


Bëngbe Bëtsa  
Cabëngaftaca  
Entsoyebuambna



New Testament in Camsá

**Bëngbe Bëtsa Cabëngaftaca Entsoyebuambna  
New Testament in Camsá**

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Camsá

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2016-05-05

## Contents

San Mateo . . . . .	1
San Marcos . . . . .	62
San Lucas . . . . .	99
San Juan . . . . .	161
Hechos . . . . .	207
Romanos . . . . .	264
1 Corintios . . . . .	296
2 Corintios . . . . .	326
Gálatas . . . . .	346
Efesios . . . . .	358
Filipenses . . . . .	369
Colosenses . . . . .	376
1 Tesalonicenses . . . . .	384
2 Tesalonicenses . . . . .	390
1 Timoteo . . . . .	394
2 Timoteo . . . . .	403
Tito . . . . .	409
Filemón . . . . .	413
Hebreos . . . . .	415
Santiago . . . . .	440
1 San Pedro . . . . .	448
2 San Pedro . . . . .	457
1 San Juan . . . . .	462
2 San Juan . . . . .	470
3 San Juan . . . . .	471
San Judas . . . . .	473
Apocalipsis . . . . .	476

## San Mateo

### *Jesusbe bêts taitanga*

*(Lc 3.23-38)*

<sup>1</sup> Quemënga imnamna Jesucristbe bêts taitanga: Jesucristna Rey David y Abrahám bentsána entšá inamna.

<sup>2-6</sup> Abraham yojamna Isaache taitá;

Isaacna Jacobëbe taitá

y Jacob, Judá y chabe catsátangbe taitá.

Judá, Fares y Zarabe taitá; y chatbe mamá Tamar yojamna;

Fares Esrombe taitá

y mua Arambe taitá.

Aram Aminadabëbe taitá;

Aminadab Naasonbe taitá

y Naasón Salmonbe taitá.

Salmón Boozbe taitá y muabe mamá Rahab yojamna;

Booz Obedbe taitá y muabe mamá Rut yojamna;

y Obedna Isaíbe taitá.

Isaí Rey Davidbe taitá;

David Salomonbe taitá y muabe mamá yojamna chë Uríasbe shema inamná.

<sup>7-11</sup> Salomón Roboambe taitá;

Roboam Abíasbe taitá

y Abíasna Asabe taitá;

Asa Josafatbe taitá;

Josafat Jorambe taitá

y Joramna Uzíasbe taitá.

Uzías Jotambe taitá,

Jotam Acazbe taitá

y Acazna Ezequíasbe taitá.

Ezequías Manasesbe taitá;

Manasés Amonbe taitá

y Amón Josíasbe taitá.

Josíasna Jeconías y chabe catsátangbe taitá yojamna.

Chë Babilonioca entšanga chë israelitënga tmojánishëche y choca imojanëtámena ora, Josías chë básenga yojánabamna.

<sup>12-16</sup> Ya Babilonioca ndutámenënga ora;

Jeconías Salatielbe taitá;

Salatiel Zorobabelbe taitá.

Zorobabel Abiudbe taitá;

Abiud Eliaquimbe taitá

y Eliaquimna Azorbe taitá.

Azor Sadoche taitá;

Sadoc Aquimbe taitá

y Aquimna Eliudbe taitá.

Eliud Eleazarbe taitá;

Eleazar Matanbe taitá

y Matán Jacobëbe taitá.

Jacob Josebe taitá yojamna y Josena Mariybe boyá.

María Jesusbe mamá, Jesús chë Bëngbe Bëtsabe Uámana Uabuayaná, chë Cristo ca uabainá.

17 Chcasna, Abrahám bentsána David bentscoñe bnétsana canta bêts pamíllanga imojéftsemna. Davíd bentsána y chë israelitënga Babilonioca imojanëtaménentscuana inye bnétsana canta bêts pamíllanga; y inye bnétsana canta bêts pamíllanga chë Israeloca entsanga imojanëtaménentsana, chë Cristo tojanonýnántscóñe.

*Jesucristo tojanonýná*  
(Lc 2.1-7)

18 Jesucristo jónýnanamna mëntsá tojanopasá: María tbojanšbuachená Joséftaca jobouamayama, pero cabá ndoñe cánýiñe ibontsiyena ora, tojanopasá Mariyna ngomaná yojoquéda chë Uámana Espíritbe obenánaca. 19 José, Mariybe boyá, canýe nyetsca soyënguiñe tšabá jamama bošá inamna. Cha ndoñe yontseboše entsangbe delante cha mal jaquédana; chíyecna tojanjuabó nye iytëcana Maríybentsána jtsojuánañana. 20 Y chca yojtsejuabnantscuana, mo otjenayoquécá canýe Bëngbe Bëtsabe ángel tbojáninýe y chana Josébioye tbojaniana: “José, Davíd bentsána entsá, ndoñe matenócochinýenana Maríaftaca jobouamayama, er chë bochantse bomna šešona chë Uámana Espíritbe obenánaca cha bochantse bomna. 21 María canýe šešona bochantse bomna y cha Jesús ca cochjuabaye. Chca echantsabaina er cha chabe entsanga chëngbe bacna soyënguentšana echanjâtsebacaye ca” —chë ángel tbojaniana.

22 Lempe chca tojanochnëngo, cachcá chaotsemnama ntšamo Bëngbe Bëtsá chabe juabna oyebuambnayëngbiajana tojanayancá. Chë oyebuambnayá mëntsá tojánayana:

23 Chë cabá boyabása nduabuatmá ngomamaná echanjoquéda

y canýe šešona boyabásetema bochantse bomna,  
y cha mochanjuabaye Emanuel ca.

(Emanuel endayana “Bëngbe Bëtsá bëngaftaca ca”.)

24 José chë otjénayentsána tojanofšená ora, tojanma ntšamo chë Bëngbe Bëtsabe ángel tbojanmandacá y Maríaftaca tojanobouamá. 25 Pero ndoñe cánýiñe ibontsaniana, sinó nye chë šešonatema tojanonýná orscana. Chë šešonatema tojanonýná orna, José chábioye Jesús ca tbojanabaye.

## 2

*Reyes Magos Jesúsbioye tmojána*

1 Herodes judiëngbe rey yojamna ora, canýe pueblo Judeoca, Belén ca uabáinentše Jesús tojanonýná. Chentsána, báseftanga, estrellënga uatsjëndayënga, magos ca uabáinënga, canýe bêts pueblöye Jerusalén ca uabáinoye tmojánashjajna. Chënga tmojánabo shinýe bocanoye luarëngocana. 2 Jerusalemocna chënga, Heródesbioye tmojána y tmojanënoticiá: “¿Ndayentše yojtsemna chë judiëngbe rey jtsemnama tojonýná cha ca? Bëngbe luarëngoca shinýe bocanoye chabe onýnana estrella fsënjinýe y as muentše cha jaboadorama tifjabo ca.”

3 Rey Herodes chca tojanuena ora, corente yojtsenócochinýena, y nyetsca chë Jerusalemëntše oyenëngnaca. 4 Chentsána chë rey tojánachembo nyetsca chë judiëngbe bachnangbe amëndayënga y chë judiëngbe ley abuátambayënga jenoyeunayëngama. Mëntsá tojanatjá: —¿Ndayentše chë Bëngbe Bëtsabe Uámana Uabuayaná, chë Cristo ca uabainá, jónýnama ibomna ca?

5 Chënga tmojanjuá: —Judeoca, Belén pueblentše ca. Bayté entsemna chë Bëngbe Bëtsabe juabna oyebuambnayá Miqueas mëntsá tojanábema:

6 Y tšëngaftanga, Judeoca Belenentše oyenënga,  
canýe mandayá tšëngaftangbentsána echanjabo.

Cha nyetsca chë Judeoca mándayëngbiana más uamaná echántsemna,  
y atšbe entsanga Israeloca echántsanýena.

Chíyecna tšëngaftangbe pueblo ndoñe nye batšá uámana pueblo quenátsmëna ca.

<sup>7</sup> Chora Herodes iytēcana chë maguënga tojánachembo y cuedádoca tojanatjá ntseco ora chë estrella tmojáninyama. <sup>8</sup> Herodes chë soyënga yojtsetátšëmbo ora, Belenoye chë maguënga tojanichamó, y mëntšá tojanëyana: “Choye motsajna y tšabá chë šešona šmochjánguango. Chašmojinýena ora, šmochjabëuenaye, as átšnaca chayobená jama chë šešona jadórama ca.”

<sup>9</sup> Rey Herodes chë soyënga tojánëyanentsana, chë maguënga tmojtsatanoñe. Chora cachiñe tmojtandinýe chë chëngbe luarëngoca tmojáninye estrella y yojtsanebnatsana chë šešona yojtsemnëntscoñe. Chentša juatsbuacá chë estrella yojójaiye. <sup>10</sup> Chë maguënga chë estrella tmojáninye orna, corente oyejuayënga imojtsemna. <sup>11</sup> Chë yebnoye tmojánamashjna ora, chë šešona tmojáninye chabe mamá Mariáftaca. Chorna, tmojanoshamentšé y chë šešonatema tmojanadorá. Chora chëngbe cajontémënga tmojanëtsécaca y tmojanatštá castellano, incienso y canýe botamana uanguëtše soye, mirra ca uabáiniye. <sup>12</sup> Chentšana, mo canýe otjenayoquécá Bëngbe Bëtsá chë maguënga tojanabuayená rey Herodesbiajana ndoñe chamondesshëcuanama. As chënga chentšana inýe benachëjana cachëngbe luarëngoye tmojésanshëcuana.

### *Egiptó luaroye tmojtsanachá*

<sup>13</sup> Chë maguënga tmojtsatanoñe ora, otjénayoca José canýe Bëngbe Bëtsabe ángelbioye tbojáninye y cha mëntšá tbojaniyana: “Motsbaná, chë šešonatema y chabe mamá mesëbiatše y Egiptoye motsachá. Herodes chë šešonatema bochanjánguango jtsóbama, chíyeca choca cochtsoquedañe atše chacbochjábuayenantscuana ca.”

<sup>14</sup> As José tojantsbaná, chë šešonatema y chabe mamá tojesanëbiatše y ibeta Egiptó benache tojéftsanbocna. <sup>15</sup> Y choca imojtsanomñe Herodes tojanóbanëntscuana. Chca tojanopasá, cachcá chaotsemnama ntšamo Bëngbe Bëtsá chabe juabna oyebuambnayanabianayana tojanayancá. Chë oyebuambnayá mëntšá tojánayana: “Egiptocana atšbe uaquiñá sënjanchembo ca.”

### *Herodes tojanmandá basetémënga jtsëbáyama*

<sup>16</sup> Chë maguënga tmojtsaningñema Herodes tojántatšëmbona ora, puerte tbojánetna, y tojanmandá lempe jtsëbáyama base boyabásetemënga uta uata bomnënga y cabá uta uata ndbomnënga, Belén y chë juachañe pueblënguentsënga. Uta uatama cha tojanjuabó, er uta uata yojtsemna chë maguënga chë estrella tmojáninyama. <sup>17</sup> Ntšamo chë Bëngbe Bëtsabe juabna oyebuambnayá Jeremías tojanoyebuambacá, cachcá tojanochnëngo:

<sup>18</sup> Ramá ca uabaina pueblentše canýe oyebuambnayana tmojanuena, ngmënaca ošachiyana y becá tsetšanánaca oyebuambnayana.

Raquel yojamna chabe básengbiama ošachiyiñe,  
pero ndoñe yontseboše chamuatebiajuama,  
chabe básenga ya obanënga causa ca —cha tojanábema.

<sup>19</sup> José cabá Egiptoca yojtsomñe ora, Herodes tojanóbana. Chentšana, otjénayoca José canýe Bëngbe Bëtsabe ángelbioye tbojáninye y cha mëntšá tbojaniyana: <sup>20</sup> “Motsbaná, chë šešonatema y chabe mamá mesëbiatše y Israeloye cochtá. Chë šešonatema jóbama bošënga ya obanënga montsemna ca.”

<sup>21</sup> As José tojantsbaná y chë šešonatema y chabe mamá Israel luaroye tojtésanëbiatše. <sup>22</sup> Arquelao Judeoca yojanmándá chabe taitá Heródesbe cuentiñe, y José chca tojántatšëmbona orna, yojtsauatja choye jama. Pero otjénayoca Bëngbe Bëtsá Josébioye tbojanbuayená; chíyeca Joseña Galilea ca uabaina luaroye tojána. <sup>23</sup> Choye tojánashjango ora, José tojána canýe pueblo Nazaret ca uabáinoye chentše joyénanama. Chca tojanochnëngo cachcá chaotsemnama ntšamo chë Bëngbe Bëtsabe juabna oyebuambnayënga tmojanayancá. Chënga tmojánayana: “Nazaretocá ca Jesús mochantšábobaina ca.”

### 3

#### *Juan chë Ubayaná entsanga yojanabuayiná (Mc 1.1-8; Lc 3.1-9, 15-17; Jn 1.19-28)*

<sup>1</sup> Chë tempo, Juan chë Ubayaná, entsanga ndoyena luaroye Judeoca tojánbocna, Bëngbe Bëtsabe soyëngama jábuayenama. <sup>2</sup> Mëntsá cha yojanëtsëtsnaye: “Bëngbe Bëtsabe amëndayana ya echanjóshjango. Ngménaca šmochtenójuaboye tšëngaftangbe bacna soyëngama y chca amana šmochtsajbaná y Bëngbe Bëtsabe benache šmochtishache ca.”

<sup>3</sup> Juan yojamna canya ndabiama chë Bëngbe Bëtsabe juabna oyebuambnayá Isaías mëntsá tojánayana:

Entsanga ndoyena luaroca canya enduáye buache:

“Bëngbe Utabná echanjabo ca;

mo nda canye benache tojtseprontacá canye uámana entsá jashjanguama,

tšëngaftángnaca cachcá, Bëngbe Utabná jabama ainaniñe tšabe juabnëngaca šmochtseprontana ca” —cha tojánayana.

<sup>4</sup> Juanbe entsáyá inauapormana camellbe stjénasheca y bobache yojanasnana. Cha inasaye chapulinatémënga y tjoca tjouangbe méloye. <sup>5</sup> Jerusalenoca entsanga, nyetsca Judea luarentša entsanga y chë Jordán ca uabaina béjaye béconana oyenënga imojánbocana Juan joyeunayama. <sup>6</sup> Bëngbe Bëtsábioye chëngbe bacna soyëngama jaimpáda chentšana, Juan chë Jordán béjayiñe chënga yojanëbáyana.

<sup>7</sup> Pero Juan tojáninye ba fariseunga y saduceunga cha chaubáyama tmojánama. Chënga imojamna chë judiëngbeñe uánatsanënga Bëngbe Bëtsá ndoñe corente ntseyeunanama; as chora tojanéyana: “¡Mëtscuaye entsanga! ¿Nda tcmënjáuyana chë echanjóshjango uabouana castigüentsana šmochjotsbocá ca? <sup>8</sup> Bëngbe Bëtsábeñe ndegombre ošbuáchiyënga šmochtsemna, as chca chaotsinýna chë bacna soyënga amana tšëngaftanga ndegombre šmojtsajbanama. <sup>9</sup> Y ndoñe šmattsejuabnaye cach tšëngaftangbiamajayanama: ‘Abrahám bentšana entsanga fsëndmëna ca’. Er atše scuayana, Bëngbe Bëtsá quem ndëtšbéngacnaca Abrahám bentšana entsanga nanjábiamana. <sup>10</sup> Chë tatsnía ya entsaprontana chë betiyeshënga tbëtëjëngocana jtseshatëtsetsama. Ndaye betiye ndoñe tontseshajo, jtseshatëtšana y iñoye jtsatmetšana. Tšëngaftangaftácnaca cachcá, tšabe soyënga ndoñe šmontsamëse, Bëngbe Bëtsá cmochanjácastigaye.

<sup>11</sup> “Ndegombre, atšna béjayeca cbondubáyana Bëngbe Bëtsabe benache chašmuatishachama. Pero chë atšbe ústonoye echanjabá, atšbiamana más obenana bomná comna, y atše merecido taitsatobuajoñe ni mo chabe shecochëtjonëshe jtsámabañama. Chë chabe benache aíñe chamojtishachëngbiamana Bëngbe Bëtsá echanjama chë echanjabábeyeca, chë Uámana Espíritu chëngbe ainaniñe cháumashënguama. Pero chë benache ndoñe chamontishachëngbiamana, Bëngbe Bëtsá echanjama chë echanjabábeyeca, corente castigánënga chamotsemnama, mo iñeshequécá. <sup>12</sup> Canye entsá chabe mëtštá cucuatšiñe jiyëbana, chabe trigo jtsóbobemana y chë ndoservena shácuanënga jtsejashtsëtsana. Chabe trigo chë grano uaquëcjnaye tsañe jtsabuájua, y chë ndoservena shácuanëngna iñoye jtsatmetšana. Cachcá, chë atšbe ústonoye echanjabana, chë tšabe entsanga echanjúbuaja, y chë bacna entsangna canye iñeshiñe echantsacastigaye, y chë iñe ndocna te queochátsfsana ca” —cha tojanéyana.

#### *Juan, Jesúsbioye tbojanabaye (Mc 1.9-11; Lc 3.21-22)*

<sup>13</sup> As Jesús, Galileocana tojána Jordán béjayoye, Juan yojtsemnoye, cha chabuábayama.

<sup>14</sup> Pero Juan ndoñe yontseboše Jesús juabáyama, y mëntsá tbojaniana: —Atše šontsemna aca chašcuabayey, y ¿más atše aca cbochjuabayey ca?

<sup>15</sup> Chora Jesús tbojanjá: —Morna chca chaotsemna. Entsemna lempe ntšamo Bëngbe Bëtsá tojamandacá jobedésana ca.



As Juan yojouena Jesús juabáyama. <sup>16</sup> Jesús ya uabainá yojtsemna ora, chë buyeshoicana tojtanshëbëbocna. Chorna Jesús tsbanánoye yojontjeshiye y tojáninye chë celoca atëfjniñe y chë Uámána Espíritu mo canye palomatemcá chábioye yojtsastjajuana. <sup>17</sup> Chora celocana Bëngbe Bëtsá mëntsá tojánayana: “Mua atšbe bonshana uaquiñá endmëna. Chabiana corente sëntsoyejuá ca.”

## 4

### *Jesús tojanobená Satanás jayëñjanama*

*(Mc 1.12-13; Lc 4.1-13)*

<sup>1</sup> Chentšana chë Uámána Espíritu entšanga ndoyena luaroye Jesús tbojanánatse, as Satanás chauábama cha jisháchichiyama.

<sup>2</sup> Chentše canta bnëtsana te y canta bnëtsana ibeta ntjascá tbojanjëtana; chíyeca chora tbojaneshëntsena. <sup>3</sup> As Satanás tbojanobobeconá y tbojaniyana: —Aca ndegombre Bëngbe Bëtsabe Uaquiñá tcomnëse, momandá quem ndëtsbenga tandëse chaobiama ca.

<sup>4</sup> Pero Jesús tbojanjuá: —Bëngbe Bëtsabe uabemana palabrënguiñe mëntsá endayana: “Entsá nye tandëseca ndoñe vida ntsebomnana, sinó entsá endobena jtsiyenana lempe ntšamo Bëngbe Bëtsá tojayancá tbojtseyeunanëse ca.”

<sup>5</sup> Chentšana Satanás, Jerusalén, chë uámána bëts pueblo ca uabáinoye Jesús tbojanánatse, y chë Bëngbe Bëtsabe bëts yebnentše chë más tsbanánoca tbojanatsá. <sup>6</sup> Chentše Satanás mëntsá tbojaniyana: —Aca ndegombre Bëngbe Bëtsabe Uaquiñá tcomnëse, muentšana fshantsoye montsënja, er Bëngbe Bëtsabe uabemana palabrënguiñe endayana:

Bëngbe Bëtsá chabe angelënga echanjichamuá, chacmotsinÿenama.

Chënga buacuatšëngaca cmochanjishache, shecuatše ndëtsbeñe ndocá chacondomama ca —cha tbojaniyana.

<sup>7</sup> Chora Jesús tbojanjuá: —Cach Bëngbe Bëtsabe uabemana palabrënguiñe mëntsá endayana: “Ndoñe matsbošana acbe Bëtsá chë Utabná bacna soyëngama jacocheñguama ca.”

<sup>8</sup> Cabana, Satanás tbojanánatse canye bëts tjoye y betscó nyetsca quem luarentša amëndayëngbenache y chentša nyetsca uámána soyënga Jesúsbiöye tbojaninÿinÿé. <sup>9</sup> As Satanás tbojaniyana: —Aca chacojoshëntsamentšé y chašcojadorase, lempe chë soyënga cbochjatštaye ca.

<sup>10</sup> Y Jesús tbojanjuá: —¡Satanás, átšbentšana mojuaná! Bëngbe Bëtsabe uabemana palabrënguiñe mëntsá endayana: “Bëngbe Bëtsá cochtsadorana y nye cha cochtseservena ca.”

<sup>11</sup> As Satanás cachcá tbojanonÿá. Cachora Bëngbe Bëtsábiocana angelotëmënga tmojánabo Jesús jtseservénama.

### *Jesús tojanontšé Galileoca chabe trabajo jamana*

*(Mc 1.14-15; Lc 4.14-15)*

<sup>12</sup> Juan chë Ubayaná cárceloye tmojanëtámiamá Jesús tojanuena ora, Galilea luaroye cha tojtaná. <sup>13</sup> Pero ndoñe tonjanoquedá Nazaret pueblentše, sinó Capernaumoca, uafjajónaye tsachañe; choye tojána joyénanama, chë uámána bëts taitata Zabulón y Neftalibe luariñe. <sup>14</sup> Chca tojanochnëngo, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Isaías tojánayana:

<sup>15</sup> Zabulón y Neftalibe luare, Jordán béjaye chenguánoica, uafjajónaye tsachañe; Galilea luariñe, ndoñe judío entšanga oyenentše.

<sup>16</sup> Chë mo ibetiñe cuaftsiyencá imojoyena entšanga, Bëngbe Bëtsabe soyënga nduabuatma causa, tmojinÿe canÿa entšangbe juabnënga binÿnayá.

Chë chëngbe juabnënga binÿnayá entsebuashinÿinÿana chë Bëngbe Bëtsábiöye nduabu-atmëngbiamá,



y chë causa chabiamana imomna mo obanëngcá, ndoñe binÿniñe jtsiyenëse ca –cha tojanábema.

<sup>17</sup> Cach orscana Jesús tojanontsé entsanga jábuayenama: “Bëngbe Bëtsabe amëndayana ya echanjóshjango. Ngménaca šmochtenójuaboye tšëngaftangbe bacna soyëngama y chca amana šmochtsajbaná ca.”

*Jesús tojánachembo canta boyabásenga beonga ashebuánayënga cha chamuastama*  
(Mc 1.16-20; Lc 5.1-11)

<sup>18</sup> Canÿe te, Jesús chë Galilea uafjajónaye tsachajana yojtsaye y ndeolpe uta boyabásata tojanÿe: canÿa yojamna Simón, chë Pedro cánaca uabainá, y chabe uabentsá Andrés. Chatna atarraiešhangá ibnetsashbuétsetšañe, er beonga ashebuánayata ibnamna. <sup>19</sup> Jesús tojanëyana: “Atšeftaca mabata; atše cbochanjábiama Bëngbe Bëtsabiamana entsanga anguayata, y morscana nÿe beonga ashebuánayata ya ndoñe quešochátsmëna ca.” <sup>20</sup> Cachora chatbe atarraiešhangá cachcá tbojésanaboshjuana y Jesús tmojanasto.

<sup>21</sup> Y más chcoye, Jesús inÿe uta catšátata tojánanÿe: Santiago y Juan, chë Zebedeobe uaquiñata. Chata ibojtsomñe canÿe barquëshañe, chatbe taitáftaca, chëngbe atarraiešhangá atapórmayñe. Jesús tojánachembo, <sup>22</sup> y cachora chë barquëshata tbojésanaboshjona, chë taitá cachentše imojéseboshjona y Jesús tmojanasto.

*Jesús ba entsanga yojanabuatambá y yojánashnaye*  
(Lc 6.17-19)

<sup>23</sup> Jesús nÿets Galilea luarëjana yojánana, chentše judiëngbe enefjuana yebnënguenache abuátambaye. Chë tšabe noticiënga Bëngbe Bëtsabe amëndayama entsanga yojanabuayiná y nÿetsca šocanëngama y tsetšanëngama yojánashnaye. <sup>24</sup> Nÿets Siria luarëjana entsanga cha imojtsebáyana. As entsanga nÿetsca šocana bomnënga Jesúsbioye imojtsënachaye: šoquënga y tsetšanana bomnënga, bacna bayëjbe juabna uambayënga, ataque osháchichanënga y jama ndobenënga. Jesús nÿetscanga yojánashnaye.

<sup>25</sup> Mallajta entsanga Galileocana, Decápolis luarocana, Jerusalenocana, Judeocana y chë Jordán béjaye chenguanoicana Jesús imojústona.

## 5

*Ndayá Jesús tjoca tojanabuatambá*

<sup>1</sup> Jesús chë mallajta entsanga tojánanÿe ora, batsjoye tojánantsjua y tojanótbema. Chabe ústonënga tmojanobobeconá y <sup>2</sup> Jesús tojanontsé mëntšá jabuátambana:

*Ndëmuanÿënga imomna chë ndegombre oyejuayana bomnënga*  
(Lc 6.20-23)

<sup>3</sup> “Puerte oyejuayënga mochántsemna chë Bëngbe Bëtsabe soyënga tša imuajaboto ca juabnayënga. Chca entsanga mochántsemna chë Bëngbe Bëtsabe amëndayoca mocht-siyenënga.

<sup>4</sup> “Puerte oyejuayënga mochántsemna chë mondbétsošachiyënga; chënga Bëngbe Bëtsá entsëjabuáchana ngménaca ndoñe chamondëtsemnama.

<sup>5</sup> “Puerte oyejuayënga mochántsemna chë uámanënga ndoñe mondbétsenobiamnayënga, er chënga mo chëngbe otocana soycá quem luare mochanjóyëngacñe.

<sup>6</sup> “Puerte oyejuayënga mochántsemna chë nÿetsca soyënguiñe tšabá jamama bošënga. Chëngbe bošana entsemna mo chë oshëntsiyá y uajuendayabe bošancá. Chë nÿetsca soyënguiñe tšabá jamama bošënga mochanjobenaye jëftsinyana lempe ntšamo tmojtse-bošcá.

<sup>7</sup> “Puerte oyejuayënga mochántsemna chë inÿëngbiama ongmiayënga, er Bëngbe Bëtsá chëngbiama bochanjóngmia.

<sup>8</sup> “Puerte oyejuayënga mochántsemna chë nÿe tšabe juabnënga ainaniñe bomnënga; chënga Bëngbe Bëtsá mochanjinÿe.

<sup>9</sup> “Puerte oyejuayënga mochántsemna chë nyetscanga natjëmbana chamotsiyenama amënga, er chënga Bëngbe Bëtsabe básenga ca mochantsabaina.

<sup>10</sup> “Puerte oyejuayënga mochántsemna chë ínÿenga tmojama chamotsesufrínënga, ntšamo Bëngbe Bëtsá yobošcá bétsamama; chca entšanga mochántsemna chë Bëngbe Bëtsabe amëndayoca mochtsiyenënga.

<sup>11</sup> “Puerte oyejuayënga tšëngaftanga šmochtsemna, entšanga chacmojoyánguango y chacmojtsëcamena ora y nyetscna soyëngaca chacmojtsëbuayatsenaye ora, atšbe ústonënga bétsemnama. <sup>12</sup> Móyejuanga, puerte móyejuanga, tšëngaftanga celoca beca šmochanjóyëngacñe. Er ntšamo entšanga tšëngaftanga cmëcamena, cachcá chë Bëngbe Bëtsabe juabna oyebuambnayëngbioye, chë tšëngaftangbe natsana monjaniyenëngbioye entšanga monjanëcamena ca” – Jesús tojánayana.

*Ošbuáchiyënga jtsemnana mo tamocá y binÿayënga quem luarentša entsangbiana  
(Mc 9.50; Lc 14.34-35)*

<sup>13</sup> “Tšëngaftanga, quem luarentša entšanga jtsëjabuáchanëse šmojtsiyena, Bëngbe Bëtsabe soyënga chamotsetatšëmbuama, as chëngbiana šmochántsemna mo chë mëntšena ndoñe chaondóndbemama tcojatboto tamocá. Pero chë tamó fténana tojtsóbemëse, ndoñe ntšopodénana tempcá sanana cachiñe jtëtsmënana. Chca, ya tondayama ntšoservénana; chíyeca chë tamó tsáshenoye jtsëtšenana y entšanga jtsebotájayana.

<sup>14</sup> “Tšëngaftanga, ntšamo tšabá yomncá šmojtsiyenëse, as quem luarentša entsangbiana šmochántsemna mo chë ibetiñe tojtsebínÿna soycá. Canÿe bëts pueblo batsjo juatsbuañe tomnëse, ndoñe ntšopodénana iytëmencá jtsemnana. <sup>15</sup> Canÿe uajuinÿanësha tcojuajuinÿena ora, ndoñe cajonëshe tajsoye jtsabuájuama, sinó tsbanánoca juajájuama, chca, nyetsca entšanga chë yebnentše tmojtsemnëngbiana chaotsebínÿnama. <sup>16</sup> Cachcá tšëngaftanga, entsangbe delante mo binÿayëngcá šmochtsemna, as chënga tšëngaftanga tšabe soyënga šmuamama chamuinÿama, y chca, chënga chamuinÿanÿé chë Taitá, Bëngbe Bëtsá celoca endmëná, corente uamaná y obená bétsemnama ca” – Jesús tojánayana.

*Chë Moisesbe leyama Jesús tojanabuatambá*

<sup>17</sup> “Ndoñe šmattsejuabnaye, ntšamo Moisesbe leyinë iuayancá y chë Bëngbe Bëtsabe juabna oyebuambnayënga tmojanayancá jabétsepochochama atše tijabo ca. Atše ndoñe chiyátabo chë soyënga jabétsepochochama, sinó jabábuayenama ndayá chë soyënga ndegombre bétsayanama. <sup>18</sup> Ndegombre šcuayana: Celoca y quem luare chaojëftsemnëntscuana, ndocná queochatobenaye ni canÿe punto, ni canÿe letra chë leyënguentšana jtsejuánana, lempe ntšamo jochnënguama yomncá chaojtsemnëntscuana. <sup>19</sup> Chíyeca, nda nÿe mo canÿe mando chë leyënguiñe ndoñe tonjoyeuná cha, masque nÿe base soye chë mando tojtsemna, y chë ínÿenga cachcá tojtsabuatambá, cha Bëngbe Bëtsabe amëndayoca chë más nduamaná echántsemna. Pero ndëmuanÿenga tmojtsama ntšamo Bëngbe Bëtsá tojamëndacá y chë ínÿenga cachcá chamotsamama tmojtsabuátambase, chënga Bëngbe Bëtsabe amëndayoca uámanënga mochántsemna. <sup>20</sup> Chë soyëngamna mëntšá šcuayana: Tšëngaftanga chë ley abuátambayënga y fariseúngbioye ndoñe šmontsayëñjanase, jt-samama ntšamo Bëngbe Bëtsá tmojamëndacá, ndocna te Bëngbe Bëtsabe amëndayoye quešmochátamashjna.

*Ndayá chë ínÿengaftaca tbojetnama Jesús tojanabuatambá*

<sup>21</sup> “Tšëngaftanga šmojouena ntšamo Bëngbe Bëtsá tšëngaftangbe bëts taitanga tojanamëndacá: ‘Ndoñe catjóba ca. Chca ochjajnayá bontsemna jobuambayana chë entsangbiana tšabá o ndoñe tšabá tmonjamama endbayanabe delante, ndáyeca chca ca.’ <sup>22</sup> Pero atše šcuayana, nda cachabe catsátaftaca tbojetna, chánaca bontsemna jobuambayana chë entsangbiana tšabá o ndoñe tšabá tmonjamama endbayanabe delante, ndáyeca chca ca. Nda cachabe catsátbioye puerte tbojtsáboyënja, cha bontsemna

chë Sanedrín ca uabaina mándayëngbe delante jobuambayana ndáyeca chca ca; y nda cachabe catšatbiamá opjema ca tojayana, ntšamo cha bétsamama, cha bontsemna chë infiernoca íñeshoye jama.

<sup>23</sup> “Chíyeca, nderado ndayá Bëngbe Bëtsabe bëts yebnoye tcojuamba Bëngbe Bëtsá jëtschuayama y chora tcojenojuabó acbe catšata ácaftaca etonaná yojtsemna ca, <sup>24</sup> as chë tcojiyëbo soye chë altarentša natsanoica cochjéseboshjona, cochtá y acbe catšátaftaca cochtenoyántsia. Chentsana cocayé altaroye cochjá y chë tcojuamba sóyeca Bëngbe Bëtsá cochjëtschuaye.

<sup>25</sup> “Nderado nda tcmojademanda y cabildoye jotsánama cmojtsemna, cabá choye ndáshjango ora, betesco cháftaca cochtenoyántsia. Chca ndóñese, chë demandayá mandádbioye cmochanjúshjango, chë mandado josticiëngbe cucuatšíñe cmochanjáboshjona y chënga cárceloye cmochanjutame. <sup>26</sup> Ndegombre cbëyana: Chentsana ndoñe quecochtëtsbocna lempe candesopagantscuana ca” —Jesús tojánayana.

### *Chë boyá o shémbioye ínÿaftaca íngñayama Jesús tojanabuatambá*

<sup>27</sup> “Tšëngaftanga šmojouena ntšamo Bëngbe Bëtsá tojanmandacá: ‘Acbe boyá o acbe shémbioye ínÿaftaca ndoñe catjaíngña.’ <sup>28</sup> Pero atše cbëyana: Nderado canÿe boyabása ndëmuanÿe shembásabioye tbojinÿe y tojajuabó ‘malaye cha ca’, chë boyabása chca tojajuabose, ainanoca ya chë inÿe shembásaftaca cachabe shémbioye tbojtseingñé.

<sup>29</sup> “Chíyeca, nderado acbe catšbioica bomínÿeca bacna soye tcojinÿe y cachca soye tcojamëse, más tšabá nántsemna chë bominÿe cochtsenobuchjatsëca y cochtsëtšena. Nÿets cuerpo jtsebmomnana y lémpca infiernoye jama chacmotsëtšenamna, acbiamá más tšabá nántsemna nÿe canÿe soye acbe cuerpentšana chacoperdé. <sup>30</sup> Nderado acbe catšbioica cucuatšëca bacna soye tcojamëse, más tšabá nántsemna chë cucuatšë cochtsenástjango y cochtsëtšena. Nÿets cuerpo jtsebmomnana y lémpca infiernoye chacmotsëtšenamna, acbiamá más tšabá nántsemna nÿe canÿe soye acbe cuerpentšana chacoperdé ca” —Jesús tojánayana.

### *Chë bouamnata enëtšanama Jesús tojanabuatambá (Mt 19.9; Mc 10.11-12; Lc 16.18)*

<sup>31</sup> “Mëntšánaca leyiñe enduábemana: ‘Ndëmuanÿe boyá chabe shémaftaca tbojtseñëtšena, chë boyá bontsemna chabe shema canÿe tsbuanácha juiiyana, ndayëchañe chaotsayana cha ya ndoñe chabe shema yontsemna ca.’ <sup>32</sup> Pero atše cbëyana: Nda chabe shémaftaca tbojtseñëtšena y chca tojopasá ndoñe chë shema ínÿaftaca tbontseingñé causa, as chë boyá jtsamana cha chabotseingñema, chë shema ínÿaftaca tojtóbouamase. Y nda chë útšena shémaftaca tojtóbouamá, chana canÿe uabuatmá jtsebmomnana, y chca, chë tsëm boyánaca canÿe bacna soye jamana ca” —Jesús tojánayana.

### *Chë entsanga júrayama Jesús tojanabuatambá*

<sup>33</sup> “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Nderado tcojayana: De Dios chë soye chanjama ca; ojal chë soye ndoñe catjama ca.’ <sup>34</sup> Pero atše cbëyana: Tondayama šmattsejúraye; ni celocama, er choca Bëngbe Bëtsabe tbemaniñe endmëna. <sup>35</sup> Ni quem luarama, er Bëngbe Bëtsabiamá mo tšenëtemcá endmëna, chiñe chabe shecuatšënga jacjayama; ni Jerusalenama, er chë pueblo endmëna Bëngbe Bëtsá chë Bëts Reybe bëts pueblo. <sup>36</sup> Ni tšëngaftangbe bestšašama cach ndoñe, er tšëngaftanga ndoñe quešmatobena ni mo canÿe stjénashe ftsenguëshe o fjantsëshe jabemana. <sup>37</sup> Tšëngaftanga aíñe ca jayanama šmojtsebošëse, nÿe aíñe ca šmochjayana, y ndoñe casna nÿe ndoñe. Ndayá chentsana más šmojatichamo soye, Satanásbiocana jtsóbocanana ca” —Jesús tojánayana.

### *Chë entsanga mondbátenachnënguama Jesús tojanabuatambá (Lc 6.29-30)*

<sup>38</sup> “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Nderado nda tcmojtsebuchjatsëca, ácnaca derecho contsebomna canyëbé cha jëtsbuchjatsëcama ca; y nderado nda canyë juatsaše tcmojtsásiye, ácnaca derecho contsebomna cányëše cha jtašiyama ca.’ <sup>39</sup> Pero atše cbëyana: Ndoñe matsbošana chë ndayánaca tcmojaborlábioye jtachnënguama; chamna, ndánaca catšbioica tcmojajuebjantšetase, cochjomiye chë ínÿoica cachcá chacmomama. <sup>40</sup> Nderado nda tcmojademanda y tojtseboše acbe shabuanguanëjua jtsabocñama, cha molesenciá acbe quëfsáyanaca chauetsácñama. <sup>41</sup> Nderado nda tcmojasmá y tcmojamanda bnëtsana cuadroca juyambama, inyë bnëtsana cuadro cochjuyamba. <sup>42</sup> Nda ndaye soye tcmojotjañëse, cochjatštaye; y nda ndaye soye tcmojuatjase, cha ndoñe stëtsoye catjaquéda ca” —Jesús tojánayana.

*Chë uayayëngbiana bonshánana jtsebomnana*  
(Lc 6.27-28, 32-36)

<sup>43</sup> “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Acbe amigo cochtsebobonshana y acbe uayayá cochtsaboyënja ca.’ <sup>44</sup> Pero atše cbëyana: Tšëngaftangbe uayayënga šmochtsababuányëshana, y chë cmëcamenëngbiana Bëngbe Bëtsá šmochtseimpadana. <sup>45</sup> Chca tšëngaftanga, chë Taitá, Bëngbe Bëtsá, chë celoca endmënabe básenga šmochántsemna; Bëngbe Bëtsá endbétsama tšabe y bacna entšángbeñe chabe shinÿe chaotsebinÿayama, y endbétsama chë nyëtsca soyënguiñe tšabá jamama bošënga y ndoñe chca entšángbeñe chauaftema. <sup>46</sup> Tšëngaftanga nÿe chë tšëngaftanga tcmojtsababuányëshanënga šmojtsababuányëshanëse, ¿Bëngbe Bëtsábíocana ndayá šmochjuacaná? Romocama crocénana entšángbioye atjanayëngnaca chca mond-uamana. <sup>47</sup> Y nÿe chë amiguëngbioye šmojtsacheuanase, ¿ndaye bëts soye šmojtsama? Chë ndoñe judiëngnaca chca mondbétsama. <sup>48</sup> Tšëngaftangbe Taitá, Bëngbe Bëtsá celoca endmëná, nyëtsca tšabe soyënga bomná y amá endmëna. Tšëngaftángnaca cachcá šmochtsemna ca” —Jesús tojánayana.

## 6

*Jesús tojanabuatambá ntšamo tšabe soyënga ínÿengbiana jamana*

<sup>1</sup> “Cuedado šmochtsebomna ndoñe ntsamama entšángbeñe tšëngaftangbe tšabe soyënga, nÿe chënga chca chamuinÿama. Chca šmojamëse, tšëngaftangbe Taitá, Bëngbe Bëtsá, celoca endmëná ndocna uacanana soye quecmochtëtatšataye.

<sup>2</sup> “Chcasna, nderado nda caridá tcojábemëse, chca ndoñe šmatjama chë ntšamo šmojtsamama nyëtscanga chamotsetatšëmbuama, mo canyë trompetëfjua cuaftsajatëtancá, chë caridá šmojábemama chaotsótatšëmbuama; chca monduamana chë bacna entšanga chë ntšamo ndegombre tmojuabnacá ndinÿinÿayënga, chë judiëngbe enefjuana yebnënguenache y tsáshenañe. Ndegombre cbëyana, chë chca amënga ya chëngbe uacanana soye tmojóyëngacñe, ntšamo chënga tmojamama entšanga tšabá chëngbiana tmojtsoyebuambná ora. <sup>3</sup> Chcasna, nda caridá tcojábema ora, ndocná más chaondëtsetatšëmbo, mo chë uañicuayoica cucuatše ndoñe queondbatstatšëmbcá ndayá chë catšbioica cucuatše tojtsamama, <sup>4</sup> chca, acbe caridá iytëcana chaotsemnana. As, tšëngaftangbe Taitá, nda bominÿe endbëtsequëcnaye chë iytëmencá tcojtsama soye, acbe uacanana soye cmochántatštaye ca” —Jesús tojánayana.

*Jesús tojanabuatambá ntšamo Bëngbe Bëtsáftaca jencuëntana*  
(Lc 11.2-4)

<sup>5</sup> “Bëngbe Bëtsáftaca šmojtsencuënta ora, ndoñe šmattsama chë bacna entšanga ntšamo ndegombre tmojuabnacá ndinÿinÿayëngcá. Chënga corente jtsogusetánana chë judiëngbe enefjuana yebnënguenache tsanana y tsashená tsëntsaca Bëngbe Bëtsáftaca jtsencuëntayana, chca, nÿe entšanga chë soye chamuinÿama. Ndegombre



šcuayana: chënga nÿe morscama ya montsábouacanána, chënga tšabá imojtsama ca entšanga tmojayana ora. <sup>6</sup> Pero aca Bëngbe Bëtsáftaca jencuéntama orna, acbe tsoye cochtamáshëngo, bësása cochtatame y cháftaca cochjencuénta. Chánaca chë iytëmentse ácaftaca echántsemna. Bëngbe Taitá lempe bominÿe endetsequëcñá, masque cánÿenga šmojtsemna ora šmojtsama soyëgnaca. As Bëngbe Bëtsá, chca cháftaca chacojtsencuénta ora, cachá acbe uacanana soye cmochántatštaye.

<sup>7</sup> “Bëngbe Bëtsáftaca šmojtsencuénta ora, ndoñe nÿe cachcá ndoservena palabrënga ba soye šmattsichamo. Chca mondbëtsama chë Bëngbe Bëtsábioye nduabuátmënga. Chënga jtsejuabnáyana becá chca tmojtsichámësna, Bëngbe Bëtsá chënga más yochjóyaunaye ca.

<sup>8</sup> Ndoñe chëngcá šmattsemna. Cabá nduyana ora, Bëngbe Bëtsá ya jtsetatšëmbuana ntšamo tšëngaftanga cmojtsëjabotcá. <sup>9</sup> Chamna tšëngaftanga mëntšá cmontsëtocana Bëngbe Bëtsáftaca jencuéntana:

Bëngbe Taitá, celoca icotsomñe.

Acbe uabaina chë más uámana uabainana chauesomñe.

<sup>10</sup> Acbe amëndayana chaóshjango.

Celoca yojtsemna ntšamo icobošcá;

quem luaríñnaca cachcá chaotsemna.

<sup>11</sup> Mënté šmiyatšatá cada te šnetsëjaboto tandëse.

<sup>12</sup> Bacna soyënga bënga fsënjama: šmotsaperdónaye;

cachcá ntšamo chë bëngbiama bacna soyënga amënga fsëndbetsaperdonaycá.

<sup>13</sup> Bacna soyënga jamama šojocochëngo ora, šcochjuabuache chca ndenobuíyama.

Nÿetsca bacna soyënguentšana šmatsebacaye.

<sup>14</sup> “Chë tšëngaftangbiama bacna soyënga amënga šmojtsaperdónasna, Bëngbe Taitá chë celoca endëtsomñá, tšëngaftanga cmochanjáperdonaye. <sup>15</sup> Pero chë tšëngaftangbiama bacna soyënga amënga ndoñe šmontsaperdónasna, Bëngbe Taitá cachcá, tšëngaftanga ndoñe quemochátaperdonaye ca” —Jesús tojánayana.

### *Chë Bëngbe Bëtsáftaca jencuéntama tondaye ntjascá*

<sup>16</sup> “Y nderado tšëngaftanga inÿe ora tondaye ntjascá šmojtsemna Bëngbe Bëtsáftaca jencuéntama, juebëngménënga ndoñe šmattsemna, ntšamo chë bacna entšanga chë ndegombre tmojuabnacá ndinÿinÿnayënga mondbetsamcá, as chca, chënga imojtsayúnama entšanga chamuinÿama. Ndegombre šcuayana, chëngbe uacanana soye ya tmojóyëngacñe, chënga tmojayunáyeca entšanga tšabá chëngbiama tmojtsoyebuambná ora. <sup>17</sup> Aca nderado tcojtsayúna ora, cochtsojuebjabebiyey y aceitíyeca botamana cochtenochquëca, <sup>18</sup> as chca, entšanga ndoñe chamondëtsetatšëmbo aca tondaye ntjascá cojtsemnama. Nÿe acbe Taitá, lempe chë mo iytëmencá yomna soyëngama tatšëmbuá, chama echántsetatšëmbo. Y cha, chë iytëmencá tcojama soye bominÿe endbetsequëcñayá, acbe uacanana soye cmochántatštaye ca” —Jesús tojánayana.

### *Chë celoca bomnana*

*(Lc 12.33-34)*

<sup>19</sup> “Bomnana quem luarentse ndoñe šmattsëjuabaye. Muentšna chë mejojón y inÿe pochócaye soyënga lempe jtsendbiamana, chë atbëbanënga jtsamashjnana y chë juabana soyënga jesatbëbana. <sup>20</sup> Más tšabá tšëngaftangbiama entsemna, mora quem luarentse tšabe soyënga šmojtsamamna, uacanana soyënga celoca chaotsójuabaye. Chentse ni chë mejojón, ni chë inÿe pochócaye soyënga acbe soyënga quemochatspochóca, ni atbëbanënga quemochátamashjna jatbëbama. <sup>21</sup> Er chë ndayentse acbe bomnana tojtsemnentša soyëngama acbe ainánaca cochántsejuabnaye ca” —Jesús tojánayana.

### *Chë cuerpama uajuinÿanësha*

*(Lc 11.34-36)*

22-23 “Acbe bominye tšabá totsomñese, mo canye uajuinyaneshacá acbe cuerpama jtsemnana, chíyeca aca jtsoybenana ntšamo tcojtsamcá chë bominyeca jtsonyayana. Chë bominye ndoñe tšabá tontsemnësna, chë bominye tondaye ntsoybenana jamana, ntšamo tcojtsamcá chacobená jinýama. Cachcá, acbe ainaniñe tšabe juabnënga tcojtse-bomnëse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontsebomnësna, lempe ntšamo chacojtsamcá ndoñe tšabá queochátsmëna. Y chca, aca cochantsiyena soyënga jtsamëse mo puerte ibetiñcá ca” —Jesús tojánayana.

*Chë Bëngbe Bëtsabiama bonshánana o chë nye quem luarentša soyënga jtsebošana*  
(Lc 16.13)

24 “Ndocná ntsoybenana uta mandayata jtsaservénana: cánýabioye bochantšaboyënja y chë ínýabioyna bochantšebobonshana, o cánýabiama tšabá echántsetrabajaye y chë ínýabiamna ndoñe tšabá. Ndoñe quecátobena Bëngbe Bëtsá jtsebobonshánana, nye quem luarentša soyënga jtsebomnana yapa tcojtsebošëse ca” —Jesús tojánayana.

*Bëngbe Bëtsá chabe básënga jtsanyënanana*  
(Lc 12.22-31)

25 “Chcasna atše šcuayana: Ndoñe šmattsenócochinýena ndayá šmochjase o šmochjofsiye vida jtsebomnana, ni ndaye entšayá šmochjuíchëtjuama cach ndoñe. Ndegombre, vida chë sanama más enduámana y cuerpo chë entšayama más. 26 Smochjanýe chë shloftšënga jtsongüefjnayana. Chënga tondaye ntjájena, ni jaja saná ntjátbanana, ni chë grano uaquëcjnaye yebnënguiñe quemnatsquëcjná; pero Bëngbe Bëtsá, celoca endmëná, chënga saná jtsatšatnayana. ¡Y tšëngaftanga chë shloftšetëmëngbiama puerte más šmonduámana! 27 Masque chca endmëna, canya masque tša tojtsenócochinýena, ¿ntšamo nanjobenaye jamana chë ntsachetšá vida yochtsebomnentšana, canye hora vida más jabotiyana?

28 “Y ndayá šmochjuíchëtjuama, ¿ndáyeca šmojtsenócochinýena? Smochjinýe chë jajañe lirio uantšëfjushangá jtsajuajnana: ndoñe ntsetrabájayana, ni ntseshabiamnayana. 29 Pero atše cbëyana, ndegombre ni mo Rey Salomón nyetsca chabe bomnánaca nyetsá botamana mo chë lirio uantšëfjushangacá quenjatspormana. 30 Bëngbe Bëtsá tša botamana shácuana tojuama, y chë shácuana mënté jajoca jtsamnana, yëfsana iñoca. Chca chë shácuana cha tojamëse, ndegombre tšëngaftangbiámna Bëngbe Bëtsá echanjama entšayá chašmotsábomnana, jentšanga nye batšá Bëngbe Bëtsábeñe ošbuáchiyënga! 31 Ndoñe šmattsenócochinýena, mëntšá jtsichámëse: ‘¿Ndayá mochjase?’ o ‘¿Ndayá mochjofsiye?’ o ‘¿Ndayá mochtichëtjo ca?’ 32 Chë soyëngama, chë Bëngbe Bëtsábioye nduabuátmënga mondbëtsenocochinýena, pero tšëngaftanga ndoñe. Tšëngaftangbe Taitá, Bëngbe Bëtsá, ndayá cmojtsëjabortama endëtatsëmbo. 33 Chíyeca, tšëngaftangna natsana šmochjshëtseboše Bëngbe Bëtsá tšëngaftangbe ainaniñe chaotsemándama y lempe ntšamo cha tojamandacá šmochtsama. Chca šmojamëse, Bëngbe Bëtsá lempe ntšamo cmojtsëjabortcá cmochanjátšataye. 34 Ndoñe matenócochinýenana ndayá yëfse yochjochnënguama. Yëfse luare cochántsebomna chë soyënga jinýama y jamama. Cada tescama endbëtsemna yapa totcá soyënga jájandmanama ca” —Jesús tojánayana.

## 7

*Ndoñe ntsichámuana chë ínýënga tšabá o ndoñe tšabá tmonjamama*  
(Lc 6.37-38, 41-42)

1 “Ndocá ínýëngbiama šmattsichamo chë ndoñe tšabá tmontsamama. Chca, Bëngbe Bëtsá ndoñe queochátichamo tšëngaftanga ndoñe tšabá šmonjama ca. 2 Chë ntšamo tšëngaftanga ínýëngbiama šmojtsichamcá tšabá o ndoñe tšabá tmontsamama, cachcá Bëngbe Bëtsá tšëngaftangbiama chë ntšamo šmojamama echántichamo. Y ntšamo

ínÿengbioye chašmojábiama, uabouana o ndoñe jabuache soyenga, cachcá Bëngbe Bëtsá tšëngaftangbioye cmochanjábiama.

<sup>3-5</sup> “Nderado canÿa chabe bominiñe canÿe niñëfja tojtsebomne, cha ndoñe ntobenanana chabe catšata jauyanama: ‘Acbe bominiñentšana canÿe polvështema jtsebuchjátsëcama šmolesenciá ca’. Natsana cha bontsemna cachabe bominiñentšana chë niñëfja jtsenobuchjátsëcana tšabá jinÿama jobenayama, chabe catšatbe bominiñentšana polvështema jtsebuchjátsëcama. Cachcá entsemna acbiama, ꞑbacna entšá chë ntšamo ndegombre tcojuabnacá ndinÿinÿayá!, chë tša bacna soye cojtsama ca acbe catšata tcojauyana ora, cach aca tša bëts bacna soyenga cojtsamama ntjenojuaboycá; y chca, aca jamana canÿe bacna soye. Natsana cmontsemna chë cach aca ndoñe tšabe soyenga cojtsamama ngménaca jshatenójuaboyana y chca amana jtsajbanana, y chentšana cocayé cochantsobena acbe catšata juajabuáchana ntšamo tšabá yomncá chaotsamama.

<sup>6</sup> “Chë Bëngbe Bëtsabe soyëngama josértama ndëboše entšanga ndoñe šmattsabuayiynaye. Aíñese nántsemna mo chë Bëngbe Bëtsabe bëts yebnoca uátšëmbona mëntšena quešënga cuaftsëbuajocá; chorna chënga jobuértanana, jobotjajuana y jtsáshantsana. O mo chë uámana ndëtsëtémënga cotšëngbioye cuaftsëtšancá, chënga nÿe jtsebotájayana ca” —Jesús tojánayana.

*Smochjotjañe, šmochjáanguango y smochjachembo  
(Lc 11.9-13; 6.31)*

<sup>7</sup> “Smochjotjañe y Bëngbe Bëtsá cmochanjátšataye; šmochjáanguango y smochanjínÿena; smochjachembo y bëšáša cmochanjébëtafjo. <sup>8</sup> Er ndánaca tojtsotjanañá, jóyëngacñana; y nda tojtsenguá cha, jónÿenana; y nda tojtsechembuanábioye jebiatëfjuana.

<sup>9</sup> “¿Ndëmuanyë boyabása tšëngaftanguentšá, canÿe tandëše chabe uaqiñá tbojtsotjanañe ora, canÿe ndëtsbé chábioye buanjatštaye? <sup>10</sup> ¿O canÿe mëtscuaye buanjatštaye, beona tbojtsotjanañe ora? <sup>11</sup> Y chca, tšëngaftanga, bacna soye amënga, tšëngaftangbe basetémënga tšabe soyenga jatšatayama šmojtsamanëše, ꞑmás tšëngaftangbe Taitá, Bëngbe Bëtsá celoca endmëná, chë tmojtsotjanañënga tšabe soyenga echanjátšataye!

<sup>12</sup> “Inÿëngaftaca šmochtsama ntšamo chë ínÿënga tšëngaftangftaca chamotsamama smojtsebošcá. Chca endmëna ntšamo Moisesbe leyiñe y chë Bëngbe Bëtsabe juabna oyebuambnayëngbe buatëmbana soyënguiñe endayancá ca” —Jesús tojánayana.

*Chë base utëntšá bëšáša  
(Lc 13.24)*

<sup>13</sup> “Chë base utëntšá bëšášajana smochjámashjna. Chë utëntšá bëšášajana y chë paselo jóyënama benache, infiernoye cmochanjuánatse y banga chëjana mondámashjuana. <sup>14</sup> Chë tšabe vida binÿnoye jamna base utëntšá bëšášajana endmëna y ndoñe paselo jóyënama benache, y chiñe báseftanga mondbínÿëna.

*Chë Bëngbe Bëtsabe ndoñe ndegombre juabna oyebuambnayënga  
(Lc 6.43-44)*

<sup>15</sup> “Cuedado smochtsebomna chë Bëngbe Bëtsabe ndoñe ndegombre juabna oyebuambnayëngbiama. Chëngna mo oveshëngcá tšëngaftangbioye mochanjabo, pero ndegombre chënga mondmëna mo tšátjaye tjañe quešëngcá. <sup>16</sup> Tšëngaftanga betiyënga jtsabuatmana ntšamo cada ona tojtseshajcá; cachcá tšëngaftanga chcanga smochantsëbuatma, ndayá chënga mochtsamama. Uchmašëshe betiyentšana ndoñe uvas ntjuátatabiana, ni higuëbé cardo betiyentšana. <sup>17</sup> Chca, nÿetsca tšabe betiyiñe tšabe soye jashájonana; y chë ndoñe tšabeshiñna podesca soye. <sup>18</sup> Canÿe tšabe betiyiñe quenátopodena podesca soyënga jashájonana, ni canÿe ndoñe tšabe betiyiñe tšabe soyënga jashájonana. <sup>19</sup> Ndaye betiye podesca shajuanëshe jtseshatëtšana y iñoye jtsatmetšana. <sup>20</sup> As chca tšëngaftanga chënga smochantsëbuatma, ndayá chënga mochtsamama ca” —Jesús tojánayana.



*Bëngbe Bëtsabe amëndayoye ndoñe nyetscanga jamashjnana*  
(Lc 13.25-27)

<sup>21</sup> “Ndoñe nyetscanga chë ‘¡Utabná! ¡Utabná ca!’ atše šmojtsatsëtsnanga, Bëngbe Bëtsabe amëndayoye quemochátamashjna. Nýe ntšamo atšbe Taitá, celoca endmëná, tojtsebošcá amëngna aíñe. <sup>22</sup> Quem luare jopochócama te banga atše šmochanjauyana: ‘¡Bëngbe Utabná! ¡Bëngbe Utabná! Aca jótšëmbonëse, ácebeñe betsošbuáchema, bënga fsëndoyebuambná, y ácbeyeca bacna bayëjëngbe juabna entšángbentsana fsëndëtabocana, y ácbeyeca bëts soyënga fsëndama ca.’ <sup>23</sup> Chora atše chanjójuaye: ‘Ndocna te checbaisëbuátmana. Atšbentsana mojuánanga, bacna soye ama entšanga ca’ ” —Jesús tojánayana.

*Chë uta ucuatjoniñe*  
(Mc 1.22; Lc 6.47-49)

<sup>24</sup> “Chcasna, nda atše šojoyeuná y chë ntšamo sentsichamcá tojtsama, endmëna mo canýe tšabá juabnaye boyabasacá. Chë boyabásana ndëtsbeñe chabe yebna yojajebo. <sup>25</sup> Uaftena yojuáshjango, chë béjayënga yojóftjajna, chë yebnoye puerte yojtsebinýiaye, pero chë yebna ndoñe ntjuáshajayana, chë yebna ndëtsbeñe inajéboyeca. <sup>26</sup> Pero nda atšbe palabra tojouena y ntšamo sentsichamcá ndoñe tontsama, endmëna mo canýe ndëjuabnaye boyabasacá. Chë boyabásana chabe yebna cascajuiñe yojajebo. <sup>27</sup> Uaftena yojuáshjango, chë béjayënga yojóftjajna, chë yebnoye puerte yojtsebinýiaye y chë yebna uabouancá yojtsáshajaye ca” —Jesús tojánayana.

<sup>28</sup> Jesús chë soyënga jóyebuambayama tojanpochocá ora, chë entšanga ojnanánënga imojtsemna ntšamo cha tojánabuatambama. <sup>29</sup> Jesús tojanabuatambá nyets obenánaca, mo canýa mando bomnacá y ndoñe nýe mo chë ley abuatambayëngcá.

## 8

*Jesús, canýa bacna nguayanánaca šocábioye tbojanshná*  
(Mc 1.40-45; Lc 5.12-16)

<sup>1</sup> Jesús tjoicana tojtantsmá ora, ba entšanga tmojanasto. <sup>2</sup> Chora canýe boyabása bacna nguayanánaca šocá Jesúsbioye tojanobeconá, chabe delante yojoshamentšiyey y tbojaniyana: —Utabná, aca tcojtsebošëse, catjobenaye atšbe šocana jtsebojuánana ca.

<sup>3</sup> As Jesús tojanacuenýanëjaná, chë boyabásabioye tbojánbojajo y tbojaniyana: —Aíñe, sëntseboše. Socana cbotsebojuaná ca.

Y cachora chabe šocana tbojtsanóbojuanañe. <sup>4</sup> Jesús chë shnanábioye tbojaniyana: —Mouena, ndocnábeñe cattsecuëntaye; nýe chë Jerusalenoca báchnëbioye motsa, y cha cochjinýinýiye mora aca ya tšabá cojtsatsmënama. Bayá cochtsambaye, Bëngbe Bëtsá chama jëtschuayama, ntšamo Moisés tojëftsanmandacá, as chca nyetscanga chamotatsëmbona mora aca ya ndoñe šocá contsemnana ca —Jesús tbojaniyana.

*Jesús canýe Romano soldadëngbe amëndayabe bochichnayábioye tbojanshná*  
(Lc 7.1-10)

<sup>5</sup> Jesús Capernaumoye tojánamashëngo ora, canýe Romano soldadëngbe amëndayá Jesúsbioye tojanobeconá canýe pavorama jaimpádama. <sup>6</sup> Jesúsbioye tbojaniyana: —Utabná, atšbe bochichnayá yebnoca šocá entsemna, jama ndoñe quenátobena y jabuache tsetšanánaca entsobësná ca.

<sup>7</sup> Chora Jesús tbojanjuá: —Cha jáshnama chanjá ca.

<sup>8</sup> As chë soldadëngbe amëndayá tbojaniyana: —Señor, atše mercedo taitatobuajoñe atšbe yebnentšë chacuamashënguama; nýe mayana y atšbe bochichnayá tšabá echántsmëna. <sup>9</sup> Atšbioye mándayënga atše sëndábamna y átšnaca soldadëngbe amëndayá sëndmëna. Atše canýe soldado stjauyana “motsa ca”, cha cachora jana; y inýa stjauyana

“mabo ca”, cha cachora jabana; y nderado atšbe bochichnayá ndayánaca chaomama stjamánda, chánaca cachora chë soye jamana ca —cha tojánayana.

<sup>10</sup> Jesús chca tojanuena ora, tojanenjaná y chë ústonënga tojanëyana: —Ndegombre cbëyana, ni mo nyets Israelentse ni canya quem boyabasacá Bëngbe Bëtsábeñe nyetsá ošbuachiyá chiyátinyena. <sup>11</sup> Y šcuayana, shinje bocanoicana y shinje uenatjëmbambanoicana bëtscá entsanga mochanjabo, y Abraham, Isaac y Jacob, chë judiëngbe tempsca uámana bëts taitángaftaca mochanjotbiana Bëngbe Bëtsabe amëndayoca, cányiñe juasama. <sup>12</sup> Ba Israeloca entsanga, chë ndëmuanyëngbiama Bëngbe Bëtsabe amëndayana natsana yochtsanmëna, chocana mochantëbuacana chë ndëbinýna luaroye, infernoye. Chentše puerte mochanjenóbošachna y chë tsetšanama juatsašënga mochantse noftëšjojnaye ca —Jesús tojánayana.

<sup>13</sup> Chora Jesús chë soldadëngbe amëndayábioye tbojaniyana: —Acbe yebnoye motsatá y chë ntšamo cojtsošbuachecá cachcá chaotsemna ca.

Cachora chë bochichnayá tšabá yojsatsmëna.

*Jesús, Pédrëbe uambén mamábioye tbojanshná*

*(Mc 1.29-31; Lc 4.38-39)*

<sup>14</sup> Chentšana Jesús, Pédrëbe yebnoye tojána. Chentše Pédrëbe uambén mamá šocá calentóracca yojtsejutsnajona. <sup>15</sup> Chora Jesús chë uambén mamabe cucuatše tojánbojajo y cachora chë calentora tbojtsanóbojuanañe. Chorna chë uambén mamá tojtantsbaná y tojanontšé chënga jobuácuedana.

*Jesús ba šoquënga tojanashná*

*(Mc 1.32-34; Lc 4.40-41)*

<sup>16</sup> Chë te jaibétatama ora, Jesús yojtsemnoye banga bacna bayëjëngbe juabna uambaye entsanga tmojanënatse. Chora, nye canye Jesús jóyebuambayëse chë bacna bayëjënga imojtsaisebocana y nyetsca šoquënga tojanashná. <sup>17</sup> Chca Jesús tojanma, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Cha mëntšá tojánayana: “Cha bëngbe šocanënga tonjaftsanca y bëngbe nyetsca tsetšanana chábeñe tonjanoquedá ca.”

*Chë Jesús juastama bošënga*

*(Lc 9.57-62)*

<sup>18</sup> Jesús tojánanyë mallajta entsanga chabe shëconana; as tojanmandá uafjajónaye chenguana jama. <sup>19</sup> Chorna, canye ley abuatambayá Jesúsbioye tbojanobobeconá y tbojaniyana: —Buatëmbayá, atše sëntseboše aca juastama, ndëmoye chacojtsá choye ca.

<sup>20</sup> As Jesús tbojaniyana: —Chë zorrënga mondbomna cuevëshënga ndayentše jtsiyenama y chë shloftšëngna uajajonëshangá, pero chë Bëngbe Bëtsá Entšá tbojanbemá ndoñe quenátsbomna ndayentše jóchnama ca.

<sup>21</sup> Chora inya, cach uatsjendayënguentsá, Jesúsbioye tbojaniyana: —Bëngbe Utabná, šmoleenciá atšbe taitá chjshesabotbontsañe ca.

<sup>22</sup> Chora Jesús tbojanjuá: —Nye šmasto. Chë Bëngbe Bëtsabiama mo obanëngcá, ntšamo Bëngbe Bëtsá yomandacá ndoñe tmontsama causa, chënga cachëngbe obanënga chamotsëtebuantsañe ca.

*Jesús chë binýia y chë béjaye bonguana yojëtsbema*

*(Mc 4.35-41; Lc 8.22-25)*

<sup>23</sup> Chentšana Jesús canye barquëshoye tojánamashëngo y chabe uatsjëndayënga imojtsetjëmbambnaye. <sup>24</sup> Ndeolpe tša jabuache binýia chë uafjajónaye béjayiñe yojóshjango; nyetsá jabuachana yojtsemna, chë olëshënga barquësho imojtsëtsbotsana. Y Jesús chora inétsomañe. <sup>25</sup> As chabe uatsjëndayënga tmojána Jesús jetsefšenama y tmojaniyana: —jBëngbe Utabná, šmatsebacá. Montsenatjëmbambana ca!

<sup>26</sup> Chora Jesús tojanéyana: —¿Ndáyeca tša šmojtsauatja? ¿Tša batšatema šmojtsošbuaché, Bëngbe Bëtsá tšëngaftanga jujuabuáchama yobenama ca?

Chca tojanéyana y tojantsbaná. Chora tojanmandá chë binÿia y chë búyeshe bonguana chaotsatsmënema, y lempe natjëmbana yojtsatsmëna. <sup>27</sup> Chabe uatsjëndayënga ojanánënga imojtsemna y mëntšá imojtsichamo: “¿Nda quem boyabása yomna? Cha tonjayana y chë binÿia y chë búyeshe tmonjoyeuná ca.”

*Chë Gadara luaroca entsata, bacna bayëjbe juabna uambayata  
(Mc 5.1-20; Lc 8.26-39)*

<sup>28</sup> Jesús uafjajónaye chenguana tojánashjango, canÿe luare Gadara ca uabáinentše. Chorna chë utabuantsánëngbentsana útata, bayëjbe juabna uambayata, tbojánbocna y Jesúsbioye tbojanobobéconata. Puerte tšatjayata ibnamna, chíyeca entsanga ndoñe ntsobenana chëjana jtsachnëjuanana; <sup>29</sup> y chora tbojanontsé chë bacna bayëjëngbeyeca mëntšá uayebuáchana: —¿Ndayá bëngaftaca cojtseboše, Jesús, Bëngbe Bëtsabe Uaquiñá? ¿Moye tcojabo bënga chafsufrema, chama cabá ndoñe chë tempo yontsemna ora ca?

<sup>30</sup> Chentša béconana ba cotšënga imnajena y chënga innétsosañe. <sup>31</sup> Y chë bayëjënga Jesús tmojanimpadá: —Muentšana jésebocanama aca tcojamëse, cochjama bënga chë cotšëngbeñe fchayamashjnama ca.

<sup>32</sup> Y Jesús tojanéyana: —Motsajna ca.

Chora chë bayëjënga chë boyabásatbentsana tmojésanbocana y chë cotšëngbeñe tmojánamashjna; cachora chë cotšënga batsjocana penëšëjana uafjajónayoye imojtsoshuetše y yojtsatajo.

<sup>33</sup> Chora chë cotšënga anÿenënga tmojtsanacheta, y chë pueblöye tmojánashjajna ora, tmojanontsé lempe ntšamo yojochnëngcá jacuéntana y ntšamo chë bayëjbe juabna uambayátaftaca tojanopasámnaca. <sup>34</sup> Chora nÿetsca entsanga chë pueblentšana tmojánbocana y Jesús yojtsemnoye tmojána. Chë entsanga Jesús tmojáninÿe ora, tmojanimpadá chë luarentšana chauesebocnama.

## 9

*Jesús, canÿe jama ndobenábioye tbojanshná  
(Mc 2.1-12; Lc 5.17-26)*

<sup>1</sup> Chca tojanopasá chentšana, Jesús canÿe barquëshoye tojánamashëngo, uafjajónaye chenguana tojána y cachabe pueblöye Capernaumoye tojtashjango. <sup>2</sup> Chora, canÿe jama ndobená, tjuashiñe jjoná, Jesús yojtsemnoye básefta boyabásenga tmojanamba. Jesús tojáninÿe chënga tša imojtsošbuáchema chë šocábioye jáshnama cha bétsobenama; as chë šocábioye tbojanijana: “Sobreno, añemo matsca; acbe bacna soyënga tcbontsebopardoná ca.”

<sup>3</sup> Chca causa, báseftanga ley abuátambayënga chentše imojtsemnënga imojtsejuabnaye: “Chca jayanëse, ndoñe tšabá quenátichamo Bëngbe Bëtsabiamá; mo chábioye cuafoyen-guangcá entsemna ca.” <sup>4</sup> Pero Jesús yojtsetátšëmbo ntšamo chënga imojtsejuabnaycá; chíyeca tojanéyana: “¿Ndáyeca nÿetšá bacna juabnënga ainaniñe šmojtsebmna ca? <sup>5</sup> ¿Tšëngaftangbiamá ndayá más paselo nántsemna tšëngaftangbe delante jayanama: ‘Acbe bacna soyënga tcbontsebopardoná’ o ‘Matëtsbaná y motsa ca’? <sup>6</sup> Atše cbochanjinÿanÿiye ntšamo chë Bëngbe Bëtsá Entšá tbojanbemá quem luarentše mando yobomnama, entsanga bacna soyëngama jáperdonama ca” —Jesús tojanéyana.

As chë jama ndobenábioye tbojanijana: “Matëtsbaná, acbe tjuashe mesocñe y acbe yebnoye motsatoñe ca.”

<sup>7</sup> Chorna chë jama ndobená tojtantsbaná y cachabe yebnoye yojtsatoñe. <sup>8</sup> Chca tmojáninÿama chë entsanga auatjanánënga imojtsemna y Bëngbe Bëtsá imojtsatschuanaye, cha chca obenana entsanga tojánatsatama.

*Jesús, Matéobioye tbojanchembo chabuastama*  
(Mc 2.13-17; Lc 5.27-32)

<sup>9</sup> Jesús chentšana tojtsanoñe y canye entsábioye tbojáninye, Mateo ca uabainá, chë Romocama impuesto entsángbioye atjanayentse inétsotbemañe. Chora Jesús tbojaniana: “Smasto ca.” As Mateo chentšana tojëftsantsbaná y tbojanasto.

<sup>10</sup> Jesús cach Mateobe yebnentse yojtsesaye ora, banga Romocama impuesto entsángbioye atjanayenga y ínýenga bacna soye amenga tmojánashjajna y mesëshentse Jesús y chabe uatsjéndayëngaftaca imojotbiamá. <sup>11</sup> Chë fariseunga chca tmojáninye ora, Jesusbe uatsjéndayëngbioye tmojanatjá: —¿Ntsamo chca yojtsemna, tsëngaftangbe uatëmbayá chë impuesto atjanayenga y bacna soye amëngaftaca entsesá ca?

<sup>12</sup> Jesús chca tojanuena y chë fariseunga tojanéyana: —Chë salud bomnënga ashnayá ndoñe ntsëjabótana, pero chë shoquënga aíñe. <sup>13</sup> Smochjá y ntsamo ndegombre iuayancá smochjuatsjinýe quem Bëngbe Bëtsabe uabemana palabrënguiñe: Atse sëntseboşe tsëngaftanga lastemadënga chašmotsemna, y ndoñe nýe bayënga chašmotsëbánaye Bëngbe Bëtsá jëtschuayama ca. Atse ndoñe chiyátabo chë Bëngbe Bëtsabe bominyiñe tsábá amënga jabáchembuama, sinó chë bacna soye amënga imomna ca juabnayënga jabáchembuama ca —Jesús tojánayana.

*Jesús tmojantjá chë Bëngbe Bëtsáftaca jencuéntama tondaye saytescama*  
(Mc 2.18-22; Lc 5.33-39)

<sup>14</sup> Chentšana, Juan chë Ubayanabe ústonënga tmojanobeconá y Jesús tmojantjá: —Bënga y chë fariseunga fsënduamana ba soye tondaye ntjascá jtsemnana, Bëngbe Bëtsáftaca jencuéntama. ¿Ndáyeca acbe uatsjéndayënga ndoñe chca ca?

<sup>15</sup> As Jesús tojanéjua: —Chë casamentoye ofjanënga chë boyabása bouamná chëngaftaca tojtsemnëntscuana, chëngbioye saná ndoñe ntsabuáshebenana y ngménaca ndoñe ntsemnëngana. Pero ora echanjobuache y chë boyabása bouamná chentšana mochantsánatseñe; chora cocayé chë ofjanënga tondaye más jasama quemochátsbomna. Ntsamo chë tojobouamá cha y chë ofjanëngaftaca endmëncá, cachcá endmëna atse y atšbe uatsjendayëngaftacnaca.

<sup>16</sup> “Ndocná canye uatanguá entsáyá base tsëm entsëjuaca jtarmëndana. Er chë tsëm entsëjua jtsabéconana y chë uatanguá entsáyá más jtsatanëcanana, y chca chë uátanëcniñe más bëtsiñe jtsabemana. <sup>17</sup> Y cach ndoñe chë tojtseshayana vínoye tanguá jasabenguiñe ntjataftsuaamayana. Tcojuafsuamasna, chë jasabenga jtseshëbëfjuana y chë vínoye jtsabuáshanana, y chë vínoye y chë jasabenga tondayama ntjatoservëna. Chíyeca comna, chë tojtseshayana vínoyna tsëm jasabenguiñe juaftsuaamana; y chca, chë jasabenga y chë vínoye jtsoservëna ca” —Jesús tojánayana.

*Jesús canye shembásabioye tbojanshná y tojanma Jairëbe bembetema cháuatayenama*  
(Mc 5.21-43; Lc 8.40-56)

<sup>18</sup> Jesús entsanga yojtsëtsësnantscuana, chë judiëngbe enefjuana yebnentša canye mandayá tojánashjango y Jesusbe shecuatšentse yojoshamentšiye. Chë mandayá tbojaniana: “Atšbe bembe tontsóbana. Diosmanda atšbe yebnoye mabo; cochjabojajo y cha echántayena ca.”

<sup>19</sup> Chentšana Jesús y chabe uatsjéndayënga chë mandayá tmojanasto. <sup>20-21</sup> Imojtsaye ora, canye shembása stëtsoicana Jesúsbioye yojobeconá. Bnétsana uta uatama oboft-jajuanánaca cha inapadecena. Chë šocá Jesúsbioye yojobeconá ora, yojtsejuabnaye: “Masque nýe mo chabe entsáyá sibiájua chajjuábojajo, salud chantinyëna ca.” Chentšana chë šocá Jesusbe entsáyá tojanábojajo.

<sup>22</sup> Tojanábojajo ora, Jesús tojanobuértana, chë shembásabioye tbojáninye y tbojaniana: “Añemo matsca, shembása. Bëngbe Bëtsábeñe icošbuachéyeca, mora tsábá contsatsmëna ca.” Y cach orscana cha tsábá yojtsatsmëna.



<sup>23</sup> Chënga tmojtëtanontsé ayana y chora chë mandayábioca chënga tmojánashjajna. Chentše Jesús tojánanyë, ínÿengna chë veloriana imojtsanflautaye y ínÿengna tša imojtsošachiye. <sup>24</sup> Chora Jesús tojanéyana: “Muentšana mobocnënga. Chë shembásetema cabá ndoñe obaná quenátsmëna; nÿe endëtsomañe ca.”

Pero chë entšanga Jesúsbioye nÿe imojtsáfchaye. <sup>25</sup> Pero Jesús pronto chënga chë yebnentsana tojanëbuacna. Chora Jesús tojánamashëngo chë shembásetema yojtsemnoye; cucuatše tbojanábuacueshache y cachora chë shembásetema tojtantsbaná. <sup>26</sup> Y nÿets chë luarëjana ndayá Jesús yojamama nÿetsca entšanga imojátatsëmbona.

### *Jesús uta jtanata tojanashná*

<sup>27</sup> Jesús chentšana tojëftsanbocna ora, uta jtanata tbojanasto y mëntsá ibojtsaiuáyebuache: —¡Davídbentšana Entšá, bëndata šmotsalastemá ca!

<sup>28</sup> Jesús chë yebnoye tojánamashëngo ora, chë jtanata tbojanóbobeconata. As Jesús tojanatjá: —¿Tsëndata šojtsošbuaché atše chca jamama chjobenaye ca?

Y tmojanjuá: —Arseñor. Aíñe ca.

<sup>29</sup> Chora Jesús tojánabuchbojajo y tojanéyana: —Ntšamo tsëndatbe ošbuáchiyana yomncá, cachcá chaotsemna ca.

<sup>30</sup> Y cachora jinÿama ibojtsobena. Jesús bëtská chata mëntsá tojanamëndá: —Ndocná más quem soye chaondëtsetatsëmbo ca.

<sup>31</sup> Pero chata chentšana tbojëftsanbocna y cachora tbojanontsé ndayá Jesús chátaftaca tojanmama nÿets chë luarëjana jacúntana.

### *Jesús, canÿe ndëbiábioye tbojanshná*

<sup>32</sup> Chë jtanata ibojtsebocanëntscuana, básefta entšanga canÿe ndëbiá, bacna bayëjbe juabna uambayá, Jesúsbioye tmojanamba. <sup>33</sup> Jesús chë bacna bayëja chábentšana tbojtánabocna y cachora chë ndëbiá tojtanontsé oyebuambnayana. Entšanga ojnanánënga imojtsichamo: “¡Ndocna te Israelentše chca bëts soye chemuáisinÿe ca!”

<sup>34</sup> Pero chë fariseunga imojtsichamo: “Cach bacna bayëjngbe amëndayá, Satanás, muábioye obenana tbojatštá chë bayëjnga entšángbentšana jtëbuacanama ca.”

### *Jesús entsangbiama tbojanongmé*

<sup>35</sup> Jesús nÿetsca pueblënguëjana y luarënguëjana yojtsachnëjuana y chë judiëngbe enëfjuana yebnënguenache entšanga yojtsabuátambaye. Yojanabuayiyná chë tšabe noticiënga Bëngbe Bëtsabe amëndayama, y nÿetsca šocanëngama y tsetšanama yojánashnaye.

<sup>36</sup> Y chë entšanga tojánanyë ora, puerte tbojanongmé. Er chënga imojtsemna mo abujajëñya ndbomna oveshëngcá, puerte uamëntsnayënga ba soyëngama padecena causa, y chaujabuachama ndocná ntsebomncá. <sup>37</sup> Chora chabe uatsjëndayënga tojanéyana: “Canÿe bëts jajañe bëtská játbanama entsemna, pero peonga nÿe báseftanga. Cachcá quem luarentše, bëtská entšanga Bëngbe Bëtsábioye nduabuátmënga montsemna, y chëngbioye chabiama abuayiynayënga nÿe báseftanga. <sup>38</sup> Peonga tmojtsashbenëse chë nduíñbioye jaimpádana ba peonga chauichamoma chë jaja saná játbanama. Cachcá, Bëngbe Bëtsábioye moimpadanga ba abuayiynayënga chauichamoma, quem entšanga chábioye chamúbuajama ca” —Jesús tojanéyana.

## 10

### *Jesús chë bnëtsana uta uatsjëndayënga tojanabacacá (Mc 3.13-19; Lc 6.12-16)*

<sup>1</sup> Chentšana Jesús tojánachembo chabe bnëtsana uta uatsjëndayënga, y obenana tojanatšatá bacna bayëjngbe juabna entšángbentšana jtabocnama y nÿetsca šocanëngama y tsetšanama jashnayama.

<sup>2</sup> Chë bnëtsana uta uatsjëndayënga mëntsá imojanabaina: chë natsaná Simón, Pedro cánaca uabainá y chabe uabentsá Andrés; Santiago y chabe uabentsá Juan, Zebedeobe

uaquiñata; <sup>3</sup> Felipe y Bartolomé; Tomás y Mateo, chë Romocama impuesto entšángbioye atjanayá; Santiago, Alfeobe uaquiñá y Tadeo; <sup>4</sup> Simón, chë celote ca uabobainá y Judas Iscariote, chë uayayëngbe cucuatšifne Jesúsbioye boshjuaná.

*Jesús, chabe bnëtsana uta uatsjédayënga tojanichamó, Bëngbe Bëtsabe amëndayama jábuayenama*

*(Mc 6.7-13; Lc 9.1-6)*

<sup>5</sup> Jesús chë bnëtsana uta boyabásenga tojanichamó chë tšabe noticiënga entšanga jabuátambama, y mëntsá tojanabuayená: “Chë ndoñe judiëngbeñe ndoñe šmattsana y ndaye pueblentše Samaria luaroca ndoñe šmatjéftsamashjna. <sup>6</sup> Nye Israeloca pueblëngoye šmochjá. Choca entšanga mo ótsena oveshëngcá montsemna, Bëngbe Bëtsábioye corente nduabuatma causa. <sup>7</sup> Smochjá y entšanga šmochjábuayenaye Bëngbe Bëtsabe amëndayana echanjóshjanguama. <sup>8</sup> Chë šoquënga šmochjášnaye, šmochjama chë obanënga chámuatayenama, bacna nguayanánaca šoquënga šmochjášnaye y bacna bayëjëngbe juabna entšángbentsana šmochtábocna. Chë obenana šmonjójyëngacñe tondaye ntjëtšajacuá; cachcá, chë soyënga šmojtšamama tondaye entšanga šmattsayëngacaye.

<sup>9</sup> “Ndoñe šmattsambaye crocénana uasnanëchiñe. <sup>10</sup> Ni shecnaja sanaca benachiñama, ni inye entšayá jtsenomódama, ni shecohëtjonëshënga, ni jatjonëfja, er chë tšabe trabajayá jtsomerecénana ntšamo tbojtsajabotcá jójyëngacñama.

<sup>11</sup> “Nderado canye bëts pueblentše o base pueblentše chašmojášhjajna ora, šmochjáanguango canye tšabe entšá, ínëngbioye ndaingñayá, y chabe yebnentše šmochtsoquedañe, inye puebloye játantscuana. <sup>12</sup> Canye yebnoye chašmojámashjna ora, nyetsca chentša oyenënga mëntsá šmochjácheuaye: ‘Chë bëngbe ainaniñe tšabe ebionana tšëngaftangbe ainaniñe chaotsemna ca.’ <sup>13</sup> Chë yebnentša entšanga ainaniñe tšabe ebionana jtsebmomna merecido tmojtsebuajonëse, chë tšëngaftangbe ainaniñe tšabe ebionana chëngaftaca chaotsemna. Ndoñesna, nye cach tšëngaftangftaca chaotsomñe. <sup>14</sup> Y nderado canye pueblentše o bëts pueblentše chë entšanga ndoñe tcmónjúbuaia y ndoñe tcmónjóyaunase, chentšana šmochjésebocana y chë shecuatšentša polvëshe šmochjésentstoto. Chca, chë entšanga mochántsetatsëmbo chënga tšëngaftangftaca ndoñe tšabá tmonjamama. <sup>15</sup> Ndegombre šcuayana, quem luare jopochócama te, chë ndoñe chacmonjúbuaia y ndoñe chacmonjoyauná entšanga Bëngbe Bëtsá puerte jabuache echantsacastígaye, y chë bacna entšanga Sodoma y Gomorra luaroquëngna ndoñe nya nyëtšá jabuache queochatacastígaye ca” –Jesús tojánayana.

*Ntšamo chë uatsjédayënga mochjansúfria*

<sup>16</sup> “Smochjouena. Atše cbontsachamná mo oveshënga cuenta tjañe quešëngbeñe. Chíyeca studio bomnënga mo mëtscuayëngcá šmochtsemna y uamanënga mo palomatemëngcá. <sup>17</sup> Entšangbiamá cuedado šmochtsebmomna, chëngbe pueblentša amëndayëngbe cucuatšifne tšëngaftanga cmochanjábashejuana y chëngbe enefjuana yebnënguenache cmochanjátsetšenaye. <sup>18</sup> Atšbe ústonënga bëtsemnama, mandadëngbioye y reyëngbioye cmochanjunatse. Y chca, tšëngaftanga šmochanjobenaye chëngbeñe y chë ndoñe judiëngbeñe ntšamo atšbiamá šmotatsëmbcá jójyëbuambayama. <sup>19</sup> Pero chë mandadëngbe cucuatšifne chacmojábashejuana ora, ntšamo o ndayá šmochjayanama ndoñe šmattsenócochinëna. Chca orna, Bëngbe Bëtsá tšëngaftanga cmochanjabuayená ntšamo o ndayá jójyëbuambayama. <sup>20</sup> Tšëngaftanga ndoñe chë oyëbuambayënga quešmochátsmëna, sinó chë tšëngaftangbe Taitá, Bëngbe Bëtsabe Espíritu, tšëngaftangbiajana echantsóyëbuambnaye.

<sup>21</sup> “Y canye entšá cachabe catsátbioye uayayëngbe cucuatšifne bochanjáboshjona chamotsóbama; y canye taitá cachabe uaquiñábioynaca. Y chë básenga chëngbe bëtsëtsangbe contra mochántsemna y uayayëngbe cucuatšifne mochanjábashejuana

chamotsébáyama. <sup>22</sup> Tšëngaftanga atšbe ústonënga bétsemnama, nyetsca entšanga cmochantsëbuayënja; pero nda nyets tempo atšbeñe ošbuachiyá chaotsomñá, atsboaná echántsemna. <sup>23</sup> Canye pueblentse chacmojtsécamena ora, inye puebloye šmochtsacheta. Ndegombre cbëyana, Israelentša nyetsca pueblëngoye cabá nda ora, chë Bëngbe Bëtsá Entšá tbojanbemá ya quem luaroye echanjabáshjango.

<sup>24</sup> “Ni canye uatsjendayá chabe buatëmbayabiana más uamaná ntsemnana, ni chë oservená chabe nduiñbiama más uamaná. <sup>25</sup> Chë uatsjendayá ya cachabe buatëmbayacá jtsemnama tojashjáchése, ndayá más nanjatsboše. Cachcá endmëna chë oservenáftaca, cachabe nduiñcá tojtsemnëse. Atše sëndmëna mo canye yebnentša taitacá y tšëngaftangna mo cach yebnentša basengcá. Entšanga jtsichámuana atšna Beelzebú o chë bacna bayëjëngbe amëndayá tsmëna ca. ¿Ntsámo chënga tšëngaftanga cmochtsëbobuatma ca?” — Jesús tojanëyana.

### *Nda ndegombre cuantsebiauatja*

*(Lc 12.2-7)*

<sup>26</sup> “Chíyeca entšangbiama ndoñe matauatjëngana. Chë yoiytëmena soyentsana ton-daye ntjinýcá queochaisoquéda, y chë ndótatšëmbo soye, ntsoatšëmbcá queochaisoquéda. <sup>27</sup> Chë mora cbontsëtsësná soyënga, chë entšangbiama mo ibetiñe cuaftsemncá soyënga, tšëngaftanga šmochjama entšanga botamana chama chamotsetatšëmbuama. Y chë iytëcana cbontsëtsësná soyënga nyetsca entšanga šmochtsabuayiynaye, mo nda canye yebnentša tsbanánocana noticiënga tojtsayebuachcá. <sup>28</sup> Ndoñe matauatjëngana nýe chë tšëngaftangbe cuerpo japochócama imobenëngbiama y ainana jtsepochócama ndoñe ntsoybenana. Más šmochtsebiauatja chë nda endobena tšëngaftangbe cuerpo y tšëngaftangbe ainana jtsepochócama, nyetsca tescama infernoca.

<sup>29</sup> “Uta jaja shloftsetémata nýe canye denario crocenánama mondbétsena. Masque chca, ni cánýetema obanatema fshantsoye jotsatšana, tšëngaftangbe Taitá, Bëngbe Bëtsá ndoñe tontsebošëse. <sup>30</sup> Y tšëngaftangbiama, Bëngbe Bëtsá botamana jtsantješnana, y chca, cha lempe tšëngaftangbiama jtsetatšëmbuana, bueta stjënashënga tšëngaftangbe bestšašiñe yomnámna. <sup>31</sup> Chíyeca ndoñe matauatjëngana, tšëngaftanga ba jaja shloftsetëmëngbiama corente más šmonduámna ca” — Jesús tojánayana.

### *Ndabiama Jesucristo yochjayana chabe entšá yomna ca*

*(Lc 12.8-9)*

<sup>32</sup> “Nda atšbe entšá yomna ca entšangbe delante tojayanabiama, átšnaca, atšbe Taitá, chë celoca endmënabe delante chanjayana cha atšbe entšá yomna ca. <sup>33</sup> Pero nda entšangbe delante atšbe entšá ndoñe yondmëna ca tojayanabiama, átšnaca, atšbe Taitá, chë celoca endmënabe delante chanjayana cha atšbe entšá ndoñe yondmëna ca” — Jesús tojanëyana.

### *Jesusbe causa, entšángbeñe más jtsentsjanayana*

*(Lc 12.51-53; 14.26-27)*

<sup>34</sup> “Ndoñe šmattsejuabnaye atše quem luaroye tijabo nyetsca entšanga natjëmbana chamotsiyenama. Atše chama ndoñe chiyátabo; atše sënjabo causa, entšanga más mochántsejtsjanaye. <sup>35</sup> Atše sënjabo chë uaquiñá cachabe taitabe contra chaotsemnama, chë bembe cachabe mamabe contra y chë bebincuá chabe uambén mamabe contra chaotsemnama. <sup>36</sup> Y chca, ba entšangbe uayayënga cachëngbe pamíllanga mochántsemna.

<sup>37</sup> “Nda cachabe taitá o mamábioye atšbiama más tbojtsebobonshánëse, cha ndoñe ntsoymerécánana atšbe entšá jtsemnama. Nda cachabe uaquiñá o bémbëbioye atšbiama más tbojtsebobonshánëse, cha cach ndoñe. <sup>38</sup> Y nda nyetsca chabe quem luare soyënga ndoñe tonjëseboshjona atše juastama, y atšbiama jasúfriama ndoñe tontseprontana y cruciñe jobanámna, cha ndoñe ntsoymerécánana atšbe entšá jtsemnama. <sup>39</sup> Nda tojtsentšena quem luarentse bëtscá soyënga jtsebomnama y atšbiama jasúfriama ndoñe



tontseprontana, chë nyetsca tescama yomna tšabe vida echanjobuetše. Pero nda quem luarentša soyënga cachcá tojesonyá atše juastama, masque chaóbana, chë nyetsca tescama yomna tšabe vida echántsebmoma ca” —Jesús tojánayana.

*Chë uacanana soyënga  
(Mc 9.41)*

<sup>40</sup> “Nda tšëngaftanga chacmojúbuaja, átšnaca cha sochanjofja; y nda atše chašojofja, chë nda šojichmóbioynaca cha bochanjofja. <sup>41</sup> Nda canye Bëngbe Bëtsabe juabna oyebuambnayábioye tbojoyeuná, cha chca bétsemnama, chábioye Bëngbe Bëtsá canye uacanana soye bochantatšetaye, mo cach Bëngbe Bëtsabe juabna oyebuambnayabe uacanana soycá. Y nda canye nyetsca soyënguiñe tšabá amábioye tbojofja, cha chca uamanama, chábioye Bëngbe Bëtsá canye uacanana soye bochantatšetaye, mo cach nyetsca soyënguiñe tšabá amabe uacanana soycá. <sup>42</sup> Y ndánaca, tšëngaftanguentsá canye nduamanábioye masque nje mo base búyeshtema tbojuabuatsšetá, atšbe ustoná bétsemnayeca, ndegombre Bëngbe Bëtsá canye uacanana soye chábioye bochantatšetaye ca” —Jesús tojánayana.

## 11

*Juan chë Ubayanabe ichmónënga  
(Lc 7.18-35)*

<sup>1</sup> Jesús tojanpochocá chabe bnëtsana uta uatsjédayënga jábuayenama, y chentšana tojtsanoñe chë luariñe pueblënguenache oyena entšanga Bëngbe Bëtsabe palabra jabuátambama y jábuayenama.

<sup>2</sup> Chë tempo Juan chë Ubayaná cárceloye tmojanëtime. Choca cha yojouena ndayá Jesús yojtsamama. Y as, Jesús yojtsemnoye, básefta chabe ústonënga tojanichamó, <sup>3</sup> mentsá jatjayama: —¿Aca ndegombre cojtsemna chë jabama ibojanmëná, chë Uámana Uabuayaná, o šojtsamna ínñabiama jatobátmama ca?

<sup>4</sup> Chca tmojantjá orna, Jesús tojanëjua: —Smochjá y Juan šmochjauyana ntšamo šmojouena y šmojinycá. <sup>5</sup> Cha šmochjacuénta: Chë jtanënga tšabá entsatëbinýna, chë coshetënga tšabá montsatana, chë bacna nguayanánaca šoquënga shnánënga montsatsmëna y chë tësmënga montsuenana, chë obanënga tmontayena y chë ndbomnjémëngbioye chë tšabe noticiënga montsabuyayiná ca. <sup>6</sup> ¡Puerte oyejuayá chaotsemna chë nda atše bacna soye ndoñe stsama ca jtsejuabnayëse, átšbeñe ošbuáchiyana ndoñe tontsajbaná cha ca! —Jesús tojanëyana.

<sup>7</sup> Chënga tmojtsatanoñe ora, Jesús tojanontsé Juanbiana chë entšanga jáuyanana, mentsá: “Juan jinýama šmojánbocana ora, ¿ndayá jinýama chë entšanga ndoyena luaroye šmojánbocana? ¿Canye entsá ainaniñe tondaye añemo ndbomná, mo canye šëše bínñiaca shatiyeynëscá? <sup>8</sup> Y ndoñese, ¿ndayá jinýama choye šmojánbocana? ¿Canye boyabása uámana entšayaca bopormaná? Ndoñe. Tšëngaftanga šmondëtatšëmbo chë boyabásenga uámana entšayaca bopormánëngna chë mándayëngbe yebnënguiñe mondbétsiyenama. <sup>9</sup> Y asna, ¿ndayama choye šmojánbocana? ¿Canye Bëngbe Bëtsabe juabna oyebuambnayá jinýama? Ndegombre, añe; y cbëyana, ndegombre cha canye Bëngbe Bëtsabe juabna oyebuambnayabiama más bëtsá endmëna. <sup>10</sup> Cha, Juan, endmëna ndabiama Bëngbe Bëtsá chabe uabemana palabrenguiñe tojánayana mo chabe ichmonacá, mentsá tojánayana ora: Cristo, atšbe entsá natsana sënjichmó acbiana chaóyebuambama, entšanga jábuayenama aca jabama ainaniñe tšabe juabnëngaca chamotseprontánama ca.

<sup>11</sup> Ndegombre cbëyana: Nyets tempo entšangbeñe, ndocná quenátsmëna Juan chë Ubayanabiama más bëtsá; masque chca, Bëngbe Bëtsabe amëndayoca chë más batšá uamaná, más bëtsá echántsemna ntšamo mora Juan yomnama.

<sup>12</sup> “Juan chë Ubayaná tojánabo orscana mentscoñama, bëtscá entšanga tša mondbošë Bëngbe Bëtsabe amëndayoye jamashënguama, y chë Bëngbe Bëtsabe amëndayama

contra imomnëngna, chëngbe nyets añémoca montseboše chë mándayana jtsepochócama. <sup>13</sup> Juan candabëntscuana, nyetsca Bëngbe Bëtsabe juabna oyebuambnayënga y Moisesbe Ley nye Bëngbe Bëtsabe amëndayama tmonjanobuambá. <sup>14</sup> Y tsëngaftanga chë soyënga jóyëngacñama šmojtsebošëse, Juan entsemna chë Bëngbe Bëtsabe juabna oyebuambnayá Eliascá, chë jabama ibojamná. <sup>15</sup> Chë jouenama tmojtsobenënga, chamouena ca” —Jesús tojánayana.

<sup>16</sup> Mëntśánaca Jesús tojánayana: “¿Ndayacá morsca entšanga imomna? Chënga mondmëna mo chë plazëngoca mondbetsetbiámama basetemëngcá; chënga chëngbe enutëngbioye jtsayebuáchana <sup>17</sup> y mëntśá jtsichámuana: ‘Tšëngaftangbiamama fsënjaflautá y ndoñe chešmatslantsá; ngmënaca fsënjaversiá y ndoñe chešmatošachna ca.’ <sup>18</sup> Juan tonjánabo, y bëtscá entšángbeñe ndoñe quenjatamana ni jasana, ni jofšiyana, y entšanga montsanichamo chana bacna bayëjbe juabna uambayá yojamna ca. <sup>19</sup> Morna, chë Bëngbe Bëtsá Entśá tbojanbemá tonjabo, y chana aiñe entsamama bëtscá entšángbeñe jtsesayana y jtsofšëšnayana, y entšanga montsichamo chana yapa uasayá y vïnoye tmoyá entsemna ca y Romocama impuesto entšángbioye atjanayënga y bacna soye amëngbe amigo ca. Pero Bëngbe Bëtsá endbëtsinÿanÿnaye cha nyets osertánana bomná yomnama, chë ndayá cha tojama ora ndayá chentšana tojóbcna soyëngaca ca” —Jesús tojánayana.

*Chë nduauenana entšanga  
(Lc 10.13-15)*

<sup>20</sup> Chentšana Jesús tojanontśé jucácanana chë entšanga, ndëmuanÿënga imojoyena chë pueblënguiñe ndayenache ba chabe bëts soyënga tojanma, chënga bacna soyënga amana ndoñe tmontsanajbanama y Bëngbe Bëtsabe benache ndoñe tmontanishachama. Mëntśá yojtsichamo: <sup>21</sup> “¡Tša lastema, Corazín puebloca entšangbiamama! ¡Tša lastema, Betsaida puebloca entšangbiámna! Chë chentše sënjama bëts soyënga, Tiro y Sidón bëts pueblënguentše matënjochnënguse, chentša bacna entšanga ya tempo ngmënaca matmëntenojuabó chëngbe bacna soyëngama y Bëngbe Bëtsabe benache matmëntishache; y chca tmojamama chaotsótatsëmbuama uajojësha entšayangaca matmëntopormanga y chëngbe bestšašiñe jatinÿá matmënjenotbótoto. <sup>22</sup> Pero ndegombre cbëyana, ntšamo entšanga tmojamama, tšabá o ndoñe tšabá bëtsemnama jayanama chaojobuache ora, tsëngaftanga más bëts castigo šmochántsebmoma, chë Tiro y Sidonoca bacna entšangbe castiguama. <sup>23</sup> Y tsëngaftanga, Capernaumoca entšanga, ¿šmojtsejuabná celóntscoca atsebánanënga šmochtsemna ca? ¡Chë uabouana infiernoyme cmochantsësetjango! Chë muentše sënjama bëts soyënga Sodomoca matënjochnënguse, choca entšanga ya tempo ngmënaca chëngbe bacna soyëngama matmëntenojuabó y Bëngbe Bëtsabe benache matmëntishache, y chë bëts pueblo cabá cachcá mëntscuana mantsomñe. <sup>24</sup> Pero ndegombre cbëyana, quem luare jopochócama te, Bëngbe Bëtsá puerte jabuache cmochantsacastígaye, y chë Sodoma luaroca entšángbioye ndoñe nyetsá jabuache quemochatacastígaye ca” —Jesús tojánayana.

*“Atšbioye mabënga y šmochjóchna”  
(Lc 10.21-22)*

<sup>25</sup> Chë tempo, Jesús tojánayana: “Atše cbatschuá, Taita, celoca y quem luarentša Utabná. Aca, chë nye batsá tatsëmbënga tcojanÿanÿé, chë tša tatsëmbënga y osertánëngbiamama tcojaiytëme soyënga. <sup>26</sup> Aiñe, chama cbontsadorana, Taita, chca chaotsemnama tcojábošenayeca.

<sup>27</sup> “Atšbe Taitá lempe chca šonjatštá. Chë Uaquiñábioye ndocná corente quebnatábuatma; nye chë Taitá aiñe. Y chë Taitábioye ndocná corente quebnatábuatma; nye chë Uaquiñá aiñe, y ndábioye chë Uaquiñá tojtseboše nda chë Taitá yomnama jinÿanÿiyama, chánaca chë Taitábioye bochantsábuatma.

28 “Atšbioye mabënga nyetsca tšëngaftanga uamëntšnayënga y bëtscá trabajo uangménënga, y atše chanjama tšëngaftanga chašmochnama. 29 Ntšamo canye entšá, uacná yuguëšiñe juabatsëcana juanatsama, cachcá, tšëngaftanga atše šmochjaleséncia jobnatsayama y jabuátambama. Atšbentsana šmochjuatsjinýe: atše uantado mëná sëndmëna y ndoñe quetsatamana yapa uamaná jatenobiamnayana. Y chca, tšabá jóchnama šmochantsobena y ainaniñe más añemo šmochántsebmna. 30 Mo canye uacnacá, ndoñe tishuta yuguëšeca o ndoñe uauta uasmanëshaca, paselo jama jobenayana, cachcá tšëngaftanga šmochántsemna atše cbojtsabnatsana y cbojtsabuátambase; y chca, tšëngaftanga más oyejuayënga šmochántsemna y más paselo nyetsca soyënga jamama echántsemna ca” —Jesús tojánayana.

## 12

*Jesusbe uatsjëndayënga ochnayté trigo tmojanátabebe*  
(Mc 2.23-28; Lc 6.1-5)

1 Chë tempo, Jesús canye ochnayté canye jajajana yojtsachnějuana. Chabe uatsjëndayëngna shëntseca imojtsemna, chíyeca tmojanontsé trigo juatabebiana y chë meshënga jasana. 2 Chë fariseunga chca tmojáninýe ora, Jesús tmojanianyana: —Minýe, acbe uatsjëndayënga canye soye montsama y chë soye ochnayté jamama ndoñe quenátslesenciana ca.

3 As Jesús tojanéyana: —¿Ndoñe šmëndualía y šmondétatšëmbo ndayá David y chabe enutënga tmojanmama, shëntseca imojtsemna ora? 4 Chca orna, David, Bëngbe Bëtsabe bëts yebnoye yojámashëngo y chë Bëngbe Bëtsá chentše yojamnama inýinýnaye tandëšënga yojase. Chë tandëše nýe ndánaca jasama ndoñe yonjalesenciana, ni Davidbiana, ni chabe enutëngbiana. Nýe bachnangbiana belesenciana chë tandëše jasama. Masque David chca tojanma, Bëngbe Bëtsá chora ndoñe tonjánayana David canye bacna soye tojanma ca. 5 ¿O ndoñe šmëndualía y šmondétatšëmbo, Moisesbe leyiñe, chë bachnanga ochnayté Bëngbe Bëtsabe bëts yebnentše jtsetrabájayana, pero ndoñe bacna soye ntsemnana chë bachnanga ochnayté ndoñe mondbóchnama? 6 Y atše šcuayana: Muentše canya entsemna, cha chë Bëngbe Bëtsabe bëts yebnentša bachnangbiana más uamaná endmëna y chabe amëndayoca soyënga más entsámama chë bachnangbe mándayentša soyëngama. 7 Bëngbe Bëtsabe uabemana palabrënguiñe mëntšá endayana:

Atše séntseboše tšëngaftanga lastemadënga chašmotsemna,

y ndoñe nýe bayënga chašmotsëbánaye Bëngbe Bëtsá jëtschuayama ca.

Ntšamo chiñe entsayancá ndegombre cmojtsësertánëse, tšëngaftanga ndoñe chëngbe contra šmattsichamo, chë ochnayté chca tmojtsamëngbiana. 8 Chë Bëngbe Bëtsá Entšá tbojanbemá, chë entšá ochnayté tojtsama sóynaca jtsemándayana ca —Jesús tojánayana.

*Chë buashana cucuatše bomna entšá*  
(Mc 3.1-6; Lc 6.6-11)

9 Chentšana Jesús tojtsanoñe y chentša judiëngbe enefjuana yebnoye tojánamashëngo. 10 Chentše yojtsemna canye boyabása buashana buacuatše bomná. Chë fariseunga imojtsenguaye ndayánaca, as chca chënga jtsebmnama ndaye sóyeca Jesús mal jaquédama. Chcasna, chora chënga Jesús tmojantjá: —¿Queojtselesenciana canye ochnayté šocá jáshnama ca?

11 Y Jesús tojanějua: —¿Nda tšëngaftanguentšá, canye oveshá tbojtsebmna y nýa chë ochnayté canye fshantsentše atëfjnoye chë oveshá tojtsótsatše, chora chë boyabása nanjá o ndoñe chë oveshá jatábocnama? 12 ¡Entšá oveshabiana puerte más uamaná endmëna! Chcasna, entselesenciana chë ochnayté tšabe soye jamama ca —Jesús tojanéyana.

13 Chora Jesús chë buashana buacuatše bomnábioye tbojanianyana: “Macuenýanëjaná ca.” Y chë boyabásana tojanacuenýanëjaná y chora chëtša tšabá yojtsatamna mo cach

inÿetšacá. <sup>14</sup> Pero chë fariseunga tmojésanbocana ora, tmojanontsé juabnayana ntšamo jamëse Jesús jóbama.

*Ndayá chë Bëngbe Bëtsabe juabna oyebuambnayá Jesusbiama tojánayana*

<sup>15</sup> Jesús chë soye tojántatsëmbona ora, chentsana tojtsanoñe y ba entsanga tmojanasto. Nÿetsca šoquënga tojanashná, <sup>16</sup> y tojanamëndá chabiama entsángbeñe ndoñe chamondëtsóyebuambnama. <sup>17</sup> Chca tojanamëndá, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Cha mëntšá tojánayana:

<sup>18</sup> Muentše atšbe oservená entsemna. Atše cha sënjabocacá, atšbe bonshaná, y atše corente chabiama sëntsoyejuá.

Atše chanjama atšbe Espíritu chabe ainaniñe chaotsemnama y entsanga echanjabuayená, Bëngbe Bëtsá nÿetsca luarënguentsana entsangbiama yochjayanama chënga tšabá o ndoñe tšabá tmonjamama.

<sup>19</sup> Cha ndoñe queochátayajuatsana, ni queochátschembumbuana.

Chabe oyebuambnayana tsáshenañe ndocná queochatuena.

<sup>20</sup> Mo nda chë atcana šëse ndoñe más jatsndbemana, chë ndobenënga cha ndoñe queochátapochocaye.

Mo nda chë quinÿenëfjua nÿe uabojátšena uajuinÿnëfjua ndoñe ntsafsanana, chë Bëngbe Bëtsábeñe jtsošbuáchiyama imojtsebojátšangbe obatmanana chábeñe, cha ndoñe queochátabuajuanaye.

Cha nÿets añémoca echanjëftsetrabája, entsanga chëngbe ainaniñe Bëngbe Bëtsabe ndegombre soyënga chamóyëngacñëntscuana.

<sup>21</sup> Y nÿetsca luarënguentsana entsanga chábeñe mochantsobátmana ca —cha tojánayana.

*Fariseunga tmojánayana Jesús Satanásbentsana obenana tojanóyëngacñe ca (Mc 3.20-30; Lc 11.14-23; 12.10)*

<sup>22</sup> Chora, Jesús yojtsemnoye canÿe boyabása jtaná y ndëbiá tmojanánatse. Chana bacna bayëjbe juabna uambayá inamna; y Jesús chábioye tbojanshná, chabuatabínÿnama y chabuatauénama. <sup>23</sup> Y nÿetsca entsanga ojanánënga imojtsichamo: “¿Mua yojtsemna chë Davídbentsana Uámana Entšá, chë Cristo ca?”

<sup>24</sup> Pero chë fariseunga chca tmojanuena ora, imojtsichamo: “Beelzebú, cach Satanás, chë bacna bayëjëngbe amëndayá, quem boyabásabioye obenana tbojatštá chë bayëjënga chauatëbuacnama ca.”

<sup>25</sup> Y Jesús yojtsetátšëmbo ntšamo chënga imojtsejuabnayama; as tojanëyana: “Canÿe amëndayentše entsanga tmojtsenojatá y tmojtsenáyase, cachënga jenpochócana. Cachcá, canÿe bëts pueblentša entsanga o canÿe yebnentša pamíllanga tmojtsenojatá y ndoñe tmontsenëyeunanëse, chënga ndoñe tšabá nÿets tempo quemochátsmëna. <sup>26</sup> Cachcá, Satanás cachabe bayëjënga jtëbuacnama tojtsebošëse, chana tojtsenojatá y cachabe contra yojtsemna. Y chca, ¿ntšamo nantsobena chabe mándayana quem luarëntše jëftsebo mnana? <sup>27</sup> Tšëngaftanga šmontsichamo atše Beelzebube obenánaca chë bayëjënga stsatëbuacana ca; pero chca ndegombre tojtsemnëse, ¿ndábeyeca tšëngaftangbe usetonënga obenana imojtsebo mnana chë bacna bayëjënga jtëbuacnama? Chíyecna, chënga montsinÿinÿná ntšamo ndegombre yomnana y tšëngaftanga ndoñe ndegombre soye šmontsichámuama. <sup>28</sup> Y atšna, chë Bëngbe Bëtsabe Espíritbeyeca chë bayëjënga entsángbentsana sëndëtëbuacana; y chë soye entsinÿinÿná Bëngbe Bëtsabe amëndayana tšëngaftangbioye tojóshjanguama.

<sup>29</sup> “¿Ntšamo nda nanjobenaye canÿe corente añemo bomna entsabe yebnoye jamashënguana y chabe soyënga jtsebocana, ndoñe natsana chábioye tconjshëtsebatsëquëse? Nÿe tcojshëtsebatsëquësna aiñe cuanjobenaye cha jefcana. Atše ya chca Satanássoftaca sënjama.



<sup>30</sup> “Nda ndoñe átšeftaca tontsemná, atšbe uayayá jtsemnana. Y nda átšeftaca ndoñe tontsetrabája, chana atšbe contra jtsetrabájayana.

<sup>31</sup> “Chíyeca cbéyana, Bèngbe Bètsá entsanga echanjáperdonaye nyetsca chèngbe bacna soyènga y chë Bèngbe Bètsabiama puerte bacá oyebuambnayana, mo chábioye cuafjoyenguangcá; pero ndoñe queochátaperdonaye chë Uámana Espíritbiama puerte bacá ichámènga. <sup>32</sup> Bèngbe Bètsá bochanjaperdóna chë Cha Entśá tbojanbemabiama ndoñe tšabá ichamuábioye; pero chë Uámana Espíritbiama ndoñe tšabá ichamuábioyna, ni quem luarentše, ni ndocna te quebochatsperdóna ca” —Jesús tojánayana.

*Tšabe betiye o ndoñe tšabe betiye tondmënana, jtsotatsëmbuana ntšamo tojashajoncá*  
(Lc 6.43-45)

<sup>33</sup> “Canje betiye tšabá mobocuedanga y botamana echanjashájona; ndoñe tšabá matscuedánana y tšabe shajuana ndoñe queochátsbomna. Chë betiye tšabe betiye o ndoñe tšabe betiye tondmënana, jtsotatsëmbuana ntšamo chëshe tojashajoncá. <sup>34</sup> ¡Mètscuaye entsanga! ¿Ntšamo šmattsobena tšabe soyèngama jtsóyebuambnayana, cach tšèngaftanga bacna entsanga šmojtsemnëse? Er ndayá ainanoca becá tomnama entśá jtsóyebuambnayana. <sup>35</sup> Chë tšabe entśá, chë ainanoca tšabe juabnènga bomnentsana jtsóyebuambnayana, y chë bacna entsana chë ainanoca bacna juabnènga tobomnentsana jtsóyebuambnayana. <sup>36</sup> Y ndegombre cbéyana, chë entsangbiama tšabá o ndoñe tšabá tmonjamama jayanama tempo chaojobuache ora, ndaye ndoservena palabra šmojóyebuambama, Bèngbe Bètsabe delante šmochanjayana ndáyeca chca ca. <sup>37</sup> Er ntšamo tcojtsóyebuambnama Bèngbe Bètsá echanjayana tšabá o ndoñe tšabá tconjamama, y cmochanjauyana aíñe o ndoñe cmontsemna castiganá jtsemnana ca” —Jesús tojánayana.

*Chë bacna entsanga Jesús tmojanimpadá canje bëtš soye chaoma, chabe obenana jinjyama*

(Lc 11.29-32)

<sup>38</sup> Chentšana, básefta fariseunga y Moisesbe ley abuátambayènga Jesús tmojan-tjá: —Buatëmbayá, bènga fsëntseboše aca canje bëtš soye chacoma, acbe obenana chašcuinjanjyema ca.

<sup>39</sup> As Jesús tojanějua: —Quem puerte bacna entsanga y ndošbuáchiyènga montseboše atše canje bëtš soye chaima, atšbe obenana jinjanjyama; pero chca soye ndoñe quemochátinje, sinó nje chë ndayá yomna mo chë Bèngbe Bètsabe juabna oyebuambnayá Jonásoftaca tojanopasá soycá. <sup>40</sup> Ntšamo Jonás unga te y unga ibeta chë bëtš beonbe uafsbioye yojëftsemncá, cachcá chë Bèngbe Bètsá Entśá tbojanbemá unga te y unga ibeta fshantse jashenoye echanjëftsemna. <sup>41</sup> Morsca entsanga tšabá o ndoñe tšabá tmonjamama Bèngbe Bètsá yochjayana te, Nínive bëtš puebloca entsanga mochanjotsaye y morsca entsangbiama mochanjayana ndoñe tšabá tmonjama ca; er chènga, Jonás yojtsabuayiynaye ora, tmojanoyeuná y chë tšabe benache tmojtanishache, y chë mora muentše entsemnana, Jonasbiama más uamaná endmëna. <sup>42</sup> Morsca entsanga tšabá o ndoñe tšabá tmonjamama Bèngbe Bètsá yochjayana te, chë Sur luaroca reinánaca echanjotsaye y morsca entsangbiama echanjayana ndoñe tšabá tmonjama ca; er chana chë quem luare iuajbana luarèngocana tojánabo Salomonbe osertánanaca palabrènga jouenama, y chë mora muentše entsemnana, Salomonbiama más uamaná endmëna ca —Jesús tojánayana.

*Ndayá inopása chë bacna entsángaftaca*

(Lc 11.24-26)

<sup>43</sup> Jesús mëntśánaca tojánayana: “Canje bacna bayèja canje entsábentsana tojésebcna ora, chë bayèjna bojojo luarènguenache jtsanana ndayentše jóchnama onguayiñe, y canje luare ndoñe tonjinjyena ora cha jenójuaboyana: <sup>44</sup> ‘Atšbe oyenoye, chë ndayentšana sënjëftsebcnoye chanjeshècna ca’. Y choye tojtashjango orna, jinjenana lempe tšabá

cha jtesamashënguama, mo chentše ndocná tontsiyencá, tsjajniñe y lempe botamaniñe cuaftsemncá. <sup>45</sup> Chorna chë bayëjna jana y inye canyësëfta bayëjenga chabiamá más opëjenga jobiatšana y nyetscanga choye jamashjnana chë boyabásabeñe joyéanama. Y chca, chë boyabása tempscama más bacna entšá jtsemnana, chora chë natsanama más bayëjenga abamna causa. Morsca puerte bacna entšángaftaca cachcá echanjochnëngo ca” —Jesús tojánayana.

*Chë Jesusbe ndegombre pamíllanguentsënga*

*(Mc 3.31-35; Lc 8.19-21)*

<sup>46</sup> Jesús cabá entšanga yojsëtsëtsnaye ora, chabe mamá y catšátanga tmojánashjajna y imojtseboše Jesúseftaca jóyebuambayama. Nye shjoca imojtsemna; <sup>47</sup> asna, canye boyabása Jesúsbioye tbojanbuayená: —Acbe mamá y acbe catšátanga shjoca montsemna y montseboše ácaftaca jóyebuambayama ca.

<sup>48</sup> Pero Jesús chë jauenayama tojánabioye tbojanayana: —¿Nda atšbe mamá yomna, y ndëmuanyënga atšbe catšátanga ca?

<sup>49</sup> Y cachora chabe cucuatše tojanatsbaná, chabe uatsjëndayënga tojanënyänyé y tojánayana: —Quemënga montsemna mo atšbe mamacá y mo atšbe catšatangcá. <sup>50</sup> Er ndánaca, ntšamo atšbe Taitá, celoca endmëná yobošcá tojtsama, jtsemnana atšbe catšata, atšbe uabena y atšbe mamá, atšbe ndegombre pamíllanguentsá ca —Jesús tojánayana.

## 13

*Chë jenabe cuento*

*(Mc 4.1-9; Lc 8.4-8)*

<sup>1</sup> Cach te, Jesús yebnentšana tojëftsanbocna y uafjajónaye tsachoca tojanótbema.

<sup>2</sup> Mallajta entšanga choye tmojanobeconá; as Jesús, chë uafjajónayentše yojanamna canye barquëshoye tojánasëngo, tojanótbema; y chë entšangna tsachoca imojtsemna.

<sup>3</sup> Chorna ba soyëngama cuentëngaca chënga tojanabuatambá.

Mëntšá tojanëyana: “Canye jená chë jënaye jaujquëshama yojëftsebocna.

<sup>4</sup> Yojsëjquëshaye orna, básefta jënaye benache juachañe yojuatquécjana, pero chë jaja shloftšënga imojástjajna y lempe imojtsósañe. <sup>5</sup> Inye meshëngna ndëtsbenguiñe yojuatquécjana, ndoñe yapa fshantse binýnentše. Chiñna betscó yojuábocna, fshantse ndoñe jashenocana yonjanmëna causa, <sup>6</sup> pero shinye yojábocna ora, puerte yojojënyána y yojsancta; y yojsábojo, bëtscá tbëtëjënga tondaye causa. <sup>7</sup> Inye meshëngna uchmëshangañe yojuatquécjana, y chë uchmëshangá yojuájua orna, lempe yojsatscué.

<sup>8</sup> Y inye meshëngna, uanguanëshiñe yojuatquécjana y puerte botamana chiñe yojuashajo: ínñenache nye canye jënyentšana mo patse meshënga yojuashájona, ínñeña mo chnënguana bnëtsana meshe y ínñeña mo unga bnëtsana meshe.”

<sup>9</sup> Jesús chca jacuéntama tojanpochocá ora, mëntšá tojánayana: “Chë jouenama tmojt-sobenënga, šmochjouena ca.”

*Ndáyeca Jesús cuentëngaca yojánabuatambaye*

*(Mc 4.10-12; Lc 8.9-10)*

<sup>10</sup> Chora chë uatsjëndayënga tmojanobeconá y Jesús tmojantjá: —¿Ndáyeca entšanga cuentëngaca cojtsabuatambá ca?

<sup>11</sup> As Jesús tojanëjua: —Bëngbe Bëtsá tšëngaftanga cmontsinyanýná nyetsca chë mo iytëmencá yomna soyënga chabe amëndayama, pero chë ínñengbioyna ndoñe. <sup>12</sup> Nda tojtsebomnábioye más jatštayana y chca cha corente bëtscá jtsebomnana; pero chë tondaye tondbomnábioyna, chë batsatema tobomna sóynaca mochántseboca. <sup>13</sup> Chíyeca atše cuentëngaca chënga sëntsëtsëtsná. Chca, masque corente chamotsafšna, ndoñe chamondobená Bëngbe Bëtsabe soyënga jinýama; y masque becá chë soyënga chamouena,

ndoñe tšabá quemochátuenana, ni queochátësertana. <sup>14</sup> Chcáyecna, chëngbeñe entsemna cachcá ntšamo chë Bëngbe Bëtsabe juabna oyebuambnayá Isaías tojanayancá: Masque beca chamouena, ndoñe queochátësertana.

Masque puerte chamotsantješna, ndoñe quemochátinje

<sup>15</sup> Quem entsanga ndoñe quemátsboše botamana jajuaboyana;

chënga uamatsáchtonega montsemna

y chëngbe bomínynaca cachcá.

Chca ndóñesna, chënga muantsobena jinýama, jouenama y ainaniñe josértama;

y chca, chënga bacna soyënga amana muantsajbaná y atšbe benache muantishache,

as atše chënga chayatsebacama ca –cha tojéftsanbema.

<sup>16</sup> “Tšëngaftangna oyejuayënga šmochanjoyena, er šmondpomna bominje y matscuašënga Bëngbe Bëtsabe soyënga jinýama y jouenama. <sup>17</sup> Ndegombre cbéyana, banga Bëngbe Bëtsabe juabna oyebuambnayënga y nyetsca soyënguiñe tšabá amënga tmonjánbošena chë tšëngaftanga šmontsonýá soyënga jinýama, y ndoñe chemátaninje; tmonjánbošena chë tšëngaftanga šmontsuenana soyënga jouenama, y ndoñe chemátanuena ca” –Jesús tojanéyana.

### *Jesús chë jenabe cuentama tojanabuayená*

*(Mc 4.13-20; Lc 8.11-15)*

<sup>18</sup> “Chcasna, oído šmochajajo; chë jenabe cuento mëntšá endayana: <sup>19</sup> Chë Bëngbe Bëtsabe amëndayama tmojouena y ndoñe tontsësertana entsanga mondmëna mo chë benache juachañe yojuatquécjana jenaycá; Satanás jabana Bëngbe Bëtsabe palabra chëngbe ainanentšana jabétsabuajuanama, chënga chiñe ndoñe chamondëtsošbuáchema. <sup>20</sup> Y chë ndëtšbenguiñe yojuatquécjana jénaye entsemna mo chë aiñe Bëngbe Bëtsabe palabra tmojouena y Bëngbe Bëtsabeñe jtsošbuáchiyama oyejuayënga tmojtsemna entsangcá; <sup>21</sup> pero ndoñe nyets tempo chana jocháchuana, y chca, ndoñe bayté Bëngbe Bëtsáftaca ntjéftsemnëngana, ndoñe yapa tmontsašbuaché causa. Inyënga chëngbiöye mochantsëbuayënja y Bëngbe Bëtsabeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonýaye. <sup>22</sup> Chë uchmëshangañe yojuatquécjana jénaye entsemna mo chë Bëngbe Bëtsabe palabra tmojouena entsangcá, pero quem luarentša soyëngaca oyejuayënga jtsemnana yapa mochántsenojuabnaye y mallajta crocénana y ba soyënga jtsebmnama mochántseboše. Chíyeca chënga Bëngbe Bëtsabe palabra jtsebnétjombana y ntšamo cha tojayancá ndoñe ntsamana. <sup>23</sup> Pero chë uanganëshiñe yojuatquécjana jénaye entsemna mo chë Bëngbe Bëtsabe palabra tmojouena y botamana jósertana entsangcá. Mo canye betiye puerte tšabá tojtseshajuancá, chënga bëtscá tšabe soyënga Bëngbe Bëtsabiama mochántsama. Inyëngna ínýengbiama más bëtscá soyënga mochántsama, y chca, ínýengna jtsemnana mo chë patse meshënga tojanshajo jenaycá, ínýengna mo chë chnénguana bnëtsancá y ínýengna mo chë unga bnëtsana meshënga tojanshajo jenaycá ca” –Jesús tojanabuayená.

### *Chë tríguañe bacna shacuanama cuento*

<sup>24</sup> Jesús mëntšánaca tojanacuntá: “Bëngbe Bëtsabe amëndayana endmëna mo chë tšabe jenaycá, canye boyabása chabe jajañe yojáje. <sup>25</sup> Pero nyetscanga imojtsomañe orna, chabe uayayá yojáshjango y chë trigo jeniñe bacna shácuana yojesejé y yojtsatoñe. <sup>26</sup> Y chë trigo yojájua y ya yojtseshajuana orna, chë bacna shácuana yojuábocna. <sup>27</sup> As chë peonga imojá chë nduiño jauyanama: ‘Bacó, chë jajañe tšabe jénaye tconjanjé y as, ¿ndáyeca chë bacna shácuana chiñe tojuábocna ca?’ <sup>28</sup> Y chë nduiño yojáuyana: ‘Atšbe uayayá chca tojama ca.’ Chora chë peonga imojatjaye: ‘¿Quectseboše bënga fchayá chë bacna shácuana jetsejashtsëtsama ca?’ <sup>29</sup> Pero chë nduiño yojáuyana: ‘Ndoñe. Chë bacna shácuana šmojtsejashtsëtsana ora, chë trígnaca šmattsejashtse ca. <sup>30</sup> Más



tšabana, cachcá mochjonÿaye cánÿiñe chaójuama, chë jaja saná játbanama tempo chaojobuáchëntscuana. Chora chë trabájayënga chanjichamuá y chanjámëndaye natsana chë bacna shácuana chamotsejashtsëtse y chamotsentsacuacjuá jtsejuinÿiyama, y chentšana chë shajuana chamuatbaná y atšbe grano uaquëcjnaye yebniñe chamotsatsuamá ca' ” —Jesús tojánayana.

*Chë mostaztiye jenayama cuento*  
(Mc 4.30-32; Lc 13.18-19)

<sup>31</sup> Jesús mëntšánaca tojanacuntá: “Bëngbe Bëtsabe amëndayana endmëna mo canÿe mostaza betiye jenaycá, canÿe boyabása chabe jajañe yojáje. <sup>32</sup> Ndegombre, nÿetsca jenayëngama chë mostaza jénaye chë más básetema endmëna, pero tojójua orna, chë jajañentšë chë más bëts betiye jóbemana. Tša bëts betiye jtsemnana, chíyeca ba buacuashangá jtsabomnana y chë jaja shloftšënga jana y chiñe uajajonëtemëngá jauábopormana ca” —Jesús tojánayana.

*Chë levadurama cuento*  
(Lc 13.20-21)

<sup>33</sup> Quem inÿe cuéntnaca tojanëyana: “Bëngbe Bëtsabe amëndayana endmëna mo levadurcá; canÿe shembása chana jenájuabana unga medida arninÿañe, nÿetsana chauabochama ca.”

*Ndáyeca Jesús entsanga cuentëngaca yojanabuayiyá*  
(Mc 4.33-34)

<sup>34</sup> Jesús nÿetsca chë soyëngama lempe cuentëngaca entsanga jtsëtsëtsnayana, y cuentëngaca ndóñesna ndoñe yonjanoyebuambná. <sup>35</sup> Chca yojamna ndayá cachcá chaochnënguama ntšamo chë Bëngbe Bëtsabe juabna oyebuambnayá tojanayancá, mëntšá:

Jabuátambamna cuentëngaca chanjóyebuambaye;  
chanjayana chë iytëmena soyëngama y chë entsanga ndoñe mondëtatšëmbo soyëngámnaca;

Bëngbe Bëtsá quem luare tojanma orscana chë soyënga yomna ca —cha tojánayana.

*Chë tríguañe bacna shácuana cuentama Jesús tojanabuayená*

<sup>36</sup> Chentšana Jesús chë entsanga tojtanichamó y yebnoye tojtanamáshëngo. Chentšna chabe uatsjëndayënga tmojanimpadá ndayá chë bacna shacuanama cuento betsayancá chauabuayenama. <sup>37</sup> As Jesús tojanëyana: “Chë tšabe jénaye jená endmëna chë Bëngbe Bëtsá Entšá tbojanbemá, <sup>38</sup> y chë jajañna, quem luare. Chë tšabe jénaye entsemna chë Bëngbe Bëtsabe amëndayoye mochjámashjna entsanga, y chë bacna shácuana entsemna chë bacna bayëjëngbe amëndayabe entsanga, <sup>39</sup> y chë uayayá, chë bacna shácuana yojáje chana, Satanás. Chë jaja saná atbanayana entsemna chë quem luare jopochócama chaojobuache ora, y chë trabájayëngna chë angelotëmënga. <sup>40</sup> Ntšamo chë bacna shácuana jtsejashtsëtšana y iñoye jtsatmetšana jtsejuinÿiyama, cachcá echántsemna quem luare jopochócama te. <sup>41</sup> Chorna, chë Bëngbe Bëtsá Entšá tbojanbemá chabe angelotëmënga echanjichamuá chë ínÿënga bacna soye chamomama amënga y chë bacna soyënga amënga chabe amëndayentšana chamotsajuanayama. <sup>42</sup> Y chora chëngbioye chë uabouana iñeshoye mochantsësetjango y chentšë puerte mochanchenóbošachna y chë tsetšanama juatsašënga mochantsenoftëšjojnaye. <sup>43</sup> Chora, chë ntšamo Bëngbe Bëtsá yomandacá amëngna corente mo shinÿcá mochantsebuashinÿinÿana chëngbe Taitá, Bëngbe Bëtsabe amëndayoca. Chë jouenama tmojtsobenënga, šmochjouena ca” —chora Jesús tojánayana.

*Chë fshantsiñe uaiytëmena bomnanama cuento*

<sup>44</sup> “Bëngbe Bëtsabe amëndayana endmëna mo chë fshantsiñe uaiytëmena bomnancá. Canÿe boyabása chë bomnana yojuñÿena y chentšana iytëcana cachentšë yojesatbontsá.

Corente oyejuayá yojtá, nyetsca chabe bomna soyënga yojetsatobuiye y chentšana chë fshantse yojtobuámiñe ca” —Jesús tojánayana.

### *Chë corente uámana fiantse ndëtsëtémama cuento*

<sup>45</sup> “Mo canye entsá uámana fiantse ndëtsëtémënga obuamnañacánaca endmëna chë Bëngbe Bëtsabe amëndayana. <sup>46</sup> Chana, canye corente uámana ndëtsëtëma yojínÿena ora, yojtá y lempe chë inabomna soyënga yojetsatobuiye y chë ndëtsëtëma yojtobuámiñe ca” —Jesús tojánayana.

### *Chë atarraiëshama cuento*

<sup>47</sup> “Bëngbe Bëtsabe amëndayana endmëna mo canye atarraiëshacá, buyeshoye jutšenana y nyetsca beonga jashebuáyana. <sup>48</sup> Chë atarraiëshá jútjiena tojtsamna orna, chë beonga ashebuánayënga jtsashëbjátsëcana, tsachoye juyambana y chentše juatbemana chë beonga jabocacayama; chë tsábënga sbarëquënguiñe juatsuámana y chë ndoñe tsábëngna jtsëtšanana. <sup>49</sup> Cachcá echanjochnëngo quem luare jopochócama tempo chaojobuache ora. Chë angelotémënga mochanjábocana chë tsabe entsángbentšana bacna entsanga jaluárama, <sup>50</sup> y chë bacna entsangna chë uabouana ñëshoye mochántsatquëcjaye, y chentše puerte mochanjenóbošachna y chë tsetšanama juatsašënga mochantsenoftëšjojnaye ca” —Jesús tojanacuntá.

### *Anteo y tsëm uámana bomnana*

<sup>51</sup> Chora chabe uatsjëndayënga Jesús tojanatjá: —¿Lempe chama quecmojtsësertana ca? Y chënga tmojanjuá: —Arseñor, aíñe ca.

<sup>52</sup> As Jesús tojanéyana: —Canye ley abuatambayá jtsetatšëmbuana ndayá Bëngbe Bëtsá tempo Moisesbiajana yojanoyebuambná soyëngama. Ntšamo Bëngbe Bëtsabe amëndayana bëtsemnama cha tojtsatsjendá orna, mo canye yebnentša nduiñcá cha jtsemnana. Chë nduiñna chabe grano uaquëcjnaye yebnocana anteo y tsëm uámana bomnana juabocnana. Cachcá chë ley abuatambayá, Bëngbe Bëtsabe soyëngama jtsabuátambayana chë tempo Bëngbe Bëtsá tojanoyebuambá soyëngama y chë tsëm soyëngnaca Bëngbe Bëtsabe amëndayama ca —tojanéyana.

### *Jesús Nazaretoca*

*(Mc 6.1-6; Lc 4.16-30)*

<sup>53</sup> Jesús chë soyënga jacuëntama tojanpochocá ora, chentšana tojtsanoñe. <sup>54</sup> Y cachabe luaroye tojtashjango y chentša judiëngbe enefjuana yebnentše tojanontsé jabuátambama. Entšanga ojnanánënga imojtsichamo: —¿Chë lempe yojtsetatšëmbcá ndëmoca mua tojuatsjinÿe ca? ¿Ntšamo nantsobena chca bëts soyënga jamama ca? <sup>55</sup> ¿Mua ndoñe yondmëna chë calpinterbe uaquiñá y chabe mamá ndoñe María? ¿Mua ndoñe yondmëna Santiago, José, Simón y Júdasbe catšata, <sup>56</sup> y chabe uabëñanga ndoñe muentše bëngaftaca mondoyena? ¿Ndayentsana lempe chca mua yojtsebomna ca? — chënga imojtsichamo.

<sup>57</sup> Y chë causa chë entsanga tmojanotjayaná y ndoñe imontseboše cha joyeunayana. Pero Jesús tojanéyana: —Nyetsquénache canye Bëngbe Bëtsabe juabna oyebuambnayá bëtsá jabemëngana, pero cachabe luarentše, cachabe yebnentše ndoñe ca.

<sup>58</sup> Chíyeca chentše Jesús ndoñe tonjëftsanma ba bëts soyënga Bëngbe Bëtsabe obenánaca, chë entsanga chábeñe ndoñe montsanošbuaché causa.

## 14

### *Ntšamo Juan chë Ubayaná tojanóbana*

*(Mc 6.14-29; Lc 9.7-9)*

<sup>1</sup> Chë tempo, Rey Herodes, chë Galileoca mandayá tojanuena ntšamo nyetsca entsanga Jesucristbiana imojtsichamcá. <sup>2</sup> As cha chabe oservënënga tojanéyana: “Mua Juan

chë Ubayaná ctsemna, obanënguentšana tojtayena, chíyeca chca obenana bëts soyënga jamama yojtsebomna ca.”

<sup>3</sup> Juan cabá ainá ora, Herodes tojanmandá cha chamishache, cadenëjuangaca chamobátsëca y chca cárceloye jutámíama. Herodes chca tojanma Herodíasbe causa, chabe catšata Felipe shema. <sup>4</sup> Juan Heródesbioye mëntšá ibnauácacana: “Ndoñe quenátslesenciana aca acbe catšatbe shémaftaca jobouamayama, acbe catšata cabá ainá yotsomñe ora ca.”

<sup>5</sup> Y chama Herodes yojtseboše Juan jóbana, pero entsangbiama yojtsauatja, er chënga innajuabnaye Juan ndegombre Bëngbe Bëtsabe obenánaca yojanoyebuambná ca. <sup>6</sup> Pero Heródesbe cumpleño oboyejuaye ora, Herodíasbe bembe entsangbe delante tojanlantsá y Herodes puerte chama yojtsóyejuaye. <sup>7</sup> Chíyeca Herodes, jajúrase, tbojansbuachená ndayánaca jatšetayana, ntšamo tbojotjañcá. <sup>8</sup> Y Herodíasna lempe bémbëbioye ibojabuayená ntšamo Herodes jojuama. As chë bembe tbojaníyana: “Canye šcneniñe Juan chë Ubayanabe bestšaše šmatšetá ca.”

<sup>9</sup> Herodes chë soyama tbojanongmé, pero chë ófjanëngbe delante jajúrase tbojansbuachená causa, yojamánda chca chaotsemnama. <sup>10</sup> Y as tojanmandá chë Juan yojanëtámenoca chabe bestšaše chamuetsëštjanguama. <sup>11</sup> Chentšana, canye šcneniñe chë bestšaše tmojanamba y chë tobiáše tmojanëntšabuaché y chana, chabe mamábíoye.

<sup>12</sup> Chentšana, Juanbe ústonënga tmojánashjajna, chabe cuerpo tmojésanocñe y tmojána jauátbontsama. Y chora, Jesús yojtsemnoye chënga tmojána y chë soyëngama tmojan-cuentá.

*Jesús shachna uaranga boyabásenga saná tojanacaredadó  
(Mc 6.30-44; Lc 9.10-17; Jn 6.1-14)*

<sup>13</sup> Jesús chca tojanuena ora, canye barquëshañe tojtsanoñe canye bën luaroye, entsanga ndoyena luaroye. Pero entsanga chama imojátatšëmbona y chë pueblënguentšana tmojánbocana shecuátšëca cha juastama. <sup>14</sup> Chentšana, chë barquëshoicana tojtanastjango ora, Jesús ba entsanga tojánanyë, chë cha tmojáanguanguënga. Chëngbiama tbojanongmé y chë entsanguentšana ba šoquënga tojanashná. <sup>15</sup> Ya jetiñe yojtsemna, chíyeca chë uatsjëndayënga Jesúsbioye tmojanobeconá y tmojaníyana: —Ya jetiñe entsemna y quem luariñe ndocná quenatíyena. Entsanga cuantichamuá, pueblotémëngoye chamotsoñama, saná chamobuámiñama ca.

<sup>16</sup> As Jesús tojanëjua: —Ndoñe quenátsiyta chënga chamotsatoñama. Tšëngaftanga saná šmochjacaredádaye ca.

<sup>17</sup> Y chënga tmojanjuá: —Muentše tondaye queftsátsbomna; nye shachna tandëse y uta beónata ca.

<sup>18</sup> As Jesús tojanëyana: —Chë soyënga moye miyëbo ca.

<sup>19</sup> Chentšana Jesús tojanmandá entsanga chamoshëntsjatbiamama. Chorna, chë shachna tandëse y chë uta beónata tojanca, cloye tojanontješé y Bëngbe Bëtsábíoye chama tbojtanchuá. Chora chë saná tojanjatá, chabe uatsjëndayënga tojanëjåtaye, y chëngna nyetsca entsanga tmojanacaredadó. <sup>20</sup> Nyetsca entsanga tmojanse jtoshachaye nyetsá y cabá chë ojamnëtémëngaca bnëtsana uta sbarëcua tmojanajutjé. <sup>21</sup> Chë tmojanšënga imojamna mo shachna uaranga boyabásenga, shembásenga y básenga ntjacuntacá.

*Jesús béjaye juatsbuacá yojtsaye  
(Mc 6.45-52; Jn 6.16-21)*

<sup>22</sup> Chentšana, Jesús chabe uatsjëndayënga tojanamëndá chë barquëshoye jtamashjina y chë uafjajónaye chenguánoica chabe natsana jashjajnana. Chëntscuana Jesús entsanga yojtichamuá. <sup>23</sup> Nyetscanga tojtanichamó orna, Jesús canye tjoye tojántsjua canya jtsemnama, Bëngbe Bëtsáftaca jencuëntama. Yojaibétata ora, cha canya chentšë

yojtsemna, <sup>24</sup> y chë barquëshana tsachocana bënoca yojtsemna. Y chë olëshënga chë barquëshana yojtšajantšetaye, chë binÿia chëngbe contra yojtsemna causa. <sup>25</sup> Ya bínÿanoyna, Jesús chëngbioye yojobeconá; bėjaye juatsbuacá yojtseye. <sup>26</sup> Chabe uatsjéndayënga chca cha tmojáninÿe orna, tša imojocochauatjaná y puerte auatjanánënga tmojanoyó: — ¡Canÿe añemëse entsemna ca!

<sup>27</sup> Pero chora Jesús tojanéyana: — ¡Añemo šmochtsebomna, atše Jesús sëndmëna; ndoñe matauatjëngana ca!

<sup>28</sup> Chora Pedro, Jesúsbioye tbojanianyana: — Bëngbe Utabná, ndegombre aca tcojtsemnëse, momandá atše bėjaye juatsbuacá ácbioye chayá ca.

<sup>29</sup> Y Jesús tbojanianyana: — Mabo ca.

Chora Pedro chë barquëshoicana tojánastjango y tojanontsé bėjaye juatsbuacá Jesúsbioye jama. <sup>30</sup> Pero chë binÿia tša jabuache yojtsemnama tojáninÿe ora, Pedro puerte yojtšauatja y tbojanontsé jtsenatjëmbambana. Chíyeca cha jabuache tojanchembo: — ¡Bëngbe Utabná, šmatsbocá ca!

<sup>31</sup> Y cachora Jesús tbojtano buácuëtëntsiye y tbojanianyana: — ¡Tša batšatema ošbuachiyá! ¿Ndáyeca ndoñe bëtscá átšbeñe contsošbuaché ca?

<sup>32</sup> Chentšana chë barquëshoye chata tbojtanamáshëngo y cachora chë binÿia bonguana yojtšatsmëna. <sup>33</sup> Y chora, chë barquëshoye imojtsemnënga Jesusbe shecuatšentše tmojanoshamentšé y tmojanianyana: — ¡Aca ndegombre Bëngbe Bëtsabe Uaquiñá comna ca!

*Genesaret ca uabáinoca, Jesús ba šoquënga tojanashná*

*(Mc 6.53-56)*

<sup>34</sup> Chë uafjajónaye tmojánenashbuachengo y canÿe luare Genesaret ca uabáinoye tmojánashajna. <sup>35</sup> Chentša entšanga Jesús tmojantëmbá ora, chë luarentša nÿetsca entšanga chama tmojántatsëmbona. As chë entšanga chëngbe šoquënga Jesúsbioye tmojanënatse. <sup>36</sup> Y imojtseimpadana nÿe mo chabe entšayá sibiájuanaca juabojajuama chë šoquënga chaualesenciama. Y nÿetscanga chabe entšayá sibiájua tmojanábojajënga, shnánënga imojtsatoquédaye.

## 15

*Ndáyeca canÿe entšá Bëngbe Bëtsabe delante ndoñe tšabia nántsemna*

*(Mc 7.1-23)*

<sup>1</sup> Chora básefta fariseunga y judiëngbe ley abuatambayënga, Jerusalenocana tmojánabënga, Jesúsbioye tmojanobeconá y tmojanianyana: <sup>2</sup> — ¿Ndáyeca acbe uatsjéndayënga ndoñe montsama chë ntšamo bëngbe bëtš taitanga monjanamancá ca? ¿Ndáyeca ndoñe ntsacuentšabiana ndayá jasama ora, ntšamo bënga chë judiënga fsënduamancá, Bëngbe Bëtsabe delante tšábënga jtsatsmënama ca?

<sup>3</sup> As Jesús tojanéjua: — ¿Y ndáyeca tšëngaftanga ndoñe šmontsama ntšamo Bëngbe Bëtsá tojanmandacá, nÿe cach tšëngaftangbe bëtšëtsanga immétsama soyënga jtsamama ca?

<sup>4</sup> Bëngbe Bëtsá mëntšá tojanmandá: “Acbe bëtšëtsata stëtsoye ndoñe catjáquedaye”, y “nda cachabe bëtšëtsatbiamá podësca tojóyebuambase, chana jóbanama jtsemnana ca.”

<sup>5</sup> Pero tšëngaftanga šmondbétsichamo canÿe entšá canobena chabe taitá o chabe mamá jauyanana: “Lempe ntšamo sëndbomncá Bëngbe Bëtsá jaserviama entsemna, chíyeca tondaye quetsátsbomna aca juajabuáchama ca”; <sup>6</sup> y šmondbétsichamo nÿe ndánaca chca tojayanëse, ya ndoñe ntsemnana chabe taitá o chabe mamá stëtsoye ndoñe ntjaquédana, ni ntjuajabuáchana ca. Y chca, tšëngaftangbiamá tondaye ntsámanana ntšamo Bëngbe Bëtsá tojanmandacá, y aiñe šmontsama ntšamo tšëngaftangbe bëtšëtsanga imojanamancá.

<sup>7</sup> ¡Bacna entšanga, ntšamo ndegombre šmojuabnacá ndinÿinÿayënga! Nÿe tšabá chë Bëngbe Bëtsabe juabna oyebuambnáyá Isaías tšëngaftangbiamá tojanoyebuambá, mëntšá tojánayana ora:



<sup>8</sup> Bëngbe Bëtsá tonjayana: “Quem entsanga mondbétsichamo Bëngbe Bëtsá tša tšabia yomna ca; chca nÿe uayásaca,

pero chëngbe ainanentše atšbiana ndocna tšabe juabnëngaca.

<sup>9</sup> Chënga nÿe bonamente mondbétsichamo: Bëngbe Bëtsá tša tšabia yomna ca; chënga nÿe entsangbe mandënga jtsabuátambayana y Bëngbe Bëtsabe mandënga ndoñe ca” —cha tojánayana.

<sup>10</sup> Chentšana Jesús entsanga tojánachembo y tojanéyana: —Smochjouena y chacmësertá. <sup>11</sup> Ndayá entsá tojttesacá, ndoñe quebochátsbema Bëngbe Bëtsabe delante ndoñe tšabia. Inÿetsá comna: ndayá entsá tojtsejuabná y tojtsoyebuambnacá endobena cha jabemana Bëngbe Bëtsabe delante ndoñe tšabia ca.

<sup>12</sup> Chora chë uatsjëndayënga Jesúsbioye tmojanobeconá y tmojaninyana: —¿Quéctsetatsëmbo, ntšamo tconjayanama chë fariseunga ndoñe tšabá chenatëuénana ca?

<sup>13</sup> As Jesús tojanëjua: —Ndaye betiye atšbe Taitá celocá ndoñe tonjájese, tbëtëjocana mochántsejashtse. Cachcá echanjama chë nÿe entsangbe buatëmbana soyëngaca.

<sup>14</sup> Cachcá mónÿaye; chënga montsemna mo jtanënga inÿe jtanënga unachayëngcá. Y canÿe jtaná inÿe jtaná tbojtsánachase, nÿets útata canÿe tbuabentše bochanjetsótsatše ca —Jesús tojánayana.

<sup>15</sup> Chora Pedro, Jesúsbioye tbojaninyana: —Ntšamo chë cuento bétsayanama šmabuayená ca.

<sup>16</sup> As Jesús tojanëjua: —¿Tšëngaftángnaca cabá ndoñe cmontsësertana ca? <sup>17</sup> ¿Cabá ndoñe cmontsësertana lempe ntšamo šmojascá uafsbioye jomashënguana y chentšana cuerpentšana jtabocnana? <sup>18</sup> Pero ntšamo šmojtsoyebuambnacana lempe ainanocana jtsóbocanana y chë soye endobena tšëngaftangbioye Bëngbe Bëtsabe delante ndoñe tšábenga jábiamana. <sup>19</sup> Ainanocana jtsóbocanana bacna juabnënga: jenóbama, shema o boyábioye ínÿaftaca jáingñama, shembása o boyabásaftaca bacna soye jamama, jatbëbama, jobostérama y ínÿabiamana jtsayátsenayama. <sup>20</sup> Chë soyënga cocayé jtsobenana entsábioye Bëngbe Bëtsabe delante ndoñe tšabia jabemama; pero chë ndoñe ntsacuentšabiana ndayá jasama ora, ndoñe ntsobenana Bëngbe Bëtsabe delante ndoñe tšabia jabemama ca —Jesús tojánayana.

*Canÿe shembása inÿe luarocana ashjagoná Jesúsbeñe yojtsošbuaché (Mc 7.24-30)*

<sup>21</sup> Jesús chentšana, Tiro y Sidón luarëngoye tojtsanoñe. <sup>22</sup> Canÿe shembása Caná luarocá chentše inoyena; cha Jesúsbioye yojobeconá y mëntšá yojtsáyebuache: —¡Utabná, Rey Davídbentšana Entšá, šmotselastemá! ¡Atšbe bembe puerte entsesufrina, bacna bayëjbe juabna entsebmna causa ca!

<sup>23</sup> Jesús ndocá tbonjanjuá. As chabe uatsjëndayënga tmojanobobeconá y tmojanimpadá: —Chë shembása mëyana chaotsatoñe; bëngbe ústonoye yapa entsáyebuache ca.

<sup>24</sup> As Jesús tojánayana: —Bëngbe Bëtsá atše šonjichmó jtsanÿenama nÿe chë entsanga, chë mo ótsena oveshëngcá imomnënga Israeloquënga, y chë ndoñe judiëngna ndoñe ca.

<sup>25</sup> Pero chë shembása tojána, Jesusbe shecuatšentše tojanoshamentšé y tbojaninyana: —¡Utabná! Diosmanda pavor šmotsebema. ¡šmotsajabuache ca!

<sup>26</sup> Y Jesús tbojanjuá: —Chë judiënga mondmëna mo Bëngbe Bëtsabe basengcá y atše ácbioye tchojuajabuache y chëngbioye ndóñesna, nántsemna mo chë básengbe saná chënga cuaftsëbaquécá y quešënga ftsëbuajocá. Chca jamana ndoñe tšabá quenátsmëna ca.

<sup>27</sup> As cha tbojanjuá: —Arseñor. Pero chë quešëngnaca chëngbe nduiñëngbe mesëshentšana tmojatquécjanatemënga mondbase, chë nduiñënga tmojttesá ora. Chcasna, Diosmanda šmotsajabuache ca.

<sup>28</sup> Chora Jesús tbojaninyana:

—¡Shembása, Bèngbe Bètsábeñe tša ošbuachiyá comna! Ntšamo cojtsebošcá chca chaotsemna ca.

Y cach orscana chabe bembe tšabá yojttsatmëna.

### *Jesús ba šoquënga tojanashná*

<sup>29</sup> Jesús chentšana tojéftsanbocna y chë Galilea uafjajónaye tsachoye tojána. Chentšana, canýe batsjoye tojántsjua y choca tojanótbema. <sup>30</sup> Mallajta entšanga Jesús yojtsemnentše tmojánashajna, y coshetënga, jtanënga, tšabá jobónjuama ndobenënga, ndëbianga y ba šocana bomnënga imojtsënachaye. Jesusbe shecuatšentše tmojanéshejango y cha nyetscanga tojanashná. <sup>31</sup> Y chca orna, chë entšanga tmojáninýe: chë ndëbianga imojtsatoyebuambná, chë tšabá jobónjuama ndobenënga tšabá imojtsatmëna, chë coshetënga tšabá imojtsatana y chë jtanëngna yojtšëbinýna; y chama chënga corente ojnánänënga imojtsemna. Chora chënga tmojanontšë jëtschuayana chë Israelentša entšanga imojánadorana Bèngbe Bètsá.

### *Jesús canta uaranga boyabásenga saná tojanacaredadó*

*(Mc 8.1-10)*

<sup>32</sup> Chentšana Jesús, chabe uatsjëndayënga tojánachembo y tojanéyana: —Quem entšangbiama šontsengmena, er ya unga te chënga átšeftaca muentše montsemna y jasama tondaye quemátsbomna. Atše ndoñe quetsátsboše ntjascá cachëngbe yebnoye chënga jtichamuana, er benachiñe shëntsama nantsabuátëcja ca.

<sup>33</sup> As chabe uatsjëndayënga tmojantjá: —¿Ntšamo muatjobenaye quem luarentše, ndocna entšá ndoyenentše, chëfta entšangbiama saná jinýenama ca?

<sup>34</sup> Y Jesús tojanatjá: —¿Bueta tandëse šmojtsebmoma ca?

Y chënga tmojanjúá: —Canýsëfta tandëse y básefta beonatémënga ca.

<sup>35</sup> Chora Jesús tojanamëndá nyetsca entšanga fshantsiñe chamotbiamama. <sup>36</sup> As chë canýsëfta tandëse y chë beonatémënga tojanca; Bèngbe Bètsábioye chama tbojtanchuá, chë saná tojanjatá y chabe uatsjëndayënga tojanëjatá. Chentšana nyetsca entšangbioye tmojanacaredadó. <sup>37</sup> Nyetsca entšanga tmojanse jtoshachaye nyetšá. Y chentšana cabá canýsëfta bëts sbarëcua tmojanajutjé chë tojanójamëtemëngaca. <sup>38</sup> Chë tmojansënga imojamna canta uaranga boyabásenga, shembásenga y básenga ntjacuntacá. <sup>39</sup> Chentšana Jesús, chë entšanga tojtanichamó, barquëshoye tojánamashëngo y Magadán luaroye tojtšanoñe.

## 16

### *Chë fariseunga y saduceunga tmojánbošena Jesús chaoma canýe bëts soye*

*(Mc 8.11-13; Lc 12.54-56)*

<sup>1</sup> Fariseunga y saduceunga tmojána Jesús jinýama, y jisháchichiyama imojtseimpadana canýe bëts soye chaoma, as jtsetatšëmbuama Jesusbe obenana ndegombre Bèngbe Bètsábocana tainóbocanama.

<sup>2</sup> Pero Jesús tojanëjua: “Tšëngaftanga jetiñoye šmondbétsichamo: ‘Yëfse tšabe te echántsemna, er celoca buánganiñe entsemna ca.’ <sup>3</sup> Y cachëse šmondbétsichamo: ‘Mënté echanjuafte, er celoca buánganiñe y ibetiñe entsemna ca.’ Tšëngaftanga celoye jont-ješiyëse, ntšamo chë tempo yochtsemnama tša tšabá jayanama šmojtšobenëse, ¿ndáyeca ndoñe šmontsobena jtsetatšëmbuana ndaye bëts soye Bèngbe Bètsá quem tempo cmojtšinýanýnama? <sup>4</sup> Quem puerte bacna entšanga y ndošbuáchiyënga montseboše atše canýe bëts soye chaima, obenana jinýanýiyama; pero ndoñe chca quemochátinýe, sinó nýe chë ndayá yomna mo chë Bèngbe Bètsabe juabna oyebuambnayá Jonásoftaca tojanopasá soycá ca” —Jesús tojánayana.

Chora Jesús tojésanabashejuana y chentšana tojtšanoñe.

*Jesús tojanabuayená chë fariseungbe buatëmbana soyëngama  
(Mc 8.14-21)*

<sup>5</sup> Chë uafjajónaye chenguanocana chënga tmojtanabo ora, chë uatsjëndayënga yojésebnëtjomba tandëse jesocñana. <sup>6</sup> Chora Jesús tojanëyana: —Smochtsantješna; cuedado šmochtsebmna chë fariseunga y saduceungbe levadurama ca.

<sup>7</sup> Pero chë uatsjëndayëngna imojtsenatsëtsnaye: —Chca entsichamo, bënga tandëse ndoñe tmonjesocñama ca.

<sup>8</sup> Jesús chë soye yojtsetátšëmbo; chíyeca mëntšá tojanëyana: —¿Ndáyeca tandëšama šmojtseatsëtsná ca? ¡Tša batšatema ošbuáchiyana šmobomna! <sup>9</sup> ¿Cabá ndoñe cmontsësertana y ndoñe šmontsabouínýna chë shachna tandëšentšana shachna uaranga entšanga sënjanëjuatšema y bnëtsana uta sbarécua šmonjánajutjema? <sup>10</sup> ¿Y ndoñe šmontsabouínýna chë canýsëfta tandëšentšana canta uaranga entšanga sënjanëjuatšema y canýsëfta sbarécua šmonjánajutjema? <sup>11</sup> ¿Ndáyeca ndoñe cmontsësertana atše tandëšama ndoñe sëntsóyebuambnana? Cuedado šmochtsebmna fariseunga y saduceungbe levadurama ca —Jesús tojanëyana.

<sup>12</sup> As chora chë uatsjëndayënga tojanësertá, Jesús ndoñe tonjánayana chë tandëšentša levadurama cuedado jtsebmnanana ca, sinó ndayá chë fariseunga y saduceungbe bu- atëmbana soyëngama.

*Pedro tojánayana, Jesús chë Cristo bëtsemnama  
(Mc 8.27-30; Lc 9.18-21)*

<sup>13</sup> Jesús, Cesarea de Filipo luaroye tojánashjango ora, chabe uatsjëndayënga tojanatjá: —¿Nda ca entšanga imojtsichamo chë Bëngbe Bëtsá Entšá tbojanbemá yojtsemna ca?

<sup>14</sup> Chënga tmojanjuá: —Báseftanga montsichamo Juan chë Ubayaná ca, ínýengna Elías ca, ínýengna Jeremías y ínýengna tempsca inýe Bëngbe Bëtsabe juabna oyebuambnayá ca.

<sup>15</sup> As Jesús tojanatjá: —Y tšëngaftangna, ¿nda atše bëtsemnama ntšamo šmochjayana ca?

<sup>16</sup> Chora Simón Pedro tbojanjuá: —Acna chë Bëngbe Bëtsabe Uámana Uabuayaná condmëna, chë Bëngbe Bëtsá Ainabe Uaquiñá ca.

<sup>17</sup> Y Jesús tbojaniyana: —Simón, Jonasbe uaquiñá, oyejuayá cochanjoyena. Ndocna quem luarentša entšá chë soye checmatinýinýé, sinó atšbe Taitá, celoca endmëná. <sup>18</sup> Y mëntšánaca cbëyana: Mora acna Pedro o chë ndëtšbecá contsemna, y chë ndëtšbeñe atšbe bëts yebna chanjajebo, y ni Satanás, chabe obenánaca entšá jóbanama, queochatobenaye jtsepochócama. <sup>19</sup> Atše cbochanjätšetaye obenana, mo llavëfjá, entšanga Bëngbe Bëtsabe amëndayoye jamashënguama chamobenama. Bëngbe Bëtsáftaca chacojtsencuénta ora, canýe soye ndoñe chaondëtsemna ca chacojayanëse, Bëngbe Bëtsá cachcá echanjayana. Y cháftaca chacojtsencuénta ora, canýe soye aíñe chaotsemna ca chacojayanëse, Bëngbe Bëtsá echanjayana aíñe chca chaotsemna ca —Jesús tbojaniyana.

<sup>20</sup> Chentšana chabe uatsjëndayënga tojanamëndá ndocnábeñe ntsecuéntayana cha, Jesús, chë Bëngbe Bëtsabe Uámana Uabuayaná, chë Cristo bëtsemnama.

*Jesús tojánayana cha ibojamna jóbanana y jtayenana ca  
(Mc 8.31-9.1; Lc 9.22-27)*

<sup>21</sup> Chorscana Jesús tojanontšé chabe uatsjëndayënga jábuayenana cha ibojtsemna Jerusalenoye jama, y chocna chë bëtsëjemëngcá mándayënga, chë judiëngbe bachnangbe amëndayënga y chë ley abuatambayënga mochjanma cha puerta chaopadecema ca. Tojanëyana cha mochjanóba, pero unga tianoye yochtanayena ca. <sup>22</sup> Chora Pedro, Jesúsëftaca tojanoluaré y tojanontšé mëntšá uatsëtsnayana: —¡Atšbe Utabná, Bëngbe Bëtsá ndoñe chaondëlesenciá chca chaopasama! ¡Ndocna te quenaisopodena chca ácaftaca jopásana ca!



<sup>23</sup> As Jesús tojanobuértana y Pédrëbioye tbojaniyana: —¡Satanás, átšbentšana mojuaná! ¡Aca contseboše atše canýe bacna soye chašócochënguama! Pedro, acbe juabnënga Bëngbe Bëtsábiocana ndoñe quenatóbocana, sinó nýe entšángbentšana ca.

<sup>24</sup> Chentšana Jesús chabe uatsjédayënga tojanéyana: —Nda atšbe uatsjendayá jtsemnama tojtseboše, cháuyana nýe Bëngbe Bëtsá yobena sempre chabe vidiñe jtsemándayana ca, chabe quem luarentša soyënga cachcá chauesonýá atše juastama, y atšbiamá jasúfriama chaotseprontana y cruciñe jobanámnaca. <sup>25</sup> Nda tojtsama quem luarentše bëtscá soyënga jtsebomnama y atšbiamá jasúfriama ndoñe tontseprontana, chë nýetsca tescama yomna tšabe vida echanjopéridia. Pero nda quem luarentša soyënga cachcá tojëftsonýá atše juastama, masque chaóbana, chë nýetsca tescama yomna tšabe vida echántsebomna. <sup>26</sup> ¿Ndayama entšá buanjósérvia nýetsca quem luarentša soyënga jtsebomnana, chë nýetsca tescama yomna tšabe vida tojtsoperdese? Ndegombre, canýe entšá chë nýetsca tescama yomna tšabe vida tojtsoperdese, ndocna soye quenátsmëna cha chaobená joyiyama, chë nýetsca tescama yomna tšabe vida jtsebomnama. <sup>27</sup> Chë Bëngbe Bëtsá Entšá tbojanbemá, chabe Taitabe obenánaca y puerte buashinýinýaniñe echanjabo chabe angelotémëngaftaca, y chora cada cánýabioye bochántatšetaye cachcá ntšamo cada ona tojëftsemcá. <sup>28</sup> Ndegombre šcuayana: Báseftanga muentše montsemnënga ndoñe quemochatóbana, Bëngbe Bëtsá Entšá tbojanbemá amëndayacá jabana ntjëftsinýcá ca — Jesús tojánayana.

## 17

### *Jesús inýetsá tojanobinýná* (Mc 9.2-13; Lc 9.28-36)

<sup>1</sup> Chentšana chnënguana tianoye, Jesús tojëftsanëbiatše Pedro, Santiago y chabe catšata Juan, y ínýoye tojanënatse nýe chënga, canýe bëtš tjoye. <sup>2</sup> Chentše, chëngbe delante inýetsá cha tojanobinýná. Chabe jubiá shinýcá yojtsebuashinýinýana, y chabe uichëtjonéjuangana mo binýniñcá uafjantsëjuangá yojtsamna. <sup>3</sup> Chca orna, chabe uatsjédayënga tmojáninýe Moisés y Elías tbojanobinýná, Jesúseftaca encuéntaye.

<sup>4</sup> Chora Pedro, Jesúsbioye tbojaniyana: “Bëngbe Utabná, ¡tša tšabá bëngbiamá cuanmëna muentše jtsemnana ca! Tcojtsebošëse, unga tambotémënga atše chjapórma: cánýetema acbiamá, ínýetema Moisesbiamá y ínýetemna Elíasbiamá ca.”

<sup>5</sup> Pedro chca yojtsóyebuambnantscuana, canýe buashinýinýana jantšetëshe nýetscanga yojáutsbotse. Y chë jantšetëshoicana canýe oyebuambnayana tmojanuena mëntšá: “Mua atšbe bonshana Uaquiñá endmëna, atše chabiamá sëntsoyejuá. Cha šmochtseyeunana ca.”

<sup>6</sup> Y chë uatsjédayënga chca tmojanuena ora, tmojanoshamentšé y jubiaca fshantsóntscoñe tmojanotsejbéna, puerte auatjanánënga. <sup>7</sup> Chora Jesús chabe uatsjédayëngbioye tojanobeconá, tojánabojajo y tojanéyana: “Matëtsbananga; ndoñe matauatjëngana ca.”

<sup>8</sup> Y tsbanánoye tmojanontješé ora, Jesús nýe canýa tmojáninýe, ndocná inýa más.

<sup>9</sup> Chë tjocana imojtsatstsmaye ora, Jesús tojanamëndá: —Bëngbe Bëtsá Entšá tbojanbemá obanënguentsana candétayenëntscuana, ndocnábeñe chë šmonjinýe soyama šmattsecuéntaye ca.

<sup>10</sup> As chë uatsjédayënga Jesús tmojantjá: —¿Ndáyeca chë ley abuátambayënga mondbétsichamo, canmëna Elías jabana chë Bëngbe Bëtsabe Uámana Uabuayanabe natsana ca?

<sup>11</sup> Chora Jesús tojanéjua: —Ndegombre canýa Eliascá natsana echanjabo y ntšamo jtsemnama yomncá, lempe echánjabatsma ca. <sup>12</sup> Pero atše cbëyana, canýa mo Eliascá ya tonjabo, entšanga ndoñe chematanotëmbá y cháftaca entšanga tmonjanma lempe

ntšamo tmojanbošencá. Y cachcá, chë Bëngbe Bëtsá Entšá tbojanbemá entsangbe cucuatšine echanjasúfria ca —Jesús tojánayana.

<sup>13</sup> Chora chë uatsjédayënga tojanësertá, Juan chë Ubayanabiama Jesús chca yo-jtsëtsëtsnama.

*Jesús, canye bacna bayëja tbojanbojuaná*  
(Mc 9.14-29; Lc 9.37-43)

<sup>14</sup> Entšanga imojtsemnoye chënga tmojtashajna ora, canye boyabása tojanobeconá, Jesusbe natsanoica yojoshamentšiyey y tbojaniyana: <sup>15</sup> —Utabná, atšbe uaqiñá mot-selastemá. Cha ataque bontsësháchichana y puerte entsesufrina, er cha inye ora iñoye jtseshajayana y inye orna, buyeshoye jtsoshbuetšana. <sup>16</sup> Acbe uatsjédayëngbioye cha sënjuánatse y ndoñe chematobená jtseboshnama ca —cha tbojaniyana.

<sup>17</sup> As Jesús tojánayana: —¡Nyetšá ndošbuáchiyënga y bacna entsanga ca! ¿Buetayté šojtsemna tšëngaftangafaca jëftsemnana? ¿Buetayté uantado tšëngaftangafaca chjëftsemna? Moye chë básetema mánatse ca.

<sup>18</sup> Chora Jesús, chë basetëmbeñe bacna bayëjbioye tbojanácacana y chábentšana cha tojésanbocna. Cach orscana chë básetema tšabá yojsatsmëna.

<sup>19</sup> Chentšana, chë uatsjédayënga luaroca Jesúseftaca tmojanoyebuambá y tmojaniyana: —¿Ndáyeca bënga ndoñe fsënjobená chë bacna bayëja jtabocnama ca?

<sup>20</sup> Y Jesús tojanéyana: —Tšëngaftanga tša batsatema ošbuáchiyana bomna causa. Nde-gombre šcuayana: tšëngaftanga batsatema ošbuáchiyana šmojtsebonnëse, masque nye mo canye mostaza betiye jenaycá, quem tjoye šmatjayana: “Muentšana mojuaná y choye motsa ca”, quem tjañe chca nanjama, y tšëngaftanga lempe jamama šmattsobena.

<sup>21</sup> Pero chca bayëjënga jtëbuacnamna jobenayana nye Bëngbe Bëtsáftaca jencuëntase y chama tondaye ntjascá jtsemnëse ca —Jesús tojanéyana.

*Jesús cachiñe tojánayana cha ibojamna jóbanana y jtayenana ca*  
(Mc 9.30-32; Lc 9.43-45)

<sup>22</sup> Jesús y chabe uatsjédayënga cányiñe Galilea luaroye imojétsaye ora, cha tojanéyana: “Chë Bëngbe Bëtsá Entšá tbojanbemá entsangbe cucuatšine mochanjáboshjona, <sup>23</sup> mochanjóba, pero unga tianoye echántayena ca.” Chë causa chë uatsjédayënga puerte ngmënaca imojtsemna.

*Chë Bëngbe Bëtsabe bëts yebnama impuesto jtsatsquëcjnyama*

<sup>24</sup> Jesús y chabe uatsjédayënga Capernaumoye tmojánashajna ora, chë Bëngbe Bëtsabe bëts yebnama entsángbioye impuesto atjanayënga Pédrëbioye tmojána y tmojantjá: —¿Acbe बातëmbayá Bëngbe Bëtsabe bëts yebnama impuesto queonjëbetsatsquëcjnyaye ca?

<sup>25</sup> Y Pedro tojanéjua: —Aíñe, cha endbetsatsquëcjnyaye ca.

Chentšana, Pedro chë yebnoye tojánamashëngo ora, Jesús natsana mëntšá chábioye tbojaniyana: —Simón, ¿ntšamo catjájuaoye? ¿Quem luarentša reyënga ndëmuanjëngbioye impuesto imnétsayëngacaye y crocénana imnétsatjanaye: cach luarentše oyenëngbioye o chë inye luarocana ashjajnëngbioye ca?

<sup>26</sup> As Pedro tbojanjúá: —Chë inye luarocana ashjajnëngbioye ca.

Y Jesús tbojaniyana: —Chcasna, ndoñe quešnátsmëna chë atšbe Taitabe bëts yebnama impuesto jtsatsquëcjnyayana ca. <sup>27</sup> Pero ndocná mal chabonduínñyanamna uafjajónayoye motsa, anzuelëfjua cochjútsena y chë natsana chaojuásjana beona cochjuábocna. Cochjuayetëfjoná y choye crocénana cochanjínjyena y chánaca echanjoshjache atšbiama y acbiana jëtsjájuaama. Cochjëftsejatsëca y cochjatsboshjona ca —Jesús tbojaniyana.

## 18

*¿Nda chë más uamaná yomna?*  
(Mc 9.33-37; Lc 9.46-48)

<sup>1</sup> Chentsana chë uatsjéndayënga Jesúsbioye tmojanobeconá y tmojantjá: —¿Chë Bëngbe Bëtsábeyeca mandánëngbeñe nda chë más uamaná yomna ca?

<sup>2</sup> Chora Jesús canye basetëmbioye tbojanchembo y chëngbe tsëntsaca tbojanatsá. <sup>3</sup> Y tojánayana: —Ndegombre cbëyana, nda mo basetemcá ndoñe tontóbema y ndoñe chacá Bëngbe Bëtsabe soyënga tonjóyëngacñe, cha ndocna te queochatobenaye Bëngbe Bëtsabe amëndayoye jamashënguama. <sup>4</sup> Chca, nda tojtsejuabná canye nduamaná yomna y quem basetemcá yomna ca, cha chë Bëngbe Bëtsabe amëndayoca chë más uamaná echántsemna. <sup>5</sup> Y nda átšbeñe ošbuachiyá bëtsemnayeca, tbojofja canya mo quem basetëmbioycá, chana atše jofjana ca —Jesús tojánayana.

*Resjo yomna, nderado bacna soyënga cuanjama*  
(Mc 9.42-48; Lc 17.1-2)

<sup>6</sup> “Nda canye básetema átšbeñe ošbuachiyábioye tbojaingñé bacna soye jamama, chabiama más tšabá nántsemna canye bëts nantsnëbé chamotsetamošëntsšua y chë mar béjaye shbuatsëntsoye chamotsashbuetsë chabotsenatjëmbama. <sup>7</sup> ¡Tša lastema quem luarentša entsangbiama, chë ínÿenga bacna soye jamama chaócochënguama tmojtsamëngbiama! Nÿets tempo chca amënga mochanjëftsemna. Pero, ¡payajema chë inya bacna soye chaomama tojtsamá ca!

<sup>8</sup> “Chíyeca, acbe cucuátšeca o acbe shecuátšeca bacna soye tcojamëse, cochtsenástjango y bënoye cochtsëtšena. Acbiama más tšabá nántsemna celoye jamashënguana chë nÿetsca tescama yomna tšabe vida jtsebmomna, cucuatše ndbomná o cosheto, y ndoñe nÿets uta cucuátšeca o shecuátšeca chë nÿets tempo echanjesomñe íñeshoye chacmotsëstjango.

<sup>9</sup> Nderado acbe bomínÿeca bacna soye tcojinÿe y cachca soye tcojama, chë bominÿe cochtsenobuchjatsëca y bënoye cochtsëtšena. Acbiama más tšabá nántsemna, celoye jamashënguana nÿe canye bomínÿeca, y ndoñe nÿets uta bomínÿeca infierno ye chacmotsëstjango, chë bëts íñeshoye ca” —Jesús tojánayana.

*Chë ótsëna oveshabiamana cuento*  
(Lc 15.3-7)

<sup>10</sup> Mëntsánaca Jesús tojánayana: “Ni mo cánÿabioye quem tsëm ošbuáchiyënguentshana, chë mo basetëmëngcá mondmënënga, mo nduamanacá šmattsonÿaye. Ndegombre cbëyana, chëngbe angelotëmënga celoca, sempre atšbe Taitá celocáftaca mondëtsemna ca. <sup>11</sup> Er chë Bëngbe Bëtsá Entšá tbojanbemá tonjabo chë pochocánënga jtsemnana imojtsajnënga jabátšebacama.

<sup>12</sup> “¿Ntsamo tsëngaftanga šmatjájuaboye? Canye boyabása patse oveshënga tojtsabamna y ndeolpe canye chentša oveshá tojtsotše. ¿Chë boyabása ndoñe chë inÿe esconëfta bnëtsana y esconëfta oveshënga tjoca cachcá nanjesëñÿaye, jama chë ótsëna oveshá jetsenguanguama? <sup>13</sup> Y chë oveshá jetsinÿenama tojobenase, ndegombre chë boyabása más oyejuayá jtsemnana chë ótsëna oveshabiamana, y ndoñe nÿa chca chë inÿe esconëfta bnëtsana y esconëfta oveshëngbiama chë ndoñe tmonjanotšëngbiama. <sup>14</sup> Cachcá, tsëngaftangbe Taitá, Bëngbe Bëtsá, chë celoca endmëná, ndoñe quenátšboše ni canya quem basenguentshana mo otšenacá chaotsemna, bacna soyënga jtsamëse oyena causa ca” —Jesús tojánayana.

*Ntsamo cuanjama inya japerdónama*  
(Lc 17.3)

<sup>15</sup> “Nderado acbe catsata, bacna soye tcmojaborlase, cochjá, cánÿata šochjencuënta y cochjama cha chauenójuaboma, ndegombre bacna soye tcmojaborlama. Cha chacmojóyeunasna, acbe catsata cachiñe tšabá ácaftaca echántsmëmna. <sup>16</sup> Pero ndoñe tcmojóyeunasna, inÿe útata cochjáchembo chacmotjëmbambama, chca, chata chabouena ntsamo cochjauyanama y chamuayana ndegombre chca yomnama. <sup>17</sup> Y chata ndoñe tonjóyaunase, chentša Bëngbe Bëtsábeñe ošbuáchiyënga macuntá. Y chënga ndoñe

tonjóyaunasna, cochjayana cha yomna mo canya Bëngbe Bëtsábioye nduabuatmacá, mo canye ndoñe judiyá ca o canye bacna entsá mo canya Romocama impuesto entsángbioye atjanayacá yomna ca.

<sup>18</sup> “Ndegombre cbéyana: Tšëngaftanga Bëngbe Bëtsáftaca chašmojtsencuénta ora, chašmojayana canye soye ndoñe chaondëtsemna ca, Bëngbe Bëtsá cachcá echanjayana. Y cháftaca chašmojtsencuénta ora, chašmojayana canye soye aíñe chaotsemna ca, Bëngbe Bëtsá echanjayana aíñe chca chaotsemna ca.

<sup>19</sup> “Mëntšánaca cbéyana: Nderado útata tšëngaftanguentšana quem luarentše tbojenoyeuná Bëngbe Bëtsáftaca jencuéntama ndayánaca jótjañama, Bëngbe Bëtsá chë celoca endmëná pronto chë soye cmochanjátšataye. <sup>20</sup> Ndayentše útata o únganga tmojënefjna, átšbeñe ošbuáchiyënga bëtsemnama, chentše atše chëngbe tsëntsaca chántsemna ca” —Jesús tojánayana.

<sup>21</sup> As Pedro tojána y Jesúsbioye tbojantjá: —Bëngbe Utabná, ¿atšbe catšata bacna soye šojaborlase, bueta soye šojtsemna cha japerdónana? ¿Canysëfta soye ca?

<sup>22</sup> Y Jesús tbojanjuá: —Ndoñe nye canysëfta soyama quechatatsëtsná, sinó canysëfta bnëtsana soye canysëfta ca.

### *Ndayá inopása chë japerdónama ndëbošëngaftaca*

<sup>23</sup> Mëntšánaca Jesús tojanéyana: “Cbochanjáuyana ntšamo Bëngbe Bëtsabe amëndayana yomnana. Endmëna ntšamo canye réyëftaca tojanopasacá. Cha yojábošena chabe oservénënga crocénana jtsëtjañana. <sup>24</sup> Jtsëtjañama yojóntša orna, canye boyabása imojuánatse, chë réybioye mallajta crocénana ibnandebena. <sup>25</sup> Chë oservená tondaye yonjábomna chë ndebénama jëtsjájuama; asna chë rey yojamánda cha chamotsiye nyets tempo nye ínÿabiama chaotsoservénama, chabe shema y chabe básengnaca, y lempe ntšamo yojanbomncánaca, y chca chë ndebénama jtopágama. <sup>26</sup> Chora chë oservená chë reybe shecuatšentše yojoshamentšiye y ibojtseimpáda: ‘Taita, Diosmanda šmotsëuantajema. Atše lempe cbochanjëtsëntšabuachiye ca.’ <sup>27</sup> Chë reyna chë boyabásabiama ibojóngmia; as chë ndebénana ibojtseperdóna y ibojëtsboshjona.

<sup>28</sup> “Chë oservenana chentšana yojésebozna y benachiñe inÿe oservenáftaca ibojenbetše, cach mandadbiama trabajayá. Chë inÿe oservenana nye batšatema crocénana chábioye ibnandebena. Chora chë oservená chë enutábioye tamošajentšana ibojishache y ibojóntša jtsëtajuashbebianana y mëntšá ibojauyana: ‘¡Ndebénana šmatsëntšabuaché ca!’ <sup>29</sup> Chora cha chë oservenabe shecuatšentše yojoshamentšiye y ibojtseimpáda: ‘Diosmanda šmotsëuantajema. Atše lempe cbochanjëtsëntšabuachiye ca.’ <sup>30</sup> Pero chë oservená ndoñe yonjábošena, sinó yojama chë inÿe oservenábioye cárceloye chamotsëtámiamana, chë ndebénana candëtsjájëntscuana. <sup>31</sup> Chë inÿe oservénënga chca imojinÿe ora, puerte yojóngmia y imojá lempe ntšamo yojopasacá chëngbe rey jacuéntama. <sup>32</sup> As chë rey yojamánda chë boyabása jobetšana, y ibojauyana: ‘¡Puerte bacna oservená! Sconjaimpadáyeca, nyets ndebénana tcbontseperdoná. <sup>33</sup> Acnaca cachcá cmondmëna chë cach aquëcá muentša trabájayabiama jóngmiana, ntšamo atše acbiama šonjongmecá ca.’ <sup>34</sup> Y tša chë rey ibojtsetna; as yojamánda jabuache chamotsetsetšená nyets ndebénana candëtsjájuantscuana ca” —Jesús tojanacuntá.

<sup>35</sup> Chora Jesús tojánayana: “Atšbe Taitá, celoca endmëná, cachcá tšëngaftangaftaca echanjama, tšëngaftangbe catšata ndoñe ndegombre nyets ainánaca šmonjaperdonase ca.”

## 19

*Ndayá Jesús tojanabuatambá chë bouamnënga tmojtsenëtšenama (Mc 10.1-12; Lc 16.18)*



1 Chë soyënga tojánayanentšana, Jesús Galilea luarentšana tojtsanoñe y Judeoye tojánashjango, Jordán chenguánoica. 2 Ba entšanga tmojanasto y chentše šoquënga tojanashná.

3 Básefta fariseunga Jesúsbioye tmojanobeconá y jisháchichiyama mëntšá tmojantjá: —¿Queojtselesenciana canye boyá nÿe ndayámnaca chabe shémbioye cachcá jesonÿayama ca?

4 As Jesús tojanějua: —¿Tšëngaftanga ndoñe chë Bëngbe Bëtsabe uabemana palabrenguiñe šmëndualía, Bëngbe Bëtsá, chë entšanga tojanabiamá, quem luare jobojátšama ora “boyá y shema tojánabiamama”? 5 Y Bëngbe Bëtsá tojánayana: “Chíyeca boyabása chabe taitá y chabe mamá echanjésabashejuana, chabe shémaftaca jenútanama, y chë útata mo canÿacá bochántsemna ca.” 6 Y chca, ya ndoñe útata quebochátsmëna, sinó mo nÿe canÿacá. Chcasna, entšá ndoñe chaondémbema ndayá Bëngbe Bëtsá mo canÿiñcá tojëftsema soye ca —Jesús tojánayana.

7 Chora chë fariseunga tmojanianana: —¿As, ndáyeca Moisés tojanmandá, chë shémbioye canye uabemana tsbuanácha juiyiyana jtsenëtšenama y cachcá jesonÿayana ca?

8 Y Jesús tojanéyana: —Tšëngaftanga Bëngbe Bëtsabe mandënga jóyëngacñama ndoñe quešmátsboše causa, Moisés tmojanalesenciá shémbioye jesëtšenana. Pero quem luare jobojátšama orna, ndoñe chca quenjatsmëna. 9 Atše cbéyana, nda chabe shémaftaca tbojtsenëtšena y chca tojopasá ndoñe chë shema chabe boyábioye ínÿaftaca tbontseingñé causa, y chë boyá ínÿaftaca tojtóbouamasna, cha chë natsana shémbioye ínÿaftaca jtseingñayana ca —Jesús tojánayana.

10 Chora chabe uatsjëndayënga tmojanianana: —Chca chë boyá y shémaftaca tojtsemnësna, ndoñe tšabá yontsemna jobouamayana ca.

11 Y Jesús tojanéyana: —Nÿetscanga ndoñe quemátobena chë palabrenga jóyëngacñana, nÿe chë Bëngbe Bëtsá tojama jóyëngacñama chamobenama, chëngna aíñe. 12 Ba soyënga comna ndaye causa chë boyabásenga ndoñe ntsoybenana jobouamayana. Inÿenga jónÿnana jobouamayama ndobenënga, ínÿengbioye cach entšanga jábiamana jobouamayama ndobenënga y ínÿengna, nÿets tempo nÿe Bëngbe Bëtsabe amëndayama oservena causa ca —tojanéyana.

*Jesús, basetémëngbiana Bëngbe Bëtsábioye tbojanimpadá  
(Mc 10.13-16; Lc 18.15-17)*

13 Entšanga basetémënga Jesúsbioye tmojanënatse, cha chauabojajuama y Bëngbe Bëtsábioye chëngbiana chaboimpadama. Pero chë uatsjëndayëngna tmojanontsé chë basetémënga unachayënga jtsécacanana. 14 Chora Jesús tojanéyana: “Cachcá mónÿaye chë basetémënga átšbioye chamuabo y ndoñe matëuyanana; er Bëngbe Bëtsabe amëndayana endmëna mo quem basetémëngcá imomnëngbiana ca.” 15 As chë basetémënga tojánabojajo, Bëngbe Bëtsá jaimpádase; y chentšana cha tojtsanoñe.

*Canye bomna bobontse Jesúsbioye tojána  
(Mc 10.17-31; Lc 18.18-30)*

16 Chentšana, canye boyabása tojána Jesús jinÿama y mëntšá tbojantjá: —Buatëmbayá, ¿ndaye tšabe soye chjama chë nÿetsca tescama yomna tšabe vida jtsebomnama ca?

17 Y Jesús tbojanjuá: —¿Ndáyeca chë tšabe soye ndayá bëtsemnama šcojtsetjaná ca? Tšabia nÿe canÿa endmëna: Bëngbe Bëtsá. Aca chë nÿetsca tescama yomna tšabe vida jtsebomnama tcojtsebošëse, mandënga cochtsobedecena ca.

18 Chora chë bobontse tbojantjá: —¿Ndaye mandënga ca?

Y Jesús tbojanjuá: —“Ndoñe catjóba, acbe shema ínÿaftaca ndoñe cattseingñaye, ndoñe catjatbëba, ndoñe catjuaboínÿena. 19 Acbe bëtsëtsata stëtsoye ndoñe catjáquedaye y ndëmua entšánaca cochtsebobonshana ntšamo cach aca cuenobobonshancá ca” —Jesús tbojanianana.

<sup>20</sup> Chora chë bobontse tbojanjuá: —Atše lempe chca nyets tempo sëndocumplina. ¿Ndayá más šojtsebuáshbena ca?

<sup>21</sup> As Jesús tbojaniana: —Aca lempe tšabá jamama tcojtsebošëse, motsa, acbe bomna soyënga cochjetsatobuiye y chë crocénana, ndbomnjémënga cochtsatšataye; chca, bëts uacanana soye celoca cochántsebomna. Chentšana cochjabo y šcochjuasto ca.

<sup>22</sup> Chë bobontse chca tojanuena ora, ngmënaca yojsatoñe, cha corente bomná bemna causa.

<sup>23</sup> Chora Jesús chabe uatsjédayënga tojanëyana: —Ndegombre cbëyana, puerte totcá entsemna canye bomnabiana Bëngbe Bëtsabe amëndayoye jamashënguama ca. <sup>24</sup> Chë bomnabiana cachiñe šcuatayana: Más paselo entsemna canye camello chë coshuf-jentša atëfñëjana chauachnëngo, y ndoñe canye bomná Bëngbe Bëtsabe amëndayoye jamashënguana ca.

<sup>25</sup> Chabe uatsjédayënga chca tmojanuena ora, puerte ojanánënga imojtsemna y imojtsichamo: —As, ¿nda yochjobenaye atsbocaná jtsemnama ca?

<sup>26</sup> Jesús chënga tojanënyányé y tojanëyana: —Entšanga ndoñe quemátobena jamama canya atsbocaná chaotsemnama, pero Bëngbe Bëtsá aíñe, er cha nyetsca soyënga jamama endobena ca.

<sup>27</sup> Chora Pedro tbojaniana: —Aca contsonyá, bënga lempe chë fsëndbomna soyënga fsënjéseboshjona y ácaftaca fsëntsajna. As, ¿ndayá bënga fchjýyëngacñe ca?

<sup>28</sup> As Jesús tojanëyana: —Ndegombre cbëyana, nyetsca quem luarentša soyëngama mo tsmécá jtsemnama tempo chaojobuache ora, chë Bëngbe Bëtsá Entšá tbojanbemá chabe buashinýinýana bëts tšenëšiñe reycá echanjót bema jtsemándayama; y tšëngaftanga, chë atše šmëstonëngna, chora bnëtsana uta uámana tbemaniñe šmochanjotbiama mo reyëngcá, chë Israeloca bnëtsana uta bëts pamillentša entsangbiama jayanama tšabá o ndoñe tšabá tmonjamama. <sup>29</sup> Y ndëmuanýënga, atše jaserviama tmojëftseboshjona cachëngbe yebna, catsátanga o uabëngana, befta o bebmá, básënga o fshantsënga, chë soyëngama patse soye más mochanjýyëngacñe y chë nyetsca tescama yomna tšabe vídnaca. <sup>30</sup> Pero banga mora uámanënga imomnënga, nduámanënga mochántsemna; y banga mora nduámanënga imomnëngna, uámanënga mochántsemna ca —Jesús tojánayana.

## 20

### *Chë trabájayëngbiama cuento*

<sup>1</sup> Mëntsánaca Jesús tojánayana: “Bëngbe Bëtsabe amëndayana endmëna mo canye bëts jajañe nduiñcá. Chë nduiña canye te cabá cachëse yojábocna peonga janguanguama, chabe uvas betiyënga jajañe chamotrabajama. <sup>2</sup> Chë nduiño peonga yojánýena orna, imojenóyeunaye canye tescama canye denario crocénana jtëbuénayama. As chora yojichamuá chë uvas betiyënga jajoye jatrabájama. <sup>3</sup> Mo base mošenana ora, chë nduiño cachiñe yojábocna y plazoca atsanënga ínýënga yojanye, tondaye ntsamcá. <sup>4</sup> As yojáyana: ‘Tšëngaftángnaca atšbe uvas betiyënga jajoye motsajna jatrabájama y ntšamo chašmojamcá cbochtëbuénaye ca.’ Y chë entsanga imojá. <sup>5</sup> Nyetsto ora y bëts mošenana ora, chë nduiño cachiñe yojábocna y cachiñe cachcá yojopása. <sup>6</sup> Mo la cinco ora, chë nduiño cachiñe yojábocna y chenache ínýënga yojánýena, tondaye ntsamcá. As yojátjaye: ‘¿Ndáyeca tšëngaftanga nyets día ntjatrabajacá muentše šmotsomñe ca?’ <sup>7</sup> Y chënga imojojuá: ‘Ndocná bënga chešnataimpadá causa ca.’ As chë nduiño yojáyana: ‘Tšëngaftángnaca atšbe uvas betiyënga jajoye motsajna jatrabájama y cbochtëbuénaye ca.’

<sup>8</sup> “Y ya bien jetiñe yojtsemna orna, chë nduiño chabe caporálbioye ibojauyana: ‘Peonga metsachembo y cochtëbuénaye. Chë ústonoye tmojáshjajnënguentsana cochjabojátša y chë natsana tmojáshjajnënga ústonoye ca.’ <sup>9</sup> Y chë mo la cinco ora imojáshjajnënga imojobeconá, y cada ona canye denario crocénana yojtáyentšbuachiye. <sup>10</sup> Chentšana, chë natsana jatrabájama imojáshjajnënga yojsamna jobéconama y chënga imojétsejuabnaye

más crocénana mochjanóyengacñe ca. Pero chëngnaca cach canye denario crocénana yojtëbuénaye. <sup>11</sup> Chca imojóyengacñe orna, chënga imojóntša chë nduiñbiana bacá ichámuana, <sup>12</sup> mëntšá: ‘Quemënga chë ústonoye tmonjášhjajnënga nye canye horatema tmonjatrabajá; ntšamo bënga šcontëbuenacá, cachcá chënga contëbuená y bëngna nyets día jabuache fsënjatrabajá y corente jënyá fsënjauantá ca.’

<sup>13</sup> “Pero chë nduiño canya chca yojsichamuábioye ibojojuá: ‘Sobreno, acbiana ndocna ndoñe tšabe soye chiyatsma. ¿Ndoñe canye denario crocénana canye tescama tbonjenoyeuná ca? <sup>14</sup> Chcasna, acbe uacanana crocénana mesocñe y motsatoñe. Atše sëntseboše chë ústonoye jatrabájama tojashjanguá jtabuénayana, cachcá ntšamo aca tcojtabuenacá. <sup>15</sup> Chca entsemna, er atše sëndobena atšbe crocénana nye ndayánaca jamana. ¿O aca envidia cojtsebomna, atše tšabia tsmënana ca?’ ” —cha yojayana.

<sup>16</sup> Chora Jesús tojánayana: “Y chca, chë mora nduámanënga imomnënga, uámanënga mochántsemna; y chë mora uámanënga imomnëngna, nduámanënga mochántsemna ca.”

*Jesús cachiñe tojánayana cha jóbana y jtayenama*  
(Mc 10.32-34; Lc 18.31-34)

<sup>17</sup> Chënga Jerusalenoye imojtsaye ora, Jesús barie tojánachembo chabe bnëtsana uta uatsjëndayënga y tojanëyana: <sup>18</sup> “Tšëngaftanga šmontsonyá mora bënga Jerusalenoye montsajnama. Chocna chë Bëngbe Bëtsá Entšá tbojanbemá, chë bachnangbe amëndayënga y ley abuátambayëngbe cucuatšinë mochanjáboshjona, y chënga mochanjayana jóbana cha ibojtsemna ca, <sup>19</sup> y chë ndoñe judiëngbe cucuatšinë mochanjáboshjona chënga chamotsáboyejuanama, chamotjanjama y chamocrucificama. Pero unga tianoye cha echántayena ca” —Jesús tojánayana.

*Chë Santiago y Juanbe mamabe impadana soye*  
(Mc 10.35-45)

<sup>20</sup> Chentšana, Zebedeobe uaquiñatbe mamá chabe uaquiñátaftaca Jesúsbioye tojanobeconá, chabe shecuatšentše yojoshamentsiye canye pavorama jaimpádama. <sup>21</sup> As Jesús tbojantjá: —¿Ndayá cojtseboše ca?

Y chë shembása tbojaniana: —Aca reycá chacojtsemánda ora, cochjamánda atšbe uaquiñata chabótbema canya acbe catšbioica y chë inya acbe uañicuayoica, ácaftaca chabotsemándama ca.

<sup>22</sup> Y Jesús tojanëjua: —Ntšamo šmontsotjanañama, tsëndata ndoñe quešnátstatšëmbo ca. Ntšamo atše chjasufriacá, ¿tsëndátnaca cachcá jasúfriama tašatjobenaye ca?

Y chata tbojanjuá: —Aíñe, fchanjobenaye ca.

<sup>23</sup> Chora Jesús tojanëjua: —Ndegombre, tsëndátnaca atšcá šochanjasúfria, pero atše ndoñe quetsátobena jamándana atšbe catšbioica o atšbe uañicuayoica chašótbemama. Chë útentše entsemna ndëmuanyëngbiana atšbe Taitá tojaprontacá ca.

<sup>24</sup> Chë inye bnëtsana uatsjëndayënga chca tmojanuena ora, chë uta catšátaftaca tmojanotjayaná. <sup>25</sup> Chora Jesús chë uatsjëndayënga tojánachembo y tojanëyana: —Tšëngaftanga šmondëtatšëmbo, chë ndoñe judiëngbeñe chë reyënga lempe jtsemándayana nya mo nduiñënga cuaftsemncá; y chë bëtsëtsa entsangna chëngbe obenánaca jtsemándayana, ndayánaca jtsamëse, chë inye entsanga sempre chamotsayaunanama.

<sup>26</sup> Pero tšëngaftangbeña ndoñe chca chaondëtsemna. Inyetsá; masna, nda tšëngaftanguentše chë más uamaná jtsemnana tojtsebošá bontsemna chë inyënga jtsaservénana. <sup>27</sup> Y ndánaca tšëngaftanguentšá chë más uamaná jtsemnana tojtsebošá bontsemna jtsemnana mo nye inyabiama nyets tempo oservenacá. <sup>28</sup> Cachcá, chë Bëngbe Bëtsá Entšá tbojanbemá ndoñe chenátabo cha chamotseservénama, ndayá inyënga jabáserviama. Y mo nda inyënga játsebacama cuafjëtšajocá, cha echanjóbana, ba entsanga atsebácanënga chamotsemnana ca —Jesús tojánayana.

*Jesús uta jtanata tojanashná**(Mc 10.46-52; Lc 18.35-43)*

<sup>29</sup> Chënga, Jericó bëts pueblentšana tmojánbocana ora, ba entšanga Jesús imojtsëstona.

<sup>30</sup> Uta jtanata benache juachañe ibnatbemana. Jesús chëjana vojtsachnëjuanama chata tbojanuena ora, tbojanontsé uayebuáchana: —¡Utabná, Davídbentšana Entšá, šmotsalastemá ca!

<sup>31</sup> Entšanga chë jtanátbioye tmojtsanëcácana iytëca chabotsemnana, pero chatna más ibojtsáyebuache: —¡Utabná, Davídbentšana Entšá, šmotsalastemá ca!

<sup>32</sup> As Jesús vojtsaye, chë jtanata tojánachembo y tojanatjá: —¿Ndayá šojtseboše atše tsëndatbiamama ca?

<sup>33</sup> Y chata tbojanjuá: —Utabná, bëndata chabuatëbínýnama ca.

<sup>34</sup> Jesús chatbiamama tbojanongmé y tojánabuchbojajo. Cachora chë jtanata tsabá yojtëbinýna y Jesús tmojanasto.

**21***Jesús Jerusalenoye tojánashjango**(Mc 11.1-11; Lc 19.28-40; Jn 12.12-19)*

<sup>1</sup> Ya Jerusalenoca béconana imojtsemna y canýe pueblo Betfagé ca uabáinoca tmojánashjango, canýe tjashe Olivos ca uabáinentše. Chora Jesús uta chabe uatsjëndayata tojanichamó, <sup>2</sup> y mëntšá tojanéyana: “Tsëndatbe natsana entsemna base pueblotémoye motsata. Cachora canýe burrá utsbuaná šochanjínýena y cháftaca canýe burrotema echántsemna. Sochjuajafjoná y šochjuánatse. <sup>3</sup> Nderado nda ndayánaca chacmojáuyanëse, šochjauyana: ‘Bëngbe Utabná bontsájaboto y chentšana camuentše echanjabáisabashejuana ca.’ ”

<sup>4</sup> Chca tojanopasá, cachcá chaotsemnana ntšamo chë Bëngbe Bëtsabe juabna oye-buambnayá tojanayancá. Cha mëntšá tojanábema:

<sup>5</sup> Jerusalén bëts pueblentše oyenënga mëyana:

“Minýënga, tšëngaftangbe Rey chentše tšëngaftangbioye entsabó, ndoñe mo canýa cachá bëtsá enobiamnayacá; canýe búrrbeñe enjaquená; canýe burrotémiñe, canýe uatrabájaye bayabe šešónbeñe ca.”

<sup>6</sup> Chora chë uatsjëndayata tbojána y tbojanma ntšamo Jesús tojanamëndacá. <sup>7</sup> Chë uatsjëndayatna chë burrá y chë burrotema tmojanënatse, entsáyëjuangá chátbeñe tbojanátatse y chora Jesús chábeñe tojanenoyayé. <sup>8</sup> Bëtscá entšanga chëngbe entsáyá chë benachëjana imojtsëtëtsatsana, y ínýengna betiyeshënguiñe buacuafjënga imojtsetcoye y chiñe imojtsequëcñá. <sup>9</sup> Y chë natsana imojtsajñënga y chë ústonoyënga mëntšá imojtsaiuáyebuache: “¡Rey Davídbentšana Entšá matschuanga ca! ¡Corente bendición bomná, chë Bëngbe Utabnabe obenánaca tojabá! ¡Bëngbe Bëtsá celocá matschuanga ca!”

<sup>10</sup> Jesús Jerusalenoye tojánamashëngo ora, nýetsca entšanga imojtsenbouenana y banga imojtsenotíciaye: —¿Nda mua yojtsemna ca?

<sup>11</sup> Y chë entšanga imojtsëjuana: —Chë Bëngbe Bëtsabe juabna oye-buambnayá Jesús, chë Galileoca pueblo Nazaretocá ca.

*Jesús, Bëngbe Bëtsabe bëts yebnentsana enënga y obuámnayënga tojtanëbuacna**(Mc 11.15-19; Lc 19.45-48; Jn 2.13-22)*

<sup>12</sup> Chentšana Jesús, Bëngbe Bëtsabe bëts yebnoye tojánamashëngo y chë entšanga chentše imojtsena y imojtsobuámnayënga chentšana tojtanëbuacna. Chéntšnaca imojtsemna entšanga canýe crocénana enënga, y chë crocénana nýe Bëngbe Bëtsabe bëts yebnentsama inoservenana. Chëngbe mesëshangá tojtsanenásatajchquëca y chë palomatema enëngbe tšenëšëngnaca. <sup>13</sup> Y tojanéyana: “Bëngbe Bëtsabe uabemana palabrenguiñe cha



mëntśá tojánayana: ‘Atśbe bĕts yebna echantsabaina átśeftaca encuéntaye yebna ca’; pero tśĕngaftangna, atbĕbanĕngbe oyeniñe chĕ yebna śmojtsebema ca” —Jesús tojanĕyana.

<sup>14</sup> Chentśana, Jesús yojtsemnoye Bĕngbe Bĕtsabe bĕts yebnentśe, jtanĕnga y coshetĕnga tmojanobeconá, y cha tojanashná. <sup>15</sup> Chĕ bachnangbe más uámana amĕndayĕnga y ley abuátambayĕnga, Jesús bĕts soyĕnga yojtsamama tmojáninĕ ora, y chĕ basetĕmĕnga Bĕngbe Bĕtsabe bĕts yebnentśe imojtsayebuáchama tmojanuena ora, tśa tmojan-otjáyana. Chĕ basetĕmĕnga mĕntśá imojtsáyebuache: “¡Chĕ Rey Davíd bĕtsana Entśá matschuanga ca!” <sup>16</sup> As Jesús tmojanianya: —¿Ntśamo chĕ basetĕmĕnga montsichamcá quectśuenana ca?

Y Jesús tojanĕjua: —Aíñe, sĕntsuenana. Pero, ¿tśĕngaftanga Bĕngbe Bĕtsabe uabemana palabrĕnguiñe chĕ soyama ndoñe śmĕndualía? Chiñe mĕntśá endayana: Chĕ basetĕmĕnga y ochóchaye śeśonatĕmĕngbe cantĕngaca aca tcojama entśanga chacmotsatschuanama ca.

<sup>17</sup> Chora Jesús chĕnga tojĕsanabashejuana y Jerusalemĕntśana Betania puebloye tojt-sanoñe; y chentśe chĕ ĩbeta tbojánbobinĕna.

*Jesús tojánayana canĕ higo betiye ndoñe más chaondĕśhájona ca*  
(Mc 11.12-14, 20-26)

<sup>18</sup> Chĕ te cachĕse, Jesús cach bĕts puebloye yojtśa ora, tbojánishĕntsena. <sup>19</sup> Chora canĕ higo betiye benache juachaca yojinĕ; as choye yojobeconá, pero nĕ ena tsbuanáchĕnga chiñe yojinĕna. As Jesús chĕ higo betiyoje tojánayana: “¡Ndocna te más chaondĕśhájona ca!” Y betśco chĕ higo betiye tojtśanbuashá.

<sup>20</sup> Chĕ uatsjĕndayĕnga chca tmojáninĕ ora, imojenjnaná y Jesús tmojantjá: —¿Ntśamo chca chĕ higo betiye canĕ ora tojtśebuashá ca?

<sup>21</sup> Y Jesús tojanĕjua: —Ndegombre cbĕyana, tśĕngaftanga Bĕngbe Bĕtsábeñe ośbuáchiyana śmojtsebmna y chabiamana ainaniñe ndoñe inĕtśá śmonjátsjuabnase, śmochantsobena jamama ndoñe nĕ ntśamo atśe quem higo betiye ca sĕnjamcá, sinó quem tjoje, “muentśana mojuaná y uafjájónayoye moshbuetśe ca” śmojayanĕse, chca jochnĕnguana. <sup>22</sup> Y Bĕngbe Bĕtsáftaca chaśmojtśencuénta ora, chábeñe jtsośbuáchiyĕse, lempe ntśamo chaśmojtjañcá śmochanjóyĕngacñe ca —Jesús tojánayana.

*Jesusbe obenana*  
(Mc 11.27-33; Lc 20.1-8)

<sup>23</sup> Chca tojanopasá chentśana, Jesús Bĕngbe Bĕtsabe bĕts yebnoye tojánamashĕngo. Chentśe yojtsabuátambantscuana, bachnangbe amĕndayĕnga y judiĕngbeñe bĕtsĕjemĕngcá amĕndayĕnga tmojanobobeconá y tmojantjá: —¿Ndaye deréchoca chĕ contśama soyĕnga aca cojtśama ca? ¿Chca jtsamama nda mando tcmĕnjatśá ca?

<sup>24</sup> As Jesús mĕntśá tojanĕjua: —Atśnaca canĕ soye sĕntsebmna tśĕngaftanga jat-jayama, y queśmojojuase, átśnaca cbochjáuyana ndaye deréchoca atśe chca stśama. <sup>25</sup> ¿Nda Juan chĕ Ubayaná tbojanichmó entśanga jubáyama, Bĕngbe Bĕtsá o entśanga ca? —Jesús tojanĕyana.

Chama chĕnga tmojanontśĕ mĕntśá enatsĕtsnayana: “ ‘Bĕngbe Bĕtsá ca’ chamoj-jojuase, cha śochanjáuyana: ‘As, ¿ndáyeca chĕ tcmojanabuayená soyĕnguiñe ndoñe śmonjanośbuaché ca?’” <sup>26</sup> Pero ndoñe quemuátobena jayanana ‘entśanga ca’; muentśa entśangbiamana bĕnga montśauatja, er nĕyetscanga mondĕjuabná Juan ndegombre Bĕngbe Bĕtsabe juabna oyebuambnayá yomna ca.” <sup>27</sup> Chcasna chĕnga Jesús tmojanjuá: —Bĕnga ndoñe queftśatśatśĕmbo ca.

Y as Jesús tojanĕyana: —Atśe cach ndoñe quechochatĕyana ndaye deréchoca chca stśama ca.

*Chĕ uta uaquiñátbiamana cuento*

<sup>28</sup> Chora Jesús entšanga tojanatjá: —¿Ntšamo tšëngaftanga quem soyama šmatjayana? Canye boyabása uta uaquiñata yojánabamna, y cányabioye ibojauyana: “Uaquiñá, mënté motsa atšbe uvas betiyënga jajoye jatrabájama ca.” <sup>29</sup> Chë uaquiñá ibojojuá: “¡Jama ndoñe quetsátsboše ca!” Pero botamana yojenójuaboye y pronto choye yojá. <sup>30</sup> Chentšana chë taitá chë inye uaquiñábioye cachcá ibojauyana. As cha ibojojuá: “Arseñor, aíñe chanjá ca.” Pero ndoñe yonjá. <sup>31</sup> ¿Chë útatentšana ndëmuanýá tojanma ntšamo chë taitá yojabošcá ca? —Jesús tojanatjá.

Y chënga tmojanjuá: —Chë natsaná ca.

Chora Jesús tojanéyana: —Ndegombre cbëyana, chë Romocama entšángbioye impuesto atjanayënga y chë bacna vida bomna shembásenga, tšëngaftangbiana más montseprontana Bëngbe Bëtsabe amëndayoye jamashënguama. <sup>32</sup> Juan chë Ubayaná tonjánabo tšëngaftanga jábuayenama ntšamo jtsiyenana cmamnama, ntšamo Bëngbe Bëtsá yobošcá, y tšëngaftanga chë tmojanabuayená soyënguiñe ndoñe chešmatanošbuaché; y chë cuenta, chë Romocama entšángbioye impuesto atjanayënga y bacna vida bomna shembásengna aíñe chábeñe montsanošbuaché. Y tšëngaftanga, masque ntšamo chënga Bëngbe Bëtsabeñe imojtsošbuáchema lempe šmojinýese, chë juabnayana ndoñe šmonjatrocá, chábeñe jtsošbuáchiyama ca —cha tojanéyana.

*Chë puerta bacna trabájayëngbiana cuento  
(Mc 12.1-12; Lc 20.9-19)*

<sup>33</sup> Mëntšánaca Jesús tojánayana: “Inye cuento šmochjatuena chašmuatsjínýama: Canye jajañe nduiño uvas betiyënga yojáje y chë shëconana yojajétja. Chë uvasësangá juantsëtetjamna canye base luare yojajutjo y canye tsbanana jebna soye yojapórma chentše jtsaishanyama. Chentšana, inye trabájayënga chë jajañe yojárrendaye y chana inye luaroye yojtsoñe. <sup>34</sup> Chë uvasësangá juashacama tempo yojobuache orna, chë jajañe nduiño básefta oservénënga yojichamuá chë arréndayënga jáuyanama ntsachetšá chë nduiño ibojtsotocánama. <sup>35</sup> Pero chë arréndayëngna chë oservénënga imojishëche: ínýengbioyna imojtsajantšetaye, ínýengbioye imojtsëbaye y chë ínýengbioyna ndëtšbéngaca imojtsatëchënganja. <sup>36</sup> As chë jajañe nduiño chë natsanama más ba oservénënga yojichamuá. Pero chë arréndayëngna, ntšamo chë natsanëngaftaca imojamcá, cachcá chora imojama.

<sup>37</sup> “Cabana, chë jajañe nduiño cachabe uaquiñá ibojíchmua; as mëntšá yojtsejuabnaye: ‘Atšbe uaquiñá cocayé mochanjóyeunaye ca.’ <sup>38</sup> Pero chë arréndayënga chë uaquiñá imojinýe orna, imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe. Cuajna, motsóbanga y lempe chabe otocana soyënga bëngbiana echanjoquéda ca.’ <sup>39</sup> As chë uaquiñá imojishache, chë uvas betiyënga jajañentšana imojtsábocna y imojtsóba.”

<sup>40</sup> Chca jacuéntama tojanpochocá orna, Jesús tojánayana: —Y morna, chë jajañe nduiño chaojabo ora, ¿ntšamo šmojtsejuabná chë arrendayëngaftaca cha yochjama ca?

<sup>41</sup> Y chënga tmojanjuá: —Chë puerta bacna arréndayënga ni mo batšatema ntjalastemaycá echantsëbaye. Chë jajañe ínýenga echanjárrendaye y chë uvasësangá juashacama tempo chaojobuache ora, ntšamo chë nduiño chabojtsotocancá chënga mochantíyiye ca.

<sup>42</sup> Chora Jesús tojánayana: —¿Tšëngaftanga ndocna te Bëngbe Bëtsabe uabemana palabra šmëndualía? Chiñe mëntšá endayana:

Chë yebna jebuanënga tmojtsanaboté ndëtšbé,  
mora chë más bëts uashacuanësentše entsejájona.  
Chë soye Bëngbe Utabná, Bëngbe Bëtsá chca tojama,  
y bënga chama ojnanánënga fsëntsemna ca.

<sup>43</sup> Ntšamo chë nduiño chë arréndayënga chë fshantse echántsabaca y ínÿenga echantsatsataye y chënga chabiamá bëtscá shajuana mochanjatbanacá, cachcá, Bëngbe Bëtsabe amëndayana tšëngaftangbentšana mochantsejuána y ínÿengbioye mochántsatataye. Chënga Bëngbe Bëtsabe soyëngama mochanjouena y chë soyëngama ínÿengbioye mochanjabuayená, Bëngbe Bëtsabe amëndayoye jamashënguama. <sup>44</sup> Ndánaca chë ndëtšbeñe chaojotsatšá, chëbé bochántsatcacaye; y chë ndëtšbé ndábeñnaca chaojótatše, polvëshe bochántsebema ca —Jesús tojánayana.

<sup>45</sup> Chë bachnangbe amëndayënga y fariseunga, Jesús chë jabuátambama cuentënga yojtsëtsësnama, tmojanenótatsëmbona chëngbiamá chca yojtsóyebuambnama. <sup>46</sup> Chora chënga tmojánbošena Jesús jishachana, pero entšangbiamá imojtsauatja; chënga imojanjuabná Jesús Bëngbe Bëtsabe juabna oyebuambnayá yojamna ca.

## 22

### *Chë casamento fiestama cuento* (Lc 14.15-24)

<sup>1</sup> Chentšana Jesús tojanontšé cachiñe cuentëngaca chënga jabuátambana. Mëntšá tojánayana: <sup>2</sup> “Cbochanjáuyana ntšamo Bëngbe Bëtsabe amëndayana yomnana. Endmëna mo ntšamo canÿe réyefata tojanopasacá. Chë rey yojamánda canÿe bëtš fiesta jamama, chabe uaquiñabe casamentama. <sup>3</sup> Chora chë rey chabe oservëngá yojichamuá chë ófjanënga jobiatšama, pero chë ófjanëngna ndoñe imonjouena jama. <sup>4</sup> As chë rey ínÿe oservëngá yojichamuá y mëntšá yojámëndaye: ‘Chë ófjanënga šmochjáuyana, ya saná stseboprontana ca. Sënjamandá, atšbe uacnënga y uamna bayënga minÿicánënga jobáyama y lempe entseprontana; y chamuabo chë casamento fiestama ca.’

<sup>5</sup> “Pero chë ófjanënga ndoñe imonjouena. Canÿa, cachabe fshantse inabomnoye yojtsoñe; ínÿana chabe obuámnayíñe trabajuama yojtsoñe; <sup>6</sup> y ínÿengna, chë reybe oservëngá imojishëche, jabuache imojtsatsetšenaye y imojtsëbaye. <sup>7</sup> Y chë rey chë soyama yojouena ora, corente ibojtsetna. As chabe soldadënga yojichamuá chë oservëngá obánayënga chamuetsëbáyama y chëngbe bëtš pueblo jetsángbotjuama. <sup>8</sup> Chora chabe oservëngá yojáyana: ‘Lempe entseprontana chë casamento fiestama, pero chë ófjanënga ndoñe quenjatëmerecena moye jabama. <sup>9</sup> Motsajna tsashenangoye y ndëmuanÿëngnaca chašmojánÿenënga, chë casamento fiestama šmochjúbuaja ca.’ <sup>10</sup> As chë oservëngá tsashenangoye imojábocana y nÿetscanga imojánÿenënga imojáchembo, cánÿiñe tšabe y bacna entšanga, y chca, chë tsocnanoiça jútjena yojtsemna entšángaca.

<sup>11</sup> “Chë ófjanënga jánÿama chë rey yojámashëngo ora, chentše cánÿabioye ibojinÿe y chana ndoñe yontsemna ntšamo canÿe casamento fiestama endbetsemncá uichëtjoná. <sup>12</sup> As chë rey ibojauyana: ‘Sobreno, ntšamo canÿe casamento fiestama endbetsemncá ndoñe quecatichëtjona. ¿Ntšamo chca moye tcojamáshëngo ca?’ Pero chë boyabásana nÿe iytëca yojtsemna. <sup>13</sup> As chë rey chë fiestentše ujuatšnayënga yojámëndaye: ‘Shecuatše y cucuatše motsebatšëca y chë ndëbinÿna luaroye, infernoye motsábocna. Chentše puerte echanjenóbošachna y chë tsetšanama juatsašënga echantsenoftëšjojnaye ca’ — cha yojayana.”

<sup>14</sup> Jesús chca jacuéntama tojanpochocá ora, mëntšá tojánayana: “Chë fiestama ófjanënga banga montsemna, pero chë bocacánënga choca jtsemnama nÿe báseftanga. Er Bëngbe Bëtšá banga jáchembuana chabe amëndayoye jamashënguama, pero nÿe báseftanga choca mochántsemna ca.”

### *Chë Romoca bëtš mandadbiamá impuesto jtsatsquëcjayama* (Mc 12.13-17; Lc 20.20-26)

<sup>15</sup> Chentšana chë fariseunga tmojtsatanoñe y tmojanenoyeuná ntšamo Jesús tojayaniñe cha jisháchichiyana, as chca, mandadëngbeñe cha mal jaquédama. <sup>16</sup> Chama

chënga tmojanichamó básefta cachëngbe usetonënga y ínÿengna Heródesbe ústonënga, Jesús jauyanama: —Buatëmbayá, bënga fsëndétatšëmbo aca ndegombre soyënga cnetsabuátambama y contsabuatambá ndegombre tšabe vida jtsebomnama, ntšamo Bëngbe Bëtsá yomandacá, y ndoñe jatuenanana nÿe ntšamo entsanga tmojatichamcá, er acbiama tondaye quenatámama nda más uamaná o nduamaná tomnana. <sup>17</sup> Chcasna, ¿ntšamo catjájuaboye? ¿Tšabá tayojtsemna, César, chë Romoca bëts mandadbiama, bënga impuesto jtsatsquëcjnyana o ndoñe ca?

<sup>18</sup> Jesús yojtsetátšëmbo chëngbe bacna juabnëngama; chíyeca tojanëyana: —Bacna entsanga, ntšamo ndegombre šmojuabnacá ndinÿinÿnayënga. ¿Ndáyeca tšëngaftanga šmojtseboše chë sóyeca atše jisháchichiyama? <sup>19</sup> Chë šmatsquëcjná crocénana šminÿinÿé ca.

As canÿe crocénana tmojanoyé. <sup>20</sup> Jesús tojanatjá: —¿Ndabe jubiá quem crocenániñe yojtsemna, y ntšamo muentše entsabemancá nda chca iuabaina ca?

<sup>21</sup> Y chënga tmojanjuá: —Césarbe jubiá; cha chca enduabaina ca.

As Jesús tojanëyana: —Césarbioye šmochtoyiye cha ibotocana soye; y Bëngbe Bëtsana cha ibotocana soye ca.

<sup>22</sup> Chënga chca tmojanuena ora, ojnanánënga imojtsemna. As chënga cachcá Jesús tmojanonÿá y tmojtsatanoñe.

### *Obanënga jtayenama Jesús tmojantjá (Mc 12.18-27; Lc 20.27-40)*

<sup>23</sup> Báseftanga judiëngbe amëndayënga, saduceos ca uabáinënga, imojanjuabná chë obanënga ndocna te ntayenana ca. Cach te, chë impuestama Jesús tojanoyebuambá te, básefta saduceunga tmojána y mëntsá tmojantjá: <sup>24</sup> —Buatëmbayá, Moisés tojánayana nderado canÿe boyá tojóbana básenga ntjëtšabashejuancá, ana chabe uabentsá jtsemnana chë shémaftaca jtobouamayana, chca, chabe uabochená obanabiama básenga jtsabamnama ca. <sup>25</sup> Chcase, canÿe bëngbentše canÿsëfta catsátanga monjamna. Chë natsaná tonjanobouamá y tontsanóbana. Básenga ndoñe quenjátabamna, chíyeca chë shemna chë uabentsáftaca tontanobouamá. <sup>26</sup> Y cháftaca cachcá tonjanopasá, chë inÿe uabentsáftaca cachcá, y cachcá chë ínÿengaftaca y chë ústonoca uabentsáftacnaca. <sup>27</sup> Y chentšana chë shembásanaca tontsanóbana. <sup>28</sup> Y morna, chë obanënga chamojtayena ora, ¿ndabe chë canÿsëfta catsatanguentšabe shema chë shembása yochtsemna, nÿetscanga cháftaca tmojanobouamase ca? —chënga tmojantjá.

<sup>29</sup> As Jesús tojanëjua: —Ntšamo tšëngaftanga šmonjayancá ndmëncá šmontsoyebuambná, Bëngbe Bëtsabe uabemana palabra, ni chabe obenanama ndoñe quecmátësertana causa. <sup>30</sup> Chë obanënga chamojtayena ora, ni boyabásenga, ni shembásenga quemochatóbouamnaye, y chca, chënga mochántsemna mo celoca angelotemëngcá. <sup>31</sup> Y chë obanënga jtayenamna, ¿ndoñe šmëndualía ntšamo cach Bëngbe Bëtsá chabe uabemana palabrënguiñe tojánayanama? Cha tonjánayana: <sup>32</sup> “Atše sëndmëna Abraham, Isaac y Jacobëbe Bëtsá ca.” Bëngbe Bëtsá chca jayanëse entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

<sup>33</sup> Chë entsanga chca tmojanuena ora, ojnanánënga imojtsemna ntšamo Jesús yojtsabuátambama.

### *Chë más bëts uámana mando (Mc 12.28-34)*

<sup>34</sup> Jesús chë saduceúngbioye iytëca tojánabiamama fariseunga tmojántatšëmbona ora, chënga tmojánenefjna, <sup>35</sup> y canÿa chënguentšá, ley abuatambayá, Jesúsbioye jisháchichiyama tbojantjá: <sup>36</sup> —Buatëmbayá, ¿Moisesbe leyiñe ndayá chë más bëts uámana mando yomna ca?



<sup>37</sup> As Jesús tbojanjuá: —“Utabná Bëngbe Bëtsá cochtsebobonshana nyets acbe ainánaca, nyets espíritoca y nyets juábnaca.” <sup>38</sup> Chë soye endmëna chë más bëts uámana mando y nyetsca mandëngama chë natsanoca entsemna. <sup>39</sup> Y quem inye soye, chë natsana mandcá endenoparecena. Endayana: “Ndëmua entsánaca cochtsebobonshana, ntšamo cach aca cuenobobonshancá ca.” <sup>40</sup> Chë uta mandentsana endóbocana lempe ntšamo Moisesbe leyíñe endayancá y ntšamo chë Bëngbe Bëtsabe juabna oyebuambnayënga mondbetsabuatambacá ca —Jesús tbojaniana.

*¿Cristo, ndabe entsábentsana yomna?*

*(Mc 12.35-37; Lc 20.41-44)*

<sup>41</sup> Chë fariseunga cabá cachentse imojtsemnëntscuana, <sup>42</sup> Jesús tojanatjá: —¿Ntšamo šmojtsejuabná chë Bëngbe Bëtsabe Uámana Uabuayanabiamana, chë Cristo? ¿Ndábentsana cha iuabó ca?

Y chënga tmojanjuá: —Davídbentsana ca.

<sup>43</sup> As Jesús tojanëyana: —¿Ntšamo chca nántsemna, cach David, chë Uámana Espíritbe mándoca, Crístbioye Utabná ca tbojtsabobuátmëse? David mëntsá tojánayana:

<sup>44</sup> Bëngbe Bëtsá, atšbe Utabná Crístbioye tbojaniana:

atšbe catšbioica mótbema,

atšbe obenánaca acbe uayayënga acbe cucuatšíñe chamoquedama chjamëntscuana ca.

<sup>45</sup> ¿Ntšámose Cristo, Davídbentsana Entšá nántsemna, cach David “Utabná ca” chábioye tbojtsabobuátmëse ca? —Jesús tojanatjá.

<sup>46</sup> Chora ndocná tonjanobená ni mo canye palabra jojuana. Y chë tescana ndocná yonjenñëmua Jesús más jatstjanayama.

## 23

*Jesús chë fariseungbiamana y ley abuátambayëngbiamana tojánayana, chënga ndoñe tsabá montsama ca*

*(Mc 12.38-40; Lc 11.37-54; 20.45-47)*

<sup>1</sup> Chora Jesús, entsanga y chabe uatsjëndayënga mëntsá tojanëyana: <sup>2</sup> “Chë fariseunga y chë ley abuátambayënga cmondbétsabuatambaye ntšamo Moisesbe leyënguiñe iuayancá. <sup>3</sup> Chcasna, tsëngaftanga cmonsamna chënga joyaunayana y ntšamo tmojayuancá, cachcá jtsamana. Pero ndoñe šmattsama ntšamo chënga mondbetsamcá, er chënga ndoñe ntsamana ntšamo mondbetsabuatambacá. <sup>4</sup> Mo canye entsá, couáybioye uauta uasmanësha juasmayana y cachá tondaye tontsasmancá, chënga entsanga jtsamëndayana bëtská mandënga chamotsocumplínama, pero cachënga ni mo batsatema ntsamana chë mandënga jtsocumplínama. <sup>5</sup> Chënga lempe jtsamana nye entsanga chamotsënyama. Chënga chë ínÿengbiamana más Bëngbe Bëtsá imobobonshana ca chamotsejuabnama, chënga monduamana tëntša sëndachëjënguiñe juabemana ntšamo Bëngbe Bëtsabe uabemana palabrënguiñe endayancá, y juentsaca y buacuatšíñe chëjënga jenábatsëcana y sibiajana nÿa tëntša uasebtotonanëjuangá jtsichëtjonana. <sup>6</sup> Chënga jtsebošana chë fiestënguiñe nÿa quëfseroca jtsetbiámanama, y chë judiëngbe enefjuana yebnënguenache chë más uámana luarënguiñe. <sup>7</sup> Chënga jtsebošana tsáshenañe entsanga nÿa respétoca chamotsacheuanama, y ‘abuátambayënga ca’ chamotsachembuanámna chënga jtsebošana.

<sup>8</sup> “Pero tsëngaftangna ndoñe šmattseboše entsanga ‘abuátambayënga ca’ chacmotsachembuanama, er nyetsca tsëngaftanga mo catsatangcá šmondmëna, Bëngbe Bëtsábeñe betsošbuachéyeca, y nye canya endmëna tsëngaftangbe Buatëmbayá. <sup>9</sup> Tsëngaftanga ‘taitá ca’ chë ley abuátambayënga šmondbétsachembuana, pero tsëngaftanga ndocna quem luarentsá ‘taitá ca’ šmattsechembuana; tsëngaftanga nye canye Taitá šmondbomna, chë celoca endmëná. <sup>10</sup> Ndoñe šmattseboše entsanga ‘mádayënga ca’ chacmotsachembuanama; er nye canye Mandayá endmëna y cha Cristo endmëna. <sup>11</sup> Nda tsëngaftangbeñe

chë más uamaná tojtsemná bontsemna chë ínÿenga jtsaservénana. <sup>12</sup> Nda cachá bëtsá tojtsenobiamná, nduamaná mochántsebema; y nda cachá nduamaná tojtsenobiamnana, más bëtsá mochanjábema.

<sup>13</sup> “¡Tša lastema tsëngaftangbiama, bacna entsanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tsëngaftanga šmontsama entsangbiama puerte totcá chaotsemna Bëngbe Bëtsabe amëndayoye jamashënguama, mo bësáša cuaftsebiatamiancá. Pero ni cach tsëngaftanga choye quešmátamashjuana, ni ínÿenga choye jamashënguama bošëngbioye chama quešmátalesenciana. <sup>14</sup> ¡Tša lastema tsëngaftangbiama, ntšamo ndegombre šmojuabnacá ndinÿinÿnayënga fariseunga y ley abuátambayënga! Tsëngaftanga chë viudángbioye chë tmobomna soyënga jtsabacayana, y entsangbe delante tsabá chacmotsëñyama y chënga šmojtsaíngñayama ndoñe chamondëtsetatsëmbuamna, Bëngbe Bëtsáftaca tša jtsencuëntayana. Chë causa, Bëngbe Bëtsá tsëngaftanga más jabuache ínÿengbiama cmochanjácastigaye.

<sup>15</sup> “¡Tša lastema tsëngaftangbiama, bacna entsanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tsëngaftanga ba luarënguenache jtsajnana canÿa tsëngaftangbe ustoná onguayiñe, y šmojínÿena ora, tsëngaftanga jamana cha chaotsemna tsëngaftangbiama uta soye más merecido buajoná infierno chaotsama.

<sup>16</sup> “¡Tša lastema tsëngaftangbiama; tsëngaftanga šmondmëna mo jtanënga entsanga unachayëngcá! Tsëngaftanga šmondbëtsichamo: ‘Nda ínÿabioye tbojašbuachená ndayánaca jamama y tojayana chë Bëngbe Bëtsabe bëts yebnama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabe bëts yebnentša castellanama cha tojajurasna, aíñe jtsemnana chë tbojašbuachená soye jamama ca.’

<sup>17</sup> ¡Obëjëmënga y nduabínÿnënga! ¿Ndayá más uámana soye yomna, chë castellano o Bëngbe Bëtsabe bëts yebna? Chë castellano Bëngbe Bëtsabiama josérviamna jtsemnana, nÿe Bëngbe Bëtsabe bëts yebnocá chë castellano tojtsemnayeca. <sup>18</sup> Tsëngaftanga mëntšánaca šmondbëtsichamo: ‘Nda ínÿabioye tbojašbuachená ndayánaca jamama y tojayana chë altarama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabiama altaroca tojtsejájona soyëngama tojajurasna, aíñe jtsemnana chë tbojašbuachená soye jamama ca.’ <sup>19</sup> ¡Nduabínÿnënga! ¿Ndayá más uámana soye yomna, chë Bëngbe Bëtsabiama tmojacjá soyënga o chë altar? Chë tmojacjá soyënga Bëngbe Bëtsabiama josérviamna jtsemnana, nÿe chë altaroca chë soyënga tmojacjáyeca. <sup>20</sup> Nda chë altarama tojajurá, ndoñe nÿe chë altarama ntsejúraryana. Lempe chë altar juatsboca tojtsemnámna cha jtsejúraryana. <sup>21</sup> Nda Bëngbe Bëtsabe bëts yebnama tojajurá, ndoñe nÿe Bëngbe Bëtsabe bëts yebnama ntsejúraryana. Bëngbe Bëtsabiama cha jtsejúraryana, cha chë chentše oyená. <sup>22</sup> Y nda celocama tojajurá, chentše reycá Bëngbe Bëtsabe tbemaniñama cha jtsejúraryana y cachora Bëngbe Bëtsabiámna, chentše yotbemanabiama.

<sup>23</sup> “¡Tša lastema tsëngaftangbiama, bacna entsanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tsëngaftanga Bëngbe Bëtsabiama jtsequëcjnyana chë jajañentša sananga bnëtsanentsana canÿe soye; chë binche matatëmënga menta, anis y chë cominentša sanágnaca. Pero tsëngaftanga nÿe batšá jtsamana chë leyentša más uámana soyënga, mo chë nÿetsca entsanga cachca derechënga chamotsebomnama, ínÿenga jtsalastemánana y chë tsabe soyënguiñe jtsiyenana, chca, entsanga tsëngaftangbeñe chamotsošbuáchema. Chë soyënga cocayé cmontsamna jtsamama, chë inÿe tsabe soyënga amana ntjajbanacá. <sup>24</sup> ¡Jtanënga entsanga unachayënga! Tsëngaftanga chë base soyënga jamama puerte jtsenócochinÿenana, pero jtsebnëjtjombana uámana soyënga jamama, Bëngbe Bëtsá tojanmandá soyënga. Y chca, tsëngaftanga šmontsemna mo canÿe entsá ndayá tojtsabuchetjácá bayëfja jtsejuánama, ndoñe ntjasama, jasama ndoñe yondëlesenciana ca chë leyíñe iuayana causa. Pero šmondmëna mo entsangcá ndëmuanÿenga camellbe mëntšena jasana, y chë leyíñe endayana chcana jasama ndoñe yondëlesenciana ca.

<sup>25</sup> “¡Tša lastema tšëngaftangbiana, bacna entsanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga šmondmëna mo entsangcá ndëmuanyënga platillëjënga y tazëšënga shjoicajana jtsóbojabiana, pero tsoyna nÿe cachcá jonÿayana. Tšëngaftanga tša jtsentsënana entsangbiana mo tšabengcá jtsinÿnama, pero tšëngaftangbe ainanentše jútjena entsemna nÿe jtsatbëbanama y nÿe bëtscá soyënga jésebomnama juabnëngaca. <sup>26</sup> ¡Nduabinÿna fariseo! Cochjshetsajbaná ainaniñe bacna soyënga bomnana. Chamna nÿe tšabe juabnënga chentše cochtsebomna, y lempe ntšamo chacojtsamcá y entsanga chamojtsönÿacá tšabá echántsemna.

<sup>27</sup> “¡Tša lastema tšëngaftangbiana, bacna entsanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga šmondmëna mo obanëngbe cuevëshënga botamana uafjantsenëshëngcá; shjoicajana puerte botamanëshënga, pero tsoyna jútjena obanëngbe betashëngaca y janjuana soyëngaca. <sup>28</sup> Tšëngaftanga chca šmondmëna: entsangbe delante tšëngaftanga jtsinÿnana mo nÿetsca soyënguiñe tšabá amëngcá, pero ndoñe chca quešmátsmëna. Tšëngaftangbe ainanentšna chë bacna entsanga ntšamo ndegombre tmojuabnacá ndinÿinÿnayëngcá y chë bacna soye amëngcá šmontsejuabná.

<sup>29</sup> “¡Tša lastema tšëngaftangbiana, bacna entsanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga jtsamana chë Bëngbe Bëtsabe juabna oyebuambnayënga tempsquënga bëtsëtsa entsanga chamotsemnama, chëngbe cuevëshënga jtsatspórmayëse. Tšëngaftanga cachcá jtsamana chë nÿetsca soyënguiñe tšabá amëngaftaca, chë chëngbiana jtenójuaboyama pormániñe jtsatsbótamnayëse; <sup>30</sup> y chentsana šmondbëtsichamo: ‘Bënga chë bëngbe bëtsëjëmëngbe tempo maftsjanienëse, chëngbioye ndoñe matmëñjanëjabuache chë Bëngbe Bëtsabe juabna oyebuambnayënga jobáyama ca.’ Pero mo chëngcá canÿe buayenana sóyeca tmojabëngbioyna ndoñe ntsayaunanana. <sup>31</sup> Pero ntšamo šmojtsamcá jtsamëse, tšëngaftanga šmontsinÿanÿná ndegombre chë Bëngbe Bëtsabe juabna oyebuambnayëngbioye tmojanëbayëngbe entsanguentsana šmomnama. Y mora cach tšëngaftangbe bëts taitangcá tšëngaftanga šmontsama. <sup>32</sup> ¡Mopochocanga jamama chë bacna soyënga, chë tšëngaftangbe bëts taitanga tmojanbojatsë jamama soyënga!

<sup>33</sup> “¡Mëtscuayënga, mëtscuaye entsanga! ¿Ndayá šmochjama chë infiernoca uabouana castigüentsana jótsbocama? <sup>34</sup> Chíyeca atše tšëngaftangbioye chanjichamuá Bëngbe Bëtsabe juabna oyebuambnayënga, tšabe soye tatšëmbënga y abuátambayënga. Pero tšëngaftangna, ínÿengbioye šmochantsëbaye y šmochanjácrucificaye; ínÿengbioyna chë enefjuana yebnënguenache šmochanjátsetšenaye y nÿetsca bëts pueblënguenache chënga šmochandúcamena. <sup>35</sup> Chíyeca, tšëngaftangbiana nÿets castigo echántsemna chë nÿetsca soyënguiñe tšabá amënga tmojëftsóbanama; Abel, chë jóbanama chabotsemnama tondaye tonjanmá, tmojanóba orscana y Zacarías tmojanóbantscoñe. Zacarías, Berequíasbe uaquiñana, Bëngbe Bëtsabe bëts yebnentše tmojanóba, altar y chë entsanga Bëngbe Bëtsábioye imojánadorana luariñe. <sup>36</sup> Ndegombre chëyana, lempe chë soyëngama castigo morsca entsangbiana echántsemna ca” —Jesús tojánayana.

### *Jesús tojanošachna Jerusalenoca entsangbiana (Lc 13.34-35)*

<sup>37</sup> Mëntsánaca Jesús tojánayana: “¡Jerusalenentša entsanga, Jerusalenentša entsanga! Tšëngaftanga chë Bëngbe Bëtsabe juabna oyebuambnayënga jtsëbáyana y chë Bëngbe Bëtsabe ichmónënga ndëtsbéngaca jtsatëchénganjana jtsëbáyama. Bueta soye atše sënjábošena tšëngaftanga átšbioye júbuajana, mo canÿe tuamba chabe bolletotëmënga chabe juatëngmiáša tajsoye cuaftajayecá, pero tšëngaftanga ndoñe chešmátsbošena. <sup>38</sup> Y šmochjinÿe, atše mora cachcá cbochanjesënÿaye, y chca, atšna enánanga cbochanjésabashejuana, mo canÿe yebna cachcá tcojesonÿá y énañe tcojeseboshjoncá.

<sup>39</sup> Y atše cbéyana, ndegombre tsëngaftanga morscana atše ndoñe más quešmochátinýe; y atše šmochántinýe mentsá chašmojtsichamo ora: ‘¡Corente bendición bomná, Bëngbe Utabnabe obenánaca tojabá ca!’ ”

## 24

*Jesús tojánayana chë Bëngbe Bëtsabe bëts yebna lempe mochjánpochocama*  
(Mc 13.1-2; Lc 21.5-6)

<sup>1</sup> Jesús Bëngbe Bëtsabe bëts yebnentšana tojëftsanbocna y ya yojtsaye. Chorna chë uat-sjéndayënga chábioye tmojanobeconá y tmojanontsé nýetsca chentša bëts yebnënga cha jinýinýiyana. <sup>2</sup> Chora Jesús tojanéyana: “Tsëngaftanga lempe šmontsonýá. Ndegombre šcuayana, quem Bëngbe Bëtsabe bëts yebnentše ndoñe queochaisoquéda ni mo canýe ndëtsbé inýe ndëtsbé juatsboye. Lempe mochantsepochóca ca.”

*Ntsamo yochtsemna quem luare jopochóca tempo chaojtsobeco ora*  
(Mc 13.3-23; Lc 21.7-24; 17.22-24)

<sup>3</sup> Chentšana chënga Olivos tjashoye tmojána. Jesús choca yojtsetbemana; as, chë uat-sjéndayënga tmojanobobeconá nýe chëngbiana jatjayama, mentsá: —Sméyana. ¿Mocna ora chë soyënga Bëngbe Bëtsabe bëts yebnoca yochjochnëngo ca? ¿Ndayá yochjochnëngo bënga jinýanýiyama aca jésabama ora ya yojtsemnama y quem luare jopochóca tempo yojtsobecuama ca?

<sup>4</sup> As Jesús tojanjuá: —Cuedado šmochtsebomna ndocná chacmondáingñema. <sup>5</sup> Banga mochanjabo y mochantsabíchamo chënga atše imomna ca. Mochánttsichamo: “Atše chë Cristo sëndmëna ca” y chca, ba entšángbioye mochanjáingñaye. <sup>6</sup> Tsëngaftanga šmochanjouena canýe luarentša entšanga inýe luaroca entšángaftaca imojtsentsjanama y nderado mochjentsjámnaca. Ndoñe matauatjëngana, er chca jochnënguama endmëna; pero masque chcase, quem luare jopochóca cabá ndoñe queochátsmëna. <sup>7</sup> Canýe luarentša entšanga inýe luaroca entšángaftaca mochánttsentsjanaye, y canýe amëndayábentša entšanga inýe amëndayábioca entšángaftácnaca; y ba luarënguine shëntsana echanjóshjango y chentša fshantsënga echanjuangmëmana. <sup>8</sup> Masque chca jasúfriase, más chcoye cabá más mochanjatssúfria.

<sup>9</sup> “Chora, entšanga inýengbe cucuatšiñe cmochanjábashejuana chacmatsetšenama y cmochantsëbaye; y atšbe ústonënga bëtsemnayeca nýetsca luarënguentša entšanga cmochantsëbuayënja. <sup>10</sup> Chë tempo, banga mora átšbeñe ošbuáchiyënga, ošbuáchiyana mochantsajbaná y mochantsenáboyënja y jóbanama inýengbe cucuatšiñe mochántsenboshjuana. <sup>11</sup> Banga Bëngbe Bëtsabe ndoñe ndegombre juabna oyebuambnayënga mochanjábobana y ba entšanga mochanjáingñaye. <sup>12</sup> Nýetsá bacna juabnënga entšangbe ainaniñe echanjésemna, y chë causa banga ndoñe quemochátenbobonshana. <sup>13</sup> Pero nda nýets tempo átšbeñe ošbuachiyá totsomñe, atsbocaná echántsemna. <sup>14</sup> Y quem tsabe noticiënga Bëngbe Bëtsabe amëndayama nýets quem luariñe entšángbioye mochántsabuyiynaye, chca, chë ndegombre soyënga Bëngbe Bëtsabiana chënga chamotsetatšëmbuama. Chentšana cocayé quem luare jopochóca tempo echántsemna.

<sup>15</sup> “Chë Bëngbe Bëtsabe juabna oyebuambnayá Daniel chë puerta uabouana soye tojëftsanabema chë pochócaye soyama. Tsëngaftanga chë puerta uabouana soye chë uámana ca uabaina luarentše chašmojinýe ora (nda tojtsalía, chabosertá), šmochántsetatšëmbo chë puerta ngmënana tempo tojóshjanguama; <sup>16</sup> entšanga Judeoca chamojtsemnënga, batsjabengoye chamotsacheta. <sup>17</sup> Y nda cachabe yebnentša tsbanánoca chaojtsemna, chaotsachá chocana ntjastjangcá ndayá tsoicana jëftsábocnama. <sup>18</sup> Y nda jajoca chaojtsemna, yebnoye ndoñe chaondëta ni mo chabe quëfsáya jesácñama. <sup>19</sup> ¡Tša lastema chë tempo ngomámanënga chamojtsemnëngbiana



o ochóchaye šešonga chamojtsabamnëngbiamá! <sup>20</sup> Bëngbe Bëtsá šmochtseimpadana chë tšëngaftanga jachetama, uaftena tempo ora o canye ochnayté ndoñe chaondëtsemnama. <sup>21</sup> Chca, chora puerte ngménana echántsemna. Tša jabuache ngmenancá, quem luare jabojátšama orscana y méntscoñama y más chcoye, cachcá ngménana ndoñe ntjamnana. <sup>22</sup> Chë puerte ngménana tempo yapa bën ndoñe chaondëtsemnama Bëngbe Bëtsá ndoñe tonjalesenciase, ndocná quentatsbocá; pero chabe ubuáyanënga cha corente endábabuanÿeshanayeca, echanjama yapa bën tempo ndoñe chaondëtsemnama.

<sup>23</sup> “Chora nderado nda cmochanjáuyana: ‘Minÿënga, muentse chë Cristo entsemna’, o ‘Choca cha entsemna ca’, chë soyëngama ndoñe šmattsayaunana. <sup>24</sup> Chora mochanjábocana ndoñe ndegombre uámana ubuáyanënga, chënga Cristo imomna ca jtsichámëse, y Bëngbe Bëtsabe ndoñe ndegombre juabna oyebuambnayëngnaca; y chënga mochanjama bëts soyënga chëngbe obenana jinÿanÿiyama, entšanga jáingñama, y tmojobenase, chë Bëngbe Bëtsabe bocacánëngnaca. <sup>25</sup> Atše ya chama tchbonjabuayená chë tempo cabá ndóshjango ora. <sup>26</sup> Chíyeca, nderado chënga chacmojáuyana: ‘Minÿënga, chentse chë Cristo entsemna, entšanga ndoyenoca ca’, choye ndoñe šmatjá; o chacmojáuyana: ‘Cha canye tsoca entsemna ca’, chama ndoñe šmattsayaunana. <sup>27</sup> Er ntšamo chë tojatcuinÿe ora, shinÿe bocanoicana y shinÿe uenatjëmbambanëntscoñe jabuashinÿinÿenancá y ba luarënguenache entšanga jobenayana jinÿama, cachcá, Bëngbe Bëtsá Entšá tbojanbemá quem luaroye chaojésabo te, entšanga nÿets luarentse mochanjobenaye cha jinÿama. <sup>28</sup> Canÿe obanabe cuerpo tojtsemnama chë gallinacënga tmojátatšëmbona y cachora chë béconana jojotana. Cachcá, chë castigo echántsemna nÿa chama chë tempo chaojtsemna ora ca” —Jesús tojánayana.

*Bëngbe Bëtsá Entšá tbojanbemá quem luaroye echanjésabo  
(Mc 13.24-37; Lc 21.25-33; 17.26-30, 34-36)*

<sup>29</sup> Mëntšánaca Jesús tojánayana: “Chë puerte ngménana tempo chaojochnëngüentšana, shinÿe ndoñe queochátsbuashinÿinÿana, juashcona ndoñe queochátsbinÿnaye, celocana estrellënga echanjatquécjana y quem luarentša tsbanánoca espíritënga obenana bomnënga echanjángmëmana. <sup>30</sup> Chora canÿe soye celoca echanjónÿna entšanga jinÿanÿiyama Bëngbe Bëtsá Entšá tbojanbemá ya iuaisaboma, y nÿets luarenache entšanga mochanjenóbošachna, y Bëngbe Bëtsá Entšá tbojanbemábioye mochanjinÿe celoca jantšetëshiñe echántsaboye, puerte obenánaca y corente buashinÿinÿaniñe. <sup>31</sup> Y canÿe trompetëfjua jabuache chaojuénana ora, cha chabe angelotëmënga echanjichamuá Bëngbe Bëtsabe ubuáyanënga júbuajama, nÿets luarëngocana, celoca cánÿoica juachoicana y chë ínÿoica juachóntscoñe.

<sup>32</sup> “Ntšamo higo betíyeca endbétsopasanama šmochjuatsjinÿe: Tojtsaisabuacuana y tojtsaisëjotsana ora, chë tšabe tempo ya tojtsaisobecuama jtsotatšëmbuana. <sup>33</sup> Cachcá, lempe chë ndayama tšëngaftanga tchbonjauyancá chašmojinÿe ora, šmochántsetatšëmbo Bëngbe Bëtsá Entšá tbojanbemá ya jésabama yojtsemnama. <sup>34</sup> Ndegombre cbëyana, lempe chca echanjochnëngo, morsca entšanga cabá ndóbana ora. <sup>35</sup> Celoca y quem luare echanjopochóca, pero atšbe palabra ndocna te queochaisopochóca.

<sup>36</sup> “Pero ndayté y ntseco ora Bëngbe Bëtsá Entšá tbojanbemá yochjésabama, ndocná quenátstatšëmbo, ni chë celoca angelotëmënga, ni Bëngbe Bëtsabe Uaquiñá. Nÿe chë Taitá chama yotátšëmbo.

<sup>37</sup> “Ntšamo Noé yojëftsiyena ora tojanopasacá, cachcá echanjopása chë Bëngbe Bëtsá Entšá tbojanbemá chaojésabo ora. <sup>38</sup> Noebe tempo, chë uabouana uaftena cabá nduáshjango ora, entšanga imnasaye, imnofšësnaye y imnóbouamnaye; natjëmbana imojtsiyeñe, y chca imojtsomñe Noé chë barquëshoye tojánamashënguëntscuana. <sup>39</sup> Chënga tondaye imonjántatšëmbo, nÿe chë uabouana uaftena tojánashjango y nÿetscanga tojtšanëyamba ora cocayé. Cachcá echántsemna Bëngbe Bëtsá Entšá tbojanbemá chaojésabo

ora; ya chaojochnëngo ora, entsanga chama mochanjátatsëmbona. <sup>40</sup> Chora uta boyabásata jajoca bochántsemna; canya mochanjesbetse y chë ínÿana ndoñe. <sup>41</sup> Uta shembásata bochántsejanÿcoye; canya mochanjesbetse y chë ínÿana ndoñe.

<sup>42</sup> “Chíyeca cuedado smochtsebomna y yejuana smochtsantjesna, er ndoñe quešmátstatsëmbo ndayté tšëngaftangbe Utabná yochjésabama. <sup>43</sup> Pero quem soye tšabá chacmësertá: Chë yebnentša nduiño, ntseco ora ibeta atbëbaná yochjabama tojtsetatsëmbëse, cha nantsefsna y ndocnábioye buanjaleséncia jushañe chaotseñbemama tsoye jtsamashënguama y jtsatbëbama. <sup>44</sup> Chíyeca, tšëngaftángnaca smochtseprontana, er Bëngbe Bëtsá Entšá tbojanbemá echanjésabo, entsanga chama tondaye chamontsejuabná ora ca” —Jesús tojánayana.

*Chë tsabe oservená y chë ndoñe tsabe oservená  
(Lc 12.41-48)*

<sup>45</sup> “¿Nda yomna chë oservená ntšamo chë nduiño tojtsebošcá amá y nÿets juábnaca amá? Cha jtsemnana nda chë nduiño bochjéftsebošhona chë yebnentšënga chaot-sanÿenama y jasama tojtsemna ora chaújuatšema. <sup>46</sup> Chë nduiño tojtashjango ora, chë oservenábioye tbojínÿena ntšamo ibomncá jtsamëse, chë oservená puerte oyejuayá echántsemna. <sup>47</sup> Ndegombre cbëyana, chë nduiño chábioye bochanjaimpáda lempe chabe soyënga chabotsinÿeñama. <sup>48</sup> Pero chë oservená bacna entšá tomnësna, jajuaboyana chë nduiño ndoñe betseco yochantabo ca, <sup>49</sup> y as, cha jóntšana chë inÿe oservénënga jtsajantšetayana, becá jtsesana y jtsetmuana inÿe tëmiëngaftaca. <sup>50</sup> Y chabe nduiño jtashjanguama ndoñe tontsejuabná te y ndoñe tontsetátšëmbo ora, cha echántashjango. <sup>51</sup> Chora chë nduiño jabuache bochantsecastíga, y ntšamo chë bacna entsanga ndayá ndegombre tmojuabnacá ndinÿinÿayënga jasúfriama entsamncá, cha echanjasúfria. Chora cha puerte echanjenóbošachna y chë tsetšanama juatsašënga echantsenoftëšjojnaye ca” —Jesús tojánayana.

## 25

*Chë bnëtsana tobiasëngbiama cuento*

<sup>1</sup> Mëntsánaca Jesús tojánayana: “Chë te chaojóshjango ora, Bëngbe Bëtsabe amëndayana echántsemna mo ntšamo canÿe casamento fiestentse tojanopasacá. Mëntsá yojopása: Bnëtsana tobiasënga chëngbe querosine uajuinÿanëshangá imojëftsájaca y imojábocana chë casamentero boyabása jajëbenguama. <sup>2</sup> Chë bnëtsana tobiasënguentsana, shachnënga sempre enójuabnayënga imnamna, y chë inÿe shachnëngna, ndenójuabnayënga. <sup>3</sup> Chë ndenójuabnayëngna chëngbe uajuinÿanëshangá imojëftsájaca, pero querosine ndoñe imonjuabuyamba chë uajuinÿanëshangañe cachiñe jtaftsuámama. <sup>4</sup> Pero chë sempre enójuabnayëngna chëngbe uajuinÿanëshangá imojëftsájaca y querosinënaca botellëšënguiñe imojuabuyamba. <sup>5</sup> Chë casamentero boyabásana ndoñe betseco yonjabo, chíyeca nÿetsca tobiasënga ocayana yojubuache y imojtsomaná. <sup>6</sup> Mo tsëntseto orna, chënga imojouena mëntsá uayebuáchana: ‘¡Chë casamentero boyabása ya endabó! ¡Jajëbenguama mobocana ca!’ <sup>7</sup> Asna, nÿetsca tobiasënga imojotsbaná y imojóntša chë uajuinÿanëshangá juabopróntana. <sup>8</sup> Chorna, chë shachna ndenójuabnaye tobiasënga chë inÿe shachnënga sempre enójuabnayëngbiye imojáuyana: ‘Diosmanda tšëngaftangbe querosinentšana baseytema šmëbuatšatá, bëngbe uajuinÿanëshangá tojontšé jtsafsanana ca.’ <sup>9</sup> Pero chë sempre enójuabnayëngna imojayana: ‘Ndoñe. Tcbojuatšatase, tšëngaftangbiama y bëngbiámncaca querosine echántashe. Más tšabá entsemna, chë querosine mondbëtsenoye chašma y tšëngaftangbiama chašmauábuamiñe ca.’

<sup>10</sup> “Chorna, chë shachna ndenójuabnaye tobiasënga imojá chë querosine jauabuámiyama; pero chëntscuana chë casamentero boyabása yojáshjango y chë sempre enójuabnayënga cháftaca chë casamento fiestoye imojámashjna, y chentša bëšáša

imojtatame. <sup>11</sup> Chentsana chë inye tobiašënga imojáshjajna y mëntšá imojtsichamo: ‘¡Taita, Taita, šmebëtafjo ca!’ <sup>12</sup> Pero chë casamentero boyabása yojójuá: ‘Ndegombre cbëyana, tšëngaftanga ndoñe quecbatëbuatma ca.’

<sup>13</sup> “Cachcá echántsemna Bëngbe Bëtsá Entšá tbojanbemá chaojésabo ora; chíyeca šmochtseprontana, tšëngaftanga ndoñe quešmátstatšëmbo ndayté, ni mocna ora chca yochjopásama ca” —Jesús tojánayana.

*Chë crocenánama cuento*  
(Lc 19.11-27)

<sup>14</sup> “Bëngbe Bëtsabe amëndayana endmëna mo ntšamo canye boyabásaftaca tojanopasacá. Cha ibojtsemna inye luaroye jtsoñama; as chabe oservénënga yojáchembo y yojaimpádaye chabe crocénana chamotsinjenama. <sup>15</sup> Cánÿabioye ibojántšabuachiye shachna uaranga crocénana, ínÿabioyna uta uaranga y ínÿabioyna canye uaranga. Chca yojamna ntšamo cada ona ibojobiashjachcá. Y as chë boyabása yojtsoñe. <sup>16</sup> Cachora chë shachna uaranga yojoyëngacñá yojá trato jabemama, y chca, inye shachna uaranga crocénana yojábotiye. <sup>17</sup> Chë uta uaranga yojoyëngacñá cachcá yojama y inye uta uaranga yojábotiye. <sup>18</sup> Pero chë canye uaranga yojoyëngacñana, yojá, fshantsiñe yojajutjo y chabe mandayabe crocénana chentše yojtseitëme.

<sup>19</sup> “Chentsana baytese chë oservénëngbe amëndayá yojtashjango y yojóntša chë crocénánama chënga jatjayana. <sup>20</sup> Natsana yojáshjango chë shachna uaranga yojoyëngacñá y chabe mandayábioye inye shachna uaranga crocénana ibojántšabuachiye y mëntšá ibojauyana: ‘Taita, aca shachna uaranga šconjanoyé y muentše entsemna inye shachna uaranga sënjaboté ca.’ <sup>21</sup> As chë mandayá ibojauyana: ‘Tša tšabá, tšabe oservená y ntšamo tsbošcá amá. Aca quem base soyiñe lempe ntšamo tchojaman-dacá tcojámayeca, atše cbochanjaimpáda más bëtscá chašcotsinÿeñama. Mamáshëngo y átšeftaca cochjóyejuaye ca.’ <sup>22</sup> Chentsana chë uta uaranga yojoyëngacñá yojáshjango y chë mandayábioye ibojauyana: ‘Taita, aca uta uaranga šconjanoyé y muentše entsemna inye uta uaranga sënjaboté ca.’ <sup>23</sup> As chë mandayá ibojauyana: ‘Tša tšabá, tšabe oservená y ntšamo tsbošcá amá. Aca quem base soyiñe lempe ntšamo tchojaman-dacá tcojámayeca, atše cbochanjaimpáda más bëtscá chašcotsinÿeñama. Mamáshëngo y átšeftaca cochjóyejuaye ca.’

<sup>24</sup> “Pero chë canye uaranga yojoyëngacñe oservená yojáshjango orna, chabe mandayábioye ibojauyana: ‘Taita, atše sëndétatšëmbo aca canye tšátjaye entšá comnama; acna chë ndoñe tconjajé chentše saná jocñana y chë ndoñe tconjujquëshe luarentše jobuátbanana. <sup>25</sup> Chama atše uatjana šjuábuache, chíyeca atše sënjá y fshantsiñe chë crocénana sënjetseitëme. Pero muentše acbe crocénana entsatsmëna ca.’ <sup>26</sup> As chë mandayá ibojójuá: ‘¡Bacna oservená y oyënjayá! Chë ndayentše ndoñe tijajé chentše saná jocñana y chë ndoñe tijujquëshe luarentše jobuátbanana atše tsuamanama icojátatšëmbëse, <sup>27</sup> aca cmonjamna atšbe crocénana bancoca jetsobuájuana y atše matijtabo ora, atšbe crocénana matijtoyëngacñe y chë chentsana tojoboté crocénanënaca ca.’ <sup>28</sup> Y as yojamënda: ‘Chë uaranga motseboca y chë bnëtsana uaranga entsebomnábioye chana motsatšetá ca. <sup>29</sup> Er nda tojtsebomnábioye, más jatšetayana, y chca cha corente bëtscá jtsebomnana; pero tondaye tondbomnábioyna, chë batšatema tobomna sóynaca jtsebocana ca.’

<sup>30</sup> “Y chora cha yojayana: ‘Quem ndoservena trabajayá shjoca ibetoye matábocna; choca puerte echanjenóbošachna y chë tsetšanama juatsašënga echantsenoftëšjojnaye ca’ ” —Jesús tojanëyana.

*Ntšamo chë quem luare jopochócama ora, nÿetsca entšangbiama mochjayana*

<sup>31</sup> Mëntšánaca Jesús tojánayana: “Chë Bëngbe Bëtsá Entšá tbojanbemá chabe obenánaca, buashinÿinÿaniñe y nÿetsca chabe angelotëmëngaftaca chaojésabo ora, chë reybiama

puerte buashinÿinÿana tbemaniñe echanjótbema. <sup>32</sup> Chora nÿets luarëngoca entšanga chabe natsanoica mochanjénefná, y cha, entšanguentsana ínÿenga echanjábacacaye, mo chë oveshënga abuañÿnÿa oveshënga chivëngbentsana endbetsabacacnaycá. <sup>33</sup> Chë abuañÿnÿana, oveshënga chabe catsbioica echanjáchembo y chivëngna chabe uañicuayoica. Bëngbe Bëtsá Entšá tbojanbemá cachcá echanjama: chë ubuáyanënga chabe catsbioica echanjúbuaja y chë bacna entšangna chabe uañicuayoica echanjásaye.

<sup>34</sup> “Chorna chë Rey, Bëngbe Utabná, chabe catsbioica chamojtsemna entšanga echanjáuyana: ‘Tšëngaftanga, Atšbe Taitá tšábeñe cmétabna, mabënga ca; atšbe amëndaye luare mo tšëngaftangbiamá otocana soycá mosháchiñënga; tšëngaftangbiamá endëprontana, Bëngbe Bëtsá quem luare tonjanma orscana. <sup>35</sup> Er atšë šonjanishëntsana y tšëngaftanga saná šmonjancaredadó; šonjanajuendá y tšëngaftanga šmonjanafšé; inÿe luarocana ashjanganocá sënjanana y posada šmonjanántšame. <sup>36</sup> Enašá sënjanana y entšayá šmonjanëtšetá jtichëtjuama; šocá sënjanájona y šmonjanatsëtsaye; cárceloca sënjanëtámena y jabëuatsëtsayama šmonjánabo ca.’

<sup>37</sup> “As chë Bëngbe Bëtsá chabe bominiñe tšábenga tojábiamënga mochanjatjaye: ‘Bëngbe Utabná, ¿ntseco shëntseca tcbënjáninÿe y tcbënjajuatšé? ¿Ntseco uajuendayá tcbënjáninÿe y tcbënjanašé? <sup>38</sup> ¿O ntseco inÿe luarocana ashjanganocá tcbënjáninÿe y posada tcbënjánantšame, o enašá y entšayá jtichëtjuama tcbënjánëtšetá? <sup>39</sup> ¿O ntseco šocá o cárceloca utamená tcbënjáninÿe y jauatsëtsayama tifjána ca?’

<sup>40</sup> “As chë Utabná echanjójua: ‘Ndegombre cbëyana, lempe ntšamo chë atšbe catsátanguentsana chë más batšá uámanëngaftaca šmojamcá, cach átšeftaca šmonjanma ca.’

<sup>41</sup> “Chentšana chë Utabná chabe uañicuayoica chamojtsemna entšanga echanjáuyana: ‘Atšbentsana mojuánanga atšbe Bëtsabe uabotëñënga. Infiernoye motsajna, chë ndocna te queochátsfsana íñeshoye; choca endëprontana Satanás y chabe ustonëngbiamá. <sup>42</sup> Er atšë shëntseca sënjanana y tšëngaftanga saná ndoñe chešmatancaredadó; šonjanajuendá y ndoñe chešmatanašé; <sup>43</sup> inÿe luarocana ashjanganocá sënjanana y ndoñe posada chešmatanántšame. Enašá sënjanana y ndoñe entšayá chešmatanëtšetá; šocá sënjanájona y cárceloca sënjanëtámena y ndoñe chešmatanatsëtsá ca.’

<sup>44</sup> “As chënga mochanjatjaye: ‘Bëngbe Utabná, ¿ntseco tcbënjáninÿe shëntseca o uajuendayá, o inÿe luarocana ashjanganocá, o enašá, o šocá o cárceloca utamená y ndoñe tcbënjanaabuache ca?’

<sup>45</sup> “Y chë Utabná echanjójua: ‘Ndegombre cbëyana, tšëngaftanga ntšamo chë atšbe catsátanguentsana chë más batšá uámanëngaftaca, ndoñe šmonjanmcá, átšeftaca cach ndoñe chešmatanma ca.’

<sup>46</sup> “Chëngna infiernoye nÿetsca tescama mochantsësetjango, y chë Bëngbe Bëtsá chabe bominiñe tšábenga tojábiamëngna chë nÿetsca tescama yomna tšabe vida mochántsebomna ca” —Jesús tojánayana.

## 26

### *Entšanga tmojanjuabó ntšamo jamëse Jesús jishachama*

*(Mc 14.1-2; Lc 22.1-2; Jn 11.45-53)*

<sup>1</sup> Lempe chca tojánayanentsana, Jesús chabe uatsjëndayënga tojanëyana: <sup>2</sup> “Tšëngaftanga šmondëtatšëmbo, uta te y chë Bashco fiesta echántsemna y Bëngbe Bëtsá Entšá tbojanbemá ínÿengbe cucuatšinë mochanjáboshjona chamocrucificama ca.” Chë fiesta inamna jtenójuaboyama Bëngbe Bëtsá chë judiëngbe bëts taitanga Egiptocana tojánatsebacama.

<sup>3</sup> Chëntscuana, chë bachnangbe amëndayënga y chë judiëngbeñe bëtsëjemëngcá mándayënga tmojánenëfná, Caifás, chë bachnangbe más uámana amëndayabe bëts yebnentše. <sup>4</sup> Tmojanenuabó y tmojanenoyeuná jtseíngñase Jesús jishachama, y jtsóbama.



<sup>5</sup> Pero imojtsichamo: “Quem fiestëntscuana ndoñe, entšanga yapa muanjontša enbouenanana ca.”

*Canÿe shembása botamana uanguëtse béjaye Jesusbe bestšasiñe tbojanbuešcja*  
(Mc 14.3-9; Jn 12.1-8)

<sup>6</sup> Jesús Betania pueblentse yojtsemna, Simón chë bacna nguayanánaca šocá ca uabobuatmabe yebnentse. <sup>7</sup> Chëntscuana canÿe shembása Jesúsbioye tojanabeconá. Chë shembásana tojanamba canÿe alabastro jarrëtema, jútjena canÿe puerta uámána botamana uanguëtse béjayeca. Jesús mesëshentse yojtsemnëntscuana, chë shembása chabe bestšasiñe chë botamana uanguëtse béjaye tbojanbuešcja.

<sup>8</sup> Chë uatsjéndayënga chca tmojáninÿe orna, tmojanotjayaná y tmojanontsé ichámuana: —¿Ndáyeca nÿe bonamente chë soye chca yojtsemna ca? <sup>9</sup> Chamna, matmënjobenanga chë béjaye becá crocenánama juiyana y chánaca ndbomnjémënga matmënjújabuache ca.

<sup>10</sup> Jesús chë soye tojanuena; as tojanéyana: —¿Ndáyeca ndoñe cachcá quem shembása šmochanjonÿaye ca? Ntšamo tonjamcá tšabá entsemna. <sup>11</sup> Er chë ndbomnjémëngna nÿets tempo tšëngaftangbeñe mochanjëftsemna, pero atše tšëngaftangaftaca ndoñe nÿets tempo quichásemna. <sup>12</sup> Ntšamo chë shembása tojamcá, chë botamana uanguëtse béjaye atšbe cuerpiñe jabuéšcjëse, cha šontseprónta atše juatbontsa tescama. <sup>13</sup> Ndegombre cbéyana, quem luariñe ndayéntsnaca Bëngbe Bëtsabe soyëngama chamojtsabuayiyná chentse, ntšamo quem shembása tojamámnaca becá mochanjëftsóyebuambaye, chca, entšanga chabiamá chamotsenójuabnama ca —Jesús tojanéyana.

*Judas tojána bachnangbe amëndayëngbioye, Jesús chamuishachama*  
(Mc 14.10-11; Lc 22.3-6)

<sup>14</sup> Canÿa chë bnëtsana uta uatsjéndayënguentsá, Judas Iscariote ca uabainá, tojána bachnangbe amëndayëngaftaca jencuéntama. <sup>15</sup> Y tojanatjá: “¿Ntsachetsá šmatjtabuénaye y Jesús tšëngaftangbe cucuatšine cbochjayentšbashejuana ca?”

As chëngna, unga bnëtsana ralbenga tmojtanabuená. <sup>16</sup> Y cach orscana Judas yojtsenguaye ntšámose y ntseco ora, Jesús chëngbe cucuatšine jayentšbashejuanama.

*Jesús chabe uatsjéndayëngaftaca Bashco saná tojanse*  
(Mc 14.12-25; Lc 22.7-23; Jn 13.21-30; 1 Co 11.23-26)

<sup>17</sup> Chë Bashco fiesta bojatsenté, chë levadúraca ndëpormana tandëse jasama fiestëntscuana, chë uatsjéndayënga Jesúsbioye tmojanobeconá y tmojantjá: —¿Ndémoca aca cojtseboše bënga fchaiprontama Bashco saná chacosama ca?

<sup>18</sup> Y Jesús tojanéyana: —Chë bëts puebloye motsajna canÿe bacobe yebnoye y cha šmochjauyana: “Buatëmbayá tonjayana: ‘Atšbe ora ya echanjobuache, y atše acbe yebnoye sëntsá, Bashco fiesta jamama atšbe uatsjéndayëngaftaca ca.’ ”

<sup>19</sup> As chë uatsjéndayënga tmojanma ntšamo Jesús tojanamëndacá y chë Bashco fiesta saná tmojanprontá.

<sup>20</sup> Y tojanibétata orna, Jesús chë bnëtsana uta uatsjéndayëngaftaca mesëshentse yojtsemna. <sup>21</sup> Y imojtsesantscuana, Jesús tojanéyana: —Ndegombre cbéyana, canÿa tšëngaftanguentsá uayayëngbe cucuatšine šochanjáboshjona ca.

<sup>22</sup> Chora chë uatsjéndayënga puerta ngménaca imojtsemna y tmojanontsé canÿánÿa Jesús jatjayama: —Bëngbe Utabná, ¿nderado atše cha chtsemna ca?

<sup>23</sup> As Jesús tojanéjua: —Canÿa nda chabe tandëse entsefchecuacná cach atše sëntsefchecuacná šcnenentse, cha uayayëngbe cucuatšine šochanjáboshjona.

<sup>24</sup> Ndegombre, Bëngbe Bëtsá Entsá tbojanbemáftaca echanjopása ntšamo Bëngbe Bëtsabe uabemana palabrënguiñe chabiamá iuayancá; pero, itša lastema chë bochjáboshjonabiamá! Más tšabá chabiamá manjamna ndoñe ntjónÿnana ca.

<sup>25</sup> As Judas, chë boshjuaná, Jesúsbioye tbojantjá: —Buatëmbayá, ¿nderado atše chtsemna ca?

Y Jesús tbojanjuá: —Ndegombre tcjayana ca.

<sup>26</sup> Imojtsesantscuana, Jesús tandése tojanca, Bëngbe Bëtsábioye chama tbojtanchuá, tojanjatá y chë uatsjédayënga tojanatsatá. Y mëntśá tojánayana: “Mocñënga, mosënga. Atśbe cuerpo entsemna ca.”

<sup>27</sup> Chentsana, canye coptema vínoyeca tojanaca, Bëngbe Bëtsábioye tbojtanchuá y chë uatsjédayënga tojanëfśaśé. Y mëntśá tojánayana: “Nÿetscanga quem coptémentśana mofśenga. <sup>28</sup> Quem vínoye atśbe buiñe entsemna. Atśbe buiñe echanjuábuashana entśanga chamotsetatśëmbuama ntśamo Bëngbe Bëtsá entśanga tojanaśebuachenacá aïne yochjochñënguama. Chë buiñe bëtsá entśangbiama echanjuábuashana, chëngbe bacna soyëngama perdonánënga chamotsemnama. <sup>29</sup> Y ndegombre cbëyana, morscana atśe ya ndoñe más chë uvasentśana obocniye quichaisofśiye. Chë tsëm vínoye tśëngaftangaftaca chanjofśiye, atśbe Taitabe amëndayoca chamojtsemna ora ca” —Jesús tojánayana.

*Jesús tojánayana, chábioye ndoñe bonjanabuátma ca Pedro yochjánayanama (Mc 14.26-31; Lc 22.31-34; Jn 13.36-38)*

<sup>30</sup> Bëngbe Bëtsá jëtschuayama tmojancantá chentsana, Olivos tjashoye tmojëftsanbocana. <sup>31</sup> Choca Jesús tojanëyana: —Tśëngaftanga nÿetscanga quem ibeta átśbeñe ośbuáchiyana śmochantsobuetśe y śmochántśacheta, er Bëngbe Bëtsabe uabemana palabreñguiñe, cha mëntśá tojánayana: “Chë oveshëngbe abujajñya chanjóba y chë oveshënga mochantsáshana ca.” Chca tśëngaftangaftaca echanjopáśa, uayayënga chaśmojishache ora. <sup>32</sup> Pero obanënguentsana chaitayenentsana, tśëngaftangbe natsana Galileoye chanjá ca —cha tojanëyana.

<sup>33</sup> Chora Pedro tbojanjuá: —Masque nÿetscanga ácheñe ośbuáchiyana chamotsobuetśe y chamotsacheta, ntśamo ácaftaca yochjopáśa causa, atśe ndocna te ca.

<sup>34</sup> As Jesús tbojaneyana: —Ndegombre cbëyana, cam ibeta, ngallo cabá ndëcánta ora, aca unga soye cochanjayana ndoñe śconduabuatma ca.

<sup>35</sup> Pero Pedro tbojaneyana: —Masque chaśotsemna ácaftaca jóbanama, atśe ndoñe quichátayana ndoñe cbonduabuatma ca.

Y nÿetsca uatsjédayëngnaca cachcá imojtsichamo.

*Getsemaní luarentśe Jesús Bëngbe Bëtsáftaca tbojanencuentá (Mc 14.32-42; Lc 22.39-46)*

<sup>36</sup> Chentsana, Jesús chabe uatsjédayëngaftaca canye luare Getsemaní ca uabáinoye tojána. Choca tojanëyana: “Muentśe motbiama, chëntscuana atśe choye chanjá Bëngbe Bëtsáftaca jencuéntama ca.”

<sup>37</sup> Y Pedro y chë Zebedeobe uta uaquiñata tojëftsanëbiatśe. Choca yojóntśa puerta ngmënaca y corente cochtsetśenaná jtsemnama. <sup>38</sup> Jesús tojanëyana: “Atśbe ainana puerta ngmënaca entsemna, mo jobanamcá. Muentśe moquedanga y átśeftaca śmochtsefśna ca.”

<sup>39</sup> Chora Jesús más natsanoye tojána, tojanoshamentśé y fshantsóntscoca yojotsejbéna, y mëntśá Bëngbe Bëtsáftaca tbojanencuentá: “Atśbe Taitá, jopódianëse moma atśe japadésama ndoñe chaśondëtsemnama. Pero ntśamo atśe stseboścá ndoñe chaondëtsemna, sinó ntśamo aca cojtseboścá ca.”

<sup>40</sup> Chentsana, Jesús chabe unga uatsjédayëngbioye tojtanabo y chëngna imnétsomañe. Chca tojánanyëna ora, Pédrëbioye tbojaneyana: “¿Ni mo canye horatema tśëngaftanga śmonjobená átśeftaca jtsefśnana ca? <sup>41</sup> Śmochtsefśna y Bëngbe Bëtsáftaca śmochtsencuëntaye, chca, bacna soye jamama ndoñe chacmondócochënguama. Tśëngaftanga ndegombre śmontsebośe espíritoca Bëngbe Bëtsá joyeunayama, pero cuerpiñe añemo ndoñe queśmátsbomna ca” —Jesús tojanëyana.

<sup>42</sup> Uta soyama tojtesaná y mēntšá Bēngbe Bētsáftaca tbojanencuentá: “Atšbe Taitá, atše japadésama ndoñe chašondětsemnama jamama ndoñe jopódianēsna, n̄ye ntšamo aca cojtsebošcá chaotsemna ca.”

<sup>43</sup> Y tojtanabo ora, chē uatsjēndayēnga cachiñe inmētsomañe; yapa ocnaye causa n̄ye imojtsefshétana. <sup>44</sup> As Jesús cachcá yojēftsēnyaye, y ungama cachiñe tojtesaná Bēngbe Bētsáftaca jencuéntama, y cach palabrenga tojánayana.

<sup>45</sup> Chora chē uatsjēndayēngbioye tojtanabo y tojanēyana: “¿Cabá šmotsomañe y šmotsochnañe ca? Ya ora tocjobuache, Bēngbe Bētsá Entšá tbojanbemá bacna soye amēngbe cucuatšñe mochanjáboshjona. <sup>46</sup> Motsbananga, cuajna. Minyēnga, chē boshjuaná ya entsebeconá ca.”

*Uayayēnga Jesús tmojánishache*  
(Mc 14.43-50; Lc 22.47-53; Jn 18.2-11)

<sup>47</sup> Jesús cabá yojtsóyebuambnantscuana, Judas, can̄ye chē bnētsana uta uatsjēndayēnguentsá, tojánashjango, y cháftaca imojtsemna ba entšanga espadējangaca y ngarotbéngaca prontánēnga. Chēnga imojamna chē bachnangbe amēndayēnga y chē judiēngbeñe bētsējemēngcá amēndayēngbe ichmónēnga. <sup>48</sup> Judas, chē boshjuaná, tojanjuabó ntšamo jamana entšanga jin̄yan̄iyama ndēmua Jesús bētsemnana. Chiyeca yojáuyana: “Nda chajjauámocho, cha echántsemna. Smochjishache ca.” <sup>49</sup> Cachora Judas Jesúsbioye tojanobeconá y tbojanчуá: —Buajtana, Buatēmbayá ca.

Y tbojtanámocho.

<sup>50</sup> Jesús tbojanianana: —Enutá, moma chē ndayá jabomama tcojabo ca.

Chorna, chē entšanga tmojanobeconá, Jesús tmojánishache y tmojanánatse.

<sup>51</sup> Chca orna, can̄ye enutá Jesúsēftaca yojtsemná, chabe espadēja tojanenosēngbotēntšena, y chē bachnangbe más uámana amēndayabe oservernábioye can̄ye matscuaše tbojtsanēstjango.

<sup>52</sup> As Jesús tbojanianana: “Espadēja matosēngbuajon̄yá. Nda espadējaca tbojóba chana, cach espadējaca echanjóbana. <sup>53</sup> ¿Aca ndoñe condētatsēmbo, atše atšbe Taitábioye stjaimpádase, cha cachora atšbiana nanjichamuá bnētsana utama más ejércitēnga angelotémēngaca? <sup>54</sup> Pero chcasna, ¿ndayá Bēngbe Bētsabe uabemana palabrenguiñe endayancá ntšamo nanjochnēngo? Chiñe endayana ntšamo entsopasancá jochnēnguama canmēna ca.”

<sup>55</sup> Cachora Jesús entšanga tojanatjá: “¿Ndáyeca šmojabo espadējangaca y ngarotbéngaca atše jishachama, mo atše can̄ye bacá uamana entšá cuaftsemncá ca? Atše cada te Bēngbe Bētsabe bēts yebnoca tšēngaftangaftaca sēnjántbemana abuatambaye, y choca ndoñe chešmátanishache. <sup>56</sup> Pero lempe quem soyēnga chca entsopasana, cachcá chaotsemnama ntšamo Bēngbe Bētsabe uabemana palabrenguiñe chē Bēngbe Bētsabe juabna oyebuambnayēnga tmojanayancá ca” —Jesús tojánayana.

Cachora n̄yetsca uatsjēndayēnga tmojtsanēuatjaná y tmojtsanacheta, y Jesús chē uayayēngaftaca cachcá tmojesanon̄yá.

*Jesús tmojanánatse chē judiēngbe más uámana amēndayēngbioye*  
(Mc 14.53-65; Lc 22.54-55, 63-71; Jn 18.12-14, 19-24)

<sup>57</sup> Chē Jesús tmojánishachēnga, tmojanánatse, Caifás chē bachnangbe más uámana amēndayabe yebnoye. Chentše chē ley abuatambayēnga y chē judiēngbeñe bētsējemēngcá amēndayēnga tmojánenefna. <sup>58</sup> Pedro bēnocana Jesús tbojanasto, chē bachnangbe más uámana amēndayabe chashjónscoñe; choye tojánamashēngo y chē Bēngbe Bētsabe bēts yebnoca josticiēngaftaca yojótbema, chca, jtsetatsēmbuama ntšamo yochjopásama.

<sup>59</sup> Chē bachnangbe amēndayēnga, chē bētsējemēngcá amēndayēnga y ín̄yēnga judiēngbe amēndayēnga imojtsenguaye ndánaca masque uayátsenaye soye Jesusbe contra cháuyanama, as chēnga jobenayama cha chaóbana ca jayanama, <sup>60</sup> pero ndoñe

tmonjáninjëna, masque banga tmojánashjajna Jesusbe contra uayátsenaye soyënga jayanama. Cabana, útata tbojánashjango, <sup>61</sup> y chata tbojánayana: “Quem boyabása tonjayana canobena Bëngbe Bëtsabe bëts yebna jtsenásatajchcana y nÿe unga tese jtëtsjebuana ca.”

<sup>62</sup> As chë bachnangbe más uámana amëndayá tojantsá y Jesúsbioye tbojantjá: —¿Ndocá cochanjayana? ¿Ndayase yojtsemna chë acbe contra montsichamo soye ca?

<sup>63</sup> Pero Jesús nÿe iytëca yojtsemna. Chiyeca chë bachnangbe más uámana amëndayá tbojaniana: —Bëngbe Bëtsá Ainabe mándoca cbomandá chašcuyana aca ndegombre chë Cristo, chë Bëngbe Bëtsabe Uaquiñá comna o ndoñe ca.

<sup>64</sup> Chora Jesús tbojanjuá: —Aca ndegombre yomncá tcjayana. Y quem sóynaca cbëyana: Tšëngaftanga šmochanjinye, atše, Bëngbe Bëtsá Entšá tbojanbemá, chë nÿets obenana bomnabe catsbioica jtsetbemanana y celoca jantšetëshiñe jtsaboyana ca.

<sup>65</sup> Chora chë bachnangbe más uámana amëndayá chabe uichëtjonëjuangá yojt-senántšajatanëca, puerte ibojtsetna causa, y tojánayana: —¡Ntšamo quem boyabása tonjoyebuambacá, Bëngbe Bëtsabiama entsemna mo cha cuafjoyenguangá, chë chabe Uaquiñá yomna ca cha tonjayana ora! ¿Ndayama más entšanga šochjätëjamoto Jesusbe contra chamuayanama? <sup>66</sup> ¿Ntšamo šmatjayana ca? —cha tojanatjá.

As chë entšanga tmojanjuá: —Ndegombre cha bëts bacna soye entsebomna; jóbanama bontsemna ca.

<sup>67</sup> Chora tmojanontsé Jesús juebëbuashëtjnayana, jabuache jantšetayana y ínÿengna imojtsejuëbjantšetaye, <sup>68</sup> y imojtsatsësnaye: “Cristo, aca ndegombre Bëngbe Bëtsabe juabna oyebuambnaya tcomnëse, jmomalisiá nda tcmënjantšetá ca!”

*Pedro tojánayana Jesúsbioye ndoñe bonjanabuátma ca*  
(Mc 14.66-72; Lc 22.55-62; Jn 18.16-18, 25-27)

<sup>69</sup> Chëntscuana Pédrëna shjoca yojtsemna, chashjoca yojtsetbemana. Chora, canÿe shembása chentša oservená tbojanobobeconá y tbojaniana: —Acnaca, Jesús chë Galileocáftaca conjánana ca.

<sup>70</sup> Pero Pédrëna, nÿetscangbe delante tojánayana chábioye ndoñe bonjanabuátma ca, mëntšá jayanëse: —Ntšamo contsichamcá, ndoñe quešnatësertana ca.

<sup>71</sup> Chora Pedro bëšoye yojábocna. Chentšna, inÿe shembása oservená chábioye tbojáninye y chë inÿe entšanga tojanëyana: —Cha, Jesús chë Nazaretocáftaca enjánana ca.

<sup>72</sup> Pedro cachiñe tojánayana ndoñe bonjanabuátma ca, y mëntšá yojtsejúraye: —¡Chë boyabása ndoñe quetsatabuatma ca!

<sup>73</sup> Chentšana, chë chentše imojtsemnënga Pédrëbioye tmojanobeconá y tmojaniana: —Ndegombre, ácnaca chë uatsjendayënguentsá condmëna. Chë contsoyebuambnacá contsoyátëmbana ca.

<sup>74</sup> Chora Pedro tojanontsé ichámuana, Bëngbe Bëtsá chašotsecastigá ndoñe ndegombre soye stsichámëse ca; yojtsejúraye y yojtsichamo: —¡Chë boyabása ndoñe quetsatabuatma ca!

Y cachora canÿe ngallo yojacánta. <sup>75</sup> Y Pedro yojenójuaboye ntšamo Jesús tbojanianama. Cha mëntšá tbojaniana: “Cabá ngallo ndécánta ora, aca unga soye cochanjayana ndoñe šconduabuatma ca.” Y chentšana tojésanbocna y corente ngmënaca yojtsenóbošachna.

## 27

*Jesús, Pilátbioye tmojanánatse*  
(Mc 15.1; Lc 23.1; Jn 18.28-32)

<sup>1</sup> Tojanbinÿna ora, nÿetsca chë bachnangbe amëndayënga y judiëngbeñe bëtsëjemëngcá amëndayënga tmojánenefjna jenóyeunayama ntšamo jamëse Jesús chaóbanama. <sup>2</sup> As,



Jesús tmojanëcuébatsëca y tmojanánatse, y chca, Pilato, chë Judeoca Romano mandadbe cucuatšiñe tmojánboshjona.

### *Ntšamo Judas tojanóbana*

<sup>3</sup> Judas, chë boshjuaná, Jesús jóbanama ibojtsemnama tojanuena ora, puerte yojt-senócochinÿena ntšamo tojánchjanguama, y chë unga bnëtsana ralbenga chë bachnangbe amëndayënga y bëtsëjemëngbiöye tojtanamba, <sup>4</sup> y mëntsá tojanëyana: —Puerte bacna soye tijama. Atše canÿe bacna soye ndbomná tšëngaftangbe cucuatšiñe tijáboshjona chaóbanama ca.

Pero chënga tmojanjuá: —¿Chë soye ndayá bëngbiana? Cach aca cochátotatsëmbñe ca.

<sup>5</sup> As Judas chë ralbenga Bëngbe Bëtsabe bëts yebnentše yojesëtsana, y yojá y yojétsentsešaye.

<sup>6</sup> Chë bachnangbe amëndayëngna chë ralbenga tmojtanatbaná y tmojánayana: — Quem crocenánama buiñe echanjuábuashana; ntšamo leyiñe endayancá, bënga ndoñe quemuátobena chë Bëngbe Bëtsabiama soyënga quëcjnayëtémiñe chana jasegórana ca.

<sup>7</sup> Chcasna, chënga tmojanenoyeuná, chë crocenánacna chë Alfarerbe Luare ca uabaina fshantse jabuámiyana, y chca, canÿe luare jtsebomnama ndayentše chë inÿe luarëngocana entšanga áshjajnënga jutabuantsama. <sup>8</sup> Chíyeca, chë fshantse mëntscoñama Buiñe Luare ca iuabaina. <sup>9</sup> Chca, tojanochnëngo ntšamo Jeremías, chë Bëngbe Bëtsabe juabna oyebuambnayá, tempscá tojanayancá, ndayá yochjanchnënguama. Chana mëntsá tojánayana: “Y chë unga bnëtsana ralbenga tmonjanca, ntsachetsá chë Israeloca entšanga cha tmojanamananacá, <sup>10</sup> y chánaca chë Alfarerbe Luare tmonjanbuamé, ntšamo Bëngbe Bëtsá šonjanmandacá ca.”

### *Jesús Pilatbe delante*

*(Mc 15.2-5; Lc 23.2-5; Jn 18.33-38)*

<sup>11</sup> Chentšana Jesús, chë mandado Pilátbiöye tmojanánatse y cha mëntsá tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

<sup>12</sup> Chë bachnangbe amëndayënga y chë bëtsëjemënga Jesús mal imojtsequédantscuana, cha ndocá ntjojuana. <sup>13</sup> Chíyeca Pilato tbojantjá: —¿Ndoñe contsuenana lempe ntšamo acbe contra montsichamcá ca?

<sup>14</sup> Pero Jesús ni canÿe palabra ndoñe ntjojuana. Chë causa, chë mandado ndoñe yontsetátšëmbo ntšamo jajuaboyana.

### *Jesús chaóbana ca tmojánayana*

*(Mc 15.6-20; Lc 23.13-25; Jn 18.38-19.16)*

<sup>15</sup> Bashco fiesta ora, chë mandado yojanamana canÿe utamená jëtsboshjonana, nda entšanga tmojuabuayaná. <sup>16</sup> Chë tempo canÿe uachuana utamená inamna, Jesús Barrabás ca uabainá. <sup>17</sup> Nÿetsca entšanga chentše imojtsemna ora, Pilato tojanatjá: “¿Tšëngaftanga nda šmojtseboše atše chjëtsboshjonama, Jesús Barrabás o Jesús, chë Cristo ca monduabobuatmá ca?”

<sup>18</sup> Er chë mandado yojtsetátšëmbo, entšangna envidia causa Jesús chabe cucuatšiñe tmojánboshjonama.

<sup>19</sup> Pilato chë tribunal ca uabáinentše yojtsetbemanëntscuana, chabe shema canÿa tbojanichmó mëntsá cha jauyanama: “Chë nÿetsca soyënguiñe tšabá ama entšábiöye ndocá matsborlánana; chabe causa ibeta otjénayoca puerte sënjasufrí ca.”

<sup>20</sup> Pero chë bachnangbe amëndayënga y chë bëtsëjemënga entšanga tmojanayëñaná, Barrabás jëtsboshjonama y Jesús chaóbana ca chamuayanama. <sup>21</sup> Chora chë mandado cachiñe tojanatjá: —¿Chë útatentšana nda šmojtseboše atše chjëtsboshjonama ca?

Y chënga tmojánayana: —¡Barrabás ca!

<sup>22</sup> Pilato tojanatjá: —¿As, ndayá Jesús, chë Cristo ca uabobuatmáftaca atše chjama ca?

Y nyetscanga tmojanjuá: —¡Motsecrucificá ca!

<sup>23</sup> Chora Pilato tojtëtanatjá: —¿Ndáyeca? ¿Ntsámo cha tojobuachjanguá ca?

Pero chënga cachiñe tmojanáyebuachena: —¡Motsecrucificá ca!

<sup>24</sup> Ndocá jamama yontsobenama y entšanga más jabuache enbouenanama tmojanontšema Pilato tojáninýe ora, cha tojanmandá búyeshe juabuíyëboñana y nyetscangbe delante yojtsenacuentšabiá. Mëntsá tojánayana: —Atše ndocá chiyátayana, ni chiyatsma quem boyabása chaóbanama. Tšëngaftanga lempe šmonjama ca.

<sup>25</sup> Chora nyetsca entšanga tmojanjuá: —¡Quemuá yochjóbanama, bënga y bëngbe básengbiama castigo chaotsemna ca!

<sup>26</sup> As Pilato, Barrabás tbojtanboshjona; tojanmandá soldadënga Jesús jabuache chamotsetsetšenama y chentšana entšangbe cucuatšínë tbojánboshjona chamocrucificama.

<sup>27</sup> Chentšana, chë mandadbe soldadënga Jesús tmojanánatse chë mandadbe bëts yebnentša chashjoye y choca nyetsca soldadënga chabe shëconana tmojanójoto. <sup>28</sup> Chorna, entšayá tmojtsanabotsca y shbuenda uafjatsenga entšayá mo reycá tmojanichëtjo.

<sup>29</sup> Canýe coronësha tmojanapormá uchmašëfjangaca y tmojanabestšajó, y catšbioica cucuatšínë canýe niñëfja. Chorna, chabe shecuatšentše imojtsofshëntsaméntšenaye y imojtsáboyejuana. Mëntsá imojtsichamo: “¡Bayté judiëngbe Rey cochtsemna ca!”

<sup>30</sup> Chëngnaca imojtsanbuashëtjnaye y cach niñëfjaca bestšašentše imojtsëtsjanjnaye.

<sup>31</sup> Y chca imnaftsáboyejuanentšana, chë shbuenda uafjatsenga entšayá tmojtsanabotsca y cachabe entšayá tmojtanichëtjo, y chora, jacrucificama tmojanánatse.

### *Jesús tmojancrucificá*

*(Mc 15.21-32; Lc 23.26-43; Jn 19.17-27)*

<sup>32</sup> Chë entšanga chentšana tmojánbocana ora, tmojánenbetse canýe bacóftaca, Simón ca uabainá, Cirene pueblócá. As, cha tmojanmandá Jesusbe cruz chauetsocutsama.

<sup>33</sup> Canýe luare Gólgota ca uabáinoca tmojánashajana ora (hebreo biyañe chca endayana “Obanabe Bestšashe Luare ca”), <sup>34</sup> Jesúsbioye vínoye hiéloyeca enájuañiye tmojanabuiyë chaofšema; pero yojaftántia y ndoñe yonjábosëna chiye jofšiyama.

<sup>35</sup> Ya tmojancrucificá orna, chë soldadënga Jesusbe entšayamna, tsbanánoye tmojanëtšena, chca, jtsetatšëmbuama ndabiama yochjanáquedama. <sup>36</sup> Y chora chënga chentše tmojanotbiama Jesús jtsebojanýama. <sup>37</sup> Y chabe bestšaše juatsboicna canýe uabemana soye tmojananjo. Chiñe yojétsayana ndáyeca cha tmojancrucificama, mëntsá: MUA JESÚS ENDMËNA, CHË JUDIËNGBE REY ca.

<sup>38</sup> Utata bacna soye ochjajnayátnaca chënga chentše tmojanacrucificá, canýa Jesusbe catšbioica y chë ínýana chabe uañicuayoica. <sup>39</sup> Y chëjana imojtsachñëjuana entšangna, Jesús imojtsóyenguaye, imojtsobestšfshanenaye <sup>40</sup> y imojtsatsaye: “¡Aca chë icobena Bëngbe Bëtsabe bëts yebna jtsenásatajchcana y nýe unga tese jëtsjebuana, cach aca mentsbocá! ¡Ndegombre Bëngbe Bëtsabe Uaquiñá tcomnëse, chë cruzocana matastjango ca!”

<sup>41</sup> Chë bachnangbe amëndayënga, ley abuatambayënga y chë judiëngbeñe bëtsëjemëngcá mándayënga cachcá imojtsóyenguaye. Mëntsá imojtsichamo: <sup>42</sup> “Cha ínýenga tojëftsatsebacá, pero cachá jéntsbecama ndoñe quenátobena. Cha Israeloca entšangbe Rey tojtsemnëse, chë cruzocana chauatastjango, y chca, bënga chábeñe fchtsošbuáchiye. <sup>43</sup> Cha tojayana Bëngbe Bëtsábeñe puerte yojtsošbuaché ca. ¡Mora Bëngbe Bëtsá chabuatsbocá, cha ndegombre muábioye tbobobonshánëse!, er cha tonjánayana Bëngbe Bëtsabe Uaquiñá canmëna ca” —chënga imojtsichamo.

<sup>44</sup> Y chë bacna soye ochjajnayata, Jesúseftaca ibojtsecrucificanátnaca cachcá ibojtsóyenguaye.

### *Jesús tojanóbana*

*(Mc 15.33-41; Lc 23.44-49; Jn 19.28-30)*

<sup>45</sup> Njyetsto orscana las treséntscoñe, njyets quem luare yojtseibétata. <sup>46</sup> Chca orna, Jesús chabe biyañe tojanáye buachena: “Elí, Elí, ¿lema sabactani ca?” (Chca endayana “Atšbe Bětsá, atšbe Bětsá, ¿ndáyeca cachcá šcojonýa ca?”)

<sup>47</sup> Chca tmojanuena ora, báseftanga chentše imojtsemna entsanguentsana imojtsichamo: “Cha Elías, chě Běngbe Bětsabe juabna oyebuambnayá, bontsechembuana ca.”

<sup>48</sup> As chora, chentša canýa tojěftsanótjajo canýe esponjěshe janguanguama, untja vínoyeca chěshe tojanfchecuacuá, canýe niñěfiñe tojananguėsětjo y Jesúsbioye tojanbeconá chaofšema. <sup>49</sup> Pero ínýengna tmojánayana: “Cachcá mochjonýaye, er Elías tayochjabo jabátsbocama ca.”

<sup>50</sup> Pero Jesús cachiñe jabuache tojanoyó y tojanóbana. <sup>51</sup> Y cachora, Běngbe Běngbe Bětsabe běts yebnoca yojújonýana entsějua tsěntsaca yojtsenájataye, tsbanánocana fshantsoye. Chějua běnějua inauamna y chě tsatsěntsaca inaujonýana. Fshantse yojuangmėmana, ndětsbenga yojtsashtětsana, <sup>52</sup> y chě cuevěshěnga obaněngaca yojtsětěfjo y banga Běngbe Bětsabe entsanga tmojtanayena. <sup>53</sup> Y chěnga, Jesús tojtanayenentsana, chě cuevěshěnguentsana tmojánbocana, y Jerusalén, chě uámana běts pueblo ca uabáinoye tmojánamashjna y ba entsángbioye tmojáněbėbuacana.

<sup>54</sup> Chě soldaděngbe aměndayá y chě ínýenga, Jesús jtsebojanýama cháftaca tmojanoquedanga, chě fshantse yojuangmėmanama tmojáninýe ora, y njyetsca chě yojtsěchnějuana soyěngama, puerte auatjanáněnga imojtsemna y tmojánayana: “¡Ndegombre quem boyabása Běngbe Bětsabe Uaquiñá yomna ca!”

<sup>55</sup> Ba shembásengnaca chentše imojtsemna y bėnocana imojtserreparana. Chěngna, Galileocana Jesús tmojanasto y cha imojanájabuachana. <sup>56</sup> Chě shembásengbeñe imojtsemna María Magdalena; María, Santiago y Josebe mamá; y Zebedeobe uaquiñatbe mamá.

### *Jesús tmojanatbontsá*

*(Mc 15.42-47; Lc 23.50-56; Jn 19.38-42)*

<sup>57</sup> Ya yojtseibétatana ora, canýe bomna boyabása, José ca uabainá, tojánashjango. Cha inamna Arimatea luarocá y Jesusbe ustoná. <sup>58</sup> José tojána Pilato jinýama, Jesusbe cuerpo jotjañama. As Pilato tojanmandá chě cuerpo chamontšabuáchema. <sup>59</sup> José chě cuerpo tojanca y canýe nduatsenga lino entsějuaca tbojanandmaná. <sup>60</sup> Y canýe chabe tsěm cuevěshiñe tbojanajó. Tempo cha inamánda chě cuevěshna ndětsbenguiñe chamopormama. Canýe běts ndětsbé tojansjoná y chě cuevěshoye amashjuanentše tojánachto; y chentšana José yojtsatoñe. <sup>61</sup> Pero María Magdalena y chě inýe Mariyna chentše tbojtsanoquedañe y chě cuevěshe ndirichiñe tbojanótbema.

### *Soldaděnga tmojána Jesús yojtsatbontsánentše jtsebojanýama*

<sup>62</sup> Yěfsana, chě ochnayté, chě bachnangbe aměndayěnga y chě fariseunga cánýiñe tmojána Pilato jinýama. <sup>63</sup> Tmojanियana: —Taita, běnga fsěntsejuabná ntšamo chě bostero cabá ainá ora tonjánayanama, chě unga tianoye cha jtayenama ca. <sup>64</sup> Chíyeca, momandá chě cuevěshe soldaděnga chamotsashanyá unga tentscuana. Chca, chabe uatsjěndayěnga ndoñe íbeta chamondabo chabe cuerpo jabětsatbėbama, y chentšana chěnga entsanga chamúyana, Jesús tojtayena ca. Y chca, chabiama quem ústonoye bostero soye, chě cachabiama tojánayana soyěngama puerte más bacá nántsemna ca —chěnga tmojanियana.

<sup>65</sup> As Pilato tojanéyana: —Tšěngaftanga cach tšěngaftangbiama soldaděnga šmondábamna. Motsajna y chě cuevěshe cuedádoca šmochtsashanyá, ntšamo šmondětatsěmbcá ca.

<sup>66</sup> Chora chěnga tmojána chě cuevěshe jtsashanyama; chě ndětsbena, tsengájaseca imojuinýnaná, ntsoatšěmbcá ndocná choye chaondámashěnguama, y soldaděnga chentše tmojěftsanabashejuana.

## 28

*Jesús tojtanayena**(Mc 16.1-8; Lc 24.1-12; Jn 20.1-10)*

<sup>1</sup> Ochnayté chentšana, chë inye semana bojatsenté yojtsebínýana ora, María Magdalena y chë inye María tbojána cuevëshoye jarrepárama. <sup>2</sup> Ndeolpe fshantse tojanangmëmmana, er Bëngbe Bëtsabe canye ángel celocana tojántsmá, chë cuevëshoye tojanobeconá, chë atamiana ndëtsbé tojtsanjuaná y chiñe tojanótbema. <sup>3</sup> Chë ángelna mo canye tcuinýejcá yojtsebuashinýinýana, y chabe uichëtjonëjuangá uafjantsëjuangá mo jantsetëshcá yojtsamna. <sup>4</sup> Chë soldadënga chca tmojáninýe ora, de auatja yojtsangmëmnyaye y mo obanëngcá imojtsemna.

<sup>5</sup> Chora chë ángel chë shembásatbioye tojanéyana: “Ndoñe batauatjana. Atse sëntsetatšëmbo tšëngaftanga Jesús, chë tmonjancrucificá cha šmojtsenguama. <sup>6</sup> Chamuentse ndoñe quenátsmëna; cha tontayena, ntšamo cachá tonjanayancá. Mabata y šochjinýe cha endëtsesegoranentse. <sup>7</sup> Betsco motsata y chë uatsjëndayënga šochjáuyana: ‘Jesús tontayena y tšëngaftangbe natsana Galileoye echanjá; choca šmochanjinýe ca.’ ” Y chora cha tojánayana: “Chca šondmëna tšëngaftanga jauyanana ca.”

<sup>8</sup> Cachora chë shembásata chë cuevëshentšana tbojésanbocna, auatjanánata pero puerteyeyuayata, y tbojëftsanotjajo chë soye chë uatsjëndayëngbeñe jobuambayama. <sup>9</sup> Y ndeolpe Jesús chata tojánëbëbuacna y tojanacheuá. Chatna, chábioye tbojanobëconata, tbojtanadorata y chabe shecuatše shëconana imojtobojcjuá. <sup>10</sup> Y Jesús tojanéyana: “Ndoñe batauatjana. Motsata atšbe uatsjëndayënga, atšbe catsátanga jáuyanama Galileoye chamotsá y choca atše šmochjinýe ca.”

*Ntšamo chë soldadënga tmojánayana ndayá tojanochñënguama*

<sup>11</sup> Chë shembásata ibojtsayëntscuana, básefta soldadënga chë bëts puebloye tmojána y ntšamo tojanopasacá lempe chë bachnangbe amëndayëngbeñe tmojanobuambá. <sup>12</sup> As chë bachnangbe amëndayënga, chë judiëngbeñe bëtsëjemëngcá mandayëngaftaca tmojánenefjna jenóyeunayama. Chëngna chë soldadëngbioye bëtscá crocénana tmojtanatšatá, <sup>13</sup> y mëntšá tmojanabuayená: “Tšëngaftanga šmochjayana, ibeta šmotsománëntscuana, Jesusbe uatsjëndayënga tmojabo y chabe cuerpo tmojabétsatbëba ca. <sup>14</sup> Y chë mandado chë soyama chaojátatšëmbonëse, bënga lempe cháftaca fchjenóyeunaye, chca, tšëngaftangaftaca ndocá chaondopasama ca” —chënga tmojanéyana.

<sup>15</sup> As chë soldadënga chë crocénana tmojanóyëngacñe y tmojanma ntšamo chë mándayënga tmojanabuayenacá. Ba entšanga chë cuento tmojanuena y mëntscóñama judiënga cachcá mondbëtsichamo.

*Jesús chë uatsjëndayënga tojanichamó, Bëngbe Bëtsabe soyëngama nyetsquénache jábuayenama**(Mc 16.14-18; Lc 24.36-49; Jn 20.19-23)*

<sup>16</sup> Chentšana, chë bnëtsana canye uatsjëndayënga Galileoye tmojána, chë ndëmua tjoye Jesús chënga tojanabuayená choye. <sup>17</sup> Y Jesús tmojáninýe ora, tmojtanadorá. Pero báseftangna imojëtsejuabnyaye nderado cha ndoñe Jesús yontsemna ca. <sup>18</sup> Jesús chëngbioye tojanobeconá y tojanéyana: “Bëngbe Bëtsá nyets mando atše šonjatšetá celoca y quem luarentse. <sup>19</sup> Chcasna, motsajna, nyets luarënguenache oyenënga atšbe uatsjëndayënga šmochjábiana. Entšanga šmochjubaye atšbe Taitá, atše chabe Uaquiñá y chë Uámana Espíritbe uabaina jayanëse, átsbeñe šmošbuachéyeca, <sup>20</sup> y šmochjabuatambá lempe ntšamo atše tchojamëndacá chënga chamóyeunama. Y ndegombre atše nyets tempo tšëngaftangaftaca chanjëftsemna, quem luare jopochócantscuana ca” —Jesús tojanéyana.



## San Marcos

### *Juan chë Ubayaná entsanga yojanabuayiyná*

*(Mt 3.1-12; Lc 3.1-9, 15-17; Jn 1.19-28)*

<sup>1</sup> Mëntsá tojanobojatsé chë tšabe noticiënga Bëngbe Bëtsabe Uaquiñá Jesucristbiamá.

<sup>2</sup> Ntšamo bayté entsemna, chë Bëngbe Bëtsabe juabna oyebuambnayá Isaías chabe librëšaňe yojëftsayanca, ntšamo Bëngbe Bëtsá chabe Uaquiñábioye ibojauyanama cha tojanábema ora:

Minýe, atšbe abuayiynayá acbe natsana sëntsichamná,  
chë aca jabama lempe echanjapróna cha.

<sup>3</sup> Entšanga ndoyena luaroca cha enduáyebuache mëntsá:

“Bëngbe Utabná echanjabo ca;

mo nda canýe benache tojtseprontacá canýe uámana entšá jashjanguama,  
cachcá tšëngaftanga, cha jabama ainaniňe tšabe juabnëngaca šmochtseprontana ca” –  
cha tojanábema.

<sup>4</sup> Chcase, Bëngbe Bëtsá Juan tbojanichmó, y cha tojánbocna entsanga ndoyena luaroca, Bëngbe Bëtsabe soyëngama abuayiynaye y entsanga ubáyana. Cha entsanga yojanëtsësnaye: “Tšëngaftangbe bacna soyëngama ngménaca šmochtenójuaboye, chca amana šochtsajbaná, y Bëngbe Bëtsabe benache šmochtishache. Chora chochjúbaye, y Bëngbe Bëtsá tšëngaftangbe bacna soyëngama cmochanjáperdonaye ca.” <sup>5</sup> Nýets Judea luarocana chábioye entsanga imojánbocana, y Jerusalenentsana nýetsca entšágnaca, y Bëngbe Bëtsábioye chëngbe bacna soyëngama jaimpáda chentšana, Juan Jordán ca uabaina béjajiňe chënga yojanëbáyana.

<sup>6</sup> Juanbe entšayá inauapormana camellbe stjënasheca y bobache yojanasnana; chapulinatémënga y tjaňe méloye inasaye. <sup>7</sup> Y mëntsá entsanga yojanëtsësnaye: “Atšbe ústonoye inýa echanjabo, atšbiamá más obenana bomná; chíyeca atše mercedo taitstobuajoňe, ni mo jotsejbiyana chabe shecochëtjonëshentsa corriëja jajafjonama. <sup>8</sup> Atšna búyesheca cbondëubáyana, pero chë echanjabábeyecna, Bëngbe Bëtsá bochanjíchmuá chë Uámana Espíritu tšëngaftangbe ainaniňe cháuamashënguama ca.”

### *Juan, Jesúsbioye tbojanabaye*

*(Mt 3.13-17; Lc 3.21-22)*

<sup>9</sup> Chë tempo, Galilea luarocana Nazaret pueblentsana Jesús yojëftsebocna, y Juan yojtsemnoye tojána; y Jordán béjajiňe Jesúsbioye cha tbojanabaye. <sup>10</sup> Bejajoicana yojtashëbëbocna orna, tojáninýe celoca atëfjniňe, y chë Uámana Espíritu chábioye mo palomatemcá yojtsastjajuana. <sup>11</sup> Y celocana Bëngbe Bëtsá mëntsá tbojanianyana: “Acna atšbe bonshana Uaquiñá condmëna; acbiamá corente sëntsoyejuá ca.”

### *Jesús tojanobená Satanás jayëñjanama*

*(Mt 4.1-11; Lc 4.1-13)*

<sup>12</sup> Chentšana chë Uámana Espíritu Jesúsbioye entsanga ndoyena luaroye tbojanánatse. <sup>13</sup> Canta bnëtsana te chë entsanga ndoyena luaroca tbojanjëtana, y Satanasna yojanabó jisháchichiyama. Chë luarentšë tšátjaye bayënga imnajena; chentšana, Bëngbe Bëtsabe angelënga cha imojtseserverna.

### *Jesús tojanontšé Galileoca chabe trabajo jamana*

*(Mt 4.12-17; Lc 4.14-15)*

<sup>14</sup> Juan cárceloye tmojanëtámentšana, Jesús Galileoye tojesaná; y chiňe cha yojanabuayiyná chë tšabe noticiënga Bëngbe Bëtsabiamá. <sup>15</sup> Jesús entsanga yojanëtsësnaye: “Ora tocjobuache, Bëngbe Bëtsabe amëndayana echanjójshjango. Tšëngaftangbe bacna

soyëngama ngménaca šmochtenójuaboye, y chca amana šmochtsajbaná y Bëngbe Bëtsabe benache šmochtishache; y ainaniñe chë tšabe noticiënga Bëngbe Bëtsabiama šmochjóyëngacñe ca.”

*Jesús tojánachembo canta boyabásenga beonga ashebuánayënga cha chamuastama*  
(Mt 4.18-22; Lc 5.1-11)

<sup>16</sup> Galilea uafjajónaye tsachajana Jesús yojtsaye ora, cha tojánanýe Simón y chabe uabentsá Andrés; chatna atarraiëshangá ibnetsashbuétsetšañe, er beonga ashebuánayata chata ibnamna. <sup>17</sup> Chora Jesús tojanëyana: “Atseftaca mabata. Atse cbochanjábiama Bëngbe Bëtsabiama entšanga anguayata; y morscana, nýe beonga ashebuánayata ndoñe quešochátsmëna ca.”

<sup>18</sup> Y cachora chatbe atarraiëshangá cachcá tbojésanaboshjuana y Jesús tmojanasto.

<sup>19</sup> Más chcoye yojátaye orna, Jesús tojánanýe Santiago y chabe uabentsá Juan, Zebedeobe uaquiñata; chatna barquëshañe ibnetsotbemañe, chatbe atarraiëshangá atapórmayñe. <sup>20</sup> Chora Jesús chë útata tojánachembo; as chatna, chatbe taitá Zebedeo chë barquëshañe tmojésanboshjona chabe peóngaftaca y Jesúseftaca tbojtsanoñe.

*Jesús, bacna bayëjbe juabna cánýabioye tbojanbojuaná*  
(Lc 4.31-37)

<sup>21</sup> Chentšana, Jesús y chabe uatsjëndayënga Capernaum ca uabaina pueblota tmojánashajna. Chë ochnayté, Jesús chë judiëngbe enefjuana yebnentše tojánamashëngo y yojóntša entšanga jabuátambama. <sup>22</sup> Entšanga imojtsenjnanaye ntšamo Jesús yojtsabatambacá, er chama mo canýe mando bomnacá yojtsóyebuambnaye, ndoñe nýe ntšamo Moisesbe ley abuátambayënga imojanabuatambacá. <sup>23</sup> Chë pueblentše judiëngbe enefjuana yebnentše yojtsemna canýe entšá bacna bayëja uambayá, y chábeyeca chë boyabása yojóntša mëntšá uayebuáchana: <sup>24</sup> —¿Ndayama bëngbioye təcjabo, Jesús Nazaretocá? ¿Tcojabo bënga jabétsapochocama? Atše sëndétatsëmbo nda aca comnama, aca chë Bëngbe Bëtsabe Uamaná ca.

<sup>25</sup> Chora Jesús chë bayëjbioye tbojtsanácacana, y tbojanianyana: —¡lytëca móbema y chábentšana maisebocna ca!

<sup>26</sup> Chora chë bacna bayëjna tojanma chë boyabása ataque chaboshachama, jabuache tojanoyó y chábentšana tojésanbocna. <sup>27</sup> Chama, nýetsca entšanga ojanánënga imojtsemna, y mëntšá imojtsentjanaye: “¿Ndayá chca yojtsemna? ¿Canýe tsëm buatëmbana soye? ¡Quem boyabása mando bomnacá y obenacá entsabatambá, y chca, chë bayëjënga cha jtsamëndayana y chëngnaca joyeunayana ca!”

<sup>28</sup> Y betesco nýets Galilea luarentša pueblënguenache Jesusbiama yojtsótatsëmbo.

*Jesús, Simón Pédrëbe uambén mamábioye tbojanshná*  
(Mt 8.14-15; Lc 4.38-39)

<sup>29</sup> Chentšana, chë enefjuana yebnentšana tmojánbocana y Santiago y Juánoftaca Jesús tojána, Simón y Andresbe yebnoye. <sup>30</sup> Simonbe uambén mamá šocá inajájona, jabuache calentóraca, y Jesúsbioye chë šocabiama tmojanianyana. <sup>31</sup> As chora, Jesús tojanobconá, chë šocábioye tbojanábuacueshache y tbojanatsbaná. Cachora chë calentora tbojtsanóbojuanañe; y cachora cha tojtantsbaná y tojanontsé chënga jobuácuedana.

*Jesús ba šoquënga tojanashná*  
(Mt 8.16-17; Lc 4.40-41)

<sup>32</sup> Chë te jetiñe, shinýe ya yojuenatjëmbe ora, chë luarentša nýetsca šoquënga y bacna bayëjënga uambayënga Jesúsbioye tmojanënatse; <sup>33</sup> y nýetsca entšanga bëšoye imojobeconá. <sup>34</sup> Jesús banga tojanashná, nýetsca šocana bomnënga, y ba bacna bayëjënga entšanguentšana tojtanëbuacna; y ndoñe tonjanalesenciá chë bayëjënga chamóyebuambama, er chënga imnatátsëmbo cha chë Cristo bëtsemnama.

*Chë judiëngbe enefjuana yebnënguenache Bëngbe Bëtsabe soyëngama Jesús yojanabuayiná  
(Lc 4.42-44)*

<sup>35</sup> Yëfsana cabá cachëse, cabá ibetcá, Jesús tojëftsantsbaná, chë pueblentsana tojëftsanbocna y entsanga ndoyena luaroye tojtsanoñe, choca Bëngbe Bëtsáftaca jencuéntama. <sup>36</sup> Pero Simón y chabe enutëngna tmojána jetsenguanguama; <sup>37</sup> y tmojtsaninýena ora tmojanianyana: –Nýetscanga cmontsenguá ca.

<sup>38</sup> Y Jesús tojanéyana: –Inýoye cuajna, cam béconana pueblëngoye, chíñnaca Bëngbe Bëtsabe soyëngama entsanga chayábuayenama; er chama atše sënjabo ca.

<sup>39</sup> Y chentsana, Jesús yojánana Bëngbe Bëtsabiamana entsanga abuayinayeye chë judiëngbe enefjuana yebnënguenache, nýets Galileiñe, y entsángbentsana bacna bayëjënga yojtëbuacana.

*Jesús, canya bacna nguayanánaca šocábioye tbojanshná  
(Mt 8.1-4; Lc 5.12-16)*

<sup>40</sup> Chentsana, canye boyabása bacna nguayanánaca šocá Jesúsbioyeye tojanobeconá; y joshaméntšase mëntšá tbojanimpadá: –Aca tcojtsebošëse, aca catjobenaye atšbe šocana jtsebojuánama ca.

<sup>41</sup> Jesús chabiamana tbojanongmé; cucuátšeca tbojánbojajo y tbojanianyana: –Aíñe sëntseboše. ¡šocana cbotsebojuaná ca!

<sup>42</sup> Y cachora chë šocana tbojtsanóbojuanañe y tšabá yojtsatsmëna. <sup>43</sup> Chora Jesús chábioyeye tbojtanichmó, pero puerte mëntšá tbojanmandá: <sup>44</sup> –Mouena; ndocnábeñe quem soye cattsecuëntayeye; nýe Jerusalenoca báchnëbioyeye motsa y cha cochjinýinýiye aca mora ya tšabá cojtsatsmënama. Chora cochjuátšëmbona ntšamo Moisés chabe leyiñe tojanmandacá, Bëngbe Bëtsábioyeye chama jëtschuayama, chca, nýetsca entsanga chamotatsëmbona mora ya tšabá cojtsatsmënama ca.

<sup>45</sup> Pero chë boyabásana, chentsana tojëftsanbocna y cachora yojóntša nýetsquénache entsanga yapa acúntayana Jesús tbojanshnama. Chë causa, Jesús ndoñe yontsobena entsangbe delante pueblënguenache jtsanana, ndayá nýe chë pueblënga béconana y nýetsca chë entsanga ndoyena luarënguiñe yojánana; pero nýets luarëngocana chábioyeye entsanga imojánashjajuana.

## 2

*Jesús, canye jama ndobenábioyeye tbojanshná  
(Mt 9.1-8; Lc 5.17-26)*

<sup>1</sup> Chentsana, Jesús Capernaumoye tojtanashjango; y entsanga imojátatsëmbona, Jesús yebnentše yojtsatsmënama. <sup>2</sup> Mallajta entsanga chentše tmojanójoto; chë causa chë yebnentše ya tondaye más luare entsangbiamana yontsemna, ni mo chë amashjuanentše, y Jesús Bëngbe Bëtsabe soyëngama yojtsabuayinayeye. <sup>3</sup> Chora tojanopasá, canta boyabásenga tmojánashjango, canye entsá jama ndobená imojtsaismana. <sup>4</sup> Pero ndoñe tmonjanobená Jesús yojtsemnoyeye cha juambana, tša entsanga causa. Chcasna, chë canta boyabásenga yebna tsbanánoca, Jesusbe tatsëtsoca batšá tmojánatëfjo y chëjana chë jama ndobená tjuashiñe tmojanëštjango. <sup>5</sup> Jesús tojáninýe chënga tša imojtsošbuaché chë šocá jáshnama cha yojanobenama; as chë jama ndobenábioyeye tbojanianyana: “Sobreno, mouena; acbe bacna soyënga tcbontseboperdoná ca.”

<sup>6</sup> Chentše báseftanga judiëngbe ley abuátambayënga imnatbemana; chënga chora mëntšá imojtsejuabnaye: <sup>7</sup> “¿Ntšámoyeca quem boyabása chca yojtsichamo? Jesús ndoñe tšabá Bëngbe Bëtsabiamana quenátichamo; mo chábioyeye cuafjoyenguangcá entsemna. Ndocna entsá quenátobena ínýabioyeye bacna soyëngama japerdónana; nýe Bëngbe Bëtsana aíñe ca.”

<sup>8</sup> Pero Jesús cachora lempe yojtsetátšëmbo ntšamo chënga ainanoca imojtsejuabnacá; as tojanéyana: “¿Ndáyeca chca tšëngaftanga ainaniñe šmojtsejuabná? <sup>9</sup> ¿Tšëngaftangbiamana

ndayá más paselo nántsemna tšëngaftangbe delante chë jama ndobenábioye atšë jauyanana: ‘Acbe bacna soyënga tcbontseboperdoná’, o ‘Matëtsbaná, acbe tjuashe mesocñe y motsa ca?’ <sup>10</sup> Y chca, mora atšë cbochanjínýanýiye Bëngbe Bëtsá Entšá tbojanbemá quem luariñe obenana yobomnama, entšanga bacna soyëngama jáperdonama ca” —Jesús tojánayana.

Y chë jama ndobenábioye tbojaniyana: <sup>11</sup> “Atšë cbëyana, matëtsbaná, acbe tjuashe mesocñe y acbe yebnoye motsatoñe ca.”

<sup>12</sup> Cachora chë jama ndobená tojtantsbaná, chabe tjuashe yojescñe, y entšangbiajana chentšana yojésebcna. Chama nýetsca entšanga imojenjnaná y Bëngbe Bëtsábioye imojtsatschuanaye, y mëntšá imojtsichamo: “Nýa ndocna te tša bëts soye chemuáisinýe ca.”

*Jesús, Levíbioye tbojanchembo chabuastama*  
(Mt 9.9-13; Lc 5.27-32)

<sup>13</sup> Chentšana, Jesús cachiñe chë uafjajónaye tsachoye tojesaná; ba entšanga chábioye imojobeconá, y Jesús yojsabuátambaye. <sup>14</sup> Chentšana yojsataye orna, Jesús tbojáninýe Levíbioye, Alfeobe uaquiñá, yojsanotbemañe, entšanga impuesto atjanayacá inétsotrabajañe. Chora Jesús tbojaniyana: “Smasto ca.”

Y Leví tojantsbaná y tbojanasto.

<sup>15</sup> Tojanopasá, Jesús Levibe yebnentšë yojtseyaye, y banga Romocama entšanga impuesto atjanayënga y inýe bacna entšanga, mesëshentšë cánýiñe imojtsetbiámana, Jesús y chabe uatsjëndayëngaftaca; er ba entšanga cha imojústona. <sup>16</sup> Chë fariseunga y chë ley abuátambayënga, chë entšángaftaca Jesús yojtseyesama tmojáninýe ora, chabe uatsjëndayëngbioye tmojanatjá: —¿Ndáyeca tšëngaftangbe buatëmbayá, entšanga impuesto atjanayëngaftaca y bacna soye amëngaftaca yojtseyesá ca?

<sup>17</sup> Jesús chca tojanuena; as mëntšá tojanëjua: —Chë salud tmotsobomñënga, ashnayá ndoñe ntsëjabótana, pero chë šoquëngna aíñe. Y atšë ndoñe chiyátabo chë Bëngbe Bëtsabe bominýiñe tšabá amënga jabáchembuama, ndayá chë bacna soye amënga imomna ca juabnayënga átšbioye jabáchembuama ca.

*Jesús tmojanatjá chë Bëngbe Bëtsáftaca jencuéntama tondaye saytescama*  
(Mt 9.14-17; Lc 5.33-39)

<sup>18</sup> Canýe, Juan chë Ubayanabe ústonënga y chë fariseungbe usetonënga, Bëngbe Bëtsáftaca jencuéntama tondaye ntjascá imojtsemna ora, básefta entšanga Jesúsbioye tmojanobeconá y mëntšá tmojaniyana: —Juanbe ústonënga y chë fariseungbe usetonënga monduamana tondaye ntjascá jtsemnana Bëngbe Bëtsáftaca jencuéntama. ¿Ndáyeca acbe uatsjëndayënga ndoñe chca ca?

<sup>19</sup> As Jesús tojanëjua: —Chë casamento fiestentšë, chë ófjanënga saná ndoñe ntsabuáshebenana. ¿Ntšamo chca ndoñe nántsemna? Chë tojobouamá entšá chëngaftaca tojtsemnëntscuana, chë ófjanënga bëtská jasana y cháftaca oyejuayënga jtsemnana. <sup>20</sup> Pero ora echanjobuache y chë boyabása chëngbentšana mochantsánatseñe; chora cocayé chë ófjanënga echántsamna tondaye ntjascá jtsemnana. Ntšamo chë tojobouamá boyabása y chë ofjanëngaftaca endmëncá, cachcá endmëna atšë y atšbe uatsjëndayëngaftacnaca.

<sup>21</sup> “Ndocná, canýe tanguá entšayá, base tsëm entšëjuaca jtarmëndana; chca tcojamëse, chë tsëm entšëjua jtsabéconana y chë tanguá entšayá más jtsatanëcanana, y chca, chë uátanëcniñe más bëtsiñe jtsabemana. <sup>22</sup> Y cach ndoñe, chë tojtseyayana vínoye tanguá jasabenguiñe ntjataftsuámayana; er chë jasabenga jtseshëbëfjuana y chë vínoye jtsabuáshanana, y chë vínoye y chë jasabenga tondayama ntjatoservénana. Chíyeca comna, chë tojtseyayana vínoyna tsëm jasabenguiñe juaftsuámana; chca, chë jasabenga y chë vínoye josérviana ca” —Jesús tojánayana.

*Jesube uatsjëndayënga canýe ochnayté trigo tmojanátabebe*  
(Mt 12.1-8; Lc 6.1-5)



<sup>23</sup> Canÿe ochnayté, Jesús canÿe jajajana yojtsaye; y chabe uatsjédayënga chëjana imojtsachnëjuana ora, tmojanontsé trigo juatabebiana. <sup>24</sup> Chë fariseunga chca imojinÿe ora, Jesúsbioye tmojanianana: —Minÿe. ¿Ntšamo acbe uatsjédayënga montsamcá, ndoñe quenátslesenciana ochnayté jtsamama ca?

<sup>25</sup> Pero cha tojanëjua: —¿Ndoñe šmëndualía y šmondétatšëmbo ntšamo Rey David y chabe enutënga tmojanmama shëntseca imojtsemna ora y jasama yojtsëjaboto ora?

<sup>26</sup> Chca ora, Abiatar chë judiëngbe bachnangbe más uámana amëndayá inamna ora, David Bëngbe Bëtsabe yebnoye yojámashëngo, y chë luarentše Bëngbe Bëtsá yojamnama inÿinÿnaye tandëšënga yojase; y chë cháftaca imojánajna entšágnaca yojátšataye. Y chë tandëšna nÿe bachnangbiamama belesenciana jasama. Masque David chca tojanma, Bëngbe Bëtsá ndoñe tonjánayana David canÿe bacna soye tojanma ca.

<sup>27</sup> Y Jesús más tojánayana: —Bëngbe Bëtsá ochnayté entšabiamama tojama y entšá ndoñe tbonjánbema nÿe chë ochnayté ndoñe chaondëtrabajama. <sup>28</sup> Chíyeca, Bëngbe Bëtsá Entšá tbojanbemá, ndayá entšá ochnayté tojtsama sóynaca jtsemándayana ca.

### 3

#### *Chë buashana cucuatše bomna entšá (Mt 12.9-14; Lc 6.6-11)*

<sup>1</sup> Chentšana, Jesús cachiñe chë judiëngbe enefjuana yebnoye tojésanamashëngo; y chentše canÿe boyabása yojtsemna, buashana cucuatše bomná. <sup>2</sup> Chë fariseunga chiñe imojtserrondana jinÿama nderado Jesús chë ochnayté chábioye tabuanjashnama, as chca chënga jtsebomnama ndaye sóyeca cha mal jaquédana. <sup>3</sup> Chora Jesús chë buashana cucuatše bomnábioye tbojanianana: —Chentše, entšangbe delante motsa ca.

<sup>4</sup> Y chë fariseunga tojanatjá: —¿Ndayá yojtselesenciana ochnayté jamama, tšabe soye o ndoñe tšabe soye? ¿Jatsbocama o jtsepochócama ca?

Pero chënga ndocá tmonjanjuá, nÿe iytëca imojobiamama. <sup>5</sup> Chora Jesús rábiaca y ngménaca chë fariseunga tojanëñyanÿé, chënga ainaniñe josértama ndoñe montseboše causa; y chë buashana cucuatše bomnábioye tbojanianana: —Macuenÿanëjaná ca.

As chë boyabása tojanacuenÿanëjaná, y chora tšabá chëtša yojtsatamna cach inÿetšacá. <sup>6</sup> Pero chë fariseungna, chentšana tmojésanbocana ora, Rey Heródesbe ustonëngaftaca tmojanenoyeuná Jesusbe contra, y tmojanontsé juabnayana ntšamo jamëse Jesús jóbama.

#### *Mallajta entšanga Jesúsbioye tmojanobeconá*

<sup>7</sup> Chentšana, Jesús chabe uatsjédayëngaftaca tojanoluaré mar béjaye tsachoye, y Galileocana bëtscá entšanga tmojanasto. <sup>8</sup> Inÿe entšágnaca chábioye tmojanobeconá Judeocana, Jerusalenocana, Idumea ca uabaina luarocana, Jordán béjaye chenguanoicana, Tiro y Sidón pueblëngocana. Chënga tmojanobeconá, Jesús tša bëtš soyënga yojtsamama tmojanuena ora. <sup>9</sup> Jesús chabe uatsjédayënga tojanëyanana: “Motsajna y canÿe barquësha atšbiamama šmochjuapróna, tša entšanga ndoñe chašmondëtsatsëntšnama ca.” <sup>10</sup> Er cha banga tojanashná, y chë causa, nÿetscanga šocana bomnënga chábioye tmojanajuatsëntšená cha jabojuama.

<sup>11</sup> Y chë bacna bayëjënga uambayëngna, Jesús tmojinÿe ora, betesco chabe she-cuatšentše imojtsofshëntsamëntšenaye, y chë bacna bayëjëngbeyeca mëntšá imojtsáyebuache: “¡Aca Bëngbe Bëtsabe Uaquiñá condmëna ca!”

<sup>12</sup> Pero Jesús puerte tojanamëndá, nda cha bëtsemnama entšangbe delante ndoñe chamondëtsichámuama.

#### *Jesús chë bnëtsana uta uatsjédayënga tojanabacacá (Mt 10.1-4; Lc 6.12-16)*

<sup>13</sup> Chentshana, Jesús canye batsjoye tojánstjua, y ndēmuanýenga tšabá tbojanínýnanēnga tojánachembo. Y chēngna chábioye tmojanobeconá. <sup>14</sup> Chora, chēnguentšana bnětsana útata tojanēbuáyana, chamotsetjēmbambnama, y Bēngbe Bětsabe soyēngama entšanga chámabuayenama; <sup>15</sup> y chēnga obenana tojanatšatá entšāngbentšana bacna bayējēnga jtēbuacanama. <sup>16</sup> Mēnga mondmēna chē bnětsana uta bocacánēnga: Simón, chē ndábioye Pedro ca Jesús tbojanabaye; <sup>17</sup> Santiago y chabe uabentsá Juan, Zebedeobe uaquiñata, chata tojanēbaye “boanerges ca”, y chca endayana “uajuesayabe uaquiñata ca”; <sup>18</sup> Andrés, Felipe, Bartolomé, Mateo, Tomás, Santiago, Alfeobe uaquiñá; Tadeo, Simón chē celote ca uabobainá; <sup>19</sup> y Judas Iscariote, chē chentshana ndoñe baytesna, Jesús uayayēngbe cucuatšīñe bochjanboshjoná.

*Ley abuátambayēnga tmojánayana, Jesús Satanásbentšana obenana tojanóyēngacñe ca (Mt 12.22-32; Lc 11.14-23; 12.10)*

<sup>20</sup> Chentshana, Jesús yebnoye tojtanamáshēngo, y tša entšanga chentše tmojanójoto; chē causa, ni cha ni chabe uatsjédayēnga, ni mo jasama luare ndoñe imontsebomna. <sup>21</sup> Jesusbe pamíllanga ntšamo cha yojtsepásama tmojántatšēmbona ora, tmojána cha jetsbetšama, er entšanga imojtsencuéntaye cha opá tojtsanóbema ca.

<sup>22</sup> Y chē ley abuátambayēnga Jerusalenocana tmojánashjainēngna Jesusbiana mēntšá imojtsichamo: “Chabe ndegombre mandayá Beelzebú, cach Satanás yojtsemna. Cha, chē bacna bayējēnga amēndayá, Jesúsbioye obenana tbojatšetá entšāngbentšana bacna bayējēnga chauatēbuacnama ca.”

<sup>23</sup> Chēnga chca imojtsichámuama, Jesús chēnga tojánachembo, y cuentēngaca tojanontšé jáuyanana, jinýanýiyama chēnga canye ndoñe ndegombre soyiñe imojtsemnama, mēntšá: “¿Ntšamo Satanás nantsobena cachá jtenábocnama ca? <sup>24</sup> Canye amēndayábentše entšanga tmojtsenojatá y tmojtsenáyase, chē amēndayana ndoñe ntjatotonana. <sup>25</sup> Cachcá, canye yebnentše pamíllanga tmojtsenojatá y tmojtsenáyase, chē pamíllanga ndoñe tšabá nyets tempo quemochátmēna. <sup>26</sup> Y cachcá, Satanás y chábēnga ndoñe tmontsenēyeunana y cachabe contra tojtsemnēse, chabe amēndayana ndoñe más queochátstotona; y cha ya ndoñe más chēngbe amēndayá queochátmēna.

<sup>27</sup> “Ndocná quenátobena canye corente añemo bomna entšabe yebnoye jamashēnguana y chabe soyēnga jtsebocana, ndoñe natsana tconjshétsebatsēquēse. Nye tcojshétsebatsēquēse cocayé cuanjobenaye cha jefcana.

<sup>28</sup> “Ndegombre cbéyana, Bēngbe Bětsá entšangbe nyetsca bacna soyēnga echanjáperdonaye, y ntšamo Bēngbe Bětsabiana y ínýengbiana ndoñe tšabá tmontsichamo soyēngnaca; <sup>29</sup> pero chē Uámana Espíritbiana ndoñe tšabá ichámēngna ndocna te queochátaperdonaye, er nyetsca tescama castigánēnga jtsemnana chēnga jtsamnana ca” —Jesús tojánayana.

<sup>30</sup> Jesús chca tojanéyana, er chēnga imojtsichamo cha bacna bayēja ibojtsambá ca.

*Chē Jesusbe ndegombre pamíllanguentšēnga (Mt 12.46-50; Lc 8.19-21)*

<sup>31</sup> Chēntscuana, Jesusbe mamá y catšátanga choye tmojánashjaina, pero nye shjoca imojtsemna; y canya tmojanichmó cha jachembuama. <sup>32</sup> Chē ba entšanga chentše chabe shēconana imojtsetbiámanēngna, chora tmojaniana: —Acbe mamá, acbe catšátanga y uabénanga shjoca montsemna; aca cmontsenguá ca.

<sup>33</sup> Chora cha tojanéjua: —¿Nda atšbe mamá yomna, y ndēmuanýenga atšbe catšátanga ca?

<sup>34</sup> Chentshana, chē chabe shēconanana tbiamanēngbioye jarrepárase, tojánayana: —Quemēnga mondmēna atšbe mamá y atšbe catšátanga. <sup>35</sup> Er ndánaca, ntšamo Bēngbe Bětsá yobošcá tojtsamá, jtsemnana atšbe catšata, atšbe uabena y atšbe mamá, atšbe ndegombre pamíllanguentšá ca.

## 4

### *Chë jenabe cuento*

*(Mt 13.1-9; Lc 8.4-8)*

<sup>1</sup> Chentsana, uafjónaye tsachoca Jesús tojtëtanontsé Bëngbe Bëtsabe soyëngama jabuátambama. Mallajta entsanga tmojanobeconá causa, chë uafjónayentse yojanamna canye barquëshoye Jesús tojánasëngo y tojanótbema; y chë entsanga tsachoca imojtsemna. <sup>2</sup> Chora cuentëngaca ba soyëngama tojanabuatambá.

Mëntsá tojanëyana: <sup>3</sup> “Smochjouena; canye jená chë jénaye jaujquëshama yojëftsebocna. <sup>4</sup> Yojsëjquëshaye orna, básefta jénaye benache juachañe yojuatquécjana; pero jaja shloftšënga imojástjajna y lempe imojtsósañe. <sup>5</sup> Inye meshëngna ndëtsbenguiñe yojuatquécjana, ndoñe yapa fshantse binyñentse. Chiñna betscó yojuábocna, ndoñe yapa jashenocana fshantse yojanmëna causa; <sup>6</sup> pero yojuábocna orna, puerte yojojënyána y yojtsancta; y yojtsábojo yapa tbëtëjënga tondaye causa. <sup>7</sup> Inye meshëngna uchmëshangañe yojuatquécjana; chë uchmashá yojuájua ora, lempe yojtsatscué, y chca, chë jénayentsana tondaye yonjuashájona. <sup>8</sup> Pero inye meshëngna, uanguaniñe yojuatquécjana, y bëtscá tšabe shajuanënga chiñe yojóbocna: ínÿenache, canye meshentsana unga bnëtsana meshënga yojóbocna; ínÿenachna, chnënguana bnëtsana meshënga; y ínÿenachna patse meshënga ca” –cha tojánayana.

<sup>9</sup> Y chentsana, Jesús más tojánayana: “Chë jouenama tmojtsobenënga, smochjouena ca.”

### *Ndáyeca Jesús cuentëngaca yojánabuatambaye*

*(Mt 13.10-17; Lc 8.9-10)*

<sup>10</sup> Chentsana, Jesús canya yojoquéda ora, chë chabe béconana imojtsemnënga chabe bnëtsana uta uatsjëndayëngaftaca, tmojantjá ndayá chë cuento bétsayanama. <sup>11</sup> As Jesús tojanëjua: “Bëngbe Bëtsá tšëngaftanga cmontsinÿanÿná nyetsca chë mo iytëmcá yomna soyënga chabe amëndayama, pero chë ínÿengbioye ndoñe; chë soyëngama chënga lempe cuentëngaca sëntsëtsëtsná. <sup>12</sup> Chca, masque beca chamotsafšna, ndoñe chamondobená chë Bëngbe Bëtsabe soyënga jinÿama; y masque beca chë soyënga chamouena, ndoñe queochátësertana, chënga Bëngbe Bëtsábioye ndoñe chamondëtobéconama, y cha ndoñe chaondáperdonama ca.”

### *Jesús chë jenabe cuentama tojanabuayená*

*(Mt 13.18-23; Lc 8.11-15)*

<sup>13</sup> Chentsana, Jesús tojanëyana: “¿Quem cuentama ndoñe tcmónjósertase, ntšamo chc case nyetsca cuentëngama cmochjóserta ca? <sup>14</sup> Chë jená endmëna chë tšabe noticiëngama abuayiynayá. <sup>15</sup> Básefta entsanga mondmëna mo chë benache juachañe yojuatquécjana jenaycá. Chëngna Bëngbe Bëtsabiamá soyënga jouenana; pero chora Satanás betscó jabana, chëngbe ainaniñe yojtsemna Bëngbe Bëtsabe palabra jabétsabuajuanama, chënga chiñe ndoñe chamondëtsošbuáchema. <sup>16</sup> Inye entsanga mondmëna mo chë ndëtsbenguiñe yojuatquécjana jenaycá; chëngna Bëngbe Bëtsabe palabra jouenana y oyejuayënga jtsemnana; <sup>17</sup> pero ndoñe nyets tempo chana jocochájuana; y chca, ndoñe bayté Bëngbe Bëtsáftaca ntjëftsemnëngana, ndoñe yapa tmontsašbuaché causa. Inyënga mochantsëbuayënja, y Bëngbe Bëtsábeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonÿaye. <sup>18</sup> Inyënga mondmëna mo chë uchmëshangañe yojuatquécjana jenaycá. Chënga Bëngbe Bëtsabe palabra mochanjouena, <sup>19</sup> pero quem luarentša soyëngaca oyejuayënga jtsemnana yapa mochántseboše, y nye bomnana jëftsebomnana yapa mochanjésenojuabnaye. Chë soyama y inye ba soyëngama yapa enócochinÿena causa, Bëngbe Bëtsabe soyëngama echantsebnëtjomba, y ndoñe quemochátama ntšamo Bëngbe Bëtsá tojayancá. <sup>20</sup> Pero ínÿënga mondmëna

mo chë uanguaniñe yojuatquécjána jenaycá. Chëngna Bëngbe Bëtsabe palabra bota-mana mochanjouena; nyets ainánaca mochántseprontana chiñe jtsošbuáchiyama. Mo canye betiye becá tsabá tojtseshajuancá, chënga bëtscá tsabe soyënga Bëngbe Bëtsabiama mochántsama. Inyënga ínÿengbiama más bëtscá soyënga mochanjama; y chca, ínÿënga mochántsemna mo chë unga bnëtsana meshe tojanshajo jenaycá, ínÿënga mo chë chnënguana bnëtsancá, y ínÿëngna mo chë patse meshënga tojanboté jenaycá ca” —Jesús tojánayana.

*Chë uajuinÿanëshama cuento  
(Lc 8.16-18)*

<sup>21</sup> Mëntsánaca Jesús tojánayana: “Ndocná juiyëbana canye uajuinÿanëshama cajonëshe o jutsnëshama tajsoye juajájuama. Ndoñe; uajuinÿanëshama juiyëbana tsbanánoca juajájuama, lempe chaotsebínÿnama. <sup>22</sup> Ndocna yoiytëmena soye ntjinÿencá queochaisoquéda, y chë ndótatsëmbo soye ntsotatsëmbcá queochaisoquéda. <sup>23</sup> Chë jouenama tmojtsobenënga, smochjouena ca.”

<sup>24</sup> Y mëntsánaca Jesús tojanëyana: “Tsabá smochjájuaboye ntšamo smojtsuenanama. Nye batsatema smojouenëse, nye batsatema cmochanjósertaye; pero aiñe tsabá smojouenëse, chama corente cmochanjósertaye; y Bëngbe Bëtsá echanjama tsëngaftanga más soyëngama chacmósertama. <sup>25</sup> Er nda Bëngbe Bëtsabe soyëngama tsabá tbojosertá, Bëngbe Bëtsá echanjama cha más ba soyëngama chabosertama; pero nda chë soyëngama josértama ndoñe tontsebošá, chë nye batsá ibosertana soyëngama bochántsebnatjëmba ca” —cha tojánayana.

*Chë ojuajna jenayama cuento*

<sup>26</sup> Jesús mëntsánaca tojanëyana: “Bëngbe Bëtsabe amëndayana endmëna mo ntšamo canye boyabása jénaye tojuatbontsá ora echandbopasacá: <sup>27</sup> masque cha cada ibeta jtsojájuana y bnëtë jotsbanama, ibeta o bnëtë, chë jénayentsána juabocnana y juájuana, ntšamo chca yojtsájuañnama chë boyabása ntjatstatsëmbcá. <sup>28</sup> Chë fshantse cachabe ponto jamana ndayánaca chiñe chaójuama; natsana tsbuanachëtama jóbocnana, chentsána chë espiga, y chentsána chë meshënga jashájonana. <sup>29</sup> Y chë meshënga ya tojtsebóchichna orna, játbanama jabocnana, chë saná josháchiñama ora ya tojobuácheyeca ca” —Jesús tojánayana.

*Chë mostaztiye jenayama cuento  
(Mt 13.31-32; Lc 13.18-19)*

<sup>30</sup> Jesús mëntsánaca tojanëyana: “¿Ndayacá Bëngbe Bëtsabe amëndayana yomna, o ndaye sóyeca nanjopódia chama jábuayenama? <sup>31</sup> Endmëna mo canye mostaza jénaye jajoca tcojajecá. Ndegombre, nyetsca quem luarentša jenayëngama, mostaza jénaye chë más básetema endmëna; <sup>32</sup> pero tcojajé orna, jójuana, y jajañe chë más bëtts betiye jóbemana, ba bëtts buacuashëngaca; chíyeca chë jaja shloftšënga jana y chiñe uaja-jonëtemëngá jauábopormana ca.”

*Ndáyeca Jesús cuentëngaca entsanga yojanabuayiná  
(Mt 13.34-35)*

<sup>33</sup> Chca Jesús Bëngbe Bëtsabe soyëngama entsanga yojanabuatambá, ba cuentënguentšana, mo chë tmonjouena cuentcá, ntsachetšá chë entsanga josértama tmojobenacá. <sup>34</sup> Tondaye yonjanabuatambá ndoñe cuentëngaca ntsemëncá; pero chabe uatsjëndayëngna lempe yojanabuayiná, cánÿënga tmojtsemna ora.

*Jesús chë binÿia y chë béjaye bonguana yojëtsbema  
(Mt 8.23-27; Lc 8.22-25)*

<sup>35</sup> Cach te, yojtseibétatana ora, Jesús chabe uatsjëndayënga tojanëyana: “Uafjajónaye chenguana cuajna ca.”



<sup>36</sup> Chorna, chë entsanga jesabáshejuanëse, chë uatsjédayënga Jesús tmojtsanáatseñe, cach yojánenjaquena barquëshañe; y inye entsángnaca inye barquëshangañe tmojanasto. <sup>37</sup> Chentsana, chë uafjajónaye béjayiñe tša jabuache binýia yojóshjango; olëshënga chë barquësha imojtsétsbotsana, y chë causa chë barquësha yojóntša búyesheca jtsobuajútjiana. <sup>38</sup> Y chëntscuana, barquësha stëtsoica, tsëntšenëshañe Jesús yojtsomañe. Chora chë uatsjédayënga tmojtsanfšená y tmojanianyana: —¡Buatëmbayá! ¿Tondayana cmontsentšamna bënga chašotsënatjëmbama ca?

<sup>39</sup> As Jesús tojantsbaná, chë binýia tbojanácacana, y chë bëts uafjajónayoye tojánayana: —¡Natjëmbana cochtsemna! ¡Bonguana ca!

Y cachora chë binýia yojëtstëcja, y lempe bonguana yojtsatsmëna. <sup>40</sup> Chora chabe uatsjédayënga tojanéyana: —¿Ndáyeca tša šmojtsauatja? ¿Bëngbe Bëtsá tšëngaftanga jujabuáchama yobenama cabá ndoñe šmontsošbuaché ca?

<sup>41</sup> Chama, chënga puerte auatjanánënga imojtsemna y mëntšá imojtsenatsëtsnaye: “¿Nda quem boyabása yomna? Cha tonjayana y chë binýia y chë béjaye tmonjoyeuná ca.”

## 5

### *Chë Gerasa luaroca bacna bayëja uambayá (Mt 8.28-34; Lc 8.26-39)*

<sup>1</sup> Chentsana, uafjajónaye chenguánoica tmojánashjajna, Geraseno ca uabaina entsangbe luaroye. <sup>2</sup> Jesús barquëshoicana tojánastjango, y cachora, chë obanëngbe cuevëshënguentsana canýe entsá, bacna bayëjbe juabna uambayá, tojánbocna y tbojanjébingo. <sup>3</sup> Chë boyabásana, obanëngbe cuevëshënguenache inoyena, y ndocná yonjobena cha jtsebátsëcana, ni mo cadenëjuangaca; <sup>4</sup> er ba soye cadenëjuangaca y inye soyëngaca cha nyëtsá tmojanbatsëca, pero cha nyëtsca soye yojtsátabebe y yojtsenájaca, y ndocná yonjobenaye cha bonguana chaotsemnama. <sup>5</sup> Nyëts tempo, bnëté y íbeta, obanëngbe cuevëshënguenache y tjañenache yojánana yoye, y ndëtšbéngaca enotsetšenaye. <sup>6</sup> Jesúsbioye bënocana tbojáninýe ora, chábioye tojanótjajo y chabe natsanoica yojoshëntsamentšiyë; <sup>7</sup> y mëntšá yojtsáyebuache: —¿Ndayá átšeftaca cojtseboše, Jesús, celoca Bëngbe Bëtsabe Uaquiñá? ¡Bëngbe Bëtsabe delante cboimpadá, ndoñe šcatjatsëšená ca!

<sup>8</sup> Chca tbojanianyana, er Jesús chábioye tbojanianyana: —¡Bacna bayëjbe juabna, chábentsana maisebocna ca!

<sup>9</sup> Chentsana Jesús tbojantjá: —¿Ntšamo cabaina ca?

Y chë bacna bayëjëngbe juábnaca cha tbojanjuá: —Atšna Legión ca sënduabaina, bëtsçanga fsëndmëna causa ca.

<sup>10</sup> Y tša Jesús ibojtserruana chë luarentšana ndoñe chaondëtëbuacanama. <sup>11</sup> Chentsa béconana ba cotšënga imnajena, batsjoca imnétsosañe; <sup>12</sup> as chë bacna bayëjënga Jesúsbioye tmojanimpadá: —Chë cotšëngbioye šmichamó, chëngbeñe fchayamashjna ca.

<sup>13</sup> Y Jesús aiñe tojanalesenciá; as chë bacna bayëjënga chë entsábentšana tmojésanbocana y chë cotšëngbeñe tmojánamashjna. Cachora chë mo uta uaranga cotšënga batsjocana peñëšëjana uafjajónayoye imojtsoshbuetše y yojtsatajo.

<sup>14</sup> Chora, chë cotšënga anýenënga tmojtsanacheta auatjanánënga, y tmojána chama jacuéntama chë puebloca y chabuenache; y entsanga tmojánabo ntšamo tojanopasacá jinýama. <sup>15</sup> Jesús yojtsemnoye chë entsanga tmojánashjajna ora, tmojáninýe chë tempo bacna bayëjënga uambayá, inëtsoybemañe, entsáyá uichëtjoná y chabe nyëts juábnaca. Y chë entsanga chama imojtsëuatjaná. <sup>16</sup> Chë tmojáninýënga imojtsecuéntaye, ntšamo chë bayëjbe juabna uambayáftaca tojanopasama, y chë cotšëngaftaca ntšamo tojanopasámna. <sup>17</sup> Chora chë entsanga tmojanontšë Jesús impadánana chë luarentšana chaotsatoñama.

<sup>18</sup> Jesús chë barquëshoye tojtanášëngo ora, chë tempo bacna bayëjbe juabna uambayá tbojanimpadá chabolesenciá cháftaca jama ca. <sup>19</sup> Pero ndoñe tbonjanlesenciá, sinó mëntšá tbojaniyana: “Acbe yebnoye motsatoñe, acbe pamíllangbioye, y cochjácutayeye ndayá Bëngbe Utabná ácaftaca tojamama, y ntšamo cha ácbioye tcmojalastemama ca.”

<sup>20</sup> Chentšana, chë entšá yojsatoñe y tojanontšé Decápolis uabaina pueblënguenache jacúntana lempe ntšamo Jesús cháftaca tojanmca; y nyetscanga imojtsenjnanaye.

*Jesús canye shembásabioye tbojanshná y Jairëbe bembetëmbioye tbojtanyená (Mt 9.18-26; Lc 8.40-56)*

<sup>21</sup> Chentšana, Jesús cachiñe chë uafjajónaye chenguana tojesaná barquëshañe. Chocna ba entšanga tmojanobuashconá, y Jesús chë uafjajónaye tsachañe yojtsemna. <sup>22</sup> Chorna, tojánashjango chë judiëngbe enefjuana yebnentša canye mandayá, Jairo ca uabainá. Jesúsbioye tbojáninye ora, chábentše tojanoshëntsamentšé, <sup>23</sup> y tša ibojtseimpadana, mëntšá: —Atšbe bembetema ya echantsóbana; Diosmanda mabo, acbe cucuatšënga chábeñe cochjajáua, salud chauatinyënama y cháuatayenama ca.

<sup>24</sup> As Jesús cháftaca tojána; pero bëtscá entšanga imojtsëstona, chábioye imojtsentsëntsenaye. <sup>25</sup> Chë entsanguentše yojsaye canye shembása šocá; cha ya bnëtsana uta uata oboftjajuanánaca inapadecena. <sup>26</sup> Cha puerte tojansufrí, ba ashnayëngbe cucuatšine, y lempe ntsachetšá inabomncá tojanpochocá jenóshnama; pero ndoñe ibontsatstëcacjana, nye más peor ibojtsobiamnaye. <sup>27</sup> Chë shembása yojouena ntšamo Jesús ba šoquënga tojánashnama, y as stëtšoicana entšangbe tsëntsajana yojobeconá, y Jesusbe entšayá yojauábojajo. <sup>28</sup> Cha chca tojanma, er yojtsejuabnaye: “Masque nye mo chabe entšayá sibiájua chaijuábojajo, y salud chantsatsbomna ca.” <sup>29</sup> Y cachora chë oboftjajuanana ibojtsobojuána; y chabe cuerpiñe ibojebiónana ya tšabá yojsatsmënama. <sup>30</sup> Chora Jesús yojasëntia chábentšana obenana yojóbocnama, mo ndábioye tbojashná orcá; as cha tojanobuértana entšangbeñe y tojanatjá: —¿Nda atšbe entšayá tojuabojajo ca?

<sup>31</sup> Chabe uatsjëndayënga tmojanjuá: —Aca contsonyá chë entšanga cmontsatsëntšená, y cabá cochjatsnoticiaye nda entšayá tojuabojajo ca.

<sup>32</sup> Pero Jesús cátoye yojtserreparana jinýama nda tbojánbojajuama. <sup>33</sup> As chë shembása, chë ntšamo cháftaca yojopásama jtsetatšëmbëse, tojanobeconá ngmëmnyá y auatjananá, chabe natsanoica tojanoshëntsamentšé, y lempe ntšamo ndegombre cháftaca tojanopasacá Jesúsbioye tbojaniyana. <sup>34</sup> Chora Jesús tbojaniyana: —Bembe, Bëngbe Bëtsábeñe icošbuachéyeca shnaná contsatsmëna. Natjëmbana motsatoñe; acbe šocana tontsopochocá ca.

<sup>35</sup> Jesús cabá yojsóyebuambnantscuana, báseftanga tmojánashjajna chë judiëngbe enefjuana yebnentša mandayabe yebnocana, y chë shembásetembe taitá tmojaniyana: —Acbe bembe tontsóbana; ¿ndayama más Buatëmbayá chama cochjátebëyaboma ca?

<sup>36</sup> Y Jesús, ntšamo chënga imojtsichamcá ntjatuenancá chë judiëngbe enefjuana yebnentša mandayábioye tbojaniyana: —Ndoñe matauatjana. Nye Bëngbe Bëtsábeñe cochtsošbuáchiye cha tšabá chaotsatsmënama ca.

<sup>37</sup> Y Jesús ndoñe tonjanalesenciá Jairëbe yebnoye banga chamuastama; nye Pedro, Santiago y Juan, Santiagbe uabentsana, aïne. <sup>38</sup> Chentšana, chë mandayabe yebnoye tmojánashjajna ora, Jesús tojánanye entšanga tša imojtsenbouenana, entšanga imojtsošachiye y puerte ngmënaca imojtseyoye. <sup>39</sup> As chë yebnoye tojánamashëngo y chë entšanga tojanëyana: “¿Ndayama tša šmojtzenbouenana y tša šmojtšendëntjana? Chë shembásetema ndoñe chenatóbana, nye endëtsomañe ca.”

<sup>40</sup> Pero entšanga nye imojtsáfchaye. As Jesús nyetsca entšanga shjoye tojtanëbuacna, y tojëftsanëbiatše chë basetembe bëtšëtsata y chabe enutënga; y chë shembásetema yojtsemnoye tojánamashëngo. <sup>41</sup> Chora Jesús tbojanábuacueshache y cachëngbe biyañe tbojaniyana: “Talita, cum ca.” (Chca endayana “Shembásetema, matëtsbaná ca”).

<sup>42</sup> Cachora, chë bnëtsana uta uata bomna shembásetema tojtantsbaná y yojtsobena jama. Y chë entsanga chama imojtsenjnanaye. <sup>43</sup> Pero Jesús corente tojanamëndá ndocnábeñe chama ntsecuéntayana ca, y tojanamëndá chë bássetema saná chamuiyé chaosama.

## 6

### *Jesús Nazaret puebloca*

*(Mt 13.53-58; Lc 4.16-30)*

<sup>1</sup> Chentšana Jesús tojëftsanbocna y cachabe luaroye tojtanashjango, y chabe uat-sjéndayënga cháftaca tmojána. <sup>2</sup> Ochnayté tojanobuache ora, Jesús tojanontsé chë judiëngbe enefjuana yebnentše entsanga jabuátambana.

Chë ba entsanga cha jóyebuambayama tmojanuenënga, imojenjnaná y tmojánayana: “¿Ndëmoca quem boyabása lempe chca tojuatsjinýe? ¿Ndaye osertánana mua tmojatsetá, y ntšámoyeca cha yojtsobena chca bëts soyënga jtsamana ca? <sup>3</sup> ¿Mua ndoñe chë calpintero yondmëna, Mariybe uaquiñá, y chabe catsátanga ndoñe mondmëna Santiago, José, Judas y Simón; y chabe uabënanagnaca muentše ndoñe bëngaftaca mondoyena ca?” —chënga imojtsichamo.

Chë causa chënga tmojanotjayaná, y ndoñe montseboše joyeunayana. <sup>4</sup> As Jesús tojanéyana: “Nýetsca luarënguenache canýe Bëngbe Bëtsabe juabna oyebuambnáyábioye bëtsá jabemana, pero ndoñe chca cachabe luarentše, ni cachabe pamíllangbenache, ni cachabe yebnentše ca.”

<sup>5</sup> Chë entsanga chentše chábeñe ndoñe montsanošbuaché causa, Jesús ndoñe tonjanobená ni canýe bëts soye Bëngbe Bëtsabe obenánaca chentše jëftsemana; nýe básefta šoquëngbeñe cucuatšënga tojanajajó y tojanashná. <sup>6</sup> Jesús ojnananá yojtsemna cachábentša entsanga chábeñe ndoñe montsanošbuaché causa.

### *Jesús, chabe uatsjéndayënga tojanichamó Bëngbe Bëtsabe amëndayama jábuayenama*

*(Mt 10.5-15; Lc 9.1-6)*

Chentšana, chë chaboye base pueblënguenache Jesús yojánana, Bëngbe Bëtsabe soyëngama abuátambaye. <sup>7</sup> Y chë bnëtsana uta uatsjéndayënga Jesús tojánachembo, y utáta ínýoye tojanichamó, entsángbentšana bacna bayëjënga jtëbuacnama obenana jatsatayëse; <sup>8</sup> y mëntsá yojáuyana: “Benachiñama tondaye šmattsambaye, nýe canýe jatjonëfja; ndoñe šmattsambaye saná, ni shecnaja, ni crocénana uasnanëchiñe. <sup>9</sup> Nduámanëshe smochjesóshecohëtjo, y nýe canýájua smochjesíchëtjo ca.”

<sup>10</sup> Mëntsánaca tojanéyana: “Posada chacmojúyentsame yebnentše smochtsoquedañe inýe puebloye játantscuana. <sup>11</sup> Canýe luaroye chašmojáshjajna y ndocná posada chacmonjuyentsame, y joyeunayama ndoñe chamontsebošëse, chentšana smochjésebocana, y shecuatsentša polvëshe smochjésenstoto, chca, chëngbioye jinýanýiyama chënga ndoñe tšabá tšëngaftangaftaca tmonjamama ca.”

<sup>12</sup> Chentšana, chë uatsjéndayënga tmojëftsanbocana y entsanga imojánabuayiynaye, chë tšabe benache chámuatishachama, bacna soyënga amana jtsajbanase. <sup>13</sup> Entšángbentšana ba bacna bayëjënga tmojtanebuacna, y ba šoquënga aceitíyeca tmojananëttojto y tmojanashná.

### *Ntšamo Juan chë Ubayaná tojanóbana*

*(Mt 14.1-12; Lc 9.7-9)*

<sup>14</sup> Rey Herodes Jesusbiamá yojátatšëmbona, er nýetsquénache nýetsca entsanga chabiama imojtsóyebuambnaye. Entšanga Jesusbiamá imojtsichamo: “Juan chë Ubayaná obanënguentšana tojtayena, chíyeca cha chca obenana yojtsebomna ca.”

<sup>15</sup> Inýëngna imojtsichamo: “Cha entsemna chë Bëngbe Bëtsabe juabna oyebuambnáyá Elías ca.”

Y ínÿengna: “Muana canÿa Bëngbe Bëtsabe juabna oyebuambnayá, mo chë temp-squëngcá ca.”

<sup>16</sup> Heródesna ntšamo entšanga Jesusbiamá imojtsichamcá tojanuena ora, tojánayana: “Mua Juan entsemna, chë atše sënjanmandá bestšaše chamotsëstjanguamá, mora obanënguentsana tojtayena ca.”

<sup>17</sup> Juan cabá ainá ora, Herodes tojanmandá cha chamishache, cadenëjuangaca chamobátsëca y chca cárceloye jutámiamá. Herodes chca tojanma Herodíasbe causa, chabe uabentsá Felipe shema. Herodes chë shëmaftaca tojanobouamá, Felipe cabá ainá ora. <sup>18</sup> Y chama, Heródesbioye Juan ibojánbuayiyaye: “Ndoñe quenátslesenciana acbe uabentsabe shema acbe shema chaotsemnama ca.”

<sup>19</sup> Chë causa, Herodías Juánbioye puerte ibojuáya, y yojánboše jtsóbama; pero ndoñe yontsobena, <sup>20</sup> er Herodes yojántatsëmbo, Juan canÿe nÿetsca soyënguiñe tšabá amá, nÿe Bëngbe Bëtsábioye sempre oservená inamná. Chama cha yojánauatja y ndoñe yonjanalesencia cha chamóbama. Y Juan Bëngbe Bëtsabe soyëngama Heródesbioye tbojtse-buayiyá ora, ntšamo jajuaboyana ndoñe yontsetátšëmbo, pero masque chca, oyejuayá Juánbioye ibnayeunana. <sup>21</sup> Pero Herodías tojáninÿena mocna ora Juan chamóbama. Heródesbe cumpleño oboyejuaye ora, bëtscá saná tmojanprontá, y Herodes yojúbuaja chabe amëndayënga, soldadëngbe amëndayënga y Galileoca uámana entšanga. <sup>22</sup> Chora, chë oboyejuaye luaroye Herodíasbe bembe tojánamashëngo, tojanlantsá, y Herodes y nÿetsca ófjanënga chama tša imojtsóyejuaye. As chë rey, chë tobiásbioye tbojaniyana: —Ndayánaca šmotjañe y atše cbochjátšetaye ca.

<sup>23</sup> Y jajúrase, mëntsá tbojanšbuachená: —Ntšamo chašcojotjañcá cbochjátšetaye, masque atšbe amëndayentša bomnantšana tsëntsafñaca ca.

<sup>24</sup> Chentsana, chë tobiáše yojëftsebozna y chabe mamábioye ibojatjaye: —¿Ndayá chjotjañe ca?

Y chabe mamá ibojojuá: —Juan chë Ubayanabe bestšaše ca.

<sup>25</sup> Cachora chë tobiáše betscó chë rey yojtsemnoye tojtanamáshëngo, y tbojaniyana: —Atše sëntseboše, cam ora Juan chë Ubayanabe bestšaše canÿe šcnenëšinë chašcuatšeta ca.

<sup>26</sup> Herodes chama corente tbojanongmé, pero chë entšangbe delante y jajúrase tbojanšbuachená causa, ndoñe yonjobenaye ntšamo tbojaniyancá jebëbuetámenana.

<sup>27</sup> Cachora chë rey canÿe soldado ibojíchnua, Juanbe bestšaše chauiyëbama. <sup>28</sup> As chë soldado cárceloye tojána, Juánbioye bestšaše tbojtsanëstjango, y canÿe šcnenëšinë tojanamba. Chë tobiásbioye tbojanëntšabuaché, y chana, chabe mamábioye.

<sup>29</sup> Juanbe ústonënga chama imojátatsëmbona ora, choye tmojánashjajna, chabe cuerpo tmojésanocñe y jauátbontsama tmojána.

### *Jesús shachna uaranga boyabásenga saná tojanacaredadó*

*(Mt 14.13-21; Lc 9.10-17; Jn 6.1-14)*

<sup>30</sup> Chë Jesús tojánichamonga chábioye tmojtashjajna ora, lempe ntšamo tmojanmama y tmojanabuatambama cha tmojancuentá. <sup>31</sup> Chora Jesús tojanëyana: “Cuajna ínÿoye, entšanga ndoyena luaroye, batšatema jóchnama ca.” Cha chca tojánayana, er tša entšanga imojtsaye y imojtsabëbana; ni mo jasama ndoñe luare imontsebozna.

<sup>32</sup> As cánÿenga barquëshañe tmojtsanoñe, entšanga ndëbínÿnoye. <sup>33</sup> Pero chënga imojtsoñama entšanga tmojánanÿe, y ndëmuanyënga imojamná imojtsetátšëmbo; chcasna, chë entšanga shecuátšëca betscó tmojána, nÿetsca pueblënguentsana, y chëngbe natsana choye tmojánashjajna. <sup>34</sup> Chentsana, chë barquëshoicana tojánastjango ora, Jesús ba entšanga tojánanÿe; chëngbiamá tbojanongmé, er imojtsemna mo abuajënÿa ndbozna oveshëngcá; y tojanontšé ba soyëngama jabuátambana.

<sup>35</sup> Ya jetiñe yojtsemna orna, chabe uatsjëndayënga tmojanobobeconá y tmojaniyana: —Ya jetiñe entsemna, y quem luariñe ndocná quenatiyena. <sup>36</sup> Entšanga cuantichamuá,



pueblotéməngoye y inye luarəngoye chamotsoñama, ndayánaca jasama chamobuámiñama ca.

<sup>37</sup> Y Jesús tojanéyana: –Tsəngaftanga saná chəngbioye šmochjacaredádaye ca.

Chora chənga tmojanianyana: –Crocénana queftsátsbomna, uta patse denario nyetsá, chəfta entsangbiama saná jabuámiyama ca.

<sup>38</sup> As Jesús tojanéyana: –¿Bueta tanděse šmojtsebomna? Marrepárange ca.

Ya imojtsetátšəmbo ora, tmojanianyana: –Shachna tanděse y uta beónata fsəntsebomna ca.

<sup>39</sup> Chora Jesús entsanga tojanaməndá ínŷoca ínŷoca chamoshəntsjatbiamama. <sup>40</sup> As chənga tmojanotbiamama patse patsənga y shachna bnətsátsanənga. <sup>41</sup> Chora Jesús chə shachna tanděse y chə uta beónata tojanca, y celoye jontjeshiyése, Bəngbe Bətsábioye chama tbojtanchuá. Chentsana chə tanděšənga tojanjatá y chabe uatsjəndayənga tojanayentsbuaché chə entsanga jatsatayama. Y chə uta beónatnaca nyetscanga tojanəjátaye. <sup>42</sup> Nyetscanga tmojanse jtoshachaye nyetsá. <sup>43</sup> Y chentsana, chə tanděse y chə beonentsana ojamnətémənga tmojanatbaná, y bnətsana uta sbarəcua tmojanajutjé. <sup>44</sup> Chə saná tmojansənga imojamna shachna uaranga boyabásənga, shembásənga y básənga ntjacuntacá.

*Jesús bėjaye juatsbuacá yojtsaye*  
(Mt 14.22-27; Jn 6.16-21)

<sup>45</sup> Chentsana, Jesús chabe uatsjəndayənga tojanaməndá chə barquəshoye jtašnjama, chə uafjajónaye chenguana jangana y chabe natsana Betsaida ca uabaina puebloca jashjajnana. Chənga imojtsebocanəntscuana, Jesús chə entsanga yojtichamuá. <sup>46</sup> Nyetscanga tojtanadiošoftá ora, tjoye cha tojtsanoñe Bəngbe Bətsáftaca jencuəntama.

<sup>47</sup> Yojtseibətata ora, chə barquəsha uafjajónaye tsəntsaca yojtsamna, y Jesús, canya fshantsoca. <sup>48</sup> Jesús tojáninye chəngbiama totcá yojtsemna, chə barquəshaca natsanoye jtsayana, er binŷia chəngbe contra yojtsemna. Ya binŷana ora, chəngbioye yojobeconá, bėjaye juatsbuacá yojtsaye, y ya chəngbiajana nŷe ndericho jachnənguama yojtsemna. <sup>49</sup> Y chənga, chə bėjaye juatsbuacá cha yojtsayama tmojáninye ora, tmojanjuabó cha canye añeməse yojtsemna ca, y tmojanontsé yoyana; <sup>50</sup> er nyetscanga chca tmojáninye y cochauatjanánənga imojtsemna. Pero Jesús cachora tojanéyana: “¡Añemo šmochtsebomna; atše Jesús səndməna; ndoñe matauatjəngana ca!”

<sup>51</sup> Chorna, chənga imojtsemna barquəshoye cha tojánasəngo, y chə jabuache binŷia tojanəjbana, y nyetscanga puerte auatjanánənga y ojanánənga imojtsemna. <sup>52</sup> Chənga tmojáninye chəfta entsanga tanděse jujátayana, pero chəngbe ainanoca cabá ndoñe imontsobena josértana, Jesús lempe jamama obená bətsemnama.

*Genesaret ca uabáinoca Jesús ba šoquənga tojanashná*  
(Mt 14.34-36)

<sup>53</sup> Chə uafjajónaye tmojánenashbuachengo ora, Genesaret ca uabaina luaroye tmojánashjajna, y chə uafjajónaye tsachoca chə barquəsha tmojanətsbua. <sup>54</sup> Chə barquəshoicana tmojánastjajna y cachora entsanga Jesús tmojantəmbá. <sup>55</sup> Chíyeca, chə luariñe yebnənguenache betscoco chənga tmojána, y tmojanontsé chə šoquənga tjuashənguiñe juyambana, chə ndə moye tmojanuena Jesús yojtsemna luaroye. <sup>56</sup> Y ndayentse cha tojámashəngüentse, pueblənguiñe, bəts pueblənguiñe y base pueblotémənguiñnaca, chə šoquənga benachoye imojtsəbuacana, y Jesús corente imojtseimpadana chə šoquənga chaualesenciá, nŷe mo chabe entsayá sibuájua juabojajuana. Y nyetscanga tmojuábojajənga tšabá imojtsatsməna.

## 7

*Ndáyeca canye entsá Bəngbe Bətsabe delante ndoñe tšabia nántsemna*  
(Mt 15.1-20)

<sup>1</sup> Chentšana, fariseunga Jesúsbioye tmojanobeconá y báseftanga ley abuátambayëngnaca, Jerusalenocana áshjajnënga. <sup>2</sup> Chënga tmojáninÿe básefta Jesusbe uatsjëndayënga, cabá ndase ora, ndoñe montsacuentšabiá ntšamo chë judiënga imojanamancá. <sup>3</sup> Er chë fariseunga y nÿetsca judiënga imojanamana jtsacuéntšabiana ba soye, ndayá jasama ora, ntšamo chëngbe bëts taitanga imojanamancá. Chënga imojanjuabná, chca jtsamëse Bëngbe Bëtsabe delante tšábenga jtsatsmënama ca. <sup>4</sup> Chë sananga enocana tmojtashjango ora, ba soye ndoñe tmontsácuentšabese, tondaye ntjasana; y ba soyëngnaca imojánama, pero nÿe chëngbe bëts taitanga chca jamana imojanamánayeca, mo chë béjayeca juabáyana tazëšënga, matbajënga, calderëshënga y jutsnëshangá. <sup>5</sup> Chë causa, chë fariseunga y chë ley abuátambayënga Jesús tmojantjá: —¿Ndáyeca acbe uatsjëndayënga ndoñe montsama ntšamo bëngbe bëts taitanga monjanamancá, y montsesá ntsacuéntšabiase, ndoñe ntšamo bënga judiënga fsënduamancá, Bëngbe Bëtsabe delante tšabá jtsatsmënama ca?

<sup>6</sup> Chora Jesús tojanëyana: —Nÿe tšabá chë Bëngbe Bëtsabe juabna oyebuambnayá Isaías tšëngaftangbiana tojánayana, bacna entšanga chë ntšamo ndegombre šmojuabnacá ndinÿinÿnayënga ca, mëntšá enduabemanentše:

Quem entšanga mondbétsichamo Bëngbe Bëtsá tša tšabia yomna ca; chca nÿe uayásaca, pero chëngbe ainanentše ndocna tšabe juabnëngaca.

<sup>7</sup> Pero chënga nÿe bonamente mondbétsichamo Bëngbe Bëtsá tša tšabia yomna ca; chënga nÿe entšangbe mandënga jtsabuátambayana, y Bëngbe Bëtsabe mandënga ndoñe ca —cha tojánayana.

<sup>8</sup> Chora Jesús tojanëyana: —Ntšamo Bëngbe Bëtsá tojanmandacá stëtsoye tšëngaftanga šmojtsequedá, nÿe ntšamo entšanga monduamancá jtsamama ca.

<sup>9</sup> Y mëntšánaca tojanëyana: “Tšëngaftanga ntšamo Bëngbe Bëtsá tojanmandacá stëtsoye jtsequédana, nÿe ntšamo tšëngaftangbe anteunga imojanamancá jtsamama. Tšëngaftanga jtsejuabnayana tšabá šmojtsama ca chca šmojtsama ora. <sup>10</sup> Moisés tonjánayana: ‘Acbe bëtsétsata ndoñe stëtsoye catjáquedaye’, y ‘nda chabe bëtsétsatbiana ndoñe tšabá tonjoyebuambá chana, jóbanama jtsemnana ca.’ <sup>11</sup> Pero tšëngaftanga šmondbétsichamo, canÿe entšá yobena chabe taitá o chabe mamá jáuyanana: ‘Lempe sëndbomna soyënga corbán entsemna, chíyeca ndoñe quetsátobena juajabuáchana ca’ (corbán endayana “Bëngbe Bëtsabiana uátšëmbona soyënga ca”). <sup>12</sup> Tšëngaftanga šmondbétsichamo, nda chca tojayanëse, ya ndoñe obligaciónaca ntsemnana chabe taitá o mamabiana ndayánaca jamama ca. <sup>13</sup> Chca, tšëngaftanga šmontsama entšanga Bëngbe Bëtsabe palabra stëtsoye chamoquedama, mo tondaye tontsamancá, chë cuenta jtsamama ntšamo anteunga imojanamancá, ntšamo entšángbeñe tempscana y mëntscoñama yochnëjuancá. Y ba soyënga tšëngaftanga cachcá šmontsama ca” —Jesús tojánayana.

<sup>14</sup> Chora Jesús, cachiñe entšanga tojtanachembo y tojanëyana: “Nÿetscanga šmochjouena y chacmësertá. <sup>15</sup> Ndayá entšá tojttesacá, ndoñe ntjábemana ndoñe tšabia Bëngbe Bëtsabe delante. Inÿetšá comna: ntšamo entšá tojtsejuabná y tojtsoyebuambnacá endobena jabemana ndoñe tšabia Bëngbe Bëtsabe delante. <sup>16</sup> Chë jouenama tmojtsobenënga, šmochjouena ca” —cha tojánayana.

<sup>17</sup> Jesús entšanga tojëftsanabashejuana y yebnoye tojtanamáshëngo ora, chabe uatsjëndayënga tmojantjá ntšamo cha tojánayanama. <sup>18</sup> As cha tojanëyana: “¿Tšëngaftangnaca cabá ndoñe cmontsësertana ca? ¿Cabá ndoñe cmontsësertana, lempe ntšamo entšá tojascá ndoñe ntsoyebenana chábiyoye jabemana ndoñe tšabia Bëngbe Bëtsabe delante; <sup>19</sup> er ainanoye ndoñe ntjómashënguana, sinó uafsbiyoye, y chentšana cuerpentšana jtabocnana ca?”

Y chca, Jesús tojánayana nÿetsca sananga tšabá jasama yomna ca y chë saná ndoñe ntjamana canÿe entšá bacna soye chaotsamama ca. <sup>20</sup> Y mëntšánaca tojánayana: “Ntšamo chë entšá tojtsejuabná y tojtsoyebuambnacá, chë soye cocayé endobena

entsá jabemana ndoñe tšabia Bëngbe Bëtsabe delante. <sup>21</sup> Er ainanocana jtsóbocanana bacna juabnënga: shembásaftaca o boyabásaftaca bacna soye jamama, jatbëbama, jóbama, <sup>22</sup> bacna juabnënga boyá o shémbioye ínÿaftaca jáingñama, jtsatbomnayama, nÿetsca bacna soyënga jamama, ínÿenga jáingñama, nÿe cachá jenomándama ntsoyencá jtsiyenama, ínÿabioye jtsántšabošama, ínÿabiama jtsayátšenayama, jtsenábotamnayama y nÿe opënga jtsobiamnayama. <sup>23</sup> Nÿetsca quem bacna soyënga entsabe ainanocana jóbocnana, y cha jabemana ndoñe tšabia Bëngbe Bëtsabe delante ca” —cha tojánayana.

*Canÿe shembása inÿe luarocana ashjargoná Jesúsbeñe yojtsošbuaché*  
(Mt 15.21-28)

<sup>24</sup> Jesús chentšana, Tiro ca uabaina luaroye tojtsanoñe, y canÿe yebnentše tojánamashëngo. Cha yojtseboše ndocná chama chaondëtsetatšëmbuama; pero ndoñe yonjobenaye iytëmenana jatsmënana. <sup>25</sup> Y betesco, canÿe shembása, canÿe bembe bacna bayëjbe juabna uambayá ibnabomná, Jesusbiana oyebuambnayana yojouena ora, chábioye tojánabo y chabe shecuatšentše tojanoshëntsamentšé. <sup>26</sup> Chë shembása ndoñe yonjamna judiá, sinó Sirofenicia luarocá. Tojánabo y Jesúsbioye tbojanimpadá chabe bembetëmbentšana bacna bayëja chabuatábocnama. <sup>27</sup> Pero Jesús tbojaniana: — Atše šondmëna natsana judío entsangbiana chë soyënga jamana; chentšana cocayé chanjobenaye chca inÿe entsangbiana jamana. Atše acbiana, canÿe ndoñe judiá, soyënga stjamëse, nántsemna mo chë básengbe saná quešënga cuaftsëbuajocá ca.

<sup>28</sup> Y cha tbojanjuá: —Arseñor, chca jtsemnana. Pero chë quešëngnaca mondbase chë básenga tmojtsesá ora tmojatquécjanatemënga. Chcasna, Diosmanda átšnaca šmotsajabuache ca.

<sup>29</sup> As Jesús tbojaniana: —Tšabá tcjayana; chcasna, acbe yebnoye motsatoñe. Chë bacna bayëja acbe bembetëmbentšana tonjësebocna ca.

<sup>30</sup> Chentšana, chë shembása chabe yebnoye tojtaná, y tbojáninÿena chë bembetema jutsnëshentše yojtsojájoñe, y chë bacna bayëja ya ndoñe chábeñe yontsemna.

*Jesús, canÿe boyabása tësmá y ndëbiábioye tbojanshná*

<sup>31</sup> Tiro pueblentšana Jesús tojëftsanbocna, y Sidón y Decápolis luarentša pueblënguëjana jachnënguse, Galilea uafjajónayoye tojánashjango. <sup>32</sup> Cha chentše yojtsemna ora, chábioye tmojanánatse canÿe entsá tësmá y ndëbiá, y tmojanimpadá chabe cucuatšënga chë šocábeñe chaojájoma, chaboshnama. <sup>33</sup> Chorna Jesús entsángbentšana luaroye tbojanánatse, cánÿata. Chora chë šocabe matscuašoye ntšabuafjënga yojajué, cucuatšinë yojabuashëtjo, y chë šocabe bichtaja yojábojajo. <sup>34</sup> Chentšana, Jesús celoye tojanontješé, jabuache yojáshachna, y hebreo palabriñe tbojaniana: “¡Efata ca!” (Chca endayana “¡Chacmotsauenana ca!”)

<sup>35</sup> Cachora, chë boyabásabe matscuaše tšabá yojtsatmëna y tšabá yojtsuenana; chë bichtaja tšabá yojtóbema y tšabá yojtsóyebuambnaye. <sup>36</sup> Y Jesús chë entsanga tojanamëndá chama ndocnábeñe ntsecuëntayana. Pero masque tša chama yojtsamëndaye, entsanga más chabiana imojtsencuëntaye. <sup>37</sup> Chama chë entsanga puerte imojtsenjanaye, y mëntšá imojtsichamo: “¡Lempe tšabá entsama! Chë tësmënga chamouenama, y chë ndëbianga chamóyebuambama entsama ca.”

## 8

*Jesús canta uaranga entsanga saná tojanacaredadó*  
(Mt 15.32-39)

<sup>1</sup> Chë tempo, ba entsanga Jesúsbioye cáchiñe tmojanobeconá, y jasama tondaye imontsebomna. As Jesús chabe uatsjëndayënga tojánachembo y tojanëyana: <sup>2</sup> —Quem entsangbiana šontsengmena, er ya unga te átšeftaca montsemna y mora jasama

tondaye quemátsbomna. <sup>3</sup> Cachëngbe yebnoye tondaye ntjascá stichamuase, shëntsama benachëjana nantsabuatëcja; y báseftanga bën luarocana tmojabo ca.

<sup>4</sup> As chabe uatsjédayënga tmojaniana: —¿Ntšamo nda nanjobenaye quem luarentše, ndocna entšá ndoyenentše, chëfta entšangbiama saná jinÿenama ca?

<sup>5</sup> Chora cha tojanatjá: —¿Bueta tandëse šmojtsebomna ca?

Y chënga tmojanjuá: —Canÿsëftaše ca.

<sup>6</sup> Chentšana, Jesús tojanamëndá entšanga chamoshëntsjatbiamama. Chorna, chë canÿsëfta tandëse tojanca y Bëngbe Bëtsábioye chama tbojtanchuá. Chentšana tojanjatá, chabe uatsjédayënga tojanëjatá, y chëngna chë entšangbiaye. <sup>7</sup> Básefta beonatémëngnaca innabomna; as Jesús, Bëngbe Bëtsábioye chama tbojtanchuá y chabe uatsjédayënga tojanamëndá entšanga jujátayama. <sup>8</sup> Nÿetscanga tmojanse jtoshachaye nÿetsá. Chentšana cabá canÿsëfta bëts sbarëcua tmojanajutjé chë ojamnëtémëngaca. <sup>9</sup> Chë tmojansënga imojamna mo canta uaranga nÿetsá. Chentšana Jesús chë entšanga tojtanadiošoftá. <sup>10</sup> Chora Jesús barquëshañe tojánenojajiye chabe uatsjédayëngaftaca, y tmojtsanoñe Dalmanuta ca uabaína luaroye.

*Chë fariseunga tmojánbošena, Jesús chaoma canÿe bëts soye, chabe ndegombre obenana jinÿama*

*(Mt 16.1-4; Lc 12.54-56)*

<sup>11</sup> Chentšana, fariseunga tmojánabo y tmojanontsé Jesúseftaca enatsëtsnayana. Y jisháchichiyama, imojtseimpadana canÿe bëts soye chaoma, as jtsetatšëmbuama Jesusbe obenana Bëngbe Bëtsábioyana ndegombre tainóbocanama. <sup>12</sup> Y Jesús ngménaca, jabuache yojáshachnëse, mëntšá tojánayana: “¿Ndáyeca tšëngaftanga, chë mora oyenënga, šmojtseboše canÿe bëts soye chaimama tšëngaftanga atšbe obenana jinÿanÿiyama ca? Ndegombre cbëyana, quem entšanga ndocna chca soye quemochátinÿe ca.”

<sup>13</sup> Chorna chë entšanga cachcá tojesanënÿá, chë barquëshoye yojtamáshëngo, y uaf-jajónaye chenguana yojtsoñe.

*Jesús tojanabuayená fariseungbe buatëmbana soyëngama*

*(Mt 16.5-12)*

<sup>14</sup> Chë uatsjédayënga yojésebnëtjomba ndaye soye jasama jesocñama, y chë barquëshoye nÿe canÿe tandëse imojtsebomna. <sup>15</sup> Jesús tojanëyana: —Smochtsantješna; cuedado šmochtsebomna fariseunga y Heródesbe levadurama ca.

<sup>16</sup> Chora chë uatsjédayënga tmojanontsé enatsëtsnayana: —Chca entsichamo, bënga tandëse ndoñe tmonjesocñama ca.

<sup>17</sup> Jesús yojtsetátšëmbo, chabe uatsjédayënga imojtsejuabnaye chana tandëšama yojtsëtsësnaye ca; pero ndegombre chana yojtsóyebuambnaye ndayá ntšamo fariseunga y Herodes bacna soyënga jtsamëse imojoyenama. Chcasna, mëntšá tojanëyana: —¿Ndáyeca tandëšama šmojtsoyebuambná? ¿Cabá ndoñe cmontsësertana, ni šmontsetátšëmbo? ¿Ainanoca ndoñe šmontseboše chacmësertama? <sup>18</sup> Bominÿe šmondobomna, pero ndoñe quešmátobena jinÿana; jouenama šmondobena, y ndoñe quešmátuenana, y ndayá tijamama ndoñe quešmatsjuabná. <sup>19</sup> Chë shachna uaranga entšanga shachna tandëšentšana sënjanëjatá chentšana, ¿bueta sbarëcua chë ojamnëtémëngaca šmënjanajutjé ca? —cha tojanatjá.

Y chënga tmojanjuá: —Bnëtsana utácua ca.

<sup>20</sup> —Y chë canÿsëfta tandëšentšana canta uaranga entšanga sënjanëjatá chentšana, ¿bueta bëts sbarëcua chë ojamnëtémëngaca šmënjanajutjé ca?

Y chënga tmojanjuá: —Canÿsëftácua ca.

<sup>21</sup> As Jesús tojanëyana: —¿Y cabá ndoñe cmontsësertana ca?

*Jesús canÿe jtanábioye tbojanshná, Betsaida puebloca*



<sup>22</sup> Chentšana tmojánashjajna Betsaida puebloca; y chora, entšanga canye boyabása jtaná Jesúsbioye tmojanánatse, y tmojanimpadá cha jabojuana chabotseshnama. <sup>23</sup> As, chë jtanábioye tbojanábuacueshache, y chë pueblo chaboye tbojanánatse. Chorna, yebuáyecá ibojabuchanëtjo, y chábeñe cucuatšënga yojajájua, y tbojantjá nderado ndayá jinýama tayojsanobena ca. <sup>24</sup> As chë jtaná yojontješiye y tojánayana: —Boyabásenga sentsënýa; mo betiyëngcá montsemna, pero montsobonjná ca.

<sup>25</sup> Chora Jesús, chë jtanabe fšnëbeñe cachiñe cucuatšënga yojajájua. Y chë boyabása yojtsobena lempe tšabá jinýama; ya shnaná yojtoquéda. Y yojtsobena nyetsca soyënga botamana jinýana. <sup>26</sup> Chentšana, Jesús cachabe yebnoye tbojtanichmó y mëntsá tbojaniyana: —Chë pueblöye ndoñe catjëftsamashënga ca.

*Pedro tojánayana, Jesús chë Cristo bëtsemnama  
(Mt 16.13-20; Lc 9.18-21)*

<sup>27</sup> Chentšana, Jesús tojánbocna chabe uatsjëndayëngaftaca Cesarea de Filipo luaroca pueblëngoye, y benachiñe chabe uatsjëndayënga tojanatjá: —¿Nda atše bëtsemnama ca entšanga imojtsichamo ca?

<sup>28</sup> Y chënga tmojaniyana: —Inýenga montsichamo Juan chë Ubayaná ca, ínýengna Elías ca, y ínýengna, canye Bëngbe Bëtsabe juabna oyebuambnayá ca.

<sup>29</sup> As Jesús tojanatjá: —Y tšëngaftangna, ¿nda atše bëtsemnama ntšamo šmochjayana ca?

Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

<sup>30</sup> Chentšana Jesús corente chënga tojanamëndá, chë nda cha yojamnama ndocnábeñe ntsecuëntayana.

*Jesús tojánayana cha ibojamna jóbanana y jtsayenana ca  
(Mt 16.21-28; Lc 9.22-27)*

<sup>31</sup> Y Jesús tojanontsé chabe uatsjëndayënga jabuátambana, cha, chë Bëngbe Bëtsá Entšá tbojanbemá, ibojamna puerta jasúfriana ca; chë judiëngbeñe bëtšëjemëngcá amëndayëngbiama, chë judiëngbe más uámana bachnangbe amëndayënga y ley abuátambayëngbiama uabotená jtsemnana ca. Entšanga mochjanóba, pero unga tianoye yochtanayena ca. <sup>32</sup> Nyetscanga catafjosertaycá chama yojtsóyebuambnaye. As Pedro, Jesúsbioye luaroye tbojanánatse, y tojanontsé jtsáuyanana. <sup>33</sup> Pero Jesús yojobuértana, chabe uatsjëndayënga tojanënýanýe, y Pédrëbioye mëntsá tbojtsanbochembo: “¡Satanás, átšbentsana mojuaná! Pedro, acbe juabnënga Bëngbe Bëtsábíocana ndoñe quenatóbocana, sinó nýe entšángbentsana ca.”

<sup>34</sup> Chentšana, Jesús chabe uatsjëndayënga y chë inýe entšanga tojánachembo chamouenama, y tojanényana: “Nda atšbe uatsjëndayá jtsemnama tojtseboše, cháuyana nýe Bëngbe Bëtsá yobena sempre chabe vidiñe jtsemándayana ca, chabe quem luarentša soyënga cachcá chauesonýá atše juastama, y atšbiama jasúfriama chaotseprontana y cruciñe jobanámna. <sup>35</sup> Nda tojtsama quem luarentše bëtscá soyënga jtsebomnama y atšbiama jasúfriama ndoñe tontseprontana, chë nyetsca tescama yomna tšabe vida echanjopérdia. Pero nda quem luarentša soyënga cachcá tojëftsonýá atše juastama, y chë tšabe noticiënga atšbiama abuátambaye causa, masque chaóbana, chë nyetsca tescama yomna tšabe vida echántsebomna. <sup>36</sup> ¿Ndayama entšá buanjósérvia nyetsca quem luarentša soyënga jtsebomnana, chë nyetsca tescama yomna tšabe vida tojt-soperdese? <sup>37</sup> Er canye entšá chë nyetsca tescama yomna tšabe vida tojtsoperdese, ndocna soye quenátsmëna cha chaobená joyiyama, chë nyetsca tescama yomna tšabe vida jtsebomnama. <sup>38</sup> Chcasna, nda mora atšbiama y atšbe buayenana soyëngama tojtsëuatja entšángbeñe, chënga chë Bëngbe Bëtsabiama nduauenanënga y bacna soye amënga, chë Bëngbe Bëtsá Entšá tbojanbemánaca chabiama echantsëuatja, chabe Taitabe bëtš obenánaca y chabe angelëngaftaca chaojésabo ora ca” —cha tojanényana.

## 9

<sup>1</sup> Měntšánaca Jesús tojaněyana: “Ndegombre cběyana, báseftanga muentše montsemnēnga ndoñe quemochatóbana, Běngbe Bětsá entšángbeñe chabe obenánaca jabomándama jabana ntjěftsinýcá ca.”

*Jesús inýetsá tojanobinýná  
(Mt 17.1-13; Lc 9.28-36)*

<sup>2</sup> Chentšana chněnguana tianoje, Jesús tojěftsaněbiatše Pedro, Santiago y Juan, y ínýoye tojaněnatse nýe chěnga, canýe běts tjoye. Y chěngbe delante Jesús inýetsá tojanobinýná; <sup>3</sup> chabe uichětjonějuangá tša yojtsabuashinýinýana; corente uafjantsějuangá yojtsamna; nýa chca juafjantsama ndocná quem luarentše quentatobenaye. <sup>4</sup> Chca orna, chě uatsjéndayēnga tmojáninýe, Moisés y Elías tbojanobinýná Jesúseftaca enuéntaye.

<sup>5</sup> Chora Pedro, Jesúsbioje tbojanianyana: “¡Buatěmbayá, tša tšabá bēngbiama cuanmēna muentše jtsemnana ca! Mora fchanjapóрма unga tambotémēnga: cánýetema acbiama, ínýetema Moisesbiama y ínýetema Elíasbiama ca.”

<sup>6</sup> Chca tojánayana, chě uatsjéndayēnga yapa auatjanánēnga imojtsemna causa, y Pedro ndoñe yontsetátšēmo ntšamo jayanana. <sup>7</sup> Chora canýe jantšetēshe yojóbema, y chěngbioje yojáutsbotse; y chě jantšetēshoicana canýe oyebuambnayana tojanóbocna, mēntšá: “Mua atšbe bonshana Uaquiñá endmēna; cha šmochtseyeunana ca.”

<sup>8</sup> Y ndeolpe, chěngbe shěconana tmojanrrepará ora, ya ndocná más tmonjáninýe; nýe Jesús canýa chěngaftaca yojtsemna.

<sup>9</sup> Chě tjocana imojtsatstsmaye ora, Jesús chě uatsjéndayēnga tojanamēndá: — Běngbe Bětsá Entšá tbojanbemá obanēnguentsana candétayenēntscuana, chě mēnté tjoca šmonjinýe soyama ndocnábeñe šmattsecuéntaye ca.

<sup>10</sup> Chě uatsjéndayēnga aíñe chca tmojanuena; pero chěnga imojtsentjanaye ndayá cha yojtsentšáyana, cha yochtanayena ca cha tojánayana ora. <sup>11</sup> Y Jesúsbioje imojtsetjanaye: —¿Ndáyeca chě ley abuátambayēnga mondbětsichamo, canmēna Běngbe Bětsabe Uámana Uabuayanabe natsana Elías jabana ca?

<sup>12</sup> As cha tojanějua: —Ndegombre, canýa Eliascá natsana echanjabo, y ntšamo jtsemnama yomncá lempe echánjabatsma. Pero ntšamo Běngbe Bětsabe uabemana palabrenguiñe endayancana, Běngbe Bětsá Entšá tbojanbemá puerte caochjasúfria, y ínýenga puerte camochtsáboyēnja ca. <sup>13</sup> Ndegombre cběyana, canýa Eliascá ya tonjabo, y cháftaca entšanga tmonjanma lempe ntšamo tmojabošencá, ntšamo chaochnēnguama Běngbe Bětsabe uabemana palabrenguiñe endayancá.

*Jesús, canýe basa bayějbe juabna uambayábioje tbojanshná  
(Mt 17.14-21; Lc 9.37-43)*

<sup>14</sup> Chentšana, chěnga tmojtaná chě inýe uatsjéndayēngbioje. Chora, Jesús tojáninýe ba entšanga chě uatsjéndayēngbe shěconana imojtsemnama, y básefta ley abuátambayēngna chěngaftaca imojtsenatsěsnaye. <sup>15</sup> Nýetsca entšanga cha tmojáninýe ora, imojenjaná y tmojanótjajo cha jachuyama. <sup>16</sup> Chora Jesús chěnga tojanatjá: —¿Ndayama chěngaftaca šmenatsěsná ca?

<sup>17</sup> Y canýa entšanguentšá tbojanjúa: —Buatěmbayá, muentše ácbioje sēnjuánatse atšbe uaquiñá; bacna bayějbe juabna entsambá, y chě causa, jóyebuambayama ndoñe quenátobena. <sup>18</sup> Nýe ndayéntsna cha tojtsemnentše, chě bayēja chábioje jishachana y jtsenajuáchesēnjana; chentše uayoicana shashiye jtsabocanana, jtsenoftěšfjojnayana y obanacá jtsatsjájonana. Acbe uatsjéndayēnga sēnjaimpadá chě bacna bayēja chamu-atábocnama, pero ndoñe chematobená ca —cha tbojanianyana.

<sup>19</sup> As Jesús tojánayana: —¡Nýetsá ndoşbuáchiyënga ca! ¿Buetayté şojtsemna tşëngaftangaftaca jëftsemnana? ¿Buetayté uantado tşëngaftangaftaca chjëftsemna? ¡Moye chë básetema mánatse ca!

<sup>20</sup> Chora chë básetema chábioye tmojanánatse; y chë bayëja Jesúsbioye tbojáninýe ora, tojanma chë basa ataque chaboshachama, y chë basa fshantsoye yojashajaye, yojtsojandounaye y uayoicana shashiye yojtsábocana. <sup>21</sup> As Jesús chë básabe taitábioye tbojantjá: —¿Buetayté chca yojtsepása ca?

Y cha tbojanjuá: —Bássetema orscana chca; <sup>22</sup> ba soye, chë bayëja chábioye iñoye jtsatmetšana y buyeshoye jtashbuetšana, jtsóbama. Chíyeca, nderado ndayá chabiama jamama tcojtsobenëse, bënga şmotsalastemá y şmotsëjabuache ca.

<sup>23</sup> Chora Jesús tbojanियana: —¿Ndayeca “ndayá jamama tcojtsobenëse ca” şcjauyana? Nda Bëngbe Bëtsábeñe tojtsošbuáchebiamma lempe endopodena ca.

<sup>24</sup> Y cachora chë básabe taitá tojanáyebuachena: —Aíñe, Bëngbe Bëtsábeñe sëntsoşbuaché; Diosmanda, ¡más jtoşbuáchiyama şmajabuache ca!

<sup>25</sup> Y bëtsá entsanga imojtsójetoma Jesús tojáninýe ora, chë bacna bayëja tbojtsanbochembo mëntsá: —¡Bacna bayëja, chë bássetema tësmá y ndëbiá biamnayá; chábentšana maisebocna y ndocna te más chábeñe catjésamashëngo ca!

<sup>26</sup> Y chë bayëja chábentšana yojésebocna, yojtseyoye y chë básabioye jabuache ibojese-shatiyiyé; y chë básana mo obanacá tojanoquedá, y chë causa banga imojtsichamo cha obaná yojtsemna ca. <sup>27</sup> Pero Jesús tbojanábuacueshache y tbojtanatsbaná; y chë básana yojtëtsaye.

<sup>28</sup> Chentšana, Jesús canýe yebnoye tojánamashëngo, y chabe uatsjëndayëngna luaroca cha tmojantjá: —¿Ndayeca bënga ndoñe fsënjobená chë bayëja jtabocnana ca?

<sup>29</sup> Y Jesús tojanëjua: —Chca bayëjënga jtëbuacanamna jobenayana nýe Bëngbe Bëtsáftaca jencuëntase, chabuájabuachama jaimpádase ca.

*Jesús cachiñe tojánayana cha ibojamna jóbanana y jtayenana ca*  
(Mt 17.22-23; Lc 9.43-45)

<sup>30</sup> Chentšana tmojëftsanbocna ora, Galilea luarëjana imojtsajna; y Jesús yojtseboşe chama ndocná chaondëtsetatsëmbuama, <sup>31</sup> er cha chabe uatsjëndayënga yojtsabuátambaye. Mëntsá cachabiama yojanëtsëtsnaye: “Bëngbe Bëtsá Entsó tbojanbemá entsangbe cucuatşinë mochanjáboshjona; mochanjóba, pero chentšana unga tianoye echántayena ca.”

<sup>32</sup> Pero chënga ndoñe yontsósertana ntşamo Jesús yojtsanëtsëtsnacá, y chama jatstjanayamna chënga imojtsauatja.

*¿Nda chë más uamaná yomna?*  
(Mt 18.1-5; Lc 9.46-48)

<sup>33</sup> Chora Capernaum puebloye chënga tmojánashajna; y cach yebnentşe imojtsemna ora, Jesús chë uatsjëndayënga tojanatjá: “¿Ndayama benachiñe şmabáyenatsëtsnaye ca?” <sup>34</sup> Chëngna nýe iyteca tmojanobiamma, er benachëjana chënga imnayénatsëtsnaye, chënguentşá nda chë más uamaná bëtsemnama. <sup>35</sup> As Jesús tojanótbema, chabe bnëtsana uta uatsjëndayënga tojánachembo y tojanëyana: “Ndánaca nýetscangbiamma chë más uamaná jtsemnama tojtseboşëse, cha chë más nduamaná chaóbema y nýetscanga chaotsaserverna ca.” <sup>36</sup> Chora Jesús canýe bássetema tbojánishache, chëngbe tsëntsaca tbojanatsá, tbojantbá y chënga tojanëyana: <sup>37</sup> “Ndánaca, átşbeñe oşbuachiyá bëtsemnayeca, tbojofja canýa mo quem basetemcá, chana atşe jofjana; y nda atşe şojofja, chora cha nýe atşe ndoñe ntjofjana, sinó chë şojichmó chábioynaca jofjana ca.”

*Nda ndoñe bëngbe contra tontsemná, bëngaftaca jtsemnana*  
(Mt 10.42; Lc 9.49-50)

<sup>38</sup> Juan, Jesúsbioye tbojaniana: —Buatëmbayá, bënga fsënjinye canye boyabása, y cha aca jótšëmbonëse, bacna bayëjbe juabna entšangbentsana endëtëbuacana; pero cha bëngaftaca ndoñe quenátsmëna causa, chama fsënjesauyaná ca.

<sup>39</sup> As Jesús tbojanjuá: —Ndoñe šmatjuauyaná; er ndocná quenátobena canye bëts soye jamana Bëngbe Bëtsabe obenánaca, atše jótšëmbonëse, y chentšana atšbe contra jatóyebuambnayana. <sup>40</sup> Ndegombre, nda ndoñe bëngbe contra tontsemná, bëngaftaca jtsemnana. <sup>41</sup> Y ndánaca, masque nye búyeshtema tšëngaftanga tcmojubuatšatá, tšëngaftanga átšbenga bëtsemnayeca, chábioye Bëngbe Bëtsá canye uacanana soye bochántatšetaye, cha chë tšabe soye tojamama ca.

*Resjo yomna, nderado bacna soyënga cuanjama*  
(Mt 18.6-9; Lc 17.1-2)

<sup>42</sup> Chentšana Jesús tojánayana: “Canya átšbeñe ošbuachiyábioye mo quem basetemcá, nda tbojaingñé atše ustonama chaotsajbanama, más tšabá chabiama nántsemna canye bëts nantsnëbé chamotsetamošëntšbua y mar béjayoye asentoye chamotsashbuetše chabotsenatjëmbama. <sup>43</sup> Nderado acbe cucuatšeca bacna soye tcojama, más tšabá nántsemna chë cucuatše chacotsenacuéstjango. Acbiama más tšabá endmëna celoye jamashënguana nyetsca tescama vida jtsebomnana, nye canye cucuatše bomná, y ndoñe nyets útatsëca infierno chacmotocá jama, chë ndocna te yochanjáfsana íñeshoye; <sup>44</sup> choca útšëñënga puerte nyetsca tescama mochanjasúfria. Chëngbioye mochtsasaye mamanga ndocna te quemochatóbana, y chë íñeshe ndocna te queochátšfsana.

<sup>45</sup> “Nderado acbe shecuatšeca bacna soye tcojama, acbiama más tšabá nántsemna chë shecuatše chacotsenashecuástjango. Acbiama más tšabá endmëna cosheto celoye jamashënguana nyetsca tescama vida jtsebomnana, y ndoñe nyets útatsëca infierno chacmotsëtšena; <sup>46</sup> choca útšëñënga puerte nyetsca tescama mochanjasúfria. Chëngbioye mochtsasaye mamanga ndocna te quemochatóbana, y chë íñeshe ndocna te queochátšfsana.

<sup>47</sup> “Nderado acbe bomínýeca bacna soye tcojinýe y cachca soye tcojama, más tšabá nántsemna chë bominye chacotsenobuchjátsëca. Acbiama más tšabá endmëna Bëngbe Bëtsabe amëndayoye jamashënguana nye canye bominye bomná, y ndoñe nyets útabeca infierno chacmotsëtšena; <sup>48</sup> choca útšëñënga puerte nyetsca tescama mochanjasúfria. Chëngbioye mochtsasaye mamanga ndocna te quemochatóbana, y chë íñeshe ndocna te queochátšfsana.

<sup>49</sup> “Tamó tšabe soye endmëna. Ntšamo chë tamó canye tšabe soye endmëncá, Bëngbe Bëtsá echanjama nyetsca tšëngaftangbiama tšábënga chašmotsemnana, chë átšbeñe betsošbuáchema šmojtsepadecena ora šmojauantase. <sup>50</sup> Tamó tšabe soye endmëna. Pero chë tamó fténana tojtsóbemëse, ndoñe quešmátobena jamana cachiñe chabe tempsca sanana chaotsatsbomnana, ni saná jatamuama. Mo tšabe tamocá entšangbiama šmochtsemna, chëngbeñe jtsiyenëse ntšamo Bëngbe Bëtsá yobošcá, y nyetscángaftaca natjëmbana šmochtsiyena ca” —cha tojánayana.

## 10

*Ndayá Jesús tojanabuatambá bouamnënga tmojtsenëtšenama*  
(Mt 19.1-12; Lc 16.18)

<sup>1</sup> Chentšana, Jesús chë luarentšana tojéftsanbocna y tojána Judea luaroye y Jordán chenguana. Entšanga cachiñe chábioye tmojánabo, y cha chënga yojtsabuátambaye, chë ntšamo jamana yojanamancá. <sup>2</sup> Básefta fariseunga chábioye tmojanobeconá, y jisháchichiyama mëntšá imojtsetjanaye: —¿Queojtselesenciana canye boyá chabe shëmbioye cachcá jesonýayama ca?

<sup>3</sup> Chora cha tojanëjua: —¿Ntšamo Moisés chë soyëngama tcmëñjanamëndaye ca?



<sup>4</sup> Y chënga tmojánayana: —Moisés tojanalesencia chë boyá chabe shémbioye chabuiyé canye tsbuanácha, ndayéchañe chaotsayana cha ya ndoñe chabe shema yontsemna ca, y chora cachcá chabe shema chabuesonýa ca.

<sup>5</sup> Chora Jesús tojanéyana: —Tšëngaftanga Bëngbe Bëtsabe mandënga ainaniñe jóyëngacñama ndoñe quešmátsboše causa, Moisés chca tšëngaftanga tcmojéftsanamëndá. <sup>6</sup> Pero quem luare jobojátsama orna, “Bëngbe Bëtsá canye boyabása y canye shembása tonjánabiamá. <sup>7</sup> Chiyeca, chë boyabása chabe taitá y chabe mamá echanjésabashejuana, chabe shémaftaca jenútanama, <sup>8</sup> y chë úatna mo canýacá bochántsemna.” Y chca, ya ndoñe útata quebochátsmëna, sinó nýe mo canýacá. <sup>9</sup> Chcasna, entšá ndoñe chaondëndbema ndayá Bëngbe Bëtsá mo canýiñcá tojëftsema soye ca —cha tojánayana.

<sup>10</sup> Ya cach yebnoca imojtsatsmëna ora, chabe uatsjëndayënga cach soyama imojtëtstjaye. <sup>11</sup> Y Jesús tojanéyana: “Nda chabe shémbioye cachcá tbojesonýa y ínýaftaca tojtóbouamase, cha chë natsana shémbioye inýe shembásaftaca jtseíngñayana; chana canye uabuatmá jtsebomnana. <sup>12</sup> Y chë shema chabe boyábioye cachcá tbojesonýa, y ínýaftaca tojtóbouamase, chánaca chë natsana boyábioye ínýaftaca jtseíngñayana; canye uabuatmá jtsebomnana ca” —Jesús tojánayana.

*Jesús, basetémëngbiamá Bëngbe Bëtsábioye tbojanimpadá  
(Mt 19.13-15; Lc 18.15-17)*

<sup>13</sup> Entšanga, basetémënga Jesúsbioye tmojanënatse, chauabájajuama y Bëngbe Bëtsábioye chëngbiamá chaboimpadama; pero chabe uatsjëndayëngna tmojanontsé chë basetémënga unachayënga jtsécacánana. <sup>14</sup> Jesús chca tojáninýe ora, tbojánetna y chë uatsjëndayënga tojanéyana: “Cachcá mónýaye chë basetémënga átšbioye chamuabo y ndoñe matéuyanana; er Bëngbe Bëtsabe amëndayana endmëna chë mo quem basetemëngcá imomnëngbiamá. <sup>15</sup> Ndegombre cbéyana, nda Bëngbe Bëtsabe soyënga ndoñe tonjóyëngacñe mo canye basetemcá jtsošbuáchiyëse, cha ndoñe queochatobenaye Bëngbe Bëtsabe amëndayoye jamashënguama ca.”

<sup>16</sup> Y chë basetémënga tojanchebá, y chëngbeñe cucuatšënga jajájuase, Bëngbe Bëtsábioye tbojanimpadá tšabe bendicionënga chëngbeñe chaotsemnana.

*Canye bomna entšá Jesúsbioye tojána  
(Mt 19.16-30; Lc 18.18-30)*

<sup>17</sup> Jesús jama tojtëtanontsé ora, canye boyabása chábioye tojanótjajo, chabe shecutšentše tojanoshëntsamentsé, y mëntšá tbojantjá: —Tšabe Buatëmbayá, ¿ndayá šojtsemna jamana chë nýetsca tescama yomna tšabe vida jtsebomnana ca?

<sup>18</sup> Y Jesús tbojanjuá: —¿Ndáyeca “tšabia ca” šcjauyana? Tšabia nýe canýa endmëna: Bëngbe Bëtsá. <sup>19</sup> Aca icotátšëmbo Bëngbe Bëtsá tojanmandacá: “Ndoñe catjóba, acbe shema ínýaftaca ndoñe cattseíngñaye, ndoñe catjatbëba, ndoñe catjuaboínýena, ínýëngbioye ndoñe catjáingñaye ndayánaca jabacama, y acbe bëtsëtsata ndoñe stëtsoye catjáquedaye ca.”

<sup>20</sup> Chora chë boyabása tbojanjuá: —Buatëmbayá, atše lempe chë mandënga básetema orscana sëndocumplina ca.

<sup>21</sup> Jesús bonshanánaca tbojanonýinýe y mëntšá tbojanianana: —Canye soye cmontsebuáshbena jamana: Motsa, lempe ntšamo icobomncá cochjetsatobuiye, y chë crocénana, ndbomnëjëmënga cochtsatsataye; chca, celoca canye bëts bomnana cochántsebomna. Chentšana, cochjabo y šcochjuasto ca.

<sup>22</sup> Pero chë bobóntsbioye inýetšá ibojtsínýnana Jesús chca tbojanianama; y puerte ngmënacá yojtá, cha puerte bomná inamna causa.

<sup>23</sup> Chora Jesús cátoye tojanrrepará y chabe uatsjëndayënga tojanéyana: —¡Puerte totcá entsemna bomnëngbiamá Bëngbe Bëtsabe amëndayoye jamashënguama ca!

<sup>24</sup> Chca imojouena ora, chë uatsjéndayënga ojnánënga imojtsemna, pero Jesús cachiñe tojanoyebuambá y mëntšá tojanéyana: —Atšbe básenga; ¡puerte totcá entsemna Bëngbe Bëtsabe amëndayoye jamashënguama! <sup>25</sup> Ndegombre, más paselo endmëna chë coshufjentša atëfjnëjana canye camello chauachnëngo, y ndoñe canye bomná Bëngbe Bëtsabe amëndayoye jamashënguana ca.

<sup>26</sup> Pero chë uatsjéndayënga nÿe más imojtsenjnanaye y imojtsentjanaye: —¿As, nda yochjobenaye atsbocaná jtsemnana ca?

<sup>27</sup> Chora Jesús tojanënyanÿe y tojanéyana: —Entšanga ndoñe quemátobena jamana canya atsbocaná chaotsemnama, pero Bëngbe Bëtsá aíñe; er Bëngbe Bëtsá lempe jamama endobena ca.

<sup>28</sup> Chora Pedro tbojanianya: —Aca contsonÿá, bënga lempe chë fsëndbomna soyënga fsënjéseboshjona y ácaftaca fsëntsajna ca.

<sup>29</sup> As Jesús tojánayana: —Ndegombre cbëyana, ndánaca átšbioye jaserviama y chë tšabe noticiënga jábuayenama, tojëseboshjona chabe yebna, catšátanga o uabénanga, bebmá o befta, o básenga, o fshantsënga, <sup>30</sup> cha mora quem luarentše echanjójyëngacñe chama patse soye más yebnënga, catšátanga, uabénanga, bebmanga, básenga y fshantsënga, masque puerte chaosufrima ínÿenga mochántsama; y chë inÿe luarocna, chë nÿetsca tescama yomna tšabe vida echanjónÿena. <sup>31</sup> Pero banga, mora uámanënga imomnënga, nduámanënga mochántsemna; y banga, mora nduámanënga imomnënga, uámanënga mochántsemna ca —Jesús tojánayana.

### *Jesús cachiñe tojánayana cha jóbanama y jtayenama*

*(Mt 20.17-19; Lc 18.31-34)*

<sup>32</sup> Chentšana Jerusalenoye imojtsaye, y Jesús yojtsebnatsana. Chë uatsjéndayënga puerte ojnánënga imojtsemna, Jesús ndauatjá choye yojtsayama; y inÿe becá entšanga ústonoye imojtsajnëngna, imojtsayáuatja. Jesús cachiñe chabe bnëtsana uta uatsjéndayënga barie tojánachembo y tojanontšé jáuyanana ntšamo cháftaca jopásama yojtsemnana. <sup>33</sup> Mëntšá tojanéyana: “Tšëngaftanga šmontsonÿá, Jerusalenoye bënga mora montsajnama. Chocna, chë Bëngbe Bëtsá Entšá tbojanbemá, chë bachnangbe amëndayënga y ley abuátambayëngbe cucuatšinë mochanjáboshjona, y chënga mochanjayana cha chaóbana ca; y ndoñe judiëngbe cucuatšinë mochanjáboshjona. <sup>34</sup> Chënga mochantšáboyejuana, mochántsebuashëttoj, mochántsetjanja y mochanjóba, pero chentšana unga tianoye cha echántayena ca.”

### *Santiago y Juan, Jesús tmojanimpadá canÿe pavor cháuabiamama*

*(Mt 20.20-28)*

<sup>35</sup> Chora, Santiago y Juan, Zebedeobe uaquiñata, Jesúsbioye tbojanobeconá y tmojanianya: —Buatëmbayá, bëndata fsëntseboše pavor chašcuabiamama ntšamo chachobajaimpadacá ca.

<sup>36</sup> Y Jesús tojanatjá: —¿Ndayá šojtseboše atše tsëndatbiamama chjamama ca?

<sup>37</sup> Y chata tbojanianya: —Aca reycá chacojtsemánda ora, cochjaleséncia bëndata fchayobená jótbemana, canya acbe catšbioica y inÿa acbe uañicuayoica ca.

<sup>38</sup> As Jesús tojanéjua: —Ntšamo šmontsotjanañama tsëndata ndoñe quešnátstatšëmbo. ¿Ntšamo atše chaitsesufrincá, tsëndátnaca cachcá jasúfriama tašatjobenaye? ¿Y entšanga puerte bacá chacmojtsëbuatsená ora, tašochjauánta, ntšamo atše chjauantacá ca?

<sup>39</sup> Y chata tbojanianya: —Aíñe fchanjobenaye ca.

Y Jesús tojanéyana: —Ndegombre tsëndátnaca atšcá šochanjasúfria, y atšbe causa cmochántsamna bëtscá soyëngama jasúfria. <sup>40</sup> Pero atše ndoñe quetsátobena jamándana nda atšbe catšbioica y atšbe uañicuayoica chaótbemama. Chë útentše entsemna ndëmuanÿëngbiamama atšbe Taitá tojaprontacá ca.

<sup>41</sup> Chë inye bnétsana uatsjédayënga chca tmojanuena ora, tmojanontsé Santiago y Juánoftaca jotjáyanana. <sup>42</sup> Pero Jesús nyetsca uatsjédayënga tojánachembo y tojanéyana: “Tsëngaftanga šmondétatsëmbo, quem luarentša amëndayënga lempe jtsemándayana, nÿa mo nduiñënga cuaftsemncá; y chë bëtsëtsa entsanga chëngbe obenánaca jtsemándayana, ntšámnaca jtsamëse, chë inye entsanga sempre chamotsayaunanama. <sup>43</sup> Pero tsëngaftangbeñe ndoñe chca chaondétsemna. Inyetsá; masna, nda tsëngaftangbeñe chë más uamaná jtsemnama tojtseboše, cha bontsemna chë ínÿënga jtsaservëna; <sup>44</sup> y ndánaca tsëngaftanguentsá chë más uamaná jtsemnama tojtsebošá, bontsemna jtsemnana nyetscangbiama, mo nÿe ínÿabiama nyets tempo oservenacá. <sup>45</sup> Cachcá, Bëngbe Bëtsá Entšá tbojanbemá ndoñe chenátabo cha chamotseservëna, ndayá ínÿënga jabáserviama. Y mo nda, ínÿënga játsebacama cuafjopagacá, cha echanjóbana ba entsanga atsebácanënga chamotsemnama ca” —cha tojánayana.

*Jesús canÿe jtanábioye tbojanshná*  
(Mt 20.29-34; Lc 18.35-43)

<sup>46</sup> Chentšana, Jesús y chabe uatsjédayënga Jericó uabaina pueblöye tmojánashjajna. Y Jesús chabe uatsjédayëngaftaca y bëtscá entsángaftaca Jericó pueblentsana yojtsaisebocana ora, Timeobe uaqiñá, Bartimeo ca uabainá, canÿe jtaná lemošna otjanañá, benache juachañe yojtsetbemana. <sup>47</sup> Y Jesús Nazaretocá chëjana yojtsachñëjuanama cha yojátatsëmbona ora, tojanontsé mëntsá uayebuáchana: —¡Jesús, Davídbentšana Entšá, šmotselastemá ca!

<sup>48</sup> Chorna, banga chë jtaná imojtsácacana iytëca chaóbemama. Pero cha más yojtsáyebuache: —¡Davídbentšana Entšá, šmotselastemá ca!

<sup>49</sup> Chora Jesús tojantsá y chë ínÿënga tojanéyana: —Chë jtaná mochembo ca.

As chë jtaná tmojanchembo, y mëntsá tmojanianyana: —¡Añemo cochtsebomna; motsbaná! Jesús cmontsechembuana ca.

<sup>50</sup> Y chë jtaná, quefsaíya jtsenátsejqüese, yojontsënja y betscó Jesúsbioye yojobeconá.

<sup>51</sup> Chora, Jesús chë jtanábioye tbojantjá: —¿Ndayá cojtseboše atše achiamo chjamama ca? Y chë jtaná tbojanjuá: —¡Buatëmbayá, šmolesenciá atše chašuatábínÿnama ca!

<sup>52</sup> As Jesús tbojanianyana: —Motsatoñe. Tšabá jtsatsmënema Bëngbe Bëtsábeñe icošbuachéyeca, tšabá contsatsmëna ca.

Y cachora cha tšabá ibojtabinÿna, y Jesúsbioye benachëjana ibojtsëstona.

## 11

*Jesús Jerusalenoye tojánashjango*  
(Mt 21.1-11; Lc 19.28-40; Jn 12.12-19)

<sup>1</sup> Ya Jerusalenoye imojtsebeconá ora, Betfagé y Betania pueblënga béconana, Olivos ca uabaina tjashe juachañe, Jesús uta chabe uatsjédayata tojanichamó, <sup>2</sup> y mëntsá tojanéyana: “Tsëndatbe natsana entsemna base pueblotémoye motsata. Chašojáshjango y cachora šochanjínÿena canÿe burrotema utsbuaná; chábeñe cabá ndocná tonjenojayé. Sochjuajafjoná y sochjuánatse. <sup>3</sup> Nderado nda, ¿ndáyeca šmojtsanachá ca? chacmojátjase, sochjojuá: ‘Bëngbe Utabná bontsájaboto y chora bochantabáiseboshjona ca.’ ”

<sup>4</sup> As chata tbojána, y tbojáninÿena chë burrotema tsáshenañe, canÿe bëšášañe utsbuaná, y imojuajafjoná.

<sup>5</sup> Y básefta entsanga chiñe imojtsemnënga, chátbioye tmojanéyana: “¿Ndayá šojtsama? ¿Ndayeca chë burrotema šojtsajafjná ca?”

<sup>6</sup> As chata tbojanjuá ntšamo Jesús tojanéyancá; y chë entsanga tmojanalesenciá chë burrotema chamuánatsama. <sup>7</sup> Chentšana, chë burrotema Jesúsbioye tmojanánatse; chë burrotëbeñe chatbe entsayá tbojanátatse, y Jesús chábeñe tojanenojayé. <sup>8</sup> Bëtscá entsanga chëngbe entsayá chë benachëjana imojtsanëtëtsatsana, y ínÿëngna chë jajoca

imojuatëtsetše buacuashangá chiñe imojuacjaye. <sup>9</sup> Y chë natsana imojtsajnënga y chë ústonoyënga mëntšá imojtsaiuáye buache: “¡Bëngbe Bëtsá matschuanga! ¡Corente bendición bomná, chë Bëngbe Utabnabe obenánaca tojabá! <sup>10</sup> ¡Tša tšabá chë echanjóshjango amëndayana, bëngbe bëts taitá David yojëftsemánda orcá! ¡Bëngbe Bëtsá celocá matschuanga ca!”

<sup>11</sup> Jesús Jerusalenoye tojánashjango, y Bëngbe Bëtsabe bëts yebnoye tojánamashëngo. Chabe shëconana lempe yojëftserrepárase, y ya yojtseibétatana causa, chabe bnëtsana uta uatsjëndayëngaftaca tojëftsanbocna, Betania puebloye.

*Jesús tojánayana canye betiye ndoñe más chaondëshájona ca*  
(Mt 21.18-19)

<sup>12</sup> Yëfsana, Betaniocana Jerusalenoye chënga imojtésajna ora, Jesús tbojánishëntsena. <sup>13</sup> Bënocana canye higo betiye yojinye; as tojána jontješiyama tainashajo o ndoñe. Pero nye tsbuanáchënga chiñe yojínýena, chora ndoñe shajo tempo bëtsemna causa. <sup>14</sup> As Jesús chë higo betiyoje tojánayana: “¡Ndocna te más chaondëshájona entšanga chamosama ca!”

Y chabe uatsjëndayënga imojouena ntšamo cha tojanayancá.

*Jesús, Bëngbe Bëtsabe bëts yebnentsana enënga y obuámnayënga tojtanëbuacna*  
(Mt 21.12-17; Lc 19.45-48; Jn 2.13-22)

<sup>15</sup> Jerusalenoye tmojánashjajntšana, Jesús Bëngbe Bëtsabe bëts yebnoye tojánamashëngo, y tojanontšé chentšana jtëbuacnana chë chentše imojtsena y imojtsobuámnáñënga. Chëntšnaca imojtsemna entšanga canye crocénana enënga, y chë crocénana nye Bëngbe Bëtsabe bëts yebnentsama inoservena. Chë entšanga crocénana atrocayëngbe mesëshangá tojtsanenásatajchquëca, y chë palomatémënga enëngbe tšenëšëngnaca; <sup>16</sup> y ndoñe tonjanalesenciá ndocná Bëngbe Bëtsabe bëts yebnëjana chë soyënga chaotsëchnëjuanama. <sup>17</sup> Y tojanontšé entšanga mëntšá jabuátambana: “Ndegombre, Bëngbe Bëtsabe uabemana palabrenguiñe cha mëntšá tojánayana: ‘Atšbe bëts yebna echantsabaina nyetsca luarentša entšangbiama átšeftaca encuéntaye yebna ca’; pero tšëngaftangna atbëbanëngbe oyeniñe chë yebna šmojtsebema ca” —Jesús tojanëyana.

<sup>18</sup> Chë bachnangbe más uámana amëndayënga y chë ley abuátambayënga tmojántatšëmbona ntšamo yojochnënguama; as tmojanontšé enójuabnayana ntšamo jobenayana cha jóbana, cha imojtsebiauatja causa, er nyetsca entšanga imojtsenjnanaye ntšamo cha yojanabuátambama. <sup>19</sup> Pero yojtseibétatana ora, Jesús chabe uatsjëndayëngaftaca chë bëts pueblentsana yojesóbocñe.

*Chë higo betiye tojtsanbuashá*  
(Mt 21.20-22)

<sup>20</sup> Yëfsana cachëse, cachëjana imojtésachnëjuana ora, tmojáninye chë higo betiye parejo tbëtëjëngaca yojtsebuashá. <sup>21</sup> Chora Pedro yojenójuaboye ntšamo yojopásama; as Jesúsbioye tbojaniyana: —¡Buatëmbayá, minye; chë tconjayana ndocna te más tšabe betiye chaotsemnana betiye tojtsebuashá ca!

<sup>22</sup> Y Jesús tbojaniyana: —Bëngbe Bëtsabeñe šmochtsošbuáchiye. <sup>23</sup> Ndegombre cbëyana, nderado nda quem tjoye tojayana, “¡chentšana mojuaná y bëts uafjajónayoye motsëshbuetše ca!” y chca tojayana ainaniñe inyetsá juabna ntjatsbomncá, y ainaniñe puerte tojtsošbuaché ntšamo tojayancá aíñe yochjochnënguama, ndegombre chca echanjochnëngo. <sup>24</sup> Chiyeca cbochanjáuyana, lempe ntšamo Bëngbe Bëtsáftaca chašmojtsencuënta ora chašmojtsotjanañama, ainaniñe corente šmochtsejuabnaye ya šmojóyëngacñe ca, y ndegombre chca šmochántsebomna. <sup>25</sup> Y Bëngbe Bëtsáftaca chašmojtsencuënta ora, šmochjenójuaboye nderado nda ndaye bacna soye tšëngaftangbiama tojamama, y cháftaca cabá etonánënga šmojtsemnëse,



šmochtseperdóna; chca, Bëngbe Bëtsá, celoca endmëná, tšëngaftangbe bacna soyëngama chacmotsaperdonama. <sup>26</sup> Pero inya ndoñe šmonjaperdonasna, Bëngbe Taitá, celoca endmëná, cach ndoñe tšëngaftanga quecmochátaperdonaye ca —cha tojánayana.

### *Jesusbe obenana*

*(Mt 21.23-27; Lc 20.1-8)*

<sup>27</sup> Chca tojanopasá chentšana, Jerusalenoye chënga tmojesaná. Jesús Bëngbe Bëtsabe bëts yebnëjana yojtsobuertanëntscuana, chábioye tmojanobeconá bachnangbe amëndayënga, ley abuatambayënga y chë judiëngbeñe bëtsëjemëngcá amëndayënga, <sup>28</sup> y mëntsá tmojantjá: —¿Ndaye deréchoca chë contsama soyënga aca cojtsama ca? ¿Chca jtsamama nda obenana tcmënjatšetá ca?

<sup>29</sup> As Jesús tojanëyana: —Atšnaca sëntsebmna canye soye tšëngaftanga jatjayama. Chašmojojuase, átšnaca cbochjáuyana ndaye deréchoca atše chca stsama. <sup>30</sup> ¿Nda Juan chë Ubayaná tbojanichmó entsanga jubáyama, Bëngbe Bëtsá o entsanga? Smëyana ca.

<sup>31</sup> Chora chënga tmojanontšé mëntsá enatsëtsnayana: “ ‘Bëngbe Bëtsá ca’ chamojojuase, cha šochanjáuyana: ‘As ¿ndáyeca chë cha tcmojanabuayená soyënguiñe ndoñe šmonjanošbuaché ca?’ <sup>32</sup> Pero ndoñe quemuátobena jayanana ‘entsanga ca’.” Chca tmojánayana, er chënga entsangbiana imojánauatja, er nyetscanga imojanjuabná, Juan ndegombre Bëngbe Bëtsabe juabna oyebuambnayá yojamnana. <sup>33</sup> Chcasna, chënga tmojanjuá: —Bënga ndoñe queftsátstatšëmbo ca.

Y Jesús tojanëyana: —As atše cach ndoñe quebochatëyana ndaye deréchoca atše chca stsama ca.

## 12

### *Chë puerte bacna trabájayëngbiana cuento*

*(Mt 21.33-46; Lc 20.9-19)*

<sup>1</sup> Chora Jesús tojanontšé cuentëngaca jabuatambana. Mëntsá tojanëyana: “Canye entsá bëtská uvas betiyënga yojáje, y chë shëconana yojajëtja. Chë uvasësangá juantsëtetjamna canye base luare yojajutjo; y canye tsbanana jebna soye yojapórma chiñe jtsashanyama. Chentšana, inye trabájayënga chë jajañe yojúyentsame, y chana inye luaroye yojtsoñe. <sup>2</sup> Chë uvasësangá juashacama tempo yojobuache orna, chë jajañe nduiño canye oservená ibojíchmuá chë arrëndayënga jáuyanama ntsachetšá chë nduiño ibojtsotocánama. <sup>3</sup> Pero chëngna, cha imojishache, imojtsejantšetaye, y tondaye ntajatacá imojtichmuá. <sup>4</sup> Chentšana, chë nduiño inye oservená ibojíchmuá; pero chana, bestšaše imojtselisia y podesca imojtsóyenguango. <sup>5</sup> Chentšana inya ibojatichmuá, y chana chë arrëndayënga imojtsóba. Y bángnaca yojichamuá; pero chëngna, ínÿengna imojtsajantšetaye y ínÿengna imojtsëbaye.

<sup>6</sup> “Chë nduiño cabá canya ibojtsábojamna jíchmuama: cachabe bonshana uaquiñá. Cabana, cha ibojíchmuá y mëntsá yojtsejuabnaye: ‘Atšbe uaquiñá cocayé mochanjóyeunaye ca.’ <sup>7</sup> Pero chë arrëndayënga cha imojinÿe ora, imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe. Cuajna, motsóbanga, y lempe chabe otocana soyënga bëngbiana echanjoquéda ca.’ <sup>8</sup> Chcasna, cha imojishache, imojtsóba y chë uvas betiyënga jajañentsana más chcoye imojetsëtšena ca” —Jesús tojancuentá.

<sup>9</sup> Jesús chca jacuéntama tojanpochocá ora, tojánayana: “Y asna, ¿ndayá chë fshantse nduiño yochjama ca? Cha co echanjá y chë trabájayënga echanjetsëbaye, y inye trabájayënga chë uvas betiyënga jajañe echanjárrendaye.

<sup>10</sup> “¿Tšëngaftanga ndocna te Bëngbe Bëtsabe uabemana palabra šmëndualía? Chiñe mëntsá endayana:

Chë yebna jebuanënga tmojtsanaboté ndëtšbé,  
mora chë más bëts uashacuanësentše entsejájona.

11 Chë soye Bëngbe Utabná, Bëngbe Bëtsá chca tojama, y bënga chama ojanánënga fsëntsemna ca.”

12 Chora, chë bachnangbe amëndayënga y chë bëtsëjemëngcá mándayënga tmojánbošena Jesús jishachana, er chënga tmojanenótatšëmbona cha chca tojancuentá jinýanýiyama chënga mo chë puerte bacna trabajayëngcá imojanmënema. Pero entsangbiama imojtsauatja, chíyeca cachcá tmojanonýá y chentsana imojtsóñenga.

*Chë Romoca bëts mandadbiama impuesto jtsatsquëcjayama*

*(Mt 22.15-22; Lc 20.20-26)*

13 Chentsana chënga, básefta fariseunga y Heródesbe ústonënga Jesúsbioye tmojanichamó, ndayá cha tojayaniñe jisháchichiyama, as chca jtsebomnama ndaye sóyeca mandadëngbeñe cha mal jaquédana. 14 Chënga tmojána y Jesús tmojanianyana: —Buatëmbayá, bënga fsëndétatšëmbo aca ndegombre soyënga cnetsabuátambama, y ndoñe jatuenanana nýe ntšamo entsanga tmojatichamcá, er acbiama tondaye quenatámana nda más uamaná o nduamaná tomnana; y contsabuatambá ndegombre tšabe vida jtsebomnama, ntšamo Bëngbe Bëtsá yomandacá. Chcasna, ¿tšabá tanántsemana, César, chë Romoca bëts mandadbiama bënga impuesto jtsatsquëcjayana? ¿Fchtsatsquëcjayaye o ndoñe ca? —chënga tmojantjá.

15 Jesús yojtsetátšëmbo, chënga bacna entsanga ntšamo ndegombre tmojuabnacá ndinýinýnayënga imojamnama; chíyeca tojanéyana: —¿Ndáyeca tšëngaftanga šmojtseboše chë sóyeca atše jisháchichiyama? Canýe denario crocénana šmiyëboñe, atše chayobená jinýama ca.

16 As canýe crocénana tmojanoyé y Jesús tojanéyana: —¿Ndabe jubiá quem crocenániñe yojtsemna, y ntšamo muentše entsabemancá nda chca iuabaina ca?

Y chënga tmojanjuá: —Césarbe jubiá; cha chca enduabaina ca.

17 Chora Jesús tojanéyana: —Chcasna, César šmohtoyiye cha ibotocana soye; y Bëngbe Bëtsana cha ibotocana soye ca.

Y nýetscanga chama imojenjnaná.

*Obanënga jtayenama Jesús tmojantjá*

*(Mt 22.23-33; Lc 20.27-40)*

18 Chentsana, báseftanga saduceo ca uabaina entsanga tmojána Jesús jinýama. Chënga imojanjuabná obanënga ndocna te ntayenana ca. Chíyeca, Jesús mëntšá tmojanianyana:

19 —Buatëmbayá, Moisés tojëftsanabema, nderado canýe boyá tojóbana y básenga ndoñe tonjëftsabáshejuanësna, canmëna chë uabentsá chë shémaftaca jtobouamayana, chca, chabe uabochená obanabiama básenga jtsabamnama ca. 20 Y chcase, canýe, canýsëfta catsátanga monjamna. Chë natsaná tonjanobouamá y tontsanóbana básenga ntjëftsabashejuancá. 21 Chentsana, chë ústona uabentsá chë shémaftaca tonjanobouamá, pero chana tontsanóbana, básenga ntjëftsabashejuancá; chë inýe uabentsáftaca cachcá tonjanopasá. 22 Chca, nýetsca canýsëfta catsátangaftaca cha tonjanobouamá, pero ndocná básenga ntjëftsabáshejuanana. Y chentsana chë shembásanaca tontsanóbana. 23 Y morna, chë obanënga chamojtayena ora, ¿ndabe chë canýsëfta catsatanguentsabe shema chë shembása yochtsemna, nýetscanga cháftaca tmojanobouamase ca? —chënga tmojantjá.

24 As Jesús tojanéyana: —Ntšamo Bëngbe Bëtsabe uabemana palabrënguiñe endayancá ndoñe tcmonjosertá, ni Bëngbe Bëtsabe obenanama. Chíyeca ntšamo ndoñe yondmëncá šmontsichamo. 25 Er obanënga chamojtayena ora, ni boyabásenga ni shembásenga quemochatóbouamnaye, y chca, chënga mochántsemna mo celoca angelotemëngcá. 26 Y chë obanënga jtayenama, ¿Moisesbe libréšañe ndoñe šmëndualía ntšamo Bëngbe Bëtsá tbojanianama, chë betiyetema yojtsángbototjuana ora? Bëngbe Bëtsá mëntšá tbojanianyana: “Atše sëndmëna Abraham, Isaac y Jacobëbe Bëtsá ca.” 27 Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entsangbe Bëtsá ca,

er masque chënga tmojanóbana, chënga cabá Bëngbe Bëtsáftaca mondoyena. Tšëngaftanga canye ndoñe ndegombre soyiñe šmontsemna ca –tojanéyana.

*Chë más bëts uámana mando  
(Mt 22.34-40)*

<sup>28</sup> Chentše yojtsemna canye ley abuatambayá. Cha yojouena ntšamo Jesús y chënga imojtsenatsëtsnayana, y yojtsetátšëmbo Jesús tšabá tojanéjuama. As, tojanobeconá y Jesúsbioye tbojantjá: –¿Ndayá chë más bëts uámana mando yomna ca?

<sup>29</sup> Y Jesús tbojanjuá: –Chë más uámana mando mëntsá endmëna: “Israeloquënga šmochjouena, Utabná, Bëngbe Bëtsá endmëna, y nÿe canye Bëngbe Utabná endmëna, ndocná más. <sup>30</sup> Utabná Bëngbe Bëtsá cochtsebobonshana nÿets acbe ainánaca, nÿets espíritoca, nÿets juábnaca y nÿets añémoca.” <sup>31</sup> Y chentšana quem inÿe mándnaca: “Ndëmua entšánaca cochtsebobonshana, ntšamo cach aca cuenobobonshancá.” Ndocna mando quem uta mandama más quenatámana ca –Jesús tojánayana.

<sup>32</sup> Chora, chë ley abuatambayá Jesúsbioye tbojaniyana: –Buatëmbayá, puerte tšabá tcjayana. Ndegombre yomncá contsichamo, nÿe canye Utabná endmëna y ndocná más. <sup>33</sup> Y cha jtsebobonshánana nÿets ainánaca, juábnaca y añémoca, y ndëmua entšánaca jtsebobonshánana cachá cuenobobonshancá, puerte cuámana. Cach nÿetsá ndoñe quenatámana bayënga jtsëbánayana, ni chë uátšëmbona soyënga Bëngbe Bëtsá jëtschuayama ca.

<sup>34</sup> Cha nÿets juábnaca tbojanjuama Jesús tojáninÿe ora, tbojaniyana: –Batšatema cmontsebuáshbena jtseprontánama, Bëngbe Bëtsá chacolesenciama acbe ainanentše jtsemándayama ca.

Y chentšana, ya ndocná yonjenñëmua Jesús más jatstjanayama.

*¿Cristo ndabe entšábentšana yomna?  
(Mt 22.41-46; Lc 20.41-44)*

<sup>35</sup> Jesús Bëngbe Bëtsabe bëts yebnentše yojtsabuátambaye ora, tojánayana: “¿Ndáyeca chë ley abuátambayënga mondbëtsichamo chë Uámana Uabuayaná Davídbentšana iuabó ca?”

<sup>36</sup> Cach David, chë Uámana Espíritbe mándoca mëntsá tojánayana: Bëngbe Bëtsá, atšbe Utabná Crístbioye tbojaniyana:

atšbe catšbioica mótbema,

atšbe obenánaca, acbe uayayënga acbe cucuatšinë chamoquedama chjamëntscuana ca.

<sup>37</sup> ¿Ntšámose Cristo Davídbentšana Entšá nántsemna, cach David ‘Utabná ca’ chábioye tbojtsabobuátmëse ca?” –cha tojanéyana.

Y chë bëtscá entšanga, oyejuayënga imojtsuenana.

*Jesús chë ley abuátambayëngbiana tojánayana, chënga ndoñe tšabá montsama ca  
(Mt 23.1-36; Lc 11.37-54; 20.45-47)*

<sup>38</sup> Mëntsánaca Jesús chënga yojtsabuátambaye: “Cuedado šmochtsebomna y ndoñe šmattsama chë ley abuatambayëngcá. Chënga jtsogusetánana bënëna entšayangaca jtsajnana y jtsebošana tsáshenañe entšanga nÿa respétoca chamotsacheuanama. <sup>39</sup> Chë judiëngbe enefjuana yebnënguenache, chë más uámana luarënguiñe jtsetbiámanana, y chë fiestënguenache nÿa quëfseroca. <sup>40</sup> Pero chënga, viudángbioye chë tmobomna soyënga jtsabacayana, y entšangbe delante tšabá chamotsënyama, y chëngbioye imojtsaíngñama ndoñe chaondëtsótatsëmbuamna, Bëngbe Bëtsáftaca tša jtsencuéntayana. Chë causa, Bëngbe Bëtsá ínÿëngbiana más chënga echanjácastigaye ca” –Jesús tojánayana.

*Jesús yojtsënyaye chë crocénana quëcnyayënga  
(Lc 21.1-4)*

<sup>41</sup> Jesús jabuátambama tojanpochocá ora, tojanótbema Bëngbe Bëtsabe bëts yebnentše, chë crocénana quëcnyayëtema ndirichiñe; y chë crocénana quëcnyayënga yojtsënyaye. Bëtscá bomnëngna becá crocénana imojtsequëcnyaye. <sup>42</sup> Chora, canye viudá ndbomnëjémnaca yojobeconá y nÿe uta crocénana chëtëmiñe yojaftseseğóra. <sup>43</sup> Chora

Jesús chabe uatsjéndayënga tojánachembo chamobéconama, y mëntšá tojanéyana: “Nde-gombre cbéyana, quem viudá ndbomñëjema, Bëngbe Bëtsabiana nÿetscangbiana más tonjëftseseGORÁ. <sup>44</sup> Chë bomnëngna chë yojtsóyentšjamentšana tmonjëftseseGORÁ, y cabá bomnana imotsóbomñë; y chë viudana tonjëftseseGORÁ lempe ntsachetšá yobomncá; masque tša ndbomñëjema, chë vida jtsebomnana lempe ntsachetšá yobomncá tonjëftseseGORÁ ca.”

## 13

*Jesús tojánayana chë Bëngbe Bëtsabe bëts yebna lempe mochjánpochocama (Mt 24.1-2; Lc 21.5-6)*

<sup>1</sup> Jesús Bëngbe Bëtsabe bëts yebnentšana tojëftsanbocna ora, canÿe chabe uatsjendayá tbojanianyana: —Buatëmbayá, minÿe, jtša bëts ndëtšbenga, y tša botamana bëts yebnënga ca!

<sup>2</sup> Chora Jesús tbojanianyana: —Tšabá cochjinÿe tša botamana bëts yebnënga. Pero muentše ndoñe queochaisoquéda ni mo canÿe ndëtšbé inÿebé juatsboye. Lempe mochantsepochóca ca.

*Ntšamo yochtsemna quem luare jopochócama te chaojtsobeco ora (Mt 24.3-28; Lc 21.7-24; 17.22-24)*

<sup>3</sup> Chentšana, Olivos tjashoye chënga tmojána. Bëngbe Bëtsabe bëts yebnentša ndirichiñe yojamna; y Jesús tojanótbema ora, Pedro, Santiago, Juan y Andrés iytëcana tmojantjá, <sup>4</sup> ntšamo cha tojanayancá ntseco yochjanopásama, y chca jopásama ya tojtsobecuama entšanga chamotsetatšëmbuama, ndayá Bëngbe Bëtsá yochjanma ca.

<sup>5</sup> Chora Jesús tojanéjua: “Cuedado šmochtsebomna ndocná chacmondáingñema. <sup>6</sup> Banga mochanjabo y mochantsabíchamo chënga Jesús imomna ca. Mochántšichamo: ‘Atše chë Cristo sëndmëna ca’, y chca, ba entšanga mochanjáingñaye.

<sup>7</sup> “Entšanga tmojtsentsjanama y nderado mochjentsjámnaca tšëngaftanga chašmojouena ora, ndoñe šmattsauatja; er chca chaochnënguama entsemna, pero masque chca, chora chë quem luare jopochócama tempo cabá ndoñe queochátšmëna. <sup>8</sup> Canÿe luarentša entšanga inÿe luaroca entšángaftaca mochántšentsjanaye, y canÿe amëndayábentša entšanga inÿe amëndayábioca entšangaftácnaca; ba luarënguenache fshantse echanjuangmëmëna y bëts shëntsana echanjóshjango. Masque chca jasúfriase, más chcoye cabá más mochanjatssúfria.

<sup>9</sup> “Pero tšëngaftangna cach tšëngaftangbiana šmochtsantješna; entšanga cmochanjíshëche y amëndayëngbe cucuatšinë cmochanjábashejuana, judiëngbe enefjuana yebnënguenache cmochanjátsetšenaye. Atšbe ústonënga bëtsemna causa, mandadëngbioye y reyëngbioye cmochanjunatse, choca, chëngbe delante ntšamo atšbiana šmotatšëmbcá chašmuayanama. <sup>10</sup> Er entseyta, quem luare cabá ndopochóca ora, Bëngbe Bëtsabe tšabe noticiënga nÿetsca luarënguentša entšángbioye chaóshjanguama. <sup>11</sup> Y inÿengbe cucuatšinë jabáshejuana chacmojtsënachá ora, ndoñe šmattsenócochinÿena ntšamo chora šmochjayanama. Chora šmochjayana ntšamo Bëngbe Bëtsá yochjamcá tšëngaftanga chašmuayanama, er tšëngaftanga cánÿenga ndoñe chora quešmochátoyebuambnaye, ndayá chë Uámana Espíritu tšëngaftangbiajana echantsóyebuambnaye.

<sup>12</sup> “Canÿe catšata cachabe catšata inÿengbe cucuatšinë bochanjáboshjona chamotsóbama, y bëtsëtsanga cachëngbe básenga mochanjábashhejuana chamotsëbáyama; y chë básengna chëngbe bëtsëtsangbe contra mochántsemna y chamotsëbáyama mochanjábashhejuana. <sup>13</sup> Atšbe ústonënga bëtsemna causa, nÿetsca luarënguentša entšanga cmochantsëbuayënja; pero nda nÿets tempo átšbeñe ošbuachiyá totsomñe, atsbocaná echántsemna.



<sup>14</sup> “Chë Bëngbe Bëtsabe juabna oyebuambnayá Daniel, chë puerte uabouana soye quem luare jopochócoma tojéftsanabema. Chë puerte uabouana soye, chca jtsemnama ínÿoca tsëngaftanga chašmojinÿe ora (nda tojtsalía, chabosertá), šmochántsetatšëmbo chë puerte ngménana tempo tojóshjanguama; chorna, chë Judeoca chamojtsemna entsanga, batsjabengoye chamotsacheta; <sup>15</sup> chama, nda cachabe yebnentša tsbanánoca chaojtsemna, chocana ndoñe chaondétastjango, ni chaondétamashëngo tsoicana ndayá jesábocnama; <sup>16</sup> y nda jajoca chaojtsemna, yebnoye ndoñe chaondéta ni mo chabe quëfsaíya jesácñama. <sup>17</sup> ¡Tša lastema chë tempo ngomámanënga o ochóchaye šesonga chamojtsabamna shembásengbiama! <sup>18</sup> Bëngbe Bëtsá šmochtseimpadana chë ngménana tempo ndoñe chaondóshjango uaftena tempo ora, <sup>19</sup> er chora puerte ngmenancá echántsemna. Tša jabuache ngmenancá, quem luare jobojátšama orscana y méntscóñama y más chcoye, cachcá ngménana ndoñe ntjamnana. <sup>20</sup> Chë puerte ngménana tempo, yapa bën ndoñe chaondétsemnama Bëngbe Bëtsá ndoñe tonjalesenciase, ndocná quentatsbocá; pero cha, chabe ubuáyanënga, chabe bocacánënga corente endábabuanÿeshanayeca, echanjama yapa bën tempo ndoñe chaondétsemnama.

<sup>21</sup> “Chora nderado nda chacmojáuyana: ‘Minÿe, muentše chë Cristo entsemna’, o ‘Choca cha entsemna ca’, chë soyëngama ndoñe šmattsayaunana. <sup>22</sup> Er mochanjábocana ndoñe ndegombre uámana ubuáyanënga, chënga Cristo imomna ca jtsichámëse, y Bëngbe Bëtsabe ndoñe ndegombre juabna oyebuambnayëngnaca; y chënga mochanjama bëts soyënga chëngbe obenana jinÿanÿiyama, entsanga jáingñama, y tmojobenase, chë Bëngbe Bëtsabe bocacánëngnaca. <sup>23</sup> ¡Cuedado šmochtsebomna! Cabá chca ndochnëngo ora, lempe tcbonjabuayená ca” —Jesús tojanëyana.

*Bëngbe Bëtsá Entšá tbojanbemá quem luaroye echanjésabo  
(Mt 24.29-44; Lc 21.25-36)*

<sup>24</sup> Méntšánaca Jesús tojanëyana: “Pero chë tempo, entsanga puerte chamojasufrí chentsana, shinÿe ndoñe queochátsbuashinÿinÿana, juashcona ndoñe queochátsbinÿnaye, <sup>25</sup> celocana estrellënga echanjatquécjana, y quem luarentša tsbanánoca espíritënga obenana bomnënga echanjángmëmana. <sup>26</sup> Y chora, entsanga mochanjinÿe, Bëngbe Bëtsá Entšá tbojanbemá jantšetëshiñe echántsaboye, corente obenánaca y corente buashinÿinÿaniñe. <sup>27</sup> Chora cha chabe angelënga echanjámëndaye chë Bëngbe Bëtsabe ubuáyanënga júbuajama, nÿets luarëngocana, quem fshantsoca cánÿoica juachoicana, celoca ínÿoica juachóntscoñe.

<sup>28</sup> “Chë higo betiyama šmochjuatsjinÿe: Tsëm buacuafjënga tojtsebomna ora y tojtsaisëjotsana, jtsotatšëmbuana chë tsabe tempo ya tojtsaisobecuama. <sup>29</sup> Cachcá, chë soyënga ndayama tsëngaftanga tcbonjauyancá chašmojinÿe ora, šmochántsetatšëmbo Bëngbe Bëtsá Entšá tbojanbemá ya jésabama yojtsemnama. <sup>30</sup> Ndegombre cbëyana, lempe chca echanjochnëngo, morsca entsanga cabá ndóbana ora. <sup>31</sup> Celoca y quem luare echanjopochóca, pero atšbe palabra ndocna te queochaisopochóca.

<sup>32</sup> “Pero Bëngbe Bëtsá Entšá tbojanbemá ndayté y ntseco ora yochjésabama, ndocná quenátstatsëmbo, ni chë celoca angelënga, ni Bëngbe Bëtsabe Uaquiñá. Nÿe chë Taitá chama yotátšëmbo.

<sup>33</sup> “Chíyeca, cuedado šmochtsebomna y yejuana šmochtsantješna, er ndoñe quešmátstatsëmbo mocna ora yochtsemna Bëngbe Bëtsá Entšá tbojanbemá jésabama tempo. <sup>34</sup> Echántsemna mo canÿe entsacá; chana inÿe luaroye ya jëftsebocnama ora, chabe oservénënga jëftsamëndana chabe yebna chamotsinÿenama. Cada ona canÿe trabajo jëftsebónÿiyana, y chë shanÿá jëftsemándana botamana chaotsantješnama. <sup>35</sup> Chcasna, cuedado šmochtsebomna, šmochtsantješna, er ntšamo chë trabajayëngcá chë yebna nduiño ntseco jtashjanguama, ndoñe ntsetatšëmbuana, mo nderado jétatana, tsëntseto ora, bínÿanoye o cachëse, tsëngaftanga cachcá, Bëngbe Bëtsá Entšá tbojanbemá ntseco

jésabama ndoñe quešmátstatšëmbo; <sup>36</sup> ndoñe cuedado šmontsebomñese, nderado cha nyē ndeolpe nántashjango, tšëngaftanga ndëprontánënga šmojtsemna ora, mo ftsomañe cuenta. <sup>37</sup> Chíyeca, ntšamo tšëngaftanga cbochanjauyancá, nyētscanga chanjáuyana: ¡Puerte cuedado šmochtsebomna ca!” —Jesús tojánayana.

## 14

*Entšanga imojtsejuabnaye ntšamo jamëse Jesús jishachama*  
(Mt 26.1-5; Lc 22.1-2; Jn 11.45-53)

<sup>1</sup> Bashco fiestama uta te yojetsájamna, chë Bëngbe Bëtsá Egiptocana judiëngbe bëts taitanga tojánatsebacama jtenójuaboyama fiesta, chë levadúraca ndëpormana tandëse say-ora. Chë judiëngbe bachnangbe amëndayënga y chë ley abuátambayënga imojtsenguaye ntšamo Jesús jishachana jtseíngñase, y jtsóbama. <sup>2</sup> Báseftanga imojtsichamo: “Quem fiestëntscuana ndoñe, er nderado entšanga yapa muanjónťša enbouenanana ca.”

*Canýe shembása botamana uanguëtše béjaye Jesusbe bestšašíñe tbojanbuešcja*  
(Mt 26.6-13; Jn 12.1-8)

<sup>3</sup> Jesús Betanioca yojtsemna, Simón chë bacna nguayanánaca šocá ca uabobuatmabe yebnentše; mesëshentše Jesús yojtsemna ora, canýe shembása tojánashjango. Chë shembása yojúshjango canýe alabastro jarrëtema jútjena canýe becá uámana y botamana uanguëtše béjayeca, ena nardana uanguëtšiyē; chana chë jarrëtema yojátsba y chë béjaye Jesusbe bestšašíñe tbojanbuešcja. <sup>4</sup> Chca tmojáninye ora, báseftanga chentše imojtsemnënga tmojanotjayaná y mëntsá imojtsenatsëtsnaye: —¿Ndáyeca nyē bonamente chë soye yojtsemna ca? <sup>5</sup> Chamna, matmënjobenanga chë béjaye unga patse denario crocénanama juiyana, y chánaca ndbomñëjmënga matmënjújabuache ca.

Y chë shembásabiama podesca imojtsichamo.

<sup>6</sup> Chora Jesús tojanëyana: —¿Ndáyeca quem shembása ndoñe cachcá šmochanjonýaye ca? ¡Ndocá matatsana! Atšbiama tšabe soye tonjama. <sup>7</sup> Er ndbomñëjmënga nyēts tempo tšëngaftangbeñe mochanjëftsemna, ndayénaca šmojábošena ora, šmatjobenaye tšabe soye chëngbiamana jamana; er atše tšëngaftangftaca ndoñe nyēts tempo quichásemna. <sup>8</sup> Quem shembása lempe ntšamo tojobenacá atšbiama tonjama. Chca tonjama ora, atšbe cuerpo tonjaprontá atše juatbontsa tescama, cabá ndoñe obaná sëntsemna ora. <sup>9</sup> Ndegombre cbëyana, quem luaroca ndayéntšnaca Bëngbe Bëtsabe tšabe noticiënga chamojtsabuayiyá chentše, ntšamo quem shembása tojamámnaca becá mochanjëftšóyebuambaye, chca, entšanga chabiamana chamotsenójuabnama ca —cha tojanëyana.

*Judas tojána bachnangbe amëndayëngbioye, Jesús chamuishachama*  
(Mt 26.14-16; Lc 22.3-6)

<sup>10</sup> Chentšana, Judas Iscariote, canýe chë bnëtsana uta uatsjendayënguentšá, tojána chë bachnangbe amëndayëngaftaca jencuéntama, Jesús chëngbe cucuatšíñe jaboshjonama. <sup>11</sup> Chca tmojanuena ora, chënga imojóyejuaye y tmojanšbuachená crocénana jtabuénayana. Y cach orscana Judas yojtsenguaye ntšamo jamana y ndëmua ora, Jesús chëngbe cucuatšíñe jaboshjonana.

*Jesús chabe uatsjendayëngaftaca Bashco saná tojanse*  
(Mt 26.17-29; Lc 22.7-23; Jn 13.21-30; 1 Co 11.23-26)

<sup>12</sup> Chë Bashco fiesta bojatšenté, chë levadúraca ndëpormana tandëse sayté, chë uat-sjendayënga Jesús tmojantjá: —¿Ndëmoca cojtseboše bënga fchaiprontama, Bashco saná chacosama ca?

Chca te chë judiënga imojanamana, Bëngbe Bëtsá jëtschuayamna canýe oveshá jóbana chora jasama, chë Egiptocana chëngbe bëts taitanga Bëngbe Bëtsá tojánatsebacama jtenójuaboyama.

<sup>13</sup> As Jesús uta chabe uatsjéndayata tojanichamó y mēntšá tojanéyana: —Chē bēts puebloye motsata. Chašojáshjango ora, canye bacó cmochanjóbiatše, matbajiñe búyeshe echantsabuyambaye; cha šochjuasto y šochterreparana ndēmuanye yebnentše yochjámashēnguama; <sup>14</sup> y chē yebna nduiño šochjauyana: “Buatēmbayá tonjayana: ¿Ndayentše chē tsañe yojtsemna, Bashco saná atše atšbe uatsjéndayēngaftaca jasama ca?” <sup>15</sup> As cha cmochanjínjānyīye canye bēts tsañe, tsbanana pisoca, lempe prontániñe; chentše šochjapróna bēnga mochjasama ca.

<sup>16</sup> As chē uatsjéndayata tbojána y tbojáninýena lempe ntšamo Jesús tojanéyancá; y chentše chē Bashco saná tbojanprontata.

<sup>17</sup> Tojanibétata ora, Jesús chē yebnoca tojánashjango, chabe bnētsana uta uatsjéndayēngaftaca. <sup>18</sup> Y mesēshentše imojtseye ora, Jesús tojanéyana: —Ndegombre cbéyana, canya tšēngaftanguentšá, átseftaca entsesá cha, uayayēngbe cucuatšīñe šochanjáboshjona ca.

<sup>19</sup> Chorna chē uatsjéndayēnga ngmēnaca imojtsemna, y tmojanontšé canjānyā cha jatjayana: —¿Atše chtsemna ca?

<sup>20</sup> Y Jesús tojanējua: —Canya chē bnētsana utatentšá entsemna. Chabe tandēse cach atše sēntsefchecuacná šcnenentše cha entsefchecuacná. <sup>21</sup> Ndegombre, Bēngbe Bētsá Entšá tbojanbemáftaca echanjopása ntšamo chabiamā Bēngbe Bētsabe uabemana palabrēnguiñe endayancá. Pero, itša lastema chē bochjáboshjonabiamā! Chabiamā más tšabá manjamna ndoñe ntjónynana ca —Jesús tojánayana.

<sup>22</sup> Imojtseyantscuana, tandēse tojanca, Bēngbe Bētsábioye chama tbojtanchuá, tojanjataye y chabe uatsjéndayēnga tojanējatá, y mēntšá tojánayana: “Mocñēnga, mosēnga, atšbe cuerpo entsemna ca.”

<sup>23</sup> Chentšana, canye coptema vínoyeca tojanaca, Bēngbe Bētsábioye tbojtanchuá, chabe uatsjéndayēnga tojanēfsašé, y nyetscanga tmojanofšé. <sup>24</sup> Mēntšá tojánayana: “Quem vínoye atšbe buiñe entsemna. Atšbe buiñe echanjuábuashana entšanga chamotsetatšēmbuama ntšamo Bēngbe Bētsá entšanga tojašebuachenacá ndegombre yochjochnēnguama. Chē buiñe bētsca entšangbe tšabiamā echanjuábuashana. <sup>25</sup> Y ndegombre cbéyana, morscana ya ndoñe más chē uvasēsentsana obocniye quichaisofsiye. Chē tsēm vínoye tšēngaftangaftaca chanjofsiye, Bēngbe Bētsabe amēndayoca chamojtsemna ora ca” — tojánayana.

*Jesús tojánayana, chábioye ndoñe bonjanabuátma ca Pedro yochjánayanama (Mt 26.30-35; Lc 22.31-34; Jn 13.36-38)*

<sup>26</sup> Bēngbe Bētsábioye jētschuayama tmojancantá chentšana, Olivos tjashoye tmojēftsānbocana. <sup>27</sup> Jesús tojanéyana: —Nyetsca tšēngaftanga quem ibeta átšbeñe ošbuáchiyana šmochantsobuetše y šmochántsacheta, er Bēngbe Bētsabe uabemana palabrēnguiñe, cha mēntšá tojánayana: “Chē oveshēnga abujénjā chanjóba y chē oveshēnga mochantsáshana ca.” Chca tšēngaftangaftaca echanjopása, uayayēnga chašmojishache ora. <sup>28</sup> Pero obanēnguentšana chaitayenentšana, tšēngaftangbe natsana Galileoye chanjá ca —cha tojanéyana.

<sup>29</sup> Chora Pedro tbojanianya: —Masque nyetscanga áceñe ošbuáchiyana chamotsobuetše y chamotsacheta, atše nýa ndocna te ca.

<sup>30</sup> Chora Jesús tbojanianya: —Ndegombre cbéyana, cam ibeta, ngallo cabá uta soye ndécanta ora, aca unga soye cochanjayana ndoñe šconduabuatma ca.

<sup>31</sup> Pero Pedro más yojtsichamo: —Masque chašotsemna ácaftaca jóbanama, atše ndoñe quichátayana ndoñe cbonduabuatma ca.

Y nyetscanga cachcá imojtsichamo.

*Getsemaní luarentše Jesús, Bēngbe Bētsáftaca tbojanencuentá (Mt 26.36-46; Lc 22.39-46)*

<sup>32</sup> Chentšana, canye luare Getsemaní ca uabáinoye tmojána. Chocna Jesús tojanéyana: “Muentše motbiama, chëntscuana atše choye chanjá, Bëngbe Bëtsáftaca jencuéntama ca.”

<sup>33</sup> Y tojëftsanëbiatše Pedro, Santiago y Juan. Choca cha yojóntša puerte ngménaca jtsemnama y corente cochtsetsenaná. <sup>34</sup> Chëngbioye tojanéyana: “Atsbe ainana puerte ngménaca entsemna, mo jobanamcá. Muentše moquedanga y šmochtsefšna ca.”

<sup>35</sup> Chentšana, Jesús más natsanoye tojána, tojanoshëntsamentšé y fshantsóntscoca tojanotsejbéna y Bëngbe Bëtsábioye tbojanimpadá, jopódianëse, chë tša japadésa ora ndoñe chaondóshjanguama. <sup>36</sup> Mëntšá yojtsichamo: “Atsbe Taitá, aca lempe jamama condobena; tojopodese, cochjama atše japadésama ndoñe chašondëtsemnama. Pero ntšamo atše stsebošcá ndoñe chaondëtsemna, sinó ntšamo aca cojtsebošcá ca.”

<sup>37</sup> Chentšana, chabe unga uatsjéndayëngbioye tojtanabo, y chëngna imnétsomañe. Chca tojánanýena ora, Pédrëbioye tbojaniyana: “Simón, ¿cotsomañe? ¿Ni mo nýe canye hora jtsefšnama ndoñe tconjobená? <sup>38</sup> Smochtsefšna y Bëngbe Bëtsáftaca šmochtsencuéntaye, bacna soye jamama ndoñe chacmondócochënguama. Tšëngaftanga ndegombre šmontseboše espíritoca Bëngbe Bëtsá joyeunayana, pero cuerpiñe ndoñe añemo quešmátsbomna ca.”

<sup>39</sup> Jesús cachiñe tojesaná y Bëngbe Bëtsáftaca tbojanencuentá, cach palabrenga jayanëse. <sup>40</sup> Yojtabo orna, chë uatsjéndayënga cachiñe imnétsomañe; chënga imojtsefshétana ocnaye causa, y ndoñe imontsobena ntšamo jojuana.

<sup>41</sup> Chentšana, tojtesaná y tojtanabo ora tojanéyana: “¿Cabá šmotsomañe y šmotsochnañe? Nýe nýetsá; hora tocjobuache, Bëngbe Bëtsá Entšá tbojanbemá bacna soye amëngbe cucuatšñe mochanjáboshjona. <sup>42</sup> Motsbananga, cuajna. Minýënga, atše boshjuaná ya entsebeconá ca.”

#### *Uayayënga Jesús tmojánishache*

*(Mt 26.47-56; Lc 22.47-53; Jn 18.2-11)*

<sup>43</sup> Jesús cabá yojtsóyebuambnantscuana, Judas, canye chë bnëtsana uta uatsjendayënguentsá, tojánashjango y cháftaca ba entsanga espadëjagaca y ngarotbéngaca prontánënga. Chënga imojamna chë bachnangbe amëndayënga, ley abuatambayënga y judiëngbeñe bëtsëjemëngcá mándayëngbe ichmónënga. <sup>44</sup> Judas, chë boshjuaná, tojanjuabó ntšamo jamana entsanga jinýanýiyama ndëmua Jesús bëtsemnana. Chíyeca, yojáuyana: “Nda chajiauámocho, cha echántsemna; šmochjishache y cuedádoca šmochjuánatse ca.” <sup>45</sup> Chcasna, Judas Jesúsbioye tojanobeconá y tbojaniyana: “¡Buatëmbayá ca!”

Y tbojanámocho. <sup>46</sup> Chora chë entsanga tmojánishache y tmojanánatse.

<sup>47</sup> Pero canya chentše Jesúseftaca yojtsemná, chabe espadëja yojenosëngbotëntšena, y chë bachnangbe más uámana amëndayabe oservená canye matscuaše tbojtsanëštjango.

<sup>48</sup> Y Jesús chë entsanga tojanatjá: “¿Ndáyeca šmojabo espadëjagaca y ngarotbéngaca atše jishachama, mo atše canye bacá uamana entšá cuaftsemncá ca? <sup>49</sup> Atše cada te tšëngaftangbeñe sëndëtsemna Bëngbe Bëtsabe bëts yebnoca abuatambaye, y ndocna te choca chešmátanishache. Pero tšëngaftanga chca átseftaca šmontsama, cachcá ntšamo Bëngbe Bëtsabe uabemana palabrenguiñe endayancá chaotsemnama ca” –tojánayana.

<sup>50</sup> Chorna, nýetsca uatsjéndayënga tmojtsanëuatjaná y tmojtsanacheta, y Jesús cachcá chë uayayëngaftaca tmojesanonýá. <sup>51</sup> Canye bobontse Jesúsbioye ibojtsëstona, nýe canye uafjantse entšëjua uichëtjoná. Cha chë entsanga tmojánishache, <sup>52</sup> pero chëngbe cucuatšñe chë entšëjua jesáboshjonëse, chë bobontsna enašá yojtsachá.

#### *Jesús tmojanánatse chë judiëngbe uámana amëndayëngbioye*

*(Mt 26.57-68; Lc 22.54-55, 63-71; Jn 18.12-14, 19-24)*

<sup>53</sup> Chentšana, Jesús tmojanánatse chë bachnangbe más uámana amëndayábioye; y chocna, nýetsca chë bachnangbe amëndayënga, bëtsëjemëngcá amëndayënga y ley



abuátambayënga tmojánenefjna. <sup>54</sup> Pedro bënocana Jesús tbojanasto, chë bachnangbe más uámana amëndayabe yebnentša chashjóntscoñe; y chentše tojanoquedá. Chë Bëngbe Bëtsabe bëts yebnoca josticiëngaftaca yojtsetbemana; iñe juachaca yojtsešbonena.

<sup>55</sup> Chë bachnangbe amëndayënga y chë judiëngbe uámana mándayënga imojtsenguaye canya, nda ndayánaca Jesusbe contra cháuyayana, as jobenayama cha chaóbana ca jayanama; pero ndoñe montsaninýana. <sup>56</sup> Er masque banga Jesusbe contra uayátsenaye soyënga imojtsichamo, nyëtscanga ndoñe cachca soye montsanichamo.

<sup>57</sup> Báseftanga imojtsaye y mëntsá Jesusbe contra, ndoñe ndegombre betsemncá tmojánayana: <sup>58</sup> “Bënga cha fsënjoyeuná mëntsá: ‘Atše quem Bëngbe Bëtsabe bëts yebna, entsangbe pormana yebna, chantsepochoça; y unga tese inye Bëngbe Bëtsabe bëts yebna, entsángbeyeca ndëpormana yebna chanjëtsejo ca.’ ”

<sup>59</sup> Pero masque chca imojtsichamo, nyëtscanga ndoñe cachca soye montsanichamo.

<sup>60</sup> Chorna, chë bachnangbe más uámana amëndayá yojotsbaná, nyëtscangbe tsëntsaca yojotsaye, y Jesúsbioye tbojantjá: —¿Ndocá cochanjayana? ¿Ndayase yojtsemna chë acbe contra montsichamo soye ca?

<sup>61</sup> Pero cha nye iyteca yojtsemna y ndocá ibontsëjuana. Chë bachnangbe más uámana amëndayá cachiñe tbojtëtantjá, mëntsá: —¿Aca chë Cristo icomna, Bëngbe Bëtsá chë nda fsëndadoranabe Uaquiñá ca?

<sup>62</sup> Y Jesús tbojanjá: —Arseñor, atše cha sëndmëna; y tsëngaftanga šmochanjinýe, atše, Bëngbe Bëtsá Entsá tbojanbemá, chë nyëts obenana bomnabe catsbioica chantsetbemana, y celoca jantsetëshiñe chántsaboje ca.

<sup>63</sup> Chora, chë bachnangbe más uámana amëndayá chabe uichëtjonëjuangá yojt-senántšajatanëca, puerte ibojtsetna causa, y tojánayana: —¿Ndayama más entsanga šochjátëjabeto Jesusbe contra chamuayanama ca? <sup>64</sup> Tsëngaftanga šmonjouena ntšamo chë entsá entsichamcá, y chca Bëngbe Bëtsabiama entsemna mo cha cuafjoyenguangcá, chë chabe Uaquiñá yomna ca cha tonjayana ora. ¿Ntšamo tsëngaftanga šmatjayana ca? —cha tojanëyana.

Y nyëtscanga tmojánayana, cha ndegombre bacna soye yojtsebomna y jóbanama ibojtsemna ca.

<sup>65</sup> Chorna báseftanga tmojanontsé Jesús buashëtjnayana; jubiá imojútsbotse, imojtsetantšaye y imojtsetjanaye: “¡Momalisiá nda tcmënjajantšetá ca!” Y chë Bëngbe Bëtsabe bëts yebnoca josticiëngna imojtsajuebantšaye.

*Pedro tojánayana Jesúsbioye ndoñe bonjanabuátma ca  
(Mt 26.69-75; Lc 22.56-62; Jn 18.15-18, 25-29)*

<sup>66</sup> Pédrëna, tsmanoca yojtsemna chashjoca. Chora, canye shembása, chë bachnangbe más uámana amëndayabe oservená yojáshjango; <sup>67</sup> y Pédrëbioye tbojáninýe ora, cha iñe juachaca yojtsanšbonena, yejuana ibojonýinýiye y tbojanianya: —Acnaca, Jesús Nazaretoçáftaca conjánana ca.

<sup>68</sup> Pero Pedro tojánayana chábioye ndoñe bonjanabuátma ca; y mëntsá tojánayana: —Ndayama cojtsichámuama ndoñe quetsátstatsëmbo, ni quešnátësertana ca.

Y shjoye, amashjuanóntscoñe yojábocna; y chora canye ngallo yojacánta. <sup>69</sup> Chë oservená cachiñe Pédrëbioye tbojáninýe y tojanontsé chë inýenga jauyanana: —Muánaca Jesusbe uatsjendayënguentsá entsemna ca.

<sup>70</sup> Pero chana cachiñe tojánayana Jesúsbioye ndoñe bonjanabuátma ca. Chentsana, chë chentše imojtsemnënga Pedro tmojátaniyana: —Ndegombre aca chënguentsá contsemna; ácnaca Galileocá contsemna ca.

<sup>71</sup> Pero Pedro tojanontsé ichámuana: —¡Bëngbe Bëtsá chašotsecastigá ndoñe ndegombre soye stsichámëse ca! —y yojóntša júrayana— ¡Atše chë entsá ndoñe quetsatabuatma, ndabiamana tsëngaftanga šmontsatsëtsná ca!

<sup>72</sup> Y cachora chë ngallo uta soyama yojacánta, y Pedro yojenójuaboye ntšamo Jesús tbojanianama: “Ngallo cabá uta soye ndécánta ora, aca unga soye cochanjayana ndoñe šconduabuatma ca.” Y tojanontsé enóbošachiyana.

## 15

### *Jesús Pilátbioye tmojanánatse*

(Mt 27.1-2, 11-14; Lc 23.1-5; Jn 18.28-38)

<sup>1</sup> Tojanbinýna ora, chë bachnangbe amëndayënga, chë judiëngbeñe bëtsëjemëngcá amëndayënga y ley abuatambayënga cánýentše tmojánenëfjna, nyetsca chë luarentša más uámana mandayëngaftaca, jenóyeunayama ntšamo jamëse Jesús jóbama. Jesús tmojanëcuébatsëca y tmojanánatse, y Pilato, chë Judeoca mandadbe cucuatšiñe tmojánboshjona.

<sup>2</sup> Pilato Jesúsbioye tbojantjá: —¿Aca chë judiëngbe rey cojtsemna ca?

Y Jesús tbojanjúá: —Aíñe, aca ndegombre yomncá tcjayana ca.

<sup>3</sup> Chë bachnangbe amëndayënga bëtscá soyënga Jesusbe contra imojtsichamo; <sup>4</sup> chíyeca Pilato cachiñe Jesúsbioye tbojantjá: —¿Ndocá šcochanjojuá ca? Minýe; bëtscá soyënga acbe contra montsichamo ca.

<sup>5</sup> Pero Jesús ndoñe más tbonjanjúá; chë causa, Pilato ndoñe yontsetátšëmbo ntšamo jajuaboyana.

### *Jesús chaóbana ca tmojánayana*

(Mt 27.15-31; Lc 23.13-25; Jn 18.38-19.16)

<sup>6</sup> Cada Bashco fiesta ora, Pilato yojanamana canýe utamená jëtsboshjonana, ndánaca entšanga tmojuabuayaná. <sup>7</sup> Chë tempo yojamna canýa Barrabás ca uabainá; cárceloye inautámena chabe enutëngaftaca. Chëngna entšanga tmojtsanëbaye, mandadëngbe entšángaftaca imojentsjaná ora. <sup>8</sup> Chora, entšanga tmojánashjajna y tmojanontsé Pilátbioye jauyanana, ntšamo Bashco fiesta ora jamama yojanamancá chaomama. <sup>9</sup> Y Pilato tojanéjua: —¿Tšëngaftanga šmojtseboše tšëngaftangbe rey atše chjëtsboshjona ca?

<sup>10</sup> Chca tojánayana, er Pilato yojtsetátšëmbo, chë bachnangbe amëndayëngna envidia causa Jesús chabe cucuatšiñe tmojánboshjonama. <sup>11</sup> Pero chë bachnangbe amëndayëngna entšanga tmojanañemó chamuenbouénanama, Pilato jauyanama chëngbiamama Barrabás chabuatsboshjona ca. <sup>12</sup> Y Pilato tojanatjá: —¿Y ntšamo chjama chë “judiëngbe Rey ca” šmonduabobuatmáftaca ca?

<sup>13</sup> Y chënga tmojanáye buachena: —¡Motsecrucificá ca!

<sup>14</sup> Y Pilato entšanga tojanéyana: —¿Ndáyeca? ¿Ntšamo cha tojobuachjanguá ca?

Pero chëngna más añémoca tmojtëtanayebuachena: —¡Motsecrucificá ca!

<sup>15</sup> As Pilato, entšángaftaca tšabá joquédama yojtsebóseyecna, Barrabás tbojtanboshjona. Yojámëndaye soldadënga jabuache Jesús chamotsetšenama; y chentšana soldadëngbe cucuatšiñe tbojánboshjona, chamocrucificama.

<sup>16</sup> Chentšana, chë soldadënga Jesús tmojanánatse chë mandadbe bëts yebnentša chashjoye, y nyetsca soldadënga tmojánachembo chamobéconama. <sup>17</sup> Shbuenda uafjatsenga uinýna entšayá mo reycá tmojanichëtjo; canýe coronësha tmojanapormá uchmašëfjangaca y tmojanabestšajó. <sup>18</sup> Y chentšana tmojanontsé jachuayana: “¡Bayté judiëngbe Rey cochtsemna ca!”

<sup>19</sup> Canýe niñëfjaca Jesús bestšašiñe imojtsëtsjanjnaye, imojtsebuashëtjnaye, y chabe delante imojtsofshëntsaméntšenaye. <sup>20</sup> Y chca imnaftsáboyeyuanentšana, chë shbuenda uafjatsenga entšayá tmojtsanabotsca y cachabe entšayá tmojtanichëtjo, y pueblo chaboye tmojanánatse jacrucificama.

### *Jesús tmojan crucificá*

(Mt 27.32-44; Lc 23.26-43; Jn 19.17-27)

<sup>21</sup> Chora, canye entsá chëjana yojsatashjajuana, Simón ca uabainá, Cirene pueblóca, Alejandro y Rufbe taitá; jajocana yojsatachnëjuana; y chë soldadëngna imojuatária Jesusbe cruz jëftsocutsayama.

<sup>22</sup> Jesús tmojanánatse Gólgota ca uabaina luaroye (hebreo biyañe endayana “Obanabe Bestsashe Luare ca”); <sup>23</sup> y tmojanabuiyé vínoye mírraca enájuabniye, pero Jesús ndoñe yonjuáyëngacñe. <sup>24</sup> Y chentšana tmojancrucificá; y chabe entsayangamna, tsbanánoye tmojanétsena jinýama ndayá cada ona yochjëftsanácñama.

<sup>25</sup> Cachëse, base mošenana ora Jesús tmojancrucificá. <sup>26</sup> Y chabe bestsaše juatsboicna canye uabemana soye tmojananjo. Chiñe yojetsayana ndáyeca cha tmojancrucificama, mëntsá: MUA CHË JUDIËNGBE REY ENDMËNA ca.

<sup>27</sup> Y cháftaca útata bacna soye ochjajnayátnaca tmojanacrucificá, canya chabe catsbioica, y ínýana chabe uañicuayoica. <sup>28</sup> Chca cháftaca tmojanma, chaochnënguama ntšamo Bëngbe Bëtsabe uabemana palabrenguiñe chabiamá iuayancá, mëntsá: “Y chábioye tmonjáninýe mo chë puerte bacna soye amënguentsá canya cuaftsemncá ca.”

<sup>29</sup> Y chëjana imojsachnëjuana entsanga, Jesús imojsóyenguaye, imojsobestsfshanenaye y imojsatsaye: “¡Aca chë Bëngbe Bëtsabe bëts yebna cochtsánenasatajchca y nýe unga tese cochtanjebo, <sup>30</sup> cach aca mentsbocá y cruzocana matastjango ca!”

<sup>31</sup> Cachcá chë bachnangbe amëndayënga y chë ley abuátambayënga imojsáboyejuana, y chënga imojsenatsësnaye: “Cha ínýenga tojëftsatsebacá, pero cachá jéntsbecama ndoñe quenátobena. <sup>32</sup> ¡Chë Cristo, chë Israeloca Rey! ¡Cruzocana chauatastjango, bënga jinýama y chábeñe chaftsošbuachema ca!”

Y cháftaca ibojtsecrucificanátnaca ibojsóyenguaye.

### *Jesús tojanóbana*

*(Mt 27.45-56; Lc 23.44-49; Jn 19.28-30)*

<sup>33</sup> Nýetsto orscana y las tresëntscoñe, nýets quem luare yojtseibétata. <sup>34</sup> Chca orna, Jesús chabe biyañe tojanáyebuachena: “Eloi, Eloi, ¿lema sabactani ca?” (Chca endayana “Atšbe Bëtsá, atšbe Bëtsá, ¿ndáyeca cachcá scojonýá ca?”)

<sup>35</sup> Chca tmojanuena ora, báseftanga chentše imojssemnënga imojsichamo: “Mouenënga, chë Bëngbe Bëtsabe juabna oyebuambnayá Elías bontsechembuana ca.”

<sup>36</sup> As chora, canya tojanótjajo, untja vínoyeca canye esponjëshe tojanfchecuacuá, canye niñëfjiñe tojananguësëtjo y Jesúsbioye tojanbeconá chaofšema; y tojánayana: “Cachcá mochjonýaye, er Elías tayochjabo jabátëstjanguama ca.”

<sup>37</sup> Pero Jesusna, jabuache tojanoyó y tojanóbana. <sup>38</sup> Y chë Bëngbe Bëtsabe bëts yebnocá yojújonýana entsëjua tsëntsaca yojsenájataye, tsbanánocana fshantsoye. Chëjua bënëjua inauamna y chë tsatsëntsaca inaujonýana. <sup>39</sup> Chë romano soldadëngbe amëndayá, Jesusbe ndirichiñe yojssemna; y ntšamo cha tojanobancá tbojáninýe ora, tojánayana: “¡Ndegombre quem boyabása Bëngbe Bëtsabe Uaquiñá yomna ca!”

<sup>40</sup> Básefta shembásengnaca chentše imojssemna, bënocana imojsreparana; chënguentsë imojssemna María Magdalena; María, Santiago chë más basa y Josebe mamá; y Salomé. <sup>41</sup> Chë shembásengna Jesús tmojanasto y tmojanájabuache cha Galileoca yojamna ora; y inýe ba shembásengnaca chentše imojssemna, chë cháftaca Jerusalenoye tmojánanga.

### *Jesús tmojanatbontsá*

*(Mt 27.57-61; Lc 23.50-56; Jn 19.38-42)*

<sup>42</sup> Chë yëfsana ochnayté yojsémnayeca, cach te yojánamna saná japróntana chë yëfsana jasama. Ya yojtseibétatana ora, <sup>43</sup> Pilato yojssemnoye tojána canye boyabása, José ca uabainá, Arimatea pueblóca; cha inamna canye chë luarentša uámana mandayënguentsá. Cha Bëngbe Bëtsábeñe yojssošbuáchiye y yojanobátmana chabe

amëndayana chaóshjanguama. Ndauatjá Pilátbioye Jesusbe cuerpo tbojanotjañe. <sup>44</sup> Pilato yojenjnaná Jesús tša betsko yojóbanama; as tojanmandá chë soldadëngbe amëndayá chamuachembo, jatjayama Jesús ya bën obaná tayojétsemnama. <sup>45</sup> Chë soldadëngbe amëndayana Pilátbioye ibojauyana Jesús ya obaná yojtsemna ca; y as chora, Josébioye tbojanlesenciá Jesusbe cuerpo chabotsámbañama. <sup>46</sup> Chora, José canye uafjantse lino entsějua tojanabuamé, Jesusbe cuerpo cruzocana tbojanéstjango, chë lino entsėjua tbojanandmaná, y canye cuevëshiñe ndëtšbeñe pormánëshiñe tbojan-jajó; chentšana canye ndëtšbé tojansjoná, y chë cuevëshoye amashjuanentše tojánachto. <sup>47</sup> María Magdalena y María, chë José y Santiagbe mamá, tbojáninye ndayentše Jesusbe cuerpo tbojanájoma.

## 16

### *Jesús tojtanayena*

*(Mt 28.1-10; Lc 24.1-12; Jn 20.1-10)*

<sup>1</sup> Ochnayté tojanopasá ora, María Magdalena, María Santiagbe mamá, y Salomé, botamana uanguëtše bėjaye tmojanabuamé, chíyeca jama Jesusbe cuerpo janëtjuama; <sup>2</sup> y tmenguse, chë semana bojatšéntena, cabá cachëse, shinye yojábocna ora, chë cuevëshoye tmojána. <sup>3</sup> Imojtsaye ora imojtsayénatsëtsnaye: “¿Chë cuevëshoye amashjuanentša ndëtšbé nda bochtsabuajuána ca?”

<sup>4</sup> Pero imojontješiyé ora, tmojáninye chë cuevëshoye amashjuanentša bëtš ndëtšbé, chentšana juanániñe. <sup>5</sup> As chënga choye tmojánamashjna y choye tmojáninye canye bobontse bën uafjantse entsějua uichëtjoná, chë cuevëshentša catsbioica inétsotbemañe; y chë shembásenga imojouatjaná. <sup>6</sup> Pero chë bobontse tojanëyana: “Ndoñe matauatjëngana; tšëngaftanga šmondënguá Jesús Nazaretocá, chë tmonjancrucificá cha. Cha ya tontayena; muentše ndoñe quenátsmëna. Minyënga cha enjëftsejajonentše. <sup>7</sup> Motsajna, y Pedro y chë inye uatsjëndayënga šmochjáuyana: ‘Jesús tšëngaftangbe natsana Galileoye echanjá. Choca cha šmochanjinye, ntšamo cachá tmojanëyancá ca.’ ”

<sup>8</sup> As chë shembásenga betsko chë cuevëshentšana tmojésanbocana, er puerte auatjanánënga imojtsemna y ngmëmnyënga imojtsemna; y chë causa, chë soyama ndocná tmonjanियana.

### *Jesús, María Magdalénbioye tbojánëbëbocna*

*(Jn 20.11-18)*

<sup>9</sup> Jesús tojtanayenentsana, chë semana bojatšénté, Jesús natsana María Magdalénbioye tbojánëbëbocna. Tempo Jesús chábentsana canyëšëfta bacna bayëjënga tojtanébuacana. <sup>10</sup> Cha Jesúsbioye ainá tbojáninýentsana, tojána Jesúseftaca imojánajnënga chama jaunayama; chëngna ngmënaca y sachénaca imojtsemna. <sup>11</sup> Pero chënga tmojanjuabó nderado mo ndoñe ndegombre yontsemna ca, chë Jesús ainá yojtsemna ca, y María Magdalena chábioye tbojáninye ca tmojanuena ora.

### *Uta ustonata Jesúsbioye tbojáninye*

*(Lc 24.13-35)*

<sup>12</sup> Chentšana, uta ustonátbioye, básefta yebnënga yojamna luaroye ibojétsaye ora, Jesús tojánëbëbuacna, mo inya cuaftsemncá. <sup>13</sup> Chora chata tbojésanshëcna chë inyënga chama jacúntama; pero chëngna cach ndoñe ndegombre ca tmojanjuabó.

*Jesús chë uatsjëndayënga tojanichamó, Bëngbe Bëtsabe soyëngama nyëtsquénache jábuayenama*

*(Mt 28.16-20; Lc 24.36-49; Jn 20.19-23)*

<sup>14</sup> Cabana, Jesús chë bnëtsana canye uatsjëndayënga tojánëbëbuacna, chënga imojtsesaye ora; y tojanëcácana chë cha ainá yojtsemnama ndoñe ndegombre yontsemna



ca tmojánjuaboma y nÿets ainánaca chábeñe ndoñe montsanošbuachema, er cha ainá tmojáninÿënga chama tmojanacuntá ora, chca ndoñe ndegombre yontsemna ca chë uatsjédayënga tmojánayana.

<sup>15</sup> Chentšana Jesús tojanéyana: “Nÿets luarëngoye motsajna, y nÿetsca entšanga chë tšabe noticiëngama šmochtsabuayiynaye. <sup>16</sup> Nda chiñe chaojtsošbuaché y tšëngaftanga chašmojuabaye, cha atsbocaná echántsemna; pero nda ndoñe tontsošbuaché, cha nÿets tempo castiganá echántsemna. <sup>17</sup> Chë átšbeñe ošbuáchiyënga ndegombre soyënga imojtsabuayiynama, entšanga mëntsá mochántsetatsëmbo: atše jótšëmbonëse, átšbeñe betsošbuachéyeca, entšángbentšana bacna bayëjëngbe juabna mochántábocna; tempo chënga ndmabiyañe mochantsóyebuambnaye. <sup>18</sup> Masque nderado cucuatšinë mëtšcuayënga tmojishache o veneno tmojofšënga, ndocá quemochatspása; y šoquëngbeñe cucuatšënga chamojacjá ora, chënga shnánënga mochántsmëna ca” —Jesús tojanéyana.

*Jesús Bëngbe Bëtsábioye tojtaná*

*(Lc 24.50-53)*

<sup>19</sup> Bëngbe Utabná Jesús jóyebuambayama tojanpochocá chentšana, celoye cha tmojtánatsbaná, y uámana luarentše, Bëngbe Bëtsabe catsbioica yojtótbema jtsemándayama. <sup>20</sup> Y chë uatsjédayëngna tmojánbocana y Bëngbe Bëtsabe soyëngama nÿetsquénache entšanga tmojanabuayená. Cach Bëngbe Utabná chënga yojanëjabuáchana, y yojánama entšanga chamotsetatsëmbuama chë buayenana soye ndegombre Bëngbe Bëtsabe soyënga bëtsemnama, chë uatsjédayënga bëtš soyënga jamama obenana chamotsebomnama cha jtsamëse.

## San Lucas

### *Jabojátšama*

<sup>1</sup> Ba entšanga Jesusbe historia tmojuábema, ntšamo bēngbeñe ndegombre tojopasacá. <sup>2</sup> Chē historia juabemamna, chēnga tmojanuena ntšamo Jesusbe uatsjédayēnga y inye entšanga chabiamna innencuentaycá. Chē entšangna tmojáninye y tmojanuena ndayá Jesús tojanmama y ntšamo tojanayancá, y chentšana chabe tšabe noticiēnga entšángbioye tmojanabuayená. <sup>3</sup> As, átšnaca sēnjontsé cuedádoca juanotíciana lempe ntšamo Jesusbiamna imojtsichamcá, tojanobojatšentšana mēntscoñe. Mora šontsinyana tšabá yojtsemna acbiamna juabemana ntšamo ndegombre yomncá, uámama taitá Teófilo, chē tjuanoticiá soyēngama, ntšamo ndegombre bēngbeñe tojopasacá. <sup>4</sup> Ba soyēnga Jesusbiamna tcmojabuátēmbanga, y atše sēntseboše aca chacotsetátšēmo, ntšamo tcojouencá ndegombre yomnama.

### *Canye ángel tojanabuayená Juan chē Ubayaná jónyñama*

<sup>5</sup> Herodes Judea luaroca rey inamna ora, yojamna canye judiēngbe bachna, Zacarías ca uabainá. Cha yojamna Abíasbe bachnanguentša pamillo. Chabe shemna, Isabel ca yojanabaina, y chana Aarónbentšana entšá inamna (Aarón, chē más uámama bachnangbe natsana amēndayá). <sup>6</sup> Chatna tšabá amata ibnamna Bēngbe Bētsabe bominyiñe, y ntšamo Bēngbe Bētsá yomandacá ibojoyena; y chca, ndocná yonjanobena jayanana chata ndoñe tšabá ibonjánama ca. <sup>7</sup> Bāsenga tondaye ibonjánabamna, Isabel šešona jtsebmomna ndobena causa, y chatna ya bētsanánata ibojtsemna.

<sup>8-9</sup> Chē bachnanga Bēngbe Bētsabe bēts yebnentše tmojtsoserverna ora, sempre imojtsemna jabocacayana, nda tšabá tbojtsonyená, Bēngbe Bētsábioye atschuanaye luaro ye cháuama incienso jajuinyiyama. Canye, Zacaríasbe entšanga Bēngbe Bētsabe bēts yebnoca, Bēngbe Bētsábentše imojttsoserverna orna, Zacaríasbioye tšabá ibojonyena; y chca, cha ibojotóca jana incienso jajuinyiyana. <sup>10</sup> Zacarías, incienso yojtsejuinyantscuana, ba entšanga shjoca imojtsemna, Bēngbe Bētsáftaca encuēntaye. <sup>11</sup> Nye ndeolpe, Bēngbe Utabnabe canye ángel tojanonyñá chē incienso jajuinyiyama altarentša catšbioica. <sup>12</sup> Zacarías chábioye tbojáninye ora, tojanenjaná y corente uatjana tbojanábuache.

<sup>13</sup> Chora chē ángel tbojaninyana: —Zacarías, ndoñe matauatjana. Bēngbe Bētsá tonjouena ntšamo tconjaimpadacá. Acbe shema Isabel canye šešona bochantsebmomna, boyabásetema, y chana Juan ca cochjuabaye. <sup>14</sup> Chama aca corente oyejuayá cochántsemna, y bētsá entšanga mochanjóyejuaye acbe uaqiñá tojonynama. <sup>15</sup> Er cha, Bēngbe Bētsabiamna canye uámama entšá echántsemna. Ndocna te queochaisofsiye vínoye, ni jabuáchiye. Chē Uámama Espiritu chabe ainaniñe echantsemándaye, cha cabá ndonyña orscana. <sup>16</sup> Banga Israeloca entšanga, ntšamo cha chaojayanama mochanjontsé joyeunayana Bēngbe Bētsá, chēngbe Utabná. <sup>17</sup> Cha echanjášhango chē Bēngbe Bētsabe Uámama Uabayana natsana, y echántsebmomna obenana y canye espíritu ntšamo chē Bēngbe Bētsabe juabna oyebuambnayá Elías inabomncá. Chabe natsana echanjášhango, bētsétsanga chēngbe básengaftaca ndoñe chamondétsentsjanama, y chē nduauenanēnga cachiñe chamotsat-sjuabnama ntšamo chē Bēngbe Bētsabe bominyiñe tšabá amēnga mondbetsejuabnaycá. Y chca, entšanga cha echantsapróntaye Bēngbe Utabná jabama orscama ca —chē ángel tbojaninyana.

<sup>18</sup> As Zacarías chē ángelbioye tbojantjá: —¿Ntšamo atše stjobenaye jtsetatšēmbuana chē šcontsatsá soye ndegombre bētsemnama? Er atše ya bētsējema sēntsemna y atšbe shémnaca cachcá ca.

<sup>19</sup> Chora chë ángel tbojanjuá: —Zacarías, atše ángel Gabriel sëndmëna; atše Bëngbe Bëtsábioca sëndoservena. Cha šonjichmó chë tšabe noticiënga aca jauyanama y jue-nayama. <sup>20</sup> Morna, chë cbontsatsá soyiñe ndoñe quecatošbuaché causa, ndëbiá cochano-joquéda, y ntšamo cbontsatsacá chaojopasá ora, chama tempo chaojtsemna ora, chora jóyebuambayama cochantobenaye ca.

<sup>21</sup> Chë ángel Zacaríaseftaca yojtsóyebuambnantscuana, entšanga shjoca Zacaríasbiana imojtsobátmana, y mëntšá imojtsejuabnaye: “¿Ndáyeca tša bën Bëngbe Bëtsabe bëts yebnentše ibojtsobiamná ca?” <sup>22</sup> Zacarías tojtanbocna ora, ndoñe yontsobena chë entšángaftaca jóyebuambayana. Chënga tmojántatšëmbona, chë Bëngbe Bëtsábioye atschuanayentše Zacarías mo otjenayoquécá Bëngbe Bëtsábiocana canye soye tojáninyama, er chëngbioye jatšëmbombonana yojáuyana, ndëbiá yojoquéda causa.

<sup>23</sup> Chabe tempo, chë Bëngbe Bëtsabe bëts yebnentše jtsetrabájayama tojanpochocá ora, Zacarías cachabe yebnoye tojtaná. <sup>24</sup> Chentšana baseftaytese, chabe shema Isabel ngomamaná yojoquéda, y chë causa, chë shema shachna ishinye cach tsoca yebnentše totanoquedá. <sup>25</sup> Cha mëntšá yojtsichamo: “Bëngbe Utabná mora atšbiana tojtenujabó, entšángbentše atšbe ngmënana jtsebojuánama, básenga tondaye béntsabamna causa ca.”

### *Canye ángel tojanabuayená Jesús jónyñama*

<sup>26</sup> Isabel chnënguana ishinye ngomamaná yojtsemna ora, Bëngbe Bëtsá, ángel Gabriel tbojanichmó Galilea luaroye, Nazaret ca uabaina puebloye, <sup>27</sup> canye shembása María ca uabainá jauatsëtsayama. Mariyna cabá boyabása nduabuatmá inamna, pero Joséftaca jobouamayama tbojanšbuachená. Y Josena, rey Davídbentšana entšá inamna. <sup>28</sup> Chë ángel Mariýbioye tojána y mëntšá tbojanчуá: —¡Mouena. Bëngbe Bëtsá tšabe bendición achiana tonjama! ¡Bëngbe Utabná ácaftaca entsemna ca!

<sup>29</sup> Chca tojanuena ora, María yojenjnaná chë soyama, y yojtsejuabnaye ndáyeca chë ángel chca tbojanчуama.

<sup>30</sup> Chora chë ángel tbojaniana: —María, ndoñe matauatjana, Bëngbe Bëtsá entsama tšabe bendicionënga chacotsebomnama. <sup>31</sup> Aca ngomamaná cochanojoquéda y canye šešona boyabásetema cochántsebomna, y chana Jesús ca cochjuabaye. <sup>32</sup> Cha puerta echantsámana, y entšangna Bëngbe Bëtsabe Uaquiñá ca chábioye mochantsábobuatma. Y Bëngbe Bëtsá chë Utabná, chábioye canye rey bochanjábema, ntšamo David yojamncá, <sup>33</sup> y Jacóbëbentšana entšanga nyetsca tescama echántsamëndaye, y chabe mándayana ndocna te queochaisopochóca ca —chë ángel tbojaniana.

<sup>34</sup> Chentšana María chë ángelbioye tbojantjá: —¿Ntšamo chca yochjopása, cabá ndoñe boyá sëntsebomñese ca?

<sup>35</sup> Y chë ángel tbojanjuá: —Chë Uámana Espíritu echanjabo nyets ácheñe, y Bëngbe Bëtsabe obenánaca ngomamaná cochanojoquéda. Chabe obenana mo jantšetëshcá cmochanjaboušbotse; chíyeca chë echanjónyña šešona Uamaná echántsemna, y chábioye Bëngbe Bëtsabe Uaquiñá ca mochantsábobuatma. <sup>36</sup> Mouena, Isabel, acbe primá, canye šešona bochantsebomna, masque ya bëtsananá cha entsemna; chë “šešona ndbomná ca” monjanabobuatmá, mora ya chnënguana ishinye ngomamaná entsemna, <sup>37</sup> er Bëngbe Bëtsá lempe jamama endobena ca —cha tojánayana.

<sup>38</sup> Chora María chë ángelbioye tbojaniana: —Bëngbe Bëtsabe oservená atše sëntsemna. Bëngbe Bëtsá átšeftaca chaoma ntšamo šcojauyancá ca.

Y chentšana chë ángel tojtsatanoñe.

### *María tojána Isabel jabuáchama*

<sup>39</sup> Chentšana, María tojanoprontá y tojanochëmo canye puebloye, Judeoca tjañenache luariñe. <sup>40</sup> Chocna cha, Zacaríasbe yebnentše tojánamashëngo y Isabélbioye tbojanчуá.

<sup>41</sup> Isabel ntšamo María tbojanchuama tojanuena ora, Isabelbe šešona chabe uafsbioye tojanobonjó, y chë Uámana Espíritu Isabélbeñe tojánamashëngo chabe ainaniñe jtsemándayama. <sup>42</sup> Chcasna, Isabel jabuache tojánayana: —¡Bëngbe Bëtsá acbiama más tšabe bendicionënga entsama nyetsca shembásengbiamia, y chë cochántsebmna šešonbiámna cachá! <sup>43</sup> Atše mercedo taitatobuajoñe, atšbe Utabnabe mamá chašubobuáchama; <sup>44</sup> er atše sënjouena ntšamo šconjachuá, y cachora atšbe šešona oyejuayá atšbe uafsbioye tonjobonjó. <sup>45</sup> ¡Aca Bëngbe Bëtsábeñe tcojošbuaché; cojtsetátšëmbo Bëngbe Bëtsá ntšamo tmojašbuachenacá yochjamama; chíyeca puerta oyejuayá cochántsemna ca!

<sup>46</sup> Chora María tojánayana:

“Nyets ainánaca Bëngbe Utabná chantsadorana,

<sup>47</sup> y Bëngbe Bëtsá, atšbe Atsbocayabiamia corente chanjóyejuaye.

<sup>48</sup> Bëngbe Bëtsá atšbiamia tojtenojuabó, atše chabe oservénëjema.

Er morscana muentša entsanga nyetscanga puerta oyejuayá ca šmochantsábobuatma.

<sup>49</sup> Bëngbe Bëtsá, chë nyets obenana bomná, chabe obenánaca bëts soyënga atšbiamia tonjama.

¡Bëngbe Bëtsá puerta Uamaná ca entsabaina!

<sup>50</sup> ¡Morsca entsanga y más chcoyënga, chábioye yeunanëngbiamia, cha sempre bochántsebmna!

<sup>51</sup> Cha, chabe obenánaca bëts soyënga tojama,

y chë nye cachënga bëtsëtsanga enobiamnayëngbe juabna tojtsepochohá;

<sup>52</sup> reyëngbioye chëngbe mándayentsana tojtsatsatše;

pero chë nye cachënga bëtsëtsanga ndenobiamnayëngbioye, uámanënga tojábiamia.

<sup>53</sup> Chë shëntseca imomnëngbioye, chamosama bëtsca cha tojatsatá,

pero chë bomnëngbioyna tondaye tonjatsatá.

<sup>54</sup> Cha tojanëjabuache chabe entsanga Israeloca, chabe oservénënga,

y ndoñe tbonjánëbnatjëmbe jtsalastemánana,

<sup>55</sup> nyetsca tescama chë Abraham y chábentsana entsángbioye,

ntšamo bëngbe bëts taitanga Bëngbe Bëtsá tojanašebuachenacá ca” —cha tojánayana.

<sup>56</sup> Mariyna unga ishinye Isabélaftaca tojanoquedá, y chentsana cachabe yebnoye tojtaná.

### *Juan chë Ubayaná tojanonýná*

<sup>57</sup> Isabel jtsešócanama tojanóntšabuache ora, canye šešona boyabásetema tojanonýná.

<sup>58</sup> Isabelbe juachañe oyenënga y chabe pamíllanga tmojántatšëmbona ntšamo Bëngbe Bëtsá chábioye ibojalastemama, y chama corente Isabélaftaca tmojanoyejuanga. <sup>59</sup> Chë šešona posuftayté yojtsebmna ora, tmojánashjango y chëtëmbioye chë más delicadentse base bobachtema tmojantëtše, ntšamo chë judiënga imojanamancá. Chënga imojétseboše chë šešónbioye Zacarías ca juabáyana, cach beftcá; <sup>60</sup> pero chabe mamá tojanëyana: —Ndoñe. Quem šešona echantsabaina Juan ca.

<sup>61</sup> As chënga Isabélbioye tmojanianya: —Acbe pamíllangbeñe ndocná chca que-natabaina ca.

<sup>62</sup> Chora chënga jatšëmbombonana Zacaríasbioye tmojantjá, ntšamo chë šešona chaotsabainama cha yojtseboše ca. <sup>63</sup> Zacaríasna jatšëmbombonana canye tablëbé tojanëyá y chiñe tojanábema: “Cha entsabaina Juan ca”. Y chë causa, nyetscanga ojnánanënga imojtsemna. <sup>64</sup> Y cachora Zacarías jóyebuyambayama yojtobenaye, y yojontšë Bëngbe Bëtsábioye jëtschuayana. <sup>65</sup> Chë juachañe oyenënga nyetscanga tmojanëuatjaná, y Judeoca nyetsca chë tjañenache luariñe entsanga chë soyëngama imojtsencuëntaye.

<sup>66</sup> Nyetscanga chë soyëngama tmojántatšëmbona ora, chëngnaca corente chama imojtsejuabnaye y mëntšá imojtsichamo: “¿Chë básetema, bëtsá ora nda yochtsemna ca?” Y ndegombre, Bëngbe Bëtsabe obenana cháftaca yojtsemna.



*Zacarías, Bëngbe Bëtsábioye jëtschuayama*

<sup>67</sup> Chë Uámana Espíritu tbojanmandá ora, Zacarías, chë basetembe taitá, Bëngbe Bëtsabe mándoca jtsóyebuambnayëse, mëntšá tojánayana:

<sup>68</sup> “¡Chë Utabná, chë Israeloca entšangbe Bëtsá matschuanga, er cha tonjabo chabe entšanga jabújabuachama y jabátsebacama!

<sup>69</sup> Cha bochanjíchmuá canye atsebacayá puerte obenana bomná, y cha echántsemna Bëngbe Bëtsabe oservená Davídbentšana entšá;

<sup>70</sup> ntšamo Bëngbe Bëtsá bayté entsemna, chë chabe juabna oyebuambnayëngbiajana, chë chábenga imomnëngbiajana bënga šojanašebuachenacá, mëntšá:

<sup>71</sup> Cha canya bochjanichmuá bëngbe uayayënga y nyetsca uaboyënjëngbiamá bënga jabátsebacama;

<sup>72</sup> bëngbe bëtsétsangbioye jálastemama, y jenójuaboyama y jamama chabe uámana trato,

<sup>73</sup> ntšamo Bëngbe Bëtsá, bëts taitá Abrahámbioye tbojanšbuachenacá.

<sup>74</sup> Cha tbojanšbuachená bëngbe uayayëngbiamá bënga jabátsebacama, chca, bënga ndauatjá Bëngbe Bëtsá jaserviama,

<sup>75</sup> y chabe entšangcá, nyetsca soyënguiñe tšabá amënga, Bëngbe Bëtsabe delante nyetsca te bëngbe vidënguiñe jëftsiyenama.

<sup>76-77</sup> Y aca, atšbe básatemna, Bëngbe Bëtsabe juabna oyebuambnayá ca cmochantsábobuatma,

entšangbioye Bëngbe Bëtsabe soyëngama cochtsabuayiynama,

Bëngbe Utabná cabá ndáshjango ora, bacna soyënga amana chamuajbanama;

as Bëngbe Bëtsá chëngbe bacna soyënga echanjáperdonaye, y Bëngbe Utabná jabama mochantsopróntaye.

<sup>78-79</sup> Bëngbe Bëtsá bënga puerte šualastemánayeca,

canya bëngbe juabnënga binynayá bochanjíchmuá,

bënga chë bacna soyënga causa mo ibetiñcá y obanëngbe luarentšcá vida bomnëngbioye jabátsebacama,

y jabuátambama ntšamo natjëmbana jtsiyenana ca” —cha tojánayana.

<sup>80</sup> Chë básetema yojontšé jobóchana y chabe espíritnaca puerte. Bayté, entšanga ndoyena luarënguenache cha yojëftsiyena, Bëngbe Bëtsá Israeloca entšangbioye cha tojáninyanjentscuana. Chentšana, chamuábuatmanamna tojanontšé Israeloca entšangbeñe jóyebuambayana.

**2***Jesucristo tojanonyná*

*(Mt 1.18-25)*

<sup>1</sup> Chë tempo yojamna canye Romoca bëts mandado, Augusto ca uabainá; y cha, chë natsanama tojanmandá nyetsca entšanga chamuenábemama. <sup>2</sup> Chë soye tojanochnëngo Cirenio ca uabainá Siroca mandado yojamna ora. <sup>3</sup> Chamna, nyetscanga tojanotocá jtan-gana jenábemëngama, cada ona ndémoca chëngbe bëts taitanga imojëftsiyena puebloye.

<sup>4</sup> As, Josénaca Galilea luarentšana Nazaretocana yojëftsebecna y Judeoye, Belén puebloye, tojtaná. Tempo, Josebe bëts taitá rey David, Belenoca inoyena. Y José, Davídbentšana entšá inámnayecna, choye jenábemama tojtaná. <sup>5</sup> Maríaftaca tojána jenábemama, y muana tbojanšbuachená Joséftaca jobouamayama. María ngomamaná yojtsemna, <sup>6</sup> y Belenoca ibojtsemnëntscuana, chë ora tbojanóntšabuache jtsešócanama.

<sup>7</sup> Y chentše María ibojtsebozna chabe natsana šešona, canye boyabásetema. Posadoca tondaye luare yontsemna causna, chata nye uacnëngbe átana tambuentše tbojanoquedá. Y Jesús tojanonyná orna, María tbojtanëntsacjúá y canye bachetémiñe tbojanajjó.

### *Chë angelotémënga y chë oveshënga abujänýanga*

<sup>8</sup> Belén béconana, chë ibeta, oveshënga abujänýanga shëntsjoca cachëngbe oveshëngaftaca imojtsemna. <sup>9</sup> Nýe ndeolpe, Bëngbe Bëtsábiocana canýe ángel tojánébëbuacna, y Bëngbe Bëtsábentsana corente yojtsebuashinýinýana chëngbe shëconániñe. Chama chënga puerte imojocochauatjaná.

<sup>10</sup> Chora chë ángel tojanéyana: “Ndoñe matauatjëngana. Sënjabo tšabe soyënga tonjopasama jábuayenama, nýetscanga chamóyejuama. <sup>11</sup> Mora chë David tonjanonýná pueblentše canýe šešona tonjonýná. Cha tšëngaftangbe atsebacayá echántsemna y tšëngaftangbe entšangbiámnaca. Cha endmëna chë Bëngbe Bëtsabe Uámana Uabuayaná, Cristo ca uabainá, y Bëngbe Utabná. <sup>12</sup> Ndegombre chca entsemnama mëntšá šmochanjátatsëmbona: canýe šešona ntsacjuaná y uacnëngbe bachetémiñe jajoná šmochanjínýena ca” –cha tojanéyana.

<sup>13</sup> Cachora, celocana mallajta angelënga chë natsana ángelbentše tmojánbocana y Bëngbe Bëtsábioye mëntšá imojtsatschuanaye:

<sup>14</sup> “¡Bëngbe Bëtsá, celoca entsemná matschuanga!

Bëngbe Bëtsábioye yeunanëngbiama, Bëngbe Bëtsá corente entsoyejuá; quem luariñe chëngbeñe puerte tšabá chaotsemna ca.”

<sup>15</sup> Chentšana chë angelënga celoye tmojésanshëcuana. Y chora chë oveshënga abujänýanga tmojanontšé jeniyanana: “Belenoye cuajna, chë quem tojopasá soye jinýama. Ndegombre, Bëngbe Bëtsá chë soye šojanýanýé ca.”

<sup>16</sup> As betscó tmojána y tmojánanýena María, José y chë šešonatema bachetémiñe jajoná. <sup>17</sup> Chë šešona tmojáninýe ora, chënga tmojanacuntá Jesusbe bëtsëtsata y chë ínýengbioye, ntšamo chë šešonbiama chë ángel tojanéyancá. <sup>18</sup> Nýetscanga chë tmojanuenënga tmojanenjananá ndayá chë oveshënga abujänýanga imojtsacúntama. <sup>19</sup> Pero Mariyna nýe cachabe ainanoca quem soyëngama más bën inétsenojuabnañe.

<sup>20</sup> Chentšana, chë oveshënga abujänýanga tmojtaná Bëngbe Bëtsá atschuanaye, ndayá tmojáninýama y tmojanuenama. Nýetšá tojanopasá lempe ntšamo chë ángel tojanéyancá.

### *Bëngbe Bëtsabe bëts yebnoye Jesús tmojanamba*

<sup>21</sup> Posufta te tojánashjache ora, chë basetémbioye chë más delicadentše base bobachtema tmojantëtše, Bëngbe Bëtsabe entšá bëtsemnama chaotsinýnama, ntšamo judiënga imojanamancá; y Jesús ca tmojanabaye, ntšamo chë ángel tbojanianyancá, María cabá ndoñe ngomamaná yontsemna ora.

<sup>22</sup> Y chë tempo tojanóshjango, ndaye ora José y María yojtsamna jamana ntšamo Moisesbe leyíñe iuayancá, ndayá jamama yojanmëncá, canýe shembása Bëngbe Bëtsabe delante tšabia jtsatsmënama, canýe šešona tbojtsebomnentšana. Asna, Jerusalemoye tbojánata y chë básetema tmojanamba, Bëngbe Bëtsabe bëts yebnoca jinýinýiyama, <sup>23</sup> ntšamo chë Bëngbe Utabná Moisésbioye tbojaniyé leyënguiñe iuayancá, mëntšá: “Canýe yebnentše chë natsana šešona boyabása tojtsemnëšna, Bëngbe Bëtsábioye cha jinýinýiyana chábioye chabotseservénama ca.” Chcasna, chë básetema Bëngbe Bëtsabe bëts yebnoye tmojanamba. <sup>24</sup> Y tmojanamba janshana uta shloftše, Bëngbe Bëtsá jëtschuayama, ntšamo Bëngbe Utabnabe leyíñe yomandancá. Chiñe mëntšá endayana: “Chë natsana šešona chaojonýná ora, boyabássetema tojtsemnëše, janshana šmochjuamba uta fchetnatémata o uta šešona palomatémata, Bëngbe Bëtsá jëtschuayama ca.”

<sup>25</sup> Jerusalemoca inamna canýe bacó, Simeón ca uabainá; cha inamna nýetsca soyënguiñe tšabá amá, y yojaniyena ntšamo Bëngbe Bëtsá yomandacá. Cha yojanobátmana chë tempo ndaye ora, Bëngbe Bëtsá bochjanichmuá canýa Israeloca entšanga cháuatsebacama. Y chë Uámana Espíritu chabe ainaniñe yojtsemna; <sup>26</sup> chíyeca, cabá lempe chca ndopása ora, cha yojtsetátšëmbo cha ndoñe yochjanóbanama, chë Bëngbe Bëtsabe Uámana Uabuayaná ntjëftsinyá. <sup>27</sup> Chë Uámana Espíritu tbojanmandáyeca,

Simeón Bëngbe Bëtsabe bëts yebnoye tojána; y Jesusbe bëtsëtsata chë básetema tmojanamba ora, ntšamo Moisesbe leyinë iuayancá chabiamama jamama ora, <sup>28</sup> Simeón tbojanocutsá y Bëngbe Bëtsábioye tbojtanchuá. Cha mëntsá tojánayana:

<sup>29</sup> “Bëngbe Utabná, mora šmolesenciá, atše acbe oservená natjëmbana jóbanana, er ya tconjama ntšamo šconjanšbuachenacá;

<sup>30</sup> atše chë entsangbe Atsebacayá sënjinýe.

<sup>31</sup> Aca cha tcojichmó nyets luarenache entsangbiama.

<sup>32</sup> Cha chë ndoñe judiëngbe juabnënga binýnaya échántsemna;

y chábeyeca, nyets quem luarentse mochanjátatsëmbona, chë acbe entsangbiama, Israeloquëngbiama ca” —cha tojánayana.

<sup>33</sup> José y María ibojenjanata ntšamo Simeón Jesusbiama yojtšichámuama.

<sup>34-35</sup> Chentšana, Simeón Bëngbe Bëtsábioye tbojanimpadá tšabe bendicionënga chata chabotsebomnama chaomama; y María, chë Jesusbe mamábioye tbojanianana: “Quem soyënga corente cmochanjacochtsetšenaná, mo ainana espadéjaca cuafjenëchnëngcá. Cha Israeloca banga echanjápochocaye y banga echanjátsebacaye; y chca, ntšamo banga ainaniñe imojuabnacá echantsótatsëmbo. Israeloca banga quem básetema mochantsábotena y chabe palabrëngnaca ca” —cha tbojanianana.

<sup>36</sup> Chëntsñaca yojtsemna canýe shembása Bëngbe Bëtsabe juabna oyebuambnayá, Ana ca uabainá; cha yojamna Fanuelbe bembe y Aserbe pamillentšá; ya bëtsananá cha inamna. Nýe canýsëfta uata cha yojëftsebouamna; <sup>37</sup> y chabe boyá tojanóbanentšana, cha posufta bnëtsana y canta uata viudá inamna. Ndocna te Bëngbe Bëtsabe bëts yebnentsana yonjábocana, y chentse tojanoquedá bnëté y ibeta, Bëngbe Bëtsáftaca encuëntaye y cha atschuanaye; y chama, ba soye yojanamana tondaye ntjascá jtsemnana. <sup>38</sup> Simeón, María y Josébioye yojtšëtsësnaye ora, Ana chëngbioye yojobeconá, y chë Atsebacayá tojanonýnama Bëngbe Bëtsábioye tbojtanchuá chentšana, Jerusalemoca entsángbioye, chë canýe atsebacayá Israeloca entsangbiama imojanobatmanëngbioye tojanéyana, chana Jesús yojëtsemna ca.

### *Jesús Nazaret puebloca*

<sup>39</sup> José y María lempe ntšamo chë Utabnabe leyënguiñe iuayancá tbojanama ora, Galilea luaroye tbojtanata, cachëngbe puebloye, Nazaretoye. <sup>40</sup> Y chë básetema yojtšobóchaye, y más añemo yojtsejacana y más osertánana yojtsebomna. Y Bëngbe Bëtsá yojánama cha bëtsá tšabe bendicionënga chaotsebomnama.

### *Jesús Bëngbe Bëtsabe bëts yebnoca*

<sup>41</sup> Chabe bëtsëtsata ibojanamana cada uata Jerusalemoye jana Bashco fiestama, chë Bëngbe Bëtsá chë judiëngbe bëts taitángbioye Egiptocana tojánatsebacama jtenójuaboyama fiesta. <sup>42</sup> Jesús bnëtsana uta uata tojánashjache ora, Jerusalemoye tmojána, ntšamo imojanamancá. <sup>43</sup> Chë fiesta tojanopochocá chentšana, chabe bëtsëtsata yebnoye ibojtsataye, y chata ntsetatsëmbcá, Jesusna Jerusalemoca yojtsoquedañe. <sup>44</sup> Chata ibojëtsejuabnaye Jesús chë inýe entsángaftaca yojtšataboye ca; chcasna, canýe te nyetsá benachëjana tbojánata ora, tbojanontsé chabe pamíllangbeñe y ubuatmëngbeñe jtsenguanguana, <sup>45</sup> pero ndoñe ibonjobenaye jtsinýenana. As, chata chora Jerusalemoye tbojésanshëcona choca cha jetsenguanguama.

<sup>46</sup> Unga tianoye chata tbojanobená Bëngbe Bëtsabe bëts yebnentse cha jetsinýenana. Chana chë Moisesbe ley abuatambayëngbe tsëntsaca inétsotbemañe, chëngbioye inayau-nana, inatjanaye. <sup>47</sup> Nyetsca ouenanënga imojtsenjanaye Jesús tša osertaná inamnana, y tša tšabá jojuama cha yojtšobenama. <sup>48</sup> Chabe bëtsëtsata chca tbojáninýe ora, chátnaca ibojenjaná. Chora, chabe mamá tbojanianana: —Uaquiná, ¿ndáyeca chca bëndátaftaca tcojama? Taitá y atše corente enócochinýenata cbondënguá ca.

<sup>49</sup> As Jesús tojanéyana: —¿Ndáyeca atše šmonguá? ¿Ndoñe šondétatšëmbo atše šomna atšbe Taitabe yebnentše jtsemnana ca?

<sup>50</sup> Pero chë bëtsétsata ndoñe tonjanésertá ntšamo cha tojanéyancá.

<sup>51</sup> Chentšana Jesús chë bëtsétsataftaca Nazaretoye tojtaná y chata yojtsayaunana. Y chabe mamana nÿe cachabe ainanoca chë soyëngama más bën inétsenojuabnañe. <sup>52</sup> Jesús yojtsobóchaye y más juabna yojtsebomna; y Bëngbe Bëtsá y nÿetsca entšanga corente oyejuayënga chabiamá imojtsemna.

### 3

#### *Juan chë Ubayaná entšanga yojanabuayiná (Mt 3.1-12; Mc 1.1-8; Jn 1.19-28)*

<sup>1</sup> Bnëtsana shachna uatama Tiberio César Romoca bëts mandado yojamna ora, Poncio Pilato yojamna Judeoca mandado, Heródesna Galileoca rey, chabe catšata Felipe Iturea y Traconitoca rey, y Lisániasna Abilinioca rey. <sup>2</sup> Anás y Caifás chë bachnangbe más uámana amëndayata ibojamna. Cach tempo, canÿe luare entšanga ndoyenentše Bëngbe Bëtsá tbojanatsétsá Juánbioye; Juan, Zacaríasbe uaquiñá. <sup>3</sup> As Juan nÿetsca luarënguëjana Jordán béjaye béconana tojánachnëngo, entšanga mëntšá utsëtsnaye: “Tšëngaftangbe bacna soyëngama ngmënaca šmochtenójuaboje, chca amana šmochtsajbaná y Bëngbe Bëtsabe benache šmochtishache. Chora cbochjúbaye, y Bëngbe Bëtsá tšëngaftangbe bacna soyëngama cmochanjáperdonaye ca.” <sup>4</sup> Chë soye tojanopasá, cachcá ntšamo chë Bëngbe Bëtsabe juabna oyebuambnayá Isaías chabe librëšañe yojëtsabemcá. Cha mëntšá tojanábema: Entšanga ndoyena luaroca canÿa enduáyebuache:

“Bëngbe Utabná echanjabo ca; mo nda canÿe benache tojtseprontacá canÿe uámana entšá jashjanguama, cachcá, tšëngaftángnaca, Bëngbe Utabná jabama ainanentše tšabe juabnëngaca šmochtseprontana.

<sup>5</sup> Nÿetsca jachañe echantojútjia, y tjañe y batsjabenga mochantenájachibiaye. Chë scundma benachënga ndirichëjënga echántsatsmëna, y chë bacá mana benachënga mochantenájachibiaye.

Mo chë chca tmojtsamëngcá, canÿe benache japróntana canÿe rey cháuashjanguama, tšëngaftángnaca bëtscá šmochtseprontana tšëngaftangbe ainaniñe, Bëngbe Utabná jabama.

<sup>6</sup> Y nÿetsca entšanga mochanjinÿe chë Atsebacayá Bëngbe Bëtsábentšana jabana ca” —cha tojanábema.

<sup>7</sup> Chë entšanga Juan chaubáyama imojánbocana ora, Juan yojanëtsëtsnaye: “¡Mëtscuaye entšanga! ¿Nda tcmënjáuyana chë echanjóshjango uabouana castigüentšana šmochjotsbocá ca? <sup>8</sup> Bëngbe Bëtsábeñe ndegombre ošbuáchiyënga šmochtsemna, as chca chaotsinÿna, tšëngaftanga chë bacna soyënga amana ndegombre šmojtsajbanama. Y ndoñe šmattsejuabnaye cach tšëngaftangbiamá jayanama: ‘Bëngna Abrahábentšana entšanga, Bëngbe Bëtsabe entšanga fsëndmëna ca’. Er atše chanjayana, Bëngbe Bëtsá quem ndëtšbéngacnaca Abrahábentšana entšanga nanjábiamá. <sup>9</sup> Tatšniá ya entsaprontana chë betiyeshënga tbëtëjëngocana jtseshatëtsetšama. Ndaye betiye ndoñe tonjashájona, jtseshatëtšana y iñoje jtsatmetšana; tšëngaftangfaftácnaca cachcá, tšabe soyënga ndoñe šmontsamëse, Bëngbe Bëtsá cmochanjácastigaye ca” —cha yojanëtsëtsnaye.

<sup>10</sup> —¿Y as, ndayá jamama šojtsamna ca? —chora chë entšanga tmojantjá.

<sup>11</sup> Y Juan tojanéjua: —Chë uta quëfsaíya uabomná bontsemna canÿiyá jutštayana chë tondaye tonduabomná. Saná bomná bontsemna juajatayana chë tondaye saná tondbomnábioye ca.

<sup>12</sup> Romocama entšángbioye impuesto atjanayëngnaca jenábayama tmojánabo. Chënga Juánbioye tmojantjá: —Buatëmbayá, ¿ndayá jamama šojtsamna ca?



<sup>13</sup> Y Juan tojanéyana: —Nýe ntšamo chë leyiñe yomandancá entšángbioye crocénana šmochtsayëngacaye ca.

<sup>14</sup> Básefta soldadëngnaca chábioye tmojantjá: —¿Ndayá jamama šojtsamna ca?

Y Juan tojanéyana: —Ndocnábioye tondaye šmatjáboca, ni jauátjanase, ni nýe ndayámnaca bonamente jobuáchëse; y nýe ntsachetšá šmacaná crocenánaca oyejuayënga šmochtsomñe ca.

<sup>15</sup> Entšanga chë Bëngbe Bëtsabe Uámana Uabuayanabiamama imojtsobátmana, y chëngna Juanbiamama imojétsejuabnaye nderado cha chë Bëngbe Bëtsabe Uámana Uabuayaná nanjamna ca; <sup>16</sup> pero Juan tojanéyana: “Ndegombre, atše béjayeca cbondubáyana. Pero chë echanjabá atšbiamama corente más obenana endbomna, y atše merecido taitatobuajoñe ni mo jotsejbiyana chabe shecochëtjonëshentša corriëja jajafjonama. Chë Bëngbe Bëtsabe benache chamojtishachëngbiamama, Bëngbe Bëtsá echanjama chë echanjabábeyeca, chë Uámana Espíritu chëngbe ainaniñe cháumashënguama. Pero chë ndoñe chamontishachëngbiamna, Bëngbe Bëtsá echanjama chë echanjabábeyeca, chëngna corente castigánënga chamotsemnana, mo iñeshequécá. <sup>17</sup> Canýe entšá chabe mëtštá cucuatšinë jiyëbana, chabe trigo jtsóbobemama, y chë ndoservena shácuanënga jtsejashtsëtsana. Chabe trigo chë grano uaquëcjnaye tsañe jtsabuájua, y chë ndoservena shácuanëngna iñeshoye jtsatmetšana. Cachcá, chë átšbentšana echanjabá, chë tšabe entšanga echanjúbuaja, y chë bacna entšangna iñeshiñe echantsacastígaye, y chë iñe ndocna te queochátsfsana ca” —cha tojanéyana.

<sup>18</sup> Chca y inýe palabréngaca Juan chë tšabe noticiëngama yojanabuayiyná. <sup>19</sup> Tempo, Juan Heródesbioye tbojanácacana, cha tojanobouamama cachabe catsata Felipe shémaftaca, Felipe cabá oyena ora; chana Herodías ca uabainá. Chama Juan tbojanácacana y nýetsca bacna soyënga Herodes tojanmámnaca. <sup>20</sup> Pero Herodes Juánbioye joyeunaye luariñna, cabá inýe más bëts bacna soye tojátanma: Juánbioye cárceloye tbojtsanëtame.

### *Juan, Jesúsbioye tbojanabaye*

*(Mt 3.13-17; Mc 1.9-11)*

<sup>21</sup> Pero Herodes Juánbioye cabá ndutame ora, Juan ba entšanga tojanëbaye, y Jesúsna tojánabo jenábayama. Ibojtsabayantšcuana, Jesús Bëngbe Bëtsáftaca ibojtsencuëntaye; y chora celoca yojotëfjo, <sup>22</sup> y chë Uámana Espíritu mo canýe palomatemcá Jesúsbioye yojtsastajuana; y celocana Bëngbe Bëtsá tbojaniyana: “Acna atšbe bonshana Uaquiñá condmëna. Acbiamama corente sëntsoyejuá ca.”

### *Jesúsbe bëts taitanga*

*(Mt 1.1-17)*

<sup>23-38</sup> Jesús unga bnëtsana uata yojtsebomna, entšángbeñe Bëngbe Bëtsabe soyëngama jóyebuambayama yojontsé ora. Entšanga imojanjuabná Jesús Josebe uaquiñá yojamna ca.

José yojamna Elibe uaquiñá.

Elí Matatbe uaquiñá

y Matatna Levibe uaquiñá.

Leví yojamna Melquiibe uaquiñá,

Melqui Janabe uaquiñá

y Jana Josebe uaquiñá.

José yojamna Matatíasbe uaquiñá,

Matatíasna Amosbe uaquiñá.

Amós Nahumbe uaquiñá,

Nahúm Eslibe uaquiñá

y Esli yojamna Nagaiibe uaquiñá.

Nagai yojamna Maatbe uaquiñá,

Maatna Matatíasbe uaquiñá.  
Matatías Semeibe uaquiñá,  
Semei Josecbe uaquiñá  
y Josec yojamna Judabe uaquiñá.  
Judá yojamna Joananbe uaquiñá  
y Joanán Resabe uaquiñá.  
Resa Zorobabelbe uaquiñá,  
Zorobabel Salatielbe uaquiñá,  
y Salatielna Neribe uaquiñá yojamna.  
Neri yojamna Melquibe uaquiñá,  
Melqui Adibe uaquiñá.  
Adi Cosambe uaquiñá,  
Cosam Elmadambe uaquiñá,  
y Elmadamna yojamna Erbe uaquiñá.  
Er yojamna Jesusbe uaquiñá  
y Jesús Eliezerbe uaquiñá.  
Eliezer Jorimbe uaquiñá  
y Jorimna Matatbe uaquiñá.  
Matat yojamna Levibe uaquiñá,  
Leví Simeonbe uaquiñá  
y Simeón Judabe uaquiñá.  
Judá Josebe uaquiñá,  
José Jonambe uaquiñá,  
y Jonamna yojamna Eliaquimbe uaquiñá.  
Eliaquim yojamna Meleabe uaquiñá,  
Melea Menabe uaquiñá.  
Mena Matatbe uaquiñá,  
y Matata yojamna Natanbe uaquiñá.  
Natán yojamna Davidbe uaquiñá,  
David Isaíbe uaquiñá  
y Isaína Obedbe uaquiñá.  
Obed Boozbe uaquiñá,  
Booz Salabe uaquiñá  
y Sala yojamna Naasonbe uaquiñá.  
Naasón yojamna Aminadabëbe uaquiñá,  
Aminadab Adminbe uaquiñá  
y Admin Arnibe uaquiñá.  
Arni Esrombe uaquiñá,  
Esrom Fáresbe uaquiñá  
y Fáresna yojamna Judabe uaquiñá.  
Judá yojamna Jacobëbe uaquiñá,  
Jacob Isaacbe uaquiñá  
y Isaacna Abrahambe uaquiñá.  
Abraham Tarebe uaquiñá  
y Taré yojamna Nacorbe uaquiñá.  
Nacor yojamna Serugbe uaquiñá,  
Serug Ragaube uaquiñá  
y Ragauna Pelegbe uaquiñá.  
Peleg Heberbe uaquiñá,  
y Heber yojamna Salabe uaquiñá.

Sala yojamna Cainanbe uaquiñá,  
 Cainán Arfaxadbe uaquiñá  
 y Arfaxadna Sembe uaquiñá.  
 Sem Noebe uaquiñá  
 y Noé yojamna Lamecbe uaquiñá.  
 Lamec yojamna Matusalenbe uaquiñá,  
 Matusalén Enocbe uaquiñá  
 y Enocna Jaredbe uaquiñá.  
 Jared Mahalaleelbe uaquiñá,  
 y Mahalaleelna yojamna Cainanbe uaquiñá.  
 Cainán yojamna Enosbe uaquiñá,  
 Enós Setbe uaquiñá,  
 Set Adanbe uaquiñá  
 y Adán Bëngbe Bëtsabe uaquiñá.

## 4

### *Jesús tojanobená Satanás jayëñjanama* (Mt 4.1-11; Mc 1.12-13)

<sup>1</sup> Juan, Jesúsbioye tbojanabáyentsana, chë Uámana Espíritu Jesusbe ainaniñe yojtsemándaye. Jesús Jordán bejayoicana tojtaná y chë Uámana Espíritna entšanga ndoyena luaroye tbojanánatse. <sup>2</sup> Chentše canta bnëtsana te tbojanjëtana, y Satanasma yojanabó Jesús jisháchichiyama. Chë canta bnëtsana tentscuana Jesús tondaye tonjanse, y cabana ibojeshëntsena.

<sup>3</sup> Chora Satanás tojésanabo y tbojanियana: —Aca ndegombre Bëngbe Bëtsabe Uaquiñá tcomnëse, momandá quem ndëtsbenga tandëse chaobiama ca.

<sup>4</sup> As Jesús tbojanjuá: —Bëngbe Bëtsabe uabemana palabrenguiñe mëntsá endayana: “Entsá nÿe tandëseca ndoñe vida ntsebomnana ca.”

<sup>5</sup> Chentšana, Satanás canÿe bëts tjoye tbojanánatse y betscó nÿetsca quem luarentša amëndayëngbenache tbojaninÿinÿé. <sup>6</sup> Chora Satanás tbojanियana: —Atše nÿets obenana cbochjätsetaye y lempe quem amëndayëngbenache yobinÿna soyëngnaca. Atše lempe chca sënjóyëngacñe y sëntsobena jatsetayama nda stsebošábioye. <sup>7</sup> Aca chacojoshëntsamentsé y chašcojadorase, lempe nÿetsá acbiama echántsemna ca.

<sup>8</sup> Chora Jesús tbojanjuá: —Bëngbe Bëtsabe uabemana palabrenguiñe mëntsá endayana: “Acbe Bëtsá, chë Utabná cochtsadorana y nÿe cha cochtseservenca ca.”

<sup>9</sup> Chentšana, Satanás Jerusalenoye tbojanánatse y Bëngbe Bëtsabe bëts yebnentše chë más tsbanánoca tbojanatsá, y tbojanियana: —Aca ndegombre Bëngbe Bëtsabe Uaquiñá tcomnëse, muentšana fshantsoye montsënja, <sup>10</sup> er Bëngbe Bëtsabe uabemana palabrenguiñe endayana:

Bëngbe Bëtsá chabe angelënga echanjichamuá, chacmotsinÿenama.

<sup>11</sup> Chënga buacuatšëngaca cmochanjishache, shecuatše ndocá ndëtsbeñe chacondomama ca —cha tbojanियana.

<sup>12</sup> Chora Jesús tbojanjuá: —Bëngbe Bëtsabe uabemana palabrenguiñe mëntsá endayana: “Ndoñe matsbošana acbe Bëtsá chë Utabná bacna soyëngama jacochënguama ca.”

<sup>13</sup> Cabana, Satanás tojanajbaná bošana Jesúsbioye bacna soyëngama jacochënguama, y bënama Jesús bentsana tojtsanojuánañe.

### *Jesús tojanontsé Galileoca chabe trabajo jamana* (Mt 4.12-17; Mc 1.14-15)

<sup>14</sup> Chentsana, Jesús Galileoye tojesaná chë Uámana Espíritbe obenánaca, y nyetsca entsanga chë luariñe chabiamá imojtsencuéntaye. <sup>15</sup> Jesús yojtsabuátambaye chë judiëngbe enefjuana yebnënguenache, y nyetscanga cha imojtsatschuanaye.

*Jesús Nazaret puebloca*  
(Mt 13.53-58; Mc 6.1-6)

<sup>16</sup> Chentsana Jesús Nazaretoye tojtashjango, chë pueblentse cha tojanoboché, y ochnayté, ntšamo cha yojanamancá, chë judiëngbe enefjuana yebnentse tojánamashëngo. Y chocna tojantsbaná Bëngbe Bëtsabe palabra jualíama. <sup>17</sup> Chë Bëngbe Bëtsabe juabna oyebuambnayá Isaíasbe librëša tmojaníyë chaulíama. Chë librëša yojutëfjona orna, tojáninýena mëntšá uábemanentse:

<sup>18</sup> “Chë Utabnabe Espiritu átšeftaca entsemna, er atše uabuayaná stsemna chë Bëngbe Bëtsabe tšabe noticiënga chë ndbomnëngbeñe jóyebuambayama.

Cha šonjichmó jábuayenama, chë utámenënga chentsana ya chamuáisebocanama; jamama chë jtanënga chamobenama tšabá jubínýnama;

jamama chë ínýengbe causa imosufrínënga, tempcá cachcá tšabá chamotsatsmënama;

<sup>19</sup> y entsanga jáuyanama ndëmua ora chë Utabná chabe entsanga yochjatsebacaye ca.”

<sup>20</sup> Jesús jualíama tojanpochocá y chora chë uajabuachanábioye chëša tbojtaniyë y tojtanoítbema. Nyetsca entsanga chë enefjuana yebnentse imojtsemnënga Jesúsbioye imojtsobuáuatja. <sup>21</sup> Chora Jesús tojanontšé mëntšá jayanana: —Camënté tšëngaftangbeñe tonjopasá ntšamo quem librëšañe iuabemancá ca.

<sup>22</sup> Nyetscanga Jesusbiamá tšabá imojtsencuéntaye y ojanánënga imojtsemna tša botamana cha yojtsóyebuambnama. Y chënga imojtsentjanaye: —¿Quem boyabása ndoñe Josebe uaquíñá yondmëna ca?

<sup>23</sup> Jesús yojtsetátšëmbo ntšamo cha tojánayaniñe chënga ndoñe tmonjanósbuachema. As tojanëyana: —Ndegombre tšëngaftanga ntšamo entsanga mondëntšayancá atše šmochanjauyana: “Ashnayá, cach aca menoshná ca”. Y tšëngaftanga šmojtsejuabná atše jauyanama: “Bënga fsënjouena chë bëts soyënga Bëngbe Bëtsabe obenánaca Capernaumoca tcojamama. Ntšamo contsichamcá ndegombre tojtsemnëse, cach acbe pueblëntšnaca cachcá moma ca”.

<sup>24</sup> Y cachora Jesús más tojanoyebuambá, mëntšá: “Ndegombre cbëyana, ni canýe Bëngbe Bëtsabe juabna oyebuambnayábioye cachabe pueblentse tšabá quematonýá.

<sup>25</sup> Ndegombre cbëyana, Elías, chë Bëngbe Bëtsabe juabna oyebuambnayá, Israeloca inamna ora, ba viudanga chentse imojamna. Chë tempo, unga uata y tsëntsañe nyetsá ndoñe tonjanafte y bëts shëntsana chë luariñe yojtsebinýna. <sup>26</sup> Pero Bëngbe Bëtsá, Elíasbioye ndoñe tbonjanichmó ni mo canýe Israelentša viudábioye, y aíñe tbojanichmó ínýoye, Sarepta ca uabáinoye, Sidón béconana, canýe chentša viudábioye. <sup>27</sup> Eliseo, chë Bëngbe Bëtsabe juabna oyebuambnayá, Israeloca inamna ora, chentse banga imojamna bacna nguayanánaca šoquënga, y ni mo canýa chentša šocábioye tbonjanshná, pero aíñe canýe šocábioye, Naamán ca uabainá, cach bacna nguayanánaca, Siriocá ca” —cha tojánayana.

<sup>28</sup> Chë judiëngbe enefjuana yebnentse imojtsemna entsanga chca tmojanuena ora, puerta tojánëtëna. <sup>29</sup> As, chora chënga tmojantsbaná, chë pueblentsana Jesús imojtábocna y más tsjuanoye canýe peñëšëjana imojuanatse. Chënga imojanajebna cach peñëšiñe, y chë entsanga imojtseboše Jesús chocana jtsajuatsëntsana. <sup>30</sup> Pero Jesusna chëngbe tsëntsajana tojánachnëngo y ínýoye tojtsanoñe.

*Jesús, bayëjbe juabna cányábioye tbojanbojuaná*  
(Mc 1.21-28)



<sup>31</sup> Chentšana, Jesús cach Galileoye tojesaná, Capernaum puebloye, y choca tojanontsé, chë ochnayté, chë judiëngbe enefjuana yebnentše entsanga jabuátambana. <sup>32</sup> Entsanga imojtsenjnanaye ntšamo Jesús yojsabuátambama, er chamna mo canye mando bomnacá yojsóyebuambnaye.

<sup>33</sup> Chë enefjuana yebnentše, canye boyabása bacna bayëja uambayá yojtsemna, y chabe causa chë boyabása tojanontsé mëntšá uayebuáchana: <sup>34</sup> —¡Cachcá šmonyá! ¿Ndayama bëngbioye təcjabo, Jesús Nazaretocá? ¿Tcojabo bënga jabétsapochocama? Atše sëndétatšëmbo nda aca connama, aca chë Bëngbe Bëtsabe Uamaná ca.

<sup>35</sup> Chora Jesús chë bacna bayëjbioye tbojtsanácacana y tbojanianyana: —¡lytëca móbema y chábertšana maisebocna ca!

As chora chë bayëja entsanguentše chë boyabásabioye tbojanshajayé, y ndocá ntjëftsemcá chábertšana yojésebocna. <sup>36</sup> Chë soyama nyetsca entsanga imojénjnanaye y mëntšá imojtsenatsëtsnaye: “¡Tša chca palabrenga! ¡Quem entsá mandayacá y obenacá chë bayëjenga entsamënda, y chënga montsaisebocana ca!”

<sup>37</sup> Y Galileoca nyetsca pueblënguiñe Jesusbiamá yojsótatšëmbo.

*Jesús, Simón Pédrëbe uambén mamábioye tbojanshná*

*(Mt 8.14-15; Mc 1.29-31)*

<sup>38</sup> Chentšana, Jesús chë judiëngbe enefjuana yebnentšana tojëftsanbocna y Simonbe yebnentše tojánamashëngo. Simonbe uambén mamá šocá inajájona jabuache calentóraca, y chë chentše imojtsemna entsanga chabiamá Jesúsbioye tmojanimpadá. <sup>39</sup> Chora Jesús chë šocábioye yojotsejbéna y tojánayana: “¡Calentora mojuaná ca!” Y chë calentora tbojtsanóbojuanañe. Y cachora, cha tojtantsbaná y tojanontsé chënga jobuácuedana.

*Jesús ba šoquënga tojanashná*

*(Mt 8.16-17; Mc 1.32-34)*

<sup>40</sup> Shinye yojuenatjëmba ora, banga inye y inye šocana bomnënga Jesúsbioye tmojanënatse, y cha nyetsca šoquëngbeñe cucuatšënga tojanajáj y tojanashná. <sup>41</sup> Chora, ba šoquëngbentšana bacna bayëjenga imojtsaisebocana y mëntšá imojtsanchembumbuana: “¡Aca chë Bëngbe Bëtsabe Uaquiñá condmëna ca!” Pero Jesusna yojsëcácana y ndoñe tonjanalesenciá chamóyebuambama, er chë bayëjenga imnatátšëmbo cha chë Cristo bëtsemnana.

*Chë judiëngbe enefjuana yebnënguenache, Bëngbe Bëtsabe soyëngama Jesús entsanga yojanabuayiyná*

*(Mc 1.35-39)*

<sup>42</sup> Yëfsana tojanbinýna ora, Jesús chë pueblentšana tojëftsanbocna, y canye luaroye, entsanga ndoyenoye tojtsanoñe. Pero entsanga tmojána cha jetsenguanguama, y cha yojtsemnoye tmojánashjajna. Chënga imojëtseboše Jesús cach pueblentše chaotsoquedáñama, <sup>43</sup> pero Jesús tojanëyana: “Atše šontsemna chë tsabe noticiënga Bëngbe Bëtsabe amëndayama inye pueblënguenáchnaca jábuayenana. Chama Bëngbe Bëtsá šonjichmó ca.”

<sup>44</sup> Y chentšana, Jesús yojánana Bëngbe Bëtsabiamá entsángbioye abuayiyñaye, chë judiëngbe enefjuana yebnënguenache Judeoca.

## 5

*Canye te mallajta beonga ashebuánaye te*

*(Mt 4.18-22; Mc 1.16-20)*

<sup>1</sup> Canye te, Jesús, Genesaret ca uabaina uafjájónaye tsachañe yojtsemna ora, ba entsanga tmojánashjajna, y chënga tša imojtsenajuatsëntšnaye Bëngbe Bëtsabe palabra jouenama. <sup>2</sup> Jesús, chë uafjájónaye tsachañe bécoñe tojáninye uta ena barquësha; chë beonga ashebuánayëngna barquëshanguentšana tmojëftsanbocna atarraiešhangá

jetsáboshabiamá. <sup>3</sup> Jesús canye barquëshañe tojánamashëngo; chësha Simónbësha in-aumna. Chora Simónbioye mëntsá tbojanianyana: “Quem tsachañentsana chcoye mëyamba ca.”

<sup>4</sup> Tojanótbema ora, Jesús chë barquëshoicana tojanontsé entsanga jabuátambama. Jabuátambama tojanpochocá orna, Simónbioye tbojanianyana: —Shbuatsëntsoye barquëshá mëyamba y tsëngaftangbe atarraïëshangá šmochjushbuetše, beonga jashebuáyama ca.

<sup>5</sup> Pero Simón tbojanjuá: —Buatëmbayá, nyets ibeta fsëndanguá y tondaye chibiátashebuaye. Pero aca chca tcjayánayecna, cachiñe atarraïëshá chantëtëshbuetše ca.

<sup>6</sup> Tmojanëshbuetše orna, bëtsá beonga tmojánishëche y chëngbe atarraïëshangá tojanontsé jtsatanécanana. <sup>7</sup> As, chë inye barquëshañe imojtsemna enutëngbioye tmojánëfjatsëmo, jabújabuachama chamuábama. Chora chënga tmojánabo, y nyets uta barquëshá beóngaca tmojanajutjé. Tša chëftanga causa, tojanontsé chë uta barquëshá jtsenatjëmbambana. <sup>8</sup> Simón Pedro chca tojáninye ora, Jesús bentše tojanoshëntsamentsé y tbojanianyana: —Bëngbe Utabná, atše bacna soye amá sëndmëna, chíyeca átšbentsana mojuaná ca!

<sup>9</sup> Chë tša beonga jashebuáyama Jesús tojanmama, Simón y chë cháftaca imojtsemnënga imojouatjaná. <sup>10</sup> Santiago y Juan, chë Zebedeobe uaquiñata y Simonbe enutata, chátnaca auatjanánata ibojtsemna. Chora Jesús Simónbioye tbojanianyana: —Ndoñe matauatjana. Morscana, entsanga Bëngbe Bëtsabiamá cochántsanguaye, y nye beonga ashebuanayá ndoñe quecochátsmëna ca.

<sup>11</sup> As chora chë barquëshangá tsachoye tmojtanëyamba y lempe jéseboshjonëse, Jesús tmojanasto.

*Jesús, canya bacna nguayanánaca šocábioye tbojanshná*  
(Mt 8.1-4; Mc 1.40-45)

<sup>12</sup> Jesús canye pueblentše yojtsemna ora, chentše tojánashjango canye entsá bacna nguayanánaca šocá. Chë šocá Jesúsbioye tbojáninye ora, tojanoshëntsamentsé y jubiaca fshantsóntscoñe yojotsejbéna y tbojanimpadá: —Bëngbe Utabná, aca tcojtsebošëse, aca catjobenaye atšbe šocana jtsebojuánana ca.

<sup>13</sup> As Jesús cucuátšëca tbojánbojajo y tbojanianyana: —Aíñe, sëntseboše. ¡Šocana cbotsebojuaná ca!

Y cachora chë šocana tbojtsanóbojuañe. <sup>14</sup> Chora Jesús tbojanmandá: —Ndocnábeñe chë soye cattsecuëntaye; nye Jerusalenoca báchnëbioye motsa, y cha cochjinÿinÿiye aca mora ya tšabá cojtsatsmënama; y chora cochjuátšëmbona ntšamo Moisés chabe leyíñe tojanmandacá, Bëngbe Bëtsábioye chama jëtschuayama, chca, nyetsca entsanga chamotatšëmbona mora ya tšabá cojtsatsmënama ca.

<sup>15</sup> Pero ndayá Jesús yojtsamama más entsanga imojátatšëmbona, y ba entsanga imojtsójotoye chábioye joyeunayama y chëngbe šocanëngama chauashnama. <sup>16</sup> Pero Jesús yojanamana jtsoñana entsanga ndoyena luarëngoye y choca Bëngbe Bëtsáftaca ibnéncuentaye.

*Jesús, canye jama ndobenábioye tbojanshná*  
(Mt 9.1-8; Mc 2.1-12)

<sup>17</sup> Canye te, Jesús yojtsabatambá ora, chentše básefta fariseunga y ley abuatambayënga imojtsetbiámana, Galileoca nyetsca pueblënguentsana áshjajnënga, Judeoquënga y Jerusalenoquënga. Y chora Jesús šoquënga yojtsashnaye, Bëngbe Bëtsabe obenánaca.

<sup>18</sup> Chora tojanopasá, básefta boyabásenga canye šocá, jama ndobená, tjuashiñe choye imojuamba. Chënga imojétseboše tsoye cha juambana, Jesús yojtsemnoye, <sup>19</sup> pero jamashjnama ndoñe tmonjanobená, tša entsanga causa. Chcasna, gradasëšënguëjana chë yebnentša tsbanánye tmojánasëngo y batšá tejëshe tmojtsanjuaná. Chorna, chë

atëfjnëjana chë šocá tjuashiñe tmojanéstjango, entšangbe tsëntsaca, Jesusbe natsanoica. <sup>20</sup> Jesús tojáninýe cha chë šocá jáshnama bétsobenama chënga puerte imojtsošbuáchema. As, chë jama ndobenábioye tbojaniyana: “Bacó, acbe bacna soyënga tcbontseboperdoná ca.”

<sup>21</sup> Chora chë ley abuátambayënga y chë fariseunga mëntšá tmojanontsé juabnayana: “Quem boyabása ndoñe tšabá Bëngbe Bëtsabiama quenátichamo; mo chábioye cuafjoyenguangcá entsemna. Ndocna entšá quenátobena bacna soyëngama inýa japerdonana; nýe Bëngbe Bëtsá aíñe ca.”

<sup>22</sup> Pero Jesús yojtsetátšëmbo ntšamo chënga imojtsejuabnayama; as tojanëyana: “¿Ndáyeca tšëngaftangbe ainaniñe chca šmojtsejuabná? <sup>23</sup> ¿Tšëngaftangbiama ndayá más paselo nántsemna tšëngaftangbe delante jayanama: ‘Acbe bacna soyënga tcbontseperdoná’, o jayanana: ‘Matëtsbaná y motsa ca’? <sup>24</sup> Y chca, morna atše cbochanjínýanýiye, chë Bëngbe Bëtsá Entšá tbojanbemá quem luariñe obenana yobomnama, entšanga bacna soyëngama jáperdonama ca” —Jesús tojánayana.

As Jesús chë jama ndobenábioye tbojaniyana: “Atše cbëyana, matëtsbaná, tjuashe mesocñe y acbe yebnoye motsatoñe ca.”

<sup>25</sup> Cachora chë jama ndobená tojtantsbaná entšangbe delante, chë cha inajájona tjuashe yojesocñe y Bëngbe Bëtsábioye atschuanaye chentšana yojtsatoñe. <sup>26</sup> Chama nýetsca entšanga imojénjanaye y Bëngbe Bëtsá imojtsatschuanaye. Y corente auatjanánënga imojtsichamo: “Mënté bëts soyënga tmonjinýe ca.”

*Jesús, Levíbioye tbojanchembo chabuastama  
(Mt 9.9-13; Mc 2.13-17)*

<sup>27</sup> Chca yojochnëngüentšana, Jesús chentšana tojëftsanbocna y canýe entšábioye tbojáninýe, Leví ca uabainá, chë entšángbioye impuesto Romocama atjanayentše inëtsofbemañe. Chora Jesús tbojaniyana: “Smasto ca.”

<sup>28</sup> Y Leví lempe tojésanboshjona, tojantsbaná y Jesús tbojanasto.

<sup>29</sup> Chentšana, Levina bëts fiesta chabe yebnentše Jesusbiama yojama. Y chë fiestentše imojtsemna banga impuesto atjanayënga; y inýe entšángnaca mesëshentše imojtsetbiámana. <sup>30</sup> Chora, chë fariseunga y chë ley abuátambayënga tmojanontsé chë Jesusbe uatsjëndayëngbiama podescas oyebuambnayana; y chëngbioye mëntšá tmojanëyana: — ¿Ndáyeca tšëngaftanga impuesto atjanayëngaftaca y bacna soye amëngaftaca šmojtšesá y šmojtsofšëšná ca?

<sup>31</sup> Y Jesús tojanëjua: —Salud bomnënga ashnayá ndoñe ntsëjabótana, pero šoquëngna aíñe. <sup>32</sup> Y atše ndoñe chiyátabo chë Bëngbe Bëtsabe bominiñe tšabá amënga jabáchembuama, sinó chë bacna soye amënga imomna ca juabnayënga Bëngbe Bëtsábioye jabáchembuama ca.

*Jesús tmojantjá chë Bëngbe Bëtsáftaca jencuëntama tondaye saytescama  
(Mt 9.14-17; Mc 2.18-22)*

<sup>33</sup> Chora chënga Jesúsbioye tmojaniyana: —Juan chë Ubayanabe uatsjëndayënga y chë fariseungbe usetonënga monduamana ba soye Bëngbe Bëtsáftaca jtsencuëntayana, y chama ba soye tondaye ntjascá jtsemnana; pero acbe uatsjëndayënga nýe nýets tempo jesosañana y jesofšëšnañana ca.

<sup>34-35</sup> Chora Jesús tojanëjua: —Chë boyabása bouamná chë ofjanëngaftaca tojtsemnëntscuana, chëngbioye saná ndoñe ntsabuáshebenana. ¿Ntšamo chca ndoñe nántsemna? Chë tojobouamá cha chëngaftaca tojtsemnëntscuana, chë ófjanënga bëtscá jasana y cháftaca oyejuayënga jtsemnana. Pero ora echanjóshjango y chë boyabása chëngbentšana mochantsánatseñe; chora cocayé chë ófjanënga echántsamna tondaye ntjascá jtsemnana. Ntšamo chë tojobouamá cha y chë ofjanëngaftaca endmëncá, cachcá endmëna atše, atšbe uatsjëndayëngaftacnaca ca —cha tojanëjua.

<sup>36</sup> Jesús mēntsánaca tojanacuntá jabuátambama: “Ndocná queonybatatētse basájua tsēm entsayañe, tanguá entsayá jtarméndama. Chca tcojamēse, chē tsēm entsayá jtsandbemaná, y chē tcojuatētse entsējua chē tanguájuañe ndoñe tšabá ntsinýnana. <sup>37</sup> Y cach ndoñe, chē tojtseshayana vínoye tanguá jasabenguiñe ntjataftsuámayana. Tcojuaftsuamasna, chē jasabenga jtseshébēfjuana y chē vínoye jtsabuáshanana; y chca, chē vínoye y chē jasabenga tondayama ntjatoservénana. <sup>38</sup> Chíyeca co, chē tojtseshayana vínoyna tsēm jasabenguiñe juaftsuámana. <sup>39</sup> Ndocná, chē bóchena vínoye tojatēmo y chentšana játsbošana chē tojtseshayana vínoye jatofšiyana; cha jayanana: ‘Chē bóchena vínoye tša tšabeye ca’.”

## 6

### *Jesusbe uatsjédayēnga ochnayté trigo tmojanátabebe* (Mt 12.1-8; Mc 2.23-28)

<sup>1</sup> Canye ochnayté, Jesús canye jajajana yojtsaye; chabe uatsjédayēnga trigo imojtsaiuatabnaye, imojtsaiúshenēcaye, y imojtsaiuasaye. <sup>2</sup> Chē causa, básefta fariseunga tmojanatjaye: —¿Ndayeca šmojtsama chē ochnayté jamama ndoñe quenátslesenciana soye ca?

<sup>3</sup> Y Jesús tojanējua: —¿Ndoñe šmēndualía y šmondétatsēmbo, ntšamo rey David y chabe enutēnga tmojanmama shēntseca imojtsemna ora y jasama yojtsējaboto ora? <sup>4</sup> Chca orna, David Bēngbe Bētsabe bēts yebnentše yojámashēngo y chē Bēngbe Bētsá chentše yojamnana inýinýnaye tandēsēnga yojase, y chē cháftaca imojánajna entsángnaca yojátšataye. Y chē tandēsna nýe bachnanga belesenciana jasama. Masque David chca yojama, Bēngbe Bētsá chora ndoñe tonjánayana David canye bacna soye tojanma ca — Jesús tojanējua.

<sup>5</sup> Y Jesús más tojanéyana: “Chē Bēngbe Bētsá Entsá tbojanbemá, chē entsá ochnayté tojtsama sóynaca jtsemándayana ca.”

### *Chē buashana cucuatše bomna entsá* (Mt 12.9-14; Mc 3.1-6)

<sup>6</sup> Inýe ochnayté, chē judiēngbe enefjuana yebnoye Jesús tojánamashēngo y tojanontsé jabuátambana. Y chentše yojtsemna canye entsá, catšbioica cucuatše buashanētse bomná; <sup>7</sup> y chē ley abuátambayēnga y fariseunga chiñe imojtserrondana jinýama nderado Jesús chē ochnayté chábioye tabuanjashna, as chca chēnga jtsebomnama ndaye sóyeca Jesús mal jaquédana. <sup>8</sup> Pero Jesús chēngbe juabna yojtsetátšēmbo; asna chē buashana cucuatše bomna boyabásabioye tbojaniyana: “¡Motsbaná y chentše tsēntsaca motsa ca!” Y chē entsá yojotsbaná y entsangbe tsēntsaca yojotsaye. <sup>9</sup> Chora Jesús chē ínýengbioye tojanéyana: “¿Ndayá yojtselesenciana ochnayté jamana, canye tšabe soye o canye ndoñe tšabe soye? ¿Jatsbocana o jtsepochócana ca?”

<sup>10</sup> Y nýetscanga chabe chabuajana imojtsemnēnga tojanēnyanjé, y chē buashana cucuatše bomnábioye tbojaniyana: “Macuenýanéjaná ca.” Y chē boyabása tojanacuenýanéjaná, y tšabá chētša yojtsatamna. <sup>11</sup> Pero chē ínýengna puerte tmojanotjayaná, y tmojanontsé enatsētsnayana ndayá muanjobenaye Jesusbe contra jamana ca.

### *Jesús chē bnētsana uta uatsjédayēnga tojanabacacá* (Mt 10.1-4; Mc 3.13-19)

<sup>12</sup> Chē tempo, Jesús tjoye tojána Bēngbe Bētsáftaca jencuéntama; y nýets ibeta cháftaca tbojanencuentá. <sup>13</sup> Tojanbinýna ora, chabe ústonēnga tojánachembo, y chēnguentšana tojanēbuáyana bnētsana uta uatsjédayēnga, chē ndēmuanýēnga “chabe ichmónēnga cánaca” tojanēbobaye. <sup>14</sup> Chēnga imojamna: Simón, chē Pedro cánaca Jesús tbojanabobayá; Andrés, Simonbe catšata; Santiago y Juan, Felipe y Bartolomé, <sup>15</sup> Mateo y Tomás,



Santiago, Alfeobe uaquiñá; Simón, chë celote ca uabobainá; <sup>16</sup>Judas, Santiagbe uaquiñá; y Judas Iscariote, chë más chcoye, Jesús uayayëngbe cucuatšine bochjanboshjoná.

*Jesús ba entsanga yojanabuatambá y yojánashnaye*  
(Mt 4.23-25)

<sup>17</sup> Chentšana, Jesús chëngaftaca chë tjocana tojtantsmá y canye jachañe tojanoquedá ba chabe ustonëngaftaca y ba inye entsángaftaca. Ba entsanga choye tmojánabo Judeocana, Jerusalenocana y Tiro y Sidón, chë mar bėjaye béconana pueblënguentshana, Jesúsbioye oído jabuájua y chëngbe šocanëngama chauashnama. <sup>18</sup> Y chábeyeca chë bacna bayëjbe juabna uambayënga tšabá imojtsatsmëna. <sup>19</sup> Njëtsca entsanga tša imojtseboše y ndayánaca imojtsama Jesús jabojuama, er chábentšana bëts obenana vojtsóbocana y njëtscanga yojsashnaye.

*Chë ndegombre oyejuayana bomnënga y ndëmuanyëngbiama tša lastema yochtsemna*  
(Mt 5.1-12)

<sup>20</sup> Jesús chabe uatsjëndayëngbioye tojanontješé y tojanëyana: “Puerte oyejuayënga tšëngaftanga, chë quem luarentša soyënga ndbomnënga, er Bëngbe Bëtsabe amëndayentša soyënga tšëngaftangbiama entsemna ca.

<sup>21</sup> “Puerte oyejuayënga tšëngaftanga chë mora oshëntsiyënga, er beca šmochantóshachaye ca.

“Puerte oyejuayënga tšëngaftanga chë mora šmošachenga, er chentšana šmochántsaténbiajuaye ca.

<sup>22</sup> “Puerte oyejuayënga šmochtsemna, entsanga chacmojtsëbuayënja ora, chacmojtšatëbuacana ora, chacmojtsëyanguá ora, y tšëngaftanga ndoñe tšabá šmontsama ca chënga chamojtsichamo ora, tšëngaftanga atšbe ústonënga bëtsemnama. <sup>23</sup> Chë te puerte šmochjóyejuaye, er celoca canye bëts uacanánana šmochántsebmna. Chëngbe bëts taitanga, cachcá chë Bëngbe Bëtsabe juabna oyebuambnayëngaftaca tmonjanma ca.

<sup>24</sup> “Pero tša lastema tšëngaftanga bomnëngbiama, er mora oyejuayënga jtsemnama ya bëtscá šmojóyëngacñe ca!

<sup>25</sup> “¡Tša lastema tšëngaftanga chë mora shachanëngbiama, er shëntsana šmochántsebmna ca!

“¡Tša lastema tšëngaftanga chë mora oyejuayëngbiama, er ngmënama šmochanjenóbošachna ca!

<sup>26</sup> “¡Tša lastema tšëngaftangbiama njëtsca entsanga tšabá chamojtsoyebuambná ora; er cachcá chëngbe bëts taitanga monjánama chë Bëngbe Bëtsabe ndoñe ndegombre juabna oyebuambnayëngaftaca ca!” —Jesús tojanëyana.

*Chë uayayëngbiama bonshánana jtsebmna*  
(Mt 5.38-48; 7.12)

<sup>27</sup> “Pero tšëngaftanga, átšbioye ouenanënga cbëyana: Tšëngaftangbe uayayënga šmochtsababuánjëshana; chë tcmojtsëbuayënjëngbiama tšabe soyënga šmochtsama; <sup>28</sup> chë tšëngaftangbiama bacna soyënga bošëngbiama, Bëngbe Bëtsá šmochtseimpadana tšabe bendicionënga chamóyëngacñama; chë tcmojóyanguanguëngbiama, Bëngbe Bëtsá šmochtseimpadana. <sup>29</sup> Nderado ndánaca cányoica tcmojajuebiantsetase, cochjomiye chë ínyoica cachcá chacmomama; nderado ndánaca quëfsaiya tcmojuábocana, cachcá cochjonjëye acbe shabuanguanëjuanaca chauetsacñama. <sup>30</sup> Ndánaca chacmojtjañábioyna, jatšetayana; y nda ndayánaca chacmojefcábioyna, ndoñe catjontšínýena chacmatoyema. <sup>31</sup> Inyëngaftaca šmochtsama, ntšamo chë ínýenga tšëngaftangaftaca chamotsamama šmojtsebošcá.

<sup>32</sup> “Tšëngaftanga, nýe chë tcmojtsababuánjëshanënga šmojtsababuánjëshanëse, ¿ndaye tšabe soye chca šmattsama?; er chë bacna entsángnaca chca mondbëtsama. <sup>33</sup> O nderado, nýe chë tšëngaftangbiama tšabe soyënga tmojtsamëngbiama tšabe soyënga šmojtsamëse,

¿ndaye tšabe soye chca šmattsama?; er bacna entšágnaca chca mondbétsama. <sup>34</sup> O n̄ye ch̄e cmochtēchenanguama šmojtsejuabnángbioye šmojúyentsámese, ¿ndaye tšabe soye chca šmattsama?; er ch̄e bacna entšágnaca mondbetsenántšamiana, chēngbentsana cachcá jtóyēngacñama jtsobátmanese. <sup>35</sup> Pero tšēngaftangna cmontsamna ch̄e uayayēnga jtsababuán̄yeshanana; y tšabe soyēnga chēngbiamana jtsamana y júyentsámiana, chēngbentsana ndayánaca jtóyēngacñama ntjatobatmancá. Chca, tšēngaftanga uacanámana cuenta can̄ye bēts soye šmochanjóyēngacñe, y celoca endmēna Bēngbe Bētsabe básēnga šmochántsemna; Bēngbe Bētsá ch̄e ndochuanayēngaftaca y bacna entšangaftácnaca tšabia comna. <sup>36</sup> In̄yēngbiamana lastemadēnga šmochtsemna, ntšamo tšēngaftangbe Taitá yomncá ca” —Jesús tojánayana.

*Ndoñe ntsichámuana ch̄e ín̄yēnga tšabá o ndoñe tšabá tmonjamama*  
(Mt 7.1-5)

<sup>37</sup> “Ndocá ín̄yēngbiamana šmattsichamo ch̄e ndoñe tšabá tmontsamama, y Bēngbe Bētsá ndoñe queochátichamo tšēngaftanga ndoñe tšabá šmonjama ca. In̄yēngbiamana ndoñe šmattsichamo ndoñe tšabá tmonjama ca, y Bēngbe Bētsá ndoñe queochátichamo tšēngaftanga ndoñe tšabá šmonjama ca. In̄yēnga šmochjáperdonaye y Bēngbe Bētsá cmochanjáperdonaye. <sup>38</sup> In̄yēngbioye šmochjatsataye y Bēngbe Bētsá cmochántatsataye. Mo nda can̄ye biaco medidiñe bētscá tojajutjé, uashēshe y cmojtiyecá, Bēngbe Bētsá cachcá cmochántatsataye. Ntšamo tšēngaftanga ín̄yēngbioye chašmojábiama, uabouana o ndoñe jabuache soyēnga, Bēngbe Bētsá cachcá tšēngaftangbioye cmochanjábiama ca” —Jesús tojánayana.

<sup>39</sup> Jesús quem cuétnaca tojánayana jabuátambama: “¿Can̄ye jtaná nantsobena in̄ye jtaná jtsanachayama? ¿Chca ndoñe n̄yets útata ndaye t̄buabentše buanjótsatše? <sup>40</sup> Ch̄e uat-sjendayá ndoñe ntsemnana ch̄e buatēmbayabiamana más bētsá. Pero chabe uatsjēndayana chaojapochocá ora, cach buatēmbayacá jtsemnana.

<sup>41-42</sup> “Can̄ya chabe bominiñe can̄ye niñēfja tojtsebomnēse, cha ndoñe ntsobenana chabe catsátbioye jauyanana: ‘Acbe bominiñentsana can̄ye polvēshtema jtsebuchjátsēcama šmolesenciá ca’. Natsana cha bontsemna cachabe bominiñentsana ch̄e niñēfja jt-senobuchjátsēcana, tšabá jin̄yama jobenayama, chabe catsatbe bominiñentsana ch̄e polvotema jtsebuchjátsēcama. ¡Cachcá entsemna acbiamana, bacna entšá ch̄e ntšamo ndegombre tcojuabnacá ndin̄yín̄yayá! Ch̄e tša bacna soye cojtsama ca acbe catsátbioye tcojauyana ora, cach aca tša bēts bacna soyēnga cojtsamama ntjenojuaboycá; y chca, aca jamana can̄ye bacna soye. Natsana cmontsemna ch̄e cach aca ndoñe tšabe soyēnga cojtsamama ngménaca jshatenójuaboyana y chca amana jshétsajbanana, y chentšana cocayé cochantsobena acbe catsata juajabuáchana ntšamo tšabá yomncá chaotsamama ca” —Jesús tojánayana.

*Tšabe betiye o ndoñe tšabe betiye tondmēnana, jtsotatsēmbuana ntšamo tojashajoncá*  
(Mt 7.17-20; 12.34-35)

<sup>43</sup> “Ndoñe queon̄ybatmēna, ch̄e can̄ye tšabe betiñe podessa soye jashájonana; ni can̄ye ndoñe tšabe betiñe tšabe soye jashájonana. <sup>44</sup> Betiyēnga jtsabuatmana ntšamo cada betiye tojtseshajcá. Uchmašeshentsana quenátopodena higuébé jocñana; ni uvašēša, shēshēntša betiyentsana. <sup>45</sup> Ch̄e tšabe entšana, chabe ainanoca tšabe juabnēnga bomnentsana jtsóyebuambnayana; y ch̄e bacna entšana, chabe ainanoca ndoñe tšabe juabnēnga bomnentsana jtsóyebuambnayana. Er ndayá becá ainanoca tomnana entšá jtsóyebuambnayana ca” —Jesús tojánayana.

*Ch̄e uta ucuatjoniñe*  
(Mt 7.24-27)

<sup>46</sup> “¿Ndáyeca tšëngaftanga atše šmnétsatsaye, ‘Utabná, Utabná ca’, y ntšamo atše stsichamcá ndoñe ntsamana? <sup>47</sup> Cbochanjáuyana ndacá yomna nda átšbioye tojabo, atšbe palabra tojouena y ntšamo stsichamcá tojtsama: <sup>48</sup> Cha endmëna mo canye entšacá, nda canye yebna jajebuamna becá fshantse jashenoye vojajutjo y ndëtsbenguiñe yojúcuatjoye. Béjayënga yojtsóftjajna ora, chë yebnëjana yojobuachnëngo, pero ndoñe yonjobenaye juashajayana, er chë ndëtsbenguiñe jabuache yojaúcuatjona. <sup>49</sup> Pero nda atšbe palabra tojouena y ntšamo stsichamcá ndoñe tontsama, endmëna mo canye entšacá, nda canye yebna vojajebo nye fshantsiñe, tondayiñe ntjucuatjoycá. Béjaye yojóftjango y jabuache chë yebnoye yojobuá ora, chë yebna yojtsáshajaye y lempe yojtsopochóca ca” —Jesús tojánayana.

## 7

### *Jesús canye Romano soldadëngbe amëndayabe bochichnayábioye tbojanshná (Mt 8.5-13)*

<sup>1</sup> Entšángbioye chca jáuyanana tojanpochocá ora, Jesús Capernaum puebloye tojána. <sup>2</sup> Chentše yojoyena canye romano soldadëngbe amëndayá. Cha ibnabomna canye bochichnayá puerte bonshaná, y chora cha šocá yojtsemna, ya jtsóbanama. <sup>3</sup> Jesús ba šoquëngbioye yojáshnama encuëntayana chë amëndayá yojouena ora, báseftanga bëtsëjemëngcá amëndayënga cha tojanichamó, chauábama Jesús jaimpádama y chabe bochichnayábioye chabotseshnáñama. <sup>4</sup> Chënga Jesúsbioye tmojánashjango y tša imojtseimpadana, mëntsá: “Quem soldadëngbe amëndayá merecido entsebuájona chacotsájabuachama; <sup>5</sup> er cha bëngbe luarentša entšángbioye corente endábabuanyëshana, y cachá chë bëngbe enefjuana posada šonjayentsjebno ca.”

<sup>6</sup> Jesús chëngaftaca tojána. Pero chë mandayabe yebnoye imojtsebeconá ora, chë soldadëngbe amëndayá básefta amiguënga yojichamuá, Jesúsbioye mëntsá chamuauyanama: “Atšbe Utabná, ndoñe yapa matenócochinënana átšbioye jabama. Atše merecido taitsatobuajoñe aca atšbe yebnoye chacuamashënguama; <sup>7</sup> chíyeca ni mo añemo chiyatentšetá jama aca jajëbenguama. Morna nye cochjayana y atšbe bochichnayá tšabá echántsatsmëna. <sup>8</sup> Er atše sëndábamna átšbioye mándayënga y átšnaca soldadëngbe amëndayá sëndmëna. Atše canye soldádbioye stjauyana ‘motsa ca’, cha cachora jana; y ín'yabioye stjauyana ‘mabo ca’, cha cachora jabana; y nderado atšbe bochichnayábioye ndayánaca chaomama stjamánda, chánaca cachora chë soye jamana ca” —cha yojáuyana.

<sup>9</sup> Jesús chca tojanuena ora, chë mándayabiamama yojenjnaná, y jobuértanëse chë ba entšanga cha ustonëngbioye tojanëyana: “Ndegombre cbëyana, ni mo nyëts Israelentše, ni canya quem boyabasacá tša ošbuachiyá chiyátin'yëna ca.”

<sup>10</sup> Y chë ichmónënga yebnoye tmojtaná orna, tmojánin'yëna chë bochichnayá ya tšabá yojtsatsmëna.

### *Jesús tojanma canye viudabe uaquiñá cháuatayenama*

<sup>11</sup> Chca tojanopasá chentšana, Jesús yojétsaye Naín ca uabaina puebloye, y cháftaca chabe uatsjëndayënga y ba entšanga imojtsaye. <sup>12</sup> Chë pueblo amashjuanoye yojtsebeconá orna, entšanga chë pueblentšana canye obaná imojtsábocana jauábtontsama; chë obaná canye viudabe uaquiñá inamna y nye cha uaquiñá. Bëtská entšanga chë obanabe mamá imojtsetjëmbambnaye. <sup>13</sup> Bëngbe Utabná chë viudábioye tbojánin'yë ora, chabiamama tbojanongmé y tbojanianyana: “Ndoñe matošachena ca.”

<sup>14</sup> Y jobëconase, chë ataúse tojánbojajo, y chë obaná atambayënga tmojantsá. Y Jesús chë obanábioye tbojanianyana: “Bobontse, atše cbëyana: ¡Matëtsbaná ca!”

<sup>15</sup> Chora chë obaná tojtantsbaná y tojanontsé oyebuambnayanama; y chabe mamábioye Jesús chë bobontse tbojtánatse. <sup>16</sup> Nyëtsca entšanga tša uatjana yojubuaache chca tmojánin'yë ora, y Bëngbe Bëtsá imojtsatschuanaye, mëntsá jayanëse: “Bëngbentše canye

Bëngbe Bëtsabe juabna oyebuambnayá cuatënjonýná ca.” Y mëntsánaca: “Bëngbe Bëtsá tojabo chabe entsànga jabújabuachama ca.”

<sup>17</sup> Y nýets Judea luaréjána y chë chábuañe luarenache entsànga imojátatsëmbona ndayá Jesús tojanmama.

*Juan chë Ubayanabe ichmónënga  
(Mt 11.2-19)*

<sup>18</sup> Juan, lempe ntšamo Jesús yojsamama yojátatsëmbona; er chabe ústonënga chama tmojançantá. As Juan, chënguentšana útata tojánachembo, <sup>19</sup> y Jesúsbioye yojichamuá jatjayama cha tajojamna chë Cristo, chë jabama ibojanmëná, chë Uámana Uabuayaná, o ínýabiama jatobátmama tajojétsamna ca. <sup>20</sup> As chë Juanbe ichmónënga Jesúsbioye tmojanobeconá y tmojanianana: —Juan chë Ubayaná sonjichamo jatjayama, aca ndegombre cojtsemna chë Cristo, chë jabama ibojanmëná, o šojtsamna ínýabiama jatobátmama ca.

<sup>21</sup> Chë ichmónata tbojánashjango ora, Jesús banga yojsashnaye, šocanëngama y tsetšanëngama; bacna bayëjbe juabna uambayënga tšabá imojtsatsmëna, y jtanënga tšabá yojsatëbinýna. <sup>22</sup> Chora Jesús mëntsá tojanéjua: —Motsata y Juánbioye šochjauyana ntšamo šojinýe y šojouencá: Chë jtanënga tšabá entsatëbinýna, chë coshetënga tšabá montsatana, chë bacna nguayanánaca šoquënga shnánënga montsatsmëna, chë tësmënga montsuenana, chë obanënga tmontayena, y chë ndbomnjémëngbioye chë tšabe noticiënga montsabuyayiná. <sup>23</sup> ¡Puerte oyejuayá chaotsemna, nda atše ndoñe bacna soye stsama ca jtsejuabnayëse, átšbeñe ošbuáchiyana ndoñe tontsajbaná cha ca! —Jesús tojanéyana.

<sup>24</sup> Chë Juanbe ichmónata chentšana tbojésanbocnentšana, Jesús tojanontšé Juanbiamama entsànga jáuyanana, mëntsá: “Juan jinýama šmojánbocna ora, ¿ndayá jinýama šmojánbocana entsànga ndoyena luaroye? ¿Canýe entsá ainaniñe tondaye añemo ndbomná, mo canýe šëse bínýiaca shatiyeynëscá? <sup>25</sup> Y ndoñese, ¿ndayá jinýama choye šmojánbocana? ¿Canýe boyabása uámana entsáyaca bopormaná? Ndoñe. Tšëngaftanga šmondëtatšëmbo chë uámana entsáyaca bopormánënga y chë bëtscá bomnánaca nýe tondayama ntsecochinýencá vida bomnëngna, reyëngbe yebnënguiñe mondbëtsiyenama. <sup>26</sup> Asna, ¿ndayá jinýama choye šmojánbocana? ¿Canýa Bëngbe Bëtsabe juabna oyebuambnayá? Ndegombre; y cbéyana, canýa Bëngbe Bëtsabe juabna oyebuambnayabiamama más bëtsá. <sup>27</sup> Cha, Juan, endmëna ndabiamama Bëngbe Bëtsá chabe uabemana palabrenguiñe tojánayana mo chabe ichmonacá, mëntsá tojánayana ora:

Cristo, atšbe entsá natsana sënjichmó acbiamama chaóyeuambama, entsànga jábuayenama aca jabama ainaniñe tšabe juabnëngaca chamotseprontánama ca. <sup>28</sup> Ndegombre cbéyana: Nýets tempo entsángbeñe, ndocná quenátsmëna Juan chë Ubayanabiamama más bëtsá; masque chca, Bëngbe Bëtsabe amëndayoca chë más batšá uamaná, cha más bëtsá echántsemna ntšamo mora Juan yomnama ca” —Jesús tojánayana.

<sup>29</sup> “Nýetsca entsànga chca Juánbioye tmojanóyeunanga y chë Romocama entsángbioye impuesto atjanayëngnaca, nýets ainánaca tmojánayana Bëngbe Bëtsá nýetsca soyënguiñe tšabá amá yomna ca; er tmojánenabaye ntšamo jubáyama Juan yojanamancá. <sup>30</sup> Pero chë fariseunga y ley abuatambayënga, ntšamo jubáyama Juan yojanamancá jýyëngacñama ndoñe tmonjánbošena ora, tmojtsanaboté ndayá Bëngbe Bëtsá chëngbiamama jamama yojanjuabnacá.”

<sup>31</sup> Jesús mëntsánaca tojánayana: “Cbochanjáuyana ndayacá morsca entsànga imomna, y ndayëngcá chënga imomna. <sup>32</sup> Chënga mondmëna mo chë plazëngoca mondbetsetbiámama basetemëngcá; chëngna mëntsá jabuache jtsenatsayana: ‘Tšëngaftangbiamama fsënjaflautá y ndoñe chešmatslantsá; ngmënacama fsënjavërsiá y ndoñe chešmatenóbošachna ca.’ <sup>33</sup> Juan chë Ubayaná tonjánabo y ndoñe quenjatamana bëtscá entsángbeñe jtsemnana, ni tandëse jasana, ni vínoye jofšiyana; y tšëngaftanga šmontsichamo chana bacna



bayëjbe juabna uambayá inamna ca. <sup>34</sup> Morna, chë Bëngbe Bëtsá Entśá tbojanbemá tonjabo y chana aíñe entsamana bëtscá entsángbeñe jtsesayana y jtsofšëšnayana, y tšëngaftanga chabiamá šmotsichamo: ‘Chana yapa uasayá y vínoye tmoyá entsemna y Romocama entsángbioye impuesto atjanayënga y bacna soyënga amëngbe amigo ca’.

<sup>35</sup> Pero Bëngbe Bëtsá endbëtsinÿinÿnaye cha nÿets osertánana bomná yomnama, chë ndayá cha tojama ora ndayá chentšana inobocna soyëngaca ca” –cha tojánayana.

### *Jesús, chë fariseo Simonbe yebnentšë*

<sup>36</sup> Canÿe fariseo Jesúsbioye tbojanofja saná jauasama, y Jesús chabe yebnoye tojána y mesëshentšë yojótbema. <sup>37</sup> Chë pueblentšë yojamna canÿe shembása, bacna vida bomná. Jesús chë fariseobe yebnentšë yojtsesama chë shembása yojátatsëmbona; as cha chë yebnoye tojánashjango y tojanamba canÿe alabastro botellëše, jútjena canÿe botamana uanguëtšë béjayeca. <sup>38</sup> Jesusbe shecuatsentšë yojoshëntsamentšiyë, šachénaca; shëchbuíyeca chabe shecuatsënga yojtsefchecuacná y cachabe stjënashaca ibojtsatsshéchojuaye. Chabe shecuatsënga yojtonguëtsëntšiyë y chë botamana uanguëtšë béjaye ibojtashecbuéscacja. <sup>39</sup> Chë fariseo Jesúsbioye ofjaná chca tojáninÿe ora, mëntśá Jesusbiamá yojtsejuabnaye: “Cha ndegombre canÿe Bëngbe Bëtsabe juabna oyebuambnayá tojtsemnëse, nantsetátšëmbo nda y mocna shembása yomna chë bontsebana shembása: canÿe bacna vida bomna shembása ca.” <sup>40</sup> As Jesús chë fariséobioye tbojanayana: –Simón, cuentado palabra šmotsoyeuná ca.

Y chë fariseo tbojanjuá: –Arseñor, Buatëmbayá ca.

<sup>41</sup> Y Jesús tojánayana: –Canÿe entśá crocénana uyentšamianá, uta ndebénata yojánabamna. Canÿa shachna patse denario crocénana ibojandebena, y chë ínÿana, shachna bnëtsana. <sup>42</sup> Pero chë útata tondaye ibontsebonna ndayentšana cha jëtsëntšabuáchiyama; as chë uyentšamianá nÿets útata chë ndebénana yojtsaperdónaye.

Chora chë fariséobioye tbojanayana: –Mora šmëyana, ¿chë útatentšana nda más chë uyentšamianábioye buantsebobonshana ca?

<sup>43</sup> Y Simón tbojanjuá: –Atšë šontsinÿana chë más bëtscá ndebená ca.

Y Jesús tbojanayana: –Ndegombre, ntšamo endmëncá tcjayana ca.

<sup>44</sup> Jesús, chë shembásabioye jontješiyëse, Simónbioye tbojanayana: –Minÿe quem shembása. Atšë acbe yebnoye sënjámashëngo y aca búyeshe ndoñe chešcatabuatšetá atšbe shecuatsëngama. Y quem shembásana, cachabe shëchbuíyeca šontseshecjabebé y chabe stjënashaca šontseshecbojó. <sup>45</sup> Ndoñe chešcatámocho, pero cha tonjámashëngo orscana ndoñe ntjájbanana atšbe shecuatsënga onguëtsëntšnaye.

<sup>46</sup> “Aca bestšašifñe aceitiye ndoñe chešcatsbuešcja, y chana aíñe botamana uanguëtšë béjaye šonjashecbuešcja. <sup>47</sup> Chcasna atšë cbëyana, cha šonjinÿanÿé atšbiamá corente bonshánana yojtsebonna, er atšë chabe bëtscá bacna soyënga sëntseboperdoná; pero nda nÿe básefta bacna soyëngama stjaperdóna chana, nÿe batšatema bonshánana jtsebonnana ca.”

<sup>48</sup> Y chora Jesús chë shembásabioye tbojanayana: “Acbe bacna soyëngama perdonaná contsemna ca.”

<sup>49</sup> Chora chë ofjanënga chentšë imnatbiámanëngna tmojanontšë enatsëtsnayana: “¿Nda quem entśá yojtsemna, chë bacna soyëngámna entśángbioye jtsaperdónayana ca?”

<sup>50</sup> Y Jesús más chë shembásabioye tbojanayana: “Aca átšbeñe icošbuachéyeca, atsbo-caná cochántsemna; natjëmbana motsatoñe ca.”

## 8

### *Chë Jesúsbioye imojanájabuachana shembásenga*

<sup>1</sup> Chca tojanopasá chentšana, Jesús bëtš y base pueblënguëjana yojánana, tšabe noti-ciënga Bëngbe Bëtsabe amëndayama entsanga abuátambaye y abuayiynaye. Chë bnëtsana uta uatsjëndayëngna cháftaca imojtsajna. <sup>2</sup> Básefta shembásëngnaca imojtsetjëmbambnaye;

chëngbentsana Jesús bacna bayëjënga tojtanëbuacna y šocanëngama tojanashná. Chënga imojamna, María chë Magdalena ca uabobainá, ndábentsana Jesús canýsëfta bacna bayëjënga tojtanëbuacna; <sup>3</sup> Juana, Cuzbe shema (Cuza yojamna rey Heródesbe canýe uajabuachaná); Susana y inýe shembásenga; chëngna chë imojánbomna soyëngaca chëngbioye imojanëjabuáchana.

*Chë jenabe cuento*

*(Mt 13.1-9; Mc 4.1-9)*

<sup>4</sup> Ba pueblënguentšana mallajta entsanga tmojánbocana Jesús jinýama. Ba entsanga jouenama tmojanobeconá ora, Jesús mëntsá tojanacuntá: <sup>5</sup> “Canýe, canýe jená jénaye jaujquëshama yojëftsebecna. Yojsëjquëshaye orna, básefta jénaye benache juachañe yojuatquécjana; chiñna entsanga imojtsebotájaye, y jaja shloftšënga imojástjajna y imojtsósaña. <sup>6</sup> Inýe meshëngna ndëtsbenguiñe yojuatquécjana. Yojuábocna orna, betscó yojsábojo, chë fshantsiñe ndoñe yapa búyeshe yonjamna causa. <sup>7</sup> Inýe meshëngna uchmëshangañe yojuatquécjana y chë uchmëshangá lempe yojsatscué, chë jénayeca cánýiñe yojuábocna ora. <sup>8</sup> Inýe meshëngna, uanguaniñe yojuatquécjana. Yojuájua orna, bëtscá yojuashájona; canýe jénayentsána nýa mo patse meshënga yojuashájona.”

Jesús chca jacuéntama tojanpochocá ora, tojanáyebuachena: “Chë jouenama tmojt-sobenënga, šmochjouena ca.”

*Ndáyeca Jesús cuentëngaca yojánabuatambaye*

*(Mt 13.10-17; Mc 4.10-12)*

<sup>9</sup> As chora chabe uatsjëndayënga tmojantjá: —¿Ntsámo chë cuento yojsayana ca?

<sup>10</sup> Y Jesús tojanéyana: —Bëngbe Bëtsá tšëngaftanga cmontsinýanýná nýetsca chë mo iytemencá yomna soyënga chabe amëndayama, pero chë inýëngbioyna ndoñe; chë soyëngama chënga lempe cuentëngaca sëntsëtsëtsná. Chca, masque corente chamot-safšna, ndoñe chamondobená Bëngbe Bëtsabe soyënga jinýama; y masque beca quem soyënga chamouena, ndoñe queochátësertana ca.

*Jesús chë jenabe cuentama tojanabuayená*

*(Mt 13.18-23; Mc 4.13-20)*

<sup>11</sup> “Chë cuento mëntsá endayana: Chë jénaye Bëngbe Bëtsabe palabra entsemna. <sup>12</sup> Chë benache juachañe yojuatquécjana básefta jénaye endayana chë básefta entsanga Bëngbe Bëtsabiamá soyënga tmojouenënga; pero chora Satanás betscó jabana chënga Bëngbe Bëtsabe palabra jabëtsabuajuanama, chca, chënga ndoñe chamondëtsošbuáchema y bacna soyënguentšana ndatsebácanënga chamotsemnana. <sup>13</sup> Inýe entsanga mondmëna mo chë ndëtsbenguiñe yojuatquécjana jenaycá. Chë entsangna Bëngbe Bëtsabe palabra jouenana y oyejuayënga jtsemnana. Pero ndoñe nýets tempo chana jocochájuana; y chca, ndoñe bayté Bëngbe Bëtsáftaca ntjëftsemnëngana, cha ndoñe yapa tmontsašbuaché causa. Inýënga mochantsëbuayënja y Bëngbe Bëtsabeñe betsošbuáchiyama mochan-jasúfrianga; chë causa, Bëngbe Bëtsabe palabra cachcá chënga mochanjesonýaye. <sup>14</sup> Inýe entsanga mondmëna mo chë uchmëshangañe yojuatquécjana jenaycá. Chëngna Bëngbe Bëtsabe palabra jouenana, pero quem luarentša soyëngaca oyejuayënga jtsemnana yapa jesenójuabnayana, y mallajta crocénana y ba soyënga jtsebmónama yapa jésebošana; chama y ba soyëngama yapa enócochinýena causa, Bëngbe Bëtsabe soyëngama echantsebnëjtjomba y ndoñe quemochátama ntsámo Bëngbe Bëtsá tojayancá. <sup>15</sup> Inýe entsangna mondmëna mo chë uanguaniñe yojuatquécjana jenaycá. Chëngna Bëngbe Bëtsabe palabra botamana mochanjouena; tsabe ainánaca Bëngbe Bëtsabe palabriñe jtsošbuáchiyama jtseprontánëngana. Mo canýe betiye puerta tsabá tojtseshajuancá, chënga bëtscá tsabe soyënga Bëngbe Bëtsabiamá mochántsama. Chca mochántsama, Bëngbe Bëtsabeñe jtsošbuáchiyëse y nýetsca soyënguiñe puerta uantadënga jtsemnëse ca” —Jesús tojanabuayená.

*Chë uajuinÿanëshama cuento*  
(Mc 4.21-25)

<sup>16</sup> “Ndocná canÿe uajuinÿanëshama juajuinÿenana, chentsana ndaye sóyeca chëshama jtséstama o jutsnëshama tajsoye jtsajájuama; juajuinÿenana ndayá tsbanánoca juajájuama, chë luarentse amashjuanëngbiama chaotsebínÿnama. <sup>17</sup> Er ndocna yoiytémama soye, ntjinÿcá queochaisoquéda, y chë entsangbiama ndótatsëmbo soye, ntsotatsëmbcá queochaisoquéda.

<sup>18</sup> “Chcasna, botamana smochjouena, er nda Bëngbe Bëtsabe soyëngama tšabá tbojoserotá, Bëngbe Bëtsá echanjama cha más ba soyëngama chaboserotama; pero nda chë soyëngama ndoñe tontsebošá, chë nÿe batšá ibosertana soyëngama bochántsebnatjëmba ca” —Jesús tojánayana.

*Chë Jesusbe ndegombre pamíllanguentsënga*  
(Mt 12.46-50; Mc 3.31-35)

<sup>19</sup> Chora, chabe mamá y chabe catšátanga chë Jesús yojtsemnentse tmojánashjajna, pero ndoñe imontsobena chábioye jobéconana, yapa entsanga causa. <sup>20</sup> As canÿa Jesúsbioye mëntsá tbojaniyana: —Acbe mamá y acbe catšátanga shjoca montsemna y montseboše aca jinÿyama ca.

<sup>21</sup> As Jesús tojánayana: —Chë Bëngbe Bëtsabe palabra tmojouenënga y ntšamo tmojouencá tmojtsamënga jtsemnana atšbe mamá y atšbe catšátanga, atšbe ndegombre pamíllanguentsënga ca.

*Jesús chë binÿia y chë béjaye bonguana yojëtsbema*  
(Mt 8.23-27; Mc 4.35-41)

<sup>22</sup> Canÿe te, Jesús chabe uatsjéndayëngaftaca canÿe barquëshoye tojánamashëngo y chënga tojanëyana: “Uafjajónaye chenguana cuajna ca.”

As tmojána; <sup>23</sup> y imojtsenachnëjuanëntscuana Jesús yojtsomaná. Ndeolpe, chë béjayiñe corente jabuache binÿia yojóshjango y yojontsé béjaye chë barquëshoye jtsobuajútjiana. Y chca, chëngbiama puerte resjo yojtsemna. <sup>24</sup> Chora chë uatsjéndayënga tmojána Jesús jetsefšenama y mëntsá tmojaniyana: —¡Buatëmbayá! ¡Buatëmbayá! ¡Montsenatjëmbambana ca!

Chora Jesús tojantsbaná y chë binÿia y chë bëts olëshëngoye tojanmandá: “Bonguana šochtsemna ca.” Y chë binÿiayana tojanëjbana y lempe bonguana yojtsatsmëna.

<sup>25</sup> Chentsana Jesús chabe uatsjéndayënga tojanëyana: —¿Bëngbe Bëtsá tšëngaftanga jujabuáchama yobenama, cabá ndoñe smontsošbuaché ca?

Y chënga auatjanánënga y ojanánënga mëntsá imojtsenatsëtsnaye: —¿Nda quem boyabása yomna? ¡Cha tojamandá ora, masque chë binÿia y chë béjaynaca joyeunayana ca!

*Chë Gerasa luaroca bacna bayëja uambayá*  
(Mc 8.28-34; Mc 5.1-20)

<sup>26</sup> Chentsana Gerasa ca uabaina luaroye tmojánashjajna, Galilea ndirichiñe. <sup>27</sup> Jesús fshantsoye tojánastjango ora, chë pueblcana canÿe entsá chábioye tojánabo. Cha ya bayté bayëjbe juabna yojtsebomna, ndocna entsayá yonjanichëtjona; y yebniñe ndoñe yonjaniyena, sinó obanëngbe cuevëshënguenache. <sup>28</sup> Chë entsá, Jesúsbioye tbojáninÿe ora, chabe natsanoica yojshëntsamentšiyey y mëntsá yojtsáyebuache: —¿Ndayá átšeftaca cojtseboše, Jesús chë celoca Bëngbe Bëtsabe Uaquiñá? ¡Diosmanda ndoñe šcatjatssetšená ca!

<sup>29</sup> Chca tbojaniyana, er Jesús tojanmandá chë bacna bayëjbe juabna chábentsana chaueseobocnama. Ba soye chë bayëja yojánama chë entsá ndoñe tšabá chaotsemnama. Chë entsanga imojuamana cucuatšentsana y shecuatšentsana cha jtsëtsbuayana bonguana chaotsemnama, pero chana jtsatabebiana, y chë bacna bayëjbe mândoca

entsanga ndoyena luarëngoye yojánachana. <sup>30</sup> Jesús chë boyabásabioye tbojantjá: —¿Ntšamo cabaina ca?

Y cha tbojanjuá: —Atše sënduabaina Legión ca.

Cha chca tojánayana, er chábeñe ba bacna bayëjënga tmojánamashjna. <sup>31</sup> Y chë bayëjënga Jesús tmojanimpadá, chë corente uabouana tboye ndoñe chaondíchamuama. <sup>32</sup> Chentša béconana ba cotsënga imnajena, tjoca inmëtsosañe; as chë bayëjënga Jesús tmojanimpadá chë cotsëngbeñe jamashjna chaulaesciamama, y Jesús aífne chca tojanalesenciá. <sup>33</sup> As chë bayëjënga chë entsábentšana tmojésanbocana y chë cotsëngbeñe tmojánamashjna; y chentšana, chë cotsënga batsjocana peñëšëjana uafjajónayoye imojtsoshbuetše y yojtsatajo.

<sup>34</sup> Chë cotsënga anýenënga chca yojopásama tmojáninýe ora, chentšana tmojtsanacheta y tmojána chë soye jacuéntama chë pueblota y chiñe luarenache. <sup>35</sup> Entšanga tmojánbocana ndayá tojanopasacá jinýama, y Jesús yojtsemnoye tmojánashjajna ora, tmojáninýe chë entsá chë ndábentšana bayëjënga tmojtanbocna, Jesusbe shecuatšentše yojtsótbemañe, entsáyá uichëtjoná y chabe nýets juábnaca. Y chë entsanga chama corente imojouatjaná. <sup>36</sup> Ntšamo yojopasacá tmojáninýëngna entsángbioye tmojanacuntá ntšamo chca chë bacna bayëjbe juabna uambayá chora ya tšabá yojtsatsmënana. <sup>37</sup> Chentšana, nýetscanga chë Gerasa luarentše oyenënga Jesúsbioye imojtseimpadana chë luarentšana ínýoye chaotsoñama, er chënga corente imojtsauatja. As Jesús chë barquëshoye tojtanamáshëngo y chentšana tojtsanoñe. <sup>38</sup> Chë entsá chë ndábentšana bacna bayëjënga tmojtanbocana, Jesúsbioye tbojanimpadá cháftaca jama chabolesenciamama; pero cha ndoñe tbonjanlesenciá. Jesús tbojanmandá chauatoquedama y mëntšá tbojanianana: <sup>39</sup> “Ache yebnoye motsatoñe y cochjácuntaye lempe ntšamo Bëngbe Bëtsá acbiamama tojamcá ca.”

Chentšana chë boyabása yojtsatoñe, y nýets pueblëjana tojanacuntá ntšamo Jesús chabiamama tojanmcá

*Jesús canýe shembásabioye tbojanshná y tojanma Jairëbe bembetema cháuatayenama (Mt 9.18-26; Mc 5.21-43)*

<sup>40</sup> Jesús chë uafjajónayoye chenguánoica tojtanashjango ora, nýetsca entsanga oyejuayënga tmojtanofja, er nýetscanga chabiamama imojanobátmana. <sup>41</sup> Chora tojánashjango canýe entsá, Jairo ca uabainá. Cha inamna chë pueblentše chë judiëngbe enefjuana yebnentša mandayá. Jesusbe shecuatšentše yojoshëntsamentšiyey y ibojtseimpadana chabe yebnoye cháuama; <sup>42</sup> er chë nýe canýe bembe cha ibnabomná, bnëtsana uta uata bomná, chora ya jóbanama yojtsemna.

Y Jesús yojtsayëntscuana, chë entsanga chábioye imojtsojuatsëntšenayey. <sup>43</sup> Chë entsanguentše yojtsayey canýe shembása, oboftjajuanánaca šocá; cha ya bnëtsana uta uata chca inapadecena. Lempe ntšamo yojanbomncá ashnayëngbioyey atóbocayíñe yojtsepochóca, y ndocná yonjobenayey cha jáshnana. <sup>44</sup> Chë shembásana stëtšaicana Jesúsbioyey yojobeconá y chabe entsáyá sibujáua tojanábojajo. Y cachora chë oboftjajuanana ibojtsobojuána. <sup>45</sup> Chora Jesús tojanatjá: —¿Nda šjabojajo ca?

Nýetscanga imojtsichamo ndoñe ca; as Pedro tojánayana: —Buatëmbayá, entsanga cmontsatsëntšená y cmontsayájuatsëntšenayey ca.

<sup>46</sup> Pero Jesús cachiñe tojánayana: —Pronto nda šjabojajo, er atše sënjasenté obenana átsbentšana jóbocnana, mo nda stjashna orcá ca.

<sup>47</sup> Chë shembása tojáninýe Jesús yojtsetátšëmbo cha tbojánbojajuama. As chora, ngmëmnyáyá tojána y Jesusbe shecuatšentše yojoshëntsamentšiyey; y nýetscangbe delante tojanobuambá, ndáyeca tbojánbojajuama, y ntšamo cachora tšabá tojtanoquedama. <sup>48</sup> Chora Jesús tbojanianana: —Bembe. Bëngbe Bëtsábeñe icošbuachéyeca shnaná contsatsmëna. Natjëmbana motsatoñe ca.



<sup>49</sup> Jesús cabá yojtsóyebuambnantscuana, chë judiëngbe enefjuana yebnentša mandayábíocana canya tojánashjango, y chë mandayábíoye tbojaníyana: —Acbe bembe ya tontsóbana; ndoñe más chë Buatëmbayábíoye matëbéyabomana ca.

<sup>50</sup> Pero Jesús chë soye tojanuena; as chë mandayábíoye tbojaníyana: —Ndoñe matauatjana. Nye Bëngbe Bëtsábeñe cochtsošbuáchiye y acbe bembe tšabá echántsmëna ca.

<sup>51</sup> Chë yebnoye tmojánashjajna ora, Jesús ndoñe tonjanalesenciá banga choye jamashjnama, nye Pedro, Juan y Santiago y chë shembásetembe bëtsëtsatna aíñe. <sup>52</sup> Nýetscanga imojtsenóbošachiye y ngménaca imojtsóyebuambnaye, pero Jesús tojanëyana: “Ndoñe matenóbošachengana. Cha ndoñe chenatóbana; cha nye endëtsomañe ca.”

<sup>53</sup> Chë entsanga Jesúsbiyoye nye imojtsáfchaye, er chënga imojtsetátšëmbo chë shembásetema obaná yojëtsemnama. <sup>54</sup> Chora Jesús chábiyoye tbojanábuacueshache y jabuache tbojaníyana: “¡Shembásetema, matëtsbaná ca!”

<sup>55</sup> Y cha tojtanayena y cachora tojtantsbaná; y Jesús tojanamëndá chë shembásetema saná chamuajuatšë, chaosama. <sup>56</sup> Chë shembásetembe bëtsëtsata puerte ojnánánata ibojtsemna; y Jesús tojanamëndá, ndayá tojanopasama ndocnábeñe ntsecuëntayana.

## 9

### *Jesús, chabe uatsjëndayënga tojanichamó, Bëngbe Bëtsabe amëndayama jábuayenama (Mt 10.5-15; Mc 6.7-13)*

<sup>1</sup> Chentšana, Jesús chabe bnëtsana uta uatsjëndayënga tojánachembo, y mando y obenana tojanatšatá bacna bayëjënga entsángbentšana jtëbuacanama y šocanëngama jashnayama. <sup>2</sup> Tojanichamó Bëngbe Bëtsabe amëndayama jábuayenama y entsángbiyoye jashnayama. <sup>3</sup> Y mëntšá tojanëyana: “Benachiñama tondaye šmattsambaye: ni jatjonëfja, ni shecnaja, ni saná, ni crocénana; ni inye entsëjua jenotrócama cach ndoñe. <sup>4</sup> Canye yebnentše posada chacmojúyentšame ora, chentše šmochjoquéda inye pueblolye játantscuana. <sup>5</sup> Nderado ndayentše posada ndoñe chacmonjuyentšame, chentšana šmochjësebocana y shecuatšentša polvëshe šmochjësenstoto, chca, chëngbiyoye jinyaníyama chënga ndoñe tšabá tšëngaftangaftaca tmonjamama ca” —Jesús tojanabuayená.

<sup>6</sup> Asna chë uatsjëndayënga tmojëftsanbocana y tmojána, nýetsca chë base pueplotëmënguenache chë tšabe noticiënga abuyaiynaye y entsanga šocanëngama áshnaye.

### *Herodes y Jesús*

*(Mt 14.1-12; Mc 6.14-29)*

<sup>7</sup> Jesusbiamá y ntšamo yojtsanopasánama rey Herodes tojántatšëmbona; y ndoñe yontsetátšëmbo ntšamo jtsejuabnayana, er báseftanga imojtsanichamo Juan chë Ubayaná obanënguentsana tojtanayena ca, <sup>8</sup> inyënga imojtsanichamo chë Bëngbe Bëtsabe juabna oyebuambnayá Elías cachiñe tojánbocna ca, y inyëngna canya chë tempo imojanmëna Bëngbe Bëtsabe juabna oyebuambnayënguentsá obanënguentsana tojtanayena ca. <sup>9</sup> Pero Heródesna tojánayana: “Cach atše sënjanmandá Juanbe bestšaše chamotsëstjanguama. ¿As, nda cha nántsemna, chë ndabiama chca soyënga jtsóyebuambnayana sëntsuenana ca?”

Chíyeca Herodes yojtsenguaye ntšamo jamëse Jesús jinýama.

### *Jesús shachna uaranga boyabásenga saná tojanacaredadó*

*(Mt 14.13-21; Mc 6.30-44; Jn 6.1-14)*

<sup>10</sup> Chë Jesús tojánichamonga chábiyoye tmojtanashjango ora, lempe ntšamo chënga tmojanmama tmojancuentá. Y Jesús, nye chënga jëftsëbiatšese inýoye tojtsanoñe, Betsaida ca uabaina pueblolye. <sup>11</sup> Pero chë entsanga chë soye tmojántatšëmbona, y as tmojanasto; y

Jesusna tšabá chënga tojanëbuaja, y Bëngbe Bëtsabe amëndayama yojtsetsësnaye, y chë šoquënga imojtsemnëngbioye tojanashná.

<sup>12</sup> Ya jetiñe yojtsoyamná orna, chë bnëtsana uta uatsjëndayënga Jesúsbioye tmojanobeconá y mëntšá tmojanianyana: —Chë entsanga cuantichamuá, jóchnama y saná jonguangoñama chamotsama chë béconana pueblotémënguenache y luarënguenache; er quem luariñe ndocná quenatiyena ca.

<sup>13</sup> Jesús chora tojanëyana: —Tšëngaftanga saná chëngbioye šmochjacaredádaye ca.

Pero chënga tmojanjuá: —Nye shachna tandëse y uta beónata fsëntsebmoma; nyetscangbiamana saná jabuámiyama nderado nda tojasna, aíñe cuanjacaredádaye ca.

<sup>14</sup> Er mo shachna uaranga boyabásenga imnamna. Pero Jesusna chabe uatsjëndayënga tojanëyana: —Mamëndá nyetscanga chamotbiamama shachna bnëtsátsanënga ca.

<sup>15</sup> As chënga chca tmojanma y nyetsca entsanga tmojanotbiamana. <sup>16</sup> Chora, Jesús chë shachna tandëse y chë uta beónata tojanca, y celoye tojanontjesé, Bëngbe Bëtsábioye chama tbojtanchuá, tojanjatá y chabe uatsjëndayënga tojanantregá entsángbioye chamuatsatama. <sup>17</sup> Nyetsca entsanga tmojanse jtoshachaye nyetšá, y cabá bnëtsana uta sbarëco tmojanajutjé chë ojamnëtëmëngaca.

*Pedro tojánayana, Jesús chë Cristo bëtsemnama*  
(Mt 16.13-19; Mc 8.27-29)

<sup>18</sup> Canye te, Jesús canya Bëngbe Bëtsáftaca ibojtsencuëntaye ora, chabe uatsjëndayënga cháftaca imojtsemna. Chora tojanatjá: —¿Nda atše bëtsemnama entsanga imojtsichamo ca?

<sup>19</sup> Y chënga tmojanjuá: —Báseftanga montsichamo Juan ca, ínÿengna Elías ca, y ínÿengna canye Bëngbe Bëtsabe juabna oyebuambnaya tempscá mora tojtayena ca.

<sup>20</sup> As Jesús tojanatjá: —Y tšëngaftangna, ¿nda atše bëtsemnama ntšamo šmochjayana ca?

Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

*Jesús tojánayana cha ibojamna jóbana y jtayenana*  
(Mt 16.20-28; Mc 8.30-9.1)

<sup>21</sup> Pero Jesús corente chënga tojanamëndá ndocnábeñe chama ntsecuëntayana. <sup>22</sup> Y mëntšá cachabiamana tojánayana: —Chë Bëngbe Bëtsá Entšá tbojanbemá bontsemna puerte jasúfriana, chë judiëngbeñe bëtsëjemëngcá amëndayëngbiamana, chë judiëngbe bachnangbe más uámana amëndayëngbiamana y ley abuátambayëngbiamana uabotená jtsemnana. Entšanga mochanjóba, pero unga tianoye cha echántayena ca.

<sup>23</sup> Chentšana nyetsca entsanga tojanëyana: “Nda atšbe uatsjendayá jtsemnama tojtseboše, cháuyana nye Bëngbe Bëtsá yobena sempre chabe vidiñe jtsemándayama, chabe quem luarentša soyënga cachcá chauesonýá atše juastama, y cada te chaotseprontana átšbeyeca jasúfriana, y cruciñe jobanámnaca. <sup>24</sup> Nda tojtsama quem luarentše bëtscá soyënga jtsebmoma y atšbiamana jasúfriana ndoñe tontseprontana, chë nyetsca tescama yomna tšabe vida echanjobuetše. Pero nda quem luarentša soyënga cachcá tojëftsonýá atše juastama, masque chaóbana, chë nyetsca tescama yomna tšabe vida echántsebmoma. <sup>25</sup> Er ¿ndayama entšá buanjósërvia nyetsca quem luarentša soyënga jtsebmomana, cha pochocaná jtsemnama tojtsá y chë nyetsca tescama yomna tšabe vida tojtsoperdese? <sup>26</sup> Er ndëmuanýe entšá, atšbiamana o atšbe buayenana soyëngama tojtsëuatja, chë Bëngbe Bëtsá Entšá tbojanbemánaca chabiamana echantsëuatja, cha chabe bëts buashinÿinÿaniñe chaojésabo ora, chabe Taitabe bëts obenánaca y chabe angelotëmëngaftaca adoraná. <sup>27</sup> Ndegombre cbëyana, báseftanga muentše montsemnënga quemochatóbana, Bëngbe Bëtsá chabe obenánaca entsángbeñe jabomándama jabana ntjëftsinýcá ca” —cha tojánayana.

*Jesús inyetsá tojanobinýná  
(Mt 17.1-8; Mc 9.2-8)*

<sup>28</sup> Měntsá tojanopasá: Chca palabrēnga tojanoyebuambá chentsana posuftaytese, Jesús tojéftsanēbiatše Pedro, Santiago y Juan, y canye tjoye tojántsjua, Bēngbe Bētsáftaca jencuéntama. <sup>29</sup> Bēngbe Bētsáftaca ibojtsencuéntantscuana, chabe jubíá inyetsá yojtsinýna, y chabe uichētjonējuangá tša uafjantsējuangá yojtsamna y tša yojtsabuashinýinýana. <sup>30</sup> Chora uta boyabásata tbojanonýná, Jesúseftaca ibojtsencuéntaye. Chata ibojamna Moisés y Elías; <sup>31</sup> corente buashinýinýaniñe ibojtsemna, y chēnga imojtsencuéntaye ntšamo Jesús Jerusalenoca jasúfriana y jóbanana. <sup>32</sup> Masque Pedro y chabe enutata tša ocnayēnga imojtsemna, nye imojtsefšna y tmojáninýe Jesusbe juachañe tša yojtsebuashinýinýana y chē uta boyabásata cháftaca ibojtsemna. <sup>33</sup> Chē uta boyabásata Jesúsbentsana ibojoluára ora, Pedro, Jesúsbioye tbojanianyana: “Buatēmbayá, ¡tša tšabá bēngbiana cuanmēna muentše jtsemnana ca! Mora fchanjapórma unga tambotémēnga: cánýetema acbiana, ínýetema Moisesbiana y ínýetemna Elíasbiana ca.”

Pero Pedro ndoñe yontsetátšēmo ntšamo yojtsichámuama. <sup>34</sup> Y chca yojtsóyebuambnantscuana, canye jantsetēshe yojóbema, y chēngbioye yojáutsbotse, y chēnga chē tsoye imojtsemnana tmojáninýe ora, chē uatsjéndayēnga chama imojtsauatja. <sup>35</sup> Chora chē jantsetēshoicana canye oyebuambnayana tojanóbocna, mēntsá: “Mua atšbe Uaquiñá endmēna, atšbe uabuayaná; cha šmochtseyeunana ca.”

<sup>36</sup> Chē oyebuambnayana tmojanuenentsana, tmojáninýe Jesús canya yojtsemna. Chē uatsjéndayēnga iyteca imojtsemna, y chē tempo ndocnábioye chama imonjuenaye.

*Jesús, canye basa bacna bayējbe juabna uambayábioye tbojanshná  
(Mt 17.14-21; Mc 9.14-29)*

<sup>37</sup> Yēfsana, chē tjocana tmojtantsmá ora, ba entsānga tmojánbocana Jesús jajébenguama. <sup>38</sup> Chora, chē entsānguentsana canye boyabása tojanontsé mēntsá uayebuáchana: — Buatēmbayá, Diosmanda atšbe uaquiñá minye. Nye cha atšbe uaquiñá endmēna; <sup>39</sup> y mora, bayējbe juabna chábioye bontsēsháchichana, y nye ndeolpe jóntšana yoyana, ataque joshachana y uayoicana shashiye jtsabocanana. Y chábentsana chē bayēja ndoñe betscó ntjéseboconana, y cuerpiñe corente maltrataná jeseboshjonana. <sup>40</sup> Acbe uatsjéndayēnga sēnjaimpadá chē bayēja chábentsana chamuatábocnama, pero ndoñe chematobená ca.

<sup>41</sup> As Jesús tojánayana: —¡Nyetsá ndošbuáchiyēnga y bacna entsānga! ¿Buetayté šojtsemna tšēngaftangaftaca jēftsemnana y jtsēuantánana ca?

Chora chē boyabásabioye tbojanianyana: —Moye chē uaquiñá mánatse ca.

<sup>42</sup> Chē basa yojtsebeconá ora, chē bacna bayēja chábioye tbojanshajayé y inye ataque tbojanēshache. Pero Jesús chē bayējbioye tbojanácacana, chē basetémbioye tbojanshná y chabe taitábioye tbojtāntregá. <sup>43</sup> Y nyetscanga puerta ojnanánēnga imojtsemna, Bēngbe Bētsá tša obenana bomná inamnana.

*Jesús cachiñe tojánayana cha ibojamna jóbanana y jtayenana ca  
(Mt 17.22-23; Mc 9.30-32)*

Nyetsca entsānga, ndayá Jesús yojtsamama ojnanánēnga imojtsemnēntscuana, chabe uatsjéndayēnga cha tojanéyana: <sup>44</sup> “Quem soye tšabá šmochjouena y ndoñe chacmondébnētjomba: Chē Bēngbe Bētsá Entšá tbojanbemá entsāngbe cucuatšine mochanjáboshjona ca.”

<sup>45</sup> Pero chēnga ndoñe yontsósertana ntšamo Jesús yojtsētsētsnacá, er Bēngbe Bētsá ndoñe tonjanalesenciá chama chaósertama; y imojtsauatja Jesús jaimpádana chama chauabuayenama.

*¿Nda chē más uamaná yomna?  
(Mt 18.1-5; Mc 9.33-37)*

<sup>46</sup> Chë tempo, chë uatsjédayënga tmojanontsé enatsëtsnayana, nda chë más uamaná bétsemnama. <sup>47</sup> Jesús yojtsetátšëmbo ntšamo chënga imojtsejuabnayama; asna, canye básietema tbojánishache, chabe juachaca tbojántbema, <sup>48</sup> y chëngbioye tojanéyana: “Nda átšbeñe ošbuachiyá bétsemnama, quem basetëmbioye tbojofja, chana atše jofjana; y nda atše šojofja, chana chë nda šojichmó chábioynaca jofjana. Chíyeca, tšëngaftanguentše chë más nduamaná, cha chë más uamaná entsemna ca.”

*Nda bëngbe contra ndoñe tontsemná, bëngaftaca jtsemnana*

*(Mc 9.38-40)*

<sup>49</sup> Juan, Jesúsbioye tbojanianana: —Buatëmbayá, bënga fsënjinye canye boyabása y cha aca jótšëmbonëse, entšángbentsana bacna bayëjbe juabna endëtëbuacana; pero cha bëngaftaca ndoñe quenátsmëna causa, chama fsënjiesauyaná ca.

<sup>50</sup> As Jesús tbojanjuá: —Ndoñe šmatjuauyaná; er nda bëngbe contra ndoñe tontsemná, bëngaftaca jtsemnana ca.

*Santiago y Juánbioye Jesús tojanëcácana*

<sup>51</sup> Jesús celoye jtama yojtsobeco ora, nyëts añémoca cha yojtsejuabnaye Jerusalenoye jama. <sup>52</sup> Natsana báseftanga tojanichamó, y chënga tmojána canye base pueblotémoye Samaria luaroca, posada chabiana janguangoñama; <sup>53</sup> pero chë luarentša entšanga ndoñe tmonjånbošëna posada juantšamiana, er tmojántatšëmbona cha Jerusalenoye yojétsayama, chë chëngbe uayayëngbe uámana puebloye. <sup>54</sup> Chabe uatsjédayata, Santiago y Juan, chë soye tbojáninye ora, Jesús tmojanianana: “Bëngbe Utabná, ¿quectseboše bëndata fchaimandá celocana íñeshe chaótsatše y quem entšanga chaotsapochócaye ca?”

<sup>55</sup> Pero Jesús yojobuértana y chátbioye tojtsanëcácana, chca juabna bomna causa.

<sup>56</sup> Chentšana chënga inye pueblotémoye tmojtsanoñe.

*Chë Jesús juastama bošënga*

*(Mt 8.19-22)*

<sup>57</sup> Benachëjana imojtsajna ora, canye boyabása Jesúsbioye tbojanianana: —Atšbe Utabná, atše sëntseboše aca juastana ndémoye chacojtsá choye ca.

<sup>58</sup> Y Jesús tbojanjuá: —Chë zorrënga cuevëshënga mondbomna ndayentše jtsiyenama y chë shloftsetémëngna uajajonëshangá; pero chë Bëngbe Bëtsá Entšá tbojanbemá ndoñe quenátšbomna ndayentše jóchnama ca.

<sup>59</sup> Jesús inye entšábioye tbojanianana: —Smasto ca.

Pero cha tbojanjuá: —Atšbe Utabná, šmolesenciá atšbe taitá chjshesabotbontsañe ca.

<sup>60</sup> As Jesús tbojanianana: —Chë Bëngbe Bëtsabiana mo obanëngcá imomnënga, ntšamo Bëngbe Bëtsá yomandacá ndoñe tmontsama causa, chënga cachëngbe obanënga chamotsëtebuantsañe. Acna, motsa y Bëngbe Bëtsabe amëndayama entšanga cochabuayená ca.

<sup>61</sup> Inyana Jesúsbioye tbojanianana: —Atšbe Utabná, atše sëntseboše aca juastama, pero šmolesenciá natsana atšbe pamílangbiana jaisodiósoftama ca.

<sup>62</sup> As Jesús tbojanianana: —Nda cachabe soyëngama tbojtsengmena, Bëngbe Bëtsabe amëndayocama ndoñe ntososervënana; er cha jtsemnana mo canye arayacá, chë tojtse-trabája ora, stëtšoye tojtsaisantjeñcá ca.

## 10

*Jesús canyësëfta bnëtsana y uta entšanga tojanichamó Bëngbe Bëtsabe soyëngama jábuayenama*

<sup>1</sup> Chë soyënga chentšana, Bëngbe Utabná Jesús inye canyësëfta bnëtsana y útatnaca tojanabacacá, y utáta chabe natsana tojanichamó, chë cha ibojtsemna jama pueblëngoye y luarëngoye.



<sup>2</sup> Měntšá chěnga tojaněyana: “Canýe běts jajañe bětscá játbanama entsemna, pero peonga báseftanga; chíyeca, chentša nduñbioye jaimpádana ba peonga chauichamó chě jaja saná játbanama. Cachcá, quem luarentše bětscá entšanga montsemna Běngbe Bětsábioye nduabuátměnga, y chěngbioye chabiana abuayiynayěnga nýe báseftanga. Chíyeca, Běngbe Bětsá moimpadanga ba abuayiynayěnga chauichamó quem entšanga chábioye júbuajama. <sup>3</sup> Motsajna; šmochjinýe, atše tšěngaftanga cbontsichamná mo oveshěnga cuenta, tjañe quešěngbeñe. <sup>4</sup> Ndoñe šmattsambaye shecnaja, ni crocénana šmattsaiuábuenana, ni shecochětjoněshe; y nda chacmojacheuá ora, ndoñe yapa bën chentše šmatjáisenobiamnaye.

<sup>5</sup> “Ndaye yebnentše chašmojá mashjna ora, natsana šmochjayana: ‘Lempe tšabá quem yebnentše chaotsomñe ca’. <sup>6</sup> Y chě yebnentše chca juabna bomna entšanga tmomñěna, chě tšabiana ndegombre chentše echántsemna; pero ndóñese, chca tšabiana chentše ndoñe queochátměna. <sup>7</sup> Canýe yebnentše šmochjoquéda, y šmochjase y šmochjofšiye ntšamo chentše chacmojacaredadaycá; er chě trabajayá mercedo jtsebuájonana chca juacánama. Canýe pueblentše nýe inýe y inýe yebněnguenache ndoñe matajnana.

<sup>8</sup> “Ndaye pueblentše chašmojá mashjna y tšabá chacmojú buajentše, šmochjase ntšamo chentše chacmojacaredadaycá; <sup>9</sup> chentša šoquěnga šmochjáshnaye y šmochjáuyana: ‘Běngbe Bětsabe aměndayana tšěngaftangbeñe entsemna ca’. <sup>10</sup> Pero canýe pueblentše chašmojáshjango y ndoñe chacmonjú buaja, chentša tsashenangoye šmochjábocana y měntšá šmochjayana: <sup>11</sup> ‘¡Chě tšěngaftangbe pueblentša polvěshe, chě běngbe shecuatšěnguiñe tojuanjěshe, camuentše fšcuesenstětoná, chca, tšěngaftanga chašmotsetatšěmbuama ndoñe tšabá šmonjamama! Pero masque chca, šmochtsetatšěmbo chě Běngbe Bětsabe aměndayana tšěngaftangbeñe entsemnama ca.’ <sup>12</sup> Ndegombre cběyana, quem luare jopochócama te, chě luarentša entšangbioye Běngbe Bětsá puerte jabuache echantsacastígaye, y Sodoma puebloca bacna entšangbioye ndoñe nýa nýetšá jabuache ca” —Jesús tojánayana.

### *Chě nduauenana entšanga (Mt 11.20-24)*

<sup>13</sup> “¡Tša lastema Corazín puebloca entšangbiama! ¡Tša lastema Betsaida puebloca entšangbiama! Er chě muentše Běngbe Bětsabe obenánaca sěnjama soyěnga, chě bětš pueblěnga Tiro y Sidonoca chca matěnjochněnguse, chentša bacna entšanga ya tempo chěngbe bacna soyěngama ngmėnaca matmėntenó juabonga y Běngbe Bětsabe benache matmėntishache, y chca tmojamama chaotsótatšěmbuama, uajojěsha entšayangaca matmėntopormanga y jatinyashiñe matmėnjotbiama. <sup>14</sup> Pero ntšamo entšanga tmojamama, tšabá o ndoñe tšabá bětsemnama jayanama chaojobuache ora, tšěngaftanga más bětš castigo šmochántsebomna, chě Tiro y Sidonoca bacna entšangbe castiguama. <sup>15</sup> Y tšěngaftanga, Capernaum pueblentša entšanga, ¿celóntscoca atsebánaněnga šmochtsemna ca šmojtsejuabnanga? ¡Chě uabouana infiernoye cmochantsěsetjango!

<sup>16</sup> “Nda tšěngaftanga tcmojoyauná, chana atše joyeunayana; y nda tšěngaftanga tcmojtsěbaté, chana atše jtsabotena; y nda atše šojtsaboté, chana chě nda šojichmó chábioye jtsabotena.”

### *Chě canýsěfta bnětsana y uta entšanga tmojtanashjajna*

<sup>17</sup> Chě canýsěfta bnětsana y útatna Jesús yojtsemnoye tmojtanashjajna, puerte oyejuayěnga; y chábioye měntšá tmojaniyana: —¡Běngbe Utabná, aca jótšěmboněse, chě bacna bayějěngnaca šonjoyauná ca!

<sup>18</sup> Y Jesús tojaněyana: —Ndegombre. Y tšěngaftanga Satanásbioye chca šmontseyějaná ora, entsemna mo Satanás celocana canýe tcuinýcá jtsotsatšana stjinycá. <sup>19</sup> Atšna obenana tcbonjatšatá mětšcuayěnga y alacraněngbeñe chašmotsajnama, y běngbe uayayá Satanasbe nýets obenana jáyějanama, tšěngaftanga ndocá ntjapasacá. <sup>20</sup> Pero

móyejuanga, ndoñe chë bacna bayëjënga chacmóyaunama obenana šmojtsebomnama, sinó tšëngaftangbe uabaina celoca ya yojtsábemanama, er tšëngaftanga chë nyetsca tescama yomna tšabe vida šmochántsebomna ca —cha tojanëyana.

### *Jesús puerte tojanoyejuá*

(Mt 11.25-27; 13.16-17)

<sup>21</sup> Chora Jesús, chë Uámana Espíritbeyeca, corente oyejuayá tojánayana: “Atše cbatschuá, Taita, celoca y quem luarentša Utabná. Aca, chë nye batšá tatšëmbënga tconjanÿanÿé, chë tša tatšëmbënga y osertánëngbiama tcojaiytëme soyënga. Aíñe, chama cbontsadorana, Taita, aca chca chaotsemnama tcojábošenayeca.

<sup>22</sup> “Atšbe Taitá lempe chca šonjatšetá. Chë Uaquiñábioye ndocná corente quebnatábuatma; nye chë Taitá aíñe. Y chë Taitábioye ndocná corente quebnatábuatma; nye chë Uaquiñá aíñe, y ndëmuanÿengbioye chë Uaquiñá tojtseboše nda chë Taitá yomnama jinÿanÿiyama, chëngnaca chë Taitábioye mochantsábuatma ca.”

<sup>23</sup> Chentšana, Jesús chabe uatsjédayëngbioye tojanobuértana y nye chëngbioye tojanëyana: “¡Puerte oyejuayënga chë ntšamo tšëngaftanga šmontsonÿacá jinÿama tmojtsoebenënga! <sup>24</sup> Er atše chëyana, banga Bëngbe Bëtsabe juabna oyebuambnayënga y reyënga tmojánbošena chë tšëngaftanga šmontsonÿá soyënga jinÿana, pero ndoñe tmonjáninÿe; y tmojánbošena chë šmontsuenana soyënga jouenana, pero ndoñe tmonjanuena ca” —cha tojánayana.

### *Chë Samarioca tšabe entšabiama cuento*

<sup>25</sup> Canÿe judiëngbe ley abuatambayá yojontsé Jesúseftaca jóyebuambayama, y jisháchichiyamna mëntšá tbojantjá: —Buatëmbayá, ¿ndayá šojtsemna jamana chë nyetsca tescama yomna tšabe vida jtsebomnama ca?

<sup>26</sup> Y Jesús tbojanjuá: —¿Ntšamo leyiñe iuábemana? ¿Ndayá chiñe condbétsaliaye ca?

<sup>27</sup> Chë ley abuatambayá tbojanjuá: —“Chë Utabná Bëngbe Bëtsá cochtsebobonshana nyets ainánaca, nyets espíritoca, nyets añémoca y nyets juábnaca”; y “ndëmua entšánaca cochtsebobonshana, ntšamo cach aca cuenobobonshancá ca.”

<sup>28</sup> Chora Jesús tbojanijana: —Tšabá šconjojuá. Chca cochtsama y chë nyetsca tescama yomna tšabe vida cochántsebomna ca.

<sup>29</sup> Pero chë ley abuatambayá tšabá jenoquédamna Jesúsbioye tbojantjá: —Y ¿ndase chë ndëmua entšánaca yomna ca?

<sup>30</sup> As Jesús tbojanjuá: —Canÿe, Jerusalenocana Jericó benache canÿe entšá yojtsetsmá, y básefta salteadorënga imojébëbocna. Lempe imojtsefca, chë entšayánaca; imojtsejantšetaye y chentšana imojtsatóñënga, y chë entšá batšá obaná imojéseboshjona.

<sup>31</sup> Ndeolpe, chë benachëjana canÿe judiëngbe bachna yojtsachnëjuana. Chë entšábioye ibojinÿe ora, nye chabuacá yojtsëchnëguañe. <sup>32</sup> Cachcá, canÿe Levita, chë canÿe Bëngbe Bëtsabe bëts yebnoca trabajayá chëjana yojtsachnëjuana; y chë entšábioye ibojinÿe orna, nye chabuacá yojtsëchnëguañe.

<sup>33</sup> “Chorna, cach benachëjana canÿe samaritano ináboye. Chë entšábioye ibojinÿe orna, ibojóngmia. <sup>34</sup> Chábioye yojobeconá, aceitiye y vínoyeca ibojáshna, y lisianënguiñe entšëjuaca ibojuantsacjuá. Chabe couayiñe ibojëftsenjayiye, canÿe yebnoye posada uyentšamianoye ibojuánatse, y chentše chábioye ibojëftsinÿena. <sup>35</sup> Yëfsana, chë samaritano uta denario crocénana yojenóbojatsëca, chë mo uta tesca trabajuama crocénana nyetsá, y chë posada nduíñbioye ibojesabuenaye, y mëntšá ibojauyana: ‘Quem boyabása cochtsinÿena, y nderado más crocénana muabiama chacojenábojafjonasna, mëjana chaitísachnëjuana ora, cbochjabáisabuenaye ca.’ <sup>36</sup> Y chcasna, ¿chë unganguentšana nda cmojtsinÿana chë entšabiama yojtsejuabnaye cha cachacá entšá inamnama ca?”

<sup>37</sup> Y chë ley abuatambayá tbojanjuá: —Chë entšabiama tbojanongmé cha ca.

Y Jesús tbojanijana: —Asna, motsa y cachcá cochjama ca.

### *Jesús, María y Martbe yebnentše*

<sup>38</sup> Chentsana, Jesús benachējana yojsaye y canye base pueblotémoye tojéftsanamashéngo; y canye shembása Marta ca uabainá, chabe yebnentše tbojanofja.

<sup>39</sup> Martna canye quenata ibnabomna, María ca uabainá. Cha Jesusbe shecuatšentše yojótbema chabe palabra jouenama; <sup>40</sup> y chéntsucuaana Marta ba soyenga yojsama. Cha Jesúsbioye tojanobeconá y tbojanianyana: —Utabná, ¿tondayana cmontsentšamna, atšbe quenata nye canya chašonýá lempe jamama ca? Měyana chašuájabuache ca.

<sup>41</sup> Chora Jesús tbojanjuá: —Marta, Marta, bētsá soyēngama contsenócochinýena y contsenomantšná; <sup>42</sup> pero nye canye soye endmēna chē yoiyta soye jamama. María chca jamama tojobuáyana, chē más tšabe soye, y ndocná queochatsma cha chaotsajbanama ca.

## 11

### *Ntšamo Bēngbe Bētsáftaca cuanjencuénta* (Mt 6.9-15; 7.7-11)

<sup>1</sup> Canye, Jesús Bēngbe Bētsáftaca ibojsencuéntaye canye luarentše. Tojanpochocá orna, canya chabe uatsjendayēnguentsá tbojanianyana: —Bēngbe Utabná, Bēngbe Bētsáftaca jencuéntama šmabuatambá, ntšamo Juan chabe uatsjēndayēngaftaca tojanmcá ca.

<sup>2</sup> Y Jesús tojanéyana: —Bēngbe Bētsáftaca chašmojsencuénta ora, šmochjyana: Bēngbe Taitá, acbe uabaina chē más uámana uabainana chauesomñe. Acbe amēndayana chaóshjango.

<sup>3</sup> Mēnté šmiyatšatá, cada te šnetsējaboto tandēse.

<sup>4</sup> Bacna soyenga fsēnjama: šmotsaperdónaye; er bēngnaca nyetscanga chē bēngbiamana bacna soyenga amēngbioye fsēndbetsaperdónaye. Bacna soyenga jamama šojocohēngo ora, šcochjuyabuache chca ndenobuíyama.

<sup>5</sup> Jesús mēntšánaca tojanéyana: “Nderado aca acbe bacóbioye tsēntseto ora tcojá y tcojauyana: ‘Bacó, Diosmanda unga tandēse šmotsemná, <sup>6</sup> er canye atšbe amigo yebnoca tonjášhjango y tondaye quetsátsbomna cha jonánjama ca.’ <sup>7</sup> Ndegombre, cha tsocana tcmojojuá: ‘Ndoñe šmatébeyabomana. Bēsása ya entsatámena y atše y atšbe básenga ya fsēntsojá; ndoñe quetsátobena mora jotsbanana y chē tandēse jámnana ca.’ <sup>8</sup> Ndegombre, chē bacó ndoñe tonjotsbaná chē tandēse jámnama, cháftaca šuenatsētsnámase, cha pronto jotsbanana chca uébeyabomana ndoñe tconjajbaná causa, y lempe ntšamo cmojsajabotcá cha cmochanjoyiye. <sup>9</sup> Chcasna, atše cbéyana: Šmochjotjañe y Bēngbe Bētsá cmochanjátšataye; šmochjánguango y šmochanjínýena; šmochjachembo y cmochanjébētafjo. <sup>10</sup> Er ndánaca ndayá tojtsotjanañá, jóyēngacñana; y tojtsenguá cha, jónýenana; y nda tojtsechembuanábioye jebiatēfjuana ca.

<sup>11</sup> “¿Nda tšēngaftanguentsana nantsobena, taitá tojtsemnēse, cachabe uaquiñábioye canye mētšcuaye jatštayana, beona tbojtsotjanañe ora; <sup>12</sup> o canye alacránashe joyiyana, shēmnébé tbojtsotjanañe ora? <sup>13</sup> Y chca, tšēngaftanga, bacna soyenga amēnga, tšēngaftangbe basetemēngbioye tšabe soyenga jatšatayama šmojsamanēse, ¡más chē celoca Taitá, chē Uámana Espíritu echanjátšataye, chca tmojtsotjanañēngbioye ca!” —Jesús tojánayana.

### *Fariseunga tmojánayana Jesús Satanásbentšana obenana tojanóyēngacñe ca* (Mt 12.22-30; Mc 3.20-27)

<sup>14</sup> Jesús canye entšábentšana canye bacna bayēja tbojtánabocna. Chē bayēja ndēbiá chē entšábioye tbojánbema, y chábentšana tojésanbocna ora, chē ndēbiá tojtanontsé oye-buambnayana. Y chē entsānga chama imojenjnaná; <sup>15</sup> pero báseftanga imojtsichamo: “Beelzebú, cach Satanás, chē bacna bayējēngbe amēndayá, quem boyabásabioye obenana tbojatšetá chē bayējēnga chauatēbuacnama ca.”

<sup>16</sup> Y ínÿenga, Jesús jisháchichiyamna tmojanimpadá canÿe bêts soye chaoma, jinÿanyiyama cha celoca obenana inabomna o ndoñe. <sup>17</sup> Pero Jesús yojtsetátšëmbo ntšamo chëngbe juabna bétsemnana. As tojanëyana: “Canÿe amëndayábentše entsanga tmojtsenojatá y tmojtsenáyase, cachënga jtsenpochócana; y canÿe yebnentše oyenënga tmojtsenojatá y tmojtsenáyase, chë pamíllanga tšabá nÿets tempo ndoñe quemochátsmëna. <sup>18</sup> Cachcá, Satanás tojtsenojatá y cachabe contra tojtsemnëse, ¿ntšamo nantsobena chabe mándayana quem luarentše jëftsebomnana? Chca sentsichamo, er tšëngaftanga šmotsichamo Beelzebube obenánaca chë bayëjënga stsatëbuacana ca; <sup>19</sup> pero chca ndegombre tojtsemnëse, ¿ndábeyeca tšëngaftangbe usetonënga obenana imojtsebomna chë bacna bayëjënga jtëbuacnama? Chíyecna, cachënga montsinÿinÿná ntšamo ndegombre yomnana, y tšëngaftanga ndoñe ndegombre soye šmotsichámuama. <sup>20</sup> Y atšna, Bëngbe Bëtsabe obenánaca entsángbentsana chë bayëjënga sëndëtëbuacana; y chë soye entsinÿinÿná, Bëngbe Bëtsabe amëndayana tšëngaftangbioye tojóshjanguama.

<sup>21</sup> “Canÿe corente añemo bomna entsá, bëtscá ármangaca chabe yebna tojtsinÿenëse, chë tsoca tomna soyënga ndoñe ntjotšana. <sup>22</sup> Pero inÿa chabiamá más añemo bomná tojabo y tbojabetseyëñaná, chë cha yojanašbuaché armangá jtsabocana y chë tobomna sóynaca; y ntšamo chë inÿa tojtsebošcá chë soyëngaca jamana.

<sup>23</sup> “Nda ndoñe átšeftaca tontsemná, atšbe uayayá jtsemnana. Y nda átšeftaca ndoñe tontsetrabája, chana atšbe contra jtsetrabájayana ca” —Jesús tojánayana.

*Ndayá inopása chë bacna entsángaftaca  
(Mt 12.43-45)*

<sup>24</sup> “Canÿe bacna bayëja canÿe entsábentsana tojësebocna ora, bojojo luarënguenache chë bayëja jtsanana, ndayentše jóchnama onguayiñe. Ndoñe tonjínÿena ora, jenójuaboyana: ‘Atšbe oyenoye, chë ndayentsana sënjëftsebochnoye chanjesshécona ca.’ <sup>25</sup> Y choye tojtashjango ora, jinÿenana lempe tšabá cha jtesamashënguama, mo tsajniñe y prontániñe cuaftsemncá. <sup>26</sup> Chora chë bayëja jana y inÿe canÿsëfta bayëjënga, chabiamá más opëjënga jobiatšana, nÿetscanga choye jamashjnama, chë boyabásabeñe joyéñanama. Y chca, chë boyabása tempscama más bacna entsá jtoquédana, chora chë natsanama más bayëjënga abamna causa ca” —Jesús tojánayana.

*Chë ndegombre oyejuayana*

<sup>27</sup> Jesús chë soyënga yojtsichamëntscuana, entsanguentše canÿe shembása yoyuayebuáchena: —¡Puerte oyejuayá chë quem luaroye tcmojúshjango y tcmojëftseboché shembása ca!

<sup>28</sup> As Jesús tbojanianana: —Más oyejuayana bomnëngna, chë Bëngbe Bëtsabe palabra tmojouena y chca tmojtsamënga ca.

*Chë bacna entsanga Jesús tmojanimpadá canÿe bêts soye chaoma, chabe obenana jinÿama*

*(Mt 12.38-42; Mc 8.12)*

<sup>29</sup> Entšanga más imojtsójotoye Jesús yojtsemnentše, y Jesús tojanontšé jáuyanana: “Morsca entsanga puerte bacna entsanga; chënga montsotjanañe atše canÿe bêts soye chaima atšbe obenana jinÿama, pero ndoñe chca quemochátinÿe, sinó nÿe chë ndayá yomna mo chë Jonásoftaca tojanopasá soycá. <sup>30</sup> Er chca, ntšamo Jonás Nínive puebloca entsanga canÿe bêts soye tojaninÿanyé Bëngbe Bëtsá obená yomnama chamotsetatšëmbuama, chë Bëngbe Bëtsá Entšá tbojanbemánaca entsinÿanÿná morsca entsángbioye, Bëngbe Bëtsabe amëndayana tojóshjanguama. <sup>31</sup> Bëngbe Bëtsá ntšamo morsca entsanga tmojanmama yochjayana te, chë Sur luaroca reiná echanjotsaye y morsca entsángbiamá echanjayana ndoñe tšabá tmonjama ca; er chana chë quem luare iuajbana luarëngocana tojánabo Salomonbe osertanánaca palabrënga jouenama, y chë mora muentše entsemnana, Salomonbiamá más uamaná endmëna. <sup>32</sup> Chë entsanga



tšabá o ndoñe tšabá tmonjamama jayanama te, chë Nínive bëts puebloca entsángnaca mochanjotsaye y mochanjayana morsca entsánga ndoñe tšabá tmonjama ca; er chënga, Jonás yojtsabuayiynaye ora, tmojanoyeuná y chë tšabe benache tmojtanishache, y chë mora muentše entsemnana, Jonasbiana más uamaná endmëna ca” –Jesús tojánayana.

*Chë cuerpama uajuinñanësha*  
(Mt 5.15; 6.22-23)

<sup>33</sup> “Ndocná canye uajuinñanësha juajuinñenana, canye iytëmena luaroye juajájuama, ni canye cajonëshe tajsoye, sinó canye tsbanana luaroca juajájuama, chca, chë luaroye amashjuanëngbiana chaotsebínñama. <sup>34</sup> Acbe bominye tšabá totsomñëse, acbe cuerpama mo canye uajuinñanëshacá jtsemnana; chíyeca aca jtsoobenana, ntšamo tcojtsamcá chë bominyeca jtsonñayana. Chë bominye ndoñe tšabá tontsemnësna, chë bominye tondaye ntsoobenana jamana, ntšamo tcojtsamcá chacobená jinñama. Cachcá, acbe ainaniñe tšabe juabnënga tcojtsebomnëse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontsebomnësna, lempe ntšamo chacojtsamcá ndoñe tšabá queochátsmëna. <sup>35</sup> Cuedado šmochtsebomna, tšëngaftangbe ainaniñe nñe tšabe juabnënga chaotsemnana, chca, lempe ntšamo chašmojtsamcá tšabá chaotsemnana, y bacna juabnënga ndoñe chaondëtsemnana. <sup>36</sup> Chcasna, lempe ntšamo šmojtsamcá tšabá tojtsemnëse y ndocna bacna sóyesna, tšëngaftanga bëtscá tšabe soyënga šmochántsama; y chca, tšëngaftanga šmochántsemna mo canye uajuinñanësha puerte tšabá tojtsebinñacá ca” –Jesús tojánayana.

*Jesús chë fariseungbiana y ley abuátambayëngbiana tojánayana, chënga ndoñe tšabá montsama ca*  
(Mt 23.1-36; Mc 12.38-40; Lc 20.45-47)

<sup>37</sup> Jesús chca jayanama tojanpochocá ora, chábioye canye fariseo tbojanofja chabe yebnoye jauasama. As Jesús tojánamashëngo y mesëshentše tojanótbema. <sup>38</sup> Chë fariseo tojanëuatjaná, Jesús ntsacuentšabiácá jasama yojontsé causa, ndoñe ntšamo chë judiënga imojanamancá, Bëngbe Bëtsabe delante tšábënga jtsatsmënama. <sup>39</sup> Pero Bëngbe Utabná tbojanianana: “Tšëngaftanga fariseunga šmondmëna mo entsángcá ndëmuanñënga chë tazëšënga y šcnenënga shjoicajana jtsóbojabiana, pero tsoyna nñe cachcá jonñayana. Tšëngaftanga becá jtsamana entsángbiana mo tšabëngcá jtsinñama; pero tšëngaftangbe ainanentše jútjena entsemna nñe jtsatbëbanama y bacna soyënga jtsamama juabnëngaca. <sup>40</sup> ¡Juabna ndbomnënga! Tšëngaftanga ndoñe šmondëtatsëmbo, chë tšëngaftangbentšana entsánga ndayá jinñama imobencá tojamá, chë tšëngaftangbe tsoye yomna soyëngnaca tojamama; y chíyeca, chabiana cachcá enduámama ndayá tšëngaftangbe ainanoye yomna soyënga, y chë entsángbe delante šmojama soyënga. <sup>41</sup> Tšëngaftanga cmontsamna, chë soyënguiñe ndayá ainaniñe yomnentšana ínñëngbioye jatšatayana, y chca, lempe ntšamo chašmojtsamcá Bëngbe Bëtsabe delante tšabá echántsemna ca.

<sup>42</sup> “¡Tša lastema tšëngaftangbiana fariseunga! Tšëngaftanga Bëngbe Bëtsabiana jtsequëcnayana chë jajañentša sananga bnëtsanentšana canye soye nyetsá, y chë binche matatëmënguentšana menta, ruda y nyetsca binche matatemënguentšánëna; pero nñe batšá jtsamana chë nyetscanga cachca derechënga chamotsebomnana y cha jtsebobonshánama. Quem soyënga cocayé cmontsamna jtsamana, chë inñe tšabe soyënga ntjajbanacá ca.

<sup>43</sup> “¡Tša lastema tšëngaftangbiana fariseunga! Tšëngaftanga tša jtsebošana chë judiëngbe enefjuana yebnënguenache chë más uámama luarënga jtsebomnana, y benachiñe nña puerte respétoca entsánga chacmotsacheuanayama ca.

<sup>44</sup> “¡Tša lastema tšëngaftangbiana! Smondmëna mo obanënga uatbontsaniñcá, ndoñe ntsinñana, y entsánga ntsetatšëmbcá chiñe jtsebotájayana. Chca šmondmëna, er

tšëngaftangbe ainana entsemna jútjena bacna juabnëngaca, pero entsangbiana ndoñe chca quešmátinÿna ca.”

<sup>45</sup> Jesús chca tojánayana ora, canÿe ley abuatambayá tbojaniana: —Buatëmbayá, chca palabrenga contsoyebuambná ora, bëngbiámna ndoñe tšabá quecátichamo ca.

<sup>46</sup> Pero Jesús tojánayana: —¡Tša lastema tšëngaftangbiámna, chë ley abuátambayënga! Mo canÿe entšá, couáybioye canÿe uauta uasmanësha tbojuasmá, y chësha ndoñe yapa chaondëtsautama tondaye tontsamcá, tšëngaftanga entsángbioye jtsamëndayana bëtscá mandënga chamotsocumplínama, pero cach tšëngaftanga ni mo batšatëmnaca jtsamana chë mandënga jtsocumplínama ca.

<sup>47</sup> “¡Tša lastema tšëngaftangbiana! Tšëngaftanga jtsamana chë Bëngbe Bëtsabe juabna oyeuambnayënga tempsquënga bëtsëtsa entsanga chamotsemnana, chëngbe cuevëshënga jtsatspórmayëse; pero chë mo chëngcá, canÿe buayenana sóyeca tmojabëngbioye ndoñe ntsayaunanana. Y chë tempsquënga chca oyeuambnayëngbioye tšëngaftangbe bëts taitanga tmojtsanëbaye. <sup>48</sup> Chca jtsamëse, tšëngaftanga šmontsinÿanÿná, ntšamo chë bëts taitanga tmojanmcá tšabá yomna ca tšëngaftanga šmojtsejuabnama, er chënga chë oyeuambnayëngbioye tmojtsanëbaye y tšëngaftangna chëngbe cuevëshënga jtsatspórmayana.

<sup>49</sup> “Chíyeca, Bëngbe Bëtsá chabe bëts osertanánaca tojánayana: ‘Atšë chëngbioye chanjichamuá atšbe juabna oyeuambnayënga y atšbiana abuayinayënga, y báseftangbioye mochantsëbaye y inÿengbioyna mochantsëcamiye ca.’ <sup>50</sup> Y chca, nÿets castigo morsca entsángbeñe echántsemna, nÿetsca Bëngbe Bëtsabe juabna oyeuambnayënga tmojóbanama, Bëngbe Bëtsá quem luare tojanma orscana; <sup>51</sup> Abëlbioye tbojanóba orscana, Zacarías tmojanóbantscoñe. Zacaríasna Bëngbe Bëtsabe bëts yebnentšë tmojanóba, altar y chë entsanga Bëngbe Bëtsábioye imojánadorana luariñe. Chcasna, Bëngbe Bëtsá echanjama chë oyeuambnayënga tmojanóbanama, morsca entsángbeñe nÿets castigo chaotsemnana ca.

<sup>52</sup> “¡Tša lastema tšëngaftangbiana, chë ley abuátambayënga! Tšëngaftanga jtsamana, Bëngbe Bëtsabe soyëngama jtsetatšëmbuama entsangbiana yapa totcá chaotsemnana. Cach tšëngaftanga ndoñe quešmátobena chë soyëngama tšabá jtsetatšëmbuana, y chama jtsetatšëmbuama tmojtsebošëngbioyna ndoñe quešmatalesénciaye ca” —Jesús tojánayana.

<sup>53</sup> Jesús chë soyënga tojánayanama, chë ley abuátambayënga y fariseunga puerte tojánëtëna, y cha chentšana yojtsaisebocana ora, tmojanontšë chábioye becá tjanayana, y imojtsama ba soyëngama chaóyeuambama, <sup>54</sup> chca, jisháchichiyama jtsebošëse, cachá ntšamo tojayana sóyeca chënga jtsebonnama ndáyeca chábioye mal jaquédana.

## 12

*Jesús, chë bacna entsanga ntšamo ndegombre tmojuabnacá ndinÿinÿayëngbiana tojanabatambá*

<sup>1</sup> Chëntscuana, ba uaranga entsanga chentšë tmojanójoto; tša entsanga causa, nÿetscanga imojtsenatsëntšenaye. Chora Jesús tojanontšë jóyeuambayama, y natsana chabe uatsjëndayëngbioye tojanéyana: “Chë fariseungbe buatëmbana soyëngama cuedado šmochtsebomna, chënga mondmëna bacna entsanga, ntšamo ndegombre tmojuabnacá ndinÿinÿayënga. Ntšamo chë levadura jamana nÿetsana chauábochema, cachcá chëngbe buatëmbana soyëngaca, chë fariseunga montsobena jamana bëtscá entsanga ntšamo ndoñe tšabá tontsemncá chamotsamama. <sup>2</sup> Er ndocna yoiytëmena soye, ntjinÿcá queochaisoquéda; y chë ndótatšëmbo soye, ntsoatšëmbcá queochaisoquéda. <sup>3</sup> Chíyeca, chë mora nÿe tšëngaftangbiana šmojtsichamo soyënga, chë entsangbiana mo ibetiñcá cuaftsemna soyënga, entsanga chama botamana mochanjátatšëmbona. Y chë iytëcana šmojtsichamo soyënga, nÿetsca entsángbioye mochántsabuyayinaye, mo nda canÿe yebnentša tsbanánocana noticiënga tojtsayebuachcá ca” —cha tojanéyana.

*Nda ndegombre cuantsebiauatja  
(Mt 10.26-31)*

<sup>4</sup> “Tšëngaftanga, atšbe amiguënga, cbochjáuyana: Ndoñe matauatjëngana nÿe chë tšëngaftangbe cuerpo japochócama imobenëngbiama, pero chentšana más jamana ndoñe ntsobenana. <sup>5</sup> Cbochanjabuayená ndábioye cmojtsamna jtsebiauatjana: šmochtsebiauatja chë nda vida jtsabuajuánama y chentšana infiernoye jtsichámuama obenana endbomnábioye; chábioye cocayé šmochtsebiauatja ca.

<sup>6</sup> “¿Shachna jaja shloftšetémënga ndoñe nÿe uta denario crocenánama mondbétsena? Pero masque chca, Bëngbe Bëtsá chëngbiama sempre jesenójuabnayana. <sup>7</sup> Y tšëngaftangbiama Bëngbe Bëtsá lempe endëtatsëmbo, y bueta stjënëjënga tšëngaftangbe bestšašinë yomnámnaca. As ndoñe matauatjëngana; tšëngaftanga ba jaja shloftšëngbiama corente más šmonduámama ca” —Jesús tojánayana.

*Ndabiama Jesucristo yochjayana chabe entšá yomna ca  
(Mt 10.32-33; 12.32; 10.19-20)*

<sup>8</sup> “Atse cbëyana, nda atšbe entšá yomna ca entšangbe delante tojayanabiama, chë Bëngbe Bëtsá Entšá tbojanbemánaca, Bëngbe Bëtsabe angelëngbe delante echanjayana chë entšá chabia yomna ca; <sup>9</sup> pero nda entšangbe delante, atšbe entšá ndoñe yondmëna ca tojayanabiama, chë Bëngbe Bëtsá Entšá tbojanbemá, Bëngbe Bëtsabe angelëngbe delante echanjayana, cha chabe entšá ndoñe yondmëna ca.

<sup>10</sup> “Bëngbe Bëtsá bochanjaperdóna, nda chë Bëngbe Bëtsá Entšá tbojanbemabiama ndoñe tšabá tontsichamuábioye, pero chë Uámana Espíritbiama ndoñe tšabá tontsichamuábioyna ndoñe.

<sup>11</sup> “Tšëngaftanga chë judiëngbe enefjuana yebnëngoye, ntšamo entšanga bétsamama ichámëngbioye y mandadëngbioye chacmojunatse ora, ndoñe šmattsenócochinÿena ntšamo o ndáyeca šmochjenéuyanama, o ndayá šmochjayanama; <sup>12</sup> er chë Uámana Espiritu cmochanjabuayená ntšamo jayanama tojtsemncá, jóyebuambayama chacmojt-samna ora ca” —Jesús tojánayana.

*Entšabiama resjo yomna, nÿe yapa bomnana jesejuabayana*

<sup>13</sup> Chentšana, canÿa entšanguentšá Jesúsbioye tbojaniyana: —Buatëmbayá, atšbe catšata momandá chë átšbioye otocana soyënga chašuatoyé ca.

<sup>14</sup> Y Jesús tbojaniyana: —Bacó, ¿nda atše šojábema tsëndatbe ujanayá ca?

<sup>15</sup> Y entšángbioye tojanëyana: —Šmochjinÿe y cuedado šmochtsebomna chë nÿe yapa soyënga jtsebomnama bošama; er masque bëtscá soyënga chašmotsóbomñe, chca ndoñe quešmochátstatšëmbo aiñe tšabe vida taišmochjónÿenama ca.

<sup>16</sup> Y chora mëntšá tojanacuntá: “Inamna canÿe bomna entšá, y chabe fshantsënguñe tša jaja saná yojtsopodena. <sup>17</sup> Chë bomná chora mëntšá yojtsejuabnaye, ‘¿Y morna, ntšamo chjama? er ndoñe quetsátsbomna ndayentše atšbe jaja saná jtsobocjayama ca.’ <sup>18</sup> Y mëntšá yojeniyana: ‘Chë grano uaquëcjnaye yebnënga chantsendbiama, y inÿe más bëts yebnënga chanjëtsejo, y chiñe nÿetsca atšbe jaja saná chantsóbocjaye y nÿetsca atšbe soyëngnaca. <sup>19</sup> Y chora atše chjeniyana: Bacó, bëtscá soyënga contsebocjana, ba uatama cmochanjuáshjache. Morna, cochjóchna, cochjase, cochjatëmo, cochjóboyejuaye ca.’ <sup>20</sup> Pero Bëngbe Bëtsá chábioye ibojauyana: ‘Obëjema, cach quem ibeta cochanjóbona; y asna, chë contsebocjana soye, ¿ndabiama yochtsemna ca?’ ”

<sup>21</sup> Y Jesús chora tojánayana: “Chca endbopása chë nÿe chabiama bomnana tojtsejuabá y bëtscá Bëngbe Bëtsabe soyënga ndoñe tonjëftsashjáftaca ca.”

*Bëngbe Bëtsá chabe básenga jtsanÿenana  
(Mt 6.25-34)*

<sup>22</sup> Chentšana, Jesús chabe uatsjëndayënga tojanëyana: “Quem soye cbëyana: Ndoñe šmattsenócochinÿena ndayá šmochjase o šmochjofsiye vida jtsebomnama, ni ndaye

entsáyá šmochjuíchëtjuama cach ndoñe. <sup>23</sup> Ndegombre, vida chë sanama más enduámana y cuerpo chë entsáyama más. <sup>24</sup> Chë ftsenga shloftšënga šmochjanýe: tondaye ntjájena, ni jaja saná ntjátbanana, ni grano uaquëcjnaye yebnënga ntsebomnana; pero Bëngbe Bëtsá chënga saná jtsatšatnayana. ¡Y tšëngaftanga chë ftsenga shloftšëngbiama puerte más šmonduámana! <sup>25</sup> Masque chca endmëna, masque canýa tša tojesenócochinýena, ¿ntšamo nanjobenaye jamana, chë ntsachetšá vida yochtsebomnentsana canýe hora vida más jabotiýana? <sup>26</sup> Chcasna, nýe chë base soye jamama ndoñe šmontsobenëse, ¿ndayama chë inýe soyëngama šmochjatenócochinýena?

<sup>27</sup> “Šmochjuinýe chë lirio uantšefjushangá jtsajuajnana: ndoñe ntsetrabájayana, ni ntseshabiamnayana. Pero atše cbëyana, ndegombre ni mo rey Salomón, nýetsca chabe bomnánaca, chë lirio uantšefjushangacá nýetšá botamana quenjatspormana. <sup>28</sup> Bëngbe Bëtsá tša botamana shácuana tojuama, y chë shácuana mënté jajoca jtsamnana y yëfsana iñoca. Cha chë shácuana chca tojamëse, ndegombre tšëngaftangbiámna Bëngbe Bëtsá echanjama entsáyá chašmotsábomnana, jentšanga Bëngbe Bëtsábeñe nýe batšá ošbuáchiyënga! <sup>29</sup> Chýeca, ndoñe šmattsenócochinýena ndayá jasama o jofšiyama onguayiñe; <sup>30</sup> er chë soyëngama quem luarentša entsanga mondbétsenocochinýena, pero tšëngaftanga ndoñe. Tšëngaftangna canýe Taitá šmondbomna, y cha endétatšëmbo ndayá cmëjabótama. <sup>31</sup> Más tšabana, tšëngaftanga šmochtseboše Bëngbe Bëtsá tšëngaftangbe ainaniñe chaotsemándama, y chë cmojtšëjaboto soyënga nýe šmochanjóyëngacñe ca” — Jesús tojánayana.

*Chë celoca bomnana*  
(Mt 6.19-21)

<sup>32</sup> “Ndoñe matauatjëngana atšbe ústonënga, atšbe básefta oveshënga, er Bëngbe Bëtsá tšabá tbonjuínynana chabe amëndayana tšëngaftanga jatšatayama. <sup>33</sup> Lempe ntšamo šmobomncá šmochtsatobuiye y chë ujabotëngbioye šmochtsatšataye. Mo ndotan-guánaye shecnajiñe crocénana cuafjacjacá, celoca tšabe soyënga šmochjobuajo. Choca ndocna te queochaisopochóca, atbëbanënga choye ndoñe quemochátamashjna jatbëbama, y mejojón ndoñe queochatspochóca; <sup>34</sup> er chë ndayentše tšëngaftangbe bomnana tojtsem-ntšá soyëngama, ainánaca tšëngaftanga šmochántsejuabnaye ca” — Jesús tojánayana.

*Bëngbe Utabná yochjésabama jtseprontánana*

<sup>35</sup> “Mo chë oservënënga, chë entsáyá uichëtjonënga y uajuinýananëshangaca chëngbe nduiño yochtashjanguama cuaftsobatmancá, tšëngaftanga šmochtseprontana Bëngbe Utabná yochjésabama. <sup>36</sup> Chca, tšëngaftanga šmochántsemna mo chë oservënënga, tšabe entsáyaca bopormánënga y uajuinýananëshangaca chëngbe amëndayá casamentocana yochtashjanguama cuaftsobatmancá; y chca, chë nduiño tojabochembo ora, cachora chë oservënënga jtebiatëfjuama. <sup>37</sup> Puerte oyejuayënga chë oservënënga, chë nduiño tojtashjango ora tmojtsefšnënga. Ndegombre cbëyana, chora chë mandayá sëndorëche echantásnaye, mesëshentše chë oservënënga echanjátbiama, y saná echanjujuatšiyë. <sup>38</sup> Puerte oyejuayënga chënga, chë tmojtsefšnënga cha tojtashjango ora, masque tsëntseto ora o bínýanoye. <sup>39</sup> Quem soye tšabá chacmësertá: chë yebnentša nduiño, ntseco ora atbëbaná yochjabama tojtsetatšëmbëse, cha ndoñe nanjaleséncia ndocná jushañe chaondbemama, chë yebnoye jtsamashënguama y jtsatbëbama. <sup>40</sup> Tšëngaftángnaca šmochtseprontana, er chë Bëngbe Bëtsá Entšá tbojanbemá echanjésabo, entsanga chama tondaye tmontsejuabná ora ca” — Jesús tojánayana.

*Chë tšabe oservená y chë bacna oservená*  
(Mt 24.45-51)

<sup>41</sup> Pedro, Jesúsbioye tbojaníyana: —Utabná, ¿chë tconjayana cuento nýe bëngbiama o nýetscangbiama yochtsemna ca?



<sup>42</sup> Y Bëngbe Utabná tbojanjuá: —¿Nda yomna chë oservená, ntšamo chë nduiño tojtsebošcá amá y nyets juábnaca amá? Cha jtsemnana nda chë nduiño bochjëftsebošhona chë yebnentšënga chaotsanýenama, y jasama tojtsemna ora chaújuatšema. <sup>43</sup> Puerte oyejuayá chë oservená, chë nduiño tojtashjango ora, cha tbojínýena jtsamëse ntšamo tbojtsemncá. <sup>44</sup> Ndegombre cbëyana, chë nduiño chábioye bochanjaimpáda nyetsca chabe soyënga chabotsinýeñama. <sup>45</sup> Pero chë oservená, chabe nduiño betesco ndoñe yochantaboca tojtsejuabná, y tojontsé chë inýe oservenënga, boyabásenga y shembásenga jtsajantšetayana, becá jtsešana, jofšiyana y jtsótmenana, <sup>46</sup> cha ndoñe tontsejuabná te y tontsetátšëmbo ora, chabe nduiño echántashjango y puerte jabuache bochantsecastíga, y echanjama cha jasúfriama chabotsemnana, mo chë Bëngbe Bëtsábeñe ndošbuáchiyënga mochanjasufriacá.

<sup>47</sup> “Chë oservená, nda tojtsetátšëmbo ndayá chë nduiño tojtsebošama, pero ndoñe tontseprontana y ndoñe tontsobedecena, cha ba soye mochántsetjanja. <sup>48</sup> Y chë oservená, ntsetatšëmbcá ntšámnaca tojabuachjuanguá, y chë causa chamotsetjanjama tbojtsemnësna, chana más batšá mochántsetjanja. Nda bëtscá soyënga tmojatštábioye jauyanana, bëtscá soyënga chaoma ca; y nda bëts trabajo tmojabonýébioyna jauyanana, más bëts trabajo chaoma ca.”

*Jesusbe causa, entšángbeñe más jtsentsjanayana  
(Mt 10.34-36)*

<sup>49</sup> “Atše sënjabo quem luariñe jabojuinýiyama, y itša sëntseboše malaye ya ctsangbototjuana! <sup>50</sup> Atše šontsemna puerte jasúfriana, y ipuerte ngménaca sëntsobátmana chca chaotsemnana! <sup>51</sup> ¿Tšëngaftanga šmojtsejuabná atše tijabo quem luarentše entšanga natjëmbana chamotsiyenama? Ndegombre ndoñe chca queochátsmëna; atše sënjabo causa, entšanga más mochántsejtsjanaye. <sup>52</sup> Er mëntescana, canýe yebnentše, shachnënga ndoñe quemochátenëyeunana, únganga útatbe contra y útata úngangbe contra mochántsemna. <sup>53</sup> Taitá uaquiñabe contra echántsemna, y uaquiñá taitabe contra; bebmá, bembëbe contra, y bembë bebmabe contra; uambén mamá, bebincuabe contra, y bebincuá uambén mamabe contra ca” —cha tojánayana.

*Ndaye tempo yochtsemnana ntšamo inétsotatšëmbo  
(Mt 16.1-4; Mc 8.11-13)*

<sup>54</sup> Mëntsánaca Jesús entšanga tojanëyana: “Tšëngaftanga, chë jantšetëshënga shinýe uenatjëmbambanoicana tojóbcnana šmojinýe ora šmondbétsichamo ‘echanjuafté ca’, y ndegombre chca jopásana. <sup>55</sup> Y tsmoicoicana tojtsebínýia orna, tšëngaftanga šmondbétsichamo ‘echanjojënýana ca’, y ndegombre chca jopásana. <sup>56</sup> ¡Bacna entšanga, chë ntšamo ndegombre šmojuabnacá ndinýinýayënga! Ntšamo quem luarentše yochtsemnana, ndayá celoca šmojinýama tša tšabá šmojtsetatšëmbëse, ¿ndáyeca ndoñe šmontsobena jtsetatšëmbuana ndaye bëts soye quem tempo Bëngbe Bëtsá cmojtšinýanýnana ca?” —Jesús tojánayana.

*Chë uayayáftaca natjëmbana jtenbemana  
(Mt 5.25-26)*

<sup>57</sup> “¿Ndáyeca cach tšëngaftanga ndoñe šmondbáyana ndayá tšabá bëtsemnana? <sup>58</sup> Nderado nda tcmojtsedemandá y cabildoye jotsánama cmojtsemna, cabá choye ndáshjango ora, betesco cháftaca cochtenoyántsia. Chca ndóñese, chë demandayá mandádbioye cmochanjúshjango, chë mandadna josticiëngbe cucuatšinë cmochanjáboshjona, y chënga cárceloye cmochanjutame. <sup>59</sup> Ndegombre cbëyana, chentšana ndoñe quecochtëtsbocna, nyets ndebénana candesopagantscuana ca” —Jesús tojánayana.

## 13

### *Bëngbe Bëtsabe benache jtishachana*

<sup>1</sup> Cach ora, báseftanga tmojána Jesús jinýama, y tmojancuentá ndayá chë mandado Pilato tojanmama; chana básefta Galileoca boyabásenga tojtsanëbaye, y chëngbe buiñe yojenajuabó chë Bëngbe Bëtsábioye jëtschuayama tmojanóba bayëngbe buiñeca.

<sup>2</sup> Y Jesús chënga tojanéyana: “¿Tšëngaftanga šmojtsejuabná, chë Galileoca entšanga chca tmojapasá, chë luarentša inýe boyabásengbiana chënga más bacna soye amënga imojamna causa ca? <sup>3</sup> Ndegombre cbéyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tšëngaftángnaca šmochanjóbana. <sup>4</sup> O, ¿tšëngaftanga šmnétsejuabnaye, chë Jerusalemntša bnétsana posufta entšanga tmojanóbanënga, chë Jerusalemoca binche uafjajónaye Siloé béconana tsbanana jebna soye tojtsanáshajaye ora, chënga imojamna chë ínýenga Jerusalemntše oyenëngbiana más bacna soyënga amënga ca? <sup>5</sup> Ndegombre cbéyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tšëngaftángnaca šmochanjóbana ca” —Jesús tojanéyana.

### *Chë ndëshajona higo betiyama cuento*

<sup>6</sup> Jesús mëntšá tojanacuntá jabuátambama: “Canýe entšá jajoca canýe higo betiye inabomna, y yojá nderado nantseshájonama, pero tondaye yonjínýena. <sup>7</sup> Chcasna, chë jajañe bojanýábioye cha ibojauyana: ‘Mouena, ya unga uata tsabó quem higo betiyoje jaborrepárama, nderado nantseshájonama, pero ndocna te tondaye chiyátinýena; chíyeca, motsetëtše. ¿Ndayama quem jajañe yochjátsjena ca?’ <sup>8</sup> Pero chë jajañe inýená ibojauyana: ‘Bacó, inýe uata cachcá monýá, fshantse chanjáboplojua y uanguanëshe chanjabotboto. <sup>9</sup> Nderado chca jamëse, nanjashájona; y ndóñesna, chora cocayé cuantsetëtše ca.’ ”

### *Jesús canýe ochnayté, canýe tsëstjona shembásabioye tbojanshná*

<sup>10</sup> Canýe, canýe ochnayté Jesús yojontsé entšanga jabuátambana, chë judiëngbe enefjuana yebnentše, <sup>11</sup> y chentše yojtsemna canýe shembása; cha ya bnétsana posufta uata yojtsešoca. Canýe bacna bayëja chábeñe tojánamashëngo y chca tseštjoná tbojtsanbema, y tondayama yontsobena jtondiríchana. <sup>12</sup> Jesús chábioye tbojáninýe ora, tbojanchembo y mëntšá tbojanianyana: “Batá, mora ya ndoñe šocá quecátsmëna ca.”

<sup>13</sup> Chora Jesús chabe cucuatšënga chábeñe tojanjajó, y cachora chë shembása yojtondirícha, y tojanontsé Bëngbe Bëtsábioye jëtschuayama. <sup>14</sup> Pero chë enefjuana yebnentša mándayana tbojánetna, Jesús chë shembása ochnayté tbojanshnama, y entšanga tojanéyana: —Chnéguana te comna jatrabájama; chora šmochjabo jenóshnama; ochnaytese ndoñe ca.

<sup>15</sup> Y Bëngbe Utabná tbojanjuá: —¡Bacna entšanga, ntšamo ndegombre šmojuabnacá ndinýinýenayënga! ¿Tšëngaftanguentšá ndocná chë ochnayté chabe uacná o chabe burrotema buanjuajafjoná, juanatsama béjaye chaofšema? <sup>16</sup> Chcasna, quem shembása, canýa Abrahámntšana entšá, y Satanasbe causa bnétsana posufta uata šocá yojtsemna, ¿ndoñe tšabá yondmëna canýe ochnayté chë bayëja jtsebojuánana ca?

<sup>17</sup> Jesús chca tojánayana ora, chabe uayayënga imojtsëuatja, y nyetsca entšanga imojtsóyejuaye Jesús tša bëts soyënga yojtsamama.

### *Chë mostaztiye jenayama cuento (Mt 13.31-32; Mc 4.30-32)*

<sup>18</sup> Jesús mëntšánaca tojánayana: “¿Ndayacá Bëngbe Bëtsabe amëndayana yomna, o ndaye sóyeca nanjopódia chama jábuayenana ca? <sup>19</sup> Endmëna mo canýe mostaza jénaye, canýe entšá jajañe tojajecá; chiyna jójuana y canýe bëts betiye jóbemana; tša bëtsashe jóbemana, chíyeca chë jaja shloftšënga chë buacuashënguiñe uajajonëtemëngá jauábopormana ca.”

*Chë levadurama cuento  
(Mt 13.33)*

<sup>20</sup> Mëntśánaca Jesús tojánayana: “¿Ndaye sóyeca chjobenaye Bëngbe Bëtsabe amëndayama jábuayenama ca? <sup>21</sup> Endmëna mo levadurcă; canye shembása chana jenájua bana unga medida arninýañe, nýetsana chauabochama ca.”

*Chë base utëntśá bëshása  
(Mt 7.13-14, 21-23)*

<sup>22</sup> Jerusalemoye benache, Jesús entsanga yojsabuátambaye bëts pueblënguñe y base pueblotëmënguñe. <sup>23</sup> Canýa chábioye tbojantjá: —Bëngbe Utabná, ¿nýe báseftanga imomna chë atsebácanënga mochtsemnënga ca?

Y Jesús tbojanjúá: <sup>24</sup> —Puerte šmochtsentsena chë base utëntśá bëshásajana jamashjnama; er ndegombre cbëyana, banga mochántseboše chëjana jamashjnama, pero ndoñe quemochatobenaye. <sup>25</sup> Chë yebnentśa nduiño chaojotsbaná y chë bëshása chaojtatámentśana, tšëngaftanga chë shjoca chašmojtsemnënga, šmochántsechembuana, mëntśá jtsichámëse: “Utabná, šmëbëtafjo ca.” Pero cha cmochanjáuyana, “Atše ndoñe quetsátstatšëmbo ndëmoquënga tšëngaftanga šmomnama ca.” <sup>26</sup> Chora tšëngaftanga šmochanjontśé ichámuana: “Aaftaca cánýiñe fsënjase y fsënjofśé, y aca bëngbe tsáshenañe tconjabuatambá ca.” <sup>27</sup> Pero cha cmochanjójuaye: “Ya tcbonjáuyana, ndëmoquënga šmomnama ndoñe tstátšëmbo ca. ¡Atšbentśana mojuánanga, bacna soyënga amënga ca!

<sup>28</sup> “Chora chentše puerte šmochanjenóbošachna y tsetśanama juatsašënga šmochantsenoftëšjojnaye, Abraham, Isaac, Jacob y nýetscanga Bëngbe Bëtsabe juabna oyebuambnayënga Bëngbe Bëtsabe amëndayoca imojtsemnana chašmojinýe ora, y tšëngaftanga chentśana cmochtëbuacanama. <sup>29</sup> Y shinýe bocanoicana y uenatjëmbambanoicana, tsmanoicana y tsjuanoicana entsanga mochanjabo y juasama mochanjotbiana Bëngbe Bëtsabe amëndayentše. <sup>30</sup> Y banga mora nduámanënga imomnënga, chora uámanënga mochántsemna; y banga mora uámanënga imomnënga, chora nduámanënga mochántsemna ca” —Jesús tojánayana.

*Jesús tbojanongmé Jerusalemëntśa entsangbiana  
(Mt 23.37-39)*

<sup>31</sup> Jesús chë soyënga tojanëyana ora, básefta fariseunga tmojánashjajna y tmojaniana: —Muentśana motsatoñe; Herodes entseboše aca jtsóbama ca.

<sup>32</sup> Y Jesús tojanëjua: —Motsajna y šmochjauyana chë corente studio bomná, mo tjañe mesetcá: “Minýe, mënté y yëfse entsángbentśana bacna bayëjënga sëndëtëbuacana y šoquënga sëndáshnaye, y baseftaytesna chanjapochóca ca.” <sup>33</sup> Pero atše šontsemna mënté y yëfse jtsayana, y baseftaytesna Jerusalemoye jana, er ndoñe tšabá ntsemnana canýa Bëngbe Bëtsabe juabna oyebuambnayá Jerusalemëntśa chábuañe chaóbana ca.

<sup>34</sup> “¡Jerusalemëntśa entsanga, Jerusalemëntśa entsanga, tšëngaftanga chë Bëngbe Bëtsabe juabna oyebuambnayënga jtsëbáyana, y chë Bëngbe Bëtsabe ichmónëngbioye ndëtšbëngaca jtsatëchënganjana jtsëbáyama! ¡Bueta soye atše sënjábošena tšëngaftanga átšbioye júbuajama, mo canýe tuamba chabe bolletotëmënga juatëngmiáša tajsoye cuaftajayecá, pero tšëngaftanga ndoñe chešmátsbošena! <sup>35</sup> Y šmochjinýe, mora atše cachcá cbochanjesënyaye, y chca, atśna enánanga cbochanjésabashejuana, mo canýe yebna cachcá tcojesonýa y énañe tcojeseboshjoncá. Y ndegombre, tšëngaftanga morscana ndoñe más atše quešmochántinýe; y atše šmochántinýe, chë: ‘¡Corente bendición bomná, Bëngbe Utabnabe obenánaca tojabá ca!’ chašmojtichamo ora ca” —Jesús tojánayana.

## 14

*Jesús, canýe uafshachanáca šocábioye tbojanshná*

<sup>1</sup> Canye ochnayté, Jesús tojána jasama fariseungbe canye amëndayabe yebnoye; y chë fariseunga yejuana imojtserreparana, er ndayá Jesús nanjama. <sup>2</sup> Chéntšnaca, chabe delante yojtsemna canye entšá uafshachaná naca šocá. <sup>3</sup> As Jesús chë ley abuatambayënga y fariseunga tojanatjá: “¿Quenlesenciana canye ochnayté canye šocá jáshnama o ndoñe ca?”

<sup>4</sup> Chëngna ndocá tmonjanjuá. As Jesús chë šocábioye tbojánishache, tbojanshná y tbojaniana chaotsatoñe ca. <sup>5</sup> Y chë fariseunga tojanéyana: “¿Nda tšëngaftanguentšá, nderado chabe uaquiñá o uacná canye tboye tojtsótsatše, cachora ndoñe nanjá jet-sejátsëcama, masque ochnayté totsomñëse ca?”

<sup>6</sup> Y chëngna ndocá tmonjanobená cha jojuana.

### *Chë casamentoye ófjanënga*

<sup>7</sup> Jesús tojáninýe ntšamo chë ófjanënga quëfseroye imojtsachnějuana jotbiamama; as mëntšá chënga tojanabuayená: <sup>8</sup> “Canye casamentama nda chacmojojfa ora, quëfseroca ndoñe catjót bema, er nderado inýe ofjaná acbiamá más uamaná ústonoye nandaboye; <sup>9</sup> y nderado chë tsëndatbe ofjajaná nanjabo y cmatjauyana: ‘Mua chentše chaótbema, maluaré ca’, y chora cmatjotóca ouatjentše chafjoca jana jatótbemana. <sup>10</sup> Chamna, nda chacmojojfa ora, chafjoca cochjót bema, chca, chë ofjajaná chaojabo ora chacmëyana: ‘Taita, quëfseroye motsëchnëngoñe ca’. Y chca, aca chë chentše tmojtsetbiámanëngbiama uamaná cochántsemna. <sup>11</sup> Er nda cachá bëtšá tojtsenobiamná, nduamaná mochántsebema; y nda cachá nduamaná tojtsenobiamná, aíñe bëtšá mochanjábema ca.”

<sup>12</sup> Y chë tbojanofja entšábioynaca Jesús mëntšá tbojaniana: “Fiesta chacojama o sananga chacojtsebomna ora, ndoñe cattšëbuájajana acbe amiguënga, catšátanga, ni pamíllanga, ni acbe juachañe oyenënga bomnënga; er chëngnaca, fiesta chamojtsebomna ora, aca cmochantétofja, y chca ya acbe uacanana soye cochántsebomna. <sup>13</sup> Chamna, canye fiesta chacojama ora, cochjúbuaja ndbomnějëmënga, jama ndobenënga, coshetënga y jtanënga, <sup>14</sup> y aca corente oyejuayá cochántsemna; er chënga ndoñe quemochatobenaye cachcá aca jtétofjana, pero acna acbe uacanana soye cochántsebomna, chë Bëngbe Bëtšabe bominýiñe tšábënga imomnënga chamojtayena ora ca” —cha tbojaniana.

### *Chë bëtš sanama cuento* (Mt 22.1-10)

<sup>15</sup> Chca tojanuena ora, canýa chë mesëshentše tbemaná tojánayana: —¡Puerte oyejuayá echántsemna Bëngbe Bëtšabe amëndayoca juasama chaojtsemná ca!

<sup>16</sup> Chora Jesús tbojaniana: —Canye bacó canye bëtš saná yojapróna y ba entšanga yojúbuaja. <sup>17</sup> Juasama ya yojobuache ora, canye oservená ibojíchmua chë ófjanënga jáuyanama chamotsajna, ya lempe yojtseprontana ca. <sup>18</sup> Pero chorna nýetscanga imojtšé jtsoyátšëmbuana. Canýa yojayana: “Cabá mora canye fshantse sënjobuámiñe, y šontsemna jana jarrepárama. Chcasna, aslëpaye šmotsepacenciá ca.” <sup>19</sup> Inýa yojayana: “Bnëtsana toronga sënjobuámiñe, y šontsemna jana jányama, jaárama taimochjosérvia. Chcasna, aslëpaye šmotsepacenciá ca.” <sup>20</sup> Y inýa yojayana: “Cabá mora sëntsobouamá, y chë causa, ndoñe quichatobenaye jama ca.” <sup>21</sup> Chora chë oservená yojesshëcona y lempe chabe nduiñbioye ibojauenaye. Chë nduiño tša ibojtsetna, y chë oservenábioye ibojauyana: “Cam ora motsa tsashenangoye y benachëngoye, y moye cochjunatse ndbomnějëmënga, jama ndobenënga, jtanënga y coshetënga ca.” <sup>22</sup> Chentša bënëntscose, chë oservená chë nduiñbioye ibojauyana: “Bacó, ya sënjama ntšamo šconjamandacá, y cabá inýëngbiama luare entsemna ca.” <sup>23</sup> As chë nduiño ibojauyana: “Motsa benachëngoye y betiyetemëngaca jetjaniñëngoye, y entšanga cochjautáriaye moye chamuábama, atšbe yebna chaojtjiama; <sup>24</sup> er ndegombre cbëyana, chë natsana sënjobuajënguentsá ndocná atšbe saná queochatsse ca.”

### *Ntšamo yomna Cristbe ustoná jtsemnama* (Mt 10.37-38)



<sup>25</sup> Mallajta entsanga Jesús imojtséstona; as cha tojanobuértana y tojanéyana: <sup>26</sup> “Nderado nda átšbioye tojabo, y ntšamo chabe taitá, chabe mamá, chabe shema, chabe básenga, chabe catšátanga y uabénanga tuababuánýeshanama, y ntšamo cachá tuenobobonshánama, atše ndoñe más corente šontsebobonshánëse, cha ndoñe ntsobenenana atšbe uatsjendayá jtsemnana. <sup>27</sup> Y nda, atšbiamana ndoñe tontseprontana jasúfriama y cruciñe jobanámnaca, y nyetsca chabe quem luare soyenga ndoñe tonjéshoshjona atše juastama, cha ndoñe ntsobenenana atšbe uatsjendayá jtsemnana.

<sup>28</sup> “Nderado nda tšëngaftanguentsá tojtsejuabná canye tsbanana jebna soye japórmama, ¿cha natsana ndoñe nanjót'bema jinýama ntsachetšá crocénana chentše yochjuába, y japochócama nyetsá crocénana tayojtsebomnana? <sup>29</sup> Chca ndóñese, nderado chë uajatsana ucuatjoniñe tojapormá y lempe jajebuama ndoñe tonjobenase, nyetscanga chca tmojinýënga, muantsáfchaye y mëntšá muantsichamo: <sup>30</sup> ‘Quemëjema jajebuama tonjontsé, y japochócama ndoñe chenatobená ca.’

<sup>31</sup> “O ¿ndaye rey inye réyefraca jéntsjava tbojotocase, natsana ndoñe nanjót'bema jajuaboyama, nderado nanjobenaye bnétsana uaranga soldadëngaftaca chë ínýabioye jayénjanana, chë inya uta bnétsana uaranga soldadëngaftaca tojtsabose? <sup>32</sup> Y ndóñesna, chë inye rey cabá bënoca tojtsemna ora, básefta entsanga echanjichamuá, cha jauyanama más tšabá yomna ndoñe jatentsjanayana ca.

<sup>33</sup> “Chcasna, ndánaca tšëngaftanguentsá, lempe ntšamo tobomncá ndoñe cachcá tonjesonýá, cha ndoñe ntsobenenana atšbe uatsjendayá jtsemnana ca” —Jesús tojánayana.

### *Chë tamó fténana tojtsebocna ora* (Mt 5.13; Mc 9.50)

<sup>34</sup> “Tamó tšabe soye endmëna; pero chë tamó fténana tojtsóbemëse, tšëngaftanga ndoñe quešmátobena jamana tempcá sanana cachiñe chaotsatsmënama, ni saná jatamuama. Chë ftena tamó tondayama ntsošervénana, cachcá, chë atšbe uatsjéndayënga jtsemnana tmojtsebošënga, pero lempe jéshoshjonama ndoñe tmontseboše, cach ndoñe chama ntsošervénana. <sup>35</sup> Chë ftena tamó ndoñe ntsošervénana ni fshantsama, ni uanguanëshama. Nye jtsëtšenana. Chë jouenama tmojtsobenënga, šmochjouena ca” —Jesús tojánayana.

## 15

### *Chë ótsëna oveshabiamana cuento* (Mt 18.10-14)

<sup>1</sup> Nyetsca chë Romocama impuesto entsángbioye atjanayënga y inye bacna soyënga amënga, Jesúsbioye imojánajna chabe palabra jouenama; <sup>2</sup> y chë fariseunga y ley abuátambayënga chama Jesusbiamana podesca imojtsoyebuambná, mëntšá: —Mua bacna soyënga amëngaftaca entsenuta y chëngaftaca entsesá ca.

<sup>3</sup> As Jesús mëntšá tojanacuntá, chënga jabuátambama: <sup>4</sup> —¿Nda tšëngaftanguentsá, canye patse oveshënga tojtsabamna, y canya tbojtsobuétšëse, chë inye esconëfta bnétsana y esconëfta oveshënga shëntsjañe ndoñe cachcá nanjesënýaye, y nanjá chë otšená jetsenguanguama candëtsónýeñëntscuana? <sup>5</sup> Y tbojtsinýena ora, oyejuayá chë oveshá jesotantšájuana; <sup>6</sup> y yebnoye tojtashjango orna, chabe amiguënga y juachañe oyenënga jáchembuana y mëntšá jáuyanana: “Atšeftaca móyejuanga, er chë sentsanobuetše oveshá sentsinýena ca.” <sup>7</sup> Atše cbëyana, cachcá, celócnaca más oyejuayana jtsebínýnana, canye bacna soyënga amá tšabe benache tojtishachabiamana, y ndoñe nya yapa, esconëfta bnétsana y esconëfta tšabe soyënga amëngbiamana, chë ndoñe yondujaboto bacna soyënga amana jtsajbanana ca.

### *Chë crocénana tojetsónýena shembásabiamana cuento*

<sup>8</sup> “O mēntšá, ¿ndēmua shembása, bnětsana uámana crocénana tojtsebomna y cánŷana tojtsobuětsěse, chora ndoñe canŷe uajuinŷaněsha nanjuajuinŷená, y cuedádoca chē yebna nantsetsjajo y botamana chē crocénana nantsenguango candětsónŷeñěntscuana?  
<sup>9</sup> Y tojtsinŷena ora, chabe amiguēnga y juachañe oyena shembásenga jáchembuana, y mēntšá jáuyanana: ‘Atšeftaca móyejuanga, er chē sěntsanobuetše crocénana sěntsinŷena ca.’  
<sup>10</sup> Atše cběyana, cachcá, chē Běngbe Bětsabe angelotéměngbeñe oyejuayana jtsebínŷnana, nŷe canŷe bacna soyēnga amá chē tšabe benache tojtishachabiana ca” —Jesús tojánayana.

### *Chē uaquiñá bacna benachiñe ayá*

<sup>11</sup> Jesús mēntšánaca tojanacuntá: “Canŷe entšá uta uaquiñata yojánabamna; <sup>12</sup> y canŷe, chē ngomēnche uaquiñá chabe taitábioye ibojauyana: ‘Taita, atšbe otocana soyēnga šmatatšetá ca.’ As chē befta lempe chē uta uaquiñata yojtējátaye.

<sup>13</sup> “Chentšana baseftaytesna, chē más bobontse uaquiñá lempe ntšamo ibojobuachcá yojtsatobuiye y chē crocenánaca bēn luaroye yojtsoñe, y choca, cha nŷe ntšamo ibojochēngcá, mocá yojenobuiye, y chca, lempe yojtsepochóca. <sup>14</sup> Lempe crocénana yojtsoshañe orna, bēts shěntsana chē luarentše yojóshjango, y chē causa cha ibojotóca shěntseca jtsejétanana. <sup>15</sup> As, cha yojá trabajo jonguangoñama y yojínŷena chē luarentša canŷe entšábentše; chana, chabe jajoye ibojíchmua cotšēnga jtsanŷenama. <sup>16</sup> Chē bobontsna yojtseboše chē cotšbe saná jtšesana, pero ndocná tondaye ibonjanájuatšnaye.

<sup>17</sup> “Cabana, botamana yojinŷe ntšamo yojtsepasacá, y mēntšá yojenójuaboye: ‘¡Bueta trabájayēnga atšbe taitabe yebnentše bētscá saná mondětsóbomñe, y atše muentše shěntsama chanjóbana ca! <sup>18</sup> Chantá atšbe taitabe yebnoye y mēntšá cha chanjauyana: Taita, šmotseperdoná. Atše tijama ndayá Běngbe Bětsá ndoñe yondbošcá, y ntšamo aca ndoñe condbošcá. <sup>19</sup> Mora ya merecido taitatobuajoñe acbe uaquiñá jtsabáinama; nŷe canŷe acbe trabajayacá Diosmanda šmatofja ca.’ <sup>20</sup> Chca jěftsenójuaboyěse, yojontšé cachabe yebnoye jtana.

“Cabá bēnoca yojtsemna ora, chabe taitá chábioye ibojinŷe, y chabe uaquiñabiana ibojóngmia, y jajébenguama betscó yojá; ibojajebengo, ibojtotsejcuá y tša yojtsóyejuayayama chē uaquiñábioye ibojtámochó. <sup>21</sup> Chora chē uaquiñá ibojauyana: ‘Taita, šmotseperdoná. Atše tijama ndayá Běngbe Bětsá ndoñe yondbošcá, y ntšamo aca ndoñe condbošcá; mora ya merecido taitatobuajoñe acbe uaquiñá jtsabáinama ca.’ <sup>22</sup> Pero chē Taitana chabe oservēnga yojámēndaye: ‘Betscó chē más tšabe entšayá mauaca y matspormanga, montšabuechětjo y matsšhecochětjo. <sup>23</sup> Mora chē más minŷica uacná šmochjuánatse y šmochjáshbua. ¡Mochjase y mochjóboyejuaye ca! <sup>24</sup> Quem atšbe uaquiñá mo obanacá endánmēna y mora bēnga montsetátsēmbo cha ainá yotsomñama. Quem atšbe uaquiñá mo otšenacá endánmēna y mora tmontsinŷena ca.’ Y chentšana imojontšé joboyejuayama.

<sup>25</sup> “Chē yebnoca fiesta yojtsemnēntscuana, chē mayor uaquiñana jajoca inětsomñe. Yebnoye yojtsataye y ya béconana yojtsemna orna, cha yojouena imojtsabuastoye y imojtselántsaye. <sup>26</sup> As chora cha canŷe oservenábioye ibojachembo y mēntšá ibojatjaye: ‘¿Ndayá bēngbe yebnentše yojtsopasana ca?’

<sup>27</sup> “As chē oservená ibojojuá: ‘Acbe uabentsá tontashjango y chama acbe taitá šonjutarié chē más minŷica uacná jáshbuama, cha tšabá tojtashjanguama ca.’ <sup>28</sup> Pero chē uabóchena catšatna corente ibojtsetna y ndoñe yontseboše tsoye jtamashēnguana. As cach befta yojábocna chē catšátbioye jaimpádama chauatamashēnguana. <sup>29</sup> Chora cha chē taitábioye ibojauyana: ‘Taita, aca condětatšēmbo bueta uata cbetsajabuáchanama, nŷets tempo cbetseyeunanama, pero ndocna te ni mo canŷe chivotema chešcaisatštá atšbe amiguēngaftaca joboyejuayama. <sup>30</sup> Y masna, acbe uaquiñá chē bacna vida bomna

shembásengaftaca acbe crocénana pochocayá tojtashjango ora, chë más minyica uacná chabiamna tcojášbua ca' —chë uaquiñá ibojauyana.

<sup>31</sup> “Chora chë befta ibojojuá: ‘Atšbe uaquiñá, aca sempre átseftaca condétsemna y lempe ntšamo atše tsbomncá acbiámncá endmëna. <sup>32</sup> Pero mora tšabá entsemna joboyeuayama y joyeuayëngama; er acbe uabentsá mo obanacá endánmëna, y mora bënga montsetátšëmbo cha ainá yotsomñama; mo otšenacá endánmëna, y mora tmontsinyëna ca.’ ”

## 16

### *Chë nduiñbe ndoñe tšabe uajabuachanábiama cuento*

<sup>1</sup> Jesús mëntsánaca chabe uatsjédayënga tojanacuntá: “Inamna canyë bomna entšá, y cha ibnabomna canyë uajabuachaná chabe soyënga chaotsinyënama; y chë nduiño imojuenaye chë uajabuachaná chabe soyëngaca ndoñe tšabá yontsamama. <sup>2</sup> Asna, chë nduiño ibojachembo y mëntšá ibojauyana: ‘¿Ntsámo acbiamna šmontsatsëtsnacá ndegombre yojtsemna ca? Mora cuenta šmatatštá ntšamo atšbe soyëngaca tcojamama, er morscana ya ndoñe atšbe soyënga inyëná quecochátsmëna ca.’ <sup>3</sup> Chë uajabuachaná yojontsé jenójuaboyana, y mëntšá yojenyana: ‘¿Y mora ntšamo chtsemna, chë nduiño atšbe trabajuentšana šojtabocna ora? Ndoñe añemo quetsátsbomna fshantse jatrabájama, y lemošna jótjañamna sëntsëuatja. <sup>4</sup> Ya sëntsetatšëmbo ndayá chjama, chca, atšbe trabajuentšana chašojtábocna ora, atše jtsabamnana ndëmuanyënga chëngbe yebnentše chašmofjama ca.’

<sup>5</sup> “Chentsana, canyánya chë chabe nduiñbioye ndebëngë yojáchembo. Cányabioye ibojatjaye: ‘¿Ntsachetšá atšbe nduiño icondebena ca?’ <sup>6</sup> Y cha ibojojuá: ‘Canyë patse barrilëšangá aceitiye ca.’ As cha ibojauyana: ‘Muentše acbe recibëcha entsamna; mora mótbema y inyácha nyë shachna bnëtsana barrilëšangama matapormá ca.’ <sup>7</sup> Chentsana inyabioye ibojatjaye: ‘Y acna, ¿Ntsachetšá icondebena ca?’ Y cha ibojojuá: ‘Canyë patse medida trigo ca.’ As cha ibojauyana: ‘Muentše acbe recibëcha entsamna; chiñe nyë posufta bnëtsanama mábema ca.’ <sup>8</sup> Chentsana, chë nduiño tšabá yojayana chë ndoñe tšabá ama mayordombiamna, cha stúdioca yojamama. Chë nyë quem luarama enójuabnaye entšanga, cachëngbe soyëngaca puerte studio bomnënga mondmëna; y chë entšangbe juabnënga binynayábenga ndoñe nya yapa ca.

<sup>9</sup> “Atše cbabuayená, quem luarentše, chë bacna soyënga amëngbe luarentša bomnánaca amiguënga šmochjábiamna, inyënga jtsëjabuáchanëse. Chca, chë bomnana tojtso pochocá ora chašmotsabamna ndëmuanyënga chë nyëtsca tescama oyenoye chacmúbuajama ca.

<sup>10</sup> “Nda básefta soyënguiñe lempe tšabá tojama, bëtská soyënguiñnaca lempe tšabá echanjama; y nda básefta soyënguiñe ndoñe tšabá tonjama, bëtská soyënguiñnaca cach ndoñe tšabá queochatsma. <sup>11</sup> Chcasna, quem luarentše, chë bacna soyënga amëngbe luarentša bomnánaca ndoñe tšabá šmonjamëse, ¿nda chë ndegombre bomnana, chë Bëngbe Bëtsabe soyënga cmochjábanyiye? <sup>12</sup> Y chë ndoñe tšëngaftangbe sóyeca ndoñe tšabá šmonjamëse, ¿nda cmochjantšabuáchiye ndayá tšëngaftangbiama yomncá ca?

<sup>13</sup> “Ndocná ntso benana uta mandayata jtsaservénana; er canyabioye bochantšáboyënja y chë inyabioyna bochantšebobonshana, o canyabiamna tšabá echántsetrabajaye, y chë inyabiamna ndoñe tšabá. Ndoñe quecátobena Bëngbe Bëtsá jtsebobonshánana, nyë quem luarentša soyënga jtse bomnana tcojtsebošëse ca” —Jesús tojánayana.

<sup>14</sup> Chë fariseunga, becá crocénana jtse bomnana bošënga imnamna, lempe chca chënga tmojanuena, y Jesús bioye imojtsáboyejuana. <sup>15</sup> As Jesús tojanëyana: “Tšëngaftanga entšangbe delante mo tšábënga cuaftsemncá jtse nobiamnayana, pero Bëngbe Bëtsá endëtatšëmbo ndayá tšëngaftangbe ainaniñe yomnana; er ndayá entšanga más tojtsebošcá, Bëngbe Bëtsá jtsáboyënjana ca.

*Moisesbe ley y Bëngbe Bëtsabe amëndayana*

<sup>16</sup> “Moisesbe ley y chë Bëngbe Bëtsabe juabna oyebuambnayënga tsëngaftanga cmon-janabuayiyná, Juan chë Ubayaná quem luaroye tonjánabëntscuana. Cha tonjánabo orscana montsabuayiyná chë tsabe noticiënga Bëngbe Bëtsabe amëndayocama, y nyëtscanga tša montseboše choye jamashënguama ca.

<sup>17</sup> “Más paselo endmëna, celoca y quem luare chaopochocá, y ndoñe chë ntšamo leyinë iuayancá, chë ndayá jopásama yomnama, ni mo canye punto ndoñe chca chaondëtsemnama ca” —Jesús tojánayana.

*Ndayá Jesús tojanabuatambá chë bouamnënga tmojtšenëtšenama*  
(Mt 19.1-12; Mc 10.1-12)

<sup>18</sup> “Nda chabe shémbioye cachcá tbojesonýá y ínÿaftaca tojtóbouamase, cha chë natsana shémbioye ínÿaftaca jtseíngñayana; y nda chë útšena shembásaftaca tojobouamá chana, canye uabuatmá jtsebmomnana, y chca, chana canye bacna soye jtsamana ca” —Jesús tojánayana.

*Chë bomná y chë ndbomnjëma Lázaro*

<sup>19</sup> “Canye bomna entsá inamna; cha yojanamana uámana y botamana shbuenda uafjatsenga y lino entsayangá jtichëtjuana, y cada te bëts fiestënga yojánama. <sup>20</sup> Canye ndbomnjëmnaca inamna, Lázaro ca uabainá, bacna nguayanánaca šocá; y cha yojanamana chë bomnabe bëšásentše fshantsiñe jótbemana. <sup>21</sup> Quem ndbomnjëma yojtseboše chë bomná yojtsesayentšana yojatquëcjana sanángaca jtoshachayana; y chë quešënga innabo ye chabe nguaye cuerpo jajáfjuama. <sup>22</sup> Canye te Lázaro yojtsóbana, y Bëngbe Bëtsabe angelënga Abrahámbioye cha imojtamba, chë nyëtscanga oyejuayënga mondmëna luaroye. Chë bomnánaca yojóbana y imojuátbontsa.

<sup>23</sup> “Chë bomná infiernoca puerte ngmëniñe yojtsesufrina ora, tsbanánoye yojtješiyey y bënoca Abraham ibojinÿe, y Lázaro cháftaca yojtsemna. <sup>24</sup> As chë bomná yojuyebuáchena: ‘¡Taita Abraham, šmolastemá! Lázaro michmó chabe ntšabuafja chaofchecuacuá y atšbe bichtaja chauabofchecuacuaye, er quem íñeshoca tša sëntsesufrina ca.’ <sup>25</sup> Pero Abraham ibojauyana: ‘Uaquiñá, menojuabó, aca fshantsoca vida conjánbomna ora, lempe ntšamo icojabošcá tconjanóyëngacñe, y Lázaro chë cuenta tondaye quenjátsbomna; pero morna, cha tsabá y oyejuayá entsemna, y aca jabuache ngmënanana contsebmomna. <sup>26</sup> Y inÿe soye, canye bëts tũañe entsemna tsëngaftangbiocana mëntscoñe; chca, chë tsëngaftangbioye muentšana jenachnënguama tmojtsebošënga ndoñe chamondëtšobena, ni chocana bëngbioye cach ndoñe ca.’

<sup>27</sup> “Y chë bomná ibojauyana: ‘Masque chca, Taita Abraham, Diosmanda Lázaro michmó atšbe taitabe yebnoye; <sup>28</sup> choca sëndábamna shachna catsátanga; as chaúyana ntšamo moca atše stsepasana y ntšamo jamëse chënga ndoñe chaondëtšamna quem ngmëñënga luaroye jabama ca.’ <sup>29</sup> Chora Abraham ibojauyana: ‘Chënga ya mondbomna ndayá Moisés y chë Bëngbe Bëtsabe juabna oyebuambnayënga tmojëftsanábema soyënga; ¡chëngbioye chamoyauná ca!’ <sup>30</sup> Chë bomná ibojojuá: ‘Ndoñe, Taita Abraham; nderado obanënguëntšana canya chëngbioye tojase, aínë chë tsabe benache muan-tishache ca.’ <sup>31</sup> Pero Abraham ibojauyana: ‘Chënga ni mo Moisés, ni chë Bëngbe Bëtsabe juabna oyebuambnayëngbioye ndoñe tmonjóyaunase, Bëngbe Bëtsábeñe ndoñe quemochatošbuáchiye, masque canye obaná chauatayenëse, chëngbioye jábuayenama ca’” —Jesús tojancuentá.

## 17

*Resjo yomna, nderado bacna soyënga cuanjama*  
(Mt 18.6-7, 21-22; Mc 9.42)



<sup>1</sup> Jesús chabe uatsjéndayënga tojanëyana: “Sempre echanjëftsemna juabnënga bacna soyënga jamama; pero, jtsa lastema chë entšabiama ndabe causa ínÿenga bacna soyënga tmojama! <sup>2</sup> Más tšabá chabiama nántsemna canÿe nantsnëbé chamotsetamošëntšbua y mar béjayoye chamotsashbuetše, y ndoñe chë canÿa Bëngbe Bëtsábeñe ošbuachiyá bacna soye chaomama juanatsana. <sup>3</sup> Cuedado šmochtsebomna.

“Acbe catsata bacna soye tojamëse, cochjuácacana; y yochtsajbaná ca cha tojayanëse, cochtseperdóna. <sup>4</sup> Masque nÿe canÿe te, canÿsëfta soye ntšámnaca tcmojaborlá, y canÿsëfta soye ‘chca ndoñe más quebochatsbórla ca’ tcmojauyanëse, aca cmontsemna cha jtseperdónana ca” —Jesús tojánayana.

*Bëngbe Bëtsábeñe jtsošbuachiyëse, corente obenana jtsebomnana*

<sup>5</sup> Chë uatsjéndayënga Bëngbe Utabnábioye tmojanianya: —Ošbuachiyana šmababuaté ca.

<sup>6</sup> Y chë Utabná tojanëjua: —Tšëngaftanga ošbuachiyana, batšatema masque nÿe mo mostaza jenaycá šmojtsebomnëse, quem sicomoro betiyoye šmatjauyana: “quemuentšana mojashtse y mar béjayoca mojé ca”, y quem betiye chca nanjama ca.

*Chë oservená ndayá ibomna jamana*

<sup>7</sup> “Nderado canÿa tšëngaftanguentšá canÿe bochichnayá tbojtsebomna, cha jajocana tojtashjango jajañe arayocana o uacnënga anÿenocana, ¿chábioye bochjauyana: ‘Matabo y mabose ca’? <sup>8</sup> Ndoñe, chamna mëntšá bochanjauyana: ‘Jetiñe juasama cochjuábua, y moprontá atše jaserviama atše candëse y candofšentscuana; y chentšana aca cochjase y cochjofsiye ca.’ <sup>9</sup> Y chë bochichnayábioye ndoñe quebochtétschuaye ndayá tbojuatariecá cha tojamama. <sup>10</sup> Tšëngaftángnaca cachcá, lempe ntšamo Bëngbe Bëtsá tcmojutariécá chašmojama ora, cmontsamna jayanana: ‘Nduámana oservénënga fsëndmëna; er nÿe ntšamo jamama šuamncá tifjama ca’ ” —Jesús tojánayana.

*Jesús, bnëtsanënga bacna nguayanánaca šoquënga tojanashná*

<sup>11</sup> Jerusalenoye benache, Jesús tojánachnëngo Samaria y Galilea luarëjana. <sup>12</sup> Y canÿe pueblotëmoye tojánashjango ora, bnëtsana boyabásenga bacna nguayanánaca šoquënga chábioye tmojána; chábentšana bënoca chënga tmojanoquedá, <sup>13</sup> y mëntšá imojtsáyebuache: —¡Jesús, Buatëmbayá, šmotsalastemá ca!

<sup>14</sup> Jesús chënga tojánanye ora, tojanëyana: —Jerusalenoca bachnángbioye motsajna, y chënga šmochjínÿanyÿe tšëngaftanga mora ndëšoquënga šmojtsemnana ca.

Y tojanopasá, chë bnëtsanënga cabá imojétsayëntscuana, ya shnánënga imojtoquédaye. <sup>15</sup> Canÿa chënguentsá, shnaná yojtsemnana tojáninÿe ora, yojeshëcona Bëngbe Bëtsábioye jabuache atschuanaye; <sup>16</sup> y Jesusbe delante yojoshëntsamentšiyë, jubiaca fshantsóntscóñe yojotsejbéna, y chábioye ibojtsatschuanaye; y chë boyabásana Samarioca entšá inamna.

<sup>17</sup> Chora Jesús tbojanianya: —Bnëtsanënga mondmëna chë shnánënga tmontoquedanga. ¿Ndayentše chë inÿe esconëftanga imojtsemna? <sup>18</sup> ¿Nÿe quem boyabása, inÿe luarocana ashjanganá, tojeshëcona Bëngbe Bëtsá jëtschuayama? ¿Ndáyeca chë ínÿenga ndoñe ca?

<sup>19</sup> Y chë entšábioye tbojanianya: —Matëtsbaná y motsatoñe; Bëngbe Bëtsábeñe aca icošbuachéyeca shnaná contsatsmëna ca.

*Ntšamo Bëngbe Bëtsabe amëndayana yochjóshjango  
(Mt 24.23-28, 36-41)*

<sup>20</sup> Canÿe, chë fariseunga Jesús tmojantjá, mocna ora chë Bëngbe Bëtsabe amëndayana yochjanóshjanguama; y cha tojanëjua: “Bëngbe Bëtsabe amëndayana chaojóshjango ora, tšëngaftanga ndoñe quešmochatobenaye chca jinÿana. <sup>21</sup> Chora ndoñe quemochátichamo ‘Muentše entsemna’ o ‘Choca entsemna ca’; er Bëngbe Bëtsabe amëndayana ya tšëngaftangbeñe entsemna ca” —cha tojánayana.

<sup>22</sup> Jesús chabe uatsjéndayënga tojanëyana: “Canÿe tempo echanjóshjango, y chora tšëngaftanga šmochántseboše canÿe te jtsebomnana, ntšamo chë Bëngbe Bëtsá Entšá tbojanbemá tšëngaftangbeñe enjëftsemna orcá; pero chora ndoñe chca queochatóshjango. <sup>23</sup> Chora báseftanga mochántsechamo: ‘Muentše entsemna’ o ‘Choca entsemna ca’; pero choye ndoñe šmatjá, ni šmatjúseto. <sup>24</sup> Er chë tojatcuinÿe ora, ntšamo celoca catoica juachoica tojabuashinÿinÿenacá, chca echántsemna chë Bëngbe Bëtsá Entšá tbojanbemá quem luaroye chaojésabo te. <sup>25</sup> Pero natsana cha bontsemna puerta jasúfriana, y morsca entšangbiana uabotená jtsemnana.

<sup>26</sup> “Ntšamo Noé yojaniyena ora tojanopasacá, cachcá echanjopása chë Bëngbe Bëtsá Entšá tbojanbemá quem luaroye chaojésabo ora. <sup>27</sup> Chë tempo, entšanga imnasaye, imnofšësnaye, imnóbouamnaye; natjëmbana imojtsiyeñe, y chca, natjëmbana imojtsomñe, Noé chë barquëshoye tojánamashënguëntscuana; pero chora uabouana uaftena tojánashjango y chë entšanga tojtsanapochocá. <sup>28</sup> Cachcá ntšamo Lot yojaniyena ora tojanopasacá: entšanga imnasaye, imnofšësnaye, imnóbouamnaye, imojtsena, sananga imnajena y imnajebuana; <sup>29</sup> pero Lot Sodoma bëts pueblentšana tojëftsanbocna ora, Bëngbe Bëtsá tojanma celocana íñeshe y azufre chauaftema, y chentša entšanga tojtsanapochocá. <sup>30</sup> Cachcá echántsemna chë Bëngbe Bëtsá Entšá tbojanbemá chaojtonÿná ora.

<sup>31</sup> “Chë tena, nda cachabe yebnentša tsbanánoca chaojtsemna, y chabe soyënga cachtsoca tojtsebomnëse, chocana ndoñe chaondétastjango chë soyënga jesabobocnana; y nda jajoca chaojtsemna, yebnoye ndoñe chaondéta. <sup>32</sup> Menójuabonga ntšamo Lotbe shémaftaca tojanopasama. <sup>33</sup> Nda tojtsentsena quem luarentše bëtsacá jtsebomnana y atšbiana jasúfriana ndoñe tontseprontana, chë nÿetsca tescama yomna tšabe vida echanjobuetše. Pero nda quem luarentša soyënga cachcá tojonÿá atše juastama, masque chaóbana, chë nÿetsca tescama yomna tšabe vida echántsebomna.

<sup>34</sup> “Atše cbëyana, chë ibeta, chë Bëngbe Bëtsá Entšá tbojanbemá chaojtonÿná ora, útata canÿe jutsnëshañe bochántsemna; canÿa mochanjesbetše y chë ínÿana ndoñe. <sup>35</sup> Uta shembásata cánÿiñe bochántsejanÿcoye; canÿa mochanjesbetše y chë ínÿana ndoñe. <sup>36</sup> Uta boyabásata jajoca bochántsetrabajaye; canÿa mochanjesbetše y chë ínÿana ndoñe ca” —cha tojanëyana.

<sup>37</sup> Chora chë uatsjéndayënga Jesús tmojantjá: —Utabná, ¿ndëmoca chca yochjopása ca? Y cha tojanjúá: —Chë obanabe cuerpo tojtsemnentše chë gallinacënga jojotana ca.

## 18

### *Chë viudá y chë mandadbiama cuento*

<sup>1</sup> Jesús mëntšá tojanacuntá, entšanga jabuátambama, Bëngbe Bëtsáftaca nÿets tempo jtsencuéntayana yomnana, ainaniñe añemo jtsebomnana ndocna te ntjajbanacá. <sup>2</sup> Mëntšá tojánayana: “Canÿe pueblentše canÿe mandado inamna; chana ni Bëngbe Bëtsábioye ndoñe bonjánebiauátja, ni entšanga yonjánayaunana. <sup>3</sup> Chë pueblentše canÿe viudánaca inamna; chana canÿe demanda yojánbomna. As chë mandádbioye yojobeconá y mëntšá ibojauyana: ‘Diosmanda atšbe uayayá motsecastigá ndayá šojaborlama ca.’ <sup>4</sup> Bayté chë mandado ndoñe yonjábošena chë viudábioye joyeunayama; pero chentšana cha yojenójuaboye: ‘Masque Bëngbe Bëtsá ndoñe quetsátebiauatja, ni entšanga ndoñe quetsátayaunana, <sup>5</sup> pero quem viudá cada ora endabó causa, aíñe chanjóyeunaye, chabe uayayá chanjacastíga; ndóñesna cada te nandaboye y cabana ya šochanjanamëntša ca.’”

<sup>6</sup> Chentšana Bëngbe Utabná tojánayana: “Smonjouena ntšamo chë ndoñe tšabá ama mandado yojayancá. <sup>7</sup> Y chca, ¿Bëngbe Bëtsá chabe bocacánënga ndoñe yochanjátsebacaye? Chënga mora ínÿengbe causa montsesufrina y cada te Bëngbe Bëtsá mondbétseimpadana chaujabuachama. ¿Más chamuatobatná ca yochjáuyana? <sup>8</sup> Atše

cbëyana, Bëngbe Bëtsá betscó tšëngaftanga cmochanjátsebacaye, tšëngaftanga chë ínÿengbe causa mora šmojtseufrínënga. Pero chë Bëngbe Bëtsá Entšá tbojanbemá chaojésabo ora, ¿cabá Bëngbe Bëtsábeñe ošbuáchiyënga quem luarentše entsanga yochjánÿena ca?” —Jesús tojánayana.

### *Chë fariseo y chë Romocama impuesto atjanayabiama cuento*

<sup>9</sup> Báseftanga imojtsanjuabná chënga tšabe entsanga imnamna ca, pero chë ínÿengbioye imojtsëbuayënja; chíyeca Jesús mëntšá tojanacuntá jabuátambama: <sup>10</sup> “Uta boyabásata Bëngbe Bëtsabe bëts yebnoye tbojána Bëngbe Bëtsáftaca jencuéntama: canÿa yojamna fariseo, y chë ínÿana, canÿe Romocama entsángbioye impuesto atjanayá. <sup>11</sup> Chocna chë fariseo, tsanana Bëngbe Bëtsábioye mëntšá ibojtsecuéntaye: ‘Bëngbe Bëtsá, cbontsatschuaná atše chë ínÿengcá ndoñe quetsatsmënana: atbëbanënga, puerte bacna soye amënga y shémbioye ínÿaftaca íngñayënga; y ni quem Romocama impuesto atjanayacá ndoñe quetsatsmënana. <sup>12</sup> Atše sënduamana, ácaftaca jencuéntamna, canÿe semaniñe uta soye tondaye ntjascá jtsemnana; y lempe stjonÿenentšana, bnëtsanentšana canÿe soye acbiama sëndëquëcñá ca.’ <sup>13</sup> Pero chë Romocama impuesto atjanayana, bënoca yojtsemna, ni celoye ntjontješiyá, yojtsenócochjantšetaye y mëntšá yojtsichamo: ‘¡Atšbe Bëtsá, šmotselastemá, atšajema bacna soye amá tsmëna causa ca!’”

<sup>14</sup> Chentšana Jesús tojánayana: “Atše cbëyana, quem Romocama impuesto atjanayá chabe yebnoye tojtaná chabe bacna soyëngama perdonaná, pero chë fariseo ndoñe. Er nda cachá bëtsá tojtsenobiamná, nduamaná mochántsebema; y nda cachá nduamaná tojtsenobiamná, aíñe bëtsá mochanjábema.”

### *Jesús, basetémëngbiama Bëngbe Bëtsábioye tbojanimpadá* (Mt 19.13-15; Mc 10.13-16)

<sup>15</sup> Entšanga imojanamana Jesúsbioye basetémënga junatsana chauabájajuama, y Bëngbe Bëtsábioye chëngbiama chaboimpadama; pero chë uatsjëndayënga chca tmojáninÿe ora, tmojanontšé chë basetémënga unachayënga jtsëcácanana. <sup>16</sup> Pero Jesusna chë basetémënga tojánachembo, y mëntšá tojánayana: “Cachcá mónÿaye chë basetémënga átšbioye chamuabo, y ndoñe matéuyanana; er Bëngbe Bëtsabe amëndayana endmëna chë mo quem basetemëngcá imomnëngbiama. <sup>17</sup> Ndegombre cbëyana, nda Bëngbe Bëtsabe soyënga ndoñe tonjóyëngacñe mo canÿe basetemcá jtsošbuáchiyëse, cha ndoñe queochatobenaye Bëngbe Bëtsabe amëndayoye jamashënguama ca.”

### *Canÿe bomna entsá Jesúsbioye tojána* (Mt 19.16-30; Mc 10.17-31)

<sup>18</sup> Canÿe mandayá Jesúsbioye tbojantjá: —Tšabe Buatëmbayá, ¿ndayá šojtsemna jamana chë nÿetsca tescama yomna tšabe vida jtsebomnana ca?

<sup>19</sup> Y Jesús tbojanjuá: —¿Ndáyeca šcjauyana “tšabia ca”? Tšabia nÿe canÿa endmëna: Bëngbe Bëtsá. <sup>20</sup> Aca condétatšëmbo ntšamo Bëngbe Bëtsá tojanmandacá: “Acbe shema ínÿaftaca ndoñe cattseíngñaye, ínÿa ndoñe catjóba, ndoñe catjatbëba, ndoñe catjuaboínÿena y acbe bëtsétsata ndoñe stëtsoye catjáquedaye ca.”

<sup>21</sup> Chora chë boyabása tbojanjuá: —Atše lempe chca básetema orscana sëndocumplina ca.

<sup>22</sup> Jesús chca tojanuena ora, tbojaniyana: —Cabá canÿe soye cmontsebuáshbena jamana: lempe ntšamo icobomncá cochjetsatobuiye, y chë crocénana, ndbomnëjëmënga cochtsatsataye; chca, celoca canÿe bëts bomnana cochántsebomna. Chentšana, cochjabo y šcochjuasto ca.

<sup>23</sup> Chë entsá chca tojanuena ora, puerte ngmënacá yojtsemna, er cha corente bomná inamna. <sup>24</sup> Chca ngmená tbojáninÿe ora, Jesús tojánayana: —¡Yapa totcá bomnëngbiama entsemna Bëngbe Bëtsabe amëndayoye jamashënguama! <sup>25</sup> Ndegombre, más paselo

endmëna canÿe camello chë coshufjentša atëfjnëjana chauachnëngo, y ndoñe canÿe bomná Bëngbe Bëtsabe amëndayoye jamashënguana ca.

<sup>26</sup> Chora, chë chca imojouenënga tmojánayana: —¿As nda yochjobenaye atsbocaná jtsemnana ca?

<sup>27</sup> Y Jesús tojanëjua: —Ndayá entsanga ndoñe mondobena jamana, Bëngbe Bëtsá aíñe endobena jamana ca.

<sup>28</sup> Chora Pedro, Jesúsbioye tbojanianyana: —Bëngbe Utabná, aca contsonÿá, bënga lempe chë fsëndbomna soyënga fsënjéseboshjona, y ácaftaca fsëntsajna ca.

<sup>29</sup> Jesús chora tojanëyana: —Ndegombre chëyana, ndánaca Bëngbe Bëtsábioye jasérviana, chabe amëndayama jtsabuayiyayëse, cachcá tojëftseboshjona chabe yebna, shema, catsátanga, bëtsëtsanga o básenga, <sup>30</sup> cha mora quem luarentse chë soyëngama más echanjóyëngacñe, y chë inÿe luarocna, chë nyetsca tescama yomna tšabe vida ca.

### *Jesús cachiñe tojánayana cha jóbanama y jtayenama*

*(Mt 20.17-19; Mc 10.32-34)*

<sup>31</sup> Jesús chabe bnëtsana uta uatsjëndayënga barie tojánachembo, y mëntšá tojanëyana: “Smontsetátšëmbo mora Jerusalenoye bënga montsajnama, y choca lempe echanjochnëngo ntšamo chë Bëngbe Bëtsabe juabna oyebuambnayënga, chë Bëngbe Bëtsá Entšá tbojanbemabiama tmojanabemcá; <sup>32</sup> er choca cha chë ndoñe judiëngbe cucuatšinë mochanjáboshjona, y mochantsáboyejuana, mochanjóyenguango, mochántsebuashëttoj; <sup>33</sup> y chamojätjanjentsana, mochanjóba, pero unga tianoye cha echántayena ca.”

<sup>34</sup> Chë uatsjëndayënga tondaye tonjanësertá, ni montsetátšëmbo ndayá bëtsemnana ntšamo Jesús yojsëtsëtsnacá, er chëngbiana yojamna josértama ndopodena soyënga.

### *Jesús, Jericó pueblaca canÿe jtanábioye tbojanshná*

*(Mt 20.29-34; Mc 10.46-52)*

<sup>35</sup> Tojanopasá, Jesús Jericó pueblöye yojtsebëconaye ora, canÿe jtaná benache juachañe inatbemana, lemošna otjanañe. <sup>36</sup> Entšanga chëjana imojtsachñëjuanama tojanuena ora, yojanotícia ndayá yojsopasana ca, <sup>37</sup> y chë entsanga tmojanianyana, —Jesús Nazaretocá entsebeconá ca.

<sup>38</sup> As cha yojsontšë uayebuáchana: —¡Jesús, Davídbentšana Entšá, šmotselastemá ca!

<sup>39</sup> Chë natsana imojtsajñënga chë jtaná imojtsácacana, iyteca chaóbemama; pero cha más yojsáyebuache: —¡Davídbentšana Entšá, šmotselastemá ca!

<sup>40</sup> As Jesús tojantsá y tojanmandá cha chamobetšama. Cha ya bécoñe yojtsemna ora, Jesús tbojantjá: <sup>41</sup> —¿Ndayá cojtseboše atše acbiama chjamama ca?

Y chë jtaná tbojanjuá: —Atšbe Utabná, atše sëntseboše chašuatabínÿnama ca.

<sup>42</sup> Chora Jesús tbojanianyana: —Matinÿe, Bëngbe Bëtsábeñe betsošbuachéyeca shnaná contsatmëna ca.

<sup>43</sup> Y cachora cha tšabá ibojtabinÿna, y Jesúsbioye ibojtsëstona, Bëngbe Bëtsá atschuanaye. Y nyetsca entsanga, chca tmojáninÿe ora, Bëngbe Bëtsá imojtsatschuanaye.

## 19

### *Jesús y Zaqueo*

<sup>1</sup> Jesús Jericó pueblöca tojánashjango ora, chë pueblëjana cha yojsachñëjuana. <sup>2-3</sup> Chora, canÿe bomna entšá, chë Romocama entsanga impuesto atjanayëngbe amëndayá, Zaqueo ca uabainá, yojtseboše Jesús jinÿama. Pero ndoñe yontsobena jinÿama, bëtscá entsanga causa y cha becuca inamna causa. <sup>4</sup> Chcasna, cha betesco natsanoye tojaftsantótjajo y canÿe sicomoro betiyeshoye tojánasëngo, chca, Jesús chëjana tojtsachñëjuana ora, jinÿama jobenayama. <sup>5</sup> Jesús chë betiyeshoye tojánashjango ora, tsbanánoye tojanontješë y



Zaqueóbíoye tbojáninye. As Jesús tbojaníyana: “Betsco chocana matastjango, Zaqueo, er mënté chanjá acbe yebnoye jatema ca.”

<sup>6</sup> Chora Zaqueo betscó tojtánastjango y chentšana puerte oyejuayá Jesúsbíoye tbojanofja. <sup>7</sup> Entšanga chca tmojáninye ora, tmojanontsé Jesusbe contra mëntšá ichámuana: “Jesús tonjá canye bacna soyënga amabe yebnentše jatema ca.”

<sup>8</sup> Chora Zaqueo tojantsá, Bëngbe Utabná Jesúscentše, y mëntšá tbojaníyana: —Mouena, atšbe Utabná, atšbe bomna soyënguentšana tsëntsañe ndbomnjémënga chanjátšataye y nda más crocénana tijëftseyëngacá, chë ntsachetsá tijëftsefcama canta soye más chan-toyiye ca.

<sup>9</sup> As Jesús tbojaníyana: —Mënté, aca acbe bacna soyënguentšana atsbocaná contsemna, er Zaqueo, ácnaca Abrahámcentšana entšá condmëna. <sup>10</sup> Er chë Bëngbe Bëtsá Entšá tbojanbemá tojabo chë pochocánënga jtsemnama imojtsajnënga jabétsanguanguama y jabátsebacama ca.

### *Chë crocénanama cuento (Mt 25.14-30)*

<sup>11</sup> Entšanga chë soyënga imojtsuenana, y Jesús inye soye tojanacuntá jabuátambama, er cha ya Jerusalén béconana yojtsemna, y entšanga imojtsejuabnaye chë Bëngbe Bëtsabe amëndayana ya yochjanóshjango ca.

<sup>12</sup> Jesús tojanëyana: “Canye luarentša uámana entšá inye bën luaroye yojá, cachabe luarentša rey chamobemama y chentšana cachábíoye jtama. <sup>13</sup> Cabá nda ora, chabe bnëtsana oservénënga yojáchembo y bëtská crocénana cada cánýabíoye yojëftsayentšbuachiye, y mëntšá yojëftsëyana: ‘Quem crocénanaca trato šmochjábema atše candëtabëntscuana ca.’ <sup>14</sup> Pero cachabe luarentša entšanga cha imojuáya, as chëngna básefta entšanga imojichamuá chë inye bën luaroca mëntšá chamuayanama: ‘bënga ndoñe queftsátsboše cha bëngbe rey chaotsemnama ca’.

<sup>15</sup> “Pero pronto chë luarentša rey cha imojábema. Y chë luaroye yojtá orna yojamánda chë crocénana yojëftsayentšbuáchenga chamobéconama, jtsetatšëmbuama ntsachetsá cada ona chë crocénanaca yojongánama. <sup>16</sup> Chë natsaná yojáshjango y yojayana: ‘Taita, acbe crocénana bnëtsana soye más tonjoboté ca.’ <sup>17</sup> Y chë rey ibojojuá: ‘Tša tšabá, tšabe oservená. Aca quem base soyiñe ntšamo tbojamandacá tšabá tcojámayeca, bnëtsana pueblentša mandado chacotsemnama cbojayé ca.’ <sup>18</sup> Chentšana inya yojáshjango y yojayana: ‘Taita, acbe crocénana shachna soye más tonjoboté ca.’ <sup>19</sup> Y chë rey ibojauyana: ‘Acnaca shachna pueblentša mandado cochántsemna ca.’

<sup>20</sup> “Chorna inya yojobeconá y mëntšá yojayana: ‘Taita, muentše acbe crocénana entsatsmëna; canye pañuelëjuañe bonguana sëntsejajo. <sup>21</sup> Atše acbiamá uatjana šonjuábuache, er aca canye tšátjaye entšá condmëna; aca chë ndoñe condbuajonentšana jocñana y chë ndoñe tconjajé luarentšana jaja saná jobuátbanana ca.’ <sup>22</sup> As chë rey ibojauyana: ‘Bacna oservená, cach acbe palabrëngaca chanjínýanýiye aca ndoñe tšabá tconjamama. Atše chë ndoñe sëndbuajonentšana jocñana y chë ndoñe sënjajé luarentšana jobuátbanana tsuamanama icojátatšëmbëse, <sup>23</sup> ¿ndáyeca ndoñe tconjá chë crocénana bancoca jetsobuájua, y atše camoye matijtabo ora, mašctoyé chë crocénana y chë chentšana tojoboté crocénanënaca ca?’ <sup>24</sup> Y chë chentše imojtsemna entšanga yojáuyana: ‘Chë crocénana motseboca y chë bnëtsana soye más tojabotébiyoye chana motsatšetá ca.’ <sup>25</sup> As chëngna imojojuá: ‘¡Pero cha ya bnëtsana soye más entsebmoma ca!’ <sup>26</sup> Y chë rey yojójuá: ‘Atše cbëyana, nda tojtsebmónábíoye, más mochanjátšetaye; pero nda tondaye tondbomnábíoye, chë tojtsejuabná batšatema yobomna sóynaca mochántseboca ca. <sup>27</sup> Y chë atše uayayënga, chë chëngbe rey atše chaitsemnama ndoñe monjánbošëngna, moye mënátse y atšbe delante šmochtsëbaye ca’ ” —cha chora yojayana.

*Jesús Jerusalenoye tojánashjango*  
(Mt 21.1-11; Mc 11.1-11; Jn 12.12-19)

<sup>28-29</sup> Chca tojéftsanayana chentšana, Jerusalenoye yojétsaye ora, Jesús tojánashjango canye tjashoye, Olivos ca uabáiniñe, Betania y Betfagé pueblënga béconana. Chora, uta chabe uatsjédayata tojanichamó, <sup>30</sup> mëntšá jáuyanëse: “Tsëndatbe natsana entsemna base pueblotémoye motsata. Chašojáshjango ora, canye burrotema utsbuaná sochanjinyëna. Chábeñe cabá ndocná tonjenojayé. Sochjuajafjoná y sochjuánatse. <sup>31</sup> Y nderado nda ndáyeca šojtsajafjná ca chacmojátjasna, sochjauyana: ‘Bëngbe Utabná bontsájaboto ca.’ ”

<sup>32</sup> Chë uatsjédayata tbojána y lempe ntšamo Jesús tojanëyancá tbojáninyëna. <sup>33</sup> Y chë burrotema imojtsajafjná orna, chë burrotema nduiñënga tmojanëyana: —¿Ndáyeca chë burrotema šojtsajafjná ca?

<sup>34</sup> Chora chata tbojánayana: —Bëngbe Utabná bontsajabótoyeca ca.

<sup>35</sup> Chentšana Jesúsbioye chë burrotema tmojanánatse, y chë burrotémbeñe chatbe entšayá tbojanájatse, y chábeñe Jesús tmojanenjayé. <sup>36</sup> Y cha yojsachñëjuana ora, entšanga chëngbe entšayá benachëjana imojtsëtëtsatsana.

<sup>37</sup> Olivos tjashe tsmanoye yojtsebeconá ora, chë bëtská entšanga, Jesúsbeñe ošbuáchiyënga, tmojanontsé uayebuáchana y Bëngbe Bëtsá oyejuayënga jëtschuayana, Bëngbe Bëtsabe obenánaca bëts soyënga Jesús tojanmama. <sup>38</sup> Chënga mëntšá imojtsichamo: “¡Corente bendición bomná chaotsemna, chë Bëngbe Utabnabe obenánaca tojabo Rey ca! ¡Celoca tšabá entsemna! ¡Bëngbe Bëtsá matschuanga ca!”

<sup>39</sup> Chë entsanguentše básefta fariseunga imojtsemnënga, Jesús tmojanianyana: — Buatëmbayá, acbe ústonënga mëcácana chca ndoñe chamondëtsáyebuachama ca.

<sup>40</sup> Pero Jesús mëntšá tojanëjua: —Ndegombre cbëyana, mënga iytëca tmojobiamëse, chë ndëtsbënga muanjuayebuáchena ca.

<sup>41</sup> Jesús Jerusalén béconana tojánashjango, y chë bëts pueblo tojáninyë ora, chentša entsangbiama tojanenobošachna. <sup>42</sup> Y mëntšá tojánayana: “¡Malaye šmëntsetátšëmbo, nýe mo mënténaca, ndayá yojtseita tšëngaftangbeñe lempe tšabá chaotsomñama! Pero mora chë soye tšëngaftangbe bominyama entsëitëmena. <sup>43</sup> Er Jerusalenoca bacna tenga echanjóshjango; chora uayayënga chentša shëconánëjana canye tapiëse mochantsepórma, mochantsejëtja y nýetsca juachoicana mochanjontsé tšëngaftanga jtsatsejana, <sup>44</sup> y lempe mochantsepochóca. Muentša oyenënga mochantsëbaye, y ni mo canye ndëtsbé inýebé juatsboca quemochaiseboshjona, chë Bëngbe Bëtsá tšëngaftanga jätsebacama tojabo ora, ndoñe chešmatoyeuná causa ca” —Jesús tojánayana.

*Jesús, Bëngbe Bëtsabe bëts yebnentšana enënga y obuámnayënga tojtanëbuacna*  
(Mt 21.12-17; Mc 11.15-19; Jn 2.13-22)

<sup>45</sup> Chentšana, Bëngbe Bëtsabe bëts yebnoye Jesús tojánamashëngo y tojanontsé chë chentše imojtsenënga chentšana jtëbuacnana, <sup>46</sup> y tojanëyana: “Bëngbe Bëtsá chabe uabemana palabrënguiñe tojayana: ‘Atšbe bëts yebna echántsemna átšeftaca encuéntaye yebna ca’, pero tšëngaftangna, atbëbanëngbe oyeniñe chë yebna šmojtsebema ca.”

<sup>47</sup> Y cada te, Bëngbe Bëtsabe bëts yebnentše Jesús entšanga yojsabuátambaye; y bachnangbe amëndayënga, ley abuátambayënga y chë pueblentša mandayëngnaca imojtsenguaye ntšamo jamëse cha jóbana. <sup>48</sup> Pero ndoñe tmonjáninyëna ntšamo, er nýetsca entšanga corente imojtseyeunana ntšamo cha yojtsoyebuambnacá.

## 20

*Jesusbe obenana*  
(Mt 21.23-27; Mc 11.27-33)

<sup>1</sup> Canye te, Bëngbe Bëtsabe bëts yebnentše Jesús yojtsabuátambaye, y chë tšabe noticiëngama yojtsabuayiyná ora, tmojánashjajna bachnangbe amëndayënga, ley abuátambayënga, judiëngbeñe bëtsëjemëngcá mandayëngaftaca cányiñe; <sup>2</sup> y Jesús tmojanianana: —Sméyana; ¿ndaye deréchoca chë contsama soyënga aca cojtsama ca? o ¿chca jtsamama nda obenana tcmënjatšetá ca?

<sup>3</sup> Chora Jesús tojanëjua: —Atšnaca canye soye sëntsebamna tšëngaftanga jatjayama. Smochjojuanga. <sup>4</sup> ¿Nda Juan chë Ubayaná tbojanichmó entšanga jubáyama, Bëngbe Bëtsá o entšanga ca?

<sup>5</sup> Chora chënga tmojanontsé enatsëtsnayana: “ ‘Bëngbe Bëtsá ca’ chamojojuase, cha šochanjáuyana: ‘As ¿ndáyeca chábeñe ndoñe šmonjanošbuaché ca?’ <sup>6</sup> Y ndoñe quemuátobena jayanana ‘entšanga ca’; entšanga ndëtsbéngaca buattsëbaye, er nyetscanga becá mondëjuabná Juan ndegombre Bëngbe Bëtsabe juabna oyebuambnayá yojamnama.” <sup>7</sup> Chcasna, chënga tmojanjuá ndoñe monjántatsëmbo nda Juan tbojanichmó entšanga jubáyama ca.

<sup>8</sup> Y Jesús tojanëyana: —Asna atše cach ndoñe quebochatéyana ndaye deréchoca chca stsama ca.

*Chë puerte bacna trabájayëngbiama cuento  
(Mt 21.33-44; Mc 12.1-11)*

<sup>9</sup> Chentsana Jesús tojanontsé entšanga jáuyanana, y quem cuéntoca tojanabuatambá: “Canye entsá uvas betiyënga yojáje y chë fshantse inye trabájayënga yojúyentsame, y baytescama bën luaroye yojtsoñe. <sup>10</sup> Chë uvasëšangá juashacama tempo yojobuache orna, chë jajañe nduiño canye oservená ibojíchmuá chë trabájayënga jáuyanama ntsachetsá cha ibojtsotocánama. Pero chëngna cha imojtsejantšetaye, y tondaye ntoyiycá imojtichmuá. <sup>11</sup> Chentsana inya ibojíchmuá; pero chë trabájayënga cha imojtsejantšetaye, imojtsóyenguango, y tondaye ntoyiycá imojtichmuá. <sup>12</sup> Chë nduiño inya ibojatichmuá; pero chánaca chënga imojtsejantšetaye, imojtselísia, y chentsana imojtábocna.

<sup>13</sup> “Chora chë nduiño yojeniyana: ‘¿Y mora ntšamo chjama ca? Cach atšbe bonshana uaquiñá chanjíchmuá; nderádose cha aíñe mochanjóyeunaye ca.’ <sup>14</sup> Pero chë trabájayënga, chë uaquiñá imojinye orna imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe; motsóbanga y nyetsca chabe otocana soyënga bëngbiama echanjoquéda ca.’ <sup>15</sup> Chcasna, chë uvas jajañentsana cha imojtsábocna y imojtsóba.”

Chora Jesús tojanatjá: —Y asna, ¿ntšamo šmojtsejuabná, ndayá chë jajañe nduiño chë trabájayëngaftaca yochjama ca? <sup>16</sup> Cha co echanjá y chë trabájayënga echanjatsëbaye, y chë uvas betiyënga jajañe inye trabájayënga echanjárrendaye ca.

Chë entšanga chca tmojanuena ora, tmojánayana: —¡Bëngaftaca ndocna te chca chaondopasá ca!

<sup>17</sup> Pero Jesús tojanënyanjé y tojánayana: —As ¿ndayama Bëngbe Bëtsabe uabemana palabrënguiñe iuayana?:

Chë yebna jebuanënga tmojtsanaboté ndëtsbé, mora chë más bëts uashacuanëšentše entsejájona ca.

<sup>18</sup> Ndánaca chë ndëtsbeñe chaojotsatsá, chëbé bochántsatcacaye; y chë ndëtsbé ndábeñnaca chaojótsatše, polvëshe bochántsebema ca —Jesús tojánayana.

<sup>19</sup> Chë bachnangbe amëndayënga y ley abuátambayënga tmojanenótatsëmbona Jesús chca tojanacuntá jinyanjüyama, chënga mo chë puerte bacna trabájayëngcá imojamnama; asna tmojánbošena cachora jishachana, pero entšangbiama imojtsauatja.

*Chë Romoca bëts mandadbiama impuesto jtsatsquëcjnyama  
(Mt 22.15-22; Mc 12.13-17)*

<sup>20</sup> Chentšana chënga báseftanga tmojanichamó, mo ndegombre tšabe entšanga cuaft-semncá chamobiamëse, Jesús jisháchichiyama, nderado ndayá cha tojayaniñe; y chca chënga jobenayama cha jishachana y chëngbe mandádbioye juanatsama. <sup>21</sup> As chënga tmojantjá: —Buatëmbayá, bënga fséntsetatsëmbo ntšamo aca cojtsoyebuambná y cojtsabuatambacá ndegombre tšabá yomnama, ntšamo ndegombre Bëngbe Bëtsá yobošcá, y acbiama tondaye quenatámama nda más uamaná o nduamaná tomnana. Aca contsabuatambá ndegombre tšabe vida jtsebomnama, ntšamo Bëngbe Bëtsá yomandacá. <sup>22</sup> Chcasna, šmëyana, ¿tšabá tayojtsemna bënga, César, chë Romoca bëts mandadbiama, impuesto jtsatsquécjnayana o ndoñe ca?

<sup>23</sup> Jesús yojtsetátšëmbo, ntšamo cha tojayaniñe jisháchichiyama chënga imojtsebošama; as tojanëyana: <sup>24</sup> —Chë šmatsquécjná crocénana šminÿinÿenga ca; ¿ndabe jubiá chë crocenániñe yojtsemna, y ntšamo muentše entsabemancá nda chca iuabaina ca?

Y chënga tmojanjuá: —Césarbe jubiá; cha chca enduabaina ca.

<sup>25</sup> Y Jesús tojanëyana: —César šmoctoyiye cha ibotocana soye; y Bëngbe Bëtsana cha ibotocana soye ca.

<sup>26</sup> Y chca, chë ichmónënga ndoñe imonjobenaye jisháchichiyana, ndayá cha entšangbe delante tojayaniñe. Masna, ntšamo tojanëjuama, ojnánänënga iytëca imojjobiama.

### *Obanënga jtayenama Jesús tmojantjá*

*(Mt 22.23-33; Mc 12.18-27)*

<sup>27</sup> Chentšana, báseftanga saduceo ca uabaina entšanga tmojána Jesús jinÿama. Chënga imojanjuabná obanënga ndocna te ntayenana ca. Jesús mëntšá tmojantjá: <sup>28</sup> —Buatëmbayá, Moisés bëngbe leyënguiñe tojëftsanabema, nderado canÿe boyá tojtsóbana y básenga ndoñe tonjëftsabáshejuanësna, canmëna chë uabentsá chë shémaftaca jto-bouamayana, chca, chë chabe uabochená obanabiama básenga jtsabamnama ca. <sup>29</sup> Chcase, canÿe bëngbentše canÿsëfta catsátanga monjamna. Chë natsaná tonjanobouamá y tontsanóbana, básenga ntjëftsabashejuancá; <sup>30</sup> chentšana chë inÿa chë shémaftaca tonjanobouamá, y cachcá tonjanopasá. <sup>31</sup> Chë inÿe uabentsá chora cháftaca tonjanobouamá, pero tontsanóbana básenga ntjëftsabashejuancá; y cachcá, chë inÿe uabentséngnaca cháftaca tmonjanobouamá, pero nÿetscanga tmonjanóbana básenga ntjëftsabashejuancá. <sup>32</sup> Cabana, chë shembásanaca tontsanóbana. <sup>33</sup> Y chcasna, chë obanënga chamojtayena ora, ¿ndabe chë canÿsëfta catsatanguentsabe shema chë shembása yochtsemna, nÿetscanga cháftaca tmojanobouamase ca? —chënga tmojantjá.

<sup>34</sup> Chora Jesús tojanëjua: —Quem luarentše boyabásenga y shembásenga mondbétsobouamnaye; <sup>35</sup> pero chë echanjóshjango luaroye jama y obanënguentšana jtayenama merecido jtsebuájonama chamojobenangna, masque boyabásenga o shembásenga, ya ndoñe quemochatóbouamnaye, <sup>36</sup> ni queochátopodena chënga chamóbanama, y chca, chënga mochántsemna mo angelëngcá, y Bëngbe Bëtsabe básenga mochántsemna, obanënguentšana mochtayénayeca. <sup>37</sup> Y Moisésnaca, chë yojtsángbototjuana betiyetémama tojanábementše, bënga šontsinÿanÿná chë obanënga innátayenama; chentše Bëngbe Bëtsá tojánayana cha yomna Abraham, Isaac y Jacobëbe Bëtsá ca. <sup>38</sup> Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entšangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

<sup>39</sup> Chora básefta ley abuatambayënga Jesús tmojanianyana: —Buatëmbayá, tšabá tcjayana ca.

<sup>40</sup> Y ya ndoñe más montsenñëmua inÿe soyëngama jatstjanayana.

### *¿Cristo ndabe entšábentšana yomna?*

*(Mt 22.41-46; Mc 12.35-37)*



<sup>41</sup> Jesús tojanatjá: “¿Ndáyeca tsëngaftanga šmnétsichamo chë Uámana Uabuayaná, chë Cristo, Rey Davídbentsana iuabó ca? <sup>42</sup> Er cach David, chabe librëšaňe Salmos ca uabainëšaňe, tojánayana:

Bëngbe Bëtsá, atšbe Utabná Crístbioye tbojaniyana:

‘Atšbe catšbioica mótbema,

<sup>43</sup> atšbe obenánaca, acbe uayayënga acbe cucuatšíňe chamoquedama chjamëntscuana ca.’

<sup>44</sup> ¿Ntšámose, Cristo, Davídbentsana nántsemna, cach David ‘Utabná ca’ chábioye tbojtsabobuátmëse ca?” —cha tojanatjá.

*Jesús chë ley abuátambayëngbiana tojánayana chënga ndoňe tsábá montsama ca*  
(Mt 23.1-36; Mc 12.38-40; Lc 11.37-54)

<sup>45</sup> Nýetsca entšanga imojtsuenana, y Jesús chabe uatsjëndayënga tojanëyana:  
<sup>46</sup> “Cuedado šmochtsebmna, y ndoňe šmattsama chë ley abuatambayëngcá; chënga jtsogusetánana bënëna entšayangaca jtsajnana, y jtsebošana tsáshenaňe entšanga becá respétoca chamotsacheuanayama. Chënga chë judiëngbe enefjuana yebnënguenache chë más uámana luarënguiňe jtsetbiámanana, y fiestënguiňe nýa quëfseroca. <sup>47</sup> Pero chë viudángbioye chë tmobomna soyënga jtsabacayana; y entšangbe delante tsábá chacmotsënyama y chënga imojtsaíngñama ndoňe chaondëtsótatsëmbuamna, Bëngbe Bëtsáftaca tša jtsencuëntayana. Chë causa, Bëngbe Bëtsá ínýëngbiana más chënga echanjácastigaye ca” —Jesús tojánayana.

## 21

*Jesús yojtsënyaye chë crocénana quëcnyayënga*  
(Mc 12.41-44)

<sup>1</sup> Bëngbe Bëtsabe bëts yebnentše, Jesús yojtsënyaye chë bomnënga crocénana jtse-  
quëcnyayana chë crocénana quëcnyayëtémiňe; <sup>2</sup> y canýe viudá ndbomnjëjémnaca tbojáninýe,  
uta crocénana chëtémiňe yojaftseseğóra. <sup>3</sup> Chora Jesús tojánayana: “Ndegombre cbëyana,  
quem viudá ndbomnjëjema, Bëngbe Bëtsabiana nýetscangbiana más becá tonjëftsesegorá;  
<sup>4</sup> er nýetscanga tmonjëftsesegorá chë yojtsóyentsjamentšana, pero chana, masque tša  
ndbomnjëjema, cha vida jtsebmnama lempe ntsachetšá yobomncá tonjëftsesegorá ca.”

*Jesús tojánayana Bëngbe Bëtsabe bëts yebna lempe mochjánpochocama*  
(Mt 24.1-2; Mc 13.1-2)

<sup>5</sup> Báseftanga imojtsichamo chë Bëngbe Bëtsabe bëts yebnama, tša yojtsebotamanana  
puerte uámana ndëtsbéngaca y chë entšanga imojanamana juambana Bëngbe Bëtsábioye  
uátsëmbona soyëngaca ca. As Jesús tojánayana: <sup>6</sup> —Canýe tempo echanjóshjango, y lempe  
ntšamo mora muentše šmontsonýacá tondaye queochatoquéda, ni mo canýe ndëtsbé  
inýebé juatsboye. Lempe mochantsepocho ca.

*Ntšamo yochtsemna quem luare jopochócama te chaojtsobeco ora*  
(Mt 24.3-28; Mc 13.3-23)

<sup>7</sup> Chora chënga tmojantjá: —Buatëmbayá, ¿ntseco chca yochjopása? ¿Y ndayá Bëngbe  
Bëtsá yochjama, chca jopásama yojtsobecuama entšanga chamotsetatsëmbuama ca?

<sup>8</sup> Y Jesús tojánayana: —Cuedado šmochtsebmna ndocná chacmondáingñema. Er  
banga mochanjabo y mochantsabíchamo chënga atše imomna ca. Mochántsi chamo: “Atše  
chë Cristo sëndmëna”, y “Mora chë tempo entsemna ca”. Pero ndoňe šmatjóyaunaye.

<sup>9</sup> Y tsëngaftanga, entšanga imojtsentsjanama y entšanga mandadëngbe contra imojt-  
semnama chašmojtsuenana ora, ndoňe šmattsauatja, er entseyta natsana chë soyënga  
chaochnëngo; pero masque chca, chë quem luare jopochócama tempo cabá ndoňe  
queochátsmëna ca.

<sup>10</sup> Y mëntšánaca Jesús tojanëyana: “Canýe luarentša entšanga, inýe luaroca  
entšángaftaca mochántsejtsjanaye; y canýe amëndayábentša entšanga, inýe amëndayábioca

entsangaftácnaca. <sup>11</sup> Ba luarënguifne jabuache echanjuangmëmana, bëts shëntsana, y entsanga pochócaye šocanënga echanjóshjango; y celoca echántsemna puerte uabouana soyënga y bëts soyënga, entsanga jinÿanÿiyama quem luare ya yochtsopochócama.

<sup>12</sup> “Pero cabá ndoñe chca chaondochnëngo ora, tsëngaftanga cmochanjíshëche y chašmosufrima mochántsama; bënga judiëngbe enefjuana yebnëngoye cmochanjunatse játsëtšenama y cárceloynaca cmochanjáutame, y reyënga y mandadëngbióynaca cmochanjunatse, atšbe ústonënga bëtsemna causa. <sup>13</sup> Chca šmochanpapása, ntšamo atšbiamá šmotatšëmbcá chënga chašmëyanama. <sup>14</sup> Natsana ndoñe šmatjátsjuabnaye jenëuyanama ntšamo chora jóyebuambayana, <sup>15</sup> er atše chanjama puerte tsabá y osertanáncá tsëngaftanga chašmóyebuambama; y chca, tsëngaftangbe uayayënga ndoñe quemochatobenaye jayanana ndoñe tsabá šmontsichamo ca, y ndocá jojuama quemochatobenaye. <sup>16</sup> Pero uayayëngbe cucuatšifne cmochanjábashejuana cach tsëngaftangbe bëtsëtsanga, catšátanga, pamíllanga y amiguënga; y tsëngaftanguentsana báseftanga cmochantsëbaye. <sup>17</sup> Y nÿetsca entsanga cmochantsëbuayënja, atšbe ústonënga bëtsemna causa. <sup>18</sup> Pero tsëngaftangbe bestšašentsana ni mo canÿe stjënëja quecmochátabajajo. <sup>19</sup> Tsëngaftanga nÿets tempo átšbeñe ošbuáchiyënga chašmojtsemnëse, chë nÿetsca tescama yomna tsabe vida šmochántsebomna ca.

<sup>20</sup> “Jerusalén nÿets shëconana soldadënga chašmojanÿe ora, šmochtsetátšëmbo Jerusalén jopochócama tojobuáchama. <sup>21</sup> Chorna, chë Judeoca oyenënga batsjabengoye chamotsacheta; Jerusalenentše chamojtsemnënga, chentsana chamuaisebocana; y chë jajenache chamojtsemnëngna, Jerusalenoye ndoñe chamondésamashjna. <sup>22</sup> Er chora echántsemna chë entsangbe jabuache castigo; lempe ntšamo Bëngbe Bëtsabe uabemana palabrenguifne endayancá chora echanjochnëngo. <sup>23</sup> ¡Tša lastema chë tempo shembásenga ngomámanëngbiamá o ochóchaye básenga chamojtsabamnëngbiamá! Er chora corente ngmënaná quem luarentše echántsemna, y quem luarentša entsangbiamá chë uabouana castigo. <sup>24</sup> Inÿenga espadëjaca mochanjóbana, y ínÿengbiyoye nÿetsca luarëngüejana utámenënga mochanjunatse; y chë ndoñe judiëngna, Jerusalenoca entsangbiyoye mochántsatsejaye y mochantsëbaye, chca chaotsemnana Bëngbe Bëtsá tojalesenciantscuana ca” —Jesús tojánayana.

*Bëngbe Bëtsá Entšá tbojanbemá quem luaroye echanjésabo  
(Mt 24.29-35, 42-44; Mc 13.24-37)*

<sup>25</sup> Mëntšánaca Jesús tojánayana: “Chora bëts soyënga echantsinÿna shinÿifne, juashconiñe y estrellënguifne; y quem luarentša entsanga tša mochántsauatja, ndayá jamama ntsetatšëmbcá, chë mar bëjaye y olëshënga corente echantsefshauenana causa. <sup>26</sup> Entšanga echantsabuatëcja tša auatja causa y ndayá quem luariñe yochjopásama enócochinÿena causa; er chë quem luarentša tsbanánoca espíritënga obenana bomnënga echanjángmëmana. <sup>27</sup> Y chora entsanga mochanjinÿe, chë Bëngbe Bëtsá Entšá tbojanbemá jantšetšhiñe echántsaboye, puerte obenánaca y corente buashinÿinÿaniñe. <sup>28</sup> Chë soyënga jochnënguama chaojobjatšé ora, añemo šmochjentšetaye y bestšaše játsbanase šmochjarrepára, er chora echántsemna chë tsëngaftangbe atsebacayana ca” —Jesús tojánayana.

<sup>29</sup> Mëntšánaca Jesús tojanëyana jabuátambama: “Smochjinÿe canÿe higo betiye o ndaye inÿe betiynaca. <sup>30</sup> Tojtsaisëjotsanama šmojinÿe ora, jtsetatšëmbuana chë tsabe tempo ya yojtsaisobecuama. <sup>31</sup> Cachcá, chë soyënga yojtsëchnëjuanama chašmojinÿe ora, šmochtsetátšëmbo chë Bëngbe Bëtsabe amëndayana ya yojtsobecuama.

<sup>32</sup> “Ndegombre cbëyana, lempe chca echanjochnëngo, morsca entsanga cabá ndóbana ora. <sup>33</sup> Celoca y quem luare echanjopochóca, pero atšbe palabra ndocna te queochaisopochóca.

<sup>34-35</sup> “Cuedado šmochtsebomna y ndoñe šmatjaleséncia tšëngaftangbe ainana bacna juabnëngaca chaotsemnama, jenomándama ntsoyencá mocá enobuena causa, tmoye causa y n̄ye quem luarentša soyëngama enócochin̄yena causa; y tšëngaftanga prontánënga šmochtsemna, n̄ye ndeolpe ch̄e te chaojobuache ora; y tšëngaftanga ndëprontánënga ndoñe chašmondëtsemna, mo tšëngaftangbiama can̄ye uachmaniñe cuaftsemncá. Er n̄yetsca quem luarentša entsangbiama chca echántsemna. <sup>36</sup> Cuedado šmochtsebomna y yejuana šmochtsantješna; n̄ye ntseco órnaca Bëngbe Bëtsáftaca šmochtsencuéntaye, chca, ch̄e echanjopása soyëngama jótsbocama chašmobenama, y ch̄e Bëngbe Bëtsá Entša tbojanbemabe delante jashjanguama ca” —Jesús tojanëyana.

<sup>37</sup> Jesús, bn̄eté Bëngbe Bëtsabe b̄ets yebnentše yojánabuatambaye, y ibetna, Olivos uabaina tjashoye yojánaye joquédama. <sup>38</sup> Y n̄yetsca entsanga cabá cachëse Bëngbe Bëtsabe b̄ets yebnoye imojánajna Jesús joyeunayama.

## 22

### *Entšanga tmojanjuabó ntšamo jamëse Jesúsbiøye jishachama (Mt 26.1-5, 14-16; Mc 14.1-2, 10-11; Jn 11.45-53)*

<sup>1</sup> Ya yojétsobeco Bashco fiesta, ch̄e levadúraca ndëpormana tandëse saye fiesta, ch̄e Bëngbe Bëtsá Egiptocana judiëngbe b̄ets taitanga tojánatsebacama jtenójuaboyama. <sup>2</sup> Ch̄e bachnangbe amëndayënga y ley abuatambayënga imojtsenguaye ntšamo jamëse Jesús jóbana, pero entsangbiama imojtsauatja.

<sup>3</sup> Chora Satanás, Judas ch̄e Iscariote ca uabobuatmabe ainaniñe bacna juabnënga tojanjajó. Chánaca yojamna ch̄e bn̄etsana uta uatsjendayënguentsá; <sup>4</sup> y tojána, ch̄e bachnangbe amëndayënga y Bëngbe Bëtsabe b̄ets yebnoca soldadëngbe amëndayëngaftaca jencuéntama, ntšamo Jesús chëngbe cucuatšiniñe jayentšbáshejuanama. <sup>5</sup> As chënga imojóyejuaye, y Judas tmojanšbuachená crocénana chama jtatšetayana. <sup>6</sup> Y Júdasna aín̄e ca tojánayana; y cach orscana cha yojtsenguaye ntšamo jamana y ndëmua ora Jesús chëngbiøye jayentšbáshejuanama, ndocna entsanga ora.

### *Jesús chabe uatsjëndayëngaftaca Bashco saná tojanse (Mt 26.17-29; Mc 14.12-25; Jn 13.21-30; 1 Co 11.23-26)*

<sup>7</sup> Ch̄e Bashco fiesta ora tojanóshjango, ch̄e levadúraca ndëpormana tandëse sayté; ch̄e te yojamna, Bëngbe Bëtsá jëtschuayamna can̄ye oveshá jóbana chora jasama. <sup>8</sup> As Jesús, Pedro y Juánbiøye tojanëyana: —Motsata y saná šochjaprón̄ta Bashco fiestama bënga mochjasama ca.

<sup>9</sup> Chora chata tbojantjá: —¿Ndëmoca cojtseboše ch̄e saná fchjaprón̄tama ca?

<sup>10</sup> Y Jesús tojanëjua: —Jerusalenentše chašojámashëngo ora, can̄ye bacó cmochanjóbiatše, matbajiñe búyeshe echantsabuyambaye. Cha šochjuasto, y šochtson̄yaye ndëmuan̄ye yebnentše cha yochjámashënguama; <sup>11</sup> y chentša nduiño šochjauyana: “Ch̄e Buatëmbayá šonjichamó aca jauyanama: ‘¿Ndayentše ch̄e tsañe yojtsemna, Bashco saná atše atšbe uatsjëndayëngaftaca jasama ca?’ ” <sup>12</sup> As cha cmochanjín̄yan̄yiye can̄ye b̄ets tsañe, tsbanana pisoca; ya lempe echántseprontana, y chentše, Bashco fiestama saná šochjaprón̄ta ca.

<sup>13</sup> As ch̄e útata tbojána, y tbojánin̄yena lempe ntšamo Jesús tojanëyancá, y chentše ch̄e Bashco saná tbojanprontata.

<sup>14</sup> Jasama tojanobuache ora, Jesús mesëshentše tojanótbema chabe uatsjëndayëngaftaca, ch̄e cachënga más chcoye chabe ichmónënga ca uabáinënga. <sup>15</sup> Chora Jesús tojanëyana: “Tša sëndánboše quem Bashco saná tšëngaftangaftaca jasama, atše cabá ndoñe chandësufrí ora. <sup>16</sup> Muentšana ndoñe más quemëntša saná quicháisesa, Bëngbe Bëtsabe amëndayana candóshjanguëntscuana. Chora echantsótatšëmbo ntšamo quem fiesta ndegombre iuayancá ca.”

<sup>17</sup> Chorna canye coptema vínoyeca tojanaca, Bëngbe Bëtsábioye tbojtanchuá y mëntšá tojánayana: “Quem coptema vínoye menáfšenga; y cbëyana, <sup>18</sup> chë uvas betiyentša shajuanentšana obocniye ndoñe más quichaisofsiye, Bëngbe Bëtsabe amëndayana candóshjanguëntscuana ca.”

<sup>19</sup> Chentšana, tandëse tojanca y Bëngbe Bëtsábioye tbojtanchuá; tojanjatá, tojanatšatá y mëntšá tojánayana: “Quem soye, atšbe cuerpo entsemna, y chanjóbana tšëngaftangbe tšabiama. Ntšamo mora bënga montsamcá šmochtsama, atšbiama jtenójuaboyama ca.”

<sup>20</sup> Tmojansentšana, chë coptémaca tojanma cachcá ntšamo chë tandëseca tojanmcá y mëntšá tojánayana: “Quem coptema vínoye entsemna chë Bëngbe Bëtsabe tsëmtrato entšàngaftaca. Atšbe buiñe echanjuábuashana, tšëngaftanga chašmotsetatšëmbuama ntšamo Bëngbe Bëtsá entsanga tojanašebuachenacá ndegombre yochjochñenguama. Chë buiñe tšëngaftangbe tšabiama echanjuábuashana. <sup>21</sup> Pero chë uayayëngbe cucuatšične šochjaboshjoná, mesëshentše átšeftaca entsemna. <sup>22</sup> Ndegombre, chë Bëngbe Bëtsá Entšá tbojanbemáftaca echanjopása, ntšamo Bëngbe Bëtsá chabiama tojanjuabocá. ¡Pero tša lastema chë bochjáboshjonabiama ca!” —Jesús tojánayana.

<sup>23</sup> Chorna chë uatsjëndayënga tmojanontšé entjanayana, chënguentšá nda chë boshjuaná bëtsemnana.

### *Nda chë más uamaná yomna*

<sup>24</sup> Chë uatsjëndayënga imojtsenatsësnaye chënguentšá nda chë más uamaná bëtsemnana. <sup>25</sup> As Jesús tojanéyana: “Chë ndoñe judiëngbeñe, chë reyënga chëngbe entšàngbioye nýe ntšámñaca jtsamëndayana, y chentša amëndayënga jtsamana, entsanga chëngbioye tšabe soye amënga ca chamotsëboboúatmama. <sup>26</sup> Pero tšëngaftangbeñe ndoñe chca chaondëtsemna; chamna, tšëngaftangbeñe chë más uamaná mo chë más basacá chaóbema, y chë mandayá mo chë oservenacá. <sup>27</sup> Er, ¿ndase chë más uamaná yomna, chë mesëshentše jasama tojotbemá o chë uajuatšnáyá? Ndegombre co chë mesëshentše tojotbemá; pero atšna tšëngaftangbeñe sëntsemna mo chë oservenacá.

<sup>28</sup> “Atšbe padecéñe tšëngaftanga sempre átšeftaca šmondëtsemna. <sup>29</sup> Chíyeca, atšbe bariëna, canye amëndayana chochanjátšataye, ntšamo atšbe taitá canye amëndayana šojatštacá; <sup>30</sup> chca, atšbe amëndayoca mesëshentše átšeftaca šmochanjase y šmochanjofsiye, y uámana tbemaniñe mo reyëngcá šmochanjotbiama, chë Israeloca bnëtsana uta pamíllanga entsangbiama chašmuayanama tšabá o ndoñe tšabá chënga tmonjamama ca” —Jesús tojánayana.

### *Jesús tojánayana, chábioye ndoñe bonjanabuátma ca Pedro yochjánayanama (Mt 26.31-35; Mc 14.27-31; Jn 13.36-38)*

<sup>31</sup> Jesús mëntšánaca tojánayana: —Simón, Simón; cochtsetátšëmbo, Satanás obenana tonjotjañe tšëngaftangaftaca nýe ntšámñaca jamama, mo chë trigo matënga tcojtsashatiyeynacá; <sup>32</sup> pero atšna Bëngbe Bëtsá sënjaimpadá, átšbeñe ošbuáchiyana ndoñe chacmondëtsebuáshbenama. Y aca, nýets ošbuáchiyana átšbeñe chacojtsatsbomna ora, chë inýe ošbuáchiyënga cochjújabuache átšbeñe sempre chamotsošbuáchema ca.

<sup>33</sup> Chora Simón tbojanayana: —Bëngbe Utabná, atše sëntseprontana ácaftaca cárceloye jámnaca y jobanámnaca ca.

<sup>34</sup> Y Jesús tbojanayana: —Pedro, atše cbëyana, cam ibeta bínyanoye, ngallo cabá ndécánta ora, aca unga soye cochanjayana ndoñe šconduabuátma ca.

### *Chë más jabuache ora yojtsobeco*

<sup>35</sup> Chentšana Jesús tojanatjá: —¿Chë ni shecnájaca, ni crocenánaca, ni shecochëtjonësheca tcbonjanichamó ora, nderado ndayá tcmojanabuáshebena ca?

Y chënga tmojanjuá: —Tondaye ca.



<sup>36</sup> Chora tojanéyana: —Mora ndoñe chca; shecnaja tobomná, chëja chauesocñe y crocenánama shecnébénaca; y nda ndoñe espadëja tondbomna, chabe quëfsáiya chaotsatábuiye y canye espadëja chauatobuámiñe. <sup>37</sup> Er cbéyana, entseyta átseftaca chaopasá, ntšamo Bëngbe Bëtsabe uabemana palabrenguiñe atšbiama iuayancá, mëntšá: “Y chábioye tmonjáninye mo chë puerte bacna soye amënguentsá canya cuaftsemncá ca.” Y lempe ntšamo atšbiama iuabemancá, mora ya echanjochnëngo ca —Jesús tojanéyana.

<sup>38</sup> As chënga tmojanianya: —Bëngbe Utabná, muentše uta espadëja entsemna ca.

Y japochócamna cha tojánayana: —Nye nyetsá ponto ca.

*Getsemaní luarentse, Jesús Bëngbe Bëtsáftaca tbojanencuentá*  
(Mt 26.36-46; Mc 14.32-42)

<sup>39</sup> Chentšana, Jesús tojánbocna y ntšamo yojanamancá Olivos tjashoye tojána, y chabe uatsjëndayënga tmojanasto. <sup>40</sup> Choca tmojánashajna ora, Jesús tojanéyana: “Bëngbe Bëtsá moimpadanga, bacna soye jamama ndoñe chacmondócochënguama ca.”

<sup>41</sup> Y chë uatsjëndayëngbentsana yojoluára, mo canye ndëtsbé jutsenëntscoca nyetsá, y yojoshëntsamentšiye Bëngbe Bëtsáftaca jencuëntama. <sup>42</sup> Jesús mëntšá tojánayana: “Taita, aca tcojtsebošëse, moma atše ndoñe chašondëtsemna chca jasúfriana. Pero ntšamo atše stsebošcá ndoñe chaondëtsemna, sinó ntšamo aca cojtsebošcá ca.”

<sup>43</sup> Chca orna celocana canye ángel tbojánëbëbocna, añemo chaotsebomnama juajabuáchama. <sup>44</sup> Jesús tša ngmëniñe yojtsemna, y Bëngbe Bëtsáftaca más ibojtsencuëntaye. Y chabe bosese yojtsemna mo fshantsiñe buiñe cuaftsebuastëtjuancá.

<sup>45</sup> Bëngbe Bëtsáftaca jencuëntama tojanpochocá ora, tojtantsbaná y chabe uatsjëndayënga imojtsemnoye tojána; y chënga imnétsomañe, tša ngmënaca imojtsemna causa. <sup>46</sup> Chora tojanéyana: “¿Ndáyeca šmotsomañe? Motsbananga y Bëngbe Bëtsá šmochtseimpadana, bacna soye jamama ndoñe chacmondócochënguama ca.”

*Uayayënga Jesús tmojánishache*  
(Mt 26.47-56; Mc 14.43-50; Jn 18.2-11)

<sup>47</sup> Jesús cabá yojtsóyebuambnantscuana, ba entsanga chentše tmojánashajna. Chë Judas ca uabainá, canya chë bnëtsana uta uatsjëndayënguentsá, chë entsangbe natsana yojtsaye. Cha yojobeconá Jesús juamóchama; <sup>48</sup> pero Jesús tbojanianya: “Judas, ¿canye juamochëse chë Bëngbe Bëtsá Entšá tbojanbemá uayayëngbe cucuatšiñe cochjaboshjona ca?”

<sup>49</sup> Chë Jesúseftaca imojtsemnënga tmojáninye ntšamo chora yochjanopásama; as tmojanianya: —Bëngbe Utabná, ¿espadëjaca fšcotsatsejaye ca?

<sup>50</sup> Y canya chënguentsá, chë bachnangbe más uámana amëndayabe bochichnayábioye catšbioica matscuaše tbojtsantëtše, y tbojtsanëstjango. <sup>51</sup> Chora Jesús tojanéyana: —Cachcá monyá; nye nyetsá ponto ca.

Y chë bochichnayábioye chë matscuaše tbojánbojajo y tbojanshná. <sup>52</sup> Chentšana, chë bachnangbe amëndayënga, chë Bëngbe Bëtsabe bëts yebnentša soldadëngbe amëndayënga y chë judiëngbeñe bëtsëjemëngcá amëndayënga, chë cha juanatsama tmojánabënga, Jesús tojanéyana: “¿Ndáyeca espadëjangaca y ngarotbéngaca šmojabo atše jishachama, mo atše canye bacá uamana entšá cuaftsemncá ca? <sup>53</sup> Atše cada te tšëngaftangaftaca sënjamna Bëngbe Bëtsabe bëts yebnentše, y ni chešmánbojajo. Pero ora tocjobuache tšëngaftanga chca chašmomama, y Satanás ntšamo yojtsebošcá tšëngaftangbeñe echantsemándaye ca” —Jesús tojanéyana.

*Pedro tojánayana Jesúsbioye ndoñe bonjanabuátma ca*  
(Mt 26.57-58, 69-75; Mc 14.53-54, 66-72; Jn 18.12-18, 25-27)

<sup>54</sup> Chentšana Jesús tmojánishache, y chë bachnangbe más uámana amëndayabe yebnoye tmojanánatse. Y Pedro bënocana ibojtsëstona. <sup>55</sup> Choca, chashja tsëntsaca, canye íñeshe tmojanangbotjó y entsanga chë shëconana imojtsetbiámana; y Pédrëncaca

chentše chëngaftaca yojótbema. <sup>56</sup> Chora, canye shembása chentša oservená, Pédrëbioye tbojáninye chë iñe juachaca yojtsetbemana; tbojanonýinyé y tojánayana: —Muánaca cháftaca endánmëna ca.

<sup>57</sup> Pero Pedro ndoñe ca tojánayana, y chë shembásabioye mëntšá tbojaniana: —Sobrená, atše cha ndoñe quetsatabuatma ca.

<sup>58</sup> Ndoñe yapa bën y inya chábioye tbojataninye y tbojaniana: —Acnaca chë uatsjendayënguentsá condmëna ca.

Pero Pedro tbojanjuá: —Bacó, atše ndoñe quetsátsmëna ca.

<sup>59</sup> Chentša benëntscosna, inya más yojátayana: —Ndegombre, muánaca cháftaca enjánana; muánaca Galileocá entsemna ca.

<sup>60</sup> Y Pedro tojánayana: —Bacó, ndayama cojtsichámuama ndoñe quetsátstatsëmbo ca.

Cachora, y Pedro cabá yojtsóyebuambnantscuana, canye ngallo yojacánta. <sup>61</sup> Chora Bëngbe Utabná yojobuértana y Pédrëbioye tbojanonýinyé; y Pedro chora yojenójuaboye ntšamo Bëngbe Utabná tbojanianama: “Cam íbeta bínyanoye, ngallo cabá ndécánta ora, aca unga soye cochanjayana ndoñe šconduabuatma ca.” <sup>62</sup> As Pedro shjoye tojánbocna, y corente ngmënaca yojtsenóbošachna.

*Jesús imojtsáboyejuana*  
(Mt 26.67-68; Mc 14.65)

<sup>63</sup> Chë Jesús imojtsebojanýá entsanga cha imojtsáboyejuana y imojtsejantšetaye; <sup>64</sup> y jtsabuchëntsacjuase, imojtsetjanaye: “¡Momalisiá, nda tcmënjajantšetá ca!” <sup>65</sup> Y imojtsóyenguaye, nýe mocá soyënga jtsatsëtsnayëse.

*Jesús, chë judiëngbe uámana mándayëngbe delante*  
(Mt 26.59-66; Mc 14.55-64; Jn 18.19-24)

<sup>66</sup> Tojanbinýna ora, chë bëtsëjemëngcá amëndayënga, bachnangbe amëndayënga y ley abuatambayënga tmojánenefna, y chëngbioye Jesús tmojanánatse. Choca tmojantjá: <sup>67</sup> —Smëyana, ¿aca Bëngbe Bëtsabe Uámana Uabuayaná, chë Cristo comna ca?

Y Jesús tojanëjua: —Aíñe ca tchojáuyanëse, tšëngaftanga chama átšbeñe ndoñe quešmochatošbuáchiye. <sup>68</sup> Y nderado tchojájtasna, tšëngaftanga ndoñe quešmochatojuá ca. <sup>69</sup> Pero cam orscana, chë Bëngbe Bëtsá Éntšá tbojanbemá, chë Bëngbe Bëtsá nýets obenana bomnabe catsbioica echántatsbemana ca.

<sup>70</sup> Chora nýetscanga tmojantjá: —¿As, aca chë Bëngbe Bëtsabe Uaquiñá comna ca?

Y Jesús tojanëjua: —Cach tšëngaftanga chca šmontsichamo; atše cha sëndmëna ca.

<sup>71</sup> As chora chënga tmojánayana: —¿Ndayama más entsanga šochjátëjamoto Jesusbe contra chamuayanama? Er cach bënga chabe uayásentsana chca tmonjouena ca.

## 23

*Jesús, Pilatbe delante*  
(Mt 27.1-2, 11-14; Mc 15.1-5; Jn 18.28-38)

<sup>1</sup> Nýetsca mándayënga tmojëftsantsbaná, y Pilátbioye, chë Judeoca mandádbioye Jesús tmojanánatse. <sup>2</sup> Y chentše tmojanontsé cha mal jaquédana, mëntšá: —Bënga fsënjínýena mua entsabuatambá bacna soyënga, quem luarentša entsangbe amëndayëngbioye ndëtsayaunanama. Cha entsichamo bënga ndoñe šontsamna Césarbiama impuesto jtsat-squëcjayana ca; y entsichamo cha yomna chë Cristo, chë Bëngbe Bëtsabe Uámana Uabuayaná, mo canye reycá ca.

<sup>3</sup> Chora Pilato Jesúsbioye mëntšá tbojantjá: —¿Aca chë judiëngbe Rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

<sup>4</sup> As Pilato, chë bachnangbe amëndayënga y entsanga tojanëyana: —Atše ni mo canye soye chiyátinýena, quem boyabása castiganá chaotsemnama jayanama ca.

<sup>5</sup> Pero chënga más tmojanáyebuachena: —Nýets Israel luarëjana entsabuatambá, Galilea entsangbe amëndayëngbe contra jtsemnama. Galilea luaroca chca tonjabojatšé y mora moca Judeócnaca cachcá entsama ca.

### *Jesús Rey Heródesbe delante*

<sup>6</sup> As Pilato, Galilea luarama yojouena ora, tojanatjá Jesús Galileocá tajojamnama. <sup>7</sup> Y Jesús aíñe Galileoca yojamnama cha tojántatšëmbona ora, Rey Heródesbioye cha tbojanichmó. Herodes inamna Galileoca mandado y chora Jerusalenentše cha yojtsemna. <sup>8</sup> Herodes Jesúsbioye tbojáninýe ora, corente tojanoyejuá. Chana tempscana inaboše Jesús jinýama. Cha ba soyënga Jesusbiamá tojanuena, y yojtseboše jinýama Jesús jamana canýe bëts soye, Bëngbe Bëtsabe obenánaca. <sup>9</sup> Heródesna ba soyënga tbojantjá, pero cha ndocá tbojanjuá. <sup>10</sup> Y chéntšnaca, chë bachnangbe amëndayënga y judiëngbe ley abuátambayënga imojtsemna, y Jesús corente mal imojtsequédaye.

<sup>11</sup> Chora, Herodes y chabe soldadënga Jesúsbioye corente imojtsáboyënja, y jtsaboye-juanamna, botamana entsayangá tmojanichëtjo, mo canýe reycá; chentšana cachiñe Pilátbioye tmojesanichmó. <sup>12</sup> Cach te Herodes y Pilato tbojtananatsëtsaye; tempna chata ibojenáyata.

### *Jesusbiamá chaóbana ca tmojánayana* (Mt 27.15-26; Mc 15.6-15; Jn 18.39-19.16)

<sup>13</sup> Chentšana Pilato, chë bachnangbe amëndayënga, chë pueblentša amëndayënga y nýetsca entsanga tojánachembo, <sup>14</sup> y mëntsá tojanëyana: —Tšëngaftanga quem entsá átšbioye šmojuánatse, mo bacna soye entsángbeñe abuatambayacá, mandadënga ndëtsayaunanama ca; tšëngaftangbe delante lempe sënjatjá, tšëngaftanga ba soyënga muabiamá šmonjayana, pero atšna ni mo canýe soye chiyátinýena, quem boyabása castiganá jtsemnama ibojtsemna ca jayanama. <sup>15</sup> Herodes cach ndoñe, chíyeca cachiñe bëngbioye cha tbojesichmó. Quem boyabása ni mo canýe ndoñe tonjobuachjanguá jóbanama chabotsemnama. <sup>16</sup> Chcasna, jabuache chamotsecastigá y chentšana chanjëtšboshjona ca —cha tojánayana.

<sup>17</sup> Yojamna canýe utamená jëtšboshjonana, ntšamo Bashco fiesta ora jamana imojanamancá. <sup>18</sup> Pero chora entsanga cánýiñe tmojanáyebuachena: —¡Jesús chaóbana! ¡Barrabás matsboshjona ca!

<sup>19</sup> Barrabás inautámena, mandadëngbioye ndëtsayaunanama chë bëts pueblentše entsanga tojánenautanama y entsá óbanaye causa. <sup>20</sup> Pilato cachiñe tojánayana Jesúsbioye jëtšboshjonama yojtsanboše ca; <sup>21</sup> pero entsangna más tmojtëtanayebuachena: — ¡Motsecrucificá! ¡Motsecrucificá ca!

<sup>22</sup> Pilato ya unga soyama tojtëtanayana: —¿Ntšamo bacna soye mua tojobuachjanguá ca? Ni mo canýe bacna soye chiyátinýena, mua jóbanama chabotsemnama. Chcasna, chanjacastíga y chora chanjëtšboshjona ca.

<sup>23</sup> Pero chëngna más imojtsechembumbuana Jesús chamotsecrucificama. Cabana, chë bachnangbe amëndayënga y chë entsangbe jabuache chembumbuanánaca, Pilato tmojanëyëñaná Jesús chamóbama. <sup>24</sup> As Pilato tojanmandá ntšamo chë entsanga imojtsotjanañcá chaotsemnama; <sup>25</sup> as chora Pilato, Barrabásbioye cachcá tbojtamboshjona, chë nda inautámena mandadëngbioye ndëtsayaunanama entsángbioye tojánenautanama y entsá óbanaye causa. Y Jesusna entsangbe cucuatšinë tbojánboshjona, ntšamo chënga tmojtsebošcá chamomama.

### *Jesús tmojan crucificá* (Mt 27.32-44; Mc 15.21-32; Jn 19.17-27)

<sup>26</sup> As jacrucificama Jesús tmojanánatse. Chora jajocana inátaboye canýe boyabása, Simón ca uabainá, Cirene luarocá; y cha Jesusbe cruz tmojancutsá, Jesusbe ústonoye chaotsambama.

<sup>27</sup> Y banga chë pueblentša entsanga imojtséstona; y chë shembásenga imojtsëstonëngna imojtsayošachiye y ngménaca imojtsanioye, Jesús chca yojtsepásama. <sup>28</sup> As Jesús chëngbioye tojanobuértana y tojanëyana: “Jerusalenentša shembásenga, atšbiamá ndoñe matošachena; cach tšëngaftangbiamá y tšëngaftangbe básëngbiamá šmochjenóbošachna. <sup>29</sup> Canýe te echanjóshjango y chë te šmochántšichamo: ‘Tša tšabá chë shembásenga šešona ndbomnëngbiamá, chë quem luaroye šešonga ndoñe tmonjëftséshejajnéngbiamá, y chë šešonga ndoñe tmonjëftsabachëngbiamá ca.’

<sup>30</sup> Chora entsanga jetsóitanama mochántseboše y mochanjontšé ichámuana: ‘¡Tjashënga šmotsëtebuantsá y batsjabenga šmotsaitame ca!’ <sup>31</sup> Atše, chë ndocna bacna soye amá, chíyeca puerte obená, chca šmojaborlase, ¿ntšamo mochjama chë ndegombre bacna soye amëngaftaca, chíyeca ndobenënga? O mëntšá, ¿chë nguëfshna betíyeca chca tmojtsamëse, ntšamo chë tojtsebuashá betíyeca mochjama ca?’ —cha tojanëyana.

<sup>32</sup> Jesúseftaca cruciñe jóbanama, útata bëts bacna soyënga ochjajnayátnaca imojtsënachaye. <sup>33</sup> Chë “Obanabe Bestšashe ca” uabaina luaroye tmojánashjajna ora, Jesús tmojanrucificá y chë bëts bacna soyënga ochjajnayátnaca, canýa chabe catšbioica y chë ínýana chabe uañicuayoica. <sup>34</sup> Chora Jesús mëntšá tojánayana: “Taita, mëngbe bacna soye motsaperdónaye, er ntšamo montsamama chënga ndoñe quemátstatsëmbo ca.”

Chë soldadënga Jesusbe entsayamna, tsbanánoye tmojanëtsëna, chënga jtenájatayama. <sup>35</sup> Entšanga chentše imojtsemnënga chca imojtsonýaye, y chë pueblentša mandayëngnaca Jesús imojtsáboyejuana y mëntšá imojtsenatsëtsnaye: “Inýengna aíñe tojëftsatsëbacá; mora cachá chauentsbocá, cha ndegombre Cristo, chë Bëngbe Bëtsabe Uámana Uabuayaná tomnëse ca.”

<sup>36</sup> Soldadëgnaca Jesús imojtsáboyejuana; tmojanobeconá y untja vínoye imojtsefsësnaye, <sup>37</sup> y mëntšá imojtsatsaye: “¡Chë judiëngbe Rey tcomnësna, cach aca mentsbocá ca!”

<sup>38</sup> Jesusbe bestšaše juatsboicna canýe uabemana soye tmojananjo; chiñe mëntšá yojtsanábemana: MUA CHË JUDIËNGBE REY ENDMËNA ca.

<sup>39</sup> Canýe bëts bacna soyënga ochjajnayá yojtsecrucificaná, Jesúsbioye mëntšá tbojanóyenguango: —Chë Bëngbe Bëtsabe Uámana Uabuayaná tcomnësna, mentsbocá y bëndátnaca šmatsebocá ca.

<sup>40</sup> Pero chë inýe bëts bacna soyënga ochjajnayana mëntšá tbojanácacana: —¿Ni mo Bëngbe Bëtsá ndoñe condërrespetana? Bëndátnaca bontsamna chacá jóbanama.

<sup>41</sup> Ndegombre bëndata muentše bontsemna bëts bacna soyënga ochjajnaye causa, y chíyeca chca jasúfriama bontsamna. Pero quem boyabása ni mo canýe bacna soye ndoñe tonjobuachjanguá ca.

<sup>42</sup> Y chorna, quem bëts bacna soyënga ochjajnayá Jesúsbioye tbojanianya: —Jesús, atšbiamá cochtenójuaboye aca reycá jabomándama chacojtabo ora ca.

<sup>43</sup> Y Jesús tbojanjuá: —Ndegombre cbëyana, mënté átseftaca celoca, chë nyetscanga oyejuayënga mondbetsemnoca, aca cochantsatsmëna ca.

### *Jesús tojanóbana*

*(Mt 27.45-56; Mc 15.33-41; Jn 19.28-30)*

<sup>44</sup> Nyetsto orscana las tresëntscoñe nyets quem luare yojtseibétata. <sup>45</sup> Y shinýe yojtsajbaná binýnayana, y Bëngbe Bëtsabe bëts yebnentše yojújonýana entsëjua tsëntsaca yojtsenájataye. Chëjua bënëjua inauamna y chë tsatsëntsaca inaújonýana. <sup>46</sup> As Jesús tojanáye buachena: “Taita, atšbe espíritu acbe cucuatšíñe šcoboshjona ca.”

Y chca jayanama tojanpochocá ora, tojanóbana.



<sup>47</sup> Chë romano soldadëngbe amëndayá chca tojáninÿe ora, Bëngbe Bëtsábioye tbojtadorá, mëntśá jayanëse: “Ndegombre, quem boyabása ainaniñe tśabe juabnënga bomná inamna ca.”

<sup>48</sup> Nÿetsca entsanga chë soye jinÿama tmojánabënga, chca tojanopasama tmojáninÿe ora, tmojanontśé jtangana enocochjantśetaye, ngménama. <sup>49</sup> Pero Jesusbe nÿetsca ubuátmënga y chë shembásenga Galileocana tmojanastëngna, chaboca tmojanouquedá chë soyënga onÿayiñe.

### *Jesús tmojanatbontśá*

*(Mt 27.57-61; Mc 15.42-47; Jn 19.38-42)*

<sup>50</sup> Yojanmëna canÿe boyabása, José ca uabainá, canÿe Judeoca pueblócá, Arimatea ca uabaina; cha inamna canÿa chë pueblentśa uámana amëndayënguentsá y canÿe tśabe entsá y nÿetsca soyënguiñe tśabá amá. <sup>51</sup> Chánaca yojanobátmana chë Bëngbe Bëtsabe amëndayana chaóshjanguama, y tondaye tbonjanogustá ntśamo chë inÿe amëndayënga tmojanjuabó y Jesúseftaca tmojanmcá. <sup>52</sup> Cha Pilátbioye tojána y Jesusbe cuerpo tbojantotjañe. <sup>53</sup> José chë cruzocana Jesusbe cuerpo tbojtantjango, canÿe lino entséjuaca tbojanandmaná y canÿe cuevëshiñe, peñëshiñe pormániñe, tbojanjajó. Chentśe cabá ndocná mondëjajo. <sup>54</sup> Yëfsana ochnayté bëtsemnayecna, cach te yojanotocana saná japróntana chë yëfsana jasama; y chë ochnayté ya yojtsebínÿana.

<sup>55</sup> Chë shembásenga, Galileocana Jesús tmojantjëmbabanga, tmojána y chë cuevëshe tmojáninÿe, y tmojanrrepará ntśamo Jesusbe cuerpo tmojanjajoma. <sup>56</sup> Yebnoye tmojtaná orna, tmojanprontá botamana uanguëtśe béjayënga y soyënga chë cuerpiñe janëtjuama.

Chë ochnaytena chënga tmojanochná, ntśamo Moisesbe leyinÿe yojanmandancá.

## 24

### *Jesús tojtanaÿena*

*(Mt 28.1-10; Mc 16.1-8; Jn 20.1-10)*

<sup>1</sup> Y tmengo, chë inÿe semana bojatśëntena, cabá cachëse, Jesús tmojanatbontśá cuevëshoye chë shembásenga tmojána, y tmojanamba chë tmojanprontá botamana uanguëtśe soyënga. <sup>2</sup> Pero choye tmojánashjajna orna, tmojáninÿena chë cuevëshoye amashjuanentśa ndëtśbé chentśana juanániñe, <sup>3</sup> y choye tmojánamashjna ora, Bëngbe Utabná Jesusbe cuerpo ndoñe tmonjáninÿena. <sup>4</sup> Chë shembásengna ndoñe imontsetátśëmbo ntśamo jajuaboyana chë soyama; chora, uta boyabásata, uabuashinÿinÿana entsáyá uichëtjonata chentśe tbojabántsaye. <sup>5</sup> Y chë shembásenga tmojanëuatjanama y fshantsoye imojtsatsejbënama, chata tbojanéyana: “¿Ndáyeca obanëngbentśe chë vida totsobomná śmojtsenguá ca? <sup>6</sup> Muentśe cha ndocná quenátmëna, er cha ya tontayena. Menójuabonga ndayá cha tmojanéyanama, cha cabá Galileoca enjamna ora. Cha tonjánayana: <sup>7</sup> ‘Chë Bëngbe Bëtsá Entśá tbojanbemá bontsemna bacna soye amëngbe cucuatśiñe chamoboshjonama, chamocrucificama y unga tianoye cháuatayenama ca’ ” —chata tbojánayana.

<sup>8</sup> Chora chë shembásenga Jesusbe palabrëngama imojtenójuaboye, <sup>9</sup> y chë cuevëshentśana tmojtaná ora, chë tśabe noticiënga chë bnëtsana canÿe uatsjëndayënga y inÿe entsángbioye tmojanacuntá. <sup>10</sup> Chë uatsjëndayëngbioye chca cuentayëngna imojamna María Magdalena, Juana, y María, chë Santiagbe mamá, y chë inÿe shembásenga chëngaftaca imojamnënga. <sup>11</sup> Pero chë uatsjëndayëngna mëntśá chë shembásengbiamá imojëtsejuabnaye: “Chënga montsoyebuambná mo corente juabna ndbomnëngcá ca.” Y chca, chënga chë soyiñe ndoñe montsanošbuaché.

<sup>12</sup> Pero chentśana, Pedro tojëftsantsbaná y ochamanana chë Jesús tmojanjajó cuevëshoye tojána. Y chocha yojtsemna ora, yojotsejbëna tsoye jontješiyama, pero nÿe ena

entšëjuangá yojuinÿe, chë Jesús tmojanbochmëjuangá. As Pedro ojnananá yebnoye yojtá, chca tojanopasama.

*Chë Emaús pueblöye benachiñe*  
(Mc 16.12-13)

<sup>13</sup> Cach te, uta uatsjéndayata Emaús pueblöye ibojtsaye. Emaús yojamna Jerusalenocana bnëtsana canÿe kilómetroca. <sup>14</sup> Chata ibojtsayencuéntaye lempe ntšamo tojanopasama. <sup>15</sup> Y tojanopasá, ibojtsencuéntaye y ibojtsenatsëtsnayëntscuana, cach Jesús tojanobeconá y chátaftaca cánÿiñe yojtsaye; <sup>16</sup> masque imojtsonÿaye, ndoñe ibontsobena cha jótëmbana. <sup>17</sup> Jesús tojanëyana: —¿Ndayama benachiñe šuabanencuéntaye ca?

As chata ngménaca ibojtsaye, <sup>18</sup> y canÿa, Cleofás ca uabainá, tbojaniyana: —¿Nÿe aca cojtsemna, inÿe luarocana ashjangoná Jerusalenentše oyená, ndayá chentše quem diënga yopasánama ndëtatsëmbuá ca?

<sup>19</sup> Chora cha tojanëyana: —¿Ndaye soyënga ca?

Y chata tbojaniyana: —Chë Jesús Nazaretocáftaca tonjopasá soyëngama. Cha enjamna canÿe Bëngbe Bëtsabe juabna oyebuambnayá, puerte obenana bomná ndayá jamama y jayanama, Bëngbe Bëtsabe delante y nÿetsca entšangbe delante. <sup>20</sup> Y ntšamo, chë bachnangbe amëndayënga y chentša mandadënga ínÿengbe cucuatšinë tmonjáboshjona, jóbanama ibojtsemna ca entšanga chamuayanama y chamocrucificama. <sup>21</sup> Bënga chabiamama fsënjanobátmana, Césarbe cucuatšëntšana Israeloca entšangbe atsebacayá chaotsemnama; pero morna ya unga te entsemna chca tonjopasá. <sup>22</sup> Y mora ndayá, básefta shembásenga bëngbe enutënga ójnanana soyënga šonjáuyana. Chënga cabá cachëse chë Jesusbe cuerpo tmonjanjajó cuevëshoye tmonjá, <sup>23</sup> y chabe cuerpo ndoñe tmonjínÿena; as chora chënga bëngbioye tmontabo y montsabíchamo angelënga tmojëftsanÿe y chënga catmënjayana cha ainá yojtsatsmëna ca. <sup>24</sup> Bëngbentšana baseftángnaca chentšana chë cuevëshoye tmonjá, y tmojínÿena ntšamo chë shembásenga tmonjayancá, pero Jesús ndoñe tmojëftsinÿe ca —chata ibojtsichamo.

<sup>25</sup> As Jesús chata tojanëyana: —¡Tša juabna ndbomnënga y tša uenana jošbuáchiyama, chë Bëngbe Bëtsabe juabna oyebuambnayënga tmojánayana soyëngama! <sup>26</sup> ¿Mo ndoñe yojamna chë Uámana Uabuayaná chë soyënga chaosufrima, y chentšana nÿetsca entšanga corente cha chamuatschuama ca?

<sup>27</sup> Chentšana Jesús tojanontsé chata jábuayenana, lempe ntšamo chabiamama yojanoyebuambnacá chë Bëngbe Bëtsabe uabemana palabrenguiñe; yojontsé Moisesbe libréšangañe y chë Bëngbe Bëtsabe juabna oyebuambnayëngbe libréšangáñnaca.

<sup>28</sup> Chë ibojétsaye pueblöye imojtsebeconá ora, Jesús tojanma mo más chcoye cuaftacá. <sup>29</sup> Pero chatna tmojanatarié chentše chaotsoquedáñama, mëntsá jauyanëse: —Bëndátaftaca motsoquedáñe; ya jetiñe entsemna y ya echanjaibétata ca.

As Jesús chátaftaca tojtsanoquedáñe. <sup>30</sup> Chentšana tojanopasá, juasama mesëshentše imojtsetbiámana ora, Jesús chë tandëse tojanca, Bëngbe Bëtsábioye tbojtanchuá, chë tandëse tojanjatá, y chata tojanatšatá. <sup>31</sup> As, chora chë uatsjéndayata ibojobenaye Jesús jótëmbana; pero chana nÿe ndeolpe yojuenatjëmba. <sup>32</sup> Chora chata ibojtsenatsëtsnaye: “Chë benachiñe Bëngbe Bëtsabe uabemana palabrengama šondabuayiyiná ora, ndegombre bëngbe ainaniñe más bontseboše cha más chašotsabuayiyinama, ¿ndoñe chca ca?”

<sup>33</sup> As, cachora tbojëftsantsbanata y Jerusalenoye tbojtanata; choca tmojáninÿena chë bnëtsana canÿe uatsjéndayënga cánÿentše imojtsemna y chëngbe enutëgnaca; <sup>34</sup> y mëntsá imojtsichamo: —¡Ndegombre Bëngbe Utabná tojtayena; Simónbioye tbojëbëbocna ca!

<sup>35</sup> As chata tbojanontsé jacúntana, ntšamo benachiñe tbojanpasacá, y ntšamo Jesúsbioye imojótëmba, chë tandëse tojanjatá ora.

*Jesús chabe uatsjédayënga tojanëbëbuacna  
(Mt 28.16-20; Mc 16.14-18; Jn 20.19-23)*

<sup>36</sup> Chë uatsjédayënga chë soyëngama cabá imojtsencuéntantscuana, Jesús chëngbe tsëntsaca tojabántsaye y mëntsá tojanëyana: “Chë atšbe ainaniñe tšabe ebionana tšëngaftangaftaca chaotsemna ca.”

<sup>37</sup> Pero chënga tša auatjanánënga imojtsemna, y canye añemëse imojétsonyaye ca imojtsejuabnaye. <sup>38</sup> Pero Jesús tojanëyana: “¿Ndáyeca auatjanánënga šmojtsemna? y ¿ndáyeca tšëngaftangbe ainaniñe chca šmojtsejuabná ca? <sup>39</sup> Atšbe cucuatšënga y atšbe shecuatšënga minyënga; šmobjajo y šmochanjinye. Cach atše sëntsemna. Canye añemësna, ni mëntsena ni betašënga ntsebomnana; pero tšëngaftanga šmontsonyá, atšna aíñe ca” –tojanëyana.

<sup>40</sup> Chca yojsichámëse, chabe cucuatšënga y chabe shecuatšënga tojaninyanýe. <sup>41</sup> Y chënga cabá ndoñe montsanošbuaché, chca noticiama corente imojtsóyejuama y tša ojanánënga imojtsemna causa; as Jesús tojanatjá: “¿Muentše ndayá jasama quešmëbomna ca?”

<sup>42</sup> As canye tabena buana beonbiana tmojanoyé; <sup>43</sup> Jesús tojanocñe y chëngbentše tojanse. <sup>44</sup> Chentšana Jesús tojanëyana: “Quem palabrënga entsemna ntšamo cabá tšëngaftangaftaca sënjamna ora tcbonjanëyancá: Entsemna, lempe chaopasá ntšamo atšbiana iuabemancá, Moisesbe leyënguiñe, chë Bëngbe Bëtsabe juabna oyebuambnayëngbe uabemana librëšangañe y Salmos librëšañnaca ca.”

<sup>45</sup> Y chora chë uatsjédayënga, Jesúsbeyeca tmojanobená chë Bëngbe Bëtsabe uabemana palabrëngama josértana. <sup>46</sup> Chentšana Jesús tojanëyana: “Ntšamo atšbiana iuabemancana yomna, chë Bëngbe Bëtsá Entšá tbojanbemá chaosufrí y unga tianoye chauatayena ca. <sup>47</sup> Y morna atšbe uabaina jayanëse, átšbeñe betsošbuáchema, nyets quem luarentše šmochjontša entšanga atšbiana jábuayenama, bacna soyënga amana chamuajbanama, as chca, Bëngbe Bëtsá chëngbe bacna soyëngama cháuaperdonama; chë soyënga Jerusalenentše chaobojatšé. <sup>48</sup> Tšëngaftanga atšbiana soyënga šmonjinýe y šmondétatšëmbo. <sup>49</sup> Atšbe Taitabe šbuachenaná, tšëngaftangbiama chanjíchmuá. Pero morna camuentše Jerusalenentše moquedanga, Bëngbe Bëtsabe obenana chašmóyëngacñëntscuana ca” –cha tojanëyana.

*Jesús celoye tojtantsjuá  
(Mc 16.19-20)*

<sup>50</sup> Chentšana, Jesús chabe uatsjédayënga ínýoye tojanënatse, Betania pueblo béconana. Y chabe buacuatšënga játsbanase, Bëngbe Bëtsá tbojanimpadá chë uatsjédayënga tšabe bendicionënga chamóyëngacñama. <sup>51</sup> Chca yojsamëntscuana, cha chëngbentšana tojanoluaré y tojanontsé celoye játsjuana. <sup>52</sup> Chë uatsjédayëngna, Jesús tmojtanadorá chentšana, Jerusalenoye oyejuayënga tmojtaná; <sup>53</sup> y cada te, Bëngbe Bëtsabe bëts yebnoye imojánajna, Bëngbe Bëtsá jëtschuayama.

## San Juan

### *Cristo, chë Bëngbe Bëtsabe Uámana Oyebuambnayana ca Uabainá*

<sup>1</sup> Quem luare ndobojátša ora, Cristo, chë Bëngbe Bëtsabe Uámana Oyebuambnayana ya yojtsemna; chora cha, chë chca uabainá, Bëngbe Bëtsáftaca yojtsanmëna, y cachá Bëngbe Bëtsá inamna. <sup>2</sup> Ndegombre cha, chë tempscana Bëngbe Bëtsáftaca yojtsanmëna. <sup>3</sup> Cháftaca, Bëngbe Bëtsá lempe tojanma; cháftaca ndóñesna, lempe ntšamo mora yomncá, Bëngbe Bëtsá tondaye matënjanna. <sup>4</sup> Cachábeñe nyets vida inamna, y quem vídaca tojánabo quem luarentša entsangbe juabnënga jabuábinÿnayama. <sup>5</sup> Cha tonjánabo moye, chë entsangbe juabnënga ndoñe binÿniñe yonjamnoye, chiñe jacobínÿnayama. Cha sempre chca yobínÿna, y Satanás chë entsangbe juabnënga ndoñe binÿniñe chaondëtsemnama amá, ndoñe yondobena chë binÿnayabe obenana jtsejuánana.

<sup>6</sup> Inamna canÿe boyabása, Juan ca uabainá; y Bëngbe Bëtsá tbojanichmó, <sup>7</sup> binÿnayabiama chaóyeuambama; entsángbeñe binÿnayabiama cháuyanama, chca, ntšamo Juan chë binÿnayabiama tojayana soyëngaca, nyetscanga Jesúsbeñe chamotsošbuáchema. <sup>8</sup> Juan ndoñe yonjamna chë binÿnayá. Cha inamna canÿe ichmoná, chë nda binÿnayá yomnabiama entsángbeñe chauabáyanama. <sup>9</sup> Chë ndegombrá quem luaroye tonjánabo chë entsangbe juabnënga jabuábinÿnayama.

<sup>10</sup> Chë Bëngbe Bëtsabe Uámana Oyebuambnayana quem luariñe yojtsanmëna; masque cháftaca Bëngbe Bëtsá quem luare tojanma, nda cha yojamnama muentša oyenënga ndoñe monjántatsëmbo. <sup>11</sup> Cachabe luare entsángbiroye tonjánabo, y entsanga ndoñe tmonjánbošena cha jofjana. <sup>12</sup> Nyetscanga, ndëmuanÿenga cha tmojanébuaja y chábeñe tmojtsošbuáchenga, cha derecho tonjanatsatá jtsobenama Bëngbe Bëtsabe básenga ca jtsabáinama. <sup>13</sup> Quem ošbuáchiyëngna, chca jtsemnama ndoñe tmonjanobená entsangbe buiñentšana tmojanonÿnáyeca, o ndaye entsabe juabnentšana. Nÿe Bëngbe Bëtsábeyeca chca chabe básenga imojtsabaina.

<sup>14</sup> Cha, chë Bëngbe Bëtsabe Uámana Oyebuambnayana, entsá tojanóbema, y quem luare bëngaftaca yojëftsiyena. Cha yomna chë Bëngbe Bëtsabe nÿe canÿe Uaquiñá; chíyeca bënga tifjáninÿe chabe bëts obenana y chabe tšabe juabna, chë Bëngbe Bëtsábentšana tojanóyëngacñana. Cha corente jtsababuánÿeshanëse šojánanÿena y yojëftsiyena ntšamo ndegombre inamncá. <sup>15</sup> Juan mëntšá chabiama yojanáyebuache: “Chabiama sënjanoyebuambná, chë ndabiama chora atše sënjánayana, chë átšbentšana jabamana atšbiama más uamaná endmëna, er atše cabá ndonÿna orna, cha ya yojtsemna ca.”

<sup>16</sup> Cha tša tšabe ainana bómnyeyeca, bënga nyetscanga mallajta tšabe bendicionënga tmojóyëngacñe. <sup>17</sup> Moisesbiajana tifjanóyëngacñe chë Bëngbe Bëtsá tojanmandá soyënga. Pero Jesucristbeyeca, Bëngbe Bëtsá tšabe bendicionënga bëngbiama tojama y chë ndegombre soyënga bënga tmojëftsashjache. <sup>18</sup> Ndocná, ndocna te Bëngbe Bëtsábioye tbonjinÿe. Chë nÿe canÿe Uaquiñá ibobomná, cach Bëngbe Bëtsá yomna; y cha, Bëngbe Bëtsá chë Taitáftaca cánÿiñe mo canÿacá yomna. Mua, chë Uaquiñá, bëngbiama tojama, Bëngbe Bëtsá juabuátmanama chaotsopodénama.

### *Juan chë Ubayaná Jesucristbiama tojanabuayená (Mt 3.11-12; Mc 1.7-8; Lc 3.15-17)*

<sup>19</sup> Canÿe te, Jerusalenoca judiënga tmojanichamó básefta chëngbe bachnanga y levitënga, chë Bëngbe Bëtsabe bëts yebnoca trabájayënga, Juan yojtsemnoye, cha nda bëtsemnama chamuatjayama. <sup>20</sup> Chocna, Juan chëngbeñe ndegombre tojanobuambá: — Atše, chë Bëngbe Bëtsabe Uámana Uabuayaná ndoñe quetsátsmëna ca.



<sup>21</sup> As chora, cachiñe tmojantjá: —As, ¿ndase cojtsemna? ¿Chë Bëngbe Bëtsabe juabna oyebuambnayá Elías ca?

Y Juan tojanējua: —Atse cha ndoñe quetsásmëna ca.

Chora chënga tmojantjá: —As, ¿chë Bëngbe Bëtsabe juabna jabóyeuambayama jabamá ca?

Y Juan tojanējua: —Ndoñe ca.

<sup>22</sup> Chora chënga tmojanियana: —Asna, ¿aca ndase cojtsemna? Bënga šontsamna nda aca cojtsemnama jtsetatšëmbuana, as chë šonjadespachenga jacúntama. ¿Ndayá cojtsobena cach acbiana jayanama ca?

<sup>23</sup> Y Juan mëntsá tojanējua: —Atse sëntsemna chë ndabiana Bëngbe Bëtsabe juabna oyebuambnayá Isaías mëntsá tojanábema: “Entšanga ndoyenoca canye abuayiynayá echántsemna, y entšanga mëntsá echántsabuyiynaye: Bëngbe Utabná echanjabo ca. Mo nda canye benache tojtseprontacá, tšëngaftángnaca cachcá, cha jabama tšabe juabnëngaca šmochtseprontana ca.”

<sup>24</sup> Chorna, báseftanga chë fariseungbe ichmónënguentsana, <sup>25</sup> Juan tmojantjá: —Chë Bëngbe Bëtsabe Uámana Uabuayaná, Cristo ca uabainá, ndoñe tcontsemnësna, ni Elías, ni chë Bëngbe Bëtsabe juabna jabóyeuambayama jabamá ndóñesna, ¿ndáyeca entšanga cojtsëbayana ca?

<sup>26</sup> Chora Juan tojanējua: —Atsna, béjayeca entšanga sëndëubáyana. Pero tšëngaftangbeñe canya entsemna; cha ndoñe quešmatábuatma; <sup>27</sup> y cha atšbe ústonoye echanjášhango. Atse merecido taitatobuajoñe, ni mo jotsejbiyama, chabe shecochëtjonëshentša corriëja jajafjonama ca.

<sup>28</sup> Chca tojanopasá, canye pueblo Betania ca uabáinentše, Jordán béjaye chenguana. Cach béjayiñe, Juan entšanga yojanëbáyana.

### *Jesús chë Bëngbe Bëtsabe Oveshatema ca uabainá*

<sup>29</sup> Yëfsana, Juan yojtsemnoye Jesús yojtsebëconaye, y chë cháftaca imojtsemna entšanga tojanëyana: “Smochjinye. Chë nda Bëngbe Bëtsá tbojichmó y iytanana Oveshatemcá entsobiamná cha, entsashjajuana ca. Cha jóbanëse, quem luarentša entšanga bacna soyëngama perdonánënga mochántsemna. <sup>30</sup> Atse chabiana cbonjutsëtsná, mëntsá sënjanayana ora: ‘Atšbe ústonoye canya echanjášhango. Cha atšbiana más uamaná endmëna, er atse cabá ndonyna ora, cha ya yojtsemna ca.’ <sup>31</sup> Tempna, cach atse ndoñe quetsjátantatšëmbo nda cha bëtsemnana. Pero atšna ínÿenga béjayeca ubáyana sëndabó, Israeloca entšanga quem boyabása chamuábuatmanama ca” —Juan tojanëyana.

<sup>32</sup> Chentšana Juan mëntsánaca tojanobuambá: “Chabiana mëntsá bominye sënjanajó: chë Uámana Espíritu, mo canye palomatemcá, celocana tonjánastjango y quem boyabásabe juatsbuañe tonjanototóna. <sup>33</sup> Atse cabá ndoñe quetsjátantatšëmbo nda cha bëtsemnana, pero chë béjayeca jubáyama šonjanichmó cha, mëntsá šonjanियana: ‘Nda chacojinye, chë Uámana Espíritu jastjanguana y chabe juatsbuañe jototonana, chábeyeca atse chanjíchmu chë Uámana Espíritu entšangbe ainaniñe cháumashënguama ca.’ <sup>34</sup> Y morna, atse aíñe chca tijinye, y ndegombre tšëngaftanga cbëyana, cha chë Bëngbe Bëtsabe Uaquiñá entsemna ca” —cha tojanëyana.

### *Chë Jesusbe natsana ústonënga*

<sup>35</sup> Yëfsana, Juan chabe uatsjëndayënguentsana útataftaca cachoca yojtésemna. <sup>36</sup> Jesús yojtsachnëjuanama, Juan tbojáninye ora, tojanëyana: “Sochjinye. Mua entsemna nda Bëngbe Bëtsá tbojichmó y iytanana Oveshatemcá entsobiamná cha ca.”

<sup>37</sup> Chora chë Juanbe uta uatsjëndayata, chca tbojanuena ora, Jesús tojanasto. <sup>38</sup> Jesús tojesanontješé y tojánanÿe chata imojétsëstonama. As, tojanatjá: —¿Ndayá šojtsenguá ca?

Y chata tbojanियana: —¿Rabí, ndayentše icoyena ca? (Rabí endayana “Buatëmbayá ca”.)

<sup>39</sup> Chora Jesús tojanējua: —Mabo y sochjinye ca.

As chata tbojána y tbojáninÿe ndayentse cha yojaniyenana. Y chentse cháftaca tojéftsanajetana, ya jetiñe mo las cuatro ora yojtsemna causa.

<sup>40</sup> Chë Jesusbiam a oyebuambnayana Juánbioye tbojanóyeunata y Jesús tbojanasto útatentsana cánÿana Andrés ca yojanabaina; cha yojamna Simón Pédrëbe catšata.

<sup>41</sup> Andrés, cabá ndocna inÿe soye ndëma ora, tojána chabe catšata Simón janguanguama. Y tbojáninÿena ora, Simónbioye tbojaniyana: “Chë Bëngbe Bëtsabe Uámana Uabuayaná, Cristo, fsënjínÿena ca.”

<sup>42</sup> Chentšana Andrés, Simónbioye tbojanánatse Jesús yojtsemnoye. Jesús, Simónbioye tbojáninÿe ora, tbojaniyana: “Aca condmëna Simón, Jonasje uaquiñá, pero Cefas ca cochantsabaina ca.” (Chcana endayana “Pedro o ndëtsbé ca”.)

### *Jesús, Felipe y Natanael tojánachembo chamuastama*

<sup>43</sup> Yëfsana, Jesús tojanjuabó Galilea luaroye jama. Benachiñe Felípbioye tbojáninÿena y tbojaniyana: “Smasto ca.”

<sup>44</sup> Chë boyabása Felipe, Betsaida pueblócá inamna. Andrés y Pédrëna cach pueblócata ibnamna. <sup>45</sup> Chentšana Felipe tojána Natanael janguanguama; y tbojaniyana: —Chë ndabiam a leyënga librëšangañe Moisés tojanábema cha fsënjínÿena ca. Cachabiam a, Bëngbe Bëtsabe juabna oyebuambnayëngnaca tmojanábema. Cha Jesús entsemna, Josebe uaquiñá, chë Nazaretocá ca.

<sup>46</sup> Chora Natanael tbojaniyana: —¿Ndaye tšabe soye Nazaretocana nanjopódia jóbocnama ca?

Y Felipe tbojanjuá: —Mabo y cochjinÿe ca.

<sup>47</sup> Natanael yojtsebéconama, Jesús tbojáninÿe ora tojánayana: —Moye canÿe entšá entsabó; cha ndegombre endomerecena Israelbentšana entšá jtsemnama. Cha tšabe entšá endmëna; ndocnábioye quebnatsingña ca.

<sup>48</sup> Chora Natanael Jesúsbioye tbojantjá: —¿Ntšamo atše šcuabuatma ca?

Y Jesús tbojanjuá: —Felipe cabá aca ndëchembo ora, atše tcbonjinÿe, chë higo betiye tēchetšoye condëtsomñe ora ca.

<sup>49</sup> As, Natanael tbojaniyana: —Buatëmbayá, ¡aca chë Bëngbe Bëtsabe Uaquiñá comna! ¡Aca, chë Israeloca entšangbe Rey ca!

<sup>50</sup> Chora Jesús tbojanjuá: —¿Aca átšbeñe cojtsošbuaché, nÿe chë higo betiye tēchetšoye tcbonjinÿe ca tcbouyanama? Ndegombre, chë soyama más bëts soyënga cochanjinÿe ca.

<sup>51</sup> Chentšana Jesús tojanëyana: —Ndegombre šcuayana: Tšëngaftanga šmochanjinÿe celoca atëfñiñe, y Bëngbe Bëtsabe angelotëmënga jtsetsjuajnana y jtsastjajuanana Bëngbe Bëtsá Entšá tbojanbemabe tatsëtsoca.

## 2

### *Canÿe casamento Galilea luaroca, Caná pueblentse*

<sup>1</sup> Chentšana unga tianoye, canÿe casamento inamna, canÿe pueblentse Caná ca uabáinentse, Galileoca. Chë oboyejuayoca Jesusbe mamá yojtsemna. <sup>2</sup> Jesús y chabe uatsjëndayëngnaca chë casamentoca ófjanënga imojtsemna. <sup>3</sup> Chë oboyejuayentse, vínoye yojtso pochóca y Jesusbe mamá tbojaniyana: —Ya tondaye vínoye quemátsbomna ca.

<sup>4</sup> As, Jesús tbojanjuá: —Mama, ¿ndáyeca chca atše šcojtsatsá? Atšbe ora cabá ndoñe ntjoshjanguana ca.

<sup>5</sup> Chentšana, chabe mamá, chentša oservëngnaca tojanëyana: —Lempe šmochjama, ntšamo cha chacmojuayancá ca.

<sup>6</sup> Chocna, chnënguana ndëtsbé matbaja inamna. Chca matbajënguentša béjayeca, judiënga imojanamana jtsacuëntšabiana cabá ndëse ora, ntšamo tempo entšanga imojanamancá, Bëngbe Bëtsabe delante tšábënga jtsatsmënama. Cada matbajiñe, mo shachna o canÿsëfta bnëtsanáju a béjaye yojanába.

<sup>7</sup> Chora Jesús chë oservénënga tojanamëndá: “Quem matbajënga béjayeca mobuajutetjé ca.” Y chënga, chora lempe tmojanbuajutetjé.

<sup>8</sup> Y Jesús tojanéyana: “Morna, báseye mobuatsjo y chë fiesta otocanábioye mabuyamba ca.” Y chënga chca tmojanma.

<sup>9</sup> Chora, chë fiesta otocaná, chë béjaye Jesús vínoye tojanbemiye tojanftantiá, ndëmocana yojóbocnama ntsetatsëmbcá. Pero chë oservénëngna aíñe imojtsetátšëmbo ndëmocana, er cachënga chë béjaye tmojanbuatsjo. As, chë fiesta otocanana, chë bobontse bouamnábioye tbojanchembo, <sup>10</sup> y tbojanianyana: “Nÿetscanga monduamana natsana chë más uámana vínoye jushebëcana, y chë ófjanënga becá tmojatëmo ora, chë más batšá uámaniye. Pero acna, chë más uámana vínoye morscama tcojtsabofjajó ca.”

<sup>11</sup> Ntšamo Jesús tojanmcá Caná pueblentše, Galileoca, yojamna chabe natsana bëts soye Bëngbe Bëtsabe obenánaca. Y chca, chabe bëts obenana y uámanana cha tojaninÿanyé; y as, chabe uatsjëndayënga chábeñe imojtsošbuaché.

<sup>12</sup> Chca tojanopasá chentšana, Jesús canÿe pueblo, Capernaum ca uabáinoye tojt-sanoñe. Chorna, chabe mamá, chabe catšátanga y chabe uatsjëndayënga cha tmojan-tjëmbambá, y choca baseftatescama tmojanoquedá.

*Jesús Bëngbe Bëtsabe bëts yebnentsana bacna entsanga tojtanëbuacna  
(Mt 21.12-13; Mc 11.15-18; Lc 19.45-46)*

<sup>13</sup> Ya canÿe judiëngbe bëts fiesta, chë Bashco fiesta yojétsobeco, chë ntšamo Bëngbe Bëtsá chëngbe bëts taitanga Egiptocana tojánatsebacama jtenójuaboyama. Chë fiestama Jesús Jerusalenoye tojána. <sup>14</sup> Jerusalenoca, Bëngbe Bëtsabe bëts yebnentsë, Jesús tojánanyëna uacnënga, oveshënga y paloma enënga, y entsángbioye crocénana atrócayënga, chëngbe luarënguenache imojtsetbiámana. <sup>15</sup> Jesús chca tojánanyë ora, biajënga tojanaca, tjan-janëja tojanobopormá, y Bëngbe Bëtsabe bëts yebnentsana nÿetscanga tojtanëbuacna, chëngbe oveshënga y uacnëngaca. Chentšana Jesús, Bëngbe Bëtsabe bëts yebnentsama yojanoserverna crocénana atrocayëngbe crocénana tojtsanëjquësheshe, y chë mesëshangá tojtsanenásatajchquëca. <sup>16</sup> Chë paloma enëngna Jesús tojanéyana: —¡Quem soyënga lempe muentšana matábocana! ¡Ndoñe matsbuamnana ni mátenana atšbe Bëtsabe yebnentsë, mo cánÿentše jiyama luarentše cuaftsemncá ca!

<sup>17</sup> Y as, chabe uatsjëndayënga tmojanenojuabó ntšamo Bëngbe Bëtsabe uabemana palabrenguiñe iuayanama: “Bëngbe Bëtsabe yebna jtseboguiánama juabna, nÿets átšbeñe entsemna ca.”

<sup>18</sup> Chora, judiënga Jesús tmojantjá: —¿Ndaye bëts soye cochjama bënga chašcuinÿanyëma, aca ndaye deréchoca bëngaftaca chca cojtsobenama ca?

<sup>19</sup> As Jesús tojanëjua: —Quem Bëngbe Bëtsabe yebna menásatajchca, y atše unga tese chtëtsbaná ca.

<sup>20</sup> Chora chë judiënga tmojanianyana: —Canta bnëtsana chnënguana uatiñe, quem Bëngbe Bëtsabe yebna tmojanjebo. ¿Y aca, nÿe unga tese lempe cochtëtsjebo ca?

<sup>21</sup> Pero Bëngbe Bëtsabe yebna, ndayama chora cha chca tojánayana, cachabe cuerpo yojtsemna, ndoñe chë jebna soye. <sup>22</sup> Chama, Jesús obanënguentsana tojtanayena ora, chabe uatsjëndayënga tmojanenojuabó ntšamo muentše cha tojanéyanama. Chca ora, Bëngbe Bëtsabe uabemana palabrenguiñe y Jesús chora tojánayana palabrenguiñe más chënga imojtsošbuaché.

*Jesús nÿetsca entsangbe juabna iuábuatma*

<sup>23</sup> Jesús Jerusalenoca chë Bashco fiestama yojtsemnëntscuana, entsanga tmojáninÿe Jesús jamana bëts soyënga Bëngbe Bëtsabe obenánaca. Chíyeca, ba entsanga chábeñe imojt-sošbuaché. <sup>24</sup> Pero Jesús chëngbeñe ndoñe yontsošbuaché, cha nÿetscanga yojanëbuatma causa. <sup>25</sup> Y Jesús ndoñe bonjanájaboto chë entsangbe soyëngama chabotsebuayiyana, er cachá entsangbe ainaniñe nÿetsca juabnënga yojanábuatma.

## 3

*Jesús y Nicodemo*

<sup>1</sup> Inamna canye boyabása Nicodemo ca uabainá. Cha yojamna fariseunguentśá y judiengbe canye amëndayá. <sup>2</sup> Chana ibeta Jesúsbiocyte tojána y tbojaniyana: —Buatëmbayá, bënga fsëntsetatsëmbo aca canye buatëmbayá comnama, Bëngbe Bëtsabe ichmoná. Ndocná quenátobena jamana quem bëts soyënga, aca contsama soyënga, Bëngbe Bëtsá cháftaca ndoñe tontsemnëse. Chíyeca bënga chca fsëntsetatsëmbo ca —cha tbojaniyana.

<sup>3</sup> Chora Jesús tbojanjuá: —Ndegombre cbëyana, nda ndoñe cachiñe tontonýná, cha ndoñe quenátobena Bëngbe Bëtsabe amëndayana jinýama ca.

<sup>4</sup> Y Nicodemo tbojantjá: —¿Ntsamo, canye entsá ya bëtsá tojtsemna ora, nantsobena cachiñe jtónýnama ca? Ndegombre, cha ndoñe ntsobenana cachabe mamabe cuerpiñe jtamashënguana cachiñe jtónýnama ca.

<sup>5</sup> Chora Jesús tbojanjuá: —Ndegombre cbëyana, béjayeca y chë Uámana Espíritbeyeca ntjonýnacá, ndocná quenátobena Bëngbe Bëtsabe amëndayoye jamashënguama. <sup>6</sup> Nda bëtsëtsabentsana tojonýná cha, quem luarentśa entsangcá jtsemnana; pero chë Uámana Espíritbeyeca tojonýná chana, jtsemnana canya chë Uámana Espiritu ainaniñe bomná. <sup>7</sup> Ndoñe matenjnanana ntśamo tbonjauyanama: “Nýetscanga entsamna cachiñe jtónýnama”. <sup>8</sup> Chë binýia ndëmuajana tojtseboşe jtsemnana, chëjana jtsanana. Masque entsanga, chë binýiyama jtsuenanana, ndoñe ntsetatsëmbuana ndëmocana yobama y ndëmoye yojtsoma. Cachcá, tsëngaftanga ndoñe queśmátstatsëmbo ntśamo entsanga chë Uámana Espíritbeyeca tmojtsonýnama; pero tsëngaftanga śmontsetáttsëmbo aíñe chca yomnama ca —Jesús tbojaniyana.

<sup>9</sup> Chora Nicodemo tbojantjá: —¿Ntsamo chca nántsemna ca?

<sup>10</sup> Y Jesús tbojanjuá: —Aca, canye Israeloca abuatambayá, ¿chë soyëngama ndoñe condëtatśëmbo ca? <sup>11</sup> Ndegombre cbëyana, bëngna chë fststáttsëmbo soyëngama fsëntsoyebuambná, y chë tifjinýe soyëngama ndegombre bëtsemnana fsëntsichamo. Pero tsëngaftangna, chë cbontsëtsëtsná soyënguiñe ndoñe queśmatoşbuaché. <sup>12</sup> Atşe, quem luarentśa soyëngama sënjoyebuambá y tsëngaftanga átsbeñe ndoñe cheśmatoşbuaché. Y as, ¿ntśamo átsbeñe śmochtsoşbuáchiye, celoca soyëngama cbojtsëtsëtsnase?

<sup>13</sup> “Ndocná, nýe cachábeyeca Bëngbe Bëtsábiocyte tonjátsjua. Nýe chë celocana tojabá aíñe, chë Bëngbe Bëtsá Entśá tbojanbemá. <sup>14</sup> Y chcase, ntśamo Moisés entsanga ndoyenoca bronze mëtşcuaye tsbanánoca tbojananguësëtcá, şoquënga tsabá chamotsatsmënama; cachcá entsemna, Bëngbe Bëtsá Entśá tbojanbemá entsanga chamuatsbanama; <sup>15</sup> chca, nýetscanga chábeñe tmojtsoşbuáchenga, chë nýetsca tescama yomna tsabe vida chamotsebonnama ca” —Jesús Nicodëmbiocyte tbojaniyana.

*Ntsachetśá Bëngbe Bëtsá entsanga iuababuánýeshana*

<sup>16</sup> Mëntśánaca Jesús tojánayana: —Bëngbe Bëtsá quem luare entsangbiocyte tśa yojánababuanýeshanayeca, chë nýe canye Uaquiñá ibobomná, bëngbiocyte tbojichmó, nýetsca chábeñe oşbuáchiyënga ndoñe chamondóbanama, y aíñe chë nýetsca tescama yomna tsabe vida chamotsebonnama. <sup>17</sup> Er Bëngbe Bëtsá chabe Uaquiñá quem luaroye ndoñe tbonjichmó quem luare entsangbiamama jabáyanama ntśamo tmojamama castigánënga chaotsamnama ca, sinó, entsanga chábeyeca atsebácanënga chamotsemnana.

<sup>18</sup> “Nda Bëngbe Bëtsabe Uaquiñábeñe tojtsoşbuáchebiamama, Bëngbe Bëtsá ndoñe queochátayana ntśamo cha tojamama, castigáná chaotsemna ca. Pero chë Uaquiñábeñe ndoñe tontsoşbuáchebiamama, mora Bëngbe Bëtsá ya tojayana, ntśamo tojamama cha castigáná chaotsemna ca, chë Bëngbe Bëtsá nýe canye Uaquiñá ibobomnábeñe ndoñe yontsoşbuaché causa. <sup>19</sup> Chca, chë ndoñe tmontsoşbuáchengbiamama cha ya tojayana, ntśamo tmojamama castigánënga chamotsemna ca; er chë entsangbe



juabnënga binÿnayá quem luaroye tojabo, pero ba entšanga tmojábošena jtsomñana, chë entšangbiana bacna juabnëngaca chamotsebomnama amáftaca. Chënga sempre bacna soyënga jtsamana; chíyeca chënga jtsebošana cháftaca jtsomñama. <sup>20</sup> Chë bacna soyënga tojtsamá ndoñe ntsebošana, chë binÿnayá chabe bacna soyënga chabuinÿinÿema, ni chabe bacna soyëngama chabuácacanama. Chíyeca, chë bacna soyënga jtsamëse oyená, chë binÿnayábioye jtsáboyënjana, y chë binÿnayábioye ndoñe ntjabana. <sup>21</sup> Pero nda sempre tojtsiyena ntšamo ndegombre yomncá jtsamëse, chana aíñe chë binÿnayábioye jabana, chë binÿnayá chabiana chabuinÿinÿema, chë tojama soyëngna, ntšamo Bëngbe Bëtsá tojtsebošcá tojamama ca” —Jesús tojánayana.

### *Juan chë Ubayaná cachiñe Jesucristbiana tojanabuayená*

<sup>22</sup> Chca tojanopasá chentšana, Jesús chabe uatsjëndayëngaftaca básefta Judeoca pueblëngoye tojtsanoñe. Chiñe, baseftatescama chë uatsjëndayëngaftaca tojanoquedá, entšanga ubáyana. <sup>23</sup> Cach tempo, Juanënaca entšanga yojanëbáyana Enonoca, Salim béconana, er choca bëtscá bėjaye inabinÿna. Ba entšanga choye imojtsaye, y Juan chënga yojanëbáyana. <sup>24</sup> Chca tojanopasá, chë Heródesbe soldadënga Juan cabá ndutame ora.

<sup>25</sup> Chë tempo, básefta Juanbe ústonënga tmojanontsé inÿe judíoftaca enatsëtsnayana ntšamo tempo judiënga chë jtsacuéntšabiana imojanámanama. <sup>26</sup> Chora, chënga Juánbioye tmojánabo y tmojanियana: —Buatëmbayá, chë Jordán chenguánoica ácaftaca enjamná, ndabiana tša tšabá conjanoyebuambná, mora entšanga entsëbayana y nÿetscanga cha montsëstona ca.

<sup>27</sup> As Juan tojanëyana: —Ndocná quenátobena tondaye ntsebomnana, Bëngbe Bëtsá ndoñe tbonjatsetase. <sup>28</sup> Cach tšëngaftanga tšabá šmonjanuena y šmontsobena ndegombre yomnama jayanana, atše ndoñe chë Bëngbe Bëtsabe Uámana Uabuayaná tsjanmëna ca sënjánayanama; sinó, Bëngbe Bëtsá atše šojanichmó chë Uabuayanabe natsana, chabiana entšanga jabábuayenama. <sup>29</sup> Chë tobiaše tojtsobouamá ora, chë bobontse chábioye jtsebomnana; y chabe amigna, chabiana jtsobátmanana y chë bobontse bouamnabe oyebuambnayana jtsuenanana; y chca tojtsuenana ora, tša oyejuayá cha jtsemnana. Cachcá, ntšamo chë Uabuayaná yojtsamama y yojtsóyebuambnama sëntsuenana ora, átšnaca corente oyejuayá sëntsemna. <sup>30</sup> Cha bontsemna más uamaná jtsemnana, pero atše šontsemna más nduamaná jtsemnana ca —Juan tojanëyana.

### *Ntšamo yomna chë celocana tojabá*

<sup>31</sup> Mëntsánaca Juan tojánayana: “Chë tsbanánocana tojabá, nÿetsca entšangbiana más uamaná endmëna. Chë quem luare oyená quem luare entšangcá jtsemnana y quem luarentša soyëngama jtsóyebuambnayana, pero chë celocana tojabana, nÿetsca entšangbiana más uamaná endmëna. <sup>32</sup> Cachá ntšamo tojinÿe y tojouencá entsoyebuambná, pero chë entsichamo soyënguiñe ndocná quenatošbuaché. <sup>33</sup> Nda ntšamo cha tojtsóyebuambnañe tojtsošbuaché y chca tojtsama, jtsinÿanÿnayana Bëngbe Bëtsá ndegombre soyënga inetsichámuama. <sup>34</sup> Chcasna, Bëngbe Bëtsabe ichmonana, jtsóyebuambnayana ntšamo Bëngbe Bëtsá tojtsichamcá. Bëngbe Bëtsana chë ichmonábioye tbojichmó chë Uámana Espíritu, nÿets tempo corente chabotsájabuachanama, ntšamo cach Bëngbe Bëtsá tojtsichamo y cachcá chaotsichámuama. <sup>35</sup> Chë Taitá Uaquiñábioye bondbobonshana, y chë Uaquiñábioye obenana tbojatsetá nÿetsca soyënguiñe jtsemándayama. <sup>36</sup> Nda chë Uaquiñábeñe tojtsošbuaché, chë nÿetsca tescama yomna tšabe vida echántsebomna; y nda chë Uaquiñábioye ndoñe tbontsašbuaché, chana chë vida ndoñe queochátsbomna, y chë Bëngbe Bëtsabe uabouana castigo nÿetsca tescama chábeñe echántsemna ca” —cha tojánayana.

## 4

### *Jesús y chë Samaria luaroca shembása*

<sup>1</sup> Chë fariseunga tmojanuena Jesús, Juanbiamá más ústonënga yojsabamnama, y más entšanga yojsëbáyanama. <sup>2</sup> Pero ndegombre, cach Jesús ndocnábioye bonýanábayana, sinó chabe uatsjédayënga. <sup>3</sup> Bëngbe Utabná Jesús, ntšamo chë fariseunga tmojanuena tojántatšëmbona ora, Judea luarocana tojëftsanbocna y Galileoye tojtaná.

<sup>4</sup> Choye jtamna ibojamna Samaria luarëjana jachnënguana. <sup>5</sup> Samariocna, canýe pueblo Sicar ca uabáinoye Jesús tojánashjango. Chë pueblo yojamna, chë Jacob chabe uaquiñá Josébioye tbojëftsanlargá fshantse béconana. <sup>6</sup> Choca yojamna cánýentšë atëfjóniñe, búyeshe jobuatsjuama, Jacobëbe atëfjóniñe ca uabáiniñe. Mo nýetsto ora, chentšë Jesús yojtsemna, aniñe uamëntšnáyá, chë atëfjóniñe batsjaca yojótbema. <sup>7-8</sup> Chabe uatsjédayëngna chë pueblöye tmojána saná jobuámiñama. Chora, canýe shembása Samariocá, chë atëfjónoye tojánashjango, búyeshe jauafcama; as Jesús tbojaniyana: —Búyeshtema šmabuatsšetá ca.

<sup>9</sup> Y chë shembása tbojanjuá: —Aca canýe judío condmëna y atšna canýe samaritaná. ¿Ntšamo cojtsobena atšë búyeshe juabuátjañama ca? (Cha chca tojánayana, er canjanopasana, judiëngna samaritanëngaftaca ndoñe monjanenatsëtsná.)

<sup>10</sup> Chora Jesús tbojanjuá: —Aca mo cojtsetátšëmbo nýe ntšamo Bëngbe Bëtsá aca jatšëtayama yojtsebošcá, y nda chë búyeshe cmojtsábuatjanañama, acna más cha catjuábuatjañe, y chana béjaye vida bomniye cmatjuabuátšëtaye ca.

<sup>11</sup> Y chë shembása tbojaniyana: —Señor, tondaye quecátsbomna nýe mo ndayecnaca búyeshe jabuatsjuama, y chë atëfjóniñe corente tboca endmëna; y as, ¿ndayentšana cochjobenaye béjaye vida bomniye atšë juabuatsëtayama? <sup>12</sup> Bëngbe tempsca bëts taitá Jacob, quem atëfjóniñe bëngbiamá tojëftsanboshjona. Cachá, chabe básenga y chabe bayënga muentšana búyeshe tmojëftsanofsé; y ¿aca chabiamá más bëtsá comna ca? —chë shembása yojsichamo.

<sup>13</sup> As Jesús tbojanjuá: —Nýetscanga chë quem búyeshentšana tmojofšenga, chënga cachiñe echantëtëjuendaye. <sup>14</sup> Pero chë chanjuabuátšëtaye búyeshentšana tojofšë chana ndocna te cachiñe quebochëtajuendaye. Cha chanjuabuátšëtaye búyeshna, chábeñe echántsemna mo cánýentšë béjaytema obocaniñcá, chë nýetsca tescama yomna tšabe vida jtsebmomna ca —cha tbojaniyana.

<sup>15</sup> Chora chë shembása tbojaniyana: —Señor, chca búyeshe šmabuatsšetá, as atšë ndoñe cachiñe chašondetsajuendama, ni búyeshe juafcama moye jtsaboyama ndoñe chašondëtsemnama ca.

<sup>16</sup> As Jesús tbojaniyana: —Motsa acbe boyá jachembuama y cochjésabo ca.

<sup>17</sup> Chora chë shembása tbojanjuá: —Boyá ndoñe quetsátsbomna ca.

As Jesús tbojaniyana: —Tšabá tcjayana boyá ndoñe condbomna ca. <sup>18</sup> Er, aca shachna boyanga conjánabamna, y chë mora contsebmomna, acbe boyá ndoñe quenátšmëna. Ntšamo tconjayancá ndegombre entsemna ca.

<sup>19</sup> Chë shembása chca tojanuena ora, Jesúsbioye tbojaniyana: —Señor, mora atšë sëntsetatšëmbo, aca canýa Bëngbe Bëtsabe juabna oyebuambnayá comnama. <sup>20</sup> Bëngbe tempsca bëts taitanga quem tjoca Bëngbe Bëtsá monjánadorana; pero tšëngaftanga, judiënga šmondbétsichamo, bënga Bëngbe Bëtsá jadóramna, Jerusalenoca chë luare canmëna ca.

<sup>21</sup> Chora Jesús tbojanjuá: —Shembása, šmoyeuná; canýe tempo echanjóshjango y chora tšëngaftanga ndoñe quecmochátamna Bëngbe Bëtsá jadóramna, ni quem tjöye jabaná, ni Jerusalenoye jana. <sup>22</sup> Tšëngaftanga samaritanënga ndoñe quešmatábuatma nda šmetsadoránama; pero bënga aíñe fsënduábuatma, er chë atsebacayá judiënguentšana endabó. <sup>23</sup> Pero ora entsoshjajuana, ya chë tempo tocjobuache, ndaye ora chë Bëngbe Bëtsá chë Taitá ndegombre atschuanayënga, chë Espíritbeyeca y ndegombre juabnëngaca chábioye mochántšadorana. Er chë Taitá entsebošë chë chábioye adórayënga chca chamotsamama. <sup>24</sup> Bëngbe Bëtsá, Espíritu endmëna; y chë chábioye adórayënga

entsamna, chë Uámana Espíritbeyeca y ndegombre juabnëngaca cha jtsadoránana ca – Jesús tbojaniana.

<sup>25</sup> Chora chë shembása tbojaniana: –Atše sëndëtatsëmbo, canmëna chë Bëngbe Bëtsabe Uámana Uabuayaná, chë Cristo jabana ca; y cha chaojáshjango orna, cha nyetsca soyëngama cašochjabuayená ca.

<sup>26</sup> As Jesús tbojaniana: –Atše, chë ácaftaca entsoyebuambná cha, cha entsemna ca.

<sup>27</sup> Chëntscuana, Jesusbe uatsjëndayënga tmojtashajna, y tmojtsanëuatjaná, Jesús canye shembásaftaca yojtsoyebuambná causa. Pero ndocná Jesús tbonjantjá: ¿Ndayá cháftaca cojtseboše? o ¿Ndayeca cháftaca cojtsoyebuambná ca?

<sup>28</sup> Chorna, chë shembása chabe uafcanëja tojésanboshjona, y chë puebloye betscotojtaná. Chocna, entsanga tojanëyana: <sup>29</sup> “Mabënga canye boyabása jinÿama ca. Cha atše šonjauyana lempe ntšamo tijamcá. ¿Chë boyabása, chë Cristo tanántsemna ca?” –cha yojtsichamo.

<sup>30</sup> As chë entsanga chë pueblócana tmojánbocana y Jesús yojtsemnoye tmojánashajna.

<sup>31</sup> Chca yojtsopasánëntscuana, chë uatsjëndayënga Jesúsbioye imojtseimpadana: –Buatëmbayá, batšatema mose ca.

<sup>32</sup> Pero cha tojanëyana: –Atše canye soye jasama sëntsebmna. Tšëngaftanga chë soyama ndoñe quešmátstatšëmbo ca.

<sup>33</sup> Chora chë uatsjëndayënga tmojanontšé entjanayana: –¿Nderado nda jasama chabiama tojiyëbo ca?

<sup>34</sup> Y Jesús tojanëyana: –Chë šonjichmó cha ntšamo yojtsebošcá jamana, y chabe trabajo japochócana, chë soyënga mo sanacá atšbiana entsemna. <sup>35</sup> Tšëngaftanga šmondbétsichamo: “Cabá canta ishinÿe entsashbena jaja saná chaotsebínÿnama ca”; pero atše cbëyana: Minÿënga tša entsanga moye montsabëbana; chënga montsemna mo jajañe saná játbánama tojtseprontancá. <sup>36</sup> Tšëngaftanga šmontsemna mo chë saná atbanayëngcá. Chëngna jajañe jtsetrabájayana, y chëngbe uacanána jtsësháchiñana. Cachcá, tšëngaftanga cmontsamna atšbiana entsanga júbuajana, chë nyetsca tescama yomna tšabe vida chamotsebmnama. Chë jaja saná átbánaye ora, jenënga y chë atbanayënga cánÿiñe oyejuayënga jtsemnana. Cachcá, chë entsanga átšbeñe chamojtsošbuaché ora, nyetscanga, chë atšbiana obuájajanënga y chë atšbiana trabájayëngnaca cánÿiñe oyejuayënga mochántsemna. <sup>37</sup> Quem entsangbe ichámuana, canye ndegombre soye endmëna: “Chë jená canÿa jtsemnana, y atbanayana inÿa ca.” <sup>38</sup> Atše tšëngaftanga cbonjichamó canye soye játbánama, y tšëngaftanga tondaye chešmatsma chca chaotsebínÿnama. Inÿënga chiñe bëtscá tmonjëttsetrabája, y tšëngaftangna, chëngbe trabajënguentšana šmojolograñe ca –Jesús tojánayana.

<sup>39</sup> Bëtscá entsanga, Samarioca pueblentšënga Jesúsbeñe imojtsanošbuaché, ntšamo chë shembása tojanëyanama. Chë shembása tojanëyana: “Lempe ntšamo atše tijamcá cha šonjauyana ca.” <sup>40</sup> As chë samaritanënga, Jesús yojtsemnentše tmojánashajna ora, tmojanimpadá chëngaftaca chaotsoquedáñama. Y as Jesús, uta te chentše tbojëftsanjétana. <sup>41</sup> Y más entsanga, cach ntšamo Jesús yojtsanëtsëtsnacá tmonjanuena ora, chábeñe imojtsanošbuaché.

<sup>42</sup> Y chë shembása chë entsanga tmojaniana: “Mora cocayé fsëntsošbuaché, ndoñe nÿe ntšamo aca šcojáuyanama, sinó cach bënga chábioye oído fsënjabuajóyeca; y mora fsëntsetatšëmbo ndegombre cha yojtsemna chë quem luare entsangbiana Atsebacayá ca.”

### *Jesús, canÿe mandado uajabuachanabe básabioye tbojanshná*

<sup>43</sup> Uta te chentšana, Jesús Samariocana tojáisanbocna y Galileoye tojataná. <sup>44</sup> Cach Jesús mëntšá tojánayana: “Canÿa Bëngbe Bëtsabe juabna oyebuambnayá, cachabe luarentše oyenënga ndoñe bëtsá ntjabemëngana ca.” <sup>45</sup> Galileoca oyenënga Jerusalenoye tmojána, y

tmojáninÿe nÿetsca bÿets soyënga ntšamo Jesús Bashco fiesta ora choca tojanmcá. Chíyeca, Jesús Galileoye tojtanashjango ora, chënga tšabá tmojtanofja.

<sup>46</sup> Galileocna, Jesús cachiñe Caná pueblöye tojésanashjango, chë béjayeca vínoye cha tojábementše. Choca yojtsemna canÿe mandadbe uajabuachaná, y chabe uaquiñana Capernaum pueblöca šocá yojtsejájona. <sup>47</sup> Jesús Judeocana Galileoye tojánashjanguama, chë uajabuachaná tojanuena ora, Jesúsbioye tojána y ibojtseimpadana chabe yebnoye cháuama, chabe uaquiñá chabuetseshnáñama, er ya jtsóbanama yojtsemna ca. <sup>48</sup> As Jesús tbojaniyana: —Tšëngaftanga, Bëngbe Bëtsabe obenana jinÿanÿiyama bÿets soyënga atše jamama ndoñe šmonjinÿese, átšbeñe ndocna te ntsošbuáchiyana ca.

<sup>49</sup> Chora, chë mandadbe uajabuachaná Jesúsbioye tbojaniyana: —Taita, betscö mabo, atšbe uaquiñá cabá ndóbana ora ca.

<sup>50</sup> As Jesús tbojaniyana: —Acbe yebnoye motsatá. Acbe uaquiñá ainá endëtsomñe ca.

Chë boyabásana tojanöšbuaché ntšamo Jesús tbojaniyancá y tojtaná. <sup>51</sup> Cha yojtsataye orna, chabe oservénënga tmojánbocana jajébenguama y tmojaniyana: —Acbe uaquiñá tšabá entsatsmëna ca.

<sup>52</sup> As cha tojanatjá: —¿Ntsecö orscana tbënjatëcja ca?

Y chënga tmojanjuá: —Tonjopasá yëfse, mošenana orscana chë calentora tbonjábosana ca.

<sup>53</sup> Chora chë taitá tojanenojuabó, cachca ora Jesús tbojaniyana: “Acbe uaquiñá ainá endëtsomñe ca”. Y cha y nÿetscanga chabe yebnentše oyenënga Jesúsbeñe imojt-sanošbuaché.

<sup>54</sup> Ntšamo Jesús chora, chë uajabuachanabe uaquiñabiama tojanmcá, Judeocana Galileoye yojtsataye orna, yojamna chabe utama chca bÿets soye jamama, Bëngbe Bëtsabe obenana jinÿanÿiyama, Galilea luaroca.

## 5

### *Jesús canÿe jama ndobenábioye tbojanshná*

<sup>1</sup> Baseftayté chentšana, chë judiënga canÿe oboyejuaye te imojtsebomna ora, Jesús Jerusalenoye tojána. <sup>2</sup> Choca, chë Oveshëngbe amashjuana ca uabáinentše yojamna canÿe binche uafjajónaye, entšangbe pormániñe. Chë béjayna judiëngbe biyañe Betzata ca inauabaina. Chë béjaye juachañe shachna amashjuana otsbojebniñe inamna. <sup>3</sup> Chiñna ba šoquënga jtanënga, coshetënga y jama ndobenënga imojtsecjana; chë béjaye chamobonjoma imojtsobátmana. <sup>4</sup> (Nderado nderado, Bëngbe Bëtsábica canÿe ángel yojanamana jastjanguana chë béjaye jabónjuama. Chca ora, chë béjayoye natsana tojamashënguá, chabe šocanama tšabá jtsatsmënana.) <sup>5</sup> Chë šoquënguiñe canÿe boyabása inamna, unga bnëtsana y posufta uatama jama ndobená. <sup>6</sup> Jesús chë jajonábioye tbojáninÿe ora y ba uatama chca yojamnana tojántatšëmbona ora, tbojantjá: —¿Quecojtseboše tšabá jtsatsmënana ca?

<sup>7</sup> Y chë šocá tbojanjuá: —Taita, ndocná quetsátsbomna nda chašuájabuache béjayoye jamashënguama, chë béjaye tojtsobonjná ora. Y atše béjayoye jamashënguama stseboše ora, inÿa atšbe natsana jtsamashënguana ca.

<sup>8</sup> Y Jesús tbojaniyana: —Matëtsbaná, acbe tjuashe mesocñe y matontsé jóyenana ca.

<sup>9</sup> Cach ora chë boyabása tšabá yojtsatsmëna, chabe tjuashe tojésanocñe y tojanontsé jtsanana. Chca tojanopasá ora, chë ochnayté inamna. <sup>10</sup> Chíyeca, chë tbojanshnábioye chë judiënga tmojaniyana: —Mëntena ochnayté. Mënté ndoñe quenátöpodena aca tjuashe jtsecutsnana ca.

<sup>11</sup> Y chë boyabása tojanëyana: —Chë šonjashná cha mëntsá šonjauyana: “Acbe tjuashe mesocñe y montsé jóyenana ca”.

<sup>12</sup> As chënga tmojantjá: —¿Nda yojtsemna chë “acbe tjuashe mesocñe y montsé jóyenana ca” tmojauyaná ca?



<sup>13</sup> Pero chë shnaná ndoñe yontsetátšëmbo nda tbojanshnama. Chocna bëtscá entšanga imojtsemna; chcasna, Jesús chëngbe tsëntsajana tojanenatjëmbo.

<sup>14</sup> Chentšana, Jesús Bëngbe Bëtsabe bëtš yebnentse chë boyabásabioye tbojáninýena y tbojaníyana: —Mouena; mora aca ya ndoñe šocá quecátšmëna; bacna soyënga ndoñe cachiñe cattsama. Aíñese, acbiama puerte mal echanjopása ca.

<sup>15</sup> Chë boyabása tojtsanoñe y chë judiënga tojanéyana: —Chë šonjashná cha Jesús entsemna ca.

<sup>16</sup> Chë causa, chë judiënga imojtsenguaye ntšamo Jesús ndayánaca jabórlana, cha ochnayté chë soyënga tojanmama. <sup>17</sup> Pero Jesús tojanéyana: “Atšbe Taitá nyets tempo tšabe soyënga endbëtsama; cachcá, átšnaca tšabe soyënga sëntsama ca.”

<sup>18</sup> Jesús tojanma ntšamo ochnayté ndoñe yonjanapodencá, y Bëngbe Bëtsabiama tojánayana “Atšbe Taitá ca”. Mëntsá Jesús yojtsanobiamná cach Bëngbe Bëtsacá. Chama, chë judiënga más imojtseboše Jesús jóbama.

### *Bëngbe Bëtsabe Uaquiñabe obenana*

<sup>19</sup> Chentšana Jesús tojanéyana: “Ndegombre šcuayana: Bëngbe Bëtsabe Uaquiñá, nýe cachabe cuenta tondaye quenátobena jamana. Cha jtsonýayana ntšamo chabe Taitá tojt-samcá. Ntšamo chë Taitá tojtsamcá, chë Uaquiñánaca jtsamana. <sup>20</sup> Er Bëngbe Taitá chabe Uaquiñábioye bondbobonshana, y lempe ntšamo cha tojtsamcá chábioye bondinýinýná; y más bëtš soyënga bochanjinýinýiye, chë soyëngama tšëngaftanga chašmenjnanama.

<sup>21</sup> Chë Taitá endama obanënga chámuatayenama y tšabe vida chamotsebomnama; cachcá, chë Uaquiñá entsama tšabe vida chamotsebomnama, ndëmuanýenga cha tojtsebošcá.

<sup>22</sup> Chë Taitá ndocnabiama jatichámuana tšabá o ndoñe tšabá yontsama ca. Chabe Uaquiñábioye nyets obenana tbonjatšetá nyetscangbiama jayanama tšabá o ndoñe tšabá tmontsamama. <sup>23</sup> Chca, chënga chamuinýinýé Bëngbe Bëtsabe Uaquiñá puerte uamaná yomnama, ntšamo Bëngbe Bëtsá puerte uamaná yomnama nyetscanga mondbetsinýinýnycá. Nda chë Uaquiñábioye ndoñe más uamaná tbontsebiamná, cach ndoñe más uamana ntsebiamnayana chë Taitábioye, nda chë Uaquiñá tbojichmóbioye.

<sup>24</sup> “Ndegombre šcuayana: Nda ntšamo atše sëntsichamcá šojoyeuná, y chë muentše šonjichmó chábeñe tojtsošbuaché, chë nyetsca tescama yomna tšabe vida jtsebomnana. Chabiama chë Uaquiñá ndoñe queochátayana castiganá chaotsemna ca. Chca, Bëngbe Bëtsabiama cha ya ndoñe más mo obanacá queochátšmëna, chábeñe ndošbuáchiye causa; y ya ndoñe nyetsca tescama castiganá queochátšmëna. Y aíñe, chë nyetsca tescama yomna tšabe vida echántsebomna.

<sup>25</sup> “Ndegombre šcuayana: Chë jobuáchama te ya tocjobuache. Chë te, chë Bëngbe Bëtsabiama mo obanëngcá imomnënga mochanjouena Bëngbe Bëtsabe Uaquiñá jtsóyebuambnayana. Nda chca tšabá chašojoyeuná cha, tšabe vida echántsebomna. <sup>26</sup> Er ntšamo Bëngbe Taitá obenana endbomncá, cachá jamama entšanga vida chamotsebomnama, chabe Uaquiñábioynaca obenana tbojatšetá entšanga vida chamotsebomnama jamama. <sup>27</sup> Chë Uaquiñá endmëna nda Bëngbe Bëtsá Entšá tbojánbema; chíyeca chë Taitá chábioye obenana tbojatšetá nyetscangbiama jayanama tšabá o ndoñe tšabá tmontsamama. <sup>28</sup> Chama ndoñe matenjnanana. Er canýe tempo echanjobuache, y chora chë Uaquiñá obanënga echántsachembuana; chënga mochanjouena y cach ora, chëngbe oyenocana mochanjésebocana. <sup>29</sup> Tšabe soyënga tmojëftsemënga, obanënguentšana mochántayena, chë nyetsca tescama yomna tšabe vida jtsebomnama. Pero bacna soyënga tmojëftsemëngna obanënguentšana mochántayena nyetsca tescama castigánënga jtsemnama ca” —Jesús tojanéyana.

### *Jesús, ndegombre Bëngbe Bëtsabe ichmoná inamna*

<sup>30</sup> Mëntsánaca Jesús cachatbiama tojánayana: “Nýe átšbeyeca tondaye quetsátobena jamama. Chë Taitá šontsemánda ntšamo nyetscangbiama jayanama tšabá o ndoñe tšabá

tmontsamama. Nýe chca atše sentsobena chë soye jamama. Ndoñe quetsátsboşe jamana nýe ntšamo cach atše stseboščá; pero sempre sëndbétseboşe jamama, ntšamo Taitá, chë šonjichmó cha tojtseboščá. Chíyeca atše nýetscangbiama sentsichamo tšabá o ndoñe tšabá tmontsamama; y ntšamo nýetscangbiama sentsichamcá, ndegombre endmëna.

<sup>31</sup> “Ntšamo cach atšbiama tijayanama, ndegombre entsemna ca stsihámëse, ntšamo stsihamcá, nýetscangbiama tondaye ntsámanana. <sup>32</sup> Pero inýa entsemna. Cha endétatšëmbo y entsichamo ntšamo ndegombre atšbiama yomncá; y sentsetatšëmbo ntšamo cha atšbiama yojsichamcá, nýetscangbiama aíñe yojsámanama. <sup>33</sup> Tšëngaftanga ínýenga šmojanichamó atšbiama Juan jatjayama; y ntšamo cha tcmojauyancá ndegombre endmëna. <sup>34</sup> Masque chë soyënga cha tcmojáuyana, ndoñe quešnatájaboto ndocna entsá atšbiama chaotsichamo ‘cha aíñe chca endmëna ca’. Atše quem soyënga sentsichamo ndayá nýe tšëngaftanga atsebácanënga chašmotsemnama. <sup>35</sup> Juan enjamna mo canýe uajuinýanësha tojtsajuinýana y tojtsabuashinýinýancá. Tšëngaftanga chabe buashinýinýanana šmonjinýe, y šmonjábosëna rato cháftaca oyejuayënga jtsemnama. <sup>36</sup> Pero chë atše sënjama soyëngacna más entsinýinýena ntšamo atšbiama ndegombre yomncá, chë ntšamo Juan atšbiama tojánayanama. Ndayá atšbe Taitá šojabonyé jamama, ntšamo atše sentsamcá, entsinýinýná ndegombre chë Taitá šojichmoma. <sup>37</sup> Atšbe Taitá, chë šojichmó chánaca entsichamo ntšamo atšbiama ndegombre yomncá, masque ndocna te chabe oyebuambnayana chešmatuena, ni ntšamo cha yomncá chešmátinýe. <sup>38</sup> Pero tšëngaftangbe ainanoye chabe palabra ndoñe tonjómarshëngo, cha tbojichmóbeñe tšëngaftanga ndoñe quešmatošbuaché causa. <sup>39</sup> Tšëngaftanga, Bëngbe Bëtsabe palabra tša jtsatsjëndayana, er šmondobátmana, chca jtsamëse chë nýetsca tescama yomna tšabe vida jónýenama. Y Bëngbe Bëtsabe uabemana palabrënguiñe atšbiama endayana ntšamo ndegombre yomncá; <sup>40</sup> pero masque chca, tšëngaftanga ndoñe quešmátsboşe atše jtsëstonana, y chca, tšabe vida jtsebonnama.

<sup>41</sup> “Atše ndoñe quetsátsboşe entsanga yapa tšabá atšbiama chamotsichámuama. <sup>42</sup> Y inýe soye, atše puerte cbondëbuatma, y sëndétatšëmbo tšëngaftanga Bëngbe Bëtsá ndoñe šmondobonshánama. <sup>43</sup> Atšna atšbe Taitabe cuenta sënjabo, y tšëngaftanga ndoñe quešmátsboşe atše jofjana. Pero inýa, cachabe cuenta tojabábioye cocayé aíñe šmatjofja. <sup>44</sup> Tšëngaftanga corente jésebošana, ínýenga tšëngaftangbiama tšabá chamotsichámuama, y ínýengbiama tšabá jtsichámuama; pero ndoñe ntsebošana chë nýe canýe Bëngbe Bëtsá tšëngaftangbiama cachcá chaotsichámuama. Chca šmojtsamëse, ¿ntšamo šmochtsobena Bëngbe Bëtsábeñe jtsošbuáchiyana? <sup>45</sup> Ndoñe šmattsejuabnaye, atšbe Taitabe delante tšëngaftangbe contra atše chjayana ca ntšamo tšëngaftanga šmojtsamama. Tšëngaftanga tša jtsobátmanana atsebácanënga jtsemnama, chë ntšamo Moisesbe leyíne endayancá šmojtsamama; pero ndegombre, ntšamo cha tojayancá, cach tšëngaftangbe contra entsemna. <sup>46</sup> Tšëngaftanga, chë Moisés tojéftsanabema soyíne šmojtsošbuachese, átšbeñnaca šmattsošbuáchiye, er cha atšbiama tojanábema. <sup>47</sup> Pero chë tojanábema soyíne tšëngaftanga ndoñe šmontsošbuachesna, ¿ntšamo šmochjobenaye chë atše sentsichamo soyënguiñe jtsošbuáchiyana ca?” —Jesús tojanëyana.

## 6

*Jesús shachna uaranga boyabásenga saná tojanacaredadó*  
(Mt 14.13-21; Mc 6.30-44; Lc 9.10-17)

<sup>1</sup> Chë soyënga tojanopasá chentšana, Jesús chabe uatsjëndayëngaftaca tojána Galilea uafjónaye chenguana. Chë uafjónayna Tiberias cánaca inauabaina. <sup>2</sup> Ba entsanga imojtsëstona, er chënga tmojáninýe cha bëts soyënga jtsamana, šoquënga jtsashnayëse. <sup>3</sup> As Jesús tjoye tojántsjua, y choca chabe uatsjëndayëngaftaca tojanótbema. <sup>4</sup> Ya judiëngbe canýe fiesta, chë Bashco fiesta, yojétsobeco.

<sup>5</sup> Jesús tojanótbema ora, tojanontješé y tojánanýe ba entšanga chábioye imojet-sebéconaye. As Felípbioye tbojanianyana: —¿Ndayentše saná cuanjabuámiye nyetsca quem entšanga chamosama ca?

<sup>6</sup> Jesús chca tbojanianyana, ana Felípbioye jinýama ntšamo cha tabuanjojuama; er cach Jesús tšabá inatátšëmbo ndayá jamama. <sup>7</sup> Y Felipe tbojanjuá: —Ni mo uta patse denario crocenánaca nanjopódia tanděše jabuámiyama, nyetsca entšanga nýe mo batšatémnaca chamuétšesama ca.

<sup>8</sup> Chorna, Jesusbe canýe uatsjendayá, Andrés ca uabainá, Simón Pédrébe catšata, Jesúsbioye tbojanianyana: <sup>9</sup> —Muentše entsemna canýe básetema y cha shachna cebada tanděše y uta beónata entsebomna. Pero, ¿ndayase nýe nyetsatema chěfta entšangbiama ca?

<sup>10</sup> As Jesús tojánayana: —Entšanga mýyana chamotbiama ca.

Becá shácuana chě luariñe inamna, y nyetsca entšanga chiñe tmojanoshěntsjatbiama. Chě entšanguentše shachna uaranga boyabásenga imojtsemna. <sup>11</sup> Chora Jesús, chě tanděše chabe cucuatšiče tojanca, y Běngbe Bětsábioye chě tanděšama tbojtanchuá; y chabe uatsjéndayēnga tojanējatá, y chě uatsjéndayēngna nyetsca entšanga imojtset-biámanēnga tmojanatšatá. Cachcá Jesús chě beónaca tojanma, y ntšamo entšanga imo-janbošcá tmojanatšatá. <sup>12</sup> Nyetscanga tmojanse y tmojtanoshachá ora, Jesús chabe uat-sjéndayēnga tojanēyana: —Chě ojamnētēmēnga šmochtsatbananga, tondaye nýe cachcá ntjěftsonýayama ca.

<sup>13</sup> As chēnga tmojanatbaná, y chě tmojanse shachna cebada tanděsentšana to-janójamēmēngaca, bnětsana uta sbarēcua tmojanajutjé. <sup>14</sup> Chě entšanga quem bēts soye Jesús jamama tmojáninýe ora tmojánayana: “Ndegombre quem boyabása, chě quem luaroye jabama Běngbe Bětsabe juabna jabóyebuambayama cha entsemna ca.”

<sup>15</sup> Jesús yojtsetátšëmbo entšanga chēngbe rey jabemama imojetsebošama. Chíyeca cach tjoye tojtsaisanoñe canýa jtsomñama.

### *Jesús bėjaye juatsbuacá yojtsaye (Mt 14.22-27; Mc 6.45-52)*

<sup>16</sup> Tojanibétata ora, Jesusbe uatsjéndayēnga chě uafjajónayoye tmojantsmá; <sup>17</sup> barquěshañe tmojtanenojayé, y tmojanontšé jenashbuachénguana, chca, Capernaumoca jenbocnama. Ya ibeta yojtsemna, y Jesús cabá ndoñe chēngbioye ntashjanguana. <sup>18</sup> Chca imojtsenashbuachnějuana orna, chě bėjayiñe jabuache binýia tojanóshjango y bēts olěshēnga chě barquěshoye yojtsójantšetaye. <sup>19</sup> Shachna o chněnguana kilómetro chēnga tmojána ora, tmojáninýe Jesús chēngbioye yojtsebéconaye, bėjaye juatsbuacá yojtsaye. Chēnga chca tmojáninýe ora tša tmojanocochauatjaná, <sup>20</sup> pero Jesús tojanēyana: “Atše sēndmēna; ndoñe matauatjēngana ca.”

<sup>21</sup> Chora chě uatsjéndayēnga oyejuayēnga imojtseboše Jesús chě barquěshoye jofjana, y ndoñe bēnēntscose ya chě imojtsaye luaroye tmojánashjajna.

### *Entšanga Jesús tmojánguango*

<sup>22</sup> Yěfsana, nyetsca entšanga, chě uafjajónaye chenguánoica tmojanoquedanga tmojáninýe, chě inýe yěfsana chě nýe canýe barquěsha yojuamněshañe Jesusbe uatsjéndayēnga tmojtsanoñama, y Jesús chēngaftaca ndoñe tonjánama. <sup>23</sup> Pero chēntscuana, Tiberias pueblentšana inýe barquěshangá tojanáshjajna canýe luarentše, chě Běngbe Utabná Jesús chabe Taitábioye tbojtanchuá chentšana, entšanga saná tmojanse luare béconana. <sup>24</sup> Asna, ni Jesús ni chabe uatsjéndayēnga chentše ndoñe montsemnama chě entšanga tmojáninýe ora, chě barquěshangañe tmojtanenojayé y Capernaumoye tmojána Jesús jetsenguanguama.

*Jesús, chě nyetsca tescama yomna tšabe vida jtsebomnama tanděše*

<sup>25</sup> Chë uafjajónaye chenguánoye tmojánashjajna ora, Jesús tmojáninýena y mëntsá tmojantjá: —¿Buatëmbayá, ntseco ora muentse tcojášjango ca?

<sup>26</sup> Y Jesús tojanéyana: —Ndegombre cbëyana, tsëngaftanga ndoñe atse quešmatsnguá, chë bëts soyënga tijamama, sinó nýe chë jtoshachaye nýetsá tandëse šmojasama.

<sup>27</sup> Ndoñe matenángmenana chë nýe ndoñe bën y jopochócana sanama; chë ndmopochócaye saná, chë nýetsca tescama yomna tsabe vida jtsebomnama saná šmochjáanguango. Chë saná, Bëngbe Bëtsá Entsá tbojanbemá cmochanjátšataye, er Bëngbe Bëtsá chë Taitá tonjinýanýé, tsabe soyëngaca, cha chábioye tbojuábuayanama ca —tojánayana.

<sup>28</sup> Chora chë entšanga tmojantjá: —¿Ndayá fchjama ntšamo Bëngbe Bëtsá yojtsebošcá chaotsemnama ca?

<sup>29</sup> Chca tmojantjá ora, Jesús tojanéyana: —Chë Taitá entseboše tsëngaftanga chabe ichmonábeñe chašmotsošbuáchema ca.

<sup>30</sup> Chora chënga tmojanianyana: —¿Ndaye tsabe soye cochjama acbe obenana bënga jinýanýiyama ca? Chë soye chaftsjinýese, ácbeñe fchantsošbuáchiye. ¿Bëngbiama taic-ochjama ca? <sup>31</sup> Bëngbe tempsca bëts taitanga entšanga ndoyenoca maná ca uabaina saná tmojanse. Bëngbe Bëtsabe uabemana palabrënguñe mëntsá endayana: “Cha celoca tandëse tonjanatšatá chamosama ca” —chënga tmojánayana.

<sup>32</sup> Chora Jesús tojanéyana: —Ndegombre cbëyana, Moisés chënga ndoñe chë celoca tandëse tonjanatšatá; Bëngbe Bëtsá Bëngbe Taitá chëngbioye tojanatšatá chë maná ca uabaina tandëse; y cha endmëna nda celocana chë ndocna te ndmopochócaye tandëse ndegombre cmondatsatná. <sup>33</sup> Er Bëngbe Bëtsábiocana tandëse entsemna chë celocana tojastjanguá; y cha quem luare entšangbiama entsama chë nýetsca tescama yomna tsabe vida chamotsebomnama ca —cha tojanéyana.

<sup>34</sup> Chora chënga tmojanimpadá: —Taita, chë tandëse sempre šcochtsatšatnaye ca.

<sup>35</sup> Y Jesús tojanéjua: —Atse sëndmëna entšanga chë nýetsca tescama yomna tsabe vida jtsebomnama tandëse. Nda atse chašojtsëstona, sempre oyejuayá echanjëftsemna y Bëngbe Bëtsabe soyënga nýets tempo echanjesóbomñe, mo nda nýets tempo saná totsobomñcá, y ndocna te tbontsishëntsancá. <sup>36</sup> Pero ntšamo ya tcbonjauyancá, tsëngaftanga atse šmonjinýe y cabá ndoñe átšbeñe quešmatošbuaché. <sup>37</sup> Nda atšbe Taitá atšbiama tbojabocacá, cha atse šochantsëstona; y nda átšbioye šojtsëstona, átšbentšana quichtëtábocna. <sup>38</sup> Er atšna celocana sënjabo chë šojichmó cha ntšamo yojtsebošcá jamama, y ndoñe nýe ntšamo atse stsebošcá. <sup>39</sup> Y chë šojichmó cha entseboše, ni mo canýa chë atšbiama tojabacacá chentšana, atse chailesenciá pochocaná chaotsemnama; y quem luare jopochócama tena, nýetscanga atšbiama tojábacacangbiama chámuatayenama atse chaimama. <sup>40</sup> Er atšbe Taitá entseboše, nda chabe Uaquiñábioye tbojinýe y chábeñe tojtsošbuaché, chë nýetsca tescama yomna tsabe vida chaotsebomna, y quem luare jopochócama tena, cha cháuatayenama atse chaimama ca —Jesús tojanéyana.

<sup>41</sup> “Atse sëntsemna chë celocana tojóshjango tandëse ca” Jesús tojanéyana causa, chë judiënga tmojanontsé chabiama podesca ichámuana. <sup>42</sup> Chënga mëntsá imojtsichamo: —¿Mua ndoñe Jesús yondmëna, chë Josebe uaquiñá? Chabe bëtsëtsata bënga tmotsábuatmñe. ¿Ntšamo cha mora yochjátichamo celocana tojástjango ca?

<sup>43</sup> As Jesús tojanéyana: —Atšbiama ndoñe podesca matichámuana. <sup>44</sup> Ndocná quenátobena atse juastana, chë Taitá, chë šojichmó cha, ainaniñe chca chaotsebošama ndoñe tbonjuajabuáchëse; y atse chanjama cha cháuatayenama quem luare jopochócama te. <sup>45</sup> Chë tempsquënga Bëngbe Bëtsabe juabna oyebuambnayënga mëntsá tmojanábema: “Cach Bëngbe Bëtsá nýetscanga echanjabuatambá ca.” Chcasna, nda atšbe Taitábioye tbojoyeuná, y ntšamo chë Taitá tbojabuatëmbacá tojuatsjinýe, cha atse šochanjuasto.

<sup>46</sup> “Ndocná atšbe Taitá tbojinýe. Nýe chë Bëngbe Bëtsábiocana tojabá aiñe. <sup>47</sup> Ndegombre šcuayana: Nda átšbeñe tojtsošbuaché, chë nýetsca tescama yomna tsabe



vida echántsebomna. <sup>48</sup> Atše sëndmëna entsanga chë nyetsca tescama yomna tšabe vida chamotsebomnama tandëse. <sup>49</sup> Masque tsëngaftangbe bëts taitanga, entsanga ndoyenoca chë maná ca uabaina saná tmojanse, pronto tmojanóbana. <sup>50</sup> Pero atše sëntsoyebuambná ndayá chë celocana tojóshjango tandësama. Nda chë tandëse tojase, ndoñe queochatóbana. <sup>51</sup> Atše sëntsemna entsanga chë nyetsca tescama yomna tšabe vida jtsebomnama tandëse, chë celocana tojóshjanguëse. Nda quem tandëse tojase, nyetsca tescama nye ainá echanjesomñe. Chë chanjátšataye tandësna, cach atšbe cuerpo entsemna. Chca chanjama quem luare entsanga chë nyetsca tescama yomna tšabe vida chamotsebomnama ca” —Jesús tojánayana.

<sup>52</sup> Chora chë judiënga tmojanontsé enatsëtsnayana: —¿Ntšamo cha yochjobenaye cachabe cuerpo jatšatayana bënga jasama ca?

<sup>53</sup> As Jesús tojanëyana: —Ndegombre šcuayana: Tsëngaftanga Bëngbe Bëtsá Entšá tbojanbemabe cuerpo ndoñe šmonjase y chabe buiñe ndoñe šmonjofšese, ndegombre tšabe vida ndoñe quešmochátsbomna. <sup>54</sup> Nda atšbe cuerpo tojase y atšbe buiñe tojofšé, chë nyetsca tescama yomna tšabe vida echántsebomna, y quem luare jopochócama te atše chanjama cha cháuatayenama. <sup>55</sup> Atšbe cuerpo ndegombre saná endmëna, y atšbe buiñe ndegombre ofšëšnaye. <sup>56</sup> Nda atšbe cuerpo tojase y atšbe buiñe tojofšé, átšeftaca cányiñe mo canyáca echántsemna, y átšnaca cháftaca. <sup>57</sup> Atšbe Taitá, chë šojichmó cha, vida endbomna, y atše chábeyeca vida sëndbomna; cachcá, nda atšbe cuerpo tojase, chana átšbeyeca vida jtsebomnana. <sup>58</sup> Chë ndaye soyama atše sëntsoyebuambná, atšbe cuerpo y atšbe buiñe, entsemna chë celocana tojóshjango tandëse. Masque tsëngaftangbe bëts taitanga chë maná ca uabaina tandëse tmojanse, pronto tmojanóbana; pero quem tandëse ndoñe cachcá quenátsmëna. Nda quem tandëse tojase, nye nyets tempo vida echanjesóbomñe ca —Jesús tojánayana.

<sup>59</sup> Chë soyëngna Jesús tonjanabuatambá Capernaum pueblentše, chë judiëngbe enefjuana yebnentše.

### *Chë nyetsca tescama yomna tšabe vida jtsebomnana palabrënga*

<sup>60</sup> Chca tmojanuena ora, banga Jesusbe ústonënga imojtsichamo: —Ntšamo cha entsichamcá yapa totcá entsemna mo ndegombre cuaftsemncá joyeunayama. ¿Nda buanjóyeunaye ca?

<sup>61</sup> Jesús yojtsetátšëmbo chënga ndoñe tšabá imontsichámuama; as, chënga tojanatjá: —¿Ntšamo cbontsëtsësnacá ndoñe tšabá cmontsëuenana ca? <sup>62</sup> Y chcasna, Bëngbe Bëtsá Entšá tbojanbemá, chë cha tempo inamna luaroye tojëtstsjuama šmojinjëse, ¿ntšamo šmattsejuabnaye? <sup>63</sup> Bëngbe Bëtsabe Espíritu entsama entsanga chë tšabe vida chamotsebomnama. Chë cuerpo ndoñe uámana soye quenátsmëna; chë tbonjúayana soyënguiñe entsemna chë Uámana Espíritbe uajabuáchenana y chë tšabe vida. <sup>64</sup> Pero masque chca entsemna, tsëngaftangbentšana banga átšbeñe ndoñe quešmatošbuaché ca —Jesús tojánayana.

Er Bëngbe Bëtsabe soyëngama entsanga jábuayenama Jesús tojanbojatsé orscana, cha inatátšëmbo ndëmuanyënga chábeñe ndoñe mochanjanošbuáchiye, y nda chë uayayëngbe cucuatšíñe yochjëtšayentšbashejuanana. <sup>65</sup> Y Jesús yojtëtóntša oyebuambnayana: —Chíyeca, atše tsëngaftanga tbonjúayana: “nda atše juastama ainaniñe chaotsebošama atšbe Taitá ndoñe tbonjúájabuache, cha ndoñe quešochatasto ca”.

<sup>66</sup> Chë causa, chentšana, ba chabe ústonënga cachcá tmojesanonjýa, y cháftaca ya ndoñe imontsajna. <sup>67</sup> Chora Jesús, chë bnëtsana uta uatsjëndayënga tojanëyana: —¿Y tsëngaftángnaca, jtsoñama y atše jéseboshjonama šmojtseboše ca?

<sup>68</sup> Chora Simón Pedro tbojanjuá: —Bëngbe Utabná Jesús, ¿chcasna ndábioye fchjanga ca? Nye aca šcontsëtsësná chë nyetsca tescama yomna tšabe vida jtsebomnana palabrënga.

<sup>69</sup> Acbeñe fsëntsošbuaché, y mora fsëntsetatšëmbo aca chë Bëngbe Bëtsabe Uamaná comnama ca.

<sup>70</sup> Chora Jesús tojanëyana: —Atše tcbonjabacacá, chë bnëtsana útata; pero canya tšëngaftanguentsana, mo Satanasbe canye trabajayacá entsemna ca.

<sup>71</sup> Judas Iscariote, chë Simonbe uaquiñabiama chca Jesús tojánayana. Er chana masque canya chabe bnëtsana uta uatsjendayënguentsá inamna, Jesús uayayëngbe cucuatšine yochjáftsayentšbashejuana.

## 7

### *Jesusbe catšátanga chábeñe ndoñe montsanošbuaché*

<sup>1</sup> Chë soyënguentsana, Jesús Galilea luarëjana yojánana. Chë tempo, judiënga imojtsanjuabnaye ntšamo jamëse cha jóbama. Chiyeca, Jesús ndoñe yontseboše Judeoye jama.

<sup>2</sup> Chora, judiëngbe canye bëts fiesta semana yojtsobeco. Quem fiestënguentscuana, chë judiënga imojanamana tambënguiñe jtsiyenana. <sup>3</sup> As chora Jesusbe catšátanga tmojanianana: —Muentše ndoñe catjoquéda; Judeoye motsa, choca condbomna ústonënga, ntšamo contsamcá chócnaca chaminýama. <sup>4</sup> Er nda tojtseboše chamotsábuatmama, chabe soyënga ndoñe iytëcana ntsamana. Aca bëts soyënga Bëngbe Bëtsabe obenánaca contsamëсна, motsa y nyetscangbe delante chca cochjama ca —chënga tmojanianana.

<sup>5</sup> Er ni mo cach Jesusbe catšátanga chábeñe ndoñe montsanošbuaché. Chiyeca chënga chca tmojanianana.

<sup>6</sup> Chora Jesús tojanëjua: —Atšbe ora cabá ndoñe quentóshjango, pero tšëngaftangbiana mocna órnaca tšabá endëtsomñe. <sup>7</sup> Chë nye quem luarama enójuabnaye entsanga ndoñe quemátobena tšëngaftanga jtsëbuayënjana, pero átšbioyna aiñe, er atše puerte tšabá sëntsinýanýná ntšamo chënga imojtsamcá ndoñe tšabá yontsemnama. <sup>8</sup> Tšëngaftanga chë fiesta smochjá. Atšbe ora cabá ndoñe quentóshjango. Chiyeca atše choye ndoñe quicháta ca —cha tojánayana.

<sup>9</sup> Jesús chë soyënga tojanëyana y cach Galileoca tojtsanoquedañe.

### *Chë tambënguiñe jtsiyenama fiesta*

<sup>10</sup> Chabe catšátanga chë fiestoye tmojána chentsana, Jesúsnaca tojána, masque ndoñe entsángbeñe, sinó mo iytëcana cuenta. <sup>11</sup> Chë fiestocna, judiënga Jesús imojtsenguaye y imojtsichamo: —¿Ndayentše chë boyabása yojtsemna ca?

<sup>12</sup> Entsángbeñe ba soyënga chabiana iytëcana imojtsichamo. Inyënga chabiana imojtsichamo: “Cha tšabia endmëna ca”; pero inyënga: “Cha entsanga entsaíngña ca”.

<sup>13</sup> Pero ndocná Jesusbiana becá añémoca yontsoyebuambná, chë judiëngbe amëndayëngbiana imojtsauatja causa.

<sup>14</sup> Chë fiesta semana tsëntsañe yojtsó ora, Jesús Bëngbe Bëtsabe bëts yebnentše tojánamashëngo, y tojanontsé jabuátambana. <sup>15</sup> Chentše chë judiënga, ntšamo Jesús tojanabuatambacá tmojanuena ora, ojnánánënga imojtsichamo: —Bëtscá ntjuatsjinýcá, ¿ntšamo nyetsá nantsetatšëmbo ca?

<sup>16</sup> As Jesús tojanëjua: —Atšbe buatëmbayana ndoñe nye átšbentsana quenatóbocana, ndayá chë šonjichmó chábentsana. <sup>17</sup> Nda tojtseboše jamama ntšamo chë šojichmó cha yojtsebošcá, cha echántsetatšëmbo atšbe buatëmbayana Bëngbe Bëtsábocana yóbocanama o nye átšbentsana. <sup>18</sup> Nda nye cachabe juábnaca tojtsoyebuambná, jtsebošana entsanga más bëtsá chamobemama; pero nda bëtscá tojtsama, chë tbojichmóbioye entsanga más bëtsá chamobemama, cha cocayé ntšamo ndegombre yomncá jtsóyebuambnayana, y ndocnábioye ntseíngñayana.

<sup>19</sup> “Ndegombre, Moisés tšëngaftangbiana ley tojëftsanaboshjona. Pero masque chca, tšëngaftanguentsá ndocná quenátama ntšamo cha tojëftsanmandacá. Y ¿ndáyeca šmojtseboše atše jóbama ca?” —Jesús tojanatjá.

<sup>20</sup> Chora entsanga tmojanjuá: —¡Ndegombre aca bacna bayëjbe juabna contsambá! ¿Nda yojtseboše aca jóbama ca?

<sup>21</sup> Chora Jesús tojanéyana: —Nýetsca tsëngaftanga ojanánënga atše smontsonyá, atše canye ochnayté canye entsá tijashnama. <sup>22</sup> Pero, Moisés tmonjanamëndá básietema base bobachtema chë más delicadentše jatëtšana, chaotsinýnama (ndoñe nýe Moisésbeyeca chca, sinó Moisesbiama más tempasca bëts taitanga chca jamama imojanamánayeca); y tsëngaftanga canye básietema base bobachtema chë más delicadentše jatëtšana, masque chë te canye ochnayté totsomñëse. <sup>23</sup> Y mora, ntšamo Moisés tmojëftsanamëndacá ndoñe cachcá ntjonýayama, canye básietema chca jatëtšana masque ochnayté; as, ¿ndáyeca atše šmojtsayaná, atše ochnayté canye entsabe nýets cuerpo tijashnama? <sup>24</sup> Nýe batsá jinýëse, ínýengbiama ndoñe matichámëngana tsabá o ndoñe tsabá tmonjama ca. Ntšamo chë soyënga ndegombre bétsemnama natsana lempe tsabá jshétsetatsëmbëse, smochjayana tsabá o ndoñe tsabá tmonjama ca —Jesús tojánayana.

### *Jesús tojánayana ndëmocana cha tojánabama*

<sup>25</sup> Chora báseftanga Jerusalemoca oyenënga tmojanontsé ichámuana: —¿Mua ndoñe yontsemna chë jóbama montsenguá cha ca? <sup>26</sup> Masque ba entsangbe delante entsoyebuambná, ndocná chábioye ndocá ntjauyanana. ¿Nderado mo chë bëngbe amëndayënga imojtsejuabná cha chë Cristo, chë Uámana Uabuayaná yojtsemna ca? <sup>27</sup> Pero bënga mondétatsëmbo ndëmocá quem boyabása yomnana; y chë cuenta, chë Cristo chaojabo ora, ndocná queochátatsëmbo ndëmocana cha yochjabama ca —chënga imojtsichamo.

<sup>28</sup> Chca tojanuena ora, Bëngbe Bëtsabe bëts yebnentše Jesús yojtsabuátambayëntscuana, cha jabuache tojánayana: —¡Tsëngaftanga šmojtsejuabná atše ndegombre šmabuatma, y ndëmocana tijabama šmojtsetátšëmbo ca! Pero nýe atšbe cuenta, ndoñe chiyátabo, ndayá canya šojichmóyeca, nda ntšamo ndegombre yomncá nýetsca soyëngama endbétsoyebuambnaye; y tsëngaftanga cha ndoñe quešmatábuatma. <sup>29</sup> Atšna aíñe cha sënduábuatma, er atše chábentšana sënjabo y cha quem luaroye šonjichmó ca —Jesús tojánayana.

<sup>30</sup> Jesús chca tojánayana ora, chënga tmojánbošena cha jishachama, pero ndocná tbonjánishache, er cha chca japásama cabá ndoñe ora tonjanóshjango. <sup>31</sup> Banga chentše Jesúsbeñe imojtsanošbuaché y tmojánayana: “Chë Uámana Uabuayaná chaojabo ora, ¿quem boyabásabiama más tsabe soyënga yochjama ca?”

### *Chë fariseunga tmojánbošena Jesús jishachama*

<sup>32</sup> Chë fariseunga tmojántatsëmbona ntšamo entsanga Jesusbiama iytëcana imojtsencuéntaye. As, chënga y chë bachnangbe amëndayënga tmojanichamó báseftanga Bëngbe Bëtsabe bëts yebnoca josticiënga, Jesús chamuishachama. <sup>33</sup> Chora Jesús tojánayana: “Muentšana nýe baseftayté tsëngaftangaftaca chanjëftsemna; chentšana, chë šojichmó chábioye chanjëtspadésa. <sup>34</sup> Chora tsëngaftanga atše smochántsenguaye, pero ndoñe quešmochátinýena; y ndayentše chántsemnoca ndoñe quešmochatobenaye jashjan-guama ca.”

<sup>35</sup> Chora chë judiënga tmojanontsé entjanayana: “¿Ndëmoye quem boyabása yochjá, y bënga ndoñe mochanjobenaye jinýenama ca? ¿Inýe fshantsëngoye, judiënga tmojuashanëngbioye yochjá, y choca chë ndoñe judiënga yochjabuatambá? <sup>36</sup> ¿Ntšamo yojtsentšáyana cha šonjauyancá, chë ‘tsëngaftanga atše smochántsenguaye, pero ndoñe quešmochátinýena; y ndayentše chántsemnoca ndoñe quešmochatobenaye jashjan-guama ca?’” —chënga imojtsichamo.

### *Béjayënga vida bomniye*

<sup>37</sup> Chë fiesta jopochócama te yojamna chë más uámana te. Chë te, Jesús entsángbentše tojantsá y jabuache tojánayana: “¡Nda tbojtsajuendá, átšbioye chauabo y chaofšé! <sup>38</sup> Ntšamo

Bëngbe Bëtsabe uabemana palabrengüiñe endayancá: ‘Nda átšbeñe tojtsošbuaché, cha echántsemna mo ndabe ainanentsana vida bomna béjayënga tojtsohocancá.’ Chca echántsemna átšbeñe ošbuáchiyëngbiama ca” —cha tojánayana.

<sup>39</sup> Chë sóyeca, Jesús yojtseboše jayanana, chábeñe ošbuáchiyënga chë Uámana Espíritu mochjanóyëngacñe ca; er chë Uámana Espíritu cabá ndoñe tonjánabo, Jesús corente bëtsá yojamnama cabá ndoñe tmonjaninýinýé causa.

### *Nýetsca entsanga ndoñe cachcá Jesusbiama imontsejuabnaye*

<sup>40</sup> Chca tmojanuena ora, ínýenga imojtsichamo: —Quem boyabása ndegombre chë Bëngbe Bëtsabe juabna oyebuambnayá entsemna, chë Cristbe natsana jabamá ca.

<sup>41</sup> Inýenga imojtsichamo: —Ndegombre cha chë Cristo, chë Uámana Uabuayaná entsemna ca.

Pero ínýengna: —Ndoñe, er chë Cristo Galileocana ndoñe queochátabo. <sup>42</sup> Ndegombre, Bëngbe Bëtsabe uabemana palabrengüiñe endayana, chë Cristna rey Davídbentsana entsá canmëna, y Belenocana caochjabo ca, cach pueblcana ndayentsá David inamna ca —chënga imojtsichamo.

<sup>43</sup> Y chca, ínýengna Jesusbe pavor imojtsemna, y ínýengna chabe contra. <sup>44</sup> Inýenga imojtseboše Jesús jishachama, pero ndocná tbonjánishache.

### *Chë amëndayënga Jesúsbeñe ndoñe montsanošbuaché*

<sup>45</sup> Chë fariseunga y bachnangbe amëndayënga imojtsemnoye chë Bëngbe Bëtsabe bëts yebnoca josticiënga tmojtashjajna ora, tmojanatjá: —¿Ndáyeca ndoñe Jesús šmonjuánatse ca?

<sup>46</sup> Chora chë josticiënga tmojanéjua: —Ndocná quenatoyebuambná ntšamo chë boyabása tonjoyebuambacá ca.

<sup>47</sup> Chora chë fariseunga tmojanéyana: —¿Tšëngaftángnaca šmojalesenciá cha chacmaingñema ca? <sup>48</sup> ¿Nderado bëngbe amëndayënguentšá o bënga fariseunguentšá nýe mo canýa chábeñe tajojtsošbuaché? <sup>49</sup> Pero quem entsanga, ntšamo leyiñe iuayancá nduabuátmënga, bacna soyëngaca sempre mochanjëftsemna ca —chënga imojtsichamo.

<sup>50</sup> Chora Nicodemo, canýa fariseunguentšá, chë Jesúseftaca jencuéntama ibeta tojána cha, tojánayana: <sup>51</sup> —Ntšamo bëngbe leyiñe endayancá, bënga ndoñe quemuátobena jayanana canýe entsá castiganá jtsemnama ibojtsemna ca, cha cabá ntjoyeunaycá, ndayá cha tojamama jtsetatšëmbuama ca.

<sup>52</sup> Chora chënga Nicodemo tmojanjúá: —¿Acnaca chábeñe cojtsošbuaché y mo canýe Galileoca entsacá cojtsejuabná ca? Bëngbe Bëtsabe uabemana palabrengüiñe cochjuatsjinýe, y cochanjinýe ni canýa Bëngbe Bëtsabe juabna oyebuambnayá Galileocana yochjabo ca.

### *Chë shema boyábioye ínýaftaca ingñayá*

<sup>53</sup> Fariseunga y bachnangbe amëndayënga chë josticiëngbioye tmojanécácanentsana, cada ona cachabe yebnoye imojtsatóñënga.

## 8

<sup>1</sup> Pero Jesusna canýe tjoye, Olivos ca uabáinoye tojtsanoñe. <sup>2</sup> Y chë yëfsana cachëse, Jesús cachiñe Bëngbe Bëtsabe bëts yebnoye tojesaná. Nýetsca entsanga tmojanobeconá jouenama, y Jesús tojanótbema y tojanontsé jabuátambama.

<sup>3</sup> Chorna, báseftanga ley abuátambayënga y fariseunga tmonjánashjajna, y canýe shembása tmojanëshjango. Chana tmojáninýena chabe boyábioye ínýaftaca ibnetsoíngñañëntscuana; nýetscangbe tsëntsaca tmojanatsá, <sup>4</sup> y Jesús tmojaniana: —Buatëmbayá, quemuá fsënjínýena chabe boyábioye ínýaftaca bondëtsoíngñañëntscuana. <sup>5</sup> Leyiñe Moisés šonjanamëndá mëntšá uamana shembásengna ndëtšbëngaca jtsëbáyama. ¿Aca ntšamo catjayana ca?



<sup>6</sup> Jesús chca tmojanियana ana jisháchichiyama, chca chënga jtsebomnama ndáyeca chabe contra jayanana. Pero Jesús nýe fshantsoye yojotsejbéna y yojóntša ntšabuáfjaca fshantsiñe juabemama. <sup>7</sup> Chënga nýe imojtsetjanaye causa, Jesús tojantsbaná y tojanéyana: —Nda tsëngaftanguentsá tondaye bacna soyënga tondbomná, chaobojatsé ndëtsbeca jatëchënjama ca.

<sup>8</sup> Chentšana Jesús cachiñe fshantsoye yojtotsejbéna, y yojtëtóntša fshantsiñe jtëtabemama. <sup>9</sup> Chca tmojanuena ora, entsanga tmojanontsé canýánýa chentšana jésecocanana; natsana chë más bëtsanánënga y chë ínýengna ústonoye. Canýa Jesús tonjanoquedá y chë shembásanaca. <sup>10</sup> As, Jesús tojtantsá y tbojantjá: —¿Shembása, ndayentše chë acbe contra ichámënga imojtsemna? ¿Ndocná acbiama tonjayana castigana chacotsemna ca?

<sup>11</sup> Ndoñe, Taita, ndocná ca —chë shembása tbojanjúá.

Chora Jesús tbojanियana: —Atše cach ndoñe acbiama quichátayana castigana chacotsemna ca. Morna, motsatoñe, pero ndoñe más bacna soye cattsama ca.

### *Jesús yomna quem luarentša entsangbe juabna binýnayá*

<sup>12</sup> Jesús cachiñe Bëngbe Bëtsabe bëts yebnentše yojsabuátambaye, y entsanga mëntšá tojanéyana: —Atše sëndbínýna quem luare entsangbe juabnënga. Nda atše chašojtsëstona, cha echantsiyena atše chë binýnayáftaca; y ndoñe mo ibetiñcá queochátaye, y chca, tsabe vida echántsebomna ca.

<sup>13</sup> Chora chë fariseunga Jesús tmojanियana: —Aca nýe cach acbiama chca contsoyebuambná; chcana, chë ntšamo contsichamcá tondaye quenatámana ca.

<sup>14</sup> As chora Jesús tojanéjua: —Ntšamo cach atšbiama sentsichamcá aíñe entsámana, masque nýe atše stsichamo ntšamo atšbiama ndegombre yomncá. Er atše sëndëtatšëmbo ndëmocana tijabo y ndëmoye ttsá. Pero tsëngaftanga ndoñe chca quešmatstatšëmbo. <sup>15</sup> Tsëngaftanga šmondbétsichamo ínýengbiama tsabá o ndoñe tsabá tmontsamama, chca, nýe ntšamo entsanga mondbetsejuabnáyca. Pero atšna ndocnabiama chca quetsátichamo. <sup>16</sup> Atše ndoñe nýe canýa quetsátsmëna ínýabiama jayanama tsabá o ndoñe tsabá tontsamama; ndayá atšbe Taitá, chë šonjichmó cha, átšeftaca chca jayanana. Chíyeca, atše ínýabiama tsabá o ndoñe tsabá tonjama ca stsichamo ora, ntšamo stsichamcá ndegombre jtsemnana. <sup>17</sup> Tsëngaftangbe leyiñe enduábemana, uta entsata ndayámnaca cachcá tbojayanëse, ntšamo chata tbojayancá puerte jtsámanana ca. <sup>18</sup> Y morna, atše sentsichamo chë ntšamo cach atšbiama ndegombre yomncá, y atšbe Taitá, chë šonjichmó chánaca entsichamo ntšamo atšbiama ndegombre yomncá ca —Jesús tojánayana.

<sup>19</sup> Chora chënga tmojantjá: —¿Ndayentše acbe Taitá yojtsemna ca?

Y Jesús tojanéjua: —Tsëngaftanga ndoñe quešmatábuatma ni atše ni atšbe Taitá. Atše šmojtsábuatmëna, atšbe Taitánaca šmattsábuatma ca.

<sup>20</sup> Bëngbe Bëtsabe bëts yebnoca, chë crocénana jacjayama luarentše yojsabuátambaye ora, Jesús chca tojánayana. Pero masque cha chentše yojtsemna, ndocná tbonjánishache, er chca japásama cabá ndoñe ora tonjanóshjango.

### *“Chë chanjá luaroye, tsëngaftanga ndoñe quešmatobena jama”*

<sup>21</sup> Chora Jesús yojtëtóntša oyebuambnayana: —Atše chantá, y chora tsëngaftanga atše šmochántseguaye. Masque chca, šmochanjóbana tsëngaftangbe bacna soyëngama ndëperdonánënga. Chë chanjá luaroye, tsëngaftanga ndoñe quešmatobena jama ca —Jesús tojánayana.

<sup>22</sup> Chora chë judiënga tmojanontsé enatsëtsnayana: —¿Mo nderado yojtsejuabná jt-senóitanama, y chíyeca yojsichamo chë cha yochjá luaroye bënga ndoñe montsobena jama ca?

<sup>23</sup> Chora Jesús tojanéyana: —Tšëngaftanga quem luaroquënga šmondmëna; atšna tsbananocá, celocá sëndmëna. Tšëngaftanga nÿe quem luarama enójuabnayënga šmondmëna, pero atše ndoñe. <sup>24</sup> Chíyeca atše chca tcbonjáuyana, chë “tšëngaftangbe bacna soyëngama ndëperdonánënga šmochanjóbana ca”. Er, nda atše ndegombre bëtsemnana ndoñe chašmontsošbuachese, tšëngaftangbe bacna soyëngama ndëperdonánënga šmochanjóbana ca.

<sup>25</sup> Chora chënga tmojantjá: —¿As aca ndase cmëna ca?

Y Jesús tojanéyana: —Entšanga jabuátambama sënjanbojatsé orscana chama tcbonjáuyana. <sup>26</sup> Atše ba soyënga sëntsebomna tšëngaftangbiana jayanama, tšëngaftangbe contra jayanama; pero chë šonjichmó cha nÿetsca soyëngama ndegombre endbëtsichamo, y atšna ntšamo chábensana tijouencá, cachcá quem luare oyenënga sëntsëtsëtsná ca — cha tojanéyana.

<sup>27</sup> Pero chënga ndoñe tonjanësertá Jesús cachabe Taitabiana chca tojanéyanama.

<sup>28</sup> As Jesús tojanéyana: —Bëngbe Bëtsá Entšá tbojanbemá chašmojatsbaná ora, šmochántsetatsëmbo nda sëndmëná atše bëtsemnana. Cachcá, tšëngaftanga šmochántsetatsëmbo, nÿe cach atšbe juábnaca atše tondaye jamama sëndobenama. Nÿe ndayá atšbe Taitá šojabuatëmbacá atše sëndoyebuambná. <sup>29</sup> Y chë šonjichmó cha ndoñe nÿe canÿa quešnátsboshjuana. Chca endmëna, er atše sempre sëndbëtsama ntšamo cha oyejuayá jabemama tojtsemncá ca —Jesús tojánayana.

<sup>30</sup> Jesús chca tojánayana ora, banga chábeñe imojtsanošbuaché.

*Bëngbe Bëtsabe básenga y chë nÿe bacna soye jtsamama vida bomnënga*

<sup>31</sup> Chora Jesús, chë chábeñe imojtsošbuaché judiënga tojanéyana: —Ntšamo cbontsëtsëtsnacá tšëngaftanga sempre šmojtsamëse, ndegombre atšbe uatsjëndayënga šmochántsemna. <sup>32</sup> Ntšamo ndegombre yomncá šmochántsetatsëmbo; y ntšamo ndegombre yomncá jtsetatsëmbëse, atsebácanënga šmochántsemna ca.

<sup>33</sup> Chora chënga tmojanjuá: —Bëngna Abrahámbentsana entšanga fsëndmëna, y ndocná ndocna te chešnáisishëche nÿe chabiana nÿets tempo jtsoservënana. As, ¿ndáyeca šcojtsëtsëtsná bënga atsebácanënga fchtsemna ca?

<sup>34</sup> Chora Jesús tojanéyana: —Ndegombre šcuayana: Nda bacna soyënga tojtsama, cha nÿe bacna soyënga jamama juabnëngaca mandaná jëftsemnana. <sup>35</sup> Canÿe oservená ndoñe nÿets tempo chë pamillentšá ntjëftsemnana, ntšamo canÿe uaquiñá siempre chë pamillentšá jesomñancá. <sup>36</sup> Y chca, Bëngbe Bëtsabe Uaquiñá chacmojátsebacase, tšëngaftanga ndegombre atsebácanënga šmochántsemna bacna soyënga juabnënguentšana. <sup>37</sup> Atše sëndëtatšëmbo tšëngaftangna Abrahámbentsana entšanga šmomnana; pero tšëngaftanga šmontseboše atše jóbama, ntšamo atše cbontsëtsëtsnacá ainaniñe jóyëngacñama ndoñe quešmátsboše causa. <sup>38</sup> Ntšamo atšbe Taitábioca tijinÿcá, cach soyëngama atše sëntsoyebuambná. Tšëngaftángnaca, cachcá ntšamo tšëngaftangbe taitábentsana šmojouencá šmontsama ca —tojanéyana.

<sup>39</sup> Chora chënga tmojanjuá: —Bëngbe uámana bëts taitá, Abraham endmëna ca.

As Jesús tojanéyana: —Tšëngaftanga Abrahambe básenga ca jtsabáinama merecido šmojtsebuajónëse, chë ntšamo Abraham tojëftsema y cachcá tšëngaftanga šmattsama. <sup>40</sup> Atšna ntšamo ndegombre yomncá sëndoyebuambná, ntšamo Bëngbe Bëtsábentsana tsouenancá. Pero mora tšëngaftanga šmontseboše atše jóbama; Abraham ndocna te chca chenaisobuachjanguá. <sup>41</sup> Tšëngaftangna, ntšamo tšëngaftangbe taitá tojëftsemcá y cachcá jtsamana ca —Jesús tojánayana.

Chora chënga tmojanijana: —Bënga nÿe enaquécana básenga ndoñe queftsátsmëna. Chë nÿe canÿe taitá fsëndbomná, Bëngbe Bëtsá endmëna ca.

<sup>42</sup> Chora Jesús tojanéyana: —Bëngbe Bëtsá ndegombre tšëngaftangbe taitá tojtsemnëse, tšëngaftangna atše šmattsebobonshana. Er atšna, Bëngbe Bëtsábiocana sënjabo

y muentše sěntsemna. Nye atšbe ponto ndoñe chiyátabo; Běngbe Bětsá šonjichmó.  
<sup>43</sup> ¿Ndáyeca tšěngaftanga ndoñe šmontsobena atšbe palabřęnga josértana? Co, ntšamo  
 cbontsětsětnacá joyeunayama ndoñe quešmátsboše causa chca. <sup>44</sup> Tšěngaftangbe taitá  
 Satanás endmēna. Tšěngaftangna chabe entšanga šmondmēna; chíyeca, tšěngaftanga  
 šmontseboše jamama cachcá ntšamo cha tojtseboščá. Quem luare jobojátšama orscana,  
 Satanás entšá obanayá endmēna. Satanasbe juabnoca, ndocna tšabe soyęnga ni ndegom-  
 bre soyęnga ntsebínynana. Chíyeca, ndocna te cha ntšamo ndegombre yomncá ntsamana.  
 Cha canye bostero endmēna, y chábentšana nyetsca bostero soyęnga jtsóbocanana. Chíyeca,  
 cha tojtsebostero ora, nye ntšamo cachá yomnama jtsichámuana. <sup>45</sup> Atšna sempre  
 ntšamo ndegombre yomncá cbondutsětsná; chíyeca, chě sěntsichamo soyiñe tšěngaftanga  
 ndoñe quešmatošbuaché. <sup>46</sup> ¿Nda tšěngaftanguentšá nanjobenaye jinyanjyana atše ndaye  
 bacna soye tijamama? Y atše, nye ntšamo ndegombre yomncá stsicháměse, ¿ndáyeca chě  
 tijayaniñe ndoñe šmontsošbuaché? <sup>47</sup> Nda Běngbe Bětsabe entšá tomna, ntšamo Běngbe  
 Bětsá tojtsichamcá jtsuenanana. Pero tšěngaftangna ndoñe Běngbe Bětsabe entšanga  
 quešmátsmēna. Chíyeca, ntšamo Běngbe Bětsá entsichamcá ndoñe quešmátsboše joue-  
 nama ca —Jesús tojaněyana.

### *Cristo Abrahambiana más natsana ya yojtsemna*

<sup>48</sup> Chora chě judięnga tmojanianyana: —Ajá, bęnga co ndegombre fstsichamo, aca nye  
 samaritano y bacna bayějbe juabna uambayá comna ca fstsichamo ora ca.

<sup>49</sup> Y Jesús tojanějua: —Atše ni mo canye bayějbe juabna quetsatambá. Ntšamo atše  
 sěntsamcá, endmēna jinyanjyama atšbe Taitá Běngbe Bětsá uamaná yomnama; pero  
 tšěngaftangna, atše chca tsmēnama ndoñe quešmatinjinyná. <sup>50</sup> Atše ndoñe quetsátsboše  
 inyęnga atše más uamaná chašmobemama. Pero inya endmēna; cha aiñe endboše  
 atše bětsá bětsemnama chaminjanjyema. Y chánaca endmēna chě inyęngbiana tšabá o  
 ndoñe tšabá tmontsamama endbetsichamuá. <sup>51</sup> Ndegombre šcuayana, nda ntšamo atše  
 sěntsichamcá tojouena y chca tojama, ndocna te queochatóbana ca —Jesús tojánayana.

<sup>52</sup> Chora chě judięnga tmojanianyana: —Mora cocayé fsěntsetatšēmbo aca ndegombre  
 bacna bayějbe juabna uambayá comnama. Abraham tojanóbana, y cachcá, nyetscanga  
 Běngbe Bětsabe juabna oyebuambnayęgnaca. ¿Y mora aca cochjátichamo, “Nda ntšamo  
 atše sěntsichamcá tojouena y chca tojama, cha ndocna te queochatóbana ca”? <sup>53</sup> ¿O aca,  
 bęngbe běts taitá Abrahambiana más bětsá comna? Cha tojanóbana, y Běngbe Bětsabe  
 juabna oyebuambnayęgnaca. ¿Ndase cojátsmēna ca aca cojatsjuabná ca? —chęnga  
 imojtsichamo.

<sup>54</sup> Chora Jesús tojanějua: —Atše nye cach atše más bětsá stsenobiamnasna, chě soye  
 tondaye nantsámana. Pero chě más bětsá šojtsebiamná cha, atšbe Taitá endmēna,  
 cach ndabiama tšěngaftanga šmondbětsichamo tšěngaftangbe Bětsá canmēna ca. <sup>55</sup> Pero  
 tšěngaftanga cha ndoñe quešmatábuatma; atše aiñe. Y atše, “cha ndoñe quetsatabuatma  
 ca” stsicháměse, átšnaca cach tšěngaftangcá canye bostero stsemna. Pero ndegombre atše  
 cha sěnduábuatma, y ntšamo cha tojtsichamcá, atše sěndouenana y cachcá sěndbětsama.  
<sup>56</sup> Tšěngaftangbe uámana běts taitá Abraham, chě atše jabama te jinjyama yojtsejuabnaye  
 ora, puerte oyejuayá yojtsemna. Y pronto tojěftsaninye, y puerte tojanoyejuá ca —Jesús  
 tojánayana.

<sup>57</sup> Chora chě judięnga tmojanianyana: —Aca cabá ndoñe shachna bnětsana uata  
 quecátsbomna; y as, ¿ntšamo cochjátichamo, Abraham tcojěftsinye ca?

<sup>58</sup> Chora Jesús tojanějua: —Ndegombre cbeyana, Abraham cabá ndoñe ainá quen-  
 jatsmēna ora, atše ya sějětsemna ca.

<sup>59</sup> Jesús chca tojanějua ora, chęnga ndětsbęnga tmojanájaca cha jtsatčhęnganjama.  
 Pero Jesusna oitanánana, Běngbe Bětsabe běts yebnentšana tojėsanbocna.

## 9

*Jesús tojanma, canye boyabása jtaná onýnaná chabuabínýnama*

<sup>1</sup> Canye luarējana yojsachnějuana ora, Jesús canye boyabásabioye tbojáninýe. Chě boyabásana jtaná inónýna. <sup>2</sup> Chě uatsjédayēnga Jesús tmojantjá: —Buatēmbayá, ¿ndáyeca quem boyabása jtaná inónýna? ¿Camuá bacna soyēnga tojamama, o chabe bētsētsangbe bacna soyēnga causa ca?

<sup>3</sup> Chora Jesús tojanējua: —Ni cachabe bacna soyēngama, y ni chabe bētsētsangbe bacna soyēnga causa. Chca endmēna ndayá entsānga jinýanýiyama ntšamo Bēngbe Bētsá yobencá. <sup>4</sup> Cabá yojsēsháchena ora, šontsamna jamana ntšamo chě šonjichmó cha yojtsebošcá. Ndoñe usháchena tempo echanjóshjango; chora ndocná tondaye jamama queochatobenaye. <sup>5</sup> Quem luariñe chjēftsemnēntscuana, atše quem luare entsāngbe juabnēnga binýnaya chanjēftsemna ca —tojanējua.

<sup>6</sup> Chca tojánayanentšana, Jesús fshantsiñe tojanbuashētjo, y chě yebuáyeca batšá ngüiche tojānbema, y chě jtaná chě ngüicheca tbojanbuchanētjo. <sup>7</sup> Chora chě jtaná tbojaniyana: —Motsa y metsobúchjabebiyē, chě binche uafjajónaye entsāngbe pormániñe, Siloé ca uabáiniyoca ca. (Siloé, judiēngbe biyañe endayana “Ichmoná ca”).

Y chě jtaná tojána; choca yojetsobúchjabebiyē, y yebnoye tojtaná ora, ya ibojsabinýna. <sup>8</sup> Chě juachañe oyenēnga y chě jtaná tempo lemošna otjanañana tmojáninýēnga, imojt-sentjanaye: —¿Mua ndoñe yondmēna chě enjanamana jótbemana lemošna jótjañama ca?

<sup>9</sup> Inýēnga imojtsichamo: —Cha entsemna ca.

Y ínýēnga: —Cha ndoñe quenátsmēna, pero chacá entsábona ca.

Y cach shnaná yojsichamo: —Atše cha sēndmēna ca.

<sup>10</sup> As chě entsānga tmojantjá: —¿Ntšamo chca mora cmojsabinýna ca?

<sup>11</sup> Y cha tojanējua: —Chě boyabása, Jesús ca uabainá, ngüiche yebuáyeca tonjábema, šonjabuchanētjo y šonjauyana: “Motsa y Siloé uafjajónayiñe metsobúchjabebiyē ca”. Chcasna, atše sēnjá, sēnjetsobúchjabebiyē y cachora šontsabinýna ca.

<sup>12</sup> Chora chēnga tmojantjá: —¿Ndayentše cha yojtsemna ca?

Y chana: —Atše ndoñe quetsátstatšēmo ca —tojanējua.

*Chě jtana shnanábioye fariseunga imojtsetjanaye*

<sup>13</sup> Chora chě entsānga, chě jtaná inamná fariseúngbioye tmojanánatse. <sup>14</sup> Chě Jesús batšá yebuáyeca ngüiche tojānbema, y chě jtaná tojanma te, canye ochnayté inamna. <sup>15</sup> As chě fariseunga chě boyabása tmojantjá: —¿Ntšámoyeca mora cmojsabinýna ca?

Chora cha tojanējua: —Cha ngüiche yebuáyeca tonjábema y šonjabuchanētjo. Sēnjetsobúchjabebiyē, y cachora šonjuabinýna ca.

<sup>16</sup> As chora básefta fariseunga imojtsichamo: —Chě jtaná chabotsabinýnama tojamá ndoñe tonjochná, y ochnayté tojatrabajá. Chýyeca cha Bēngbe Bētsabe entsá ndoñe quenátsmēna ca.

Inýēnga imojtsichamo: —Cha canye bacna soyēnga amá tojtsemnēse, ¿ntšamo nantsobena canye bēts soye Bēngbe Bētsabe obenánaca jamama ca?

Y chca, ínýēnga Jesusbe pavor imojtsemna, y ínýēnga chabe contra. <sup>17</sup> Chama chēnga cachiñe chě jtaná inamná tmojtētantjá: —Er aca mora chacmotsabinýnama cha tojamēse, ¿chabiama ntšamo catjayana ca?

Chora cha tojanējua: —Chana canýa Bēngbe Bētsabe juabna oyebuambnayá entsemna ca.

<sup>18</sup> Pero chě judiēnga ndoñe montsanošbuaché, cha chě jtaná inamnama y chora ibojsabinýnama. As chēnga, ínýēnga tmojanichamó chě boyabásabe bētsētsata jobiatšama.

<sup>19</sup> Chě bētsētsata tbojánashjango ora, chě judiēnga tmojanatjá: —¿Quem boyabása tsēndatbe uaquiñá yomna ca? ¿Ndegombre tašojtsichamo cha jtaná inonýnama? Chcase, ¿ntšamo mora cha ibojsabinýna ca?



<sup>20</sup> Chora chë bëtsëtsata tmojanëjua: —Aíñe fsëndëtatsëmbo cha bëndatbe uaquiñá endmënama y jtaná tonjanonýnama. <sup>21</sup> Pero ndoñe queftsátstatsëmbo ntšámoyeca mora chca ibojtsabinýnama, ni bëndatbe uaquiñá chabotsabinýnama nda tojamama cach ndoñe. Cachá motjanga. Ya bëtsá entsemna, y cachá entsobena tsëngaftanga razón jatšatayama ca —chata tbojánayana.

<sup>22</sup> Tempo, chë judiënga imojenóyeunaye, chëngbe enefjuana yebnënguentšana jtëbuacanana chë Jesús ndegombre chë Uámana Uabuayaná, chë Cristo yojamna ca tmojayanënga. Chë bëtsëtsatna chama ibojtsauatja; <sup>23</sup> chíyeca tmojanëyana: “Cha ya bëtsá entsemna. Cachá motjanga ca”.

<sup>24</sup> As cachiñe chë judiënga chë jtaná inamná tmojanchembo y tmojanianyana: —Bëngbe Bëtsabe delante cach acbiama ndegombre mobuambá. Bënga fsëndëtatsëmbo chë boyabása canýe bacna soyënga amá yomnama ca.

<sup>25</sup> Chora cha tojanëjua: —Cha canýe bacna soyënga amá o ndoñe tondmënama, atše ndoñe quetsátstatsëmbo. Atše nýe mëntsá sëntsetatsëmbo: Atše jtaná sënjanmëna, pero mora šontsabinýna ca.

<sup>26</sup> Chora chënga cachiñe tmojatantjá: —¿Ntšamo tcmënjama? ¿Ntšamo cha tënjama chacmotsabinýnama ca?

<sup>27</sup> Y cha tojanëjua: —Ya tcbonjáuyana y ndoñe chešmatoyeuná. ¿Ndáyeca cachiñe šmojtseboše jatuenama? ¿Tsëngaftángnaca šmojtseboše chabe ústonënga jtsemnama ca?

<sup>28</sup> Chora chënga cha tmojtsanóyenguango y tmojanianyana: —Acna canýe chabe us-toná cojtsemna, pero bënga ndoñe; bëngna Moisesbe ústonënga fsëndmëna. <sup>29</sup> Bënga fsëndëtatsëmbo, Bëngbe Bëtsá Moisésbioye tbojanatsëtsama, pero chë boyabásabiama ndoñe queftsátstatsëmbo ni mo ndëmocana cha tojabama ca —chënga imojtsíchamo.

<sup>30</sup> Chora chë boyabása tojanëjua: —¡Ntšamo chca nántsemna! Tsëngaftanga ndoñe šmontsetatsëmbo ndëmocana cha tojabama; pero chašubabinýnama cha tonjama. <sup>31</sup> Bënga tsabá mondëtatsëmbo, bacna soyënga amënga Bëngbe Bëtsá ndoñe queondbátayaunanama. Chana, nýe chábioye adorayá y ntšamo cha tojtsebošcá amábioye joyeunayana. <sup>32</sup> Quem luare jobojátsama orscana ndocna te quenaisótatsëmbo canýe jtaná onýnanabiama ndánaca cha chabotsabinýnama tojéftsemama. <sup>33</sup> Quem boyabása, Bëngbe Bëtsabe ichmoná chabe soyënga jamama ndoñe tontsemnëse, tondaye nantsobena jamama ca —chë entsá tojánayana.

<sup>34</sup> As chë fariseunga tmojanianyana: —¡Ndayá! Aca tcojanonýná orscana, corente bacna soyënga amá tcomnëse, ¿ntšamo mora bënga šcochjátatuatambaye ca?

Y chora chë judiëngbe enefjuana yebnentsana cha tmojtanábocna.

### *Chë Bëngbe Bëtsabe soyëngama mo jtanëngcá imomnënga*

<sup>35</sup> Chë jtaná tmojtanábocnama Jesús tojanuena ora, tojána cha janguanguama. Tbojáninýena ora tbojanianyana: —¿Aca Bëngbe Bëtsá Entšá tbojanbemábeñe quecojtsošbuaché ca?

<sup>36</sup> Y cha tbojanjuá: —¿Taita, nda cha yojtsemna, as atše chábeñe jtsošbuáchiyama ca?

<sup>37</sup> As Jesús tbojanianyana: —Aca ya tconjinýe; chë ácaftaca entsoyebuambná cha entsemna ca.

<sup>38</sup> Chora, chë boyabása Jesús bentše tojanoshamentšé jëtschuayama y tbojanianyana: —Atšbe Utabná, aíñe sëntsošbuaché ca.

<sup>39</sup> Chora Jesús chë entsanga tojanëyana: —Atše quem luaroye tijabo ndayá entsanga jinýanýiyama ntšamo cachënga Bëngbe Bëtsabe soyëngama imojuabnama. Chë Bëngbe Bëtsabe soyëngama ndosertánënga, chë soyënga atše chanjínýanýiye ora, mo jtanëna shnanëngcá mochántsemna; y chë Bëngbe Bëtsabe soyëngama corente imotatsëmbo ca juabnayëngna chanjínýanýiye, nýe batšá Bëngbe Bëtsabe soyëngama imotatsëmbuama. Y chca, chënga, masna mo jtanëngcá mochántsemna y ndoñe mo chë jinýama obenëngcá.

<sup>40</sup> Básefta fariseunga Jesúseftaca imojtsemnënga chca tmojanuena ora, cha tmojaniana: —Ndegombre bënga ndoñe mo jtanëngcá queftsátsmëna ca.

<sup>41</sup> Chora Jesús tojanëjua: —Tšëngaftanga Bëngbe Bëtsabe soyëngama ndëtatšëmbënga šmojtsemna ca, y ndegombre chë soyëngama ndoñe cmontsësertana ca šmojobuambase, ndayá šmojtsamcá Bëngbe Bëtsá mo bacna soyënga cuenta ndoñe queochátönyaye. Pero tšëngaftanga corente Bëngbe Bëtsabe soyëngama cmojtsësertana ca šmojtsichámësna, Bëngbe Bëtsá ndoñe queochatobenaye tšëngaftangbe bacna soyëngama jáperdonana ca — Jesús tojanëyana.

## 10

### *Chë oveshënga abujënyä y chabe oveshënga*

<sup>1</sup> As Jesús tojanëyana: “Ndegombre šcuayana: Nda chë oveshëngbe luaroye bësáshajana ndoñe tonjámashëngo, pero aíñe inyájana tojtsamáshëngo, chana canyë atbëbaná y abacayá jtsemnana. <sup>2</sup> Pero chë bësáshajana tojamashënguana, chë oveshënga anyëná jtsemnana. <sup>3</sup> Chë bësásha ebtafjuaná, chë bësásha jebëtafjuana, y chë oveshënga abujënyä ntšamo cada ona tmabaincá chë oveshënga jáchembuana. Y chë oveshënga jtsetatšëmbuana chëngbe abujënyä yojtsachembuanama; y chë luarentšana cha jubuacnana. <sup>4</sup> Nyetsca oveshënga tmojábocana ora, chë abujënyä chënga jtsebënatsanana, y chë oveshënga jtsëstonana, er chabe oyebuambnayana chënga joyátëmbana. <sup>5</sup> Pero chë tmonduabuatmábioyna chë oveshënga ndoñe ntjuastana; nyë chábentšana jtsachetëngana, chë oveshënga chabe oyebuambnayana ndoñe ntjoyátëmbana causa ca” —Jesús tojánayana.

<sup>6</sup> Jesús entsanga chca tonjanacuntá, pero chënga ndoñe ntjosértana ntšamo yojtsentsayancá.

### *Jesús, chë oveshënga tšabe abujënyä*

<sup>7</sup> As Jesús cachiñe tojanëyana: “Ndegombre cbëyana: Atše sëndmëna chë bësásha oveshënga mondbëtsamashjuanëjana. <sup>8</sup> Nyetscanga chë atšbe natsana tmojánabënga, atbëbanënga y abacayënga imnamna, pero chë oveshënga ndoñe chëngbioyë ntjóyaunayana. <sup>9</sup> Atše chë bësásha sëndmëna. Nda quem bësáshajana tojamashënguá, atsboaná echántsemna. Canyë oveshájamashënguana y jabocnana, y shácuana jónyëna. Cachcá, chë quemëjana tojamashënguá, lempe echanjónyëna.

<sup>10</sup> “Chë atbëbaná jabana nyë jatbëbama, jóbama y lempe jtseepochócama; pero atšna, entsanga vida chamotsebonnama y átšeftaca bëtscá tšabe vida chamotsebonnama tijabo.

<sup>11</sup> “Atše sëndmëna chë oveshënga tšabe abujënyä. Chë oveshënga tšabe abujënyä sempre jtseprontánana chëngbiamá jóbana, chabe oveshënga ababuányëshanayeca. <sup>12</sup> Pero nda nyë crocenánama totrabáya y chë oveshënga ndoñe chábënga tmontsemna, cha nderado tojinyë canyë tjañe queše chë oveshëngbioyë tojtsobécocnana, cachora nyë cachcá jesënyayana y jtsachana. Chë tjañe queše oveshënga jtsacamiyana, y chë oveshëngna nyë cátoyë jtsachetana. <sup>13</sup> Cha jtsemnana nyë crocenánama trabajayá; chabiama nyë chë uacanánana más uámana soye jtsemnana, y chë oveshëngbiamá tondayana ntsentsamnana; chíyeca cha jtsachana.

<sup>14</sup> “Atše sëndmëna chë oveshënga tšabe abujënyä. Atše chënga sëndëubuatma, y chëngnaca atše šmonduábuatma. <sup>15</sup> Cachcá, chë Taitá Bëngbe Bëtsá atše šonduábuatma y atše chábioyë. Atše sempre sëndëtseprontana jóbana, atšbe oveshënga sëndababuanyëshánayeca. <sup>16</sup> Atše inyë oveshënga sëndábamna, pero chënga ndoñe quem luariñe oveshënga quemátsmëna. Atše šontsemna chëngnaca moyë junatsana. Chëngnaca atšbe oyebuambnayana mochanjouena, y muentša oveshëngaftaca cányiñe mochántsemna, y atšna nyetsca chë oveshëngbiamá chë abujënyä chántsemna.

17 “Atše sempre sëndétseprontana jóbanama, chora jtayenama. Chíyeca chë Taitá šondbobonshana. 18 Ndocná atšbe vida quešochatsbojuána, pero chënga sëndababuanÿeshánayeca sempre sëndétseprontana jóbanama, cach atše chca sëndbošeyeca. Derecho sëndétsóbomñe chëngbiamá jóbanama, y chora jtayenama. Chca endmëna ntšamo atšbe Taitá šonjamandacá ca” —Jesús tojánayana.

19 Chë soyënga chë judiënga tmojanuena ora, cachiñe banga Jesusbe contra y ínÿengna Jesusbe pavor imojtsemna. 20 Banga imojtsichamo: —Chana bacna bayëjbe juabna uambayá y corente juicio ndbomná entsemna. Y as ¿ndáyeca cha mochjátyseunana ca?

21 Pero ínÿengna imojtsanichamo: —Ndocna bacna bayëjbe juabna uambayá ntsobenana chca jóyebuambayama. ¿Canÿe bayëja nantsobena jamama canÿe jtaná chabotsabinÿnama ca?

### *Chë judiënga ndoñe imontsošbuáchiye Jesús Bëngbe Bëtsabe Uaquiñá bëtsemnama*

22 Canÿe uaftena tempo inamna, y Jerusalenentše canÿe fiesta imojtsebomna. Chë fiesta inamna cada uata, Bëngbe Bëtsabe bëts yebna tempo cachiñe tmojtanjebuama entšanga jtenójuaboyama. 23 Jesús Bëngbe Bëtsabe bëts yebnocá yojétsana, canÿe amashjuana otsbojebniñe, Salomonbe Amashjuana ca uabáinentše. 24 Chora, chë judiënga tmojanóbobuashcona, y tmojantjá: —¿Buetaytentscuana bënga fchjëftsemna acbiamá ndegombre soye ntsetatsëmbcá? Aca chë Cristo cojtsemnëse, chama lempe tšabá šmanÿanjé ca.

25 As Jesús tojanëjua: —Ya tcbonjáuyana y tšëngaftanga átšbeñe ndoñe ntsošbuáchiyana. Chë atše sëndama soyënga, atšbe Taitá Bëngbe Bëtsabe obenánaca, cmontsinÿanÿná nda atše bëtsemnana. 26 Pero tšëngaftanga átšbeñe ndoñe quešmatošbuaché, er tšëngaftanga atše ndoñe quešmatëstona, ntšamo chë oveshënga chë tšabe abujajëña mondbetsëstoncá. 27 Chë atše šmondústonënga, atše šmondbóyeunaye y šmondbëuasto. Atše chënga sëndëubuatma. 28 Atše chanjama, quem entšanga chë nÿetsca tescama yomna tšabe vida chamotsebomnama; chënga ndocna te pochocánënga quemochátsmëna, y ndocná quenátobena átšbentšana chënga jefcana. 29 Atšbe Taitá Bëngbe Bëtsá, chë entšanga atše chašmuastama tojamá, nÿetscangbiamá más bëtsá endmëna, chíyeca ndocná quenátobena chábentšana chënga jefcana. 30 Chë Taitá y atše canÿa fsëndmëna ca —Jesús tojánayana.

31 Chora, chë judiënga cachiñe ndëtšbënga tmojanájaca Jesús jtsatëchënganjama. 32 Pero Jesús tojanëyana: —Atše tšëngaftangbeñe, ba bëts soyënga sënjama atšbe Taitá Bëngbe Bëtsabe obenánaca. ¿Ndëmua chentša soyama atše šmochtsatëchënganja ca?

33 Chora chë judiënga tmojanjúá: —Ni canÿe quem bëts soyëngama bënga queftsátšboše aca jtsatëchënganjama. Aca Bëngbe Bëtsabiamá ndoñe tšabá quecátichamo; mo chábioye cuafjoyenguangcá entsemna. Aca nÿe canÿe entšá condmëna, pero acna contsichamo cach aca Bëngbe Bëtsá comna ca; chíyeca bënga fsëntseboše ndëtšbéngaca aca jtsatëchënganjama ca —chënga tmojanianyana.

34 Chora Jesús tojanëyana: —Bëngbe Bëtsabe uabemana palabrenguiñe mëntšá endayana: “Atše sënjayana tšëngaftanga diosënga šmomna ca.” 35 Bëngbe Bëtsá chca tojánayana chë chabe palábraca y cha chamotseservénama tojánamandangbiamá; ndocná quenátobena jinÿanÿiyana ni mo canÿe soye Bëngbe Bëtsabe uabemana palabrenguiñe, ndoñe ndegombre soye yomnama. 36 Y atšbiamá, Bëngbe Bëtsabiácá uabuayaná y quem luare ichmoná, ¿ntšamo tšëngaftanga šmojtšobena jayanama, “aca Bëngbe Bëtsabiamá ndoñe tšabá quecátichamo ca”, chë Bëngbe Bëtsabe Uaquiñá sëndmëna ca atše tijayanama? 37 Ntsamo atšbe Taitá endamcá atše ndoñe sëntsamëse, tšëngaftanga átšbeñe ndoñe šmattsošbuáchiye. 38 Pero, ntšamo atšbe Taitá endamcá atše aíñe stsamëse, masque ndoñe átšbeñe šmontsošbuaché, nÿe chë Taitabe obenánaca soyënga tijamama

šmochtsošbuáchiye. As, canye ora chašmotsetátšëmbo y chacmësertá, chë Taitá átsbeñe yomnama y atše chábeñe tsmënama ca —Jesús tojanëyana.

<sup>39</sup> Chora chënga cachiñe tmojánbošena Jesús jishachama, pero cha chëngbentsana tojanotsbocá.

<sup>40</sup> Chentsana, Jesús Jordán béjaye chenguana tojesaná y choca tojtsanoquedañe. Chentše Juan tempo entšanga yojanëbáyana. <sup>41</sup> Ba entšanga tmojána Jesús jinýama, y mëntšá imojtsichamo: “Ndegombre, masque Juan ni mo canye bëts soye Bëngbe Bëtsabe obenánaca tonjëftsema, lempe ntšamo quem boyabásabiama tonjanoyebuambacá, ndegombre yojamna ca.” <sup>42</sup> Y chentše, ba entšanga Jesúsbeñe imojtsanošbuaché.

## 11

### *Lázaro tojanóbana*

<sup>1</sup> Inamna canye boyabása šocá, Lázaro ca uabainá. Cha inoyena canye pueblo Betania ca uabáinentše, Marta y Maríaftaca, chabe uabénata. <sup>2</sup> Quem María inamna nda Bëngbe Utabná Jesusbe shecuatšiñe botamana uanguëtsiye tbojanáshecbuešcja, y chabe stjënashaca tbojtanshechojó cha. <sup>3</sup> Chë uta uabénatna ínýenga tmojanichamó Jesús jauenayama: —Bëngbe Utabná, chë aca condbobonshaná šocá entsemna ca.

<sup>4</sup> Jesús chca tojanuena ora, tojánayana: —Quem šocana ndoñe quenátsmëna Lázaro chaóbanama. Pero aíñe entsemna Bëngbe Bëtsabe obenana entšanga jinýanýiyama, y Bëngbe Bëtsabe Uaquiñá chamuatschuama ca.

<sup>5</sup> Jesús corente yojánababuanýeshana Marta, María y chatbe uaftše Lázaro. <sup>6</sup> Masque chcasna, Lázaro šocá yojtsemna ca Jesús tmojanianyana ora, cabá uta te más cha yojétsemna luarentše tojtsanoquedañe. <sup>7</sup> Chentsana, chabe uatsjëndayënga tojanëyana: —Judeoye cachiñe cuajna ca.

<sup>8</sup> As chë uatsjëndayënga tmojanianyana: —Buatëmbayá, baseftayté entsemna chë luaroca judiënga cmonjanbuachetá ndëtsbéngaca jtsóbama; y mora, ¿cabá choye jtésama cojtseboše ca?

<sup>9-10</sup> Chora Jesús tojanëyana: —Bnëtsana uta hora bnëtë endmëna. Nda bnëtë tojt-sana, ndoñe ntjojéstjiana, binýniñe bëtsemnayeca. Cachcá átšeftaca endmëna, tondaye quenátopodena átšeftaca jopásana, atše jóbanama cabá ndoñe tonjobuache ora. Pero íbeta tojtsanëse, cha jtsojéstjiana, ndoñe binýniñe causa. Cachcá, bënga šontsamna yojtsësháchenëntscuana jatrabájana. Atšbe jóbanama tempo chaojóshjango ora, ya ndoñe queochátëshachena jatrabájama ca —tojánayana.

<sup>11</sup> Chentsana tojanëyana: —Bëngbe amigo Lázaro tojtsomaná, pero atše choye chanjá jetsefšenama ca.

<sup>12</sup> Chora chë uatsjëndayënga tmojanjuá: —Bëngbe Utabná, tojtsomanase yojtsayana chana tšabá yochtsatsmëna ca.

<sup>13</sup> Pero Jesús yojtsanëtsëtsná ndayá Lázaro tojtsanóbana ca, y chabe uatsjëndayëngna imojtsejuabnaye Lázaro ndegombre yojtsomáñama. <sup>14</sup> As Jesús tšabá tojanëyana: —Lázaro tontsóbana. <sup>15</sup> Atše sëntsoyejuá choca atše ndoñe tsmënama, tšëngaftangbe tšabiama chaotsemnama; chca, tšëngaftanga más átšbeñe chašmotsošbuáchema. Pero cuajna cha jinýama ca.

<sup>16</sup> Chora Tomás, chë Gemelo ca uabobainá, chë inye uatsjëndayënga tojanëyana: “Bëgnaca cuajna, cháftaca mochjóbana ca.”

### *Jesús iuama entšanga chámuatayenama y chë nyetsca tescama yomna tšabe vida chamotsebonnama*

<sup>17</sup> Jesús chë béconana tojánashjango ora, tojántatšëmbona Lázaro ya canta te uatbontsána yojtsemnama. <sup>18</sup> Betania pueblo yojamna Jerusalén béconana, mo unga kilómetroca. <sup>19</sup> Ba judiënga tmojána Marta y María jautsëtsayama y jatjëmbambayama ndoñe tša



ngménaca chabondëtsemnama, chatbe uaftše tojanóbana causa. <sup>20</sup> Jesús yojtsashjajua-nama Marta tojántatsëmbona ora, tojánbocna cha jajébenguama, pero María cach yebnentše tojanoquedá.

<sup>21</sup> Chora Marta Jesúsbioye tbojaniyana: —Bëngbe Utabná, aca muentše macmënëse, atšbe uaftše ndoñe matënjóbana. <sup>22</sup> Pero atše sëntsetatsëmbo, masque ndayánaca mora Bëngbe Bëtsá chacojotjañe, y cha lempe chca cmochjátsetaye ca.

<sup>23</sup> Y Jesús tbojanjuá: —Acbe uaftše echántayena ca.

<sup>24</sup> Chora Marta tbojaniyana: —Aíñe, atše sëndétatsëmbo cha yochtayenama, pero quem luare jopochócama te, nÿetsca obanënga mochtayena ora ca.

<sup>25</sup> As Jesús tbojaniyana: —Atše sëndmëna chë entsanga chámuatayenama y chë nÿetsca tescama yomna tšabe vida chamotsebomnama endamá. Nda átšbeñe tojtsošbuaché, masque chaóbana, echántayena. <sup>26</sup> Y nda cabá ainá totsomñe y átšbeñe tojtsošbuaché, ndocna te queochatóbana. ¿Chë cbontsatsá soyiñe quecojtsošbuaché ca? —Jesús tbojan-tjá.

<sup>27</sup> Chora Marta tbojaniyana: —Aíñe, Bëngbe Utabná, atše áceñe sëntsošbuaché, aca chë Cristo, chë Bëngbe Bëtsabe Uaquiñá y chë quem luaroye jabamá comnama ca.

### *Jesús, Lázaro yojtsátbontsana cuevëshentše yojenóbošachna*

<sup>28</sup> Chca tojánayanentšana, Marta tojtaná chabe quenata María jachembuama, y iytëcana tbojaniyana: “Buatëmbayá tonjášhango y entseboše aca jinÿama ca.”

<sup>29</sup> María chca tojanuena y cachora tojëftsanbocna y tojána Jesús jinÿama. <sup>30</sup> Jesús cabá ndoñe chë pueblöye tonjánamashëngo; yojëtsemna Marta tbojanjébengo luarentše. <sup>31</sup> Chë yebnentše imojtsemna judiënga, María tša ngménaca ndoñe chaondëtsemnama tjëmbambnayënga, tmojánbocana María juastama; er chë tojëftsantsbaná y tojëftsanbocna ora, chë judiënga imojtsejuabnaye, Lázaro yojtsátbontsana luaroye María yojtsaye, choca jošachnama ca.

<sup>32</sup> Jesús yojtsemnentše María tojánashjango ora, chábentše tojanoshamentšé y tbojaniyana: —Bëngbe Utabná, aca muentše macmënëse, atšbe uaftše ndoñe matënjóbana ca.

<sup>33</sup> María y cháftaca tmojánashjajna judiënga, nÿetscanga imojetsenóbošachiye; y Jesús chca tojáninÿe ora, corente tbojancochtsetšena y puerte ngménaca yojtsemna. <sup>34</sup> Chora Jesús tojanatjá: —¿Ndayentše cha šmojuatbontsá cá?

Y chënga tmojanjuá: —Bëngbe Utabná, mabo y cochjinÿe ca.

<sup>35</sup> Chora Jesús tojánenobošachna. <sup>36</sup> As chë judiënga tmojánayana: —¡Minÿënga, tša ibnabobonshana ca!

<sup>37</sup> Pero inÿe judiënga imojtsichamo: —Chë jtaná chabuabínÿnama tojamá, ¿tondaye tonjobená jamama, Lázaro ndoñe chaondóbanama ca?

### *Lázaro tojtanayena*

<sup>38</sup> Jesús, cachiñe puerte cochtsetšenaná, chë uatbontsánöye tojanobeconá. Chë luarna cuevëshe inamna, y amashjuanentše canÿe bëts ndëtšbeca yojtsatámena. <sup>39</sup> Chora Jesús tojanëyana: —Chë ndëtšbé mojuánanga ca.

Chora Marta, chë obanabe uabena tbojaniyana: —Bëngbe Utabná, mora ya bacá yojtsonguëtšé, er ya canta te entsemna cha tontsóbana ca.

<sup>40</sup> Y Jesús tbojanjuá: —Ndegombre, ya tbonjauyana, aíñe átšbeñe tcojtsošbuáchese, cochjinÿe Bëngbe Bëtsá puerte obená y bëtsá bëtsemnama ca.

<sup>41</sup> Chora chë ndëtšbé tmojanjuaná; Jesús celoye yojontješiye y Bëngbe Bëtsábioye tbojaniyana: “Taita, cbatschuá atšbe opresido tcojouenama. <sup>42</sup> Atše sëndétatsëmbo aca sempre šcondbétseyeunanama; atše chca tbonjauyana, muentše montsemna entsangbe tšabiama, chca, aca atše šcojichmoma, chënga chamotsošbuáchema ca.”

<sup>43</sup> Chca tojánayanentšana, jabuache tojánayana: “¡Lázaro, chentšana matsbocna ca!”

<sup>44</sup> Y cachora chë obaná tojtanbocna, cucuatšënga y shecuatšënga entsëjuaca batsëcná, y chabe jubiá base entsëjuaca uamochëcjuaná. As Jesús tojanëyana: “Motsejafjoná y jama chaotsobena ca.”

*Chë judiëngbe amëndayënga tmojanenoyeuná Jesúsbiöye jóbama*  
(Mt 26.1-5; Mc 14.1-2; Lc 22.1-2)

<sup>45</sup> Chë soyëngama, banga chë judiënguentsana, María jatjëmbambayama tmojánanga, y ntšamo Jesús tojanmcá tmojáninÿënga, Jesúsbeñe imojtsošbuaché. <sup>46</sup> Pero inÿe judiënga fariseúngbiöye tmojána, ntšamo Jesús tojanmama chënga jacúntama. <sup>47</sup> As, chë fariseunga y chë bachnangbe amëndayënga tmojánenefjna inÿe judiëngbe amëndayëngaftaca, y tmojánayana: —¿Ndayá mochjobenaye cháftaca jamama? Quem boyabása bëts soyënga entsama. <sup>48</sup> Nÿe cachcá chamojonÿase, nÿetsca entsanga chábeñe mochantsošbuáchiye; chë romanëngbe amëndayënga mochanjabo y lempe mochantsepochoáca, Bëngbe Bëtsabe bëts yebna y bëngbe luare Israel ca —chënga imojtsichamo.

<sup>49</sup> Pero canÿa chënguentsá, Caifás ca uabainá, chë uata chë bachnangbe más uámana amëndayá inamná, tojanëyana: —Tšëngaftanga tondaye quešmátstatsëmbo. <sup>50</sup> Y ndoñe quešmatsjuabná, tšëngaftangbiana más tšabá yojtsemna nÿe canÿe boyabása Israeloca entsangbiana chaóbana, y ndoñe nÿets bëngbe luare chamotsepochoáca ca —cha tojanëyana.

<sup>51</sup> Pero Caifás chë soye nÿe cachabe juábnaca ndoñe chca tonjánayana. Cha, chë uata chë bachnangbe más uámana amëndayá inámnayeca, Bëngbe Bëtsabe Espíritbe obenánaca tojánayana Jesús ibojamna Israeloca entsangbiana jóbana ca. <sup>52</sup> Y ndoñe nÿe Israeloca entsangbiana, sinó chë inÿe luarënguiñe Bëngbe Bëtsabe básenga tmojanáshanënga chamuatábama, as chca, nÿetscanga nÿe canÿe luarentša entsanga chamotsemnama. <sup>53</sup> Chcasna, cach tescana judiëngbe amëndayënga tmojanenoyeuná Jesús jóbama.

<sup>54</sup> Chíyeca Jesús entsángbeñe, Judea luariñe ya ndoñe yontsana. Chë luarentšana tojëftsanbocna y canÿe luaroye tojtsanoñe, entsanga ndoyeniñe béconana, canÿe pueblo Efraín ca uabáinoye. Y chentše chabe uatsjëndayëngaftaca tojtsanoquedañe.

<sup>55</sup> Judiëngbe Bashco fiestama batšá yojtsájamna, y ba entsanga pueblënguentsana Jerusalemoye imojtsajna, soyënga choca jamama ntšamo tempo inamncá, chca, Bëngbe Bëtsabe bominÿama tšábenga jtsemnama, chë Bashco fiesta cabá ndobuache ora. <sup>56</sup> Chocna, judiënga Jesús imojtsenguaye, y Bëngbe Bëtsabe bëts yebnentše imojtsentjanaye: “¿Ntšamo šmojtsejuabná, cha tayochjabo o ndoñe quem fiestama ca?”

<sup>57</sup> Chë fariseunga y chë bachnangbe amëndayënga tmojanmandá, nderado nda Jesús ndayentše tojtsemnama tojtsetatsëmbësna, chaobuambá ca, as Jesús jishachama.

## 12

*María, botamana uanguëtsiye Jesúsbeñe tbojanáshecbuešcja*  
(Mt 26.6-13; Mc 14.3-9)

<sup>1</sup> Chnënguana te chë Bashco fiestama yojtsájamna ora, Jesús Betania puebloye tojtaná. Lázaro, chë Jesús tbojtanayená cha, choca inoyena. <sup>2</sup> Chentšna bëts saná Jesusbiana tmojanábua. Marta tojanëjuatšé, y Lázaro yojtsemna chë Jesúsëftaca juasama mesëshañe imojtsetbiámanënguentsë. <sup>3</sup> As María canÿe jarrëtema tojanaca; chiñe yojanaftsuamna canÿe botamana uanguëtsiye, bëtská uámaniye, ena nárdoca pormániye. Chë uanguëtsiye, María, Jesusbe shecuatšënguiñe tbojanáshecbuešcja, y cachabe stjënashaca tojtsanshechojó. Chora, chë yebnentše ena nardiyana yojtsonguëtsiye.

<sup>4</sup> Chora, canÿa Jesusbe uatsjëndayënguentsá, Judas Iscariote, chë Jesús uayayëngbe cucuatšëñe yochjanayentšbashejuaná, tojánayana: <sup>5</sup> —Quem botamana uanguëtsiye unga patse denario crocénana enduámana. ¿Ndayeca ndoñe šmonjuiye y ndbomnjëmënga chë crocénana mašmëntsatsatá ca?

<sup>6</sup> Pero Judas chca tojánayana, chë ndbomnëjémengbeñe ntsejuabnaycá, sinó cha atbëbaná inamna causa. Judas chëngbe crocénana shecnësiñe yojánatbëna, y ba soye, chë shecnësoye imojanatsuáma crocénánentsana cha yojánatbëbana.

<sup>7</sup> As Jesús tbojanjuá: —Cachcá monyá. María mentscoñe chë botamana uanguëtsiye iuabofjájona, cha jobenayama átsbeñe jabuëscjama, er ndoñe bën y atše šmochanjaitëme. <sup>8</sup> Chë ndbomnëjémengna tsëngaftangbeñe sempre mochanjesomñe, pero atše ndoñe ca —tojánayana.

### *Judiënga tmojanenoyeuná Lázaro jóbama*

<sup>9</sup> Ba judiënga tmojántatsëmbona Jesús Betanioca yojtsemnama, y choye tmojána, ndoñe nye Jesús jinýama, sinó Lázarnaca, chë Jesús tbojtanayená cha. <sup>10</sup> As chë bachnangbe amëndayënga tmojanenoyeuná Lázarnaca jóbama. <sup>11</sup> Chabe causa, ba judiënga chëngbioye cachcá tmojesanënyä y Jesúsbeñe imojtsošbuaché.

### *Jesús Jerusalenoye tojánashjango*

*(Mt 21.1-11; Mc 11.1-11; Lc 19.28-40)*

<sup>12</sup> Chë yëfsana, mallajta entsanga, Jerusalenoca fiestama tmojánashjajnënga, tmojántatsëmbona Jesús choye yochjánashjanguama. <sup>13</sup> As chëngna palma betiye buacuafjënga tmojanatëtsetše, y Jesús jajëbenguama tmojánbocana, y mentsá imojtsáyebuache: “¡Bëngbe Bëtsá matschuanga! ¡Corente bendición bomná chë Bëngbe Utabnabe obenánaca tojabá! ¡Corente bendición bomná chë Israeloquëngbe Rey ca!”

<sup>14</sup> Jesús canye burrotema tbojáninýena y chábeñe tojanenoyayé. Ntšamo Bëngbe Bëtsabe uabemana palabrenguiñe iuayancá, cachcá tojanopasá. Chiñe mentsá endayana Jerusalenoca entsangbiama:

<sup>15</sup> Sión bëts pueblaca oyenënga, ndoñe matauatjëngana.

Minyënga, tsëngaftangbe Rey burrotëmiñe enjaquená entsabó ca.

<sup>16</sup> Chca orna, Jesusbe uatsjëndayënga chë soyëngama ndoñe tonjanësertá; pero chentšana, Jesús corente bëtsá yomnama Bëngbe Bëtsá tojaninýanyé ora, chë uatsjëndayënga chama tmojanenoyuabó, lempe ntšamo Bëngbe Bëtsabe uabemana palabrenguiñe iuayancá y cachcá Jesúseftaca tojanopasama.

<sup>17</sup> Chë Jesúseftaca imojtsemna entsanga, Lázarbioye uatbontsánoye tbojanchembo ora y chentšana tbojtanayená ora, ntšamo tmojáninýama chora imojtsecuëntaye. <sup>18</sup> Chíyeca, ba entsanga tmojánbocana Jesús jajëbenguama, chë bëts soye Bëngbe Bëtsabe obenánaca cha tojanmama tmojanuénayeca. <sup>19</sup> Pero chë fariseunga imojtsenatsëtsnaye: “Tsëngaftanga šmontsonyá bënga tondaye jamama quemuátobenama y más, ¡nyëtscanga cha montsëstona ca!”

### *Básefta Grecia luaroca entsanga Jesús tmojánanguango*

<sup>20</sup> Bashco fiestama, chë Bëngbe Bëtsá jadórama Jerusalenoye tmojánangbeñe, básefta griego entsángnaca imojtsemna. <sup>21</sup> Chëngna, Felipe chë Galilea luarocá, chë Betsaida pueblocabioye, tmojanobeconá y tmojanimpadá: “Señor, bënga fsëntseboše Jesús jinýama ca.”

<sup>22</sup> Chora Felipe tojána Andrés jauyanama, y chë útatna Jesúsbioye tbojána, chë grieguëngbiama jauenayama. <sup>23</sup> Jesús chata tojanëyana: “Chë Bëngbe Bëtsá Entsá tbojanbemá corente bëtsá yomnama jinýanýiyama te ya tocjobuache. <sup>24</sup> Ndegombre šcuayana: Canye trigo jénaye ndoñe fshantsiñe tmonjuatbontsá y ndoñe tonjóbanëse, nye cach canye trigo jénaye jesomñana. Pero tmojuatbontsá y tojóbanase, bëtsá jashájonana. <sup>25</sup> Cachcá, nda nye cachá tojtsenóbobonshana, cha chabe vida echanjëftsobuetše. Pero nda nye cachá ndoñe tontsenóbobonshana y ntšamo atše stsemadacá, quem luariñe vida tojtsebomnëntscuana cha tojtsamëse, chë nyëtsca tescama yomna tsabe vida echántsebomna. <sup>26</sup> Nda ntšamo stsemadacá jamama tojtseboše, atše chašotsëstona. Chca, ndayentše atše chaitsemna, chánaca, chë atše oservená, chentše chaotsemna. Atše

šojtseservénabiama, atšbe Taitá Bëngbe Bëtsá echanjínjányiye bëtsá yomnama ca” —Jesús tojánayana.

*Jesús tojánayana cha yochjanóbanama*

<sup>27</sup> Y más Jesús tojánayana: “¡Mora tša cochtsetšenaná sëntsemna! ¿Atše chjayana: ‘Taita, chë átšeftaca echanjopása soyënga šmotsebojuaná ca?’ Ndoñe; er más chama atše quem luaroye tijabo. <sup>28</sup> Taita, šminjányé aca puerte bëtsá y obená comnama ca.”

Y cachora, celocana canye oyebuambnayana tojanóbocna mëntšá: “Ya tcbonjinjányé atše puerte bëtsá y obená tsmënama, y mora cachiñe cachcá chanjama ca.”

<sup>29</sup> Entšanga chca tmojanuena ora, ínÿenga imojtsichamo nÿe tojanjuésase ca; pero ínÿengna imojtsichamo: —Canye ángel chábioye tbonjuatsëtsá ca.

<sup>30</sup> Chora Jesús tojanëyana: —Ntsamo šmonjouencá, atšbiana ndoñe quenátsmëna, sinó tšëngaftangbiana. <sup>31</sup> Mora chë tempo entsemna, chë quem luare entšanga tmojëftsema bacna soyënga jinjányiyama y chëngbe castiguama jayanama. Y mora, chë nÿetsca bacna soyënga mandayá, quem luarentšana mochántábocna. <sup>32</sup> Pero atše fshant socana atsbananá chaitsemna ora, nÿetsca entšanga átšbioye chanjúbuaja ca — Jesús tojánayana.

<sup>33</sup> Chca cha yojsichamo, ana jinjányiyama ntšamo jóbanama ibojamnama. <sup>34</sup> Chora chë entšanga tmojanjuá: —Bëngbe Bëtsabe uabemana palabreñguñe endayana, y chíyeca bënga fsëndétatsëmbo chë Cristo nÿetsca tescama vida yochtsebomna ca. As, ¿ndáyeca cojtsichamo, Bëngbe Bëtsá Entšá tbojanbemá chamuatsbanama yojtsemna ca? ¿Nda yojtsemna Bëngbe Bëtsá Entšá tbojanbemá ca? —chënga imojtsichamo.

<sup>35</sup> Y Jesús tojanëyana: —Nÿe baseftatescama chë entšangbe juabnënga binÿnayá tšëngaftangbeñe entsemna. Chë binÿnayá cabá tšëngaftangbeñe yojtsemnëntscuana, cháftaca šmochtsajna. Chca, mo ibetiñcá ndoñe quešmochátajna. Nda ndoñe binÿniñe tojtsana, cha ndoñe ntsetatsëmbuana ndëmuajana yojtsana. <sup>36</sup> Chë binÿnayá cabá tšëngaftangftaca endétsemnëntscuana, chábeñe šmochtsošbuáchiye; as, tšëngaftangbe juabnënga binÿniñe echántsemna ca —Jesús tojánayana.

Chë soyënga tojánayanentšana, Jesús tojtsanoñe y entšangbiana yojetsóitana.

*Ndáyeca chë judiënga Jesúsbeñe ndoñe montsanošbuaché*

<sup>37</sup> Masque Jesús, judiëngbe delante ba bëts soyënga Bëngbe Bëtsabe obenánaca tojëftsema, chënga ndoñe chábeñe ntsošbuáchiyana, <sup>38</sup> ntšamo Bëngbe Bëtsabe juabna oyebuambnayá Isaías tojanabemcá, cachcá chaotsemnama. Isaías mëntšá tojánayana:

Bëngbe Utabná, ¿nda bëngbe buayenana soyiñe yojtsošbuaché?

Y ¿nda tbojosertá, acbe obenana tcojinjinyé ora ca?

<sup>39</sup> Chíyeca chënga ndoñe montsobena Jesúsbeñe jtsošbuáchiyama, er Isaías mëntšánaca tojëftsanabema:

<sup>40</sup> Bëngbe Bëtsá tojama chënga chabe soyëngama ndoñe botamana chamondëtsejuabnama y chabe soyënga ainaniñe ndoñe chamondóyëngacñama,

as ndoñe chaondëtsësertánama ca.

Y Bëngbe Bëtsá entsichamo: “Chca entsemna, chënga atšbe benache ndoñe chamondishachama,

y atše ndoñe ntjätsebacama;

y chca, chënga mochántsemna mo ndëshnana entšangcá ca.”

<sup>41</sup> Isaías chca tojánayana, er tojáninÿe Jesús puerte bëtsá y obená yojamnama, y chca chë uabemaniñe Jesusbiana yojanoyebuambná.

<sup>42</sup> Pero masque chca iuábemanëse, ba judiënga imojtsanošbuaché, y banga judiëngbe amëndayëgnaca Jesúsbeñe imojtsanošbuaché. Pero chëngna, Jesúsbeñe imojtsošbuáchema entšangbeñe ndoñe montsichamo. Chca imojánama chë fariseungbiana auatja causa, chë judiëngbe enefjuana yebnënguentšana ndoñe



chamondëtëbuacnama. <sup>43</sup> Chëngbiana más yojanámana, entsanga chëngbiana chamotsichamo tša uámanënga imojamna ca, y ndoñe, Bëngbe Bëtsá chca chaotsamama.

*Jesusbe palabréngaca yochtsótatsëmbo entsanga tšabá o ndoñe tšabá tmonjamama*

<sup>44</sup> Chora Jesús mëntsá jabuache tojánayana: “Nda átšbeñe tojtsošbuaché, ndoñe nýe átšbeñe ntsošbuáchiyana; chë nda šojichmó chábeñnaca cha jtsošbuáchiyana. <sup>45</sup> Cachca, nda atše šojtsonýá, chë šojichmó chábioynaca cha jtsonýayana. <sup>46</sup> Atše quem luaroje tijabo entsangbe juabnënga jabobínýnama, chca, nda átšbeñe tojtsošbuaché, mo ibetiñcá ndoñe chaondëtsemnama. <sup>47</sup> Pero nda atšbe soyëngama tojouena, pero ntšamo sentsichamcá ndoñe tontsama, atše chabiana ndocá quichátayana tšabá o ndoñe tšabá tonjama ca. Atše ndoñe chiyátabo, ntšamo quem luarentša entsanga tmojamama tšabá o ndoñe tšabá yontsemna ca jatichámuama; quem luaroye sënjabo ndayá chënga jabátsebacama. <sup>48</sup> Nda atše šojtsaboté y atšbe palabréngama ndoñe šonjoyeuná, ya entsebomna nda chabiana yochjayana bëts castigo jtsebomnama ibojtsemna ca. Atše tianoyebuambá palabréngaca, quem luare jopochócama te chabiana chca echántsayana. <sup>49</sup> Er atše ndoñe nýe atšbe juábñaca quetsatoyebuambná. Chë Taitá, chë šonjichmó cha, šonjamandá ntšamo jayanana y ndayá jabuátambana. <sup>50</sup> Atše sëndëtatsëmbo, atšbe Taitá tojamandá orna, cha jamándana entsanga chë nýetsca tescama yomna tšabe vida chamotsebomnama. Chíyeca, ndayá sentsichamcá, endmëna ntšamo atšbe Taitá Bëngbe Bëtsá šojamandacá ca” —Jesús tojánayana.

## 13

*Jesús chabe uatsjëndayënga tojanashecjabebé*

<sup>1</sup> Bashco fiesta cabá ndobuache ora, Jesús yojtsetátšëmbo chabe tempo tojanóshjanguama, quem luarentšana jëftsebocnama y chabe Taitábioye jtama. Ntšamo Jesús chábinga yojanababuanýeshancá, chë quem luare imojamnënga, chórñaca yojtseboše chë bëts bonshánana puerte más jinýanýiyana.

<sup>2</sup> Pero Satanás, Júdasbe ainaniñe bacna juabnënga tojanjajó, uayayëngbe cucuatšinë Jesús jayentšbáshejuanama. Judas Iscariote, Simonbe uaqiñá. <sup>3</sup> Jesús yojtsetátšëmbo chabe Taitá Bëngbe Bëtsá nýets obenana tbojánatšetama. Cachcá, Jesús yojtsetátšëmbo, Bëngbe Bëtsábiocana cha tojánabama y cachábioye jtama ibojtsemnama. <sup>4</sup> Chcasna, chë ibeta jasama tmojanpochocá ora, mesëshentsana tojantsbaná, chabe juatsboye uichëtjoníya tojanenátsejca y canýe tualléjua tojanenasná. <sup>5</sup> Chentšana, canýe bachešinë búyeshe tojanbuešcja y tojanontsé chabe uatsjëndayënga jushecjabebiyana y jtšhechojuana cha yojtsasnana tualléjuaca.

<sup>6</sup> Pero, Simón Pedro tbojanobuache ora, Jesúsbioye tbojaniyana: —Atšbe Utabná, ¿aca šcochjuashecjabiá ca?

<sup>7</sup> Chora Jesús tbojanjuá: —Atše sentsama soye mora ndoñe quecmátësertana; pero más hcoye aíñe cmochanjosérta ca.

<sup>8</sup> As Pedro tbojaniyana: —¡Ndocna te šcatjuashecjabiá ca!

Pero Jesús tbojaniyana: —Ndoñe chacbonjuáshecjabese, atšbia ndoñe quecochátsmëna ca.

<sup>9</sup> Y Simón Pedro tbojaniyana: —¡Atšbe Utabná, as nýe atšbe shecuatšënga ndoñe, ndayá atšbe cucuatšënga y bestšášnaca ca!

<sup>10</sup> Pero Jesús tbojanjuá: —Nda bebená tojtsemna, nýe shecuatše jtsashecjabiana jtsajabótana, ndoñe nýetšá cachiñe. Nda tojtsobebé, ndoñe tsengá ntsemnana. Cachcá, mo bebëñënga cuenta tšëngaftanga šmontsemna; pero canýa muentše entsemna, y cha mo bebenacá ndoñe quenátsmëna.

<sup>11</sup> Jesús yojtsetátšëmbo nda chë uayayëngbe cucuatšinë boshjuaná yochtsanmënama, chíyeca tojánayana: “Tšëngaftanguentsá canýa entsemna, cha mo bebenacá ndoñe quenátsmëna ca”.

<sup>12</sup> Jushecjabebiyama tojanpochocá ora, chabe juatsboye uichëtjoníya tojtaníchëtjo, y mesëshentše tojtanótbema. Chora tojanéyana: —¿Chë tcbonjábíama soyama quecmo-jtsésertana ca? <sup>13</sup> Tšëngaftanga atše šmondbauyana Buatëmbayá y Bëngbe Utabná ca; tšabá chca šmontsichamo, er atše ndegombre chca sëndmëna. <sup>14</sup> Atše, tšëngaftangbe Buatëmbayá y Utabná, tcbonjushecjabebé; chcasna, tšëngaftángnaca cmontsamna jenáshecjabebiyana. <sup>15</sup> Ntšamo quem sóyeca tcbonjanýanýecá, tšëngaftanga cachcá šmochtsama. <sup>16</sup> Ndegombre šcuayana, chë oservená chabe nduiñbíama ndoñe más uamaná ntsemnana. Cachcá, chë ichmoná chë tbojichmobíama ndoñe más uamaná quenátsmëna. <sup>17</sup> Quem soyënga chašmojuatsjinýe y chca chašmojamëse, tšëngaftanga puerte oyejuayënga vida šmochanjëftsebmna.

<sup>18</sup> “Atše sëndëtatsëmbo chë tijábacangbíama, chíyeca atše nyetscangbíama ndoñe chca quetsatoyebuambná. Y ntšamo Bëngbe Bëtsabe uabemana palabrengüiñe endayancá cachcá chaotsemnana, chë ‘canýa átšeftaca tandëse tonjasá, atšbe contra echántsemna ca’, cachcá echanjopása. <sup>19</sup> Mora, cabá ndoñe chca tonjopasá ora, lempe chë soyënga sentsichamo. As, chca chaojopasá ora, átšbeñe šmochantsošbuáchiye, y as šmochántsetatsëmbo atše tsmëna chë nda sëndmëná. <sup>20</sup> Ndegombre šcuayana: Nda atše tijichmóbioye tbojofja, cha atše šochanjofja; y nda atše šojofja, cha chë nda šojichmóbioye bochanjofja ca” —Jesús tojánayana.

*Jesús tojánayana uayayëngbe cucuatšíñe Judas bochjáboshjonama  
(Mt 26.20-25; Mc 14.17-21; Lc 22.21-23)*

<sup>21</sup> Chë soyënga tojánayanentsana, Jesús corente cochtsetšenaná yojtsemna, y tojánayana: —Ndegombre šcuayana, canýa tšëngaftanguentsá uayayëngbe cucuatšíñe šochanjáboshjona ca.

<sup>22</sup> Chora, chabe uatsjëndayënga tmojanontšë enonýinýayana, y ndoñe montsetátšëmbo ndabíama Jesús chca tojánayanama. <sup>23</sup> Canýe uatsjendayá, chë Jesús puerte ibnabobonshaná, Jesusbe juachaca inatbemana. <sup>24</sup> As, Simón Pedro chábioye tbojánëfjatsëmbo, ndabíama Jesús chca tojánayanama Jesúsbioye chabotjama. <sup>25</sup> Chë puerte bonshana uatsjendayá, Jesúsbioye batšatema más tojanosjoná y tbojantjá: —Bëngbe Utabná, ¿nda cha yojtsemna ca?

<sup>26</sup> Chora Jesús tbojanjuá: —Atše canýe base tandëtema chanjafchécuacuaye y ndábioye chajoyé, cha entsemna ca.

As Jesús canýe base tandëtema tojanfchecuacuá, y Judas, Simón Iscariotbe uaqiñábíoye, tbojanoyé. <sup>27</sup> Tandëse tojanóyëngacñe y cach ora, Satanás Júdasbe ainaniñe bacna juabnënga tbojáncochëngo. As Jesús tbojaníyana: “Chë cochanjama soye, cam ora moma ca.”

<sup>28</sup> Pero ni canýa chë jasama imojtsetbiamanënguentsá tbojanësertá, ndayama Júdasbioye chca tbojaníyanama. <sup>29</sup> Judas inamna chëngbe crocénana shecnëšiñe uambayá; chíyeca ínýënga tmojanjuabó Jesús chca ibojtsatsaye, ana ndayá yojtseita soye chë fiesta chabuabíamíyama, o ndbomnëjëmënga ndayánaca chauatšatama ca.

<sup>30</sup> Júdasna chë base tandëtema tojanóyëngacñe, y cachora chentšana tojëftsanbocna. Chora ya ibeta yojtsemna.

*Chë tsëm mando*

<sup>31</sup> Judas tojëftsanbocnentsana, Jesús tojánayana: —Ora tocjobuache, Bëngbe Bëtsá Entšá tbojanbemá corente bëtsá y obená yomnama jinýanýiyama; y mua echanjínýanýiye Bëngbe Bëtsá corente bëtsá y obená yomnama. <sup>32</sup> Cha echanjínýanýiye Bëngbe Bëtsá chca yomnama, chíyeca Bëngbe Bëtsánaca echanjínýanýiye corente bëtsá y obená yomnama, y mora entsemna chë ndaye ora Bëngbe Bëtsá chca chabíama yochjínýanýiye. <sup>33</sup> Atšbe básënga, baseftatescama tšëngaftangafatacá sëntsemna. Chora šmochántsenguaye, pero

ntšamo judiënga sënjauyancá, mora cachcá tšëngaftanga cbëyana: Chë chanjá lu-  
aroye, tšëngaftanga ndoñe quešmatobena jama ca. <sup>34</sup> Canýe tsëm soye cbetsamëndá:  
Nyetscanga šmochtsenbobonshana. Ntšamo atše tšëngaftanga cbondábabuanýeshana,  
cachcá tšëngaftanga šmochtsenbobonshana. <sup>35</sup> Tšëngaftanga šmojtsenbobonshánëse,  
nyetsca entšanga mochántsetatšëmbo, tšëngaftanga atšbe uatsjëndayënga šmomnana ca –  
Jesús tojanëyana.

*Jesús tojánayana, chábioye ndoñe bonjanabuátma ca Pedro yochjánayanama*  
(Mt 26.31-35; Mc 14.27-31; Lc 22.31-34)

<sup>36</sup> Chora Simón Pedro tbonjantjá: –Bëngbe Utabná, ¿ndëmoye cochjá ca?

As Jesús tbojanjuá: –Atše sentsá luaroye, mora aca ndoñe quecátobena atše juastana,  
pero más chcoye aíñe šcochanjuasto ca.

<sup>37</sup> As Pedro tbojanayana: –Atšbe Utabná, ¿ndáyeca ndoñe sentsobena mora aca juas-  
tama? ¿Atše sëntseprontana acbiama jóbanama ca!

<sup>38</sup> Chora Jesús tbojanayana: –¿Ndegombre cojtseprontana atšbiama jóbanama? Nde-  
gombre cbëyana, cabá ngallo ndëcánta ora, aca unga soye atšbiama cochanjayana: “Cha  
ndoñe quetsatabuatma ca”.

## 14

*Jesús beyeca entšanga jobenayana Bëngbe Bëtsábioye jama*

<sup>1</sup> Mëntšánaca Jesús tojánayana: –Ndoñe ainana tsetšanënga matsmënana. Tšëngaftanga  
Bëngbe Bëtsábeñe šmondošbuaché; átšbeñnaca šmochtsošbuáchiye. <sup>2</sup> Atšbe Taitá Bëngbe  
Bëtsá endmënoca, ba luarënga joyéanama endmëna. Ndoñe chca tontsemnëse, atše  
chca matchënjáuyana. Morna, cha endmënoye atše chanjá tšëngaftangbiama canýe  
luare joyéanama jabuáprontama. <sup>3</sup> Atše chajá y chë luare chacbojabuaprontá ora,  
cachiñe moye chanjésabo, tšëngaftanga átšeftaca junatsama. As, atše chaitsemnoye,  
tšëngaftángnaca chašmotsá joyéanama. <sup>4</sup> Atše chanjá choye ntšamo jama y jashjan-  
guama ya šmontsetátšëmbo ca –Jesús tojánayana.

<sup>5</sup> Chora Tomás Jesús bioye tbojanayana: –Bëngbe Utabná, ndëmoye cochjama ndoñe  
queftsátstatšëmbo. As, ¿ntšamo bënga fchtsetátšëmbo ntšamo choye jama ca?

<sup>6</sup> Chca tbojanayana ora, Jesús tbojanjuá: –Atše sëndmëna benachcá; chëjana tcojtsase,  
pronto jashjanguana. Atše sëndmëna ntšamo ndegombre yomncá sempre oyebuamb-  
nayá, y entšanga chë nyetsca tescama yomna tsabe vida chamotsebomnana endamá.  
Nýe átšbeyeca endopodena ndayëjana jama, y atšbe Taitá Bëngbe Bëtsábioca jashjan-  
guama. <sup>7</sup> Tšëngaftanga atše šmojtsábuatmëse, atšbe Taitánaca šmattsábuatma. Morscana  
ya cha šmonsábuatma y cha šmontsonyá ca –tbojanayana.

<sup>8</sup> Pero Felipe tbojanayana: –Atšbe Utabná, nýe chë Taitá šmanýanýé, ndayama más ca.

<sup>9</sup> Chora Jesús tbojanayana: –Chëfta te tšëngaftangftaca sëntsemna, y ¿cabá ndoñe  
atše šcontsábuatma, Felipe? Nda atše šojinýe, chë Taitá Bëngbe Bëtsábioynaca jinýana.  
As, ¿ntšamo atše šcojtsatsá, chë Taitá šmanýanýé ca? <sup>10</sup> ¿Ndoñe condošbuaché,  
atšbe Taitá átšbeñe y átšnaca chábeñe nýe canýacá ftsmënana? Chë cbontsëtsësná  
soyënga, ndoñe nýe atšbe juábnaca chca quetsatoyebuambná. Atšbe Taitá, chë átšbeñe  
vida endbomná jtsamana lempe ntšamo stsamcá. <sup>11</sup> Muiñe šmochtsošbuáchiye:  
Atšbe Taitá átšbeñe endmëna, y átšnaca chábeñe mo nýe canýacá sëndmëna. Chama  
ndoñe šmontsošbuachese, as nýe chë tijama soyëngámncá átšbeñe šmochtsošbuáchiye.

<sup>12</sup> Ndegombre šcuayana, nda átšbeñe tojtsošbuaché, ntšamo atše tijamcá y cachcá cha  
echántsama. Atšbe Taitá entsemnoye atše chanjá, chiyeca, chë átšbeñe ošbuachiyá,  
chama más bëts soyënga echanjama. <sup>13</sup> Tšëngaftanga ndaye sóynaca Bëngbe Bëtsábioye  
šmojtjañe, y chca šmojama atše jótšëmbonëse, átšbeñe šmošbuachéyeca, lempe  
šmochanjóyëngacñe; chca, chë Uaquiñá echanjínýanýiye chë Taitá corente bëtsá y

obená yomnama. <sup>14</sup> Tšëngaftanga ndaye sóynaca atše šmojtjañe, y chca šmojama atše jótšëmbonëse, átšbeñe šmošbuachéyeca, atše chë soye chanjama ca —Jesús tojánayana.

*Jesús tojanašebuachená chë Uámana Espíritu jíchmuama*

<sup>15</sup> Mëntšánaca Jesús tojánayana: “Tšëngaftanga atše šmojtsebobonshánëse, ntšamo cbontsamëndacá cachcá šmochanjama. <sup>16</sup> Chca chašmojamëse, atšbe Taitá Bëngbe Bëtsá tšëngaftangbiama chanjaimpáda, tšëngaftanga jabújabuachama y jabáñemuayama inya cha chabuichmoma, chë Uajabuachaná nyetsca tescama tšëngaftangaftaca chauétsemnama. <sup>17</sup> Cha, chë Uámana Espíritu endmëna chë nyetsca soyënguiñe ntšamo ndegombre yomncá oyebuambnayá. Chë nýe quem luarama enójuabnaye entšanga, chë átšbeñe ndošbuáchiyënga ndoñe quematonýá, ni quematábuatma. Chíyeca chënga ndoñe quemátobena cha jóyëngacñana. Pero tšëngaftanga aiñe cha šmontsábuatma. Cha tšëngaftangaftaca entsemna, y tšëngaftangbe ainaniñe sempre echanjëftsiyena.

<sup>18</sup> “Atše ndoñe quechocháisabashejuana, mo uajchonga cuenta chašmotsemnama. Tšëngaftangbiyoe chanjésabo. <sup>19</sup> Muentšana baseftaytese, chë nýe quem luarama enójuabnaye entšanga ndoñe más quešmochátönyaye; pero tšëngaftangna aiñe, atše cachiñe šmochántinýe. Atše ainá chántsemna, chíyeca tšëngaftanga átšeftaca tšabe vida šmochántsebmoma. <sup>20</sup> Chë Uámana Espíritu tšëngaftangbe ainaniñe chašmojóyëngacñe ora, tšëngaftanga šmochántsetatšëmbo, atše atšbe Taitábeñe nýe canýacá tsmënama; cachcá, tšëngaftanga šmochántsetatšëmbo, tšëngaftanga átšeftaca cachcá nýe canýacá šmomnama y átšnaca tšëngaftangaftaca. <sup>21</sup> Nda totátšëmbo ntšamo atše tijamandacá y sempre chca tojtsama, cha ndegombre šojtsebobonshana. Nda átšbioyoe šojtsebobonshana, chábioyoe atšbe Taitánaca bochantsebobonshana. Atšnaca cha chántsebobonshana, y nda atše tsmënama cha chanjinýinýiye ca” —Jesús tojánayana.

<sup>22</sup> Chora, inýe Judas, ndoñe Judas chë Iscariote, Jesúsbioyoe tbojanianyana: —Bëngbe Utabná, ¿ntšamo chca yojtsemna, nýe bënga šcochjínýanýiye ntšamo cach aca comnama, y nyetsca quem luarentšëngbiyoe ndoñe ca?

<sup>23</sup> Chora Jesús tbojanjúá: —Nda atše šojtsebobonshana, ntšamo atše sëntsoyebuambnacá echanjama. Atšbe Taitánaca chábioyoe bochantsebobonshana, y bëndata chábioyoe fchanjabo y chábeñe vida fchantsebmoma. <sup>24</sup> Nda ndoñe šontsebobonshana, ndoñe queochátama ntšamo sëntsoyebuambnacá. Ntšamo sëntsoyebuambnacá ndoñe nýe atšbe juábnaca quenátsmëna, sinó chë Taitá, chë šonjichmó chabe juábnaca.

<sup>25</sup> “Atše cabá tšëngaftangaftaca sëntsemnëntscuana, lempe quem soyëngama sëntsoyebuambná. <sup>26</sup> Chë Uajabuachaná, chë Uámana Espíritu, atšbe impadanánaca atšbe Taitá bochanjíchmuama. Cha lempe cmochántsabuatambaye, y echanjama nyetsca chë tcbonjúuyana soyëngama chašmuatenójuaboma.

<sup>27</sup> “Chë atšbe ainaniñe puerte tšabe ebionana tšëngaftangbiama šcuétseboshjona, cbetsatšatá. Chë nýe quem luarama enójuabnaye entšanga cmondbétsatšatnaye soyëngcá ndoñe quenátsmëna, chë atše cbontsatšatná ainaniñe puerte tšabe ebionana. Ainana tsetšanënga ndoñe matsmënana, ni matauatjëngana. <sup>28</sup> Ya šmonjouena ntšamo tcbonjauyancá: ‘chanjá y tšëngaftangbiyoe chanjésabo’. Tšëngaftanga atše šmojtsebobonshánëse, šmattsóyejuaye atše chë Taitábioyoe jama šojtsemnama, er chë Taitá atšbiama más bëtsá endmëna. <sup>29</sup> Quem soyënga tcbonjúuyana, cabá ndoñe chca tonjopasá ora; as, chca chaojopasá ora, chiñe jenójuaboyëse átšbeñe chašmotsošbuáchema.

<sup>30</sup> “Chë quem luarentša bacna soyënga mandayá endabó; chíyeca atše ya ndoñe bëtscá tšëngaftangaftaca quichaisóyebuambaye. Pero cha tondaye quenátobena atše jabórlana.

<sup>31</sup> Masque cha chca endmëna, chca entsemna, atše chë Taitábioyoe tsbobonshánama quem luarentša entšanga chamotsetatšëmbuama. Ntšamo atšbe Taitá šojamandacá, atše cachcá tsámama chamotsetatšëmbuama.

“Motsbananga. Muentšana cuajna ca” —Jesús tojanéyana.



## 15

*Jesús yomna mo chë tšabe uvas betiyá*

<sup>1</sup> Měntšánaca Jesús tojánayana: “Atše sěndmēna mo chë tšabe uvas betiyá, y atšbe Taitá Běngbe Bětsá chë tšabe uvas betiye inyenacá. <sup>2</sup> Chë injená, chë uvas betiyentša buacuafjēnga nděshajuaněfjēnga jtsebuácuētětsetsana; pero chë uvas betiyentša buacuafjēnga shajuaněfjēnga jtsobolímpiana, bětsá chaotseshájuanama. Nda ndoñe tontsama ntšamo Běngbe Bětsá tojtsebošcá, jtsemnana mo chë nděshajuana buacuafjēngcá; y chë causa, chë Taitá chábioye corente bochantsecastíga. <sup>3</sup> Tšěngaftanga šmonjouena ntšamo tijayancá; bětsá chca šmontsama. Chíyeca mora tšěngaftanga šmontsemna mo chë límpiana y shajuana buacuafjēngcá. <sup>4</sup> Atšeftaca cányiñe mo canyáca šmochtsemna y atše tšěngaftangafácnaca. Chë buacuafja uvas betiyentšana juanáněfja ndoñe ntsohenana nye cachabe ponto jashájonana. Cachcá, tšěngaftanga átšeftaca ndoñe cányiñe mo canyáca šmontsemnēse, ndoñe šmattsobena Běngbe Bětsabiama bětsá soyēnga jamama.

<sup>5</sup> “Atše chë tšabe uvas betiyá sěndmēna y tšěngaftanga chë buacuafjēngcá. Nda átšeftaca cányiñe mo canyáca tojtsemna y atše cháftacnaca, cha Běngbe Bětsabiama bětsá soyēnga echanjama, mo canye buacuafja becá tojtseshajuancá. Er, tšěngaftanga atšbe uajabuáchenana ndoñe šmontsebomnēse, átšeftaca cányiñe mo canyáca ndoñe šmontsemna causa, tondaye šmattsobena jamama. <sup>6</sup> Canya átšeftaca cányiñe mo canyáca ndoñe tontsemnēse, cha jtsemnana mo canye buacuetětšena buacuafja, utšeněfja y buasháněfjácá. Chca buacuafjēnga, entšanga jtsatbanana, íñeshoye jtsětšenana y chentše jtsejuinỹiyana. Cachcá, nda ndoñe átšeftaca cányiñe mo canyáca tontsemna, ndoservená jtsemnana y luaroca cha mochantsesegóra.

<sup>7</sup> “Tšěngaftanga átšeftaca cányiñe mo canyáca šmojtsemna y ntšamo atše tijayancá šmojtsamēse, lempe ntšamo šmojtsebošcá šmochjotjañe, y lempe šmochanjóyēngacñe. <sup>8</sup> Chë shajuana buacuafjēngcá tšěngaftanga chašmojtsemna ora, šmochanjínyanỹiye atšbe Taitá corente bětsá y obená yomnama. Y chca, tšěngaftanga atšbe ndegombre uat-sjédayēnga šmochántsemna. <sup>9</sup> Ntšamo chë Taitá šondbobonshancá, átšnaca cachcá tšěngaftanga cbondábabuanỹeshana. Chíyeca, šmochtsiyena atšbe bonshánama jtsejuabnaye. <sup>10</sup> Atše sěndama ntšamo atšbe Taitá šonděmandacá. Chíyeca atše sěndoyena chabe bonshánama jtsejuabnaye. Cachcá tšěngaftángnaca, ntšamo atše cbontsaměndacá šmojtsamēse, atšbe bonshánama jtsejuabnaye šmochantsiyena.

<sup>11</sup> “Atše chca cbontsětsětná, chë atše sěntsebomna oyejuayana tšěngaftángnaca chašmotsebomnama, y tšěngaftanga puerte chašmotsóyejuama. <sup>12</sup> Měntšá cbetsaměndá: Ntšamo atše cbondababuanỹeshancá, cachcá šmochtsenbobonshana. <sup>13</sup> Chë chabe amiguēngbiama tojóbanabiama, ndocna quenátobena chabiama más bonshánana jtse-bomnana. <sup>14</sup> Ntšamo atše tijamandacá tšěngaftanga šmojtsamēse, atšbe amiguēnga šmochántsemna. <sup>15</sup> Chë oservená ndoñe ntsetatšěmbuana ndayá chabe nduiño tojt-samama. Chíyeca atše tšěngaftanga oservēnēnga ca ndoñe quechatětsětná. Morscana mēntšá cbontsětsětná: ‘Tšěngaftangna atšbe amiguēnga šmontsemna ca’, er lempe ntšamo atšbe Taitábentšana tijuatsjinycá, tšěngaftanga tcbonjinyanỹé. <sup>16</sup> Tšěngaftanga ndoñe atše chešmatábuayana, pero atše aíñe tšěngaftanga tcbonjabacacá y tcbon-jubuáyana, Běngbe Bětsabe trabájo jamama; y chca, mo canye betiye sempre tojtse-shajuana y chë shajuana ndocna te tontsopochocacá, tšěngaftanga chašmotsemnama. Chca, lempe ntšamo atšbe Taitá šmojtjañcá, y chca šmojama atše jótšěmbonēse, átšbeñe šmošbuachéyeca, cha lempe cmochanjátataye. <sup>17</sup> Měntšá atše cbetsaměndá: Šmochtsenbobonshana ca” —Jesús tojaněyana.

*Jesús y chabe entšanga, chë nye quem luarama enójuabnayeñgbiama uaboyēnjanēnga*

<sup>18</sup> Měntsánaca Jesús tojánayana: “Pero chë nÿe quem luarama enójuabnaye entšanga tcmojsëbuayënjëse, šmochjenójuaboye, natsana chënga atše šmonjanáboyënjama. <sup>19</sup> Tšëngaftanga, chë nÿe quem luarama enójuabnaye entšanguentšana šmojtsemnëse, chënga cmattsababuánÿeshana cachëngbengbioycá. Pero tšëngaftanga ndoñe chë nÿe quem luarama enójuabnaye entšanguentšana quešmátsmëna, y atšna, chë quem luare oyenënguentsana tšëngaftanga tcbonjabacacá. Chíyeca chë nÿe quem luarama enójuabnaye entšanga tšëngaftanga cmontsëbuayënja. <sup>20</sup> Smochjenójuaboye ntšamo tcbonjáuyanama: ‘Chë oserverná chabe nduiñbiama ndoñe más uamaná quenátsmëna ca’. Chënga monjánama atše chaisufrima; tšëngaftángnaca chašmotsesufrínama mochántsama. Entšanga ntšamo atše tijayanentsana ntsachetšá tmojtsamcá, cachcá chënga mochántsama ntšamo tšëngaftanga chašmojtsëtsësná chentsana. <sup>21</sup> Chë chacmojtsëbuayënjënga, chë šojichmó cha ndoñe quematábuatma. Chíyeca chënga lempe chca cmochanjáborlaye, atšbe causa.

<sup>22</sup> “Atše ndoñe matijabo y chënga ndoñe matijáuyanëse, ndegombre ndoñe bacna soye mattsebomna. Pero mora, chëngbe bacna soyëngama chënga ndoñe quemátobena jayanana, ‘¡Chca fsënjama ntsetatsëmbcá ca!’ <sup>23</sup> Nda atše šojtsáboyënja, atšbe Taitábioynaca jtsáboyënjana. <sup>24</sup> Atše chë bëts soyënga Bëngbe Bëtsabe obenánaca chëngbeñe ndoñe matijamëse, ndegombre chënga ndoñe bacna soyënga mattsebomna. Pero mora, masque ntšamo sënjamcá tmonjinÿëse, chënga atše šmontsáboyënja y atšbe Taitábioynaca. <sup>25</sup> Chca chënga montsama, ntšamo chëngbe leyënguiñe enduabemancá cachcá chaopasama. Chiñe mēntšá endayana: ‘Nÿe tondayama chënga šmonjanáboyënja ca.’

<sup>26</sup> “Atše, atšbe Taitábentsana chë Uajabuachaná y añemuayá tšëngaftangbioye chanjíchmuá. Cha chë Uámana Espíritu endmëna, chë nÿetsca soyënguiñe ntšamo ndegombre yomncá oyebuambnayá. Cha endmëna chë Taitábentsana ichmoná; y cha lempe atšbe tšabe soyënga cmochantsëtsësnaye. <sup>27</sup> Chorscana, tšëngaftángnaca atšbiana entšanga šmochantsëtsësnaye, er tšëngaftanga átšeftaca šmondétsemna, entšanga jábuayenama atše sënjanbojatsé orscana ca” —Jesús tojánayana.

## 16

<sup>1</sup> Měntsánaca Jesús tojánayana: “Atše quem soyënga cbontsëtsësná, tšëngaftanga átšbeñe ošbuáchiyana ndoñe chašmondájbanama, atšbe causa chašmojtsesufrina ora. <sup>2</sup> Chëngna, chë judiëngbe enefjuana yebnënguentsana cmochantëbuacana. Chca tempo chaojobuache ora, chë tšëngaftanga chacmojtsëbáyënga mēntšá mochántsejuabnaye: ‘Bënga tšabá tmonjama ca. Ntšamo Bëngbe Bëtsá yojtsebošcá, cachcá bënga tmonjama ca.’ <sup>3</sup> Chënga, chë Taitá Bëngbe Bëtsá ndoñe quematábuatma, y átšbioye cach ndoñe. Chíyeca, chca cmochanjáborlaye. <sup>4</sup> Atše chca tšëngaftanga cbontsëtsësná, ntšamo tcbonjáuyanama chašmuenójuaboma, chca tempo chaojobuache ora ca” —Jesús tojánayana.

### *Ndayá chë Uámana Espíritu inétsama*

Měntsánaca tojánayana: “Entšanga jábuayenama sënjanbojatsé orscana, chë echanjopása soyëngama ndoñe quecbënjatanëtsësná, er atše tšëngaftangaftaca sënjëtsemna. <sup>5</sup> Pero morna, chë šojichmó cha yomnoye chantá; y tšëngaftanguentšá ndocná šochanjatjaye, ‘¿ndëmoye cojtsá ca?’ <sup>6</sup> Mora, tšëngaftangbe ainana ngménaca entsemna, atše chca tcbonjáuyana causa. <sup>7</sup> Pero ndegombre šcuayana: Atše chanjá y chca tšëngaftangbe tšabiana echántsemna. Atše ndoñe quetsjase, chë Uajabuachaná y añemuayá ndoñe tšëngaftangbioye queochátabo. Pero aíñe chanjá, y chora cha tšëngaftangbioye chanjíchmuá. <sup>8</sup> Cha chaojášhango ora, echanjama quem luarentša entšanga corente chamotsetátšëmbo ndayá ndegombre yomna bacna soyënga jtsamana, ndayá ndegombre yomna chë Bëngbe Bëtsabe bominiñe tšabia jtsemnana, y ndayá yomna chë Bëngbe Bëtsá entšangbiana jayanana tšabá o ndoñe tšabá tmonjamama. <sup>9</sup> Entšanga átšbeñe ndoñe

quematošbuaché. Chiyeca chë Uajabuachaná echanjama chënga corente chamotsetátšëmbo ndayá ndegombre yomna chë bacna soyënga jtsamana. <sup>10</sup> Chë Taitábioye chanjá y atše ndoñe más quešmochátinýe. Chiyeca chë Uajabuachaná echanjama chënga corente chamotsetátšëmbo ndayá ndegombre yomna Bëngbe Bëtsabe bominiñe tšabia jtsemnana. <sup>11</sup> Quem luarentša bacna soyënga mándayabiama Bëngbe Bëtsá ya tonjayana, ntšamo cha tojamama ndoñe tšabá yontsemna ca y nyetsca tescama castiganá chaotsemna ca. Chiyeca chë Uajabuachaná echanjama entšanga corente chamotsetátšëmbo, ndayá ndegombre yomna chë Bëngbe Bëtsá entšangbiama jayanana tšabá o ndoñe tšabá tmonjamama.

<sup>12</sup> “Atše cabá ba soyënga sëntsebmoma tšëngaftanga jáuyanama. Masque chcasna, mora tšëngaftanga ndoñe quešmátobena chë soyëngama josértana. <sup>13</sup> Pero chë Uámana Espíritu, chë nyetsca soyënguine ntšamo ndegombre yomncá oyeuambnaya, chaojáshjango ora, lempe ntšamo ndegombre yomncá cmochanjabuatambá. Cha ndoñe nýe cachabe juábnaca queochátoyebuambnaye. Ntšamo chë Taitá chábioye tbojauyancá, tšëngaftanga cachcá cmochanjáuyana, y cha cmochanjábuayenaye ntšamo yochjopásama. <sup>14</sup> Atšbe soyënguentsana cha echanjójyëngacñe, y cach soyëngama cmochanjabuatambá. Chcase cha cmochanjínýanýiye atše bëtsá y obená bëtsemnana. <sup>15</sup> Lempe ntšamo chë Taitá endbomncá, atšbe soyëngnaca endmëna. Chiyeca atše tcbonjáuyana, chë Uámana Espíritu atšbe soyënguentsana yochjójyëngacñe y cach soyëngama cmochjabuatambá ca.”

<sup>16</sup> “Baseftayté y atše ndoñe más quešmochátinýe. Inýe baseftayté y cachiñe šmochantétinýe ca” —Jesús tojanéyana.

*“Tšëngaftangbe ngménana, oyejuayana echanjóbema”*

<sup>17</sup> Chora Jesusbe básefta uatsjédayënga imojtsentjanaye: —¿Ntšamo yojsentšáyana, chë “baseftayté y atše ndoñe más quešmochátinýe, y inýe baseftayté y cachiñe atše šmochantétinýe, er atše chë Taitábioye chanjá ca”? <sup>18</sup> ¿Ntšamo yojsentšáyana, chë “baseftayté ca”? Ndoñe quemuátstatšëmbo ntšamo yojsentšáyanama ca —chënga imojtsichamo.

<sup>19</sup> Jesús yojsentšátšëmbo chënga chca jatjayama imojtsebošama, y tojanéyana: — Atše tcbonjáuyana: “Baseftayté y atše ya ndoñe más quešmochátinýe, y inýe baseftayté y cachiñe atše šmochantétinýe ca.” ¿Chë soyëngama šmojsentjaná ntšamo stsentšáyanama? <sup>20</sup> Ndegombre šcuayana: Tšëngaftanga šmochanjenóbošachna y puerte ngménënga šmochántsemna, pero chë nýe quem luarama enójuabnaye entšanga corente oyejuayënga mochántsemna. Masque tša ngménënga šmochántsemna, chentšana tšëngaftangbe ngménana, oyejuayana echanjóbema. <sup>21</sup> Canýe shembása tbojontšabuache šešona jónýnama ora, tša ngménaca cha jésemnana, puerte tbojtsetsetse causa. Chë šešona ya tojonýná ora, cha ndoñe ntsenójuabnayana chë tša ibuántsetšama. Canýe šešona quem luaroye cháuashjanguama chë shembása tojámayeca, chora cha tšabá y oyejuayá jtsemnana. <sup>22</sup> Ndegombre, tšëngaftángnaca cachcá, chora tša ngménaca šmochántsemna. Pero atše tšëngaftangbioye chajésabo ora, atše šmochantétinýe y corente oyejuayënga šmochántsmëna. Y ndocná queochatobenaye chë oyejuayana jabuajuánana.

<sup>23</sup> “Chë te chaojóshjango ora, tšëngaftanga ndocá atše quešmochatstjaye. Ndegombre šcuayana, lempe ntšamo atšbe Taitá šmojtjañcá, y chca šmojama atše jótšëmbonëse, átšbeñe šmošbuachéyeca, cha lempe cmochanjátšataye. <sup>24</sup> Mëntscoñama, atšbe Taitá tondaye chešmatotjañe atše jótšëmbonëse. Cha motjañënga y šmochanjójyëngacñe, y chca, bëtscá oyejuayana šmochántsebmoma ca” —Jesús tojanéyana.

*Jesucristo, quem luarentše mandayábioye yëñjanayá*

<sup>25</sup> Mëntsánaca Jesús tojánayana: “Chë soyëngama lempe cuentëngaca tšëngaftanga tcbonjáuyana; pero tempo echanjobuache, chora atše ya ndoñe más cuentëngaca quebochátëtsësnaye; chë cuentna, puerte botamana lempe atšbe Taitabiama cbochanjáuyana. <sup>26</sup> Chë tena, atše jótšëmbonëse, átšbeñe šmošbuachéyeca, atšbe

Taitábioye šmochanjotjañe. Y atše cbéyana; chca, chë te ndoñe quešochatájaboto tšëngaftangbiana atšbe Taitá jatsimpadánana. <sup>27</sup> Atše ndoñe quichatsimpadana, er cach Taitá tšëngaftanga cmondábabuanÿeshana. Tšëngaftanga atše šmondobonshánama, y Bëngbe Bëtsábíocana atše tijabama šmojtsošbuáchema, chë Taitá cmondábabuanÿeshana. <sup>28</sup> Atše chë Taitábíocana sënjábcna y quem luaroye sënjabo. Pero mora quem luare chanjëftseboshjona atšbe Taitábioye jtama ca” —Jesús tojánayana.

<sup>29</sup> Chora chabe uatsjédayënga tmojaniana: —Mora ya ndoñe cuentëngaca quecatoyebuambná, chíyeca lempe paselo josértama bëngbiana entsemna. <sup>30</sup> Mora fsëntsetatšëmbo aca nÿetsca soyëngama cotatšëmbuama, y ndoñe quenátsiyta ndocná aca chacmátstjanama, er aca chëngbe juabnënga jtsabuatmana, chënga cabá aca ndëtjaye ora. Chíyeca bënga fsëntsošbuaché aca Bëngbe Bëtsábíocana tcojabama ca —chënga tmojaniana.

<sup>31</sup> As Jesús tojanéyana: —¿Mora chiñe šmojtsošbuaché ca? <sup>32</sup> Ya tempo tocjobuache y cam ora entsemna, tšëngaftanga nÿetsquénache šmochanjuáshana y atše nÿe canÿa šmochanjéseboshjona. Pero atše ndoñe nÿe canÿa quichátsmëna, chë Taitá átšeftaca entsémnayeca. <sup>33</sup> Atše lempe quem soyënga cbontsëtsëtsná, tšëngaftangbe ainaniñe tšabe ebionana chašmotsebmoma, átšeftaca cánÿiñe mo canÿacá jtsemnëse. Quem luar-entše šmochanjasufrina; pero añemo šmochtsebmoma, atše ya chë quem luarentša mandayá sënjayëñaná ca —Jesús tojánayana.

## 17

### *Jesús chabe uatsjédayëngbiana Bëngbe Bëtsábíoye tbojanimpadá*

<sup>1</sup> Jesús chë soyënga tojánayanentšana, celoye tojanontješé y Bëngbe Bëtsábíoye tbojaniana: “Taita, atšbe te ya tocjobuache. Minÿanÿé, atše acbe Uaquiñá, corente bëtsá y obená bëtsemnama. As, atše acbe Uaquiñá, aca corente bëtsá y obená comnama chainÿanÿema. <sup>2</sup> Mora aca nÿets obenana šconjatšetá nÿetsca entsángbeñe, nÿetscanga chë atšbiana tcojábacacanga chë nÿetsca tescama yomna tšabe vida chamotsebmoma atše chaimama. <sup>3</sup> Chë nÿetsca tescama yomna tšabe vida jtsebmomana endmëna aca, chë nÿe canÿe y ndegombre Bëngbe Bëtsá jtsabuatmana, y atše Jesucristo, acbe ichmoná.

<sup>4</sup> “Lempe ntšamo šconjamandacá atše sënjapochocá, y chca quem luariñe sënjama aca corente bëtsá y obená comnama jinÿanÿiyama. <sup>5</sup> Taita, quem luare cabá ndoñe quenjatsmëna ora, aca tconjaninÿanÿé atše corente bëtsá y obená ácaftaca bëtsemnama. Mora moma atše cachcá ácaftaca chaitsemnama.

<sup>6</sup> “Aca quem luarentša entsanguentšana quem boyabásenga tconjabacacá y atšbiana šconjinÿinÿé. Atše chënga sënjanÿanÿé ntšamo ndegombre aca comnama. Chënga acbe entsanga mondmëna; y acna, chë atšbiana chënga šconjinÿinÿiyá. Chënga acbe palabra tmonjouena y tšabá tmonjoyeuná. <sup>7</sup> Chíyeca chënga mondetatšëmbo, lempe ntšamo atše tsbomncá ácbentšana tijóyëngacñama. <sup>8</sup> Atše chënga sënjáuyana ntšamo aca šcojauyancá, y chënga montsošbuaché chë atše sënjauyaniñe. Chíyeca, chënga ndegombre mondetatšëmbo atše acbiocana tijabama, y montsošbuaché aca chë atše šcojichmó cha comnama.

<sup>9</sup> “Atše chëngbiana cbontseimpadana. Chë nÿe quem luarama enójuabnaye entsangbiana ndoñe quecbátsimpadana, pero aiñe chë atšbiana šcojinÿinÿiyëngbiana, er chënga acbe entsanga mondmëna. <sup>10</sup> Lempe ntšamo atše tsbomncá, acbiámncá endmëna; y cachcá, lempe ntšamo cobomncá, atšbiámncá endmëna. Acbengbe vidëngaca aca tcojinÿanÿé atše corente bëtsá y obená bëtsemnama.

<sup>11</sup> “Atše ndoñe quem luarentše quešocháisetotona, pero chënga aiñe cabá camuentše mochanjëftsemna. Atše chantá ácaftaca jtsatsmënama. Uámana Taitá, chë atšbiana šconjinÿinÿiyënga acbe obenánaca cochtsanÿena. Chca ntšamo bëndata mo canÿacá bondmëna, chëngnaca cachcá chamotsemnama. <sup>12</sup> Atše chëngaftaca sëntsemnëntscuana, chënga sëntsanÿena, aca šconjatšetá obenánaca. Atše chënga



sëndányena, y ni canya queochátsmëna infiernoca pochocaná, nye chë infiernoca pochocaná jtsemnama ibomná chana aíne, ntšamo acbe uabemana palabrënguïñe endayancá, cachcá chaotsemnama.

<sup>13</sup> “Morna chë aca condmënoye chantá; pero atše cabá quem luariñe sëntsemnëntscuana chca chënga sëntsëtsëtsná, chca, chë atše sëntsebmna puerte bëtscá oyejuayana chëngnaca chamotsebmnama. <sup>14</sup> Atše chënga sënjáuyana ntšamo aca šconjauyancá. Ntšamo atše ndoñe quetsátsmëna chë nye quem luarama enójuabnaye entšanguentsá, cachcá, chënga cach ndoñe quemátsmëna. Chíyeca, chë nye quem luarama enójuabnaye entšanga chënga montsëbuayënja. <sup>15</sup> Atše ndoñe quecbátsimpadana, chënga quem luarentšana chacúbuacanama; pero aíne, nyetsca bacna soyënguentsána chacuatsebacama. <sup>16</sup> Ntšamo atše ndoñe quetsátsmëna chë nye quem luarama enójuabnaye entšanguentsá, cachcá, chënga cach ndoñe quemátsmëna. <sup>17</sup> Cochjama chënga acbe entšanga chamuëtsemnama, y chca, nye acbiama vida chamotsebmna. Chca cochjama, ntšamo ndegombre yomncá chënga imoyenama. Ntšamo aca condbetsichamcá, ndegombre endmëna. <sup>18</sup> Ntšamo aca quem luaroye šconjanichmocá, cachcá átsnaca chënga sëntsachamná, quem luare entšanga jábuayenama. <sup>19</sup> Chëngbiama atše cachiñe mëntsá cbëyana: Atše nye acbiama sëndmëna. Y chca, chëngnaca, ntšamo acbiama ndegombre yomncá jtsóyebuambnayëse acbe entšanga chamotsemna, y chca, nye acbiama vida chamuëtsebmna, ntšamo ndegombre yomncá chënga imoyenama.

<sup>20</sup> “Pero nye chëngbiama ndoñe quecbátsimpadana, sinó chë átšbeñe mochtsošbuáchiyëngbiamnaca, chë atšbiama šconjínjinyiënga, chëngbioye atšbiama ínÿenga chamojtsabuayiyná ora; <sup>21</sup> as chënga nyetscanga cányiñe mo canyácá chamotsemnama. Ntšamo aca, Taita, átšeftaca cányiñe mo canyácá bondmëna y átsnaca ácaftaca, cachcá chëngnaca cányiñe mo canyácá bëndátaftaca chamotsemnama cbontseimpadana. Y chca, quem luarentša nyetsca entšanga, atše šcojichmoma chamotsošbuáchema. <sup>22</sup> Ntšamo chë obenana y uámanana šconjatšetacá, cachcá átsnaca chënga sënjatsatá. As, ntšamo bëndata cányiñe mo canyácá bondmëna, chëngnaca cachcá cányiñe mo canyácá chamotsemnama. <sup>23</sup> Atše chëngbe ainaniñe sëntsemna, y aca átšeftaca cányiñe mo canyácá bondmëna; as, chëngnaca nyetsca soyënguïñe cányiñe mo canyácá chamotsemnama. Y chca, quem luarentša entšanga chamotsetátšëmbo aca šcojichmoma, y chamotsetátšëmbo ntšamo atše šcondbobonshancá, chëngnaca cachcá condábabuanyëshanama.

<sup>24</sup> “Taita, atšbiama chënga šconjínjinyië. Atše mëntsá sëntseboše: chë atše chántsemnoca, chëngnaca chamotsemna, y chentše, chë šconjatšetá obenana y uámanana chënga chámuinÿe. Quem luare cabá ndoñe quenjatsmëna orscana, šconjánbobonshana; chíyeca, cachora tconjaninÿanyé atše corente bëtsá y obená bëtsemnama. <sup>25</sup> Taita, nyetsca soyënguïñe tšabá amá, masque chë nye quem luarama enójuabnaye entšanga ndoñe quecmatábuatma, atše aíne cbonduábuatma, y quem boyabásenga montsetátšëmbo, aca comna chë šcojichmó cha. <sup>26</sup> Atše chënga sënjinÿanyé ntšamo ndegombre aca comnama, y más chanjínÿanyië; chca, ntšamo šcondbobonshancá, chëngnaca cachcá chamotsenbobonshánama y atše chëngbe ainaniñe chaitsemnama ca” —Jesús tojánayana.

## 18

*Uayayënga Jesús tmojánishache*

*(Mt 26.47-56; Mc 14.43-50; Lc 22.47-53)*

<sup>1</sup> Chë soyënga Jesús tojëftsanayanentsána, chabe uatsjëndayëngaftaca tojëftsanbocna, chë binche béjaye Cedrón ca uabáiniye chenguana jama. Chentše inamna canÿe tjashetema; y Jesús chabe uatsjëndayëngaftaca choye tojánamengo. <sup>2</sup> Y Judas, chë Jesús uayayëngbe cucuatšiñe boshjuaná, tšabá chë luare yojanábuatma, er Jesús y chabe uatsjëndayënga ba soye chentše imojánenefjuana. <sup>3</sup> Chora Judas tojánashjango, y cháftaca

ba soldadënga y básefta Bëngbe Bëtsabe bëts yebnoca josticiënga; chënga imojamna chë bachnangbe amëndayënga y fariseungbe ichmónënga; nyetscanga uajuinÿanëshangaca, lamparëshangaca y espadëjangaca uajatënga.

<sup>4</sup> Jesusna yojtsetátšëmbo lempe ntšamo cha yochjanpásama; chíyeca, natsanoye tojánbocna y chë entsänga tojanëyana: —¿Nda šmojtsenguá ca?

<sup>5</sup> Y chënga tmojanjuá: —Jesús, chë Nazaretocá fsëntsenguá ca.

As Jesús tojanëjua: —Atše cha sëndmëna ca.

Y Judas, chë boshjuaná, chánaca chë entsängaftaca yojtsemna. <sup>6</sup> Jesús tojanëyana: “Atše cha sëndmëna ca”, y cachora chë entsänga tmojtantostëtšánanga y fshantsoye tmojánshajaye.

<sup>7</sup> Chora Jesús cachiñe tojanatjá: —¿Nda šmojtsenguá ca?

Y chënga tmojanjuá: —Jesús, chë Nazaretocá ca.

<sup>8</sup> As Jesús tojanëyana: —Ya tcbonjáuyana: “Atše cha sëndmëna ca.” Atše šmojtsenguasna, mënga cachcá šmochjónÿaye chamotsóñengama ca.

<sup>9</sup> Chca tojanopasá, ana ntšamo Jesús tojanayancá cachcá chaotsemnama, chë “Atšbe Taitá Bëngbe Bëtsá, chë šconjínÿinÿiye entsanguentšana ni canÿa pochocaná queochátsmëna ca”.

<sup>10</sup> Simón Pedro canÿe espadëja inasëngbuájonÿana; asna, tojanenosëngbotëntšena y chë bachnangbe más uámana amëndayabe canÿe oservenábioye catsbioica matscuaše tbojt-sanëštjango. Chë oservená Malco ca inauabaina. <sup>11</sup> As Jesús, Pédrëbioye tbojaniyana: “Ache espadëja matosëngbuajonÿá. Ntšamo atšbe Taitá Bëngbe Bëtsá tojanmandacá, chë atše puerte ngmënana jtsebomnama, ¿ndoñe chca chaondëtsemna ca?”

### *Jesús, Anasbe yebnoca*

*(Mt 26.57-58; Mc 14.53-54; Lc 22.54)*

<sup>12</sup> Chentšana chë soldadënga, chëngbe amëndayá y Bëngbe Bëtsabe bëts yebnoca josticiënga Jesús tmojánishache y tmojanëcuébatsëca. <sup>13</sup> Natsanëna, Anás, Caifasbe uambén taitábioye Jesús tmojanánatse. Caifás chë uata inamna chë bachnangbe más uámana amëndayá. <sup>14</sup> Caifás yojamna nda judiënga tojanëyana: “Tšëngaftangbiamá más tšabá entsemna canÿe boyabása Israeloca entsangbiamá chaóbana ca.”

### *Pedro tojánayana Jesúsbioye ndoñe bonjanabuátma ca*

*(Mt 26.69-70; Mc 14.66-68; Lc 22.55-57)*

<sup>15</sup> Simón Pedro y inÿe uatsjendayá Anasbe yebnoye Jesús imojtsëstona. Chë inÿe uatsjendayábioyna, chë bachnangbe más uámana amëndayá ibnauábuatma; chíyeca, cha tojanobená Jesúseftaca chabe chashjóntscoñe jashjanguana. <sup>16</sup> Pero Pédrëna nÿe shjoca, amashjuanentše tojanoquedá. Chcasna, chë inÿe uatsjendayá tojánbocna y chë bëshása ebtafjuana shembásaftaca tojanoyebuambá. Chora Pedro tbojanëmashëngo. <sup>17</sup> As chë shembása Pédrëbioye tbojaniyana: —¿Acnaca ndoñe chë boyabásabe uatsjendayá condmëna ca?

Y Pedro tbojanjuá: —Ndoñe; atše cha ndoñe quetsatabuatma ca.

<sup>18</sup> Tša yojtsesësna causna, chë oservénënga y chë josticiënga shjoca tmojanniñe y chentše imojtósboniye. Y Pédrëna chëngaftaca yojtsešbonena.

### *Ntšamo chë bachnangbe más uámana pasado amëndayá, Jesúsbioye tbojantjá*

*(Mt 26.59-66; Mc 14.55-64; Lc 22.66-71)*

<sup>19</sup> Chora, chë bachnangbe más uámana pasado amëndayá tojanontšë Jesús jatjayama chabe uatsjendayëngbiamá y ndayá cha entsänga yojánabuatambamnaca. <sup>20</sup> Y Jesús tbojanjuá: —Atše nyetsca entsangbe delante sënjoyebuambá. Sempre chë entsangbe ene-fjuana yebnënguenache sëndabuatambá, y Bëngbe Bëtsabe bëts yebnócna, nyetsca judiënga mondbétsenefjuantšë; y chca, iytëmencá tondaye chiyatoyebuambá. <sup>21</sup> ¿Ndayeca chca

šcojtsetjaná? Atšbe palabra tmojouenënga májtjaye, as chënga chacmëyana ntšamo atše tijáuyanama. Chënga mondëtatšëmbo ntšamo atše tijayancá ca —Jesús tbojanjuá.

<sup>22</sup> Jesús chë soyënga tojánayana ora, canÿe josticio chentše yojtsemná, Jesúsbioye tbojanjuebjantšetá y tbojaniana: —¿Chca chë bachnangbe más uámana amëndayá cuanjojuá ca?

<sup>23</sup> Y Jesús tbojanjuá: —Ndoñe tšabá tijayanësna, šmëyana ndayentše chë podesca palabra yojtsemna; y tšabá tijóyebuambasna, ¿ndáyeca šcojajuebjantšetá ca?

<sup>24</sup> Chentšana, Anás tojanmandá, chë bachnangbe más uámana amëndayá Caifasbe yebnoye, Jesús batsëcná chamuánatsama.

*Pedro cachiñe tojánayana Jesúsbioye ndoñe bonjanabuátma ca*  
(Mt 26.71-75; Mc 14.69-72; Lc 22.58-62)

<sup>25</sup> Chëntscuana, Pedro yojtsešbonena, tsanana chë iñe juachaca. Chora chë entšanga tmojantjá: —¿Aca ndoñe chabe uatsjendayënguentsá condmëna ca?

Y Pedro ndoñe ca tojánayana: —Atše ndoñe quetsátsmëna ca —cha tojánayana.

<sup>26</sup> Chora, chë bachnangbe más uámana amëndayabe canÿe oservená Pédrëbioye tbojaniana: —¿Atše ndoñe cháftaca chë tjashetémoca tcbonjinÿe ca?

Chë oservená inamna chë Pedro tbojtsanmatstëtšabe pamillo.

<sup>27</sup> Y Pédrëna cachiñe ndoñe ca tojánayana, y cachora canÿe ngallo yojacánta.

*Jesús Pilatbe delante*

(Mt 27.1-2, 11-14; Mc 15.1-5; Lc 23.1-5)

<sup>28</sup> Chentšana, Caifasbe yebnentšana Jesús tmojanánatse chë romano mandadbe yebnoye. Ya yojtsebínÿana, y chë bëts yebnoye chë judiënga ndoñe tmonjánamashjna, er chënga imojtseboše chë Bashco saná jasama. Judiënga ndoñe imonjobena Bashco saná jasana, chca tempo canÿe ndoñe judiëbe yebnoye nda tojámashënguse. <sup>29</sup> Chíyeca Pilato tojánbocna y chënga tojanëyana: —¿Ndayá quem boyabásabe contra šmochjayana ca?

<sup>30</sup> Chora chë entšanga tmojanjuá: —Bacá uamaná ndoñe tontsemnëse, ndoñe matifjuánatse ca.

<sup>31</sup> As Pilato tojanëyana: —Tšëngaftanga matánatse, y ntšamo cach tšëngaftangbe leyiñe iuayancá muabiana šmochjayana tšabá o ndoñe tšabá tonjamama ca.

Y chë judiënga tmojanjuá: —Bënga derecho queftsátsbomna ndocná jóbama ca.

<sup>32</sup> Chca tojanopasá, ana ntšamo Jesús cachá jóbanama tojanayancá cachcá chaotsemnama. <sup>33</sup> As Pilato cach yebnoye tojtanamáshëngo, Jesús tbojanchembo y tbojantjá: —¿Aca chë judiëngbe Rey cojtsemna ca?

<sup>34</sup> Y Jesús tbojanjuá: —¿Ntšamo šconjatjacá, cach aca chca cojtsejuabnáyeca chca yojtsemna o ínÿenga atšbiana tcmojacuentáyeca ca?

<sup>35</sup> Chora Pilato tbojaniana: —¿Mo atše judío quetsmëna? Cach ácbioca entšanga y chë bachnangbe amëndayënga muentše tcmojjúshjango. ¿Ndayá tcojama ca?

<sup>36</sup> Chora Jesús tbojanjuá: —Atšbe jamándama luare ndoñe quem luarentše quenátsmëna. Aíñe tojtsemnësna, atšbe ústonënga muantsatsejaye atše chë judiëngbe cucuatšiñe ndoñe chašmondboshjonama. Pero atšbe jamándama luare ndoñe quem luarentše quenátsmëna ca —Jesús tbojanjuá.

<sup>37</sup> As Pilato tbojaniana: —¿As aca rey cojtsemna ca?

Y Jesús tbojanjuá: —Tšabá tcjayana; atše rey sëndmëna. Chama atše tijonÿná y quem luaroye tijabo; y atše sënjabo ndegombre soyëngama jabóyebuambayama. Y chca soyënga jtsemëse tmoyenënga, atše jtseyeunanana ca.

<sup>38</sup> Chora Pilato tbojaniana: —¿Y ndayase chë ndegombre soye yomna ca?

*Jesusbiana tmojánayana chaóbana ca*  
(Mt 27.15-31; Mc 15.6-20; Lc 23.13-25)

Chca tbojantjá chentšana, Pilato cachiñe tojánbocna judiëngaftaca jóyebuambayama, y tojanëyana: —Atse ni mo canye soye chiyátinÿena, quem boyabása castiganá chaotsemna ca jayanama. <sup>39</sup> Pero tšëngaftanga šmondëtatšëmbo, Bashco fiestama atse canye utamená cachcá jëtsboshjonama. ¿Šmojtseboše chë judiëngbe Rey chjëtsboshjona ca?

<sup>40</sup> Chorna nÿetsca entšanga cachiñe tmojanáyebuachena: —¡Ndoñe, cha ndoñe! ¡Barrabás matsboshjona ca!

Barrabasna canye bacá uamana entšá inamna.

## 19

<sup>1</sup> Chora Pilato, Jesús tbojanánatse y tojanmandá chamotsetjanjama. <sup>2</sup> Y canye coronësha uchmašëfjangaca chë soldadënga tmojanapormá y Jesús tmojanabestšajó; y canye shbuenda uafjatsenga entšayá mo reycá tmojanichëtjo. <sup>3</sup> Chorna chënga imojtsóbobecocnaye y jtsafchayama imojtsatsëtsnaye: “¡Bayté judiëngbe Rey cochtsemna ca!” Y imojtsejuebantšetaye.

<sup>4</sup> Pilato cachiñe tojánbocna y entšanga tojanëyana: —Smochjouena; cha chanjuábocna, chë boyabása castiganá chaotsemna ca jayanama atse ni mo canye soye ndoñe sënjinÿenama chašmotsetatšëmbuama ca.

<sup>5</sup> As Jesús tojánbocna chë uchmašëfjangaca coronësha uabestšajoná y chë shbuenda uafjatsenga entšayá mo reycá uichëtjoná. Y Pilato tojanëyana: —¡Muentše chë boyabása entsemna ca!

<sup>6</sup> Chë bachnangbe amëndayënga y chëngbe josticiënga cha tmojáninÿe ora, tmojanontšë uayebuáchana: —¡Motsecrucificá! ¡Motsecrucificá ca!

Chora Pilato tojanëyana: —Cach tšëngaftanga mánatse y šmochjacrucificá; atse ni mo canye soye chiyátinÿena quem boyabása castiganá chaotsemna ca jayanama ca.

<sup>7</sup> Chora chë judiënga tmojanjuá: —Bëngna canye ley fsëndbomna, ntšamo chiñe endayancana, quem boyabása jóbanama bontsemna, Bëngbe Bëtsabe Uaquiñá entsenobiamná causa ca.

<sup>8</sup> Pilato chca tojanuena ora, más yojsauatja. <sup>9</sup> Cachiñe chabe yebnoye tojanamáshëngo y Jesús tbojantjá: —¿Ndëmocá aca cmëna ca?

Pero Jesús ndocá tbonjanjuá. <sup>10</sup> Chora Pilato tbojanianyana: —¿Ndoñe šcochanjojuá ca? ¿Ndoñe condëtatšëmbo, aca jacrucificama o jëtsboshjonama atse tsobenama ca?

<sup>11</sup> As Jesús tbojanjuá: —Acbe obenana Bëngbe Bëtsá ndoñe macmënjánatšetase, tondaye cattsobena átšeftaca jamama; chíyeca, acbe cucuatšinë šonjaboshjoná, acbiama más bëts bacna soye tonjama ca.

<sup>12</sup> Cach orscana Pilato yojsenguaye ntšamo jamana, jobenayama Jesús jëtsboshjonama; pero chë judiënga imotsáyebuache: —¡Chacojëtsboshjonësna, Césarbe amigo ndoñe condmëna! ¡Nda rey tojtsenobiamná chana, Césarbe uayayá jtsemnana ca!

<sup>13</sup> Pilato chë soyënga tojanuena ora, chashjoye Jesús tbojanábocna. Pilato tojanótbema chabe puestentše tribunaloca. Chë tribunaloca chashjañna hebreo biyañe Gabata ca inauabaina, y endayana “ndëtsbéngaca pormániñe ca”. <sup>14</sup> Bashco fiestama canye te yojsájamna, y mo nÿetsto ora yojtsemna. Chora Pilato chë judiënga tojanëyana: —¡Muentše tšëngaftangbe rey entsemna ca!

<sup>15</sup> Pero chënga tmojanáyebuachena: —¡Chaóbana! ¡Chaóbana! ¡Motsecrucificá ca!

As Pilato tojanatjá: —¿Tšëngaftangbe rey atse chjacrucificá ca?

Y chë bachnangbe amëndayënga tmojanjuá: —Bëngbe rey nÿe César endmëna, ndocná más ca.

<sup>16</sup> Chentšana Pilato, chëngbe cucuatšinë Jesús tbojánboshjona chamocrucificama y chë judiënga cha tmojanánatse.

*Jesús tmojanrucificá*

*(Mt 27.32-44; Mc 15.21-32; Lc 23.26-43)*



<sup>17</sup> Jesús tojánbocna chabe cruz tantšajónana y tmojanánatse canye luaroye, “Obanabe Bestšashe ca” uabáinoye (hebreo biyañe Gólgota ca inauabaina). <sup>18</sup> Chentše cha tmojancrucificá y inye útatnaca cátaoica tmojanacrucificá; Jesusna tsěntsaca. <sup>19</sup> Pilato tojanmandá canye uabemana soye chě cruciñe chamuanjuama. Chiñe yojetsábemana: JESÚS NAZARETOCÁ, JUDIËNGBE REY ca. <sup>20</sup> Y ba judienga chě uabemana soye tmojanalía, er chě Jesús tmojancrucificá luare Jerusalenó béconana inamna, hebreo, latín y griego biyañe yojetsábemana. <sup>21</sup> Chca juabemama tojanmandáyeca, chě bachnangbe aměndayenga Pilato tmojanianya: —Ndoñe matabiamnana “Judiengbe Rey” sinó ntšamo cachá tojayancá, “Judiengbe Rey atše sěndmēna ca”.

<sup>22</sup> Pero Pilato tojanějua: —Ntšamo tijuábema cachcá chaotsábemana ca.

<sup>23</sup> Chě soldadenga Jesús tmojancrucificá chentšana, chabe entšayangá tmojanájaca y cántañe tmojanajatá, nyetsca canta soldadēngbiana. Chabe cmešėjua tmojanaca; chėjua yojanamna nduajonanėjua, nyetsėjua uabianánėjua. <sup>24</sup> As chě soldadenga tmojáneniyana: “Ndoñe matjuátanēca; más tšabana tsbanánoye mochjútšena, ndabiana yochjuáquedama chaotsotatsěmbuama ca.”

Chca tojanopasá ana ntšamo Běngbe Bětsabe uabemana palabrēnguiñe endayancá cachcá chaotsemnama, chě “Atšbe entšayangá tmojatenájataye; atšbe cmešėjua tmojanaca; tsbanánoye tmonjanětšena, ndabiana juaquédama jtsotatsěmbuama ca.” Y lempe chca chě soldadenga tmojanma.

<sup>25</sup> Jesusbe cruz juachaca imojtsemna chabe mamá; chě mamabe quenata María, Cleofasbe shema; y María Magdalena. <sup>26</sup> Jesús chabe mamábioye tbojáninye, y chabe juachacna chě Jesusbe bonshana uatsjendayá yojtsemna. Chora chabe mamá tbojanianya: “Mama, chentše acbe uaquiñá entsemna ca.”

<sup>27</sup> Y chě bonshana uatsjendayá tbojanianya: “Chentše acbe mamá entsemna ca.”

Cach orscana, chě uatsjendayá chabe yebnentše Jesusbe mamábioye tbojanofja.

### *Jesús tojanóbana*

(Mt 27.45-56; Mc 15.33-41; Lc 23.44-49)

<sup>28</sup> Jesús yojtsetatsěmbo ya lempe tojanchnēnguama, chíyeca chentšana y ntšamo Běngbe Bětsabe uabemana palabrēnguiñe endayancá cachcá chaotsemnama, tojánayana: “Sontsajuendá ca.”

<sup>29</sup> Chentše inamna canye matbaja buajútjena untja vínoyeca. As, chě soldadenga canye esponjēshe chě vínoyeca tmojanfchecuacuá, canye hisopo niñēfiñe tmojananguēsētjo y játsbanase, Jesusbe uayásoye tmojanbeconá. <sup>30</sup> Chě untja vínoye Jesús tojanofšé ora, tojánayana: “Ya lempe tojochnēngo ca.”

Tojanotsejbé y tojanóbana.

### *Canye soldado chabe lanzēsaca costillaca Jesúsbioye tbojanashacuá*

<sup>31</sup> Bashco fiestama canye te yojtsájamna, y chě judienga ndoñe imontseboše chě crucificánēnga cachentše chě ochnayté chamotsemnama, chě te puerte uámama te bétsemnayeca. As Pilato tmojanimpadá chě crucificánēnga shecuatsēnga jetsatcacayama y chě cuerpēnga chentšana jtsejuánama chaomandama. <sup>32</sup> As chě soldadenga tmojánana y shecuatsēnga imojtsatcacaye, natsana canya y chentšana chě inya, Jesúsēftaca yojtsecrucificaná. <sup>33</sup> Pero Jesúsbioye tmojanobeconá ora, ya obaná tmojáninye; chíyeca chabe shecuatsēnga ndoñe tmonjanatcacá. <sup>34</sup> Masque chca, canye soldado Jesúsbioye costillaca canye lanzēsaca tbojanashacuá. Y cachora buiñe y búyeshe chentšana tonjanóbocna. <sup>35</sup> Chě mēntšá cuentayá chentše enjamna y tonjáninye, y ndegombre entsichamo; cha endětatsěmbo ndegombre yojtsichámuama, chca, tšēngaftāngnaca chiñe chašmotsošbuáchema. <sup>36</sup> Chě soyēnga chca tojanopasá, ntšamo Běngbe Bětsabe uabemana palabrēnguiñe endayancá cachcá chaotsemnama. Chiñe endayana: “Ni mo canye

betaše cha quemochatsëntšátca ca.”<sup>37</sup> Y ínÿoca, Bëngbe Bëtsabe uabemana palabrënguiñe endayana: “Chë tmojenachentsá bominye mochanjabuájua ca.”

### *Jesús tmojanatbontsá*

*(Mt 27.57-61; Mc 15.42-47; Lc 23.50-56)*

<sup>38</sup> Chë soyënga tojanopasá chentsana, José Arimateocá, Pilátbioye tbojanimpadá Jesusbe cuerpo jesocñama chabolesenciama. José inamna Jesusbe canÿe ustoná, masque nÿe iytëcana, chë judiëngbiama auatja causa. Pilato aiñe tbojanlesenciá; as José tojána y Jesusbe cuerpo yojtsámbarne. <sup>39</sup> Nicodemo, chë ibeta Jesúsbioye tbojanbuachá, chánaca tojánashjango y tojanëyamba unga bnëtsana kilo mirra y áloe enájua bnana. <sup>40</sup> As José y Nicodemo Jesusbe cuerpo tbojanca y tmojanandmaná chë botamana uanguëtse soyëngaca unëtjona entsëjuangaca. Judiënga chca imnauamana, obaná juatbontsama ora. <sup>41</sup> Jesús tmojan crucificá luarentse canÿe base jajañe inamna, y chiñe canÿe tsëm cuevëshe, entsangbe pormánëshe, obanëngbiama; chëshiñe cabá ndocna obaná mondëjajo. <sup>42</sup> Asna, nÿe chentse Jesusbe cuerpo tmojansegorá, chë Bashco fiestama canÿe te yojtsámbarne causa, y chë cuevëshe chë béconana inámnayeca.

## 20

### *Jesús tojtana yena*

*(Mt 28.1-10; Mc 16.1-8; Lc 24.1-12)*

<sup>1</sup> Chë inÿe semana bojatsënté, cabá cachëse, cabá ndëbinÿna ora, María Magdalena chë cuevëshoye tojána y tojáninÿe ínÿoca yojtsemna chë cuevëshoye amashjuanentsa ndëtšbé. <sup>2</sup> Asna, tojëftsantjajo y tojána chë Simón Pedro y chë inÿe uatsjendayá, ndábioye Jesús tša ibnabobonshana ibojtsemnoye. Chora tojanëyana: “Bëngbe Utabnabe cuerpo chë cuevëshentsana tmojtsámbarne y ndayentse tmojtsejájoma ndoñe queftsátstatšëmbo ca.”

<sup>3</sup> Chora Pedro y chë inÿe uatsjendayá chentsana tbojëftsanbocna y chë cuevëshoye tbojánata. <sup>4</sup> Nÿets útata ibojtsëchamana, pero chë inÿe uatsjendayá Pédrëbiama más betscó tojanótjajo y natsana chë cuevëshoye tojánashjango. <sup>5</sup> Tojanotsejbé y chë chentse tmojanacjá entsëjuangá tojáninÿe, pero choye ndoñe tonjánamashëngo. <sup>6</sup> Chentsana, Simón Pedro chabe ústonoye tojánashjango y chë cuevëshoye tojánamashëngo, y tojáninÿe chë chentse tmojanacjá entsëjuangá. <sup>7</sup> Y chë Jesús juabestšentsacjuama tojanaservé entsëjuana ndoñe chë inÿájua yontsamna, sinó ínÿoca botamana uandmanánëjua. <sup>8</sup> Chora chë inÿe uatsjendayá, chë cuevëshoye natsana tojanashjanguá, choye tojánamashëngo. Tojáninÿe y Jesús tojtana y enama yojtsanošbuaché. <sup>9</sup> Chëntscoñe chë útata cabá ndoñe yontsósertana ntšamo Bëngbe Bëtsabe uabemana palabrënguiñe endayancá, chë Jesús obanënguentšana jtayenama ibojamnama. <sup>10</sup> Chentsana chë uatsjendayata chatbe oyenoye tbojtaná.

### *Jesús, María Magdalénbioye tbojánëbëbocna*

*(Mc 16.9-11)*

<sup>11</sup> Pero María chentse tojanoquedá, chë cuevëshe juachaca šachénaca; yojtsošachentscuana tojanotsejbé cuevëshoye jarrepárama. <sup>12</sup> Y tojáninÿe uta angelotémata uafjantsëjua uichëtjonata, Jesusbe cuerpo yojtsejajónentse ibojtsetbemana. Canÿa tsëntšënëshoica y chë ínÿana matsëskoica. <sup>13</sup> Chora chata tmojanianyana: —Shembása, ¿ndayama cošaché ca?

As cha tojanjúá: —Atšbe Utabná tmojtsámbarne, y ndayentse tmojtsejájoma ndoñe quetsátstatšëmbo ca.

<sup>14</sup> Chca tojánayana ora, tojanostëtsantješé y tojáninÿe chentse Jesús yojtsemna, pero María ndoñe yontsetátšëmbo cha Jesús bëtsemnama. <sup>15</sup> Chora Jesús tbojanianyana: —Shembása ¿ndayama cošaché? ¿Nda congua ca?

María yojtsejuabnaye chë boyabásana yojtsemna chentša base jajañe uaishanjá ca; chíyeca tbojantjá: —Bacó, aca tcojuambësna, šmëyana ndayentše cojtsejajó, as atše cha jesocñama ca.

<sup>16</sup> As Jesús tbojaniana: —¡María ca!

Chora María chábioye tojanontješé y tbojaniana: —¡Rabuni ca! (hebreo biyañe chca endayana “Buatëmbayá ca”.)

<sup>17</sup> Chora Jesús tbojaniana: —Ndoñe šcatábojajo, er atše cabá ndoñe atšbe Taitábioye quetstëtstsjua. Pero motsa atšbe catšátangbioye y cochjáuyana, atše stsetsjuá atše y tšëngaftangbe Bëtsábioye, atše y tšëngaftangbe Taitábioye ca.

<sup>18</sup> As María Magdalena tojána y Jesusbe uatsjëndayënga tojanëyana cha chë Utabnábioye tbojáninÿe ca y cha chë palabrenga tojánayana ca.

### *Jesús chabe uatsjëndayënga tojánebëbuacna*

*(Mt 28.16-20; Mc 16.14-18; Lc 24.36-49)*

<sup>19</sup> Tojanibétata ora, cach semana bojatsenté, chë uatsjëndayënga tmojánenefjna canÿe luarentše, pero lempe tmojtanatame, chë judiëngbiama auatja causa. Chora Jesús tojánamashëngo, chëngbe tsëntsaca tojantsá y mëntšá tojanacheuá: “Chë atšbe ainaniñe tšabe ebionana tšëngaftangftaca chaotsema ca.”

<sup>20</sup> Y chca tojanëyana ora, chabe cucuatšënga y costillaca tojaninÿanyé. Chora chë uatsjëndayënga oyejuayënga imojtsemna, chëngbe Utabná tmojáninÿama. <sup>21</sup> As Jesús cachiñe tojanëyana: “Chë atšbe ainaniñe tšabe ebionana tšëngaftangftaca chaotsemna. Ntšamo atšbe Taitá Bëngbe Bëtsá šojichmocá, átšnaca cachcá tšëngaftanga cbontšachamná ca.”

<sup>22</sup> Chca tojánayana ora, chëngbioye tojangouo y tojanëyana: “Chë Uámana Espiritu šmochjóyëngacñe. <sup>23</sup> Ndëmuanÿenga chëngbe bacna soyëngama chašmojáperdonanga, perdonánënga mochántsmëna; y ndoñe chašmonjáperdonasna, ndëperdonánënga mochántsemna ca.”

### *Tomás, Bëngbe Utabnábioye ainá tbojáninÿe*

<sup>24</sup> Pero Tomás, chë Gemelo ca uabobainá, canÿa chë bnëtsana uta uatsjëndayënguentsá, chë uatsjëndayëngaftaca ndoñe yontsemna, Jesús tojánashjango ora.

<sup>25</sup> Chíyeca, “bënga chë Utabná fsënjinÿe ca”, chë inÿe uatsjëndayënga tmojaniana ora, Tomás tojanëjua: “Atše chabe cucuatšinë chë uajabonjana uinÿniñe ndoñe sënjinÿe, y chiñe atšbe ntšabuafja ndoñe sënjajué y atšbe cucuatše chabe costillaca ndoñe, ndoñe quichátošbuachiye ca.”

<sup>26</sup> Canÿe semana tojanochnëngo ora, chë uatsjëndayënga cachiñe canÿe luarentše tmojánenefjna. Y Tomásna chëngaftaca yojtsemna. Masque chentše atámeniñe yojtsemna, Jesús tojánamashëngo, chëngbe tsëntsaca tojantsá y tojanëyana: —Atšbe ainaniñe tšabe ebionana tšëngaftangftaca chaotsemna ca.

<sup>27</sup> Chora Tomásbioye tbojaniana: —Acbe ntšabuafja muentše mojué y atšbe cucuatšbe minÿe; acbe cucuatše miyëbo y atšbe costillaca mojué. Y ndošbuachiyá ndoñe matsmënana, sinó atše tijtayenama cochtsošbuáchiye ca.

<sup>28</sup> As Tomás tbojaniana: —¡Atšbe Utabná y atšbe Bëtsá ca!

<sup>29</sup> Chora Jesús tbojaniana: —Tomás, nÿe šconjínÿeyeca cojtsošbuaché. ¡Bëngbe Bëtsá chaoma puerte oyejuayënga chamotsemna chë nÿe ntjinÿcá tmojošbuachenga ca!

### *Ndayama quem librëša tmojánábema*

<sup>30</sup> Jesús, chabe uatsjëndayëngbe delante inÿe bëts soyënga Bëngbe Bëtsabe obenánaca tonjëftsema, pero quem librëšañe ndoñe quenatábemana. <sup>31</sup> Y quem librëšañe soyëngna, entsábemana tšëngaftanga chašmotsošbuáchemá, Jesús, chë Cristo y Bëngbe Bëtsabe Uaquiñá bëtsemnama; y chcase, chábeñe chašmojtsošbuachese, chábeyeca chë nÿetsca tescama yomna tšabe vida chašmotsebonnama.

## 21

*Jesús, canyësëfta chabe uatsjédayënga tojánebübuacna*

<sup>1</sup> Chca tojanopasá chentšana, Jesús inye soye chabe uatsjédayënga tojánebübuacna, Tiberias mar béjaye tsachañe. Chora mëntśá tojanopasá: <sup>2</sup> Cányëntse imojétsemna Simón Pedro; Tomás, chë Gemelo ca uabobainá; Natanael, chë Galilea luarocá, Caná pueblocá; Zebedeobe uaquiñata y Jesusbe inye uta uatsjédayata. <sup>3</sup> Simón Pedro chënga tojanëyana: —Sëntśá beonga jashebuáyama ca.

As chënga tmojanjuá: —Bëgnaca ácaftaca fchanjá ca.

As tmojána y canye barquëshoye tmojánamashjna; pero chë ibeta tondaye tmojáninýena. <sup>4</sup> Ya yojtsebínýana orna, Jesús chë tsachoca yojtsemna, pero chë uatsjédayënga ndoñe imontsetátśëmbo cha Jesús yojamnama. <sup>5</sup> Chora Jesús tojanatjá: —Básenga, ¿tondaye šmonjashbuá ca?

Y chënga tmojanjuá: —Tondaye ca.

<sup>6</sup> As Jesús tojanëyana: —Barquëshá catsbioica chë atarraiëshá mëtsena y beonga šmochanjáshebuaye ca.

As chënga chca tmojanma, y chora chëshá jtabocnama ndoñe imontsobena, nyetśá beonga tmojánishëche causa. <sup>7</sup> As chë Jesusbe bonshana uatsjendayá, Pédrëbioye tbojaniyana: “¡Bëngbe Utabná entsemna ca!”

Simón Pedro chca soye tojanuena y cachora entsáyá tojtaníchëtjo, er nduichëtjoná yojtsemna, y chë béjayoye tojanoshbuetsë. <sup>8</sup> Chë inye uatsjédayëngna chë barquëshañe tmojána, y chë atarraiëshá jútjena beóngaca imojtsásjaye, er chë tsachocama bécoñe imojtsemna, nye canye patse metroca. <sup>9</sup> Fshantsoye tmojánastjajna ora, chënga tmojáninýena canye chebániñe pormániñe, y chentśna canye beona y tandëšnaca yojtsesegorana. <sup>10</sup> Chora Jesús tojanëyana: “Chë šmonjáshebuaye beonguentšana báseftanga miyëbo ca.”

<sup>11</sup> Simón Pedro chë barquëshoye tojánamashëngo, y chë atarraiëshá jútjena bëts beóngaca, uasjoónana tsachóntsoñe tojanëyamba. Mo canye patse y shachna bnëtsana y unga beóngaca; pero masque nyetśá beonga, chë atarraiëshá ndoñe ntjuatanëcanana.

<sup>12</sup> Chora Jesús tojanëyana: “Mabënga, šmochjase ca.”

Chë uatsjédayënguentšana ni canya yontsenñémua cha jatjayama nda cha yojamnama, er nyetscanga imojtsetátśëmbo cha chë Utabná bëtsemnama. <sup>13</sup> Chora Jesús tojanobeconá, chë tandëse tojanca y chënga tojanatśatá, y chë beónacnaca cachcá tojanma.

<sup>14</sup> Chóracna, Jesús ya unga soyama chabe uatsjédayënga yojtsanebübuacana, obanënguentšana tojtanayenentšana.

*Jesús, Simón Pédroftaca tojanoyebuambá*

<sup>15</sup> Jasama tmojanpochocá ora, Jesús, Simón Pédrëbioye tbojantjá: —Simón, Juanbe uaquiñá, ¿quemëngbiama más quešcbobonshana ca?

Y Pedro tbojanjuá: —Atśbe Utabná, aíñe. Aca condëtatśëmbo atśe aíñe cbondbobonshánama ca.

As Jesús tbojaniyana: —Atśbe entsanga, mo oveshatemëngcá imomnënga, cochtsanýena ca.

<sup>16</sup> Chora cachiñe tbojantjá: —Simón, Juanbe uaquiñá, ¿quešcbobonshana ca?

Y Pedro tbojanjuá: —Atśbe Utabná, aíñe. Aca condëtatśëmbo atśe aíñe cbondbobonshánama ca.

As Jesús tbojaniyana: —Atśbe entsanga, mo oveshëngcá imomnënga, cochtsanýena ca.

<sup>17</sup> Y unga soyama tbojtëtantjá: —Simón, Juanbe uaquiñá, ¿quešcbobonshana ca?

Pedro puerte tbojanongmé, ya unga soyama “quešcbobonshana ca” tbojantjá causa; y tbojanjuá: —Atśbe Utabná, aca lempe condëtatśëmbo. Aca condëtatśëmbo atśe aíñe cbondbobonshánama ca.

As Jesús tbojaniyana: —Atśbe entsanga, mo oveshëngcá imomnënga, cochtsanýena.

<sup>18</sup> Ndegombre cbëyana: Más bobontse conjamna ora, conjanamana cach aca jtichëtjuana



y ndēmoye jama cojtseboše choye jtsoñana; pero tanguá chacojtsemna orna, buacu-atšënga cochanjatsbaná, y inya cmochantichëtjo y ndēmoye jama ndoñe chacontseboše choye cmochanjuánatse ca —Jesús tbojaniana.

<sup>19</sup> Chca tojánayana, ana jtsotatšëmbuama ntšamo Pedro jóbanama ibojamnama, y chë chca jóbanëse, Bëngbe Bëtsá corente bëtsá y obená bëtsemnama Pedro yochjáninñanñiyama. Y chca tojánayanentšana, Pédrëbioye tbojaniana: —Smasto ca.

*Jesusbe bonshana uatsjendayá*

<sup>20</sup> Pedro tojesanenostëtšantješë y tojáninñe, Jesusbe bonshana uatsjendayá ústonoye vojtsaye. Cha enjamna chë monjansá ora, Jesús cabá ndóbana ora, chë Jesúsbioye más tonjanosjoná y tbonjantjá: “Bëngbe Utabná, ¿nda chë boshjuaná yochtsemna ca?”

<sup>21</sup> Pedro chábioye tbojáninñe ora, Jesúsbioye tbonjantjá: —Atšbe Utabná, y cháftaca, ¿ntšamo yochjopása ca?

<sup>22</sup> Chora Jesús tbojanjuá: —Atše quem luaroye jesabámëntscuana cha ainá chauesomñama atše stsebošëse, ¿aca ndayá chama cmatjátsëntšamna? Acna nñe šmasto ca.

<sup>23</sup> Chíyeca, chentšana, Jesucristbeñe ošbuáchiyëngbenache nñetscanga imojánichamo, chë uatsjendayá ndoñe yochanjanóbana ca. Pero Jesusna ndoñe chca tonjánayana, sinó “atše quem luaroye jesabámëntscuana cha ainá chauesomñama atše stsebošëse, ¿aca ndayá chama cmatjátsëntšamna? ca”.

<sup>24</sup> Mua endmëna chë uatsjendayá; cha entsichamo quem soyënga ndegombre yojamnama, y camuá quem librësañe lempe tonjuábema. Y bënga mondëtatšëmbo cha ndegombre soye endóyebuambnama.

<sup>25</sup> Jesús inñe ba soyënga tonjëftsema; tša bëtsá soyënga endmëna, nderado lempe cada canñe soye tcojuábema y librësangá tcojuapormá, atše sëntsejuabná, nñetsca chësangá quem luarentše ndoñe nanjuába.

## Hechos

### *Jesús tojanasebuachená chë Uámana Espíritu jíchmuama*

<sup>1</sup> Teófilo, atšbe natsana librěšaňe tcbonjuábobema lempe ntšamo Jesús tojanmama y tojánabuatambama, chca tojanbojatsé orscana, <sup>2</sup> y Běngbe Bětsá celoye tbojtanatsbanantscuana. Cabá celoye nděta orna, chë chabe ichmoněngcá tojanabacacá boyabásengna Jesús tojěftsanaměndá, chë Uámana Espíritbiajana, ndayá jamama yojánamnama. <sup>3</sup> Jesús cruciňe tojanóbana y tojtanayenentsana, ba soye chë ichmóněnga yojáneběbuacana, chca, chěnga jinýanyiyama cha ndegombre tojtanayenama. Canta bnětsana tentscuana cha yojáneběbuacana y Běngbe Bětsabe aměndayama chěnga yojanabuatambá.

<sup>4</sup> Canýe, Jesús chabe ichmóněngaftaca yojětsemna ora, měntšá tojanaměndá: — Jerusalenentsana ndoňe šmatjábocana. Camuentše šmochjobátma, ntšamo atšbe Taitá tcmónjanašebuachenacá chaóshjanguěntscuana, ndayama atše tcbonjúyana. <sup>5</sup> Ndegombre, Juan entsanga bėjayeca tonjaněbaye; pero ndoňe baytesna, Běngbe Bětsá chë Uámana Espíritu bochanjíchmuá, tšěngaftangbe ainaniňe jtsemándayama cháuamashěnguama ca.

### *Jesús celoye tojtantsjuá*

<sup>6</sup> Canýe, chë ichmóněnga Jesúseftaca cánýiňe imojtsemna ora, chěnga tmojantjá: — ¿César y chë Romoquěngbe aměndayentsana tašcochjatsebacá, y mora běnga, Israeloca entsanga, canýe Rey quemochtsatsbomna ca?

<sup>7</sup> As Jesús tojaněyana: —Tšěngaftanga ndoňe quecmátamna chë soyěngama jtsetatšěmbuana. Nýe atšbe Taitá aiňe; y cha, chabe obenánaca echanjamánda mocna ora y ndayté chca chaopasama. <sup>8</sup> Chë Uámana Espíritu tšěngaftangbe ainaniňe jtsemándayama chaojabo ora, tšěngaftanga obenana šmochanjóyěngacňe. Chentšana, ntšamo atšbíama šmotatšěmbcá, chë tcbonjabuatambá soyěnga, entsanga šmochjúyana Jerusalenentše, nýets Judea luariňe, Samarioca y quem luarentša nýets luarěnguenáchnaca ca.

<sup>9</sup> Chë soyěnga tojánayanentsana y chabe uatsjěndayěnga imojtsonýaye ora, Běngbe Bětsá, Jesúsbioye tbojtanatsbaná y canýe jantšetěshe chábioye ibojútsbotse y ndoňe más tmonjanobená cha jinýama. <sup>10</sup> Jesús celoye yojtsetsjuama chěnga bën imojtserreparáněntscuana, nýe ndeolpe, uta boyabásata uafjantse entšayaca bopormánata chěngbe juachaca tbojabántsaye, <sup>11</sup> y chěngbioye tmojaněyana: “Galileoca entsanga, ¿ndáyeca celoye šmojtsantješana? Jesús, chë tšěngaftangftaca enjammá celoye tontá y ntšamo mora šmonjinýcá cha celoye jtama, cachcá quem luaroye cha echanjésabo ca.”

### *Júdasbe cuenta Matías tmojanábuayana*

<sup>12</sup> Jesusbe ichmóněnga chë Olivos tjashocana Jerusalenoye tmojtaná. Chë tjocana Jerusalenóntscoňna bécoňe inamna, ndayěntscoca canýe ochnayté jama yojanlesenciana nýetšá. <sup>13</sup> Jerusalenoye tmojtanashjajna orna, chë yebnentša tsbanánoca tsoye tmojtanásěngo. Chentše yojánatana Pedro, Juan, Santiago, Andrés, Felipe, Tomás, Bartolomé, Mateo, Santiago chë Alfeobe uaquiňá, Simón chë Celote ca uabobainá, y Judas, chë Santiagbe uaquiňá. <sup>14</sup> Chěnga sempre imojanamana jtenefjnana Běngbe Bětsáftaca jencuěntama básefta shembásengftaca, María Jesusbe mamá y Jesusbe catšátangftaca.

<sup>15</sup> Chë tempo tmojánenefjna canýe patse y uta bnětsana Jesucristbeňe ošbuáchiyěnga, y canýe, Pedro tojantsá y tojaněyana: <sup>16</sup> “Jesucristbeyeca atšbe catšátanga, endáněyta ntšamo Běngbe Bětsabe uabemana palabrěnguiňe iuabemancá chaochněnguama, y tempo, David chë Uámana Espíritbeyeca chiňe tojanábema ntšamo Júdasftaca yochjanopásama; chcasna, Judas uayayěnga tojaněnatse Jesús chamuishachama. <sup>17</sup> Júdasnaca

bëngbe enutá enjamna y Jesús chábioynaca tbonjanábuayana bëngcá chabe trabajuíne jtsoservénama. <sup>18</sup> Tšëngaftanga šmondétatsëmbo, chë Judas bacna soye tojanmama tmojtanabuená crocenánacna fshantse tmojánbuamema. Chentšana cha tojtsanótsatše y chabe bestšaše tsëntsaca tbojtsanashtétšena y chabe uafsbentšana nyetsca chabe chunchullëjuangá tojtsanáshana. <sup>19</sup> Jerusalemëntše oyenënga chë soyama tmojántatsëmbona ora, chë fshantse chëngbe biyañe Acéldama ca tmojanabaye. Acéldama endayana ‘Buiñe Luare ca’. <sup>20</sup> Salmos librëšañe, Jesucristo uayayëngbe cucuatšinë boshjuanabiama mëntsá enduábemana:

Chabe yebna éñañe chaotsemna

y ndocná chentše chaondëtsiyena ca.

Y mëntsánaca endayana:

Chabe cuenta inÿa chabe trabajo chaoma ca.

<sup>21</sup> “Chcasna, mora muentše montsemna taitanga bëngaftaca mondenutënga, Bëngbe Utabná Jesús bëngaftaca enjamnëntscuana, <sup>22</sup> Juan Jesúsbioye tbonjanabaye orscana y Bëngbe Bëtsá Jesúsbioye bëngbentšana celoye tbontanatsbanantscuana. Y mora šontsamna canÿa mënguentšá juabuáyanama, Jesús tojtanayenama entšángbioye bëngaftaca jábuayenama ca.”

<sup>23</sup> As chora útata tmojanabocacá: José, nda Barsabás ca imojanábobuatma y ínÿengna Justo ca; y chentšana Matías. <sup>24</sup> Chora Bëngbe Bëtsáftaca mëntsá tmojanencuentá: “Bëngbe Utabná, aca nyetscangbe ainana icuabuatma; chcasna, šminÿanÿé nda quem útatentšana cochjuábuayanana, <sup>25</sup> canÿe ichmonacá Júdasbe cuenta chaotrabajama. Judas ya ndoñe canÿe ichmoná quenátsmëna, bacna soye tojama causa, y cha mora yojtsemna chë ndayentše jtsemnama ibomna luaroca ca” —chënga tmojánayana.

<sup>26</sup> Y nda chë ichmoná yochtsemnama jtsotatsëmbuamna tsbanánoye tmojanëtšena y Matías tbojanobuache; as cach orscana, Jesucristbeñe ošbuáchiyënga chabiama imojanjuabná mo canÿe Jesusbe ustonacá, cachcá ntšamo chë bnëtsana canÿe uatšëndayëngbiama chënga imojanjuabnacá.

## 2

### *Chë Uámana Espíritu ošbuachiyëngbeñe tojánamashëngo*

<sup>1</sup> Pentecostés ca uabaina fiesta tojanobuache ora, chë jaja sananga tmojanobuátbanama fiesta te, Jesucristbeñe ošbuáchiyënga nyetscanga cánÿiñe canÿe luarentše imojtsemna. <sup>2</sup> Ndeolpe, celocana mo canÿe jabuache binÿiëcá yojtsaishauenana y chca, tša jabuache shauenanana tojanóshjango nyets yebnentše, chënga imojtsetbiámanentše. <sup>3</sup> Y chora bichtajënga mo inëshcá yojónÿna y canÿánÿabeñe yojojátaye. <sup>4</sup> Chca chë Uámana Espíritu tojánamashëngo chëngbe ainaniñe jtsemándayama; chora nyetscanga tmojanontsé inÿetšá biyangana, chënga tempo ndmabiyañe, ntšamo chë Uámana Espíritu yojtsamcá chënga inÿetšá chamotsebiyama.

<sup>5</sup> Chë tempo Jerusalemëntše imojtsemna ba judiënga, Bëngbe Bëtsá puerte adórayënga, nyets luarëngocana áshjajnënga; chënga tmojánabo Bëngbe Bëtsá jëtschuayama. <sup>6</sup> Entšanga chë shauenanana tmojanuena ora, tmojanójoto y ndoñe imontsetátšëmbo ntšamo jtsejuabnayana ndayá yojtsopasánama, er chë inÿe luarocana áshjajnënga imojtsuenana chë Jesucristbeñe ošbuáchiyënga inÿetšá biyangana jtsóyebuambnayana, ntšamo cada ona chënga imojanbiyacá. <sup>7</sup> Chë soyëngama entšanga puerte imojenjaná y mëntsá imojtsenatsëtsnaye: “Chë chca montsóyebuambnanga Galileoquënga mondmëna. <sup>8</sup> Chcase, ¿ntšámoyeca bënga imojtsobena chënga joyaunayana cach bënga mondëbiyacá ca? <sup>9</sup> Muentše montsemna Partioquënga, Medioquënga, Elam, Mesopotamia y Judeoquënga, Capadocia, Ponto y Asia luaroquëngnaca, <sup>10</sup> Frigioquënga, Panfilia, Egiptó y Libia, chë Cirene béconana luaroquënga. Báseftangna Romoquënga montsemna;

<sup>11</sup> chëngbeñe nderado judiënga camuentše onÿnánënga, pero ínÿengna ndoñe, y chënga Bëngbe Bëtsá mondbëtsatschuanaye cach ntšamo chë judiënga monduamancá. Inÿengna Cretocana y Arabiocánënaca tmojabo. ¡Y bënga montsobena chë Galileoca judiënga joyaunayana Bëngbe Bëtsá bëts soyënga tojamama cach bënga mondëbiyacá ca!” —chë entsänga imojtsichamo.

<sup>12</sup> Chë causa nÿetscanga imojtsenjnanaye y ntšamo jtsejuabnayama ntsetatšëmbcá imojtsemna y imojtsentjanaye: “¿Ndayá chë soye yojsayana ca?”

<sup>13</sup> Pero ínÿengna, chë soyëngama chëngbioye imojtsëbayajuana y imojtsichamo: “Chënga tëmiënga montsemna ca.”

### *Ntšamo Pedro chora tojanoyebuambá*

<sup>14</sup> Chentšana, Pedro tojantsá chë inÿe bnëtsana canÿe ichmónëngaftaca y jabuache tojanontšé chë entsänga jáuyanana, mëntšá: “Atšbe entsänga judiënga y nÿetscanga Jerusale-  
nentše oyenënga, tšabá šmochjouena. Ntšamo tojopasama cbochanjábuayenaye, as  
chacmësertama. <sup>15</sup> Tšëngaftanga šmontsejuabná atše y atšbe enutënga tëmiënga fstsemna  
ca, pero ndegombre, tëmiënga ndoñe queftsátmëna; cabá cachëse, base mošenana ora  
ctsomñe. <sup>16</sup> Pero ntšamo entsopasánamna, Bëngbe Bëtsabe juabna oyebuambnayá Joel  
mëntšá tojanábema:

<sup>17</sup> Bëngbe Bëtsá mëntšá tojánayana: ‘Quem luare jopochócama te chaojtsobeco ora, chë  
soyënga echanjochnëngo.

Atše chanjama, atšbe Espíritu nÿetscangbe ainaniñe cháumashënguama.

Chentšana, tšëngaftangbe uaquiñënga y bemianga atšbe soyëngama entsänga  
mochantsëtsëtsnaye;

tšëngaftangbe bobontsëngna, atše chanjama soyënga mochantsonÿaye mo otjenayoquëcá;  
y tšëngaftangbe bëtsëjëmëngna atšbe soyënga mochantsotjénaye.

<sup>18</sup> Chca ora, atše chanjama nÿetsca atšbe oservénëngbiama, boyabásenga y shembásenga,  
chëngbe ainaniñe atšbe Espíritu cháumashënguama,  
as chënga atšbe soyëngama entsänga mochantsëtsëtsnaye.

<sup>19</sup> Atše chanjama bëts soyënga celoca;

y quem luariñe echántsemna buiñe, íñeshe y ngona mo jantšetëshcá, atšbe obenana  
jinÿanÿiyama.

<sup>20</sup> Cabá chë puerte uámana te, chë Bëngbe Utabná bëts soyënga jamama ndobuache ora,  
shinÿe ndoñe queochátsbuashinÿinÿana

y juashcona buánganëtema mo buiñcá echántsemna.

<sup>21</sup> Y as, ndánaca Bëngbe Utabná tbojtsotšëmbuaná, cha bochanjatsbocá.’

Chca Joel tempo tojanábema ca” —Pedro tojánayana.

<sup>22</sup> Chora Pedro tojatanëyana: “Israeloquënga, šmochjouena ntšamo cbochan-  
jauyancá: Bëngbe Bëtsá ndegombre tcmonjaninÿanÿé, Jesúsbioye chabe trabajo bi-  
amnayá cha tbojánbemama. Chë soye Bëngbe Bëtsá tcmonjaninÿanÿé, Jesús chë Nazare-  
tocáftaca cha tojanma bëts soyëngaca y ójnanana soyëngaca, Bëngbe Bëtsabe obe-  
nana jinÿanÿiyama. Cach tšëngaftanga chë soyëngama šmondëtatšëmbo, Bëngbe Bëtsabe  
obenánaca chë soyënga tšëngaftangbeñe Jesús tonjánmayeca. <sup>23</sup> Ndegombre tšëngaftangbe  
cucuatsiñe Jesús tmonjánboshjona, pero cabá ndëboshjona ora, Bëngbe Bëtsá tojanjuabó  
ntšamo jopásana yojamnama; y ntšamo tšëngaftanga cháftaca šmochjanmámna cha  
inatátšëmbo. Tšëngaftangna Jesús šmonjanishache y šmonjanma cha chamóbama y  
chamocrucificama, bacna entsangbe cucuatsiñe. <sup>24</sup> Pero Bëngbe Bëtsá tojama cha  
cháuatayenama; y chë obanëngbe luarentšana tbojatsbocá, er ndoñe yonjopodena cha  
obaná chaoquedama ca” —cha tojánayana.

<sup>25</sup> Chora Pedro tojatanëyana: “Rey David tempo Jesusbiamma mëntšá tojëftsanabema,  
ntšamo cha Bëngbe Bëtsábioye tbojaniyanama:



Atšbe Utabná, aca sempre átšeftaca condbétsemna,  
y sempre átšeftaca condboquedá atše juajabuáchama,  
chíyeca ndocná queochatobenaye atše jauátjanama.

<sup>26</sup> Chíyeca atše corente oyejuayá sěntsemna,  
y atšbe uayášaca cbontsatschuaná.

Atše masque chanjóbana, tšabá sěndětatsěmbo aca atšbe Bětsá, atše chaitayenama  
cochjamama.

<sup>27</sup> Aca, Běngbe Bětsá, obaněngbe luarentše ndoñe quešcochátsboshjona,  
y ndoñe queochatsleséncia acbe uámana oservenabe cuerpo chaotsopochocama.

<sup>28</sup> Aca chě tšabe benache šconjaninýinýé, ntšamo tšabe vida jtsebomnama.

Aca átšeftaca condbétsemnama, atše puerte oyejuayá sěntsemna ca —David  
tojěftsanabema ca.”

<sup>29</sup> Chentšana Pedro tojataněyana: “Baconga y batanga, šontsemna ndegombre  
tšěngaftanga jábuayenana tšabá chacmėsertama. Běngbe tempsca běts taitá David to-  
janóbana y tmojanatbontsá, y běnga montsemna cha tmojanatbontsá luare béconana.

<sup>30</sup> Cach David canýe Běngbe Bětsabe juabna oyebuambnayá inamna. Cha tšabá  
inatátšěmbo Běngbe Bětsá bětská tbojanšbuáchenama, Davidbe entšanguentšana canýa,  
Cristo, cach Davidcá rey jabemama. <sup>31</sup> David inatátšěmbo chě Uámana Uabuayaná,  
chě Cristo, cháuatayenama Běngbe Bětsá yochjanmama. Chama cha tojánayana y  
tojěftsanabema, obaněngbe luarentše Cristo ndoñe ntjěftseboshjonana y Běngbe Bětsá  
ndoñe ntjalesénciana chabe cuerpo chaotsopochocama ca. <sup>32</sup> Běngbe Bětsá tojama Jesús  
cháuatayenama y běnga cha fsěnjinye. Chíyeca běnga fsěntsetatsěmbo chca ndegombre  
bétsemnama. <sup>33</sup> Běngbe Bětsá, Jesús celoye tbontanatsbaná chabe catšbioica jtsatsmėnama  
jtsemándayama, y Běngbe Bětsá chě Uámana Espíritu Jesúsbioye tbojaněntšabuaché ntšamo  
chě Taitá tbojanšbuachenacá. Ntšamo tšěngaftanga šmontsonýá y šmontsuenancá  
entsemna, Jesucrísoftaca chě Uámana Espíritu běngbe ainaniñe cháuamashėnguama Běngbe  
Bětsá tojámayeca. <sup>34</sup> David ndoñe Jesuscá celoye tonjána, pero měntšá tojěftsanábema:

Běngbe Bětsá atšbe Utabná Crístbioye tbonjaninyana:

‘Atšbe catšbioica cochtsetbemana,

<sup>35</sup> acbe uayayěnga acbe cucuatšinye chamoquedama atšbe obenánaca chjaměntscuana ca.’

<sup>36</sup> Chora Pedro tojataněyana: “Tšěngaftanga nýets Israeloquěnga šmochtsetátšěmbo,  
atše ndegombre cach Jesusbiana sěntsóyebuambnama. Cha tšěngaftanga  
šmonjancrucificá, pero Běngbe Bětsá chábioye tbonjábema Běngbe Utabná y chabe Uámana  
Uabuayaná, chě Cristo ca.”

<sup>37</sup> Chě soyěnga tmojanuena ora, entšanga cochtsetšenáněnga imojtsemna, y Pedro y  
chě inýe ichmóněngbiyoye tmojaněyana: —Baconga, ¿ndayá mora jamama šojtsamna ca?

<sup>38</sup> As Pedro tojanějua: —Ngmėnaca šmochtenójuaboye bacna soyěnga šmojtšamama,  
chca amana šmochtsajbaná y Běngbe Bětsabe benache šmochtishache. Chca  
chašmojama ora, chochanjubaye mo chábeñe ošbuachiyěngcá, Jesucristo atše  
jótšěmboněse. Chcase, Běngbe Bětsá tšěngaftangbe bacna soyěngama cmochanjáperdonaye  
y echanjama chě Uámana Espíritu tšěngaftangbe ainaniñe jtsemándayama  
cháuamashėnguama. <sup>39</sup> Běngbe Bětsá chě soyěnga tcmonjanašebuachená tšěngaftangbiama,  
tšěngaftangbe básengbiama y nýets chě bėn luarėnguenache imomna entšangbiama,  
nýetscanga chě Běngbe Utabná Běngbe Bětsá chábioye jabama chaojubuáyaněnga ca.

<sup>40</sup> Inýe palabrėngnaca Pedro tojataněyana y bětská tojanabuayená měntšá: “¡Běngbe  
Bětsá chě Israeloca bacna entšanga echanjácastigaye. Chašmótsbocamna, chěngbentšana  
šmochtsojuánañe ca!”

<sup>41</sup> Ba entsanga imojtsanošbuaché ntšamo Pedro tojanéyanama y tmojánenabaye. Cach te mo unga uaranga entsanga nyetsá tmojanoboté, Jesucristbeñe ošbuáchiyënga jtsemnama. <sup>42</sup> Chënga corente imojtseboše jtsamama chë Jesusbe ichmónënga imojtsabuatambá soyënga. Tšabá yojsacochebiona nyetscanga cányiñe jtsemnama y imoijanamana mo chë Jesucristbeñe ošbuachiyëngcá cányiñe jtsesayana y cányiñe Bëngbe Bëtsáftaca jtsencuéntayana.

### *Ntšamo chë natsana Crístbeñe ošbuáchiyënga vida imnabomna*

<sup>43</sup> Nyetscanga imojtsenjanaye, chë ichmónënga bëts soyënga y inyë soyënga chabe obenana jinñanñiyama chamomama Bëngbe Bëtsá tojánmayeca. <sup>44</sup> Nyetsca chë Jesucristbeñe ošbuáchiyënga sempre cányiñe mo canñacá imojtsemna y nyetsca chëngbe bomna soyënga nyetscangbiamama yojtsemna. <sup>45</sup> Chënga imoijanamana fshantsënga jtsatobuñyana y chë imojánbomna soyëngnaca, y chë crocénana jujátayana ntšamo chë ínñyënga tojtsëjabotcá. <sup>46</sup> Cada te imoijanamana Bëngbe Bëtsabe bëts yebnentše jénefnana cha jëtschuayama, y yebnënguenache cányiñe imojtsetsaye oyejuayënga y ndoñe ojëndayënga. <sup>47</sup> Chënga imoijanamana Bëngbe Bëtsá jtsatschuanayana, y nyetsca entsanga imojtsejuabnaye chë Jesucristbeñe ošbuáchiyëngbiamama tšabe entsanga imoiamna ca. Y cada te Bëngbe Bëtsá yojsama más ošbuáchiyënga chamóbotema, chë ndëmuanñyënga cha yojsatsebacayënga.

## 3

### *Pedro canñe coshétbioye tbojanshná*

<sup>1</sup> Canñe te, Pedro y Juan Bëngbe Bëtsabe bëts yebnoye tbojánata bëts mošenana ora. Chca ora entsanga imoijanamana Bëngbe Bëtsáftaca jtsencuéntayana. <sup>2</sup> Bëngbe Bëtsabe bëts yebnentše canñe cosheto yojtsemna; tojanonñná orscana chca šocá inamna. Entšanga imoijanamana cada te cha juanatsana canñe luaroye, Bëngbe Bëtsabe bëts yebnoca, Botamana Amashjuana ca uabáinoye, chë tmojtsachñëjuanënga lemošna chaótejañama. <sup>3</sup> Pedro y Juan Bëngbe Bëtsabe bëts yebnoye jamashënguama chë cosheto tojánanñe ora, canñe lemošna chátbioye yojótejañe. <sup>4</sup> Chatna chë šocá imojtsonñyaye, y Pedro tbojaniyana: “Scochtsëñyaye ca.”

<sup>5</sup> As cha yojsëñyaye y yojtsejuabnaye ndayá chjójyëngacñe ca. <sup>6</sup> Chora Pedro tbojaniyana: “Quetsátsbomna ni crocénana, ni castellano aca jatsetayama, pero atše chanjama Jesucristbe obenánaca ndayá acbiamama jamama atše stsobencá: Jesús chë Nazaretocá obenana endbomna; chíyeca atše cbëyana chabe mándoca, matëtsbaná y cochtsana ca.”

<sup>7</sup> Pedro chca tbojaniyana ora, tbojanábuacueshache catšbióicatše y tbojtanatsbaná, y cachora chë cosheto shecuatšñe y shëmiabeñe añemo yojsatsbomna. <sup>8</sup> As chë cosheto, canñe jontsëñjese tšabá tojtantsá y tojanontsé tšabá jtsanana, y Bëngbe Bëtsabe bëts yebnoye Juan y Pédroftaca tojánamashëngo; yojsayontsëñjnaye y Bëngbe Bëtsá ibojtsatschuanaye, tbojanshnama. <sup>9</sup> Chë Bëngbe Bëtsabe bëts yebnentše imojétsemnënga nyetscanga cha tmojáninñe tšabá jtsanana y Bëngbe Bëtsá jtsatschuanayana. <sup>10</sup> Chënga imnatátšëmbo cha chë cosheto yojamnama, chë nda yojanamana Bëngbe Bëtsabe bëts yebnoca, chë Botamana Amashjuanentše jótbemana, entsanga lemošna jotejañama. Cha tšabá yojsatsmënamna entsanga ojanánënga imojtsemna.

### *Ntšamo Pedro tojanoyebuambá Salomonbe Amashjuana ca uabáinentše*

<sup>11</sup> Chë cosheto ya shnaná ora, ndoñe yontseboše Juan y Pédrëbentšana joluárana. As, nyetsca entsanga ojanánënga tmojanótjajo chë amashjuana otsbojebniñe, Salomonbe Amashjuana ca uabáinoye, chë Juan, Pedro y chë cosheto shnaná imojétsemnoye. <sup>12</sup> Pedro chë entsanga tojánanñe ora, tojanéyana: “Taitanga y mamanga, Israeloquënga, ¿ndáyeca chë soyëngama ojanánënga šmojtsemna? ¿Ndáyeca nyë scojtsëbuátja? ¿Šmojtsejuabná

nÿe bëndatbe obenánaca quem boyabása tiffashná ca? ¿O šmojtsejuabná quem boyabása tiffashná bëndata Bëngbe Bëtsá puerte tšabá ftsadoránayeca? <sup>13</sup> Bëngbe Bëtsá, ndábeñe Abraham, Isaac y Jacob imojanošbuaché y ndábeñe bëngbe bëts taitanga imojanošbuaché, cha tonjinÿanÿé chabe oservená Jesús chë más uamaná yomnama. Cha tšëngaftanga chë mándayëngbe cucuatšíñe šmonjánboshjona chamóbama. Pilato enjëtseboše Jesús jëtsboshjonama, pero tšëngaftanga Pilatbe delante šmonjánayana chca ndoñe šmontsanboše ca, y chíyeca Pilato ndoñe tbontanboshjona. <sup>14</sup> Jesús uamaná y nÿetsca soyënguiñe tšabá amá enjamna, pero tšëngaftangna cha šmontsanaboté y Pilato šmonjanimpadá chabe cuenta canÿe boyabása, entšá obanayá, chabuatsboshjonama. <sup>15</sup> Y chca, chë ndegombre tšabe vida chašmotsebomnama amábioye tšëngaftanga šmonjanóba. Pero Bëngbe Bëtsá tojanma cha cháuatayenama y bënga chë soye fsënjáninÿe y chama fsëndétatsëmbo. <sup>16</sup> Jesús puerte obená endménayeca, quem cosheto añémoca entsatsmëna. Ntšamo šmonjinÿe y šmonjatatsšëmbonca ndegombre tonjopasá Jesúsbeñe betsošbuáchema. Chë Jesúsbeñe jtsošbuáchiyana tonjama cha tšabá tšëngaftangbeñe chaotsatsmënama.

<sup>17</sup> “Taitanga y mamanga, atše sëndétatsëmbo tšëngaftangbe causa y tšëngaftangbe amëndayëngbe causa Jesús tojanóbanama. Pero tšëngaftanga chca šmojanma, ndayá šmojétsamama ntsetatsëmbcá. <sup>18</sup> Tempo, Bëngbe Bëtsá chë chabe juabna oyebuambnayënga tojanamëndá entšanga jábuayenama, chë Bëngbe Bëtsabe Uámana Uabuayaná puerte ngménana yochtsanbomnama. Morna, ntšamo Bëngbe Bëtsá tojanayancá ya tonjochnëngo. <sup>19</sup> Chcasna, ngménaca menójuabonga bacna soyënga šmojtsamama, chca amana šmochtsajbaná y Bëngbe Bëtsabe benache šmochtishache, chca, tšëngaftangbe bacna soyënga cha chacmabuajuánama. Chca chašmojamëse, Bëngbe Bëtsá echanjama tšëngaftangbe ainaniñe oyejuayana chašmotsóbomñama, <sup>20</sup> y tšëngaftangbioye bochanjíchmuá Jesús, chë tempo chabe Uámana Uabuayaná Bëngbe Bëtsá tbojanbemá. <sup>21</sup> Canÿe te echanjóshjango, Bëngbe Bëtsá lempe tsmëmácá jëtsbemama. Chë tentscuana Jesús bontsemna celoca joquédana. Chca echanjochnëngo ntšamo Bëngbe Bëtsá chabe juabna oyebuambnayëngbiajana entšanga tojanabuayenacá. <sup>22</sup> Moisés bëngbe bëts taitanga tojanabuayená: ‘Chë Utabná Bëngbe Bëtsá canÿe chabe juabna oyebuambnayá ntšamo atše sëndmëncá, cmochanjayentšíchmuá. Cha tšëngaftangbentšana echanjábocna y tšëngaftanga cmontsamna ntšamo chacmojtsëtsëtsnacá cha jtseyeunanana. <sup>23</sup> Ndánaca chábioye ndoñe chabonjoyeuná, cha bontsemna chë Bëngbe Bëtsabe entšángbentšana luaroca jtsemnama y chamotsepochochocama ca’ –cha tojánayana.

<sup>24</sup> “Y nÿetsca chë Bëngbe Bëtsabe juabna oyebuambnayëngnaca Samuel orscana, entšanga tmojanabuayená ndayá quem tempo yochjanchnënguama, ntšamo mora montsonÿacá. <sup>25</sup> Chabe juabna oyebuambnayëngaftaca Bëngbe Bëtsá tojanašebuachená bëts soyënga tšëngaftangbiama, y tšëngaftangbe bëts taitángaftaca canÿe trato tojánbema; chë soyënga cabá tšëngaftangbiama entsemna. Bëngbe Bëtsá Abrahámioye mëntšá tbojanianya: ‘Chë ácbentšana entšángbeyeca tšabe bendicionënga chanjama nÿetsca quem luarentša entšangbiama ca.’ <sup>26</sup> Bëngbe Bëtsá tojama chabe oservená cháuatayenama y natsana tšëngaftangbioye tbojanichmó, bacna soyënga amana chašmotsajbanama. Y chca, Bëngbe Bëtsá jamama tšëngaftangbeñe tšabe bendicionënga chaotsemnama ca” – Pedro tojánayana.

## 4

### *Pedro y Juan Jerusalenentša mandadëngbe delante*

<sup>1</sup> Pedro y Juan cabá entšanga imojtsëtsësnaye; chorna chë chata ibojtsemnoye tmojánashajna judiëngbe bachnanga, Bëngbe Bëtsabe bëts yebnentša soldadëngbe amëndayá y saduceo ca uabaina judiëngbe amëndayënga. <sup>2</sup> Chatna entšángbioye imojtsabuátambaye Jesús tojtanayenama y chë soye yojánayana obanënga ndegombre

mochtayena ca. Chë causa, chë tmojánashjajna amëndayënga tojánetëna. <sup>3</sup> As, Pedro y Juan tmojánishëche y ya jetiñe yojtsemna causa, cárceloye tojanëtame yëfsanëntscuana. <sup>4</sup> Masque chca, banga entsanguentsana, ntšamo Pedro y Juan tbojanayancá tmojanuenënga, aiñe Jesucristbeñe imojtsošbuáchiye. Chë tentscuana shachna uaranga Jesucristbeñe ošbuáchiyënga imojtsemna, nÿe boyabásenga jacuéntase.

<sup>5</sup> Yëfsana, chë judiëngbe amëndayënga, judiëngbeñe bëtsëjemëngcá amëndayënga y ley abuátambayënga Jerusalenentše tmojánenefjna. <sup>6</sup> Chéntšnaca imojtsemna, chë bachnangbe más uámana amëndayá Anás ca uabainá, Caifás, Juan, Alejandro y chë bachnangbe más uámana amëndayëngbe nÿetsca pamíllangnaca. <sup>7</sup> Chora chënga tmojanmandá Pedro y Juan junatsama, y chëngbe tsëntsaca tojanatsá y mëntšá tmojanatjá: —¿Ndabe obenánaca chë soyënga šojtsama, o, nda derecho tcmënjatšatá chë soyënga chašotsamama ca?

<sup>8</sup> As Pedro, chë Uámana Espíritu chabe ainaniñe corente jtsemándayëse, mëntšá tojanëjua: —Israeloca mándayënga y bëtsëjemënga, <sup>9</sup> mënté šconjatjá chë jama ndobenáftaca tšabe soye tifjamama y ntšamo cha mora jama yojtsatobenama. <sup>10</sup> Chcasna, ntšamo tojopasama cbochanjabuayená, chca, tšëngaftanga y nÿetsca Israeloca entsanga chë soyënga chašmotsetatšëmbuama. Quem boyabása, chë tšëngaftangbe tsëntsaca entsemná, Jesucristo chë Nazaretocabe bëts obenánaca chca tšabá entsatsmëna. Y Jesús endmëna nda tšëngaftanga šmonjancrucificá y ndabiamama Bëngbe Bëtsá tojanma cháuatayenama. <sup>11</sup> Jesusbiamama Bëngbe Bëtsabe uabemana palabrënguiñe mëntšá endayana: “Chë yebna jebuanënga tmonsanaboté ndëtšbé, mora chë más bëts uashacuanësentše entsejájona ca”. Tšëngaftanga šmondmëna mo chë yebna jebuanëngcá, er Jesúsbioye šmonsanaboté y mora cha chë más uamaná entsemna. <sup>12</sup> Nÿe cha yobena tšëngaftanga játsebacama. Bëngbe Bëtsá ndocna inÿe entsábioye tbonjatšetá chabe obenana chca jamama; chíyeca quem luarentše ndocná más quenátobena bënga játsebacama. Nÿe Jesucristbe obenánaca aiñe ca —Pedro tojánayana.

<sup>13</sup> Chënga imojenjnaná Pedro y Juan tša añémoca ibojtsóyebuambnama tmojáninÿe ora, y chata tempo nduatsjínÿenata y libréša nduabuatmata bëtsemnana tmojántatšëmbona ora. Chca chë mándayënga tmojántatšëmbona chata Jesúseftaca bayté ibojamnama. <sup>14</sup> Y entsanga imojtsonÿaye chë tmojanshná cha chentše chátaftaca yojtsemnana; chë causa, chënga ndocá más tmonjanobená chatbe contra jatichámuana. <sup>15</sup> As chora tmojanamëndá chentšana chábuaisebocnama y chentše tmojanoquedangna chë soyama imojtsenatsëtsnaye. <sup>16</sup> Chënga imojtsentjanaye: “¿Ndayá chátaftaca mochjama ca? Jerusalenentše oyenënga montsetatšëmbo chata chë bëts soye Bëngbe Bëtsabe obenánaca tbojamama; chë causa, bënga ndoñe quemuátobena jayanana chata chca ndoñe tbonjama ca. <sup>17</sup> Pero entsanga chama ndoñe más chamondëtsencuéntamna, chata mochjáuyana: ‘Ndoñe más entsángbeñe Jesús šmattsebáyana; y ndoñe chašmonjouenëse, jabuache castigo šochántsebomna ca.’ ”

<sup>18</sup> As chë mándayënga cachiñe chata tmojánachembo y tmojanamëndá ndoñe más Jesús jtsebáyana, ni chabiamama entsángbeñe jtsabuátambayana. <sup>19</sup> Pero Pedro y Juan tbojánayana: “¿Ntšamo tšëngaftanga šmatjayana ntšamo fchanjayanama ca? Ndegombre, Bëngbe Bëtsabe bominÿiñe ndoñe tšabá quenátsmëna tšëngaftangbioye aiñe joyaunayana y chábioye ndoñe. <sup>20</sup> Er bënga queftsátobena jtsajbanana oyebuambnayana chë tifjinÿe y tifjouena soyëngama ca.”

<sup>21</sup> Chë mandayëngna chátbioye tojtsanautatjá, pero chentšana tmojtanabáshejuana. Nÿetsca entsanga Bëngbe Bëtsá imojtsatschuanaye ntšamo tojanopasama; chíyeca, chë mándayënga ndoñe tmonjanobená tondaye ntjinÿenana ntšamo chata jácastigama. <sup>22</sup> Chë boyabása, ndáftaca chata chë bëts soye Bëngbe Bëtsabe obenánaca tbojanma, inabomna canta bnëtsana uatama más.

*Jesucristbeñe ošbuáchiyënga Bëngbe Bëtsá tmojanimpadá más añemo chauatšatama*



<sup>23</sup> Pedro y Juan ya tmojtanabáshejuana ora, tbojánata chë inÿe ošbuáchiyëngaftaca jaten-inÿenama y lempe ntšamo chë bachnangbe amëndayënga y bëtsëjemëngcá mándayënga chátbioye tmojanëyancá, chëngbioye tmojanacuntá. <sup>24</sup> Chënga chca tmojanuenentšana, nÿetscanga cánÿiñe tmojanontšé Bëngbe Bëtsáftaca mëntšá jencuéntama: “Bëngbe Utabná, aca chë nda tojama celoca, fshantse, nÿetsca béjayënga y lempe ntšamo chenache yomncá, <sup>25</sup> chë Uámana Espíritbiajana tcojánayana y acbe oservená David, ntšamo tcojanayancá tojanábema, mëntšá:

¿Ndáyeca entšanga yapa imojtsetšátjaye ca?

¿Ndáyeca imojtsejuabná nÿe bonamentiamá soyënga jamana?

<sup>26</sup> Quem luarentša reyënga y amëndayënga imoprontánënga, nÿetscanga tmojenoyeuná Bëngbe Bëtsá y chabe Uámana Uabuayaná chë Cristbe contra jtsemnama ca —cha tojanábema.

<sup>27</sup> “Ndegombre chca tonjopasá. Rey Herodes y Poncio Pilato, quem bëts pueblentse, ndoñe judiëngaftaca y israelitëngaftaca tmonjánenefjna, jenóyeunayama ntšamo jamana, Jesús chë acbe uámana oservená y chë Uámana Uabuayaná tcojabemábioye jóbama.

<sup>28</sup> Tempo, Bëngbe Bëtsá, acbe obenánaca y ntšamo icnabošcá tcojanmandá ntšamo mora chaotsemnama, y chënga chca Jesúseftaca tmonjama. <sup>29</sup> Morna Bëngbe Bëtsá, mouena ntšamo chënga montsichamo, bënga jasúfriama cašojtsamna ca; chcasna, cochjama bënga fchayobená Jesusbe tšabe noticiënga bëts añémoca entšángbeñe jtsóyebuambnayama, <sup>30</sup> y cochjama acbe obenánaca šoquënga tšabá chamotsatsmënema y cochjama bënga fchayobená bëts soyënga jamama, Jesús chë uámana oservenabe obenánaca y cha jótšëmbonëse ca” —chënga tmojánayana.

<sup>31</sup> Bëngbe Bëtsáftaca jencuéntama tmojanpochocá orna, chë tmojánenefjntšë tojanangmëmmana; y nÿetscangbe ainaniñe chë Uámana Espiritu tojanontšé más jtsemándayana, y chënga tmojanontšé más añémoca Bëngbe Bëtsabe soyëngama entšanga jábuayenama.

### *Nÿetsca bomna soyënga nÿetscangbiama yojtsemna*

<sup>32</sup> Jesucristbeñe ošbuáchiyënga, nÿetscanga canÿe juabna imojtsebomna y ainaniñe cach canÿe ebionana. Ndocná ntjatichamuana chabe soyënga nÿe chabiamá yojtsemna ca, pero aíñe imojtsichamo, “atše sëndbomna soyënga nÿetscangbiama entsemna ca”. <sup>33</sup> Chë Jesusbe ichmónëngna puerte obenánaca mëntšá imojtsichamo: “Fsënjinÿe y fsëntsetatšëmbo Bëngbe Utabná Jesús obanënguentšana tojtayenama ca.” Y Bëngbe Bëtsá yojtsama chë ichmónënga bëtscá tšabe bendicionënga chamotsebomnama. <sup>34</sup> Jesucristbeñe ošbuachiyëngbeñe ndocná yonjamna ndayánaca uajabotá, er nÿetscanga fshantse o yebna bomnënga imojanamana jtsatobuíyana, y chë crocénana <sup>35</sup> chë ichmónëngbioye jayentšbuáchiyana, ntšamo tojtsëjbotcá nÿetscanga jujátayama. <sup>36</sup> Chca tojanma canÿa Bëngbe Bëtsabe bëts yebnoca trabajayá, José ca uabainá; cha chë ichmónënga imojanábobuatma Bernabé ca (y chca iuayana “Añemuayá ca”). Bernabé yojamna Chipre luarocá. <sup>37</sup> Chana, fshantse yojtsatobuiye, y chë crocénana Jesusbe ichmónëngbioye yojáyentšbuachiye, chë uajabótëngbiama chaoservema.

## 5

### *Ntšamo Ananías y Safiraftaca tojanopasá*

<sup>1</sup> Inamna canÿe bacó, Ananías ca uabainá, y chabe shemna, Safira ca. Chatna canÿe fshantse tbojániye. <sup>2</sup> Ananías y Safirna tbojanenóyeunata; chcasna, batšá crocénana cachatbiama tbojanobuajó y chë tojanójama crocénana ichmónëngbioye Ananías tojanamba, pero tojanëyana chana canjamna nÿets crocénana ntsachetšá chë fshantsama tbojanosháchiñe ca. <sup>3</sup> As Pedro tbojaniyana: “Ananías, ¿ndáyeca tcojalesenciá Satanás acbe ainaniñe bacna juabnënga chacmócochënguama, Uámana Espiritu chë crocénanama

jabuambayama ca? Acna chë fshantsama tcmojtabuená crocenánentsana cach acbiama batśá tcontábojama. <sup>4</sup> Cabá ntsatobuiye ora, chë fshantse ácbeshe endánmëna y tcojtsatobuíyentsana chë crocénana acbiana y chánaca condánobena ntśamo tcojtseboścá jamama. ¿Ndáyeca acbe ainaniñe tcojajuabó chë crocenánama chca jobostérama? Chca jamëse, ndoñe nýe entsángbioye quecatabuambná, sinó Bëngbe Bëtsánaca ca” —Pedro tbojanियana.

<sup>5</sup> Ananías chë palabrënga tojanuena ora, obaná tojánshajaye. Y nýetscanga chama tmojántatsëmbonënga corente imojtsauatja. <sup>6</sup> Chentsana, básefta bobontsënga tmojánashjajna y Ananíasbe cuerpo entsëjuaca tmojanandmaná y jauátbontsama tmojanamba.

<sup>7</sup> Mo unga horëntscose, Ananíasbe shema Safira tojánashjango, pero ndoñe yontsetátšëmbo ntśamo chabe boyáftaca tojanopasama. <sup>8</sup> Chora Pedro tbojantjá: —Ndegombre šmëyana, ¿chë šmonjayana nýetsnama chë fshantse šmojiye ca?

As chë shema tbojanjuá: —Aíñe, nýetsnama fsënjiye ca.

<sup>9</sup> Pedro tbojanियana: —¿Ndáyeca tsëndata šojenoyeuná Bëngbe Utabnabe Espiritu jabuambayama, y cabá castigo jtsebomnama ndoñe šontsobatmana ca? Acbe boyá jauátbontsama tmonjuambënga muentše bësoca montsemna y mora ácnaca cmochanjuamba ca.

<sup>10</sup> Cachora Safira Pédrëbe shecuatsëntse obaná tojánshajaye. Chë bobontsënga tmojtanamáshjna ora, obaná Safira tmojáninýena; asna, chentsana tmojanamba y cachabe boyabe juachaca tmojanatbontśá. <sup>11</sup> Y nýetsca Jesucristbeñe ošbuáchiyënga chentše imojtsemnënga y nýetscanga chë soye tmojántatsëmbonënga, corente imojtsauatja.

### *Ba bëts soyënga chë ichmónënga tmojanma, Bëngbe Bëtsabe obenana jinýanyiyama*

<sup>12</sup> Chë Jesucristbe ichmónëngaftaca ba bëts soyënga entsángbeñe yojtsebinýna Bëngbe Bëtsabe obenana jinýanyiyama; y nýetsca Jesucristbeñe ošbuáchiyënga imojanamana Bëngbe Bëtsabe bëts yebnoca jénefnana, Salomonbe Amashjuana otsbojebnentše.

<sup>13</sup> Chë ínýenga, chë Jesucristbeñe ndošbuáchiyënga, imojtsauatja Jesucristbeñe ošbuáchiyëngaftaca jtse nutana; pero entsangna chë ošbuáchiyëngbiana tśabá imojtsencuëntaye. <sup>14</sup> Bëngbe Utabnábeñe ošbuáchiyënga más imojtsóbotena, bëtscá boyabásenga y shembásengnaca. <sup>15</sup> Tśa bëts soyënga chë ichmónëngaftaca yojtsebinýna; chíyeca entsanga imojanamana jutsnëshangañe y tjuashënguiñe tsáshenoye šoquënga jubuacnana, chca, Pedro chëjana tojtsachnëjuana ora, nýe mo chabe sómbrenaca chëngbe cuerpëjana chaochnënguama, shnánënga jtsatsmënana. <sup>16</sup> Jerusalén chábuañe pueblënguentsana ba entsanga imojanamana jabana, y šoquënga y bacna bayëjbe juabna uambayënga imojtsëyabó; y nýetscanga shnánënga imojtsatsmëna.

### *Bëngbe Bëtsá tojanma Pedro y chë inýe ichmónënga cárcelocana natjëmbana chámuaisebocnama*

<sup>17</sup> Chë ichmónënga tśa tśabá imojtsamama, chë judío bachnangbe más uámana amëndayá y chabe ústonënga, chë saduceunga, puerte envidia imojtsebomna. <sup>18</sup> As chë ichmónëngbioye tmojánishëche y chë bëts pueblentśa cárceloye tojtsanëtame. <sup>19</sup> Pero ibetna, Bëngbe Utabná canýe ángel tbojanichmó y chë utámenentśa bëšašangá cha tojánatëfjo, chënga tojtanëbuacna y mëntśá tojanëyana: <sup>20</sup> “Motsajna, Bëngbe Bëtsabe bëts yebnentše šmochjámashjna, y entsanga šmochjabuayená ntśamo cuanjama chë nýetsca tescama yomna tśabe vida jtsebomnama, Jesucristoftaca cánýiñe mo canýacá jtsemnëse ca.” <sup>21</sup> Ntśamo tmojanuencá, yëfsana cabá cachëse Bëngbe Bëtsabe bëts yebnoye tmojána y tmojanontśé entsanga jabuátambana.

Chëntscuana, chë bachnangbe más uámana amëndayá y chabe ústonënga, chë Israeloca bëtšëjemëngcá mándayënga y inýe chentśa amëndayënga tmojánachembo jénefnama y

jenóyeunayama; as chora chënga tmojanmandá chë utámenocana chë ichmónënga jobiatšama. <sup>22</sup> Pero chë soldadënga chë utámenoye tmojánashjajna ora, chënga chentše ndoñe tmonjánanýena. Chcasna, chënga tmojtaná chë mándayënga chca jaúnayama. <sup>23</sup> Y tmojánayana: “Chë utámenoca fsënjínýena lempe tsabá endëtsëtámeñe y soldadëngna nyetsca bëšašangá monduabojanyanga; pero fsënjatëfjo y tsoye fsënjámashjna orna ndocná chibiátinýena ca.”

<sup>24</sup> Chë bachnangbe amëndayënga y chë Bëngbe Bëtsabe bëts yebnentša soldadëngbe amëndayá chca tmojanuena ora, yojtsëtëmnana y imojtsentjanaye ndayá chentšana yochjanopásama. <sup>25</sup> Chorna, chënga imojtsemnentše canýe boyabása tojánashjango y mëntsá tojanéyana: “Chë šmojutámiënga mora Bëngbe Bëtsabe bëts yebnocca montsemna, entšanga montsabuatambá ca.”

<sup>26</sup> Chë soldadëngbe amëndayá tojána soldadëngaca, chë Jesusbe ichmónënga junatsama; pero nýe tsabá tmojanënatse, er chënga entšangbiamma imojtsauatja, nderado cachëngbioye ndëtsbéngaca muantsëbaye. <sup>27</sup> Chëngbioca tmojanëshejajna ora, mandayëngbioye tmojanënatse; chora chë bachnangbe más uámana amëndayá mëntsá tojanéyana: <sup>28</sup> —Bënga jabuachana tcbontsëuyaná y tcbonjáuyana ndoñe šmontselesenciana jtsóyebuambnayama chë boyabása Jesús tojánayana yojtsemna jabuátambama soyëngama ca. Masque chcasna, mora tsëngaftanga nyetsca chë Jerusalenentša oyenënga chabe soyëngama šmojtسابuatambá y šmojtseboše, cha tojanóbanama castigo bëngbeñe chaotsemnana ca.

<sup>29</sup> Chorna, Pedro y chë inýe ichmónënga tmojánayana: —Bënga šontsamna natšana Bëngbe Bëtsá joyeunayana y chentšana entšangbioye. <sup>30</sup> Chë Taitá, nda bëngbe bëts taitanga monjánadorana, cha tojama Jesús cháuatayenama, chë nda tsëngaftanga šmonjanóba canýe cruciñe juajabonjëse. <sup>31</sup> Bëngbe Bëtsá tbontatsbaná y chabe catšbioica tbojëtstbema, jtsamëndayama, y tbojábema entšangbe Unachayá y Atsebacayá, chca, Israeloca entšanga ngmënaca chamuenójuaboma bacna soyënga imojtsamama y chca amana chamotsajbanama, y chëngbe bacna soyëngama perdonánënga chamotsemnana. <sup>32</sup> Bënga fsëntsichamo ndayá bënga ndegombre tifjinýe Bëngbe Bëtsá chca jtsamana ca; chë Uámana Espíritnaca chë soyëngama endbëtsoyebuambnaye. Bëngbe Bëtsá endbëtsama chë Uámana Espíritu cháuamashëngo chë tmojtseyeunanënga ainaniñe jtsemándayama ca —chënga tmojánayana.

<sup>33</sup> Chë mándayënga chca tmojanuena ora, puerta tmojanotjayaná y tmojánbošena chë ichmónënga jtsëbáyama. <sup>34</sup> Pero chë mándayënguentše yojtsemna canýe fariseo, Gamaliel ca uabainá. Chana canýe ley abuatambayá inamna y entšanga puerta imnarrespetana. As cha tojantsá y tojanmandá chë ichmónënga ratotema chentšana jubuacnama. <sup>35</sup> Chentšana chë inýe mándayënga tojanéyana: “Israeloca taitanga, puerta cuedado šmochtsebmna ntšamo quem boyabásengaftaca šmochjamama. <sup>36</sup> Quem soyama šmochjenójuaboje: Ndoñe bayté quenátsmëna, Teudas tonjánbocna y cha enjánichamo canýe uámana entšá canjamna ca, y mo canta patse entšanga cha tmojanasto. Pero chora inýënga cha tmontsanóba y chabe ústonënga tmontsanáshana, y chca lempe tontsanopochocá. <sup>37</sup> Chentšana, chë entšanga jenábemama enjamna ora, Judas chë Galileocá tonjánbocna y tonjanma báseftanga cha chamuastama; pero chánaca inýënga tmontsanóba y nyetsca chabe ústonënga tmontsanáshana. <sup>38</sup> Chíyeca atše cbéyana, quem boyabásenga matabáshejuana y ndocá mataborlánana. Ntšamo chënga montsamancá, nýe entšangbe juabna y nýe chëngbe trabajo tojtsemnëse, betscó echanjopochóca. <sup>39</sup> Pero chca Bëngbe Bëtsabe soye tomnëse, tsëngaftanga ndoñe quešmochatobenaye jáyëñjanama. Cuedado šmochtsebmna, nderado mo Bëngbe Bëtsabe uayayënga šmuatjanenobiama ca” —cha tojanéyana.

Y as chënga Gamaliel tmojanoyeuná. <sup>40</sup> Chcasna, chë ichmónëngbioye tmojánachembo, tmojtšanachebuárganja y tmojanéyana Jesusbe uabáinaca entšangbeñe ndoñe cha-

mondëtsoyebuambná ca; y chentšana tmojtanabáshejuana. <sup>41</sup> Chora chë ichmónënga chë amëndayëngbentsana puerte oyejuayënga tmojésanbocna, er Bëngbe Bëtsá tojanalesenciá jasúfriama, chënga Jesusbiana oservénënga bëtsemnayeca. <sup>42</sup> Chentšana, chënga cada te imojanabuatambá y Jesús, chë Uámana Uabuayaná, chë Cristo bëtsemnama entšángbioye imojanabuayiyná, Bëngbe Bëtsabe bëtš yebnentše y yebnënguenáchnaca.

## 6

### *Chë ichmónëngbiana ujabuáchanënga tmojanëbuáyana*

<sup>1</sup> Chë tempo, Jesucristbeñe ošbuáchiyënga betscó imojtsóbotena. Chora chë Jesucristbeñe ošbuachiyëngbentše, chë judiënga griego biyanga batsá imojtsetšátjaye y chë judiënga hebreo biyangbiana mëntšá tmojánayana: “Chë griego biyangbe viudángbioye ndoñe cachcá quemnatëjabuáchana ntšamo chë hebreo biyangbe viudángbioye cada te montsëjabuachancá ca.”

<sup>2</sup> Asna, chë bnëtsana uta ichmónënga nyetsca chë Jesucristbeñe ošbuáchiyënga tmojanëbuaja y tmojanëyana: “Ndoñe tšabá quenátsmëna, bënga jtsajbanana Bëngbe Bëtsabe palabra oyebuambnayana nye chë viudanga jtsanyënama chë tojtsëjaboto soyënguiñe. <sup>3</sup> Chcasna, baconga y batanga, tšëngaftanguentšana canyësëftanga mëbuáyana, tšabá mandbomnëngcá šmëbuátmënga, chamotsemna osertánënga y chë Uámana Espiritu chëngbe ainaniñe chaotsemánda, as chënga chë ujabótënga jtsëjabuáchanama trabajo fchanjábanyiye. <sup>4</sup> Y bëngna šontsamna nyets tempo Bëngbe Bëtsáftaca jtsencuëntayana y Bëngbe Bëtsabe palabra entsanga jtsabuayiynayana ca” –chënga tmojánayana.

<sup>5</sup> Nyetscanga tojanogusetá ntšamo chë ichmónënga tmojanayancá; as, Esteban tmojanábuayana; canye boyabása puerte ošbuachiyá cha inamna y chë Uámana Espiritu chabe ainaniñe yojanmánda. Chentšana tmojanëbuáyana Felipe, Prócoro, Nicanor, Timón, Parmenas y Nicolás (cha inamna ndoñe judío entsá, Antioquía bëtš pueblócá, y cha yojanamana Bëngbe Bëtsá jtsadoránana mo cach judiëngcá). <sup>6</sup> Chentšana chënga tmojanënatse Jesucristbeñe ichmónënga imojtsemnoye; chocna, chë Jesusbe ichmónënga Bëngbe Bëtsá tmojanimpadá chë ichmónëngbe trabajënguiñe chë ubuáyanënga chaújabuachama, chëngbe cucuatšënga chëngbe bestšašentše jajájuase.

<sup>7</sup> Más banga Bëngbe Bëtsabe palabra imojtsuenana, y chca, Jesucristbeñe ošbuáchiyënga más imojtsóbotena, y Jerusalenentše más ošbuáchiyënga betscó imojtsóbotena. Y ba judiëngbe bachnángnaca tmojanontšé Jesucristbeñe jtsošbuáchiyana, ntšamo chë ínënga imojtsanošbuachecá.

### *Esteban tmojánishache*

<sup>8</sup> Esteban, Bëngbe Bëtsabe obenana y chábentsana tšabe bendicionënga yojtsebomnëse, entšángbeñe bëtš soyënga yojtsama. <sup>9</sup> Báseftanga “Ya Cachcá Atabashejuana Oservénënga ca” uabainëngna tmojanontšé Estébanoftaca enatsëtsnayana. Chënga imojamna judiënga Cirenoquënga, Alejandroquënga, Cilicia y Asioquëngnaca, y chëngbe enefjuana luare yojanabaina “Ya Cachcá Atabashejuana Oservénëngbe Yebna ca”. <sup>10</sup> Pero chë Uámana Espiritu tojanma Esteban chaóyebuambama bëtscá osertanacá, y chíyeca chënga ndoñe imontsobena ntšamo cha jojuana. <sup>11</sup> As chënga báseftanga tmojanëbuénaye Estébanbe contra podesca soye chamuayanama, mëntšá: “Cha fsënjoyeuná Moisesbiana y Bëngbe Bëtsabiana ndoñe tšabá jtsóyebuambnayana, mo cuafjoyanguangcá ca.” <sup>12</sup> Chcase chënga tmojanma entsanga, bëtšëjemëngcá mándayënga y ley abuatambayënga Estébanbe contra chamóntša enbouenanana; y as, Esteban tmojanotbá y chë mándayënga imojtsemnoye imojuichëmo. <sup>13</sup> Y tmojanënatse básefta entsanga, uayátsenaye soyënga y podesca soyënga Estébanbe contra chamuayanama; as chënga mëntšá tmojánayana: “Mua bacna soyënga entsichamo chë Bëngbe Bëtsá jtsadoránama bëtš yebnama y Moisesbe leyëngama. <sup>14</sup> Y fsënjoyeuná cha jayanana, Jesús Nazaretocá Bëngbe Bëtsabe bëtš yebna caochtsepochoáca



y caochjama bēnga n̄ye chabe mandēngaca mandánēnga chamotsiyenama y ndoñe ntšamo Moisés bēngbe bēts taitanga tojēftsanabuatambacá ca.”

<sup>15</sup> Chē mándayēnga y n̄yetscanga chentše imojétsetbiamanēnga Esteban tmojanon̄ȳin̄yé ora, tmojánin̄ye chabe jubíá yojtsebuashin̄ȳin̄yana mo can̄ye ángelbe jubiacá.

## 7

### *Ntšamo Esteban tojanen̄eyaná*

<sup>1</sup> Chora chē bachnangbe más uámana amēndayá, Estébanbioye tbojantjá: —¿Ntšamo acbiana montsichamcá ndegombre yojtsemna ca?

<sup>2</sup> As Esteban tojan̄jú: —Taitanga y baconga, mouenēnga. Bēngbe Bētsá, chē corente uamaná endmēná, Abrahámbioye tbojánēbēbocna, cha Mesopotamioca yojaniyena ora; tbojánēbēbocna, Harán bēts pueblocá joyénanama cabá nda ora, <sup>3</sup> y Bēngbe Bētsá tbojaniyana: “Metseboshjona acbe fshantse y acbe pamíllanga y cbochanjin̄ȳin̄ȳiye luaroye cochjá ca.” <sup>4</sup> As Abraham chabe luare Caldea tojēftsanboshjona y tojána Haránoca joyénanama. Chabe taitá tojanóbanentšana, Bēngbe Bētsá Abrahámbioye chē luaroye tbojanánatse, chē mora tšēngaftanga šmontsiyenentše. <sup>5</sup> Pero quem luariñe ni mo base fshantse ndoñe tbonjēftsanatšetá, ni mo ndayentše jtsiyenama. Pero aĩñe Abrahámbioye tbojanšbuachená chē fshantse jatšetayama, chabiana y chabe básengbiana, Abraham tojóbanentšana. Chca tbojanšbuachená ora, Abraham ni can̄ye šešona bonjánbomna. <sup>6</sup> Y Bēngbe Bētsá mēntšá tbojaniyana: “Chē ácbentšana entšanga, ín̄yēngbe luaroca áshjajnēnga mochántsemna, y choca oyenēnga chēngbe oservēnēnga chēngbioye mochanjábiana y canta patse uatēntscuana jabuache mochanjasufrina ca.” <sup>7</sup> Y mēntšánaca tbojaniyana: “Pero atše chanjácastigaye chca oservēnēnga chacmojábiana luarentša entšanga; y as, chentšana chē ácbentšana entšanga mochanjésebocana y mora bontsemna luaroye mochanjésabo y muentše atše šmochántadorana ca.” <sup>8</sup> Bēngbe Bētsá Abrahámbioye tbojanšbuachená n̄ye cha y chabe básēngbe Taitá cha jtsemnama y jamama tšabe bendicionēnga chēngbeñe chaotsemnama, y chama, chaotsin̄ȳnamna tbojanmandá chabe šešona, boyabásetema tojon̄yná ora, base bobachtema chē más delicadentše jatētšana. Chíyeca, chabe uaquiñá Isaac tojanon̄yná ora, posufta tianoye Abraham base bobachtema chē más delicadentše tbojantētše. Isaac cachcá tojanma chabe uaquiñá Jacóboftaca y Jacob cachcá tojanma chē chabe bnētsana uta uaquiñēngaftaca. Chēnga monjamna chē Israeloca bnētsana uta bēts pamíllangbe taitanga.

<sup>9</sup> “Quem uaquiñēnga bēngbe bēts taitanga monjamna. Chēngna, chēngbe uabentsá Josébioye envidia imnabomna y tmojtsatanobuiye, Egiptoye can̄ye oservenacá chamotsánatseñama. Pero Bēngbe Bētsá Josébioye n̄yets tempo ibnauájabuachana, <sup>10</sup> chíyeca n̄yetsca chabe ngmenēnguentšana tbojanatsbocá y Bēngbe Bētsá tojanma cha chaotsetatšēmbuama tšabá jóyebuambayama chē Egiptoca réybentše, Faraón ca uabainá. Bēngbe Bētsá tojanma chē Faraón chaoyejuá ntšamo José yojamnama; chíyeca Faraón Josébioye tbojánbema Egiptoca mandado y chabe yebnēnguentše oyenēngbiámna.

<sup>11</sup> “Chē tempo, Egiptó y Canaán luariñe bēts shēntsana tojanóshjango y puerta ngménana yojtsemna y bēngbe bēts taitanga ndoñe imontsobena saná jón̄yēnama. <sup>12</sup> Pero Jacob tojántatšēmbona Egiptoca saná yojtsemnama; asna, chabe uaquiñēnga, chē bēngbe bēts taitanga choye tojanichamó. Chora yojamna chē natsanama chēnga Egiptoye jama. <sup>13</sup> Uta soyama chēnga tmojtesaná ora, José chabe catsátanga tojan̄yana: ‘Atše José sēndmēna, tšēngaftangbe uabentsá ca.’ Chca chē Faraón Josebe pamíllangbiana tojántatšēmbona. <sup>14</sup> Chentšana, José tojanmandá chabe taitá Jacob y n̄yetsca pamíllanga Egiptoye chamotsama. Can̄ysēfta bnētsana shachnēnga imojamna chē Egiptoye tmojánanga. <sup>15</sup> Chcasna, Jacob Egiptoye tojána choca joyénanama. Choca cha tojanóbana y chē in̄ye bēngbe bēts taitángnaca. <sup>16</sup> Jacob y chabe básēnga,

ntšamo imojtsobancá, chëngbe cuerpo Siquem bëts puebloye imojtsatambaye y tmojanëtebuantsá, Abraham tojëftsanbuamé cuevëshënguine. Abraham canye crocenánama Hamorbe uaquiñëngbioye, chëshënga yojtëyentsbuamiñe Siquem puebloca.

<sup>17</sup> “Ntšamo Bëngbe Bëtsá Abrahambioye tbojanšbuachenacá jamama yojtsobeco ora, Egiptoca corente tmojanoboté Israeloca entšanga y banga chënga imojtsemna. <sup>18</sup> Cabana, Egiptoca inye rey tojanoyayé y cha Josébioye ndoñe tbonjanabuátmana. <sup>19</sup> Chë reyna, bëngbe entšanga, chë bëngbe bëts taitangbioye tojanaingñe y tojanma chënga puerta chamosufrima; tojanamëndá, chë tmojtsónyna šešonatémënga cachcá jtsënyayana chamotsóbanama. <sup>20</sup> Chë tempo canye básetema tojanonyna y cha Moisés ca tmojanabaye. Bëngbe Bëtsá Moisesbiana oyejuayá yojtsemna y chabe bëtsëtsata cach yebnentše tmojanboché unga ishinjëntscuana. <sup>21</sup> Cachcá jonýayama yojtsamna orna, Faraonbe bembe tbojanocñe y mo cachabe uaquiñá cuenta tbojanboché. <sup>22</sup> Chca, chë Egiptoquënga imnatátšëmbo soyënga Moisés tmojanbuatëmbá y canye uámana entšá tojánbocna jóyebuambayama y ndayánaca jamama.

<sup>23</sup> “Canta bnëtsana uata tojánashjache ora, tojanenojuabó jama jtsetatšëmbuama ntšamo chë Israeloquënga, chabe entšanga imojtsemnama. <sup>24</sup> Canye, Moisés tojáninye canye Egiptocá canye Israelocábioye ibojtsejantšetaye ora; as Moisés tbojanoboguiyaná y chë Egiptocábioye tbojtsanóba. <sup>25</sup> Moisés yojtsanjuabnaye chë Israeloquënga yojtsósertana, Bëngbe Bëtsá yochjanma cach Moisesbe obenánaca chë Egiptoca mandentsana chëngbioye játsebacama ca. Pero chë Israeloquënga ndoñe yontsësertana. <sup>26</sup> Yëfsana, Moisés tojánanyena útata, cach Israelocata, ibojtsentsjanaye; chora cha betscó tojána jetsëuyanama y tojanëyana: ‘Tsëndata catšata šondmëna, ¿ndáyeca šojtsentsjanata ca?’ <sup>27</sup> As, chë inýabioye ibojtsetsjanayá Moisésbioye tbojtsanajuatsëntše y tbojanianyana: ‘¿Nda bëngbeñe tcmënjajayé mandado y chë tšabá o ndoñe tšabá fstsamama chacuayanama ca?’ <sup>28</sup> ¿Cojtseboše átšnaca jóbama, ntšamo tonjopasá yëfse chë Egiptocábioye tconjobacá ca?’ <sup>29</sup> Moisés chca tojanuena ora, Madián luaroye tojtsanachá y choca yojoyena inye luarocana ashjanganacá. Chentše uta uaquiñata yojëftsabamna.

<sup>30</sup> “Chentšana canta bnëtsana uatëse, entšanga ndoyena luariñe, Sinaí tjañe béconana, canye ángel tbojánëbëbocna zarzësha yojtsángbototjuanentše. <sup>31</sup> Moisés yojenjnaná ndayá yojtsonyama y tšabá jinýama tojanobeconá ora, tojanuena Bëngbe Bëtsá mëntšá ibojtsatsëtsnaye: <sup>32</sup> ‘Atše acbe bëts taitangbe Bëtsá sëndmëna, Abraham, Isaac y Jacobëbe Bëtsá ca.’ Moisés chama tojanëuatjaná, ibojtsengmëmnyaye y añemo ndoñe yontse-bomna choye jontješiyama. <sup>33</sup> As Bëngbe Utabná tbojanianyana: ‘Motsenóshecbotsca, er aca contsemnentše nýe atšbiana luare endmëna, er átšnaca chentše sëntsemna. <sup>34</sup> Ndegombre sënjinýe ntšamo atšbe entšanga Egiptoca montsesufrina y sënjouena chëngbe oyaboyuayana, y atše sënjabo chënga jabátsebacama. Chcasna, mabouena, Egiptoye cbochanjíchmuca ca’ –Bëngbe Bëtsá tbojanianyana.”

<sup>35</sup> Chentšana Esteban tojanëyana: “Quem Moisés entšanga tmojtsanaboté y tmojanianyana: ‘¿Nda bëngbeñe tcmënjajayé mandado y chë tšabá o ndoñe tšabá fstsamama chacuayanama ca?’ Masque chca, Bëngbe Bëtsá mo mandayacá y atsebacayacá tbojesanichmó, chë zarzëshentše tojanobinyna ángeloftaca. <sup>36</sup> As Moisés, bëngbe bëts taitanga Egiptocana tojésanëbuacna y bëts soyënga tojanma, y inye soyënga Bëngbe Bëtsabe obenana jinýanýiyama Egiptentše, chë Buángana ca uabaina mar béjayentše y entšanga ndoyena luarentše, canta bnëtsana uatëntscuana. <sup>37</sup> Cach Moisés Israeloca entšanga mëntšá tojanëyana: ‘Bëngbe Bëtsá tšëngaftanguentsana canya bochanjábema atšcá Bëngbe Bëtsabe juabna oyebuambnyá ca.’ <sup>38</sup> Moisés Israeloca entšangaftaca yojëftsemna chë entšanga ndoyena luaroca. Choca chë entšanga tmojánenefjna Sinaí tjañe béconana. Chentšana canye ángel Moisésoftaca tojanoyebuambá, bëngbe bëts taitangbioye chë buayenana soye Moisés chaóyebuambama, chë entšanga tšabe vida jónýenama palabrenga; y Moisés chca tojanma, bëngnaca chë palabrenga jouenama jobenayama.

<sup>39</sup> “Pero bēngbe bēts taitanga ndoñe tmonjánbošena joyeunayama, masna n̄ye tmojtsanaboté y Egiptoje jesshéconama imojtsaiseboše. <sup>40</sup> Moisés cabá chē tja tsjuanoca chē ángeloftaca yojtsemna ora, chēngbe bachnangbe más uámana amēndayá Aarónbioye mēntśá tmojaniana: ‘Bēngbe Bētsabe cuenta šmayentšpormá can̄ye buashin̄yina soye jadórana, bēnga chašúnatsama. Er bēnga quemátstatšēmo ndayá yojtsopasana Moisés, chē Egiptocana šonjēftsēbuacnáftaca ca.’ <sup>41</sup> As tmojanma can̄ye buashin̄yina soye mo can̄ye uacnabecá y cha jadórana ba bayēnga tmojanēbaye, y tmojanóboyejuanga cachēnga chē soye tmojanpormáyea. <sup>42</sup> Chē causa, Bēngbe Bētsá chēngbentšana tojtsanojuánañe y cachcá tojesanēñyaye chēngbe bacna soyēnga causa, estrellatēmēnga chamotsadoránama. Chca jochnēnguama, Bēngbe Bētsabe juabna oyebuambayēngbe librēsañe mēntśá endayana, ntšamo Bēngbe Bētsá tojanayancá:

Israeloca entšanga,

¿Atše jētschuayama bayēnga chešmēnjanēbaye y chē soyēnga chešmēnjanátšēmbona, chē canta bnētsana uata entšanga ndoyena luarentše tšēngaftanga šmonjēftsemna ora?

<sup>43</sup> Atše jadóra cuentna, chē Molocbiana jebna soye šmonjanacutsá y cha šmonjánadorana,

y chē Refánbe estréllacnaca cachcá šmonjánama.

Chē soyēnga mo Bēngbe Bētsá cuenta šmonjánbomna y cach tšēngaftanga šmonjanobopormá jadórana.

Mora chē causa atše chanjama, Babilonientšana más chcoye tšēngaftanga chacmotsēnatsama ca” —chiñe endayana.

<sup>44</sup> “Bēngbe tempsca bēts taitanga entšanga ndoyena luaroca, chē jatsjacama opodena yebna imnabomna; chē yebnentše Bēngbe Bētsá chēngaftaca tojanoyebuambá. Inajebna ntšamo Bēngbe Bētsá Moisésbioye tbojanmandacá, y cha tojanma ntšamo chaojebuama Bēngbe Bētsá tbojanin̄yinecá. <sup>45</sup> Bēngbe bēts taitangna chēngbe taitāngbentšana chē jatsjacama opodena yebna chēngbiana tmojanóyēngacñe, y chēnga chē Canaán luaroye Josuéftaca, chē in̄ye luaroquēngaftaca jēntsjava tmojána ora, chē jebna soye tmojanamba y chocna, Bēngbe Bētsábeyeca chentša entšāngbioye Israeloquēngbentšana tmojtānēbuacna; y chē jebna soyna chē tmojanayēnjaná luarentše tojanoquedá, rey David yojēftsiyenēntscuana. <sup>46</sup> David tšabá mandbomná inamna, chíyeca Bēngbe Bētsá cháftaca puerta yotsóyejuaye. David chábioye lesencia tbojanotjañe jajebuama, Bēngbe Bētsá chē Jacob tbojanadorá cha, chentše chaotsiyenama. <sup>47</sup> Pero Salomón inamna nda chē Bēngbe Bētsabe bēts yebna tojanjebúá. <sup>48</sup> Masque chē celoca Bēngbe Bētsá, entšangbe jebna yebniñe ndoñe quenatiana. Ntšamo Bēngbe Bētsabe juabna oyebuambnayá tojanabemcá, ndayá Bēngbe Bētsá tojanayancá:

<sup>49</sup> ‘Celoca endmēna chē luare ndayentšana atše tsmánda,

y quem luare endmēna n̄ye mo can̄ye tšenētemcá ndayentše atšbe shecuatšēnga chjajaye.

As, ¿ntšamo atšbiana jebna yebna šmochjajebo ca?’ —chē Utabná jayanana—;

‘o ¿ndaye yebnentše atše jóchnama chjobenaye,

<sup>50</sup> ndegombre cach atše n̄yetsca chē soyēnga tijamēse ca?’ ”

<sup>51</sup> Esteban mēntśánaca tojanéyana: “Tšēngaftanga n̄yets tempo josértama ndēbošēnga šmondmēna; šmondbomna ainana mo chē Bēngbe Bētsábeñe ndošbuáchiyēngbe ainancá, y Bēngbe Bētsabe soyēngama nduauenanēnga šmondmēna. Tšēngaftanga ndocna te quešmátsboše chē Uámana Espiritu joyeunayana. Ntšamo tšēngaftangbe bēts taitanga monjaniancá, tšēngaftāngnaca cachcá. <sup>52</sup> ¿Bēngbe Bētsabe juabna oyebuambnayēnguentšana, ndábioye tšēngaftangbe bēts taitanga ndoñe monjanacmena? Chē Bēngbe Bētsá tojanichamó entšanga chēnga tmojtsanēbaye, y mēngna entšāngbioye imojanabuayiyiná Cristo, chē ntšamo Bēngbe Bētsá yobošcá amá yochjánabama. Pero morna,

uayayëngbe cucuatsiñe cha šmojábošhona y šmojóba. <sup>53</sup> Bëngbe Bëtsabe mandënga angelëngaftaca tšëngaftanga šmonjanóyëngacñe, pero chë soyënga ndoñe quešmátsyeunana ca” –cha tojanëyana.

### *Esteban ndëtsbéngaca tmojanóba*

<sup>54</sup> Chentša mándayënga chca tmojanuena ora, Estébanoftaca tmojanotjayaná y tmojanenaftëšbonzentsé, rábiaca imojtsemnama. <sup>55</sup> Pero chë Uámana Espíritu Estébanbe ainaniñe corente yojtsemádaye. Celoye yojontješiyë y Bëngbe Bëtsabe buashinÿinÿanana yojinÿe, y Jesús, Bëngbe Bëtsabe catšbioica yojtsatsana. <sup>56</sup> As, Esteban tojánayana: “¡Mouenënga, sëntsonÿá celoca entsatëfjna y Bëngbe Bëtsá Entšá tbojanbemá Bëngbe Bëtsabe catšbioica entsemna jtsamëndayama ca!”

<sup>57</sup> Chora chënga jabuache imojtseyoye, imojtsenamatsachto ndoñe más ntsue-nanama y Estébanbioye tmojanontsënja. <sup>58</sup> Chentšana, chënga chë pueblentsana tmojtsanáocna y ndëtsbéngaca tmojtsanatëchënganja. Chë Estébanbioye mal tmojanquedangna entsayangá tmojtsanenátsejca y canÿe bobontse, Saulo ca uabainá, tmojtsanábonÿiñe chaotsinÿenama.

<sup>59</sup> Ndëtsbéngaca imojtsénanantscuana, Esteban Bëngbe Bëtsáftaca ibojtsencuëntaye y mëntšá tojánayana: “Bëngbe Utabná Jesús, atšbe espíritu šmóyëngaca ca.”

<sup>60</sup> Chentšana Esteban tojanoshamentsé y jabuache tojánayana: “¡Bëngbe Utabná, chëngbe bacna soye motsaperdoná ca!” Y chca tojánayana ora, tojanóbana.

## 8

<sup>1</sup> Saulo chentše yojtsemna y tšabá imojtsama ca yojtsejuabnaye, Esteban tmojanóbama.

### *Saulo yojánama chë Crístbeñe ošbuáchiyënga chamotsesufrínama*

Cach te, inÿënga tmojanontsé Jesucristbeñe ošbuáchiyënga Jerusalenentše ucamenana y jtsamana puerte chamotsesufrínama; chcasna, chënga tmojtsanacheta y Samarioye y Judeoye tmojanáshana. Nÿe chë Jesucristbe ichmónënga ndócnoye tmonjánacheta. <sup>2</sup> Básefta boyabásënga, Bëngbe Bëtsá adórayëngna, Esteban tmojanamba jauátbontsama y chabiamana puerte tmojánenobošachna. <sup>3</sup> Chëntscuana, Saulo yojtsentsëna Jesucristbeñe ošbuáchiyënga jtsapochócama y yebnënguenache yojánamashjuana boyabásënga y shembásënga sjojónana ubuacana jutámiamana.

### *Felipe Samaria luaroca tšabe noticiëngama yojanabuayiyiná*

<sup>4</sup> Y Jesucristbeñe ošbuáchiyënga tmojanáshanëngna nÿetsquénache imojánabuayiyinaye Jesusbe tšabe noticiënga. <sup>5</sup> Chca, Felipe Samarioye tojána y tojanontsé chë Bëngbe Bëtsabe Uámana Uabuayaná, Cristbiamana, chentša entsanga jábuayenama. <sup>6</sup> Entšanga imojánenefjuana Felipe joyeunayama y tmojáninÿe bëts soyënga cha jtsamana, Bëngbe Bëtsabe obenana jinÿanÿiyama. Chënga nÿetscanga ntšamo Felipe yojtsichamcá tšabá imojtseyeunana. <sup>7</sup> Banga bayëjbe juabna uambayënga tšabá imojtsatsmëna y chë bacna bayëjënga jabuache jtsaiyoyëse chëngbentšana imojtsaisebocana; y banga jama ndobenënga y coshetënga tšabá imojtsatsmëna. <sup>8</sup> Chë soyama chë pueblentsa oyenënga corente imojtsóyejuaye.

<sup>9</sup> Pero canÿe pueblentše Samarioca inamna canÿe boyabása, Simón ca uabainá; cha tempo inamna canÿe bocjuaná y chë Samarioca entsanga chabe soyëngama imojánenjanaye. Cha yojánichamo cha canÿe uámana entšá canjamna ca. <sup>10</sup> Y chábioye corente imnayeunana nÿetscanga, uámanënga y nduámanëngnaca. Entšanga imojánichamo: “Mua entsemna chë Bëngbe Bëtsabe bëts obenana inÿanÿinayá ca.”

<sup>11</sup> Y ndegombre chënga corente imnayeunana, er cha chë bocjuanana soyëngaca bayté chë entsanga ingñëngna y ojnanánënga yojtsabamna. <sup>12</sup> Pero chë luarentša entsangna, Felipe tmojanoyeuná chë cha yojtsëtsësná tšabe noticiënga Bëngbe Bëtsabe amëndayama



y chë Jesucristbiamá tšabe soyënga. Chorna chënga Jesucristbeñe imojtsošbuáchiye, y boyabásenga y shembásenga tmojánenabaye. <sup>13</sup> Y cach Simónëna Jesucristbeñe yojtsošbuáchiye y tojanenábaye, y chentšana cada te Felípeftaca cha yojtšanmëna. Cha tojáninÿe Felipe chë bëts soyënga Bëngbe Bëtsabe obenánaca jamana, y chama ojnananá yojtsemna.

<sup>14</sup> Chë Jerusalenoca imojtsemna ichmónënga tmojántatsëmbona Samarioca entšanga Bëngbe Bëtsabe palabra tmojanóyeunama; as, chora Pedro y Juan choye tmojanichamó. <sup>15</sup> Pedro y Juan Samarioye tbojánashjango ora, chentše Jesucristbeñe ošbuáchiyëngbiamá Bëngbe Bëtsá tmojanimpadá, as chë Uámana Espíritu chëngbeñe cháumashënguama jtsemándayama. <sup>16</sup> Er cabá ni mo cánÿabeñe chë Uámana Espíritu tonjánamashëngo; chënga tmojánenabaye Bëngbe Utabná Jesús jótsëmbonëse, chábeñe ošbuáchiyënga jtsemnama imojtsebóseyeca. <sup>17</sup> As Pedro y Juan chëngbe bestšašifne cucuatšënga tbojancjá, y chca, chë Uámana Espíritu tojánamashëngo chëngbe ainaniñe jtsemándayama.

<sup>18</sup> Simón tojáninÿe, chë ichmónënga entšángbeñe cucuatšënga tmojacjá ora, chë Uámana Espíritu chëngbeñe jamashënguana. As chora Simón chë ichmónënga tojanëyana: — Quem crocénana mosháchiñe, <sup>19</sup> y átsnaca chë obenana šmatšetá, y ndábeñnaca cucuatšënga chajajajó ora, chábeñnaca chë Uámana Espíritu cháumashëngo ca.

<sup>20</sup> As Pedro tbojanianya: —¡Acbe crocénana infernoye chaotsá y ácnaca, chë Bëngbe Bëtsabe tšetana soye crocénánaca jobuámiñama yopodena ca tcojajuabó causa! <sup>21</sup> Ndegombre, aca bëngaftaca ndoñe quecátsmëna, ni bëngbe trabajo acbiamá quenátsmëna, Bëngbe Bëtsabe delante acbe ainaniñe tšabe juabnënga ndoñe quecátbomna causa. <sup>22</sup> Ngmëna cochjenójuaboye quem bacna soye tcojamama y chca amana cochtsajbaná y Bëngbe Bëtsá cochjaimpáda, aca chca tcojajuaboma nderádose cmatjaperdóna. <sup>23</sup> Atše sëntsetatsëmbo, acbe ainaniñe tša bacna juabnënga ínÿengbiamá yojtsemnama; y bacna soyënga amana jtsajbanama ndoñe quecátobena causa, aca mo canÿe ntsacjuanacá contsemna ca —Pedro tbojanianya.

<sup>24</sup> As chora Simón tojanëyana: —Bëngbe Utabná atšbiamá šochjaimpáda, ntšamo šmonjauyancá ndoñe chandëpasama ca.

<sup>25</sup> Pedro y Juan, ntšamo Bëngbe Utabná Jesucristbiamá tbojaninÿcá y ibnatatsëmbcá entšanga imojtsëtsësnaye. Chentšana, Jerusalenoye tbojésanata y tbojánachnëngo ba Samarioca pueblënguëjana, tšabe noticiënga entšanga abuayinaye.

### *Felipe y chë Etiopía luaroca reinabe uajabuachaná*

<sup>26</sup> Chentšana, Bëngbe Utabnabe canÿe ángel Felípbioye tbojanianya: “Moprontá y tsmana luarëngoye motsa, Jerusalenentšana Gaza ca uabaina bëts puebloye benachëjana ca.” Chë benachna entšanga ndoyena luarëjana yojanachnëngona. <sup>27</sup> As Felipe yojëtsëtsbaná y tojána. Benachiñe tbojáneninÿena canÿa Etiopía luarocáftaca. Etiopía luaroca canÿe reiná inamna y chë boyabásana chabe uajabuachaná y chabe crocénana bojanÿá inamna. Chana Jerusalenoye tojánabo Bëngbe Bëtsá jadórama. <sup>28</sup> Chora Etiopía luaroye yojtstataye, chabe cochëshañe inayésenotbemañe, y chë Bëngbe Bëtsabe juabna oyebuambnayá Isaíasbe uabemana libréša yojtšaiualíaye.

<sup>29</sup> Chora chë Uámana Espíritu Felípbioye tbojanianya: “Mobeconá y chë cochësha juachaca cochtsaye ca.” <sup>30</sup> As Felipe betscó yojobeconá. Chora yojouena chë Etiopía luarocá, Isaíasbe uabemana libréša yojtšaiualíaye; as tbojantjá: —¿Chë contsalía soye quecmojtsoertana ca?

<sup>31</sup> Y chë Etiopía luarocá tbojanjuá: —¿Ntšamo šochjosërta, ndocná šonjabuayenase ca? Y Felípbioye tbojanianya: —Diosmanda, atšbe cochëshoye másëngo y atšbe juachaca mabótbema ca.

<sup>32</sup> Isaíasbe uabemana libréšañe mëntšá yojtšalíaye:  
Cha tmojánánatse mo canÿe oveshá jóbama cuafjuanatscá;

y chë mo canÿe oveshá tmojtsëtsbotjná ora, cha iytëca jtsemnana, chánaca cachcá, chacá tondaye chenátanayana.

<sup>33</sup> Entšanga tmonjanma cha puerte chaosufrima, mo cha canÿe nduamaná cuaftsemncá y ntšamo ndoñe betsomerecencá cháftaca tmonjanma.

Ndocná nanjobenaye chabe básengbiana jacuéntana, quem luarentša chabe vida tmontsanbojuaná causa ca.

<sup>34</sup> Chora chë Etiopía luaroca uajabuachaná Felípbioye tbojaniana: —Diosmanda, šmobuayená, ¿ndabiama Bëngbe Bëtsabe juabna oyebuambnayá chca yojtsichamo, cachabiama o ínÿabiama ca?

<sup>35</sup> As Felipe tojanontsé, chë Isaíasbe librëšañe yojtsayana sóyeca, Jesusbe tšabe noticiënga jábuayenama.

<sup>36</sup> Chentša bënëse, canÿe béjaye obëjniñe juachañe ibojtsachñëjuana. Chora chë uajabuachaná tojánayana: —Muentše béjaye entsemna. ¿Ndáyeca ndoñe nanjopódia atše muentše uabainá jtsemnama ca? Diosmanda, šmabaye ca.

<sup>37</sup> As Felipe tbojaniana: —Jesucristbeñe nÿets acbe ainánaca tcojtsošbuáchese, añe echanjopódia juabáyama ca.

Y chë boyabása tbojanjuá: —Añe, sëntsošbuaché Jesucristo Bëngbe Bëtsabe Uaquiñá yomnama ca.

<sup>38</sup> As chë Etiopiocá tojanmandá chë cochësha chauátotonama. Chentšana, nÿets útata chë béjayoye tbojanashëbëbuástjango y Felipe, chë Etiopioica uajabuachanábioye tbojanabaye.

<sup>39</sup> Chë béjayentsana tbojtambocna ora, chë Uámana Espíritu Felipe ibojtsánatseñe y chë uajabuachaná ya ndoñe más Felípbioye ibontsonÿaye, pero corente oyejuayá yojtsatoñe. <sup>40</sup> Felipe tojántatsëmbona Azoto bëts pueblaca yojtsemnama, y chentšana tojána nÿetsca pueblënguenache chë tšabe noticiënga abuayiyenaye, Cesarea pueblaye jashjanguëntscuana.

## 9

### *Ntšamo Saulo Crístbeñe ošbuachiyá tojanóbema (Hch 22.6-16; 26.12-18)*

<sup>1</sup> Saulo chëntscuana cabá Bëngbe Utabnábeñe ošbuachiyënga yojanautatjná jtsëbáyama. Chama cha tojána chë bachnangbe más uámana amëndayábioye, <sup>2</sup> uabemana tsbuanachangá jauátjañama, as chëchangaca jobenayama chë Damascoca judiëngbe enefjuana yebnëngoye jama, y chocna, chë Jesucristo tojaninÿanÿé Benache ustoniñe, boyabásenga o shembásenga tojánÿenëse, jótabayama y Jerusalenoye junatsama. Y chca jamama tojánbocna. <sup>3</sup> Pero ya Damasco béconana yojtsaye orna, nÿe ndeolpe chabe juachañe celocana canÿe bëts tcuinÿe tojanbuashinÿinÿena. <sup>4</sup> Chora Saulo fshantsoye tojánshajaye y canÿe oyebuambnayana tojanuena, mëntšá: —Saulo, Saulo, ¿ndáyeca chca šcojtsacmena ca?

<sup>5</sup> As Saulo tbojantjá: —¿Nda comna, Bëngbe Utabná ca?

Y chë oyebuambnayana tbojanjuá: —Atše sëndmëna Jesús y aca condama atšbe entšanga chamotsesufrínama. <sup>6</sup> Pero matëtsbaná y Damascoye mamáshëngo; chentše canÿa cmochanjabuayená ndayá jamama cmojtsemnama ca.

<sup>7</sup> Chë Sáuloftaca imojánajna boyabásenga tša auatjanánënga imojtsemna y chíyeca ndoñe imontsobena jóyebuambayana; er nÿe chë oyebuambnayana tmojanuena, pero ndocná tmonjáninÿe. <sup>8</sup> As Saulo fshantsentsana tojtantsbaná y tojtanobuchatefjona ora, tondaye yontsobena jinÿana. Chcasna, chë ínÿenga tmojëftsanobuacuetëntsé y chca, Damascoye tmojanánatse. <sup>9</sup> Chentše yojëftsemna unga te, jinÿama ntobencá, ni ntjascá y tondaye ntjofšiyá.

<sup>10</sup> Damascoca Jesucristbeñe canye ošbuachiyá inoyena, Ananías ca uabainá. Cha Bëngbe Utabnábioye mo otjenayoquécá tbojáninÿe y Bëngbe Bëtsá tbojaniana: —Ananías ca.

As cha tbojanjuá: —Bëngbe Utabná, ¿ndayá chjama ca?

<sup>11</sup> Y Bëngbe Utabná tbojaniana: —Moprontá y motsa chë “Ndericho tsáshenañe ca” uabáinoe, y Júdasbe yebnentše cochjanotícia canye boyabásabiama, Saulo ca uabainábiamá, Tarso pueblócá; cha mora Bëngbe Bëtsáftaca bentsencuénta. <sup>12</sup> Saulo ya tonjinÿe mo otjenayoquécá, canye entšá Ananías ca uabainá entsamashjuana y chabe cucuatšënga chabe bestšašifne entsejájua, chca, cha chabuatabínÿnama ca.

<sup>13</sup> Ananías chca tojanuena ora, tojánayana: —Bëngbe Utabná, banga ba soyënga chabiamá šmonjacuéntá; Jerusalenoca tša bacá acbe entšanga imomnënga tojáborye. <sup>14</sup> Y mora entsebomna mando chë bachnangbe amëndayëngbentsana, muentše aca otšëmbuanënga jótabayama ca.

<sup>15</sup> As Bëngbe Utabná tbojaniana: —Motsa, er atše cha sënjuábuayana atšbiamá chaotra-bajama; chaóyebuambama ndoñe judiëngbeñe, reyëngbeñe y Israeloca entšangbeñnaca, y chca, chënga atšbiamá chamotatsëmbonama. <sup>16</sup> Atše cha chanjinÿinÿiye ntsachetšá ibojtsemna átsbeyeca jasúfriama ca.

<sup>17</sup> As Ananías tojána Saulo yojtšanmëna yebnoe. Tojánamashëngo ora, Saulëbe bestšašifne chabe cucuatšënga tojanjajó y tbojaniana: “Jesucristbeyeca atšbe catšata, Saulo, Bëngbe Utabná Jesús, chë benachëjana conjanabó ora cmonjanebëbocná, šonjichmó aca chacmatabínÿnama y chë Uámana Espiritu acbe ainaniñe jtsemándayama cháuamashënguama ca.”

<sup>18</sup> Cachora, Sálëbe bominÿentsana mo beonbe bobachëshëngcá tojantquécjana, y chca, ibojtsatabinÿna; chora tojantsbaná y tojanenábaye. <sup>19</sup> Chentšana, Saulo tojanse y añemo yojtatsbomna y baseftayté chë Jesucristbeñe ošbuáchiyëngaftaca tbojántotona, Damascoca.

### *Damascopuebloca Saulo entšanga yojanabuayiná*

<sup>20</sup> Saulo cachorscana tojanontšé jábuayenama judiëngbe enefjuana yebnënguenache, Jesús Bëngbe Bëtsabe Uaquiñá bëtsemnama. <sup>21</sup> Chë imojtsuenanënga nÿetscanga imojtsenjanaye y mëntšá imojtsichamo: “Mua entsemna chë Jerusalenoca Jesúsbioye otšëmbuanënga endanëbanayá, y mora camuá Damascocoye tojabo, Jesucristbeñe ošbuáchiyënga jabótabayama y chë bachnangbe amëndayëngbe cucuatšifne jabáshejuanama.”

<sup>22</sup> Pero Saulo cada ora más añémoca yojtsoyebuambnaye y puerte tšabá yojaninÿanÿná Jesús Bëngbe Bëtsabe Uámana Uabuayaná bëtsemnama. Chíyeca chë Damascoca judiënga ndoñe imontsobena ntšamo cha jojuana.

### *Ntšamo Saulo judiëngbentsana tojtšanachá*

<sup>23</sup> Bayté tojanochnëngo ora, judiënga tmojanenoyeuná ntšamo jamëse Saulo jóbama, <sup>24</sup> pero Saulo chë soye tojántatsëmbona. Bnëtë y ibeta, chë bëts pueblentša bëšašanguenache chënga chabiamá imojananÿá, jtsóbama; <sup>25</sup> pero chë Jesucristbeñe ošbuáchiyënga, ibeta, cha canye bëts sbarëcuiñe tmojtšanatsuamá, y chë pueblentša shëconana tapiëšëjana tmojtšanëstjango. Chca cha tojanotsbocá.

### *Saulo Jerusalenoca*

<sup>26</sup> Saulo Jerusalenoye tojánashjango ora, yojtseboše chë Jesucristbe ichmónëngaftaca jenútanama, pero nÿetscanga imojtsebiauatja y ndoñe imontsošbuaché Saulo Jesucristbe ustoná yojtsemnama. <sup>27</sup> Chcasna, Bernabé Sálëbioye tbojëftsanbetše y chë Jesucristbe ichmónëngbioye tbojanánatse, y tojanacuntá Saulo benachiñe Bëngbe Utabnábioye tbojáninÿama, ntšamo Bëngbe Utabná tbojanianama y ntšamo cha Damascoca tša

añémoca Jesusbiama entšanga tojánabuayenama. <sup>28</sup> As Saulo Jerusalenentše tojanotoná y chë Jesucristbe ichmónëngaftaca yojánana. Bëngbe Utabnabiama bëts añémoca entšanga yojanabuayiyná y <sup>29</sup> yojanoyebuambná y imojanenatsëtsná chë griego biyá judiëngaftaca; pero chëngna imojtsenëyeunana Saulo jtsóbama. <sup>30</sup> Jesucristbeñe ošbuáchiyënga chca tmojántatšëmbona ora, Saulo Cesarea luaroye tmojanánatse, y chentšana Tarso puebloye tmojanichmó.

<sup>31</sup> Y chca, Jesucristbeñe ošbuáchiyënga Judeoca, Galilea y Samaria luarentše chora ya ndoñe más montsansufrina y natjëmbana imojtsemna, y nyetscanga más ošbuáchiyana imojtsebomna. Ntšamo Bëngbe Bëtsá yojanbošcá, imojtsaniyena cha jtsatschuanayëse; y chë Uámana Espíritbe uajabuáchenanaca, Jesucristbeñe ošbuáchiyënga más tmojanoboté.

### *Pedro Enéasbioye tbojanshná*

<sup>32</sup> Pedro yojánabuache nyetsca chë Jesucristbeñe ošbuáchiyëngbenache. Y chca, Lida puebloca Bëngbe Bëtsabe entšanga jabuachámnaca tojána. <sup>33</sup> Lida pueblentše canya tbojáninýena, Eneas ca uabainá. Cha jama ndobená inamna y posufta uata jutsnëshañe chca inajájona. <sup>34</sup> Pedro tbojaniyana: “Eneas, Jesucristo tcmönjashná. Matëtsbaná y acbe tjuashe motsejacaná ca.” Y cachora chë jama ndobená tojtantsbaná.

<sup>35</sup> Nyetscanga chë Lida pueblentše y Saronoca oyenënga chë entšá shnaná tmojáninýe. Y as, chënga bacna soyënga amana tmojtsanajbaná y cach orscana tmojanontšë Bëngbe Utabnábeñe ošbuáchiyana.

### *Pedro tojanma Dorcas cháuatayenama*

<sup>36</sup> Chë tempo, Jope puebloca yojaniyena canye shembása Jesucristbeñe ošbuachiyá, Tabita ca uabainá, o griego biyaña Dorcas ca. Cha nyets tempo tšabe soyënga yojánama y yojanamana chë tojtsëjabetënga jujabuáchana. <sup>37</sup> Pero chora, šocana tbojanshache y tojtsanóbana. Tmojtsanbebé chentšana, canye tsoye tsbanana tsañoca chabe cuerpo tmojtanaajó. <sup>38</sup> Jope inamna Lida béconana, y Lidentše Pedro yojtsemna; y chë Jope pueblentše Jesucristbeñe ošbuáchiyënga tmojántatšëmbona Pedro choca yojtsemnama. Asna, uta boyabásata tmojanichamó Pedro jauyanama: “Diosmanda, betSCO Jope puebloye mabo ca.”

<sup>39</sup> As Pedro tojëftsantsbaná y chë uta boyabásaftaca tojána. Choye tmojánashhajna ora, tmojanánatse chë Dórcasbe cuerpo yojtsemnoye, tsbanánoca; chorna, nyetsca viudanga šachénaca Pédrëbioye tmojanóbobuashcona y imojtsinýinýnaye chë Dorcas yojuajonaná entšayangá y cmešëjuangá, cabá chëngaftaca yojëftsemna ora. <sup>40</sup> Pedro tojanmandá nyetscanga chentšana chamotsebocanama; chora Pedro yojoshëntsamentšiyë y Bëngbe Bëtsáftaca ibojencuentá. Chentšana, Pedro chë obanábioye tbojanonýinýë y tbojaniyana: “Tabita, matëtsbaná ca.”

As Dorcas tojtanobuchatëfjona y Pédrëbioye tbojáninýe ora, tojanótbema. <sup>41</sup> Chora Pedro tbojanábuacueshache y tbojtanatsbaná. As Pedro tojánachembo nyetsca chë Jesucristbeñe ošbuáchiyënga, chë viudanga y chë inýënga, y Dorcas ainá tojtaninýanýë. <sup>42</sup> Chë soye nyets Jope pueblentše tojanótatšëmbona y banga Bëngbe Utabnábeñe imojtsošbuáchiye. <sup>43</sup> Y Pedro bayté Jope pueblentše tojanoquedá, Simón chë bobáchëshiñe trabajayabe yebnentše.

## 10

### *Pedro y Cornelio*

<sup>1</sup> Cesarea pueblentše inamna canye boyabása Cornelio ca uabainá; cha inamna chë Italiano ca uabaina soldadëngbe amëndayá. <sup>2</sup> Cornelio Bëngbe Bëtsábioye ibnarrespetana y nyetsca chabe yebnentša oyenëngaftaca Bëngbe Bëtsá puerte imojánadorana. Becá crocénana inaquëcnaye chë judiënga ndbomnjëmënga jujabuáchama y sempre Bëngbe Bëtsáftaca ibnéncuentaye.



<sup>3</sup> Canÿe te, mo bëts mošenana ora, cha botamana tojáninÿe mo otjenayoquëcá, mëntšá: Bëngbe Bëtsabe canÿe ángel Cornelio yojtsemnoye yojtsamashjuana y tbojaniyana: — ¡Cornelio ca!

<sup>4</sup> Cornelio chë ángelbioye ibojtsonÿaye y auatjananá tbojaniyana: —Taita, ¿ndayá yojtsemna ca?

Y chë ángel tbojaniyana: —Bëngbe Bëtsá condbétseimpadanama y chë ujabótënga condbétsëjabuachanama, Bëngbe Bëtsá ácaftaca entsoyejuá y lempe cmochanjóyeunaye. <sup>5</sup> Chcasna, mora básefta boyabásenga Jope bëts puebloye michamó y Simón, chë Pedro ca monduabobuatmá, moye chamuánatse. <sup>6</sup> Cha posada entsebmna inÿe Simónbentše, chë bobáchëshiñe trabajayabe yebnentše. Chabe yebna mar béjaye tsachañe endmëna. Cha cmochanjauyana ndayá jamama cmojtsemna ca.

<sup>7</sup> Chë Cornéliëbioye ibojuatsëtsaye ángel tojtsatanoñe ora, Cornelio chabe oservenënguentšana útata tojánachembo y canÿe soldádnaca, chabe ujabuachaná, Bëngbe Bëtsá adorayá; <sup>8</sup> lempe ntšamo yojopasacá chënga tojanacuntá y chentsana Jope puebloye tojanichamó.

<sup>9</sup> Yëfsana mo nÿetsto ora, chënga benachiñe Jope béconana imojtsajnéntscuana, Pedro yebnentša tsbanánoye tojánašëngo, Bëngbe Bëtsáftaca jencuéntama. <sup>10</sup> Becá tojánishëntsena y jasama yojtseboše; pero imojtsebopróntantscuana, Pedro mo otjenayoquëcá mëntšá tojáninÿe: <sup>11</sup> Celoca yojtsatëfjna y mo canÿe bëts entšayëjuacá yojtsabá y nÿets canta sibientšana yojtsëjonÿana. <sup>12</sup> Chë entšayëjuañe imojtsemna nÿetscna bayënga, ósjojnaye bayënga y nÿetscna shloftšëngnaca. <sup>13</sup> Y tojanuena canÿe oyebuambnayanana mëntšá: —Motsbaná, Pedro; mobaye y quem bayënga mose ca.

<sup>14</sup> Chora Pedro tojánayana: —Ndoñe, atšbe Utabná. Atše ndocna te chiyáisese Moisesbe leyinÿe ndoñe yondëlesenciana jasama bayënga y chë jasama ndoñe tšabá imomna bayënga ca.

<sup>15</sup> Y cachiñe tojtëtanuena chë oyebuambnayanana mëntšá: —Bëngbe Bëtsá tojalesenciá y canÿe bayá tšabá jasama yomna ca tojayanëse, aca ndoñe matsjuabnana chë bayá jasama ndoñe tšabá yontsemna ca.

<sup>16</sup> Chë soye unga soyama chca tojanopasá chentsana, chë entšayëjua celoye tojtanátsjua. <sup>17</sup> Pero Pedro ndoñe yontsetátšëmbo ntšamo tojaninÿcá ndayá chabiamana yojtsayanama. Chëntscuana, chë Cornéliëbe ichmónënga noticiánana Simónbe yebnocatmojánashjajna y shjoca bëšoca imojtsobátmana. <sup>18</sup> Tmojanchembo ora, tmojanënoticiá Simón, chë Pedro ca uabobainá, chentše taibojatanama.

<sup>19</sup> Pedro, ndayá tojáninÿama chabosertama yojtsenójuabnantscuana, chë Uámana Espíritu tbojaniyana: “Mouena, muentše mora unga boyabásenga cmontsenguá. <sup>20</sup> Motsbaná, mocana matastjango y yapa ntjatenójuabnayscá chëngaftaca cochjá, er atše chënga sënjichamó ca”.

<sup>21</sup> As Pedro tojtastjango y chë tmojánashjajnënga tojanëyana: —Atše sëndmëna chë šmontsenguá cha. ¿Ndáyeca moye šmojabo ca?

<sup>22</sup> Chora chënga tmojanjuá: —Cornelio šonjichamó. Cha endmëna chë soldadëngbe amëndayá, canÿe tšabá mándbomna entsá y Bëngbe Bëtsábioye adorayá, y nÿetsca judiënga chabiamana tšabá mondbétsoyeuambnaye. Bëngbe Bëtsabe canÿe ángel chábioye tbojabuayená ntšamo jamana aca chábioye chacotsama, as chë ndayá cha jauyanama cojtsebmncá cha jouenama ca.

<sup>23</sup> As chënga tojanëmashengo y posada tojanëyentsame. Yëfsana Pedro chë unga boyabásengaftaca tojána. Básefta Jesucristbeñe ošbuáchiyënga Jope pueblentšënga Pedro tmojantjëmbambá.

<sup>24</sup> Chë inÿe yëfsana Cesarea puebloye tmojánashjajna. Chentše Cornelio Pédrëbiana yojtsobatmana, y Cornelio tojanëbuaja pamíllanga y tšabe amiguëgnaca chentše imojtsemna. <sup>25</sup> Pedro tojánashjango ora, Cornelio tojánbocna jajëbenguama y chabe shecutšentše yojshëntsamentšiyë cha jadórama. <sup>26</sup> Pero Pédrëna tbojtanatsbaná y mëntšá tbojaniyana: —Matëtsbaná, atše cach aquëcá nÿe canÿe entšá sëndmëna ca.

<sup>27</sup> Pedro Cornélioftaca encuëntaye chë yebnentše tojánamashëngo y ba entšanga tojánanÿena, chentše tmojanójetënga. <sup>28</sup> Chora Pedro tojanëyana: —Cach tšëngaftanga šmondëtatšëmbo chë judiëngbe leyënguifne endayana ndoñe yondopodena canÿe judío ndoñe judío entšangaftaca jenútanama y ni mo chëngbe yebnënguenache jábuachama ca. Pero Bëngbe Bëtsá šonjinÿinÿé atše ndocna te šondmëna ínÿabiana jatsjuabnayanana cháftaca jenútanama ndoñe tšabá yondmëna ca. <sup>29</sup> Chíyeca, šmonjobetše ora, ndocá ntjatichamcá nÿe sënjabo ca.

Chora tojanatjá: —¿Ndáyeca šmojobetše ca?

<sup>30</sup> As Cornelio tojánayana: —Canta te entsemna, camëntša ora, muentše sëndánmëna Bëngbe Bëtsáftaca encuëntaye y ndeolpe sënjinÿe atšbe delante canÿe boyabása uabuashinÿinÿana entšayaca bopormaná. <sup>31</sup> Cha šonjauyana: “Cornelio, Bëngbe Bëtsá condbëtseimpadanama y chë ujabótënga condbëtsëjabuachanama, Bëngbe Bëtsá ácaftaca entsoyejuá y lempe cmochanjóyeunaye ca. <sup>32</sup> Básefta boyabásenga Jope bëts puebloye michamó y Simón chë Pedro ca monduabobuatmá moye chamuánatse ca. Cha posada entsebomna inÿe Simónbentše, chë bobáchëshiñe trabajayabe yebnentše, y chabe yebna mar béjaye tsachañe endmëna. Cha cmochanjauyana ndayá jamama cmojtsemna ca.” <sup>33</sup> Chcasna, cachora sënjichamó aca jobetšama, y aslëpaye jabama tcojóyaunama. Y as morna, nÿetscanga Bëngbe Utabnabe delante fsëntseprontana jouenama lempe ntšamo Bëngbe Bëtsá tcmojamandacá ca —cha tojánayana.

### *Ntšamo Pedro tojanoyebuambá Cornéliëbe yebnentše*

<sup>34</sup> Pedro chora tojanontšé mëntšá jóyebuambayama: —Mora atše šontsosertana, ndegombre Bëngbe Bëtsabiana nÿetscanga cachcá uámanënga imomnana. <sup>35</sup> Nÿets luarënguenache Bëngbe Bëtsá júbuajana cha tmojtsatschuaná y tšabe soyënga tmojtsamënga. <sup>36</sup> Tšëngaftanga šmondëtatšëmbo, Bëngbe Bëtsá Israeloca entšanga tojánabuayenama, tšabe noticiënga jtsóyebuambnayëse, chënga nÿetscanga ainaniñe tšabe ebionana chamotsebomnana, Jesucristbeyeca; y cha endmëna nÿetsca entšangbe Utabná. <sup>37</sup> Tšëngaftanga šmondëtatšëmbo ntšamo nÿets Judeoca tonjanopasama. Chë soye Galilea luaroca tojanoboatšé, Juan entšanga yojanabuayiyná orscana, chënga bacna soyënga amana chamotsajbanama y chamuenábayama. <sup>38</sup> Šmondëtatšëmbo ntšamo Bëngbe Bëtsá, Jesús Nazaretocábioye tbojanábuayanama y tojanma chë Uámana Espíritu chabe ainaniñe cháumashënguama, y tojanma Jesús corente obená chaotsemnana; y šmondëtatšëmbo ntšamo Jesús enjánana entšangbiana tšabe soyënga amiñe y nÿetscanga chë Satanás yojánama chamosufrimënga áshnaye, er Bëngbe Bëtsá cháftaca yojtsemna.

<sup>39</sup> “Bënga fsënjaninÿe y fsëndëtatšëmbo lempe ntšamo Jesús tojanmcá Jerusalenoca y nÿets Judea luariñe; y cha tmonjanóba, canÿe cruciñe jacrucificase. <sup>40</sup> Pero Bëngbe Bëtsá tonjanma unga tianoye cha cháuatayenama y bëngbeñe chaonÿnama. <sup>41</sup> Cha nÿetsca entšangbe delante ndoñe chenátanbocna, pero aiñe bëngbeñe, chë tempo Bëngbe Bëtsá šojanëbuáyanënga, Jesús tojtanayenama chamuinÿama. Y tojtanayenentšana bënga cháftaca fsënjanse y fsënjanofsé. <sup>42</sup> Cha šonjichamó entšanga jábuayenama y jayanama ndegombre cha yomna chë Bëngbe Bëtsabe uabuayaná, chë nda obanëngbiana y ainëngbiana yochjayana tšabá o ndoñe tšabá tmonjamama. <sup>43</sup> Bëngbe Bëtsabe juabna oyebuambnayënga nÿetscanga cach Jesusbiana tmojánayana, nda Jesúsbeñe tojtsošbuaché, chábioye Bëngbe Bëtsá chabe bacna soyëngama bochanjaperdóna, Jesusbe obenánaca ca.”

*Ndoñe judiënga chë Uámana Espíritu tmojanóyëngacñe*

<sup>44</sup> Pedro chë palabrenga cabá yojtsóyebuambnantscuana, chë Uámana Espiritu tojánamashëngo nyetsca chë imojtsuenanëngbe ainaniñe jtsemándayama. <sup>45</sup> Chë judiënga Jesucristbeñe ošbuáchiyënga Pédroftaca tmojánabënga imojenjaná, chë Uámana Espiritu ndoñe judiëngbeñnaca cháúamashënguama Bëngbe Bëtsá tojanmama. <sup>46</sup> Chënga imojtsuenana chënga inyetsá jtsebiayangana, chënga tempo ndmabiyañe y jtsichámuana Bëngbe Bëtsá bëts soyënga tojanmama.

<sup>47</sup> Chora Pedro tojánayana: “Pero mëngna chë Uámana Espiritu tmonjójyëngacñe ntšamo bënga tmonjójyëngacñecá. Chcasna, ndocná queochatobenaye jamana chënga uabáinënga ndoñe chamondëtsemnama ca.” <sup>48</sup> As Pedro tojanamëndá chënga jubáyama, Jesucristo jótšëmbonëse. Chentšana chënga tmojanimpadá baseftayté chëngaftaca chaoquedama.

## 11

### *Ntšamo Pedro chë Jerusalenoca imojánenefjuana ošbuachiyëngbioye tojanëyana*

<sup>1</sup> Jesucristbe ichmónënga y chë Judeoca Jesucristbeñe ošbuáchiyënga tmojántatšëmbona, chë ndoñe judiëngnaca Bëngbe Bëtsabe palabriñe imojtsošbuáchema. <sup>2</sup> Pero Pedro Jerusalenoye tojesaná ora, báseftanga chabiamana ndoñe tšabá tmonjánayana. Chënga imojamna chë juabnayënga, chë ndoñe judiënga ošbuáchiyënga boyabásenga canjánamna chë más delicadentse base bobachtema tëtšenënga jtsemnama ca, ntšamo chë judiënga imojanamancá, as chënga jobenayama chë judiënga ošbuáchiyëngaftaca jenútanama ca. <sup>3</sup> As Pedro tmojantjá: —¿Ndáyeca tcojá chë ndoñe judiënga jábuachama y chëngaftaca tcojase ca?

<sup>4</sup> Chora Pedro lempe chënga tojanacuntá ntšamo chë ndoñe judiëngbioye cha tojána orscana tojanopasama. Cha tojanëyana: <sup>5</sup> —Atše Jope puebloca sënjamna y Bëngbe Bëtsáftaca sënjencuénta ora, mo otjenayoquécá sënjáninýe celocana mo canýe bëts entšëjuacá átšbioye enjétsabeconaye y nyets canta sibiocana enjétsëjonýana. <sup>6</sup> Y botamana sënjanrrepará ndayá chë tsoye bëtsemnama y sënjáninýe choye monjëtsemna uamna y tjoca bayënga, ósjojnaye bayënga y nyetscna shloftšëngnaca. <sup>7</sup> Y sënjanuena canýe oyebuambnayanana mëntšá: “Motsbaná, Pedro; mobaye y quem bayënga mose ca.” <sup>8</sup> Chora atše sënjánayana: “Bëngbe Utabná, ndoñe; atše ndocna te chiyáisese chë Moisesbe leyiñe ndoñe yondëlesenciana jasama bayënga y jasama ndoñe tšabá imomnënga ca.” <sup>9</sup> Chentšana cachiñe sëntëtanuena chë celocana oyebuambnayanana mëntšá: “Bëngbe Bëtsá tojalesenciá y canýe bayá tšabá jasama yomna ca tojayanëse, ndoñe matsjuabnana chë bayá jasama ndoñe tšabá yontsemna ca.” <sup>10</sup> Chë soye unga soyama chca tonjanopasá y chentšana chë entšëjua celoye tontanátsjua. <sup>11</sup> Y cachora unga boyabásenga Cesarea pueblcana ichmónënga, chë posada sëndbomnentse tmonjánashajna, atše janguanguama. <sup>12</sup> Y chë Uámana Espiritu šonjanmandá atše yapa ntjatenojwabnycá chëngaftaca jama; y quem chnënguana Jesucristbeñe ošbuachiyëngnaca átšeftaca tmonjána. Nyetscanga canýe entšá Cornelio ca uabainabe yebnoye fsënjánamashjna; <sup>13</sup> y chana bënga šonjanacuntá ntšamo tojáninýe, cachabe yebnentse canýe ángel ibojtsebiatsana y mëntšá tbojanianana: “Básefta boyabásenga Jope bëts pueblloye michamó y moye chamuánatse Simón, chë Pedro ca monduabobuatmá, <sup>14</sup> y cha cmochanjabuayená ntšamo aca y acbe yebnentša oyenënga šmochjotsbocá ca.” <sup>15</sup> As, atše jóyebuambayama sënjanbojatsé orna, chë Uámana Espiritu tonjánamashëngo chëngbe ainaniñe jtsemándayama, ntšamo bëngbeñe natsana tonjanamashëngcá.

<sup>16</sup> “Chora sënjanenojuabó ntšamo Bëngbe Utabná tonjánayanama: ‘Ndegombre, Juan entšanga béjayeca tonjanëbaye; pero Bëngbe Bëtsá chë Uámana Espiritu bochanjíchmuá, tšëngaftangbe ainaniñe jtsemándayama cháúamashënguama ca.’ <sup>17</sup> Chcasna, chëngnaca Bëngbe Bëtsá chë Uámana Espiritu tonjatsatá, ntšamo bënga, chë Utabná Jesucristbeñe

ošbuáchiyënga, šonjanatšatacá. Y chca, atše ndoñe quetsátsmëna canye tša uamaná, Bëngbe Bëtsá jauyanama ntšamo cha yobošcá ndoñe chaondëtsemna ca.”

<sup>18</sup> Jerusalemoca Jesucristbeñe ošbuáchiyënga chë soyënga tmojanuena ora, ndocá más tmonjantjá y Bëngbe Bëtsá tmojtanchuá, mëntšá: —¡Asna, Bëngbe Bëtsá chë ndoñe judiëngnaca tojalesenciá chëngbe bacna soyëngama ngmënaca chamuatenójuaboma y chca amana chamotsajbanama, chë nyetsca tescama yomna tšabe vida chamotsebom-nama ca!

*Ntšamo Antioquía pueblota tojanobojatšé, entšanga Jesucristbeñe ošbuáchiyana*

<sup>19</sup> Esteban tmojanóba chentšana, tmojanontsé chë Jesucristbeñe inye ošbuachiyëngnaca jatëcamiyama. As chentšana báseftanga yojtsamna bën luarëngoye jtsachetëngana Fenicioye, Chipre y Antioquía luarëngoye, y chenache chënga Jesucristbe soyëngama imojanoyebuambná, pero nye judiëngbiana. <sup>20</sup> Pero báseftanga imojamna Chipre y Cirene luaroquënga, y chënga Antioquía bëts pueblote tmojánashjajna orna, chë ndoñe judiëngbeñnaca tmojanoyebuambá, Jesús, chë Utabnabe soyëngama jabuayenase. <sup>21</sup> Bëngbe Utabnabe obenana chëngaftaca yojtsemna, y chca, ba entšanga tmojanajbaná bacna soyënga amana y tmojanontsé Bëngbe Utabnábeñe jtsošbuáchiyana.

<sup>22</sup> Jerusalemoca Jesucristbeñe ošbuáchiyënga chë soye tmojántatšëmbona ora, Antioquía luaroye Bernabé tmojanichmó. <sup>23</sup> Bernabé choye tojánashjango orna, tojáninye ntšamo Bëngbe Bëtsá tšabe bendicionënga chëngbeñe tojanmama y chama corente tojanoyejuá. Nyetscanga tojanabuayená chamotsiyena nyets ainánaca Bëngbe Utabnábeñe jtsošbuáchiyëse. <sup>24</sup> Bernabé inamna canye entšá tšabe soyënga amá, chë Uámana Espiritu chabe ainaniñe yojtsemándaye y bëtscá ošbuachiyá inamna. Y banga tmojanontsé Bëngbe Utabnábeñe jtsošbuáchiyana.

<sup>25</sup> Chentšana, Bernabé Tarso pueblote tojána Saulo janguanguama, <sup>26</sup> y tbojáninyena ora, Antioquía luaroye tbojëftsanbetše. Antioquía luarentšna canye uata nyetsá Jesucristbeñe ošbuáchiyëngaftaca cányiñe ibojëftsemna y ba entšanga tmojanabuatambá. Antioquioca inamna chë ndayentše natsanama Jesucristbeñe ošbuáchiyënga Cristbe ústonënga ca imojtsëbuatma.

<sup>27</sup> Chë tempo, básefta Bëngbe Bëtsabe juabna oyebuambnayënga Jerusalemocana Antioquía luaroye tojána. <sup>28</sup> Chënguentsana canya Agabo ca uabainá tojantsá y chë Uámana Espiritbeyeca tojánayana, mëntšá: “Nyets luariñe entšanga oyeniñe bëts shëntsana echanjóshjango ca.” Y ndegombre chca tojanopasá, Claudio Romoca bëts mandado inamna ora. <sup>29</sup> Chcasna, chë Antioquía bëts pueblentša Jesucristbeñe ošbuáchiyënga imojenóyeunaye ntsachetšá crocënanëñnaca juíchmuana, ntšamo cada ona tojobenacá, Judeoca Jesucristbeñe ošbuáchiyënga jujabuáchama. <sup>30</sup> Chca tmojanma, y Bernabé y Sáuloftaca chë crocënanana tmojanichmó chë Judeoca Jesucristbeñe ošbuáchiyënguentsë bëtšëjëmëngcá amëndayëngbioye.

## 12

*Santiago tmojanóba; Pedro tmojanëtame*

<sup>1</sup> Chë tempo, rey Herodes básefta Jesucristbeñe ošbuáchiyënga tojánishëche jutámiamama y jatsetšenama. <sup>2</sup> Tojanmandá espadëjaca chamóbama Santiago, Juanbe catšata; <sup>3</sup> y Herodes tojántatšëmbona judiënga chë soye tojanogúsetama; as, cha tojanmandá Pédrëñnaca chamutámiamama. Chca tojanopasá chë levadúraca ndëpormana tandëse sayté, Bashco fiesta ora. <sup>4</sup> Pedro tmojánishache orna, Herodes tojanmandá chamutámiamama, y chë cárceloca soldadënga cantátanga tmojanenojatá cántentše cha chamotsebojanýama. Herodes yojëtsejuabnaye, Bashco fiesta tojochnëngo ora Pedro juabocnama, entšangbe delante jayanama cha chaóbanama. <sup>5</sup> Chcasna, Pedro yojtsëtámena y chë soldadënga



corente imojtsebojanýá. Pero Jesucristbeñe ošbuáchiyëngna bëtská Bëngbe Bëtsá imojtseimpadana Pédrëbiama.

*Bëngbe Bëtsá tojanma Pedro natjëmbana cárcelocana cháuaisebocnama*

<sup>6</sup> Canýe te yojtśájamna Herodes entsangbe delante Pedro juabocnama. Chë te ibetna, Pedro yojtśomañe y cátatoica canýe soldado yojtśemna; uta cadenëjuaca yojtśabatsëcna y inýe soldadëngna bëśócana chë utámeniñe imojtsebojanýá. <sup>7</sup> Ndeolpe, Bëngbe Utabnabe canýe ángel tojánbocna, y lempe chë utámeniñe yojtsebuashinýinýana. Chora chë ángel tëchañe Pédrëbioye tbojánbojajo, tbojanfšená y tbojaniyana: “Betsco motsbaná ca.” Y cachora chë cadenëjuangá Pédrëbe buacuatšënguentsana tojanatquëcjana, <sup>8</sup> y chë ángel tbojaniyana: “Matichëtjo y matóshecochëtjo ca.” Pedro tojanma ntśamo chë ángel tbojaniyancá, y chora chë ángel tbojátaniyana: “Mataquëfsayé y śmasto ca.”

<sup>9</sup> Pedro utámenocana chë ángel ibojtsëstona, pero ndoñe yontsetátšëmbo aíñe ndegombre o ndoñe bentsemna chë ángel yojtśama cha chocana cháuaisebocnama; masna, ibojtsinýana mo canýe otjénayoca cuaftsemncá ca. <sup>10</sup> Y útentše chë soldadënga imojtsebojanýajana chata tbojánachnëngo y yerëša bëśásoye tbojánashjango, chë ndayëša yojanamna tsáshenoye jabocnama; y chë bëśásana nýe cachabe ponto yojotëfjo. Chentśana tbojëftsanbocna ora, canýe tsáshenëjana ibojtsaye, y nýe ndeolpe chë ángel Pédrëbentśana yojtsojuánañe.

<sup>11</sup> Nýa chora Pedro tbojanosertá y tojánayana: “Mora tśabá śjosertá, ndegombre Bëngbe Utabná chabe ángel tbojichmó atše jatsbocama Heródesbe cucuatšentśana y lempe ntśamo judiënga átšeftaca jamama imojuabnámnaca ca.”

<sup>12</sup> Pedro chë soyama juicio tojanca ora, tojána María, Juanbe mamabe yebnoye; Juan, Marcos ca imojanábobaina. Y chë yebnentše banga cánýiñe imojtśemna, Bëngbe Bëtsáftaca encuëntaye. <sup>13</sup> Pedro chë tsashenoica bëśásoca tojanchembo ora, canýe oservená, Rode ca uabainá, tojánbocna jarrepárama. <sup>14</sup> Chë oservená Pédrëbioye tbojanoyatëmbá ora, corente oyejuayá yojtśemna y cha, jebiatëfjo cuentna, cach tsoye tojesaná chë tśabe noticia jaúnayama, Pedro bëśoca yojtśemna ca. <sup>15</sup> Chë tsoca imojtśemnëngna chora tmojaniyana: “¿Opá chectsebocna ca?”

Pero chë oservená yojtśichamo ndegombre ca. Y chënga tmojaniyana: “¡Chabe ángel ctsemna ca!”

<sup>16</sup> Chëntscuana Pedro cabá yojtsechembuana; tmojánebiatëfjo y tmojáninýe ora, chënga puerte imojenjnaná. <sup>17</sup> Pero Pedro tojánëfjatsëmbo iytëca chamobiamama y tojanacuntá ntśamo Bëngbe Utabná utámenocana tbojánatsbocama. Chentśana tojanéyana: “Ntśamo tonjopasama Santiago y chë Jesucristbeñe inýe ošbuáchiyënga śmochjaúnaye ca.”

Chora Pedro chë yebnentśana tojtáisebocna y ínýoye yojáta.

<sup>18</sup> Tojanbinýna ora, chë soldadënga puerte imojóntśa enbouenanana, ntśamo Pédroftaca tojanopasama ndoñe imontsetátšëmbo causa. <sup>19</sup> As Herodes tojanmandá Pedro chamotsenguanguama; pero jtsinýenama ndoñe imonjobenaye orna, Herodes chë soldadënga tojanatjá ndayá Pédroftaca tojanopasana y chentśana tojanmandá chë cha imojanbojanýá soldadënga jtsëbáyama. Chë soyënga tojanochnëngo chentśana, Herodes Judea luarentśana tojëftsanbocna y Cesarea luaroye tojtśanoñe, y chocha tojtśanoquedañe.

*Herodes tojanóbana*

<sup>20</sup> Herodes corente yojtsetśátjaye Tiro y Sidonoquëngaftaca; as chënga tmojanenoyeuná Heródesbioye jama. Canýe uámana uajabuachaná, Blasto ca uabainábioye tmojanayeuamaná, y chana tojanašebuachená Herodes jauyanama ndoñe más entjayánanënga chamondëtsemnama, er Tiro y Sidonoca entsanga vida imnabomna Heródesbe luaroca sanángaca. <sup>21</sup> Chcasna, rey Herodes inýe tescama tojánachembo. Chë tena, jóyebuambayama Herodes uámana entsayaca yojtśopórma y yojótbema chabe

mándaye tbemanentše; chentšana tojanonguamé. <sup>22</sup> Chora entsanga tmojanontšé mëntšá uayebuáchana: “¡Chë entsoyebuambná cha entsá ndoñe quenátsmëna! ¡Chana canýe dios entsemna ca!” <sup>23</sup> Cachora, Bëngbe Bëtsabe canýe ángel tojanma Herodes šocana chaboshachama, chabe cuenta Bëngbe Bëtsá chamuatschuama entsanga ndoñe yonjáuyana causa. Herodes tojanóbana mamángaca sasná.

<sup>24</sup> Pero chë tempo más bëtská entsanga Bëngbe Bëtsabe palabra imojtsuenana y Jesucristbeñe imojtsošbuáchiye.

<sup>25</sup> Bernabé y Saulo chatbe trabajo tbojëftsanma ora, Jerusalenocana Antioquía luaroye tbojésanata y Juan, chë Marcos ca uabobuatmá, chátaftaca tmojëftsanbetše.

## 13

### *Bernabé y Saulo tbojanbojatsé Bëngbe Bëtsabe trabajo jamama*

<sup>1</sup> Antioquía luaroca Jesucristbeñe ošbuáchiyënguente imojtsemna Bëngbe Bëtsabe juabna oyebuambnayënga y ošbuachiyëngbioye abuátambayënga. Chënga imojanabaina Bernabé, Simón (chë Sibetá ca uabobuatmá), Lucio Cirenocá, Manaén (nda tojanoboché cánýiñe Herodes, chë Galileoca réyefraca) y Saulo. <sup>2</sup> Canýe te, Bëngbe Utabná imojtsatschuanaye y chama tondaye ntjascá imojtsemna ora, chë Uámana Espiritu tojánayana: “Mora šmochjaleséncia Bernabé y Saulo tšëngaftangbentsana chabuétsebocnama; chatna canýe trabajuama sënjabacacá ca.”

<sup>3</sup> Bëngbe Bëtsá jëtschuayama tondaye ntjascá imojtsemnëntscuana y cháftaca imojtsencuëntantscuana, chëngbe cucuatšënga chatbe bestšaše juatsboica tmojancjá, chatbe trabajuiñe chaújabuachama Bëngbe Bëtsá jtseimpadánëse. Y chentšana chátbioye tmojtana-diošoftá.

### *Bernabé y Saulo Chipre luaroca*

<sup>4</sup> As Bernabé y Saulo, chë Uámana Espiritbeyeca ichmónata, Seleucia ca uabáinoye tbojánata y chentšana bejaycá, Chipre luaroye. <sup>5</sup> Salamina bëts puebloye tbojánashjango ora, tbojanontšé Bëngbe Bëtsabe palabrama entsanga jábuayenama, chentša judiëngbe enefjuana yebnënguenache. Juan Marcos mo chatbe uajabuachanacá ibojtsebomna.

<sup>6</sup> Nyets chë luarëjana tmojánachnëngo orna, Pafos puebloye tmojánashjaina; y chentše tmojáninýena canýe judío tatsëmbuá, Barjesús ca uabainá. Cha yojánichamo cha canjamna canýe Bëngbe Bëtsabe juabna oyebuambnayá ca, pero ndoñe chca yonjamna.

<sup>7</sup> Chë tatsëmbuá inatrabájaye chë Chipre luaroca mandadbiana, Sergio Paulo ca uabainá; y chë mandadna corente osertaná inamna. Cha yojtseboše Bëngbe Bëtsabe palabra jouenama; as tojanmandá Bernabé y Saulo jobiatšana. <sup>8</sup> Pero chë tatsëmbuá, grieguiñe Elimas ca uabainá, Saulo y Bernabebe contra yojtsemna y yojtsama chë mandado ndoñe chaondëtsošbuáchema, ntšamo chë Jesucristbeñe ošbuáchiyënga imojanošbuachecá. <sup>9</sup> Chora, Saulo chë Pablo ca imojanábobuatmabe ainaniñe chë Uámana Espiritu corente yojtsemándaye; as chë tatsëmbuábioye yejuana ibojonýinýiye, <sup>10</sup> y tbojaniyana: “¡Abuambnayá, puerta bacna entsá, Satanasbe uaquiñá y tšabe soyënga ndoñe chaondëtsebínýnama trabajayá! Bëngbe Utabnabe nyetsca ndegombre soyëngama aca contsichamo uayátsenaye soyënga yojtsemna ca. <sup>11</sup> Mora, Bëngbe Bëtsá cmochanjacastíga, jtaná cochanjoquéda y baseftayté jinýama quecochatobenaye ca.”

Cachora Elimas mo ibetiñcá yojoquéda y ibojtsonguaye canýa buacuetëntšnana chabuánatsama, jtaná yojtsemna causa. <sup>12</sup> Chë mandado chca tojáninýe ora, Jesucristbeñe yojtsošbuaché y yojenjaná Bëngbe Utabnabe soyënga tojanatsjínýama.

### *Pablo y Bernabé Antioquía pueblentše, Pisidia luaroca*

<sup>13</sup> Pablo y chabe enutënga, Páfosocana, bejaycá Perge puebloye tmojatananga, Panfilia luaroca. Pero Juan tojésanabashejuana y Jerusalenoye tojésanshëcona. <sup>14</sup> Pergentšana Antioquía puebloye tbojatanata; chë pueblo inamna Pisidia luare béconana. Chentšana,

ochnayté, chë judiëngbe enefjuana yebnoye tbojánamashëngo y tbojanótbema. <sup>15</sup> Moisesbe leyiñe y Bëngbe Bëtsabe juabna oyebuambnayëngbe uabemana librëšangañe tmojanalía orna, chë enefjuana yebnentša mándayënga canya tmojanichmó chënga jáuyanama: —Israeloquënga, bënga fsëntseboše entsanga chašmabuayená, nderado ndayá jayanama šmojtsebošnëse, muentša entsanga añemo chamotsebošnëse ca.

<sup>16</sup> As Pablo tojantsá y entsángbioye cucuátseca tojánefjatsëmbo iytëca chamobiamama, y tojánayana: —Smochjouena Israeloquënga y ndoñe judiënga Bëngbe Bëtsá adórayënga. <sup>17</sup> Israeloca entsanga mondadorana Bëtsá, Bëngbe Bëtsá, bëngbe bëts taitanga tojanëbuáyana, y tojanma chënga corente bëtsçanga chamotsemnama, chënga Egiptoca inye luarocana ashjajnëngcá imojoyena ora. Y chentšana, cachabe obenánaca chë luarocana chënga tojésanëbuacana. <sup>18</sup> Canta bnëtsana uata nyëtsá, Bëngbe Bëtsá entsanga ndoyena luaroca chënga yojanëuantana, <sup>19</sup> y cha tojanma chë Canaán luaroca canyëšëftentša entsanga chamopochocama y bëngbe bëts taitanga chëngbe fshantsënga nduiñënga tojánabiamama. <sup>20</sup> Chë tempo, chë Bëngbe Bëtsá Abrahámbioye quem fshantse jatsetayama tbojanšbuachená orscana, y chë tempo, chë bëngbe bëts taitanga chë fshantse tmojanóyëngacñëntscuana, canta patse y shachna bnëtsana uata tojanochnëngo.

“Chentšana, Bëngbe Bëtsá chëngbiamama mandadënga tojánabiamama, Bëngbe Bëtsabe juabna oyebuambnayá Samuel chëngbe mandayá yojëftsemna tempëntscuana. <sup>21</sup> Chentšana, Israeloquënga Samuel tmojanimpadá canye rey chabojayé chaotsamëndama; as Bëngbe Bëtsá Saúlbioye chëngbe rey tbojánbema, canta bnëtsana uatëscama. Saúl inamna Cisbe uaquiñá y Benjaminbe bëts pamillanguentsá. <sup>22</sup> Más chcoyna, Bëngbe Bëtsá Saúlbioye chë mándayentsana tbojtsanjuaná, y chentšana Davídbioye mo chëngbe reycá tbojánbema. Chabiamama Bëngbe Bëtsá tojánayana: ‘Atše sëndëtatšëmbo, David, Isaíbe uaquiñá, canye tšabe entsá yomnama y chama atše sëndoyeuá, y cha sempre endëprontana ntšamo atše stebošcá jtsamama ca.’ <sup>23</sup> Davídbentsana canye entsá Jesús enjamna, nda Bëngbe Bëtsá tbojanichmó Israeloca entsanga jabátsebacama, ntšamo cach Bëngbe Bëtsá chëngbe bëts taitanga tojanašebuachenacá. <sup>24</sup> Cabá Jesús ndëbocna ora, Juan nyëtsca Israeloquënga tojanabuayená bacna soyënga amana chamotsajbanama y chamuenábayama. <sup>25</sup> Juanbe trabajo jopochócama yojtsobeco ora, cha tojánayana: ‘¿Nda atše tsmënama tšëngaftanga šmojuabná ca? Chë tšëngaftanga šmontsejuabná atše tsmëna ca cha, atše ndoñe quetsátsmëna. Pero átsbentsana echanjabo canya, y atše mercedo taitatobuajoñe ni mo jotsejbiyama chabe shecochëtjonëshentsa corriëja jajafjonama ca.’

<sup>26</sup> “Chcase morna, Abrahámbentsana entsanga y ndoñe judiënga Bëngbe Bëtsá adórayënga; bëngbiamama entsemna quem buayenana soye, chë Bëngbe Bëtsá entsanga jatsebacana. <sup>27</sup> Masque cada ochnayté, Bëngbe Bëtsabe juabna oyebuambnayëngbe uabemana palabra monjanalía chëngbe enefjuana yebnentše, Jerusalenentša oyenënga y chentša mándayënga ndoñe quenjátanësertana nda Jesús bëtsemnama, y chë tmojtsalía soyëngama cach ndoñe. Y chca, chënga Jesús chamóbama tmojánboshjona ora, chë chca amënga tmojanma ntšamo Bëngbe Bëtsabe juabna oyebuambnayëngbe librëšangañe iuabemancá. <sup>28</sup> Y masque ndocna bacna soye tmonjáninýena Jesús jóbana chabotsemnama, Pilato tmojanimpadá chaomandá chábioye jóbama. <sup>29</sup> Chentšana, lempe ntšamo Bëngbe Bëtsabe uabemana palabrengeñe iuayancá Jesúsëftaca tojanochnëngo ora, chabe ústonënga chë cruzocana tmojtanëštjango y tmojanatbontsá. <sup>30</sup> Pero Bëngbe Bëtsá tojanma Jesús cháuatayenama. <sup>31</sup> Chë Galileocana Jerusalenoye cháftaca tmojánanga, baytentscuana Jesús yojánëbëbuacana; y morna, lempe ntšamo Jesusbiamama tmojaninýcá, chënga entsángbeñe montsoyëbuabná.

<sup>32</sup> “Y chca, mora bënga chë tšabe noticiënga cbontsëtsëtsná. Ntšamo Bëngbe Bëtsá bëngbe bëts taitanga tojanašebuachenacá, <sup>33</sup> cha tonjama, bënga chë chëngbe entsanguentšëngbiamama, chca chaotsemnama. Y Bëngbe Bëtsá chca tojama, Jesús

cháuatayenama cha jamëse. Rey David, Bëngbe Bëtsabe uabemana palabrënguiñe, segundo salmentse mëntšá tojanábema, ntšamo Bëngbe Bëtsá Jesúsbiöye tbojanianama:

Aca atšbe uaquiñá condmëna.

Mënté entsanga sënjinÿanÿé aca atšbe Uaquiñá comnama ca.

<sup>34</sup> Y tempo Bëngbe Bëtsá chabe uabemana palabrënguiñe tojaninÿanÿé cachá jamama Jesús cháuatayenama y ndoñe cachiñe chaondóbanama, mëntšá tojánayana ora:

Chë ndegombre soyënga y chë tšabe bendicionënga ntšamo David sënjanšbuachenacá, tšëngaftanga cbochanjátsataye ca.

<sup>35</sup> Inÿoca Bëngbe Bëtsabe uabemana palabrënguiñe, Salmos librëša uabiamnayá, mëntšá tojanábema ntšamo Jesús Bëngbe Bëtsábiöye tbojanianama:

Aca ndoñe quecochatslesencia atšbe cuerpo,

chë acbe Uámana oservenabe cuerpo chaotsopochocama ca.

<sup>36</sup> David, chabe tempo imojoyenëngbiana tojanma, ndayá cha chaomama Bëngbe Bëtsá tojanjuabocá. Cha tojanóbana y tmojanatbontsá chë chabe bëts taitángbiöye tmojanëtabuantsá luarentse, y chabe cuerpo tojanopochocá. <sup>37</sup> Pero chë Bëngbe Bëtsá tojanma chauatayenamabe cuerpna, ndoñe tonjanopochocá.

<sup>38-39</sup> “Asna, baconga y batanga, atšbe sëntseboše tšëngaftanga quem soye chašmotsetátšëmbo: Ndayá Jesús tojanmama, entsanga chëngbe bacna soyëngama perdonánënga montsemna. Jesúsbe yeca, nÿetsca chábeñe tmojtsošbuáchenga, bacna soyëngama perdonánënga mochántsemna. Ntšamo Moisesbe leyinë iuayancá tmojanmama, chënga ndoñe tmonjanobená chca perdonánënga jtsemnama; nÿe Jesúsbeñe jtsošbuáchiyëse chënga perdonánënga jtsemnana. <sup>40</sup> Cuedado šmochtsebomna, ntšamo Bëngbe Bëtsabe juabna oyebuambnayënga tmojanayancá, tšëngaftangaftaca ndoñe chaondochnënguama. <sup>41</sup> Bëngbe Bëtsá mëntšá tojánayana:

Smochjouena. Tšëngaftanga chë ntšamo atšbe tijayancá šmojtšábotenga, ojnánënga šmochántsemna y šmochanjóbana. Tšëngaftanga cabá vida šmobomnëntscuana, atšbe bëts soyënga chanjëftsema, y masque ndánaca chë soyëngama chacmojtsacúnta, tšëngaftanga chiñe ndoñe quešmochatošbuáchiye ca” —Pablo tojanoyebuambá.

<sup>42</sup> Pablo y chabe enutënga chë judiëngbe enefjuana yebnentšana tmojëftsanbocna ora, chë ndoñe judiënga chëngbiöye tmojanaimpadá, chë inÿe ochnaytescama chë soyëngama más jábuayenama. <sup>43</sup> Chentse chë te jénefnama tempo tojanopochocá ora, ba judiënga y ndoñe judiënga, chë Bëngbe Bëtsábiöye imojánadorana mo chë judiëngcá, Pablo y Bernabé tmojanëseto. Y chatna chënga tmojanabuayená nÿets tempo chamotsejuabnama, Bëngbe Bëtsá chëngbiana tšabe soyënga yojtsamama.

<sup>44</sup> Chë inÿe semana, chë ochnaytena, nÿa mo nÿetsca chë pueblentse oyenënga tmojanobeconá Bëngbe Bëtsabe palabra jouenama. <sup>45</sup> Pero ba entsanga choye jouenama tmojánama chë judiënga tmojáninÿe ora, tmojanotjyaná, ba entsanga Pablo imojtseyeunanama; as chënga tmojanontsé mocá ichámuana ndayá cha yojtsóyebuambnama, y chábíöye oyenguayana. <sup>46</sup> As Pablo y Bernabé más añémoca mëntšá tbojánayana: “Endánëyta, natsana tšëngaftanga, chë judiënga šmomnënga, Bëngbe Bëtsabe palabra jshabuayenana. Pero tšëngaftangna chë palabra šmontsaboté, y šmontsejuabná tšëngaftangbiana ndoñe tšabá yontsemna chë nÿetsca tescama yomna tšabe vida jtsebomnana ca; chë causa, bënga fchantsoñe chë ndoñe judiëngbeñe Bëngbe Bëtsabe palabra jóyebuambayama. <sup>47</sup> Er Bëngbe Bëtsá chama šjanichamó, mëntšá jauyanëse:

Aca tcbonjuábuayana chë ndoñe judiëngbiöye tšabe noticiënga jábuayenama, chaósertama. Y chca, aca chëngbiana cochántsemna mo canÿe binÿnayacá.

Chca, ácbeyeca nÿets luarënguenache entsanga atšbe chanjatsebacá ca.”

<sup>48</sup> Chë ndoñe judiënga chca tmojanuena ora, puerte imojtsóyējuaye y tmojanontsé mëntšá ichámuana: “Bëngbe Utabnabe palabra tšabá bëngbiana entsemna ca.” Y



chora, chë nyetsca tescama yomna tšabe vida jtsebonnama Bëngbe Bëtsá tempo tojánabacanga, tmojanontsé Jesúsbeñe jtsošbuáchiyana. <sup>49</sup> Y chca, nyets chë luariñe más entsanga Bëngbe Bëtsabe palabra imojtsuenana. <sup>50</sup> Pero chë judiënga tmojanoyebuambá, shembásengaftaca Bëngbe Bëtsá adórayënga y uámanënga, y chë pueblentša uámana taitángaftaca, jamama Pablo y Bernabé chabosufrima y chë luarentšana jtëbuacnama. <sup>51</sup> As, Pablo y Bernabé tbojésanshecstëtonata, judiënga jinÿanÿiyama chënga ndoñe tšabá tmojanmama; y chentšana, Iconio puebløye tbojtsanoñe. <sup>52</sup> Pero Jesucristbeñe ošbuáchiyënga corente oyejuayënga imojtsemna, y chë Uámana Espíritu chëngbe ainaniñe corente yojtsemádaye.

## 14

### *Pablo y Bernabé Iconio puebloca*

<sup>1</sup> Iconioca, Pablo y Bernabé cánÿiñe tbojánamashëngo chë judiëngbe enefjuana yebnentše y corente obenánaca Bëngbe Bëtsabe palabra tbojanoyebuambá. Chíyeca, ba judiënga y ndoñe judiënga Jesucristbeñe imojtsošbuaché. <sup>2</sup> Pero chë judiënga Jesucristbeñe ndošbuáchiyënga, chë ndoñe judiëngbioye tmojanayëñaná, Pablo y Bernabebiamama podesca chamotsejuabnama. <sup>3</sup> Chíyeca, Pablo y Bernabé bayté chentše tbojanototoná y ndauatjca Bëngbe Utabná Jesucristbiamama tbojanoyebuambá. Bëngbe Utabná obenana chata tojanatšatá bëts soyënga jtsamama, y chë soyëngaca Bëngbe Utabná entsanga tojaninÿanÿé, ndayá chë ichmónata ibojtsoyebuambnacá ndegombre bëtsemnama, chë Bëngbe Bëtsá nyetscanga iuababuánÿeshanana. <sup>4</sup> Pero nyetsca chë pueblentša entsanga ndoñe cachcá imontsejuabnaye; ínÿenga chë judiëngaftaca imojtsemna, y ínÿengna chë Jesucristbe ichmonátaftaca. <sup>5</sup> As, chë judiënga y ndoñe judiënga chentša mandayëngaftaca tmojanenoyeuná chata jtsatsetšenama y ndëtsbéngaca jtsébáyama. <sup>6</sup> Pero Pablo y Bernabé chama tbojántatšëmbona orna, tbojtsanëchañe Lистра y Derbe puebløye, Licaonia luaroca, y choca chábuañe luarëngoye; <sup>7</sup> y chë luarënguenáchnaca, chata Jesucristbe tšabe noticiënga entsanga tmojanabuayená.

### *Lистра puebloca, ndëtsbéngaca Pablo tmojtsanatëchënganja jtsóbama*

<sup>8</sup> Lистра puebloca inamna canÿe boyabása jama ndobená. Ndocna te yondobena jana, chca cosheto inónÿna causa. Chë boyabásana yojtsetbemana <sup>9</sup> ouenana ntšamo Pablo yojtsichamcá. Y Pablo chábioye tbojanonÿinÿé ora, tojántatšëmbona chë šocá tša yojtsošbuáchema, shnaná jtsatsemnama; <sup>10</sup> as Pablo, juayebuáchenëse tbojanianana: “¡Motsbaná y acbe shecuatšëngaca tšabá motsa ca!”

Chora chë boyabása, canÿe jontsënjëse tojantsá y yojóntša anana. <sup>11</sup> As chë entsanga, ndayá Pablo tojanmamá tmojáninÿe ora, tmojanontsé uayebuáchana chë Licaonia luarëntša biyañe, mëntšá: “¡Bëngbe diosënga bëngbioye tbojátšma mo entsatcá ca!”

<sup>12</sup> Bernabé imojtsábobuatma Zeus ca, mo chë chëngbe diosënga amëndayacá; y Páblëna Hermes ca, mo chë inÿe diosëngbiamama oyebuambnayacá. Páblëbioye chca imojtsábobuatma, er cha más yotsoyebuambná. <sup>13</sup> Zeusbiamama chentša bachna inabomna canÿe yebna chë pueblo chaboca, chábioye jadórama. Chë bachna, uacnënga tojanënatse y uantšëfjushangá tojanëyamba chë Zeus jadórama yebnentša amashjuanoye; y cha y chë entsanga imojtseboše chë uacnënga jashebuáyana y jajuinÿiyana, chca, chë ichmonátbioye jadórama.

<sup>14</sup> Bernabé y Pablo chama tbojántatšëmbona ora, entsáyá tbojtsanenántšajatanëca, entsanga jinÿanÿiyama, ntšamo chënga imojtsamcá chata tondaye yonjógusetama, y tbojëftsanotjajo entsangbe tsëntsajana y mëntšá ibojtsaychembumbuana: <sup>15</sup> “Baconga y batanga, ¿ndáyeca chca šmojtsama ca? Bëndata cach tšëngaftangcá entsata fsëndmëna. Muentše bëndata fsëntsemna nÿe jábuayenama Bëngbe Utabná Jesucristbe tšabe noticiënga, tšëngaftanga chë quem ndoservenana soyënga, vida ndbomna soyënga adórayana

chašmotsajbanama, y Bëngbe Bëtsá Ainabe benache chašmatishachama. Ndegombre, cha tojanma celoca, fshantse, nyetsca béjayënga y lempe ntšamo chenache yobinýncá. <sup>16</sup> Masque tempo, Bëngbe Bëtsá entšanga tojanalesenciá cada ona chaoma ntšamo tojtsejuabnacá, tšabá cachëngbiama yojtsémnayeca, <sup>17</sup> Bëngbe Bëtsá ndocna te ntjájbanana tšëngaftanga jtsinýanýnáyana, cachá tojama tšabe soyëngaca, mocna Bëtsá cha yomnana. Cha endama tšëngaftangbiama chauaftema y chë matënga botamana chaoshájonama, y beca saná cmondatsatná; y cha endama tšëngaftangbe ainaniñe corente oyejuayana chašmotsebomnana ca” —chata tbojánayana.

<sup>18</sup> Masque chë soyënga tbojánayana, nýe batšatema más bën y ya ndoñe matbënjánobenata chë entšanga jtsëuyanana uacnënga jashebuáyama, chca, chátbioye jadórama.

<sup>19</sup> Chca ora, básefta judiënga tmojánashjajna Pisidioca, Antioquíocana y Iconiocana, y chentša entšángbioye tmojanayëñaná, Jesucristbe ichmonatbe contra chamotsemnana. Chcasna, Pablo ndëtsbéngaca imojtséñanaye y chabe cuerpo chë pueblo chaboye tmojt-sansjojó, er chënga imojtsejuabnaye Pablo ya obaná yojtsemna ca. <sup>20</sup> Pero Jesucristbeñe ošbuáchiyënga Pablo tmojanóbobuashcona orna, cha tojtantsbaná y cachiñe chë puebloye tojttesaná; y chë yëfsana, Bernabéftaca Derbe puebloye tojána.

<sup>21</sup> Derbe puebloca Jesucristbe tšabe noticiënga entšanga tmojanabuayená, y chca, entšanga Jesucristbeñe imojtsošbuáchiye. Chentšana chata tbojésanshëcona Listra, Iconio y Pisidioca Antioquiye. <sup>22</sup> Chë luarënguenache chata ibojánana chë Jesucristbe ustonëngbioye atañëmuaye, cada te chábeñe más chamotsošbuáchema. Y entšángbioye tmojanéyana: “Bëngbe Bëtsabe amëndayoye jamashënguamna, bënga šontsamna quem luarentše bëtscá jëftsepadecénana ca.” <sup>23</sup> Nyetsca ošbuachiyëngcá enefjuanenache, bëtsejemëngcá mándayënga tmojanabacacá, chentša Jesucristbeñe ošbuáchiyënguentsana, cachënga chentša ošbuachiyëngbioye jtsamëndayama. Bëngbe Bëtsá jëtschuayama tondaye ntjascá imojtsemna y cháftaca imojtsencuënta ora, cha tmojanimpadá, chë ošbuáchiyënga Bëngbe Utabnabe cucuatšiñe chamotsemnana, ndábeñe chënga imojtsošbuaché.

### *Pablo y Bernabé, Sirioca Antioquía puebloye tbojtánata*

<sup>24</sup> Pisidia luarëjana tbojánachnëngo ora, Panfilia luaroye tbojánashjango. <sup>25</sup> Perge pueblentše Jesucristbe tšabe noticiënga entšángbioye tmojanabuayená, y chentšana Atalia puebloye tbojánata. <sup>26</sup> Chentšana, Bernabé y Pablo, bejaycá tbojtánata Sirioca Antioquía puebloye. Chentša entšanga Bëngbe Bëtsá tmojanimpadá chata chabe cucuatšiñe chabotsemnana, chë trabajuñe chaotsanýenama; y chorna, chë trabajo ya tbojanpochocá. <sup>27</sup> Choye tbojtánashjango ora, nyetsca Jesucristbeñe ošbuachiyëngbioye tmojánachembo, y tmojanacuntá ntšamo Bëngbe Bëtsá tšabe soyënga chátaftaca tojanmama, y ntšamo Bëngbe Bëtsá tojaninýanýé, chë ndoñe judiëngnaca chamotsobenama Jesucristbeñe jtsošbuáchiyama. <sup>28</sup> Y Pablo y Bernabé bayté chentše tbojanototoná Jesucristbeñe ošbuáchiyëngaftaca.

## 15

### *Ichmónënga y bëtsejemëngcá mándayënga Jerusalenoca tmojánenefjna jencuëntama*

<sup>1</sup> Chë tempo, báseftanga Judeocana áshjajnënga tmojanontsé, Antioquía pueblentše, chentša Jesucristbeñe ošbuáchiyënga mëntšá jabuátambana: “Base bobachtema chë más delicadentše ndoñe šmonjenotëtšëse, ntšamo Moisesbe leyíñe endayancá, ndoñe quenátopodena tšëngaftanga atsebácanënga jtsemnana ca.” <sup>2</sup> Chíyeca, Pablo y Bernabé jabuachana chca buatëmbayëngaftaca imojánenatsësnaye. Cabana, tmojanëbuáyana Pablo, Bernabé y ínýënga Jerusalenoye chamotsama, choca chë Jesucristbe

ichmónëngaftaca y chë chentše Jesucristbeñe ošbuachiyëngbeñe bëtsëjemëngcá mandayëngaftaca chama chamencuentama.

<sup>3</sup> Chcasna, chë Antioquioca imojánenefjuana Jesucristbeñe ošbuáchiyënga Jerusalenoye chënga tmojanichamó. Fenicia y Samaria luarëjana imojtsachnëjuana ora, chënga tmojanacuntá ntšamo chë ndoñe judiënga chëngbe tempsca soyënguiñe ošbuáchiyana tmojtsanajbanama y chora Bëngbe Bëtsábeñe imojtsošbuáchema. Jesucristbeñe chentša ošbuáchiyënga chca tmojanuena ora, puerte oyejuayënga imojtsemna.

<sup>4</sup> Pablo y chë ínÿenga Jerusalenoye tmojánashajna ora, chentša Jesucristbeñe ošbuáchiyënga, Jesucristbeñe ichmónënga y bëtsëjemëngcá mándayënga chëngbiöye tmojanëbuaja. Chentšana, Pablo y Bernabé tbojanacuntá lempe ntšamo Bëngbe Bëtsá chátaftaca yojamcá. <sup>5</sup> Pero básefta fariseunga, chora ya Jesucristbeñe ošbuáchiyënga, tmojantsá y mëntsá tmojánayana: “Chë ndoñe judiënga entsamna chë más delicadentše base bobachtema tëtšenënga jtsemnana, bënga judiëngcá; y tšëngaftanga cmontsamna chënga jáuyanana, ntšamo Moisesbe leyënguiñe iuayancá chamotsamama ca.”

<sup>6</sup> As, chë Jesucristbeñe ichmónënga y bëtsëjemëngcá mándayënga tmojánenefjna jencuëntama, chë ndoñe judiënga aíñe o ndoñe yonjánamnama chë más delicadentše base bobachtema tëtšenënga jtsemnana, ntšamo chë judiënga imojanamancá. <sup>7</sup> Bën y bëtscá chënga tmojanencuentá chentšana, Pedro tojantsbaná y mëntsá tojanëyana: “Jesucristbeyeca catsátanga, tšëngaftanga šmondëtatšëmbo, ya bayté entsemna Bëngbe Bëtsá tšëngaftangbentšana atše šonjanábuayana, Jesucristbeñe tšabe noticiënga chë ndoñe judiënga jábuayenama, chca, chënga Bëngbe Utabnábeñe chamotsošbuáchema. <sup>8</sup> Bëngbe Bëtsá jtsetatšëmbuana lempe ntšamo entsanga tmojtsejuabnacá. Y cha šonjaninÿanyé, chë ndoñe judiëngnaca imnobena chabe entsanga jtsemnana, chábeñe tmojtsošbuáchese, chë Uámana Espíritu chëngbe ainaniñe cháumashënguama cha tojanma ora, ntšamo cha bëngbe ainaniñe tojanmá. <sup>9</sup> Y chca, Bëngbe Bëtsabiama nÿetscanga cachcá monduámana, judiënga y ndoñe judiëngnaca; y cha tojama chë ndoñe judiëngnaca chëngbe bacna soyëngama perdonánënga chamotsemnana y ainaniñe tšabe juabna chamotse-bomnana, Bëngbe Bëtsabe palabriñe jtsošbuáchiyëse. <sup>10</sup> Y mora, ¿ndáyeca tšëngaftanga ndoñe šmontseboše ntšamo Bëngbe Bëtsá tojamcá? Pero tšëngaftanga šmontseboše, chë ndoñe judiënga Jesucristbeñe ošbuáchiyënga lempe chë leyentša mandënga chamot-socumplínama, mo nda ínÿabiöye uauta uasmanësha cuaftsasmëmnacá; pero lempe chë mandënga, ni bëngbe bëts taitanga ni bënga ntsobenana jocúmpliana. <sup>11</sup> Y chca ndoñe chaondësemna. Bënga mondošbuaché bënga atsebácanënga imomnana Bëngbe Utabná Jesús chabe tšabe juabna šojaninÿanyéyeca, y Bëngbe Bëtsá cachcá chë ndoñe judiëngnaca tojatsebacá ca” —cha tojanëyana.

<sup>12</sup> Chorna, chentše imojtsemna entsanga nÿetscanga iytëca tmojanobiama, y tmojanuena Bernabé y Pablo jtsóyebuambnayana, chë bëts soyëngama, Bëngbe Bëtsabe obenana entsanga jinÿanyiyama, y inÿe soyëngama chabe obenánaca, ntšamo chë ndoñe judiëngbeñe Bëngbe Bëtsá chátaftaca tojanmá.

<sup>13</sup> Chë útata jóyebuambayama tbojanpochocá ora, Santiago mëntsá tojánayana: “Jesucristbeyeca catsátanga, šmochjouena: <sup>14</sup> Simón šonjabuayená ntšamo Bëngbe Bëtsá natsana tojaninÿanyé, chë ndoñe judiëngnaca cha iuanÿenama, y chíyeca cha chënguentšana banga tojubuáyana chabe entsanga chamotsemnana. <sup>15</sup> Ntšamo Simón šonjabuayenacá entsemna cachcá ntšamo chë Bëngbe Bëtsabe juabna oyebuambnayënga tmojanayancá, ntšamo yochjanopásama y ntšamo Bëngbe Bëtsabe uabemana palabrenguiñe endayancá, mëntsá:

<sup>16</sup> Chentšana atše chanjésabo

y chë Rey Davidbe pamíllanga cachiñe uámanënga chantabiama;

mo nda canÿe uáshajayena yebna tojëtšjebcá, atše, Davidbe pamíllanga cachiñe uámanënga chantabiama;

17 chca, chë inÿe entšanga chamonguango ndayá jamana atše, tšëngaftangbe Utabná, más chašmotsábuatmama,

nÿetsca ndoñe judiënga, chë atšbe entšanga chamotsemnama atše tijábacacanga.

18 Chca atše, tšëngaftangbe Utabná sentsichamo,

nda ya bayté entsemna tonjanma entšanga chë soyënga chamotsetatšëmbuama ca —chiñe endayana.”

19 Chentšana Santiago mëntšá tojanëyana: “Chíyeca atše sëntsejuabná, bënga ndoñe šontsamna chë ndoñe judiëngbiana jamana más totcá chaotsemnama Jesucristo jtsëstonama. 20 Chamna, šontsamna chënga juabuábiamana y jáuyanana ndoñe chamondëtsesá, sananga chë ndaye soyënga entšanga tmojuabná diosënga yomna ca jadórana tmojuiyëbana; bacna soyënga shembásenga o boyabásengaftaca ndoñe chamondëtsama y ndoñe chamondëtsesá tšëšana bayëngbe mëntšëna, y buiñe cach ndoñe ca. 21 Er chë natsana tempënga orscana, nÿetsca pueblënguenache mondmëna chë Moisés tojëftsanayana soyënga entšangbioye abuyayinayënga; y chabe leyënga, nÿetsca ochnayté mondbetsalíaye chë bënga judiëngbe enefjuana yebnënguenache ca” —cha tojanëyana

*Chë Jerusalenoca ichmónënga y bëtsëjemëngcá mándayënga canÿe tsbuanácha tmojanichmó chë ndoñe judiëngbiana*

22 Chentšana, chë Jesucristbe ichmónënga y bëtsëjemëngcá mándayënga, nÿetsca chë Jesucristbeñe ošbuáchiyëngaftaca tmojanenoyeuná chënguentšana báseftanga jabacacayama, Pablo y Bernabéftaca Antioquía puebloye jíchamuama. Chcasna, tmojanëbuáyana Judas, chë Barsabás ca uabobuatmá, y Silas; chata ibnamna uámanata chë Jesucristbeñe ošbuáchiyënguentše. 23 Y chëngaftaca canÿe tsbuanácha tmojanichmó, y chiñe mëntšá yojétsayana:

Bënga chë Jesucristbe ichmónënga y chë bëtsëjemëngcá mándayënga, cach tšëngaftangcá Jesucristbeñe ošbuáchiyënga, fsëntseboše Bëngbe Bëtsá salúdoca chacmotsábouamna, tšëngaftanga chë ndoñe judiënga, Jesucristbeñe ošbuáchiyënga, Antioquía puebloca y Siria y Cilicia luarëngoca oyenënga.

24 Bënga fsëntsetatšëmbo bëngbentšana báseftanga choye tmojángama, bënga ntjamëndacá, y fsëntsetatšëmbo mocna soyënga cmojtsabuátambama y chë causa, tšëngaftanga ndoñe šmontsetatšëmbo ntšamo jtsejuabnayana ndayá jamama yomnana, Jesucristbe canÿe ndegombre ustoná jtsemnama. 25 Chcasna, bënga fsënjenoyeuná y šonjúnÿnana tšabá yojtsemna báseftanga bënguentšana jabacacayana tšëngaftangbioye jontješiyama chamotsama, y Pablo y Bernabé, chë Jesucristbeyeca bëngbe bonshana catšátataftaca, choye chamotsama. 26 Chë úatna ba soye tbojotsbocá vida jáshbiana, Bëngbe Utabná Jesucristbiana oservëniñe. 27 Chátaftaca Judas y Silas fsënjichamó; y chatna cach tšëngaftangaftaca bochanjóyebuambaye ntšamo quem tsbuanáchañe yojtsábemanama. 28 Chë Uámana Espíritu y bënga cachcá fsëntsejuabná, bënga ndoñe šontsamna tšëngaftanga jamëndana bëtscá jabuache mandënga Moisesbe leyënguiñe chašmotsocumplínama. Nÿe quem uámana soyënga chiñe aíñe cmontsamna jtsobedecénana: 29 Ndoñe šmattsesaye mëntšëna, chë ndaye soyënga entšanga tmojuabná diosënga yomna ca jadórana tmojóba bayëngbiana; ndoñe šmatjofsiye buiñe, ni šmatjase tšëšana bayëngbe mëntšëna; y shembásenga y boyabásengaftaca bacna soyënga ndoñe šmattsama. Chë soyënga ntšamcá, tšabá šmochanjama.

Bëngbe Bëtsá salúdoca chacmotsábouamna ca —chiñe yojétsayana.

30 Chcasna, chë quem Jerusalenocana ichmónënga tmojésanodiošftanentšana, Antioquía puebloye tmojána; y chocna, nÿetsca chë Jesucristbeñe ošbuachiyëngbioye tmojanëbuaja y chë tsbuanácha tmojanayentšbuaché 31 Chë Antioquía pueblentša Jesucristbeñe ošbuáchiyënga ntšamo chë tsbuanáchañe yojtsabemancá tmojanalía ora, bëtsa añemo tmojtanca y corente imojtsóyejuaye. 32 Judas y Silas Bëngbe Bëtsabe juabna



oyebuambnayata ibnamna; as, chátnaca chë chentša Jesucristbeñe ošbuachiyëngbioye ba soyënga tmojanëyana, chënga añemo chamotsatsbomnama y Jesucristbeñe corente chamotsošbuáchema. <sup>33</sup> Chentšana baseftaytese, chentša Jesucristbeñe ošbuáchiyënga chëngbioye tmojanadiošoftá, chë ndëmuanyënga tmojanichamóngbioye jtama. <sup>34</sup> Pero Sílasna tšabá ibojtsinÿana cachentše más jëftsajëtanama. <sup>35</sup> Pablo y Bernabé baseftayshinÿe Antioquía pueblentše tbojanototoná y ba ínÿengaftaca Bëngbe Utabná Jesucristbe tšabe noticiënga entsanga tmojanabuatambá y tmojanabuayená.

*Pablo cachiñe inÿe luarëngoye tojána, Bëngbe Bëtsabe trabajo jamama*

<sup>36</sup> Chentšana baseftaytese, Pablo Bernabébioye tbojaniana: “Bëngbe Utabnabe palabra tbonjanabuayená luarëngoye bochjésa, choca Jesucristbeñe ošbuáchiyënga jábuachama y jányama ntšamo imojtsemnama ca.”

<sup>37</sup> Bernabé yojtseboše, Juan chë Marcos ca uabobuatmábioye chátaftaca jëftsbetšama. <sup>38</sup> Pero Páblëna ndoñe tšabá ibontsinÿana cha jëftsbetšana, er Juan chátbentšana tojtsanojuánañe Panfilia luarocana, y ndoñe tonjanatjëmbambá, Bëngbe Bëtsabe trabajo japochócantscuana. <sup>39</sup> Y chë palabrama tondaye tbonjanenóyeunata causna, Pablo y Bernabé cachcá tbojesanenonÿaye. Y chca, Bernabé, Marcos tbojëftsanbetše, y bejaycá Chipre luaroye tbojánata; <sup>40</sup> y Páblëna, Silas tbojanábuayana jëftsbetšama. Chë Antioquía pueblentša Jesucristbeñe ošbuáchiyënga Bëngbe Bëtsá tmojanimpadá Pablo y Silas Bëngbe Utabnabe cucuatšinë chabotsemnama, chatbe trabajuiñe chaotsanÿenama. Chentšana, Pablo Sílasftaca tbojánbocna y <sup>41</sup> Siria, Cilicia luarënguëjana tojánachnëngo entsanga añemo atšatnaye, chë luarenache enefjuana ošbuáchiyënga Jesucristbeñe más chamotsošbuáchema.

## 16

*Pablo Timotéobioye tbojáninÿena*

<sup>1</sup> Chentšana Pablo tojánashjango Derbe y Listra luaroye, y chentše tbojáninÿena canÿe Jesucristbeñe ošbuachiyá, Timoteo ca uabainá; cha inamna canÿe judiá Jesucristbeñe ošbuachiyabe uaquiñá y chabe taitana griego entsá inamna. <sup>2</sup> Chë Listra y Iconioca Jesucristbeñe ošbuáchiyënga Timoteobiana tšabá imojanoyebuambná. <sup>3</sup> Pablo tojánbošena Timoteo jëftsbetšama; pero cabá ndetsbetše orna, Pablo base bobachtema chë más delicadentše tbojantëtše, ntšamo judiënga imojanamancá. Cha chca tojanma, jobenayama chë judiënga imojoyena luarëngoye cháftaca jama, er nyetsca judiënga imnatátšëmbo Timoteobe taitá griego inamnana. <sup>4</sup> Chë ibojtsachnéjuana pueblënguenache chata ibojtsana Jesucristbeñe ošbuachiyëngbioye abuayiynaye, ntšamo Jerusalenoca Jesusbe ichmónënga y bëtsëjemëngcá mándayënga tmojanamëndacá, ndayá chë Jesucristbeñe ošbuáchiyënga ndoñe judiënga jamama yojtsamncá. <sup>5</sup> Nyets luarenache enefjuana ošbuáchiyënga, Jesucristbeñe más imojtsošbuáchiye, y cada te Jesucristbeñe ošbuáchiyënga más imojtsóbotena.

*Pablo mo otjenayoquécá canÿe Macedonioca entsábioye tbojáninÿe*

<sup>6</sup> Chë Uámana Espíritu, Pablo y Sílasbioye tojaninÿanÿé, chata ndoñe yontsanamna Asia luaroca Bëngbe Bëtsabe palabra entsanga jábuayenana; asna, tojánachnëngo Frigia y Galacia luarëjana. <sup>7</sup> Y Misia luaroca enajébanoye tbojánashjango ora, tmojanjuabó tsjuana jana, Bitinia luaroye; pero chë Uámana Espíritu tojanabuayená choye ndoñe chabondëtsama. <sup>8</sup> Misia luarëjana tmojánachnëngo ora, Troas luaroye chënga tmojána. <sup>9</sup> Chë te ibeta, Pablo mo otjenayoquécá tojáninÿe canÿe Macedonioca boyabása ibojtsebiatsana y mëntšá ibojtseimpadana: “Diosmanda Macedoniocyte mabo y šmabëjabuache ca.” <sup>10</sup> Pablo chca tojáninÿe y cachora lempe tmonjanprontá Macedoniocyte jama. Atšnaca, chë quem soyënga uabiamnayá, chënga sënjëtsatjëmbambnaye.

Bënga fsënjétsejuabnaye ndegombre Bëngbe Bëtsá šojtsanachembuana choye jama ca, Jesucristbe tšabe noticiënga choca entsanga jábuayenama.

### *Pablo y Silas Filipos pueblaca*

<sup>11</sup> As, Troasentsana bejaycá fsënjána Samotracia luaroye, y yëfsana Neápolis puebløye, <sup>12</sup> y chentsana Filíposoye. Filipos enjamna canye uámana bëts pueblo Macedonioca y bëtscá romanënga oyeniñe. Chë luarentse baseftayté fsënjanoquedanga. <sup>13</sup> Canye ochnaytena, chë pueblentsana fsënjéftsanbocna y chë fshájaye tsachoye fsënjána. Fsënjauena chentse canjamna canye luare Bëngbe Bëtsáftaca jencuéntama ca, y fsënjána janguanguama. Fsënjáninyëna ora, chentse fsënjanothiama y Bëngbe Bëtsabe palabra fsënjanoyeuambá chentse tmojanójoto shembásengbiamá. <sup>14</sup> Enjamna canye shembása, Lidia ca uabainá, Tiatira pueblócá, y cha enjamna uámana uabuángana uafjatsenga entsayá uená. Cha inamna Bëngbe Bëtsábioye adorayá y chentse Páblëbioye ibotseyeu-nana. Bëngbe Bëtsá tojanma cha chabosertá lempe ntšamo Pablo yojtsoyebuambnacá, Jesucristbeñe chaotsošbuáchema. <sup>15</sup> Cha y chabe yebnentse oyenënga tmonjánenabaye ora, Lidia mëntsá šonjanaimpadá: “Tšëngaftanga šmonjayana atse Jesucristbeñe ndegom-bre stošbuaché ca; chcasna, mabënga yebnoye, átsbentse chašmoquedama ca.”

Y šonjanëtaríe bënga chentse joquédama.

<sup>16</sup> Canye te, chë Bëngbe Bëtsáftaca encuëntaye luaroye fsënjétsajna orna, šonjanëbiatse canye tobiáše, oservená, bacna bayëjbe juabna uambayá; chë causa cha malisi-ayá inamna. Chabe nduiñënga becá crocénana imojanójacañe, chë tobiáše yojan-malísiaye soyëngama. <sup>17</sup> Chë tobiáše tonjanontsé Pablo y bënga usetonana y mëntsá enjétsaychembumbuana: “¡Quem boyabásenga montsemna chë celoca Bëngbe Bëtsabe os-ervénënga y tšëngaftanga cmontsabuaiyina ntšamo Bëngbe Bëtsá yobena tšëngaftanga játsebacama ca!”

<sup>18</sup> Y bayté chca enjanchembumbuana; chë causa, Pablo bonjétssetana y cabana, ton-janobuértana y chë bacna bayëjbioye mëntsá tbonjanianana: “¡Jesucristbe obenánaca y cha jótšëmbonëse, cbontsemánda chë tobiášbentšana chacuaisebocnama ca!”

Y cachora chë bacna bayëja chë tobiášbentšana tojésanbocna.

<sup>19</sup> Pero, chë bayëjbe juabna chábsentšana tojésanbocnama y chëngbiamá más crocénana jabemama chora chë tobiáše ndoñe yontsobenama, chë tobiáše nduiñënga tmojáninye ora, Pablo y Silasbioye tmojánishëche y tmojtsanasjojoye plazoye, mandayëngbioye.

<sup>20</sup> Chë mandayëngbioye tmojanënatse ora, chënga mëntsá imojtsichamo: “Quem boyabásata judío entsata bondmëna, y muatbe causa bëngbe pueblentsa entsanga montsenbouenana, <sup>21</sup> y bontsabuatambá soyënga jamama ntšamo chë judiënga imua-mancá y bëngbe leyënguiñe chë soyënga jamama ndoñe quenátslesenciana. Bënga ndoñe quešnátamna ni jouenana, ni jamana chë soyënga, romanënga bëtsemnayeca ca” —chënga imojtsichamo.

<sup>22</sup> Chora chë entsanga tmojanontsé uayebuáchana; as, chë mándayënga tmojanamëndá chata entsayá jtsëtsejquëcana y niñëfjëngaca jtsachebuánganjana. <sup>23</sup> Jabuache tmo-janachebuánganjentsana, cárceloye tmojanautame y chë utámenënga shanyá tmojan-mandá yejuana chaotsabuajënyama. <sup>24</sup> Chca tmojanmandá ora, chë utamianá chata tojanënatse chë más tsoye utámenoye y shecuatšentšana tsbuanëšinë tojanatsebuá.

<sup>25</sup> Pero tsëntseto orna, Pablo y Silas ibnétsocantañe Bëngbe Bëtsá jëtschuayama, y cháftaca ibnéncuentaye; y chë inye utámenëngna chca imojtsuenana. <sup>26</sup> Ndeolpe, corente jabuache yojtsëbánjua y chë utámena yebna fshantsocana yojtsábonjnaye. Cachora, nyetsca chë utámenentsa bëšašangá tojantëfjo y nyetsca utámenënga chë cadenëjuangá yojtsayentsjafjona. <sup>27</sup> Pero chë utámenënga shanyá tojanofšená y chë utámenentsa bëšašangá yojtsatëfjnama tojáninye ora, cha tojanjuabó nyetsca utámenënga tmojtsana-cheta ca; chë causa, chabe espadëja yojenosëngbotëntšena jtsenóitanama. <sup>28</sup> Pero

Pablo tbojánbochembo: —¡Acbe cuerpo ndocá matenábomana; nyetscanga camuentše fsëndetsomñe ca!

<sup>29</sup> Asna, chë utámenentša shanyá canye uajuinýanésa tojanéyá y chë utámenoye ochamanana tojánamashëngo y auatja causa ngmëmnyá Pablo y Sílasbe shecuatšentše vojoshëntsamentšiyé. <sup>30</sup> Chentšana tojtánëbuacna y tojanéyana: —Señórata, ¿ndayá šojtsemna jamama atše atsbocaná jtsemnama ca?

<sup>31</sup> Y chata tbojanjuá: —Bëngbe Utabná Jesúsbeñe cochtsošbuáchiye, y chca, Bëngbe Bëtsá aca cmochanjatsbocá y acbe yebnentše oyenëgnaca ca.

<sup>32</sup> Y cha y nyetscanga chë yebnentše imojtsemnënga, Bëngbe Utabnabe palabra tmojanabuayená. <sup>33</sup> Cach ora chë ibeta, chë utamianá chata tojanënatse chë lisianënguiñe jetsajabiama. Chentšana, cha y chabe pamíllanga tmojánenabaye. <sup>34</sup> Chentšana, chë utamianá chata tojanënatse chabe yebnoye y saná tojanacaredadó. Cha y nyetscanga chë yebnentše oyenënga oyejuayënga imojtsemna, Bëngbe Bëtsábeñe imojtsošbuáchema.

<sup>35</sup> Yëfsana cachëse, chë mandayëngna soldadënga tmojanichamó, chë utamianá jamándama Pablo y Silas chauatabáshejuanama. <sup>36</sup> Chë utamianá Páblëbioye tbojaniyana: —Chë mándayënga šmonjamandá tsëndata jtabáshejuanama. Chcasna, šontsobena natjëmbana jtsatoñana ca.

<sup>37</sup> Pero Pablo chë soldadënga tojanéyana: —Bëndátnaca fsëndmëna mo Romoca onýnanatcá derecho bomnata y šonjáchebuanganja entšangbe delante, bacna soyënga aíñe o ndoñe tatifjamama cabá ndinýanýiye ora, y cárceloye šmonjautame. ¿Y mora imojtseboše iytëcana jtabáshejuanama? Chca ndocna te chaondëtsemna; cach mándayënga chamuabo jabátëbuacnama ca —cha tojánayana.

<sup>38</sup> Chentšana, chë soldadënga chë mandayëngbeñe tmojanobuambá ntšamo Pablo y Silas tbojanayancá; chca chënga tmojántatsëmbona chatna mo Romoca onýnanatcá derecho bomnata ibnamnama; chë causa, chë mándayënga puerte imojtsauatja. <sup>39</sup> Chcasna, cach mándayënga tmojána chata perdón jatëtejañama; chentšana tmojtánëbuacna y tmojanéyana: “Diosmanda, muentšana inye luaroye motsoñata ca.” <sup>40</sup> As chata chë utámenentšana tbojëftsánbocna y Lídiëbe yebnoye tbojëftsánata. Chentšana, Jesucristbeñe ošbuáchiyëngaftaca tmojánenefña y chata tbojánayana soyëngaca chëngbioye tmojanañemó. Y chentšana, chata ínjoye tbojtsanoñe.

## 17

### *Tesalónica puebloca, Pablo y Sílasbioye ndoñe tsabá tmonjanëbuaja*

<sup>1</sup> Pablo y Silas inye luaroye ibojtsaye ora, Anfípolis y Apolonia bëts pueblënguëjana tbojánachnëngo y canye bëts pueblo, Tesalónica ca uabáinoye tbojánashjango. Chentše, chë judiënga canye yebna imnabomna chënga jénefnama. <sup>2</sup> Páblëna, ntšamo enjanamancá, cada ochnayté chë jénefnama yebnoye yojánaye, unga semanëntscuana, y chentše chë judiëngaftaca yojanoyebuambná y imojánëtsëtsnaye. Bëngbe Bëtsabe uabemana palabrënguiñe iuayana soyëngaca, <sup>3</sup> chënga yojanabuayinýa y ndegombre yojaninýanýná, Bëngbe Bëtsabe Uámana Uabuayaná jóbánama y chentšana jtayenama ibojamnama. Y mëntšá yojanëtsëtsná: “Chë Cristo, Jesús endmëna, ndabiama atše cbontsabuyayinýa ca.”

<sup>4</sup> Judiënguentsána báseftanga chiñe imojtsošbuáchiye y Pablo y Silas tmojanéseto más jouenama. Ba grieguënga, Bëngbe Bëtsá adórayënga, Jesucristbeñe imojtsošbuáchiye y ba uámana shembásengnaca. <sup>5</sup> Pero chë judiënga ndošbuáchiyënga chca tmojáninýe ora, puerte envidia imojtsebomna. Asna, chënga tmojánachembo banga, tondaye amënga y bacna entšanga, y chënga tmojanenutaná jamama nyetsca chë pueblentša entšanga chamotsenbouéñanama; y canye entšá, Jasón ca uabainabe yebna chënga tmojtsanabuache, Pablo y Silas jtsanguanguama, chentšana jesëbuacnama y entšangbe cucuatšíñe jabáshejuanama. <sup>6</sup> Pero chentše ndocná tmonjáninýena; as chë entšanga Jasón imojtsesjojoye y chentša mándayënga imojëtsemnoye tmojanánatse y Jesucristbeñe inye

ošbuachiyëngnaca choye tmojanënatse, y mëntšá imojtsáyebuache: “¡Chë boyabásata, chë ndëmuanÿata ibojtsama nÿetsca luarentša entsanga chamuenbouéнанama, quem luaróynaca tbojabo, <sup>7</sup> y Jasón chabe yebnentše chata tojúbuaja ca! ¡Chënga montsama ntšamo chë Romoca bëts mandadbe mandënguiñe ndoñe quenatslesenciancá, er chënga montsichamo inÿe rey canmëna, Jesús ca, y cha, César chë Romoca mandadbe cuenta nÿetscángbeñe yojtsemánda ca!” —chënga imojtsáyebuache.

<sup>8</sup> Chë entsanga y chë pueblentša mándayënga chca tmojanuena ora, corente imojenbouéнанa. <sup>9</sup> Pero Jasón y chë ínÿenga, cháftaca imojtsemnënga, crocénana tmojtanjajó, y as tmojtanabáshejuana.

### *Pablo y Silas Berea Puebloa*

<sup>10</sup> Ya ibeta yojtsemna orna, chë Jesucristbeñe ošbuáchiyënga tmojanma cachora Pablo y Silas Berea bëts puebloye chabuétsebocnama. Y chata choye tbojánashjango ora, chë judiëngbe enefjuana luaroye tbojánata. <sup>11</sup> Chentša judiënga imojamna más tšabe ainana bomnënga chë Tesalonicoca judiëngbiamá; chcasna, oyejuayënga chë buayenana soye Jesucristbiamá tmojanóyëngacñe, y cada te Bëngbe Bëtsabe uabemana palabra imojanalía, jtsetatšëmbuama, ntšamo Pablo y Silas ibojtsëtsëtsnacá aïñe o ndoñe ndegombre yojtsemnama. <sup>12</sup> Y chca, ba chentša judiënga chatbe palábraca Jesucristbeñe imojtsošbuáchiye, y Grecia luaroca ba uámana shembásenga y boyabásengnaca. <sup>13</sup> Pero, Pablo Bereoca chë Bëngbe Bëtsabe buayenana soyama entsanga yojtsabuayiynama chë Tesalonicoca judiënga tmojántatšëmbona ora, chënga choye tmojána y tmojanma chentša entsanga chamuenbouéнанama. <sup>14</sup> Chcasna, banga Jesucristbeñe ošbuáchiyënga tmojanma cachora Pablo chentšana chauétsebocnama y béjaye tsachoye chaotsoñama; chëntscuana, Silas y Timoteo Bereoca tbojanoquedá. <sup>15</sup> Pablo tmojantjëmbambá entsangna, Atenas ca uabaina bëts pueblóntscoñe cháftaca tmojána. Chentšana, Pablo chënga tojanabuayená chamuauisshëconama Silas y Timoteo jaúnayama betscó jtsayana, Pábloftaca jateninÿenama.

### *Pablo Atenas puebloa*

<sup>16</sup> Pablo Atenas bëts puebloa Silas y Timoteo yojtsëbatmanëntscuana, puerta tbojanongmé, er cha tojáninÿe chentša entsanga imojtsadorana bëtscá cachëngbe pormana soyënga, ndayama chënga imojanjuabná diosënga yojamna ca. <sup>17</sup> Chíyeca, chë judiëngbe enefjuana yebnentše, judiënga y ndoñe judiënga Bëngbe Bëtsá adorayëngaftaca imojánenatsëtsnaye, y cada te chentša plazoca chë ndëmuanÿenga chentše imojanashjajuanëngaftácnaca. <sup>18</sup> Y báseftanga, ntšamo jtsejuabnayama entsanga abuátambayënga, epicureunga y estoiquënga ca uabainëngnaca Pábloftaca imojánenatsëtsnaye. Inÿenga imojtsichamo: “¿Ndayama quem bostero yojtsoyebuambná ca?” Y ínÿengna: “Chana inÿe luarëngoca entsangbe diosëngbiamá muentše entsabóyebuambnaye ca.”

Chënga chca imojtsichamo, er Páblëna Jesusbiamá y chë obanënga jtayenama yojanoyebuambná. <sup>19</sup> Asna, chentša entsanga cha tmojanánatse canÿe luaroye, entsanga jénefnama y oyeambuambnayënga joyaunayama luare, Areópago ca uabáinoye. Chentše imojanamana uámanënga jénefnana, nderado ndabiamá jayanama tšabá o ndoñe tšabá tonjamama. Chora Pablo tmojantjá: —¿Chë aca contsabuatambá soyënga ndayá bétsayanana bënga quefstsobena jtsetatšëmbuama ca? <sup>20</sup> Aca tsëm soyënga šcontsëtsëtsná y bënga fsëntseboše jtsetatšëmbuana ndayá chë soyënga bétsayanana.

<sup>21</sup> Er nÿetscanga Atenasentša oyenënga y inÿe luarëngocana áshjajnëngna, corente yojanogúsetana chë tojtsopasana tsëm soyëngama jtsuenanana y jtsencuëntayana.

<sup>22</sup> As Pablo tojantsá chëngbe tsëntsaca chë Areópago ca uabáinentše y tojánayana: —Atenasentša entsanga: ntšamo bominÿe sënjajajcá, atše sëntsetatšëmbo tšëngaftanga ba diosënga puerta šmayaunana y šmadoránama. <sup>23</sup> Atše sëndánrreparana tšëngaftangbe diosënga šmétsadorana luarënguenache y sënjínÿena canÿe altar y chentše mëntšá



iuábemana: “Chë Bëtsá nduabuatmabiama ca”. Y morna, chë Bëtsá chë nda ntsabuatmcá šmadoránabiama, atše cbontsabuaiyná.

<sup>24</sup> “Chë Bëtsá quem luare y lempe ntšamo chentše yomncá tojanma; cha endmëna quem luarentše y celoca Utabná, y cha ndoñe quenatiyena cha jadórama entšangbe jebna yebnënguiñe, <sup>25</sup> ni quebnatájaboto ndocná chabiama tondaye chaondétsama, er cha endmëna nda inétsama bënga vida chamotsebomnama y jtseshachnayama chamot-sobenama, y cha nyetsca soyënga šnetsatšatnaye.

<sup>26</sup> “Cha nÿe canÿe boyabásabentsana nÿets luarënguentša entsanga tojánabiama, nÿets quem luarentše chamotsiyenama; y cha quem soyënga cabá ndëma ora, tojanjuabó mocna ora y ndayentše entsanga chamuetsiyenama; <sup>27</sup> chca, Bëngbe Bëtsá chamonguan-guama, masque chabiama ndoñe corente tmontsetátšëmbo, y chamuinÿena y chábeñe chamotsošbuáchema; pero ndegombre, Bëngbe Bëtsá bëngbentše cada cánÿabentsana ndoñe bënoca quenátsmëna. <sup>28</sup> Ntšamo canÿa tojanayancá: ‘Bënga Bëngbe Bëtsáftaca cánÿiñe mo canÿacá mondmëna; chábeyeca bënga vida mondbomna, jobónjuama mon-dobena y ainënga mondmëna ca’. Ntšamo tšëngaftanguentša báseftanga bëts soyëngama uabiamnayëngnaca tmojanayancá: ‘Bënga nÿetscanga Bëngbe Bëtsabe básenga mondmëna ca’. <sup>29</sup> Y chcasna, Bëngbe Bëtsabe pamíllanga bënga tmomnëse, ndoñe quešnátamna jtse-juabnayana Bëngbe Bëtsá yomna mo cach entsangbe castellano, midio o chë ndëtšbeca pormana soyëngcá ca, er chë soyëngna nÿe ntšamo entsanga tmojajuabocá y tmojt-sobencá japórmana. <sup>30</sup> Pero Bëngbe Bëtsá tojanjuabó ndoñe ntjatonÿayana chë entsangbe tempsca ndosertánana, y morna, nÿetsca luarënguentša entsanga entsamënda, ndaye bacna soyënga tmojtsamama ngmënacá chamuenojuabó, chca amama chamotsajbaná y Bëngbe Bëtsabe benache chamuatishache ca. <sup>31</sup> Bëngbe Bëtsá canÿe te tojuinÿnaná, y chë tena, ndocnábioye ínÿabiama más tšabá ntjatonÿaycá, cha echanjayana entsanga tšabá o ndoñe tšabá tmonjamama; lempe chca cha echanjama canÿa cachá tbojabocacá entsáftaca, Jesús; y chca yochtsemnamna, Bëngbe Bëtsá entsanga tojinÿanÿé, chë boca-caná Jesús cháuatayenama cachá tojánmayeca ca” —Pablo tojánayana.

<sup>32</sup> Chë obanënga mochtayenama ichámuana chë entsanga tmojanuena ora, báseftanga Pablo imojtsáboyejuana, y ínÿengna mëntsá imojtsichamo: —Bënga fsëntseboše chë consichamo soyënga más chcoye cachiñe jatuenama ca.

<sup>33</sup> As Pablo chëngbentsana tojésanbocna. <sup>34</sup> Pero báseftanga aíñe Jesucristbeñe imojt-sošbuáchiye y Pablo tmojanasto más jatuenama; chënguentše imojamna Dionisio, canÿa chë Areopagoca tbiamanënguentšá; canÿe shembásanaca, Dámaris ca uabaina, y ínÿenga.

## 18

### *Pablo Corinto puebloca*

<sup>1</sup> Chë soyënga tojanochnëngüentsana, Pablo Aténasentsana Corinto bëts puebloye tojána. <sup>2</sup> Chocna, canÿe judío Ponto luaroca onÿnanáftaca tbojáneninÿena, Aquila ca uabainá. Cha y chabe shema Priscila, cabá chora cuenta Italia luarocana tbojánabo, nÿetsca judiënga Romocana chamuáisebocanama choca bëts mandado Claudio tojan-mandá causa. Pablo tojána chata jautsëtsayama, <sup>3</sup> y ntšamo chata jamama Páblënacá jamama inatátšëmboyecna, chátaftaca yojtsoquedañe y cánÿiñe chënga innatrabájaye; chënga innatátšëmbo mo tambotemëngcá entsëjuaca japórmana. <sup>4</sup> Y nÿetsca ochnayté, Pablo yojanamana chentša judío entsangbe enefjuana yebnoye jana, Bëngbe Bëtsabe soyëngama jóyebuambayama, y puerte yojtsentsena judiënga y ndoñe judiënga chamot-sošbuáchema, ntšamo cha yojtsanëtsëtsnacá ndegombre bëtsemnama.

<sup>5</sup> Silas y Timoteo Macedoniocana choye tbojánashjango ora, Pablo nÿets tempo Bëngbe Bëtsabe soyëngama entsanga yojtsabuayiynaye y puerte tšabá chë judiënga yojan-inÿanÿná, Jesús ndegombre Bëngbe Bëtsabe Uámana Uabuayaná bëtsemnama. <sup>6</sup> Pero chë judiënga Páblëbe contra imojtsemna y tmojanontsé podesca chabiama ichámuana. Asna,

Pablo chabe uichëtjonyangá yojtsenántsasjajaye, chënga jinÿanÿiyama chënga ndoñe tšabá tmonjánchjanguama, y tojanéyana: “Tšëngaftanga ndatsebácanënga chašmojóbanëse, cach tšëngaftanga šmochtsótatsëmbñe; atšna ndoñe. Mëntescana chë ndoñe judiënga jábuayenama chantsoñe ca.”

<sup>7</sup> Chorna, chë judiëngbe enefjuana yebnentšana tojëftsanbocna y canÿe boyabása, Ticio Justo ca uabainábioye tojtsanoñe. Cha Bëngbe Bëtsábioye ibojánadorana y chë enefjuana yebnentša juachaca inoyena. <sup>8</sup> Y Crispo, canÿe chë enefjuana yebnentša mandayá, Bëngbe Utabná Jesucristbeñe yojtsošbuáchiye y nÿetsca chabe pamíllangnaca; y banga chë Corintentsëngnaca Jesucristbeñe imojtsošbuáchiye, Pablo yojtsoyebuambná ora; y chënga tmojánenabaye. <sup>9</sup> Canÿe ibeta, Bëngbe Bëtsá Páblëbioye mo canÿe otjenayoquécá tbojaniyana: “Ndoñe matauatjana; nÿe cochtsana atšbe soyëngama oye-buambnaye y ndoñe iytëca cattsemana. <sup>10</sup> Er atše ácaftaca sëntsemna y ndocná quecmochátsbojajo ntšámna jáborlama; atše bëtscá entsanga quem pueblentše sëndábamna ca.” <sup>11</sup> Chcasna, Pablo Corintentsë canÿe uata y chnénguana shinÿe tojanototóna, Bëngbe Bëtsabe palabra entsanga abuátambaye.

<sup>12</sup> Pero, Galión chë Acaya luarentša mandado inamna orna, chë judiënga imojenóyeunaye Páblëbe contra; cha tmojánishache y chë tribunaloye tmojanánatse. <sup>13</sup> Chocna, chë mandado tmojaniyana: —Mua entsanga entsëtsëtsná y entsama chënga Bëngbe Bëtsá chamotsadorana, pero ndoñe ntšamo bëngbe leyënguñe endayancá ca.

<sup>14</sup> Pablo jóyebuambayama uatajanóntša orna, Galión chë judiënga tojanéyana: —Quem entsá nderado ínÿabioye matbënjóba o ndayánaca chca matënjobuachjanguá, as cocayé atše matijótbema tšëngaftanga judiënga yejuana joyaunayama; <sup>15</sup> pero ntšamo šmontsichamcá entsemna nÿe buatëmbana soyëngama, nÿe tšëngaftanga šmëbuatma entsangbiama y cach tšëngaftangbe leyëngama; chcasna, cach tšëngaftanga cmontsamna jenóyeunayana y jamana ntšamo chašmojenoyeunacá. Atše quem base soyëngama ndoñe quetsátsboše ngoberna jtsemnana ca.

<sup>16</sup> As Galión tojanamëndá chë tribunal luarentšana chë judiënga jtëbuacnama. <sup>17</sup> Chorna, chë entsanga tmojánishache chë judiëngbe enefjuana yebnentša mandayá, Sóstenes ca uabainá, y Galionbe delante imojtsejantšetaye. Pero Galión chë soye tondayana ibontsentšamna.

*Pablo Antioquoye tojtaná y chentšana cachiñe inÿe luarëngoye tojána, Bëngbe Bëtsabe trabajo jamama*

<sup>18</sup> Pablo cabá bayté Corintentsë tbojánatona. Chentšana, Jesucristbeñe ošbuachiyëngbentšana tojesanodiošoftá y bejaycá Siria luaroye tojána, Priscila y Aquílaftaca. Cabá Sirioye nda ora, Cencrea puebloca nÿets stjénashe yojtsenátstbotje, Bëngbe Bëtsábioye jinÿinÿiyama canÿe soye tbojanšbuáchenama. <sup>19</sup> Efeso puebloye tmojánashjajna ora, Páblëna Priscila y Aquila tojésanabashejuana. Chentšana, cha tojána chë chentša judiëngbe enefjuana yebnoye y chentše chë judiëngaftaca yojanoyebuambná y imojánenatsëtsnaye. <sup>20</sup> Báseftanga Pablo tmojanimpadá inÿe baseftayté chentše chauesomñama, pero chana ndoñe tonjanoyauná; <sup>21</sup> chentšana, chëngbentšana tojesanodiošoftá, mëntšá jëftsëyanëse: “Nderádose cachiñe chantésabo tšëngaftanga jabábuachama, Bëngbe Bëtsá šojalesenciase ca.”

Chora, Pablo bejaycá Efesocana tojëftsanbocna. <sup>22</sup> Cesarea puebloye tojánashjango ora, tojána jacheuayama Jesucristbeñe ošbuáchiyënga Jerusalenoca; y chentšana Antioquoye tojána. <sup>23</sup> Chentše baseftayté yojëftsemna; y chentšana, Pablo tojesaná Galacia y Frigia luarënguenache, Jesucristbeñe ošbuáchiyënga añemo atšatnaye.

*Apolos, Efeso puebloca Bëngbe Bëtsabe soyëngama yojanabuayiyná*

<sup>24</sup> Cach tempo, Efesoye tojánashjango canÿe judío, Apolos ca uabainá, Alejandría bëtš pueblócá; cha puerte obená inamna jonguamiyama y corente inatátšëmbo Bëngbe

Bëtsabe uabemana palabrengama. <sup>25</sup> Bëtsá tojánatsjinýe chë Bëngbe Utabná tojaninýanýé benachama; añémoca yojanoyebuambná y Jesusbe soyëngama botamana yojanabu-atambá, masque cha nýe ntšamo Juan entšanga tojánabuatambama y tojanëbáyama inatátšëmbo. <sup>26</sup> Ndauatjá Apolos tojanontsé jóyebuambayama chë judiëngbe enefjuana yebnentše. Pero Priscila y Aquila cha imojóyeunaye ora, barie tmojanchembo y más botamana tmojanbuayená, ntšamo Bëngbe Bëtsabe inýinýena benache bëtsemnama. <sup>27</sup> Apolos Acaya luaroye jama yojtseboše orna, Jesucristbeñe ošbuáchiyënga bëtscá tmojanañemó y choca Jesucristbeñe ošbuáchiyëngbiama canýe tsbuanácha tmojanichmó, chca, Apolos choca tšabá chamofjama. Acaya luaroye tojánashjango ora, Jesucristbeñe ošbuáchiyënga bëtscá tojanëjabuache. Bëngbe Bëtsá chëngbe tšabiama yojanjuabnáyeca, chënga Jesucristbeñe corente imojtsošbuáchiye. <sup>28</sup> Entšangbe delante chë judiëngaftaca jabuachana imojánenatsëtsnaye y nyetscanga tojaninýanýé, ntšamo ndoñe tšabá inamncá chë judiënga imnatatšëmbuama; y Bëngbe Bëtsabe uabemana palabrengaca chënga tojaninýanýé, Jesús Bëngbe Bëtsabe Uámana Uabuayaná bëtsemnama.

## 19

### *Pablo Efeso puebloca*

<sup>1</sup> Apolos Corintoca yojtsemnëntscuana, Páblëna chë tjañe luarënguëjana tojánachnëngo y Efesoye tojánashjango; chentše básefta ošbuáchiyënga tojánanyëna, pero chëngna nýe ntšamo Juan chë Ubayaná tojanabuatambacá imnatátšëmbo. <sup>2</sup> Pablo chënga tojanatjá: —¿Uámana Espíritu chenjánabo tšëngaftangbe ainaniñe jtsemándayama, Jesucristbeñe ošbuáchiyënga šmojanóbiamá ora ca?

Chora chënga tmojanjuá: —Ni mo queftsátstatšëmbo chë Uámana Espíritu yomnama ca.

<sup>3</sup> Y Pablo tojanéyana: —As, ¿ntšamo šmojánenabayé ca?

Y chënga tmojanjuá: —Fsënjánenabayé ntšamo Juan entšanga yojanëbayancá ca.

<sup>4</sup> As Pablo tojanéyana: —Juan tojanëbayé chë bacna soyënga amama ngménaca tmojanenojuabó, chca amana tmojanajbaná y chë Bëngbe Bëtsabe benache tmojánishachënga, y entšanga yojanëtsëtsná chë chábentšana yochjanashjanguábeñe chamotsošbuaché ca; y cha Jesús endmëna ca —Pablo tojánayana.

<sup>5</sup> Chca tmojanuena ora, chënga tmojánenabayé Bëngbe Utabná Jesús jótšëmbonëse, chábeñe imojtsošbuáchema. <sup>6</sup> Pablo chëngbe bestšašniñe chabe cucuatšënga tojanajó ora, Uámana Espíritu chëngbe ainaniñe tojánamashëngo jtsemándayama; tmojanontsé inýetsá biyangana, chënga tempo ndmabiyañe, y Bëngbe Bëtsabe juabna imojtsoyebuambná.

<sup>7</sup> Chentše imojtsemna bnëtsana uta entšanga.

<sup>8</sup> Unga shinýëntscuana Pablo yojánaye chë judiëngbe enefjuana yebnoye y ndauatjá Jesucristbe soyëngama yojanoyebuambná; entšangftaca imojánenatsëtsnaye y entšanga yojanëtsëtsná Bëngbe Bëtsabe amëndayama, chënga chábeñe chamotsošbuáchema. <sup>9</sup> Pero ba nduauenanënga ndoñe imontsošbuaché y Bëngbe Utabná tojaninýanýé Benachama entšangbeñe bacna soyënga imojtsichamo. Chcasna, Pablo chëngbentšana tojtsanojuánañe y nýe chë Jesucristbeñe ošbuáchiyënga tojanëbuaja canýe scueloye, canýe entšá Tirano ca uabainabe yebnoye. Chentše cada te chë ouenanëngaftaca yojanoyebuambná, <sup>10</sup> y chca yojánama uta uatëntscuana; y chca, nyetscanga Asia luaroca oyenënga Bëngbe Utabnabe palabra tmojanuena, judiënga y ndoñe judiëngnaca. <sup>11</sup> Y Bëngbe Bëtsá puerte bëts soyënga Pábloftaca yojtsama. <sup>12</sup> Tša bëts soyënga tojanma; chíyeca, nyetsca chë Pablo tojuabojajo entšayá y pañuelëjuangá, entšanga imojanamana šoquëngbioye juyambana, y chca tmojama orna, chë šocanënga juenatjëmbana y chë bacna bayëjënga entšangbentšana jësebocanana.

<sup>13</sup> Pero básefta judiënga tsáshenañe bacna bayëjënga entšangbentšana imojtanëbuacana. Chë judiënga imojtseboše chë bayëjënga jtëbuacnana, Bëngbe Utabná Jesús jótšëmbonëse. As, chë bacna bayëjëngbioye mëntsá imojtsëtsëtsnaye: “Bëngbe Utabná Jesús, Pablo

bondbetsebayaná jótšëmbonëse y chabe obenánaca cbontsamënda muabentšana chašmuaisebocnama ca.”

<sup>14</sup> Chca imojánama chë judío Esceva ca uabainabe canÿsëfta uaquiñënga. Esceva inamna bachnangbe amëndayá. <sup>15</sup> Pero canÿe, Escévëbe uaquiñënga chca tmojánayana orna, chë bacna bayëja mëntšá tojanëjua: “Atše Jesús sënduábuatma y sëndëtatsëmbo nda Pablo yomnana; pero tšëngaftanga, ¿ndëmuanyënga šmomna ca?”

<sup>16</sup> As, cachora chë bacna bayëjbe juabna uambayá chëngbioye tojanontsënja y tša añemo bomná bëtsemnayeca chënga tojtsanayëjaná, jabuache jtsajantšetayëse; chë causa, chënga chë yebnentšana tmojtsanacheta enašënga y lisiánënga. <sup>17</sup> Nÿetscanga Efesoca oyenënga, judiënga y ndoñe judiënga, chca tmojántatsëmbona y corente imojtsanauatja. Y chca, Bëngbe Utabná Jesús entšanga más imojtsatschuanaye.

<sup>18</sup> Jesucristbeñe imojtsošbuachiyënguentšana, banga imojánashjajuana y entšangbe delante imojtsecompšaye, tempo bacna soyënga tmojanmama; <sup>19</sup> banga, chë bocjuanana soyënga jamama imojanëntšénënga, chëngbe bocjuanana librëšangá tmojaniyëbo y entšanga imojtsantješna ora, chëšangá imojtsajuinÿiye. Tmojanjuabó ntsachetšá chë librëšangá betsámanama y tojanóbocna shachna bnëtsana uaranga crocénana nÿetšá. <sup>20</sup> Y chca, Bëngbe Utabnabe palabra más ba entšanga imojtsuenana y chiñe imojtsošbuáchiye y Bëngbe Bëtsá chabe obenana entšángbeñe yojtsinÿinÿnaye.

<sup>21</sup> Chca tojanochnëngüentšana, Pablo tojanjuabó Macedonia y Acaya luarënguëjana jachnënguse, Jerusalenoye jésama. Y yojtsejuabnaye cha ibojtsemna Jerusalenentšana Romoye jama ca. <sup>22</sup> Asna, chabe uajabuachanënguentšana útata, Timoteo y Erasto, Macedonioye cha tojanichamó. Chëntscuana Pablo baseftayté más Asia luarentše tbojanjëtana.

### *Efesoca entšanga tmojánenbouenana*

<sup>23</sup> Chë tempo, Efesoca entšanga corente tmojánenbouenana, chë Bëngbe Utabná yojtsinÿanÿná Benache imojtsisháchichanëngbe causa. <sup>24</sup> Chë entšanga chca tmojanma, er canÿe entšá mídioca soyënga pormayá, Demetrio ca uabainá, chënga tojanayëjaná chca jamama. Cha yojanamana binche soyetëmënga japórmana y chëtëmënga yojáninÿna mo chë Efeso puebloquëngbe diosá Artemisa jadórama bëts yebncá. Demétrioftaca imojantrabájangna bëts cá crocénana imojanójacañe chë soyetëmënga eniñe. <sup>25</sup> Demetrio tojanëbuaja cháftaca imojantrabájangna y ínÿënga cach mídioca soyënga pórmayënga, y mëntšá tojanëyana: “Baconga, tšëngaftanga šmondëtatsëmbo, bënga bëts cá crocénana jtsebomnamna quem trabajuentšana chca jopódiana. <sup>26</sup> Pero tšëngaftanga šmontsonÿá y šmontsuenana ntšamo chë Pablo ca uabainá yojtsichamcá. Cha entsichamo, chë entšangbe pormana soyënga ndoñe yontsemna jtsadoránana ca; y chca ba entšanga tojabuayená y chënga aiñe montseyeunana. Chë soyna ndoñe nÿe muentše Efesentše chca quenátopasana; nÿets Asia luaríñnaca chca entsopasana. <sup>27</sup> Resjo entsemna; chca causa, entšanga bëngbe trabajuama ndoñe tšabá quemochátichamo y chë uámana Artemisa jadórama bëts yebnama mochántichamo uámana yebna ndoñe yondmëna ca. Y chca, Artemisbe obenana entšanga mochantsábotena y Artemisa ndoñe bañe quemochátatuatma, nda Asientše y nÿets luaríñnaca mondadorana ca.”

<sup>28</sup> Chca tmojanuena ora, chca pórmayënga puerte tojánëtëna y tmojanáyebuachena: “¡Efesoquëngbe Artemisa corente bëtsá endmëna ca!”

<sup>29</sup> Y chca, nÿetsca chë pueblentša entšanga tmojánenbouenana. Tmojanotabá Gayo y Aristarquëbioye, Macedonioca boyabásata, Páblëbe tjëmbambnayata; y sjojónana tmojanënatse chëngbe enefjuana yebnóntsoñe. <sup>30</sup> Pablo tojánbošena choye jamashënguama chë entšángaftaca jóyebuambayama, pero Jesucristbeñe ošbuáchiyënga ndoñe tmonjanlesenciá. <sup>31</sup> Chë Asioca mándayëngbentše báseftanga inamna Páblëbe amiguënga, y chënga Páblëbioye palabra tmojanafja chë jënefnama yebnoye ndoñe chaondámashënguama.



<sup>32</sup> Chëntscuana, entšanga imojtsejotonocna, ínÿenga imojtsechembumbuana canÿe soye y ínÿengna inÿe soye, chënga corente imojtsenbouenana causa, y banga chentše imojtsemnënga ndoñe imontsetátšëmbo ndayama choye tmojanobéconama. <sup>33</sup> Pero básefta judiënga, canÿe entšá, Alejandro ca uabainá, chë entšangbe natsanoye tmojanajuatsëntše, y báseftanga cha tmojanbuayená ntšamo yojtsopasánama. Asna, Alejandro tojánefjatsëmbo cucuátšeca iytëca chamobiamama, er cha yojtseboše entšangbe delante chë judiënga jobuauyanama. <sup>34</sup> Pero, Alejandro judío bemnama chë entšanga tmojántatsëmbona ora, nÿetscanga tmojanáyebuachena uta horëntscuana, mëntšá: “¡Efe-soquëngbe Artemisa corente bëtsá endmëna ca!”

<sup>35</sup> Chë pueblentša mándayëngbe uajabuachaná, entšanga iytëca jábiamama tojanobená ora, tojanëyana: “Efe-soquënga, nÿets luariñe endótatsëmbo, quem pueblentše oyenënga iuamna jtsinÿenana chë Artemisa jadórama bëts yebna y chë cha jadórama celocana ot-satsena ndëtšbé. <sup>36</sup> Ndocná quenátobena chama jayanama ndoñe ndegombre yondmëna ca. Chcasna, natjëmbana motsomñënga y tondaye matamëngana corente tšabá ntjshajuaboycá. <sup>37</sup> Tšëngaftanga quem boyabásenga moye šmojunatse, masque Artemisbe yebnentše tondaye tmonjatbëba y bëngbe Artemisbiana ndoñe podesca tmonjoyebuambá. <sup>38</sup> Demetrio y cháftaca šmotrabájanga, nderado ndabiama ndaye demanda šmojtsebonnësna, cabildoca endatëfjna y chentše mándayënga montsemna chë demandënga jouenama, y chëngbentše cada ona šmochjëftsendemánda. <sup>39</sup> Y tšëngaftanga inÿe soye šmojtseguasna, cmontsamna ntšamo bëngbe leyënguiñe yomandancá, nÿetsca quem pueblentše oyenëngaftaca jenóyeunayana. <sup>40</sup> Ndayá mënté tojopasá causa, resjo entsemna bëngbiana chamuayana, ntšamo leyënguiñe yomncá bënga ndoñe montsama ca; y bënga ndoñe quemuátobena ndayá jojuana, ndáyeca quem enbouenanana tojopasá ca šojátjayëse ca” —cha tojanëyana. <sup>41</sup> Y chca jayanëse, chë entšanga tojtanichamó.

## 20

### *Pablo, Macedonia y Grecia luaroye tojána*

<sup>1</sup> Chë enbouenanana tojanochnëngo ora, Pablo chë Jesucristbeñe ošbuachiyëngbiroye tojanëbuaja jábuayenama, añemo chamotsatsbomnama; tojesanodiošoftá y Macedoniroye tojëftsanbocna. <sup>2</sup> Chë luarënguëjana cha tojánachnëngo Jesucristbeñe ošbuáchiyënga becá añemo atatsatnaye, ba chabe palabrëngaca; chentšana, Grecia luaroye tojánashjango, <sup>3</sup> y chentše unga ishinÿe tojanoquedá. Barquëshañe Sirioye játama Pablo yojtseprontana orna, tojántatsëmbona chë judiënga cha jtsóbama tmojanenóyeunama. Asna, tojanenojuabó jesshëconama, cach Macedonia luarëjana jésachnënguse. <sup>4</sup> Pablo quem boyabásenga tmojantjëmbambá: Sópater, chë Bereocá, Pirrbe uaquiñá; Aristarco y Segundo, Tesalónicocata; Gayo, Derbe pueblócá; Timoteo; y Tíquico y Trófirmnaca, Asia luarocata. <sup>5</sup> Chënga tmonjanonatsé y šonjanëbatma Troasoca. <sup>6</sup> Chë levadúraca ndëpormana tandëse saye fiestentšana, Filíposentšana barquëshañe fsënjëftsanbocna y shachna tianoye, Troasoca chë tmonjanonatsenga fsëntanishëche, y chentše canÿe semana fsënjanoquedanga.

### *Ntšamo tojanopasá Troas puebloca*

<sup>7</sup> Chë inÿe semana jobojátšama te, fsënjánenefjna Jesucristbeñe ošbuachiyëngcá tandëse jajátayama, cánÿiñe jasama; y Pablo entšanga enjëtsëtsësnaye. Cha bonjamna yëfsana chentšana jëftsebocnana; chë causa, más bën chëngaftaca tonjanoyebuambá, tsëntsetëntscuana. <sup>8</sup> Fsënjamna canÿe tsoye tsbanana tsañoca y chentše ba uajuinÿanëshangá enjanamna; <sup>9</sup> y canÿe bobontse, Eutico ca uabainá, ventanentše enjántbemana. Pablo bën enjanoyebuambná causa, chë bobontse ocnayana tbojanábuache. Cabana, corente tojtsanomaná ora, chë unga tsañocana tontsanótsatše y

obaná chora tmontanatsbaná. <sup>10</sup> As, Pablo tonjánastjango, chë bobóntsbióye tbonjanotsbuajó y tbonjanotsejcuá. Y chë entsanga tonjanéyana: “Ndoñe nyetsá matauatjëngana; ainá cha entsatsmëna ca.”

<sup>11</sup> Chentsana Pablo cach tsbanánoye tonjesaná y tandëse tonjanjatá, jtenójuaboyama ndayá Jesús jóbánëse tojanmama. Chora Pablo chë entsángaftaca tonjanse y tontëtanontsé oyebuambnayana, jabinÿnëntscuana. Chora Pablo chentsana tontsanoñe. <sup>12</sup> Y chë otsatšena bobontsna ainá imojtsatánatseñe, y chama chë entsanga corente oyejuayënga imojtsemna.

### *Pablo Troasentsana Mileto puebloye tojána*

<sup>13</sup> Bëngna fsënjanonatsé y barquëshañe fsënjána Aso pueblóntscoñe, chentsana Pablo jtesbetsama, ntšamo fsënjanenoyeunacá, er Pablo tonjánbošena fshantscá choye jana. <sup>14</sup> Asoca Pábloftaca fsëntaneninyëna ora, bëngaftaca barquëshañe cha tonjána Mitilene puebloye. <sup>15</sup> Chentsana fsënjéftsambocna y yëfsana Quío luarëjana fsënjánachnëngo, y chë inÿe yëfsana Samos luaroye fsënjánashjajna. Chentsana fsënjána y yëfsana Mileto puebloye fsënjánashjajna. <sup>16</sup> Chca tonjanochnëngo er Pablo ndoñe chenátanbošena Efesoye jama, Asia luariñe ndoñe yapa ndëtsemnama. Chca tojánbošena er cha enjëtseboše betscó Jerusalenoca jtsatsmënana, tojopodesna chë judiëngbe fiesta, Pentecostés ca uabaina fiestama.

### *Ntšamo Pablo chë Efesoca ošbuachiyëngbeñe bëtsëjemëngcá mándayënga tojanéyana*

<sup>17</sup> Miletocana Pablo tonjanmandá chë Efesoca ošbuachiyëngbeñe bëtsëjemëngcá mándayënga jobiatšana. <sup>18</sup> Chënga tmonjánashjajna ora, Pablo tonjanéyana: “Tšëngaftanga šmondëtatšëmbo ntšamo atše quem Asia luaroye sënjabánashjango orscana tšëngaftangbeñe snetsamana. <sup>19</sup> Nyets tempo Bëngbe Utabná sëndëserveda y cach atše uamaná ndoñe quetsatenobiamná. Corente shëchbuiye tijëftsoferdé y ba soyënguiñe tijasufri, chë judiënga atše jóbama mondboše causa. <sup>20</sup> Y lempe ntšamo tšëngaftangbe tšabiama yomncá tbonjabuayená; tondaye ntjatsbuetamencá. Nyetscangbe delante sënjabuatambá y tšëngaftangbe yebnënguenáchnaca. <sup>21</sup> Judiënga y ndoñe judiënga Bëngbe Bëtsabe soyëngama sënjabuayená, bacna soyënga amama ngmënaca chamuenójuaboma y chca amana chamotsajbanama, Bëngbe Bëtsabe benache chamuishachama y Bëngbe Utabná Jesúsbeñe chamotsošbuáchema. <sup>22</sup> Y mora Jerusalenoye chanjá; Uámana Espíritu chca šontsemánda y ndayá choca chjapásamna ndoñe quetsátstatsëmbo. <sup>23</sup> Nyë mëntsá aíñe sëndëtatšëmbo: Nyetsca bëts pueblënguenache ndayëjana atše chandbétsana, Uámana Espíritu šondbëtsebuayiyenaye entsanga cašmochjutame y puerta chaisufrima camochjama ca. <sup>24</sup> Atšbe vida cach atšbiama ndoñe yapa quenatámana, chaitsaina o chayóbana. Pero atšbiama iuámanana endmëna ndayá atše jobenayana atšbe trabajo jëftsepochócana, ndayá Bëngbe Utabná Jesús šojanmandá jamama, chë tšabe noticiënga Bëngbe Bëtsá entsángaftaca tšabia yomnama jábuayenama.

<sup>25</sup> “Y mora atše ndegombre sëntsetatšëmbo, tšëngaftangbentsana, chë ndëmuanÿëngbentše Bëngbe Bëtsabe amëndayama sënjabuayená, ndocná atše más quešmochátinye. <sup>26</sup> Chíyeca, atše ndegombre mënté cbetséyana: Atše tondaye quetsátstatsëmbo nderado nda ndatsbocaná chaojóbanabiama, <sup>27</sup> er atše ntšamo Bëngbe Bëtsá jamama yojuabnacá lempe tbonjabuayená, tondaye ntsebuetamencá. <sup>28</sup> Chcasna, cach tšëngaftangbiama šmochtsantješna y nyetscanga muentše Jesucristbeñe ošbuachiyëngbiámna. Chëngbeñe mo chëngbe abujënyangcá Uámana Espíritu tmonjajayé, Bëngbe Bëtsabe entsanga chašmotsanÿenama, chënga Bëngbe Bëtsá chábenga tojábiana, chabe Uaquiñabe buiñe juabuáshanëse y jóbánëse, mo bëtscá cuafjopagacá. <sup>29</sup> Atše sëntsetatšëmbo, atše chaitsoñe orna, banga mochanjabo y chënga mochántsemna mo corente tšátjaye tjañe quešëngcá, Jesucristbeñe ošbuáchiyënga chábeñe ošbuáchiyana chamotsajbanama chënga jamama. <sup>30</sup> Y tšëngaftangbentsánëna

báseftanga mochanjábocana y entsángbioye uayátsenaye soyënga mochanjabuatambá, chca, báseftanga Jesucristbeñe ošbuáchiyënga chë ínÿengbentsana chamotsoluarema y nÿe chë abuatambayëngbioye chamotsésetonama. <sup>31</sup> Chcasna, sempre šmochtsantješna; ndoñe chacmondébnëtjomba, atše unga uatëntscuana, bnëté y ibeta, tšëngaftanga cada ona cbondétsabuayiynama y chama atše puerte tijasufrí.

<sup>32</sup> “Y morna, Jesucristbeyeca catsátanga, Bëngbe Bëtsabe cucuatšinë cbétsabashejuana y ntšamo tšëngaftangbiamá chabe tšabe juabna yomnama palabréngaca, tšabá chašmuesomñe. Cha endobena jamama tšëngaftangbe ainaniñe más chašmotsošbuáchema, y endobena tšabe soyënga tšëngaftanga jatšatayama, ndayá jatšatayama tojanašebuachenacá mo tšëngaftangcá entsángbioye, ndëmuanÿenga cha tojáchembo chabe entsanga chamotsemnama. <sup>33</sup> Atše ndocnabe crocénana, o castellano o entsáyá atšbiamá quetsatántšaboše; <sup>34</sup> más inÿetšá, y tšëngaftanga lempe šmondétatšëmbo, atše cach atšbe cucuatšeca tijéftsetrabajama, atšbiamá y átšeftaca imojamnëngbiamá opresido enjamna soyënga janguanguama. <sup>35</sup> Atše nÿets tempo sëndinÿanÿná entšá chca ibomnama, chë jabuache jatrabájana y chë ujabótënga jujabuáchana, quem Bëngbe Utabná Jesusbe palabréngama sempre jtsejuabnayëse: ‘Canÿe entšá más oyejuayá jtsemnana ndayánaca ínÿabioye tbojtsatšetná ora, y ínÿabioye tbojtseyëngacá ora ndoñe nÿa nÿetšá ca’ ” –Pablo tonjanoyebuambá.

<sup>36</sup> Pablo chë soyënga tonjánayanentsana, tonjanoshamentšé y nÿetscanga chentše monjétsenngaftaca Bëngbe Bëtsá tmonjanótsëmbona. <sup>37</sup> Nÿetscanga tmonjánenobošachna y Pablo tmontanotsejjuá y tmontanámocho. <sup>38</sup> Y entsanga corente ngménaca monjétsenna, chënga ndocna te más cha mochántinÿe ca Pablo tojanëyana causa. Chentšana, chënga chë barquëshá enjetsamnëntscoñe cha tmonjantjëmbambá.

## 21

### *Pablo Jerusalenoye tojána*

<sup>1</sup> Chë Jesucristbeñe ošbuáchiyënga fsënjéftsanashejuana ora, barquëshañe fsënjanojayé y ndericho Cos luaroye fsënjána; chë yëfsana Rodasoye y chentšana Pátara puebloye. <sup>2</sup> Pátara pueblentše canÿe barquëshá fsënjáninÿena, Fenicioye enjétsaye; asna, chëshañe fsënjanojayé y chentšana fsënjéftsanbocna. <sup>3</sup> Fsëntsachnëjuana ora, fsënjáninÿe Chipre luare; Chipre bëngbe uañicuayoica tonjanoquedá y bëngna Sirioye fsënjétsaye. Tiro pueblentše chë barquëshentša uasmanëshangá jéftsáboshjonama yojámnayeca, chë puebloye bënga fsënjéftsanamashjna. <sup>4</sup> Chentšna, Jesucristbeñe ošbuáchiyënga fsënjánanÿena y canÿsëfta te chëngaftaca fsënjanoquedá. Chënga Pablo tmonjanianyana cha ndoñe ibonjamna Jerusalenoye jtsayana ca, er chë Uámana Espiritu tojanabuayená ndayá choca cháftaca jopásama. <sup>5</sup> Chë canÿsëfta te tonjanochnëngo ora, chentšana fsënjéftsanbocna y nÿetscanga parejo chëngbe shémangaftaca y básengaftaca šonjanatjëmbambá chë pueblo chabóntscoñe; y chentše, chë chënÿañe fsënjanošamentšé y Bëngbe Bëtsá fsënjanimpadá. <sup>6</sup> Chentšana, fsënjesanodiošoftá y chë barquëshoye fsëntanášëngo; chentšana chë ošbuáchiyënga cachëngbe yebnëngoye tmontaná.

<sup>7</sup> Tirentsana fsënjéftsanbocna y Tolemaida puebloye fsënjánashajna; y chentše tonjanopochocá bëngbiamá bejaycá chë te ayana. Tolemaidentše Jesucristbeñe ošbuáchiyënga fsënjanocheuá y chëngaftaca canÿe te fsënjanoquedanga. <sup>8</sup> Yëfsana, bënga chentšana fsënjéftsanbocna y Cesarea luaroye fsënjánashajna. Chocna, bënga fsënjána Felipe chë Jesucristbiamá tšabe noticiënga abuayiynayabe yebnoye y cháftaca fsënjanoquedanga. Felipe enjamna canÿa chë Jesucristbe ichmónëngbioye ujabuachanënguentšá, Jerusalenoca ubuáyanënga. <sup>9</sup> Felipe enjánabamna canta ndëbouamna bemianga y chënga monjamna Bëngbe Bëtsabe juabna oyebuambnayënga. <sup>10</sup> Ya bayté chentše fsënjétsenna orna, Judeocana tonjánashjango

canÿa Bëngbe Bëtsabe juabna oyebuambnayá, Agabo ca uabainá. <sup>11</sup> Agabo bëngbioye tonjánashjango ora, Páblëbe uasnanëja tonjanca y cucuatšënga y shecuatšënga cachá tonjanenabatsëca y mëntšá tonjánayana: “Uámana Espíritu entsichamo, Jerusalenoca quem uasnanëja nduíñbioye chë judiënga mëntšá camochjama y ndoñe judiëngbe cucuatšëne camochjáboshjona ca.”

<sup>12</sup> Chca fsënjanuena ora, bënga y chentša entsanga Pablo fsënjanimpadá Jerusalenoye ndoñe chaondëtsama. <sup>13</sup> Chora Pablo tonjánayana: —¿Ndáyeca šmojtsošaché y šmojtsama atšbe ainaniñe puerte ngménana chaotsemnama ca? Atše sëntseprontana y ndoñe nÿe chašmobatsëcama; Jerusalenoca jobanámnaca sëntseprontana, Bëngbe Utabná Jesus-biama ca —cha tonjánayana.

<sup>14</sup> Jáyënjana ndoñe chibiatanobená ora, ndoñe más chibiatanimpadá; nÿe mëntšá fsënjanayana: —Ntšamo Bëngbe Utabná yojtsebošcá chaotsemna ca.

<sup>15</sup> Chë soyënga tonjanochnëngüentsana, fsënjanoprontá y Jerusalenoye fsënjána. <sup>16</sup> Cesareoca, básefta Jesucristbeñe ošbuáchiyënga choye šonjanatjëmbambá y chocna, chënga šonjanënatse canÿe Chipre luaroca entsabe yebnoye, Mnasón ca uabainá, ndábentše bënga joquédama. Mnasón tempscana inamna Jesucristbeñe ošbuachiyá.

### *Pablo tojána Santiago jauatsësayama*

<sup>17</sup> Jerusalenoye fsënjánashajna orna, chentša Jesucristbeñe ošbuáchiyënga oyejuayënga šonjanëbuaja. <sup>18</sup> Yëfsana, Pablo bëngaftaca tonjána Santiago jábuachama, y chentše, nÿetsca chë ošbuachiyëngbeñe bëtsëjemëngcá mandayëngnaca monjëtsemna. <sup>19</sup> Pablo tonjanacheuá y chentšana tonjanacuntá lempe ntšamo Bëngbe Bëtsá Páblëbe trabájoca chë ndoñe judiëngbeñe tojanmama.

<sup>20</sup> Chca tmonjanuena ora, Bëngbe Bëtsá tmontanchuá y Pablo mëntšá tmonjanayana: “Morna, Jesucristbeyeca bëngbe catsata, contsonÿá ntšamo ba uaranga judiënga Jesucristbeñe imojtsošbuáchema, y chënga nÿetscanga montsantješna nÿetsca Jesucristbeñe ošbuáchiyënga chë Moisesbe leyentša nÿetsca mandënga chamotsocumplínama. <sup>21</sup> Y entsanga chëngbioye noticia tmojatšatá, aca chë inÿe luarënguenache imoyena judiënga cojtsabuatabá, Moisés tojanmandá soyënga ndoñe ntseyeunanama y basetëmënga base bobachtema chë más delicadentše ndoñe ntjatëtšama, ntšamo bënga judiënga fsënduamancá, y ntšamo bënga fsëndëtatšëmbcá ndoñe chamondëtsamana ca. <sup>22</sup> Y morna, ¿ntšamo chë soyëngama cochtsemana? Ndegombre, chënga mochanjätatšëmbona aca moye tcojabama. <sup>23</sup> Chcasna, ntšamo cbochanjabuayenacá cochjama: Bëngbentše canta boyabásënga montsemna y chënga entsamna Bëngbe Bëtsabiama canÿe šbuachenana soye jamama. <sup>24</sup> Acaftaca cochjunatse, chëngaftaca cochtsemna y chëngcá cochtsama Bëngbe Bëtsabe delante tšábënga jtsatsmënama ntšamo chamojtsama ora, y ntsachetšá jëtsjájuama chaojtsamncá, aca cochjëtšájua, as chënga chamobená nÿets stjënashe jtsenátšbotjiama, jinÿanÿiyama, ntšamo Bëngbe Bëtsábioye tmojašbuachenacá ya tmojamama. Y chca, nÿetsca judiënga mochanjinÿe ndoñe ndegombre yontsemna chë ntšamo chëngbioye acbiama tmojacuntacá; masna, chënga mochanjätatšëmbona aca ndegombre ntšamo Moisesbe leyine yomandancá icuamama. <sup>25</sup> Y chë ndoñe judiënga Jesucristbeñe imojtsošbuachengbiamna, bënga ya fsënjubuábiamna y fsënjáuyana ndayá jtsocumplínama chënga yojtsamnama, mëntšá: ‘Ndoñe chamondëtšesá mëntšëna, chë entsanga tmojtsejuabná diosënga imomna soyënga jadórama tmojiyëbana; ni buiñe, ni tšëšana bayëngbe mëntšëna; y ndoñe chamondëtšama bacna soyënga shembásënga y boyabásëngaftaca ca’ ” —chënga tmojánayana.

### *Bëngbe Bëtsabe bëts yebnentše judiënga Pablo tmojánishache*

<sup>26</sup> As Pablo, yëfsana chë cántanga tonjanënatse y chëngaftaca tonjanma soyënga Bëngbe Bëtsabe delante tšábënga jtsatsmënama. Chentšana, Pablo Bëngbe Bëtsabe bëts yebnoye tonjánamashëngo chë bachnanga júnayama, ndaytëntšcoñe yojamna chë cantangbiamna



soyënga jtsamama, Bëngbe Bëtsabe delante tšábenga jtsatsmënema, y jayanama ndayté chëngbiamama yojtsemna ndaye ora cada ona ibojtsemna ndayánaca Bëngbe Bëtsabe bëts yebnoye juambana, Bëngbe Bëtsabiamama juatšëmbonama.

<sup>27</sup> Chënga tmojanenoyeuná y tmojánayana canÿsëfta tentscuana chca jamana ca. Chë canÿsëfta te ya jochnënguama yojtsemna orna, básefta judiënga Asioquënga Pablo tmojáninÿe Bëngbe Bëtsabe bëts yebnoca y tmojanma entšanga chamuenbouéanamama. Y cha tmojánishache, <sup>28</sup> mëntšá jtsayebuáchëse: “¡Israeloca entšanga, šmabëtsëjabuache ca! Quem boyabása entsemna chë nÿets luarënguenache iuana abuátambaye soyënga bëngbe entšangbe contra, y ntšamo bëngbe leyënguiñe endayanama contra, y quem Bëngbe Bëtsabe bëts yebnoma ndoñe tšabá yontsoyebuambná. Y cabana quem Bëngbe Bëtsabe bëts yebnoye grieguënga tojúmashengo, y chca cha tonjama chë Bëngbe Bëtsabe bëts yebna Bëngbe Bëtsabe bominiñe ndoñe tšabá chaondëtsemnama ca” —chënga imojtsichamo.

<sup>29</sup> Chca imojtsichamo, er entšanga Pablo tmojáninÿe chë bëts pueblentse Trófimo Efesocáftaca; y imojëtsejuabnaye chábioye Bëngbe Bëtsabe bëts yebnoye Pablo tbojanánatse ca.

<sup>30</sup> Nÿetsca chë pueblentša entšanga tmojánenbouenana, y ochamanana chë Pablo yojtsemnoye tmojánashjajna. Pablo tmojánishache y Bëngbe Bëtsabe bëts yebnentšana shjoye tmojtsansjojó, y cachora chentša bëšašangá tmojtanatame. <sup>31</sup> Jtsóbama ya imojtsebuachéta ora, chë Romoca soldadëngbe mandayá tojántatšëmbona nÿetsca chë bëts pueblentša entšanga imojtsenbouenanamama. <sup>32</sup> Asna, chë mandayá chabe soldadënga y inÿe chentša amëndayënga tojánachembo y cánÿiñe chë entšanga imojtsemnoye tmojëftsánótjajo. Entšanga, chë mandayá y chë soldadëngbioye tmojánanÿe ora, tmojtsanajbaná Pablo jantšetayana.

<sup>33</sup> Chorna, chë soldadëngbe amëndayá tojanobeconá, Páblëbioye tbojánishache y tojanmandá uta cadenëjuaca cha chamotsebátsëcama y tojanatjá: “¿Nda mua yomna y ndayá tojama ca?” <sup>34</sup> Pero chë entšangbeñe, ínÿenga canÿe soye imojtsáyebuache y ínÿengna inÿe soye; y chca, ntšamo ndegombre tojanopasama jtsetatšëmbuama chë mandayá ndoñe tonjanobená; chcasna, cha tojanmandá Pablo chë soldadëngbe oyenoye chamuánatsama. <sup>35</sup> Chë soldadëngbe oyenoca grádasbengoye tmojánashjajna ora, chë soldadënga tojanotocá Pablo cutsnana juambama, chë entšanga tša rábiaca imojtsemna causa, <sup>36</sup> er chënga ústonoye imojétsaye y “¡Chaóbana ca!” imojtsaiuáyebuache.

### *Ntšamo Pablo entšangbe delante tojanenëuyaná*

<sup>37</sup> Chë soldadëngbe oyenoye ya jamashënguama imojtsemna orna, Pablo chë soldadëngbe amëndayábioye tbojantjá: —¿Tašcatjaleséncia ratotema ácaftaca jóyebuambayama ca?

Y chë mandayá tbojanjuá: —¡Aca icobena griego biyañe jóyebuambayama! <sup>38</sup> As, ¿aca ndoñe condmëna chë Egiptocá, chë ndoñe bayté quenátsmëna entšanga yojanëtsëtsná chë mándayëngbe contra chamotsemnana y chë canta uaranga podesca uamana entšanga puñálaca uajatëngaftaca, entšanga ndoyena luaroye tojanbocná ca?

<sup>39</sup> Chora Pablo tbojanjuá: —Atše judío sëndmëna, Tarso puebloca onÿnaná, canÿe uámana pueblentse Cilicia luaroca; Diosmanda šmolesenciá entšanga jáuyanama ca.

<sup>40</sup> As, chë soldadëngbe amëndayá chca tbojanlesenciá. Páblëna chë gradasbenguiñe tojantsá y cucuatše tojanatsbaná entšanga iytëca chamobiamama. Nÿetscanga iytëca imojtsemna orna, Pablo hebreo biyañe mëntšá entšanga tojanëyana:

## 22

<sup>1</sup> “Baconga y taitanga, mora šmochjouena atše jenëuyanama ntšamo chjayancá ca.”

<sup>2</sup> Pablo cachëngbe biyañe, hebreo biyañe yojtsóyebuambnana entšanga tmojanuena ora, más iytëca tmojanobiama. As Pablo tojanëyana: <sup>3</sup> “Atše judío sëndmëna. Tarso pueblentse, Cilicia luaroca sënjanonÿná, pero muentše Jerusalenentše sënjanoboché

y sëndétatšëmbo soyëngna Gamaliélbeyeca chca botamana sënjanatsjinÿe. Cha corente tšabá šonjanbuatëmbá bëngbe bëts taitangbe leyënga; nÿets atšbe ainánaca Bëngbe Bëtsá sëndëserveda, ntšamo nÿetsca tšëngaftanga mora šmontsamancá. <sup>4</sup> Atše sënjánama chë Jesucristo tojaninÿanÿé Benache ústonënga chamosufrima y chamóbanama; boyabásenga y shembásenga sënjanëtabaye y cárceloye sënjanautame. <sup>5</sup> Chë judío bachnangbe más uámana amëndayá, nÿetsca chë judiëngbeñe bëtsëjemëngcá mándayënga y inÿe muentša mándayënga mondobena jayanana ntšamo sentsichamcá ndegombre yomnama. Chënga uabemana tsbuanachangá šmonjaninÿé, bëngbe catšátanga judiënga chamotsetatšëmbuama atše mando stsanbomnama, Jesucristbeñe ošbuáchiyënga jótabayama; y Damascoye sënjána chocha Jesucristbeñe ošbuáchiyënga jótabayama, moye Jerusalenoye junatsama jacastígayama.”

*Pablo tojanacuntá ntšamo Jesucristbeñe ošbuachiyá tojanóbema  
(Hch 9.1-19; 26.12-18)*

<sup>6</sup> “Pero canÿe te benachiñe Damasco béconana sënjétsaye orna, mo nÿetsto ora, nÿe ndeolpe atšbe juachañe canÿe bëts tcuinÿe celocana tonjanbuashinÿinÿena. <sup>7</sup> Y fshantsoye sënjétseshajaye y canÿe oyebuambnayana sënjanuena mëntšá: ‘Saulo, Saulo, ¿ndáyeca šcojtsacmena ca?’ <sup>8</sup> Atše sënjantjá: ‘¿Nda comna, Bëngbe Utabná ca?’ Y chë oyebuambnayana šonjanjuá: ‘Atše sëndmëna Jesús Nazaretocá, y aca condama atšbe entšanga chamotsesufrínama ca.’ <sup>9</sup> Chë átšeftaca monjánajnënga chë bëts tcuinÿe tmojáninÿe y tmojanouatjananga, pero chë oyebuambnayana ndoñe tmonjanuena. <sup>10</sup> Chora atše sënjantjá: ‘¿Bëngbe Utabná, ndayá jamama šojtsemna ca?’ Y cha šonjaninÿe: ‘Matëtsbaná y mëtëtontsé Damascoye jama. Chentše canÿa cmochanjabuayená ndayá jamama cmojtsemnama ca.’ <sup>11</sup> Chë tcuinÿe yapa tonjanbuashinÿinÿena causa, atše jtaná sënjanoquedá. Chcasna, chë inÿenga šmontanobuacuetëntsé y chca, Damascoye sënjánashjango.

<sup>12</sup> “Chentše enjamna canÿe bacó Ananías ca uabainá; cha inoyena ntšamo Bëngbe Bëtsá yobošcá y yojánama ntšamo bëngbe leyënguñe iuayancá, y nÿetsca chentša judiënga monjanamana chabiamana tšabá jtsóyebuambnayana. <sup>13</sup> Cha tonjánabo atše jinÿama y tonjánashjango ora, šonjaninÿe: ‘Jesucristbeyeca atšbe catšata, Saulo, chacmotsatabinÿna ca.’ Cachora y cha sënjáninÿe.

<sup>14</sup> “Chentšana cha tonjánayana: ‘Bëngbe bëts taitangbe Bëtsá aca tcmojuábuayana, ntšamo cha acbiamana yobošcá chacotsetatšëmbuama, chë nÿetsca soyënguñe Tšabá Amá chacuinÿama y cachabe uayášentsana chacóyeunama. <sup>15</sup> Bëngbe Bëtsá chca tojama, aca chë chabe buayenana soyëngama entšángbeñe chacóyebuambama, y chamna nÿets luarentša entšángbeñe cochjacuénta, ntšamo tcojinÿe y tcojouencá. <sup>16</sup> Y mora, ¿ndoñe más matobátmanana! Motsbaná y cochjenábaye Jesucristo jótšëmbonëse, chca, acbe bacna soyëngama perdonaná chacotsemnama ca’ ” —cha šonjaninÿe.

*Pablo tojanacuntá ntšamo chë ndoñe judiëngbioye tmojánichmoma*

<sup>17</sup> “Jerusalenoye sëntaná ora, Bëngbe Bëtsabe bëts yebnoye sënjána cháftaca jencuéntama, y ndeolpe atše mo otjenayoquécá sënjanoquedá. <sup>18</sup> Chca orna, Bëngbe Utabná sënjáninÿe y cha mëntšá šonjaninÿe: ‘Betsco motsa y cam ora Jerusaleñentšana métsebozna; quemuentša entšanga ndoñe quecmochatóyeunaye ntšamo atšbiamana condétatšëmbo y contsëtsëtnacá ca.’ <sup>19</sup> Atše sënjanjuá: ‘Bëngbe Utabná, chënga mondétatšëmbo atše sënjánana nÿetsca chëngbe enefjuana yebnënguenache y chë ácebeñe ošbuáchiyënga sënjanëtámiana y sënjánatsetšenaye; <sup>20</sup> y acbiamana ndegombre oyebuambnayá Esteban tmonjanóba ora, átšnaca chentše sënjamna y tšabá imojtsama ca chama sënjëtsejuabnaye, y cabá chë monjanóbanangbe entšayëjuangá atše chora sënjanabojanÿá ca’ —atše sënjanjuá. <sup>21</sup> Pero chca sënjánayana ora, Bëngbe Utabná šonjaninÿe: ‘Motsa; atše bën luarëngoye, ndoñe judiëngbioye cbochanjíchmuca ca.’ ”

*Pablo y chë soldadëngbe amëndayá*

<sup>22</sup> Chë entsanga chëntscoñe tmojanuena; pero chë ndoñe judiëngbiana tojanoye-buambá orna, chënga tmojanontsé uayebuáchana: “¡Ndoñe tšabá quenátsmëna cha vídaca chaotsemnama! ¡Motsóba ca!” <sup>23</sup> Y chënga más imojtsáyebuache; puerte rábiaca chëngbe uichëtjonëjuangá tsbanánoye imojtsëbéntaye y tsbanánoye polvëshe imojtsëtsana; <sup>24</sup> chë causa, chë mandayá tojánayana chë soldadëngbe oyenoye Pablo chamotsëmashëngo ca, y tojanmandá chamotsetjanja chaobuambama ndáyeca entsanga chca chabe contra imojtsáyebuache. <sup>25</sup> Pero jtsetjanjama ya tmojanbatsëca orna, chentse imojtsemna soldadëngbe amëndayábioye Pablo tbojantjá: —¿Tšëngaftanga šmobena canyë entsá derecho bomná mo canyá Romoca onyñanacá jatjanjana, ndegombre tšabá o ndoñe tšabá tonjamama cabá ndayana ora ca?

<sup>26</sup> Chë básefta soldadëngbe mandayá chë soye tojanuena ora, tojána y nyetsca soldadëngbe amëndayábioye chama ibojuenaye, mëntšá: —¿Ndayá cochjama? Chë entsá derecho bomna mo canyá Romoca onyñanacá canmëna ca.

<sup>27</sup> As chë amëndayá tojána Pablo yojtsemnoye y tbojanianyana: —Smëyana, ¿aca derecho bomná mo canyá Romoca onyñanacá comna ca?

Y cha tbojanjuá: —Arseñor ca.

<sup>28</sup> Chora chë amëndayá tojánayana: —Atše beca crocénana sënjëtšajó mo canyá Romoca onyñanacá derecho jtsebomnama ca.

As Pablo tbojanjuá: —Y atšna derecho bomná mo canyá Romoca onyñanacá sëndmëna atše tijanonyná orscana, er atšbe taitá chca derecho bomná inamna ca.

<sup>29</sup> Chcasna, chë jatjanjama imojtseprontanënga, Páblëbentsana tmojanajuaná; y chë mandayánaca tojanajuaná y yojtsauatja, Pablo derecho bomná mo canyá Romoca onyñanacá yojamnama tojántatsëmbona ora, er cha tojanmandá Pablo chamotsebátsëcama.

*Pablo, Jerusalemëntša uámana mándayëngbe delante*

<sup>30</sup> Chë soldadëngbe amëndayá yojtseboše ndegombre jtsetatšëmbuama ndaye soyama judiënga Páblëbe contra imojtsichámuama; asna, yëfsana tojanmandá cadenëjuangá jt-sajafjonana y chë bachnangbe amëndayënga y nyetsca chë judiëngbe amëndayënga chamobéconama. Chentšana, Pablo tbojanábocna y chëngbe delante tbojanatsá.

## 23

<sup>1</sup> Chora Pablo, nyetsca chë mandayëngbioye tojanënyanýe y tojanéyana: —Taitanga, atše mënténtscoñe tsiyena jtsamëse ntšamo Bëngbe Bëtsá yobošcá y chabe delante atšbe ainana natjëmbana endëtsomñe ca.

<sup>2</sup> As, Ananías, chë bachnangbe más uámana amëndayá, tojanmandá Páblëbe béconana imojtsemnënga cha chamotsáyejantšetama. <sup>3</sup> Pero chora Pablo Ananíasbioye tbojanjuá: —¡Bëngbe Bëtsá ácnaca cmochanjëtšjantšetá, bacna entsá, ntšamo ndegombre tcojuabnacá ndinýinynayá! Aca chentse contsetbemana tšabá o ndoñe tšabá tijamama jayanama, ntšamo Moisesbe leyíne yomandancá; as, ¿ndáyeca cojtsemánda chašmojantšetama? Chca chë leyíne ndoñe quenátšlesenciana ca.

<sup>4</sup> As, chabe béconana imojtsemna entsanga tmojánayana: —¿Chca chë Bëngbe Bëtsabe bachnangbe más uámana amëndayábioye cochjóyenguango ca?

<sup>5</sup> Chora Pablo tojánayana: —Taitanga, atše ndoñe quetsátstatsëmbo cha chë bachnangbe más uámana amëndayá yomnama. Er Bëngbe Bëtsabe uabemana palabrenguiñe mëntšá endayana: “Entsangbe mandayabe contra ndoñe catjayana ca.”

<sup>6</sup> Pablo tojáninýe chë mándayënguentše báseftanga saduceunga y inýengna fariseunga imojtsemnama; as, mëntšá tojanáyebuachena: —Taitanga, atše fariseo sëndmëna; atšbe bëtsëtsanga fariseunga mondmëna. Atše, jtsošbuáchiyëse chë obanënga mochtayenama tsobatmana causa, atše ndoñe tšabá sëntsama ca tšëngaftanga šmochjayana ca.

<sup>7</sup> Pablo chca tojánayana ora, chë fariseunga y saduceunga tmojanontsé enatsëtsnayana, y chë causa nyëtsca entsanga ndoñe cachcá imontsejuabnaye. <sup>8</sup> Er chë saduceunga jtsichámuana chë obanënga ndoñe ntayenana ca, y ni angelënga, ni espíritënga ndoñe mondmëna ca; pero chë fariseunga aíñe chë soyënguiñe jtsošbuáchiyana. <sup>9</sup> Y nyëtscanga tša imojtsáyebuache; asna, básefta fariseunga ley abuátambayënga tmojantsbaná y jabuachana mëntšá imojtsáyebuache: “Quem boyabása ndocna bacna soye tonjama. Nderado mo Bëngbe Bëtsabe canye ángel o espíritu muábioye ndegombre tbojayuana ca.”

<sup>10</sup> Entšanga más imojtsáyebuache y chë soldadëngbe amëndayá yojtsauatja nderado entsanga Pablo muantsatcacaye; as, cha tojanmandá soldadënga chamua Pablo chë entsángbentsana jaisábocnama y chë soldadëngbe oyenoye cachiñe jesánatsama.

<sup>11</sup> Yëfsana íbeta, Bëngbe Utabná Páblëbioye tbojánëbëocna y tbojaniyana: “Pablo, ainaniñe añemo cochtsebmna. Ntšamo aca atšbiamna condétatšëmbo y muentše Jerusalemntše condoyebuambnacá, cachcá cmontsemna Romoca jamama ca.”

### *Judiënga tmojanenoyeuná Pablo jtsóbama*

<sup>12</sup> Chë inye yëfsana, judiënguentsana báseftanga tmojanenoyeuná Pablo jtsóbama, y tmojanjurá tondaye ntjasana, ni ntjofšiyana, cha jóbantscuana. <sup>13</sup> Chca jamama tmojanjuabó entsanga imojamna canta bnëtsanëngama más. <sup>14</sup> Chënga tmojána chë bachnangbe amëndayënga y judiëngbeñe bëtsëjemëngcá mandayëngbioye y mëntšá tmojánayana: “Bënga Bëngbe Bëtsá mëntšá fsënjašbuachená y bacna soyënga bëngbeñe chaotsemna chca ndoñe fsënjocumplise: Tondaye ntjasana, ni ntjofšiyana, Pablo jóbantscuana. <sup>15</sup> Morna, tsëngaftanga y chë inye muentša mandayëngaftaca chë soldadëngbe amëndayá smochjaimpáda Pablo moye chabuánatsama; y smochjauyana chca yojtsemna ana chë ndayá yojtsopasánama más botamana cha jatjayama ca; y bëngna fchtseprontana cha jtsóbama, cabá moye ndáshjango ora ca.”

<sup>16</sup> Pero, Páblëbe uabenbe uaquiñá chë soye tojántatšëmbona; asna, tojána chë soldadëngbe oyenoye, chama Pablo jauenayama. <sup>17</sup> Chorna, Pablo canye básefta soldadëngbe mandayábioye tbojanchembo y tbojaniyana: “Diosmanda quem basa mánatse chë nyëtsca soldadëngbe amëndayábioye; canye soye entsebmna chábioye juenayama ca.”

<sup>18</sup> As, cha chë bobontse tbojëftsanbetše, chë nyëtsca soldadëngbe amëndayábioye tbojanánatse y tbojaniyana: “Chë utamená Pablo šonjachembo y šonjaimpadá quem bobontse ácbioye juanatsana; mua caojtsebmna canye soye aca jauyanama ca.”

<sup>19</sup> Chë soldadëngbe amëndayá chë bobóntsbioye tbojëftsanobuácuëntšiyë, luaroye tbojanánatse y tbojantjá: —¿Ndayá cojtsebmna atše jauyanama ca?

<sup>20</sup> As chë bobontse tbojaniyana: —Judiënga tmojenoyeuná taitá jaimpádama, yëfse chëngbe amëndayëngbioye Pablo chacuánatsama, y chënga cmochanjauyana chca yojtsemna ana chë ndayá yojtsopasánama más botamana cha jatjayama ca. <sup>21</sup> Pero ndoñe catjóyaunaye; chënguentsana canta bnëtsanëngama más entsanga iytëmenënga Pablëbiamna montsanjá. Chënga tmojajurá, bacna soye chëngbeñe chaotsemna ndoñe tmonjocumplise, tondaye ntjasana, ni ntjofšiyana, Pablo jóbantscuana. Mora chënga montseprontana y montsobátmana ntšamo aca chë soyama cochjáuyanama ca —chë bobontse tbojaniyana.

<sup>22</sup> Chentsana, chë soldadëngbe amëndayá chë bobóntsbioye tbojanmandá, ndayá ibojuenayama ndocnábeñe ntsecuëntayana, y chentsana tbojtanichmó.

### *Pablo tmojanánatse Félix, chë Cesareoca mandádbioye*

<sup>23</sup> Chentsana, chë soldadëngbe amëndayá tojánachembo útata chë inye soldadëngbioye mándayënguentsana, y tojanamëndá chamoprontama uta patse soldadënga, inye canyëfta bnëtsanënga couayënguiñe y inye uta patse lanzëšangaca, Cesarea puebloye íbeta, las nueve ora jabocanama; <sup>24</sup> y tojanamëndá couayënga chamoprontá Pablo



chauenójayema. Y tojanmandá tšabá y ndocá ntjapasacá Pablo chamuánatsama, Félix chë Cesareoca mandádbioye. <sup>25</sup> Y canÿe tsbuanácha chëngaftaca tojanichmó y chëchañe mëntšá vojtsábemana:

<sup>26</sup> Claudio Lisias, chë bëts uámana mandado Felixbiama: Salud bomná chacotsomñe.

<sup>27</sup> Judiënga quem boyabása tmojishache y montseboše jtsóbama; pero cha mo canÿa Romoca onÿnanacá derecho bomná yomnama sënjåtatsëmbona ora, atšbe soldadëngaftaca sënjá y chëngbe cucuatšentsana cha sënjatsbocá. <sup>28</sup> Atše sëntseboše jtsëtatsëmbuana ndaye soyama chënga chabe contra imojtsichámuama; as, cha sënjuánatse nÿetsca chë judiëngbe amëndayënga montsemnoye; <sup>29</sup> y chentšana, atše sënjåtatsëmbona chënga chabe contra imojtsichamo ana cachëngbe leyentša soyëngama, pero cha tondaye tonjobuachjanguá, cha jóbama bënga chašotsamnama, ni mo cárceloje jutámíama. <sup>30</sup> Pero atše sënjåtatsëmbona chë judiënga tmojenoyeuná cha jtsóbama; chíyeca, cam ora cha ácbioye sentsichamná, y chabe contra ichámëngna sënjáuyana, ndayá muabe contra jayanama imojtsebomncá acbe delante chamuayana ca.

<sup>31</sup> Chentšana, chë soldadënga tmojanma ntšamo tmojanamëndacá, ibeta Pablo tmojëftsanbetše y Antípatris puebloje tmojanánatse. <sup>32</sup> Yëfsana, chë shecuátšeca tmojána soldadëngna cach soldadëngbe oyenoye tmojésanshëcuana, y chë couayiñe enjaquenënga Pábloftaca tmojána. <sup>33</sup> Cesareoye chënga tmojánashjajna ora, chë tsbuanácha chë mandádbioye tmojanantsabuaché, y Páblënaca chabe cucuatšíñe tmojánboshjona. <sup>34</sup> As chë mandado chë tsbuanácha tojanalía; chentšana, cha tojanënoticiá ndaye luarocá Pablo inamnama, y Cilicia luarocá cha inamnama cha tojántatsëmbona ora, <sup>35</sup> tbojaniyana: “Acbe contra ichámëngna chamobeconá ora, ácbioye oído cbochjabuájua ca.”

Chentšana, cha tojanmandá Rey Heródesbe bëts yebnoca Pablo chamotsebojanÿama.

## 24

### *Ntšamo Pablo chë mandado Félixbe delante tojanenëuyaná*

<sup>1</sup> Shachna tianoye, Ananías, chë bachnangbe más uámana amëndayá, Cesareoye tojána báseftangaftaca chë judiëngbeñe bëtšëjemëngcá mándayënguentšana y canÿa entšanga obuauyayáftaca, Tértulo ca uabainá; y chë mandádbioye chënga tmojána Páblëbe contra jayanama.

<sup>2</sup> Pablo tmojanábocna ora, Tértulo tojanontsé chabe contra jayanama y Félixbioye tbojaniyana: “Aslëpaye, taita mandado, ácbeyeca bënga natjëmbana fsëndoyena y aca puerte obiashjachá cómnayeca ba tšabe soyënga quem luarentša entšangbiama vojtsëbinÿna. <sup>3</sup> Nÿets tempo y nÿetsquénache chë soyënga fsëndóyëngacañe, bëts uámana mandado, y bënga chama corente cbondetsechuaná. <sup>4</sup> Pero ndoñe yapa bën jatenbiamnayamna, Diosmanda ratotema šmotsoyauná. <sup>5</sup> Bënga fsëntsetatsëmbo quem boyabása entšanguentše entsemna mo bacna shacuancá, nÿets luarënguenache vojtsana y vojtsama chë judiënga nÿetscanga cachca soye ndoñe chamondëtsejuabnama, y cha vojtsëmna chë Nazaretocabe ustonëngbe uanatsaná. <sup>6</sup> Y tonjábošena jamama Bëngbe Bëtšabe bëts yebna, Bëngbe Bëtšabe bominÿíñe ndoñe tšabá chaondëtsemnama; chíyeca bënga cha fsënjotbá. Bënga fsënjábošena chabiama jayanana tšabá o ndoñe tšabá tonjamama, ntšamo bëngbe leyënguiñe endayancá; <sup>7</sup> pero chë soldadëngbe amëndayá Lisias tonjontremeté y jabuachana bëngbe cucuatšentsana tbojtsánatseñe, <sup>8</sup> y tonjayana chë chabe contra ichámëngna caojtsamna ácbioye chama jabana ca. Cach taitá chacojatjá ora, ndegombre soyënga cochántsetatsëmbo ndáyeca bënga muabe contra fstsichámuama ca” —cha tojánayana.

<sup>9</sup> Y chë judiënga chentše imojëtsemnëngna imojtsanichamo aíñe chca tojanopasá y lempe ndegombre vojtsëmna ca.

<sup>10</sup> Chentšana, chë mandado Páblëbioye tbojánefjatsëmbo chaóyebuambama; as Pablo tojánayana: “Atše sëndétatsëmbo aca ba uatama comna muentša entsangbiana tšabá o ndoñe tšabá tmonjamama ichamuá; chcasna, tondayama ntsauatjca y puerte oyejuayá acbe delante šcuenëuyaná. <sup>11</sup> Ntšamo cach aca jtsetatsëmbuama contsobencá, cabá bnétsana uta te entsemna atše Jerusalenoye sënjá, Bëngbe Bëtsá jadórama. <sup>12</sup> Y quemënga ndoñe chešmátinýena nderado ndáftaca jabuachana enatsëtsnanyiñe, ni entsanga chamuenbouénanama amiñe, Bëngbe Bëtsabe bëts yebnoca, ni chëngbe enefjuana yebnënguenache, ni inýe luarënguenache chë bëts pueblentse. <sup>13</sup> Quem entsanga tondaye quemátsbomna ntšamo jayanama, atšbe contra montsichamo soyënga ndegombre yojtsemna ca. <sup>14</sup> Pero ndegombre endmëna y chanjayana, atše bëngbe taitangbe Bëtsá sëndëserveda, jtsiyenëse ntšamo Bëngbe Bëtsá šonjaninýanyé benache yomncá; y quem entsanga montsichamo, básefta soyënga ntšamo bënga quem Tsëm Benache ústonënga fstsošbuachecá, ndoñe ndegombre yondmëna ca. Pero atšna nyetsca chë Moisesbe leyíñe y Bëngbe Bëtsabe juabna oyebuambnayëngbe uabemana librëšanguentša soyënguiñe sëndošbuaché; <sup>15</sup> y atše cach chëngcá, puerte jtsošbuáchiyëse Bëngbe Bëtsábeñe sëndobátmana cha yochjama chë mochjóbanënga chámuatayenama, nyetsca entsanga, lempe tšabá amënga y chë ndoñe tšabá amëngnaca. <sup>16</sup> Chýeca, atše nyets tempo puerte tšabá sëndama, tondayama ntjatenócochinýenama y atšbe ainana natjëmbana chaotsomñama, Bëngbe Bëtsabe delante y entsangbe delántnaca.

<sup>17</sup> “Básefta uatama inýe luarënguenache atše sëndánana; ndoñe bayté quenátsmëna cach atšbe luaroye sëntashjango, chentša ndbomnjëmënga jujabuáchama ndayánaca jatšatayama y bayënga jobáyama, Bëngbe Bëtsá jëtschuayama. <sup>18</sup> Atše sënjama soyënga Bëngbe Bëtsabe delante tšabá jtsatsmënama; chentšana, básefta Asioca judiënga Bëngbe Bëtsabe bëts yebnentse šmonjínýena, pero ndoñe chešmátinýena ni ba entsángaftaca, ni enbouenaniñe. <sup>19</sup> Chë šmonjinýenënga entsamna ácbioye jabana y acbe delante atšbe contra chamuayana, nderado ndayá tmojtsebomñese. <sup>20</sup> O ndóñesna, cach quemënga, muentše montsemnënga chamuayana, chë judiëngbe amëndayëngbioye atše šmonjuánatse ora, atše ndayá tjobuáchjanguama chešmënjínýena, atše castiganá jtsemnama šojtsemna ca chënga chamuayanama; <sup>21</sup> o nderado nántsemna chë atše chëngbentse sëntsemna ora, mëntšá tjuáyebuachenama: ‘Atše chë obanënga mochtayenama puerte jtsošbuáchiyëse sëndobátmana causa, tšëngaftanga atšbe contra šmochjayana ca.’”

<sup>22</sup> Félix bëtsca inatátsëmbo Bëngbe Utabná tojaninýinýé Benache ústonënga imojanošbuaché soyëngama; as, Pablo chca yojtsoyebuambná ora, cha tojanmandá ndoñe más chë soyama chë te jatóyebuambnayana, y chë entsanga tojanëyana: “Chë soldadëngbe amëndayá Lisias chaojáshjango ora, chanjayana ntšamo quem tšëngaftangbe sóyeca jamama ca.”

<sup>23</sup> Y chentša soldadëngbe amëndayábioye tbojanmandá Pablo jtsebojanýama, pero nýe utamená ndoñe chaondëtsemna ca; y tojanmandá, Páblëbe amiguënga jalesénciayana ntšamo tmojtsebošcá cha chamuauájabuachama.

<sup>24</sup> Chentšana baseftaytese, chë mandado Félix Cesareoye tojtanashjango, chabe shema Drusíaftaca, canýe judiá. Chorna, cha tojanmandá Pablo jachembuana y tojanuena ntšamo Pablo yojtsichamo, ntšamo canýa nanjobenaye Jesucristbeñe ošbuachiyá jtsemnama. <sup>25</sup> Pero, nyetsca soyënguiñe tšabá jtsamama, cachá jenomándama jtsobenama y ntšamo tmojamama nyetsca entsangbiana Bëngbe Bëtsá yochjayanama Pablo tojanoyebuambá ora, Félix tojanëuatjaná y Páblëbioye tbojanianyana: “Mora, mata; luare quétstsebomna ora, cbochjachembo ca.”

<sup>26</sup> Jëtsboshjonama Pablo crocénana chabuatabuenámnaca Félix inobátmana; y chca, ba soye ibojanófjajana cháftaca jencuéntama. <sup>27</sup> Y chca uta uata tojanochnëngo; chentšana, Félix ya ndoñe más chë mandado yontsemna y chabe cuentna Porcio Festo mandadcá

tmojántbema. Félix yojtseboše chë judiëngbe delante tšabá joquédama, chíyeca utamená Pablo tbojëftsanboshjona.

## 25

### *Pablo Festbe delante*

<sup>1</sup> Festo chë luaroye tojánashjango y unga tianoye, Cesarea pueblentšana Jerusalenoye cha tojána. <sup>2</sup> Chocna, chë bachnangbe amëndayënga y chë más uámana judiënga Féstbioye tmojána Páblëbe contra jayanama. <sup>3</sup> Y tmojanimpadá, mo chëngbiamá canye bëts pavor cuenta, cha chaomandá Pablo Jerusalenoye chamuánatsama. Chëngna imojétsejuabnaye Pablo benachiñe chamotsóbama. <sup>4</sup> Pero Festo tojanéyana, Páblëna Cesareoca utamená yojtsemna y baseftaytese cha choye jtama ca. <sup>5</sup> Y tojanéyana: “Chamna, tšëngaftangbe amëndayënga átšeftaca Cesareoye chamua y chë boyabása ndaye bëts soye tojobuáchjanguase, choca chabe contra šmochjayana ca.”

<sup>6</sup> Festo Jerusalenentše posufta o bnëtsana te más chëngaftaca tbojëftsanjétana y chentšana Cesareoye tojtaná. Yëfsana, cha tojanótbema chabe puestentše tribunaloca y tojanmandá Pablo choye chamuánatsama. <sup>7</sup> Pablo choye tojánashjango ora, Jerusalenocana tmojánashjajna judiënga tmojanobobconá y ba uabouana soyënga chabe contra imojtsichamo, pero ni canye chë soyëngama tmonjanobená jinÿanÿiyana chca ndegombre bétsemnama.

<sup>8</sup> Y Pablo, cachá jenëuyanama mëntšá yojtsichamo: —Atše tondaye chiyatobuachjanguá, ni judiëngbe leyëngama, ni Bëngbe Bëtsabe bëts yebnama, ni Romoca bëts mandadbe contra ca.

<sup>9</sup> Festo yojtseboše chë judiëngaftaca tšabá joquédama; as Páblëbioye tbojantjá: —¿Tacatjábošena Jerusalenoye jama, choca atše quem acbe soyama jayanama ca?

<sup>10</sup> As Pablo tojánayana: —Atše sëntsemna chë Romoca bëts mandado tojichamó amëndayëngbe delante y chënga entsamna jayanama atše tšabá o ndoñe tšabá sënjamama. Ntšamo ndegombre contsetatsëmbcá, judiëngbe contra atše ndocna bacna soye chiyatsma. <sup>11</sup> Nderado atše ndaye bëts soye tijobuachjanguá y chama atše jóbanama šojtsemnëse, atše tondaye quichátayana atše ndoñe chayóbanama; pero atšbe contra montsichamo soyëngama tondaye ndegombre tontsemnëse, ndocná queochatobenaye chëngbe cucuatšične atše jaboshjonana. Chíyeca, Diosmanda chë Romoca bëts mandado cháuyana tšabá o ndoñe tšabá sënjama ca —Pablo tojánayana.

<sup>12</sup> As Festo, chë soyama chabe buayiynayënga tojanatjá y chentšana tojánayana: —Chë Romoca bëts mandado quem soyama cháuyanama tcojábošenësna, chábioye cochjá ca.

### *Festo, Rey Agrípaftaca tbojanencuentá ntšamo Pábloftaca jamama*

<sup>13</sup> Chentšana baseftayté tojanochnëngo ora, Rey Agripa y Berenice Cesareoye tbojána, Festo jauatsëtsayama. <sup>14</sup> Bayté chata chentše tojanajétana; y chca, Festo chë réybioye tbojancuentá Páblëbe soyama. Cha mëntšá tbojaníyana: —Muentše endmëna canye entšá, Pablo ca uabainá; Félix utamená tbonjëftseboshjona, atše mandadca sënjontsé ora. <sup>15</sup> Jerusalenoca sëndánmëna ora, chë bachnangbe amëndayënga y chë judiëngbeñe bëtsëjemëngcá mándayënga Páblëbe contra demanda tmonjajajó y šmonjaimpadá cha jóbanama ibojtsemna ca atše jayanama. <sup>16</sup> Y atše sënjáuyana: “Chë romanënga ndoñe quematamana ndocnabiamá jayanana cha jóbanama ibojtsemna ca, chabe contra ichámënga chabe delante ndoñe tmontsemnëse, chca, chama jenëuyanama cha chaobenama ca.”

<sup>17</sup> Chíyeca, chënga moye tmonjabo ora, ndoñe yapa bën ntjatenobiamnaycá cach yëfsana atšbe puestentše tribunaloca sëntótbema y sënjamandá chë boyabása jobetsana. <sup>18</sup> Pero chabe contra ichámënga, ntšamo atše sëndanjuabnacá chënga mochjayanamna ni mo canye bëts soye chabe contra chemátayana, chënga jóyebuambayama tonjóyentšbuache ora.

<sup>19</sup> Chënga chabe contra montsichamo, nÿe cachëngbe Dios ntšamo jadórama yomnana y

canÿa Jesús ca uabainábiamas; cha tojanóbana, pero Pablo entsichamo cha ainá yotsomñe ca.

<sup>20</sup> “Chora atse ndoñe quetstétsetatsëmbo ntšamo chë soyiñe jamana; asna, Pablo sënjantjá Jerusalenoye jama tayojétseboše ca, choca atse jayanama tšabá o ndoñe tšabá cha tonjanmama. <sup>21</sup> Pero cha šonjaimpadá camuentse jaboshjonana, cach Romoca bëtš uámana mandado chë soyama tojayanëntscuana ca. Chcasna, atse sënjamandá cha chamotsebojanÿama, chë mandádbioye jíchmuama atse jobenayëntscuana ca” —Festo tbojancuentá.

<sup>22</sup> Chca tbojanencuentá ora, Agripa Féstbioye tbojanianyana: —Atšnaca sëntseboše chë boyabása joyeunayama ca.

Y Festo tbojanjuá: —Cach yéfse oído chábioye cochanjabuájua ca.

<sup>23</sup> Chë yëfsana, Agripa y Berenice corente uachuanentše chë tribunaloye tbojánamashjna y chátaftaca tmojánamashjna chë soldadëngbe amëndayënga y chë pueblentša uámana taitanga. Chentšana Festo tojanmandá Pablo jobetsana; <sup>24</sup> y chora cha tojánayana: “Rey Agripa y nÿetsca taitanga bëngaftaca šmojtsemnënga: Chentše entsemna chë boyabása. Nÿetsca judiënga chabe contra átsbentše montsabíchamo, Jerusalenoca y quem Cesarea puebléntšnaca, y nÿa jtsayebuáchëse tša šmontseimpadana cha chaóbanama; <sup>25</sup> pero atse sëntsejuabná quem boyabása tondaye tonjama, jóbanama chabotsemnana ca. Y más, cachá šonjaimpadá chë Romoca bëtš uámana mandado César chabe soyama cháuyanama; chcasna, chca chanjama, chábioye cha chanjíchmu. <sup>26</sup> Pero atse, atšbe bëtš uámana mandádbioye quem boyabásabiamas juábobemama ndocna serto soye quetsátsbomna causa, tšëngaftangbe delante cha tijatsá, y masna, acbe delante, bëtš rey Agripa; chca, lempe chacojatjá chentšana, ndayá juabemama atse chaitsebomna. <sup>27</sup> Er atse sëntsejuabná ndoñe corente juabnayabe soye yomna, canÿe utamená jíchmuana y ndayama chabe contra tmojtsichámuama ndoñe lempe ntjuabemana ca” —cha tojánayana.

## 26

### *Pablo tojanontsé rey Agripbe delante jóyebuambayama*

<sup>1</sup> Chentšana, Agripa Páblëbioye tbojanianyana: —Jóyebuambayama contselesenciana, cach aca chacuenëuyanama ca.

As Pablo, chë réybioye jachuayama cucuatše tojanatsbaná y jenëuyanama tojanontsé mëntšá jayanama: <sup>2</sup> —Atse ndegombre sëntsoyejuá mora chjobenaye acbe delante jóyebuambayama, uámana rey Agripa, chca, atse jenëuyanama nÿetsca soyëngama ntšamo judiënga atšbe contra montsichámuama; <sup>3</sup> y más sëntsoyejuá, taitá conduábuatmama lempe ntšamo judiënga monduamancá y condétatsëmbo chë judiënga ndayama imuenoboyebuambnama. Chcasna, Diosmanda uantádoca šmotsoyeuná.

### *Pablo tojanacuntá ntšamo cha tempo inamnana*

<sup>4</sup> “Nÿetsca judiënga mondétatsëmbo ntšamo atse tempscana chëngbeñe tsiyenama, bobontse sënjamna orscana, atse sënjanonÿná luarentše y Jerusalenentše. <sup>5</sup> Chëngnaca mondétatsëmbo y montsobena jayanana, chënga tmojtsebošëse, chca ndegombre yomnama; atse nÿets tempo fariseucá vida sëndbomna, y chë fariseunga mondoyena más soyënga jtsamëse chë judiëngbe leyëngaca chë inÿe judiëngbiamas. <sup>6</sup> Y mora, ntšamo Bëngbe Bëtšá bëngbe bëtš taitanga tojanašebuachenacá, chë obanënga jtayenama cha yochjamama puerte jtsošbuáchiyëse atse obatmana causa, šmojuánatse atšbe contra jayanama. <sup>7</sup> Bëngbe bnëtsana uta Israeloca bëtš pamíllanga mondobátmana chë šbuachenana soye chëngbiamas chaóshjanguama y chíyeca, cada te bnëté y ibeta chënga Bëngbe Bëtšá mondadorana y mondëserveda. Y atse cach soyama obatmana causa, bëtš rey Agripa, judiënga mora atšbe contra montsabíchamo. <sup>8</sup> ¿Ndáyeca tšëngaftanga



judiënga šmojtsichamo, chë obanënga chámuatayenama Bëngbe Bëtsá yochjamama jtsošbuáchiyama ndoñe šmontsobena ca?

*Pablo tojanacuntá, ntšamo tempo cha Jesucristbeñe ošbuáchiyënga yojanaborlánama*

<sup>9</sup> “Y cach átšnaca sënjanjuabná atše šojamna lempe ntšamo stjobenacá jamana, Jesús chë Nazaretocábeñe ošbuáchiyënga corente chamosufrima, <sup>10</sup> y chca Jerusaleñentše atše sënjanma. Chë bachnangbe amëndayënga mando šmonjanatšetá, y chca, banga Jesucristbeñe ošbuáchiyënga cárceloye sënjanëtame; y jtsëbáyama ca chëngbiamá montsanichamo ora, átšnaca aiñe chca chamoma ca sënjánichamo. <sup>11</sup> Y ba soye, chë judiëngbe enefjuana yebnënguenache jabuache chënga sënjanatsetšená, chënga Jesucristo ústonana chamotsajbanama, y chëngaftaca tša etonaná sënjëtsemna causa, chë inye luarëngoca bëts pueblënguenáchnaca chënga sënjanëcamena.”

*Pablo tojanacuntá ntšamo cha Jesucristbeñe ošbuachiyá tojanóbema*

*(Hch 9.1-19; 22.6-16)*

<sup>12</sup> “Y cachcá jamama canye te Damascoye sënjëtšaye; chë bachnangbe amëndayënga uabemanëchangá šmonjanëtšabuaché chca jamama y, cachënga choye šmonjanichmó. <sup>13</sup> Pero, uámana rey, chë benachëjana mo nyetsto ora, sënjáninye canye bëts tcuinye celocana, shinýama corente más enjëtsebinýnaye, y atše y chë átšeftaca ajnëngbe shëconana corente enjëtsebuashinýinýana. <sup>14</sup> Nyetscanga fsënjánshajaye y atše sënjanuena canye oyebuambnayana, hebreo biyañe, mëntšá šonjëtšatsaye: ‘Saulo, Saulo, ¿ndáyeca chca šcojtsacmena ca? Cach aca bacá contsenabomá, atšbe entšanga chamosufrima tcojtsama ora, mo uacná ngmëche niñëfjiñe cha tojtsoscunjáná orcá, cachá jenótsetšenana ca.’ <sup>15</sup> As atše sënjánayana: ‘¿Nda comna, Bëngbe Utabná ca?’ Y chë Utabná šonjanjuá: ‘Atše sëndmëna Jesús, y aca condama atšbe entšanga chamosufrima ca. <sup>16</sup> Pero matëtšbaná y matëtšá. Atše cbonjébëbocna jinýinýiyama aca tchojuábuayanama atše šcochjasérviamá, y chacotsetatšëmbuama y entšanga chacuacuntama, mora tconjinye soyama y más chcoye atšbiama chochanjinýinýiye soyëngámna. <sup>17</sup> Atše chanjama judiënga y ndoñe judiënga tondaye chacmondëborlama; y morna, ndoñe judiëngbioye cbontsichamná, <sup>18</sup> chënga atšbe soyëngama josértama aca chacomama. Chca, chënga bacna juabnënga ndoñe chamondëtsebmna, mo ibetiñe cuaftsemnëngcá, sinó mo binýniñcá chamotsemna átšeftaca, atše chë entšangbe juabnënga binýnáyá. Satanasbe cucuatšinë ndoñe chamondëtsemnama, sinó Bëngbe Bëtsabe obenánaca chamotsiyenama; chënga átšbeñe chamotsošbuáchema, y chca, chëngbe bacna soyëngama perdonánënga chamotsemnama y chënga chamotsebmnama canye luare entšángaftaca, chë ndëmuanýengbioye Bëngbe Bëtsá tšabe entšanga y chabe entšanga tojábiamá, chënga átšbeñe betsošbuáchiyama ca’ ” —cha šonjaniana.

*Pablo tojanma ntšamo chë mo otjenayoquëcá tojaninýcá*

<sup>19</sup> “Chcasna, bëts rey Agripa, atše sënjanma chë mo otjenayoquëcá sënjáninye ora ntšamo Cristo šonjaniancá; <sup>20</sup> y natsana, Damascoca entšanga chë tšabe noticiëngama sënjanabuayená; chentšana, Jerusaleñoquënga y nyetsca chë Judea luaroquënga y ndoñe judiëngnaca; chënga sënjánaimpadana bacna soyënga amama ngménaca chamuatenójuaboma, chca amana chamuajbaná y Bëngbe Bëtsabe benache chámuatishachama, y soyënga chamotsama jinýinýiyama chca ndegombre tmojanmama. <sup>21</sup> Chca sënjánama causa, judiënga Bëngbe Bëtsabe bëts yebnoca šmonjanishache y tmonjánbošena atše jtsóbana. <sup>22</sup> Pero Bëngbe Bëtsá sempre šonduájabuachana, y chca, cada te mëntscóñama, nyetscanga Bëngbe Bëtsabiamá sëndabuayinýá, uámanëngbioye y nduámanëngbioynaca; nye ntšamo Moisés y Bëngbe Bëtsabe juabna oyebuambnayënga tmojanayancá, ntšamo yochjopásama atše sëndoyebuambná; inýëtšá ndoñe. <sup>23</sup> Chënga tmonjánayana: ‘Bëngbe Bëtsabe Uámana Uabuayaná, Cristo jóbanama bontsemna; pero chaojóbanentšana, cha chë natsaná echántsemna obanënguentšana jtayenama, y cha judiëngbioye y ndoñe

judiëngbioye echanjabuayená, y chca, chënga mochántsetatšëmbo nÿetscanga chábeñe tmojtsošbuáchenga atsebácanënga mochtsemnama ca.’ ”

*Pablo tojanma rey Agrípbioye jáyëñjanama, Jesucristbeñe ošbuachiyá chaóbemama*

<sup>24</sup> Pablo, cachá jenëuyanama chë soyënga tojánayana ora, Festo mëntšá tojanáyebuachena: —¡Pablo, opá cojtsóbema! Yapa ualíaye causa, opá tcojtsóbema ca.

<sup>25</sup> Pero Pablo tbojanjuá: —Opá ndoñe quetsásmëna, bëts uámana Festo; inÿetšá entsemna; atše sëntsoyebuambná nÿets juábnaca, y ndegombre soyënga. <sup>26</sup> Chentše rey Agripa entsuenana, y cha puerte tšabá chë soyëngama endëtatsëmbo, chíyeca, tondayama ntjatauatjá, atše chabe delante sëntsoyebuambná; atše corente sëndëtatsëmbo chánaca chë soyëngama yotatsëmbuama, er ndayá Jesús tojanmcá, ndoñe tonjopasá ndaye iytëmena chaboye. <sup>27</sup> Bëts rey Agripa, ¿Bëngbe Bëtsabe juabna oyebuambnayënga tmojánayana soyënguiñe aca quecošbuaché? Atše sëntsetatšëmbo aiñe chiñe cošbuáchema ca —Pablo tbojaniana.

<sup>28</sup> Chora Agripa tbojanjuá: —Batšatema más y mašcjayëñjaná Jesucristbe ustoná atše jóbemama ca.

<sup>29</sup> As Pablo tojánayana: —Nÿe batšatema más o bëts cama más, atše Bëngbe Bëtsá sëntseimpadana, ndoñe nÿe bëndatbe barie, sinó nÿetscanga chë mora šmojtsuenanënga, atšcá Cristbe ústonënga chašmobiamama, pero utámenënga ndoñe chamondëtsemna, ntšamo mora atše sëntsemncá ca.

<sup>30</sup> Chorna, chë rey, chë mandado, Berenice y chë chëngaftaca imojantbiámanënga tmojantsbaná, <sup>31</sup> y luaroye tmojána chë soyama jencuëntama. Mëntšá imojtsichamo: —Quem boyabása ndocna bacna soye tonjama jóbanama chabotsemnama, ni mo utamená jtsemnama ndoñe quebnátsmëna ca.

<sup>32</sup> Y Agripa Féstbioye tbojaniana: —Chë Romoca bëts mandado, quem chabe soyama cháuyanama cachá ndoñe matënjábošenëse, bënga matmënjobená quem boyabása jëtsboshjonama ca.

## 27

*Roma bëts puebloye Pablo tmojanichmó*

<sup>1</sup> Italia ca uabaina luaroye Pablo jíchmuama tmojanenoyeuná ora, atše, quem librëša uabiamnayá, cháftaca sënjána. Chora Pablo y chë inÿe utámenënga Julio ca uabainabe cucuatšinë tmonjánabashejuana. Julio enjamna canÿa chë Romoca bëts mandadbe soldadënguentša mandayá. <sup>2</sup> Asna, fsënjánašëngo canÿe Adramitio puebloca barcuñe; ya chë Asioca bëts pueblëngoye juama enjétsamna. Cesarea pueblentsana fsënjánbocna y Aristárcnaca bëngaftaca enjëtsemna; cha enjamna Tesalónica bëts pueblócá, Macedonia luaroca.

<sup>3</sup> Chë inÿe yëfsana, Sidón puebloye fsënjánashjajna. Chentše Julio, tšabá mandbomná Pábloftaca enjëtsemna; tbonjanlesenciá chabe amiguëngbioye chauabuáchama, chënga chamofjama y chamóbocuedama. <sup>4</sup> Sidonocana fsënjéftsanbocnentsana, bëngbe contra corente enjëtsebinÿiaye. Chíyeca, Chipre fshantsënga catšbioicajana, ndoñe yapa quentëtsebinÿiayëjana bënga fsënjána. <sup>5</sup> Cilicia y Panfilia luarënga béconana mar bejaycá fsënjánachnëngo, y Mira bëts puebloye fsënjánashjajna, Licia luaroca.

<sup>6</sup> Chë soldadëngbe amëndayá, canÿe Alejandría puebloca barco chentše tonjáninÿena, Italia luaroye yojétsaye; asna, šonjanamëndá chë barcuñe jenójaiyana. <sup>7</sup> Baseftaytentscuana uenana fsënjánana y pordonto fsënjánobená Gnido pueblentsana ndirichiñe jashjanguana. Cabá bëngbe contra enjëtsebinÿiaye causa, Salmón luarëjana fsënjánachnëjna, Creta fshantsënga béconana, ndoñe yapa quentëtsebinÿiayëjana. <sup>8</sup> Y chca, pordonto bejaycá fsënjánana, fshantsënga béconana; chentšana, canÿe pueblo, Tšabe Puertënga ca uabáinentše fsënjánashjajna, Lasea ca uabaina pueblo béconana.

<sup>9</sup> Chca, bayté tonjanochñengo y chora chë bejaycá jama puerte resjo enjésemna, er ya chë judiënga bayënga jobáyama te tonjanochñengo, Bëngbe Bëtsá chëngbe bacna soyëngama cháuaperdonama, y chora chë uaftena tempo joshjanguama ya enjétsobeco.

<sup>10</sup> Chíyeca Pablo chë entšanga mëntšá tonjanabuayená: “Baconga, atše šontsinýana mora puerte resjo entsemna bejaycá játama, y ndoñe tšabá queochátsmëna, ni chë uasmanëshangama, ni chë barcuama y bëngbiana cach ndoñe, mo nderado muanjanóbana ca.”

<sup>11</sup> Pero chë soldadëngbe amëndayá Páblëbioye ndoñe ntjoyeunayana; más, chë barcuentsa mandayá y chë barco nduíñbioye aíñe. <sup>12</sup> Ndoñe tšabá yonjamna, chë barco chora enjésemnentše chë uaftena tempëntscuana jëftsemnana; chë causa, nýa mo nýetscanga tmonjanenoyeuná cachiñe bejaycá chentšana játama, nderado cuanjobenaye Fenice puebloye jashjanguama y chentše jëftsemnana chë uaftena tempo tojopochocantscuana. Chë pueblo Creta luaroca enjamna; y choye jamashënguamna enjamna shinýe endbetsenatjëmbambana juachoica tsjuanoicajana y tsmanoicajana.

### *Mar béjayiñe puerte uaftena y binýia tojanóshjango*

<sup>13</sup> Chentšana tonjanontšé tsmanoicana batšá binýiayana, chíyeca chë entšanga tmonjanjuabó ya yojsanopodena jtëtóntsana jama ca. As, chentšana fsënjëftsanbocna y bejaycá fsënjána, Creta fshantsënga beconanëjana. <sup>14</sup> Pero baseftayté chentšana, chë fshantsëngocana tonjanontšé corente jabuache binýiayana y chë barquëshoye enjétsoshjajuana. Chë binýia yojanabaina Nordeste binýia ca. <sup>15</sup> Chë barcna nýe chë bínýiëbe ponto tonjanontšé uayana; chë binýia enjétsobayëjana jama ndoñe quentétsopodena causa, šonjanotocá nýe ntšamo tojtsebinýiacá chašúyambama. <sup>16</sup> Chentšana fsënjánachñëjna Cauda ca uabaina stëtšoicajana, base fshantsënga mar béjayoca; chiñe ya ndoñe tša jabuache quentétsëbinýiaye y pordonto fsënjánobená buyeshoicana jtabocnana chë barco enjanasjá canouše, ndoñe chaondëtsóndbemama. <sup>17</sup> Ya chë barquëshoye fsëntanëšëngo orna, chë entšanga lazëjangaca chë barquëshatmonsanabatsécaca, más uamorochësha chaotsamnana. Pero chënga monjétsauatja nderado chë barco chë Sirte ca uabaina cascajuentše nanjetsánjua; asna, chë barcuentsa ancla tmonjanashëbëútsëna, chë barco ndoñe betesco chaondëtsábonjnama, y ntšamo enjetsanbinýiaycá fsënjána. <sup>18</sup> Chë inýe yëfsana y chë binýiayana cabá jabuache enjésemna causa, chënga tmonjanontšé chë barcuentsa uasmanëshangá jtsëshbuëtsetšana; <sup>19</sup> y unga tianoye bëngnaca šonjanotocá, cach bëngbe cucuátšëca, chë barcuentsa soyënga buyeshoye jtsëtšanana. <sup>20</sup> Baytentscuana bënga ndoñe chibiatanobená jinýana ni shinýe, ni estrellatëmënga, tša tonjétsëbetata causa; y tša jabuache enjétsëbinýiaye causa, bënga ya ndoñe quefstétsanobatmana chentšana jótsbocana.

<sup>21</sup> Ya bayté enjésemna y chëntscuana tondaye saná ntjascá fsënjésemna. Chentšana, Pablo bëngbe tsëntsaca tonjantsá y tonjánayana: “Baconga, tšabá manjamna atše mašmënjanoeyená y Creta luarocana ndoñe matmënjëftsanbocna; chca mora ndoñe mal mamojtsepasá y ndoñe nýa nýetsá matmënjobuetše. <sup>22</sup> Pero mora ngmënacanda ndoñe matsmëngëngana; masque chë barco echantsenatjëmba, tšëngaftanguentšá ndocná queochatóbana. <sup>23</sup> Ibeta canýe ángel šonjébëbocna; Bëngbe Bëtsá, ndabia atše sëndmëna y nda sëndëservenana, cha tbojichmó; <sup>24</sup> y chë ángel mëntšá šonjauyana: ‘Pablo, ndoñe matauatjana; entseyta aca chë Romoca bëts mandádbioye chacotsama, y aca Bëngbe Bëtsábia cómnayeca, nýetsca quem barcuíñe ajnënga jobanámentsana cha echanjatsebacá ca.’ <sup>25</sup> Chcasna, baconga, ndoñe matauatjëngana, er atše Bëngbe Bëtsábeñe corente sëntsošbuaché y lempe ntšamo chë ángel šonjauyancá echanjóbcna. <sup>26</sup> Pero mora entseyta canýe fshantse mar béjayiñe chašúshejanguama ca” —cha tonjanëyana.

<sup>27</sup> Canýe ibeta, uta semana fsënjánana chentšana chë Adriático ca uabaina mar béjayiñe fsënjésemna, y nýe ínýoye y ínýoye chë binýia šonjétsëyambaye. Y mo tsëntseto yojésemna

orna, chë barcuentsä trabájayënga tmojanjuabó ya fshantse béconana imojétsemna ca. <sup>28</sup> As chënga tmonjanmedidá ntsachetšá chë býeshe buatyoye inamnama y tonjanóbocna unga bnëtsana y chnënguana metro; más chcoye cachiñe tmonjanmedidá y uta bnëtsana canýsëfta metro tonjanóbocna. <sup>29</sup> Chënga monjétsauatja nderado bëts ndëtšbéngaca nanjetsántšëtjiama; asna, chë barco stëtsoicajana canta ancla buyeshoye tmonjanashëbëútsëna, chë barco ndoñe más chaondëtsábonjnama, y tša monjëtseboše betsko chaobínýnama. <sup>30</sup> Chëntscuana, chë barcuentsä trabájayënga tmojánbošëna chentšana jtsachetana; chamna, chënga tmojanontsé chë canouše buyeshoye justjanguana, pero chca imojétsama, mo chë anclënga chë barco natsanoica cuaftšëtstjajuancá. <sup>31</sup> Pero Pablo chë soye tojáninýe, y chë soldadëngbe amëndayábioye y chë soldadëngbioye tonjanëná y mëntšá tonjanéyana: “Chë barcuentsä trabájayënga cach quem barcuentsë ndoñe chamonjoquedase, tšëngaftanga ndoñe quešmochatobenaye muentšana jótsbocama ca.”

<sup>32</sup> As, chë soldadënga tmonjána y chë canoušentsä lazëjënga tmontsantëtsetše y buyeshoye chëse tmontsantsatše.

<sup>33</sup> Enjëtsebinýana ora, Pablo nýetscanga tonjanaimpadá ndayánaca chamosëngama, mëntšá jáuyanëse: “Ya uta semana entsemna y tšëngaftanga ni mo batšatema chešmatamaná, y tondaye chešmatšbmuananga. <sup>34</sup> Diosmanda, masque nýe mo batšatémnaca šmochjase. Chca cmontsamna jamana ndoñe chašmondóbanama, er ndocná ndocá queochatspása ca.”

<sup>35</sup> Pablo, chca tonjánayanentšana, canýe tandëse tonjanca y nýetscangbe delante Bëngbe Bëtšábioye tbontanchuá. Chorna, tonjanjatá y tonjanontsé jasama. <sup>36</sup> Chentšana nýetscanga tmonjanenñemó y chëngnaca tmonjanse. <sup>37</sup> (Chë barcuentsë nýetscanga fsënjamna uta patse y canýsëfta bnëtsana y chnënguanënga.) <sup>38</sup> Ntšamo imnabošcá tmonjansentšana, buyeshoye trigo tmontsanashaná, chca, chë barco ndoñe yapa chaondëtsautama.

### *Chë barco tojtsanenatjëmbe*

<sup>39</sup> Ya tonjanbinýna ora, chë barcuentsä trabájayënga ndoñe quemëntëtsetatšëmbo ndaye fshantse chentše bëtsemnama, pero tmonjáninýe chë fshantsentše canýe luare jachañe, chë béjaye chë luaroye omashjuanentše, y chiñe canýe chënyañe enjamna; as chënga tmonjanjuabó jarrepárana nderado cuanjobenaye chëjana chë barco chë fshantsoye juyambana. <sup>40</sup> Asna, chë anclentsä lazëjënga tmontsantëtsetše y chë anclënga buyeshoye tmontsanboshjuana, y chë timón, chë barco juyambama oservenana soyentsä uabatsëcnëjëngnaca tmontsanjafjoná. Chorna, chë barcuentsä natsanoica niñëšiñe entšëjua tsbanánoye tmontanëšëngo, y chë binýia tonjanma chë barco chaontsé chë chënyoye juabëconama. <sup>41</sup> Pero chë barco canýe luaroye tonjánashjango, y chentše chë béjaye catatoicajana enjetsobuá y chë barco cánýentše, bëtscá cascajo buyeshiñe binýnentše tontsananojo. Chë barcuentsä natsanoica lado chë cascajuiñe entsanajuena, ndócnoye juabónjuama ntsopodencá, y chë stëtsoica lado puerta entsanashatiyíná y lempe entsanandbiamná, yapa binýia causa y býeshe chentše enjëtsojantšëtaye causa.

<sup>42</sup> Chora, chë soldadënga tmonjanjuabó chë utámenënga jtsëbáyana, jachbabëse chënga ndoñe chamondëtsachetama. <sup>43</sup> Pero chë soldadëngbe amëndayá inaboše Pablo jatsbocama, y chíyeca chë soldadëngbioye ndoñe chenatanalesenciá chca jamana; y tonjanmandá nýetscanga chë jachbabama obenëngna natsana chë buyeshoye joshbuetšana tsachoye chamuashjanguama, <sup>44</sup> y chë ínýengna tablëshënguiñe o chë barcuentsä pedazënguiñe chamoshbuetšama. Y chca, nýetscanga fsënjanobená tšabá y ndocá ntjapasacá fshantsoye jashjanguama.



## 28

### *Pablo Malta luaroca*

<sup>1</sup> Ya n̄yetscanga fshantsoca t̄sabá fs̄enj̄tsemna ora; fs̄enj̄ántats̄s̄embona ch̄e luare Malta ca yojanabaina. <sup>2</sup> Ch̄e luarent̄sa ents̄anga b̄ngaftaca corente t̄sabá mándbomn̄nga monj̄tsemna; can̄ye íñeshe tmonjanangbotj̄o y šonjan̄ebuaja chocha b̄nga jat̄óšboniyama, er t̄sa enj̄tsaftena y yapa enj̄tses̄sna. <sup>3</sup> Pablo tojanatbaná básefta buashana chames̄fj̄nga y ch̄e íñeshoye enj̄tseshac̄naye ora, can̄ye m̄t̄scuaye tojánbocna y enj̄tsachaye, chent̄se yapa obon̄yaye causa, y Pábl̄ebe cucuat̄siñe tontsanon̄yá. <sup>4</sup> Ch̄e luarent̄sa ents̄anga, ch̄e m̄t̄scuaye Pábl̄ebe cucuat̄siñe yojtsajon̄yanama tmonj̄ánin̄ye ora, monj̄tsenats̄s̄naye: “Quem boyabása ndegombre in̄ya obanayá cuanm̄ena; mar b̄jayoca joban̄ament̄šana tojotsbocá, pero chca uamana causa, diosá Justicia ndoñe quebnats̄les̄encia cha vida chaotsebomnama ca.”

<sup>5</sup> Pero Pablo tontsanenacuest̄etoná y íñeshoye ch̄e m̄t̄scuaye tbontsants̄at̄se y Pablo ndocá chenatanpasá. <sup>6</sup> Ch̄e ents̄anga imoj̄t̄sejuabnaye ch̄ábioye bochtsacuefshachá y n̄ye ndeolpe obaná yochjashajaye ca. Pero b̄n tonjanochn̄ngo y ndocá chenátanopasama ch̄nga tmonj̄ánin̄ye ora, ya ndoñe cachcá quem̄ent̄tsanjuabnaye y tmonjanont̄sé ichámuana Pablo can̄ye dios inamna ca.

<sup>7</sup> Chent̄sa béconana inamna ch̄e luarent̄sa mandayabe fshants̄nga. Cha šonjan̄ebuaja y corente t̄sabá šonjanacuedá, unga tents̄cuana. Ch̄e taitana Publio ca inauabaina. <sup>8</sup> Ch̄e tempo, Públīebe taitá šocá jutsn̄eshañe inaj̄jona, calent̄oraca y buiñeca buamachn̄ejuanánaca. Pablo tonj̄ána cha jin̄yama y tonj̄ánamash̄ngo; B̄ngbe B̄tsábioye tbonjanimpadá y ch̄e šocábeñe chabe cucuat̄s̄nga tonjanjajó, y chca, cha shnaná enj̄tsats̄m̄ena. <sup>9</sup> Chca tonjanopasá chent̄šana, ch̄e luarent̄sa in̄ye šoqūnga Pábl̄ebioye monj̄ánajna y cha enj̄ánashnaye. <sup>10</sup> B̄t̄scá t̄sabe soȳnga chent̄se b̄ngbiama tmonjanma, y cachiñe játama ya ch̄e barcuñe fs̄entanenojayenga orna, lempe nt̄samo bejaycá jama šonjan̄ejabotcá ch̄nga šonjanat̄satá.

### *Pablo Romoye tojánashjango*

<sup>11</sup> Ch̄e fshantsent̄se mar b̄jayoca unga ishinye fs̄enj̄ftsemna, y chent̄šana can̄ye Alejandriocana yojanabá barcuñe fs̄enjanenojayé; ch̄e barco n̄yets uaftena tempo ch̄e luarent̄se yoj̄ftsamna y enjanabaina Cástor y Pólux ca, mo ch̄e roman̄ngbe uta diosata cat̄satcá. <sup>12</sup> Chent̄šana, Siracusa b̄ts puebloye fs̄enj̄ánashjajna y chent̄se unga te fs̄enj̄ftsemna; <sup>13</sup> y chent̄šana fshantse béconana bejaycá fs̄enj̄ána, Regio puebloye jashjanguents̄cuana. Ȳfsana, tsmanoicana tsjuanoye enj̄t̄sebin̄yaye, y chca, ch̄e in̄ye ȳfsana Puteoli puebloye fs̄enj̄ánashjajna. <sup>14</sup> Chent̄se básefta Jesucrist̄beñe ošbuáchiȳnga fs̄enj̄ánan̄yena, y šonjan̄ebuaja ch̄ngaftaca can̄ye semana chent̄se j̄ft̄saj̄etanama; y chent̄šana Romoye fs̄enj̄ftsanbocna. <sup>15</sup> Romoca Jesucrist̄beñe ošbuáchiȳnga ya imoj̄t̄setats̄embo b̄nga choye fchjanashjajnama; chcasna, ch̄nga tmonj̄ánbocna b̄nga jaj̄ebenguama can̄ye luare Foro del Apio y Unga Tabern̄nga ca uabainóntscoñe. Pablo ch̄nga tonj̄ánan̄ye ora, B̄ngbe B̄tsá tbontanchuá y puerta añemoca enj̄tsemna. <sup>16</sup> Romoye fs̄enj̄ánashjajna ora, soldad̄ngbe am̄endayá Pábl̄ebioye tbonjalesenciá cán̄yabe yebnent̄se chaotsiyenama, y tonjanmandá can̄ye soldado chabotsebojan̄yama.

### *Ndayá Pablo Romoca tojanma*

<sup>17</sup> Choye fs̄enj̄ánashjajnent̄šana unga tianoye, Pablo tonjanmandá chent̄se imnoyena judīnga más uáman̄nga chamobéconama; y n̄yetscanga ya tmoj̄ánenefjna ora, cha tojan̄eyana: —Cat̄átanga judīnga, masque at̄se tondaye chiyatsma b̄nga judīnga mondb̄tsama soȳngama contra, ni b̄ngbe b̄ts taitanga imojanamana soȳngama contra, judīnga Jerusalenoca šmonjanishache y roman̄ngbe cucuat̄siñe šmonj̄ánboshjona. <sup>18</sup> Ch̄e roman̄nga lempe šmonjant̄já chent̄šana, monj̄t̄seboše at̄se j̄tsboshjonana, er ndocna bacna soye chemátanin̄yena at̄se j̄obanama chašotsemnama. <sup>19</sup> Pero ch̄e judīnga

ndoñe quemtétseboše atše chašmuatsboshjonama; chíyeca, šonjanotocá jáimpadana cach Romoca bëts uámana mandado cháuyana atše tšabá o ndoñe tijanmama, masque atše tondaye quetsátsbomna, cach atšbe luarentša entšanga, judiëngbe contra jayanama. <sup>20</sup> Chíyeca, atše tcbonjúbuaja jányama y jáuyanama, er ndayama chë Israeloca entšanga puerte jtsošbuáchiyëse mondobátmanama, chë obanënga mochtayenama, atše mora utamená séntsemna ca –tojanéyana.

<sup>21</sup> Chora chënga tmojanianyana: –Bënga ni mo canyë tsbuanácha Judeocana fchiy-atáyëngaca acbiama noticiëngaca, y ni canyë catšata judío, chocana moye ashja-jnënguentsá, ndocna bacna soye acbiama chešnatacuntá. <sup>22</sup> Bënga fsëntseboše jouenana ntšamo aca cojuabnama, er ntšamo Jesucristbe ustonëngbiama fstsëtatšëmbcá, entsemna ana nyëts luarenache chëngbe contra entšanga imojtsichamo ca.

<sup>23</sup> Asna, canyë tescama Pablo tmojanianyana chca chaotsemnama; y chë tena, ba entšanga chë Pablo posada inabomnoye tmojanobeconá. Y cachëscana tojanjétanëntscuana, Pablo entšanga yojanëtsëtsná Bëngbe Bëtsabe amëndayama, ndayama cha ininye y inatátšëmbo; y yojtsentšena chënga jáyënjana Jesúsbeñe chamotsošbuáchema, Moisesbe leyënguentsá soyëngaca y Bëngbe Bëtsabe juabna oyebuambnayëngbe uabemana librëšangañe soyëngaca. <sup>24</sup> Báseftanga aíñe imojtsošbuáchiye ntšamo Pablo yojtsanëtsëtsnacá ndegombre bëtsemnama, pero inyëngna ndoñe. <sup>25</sup> Nyëtscanga ndoñe cachcá montsanjuabnaye causa, tmojanontsé chentšana jésebocanana. As Pablo tojanéyana: “Nyëts razónaca chë Uámana Espíritu tšëngaftangbe taitanga tojanéyana, Bëngbe Bëtsabe juabna oyebuambnayá Isaíasbiajana, mëntšá:

<sup>26</sup> Motsa chë entšanga jauyanama:

‘Bëtscá šmochantsuenana, pero tondaye quecmochátësertana; tša šmochantsafšna, pero tondaye quešmochátinye.

<sup>27</sup> Muentša entšanga ainánaca josértama ndoñe quemátsboše causa, chënga nduauenanënga montsemna y nduabinynëngnaca; chënga bomínyeca ndoñe chamondobená jinýama, ni chëngbe matscuašeca jouenama, ni chëngbe ainánaca josértama ndoñe chamondobená, chca, atšbe benache ndoñe chamondishachama, atše ndoñe ntjätsebacama ca.’ ”

<sup>28</sup> Pablo chora mëntšá tojanéyana: “Ndegombre šmochtsetátšëmbo, cach quem Bëngbe Bëtsabe buayenana soyënga entšanga bacna soyënguentsana játsebacama, chë ndoñe judiëngbioye mochanjábuayenaye, y ndegombre chënga cocayé aíñe mochanjóyeunaye ca.” <sup>29</sup> (Pablo chca tojánayana ora, chë judiënga chentšana imojésebocana y tša imojtse-natsëtsnaye.)

<sup>30</sup> Pablo uta uata chentše tonjanoquedá canyë uántsamena yebnentše; y nyëtscanga cha jauatsëtsayama monjánajnënga cha enjanëbuájajana. <sup>31</sup> Nyëtscangbe delante puerte añémoca entšanga enjanabuayinýa Bëngbe Bëtsabe amëndayama, y enjanabuatambá soyënga Bëngbe Utabná Jesucristbiamana, y ndocna Romoca mandayá quebënjatanauyá chca jtsamama.

## Romanos

### *Pablo Romoca ošbuáchiyënga jacheuayama*

<sup>1</sup> Atše Pablo, Jesucristbe oservená, quem tsbuanácha sentsabiamná. Bëngbe Bëtsá šonjanchembo Jesucristbe ichmoná jtsemnama, y šonjanbocacá chabe tsabe noticiëngama entšanga chayábuayenama.

<sup>2</sup> Ya bayté entsemna, Bëngbe Bëtsá chabe juabna oyebuambnayëngaftaca chë tsabe noticiënga entšanga tojanašebuachená, y chënga chca tmojëftsaná bema Bëngbe Bëtsabe uabemana palabrénguiñe. <sup>3-4</sup> Chë tsabe noticiëngna, chabe Uaquiñá Bëngbe Utabná Jesucristbiamna jtsóyebuambnayana. Entšá quetsomñecana, tojanonýná canýe rey Davidbentša entšábentšana; pero chabe espíritu sempre uamanáyecna, Bëngbe Bëtsá chabe obenánaca entšanga tojaninýanyé Jesucristo chabe Uaquiñá bétsemnama. Cha chca tojaninýanyé chë Uaquiñá cháuatayenama cha tojanma ora.

<sup>5</sup> Chábeyeca, Bëngbe Bëtsá atše canýe bëts soyama šojanábuayana, Jesucristbe ichmoná jtsemnama, chabe soyëngama entšanga jábuayenama, y nyets luarënguenache Jesucristbeñe ošbuáchiyënga chamotsemnama, y chca, ntšamo cha yomandacá chënga chamotseyeunanama. <sup>6-7</sup> Tšëngaftángnaca chëngbeñe šmontsemna, tšëngaftanga chë Romoca šmoyenënga, ndëmuanýënga Bëngbe Bëtsá tcmojáchembo Jesucristbenga chašmotsemnama. Atše tšëngaftangbiamna sentsabiamná, tšëngaftanga Bëngbe Bëtsabe bonshánënga y chabe entšanga chašmotsemnama chëmbonënga. Atše sentsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tsabe bendicionënga chaotsemnama, y chaboma tšëngaftanga ainaniñe tsabe ebionana chašmotsebomnama.

### *Pablo tša inaboše Roma bëts puebloye jama*

<sup>8</sup> Jabojátšamna, Bëngbe Bëtsá, Jesucristbiajana šcuatschuá, cada ona tšëngaftanguentsabiamna, er nyets quem luariñe entšanga tša monjesoyebuambná tšëngaftanga Jesucristbeñe bëtscá šmojtsošbuáchema. <sup>9</sup> Bëngbe Bëtsá, nda nyets ainánaca sëndëservena, tsabe noticiënga chabe Uaquiñabiamna abuayinayañe, endétatšëmbo atše nyets tempo Bëngbe Bëtsáftaca stsencuénta ora, tšëngaftangbiamna sëndétseimpadanama; <sup>10</sup> y mora Bëngbe Bëtsá sëntseimpadana, nýa mora y cha tojtsebošëse, chašolesenciá jama tšëngaftanga jautsësayama. <sup>11</sup> Er atše tša sënýeboše tšëngaftanga jányama, chca, atše chayobená jamama chë Uámana Espíritbentšana yóbocana tsabe soyënga tšëngaftanga chašmotsebomnama; y chca, tšëngaftanga ainaniñe bëts añemo chašmotsebomnama, y Jesucristbeñe corente chašmotsošbuáchema; <sup>12</sup> o más tsabá jayanamna, tšëngaftanga y átšeftaca mochjenájabuache ainaniñe bëts añemo jtsebomnama, tšëngaftanga y átšnaca Jesucristbeñe tša imošbuachéyeca.

<sup>13</sup> Y morna, Jesucristbeyeca catšátanga, sëntseboše tšëngaftanga chašmotsetátšëmbo atše ba soye jama tijájuaboma, tšëngaftanga jautsësayama, pero méntscóñama ndoñe tsjobenaye. Atše sëntseboše ndayá chayobená jamana ínýënga tšëngaftangbioca Jesucristbeñe chamotsošbuáchema, ntšamo ínýengbeñe ndoñe judiëngbeñe tonjopasacá. <sup>14</sup> Atše Jesucristbiamna canýe oservená sëndmëna, y chíyeca nyetscángaftaca obligaciönaca sëntsemna, chë pueblënguiñe oyenëngaftaca y bën tjoye oyenëngaftaca, chë uatsjinýenëngaftaca y ndoñe chcangaftácnaca. <sup>15</sup> Chíyeca atše tša sëntseboše tšëngaftanga chë Romoca šmoyenëngnaca chë tsabe noticiënga jábuayenama.

*Chë tsabe noticiënga Bëngbe Bëtsabe obenana jtsinýanýayana*

<sup>16</sup> Atše ndoñe quetsátëuatja chë tšabe noticiënga jtsabuayiyayama, er chë noticiënga jtsinÿanÿayana Bëngbe Bëtsabe obenana; y chë obenánaca, nÿetscanga Jesucristbeñe ošbuáchiyënga jtsobenana atsebácanënga jtsemnama, natsana chë judiënga chca ošbuáchiyënga, pero chë ndoñe judiëngnaca. <sup>17</sup> Er chë tšabe noticiënga jtsinÿanÿayana ntšamo Bëngbe Bëtsá inétsama entšanga chabe bominiñe tšábenga chamotsemnama. Y entšanga chabe bominiñe tšábenga jábiamana, chënga Jesucristbeñe tmojtsošbuáchema. Ntšamo Bëngbe Bëtsabe uabemana palabrenguiñe endayancá: “Nÿe ndabiana Bëngbe Bëtsá tojama chabe bominiñe tšabia chaotsemnama, cha Bëngbe Bëtsábeñe betsošbuáchema, cha ndegombre chë nÿetsca tescama yomna tšabe vida echántsebomna ca.”

*Bëngbe Bëtsabe delante nÿetscanga culpa bomnënga mondmëna*

<sup>18</sup> Bëngbe Bëtsá celocana tojinÿanÿé, chë uabouana castigo, tša tbojetnama entšangbiana chaotsemnama, ainaniñe bacna juabnënga bomnëngbiana y chë bacna soyënga amëngbiana y ndëmuanÿengbiana, masque Bëngbe Bëtsabe ndegombre soyënga jtsotatsëmbñana, tša bacna soyënga tmojtsama causa, ndoñe ntjalesénciana cachënga jtsiyenama ntšamo ndegombre yomncá. <sup>19</sup> Bëngbe Bëtsá echanjácastigaye, er ntšamo entšanga imobencá Bëngbe Bëtsabiana jtsetatsëmbuama soye, chëngaftaca sempre endésemna. Y chca endmëna, Bëngbe Bëtsá chë soye tojinÿanÿéyeca. <sup>20</sup> Bëngbe Bëtsá quem luare tojanma orscana, entšanga mondet sobena botamana josértana, Bëngbe Bëtsabe obenana ndocna te yochjëftsopochócama y cha ndegombre Bëngbe Bëtsá yomnama. Chë soyënga Bëngbe Bëtsabiana entšanga quemátobena jinÿana; nÿe jtsetatsëmbuamna aíñe. Entšanga mondobena chë soyënga Bëngbe Bëtsabiana jtsetatsëmbuana, cachá tojanma soyëngaca. Chcasna, chënga ndoñe quemátobena jayanana bacna soye tojama, cha nduabatma causa ca. <sup>21</sup> Chënga Bëngbe Bëtsabiana mondetatsëmbo, pero ndoñe ntsebošana chábioye jadórana, “aca ndegombre Bëngbe Bëtsá condmëna ca” jtsichámëse, ni cha ntsatschuanayana. Pero, ntšamo chënga tmojtsejuabnacá tondaye ntsámanana; ndoservena juabnëngaca y bacna juabnëngaca montsiyena, y chca, chënga montsiyena, jtsamëse ntšamo cachëngbe juabnënga yomncá, mo ibetiñe cuaftsajncá. <sup>22</sup> Chënga jtsichámüana corente osertánënga imomna ca, pero ndegombrna juabna ndbomnënga mondmëna. <sup>23</sup> Chënga ndoñe ntsadoránana Bëngbe Bëtsá, chë ndocna te yochjëftsobaná; chë cuenta, soyënga tmojobopormá mo entšangcá, y chëngna aíñe jóbanana; o soyënga shloftsëngcá o bayëngcá, o osjojnayëngcá, y chënga diosënga imomna ca jtsejuabnayëse jtsadoránana.

<sup>24</sup> Chíyeca, Bëngbe Bëtsá cachcá tojónÿa, cachëngbe ainaniñe puerte bacna juabnëngaca mandánënga chamotsiyenama, y chca, bacna soyëngnaca ínÿengaftaca imojtsama; chë soyëngamna jtsëuatjana chënga entsamna. <sup>25</sup> Chënga chca jtsemnana, er ndoñe tmonjábošena Bëngbe Bëtsabe ndegombre soyënguiñe jtsošbuáchiyana, pero chë ndoñe ndegombre soyënguiñe cocayé jtsošbuáchiyana; chënga jtsadoránana y jtseservénana, Bëngbe Bëtsá quem luarentše tojama soyënga; pero ndoñe ntsadoránana, ni ntseservénana cach Bëngbe Bëtsá, chë nÿetsca chë soyënga tojanmá. Entšanga nÿets tempo cha chamotsatschuaná. Chca chaotsemna.

<sup>26</sup> Entšanga chca ndoñe tšabá tmonjámayeca, Bëngbe Bëtsá cachcá tojónÿa, chënga ínÿengaftaca bacna soyënga jtsamama chamotsebošama; chë soyëngamna jtsëuatjana chënga entsamna. Y chca, chë shembásengnaca tmojtsajbaná boyabásengaftaca jtsamana ntšamo tšabá yomncá, inÿe shembásengaftaca bacna soyënga jtsamama. <sup>27</sup> Cachcá, boyabásenga tmojtsajbaná shembásengaftaca jtsamana ntšamo tšabá yomncá; y tša imojtseboše inÿe boyabásengaftaca bacna soyënga jtsamama. Chënga chë inÿe boyabásengaftaca bacna soyënga imojtsama causa, entsamna jtsëuatjana, y chë soyëngama castigánënga mochántsemna, cachëngbe cuerpënguiñe jasúfriase, ntšamo chëngbe bacna soyëngama yojtsëmerecencá.



28 Chënga ndoñe tmonjábošena jtsiyenana jtsejuabnayëse, ntšamo entšanga Bëngbe Bëtsabiamana imotatsëmbcá ndegombre bëtsemnama. Chíyeca Bëngbe Bëtsá cachcá tojónya, cachëngbe ndbémana juábnaca chamotsiyenama; y chca, chënga ba soyënga jtsamana, jamama ndoñe yontsamncá. 29 Chënga nyetscna bacna soye jtsamana: ainaniñe nyetscna bacna juabna jtsebomnana, nye cachëngbiamana bëtscá soyënga jtsebomnana tša jésebošana, y ínÿengbioye ntšámnaca jáborlama jtsebošana; chënga nye játsbošana inya tojtsebomna soyënga jtsebomnana, ínÿenga jtsëbánayana. Mondmëna penzentserënga, ínÿenga áingñayënga, puerte bacna soyënga ínÿengbiamana bošënga, y uayátsenayënga. 30 Chënga ínÿengbiamana podesca jtsóyebuambnayana, Bëngbe Bëtsá jtsáyayana, ínÿenga jtsóyanguayana, nye cachëngbe soyënga más iuámama ca jésejuabnayana, tša jtsenábotamnayana, jésejuabnayana ntšamo muanjobenaye más bacna soyënga jamana; chëngbe bëtsetsangbioye ndoñe ntsayaunanana. 31 Chënga ndoñe ntsebošana chë tšabe soyëngama chaósertama, tondayama palabra ndbomnënga, ndocnábioye ntsebobonshánana y ndocnabiamana ntjóngmiana. 32 Y chënga corente mondëtatšëmbo chca soyënga amëngbiamana, Bëngbe Bëtsá chabe leyíñe tojayana jóbanama yojtsëmerecena ca; pero masque chca, chënga nyets tempo chca jtsamana, y oyejuayënga jtsënyayana ínÿenga cachcá tmojtsama ora.

## 2

### *Bëngbe Bëtsá echanjama chë ndoñe tšabe soye amënga bëtscá castigo chamotsebomnana*

1 Chcasna tsëngaftanga, chë ínÿenga ndoñe tšabá montsama ca šmojtsichámënga, ndoñe quešmátobena jayanana ndáyeca chca cach tsëngaftanga šmojama soyëngama. Tsëngaftanga chca ínÿengbiamana šmojtsichamo ora, jtsinÿanÿayana cach tsëngaftángnaca ndoñe tšabá šmonjamama, y castigánënga jtsemnama cmontsamna, er tsëngaftanga cachëngcá šmojtsiyena. 2 Bënga mondëtatšëmbo, Bëngbe Bëtsá ntšamo ndegombre yomncá inétsamama, chë chca amëngbiamana ndoñe tšabá tmonjama ca y castigánënga jtsemnama yojtsamna ca cha tojayana ora. 3 Y tsëngaftanga, chë ínÿenga ndoñe tšabá montsama ca šmojtsichámënga, y cachca soyënga šmojtsama, ¿šmojatsjuabná Bëngbe Bëtsabe castigüentšana šmochjotsbocá ca? 4 Bëngbe Bëtsá tsëngaftangbiamana corente tšabe juabna endbomna; mora ndoñe quecmátacastigaye, y tsëngaftangaftacna puerte uantado nye chca endëtsemna. ¿Chama tsëngaftanga cha šmojtsábotena? ¿Ndoñe šmondëtatšëmbo Bëngbe Bëtsá chca corente jtsababuánÿeshanëse cmojtsënÿa, tsëngaftanga juabna chašmotrocama y chabe benache chašmuishachama cha yobóseyeca? 5 Er tsëngaftanga ndoñe quešmátboše chacmotsësertánama, y bacna soyënga amama jtsajbanama ndoñe quešmátboše causa, šmontsama más bëtscá castigo chašmotsebomnana, chë ndayté Bëngbe Bëtsá ntšamo entšanga tmojamcá tšabá o ndoñe tšabá bëtsemnama yochjayana ora; chë te, Bëngbe Bëtsá echanjamánda chë ndoñe tšabe soye amënga bëtscá castigo chamotsebomnana, y chë tšabe soye amëngna, uacanana soye; y chca echanjama ntšamo ndegombre yomncá, y echanjínÿanÿiye cha tša tbojetna, entšanga ndoñe tšabá tmonjamama. 6 Chca, chë te, ntšamo cada ona tojëftsemama, Bëngbe Bëtsábentšana echanjóyëngacñe. 7 Ndëmuanÿënga nyets tempo tšabá jtsamëse imoyena, y chca imonguá Bëngbe Bëtsá más uámanënga chauabiamana, cha chëngbiamana tšabá chaotsoyebuambná y tšabe vida jtsebomnana chaoma; chë te chëngbiamana Bëngbe Bëtsá echanjama, chë nyetsca tescama yomna tšabe vida chamotsebomnana. 8 Inÿenga imoyena, nye cachëngbe juabnëngaca cachënga tšabá jtsomñama; y ntšamo ndegombre tšabá yomncá tmojtsaboté, ntšamo ndoñe tšabá yomncá jtsamama. Y Bëngbe Bëtsá chë te, ndoñe tšabá tmonjëftsobuachjanguamna puerte etonaná echanjayana nyetsca tescama castigánënga jtsemnana chënga yojtsamna ca. 9 Bëngbe Bëtsá echanjama, chca amëngna puerte chamosufrima y lastemcá chëngbiamana chaotsemnana, er yapa tsetšënana chëngbiamana echanjëftsemna; chca echántsemna chë chcángbeñe judiënga imomnëngbiamana natsana,

y ndoñe judiëngbiámna. <sup>10</sup> Pero chë te, Bëngbe Bëtsá echanjama, ntšamo tšabá yomncá amëngna puerte uámanënga chamotsemnama, chëngbiama corente tšabá echanjóyebuambaye, y echanjama chënga cháftaca tšabá tempcá chamotsatsmënama; y chca echántsemna chë chcángbeñe judiënga imomnëngbiama natsana, pero ndoñe judiëngbiámna.

<sup>11</sup> Er Bëngbe Bëtsabiama nyetscanga cachcá monduámna. <sup>12</sup> Chë Moisesbe ley ndoñe monduábomnënga, bacna soye tmojamama castigo mochántsebomna, masque leyënga ndoñe tmonduábomnëse, ndayá yojsamna jamama chaúyanama; y chë Moisesbe leyënga imuabomnëngbiama, bacna soye tmojamama, Bëngbe Bëtsá echanjayana chënga ndoñe tšabá tmonjama ca y castigo chamotsebomna ca, chë leyënguiñe iuayana soyëngaca. <sup>13</sup> Chca endmëna, er Bëngbe Bëtsá ndoñe queonybatsma entšanga chabe bominyiñe tšábenga chamotsemnama, nye ntšamo chë leyiñe iuayancá tmojtsuenanama, sinó ntšamo leyënguiñe iuayancá, ndayá jamama yojsamncá tmojtsamëse. <sup>14</sup> Chë ndoñe judiënga chca leyënga ndoñe quematábomna, pero chëngbe ainantša juabnënga tojtsëtsësná ndayánaca jamana, y ndayá chamotsamama ntšamo chë leyënguiñe tomandancá chënga tmojamëse, chënga jtsinyänayana tšabá imotátšëmbo ndayá aíñe o ndoñe inétsamna jamama, masque leyënga ndoñe tmonduábomnëse, ndayá yojsamna jamama chaúyanama. <sup>15</sup> Ntšamo tmojtsiyencá chënga jtsinyänayana, ndayá leyiñe yomandánama chënga ainaniñe cachcá imojuabnama. Ntšamo chënga ainaniñe imotátšëmbo y imojuabnacá ndayá cachënga tmojamama, jtsinyänayana chënga ntšamo chë leyiñe yomandánama cachcá imojuabnama. Inye ora, chëngbe juabnënga echantsëtsësnaye aíñe o ndoñe tšabá tmonjama ca; y ndayté, Bëngbe Bëtsá nyetscangbiama ntšamo tmojamama yochjayana ora, cachëngbe ainaniñe tmojajuabó soyëngaca, cha echanjinyänyie ndayá tšabá o ndoñe tšabá tmonjamama. <sup>16</sup> Chë te, Bëngbe Bëtsá nyetscangbiama echanjayana chëngbe juabnëngama y ntšamo tmojamama, ndayá entšanga tempo ndoñe tmonjáninyama; cha chca echanjama Jesucrísoftaca; y chë atše sëndabuayiyná tšabe noticiënga entsichamo ndegombre chca yochtsemnama.

### *Judiënga y Moisesbe ley*

<sup>17</sup> Y mora tšëngaftangbiama, chë judiënga šmomna ca ichámënga, y tša šmojtsejuabná Moisesbe léyeca tšëngaftanga tšabe vida jtsebomnama, y jtsenábotamnayana Bëngbe Bëtsabe ubuáyana entšanga šmomna ca; <sup>18</sup> tšëngaftanga chë ntšamo Bëngbe Bëtsá yobošcá tšëngaftanga chašmotsamama tatsëmbënga, y chë leyentšana šmojuatsjinye jobocacayana ndayá más tšabá jamama tojtsemncá. <sup>19</sup> Tšëngaftanga tša jësejuabnayana, šmobena ingyënga chë ntšamo tšëngaftanga cmësertancá ndosertánënga jujabuáchama ca, mo jtanënga unachayënga cuaftsemnëngcá, o mo chë ndoñe binýniñcá oyenëngbe juabnënga binýnayëngcá; <sup>20</sup> tšëngaftanga jtsejuabnayana chë ntšamo tšabá yomncá ndosertánëngbiama abuayiynayënga šmomna ca, y mo chë basëngcá tondaye nduatsjinyëngbiama abuátambayënga ca. Tšëngaftanga tša jësejuabnayana chë ley šmobomnama, lempe šmotátšëmbo ca y ntšamo šmojtsichamcá ndegombre yojtsemna ca. <sup>21</sup> Y chcasna, tšëngaftanga chë ingyënga abuátambayënga, ¿ndáyeca ndoñe cach tšëngaftanga šmondëtsánatsana? Tšëngaftanga ingyëngbioye jtsabuayiynayana ndoñe chamondëtsatbëbanama; as, ¿ndáyeca cach tšëngaftanga šmnëtsatbëbana? <sup>22</sup> Tšëngaftanga jtsichámuana, acbe shema o boyábioye ndoñe ingyäftaca cattseíngñaye ca; as, ¿ndáyeca tšëngaftanga cachcá šmnëtsama? Tšëngaftanga jtsáboyënjana soyënga chë ndayama ingyënga tmojtsichamo diosënga yomna ca y jtsadórayana; as, ¿ndáyeca chë soyënga chënga jadórama yebnënguentšana uámana soyënga šmnëtsatbëbana? <sup>23</sup> Tšëngaftanga tša jtsenábotamnayana chë ley šmobomnama; as, ¿ndáyeca šmonýbëtsama ingyënga Bëngbe Bëtsabiama podësca chamotsóyebuambnama, tšëngaftanga chë leyentšana mandënga jobedësama ndocna te ntsebošana causa? <sup>24</sup> Chama, Bëngbe Bëtsabe uabemana

palabrënguiñe mëntśá endayana: “Tšëngaftanga judiëngbe causa, ndoñe judiëngbeñe Bëngbe Bëtsabiana ndoñe tšabá quematoyebuambná ca.”

<sup>25</sup> Tšëngaftanga ntšamo leyíñe yomandancá šmojtšamëse, Bëngbe Bëtsábenga šmomnana jinÿanÿiyama, chë más delicadentse base bobachtema tëtšenënga jtsemnana tšabá nántsemna; pero ntšamo chiñe tomandancá ndoñe šmontsamëse, chca tëtšenënga jtsemnana, tondayama ntšoservénana, y chca, tšëngaftanga jtsemnana mo chë más delicadentse base bobachtema ndëtëtšenëngcá. <sup>26</sup> Y chë ndoñe judiënga chë más delicadentse base bobachtema tëtšenënga, judiëngcá ndoñe quemátsmëna; pero chënga ntšamo leyíñe yomandancá tmojtšamëse, ndegombre Bëngbe Bëtsá chënga echanjúbuaja mo cachabe entšangcá. <sup>27</sup> Y chca, tšëngaftanga judiëngbiama Bëngbe Bëtsá echanjayana ndoñe tšabá šmonjama ca, ntšamo leyíñe yomandancá ndoñe šmontsama causa. Cha chca echanjama, er bëtscá ndoñe judiënga mondmëna y chënga ntšamo leyíñe yomandancá mondocumplina, pero chënga ndoñe quemátsmëna tšëngaftangcá tëtšenënga, jtsinÿnama Bëngbe Bëtsábenga šmomnana. Tšëngaftanga, masque Bëngbe Bëtsabe uabemana ley šmonduábomna y chë más delicadentse base bobachtema tëtšenënga šmondmëna, cabá ndoñe šmontsama ntšamo leyíñe iuayancá, ndayá jamama cmojtšamnana.

<sup>28</sup> Chcasna, nda chë más delicadentse base bobachtema tmojatëtse ora, chábioye chë soye ndoñe ntjábemana canÿe ndegombre judío. Y canÿe entśá ndoñe Bëngbe Bëtsábía ntsemnana nÿe ínÿenga chë más delicadentse base bobachtema tmojatëtšama. <sup>29</sup> Y canÿe entśá ndegombre judío jtsemnana, ntšamo chabe ainaniñe tomncá, cha Bëngbe Bëtsabe entśá yomnana tojtsinÿanÿnase. Y chca, canÿe ndegombre judío, Bëngbe Bëtsabe entśá yomnana chaotsinÿnamna ndoñe quenátsmëna chë más delicadentse base bobachtema jtsetëtšenana, sinó ntšamo Bëngbe Bëtsá tojamcá chabe ainaniñe chaotsebínÿnama. Bëngbe Bëtsabe Espíritu jamana entśá chca ainana chaotsebomnana, ndayá inétsinÿanÿnaye cha canÿe ndegombre judío yomnana; y chë uabemana ley ndoñe quenátobena chca jamana. Bëngbe Bëtsá endmëna chë tšabe soye entšabiana ichamuá; entšanga ndoñe.

### 3

<sup>1</sup> Chcase, ndánaca šuatjatjaye, as ¿Bëngbe Bëtsabe entśá jtsemnana jëftsashjáchama, más tšabá yojtsemna canÿe judío jtsemnana ca? ¿Base bobachtema chë más delicadentse tëtšená jtsemnana becá yojtsámama ca? <sup>2</sup> Aíñe, chca jtsemnana corente enduámama y nÿetsca soyënguiñe; natsana chjayana, Bëngbe Bëtsá, judiënga chabe palabra tojanabanÿé, nÿetscangbiama chamotsinÿenama. <sup>3</sup> Y morna, ¿ndayá yochjopása nderado judiënguentse báseftanga ya ndoñe chca tmontsentšénese? Y chë causa, ¿Bëngbe Bëtsánaca yochtsajbaná ntšamo tojašebuachenacá amana? <sup>4</sup> ¡Ndoñe, ndegombre ndoñe! Chca ndoñe cha queochatsma; tšëngaftanga šmondëtatšëmbo Bëngbe Bëtsá sempre endbëtsama ndayá jamama tojašebuachenacá, masque nÿetsca entšanga bosterënga chamotsomñe. Er Bëngbe Bëtsabe uabemana palabrënguiñe Bëngbe Bëtsabiana mëntśá endayana:

Aca ntšamo chacojayana ora, nÿetscanga mochanjinÿe aca ntšamo ndegombre yomncá cnétsamama;  
y chacojtsenëuyaná ora, sempre cochanjínÿanÿiye acbe contra tmojtsoye-  
buambnángbioye, chënga ndoñe tšabá montsamama ca.

<sup>5</sup> Pero bënga ndoñe tšabe soye montsama ca báseftanga tmojayana ora, Bëngbe Bëtsá sempre tšabá inétsamama entšanga más tšabá jinÿama tmojtsobenëse, ¿ntšamo bënga mochjayana? ¿Bënga imojtsobena jayanana Bëngbe Bëtsá ndoñe tšabá tonjama ca, bëngbiama castigo chaotsemna ca cha tojayana ora? (Morna atse sëntsoyebuambná ntšamo entšanga jóyebuambayama monduamancá.) <sup>6</sup> ¡Ndoñe, ndegombre ndoñe! Ndoñe quemuátobena chca jayanama. Bëngbe Bëtsá nÿets tempo ntšamo ndegombre yomncá

ndoñe tontsamëse, ndegombre cha ndoñe nanjobenaye jayanama nyetsca quem luar-entša entsangbiana, ntšamo tmojamcă tšabá o ndoñe tšabá bétsemnama.

<sup>7</sup> Nderado nda tojayana: “Atše ndaye bacna soye stjama y ndoñe ntšamo ndegombre yomncá tojtsemna, y chë soye tojoservé Bëngbe Bëtsá puerte uamaná y bëtsá yomnama jinÿanÿiyama, y Bëngbe Bëtsá sempre ntšamo ndegombre yomncá tojtsamama jinÿama entsanga tmojtsobenëse, ¿ndáyeca Bëngbe Bëtsá cabá iuichamo ntšamo atše tijamcă ndoñe tšabá yontsemna ca y atše canÿe bacna soye amá stsemna ca?” <sup>8</sup> Y chcase, ndánaca mëntšá nanjáyana: “Ntšamo ndoñe tšabá yondmëncá mochjama, chca, entsanga chámuinÿe Bëngbe Bëtsá puerte tšabia yomnama ca.” Ndegombre, atše mal jaquédama báseftanga tmojayana atše chca stsabuatambá ca; Bëngbe Bëtsá chca abuatambayënga echanjácastigaye, ntšamo castigánënga jtsemnama imomerecencá.

*Ntšamo entsá tojtsamama, Bëngbe Bëtsabe bominiÿiñe ndocná tšabia ntsemnana*

<sup>9</sup> Y asna, ¿Bëngbe Bëtsá bënga judiënga ínÿengbiana más tšabá šonÿa? ¡Ndoñe, ndegombre ndoñe! Atše ya sënjinÿinÿé judiënga y ndoñe judiëngnaca, chë bacna soyënga jamama juabnëngaca mandánënga imomnama. <sup>10</sup> Er Bëngbe Bëtsabe uabemana palabrenguiñe mëntšá endayana:

Ntšamo entsá tojtsamama, ndocná Bëngbe Bëtsabe bominiÿiñe tšabia quenátsmëna.

¡Ndoñe, ndegombre ndoñe, ni mo canÿa chca quenátsmëna!

<sup>11</sup> Ndocná quenátsmëna ntšamo ndegombre yomncá chabotsosertánama;

¡Ndocná quenátsmëna nda chaotseboše Bëngbe Bëtsáftaca jtsemnama!

<sup>12</sup> Nyetscanga ndoñe tšabe benache tmojishache y chiñe montsajna.

Chënga nyetscanga Bëngbe Bëtsabe bominiÿiñe tondayama quemátoservena.

Ndocná quenátsmëna ntšamo tšabá yomncá chaotsamama, ¡ni canÿa ndoñe!

<sup>13</sup> Ntšamo tmojtsichamcă puerte bëts bacna soye jtsemnana, mo canÿe obanabe cuevëshe atëfnëshe puerte bacá tojtsonguëtšecá.

Chënga tmojtsoyebuambná soyëngaca ínÿengbioye jtsaíngñayana.

Chë tmojtsichamo soyëngaca puerte bacna soye ínÿengbiana jtsamana, mo canÿe mëtšcuaye tbojtseftëtše orcă, chë veneno canÿe entsábioye jóbana.

<sup>14</sup> Chënga, nyets tempo ínÿengbiana podesca jtsichámuana, y siempre jtsóyebuambnayana chë ínÿenga ntšámnaca jáborlama.

<sup>15</sup> Siempre jtseprontánana ínÿengbioye ntšámnaca jáborlama y jobáyama.

<sup>16</sup> Chënga siempre jtsiyenana ínÿenga chamotsesufrínama jtsamëse, y nÿe ntšámnaca jtsaborlánana.

<sup>17</sup> Chënga ndocna te tondaye ntjamana nyetscanga natjëmbana chamotsiyenama;

<sup>18</sup> Chënga ndoñe ntsiyenana Bëngbe Bëtsabiana jtsejuabnayëse, cha chë más bëtsá nyetscangbiana yomnama ca —chiñe endayana.

<sup>19</sup> Er bënga mondëtatšëmbo, lempe ntšamo leyiñe iuabemancá, chë leyëngaca mandánënga imoyenëngbiana yomnama. Chcasna, chë ley endmëna, Bëngbe Bëtsabe delante ndocná chaondobená jayanama, cha ndoñe tšabá tonjama, chama ndoñe yonjátatšëmbo causa ca; y endmëna jinÿanÿiyama, ntšamo tmojamcă tšabá o ndoñe tšabá bétsemnama Bëngbe Bëtsá nyetscangbiana yochjayana ora, nyetscanga yojtsamna chabe delante jayanama, ndáyeca ntšamo tšabá yomncá ndoñe tmonjama ca. <sup>20</sup> Er, Bëngbe Bëtsá ndoñe queochatsma ndocná chabe bominiÿiñe tšabia chaotsemna, ntšamo leyiñe yomandancá cha tojamama; chë ley bëngbiana jamana, nÿe bënga bacna soye tmojamama chamotsetatšëmbuama.

*Ntšamo Bëngbe Bëtsá inama entsanga chabe bominiÿiñe tšábënga chamotsemnama*

<sup>21</sup> Pero mora, Bëngbe Bëtsá tonjinÿanÿé ntšamo cha inama entsanga tšábënga chabe bominiÿiñe chamotsemnama; y Bëngbe Bëtsá ndoñe ntjamana canÿa chabe bominiÿiñe tšabia chaotsemnama, ntšamo ibomncá cha tojtsamama, ntšamo chë leyënguiñe y



mandënguifne yomncá. Pero masque mora chca, Bëngbe Bëtsá tonjinÿanÿé, Moisesbe leyifne y Bëngbe Bëtsabe juabna oyebuambnayëngbe librëšangañe yopodena jinÿenana chca yochtsemnama. <sup>22</sup> Bëngbe Bëtsá jamana entšanga chabe bominiÿifne tšábenga chamotsemnama, chënga Jesucristbeñe tmojtsošbuáchema. Bëngbe Bëtsá nÿetscanga Crístbeñe ošbuáchiyëngbiama chca jamana, y chabiama nÿetscanga cachcá monduámama; <sup>23</sup> er nÿetscanga bacna soye tmojama, y chë causa, ndocna entšá tonjobená jashjáchana ndocna bacna soye ndbomná jtsemnama y puerte bëtsá jtsemnama, ntšamo Bëngbe Bëtsá tojanjuabocá entšanga chamotsemnama. <sup>24</sup> Pero Bëngbe Bëtsá chëngbiama corente tšabe juabna bómnyeca, mo ndayá cuafjatšatacá, cha jamana chënga chabe bominiÿifne tšábenga chamotsemnama. Bëngbe Bëtsá chca tojanma, Cristo Jesúsbeyeca, entšanga atsebácanënga chamotsemnama y ya ndoñe más bacna soyënga jamama juabnëngaca mandánënga chamondëtsemnama cha tojanma ora. <sup>25</sup> Bëngbe Bëtsá cha thojanábuayana, chabe buifne juabuáshanëse y jóbanëse, cha chaotsemna ndábeyeca Bëngbe Bëtsá entšanga bacna soyëngama jáperdonama; Jesucristbeñe jtsošbuáchiyëse entšanga jobenayana perdonánënga jtsemnama. Bëngbe Bëtsá chca tojanma, jinÿanÿiyama cha inétsama entšanga tšábenga chabe bominiÿifne chamotsemnama, chë entšanga bacna soyënga tmojanmama chë tempo ntjatonÿaycá, er cha chë tempo corente uantado chëngaftaca yojtsemna y chëngbe bacna soyëngama ndoñe yonjánacastigaye. <sup>26</sup> Cha lempe chca tojanma, jinÿanÿiyama cha sempre ntšamo ndegombre yomncá inétsamama, y nÿetscanga Jesucristbeñe ošbuáchiyënga chabe bominiÿifne tšábenga chamotsemnama inétsamama.

<sup>27</sup> Chcáyeca, entšá ndoñe ntsoobenana tondayama ntsenábotamnayana. Chca endmëna, er Bëngbe Bëtsá tšabia chabe bominiÿifne jabemana, ndoñe ntšamo leyifne tomandancá cha tojtsamama, sinó nÿe Jesucristbeñe tojtsošbuáchema. <sup>28</sup> Y chca jayanëse, mora bënga tšabá montsetátšëmbo, Bëngbe Bëtsá inétsama canÿe entšá tšabia chabe bominiÿifne chaotsemnama, nÿe Jesucristbeñe tojtsošbuáchema, y ndoñe ntšamo leyifne yomandancá cha tojtsamama.

<sup>29</sup> ¿O Bëngbe Bëtsá nÿe judiëngbe Bëtsá yomna? ¿Ndoñe judiëngbe Bëtsánaca cha ndoñe yondmëna? Aifne, chëngbe Bëtsánaca cha endmëna; <sup>30</sup> er nÿe canÿe Bëtsá nÿetscangbiama endmëna, y cha echanjama chë más delicadentse base bobachtema tëtšenënga imomnëngbiama y ndoñe chchangbiámna, chabe bominiÿifne tšábenga chamotsemnama, Jesucristbeñe tmojtsošbuáchema. <sup>31</sup> Chcasna, Bëngbe Bëtsá jamana entšanga chabe bominiÿifne tšábenga chamotsemnama, Jesucristbeñe tmojtsošbuáchema; ¿chca yojtsayana chë ley nÿe tondayama yondoservenaca? ¡Ndoñe, ndegombre ndoñe! Inÿetšá, chca jamana chë ley más chaotsámanama.

## 4

### *Ntšamo Abrahánoftaca tojanopasá*

<sup>1</sup> Morna Abrahambiamama mochjóyebuambaye, bëngbe tempsca bëts taitá, y mochjinÿe ndayá tojánatsjinÿe Bëngbe Bëtsábeñe ošbuáchiyana bomnentšana. <sup>2</sup> Abraham chabe bominiÿifne tšabia chaotsemnama, ndayá cha tojanmama Bëngbe Bëtsá matënjanmëse, cha matënjanobená entšángbeñe ndayama jtsenábotamnayana, pero Bëngbe Bëtsabe delantë ndoñe; <sup>3</sup> er Bëngbe Bëtsabe uabemana palabrënguifne mëntšá endayana: “Abraham, Bëngbe Bëtsábeñe yojtsošbuáchiye, y chíyeca Bëngbe Bëtsá tonjánayana cha chabe bominiÿifne tšabia yojamna ca.”

<sup>4</sup> Canÿe entšá trabajayá, crocénana josháchiñana ndayá tojamama, pero chë crocénana ndoñe nÿe tšetanana ntsemnana, sinó chana jtsemnana ntšamo cha tojtsomerecencá. <sup>5</sup> Er menójuabonga, nda tondaye tontsama Bëngbe Bëtsá cháuyanama cha chabe bominiÿifne tšabia yomna ca, pero aifne tojtsošbuaché Bëngbe Bëtsábeñe, nda endbáyana chë bacna soye tmojamënga mora mo ndoñe chca cuafjamcá chamotsemna ca, chabiama Bëngbe Bëtsá echanjama chabe bominiÿifne tšabia chaotsemnama, chabe ošbuáchiyama.

<sup>6</sup> Rey David cachcá chabe librésañe tojánayana, chë ndabiamana Bëngbe Bëtsá jayanana chabe bominyiñe tšabia chaotsemna ca, masque chabiamana chca cháuyanama tondaye tonjamëse. David chca entsabiamana tojánayana, cha puerte echantsoyejuaye ca. <sup>7</sup> Chabe librésañe mëntsá tojanábema:

¡Tša oyejuayënga jtsemnana chë Bëngbe Bëtsá chëngbe bacna soyënga tojáperdonanga, chë Bëngbe Bëtsá chëngbe bacna soyënga tojabuajuánanga!

<sup>8</sup> ¡Puerte oyejuayá jtsemnana chë Bëngbe Bëtsá mo ndoñe bacna soye cuafjama cuenta tbojtsonyá cha ca!

<sup>9</sup> ¿David tojánayana nÿe chë más delicadentse base bobachtema tëtšenënga imomnëngbiama oyejuayana yomna ca? Ndoñe; ndoñe chca mondmëñëngbiámna. Y muentse tmonjayana, Abraham Bëngbe Bëtsábeñe yojtsošbuachéyeca, Bëngbe Bëtsá tojánayana cha chabe bominyiñe tšabia yojamna ca. <sup>10</sup> Y ¿ntseco chca tojanopasá? ¿Abraham ya chë más delicadentse base bobachtema tëtšená yojtsemna ora, o cabá ndoñe chca yontsemna ora? Ndegombre, Abraham cabá ndoñe chca tëtšená yontsemna ora. <sup>11</sup> Y cabá chentsana, Abraham base bobachtema chë más delicadentse tëtšená yojtsemna; y chca yojamna jinÿanyiyama, Bëngbe Bëtsá tempo ya chabiamana tojánayana cha chabe bominyiñe tšabia yojamna ca, cha Bëngbe Bëtsábeñe yojtsošbuáchema. Lempe chca tojanopasá, jinÿanyiyama Abraham mo taitacá yomnama Bëngbe Bëtsábeñe imošbuachéngbiama, masque ndoñe base bobachtema chë más delicadentse tëtšenënga mondmëna. Y cachcá Bëngbe Bëtsá chë ošbuáchiyëngbiama tojánayana, chënga chabe bominyiñe tšábenga imomna ca. <sup>12</sup> Y Abrahámna endmëna mo chë taitacá, chë más delicadentse base bobachtema tëtšenënga imomnëngbiama, pero aiñe Bëngbe Bëtsábeñe corente jtsošbuáchiyëse imoyenëngbiama, cachcá ntšamo bëngbe bëtš taitá Abraham Bëngbe Bëtsábeñe yojtsošbuachecá. Y cha cabá chë más delicadentse base bobachtema ntsetëtšena ora, ya chca yojtsošbuáchiyë.

*Jtsošbuáchiyëse, ntšamo Bëngbe Bëtsá tojasebuachenacá jóshjanguana*

<sup>13</sup> Bëngbe Bëtsá tojanašebuachená Abrahambiamana y chábentsana entsangbiama, quem luare chëngbiama yochjëftsemna ca. Y chca tojanašebuachená, ndoñe Abraham ntšamo leyiñe yomandancá betsobedecénama, sinó cha Bëngbe Bëtsábeñe yojtsanošbuáchema, y chíyeca Bëngbe Bëtsá tojánayana cha chabe bominyiñe tšabia yojamna ca. <sup>14</sup> Pero, ntšamo Bëngbe Bëtsá tojanašebuachenacá, bënga ntšamo chë leyiñe yomandancá tmojtsamëngbiama yojtsemna ca tmojayanëse, Bëngbe Bëtsábeñe jtsošbuáchiyana tondayama nantsoservena, y ntšamo Bëngbe Bëtsá tojanašebuachenacá tondaye ntsámanana. <sup>15</sup> Chë ley juabocnana, Bëngbe Bëtsá puerte etonaná entsanga cháucastigama, chënga ntšamo chiñe iuayancá ndoñe tmonsamama; pero ndocna mandënga tontsemnëse, ndocná ntšobenana chë ndoñe tontsayancá ndoñe ntjamana.

<sup>16</sup> Y chca, Bëngbe Bëtsá Abrahámbyoye tbojanšbuachená, cha yojtsanošbuachéyeca, ntšamo Bëngbe Bëtsá tojanašebuachenacá, ndegombre chaotsemnama chë Bëngbe Bëtsábeñe imošbuáchema mo Abrahámbyoye entsangcá imomnëngbiama; y Bëngbe Bëtsá chca tojanašebuachená, cha chëngbe tšabiamana iuantjéšnayeca. Chë mo Abrahámbyoye entsangcá imomnëngbeñe, ndoñe quemnatmëna nÿe chë ntšamo ley yomandacá inmëtsamënga, sinó nÿetscanga chë ntšamo Abraham tojanošbuachecá Bëngbe Bëtsábeñe imošbuachëngna. Y Abraham nÿetscanga bëngbiama, Bëngbe Bëtsábeñe ošbuáchiyënga, mo taitacá endmëna. <sup>17</sup> Ntšamo Bëngbe Bëtsábeñe uabemana palabrënguiñe endayancá, Bëngbe Bëtsá Abrahámbyoye ibojtsatsësnaye ora: “Atse sënjama aca ba luariñe entsangbiama atšbe bominyiñe taitá chacotsemnama ca.” Chë ntšamo tojanašebuachenacá ndegombre tšabe soye endmëna, er Bëngbe Bëtsá chca Abrahambiamana yojanjuabná; y Bëngbe Bëtsá endmëna ndábeñe Abraham yojtsanošbuaché, y nda inétsama entsanga chámuatayenama, y nda inamánda y entsanga jobenayana jinÿama ndayá ndocna te tmonjaninÿcá.

18 Abraham Bëngbe Bëtsábeñe yojtsošbuáchiye y yojtsobatmana ntšamo tbojanšbuachenacá chaotsemnama, masque entsábe juabniñe ndoñe chca ntjátsjuabnayana; y chca, cabana cha tojánashjache jtsemnana “ba luariñe entsangbe taitá”, ntšamo Bëngbe Bëtsá tbojaniancá: “Ácbentšana entsanga tša mallajta mochántsemna, ndocná queochatobenaye jacúntana ca”. 19 Abraham yojanobatmanëntscuana, cha puerte chábeñe yojtsanošbuaché, ntšamo tbojanšbuachenacá jóyëngacñama, masque Abraham yojtsonyaye ya bëtsanánëjema yojtsemnana, er ya mo patse uata yojtsebomna, y chabe shema, Sara, ndoñe yonjobena šešonga jtsabamnama. 20 Abraham ndocna te tonjanajbaná Bëngbe Bëtsábeñe ošbuáchiyana, y ni mo canye ndoñe yonjanjuaboye chë ntšamo Bëngbe Bëtsá tbojanšbuachenacá ndoñe joparéjana ca; sinó más corente chábeñe yojtsanošbuaché, y chca Bëngbe Bëtsábioye ibojtsatschuanaye, 21 er cha tšabá inatátšëmbo, ntšamo tbojanšbuachenacá jamama, ndegombre Bëngbe Bëtsá obená inamnama. 22 Chíyeca, Bëngbe Bëtsá tojánayana cha chabe bominyiñe tšabia yojamna ca. 23 Pero, chabe bominyiñe tšabia yojamna ca Bëngbe Bëtsá tojánayana ora, ndoñe nye Abrahambiana chca ntsóyebuambnayana; 24 ndayá bëngbiámnaca, ndëmuanyëngbiana Bëngbe Bëtsá yochjayana chabe bominyiñe tšábenga imomna ca, bënga Bëngbe Bëtsábeñe imošbuachéyeca; Bëngbe Bëtsá, nda tojanma Bëngbe Utabná Jesús cháuatayenama. 25 Bëngbe Bëtsá tojanalesenciá entsanga Jesús chamóbama, bënga bacna soyënga tmojanma causa, y Bëngbe Bëtsá tojanma cha cháuatayenama. Bëngbe Bëtsá chca tojanma jobenayama, bënga chabe bominyiñe tšábenga jábiamama.

## 5

### *Mora bënga Bëngbe Bëtsabe bominyiñe tšábenga montsemna*

1 Er Bëngbe Bëtsá tojama bënga chabe bominyiñe tšábenga chamotsemnana, bënga chábeñe imošbuachéyeca; mora tempcá tšabá Bëngbe Bëtsáftaca bënga montsatsmëna, Bëngbe Utabná Jesucristbeyeca. 2 Bënga Cristbeñe mondošbuáchema, cha tojama bënga chamotsetatšëmbuama Bëngbe Bëtsá tša tšabia yomnama, y Bëngbe Bëtsábicana tšabe soyënga jtsebomnëse mora chamotsiyenama. Bënga tša oyejuayënga jësemnana, er Bëngbe Bëtsábeñe jtsošbuáchiyëse mondobátmana cha puerte uámanënga y bëtsétsanga šochjábiamama, batšá ntšamo cachá yomncá. 3 Y ndoñe nye chama bënga oyejuayënga jësemnana, ndayá bënga tmojttesufrina y padecena soyënguiñe tmojtsajna órnaca. Chca mondbama, er bënga mondétatšëmbo bënga tmojttesufrina orna, bënga juatsjínýana ntšamo uantadënga jtsemnana padecena soyënguiñe tmojtsemna ora, Bëngbe Bëtsábeñe jtsošbuáchiyëse. 4 Bënga padecena soyënguiñe tmojtsemna ora, más tšabá uantadënga jtsemnana mondobénayeca, Bëngbe Bëtsá oyejuayá bëngaftaca jtsemnana, padecena soyënguentšana ndegombre tšabá tmojachnëngo ora. Bëngbe Bëtsá oyejuayá bëngaftaca chaotsemnana bënga tmojama ora, bënga jtsobenana más jtsobátmanana, ntšamo šojašebuachenacá cha yochjamama. 5 Bënga chca tmojtsobátmanëse, ndocna te nye bonamente quemochatobátmana, er Bëngbe Bëtsá šojinýanyé tša bëtscá cha šuababuánýeshanama. Bëngbe Bëtsá chca tojama chë Uámana Espíritbeyeca, y cha endmëna nda Bëngbe Bëtsá tbojanichmó bëngbe ainaniñe chaotsemnana jtsemándayama.

6 Tempo bënga tondaye chemuatanobená jamana Bëngbe Bëtsabe bominyiñe tšábenga jtsemnana, y chora Cristo tojanóbana bënga chë bacna soyënga tmojamëngbe tšabiama, nýa chama tempo yojamna ora. 7 Ndoñe paselo quenátsmëna jajuaboyana, ndáyeca canya nantseprontana jóbanama canya ntšamo chë leyiñe yomandancá jamama tojt-samanabiama; pero, canya bëtscá jtsababuánýeshanëse tšabe soyënga ínýëngbiana tojt-samabiama, nderádose chabiama jóbanama cuantseprontana. 8 Pero Bëngbe Bëtsá bënga šojanýanyé tša šuababuánýeshanama, er bënga cabá bacna soyënga ntsamcá imojoyena ora, Cristo bëngbiana tojanóbana.

<sup>9</sup> Cristo, chabe buiñe juabuáshanëse bēngbiama tojanóbanayeca, Bēngbe Bētsá tojanma bēnga chabe bominyiñe tšábenga jtsemnama. Y chca endmēnayeca, ndegombre Cristo šochanjátsebacaye, entšanga ndoñe tšabá tmonjama ca y castigo chēngbiama chaotsemna ca Bēngbe Bētsá chaojayana ora. <sup>10</sup> Bēnga tempo Bēngbe Bētsá imojanáya; pero cha tojanma bēnga cháftaca tempcá tšabá chamotsatsmēnama, chabe Uaquiñá tojanóbanayeca. Y mora, bēnga natjēmbana cháftaca chamotsemnama ya tojama ora, ndegombre atsebácanēnga mochántsemna, chabe Uaquiñá ainá yómnayeca. <sup>11</sup> Y ndoñe nye chca, ndayá bēnga cháftaca puerte oyejuayēnga chamotsemnámna Bēngbe Bētsá jamana, ndayá Bēngbe Utabná Jesucristo bēngbiama tojánmayeca. Y mora, chábeyeca Bēngbe Bētsá tojama bēnga cháftaca tempcá tšabá chamotsatsmēnama.

### *Adán y Cristo*

<sup>12</sup> Canye entšá bacna soye tojanma causa, nyetsca entšanga bacna soyēnga amēnga tmojábcana; y cha tojanóbana, bacna soyēnga tojanma causa. Y chca, nyetsca entšanga entsamna jóbanama, er nyetscanga bacna soyēnga tmojama. <sup>13</sup> Bēngbe Bētsá Moisésbioye chē leyēnga cabá nduántšaboshjona ora, entšanga quem luarentše bacna soyēnga tmojanma. Pero ndocna ley tontsemna ora, Bēngbe Bētsá ndoñe ntjatonjáyana entšanga bacna soyēnga tmojamama. <sup>14</sup> Nyetsca entšanga, Adánbentsana Moisésbentscoñe, nyetscanga yojánamna jóbanama, ntšamo cach Adán tojanmcá ndoñe tmonjanmēngnaca, ntšamo cha ndoñe chaondēmama Bēngbe Bētsá tbojanmandacá cha tojanma ora. Y Adánbeñe entšanga mondobena jinjyama, ntšamo chē jabama ibojamná canye soyēnguiñe yochtsanmēna.

<sup>15</sup> Pero ntšamo chē útata tbojanmcá ndoñe cachca soye quenátsmēna; er Bēngbe Bētsá entšangbe tšabíama jtsejuabnayēse tšabe soyēnga chēngbiama tojanma ora, ndoñe yonjamna mo ntšamo Bēngbe Bētsá tbojanmandacá ndoñe chaondēmama Adán tojanma orcá. Tšēngaftanga šmondétatšēmo, nye canye entšá canye bacna soye tojanma causa, cha tojanma nyetsca entšanga jóbanama chaotsamnama, pero Bēngbe Bētsá entšangbe tšabíama yajuabnáyeca, más bēts soyēnga jamana, chē Adanbe bacna soye entšangbiama bacna soyēnga tojanmama. Chca, Bēngbe Bētsá tojanma ba entšanga bētská tšabe soyēnga chamotsebomnama; y chca tojama, nye canye entšá, Jesucristo, tšabe soyēnga tojánmayeca. <sup>16</sup> Chē ba entšanga bētská tšabe soyēnga chamotsebomnama Bēngbe Bētsá tojamentšana endóbocana soye, puerte inyētšá comna, chē entšá Adán, canye bacna soye tojanmentšana tojanóbocna soyama. Adán bacna soye tojanmentšana, Bēngbe Bētsá tojánayana chana bacna soye tojanma y castigo jtsebomnama ibojtsemna ca, y nyetsca entšangnaca chē causa; pero masque nyetscanga bacna soyēnga tmojama, Bēngbe Bētsá entšangbe tšabíama ndoñe bēndētsebnatjēmbayeyeca, tojanma entšanga chabe bominyiñe tšábenga chamotsemnama y chē bacna soyēngama castigánēnga ndoñe chamondētsemnama. <sup>17</sup> Ndegombre endmēna, canye entšá bacna soye tojanma causa, nyetsca entšanga jóbanama yojtsamna. Pero puerte más, canye entšá Jesucristo tojanma. Ndēmuanjēngbiama Bēngbe Bētsá tojama bētská tšabe soyēnga chamotsebomnama, ndēmuanjēngbiama Bēngbe Bētsá tojama chabe bominyiñe tšábenga chamotsemnama, y Bēngbe Bētsábiocana chca tmojóyēngacñēnga, chēnga nyetscanga mochantsiyena bacna soyēnga jtseyēnjanayēse y nyetsca tescama mo bētsētsangcá; y chca echántsemna ndayá Cristo tojánmayeca.

<sup>18</sup> Y chca, ntšamo canye entšá, Adán, canye bacna soye tojanmama, Bēngbe Bētsá tojánayana nyetscanga bacna soye tmojanma y castigánēnga chamotsemna ca; cachcá ntšamo canye entšá, Cristo, puerte tšabe soye tojánmayeca, Bēngbe Bētsá jayanana nyetscanga imojtsobena chabe bominyiñe tšábenga jtsemnama y chē nyetsca tescama yomna tšabe vida jtsebomnama ca. <sup>19</sup> Y ntšamo Bēngbe Bētsá tbojanmandacá ndoñe



chaondēmama canye entsá tojanma causa, nyetsca entsanga bacna soye amenga tmojanobiamama; cachcá, ntšamo Bëngbe Bëtsá tbojanmandacá canye entsá, Jesucristo, tojánmayeca, Bëngbe Bëtsá tojanma bëtscá entsanga chabe bominyiñe tšábenga chamotsemnana.

<sup>20</sup> Chë ley entsangbe cucuatšiñe tmojanáboshjona, jinyanñiyama ntšamo ndegombre yomna bacna soyënga jtsamana; pero entsanga más bacna soyënga imojtsama ora, Bëngbe Bëtsá cabá más chëngbe tšabiamama yojtsanjuabnaye y más tšabe soyënga chëngbiamama yojtsama. <sup>21</sup> Chcasna, mora mochjayana, entsanga bacna soyëngaca puerte mandánënga imojamna, y chca, nyetscanga jóbanama yojamna ca. Pero mora, ya ndoñe chca quenátsmëna, er Bëngbe Bëtsá tojama entsanga chabe bominyiñe tšábenga chamotsemnana, Bëngbe Utabná Jesucristbeyeca chë nyetsca tescama yomna tšabe vida chamotsebomnana; chíyeca mora bënga montsobena jtsiyenama, Bëngbe Bëtsá šojatsatá tšabe soyënga lempe bëngaftaca jtsemnëse.

## 6

### *Crístbeyeca bënga tšabe vida jtsebomnana*

<sup>1</sup> Y asna, ¿ntšamo mochjayana? ¿šojtsamna jtsiyenana sempre bacna soyënga jtsamëse, chca, Bëngbe Bëtsá šuababuánñeshanama más chašotsinñanñanama, cha más bacna soyënga bënga jtsaperdónayëse? <sup>2</sup> ¡Ndoñe, ndegombre ndoñe! Tempo bënga monjaniiyena bacna soyënga jamama juabnëngaca mandánënga, pero mora bënga montsobena jtsiyenana chë juabnënga tondaye bëngbioye ntsamcá, y chca, bënga montsobena mo obanëngcá chë soyëngama jtsemnana; y as, ¿ndáyeca bënga muatjátsjuabnaye ntšamo ndoñe tšabá tontsemncá jatiyenana? <sup>3</sup> Er ndegombre tšëngaftanga šmondëtatšëmbo, bënga uabáinënga tmojanuquedá ora, tmonjaninñanñé bënga Cristo Jesúseftaca cánñiñe mo canñacá bëtsemnana; y bënga uabáinënga tmonjanuquedá ora, enjamna mo bënga cuafjobancá, ntšamo Cristo tojanobancá. <sup>4</sup> Bënga uabáinënga tmonjanuquedá ora, enjamna mo bëngnaca cháftaca cuafjobancá, y cháftaca uatabuantsanëngcá. Chca yojamna, bënga chamotsobenama mo tsëm entsangcá jtsiyenama, ntšamo Crísoftaca tojanopasacá, cha cháuatayenama Bëngbe Bëtsá tojanma ora, chabe puerte bëtš obenánaca.

<sup>5</sup> Bënga Crísoftaca cánñiñe mo canñacá jtsemnëse, cha tojanóbana ora mo bëngnaca cháftaca cuafjobancá enjámnayeca, ndegombre bënga cánñiñe mo canñacá cháftaca mochántsemna, bënga cachiñe vida nyetsca tescama chamotsatsbomnana Bëngbe Bëtsá jtsamëse, ntšamo Cristo cháuatayenama cha tojanmca. <sup>6</sup> Y bënga mondëtatšëmbo, chë ntšamo bëngbe vida enjamncá, bacna juabnëngaca mandánënga, Jesucristbeñe cabá ntšošbuáchiye ora, mora ya ndoñe chca yontsemnana; y chca entsemna mo chë tempsca vida chaóbanama cuafjamcá, Cristo tmojanrucificá ora. Chca yojamna, Bëngbe Bëtsá jobenayama chë bacna soyënga jamama bëngbe juabnënga jtsepochócama; y chca, ya ndoñe más chë bacna soyëngaca mandánënga chamondëtsemnana, mo nyets tempo nye ínñabiamama oservenëngcá. <sup>7</sup> Er canye entsá tojóbanama ora, chë bacna soyënga chábioye ya ndoñe más ntsemándayana. <sup>8</sup> Er Cristo tojanóbana ora, mo bëngnaca cháftaca cuafjobancá endmënayeca, cháftaca jtsiyenámncá bënga montšošbuaché. <sup>9</sup> Bënga mondëtatšëmbo Cristo cháuatayenama y ndocna te cha cachiñe jatóbanama Bëngbe Bëtsá tojanmama; y ndocna obenana queochatsma cha cachiñe chauatóbanama. <sup>10</sup> Cha tojanóbana, y chë bacna soye jamama juabnënga ndocna te ntjobenayana chábioye jamándana, y ínñënga ndoñe imontsobena ntšamo cha jabórlana; y ntšamo mora cha yoyencá, Bëngbe Bëtsá jtsešervénama yomna. <sup>11</sup> Cachcá, tšëngaftanga cmontsamna jtsejuabnayana, chë ya ndoñe más bacna soyëngaca mandánënga šmojtsemnana, pero vida šmobomna lempe jtsamëse Bëngbe Bëtsá tšëngaftangaftaca oyejuayá chaotsemnana, Cristo Jesúseftaca cánñiñe mo canñacá jtsemnëse.

<sup>12</sup> Tšëngaftanga cmontsamna, chë bacna soyënga jamama ainanentše šmobomna juabnëngaca ndoñe más mandánënga ntsemnana, chca, tšëngaftanga ndoñe chašmondétsamama juabnëngaca nÿe cach tšëngaftanga, tšëngaftangbe cuerpiñe tšabá jtsomñama. <sup>13</sup> Tšëngaftanga ndoñe quecmátamna jalesénciana ndaye tšëngaftangbe cuerpentša soye, bacna soyënga jamama chaoservema. Chamna, tšëngaftanga cmontsamna Bëngbe Bëtsá jauyanana, lempe ntšamo tšëngaftanga šmomncá, cha jaserviama chaotsemna ca, tšëngaftanga chë šmomna mo ya ndoñe más obanëngcá Bëngbe Bëtsabiamana, y tojanma tšabe vida chašmotsebomnana; y jauyanana nÿetsca tšëngaftangbe cuerpentša soyëngna Bëngbe Bëtsá jaserviama yojtsemna ca. <sup>14</sup> Ndoñe quecmátamna bacna soyëngaca mandánënga jtsemnana, er tšëngaftanga ndoñe quešmátiyena leyinë iuayana soyëngaca mandánënga, y šmondoyena Bëngbe Bëtsá tšëngaftangbiamana tšabá jtsejuabnayëse.

### *Ošbuachiyá obligacionaca jtsemnana ntšamo tšabá yomncá jamama*

<sup>15</sup> Y asna, ¿bënga imojtsobena bacna soyënga jamana, chë leyinë iuayana soyëngaca ndëmandánënga imomnana, y Bëngbe Bëtsá bëngbiamana tšabá jtsejuabnayëse bënga imoyenama? ¡Ndoñe, ndegombre ndoñe! <sup>16</sup> Tšëngaftanga tšabá šmondétatšëmbo, ínÿabe cucuatšinë mo nÿets tempo nÿe ínÿabiamana oservenëngcá šmojoquedá ora, cha jtsobedecénama, ndegombre tšëngaftanga chë nduiñbiamana nÿets tempo oservenënga jtsemnana. Chcasna, cachcá jtsemnana, chë tšëngaftanga šmojabocacá bacna soyëngaca mandánënga jtsemnana, y chca jtsemnana mo Bëngbe Bëtsabe bominiñe tšëngaftanga nÿetsca tescama obanënga cuaftsemncá, o Bëngbe Bëtsá jtsobedecénama, y chca, chabe bominiñe tšábënga jabocanana. <sup>17</sup> Pero šontsamna Bëngbe Bëtsá jtsatschuanayana, er tempo tšëngaftanga mo nÿe ínÿabiamana oservenëngcá šmojamna, bacna soyënga jamama juabnëngaca mandánënga; pero mora nÿets ainánaca šmojoyeuná, ntšamo chë tcmojanabatambá soyënguiñe šmojoyëngacñécá. <sup>18</sup> Bëngbe Bëtsá tšëngaftanga cmojatsebacá, bacna soyëngaca ndëmandánënga chašmotsemnana, y morna mo Bëngbe Bëtsabiamana oservenëngcá šmojabocna, ntšamo tšabá yomncá jtsamama. <sup>19</sup> Muentše sënjoyebuambá ntšamo entšanga mondbetsichamcá, er tšëngaftanga ndoñe corente juabna quešmátsbomna toto palabrënga chacmósertama. Tempo, tšëngaftanga šmonjanamana jalesénciana, lempe ntšamo šmojamncá mandánënga jtsemnana, bacna soyënga shembásaftaca o boyabásaftaca jamama juabnëngaca, y nÿe ndaye bacna soyënga jamama juabnëngaca. Cachcá, mora tšëngaftanga cmontsamna jalesénciana tšëngaftanga chašmotsemnana juabnëngaca mandánënga tšabe soyënga jtsamama, chca, ndegombre Bëngbe Bëtsabe entšanga chašmotsemnana.

<sup>20</sup> Tšëngaftanga, cabá bacna soyënga jamama juabnëngaca mandánënga šmonjamna ora, tšëngaftanga ndoñe obligacionaca quešmënjatsmëna ntšamo Bëngbe Bëtsabiamana tšabá yomncá játamama. <sup>21</sup> ¿Ndaye tšabe soye tšëngaftanga šmojosháchiñe chë tempo šmojánama soyënga amiñe? Tondaye; y mora chë soyëngama šmojtsëuatja. Chca soyënga tcojamentšana jóbocnana, entšá nÿetsca tescama castiganá chaotsemnana, mo Bëngbe Bëtsabe bominiñe nÿetsca tescama obaná cuaftsemncá. <sup>22</sup> Pero mora, ndoñe quešmátsmëna bacna soyënga jamama juabnëngaca mandánënga, y mora bëtscá šmojtsentšana Bëngbe Bëtsá jtseyeunanana y jtseeservénana. Chca jtsamana, tšëngaftangbiamana puerte tšabá entsemna, er chca, Bëngbe Bëtsabe entšanga šmochántsemna, y cabana, chë nÿetsca tescama yomna tšabe vida šmochántsebomna. <sup>23</sup> Bacna soyënga tcojtsamentšana jóbocnana entšá nÿetsca tescama castiganá chaotsemnana, mo Bëngbe Bëtsabe bominiñe nÿetsca tescama obanënga cuaftsemncá; pero, Bëngbe Bëtsá šojtsatšatná soyënguentšana, jóbocnana chë nÿetsca tescama yomna tšabe vida jtsebomnana, Cristo Jesús Bëngbe Utabnáftaca cánÿiñe mo canÿacá jtsemnëse.

## 7

*Chë bouamnátbentsana ndayá bëngbiana mochjuatsjinje*

<sup>1</sup> Jesucristbeyeca catsátanga, tšëngaftanga šmotátšëmbo ntšamo chë leyënga entšangbiana inétsemnama; tšëngaftanga šmotátšëmbo, ntšamo chë leyiñe tojtsayancá canje entsá chaotsamamna, nje chë entsá tojtsainëntscuana chábioye jtsemándayana. <sup>2</sup> Chcasna, canje bouamna shembása, ntšamo chë leyiñe endayancá bontsemna chabe boyáftaca jëftsemnana, chë boyá tuainëntscuana; pero chë boyá tojtsóbanësna, chë leyiñe endayana, chë shemna canya jtoquédana, chë boyabiana ndëmandaná ca. <sup>3</sup> Y chca, chë shema inje boyabásaftaca chabe boyábioye tbojaingñé, chë boyá cabá vida totsóbomñe ora, chë shemna jtsabáinana chabe boyábioye ínñaftaca ingñayá ca. Pero chabe boyá tojtsóbanëse, chë leyiñe endayana chë shemna canya jtoquédana, chë boyabiana ndëmandaná ca, y cha jtsobenana ínñaftaca jtobouamayana; y chca tojama ora, boyábioye ínñaftaca ingñayana ndoñe ntsemnana.

<sup>4</sup> Tšëngaftanga chë ošbuachiyëngaftácnaca cachcá endmëna; ya ndoñe más chë léyeca mandánënga quešmátmëna, er Cristo tojanóbana ora šmojánbocna, mo chë soyëngama obanënga cuaftjoquedangcá, ínñabe entsanga jtsemnana, Crístbënga, ndabiana Bëngbe Bëtsá tojanma cháuatayenama; y chca jtsemnëse, bënga bëtscá soyënga ntšamo tšabá yomncá chamotsamama, Bëngbe Bëtsá jasérviana. <sup>5</sup> Bënga chë nje ntšamo cabënga innabošcá monjaniyena ora, chë ley enjanoservena bëngbe ainaniñe chamotsebomnana bacna soyënga jamama puerte bëts juabnënga, nje bënga tšabá jtsomñama. Ba bacna soyënga tmonjanma, y chë causa bënga šonjánamna njetzca tescama castigánënga jtsemnana, mo Bëngbe Bëtsabe bominjñiñe njetzca tescama obanënga cuaftsemncá. <sup>6</sup> Pero mora Bëngbe Bëtsá šojatsebacá chë léyeca ndëmandánënga chamotsemnana; chë ley tempo enjamna bëngbiana mo canje amëndayacá. Pero mora bënga chë leyama mo obanëngcá montsemna; chca, bënga ndoñe chamondëtsiyenama ntšamo tempo enjamncá, chë uabemana leyëngaca mandánënga, y aiñe tsmëcá chamotsiyenama, ntšamo chë Uámana Espíritu iuamcá bënga vida chamotsebomnana.

*Bacna soye jamama juabna tcojtsebomnëse, chë ley jamana entsá bacna soye chaomama*

<sup>7</sup> Báseftanga muanjayana cach ley bacna soye yomna ca; ndegombre, chë ley ndoñe chca quenátmëna. Chë léyeca atše tšabá sëndétatšëmbo ndayá yomna bacna soye jamana. Atše ndocna te matijántatšëmbona ndayá yomna chë “ínñabioye jtsántšabošana”, “ínñabioye ndoñe cattsantšaboše ca” chë leyiñe ndoñe matmënjánábemëse. <sup>8</sup> Pero bacna soyënga jamama juabnënga atše bomna causa tonjanma, atše puerte chaitsebošama chë ndoñe šonjamna jtsebošana soyënga; y chca chë juabnëngaca tonjanopasá, atše chë leyënguiñe ndayá iuayanama jtsejuabnayëse. Er ndocna ley tondmëna ora, entsá ndoñe ntsetatšëmbuana ndayá yomna bacna soye jtsamana. <sup>9</sup> Canje tempo enjamna, chora atše sënjananiyena leyëngama ntsetatšëmbcá, pero ntšamo leyiñe iuayancá sënjanabuátmana ora, ndayá jamama ndoñe yonjamnama, atše sënjanontsé chë bacna soyënga jamama juabnëngaca mandaná jtsemnana; <sup>10</sup> y chora atše sënjántatšëmbona, chë causa šojtsanmëna njetzca tescama castigáná jtsemnana, mo Bëngbe Bëtsabe bominjñiñe njetzca tescama obaná cuaftsemncá. Bëngbe Bëtsá chë mando tojanma, atše chë njetzca tescama yomna tšabe vida jtsebomnana chayobenama, chë ley jtseyeu-nanëse; pero ndoñe chiyatanobedecé causa, chë mando tonjanma atše chašotsemna njetzca tescama castigáná jtsemnana. <sup>11</sup> Chë leyentša mandñe inje soyënga ndoñe šonjëtsemna jamama ca yojtsayánayeca, chë bacna soyënga jamama juabnënga átšbeñe, šmonjaniñe bacna soyënga jamama; y chë mando bëtsemnana, chë bacna soyënga jamama juabnënga tmonjanma atše chašotsemna njetzca tescama castigáná jtsemnana, mo Bëngbe Bëtsabe bominjñiñe njetzca tescama obaná cuaftsemncá.

12 Pero bēnga mēntšá mochjayana: chē leyña tšabe soye endmēna, er Bēngbe Bētsábiocana tojanóbocna, y chē mandēngnaca Bēngbe Bētsábiocana tojanóbocna ca; chiñe endayana ndayá tšabá yomna jamana y chca tšabá jtsemnana. 13 Y asna, ¿quem tšabe soye tojanma atše chašotsemna n̄yetsca tescama castiganá jtsemnama, mo Bēngbe Bētsabe bominyiñe n̄yetsca tescama obaná cuaftsemncá? ¡Ndoñe, ndegombre ndoñe! Chē bacna soyēnga jamama juabnēnga atše bomna causa, chca átšeftaca tonjanopasá. Chē tšabá yomna sóyeca, chē bacna soyēnga jamama juabnēnga tmonjanma atše chašotsemna n̄yetsca tescama castiganá jtsemnama. Chca chē juabnēngaca tonjanopasá, entšanga jobenayama jtsetatšēmbuama ndayá yomna bacna soye jamana; y chē mando, bacna soye jamama ndoñe yondmēna ca jtsichámuana causa, n̄yetsca entšanga mondobena jin̄yana can̄ye bacna soye, mo can̄ye puerte bēts bacna soycá.

14 Bēnga mondētatšēmbó chē ley Bēngbe Bētsabe ley yomnama, pero atšna n̄ye can̄ye entšá sēndmēna, can̄ya n̄yets tempo n̄ye bacna soyēnga jamama juabnēngaca mandaná. 15 Ndegombre ndoñe quešnátēsertana ntšamo sēntsamcá, er ndoñe ntsamana ndayá jamama stsebošcá, pero aiñe jtsamana ndayá jamama ndoñe šontsogustancá. 16 Pero chē atšbe ainaniñe stsejuabná ndoñe tšabá tontsemna soye stsamēse, ndayama leyiñe iuayana ndoñe candmēna ntsamana ca, chca atše jtsin̄yan̄yayana chē ley ndegombre tšabe soye yomnama. 17 Chcasna, atše ya ndoñe ntsemnana chē chca tojtsamá, ndayá chē bacna soye jamama atšbe ainaniñe yomna juabnēnga jtsamana atše chca jamama. 18 Atše sēndētatšēmbó, atšbe ainaniñe tondaye yontsemna ntšamo tšabá yomncá atše jamama. Masque sēntseboše ntšamo tšabá yomncá jamama, ndoñe quetsátobena chca jamama. 19 Atše ndoñe quetsátama chē tšabe soye ndayá jamama sēndbošcá, pero aiñe sēntsama chē bacna soye ndayá jamama ndoñe sēndbošcá. 20 Chē ndayá ndoñe jamama sēntsebošcá stsamēse, chca jtsayanana, atše ya ndoñe stsemna chē chca yojtsamá, sinó chē bacna soye jamama atšbe ainaniñe yomna juabnēnga chca yojtsama.

21 Chca, atše tijátatšēmbona ndayá átšeftaca yojtsopasánana; masque, ntšamo tšabá yomncá jamama stseboše, bacna juabnēnga sempre jtsemándayana atše bacna soye chaimama. 22 Atšbe ainanoca puerte sēntsoyejuá, Bēngbe Bētsábiocana yóbocana mandēngama. 23 Pero atše sēnjín̄yena in̄ye soye átšeftaca yojtsopasánama; chē bacna soye jamama atšbe ainaniñe yomna juabnēnga yojtsama atše ndoñe ntjamama ntšamo atšbe juabnoca yomna mo ndegombre soycá, mo chē bacna soyēngaca mandaná cuaftsemncá.

24 ¡Tša lastema atšbiama! Chē bacna soye jamama juabnēnga átšbeñe entsemánda, y entsama atše chašotsemna n̄yetsca tescama castiganá jtsemnama, mo Bēngbe Bētsabe bominyiñe n̄yetsca tescama obaná cuaftsemncá. ¿Nda nanjobenaye chentšana atše jatsbocama? 25 N̄ye Bēngbe Bētsá endmēna nda yobena atše jatsbocama, Bēngbe Utabná Jesucristbeyeca. Chábioye chama mochtsatschuanaye. Atšbe ainanoca atše aiñe sēntsejuabná chē ley puerte tšabe soye yomna ca, y jobedésama sēntseboše; pero chē bacna soye jamama átšbeñe yomna juabnēngaca, atše bacna soyēnga sēntsama, ntšamo chē juabnēnga šontsemandacá.

## 8

### *Ntšamo Bēngbe Bētsabe Espíritu yomandacá jtsiyenana*

1 Y chca, Bēngbe Bētsá ndoñe ntjayanana, Cristo Jesúseftaca cán̄yiñe mo can̄yacá imomnēnga, chēngbe bacna soyēngama n̄yetsca tescama castigánēnga jtsemnama yojtsamna ca. 2 Er, chē Uámana Espíritoftaca mandánēnga mondmēnayeca, Bēngbe Bētsá šojatsebácá, bēnga chē bacna soye jamama juabnēngaca mandánēnga ndētsemnama, y n̄yetsca tescama castigánēnga ndētsemnama, mo Bēngbe Bētsabe bominyiñe n̄yetsca tescama obanēnga cuaftsemncá. Chē Uámana Espíritu jamana bēnga ndegombre tšabe vida chamotsebomnama, cán̄yiñe mo can̄yacá Cristo Jesúseftaca jtsemnēse. 3 Bēngbe Bētsá



tojanma ndayá Moisesbe ley ndoñe tonjanobenacá, er entsanga mondoyena nýe ntšamo cachënga imobošcá, y nýe cánýenga ndoñe ntsoybenana jamana ntšamo tojtsamncá. Bëngbe Bëtsá tojánayana entsángbeñe bacna juabnëngbe mando jtsepochoçama ca, y chama chabe Uaquiñá tbojanichmó. Cha quem luaroye mo canýe entsacá tojánabo, canýe ainánaca, mo chë entsanga bacna soye amëngbe ainancá, pero ndocna te ni mo canýe bacna soye ndoñe tonjëftsema; y tojánabo, chábeyeca entsanga bacna soyëngama perdonánënga chamotsemnana. <sup>4</sup> Bëngbe Bëtsá chca tojanma, bënga chë mora oyenënga jtsamëse ntšamo chë Uámana Espíritu ainaniñe yomandacá y ndoñe nýe ntšamo bënga entsanga tmojtsebošcá, chamobenama tšabá jamana ntšamo chë leyiñe yomandancá, ntšamo šojtsamncá.

<sup>5</sup> Chë nýe cachënga tšabá jtsomñama cachëngbe juabnëngaca imoyenënga, nýe sempre jësejuabnayana bacna soyënga jtsamama, chca bacna juabnëngaca mandánënga; pero ntšamo chë Uámana Espíritu ainaniñe iuamëndacá oyenëngna, sempre jësejuabnayana tšabe soyënga jamama, ntšamo chë Uámana Espíritu yobošcá. <sup>6</sup> Ntšamo chë nýe cachá tšabá jtsomñama juabnëngaca mandaná oyenentsana jóboynana entsá nýetsca tescama castiganá chaotsemnana, mo Bëngbe Bëtsabe bominyiñe nýetsca tescama obaná cuaftsemncá; y ntšamo chë Uámana Espíritu tojtsemandacá oyenentsana jóboynana chë nýetsca tescama yomna tšabe vida jtsebomnana y ainaniñe tšabe ebionana. <sup>7</sup> Chë nýets tempo oyenënga nýe ntšamo tmojtsebošcá nýe cachënga tšabá jtsomñama jtsejuabnayëse, Bëngbe Bëtsabe uayayënga jtsemnana, er chënga ndoñe ntsamana ntšamo cha tojtsemëndacá, y chca jamama ndoñe ntsoybenana; <sup>8</sup> y chca, chë nýe chca bacna juabnëngaca oyenënga, ndoñe ntsoybenana jamana ntšamo Bëngbe Bëtsá tšabá tbojtsinýancá.

<sup>9</sup> Pero tsëngaftanga ndoñe quešmátiyena nýe cach tsëngaftanga tšabá jtsomñama cach tsëngaftangbe juabnëngaca, sinó šmojtсийena ntšamo chë Uámana Espíritu tsëngaftangbe ainaniñe cmamëndacá, er chë Uámana Espíritu sempre tsëngaftangbe ainaniñe iuétsemna. Nda ndoñe quem Cristbe Espíritu tondbomná, ndoñe Cristbia ntsemnana. <sup>10</sup> Pero Cristo sempre tsëngaftangbe ainantse vida totsóbomñëse, masque tsëngaftangbe cuerpënga yochjopochóca, quem luarentse entsanga bacna soyënga jtsamana causa, tsëngaftangbe espíritu nýets tempo vida echanjesóbomñe, er Bëngbe Bëtsá tojama tsëngaftanga chabe bominyiñe tšábënga chašmotsemnana. <sup>11</sup> Y Bëngbe Bëtsabe Espíritu, Jesús cháuatayenama tojamabe Espíritu, sempre tsëngaftangbe ainaniñe tojtsemnëse, Bëngbe Bëtsá, chë Cristo cháuatayenama tojamá, echanjama chë tsëngaftangbe yochjóyana cuerpo, cachiñe vida chaotsatsbomnana. Cha chca echanjama chabe Espíritoftaca, y mua sempre tsëngaftangbe ainaniñe iuétsemna.

<sup>12</sup> Chcasna, Jesucristbeyeca catšátanga, šontsamna jtsiyenana ntšamo chë Uámana Espíritu ainaniñe šuamëndacá; ndoñe quešnátamna jtsiyenana nýe bënga tšabá jtsomñama cabëngbe bacna juabnëngaca; <sup>13</sup> er nýe bënga tšabá jtsomñama cabëngbe bacna juabnëngaca šmojtсийenëse, castigánënga šmochántsemna, mo Bëngbe Bëtsabe bominyiñe obanënga cuaftsemncá; pero Uámana Espíritbeyeca, chca juabnëngaca nýetsca bacna soyënga jtsamana jtsajbanama šmojobenase, chë nýetsca tescama yomna tšabe vida šmochántsebomna.

<sup>14</sup> Ntšamo chë Uámana Espíritu yomandacá tmojtsamëngna, Bëngbe Bëtsabe básënga jtsemnana. <sup>15</sup> Er Bëngbe Bëtsá ndoñe tonjama bënga ainaniñe canýe espíritu chamotsebomnana, mo nýe ínýabiama nýets tempo oservenëngcá chašotsamëndama, y chca cha chaoma bënga cachiñe chamotsëuatjama; sinó chë Bëngbe Bëtsá tojama bënga chamotsebomnana Espíritu jamana bënga Bëngbe Bëtsabe básënga chamotsemnana, y chë Espíritu endama “Atšbe Taitá ca” bënga Bëngbe Bëtsá chamotsechëmbuanama. <sup>16</sup> Y chë Uámana Espíritu y bëngbe espíritu canýe ora jayanana bënga Bëngbe Bëtsabe básënga imomna ca. <sup>17</sup> Y Bëngbe Bëtsabe básënga mondménayeca, bëngnaca mochanjóyëngacñe ndayá cha chabe básënga jatšatayama tojašebuachenacá; bënga y Cristo cánýiñe chë

soyënga mochanjóyëngacñe, er bënga inye soyënguiñe tmojasufrí cachcá ntšamo Cristo tojansufricá, Bëngbe Bëtsá uámanënga y bëtsëtsanga chásuabiamama, ntšamo cach Cristo yomncá.

*Bëngbe Bëtsá bëtsëtsanga y uámanënga šochjábiama*

<sup>18</sup> Atše ndegombre sëndétatsëmbo, ntšamo quem tempo bënga imosufrincá, puerte batšatema yomna chë bëngbe tšabiamama uámanana y buashinÿinÿanana Bëngbe Bëtsá šochjínÿanÿiyama. <sup>19</sup> Lempe ntšamo Bëngbe Bëtsá tojamcá endmëna mo tša cuaftsobatomancá, chaobuache chë Bëngbe Bëtsá ntšamo chabe básenga imomnama jinÿanÿiyama ora. <sup>20</sup> Er lempe ntšamo Bëngbe Bëtsá tojamcá, mora ndoñe yontsoservena ntšamo chaotsemnama cha tojanjuabocá. Chca tojanopasá, ndoñe chë lempe ntšamo cha tojanmcá chca chaotsemnama tojánbošenayeca, ndayá cabá chë soyënga tojanmentšana, Adán bacna soye tojanmentšana, Bëngbe Bëtsá tojanjuabó ntšamo cha tojanmcá joserviama ndoñe ndayama ntšamo cha tempo tojanjuabocá. Pero lempe ntšamo Bëngbe Bëtsá tojanmcá entsemna mo cuaftsobatomancá canye te, ndëmua ora chë soyënga chaoservema cha yochjamama jtsetatsëmbëse, ntšamo quem luare jobojátšama ora chama cha yojanjuabnacá; <sup>21</sup> Bëngbe Bëtsá canye te yochjama lempe ya ndoñe más chaondetsopochocama. Y chora, ntšamo Bëngbe Bëtsá yochjamcá chabe básenga chamotsemnama, lempe ntšamo cha yojanjuabnacá, chabe uámanana y buashinÿinÿanana jtsebomnama, cachcá yochjama lempe chë cha tojanma soyëngaca.

<sup>22</sup> Er bënga mondétatsëmbo lempe ntšamo Bëngbe Bëtsá tojanmcá mëntscoñama yomna mo canye shembása šešona jtsebomnama ora tbojtsetsetšama tojtsobësnacá; er lempe ntšamo cha tojanmcá entsemna mo tša cuaftsebošcá Bëngbe Bëtsá chaomama, chë soyënga chaoservema ndayama cha tempo tojanjuabocá. <sup>23</sup> Pero ndoñe nÿe chë lempe ntšamo Bëngbe Bëtsá tojanmcá yojtsemna mo chë shembasacá, sinó bëngnaca; y bënga ainaniñe mondbomna chë Uámana Espíritu, y chë soye endmëna ndayá natšana bënga tmojanóyëngacñe, chë Bëngbe Bëtsá bëtscá soyënga šochjátšatayentšana; bënga bëngbe ainanoca tša jesobësnayana, bënga chabe básenga chamotsemnama Bëngbe Bëtsá chaomama mondobátmanëntscuana, y chca, Bëngbe Bëtsá chaoma bënga ndocna te ndopochócama cuerpënga chamotsebomnama. <sup>24</sup> Bënga, Bëngbe Bëtsábeñe jtsošbuáchiyëse monjobátmana ntšamo cha tojanayancá chaomama, y chíyeca cha bënga šojatsebacá; pero ndayama tmobatmancá, ya tojtsëchnëjuanama bënga tmojtsonÿase, chora chama ya ndoñe ntjátobatmanëngana. Er ndocná jatobátmanana chë ndayá jinÿama ya tojobenacá. <sup>25</sup> Pero ndayama bënga tmobatmancá, cabá ndoñe jinÿama tmontsobena soye tojtsemnëse, bënga jtsamnana Bëngbe Bëtsábeñe jtsobátmanana, uantadënga jtsemnëse, ntšamo tojayancá Bëngbe Bëtsá chaomëntscuana.

<sup>26</sup> Uámana Espíritnaca bënga šochandbëtsëjabuachana, er bënga ainaniñe ndoñe corente ntsošbuáchiyana. Bënga ndoñe quemuátstatsëmbo Bëngbe Bëtsáftaca jencuéntana ntšamo ndegombre tšabá yomncá; però cach Espíritu Bëngbe Bëtsábioye bëngbiamama jtsotjanañana, mo chca ora chabe ainanoca tša cuaftsobësnacá; y ndayá chca ora tbojtsotjanañamna, bënga ndoñe ntjobenayana bëngbe palábraca chama jóyebuambayama. <sup>27</sup> Y Bëngbe Bëtsana, ntšamo entšanga ainanoca tmojtsebošcá yonÿá, y ntšamo chë Espíritu jayanama tojtsebošcá yotátšëmbo, er chë Espíritu chabe entšangbiamama ibotjanañe, ntšamo Bëngbe Bëtsá yobošcá.

*Bënga ayëñjanayëngama más tmojábocana*

<sup>28</sup> Y bënga mondétatsëmbo, Bëngbe Bëtsá nÿetsca soyënguiñe inétsama cha imobobonshánëngbe tšabiamama, ndëmuanÿënga cha tojáchembo chabe entšanga chamotsemnama, ntšamo cha jamama yojanjuabnacá. <sup>29</sup> Jesucrístbeñe imošbuachëngbiamna, Bëngbe Bëtsá quem luare tojanma orscana yojanjuabná y chënga tojanabacacá chca chamotsemnama, y chë tempscana tojaninÿaná chënga chabe Uaquiñacá chamotsemnama;

chca, chabe Uaquiñá chë bëtscá catšátangbeñe chë natsaná chaotsemnana. <sup>30</sup> Y chë Bëngbe Bëtsá chca tojánabacacangnaca, tojánachembo chabe entšanga chamotsemnana; chëngbiana tojanma chabe bominyiñe tšábenga chamotsemnana, y chëngbiámnaca yochjama chabe uámanana y obenanentšana chamotsebomnana.

<sup>31</sup> Y asna, ¿chë soyëngama ntšamo mochjayana? Co Bëngbe Bëtsá bëngaftaca tojtsemnëse, bënga jáyënjana ndocná queochatobenaye ca. <sup>32</sup> Cha tondaye tonjanma chabe Uaquiñá jasúfriama ndoñe chabondëtsemnana, sinó tojanalesenciá entšanga chamóba, nyetsca bëngbe tšabiama. Bëngbe Bëtsá chabe Uaquiñáftaca chca tojanmëse, ndegombre Bëngbe Bëtsá lempe šochanjátšataye. <sup>33</sup> ¿Nda nanjobenaye jayanama chë Bëngbe Bëtsá tojábacacanga bacna soyënga tmojama y castigánënga chamotsemna ca? Ndocná; er cach Bëngbe Bëtsá endmëna nda tojayana bënga chabe bominyiñe tšábenga imomna ca. <sup>34</sup> Y asna, ¿nda nanjobenaye jayanama bënga castigánënga jtsemnana šojtsamna ca? ¿Cristo Jesús cha yojtsemna? Ndoñe. Cristo, nda bëngbiana tojanóbana, pero cabá más, ndabiama Bëngbe Bëtsá tojanma cháuatayenama, y mora Bëngbe Bëtsabe catšbioica yojtsetbemana, jamándama y puerte bëtscá chentše jtsemnana; y choca, chánaca bëngbiana Bëngbe Bëtsábioye ibotjanañe. <sup>35</sup> ¿Ndayá nanjobenaye Crístbentšana, chë tša šondababuanyëshanábentšana bënga jtsajuánayana? ¿Padecena soyënguiñe jtsemnana, tša jtsetsetšana, bënga chamosufrima inyënga tmojtsama ora, tondaye saná shëntsana ora, tondaye entšayá tmontsábomna ora, o resjo bëngbiana tojtsemna ora, o bënga jtsëbáyama inyënga tmojtseboše ora? <sup>36</sup> Ntšamo Bëngbe Bëtsabe uabemana palabrënguiñe endayancá, canyë entšá Bëngbe Bëtsábioye ibojauyana ora:

Ache causa entšanga cada te šontsëtsëtsná bënga jtsëbáyama ca;

entšanga bëngbioye nyë ntšámnaca jtsaborlánana;

bëngaftaca jamana mo chë jobáyama oveshëngaftaca mondbetsamcá ca.

<sup>37</sup> Pero ndoñe; nyetsca chë soyënguentsana bëngna ayënjana yëngama más tmonjábocana, cha bënga šuababuányëshanayeca. <sup>38</sup> Er atše tšabá sëndëtatsëmbo tondaye yondobena, bënga Bëngbe Bëtsábentšana, chë tša šondababuanyëshanábentšana jtsajuánayana: masque ainënga o obanënga tmojtsemna; ni angelënga, ni amëndayënga chca jamama quemátobena; ni chë mora yojtsëchnëjuana soyënga, ni chë más chcoye yochjopása soyënga; ni ndocna obenana cach ndoñe; <sup>39</sup> ndocna quem luarentša tsbanánoca soye, ni quem luarentša tajsoica soye; ni ndocna inyë soye ntšamo Bëngbe Bëtsá tojamcá, quenátobena chca bënga jtsajuánayama. ¡Ndocna soye quenátobena bënga Bëngbe Bëtsábentšana, chë bënga šondababuanyëshanábentšana jtsajuánayana, chë Cristo Jesús Bëngbe Utabnáftaca Bëngbe Bëtsá šojanýanyé bonshánentšana!

## 9

### *Bëngbe Bëtsá Israeloca entšanga tojabacacá, uámanënga chamotsemnana*

<sup>1</sup> Atše, Crísoftaca cányiñe mo canyácá quetsomñecana, ntšamo sentsichamcá ndegombre endmëna; atše ndoñe quetsátsbostero. Atšbe ainanoca juabnënga, Uámana Espíritbeyeca jtsemandánëse, chë šmonybëuyana tšabá o ndoñe tšabá tijamama, šmontsatsëtsná atše ndoñe stsebosterama. <sup>2</sup> Ndegombre, atše puerte ngménaca atšbe entšangbiana, chë Israeloquëngbiana sëntsemna y atšbe ainana tša šontsetsetše, chënga Jesucristbeñe jtsošbuáchiyama ndoñe quemátsboše causa. <sup>3</sup> Tšabá tojtsemnëse, atše stjobenaye jtsebošana cach atše Bëngbe Bëtsábeyeca nyetsca tescama castiganá y Crístbentšana luaroca jtsemnana, atšbe entšanga, chë cach atšcá buiñe bomna entšanga jujabuáchama. <sup>4</sup> Chënga mondmëna chë Israeloca entšanga, chë Bëngbe Bëtsabe bocacana entšanga. Bëngbe Bëtsá chënga chabe basengcá tojánabiama y chë tša bëtscá y uamaná cha yomnana chënga tojaninýanyé. Bëngbe Bëtsá ba soye chënga tojanabuayená ndayá cha chëngbiana yojánboše y ndayá chëngbiana jamama, y chë ley chëngbe cucuatšíñe tojanáboshjona. Chënga monjántatsëmbo ntšamo Bëngbe Bëtsábioye ndegombre jadórana, y chënga mondbomna

chë Bëngbe Bëtsabe šbuachenánana: chënga cha játsebacana. <sup>5</sup> Chënga mondmëna chë bëngbe tempsca uámana bëts taitangbentsánënga, y Crístnaca mo canye entsacá, mo canye Israeloca entsangbentsacá tojánabo; y cha endmëna Bëngbe Bëtsá, nyetsca soyënguiñe mandayá. Nyetsca entsanga nyets tempo cha chamotsatschuaná. Chca chaotsemna.

<sup>6</sup> Atše ndoñe quetsátichamo, ndayá jamama tojanašebuachenacá ndoñe Bëngbe Bëtsá tonjama ca; er, nyetsca Israeloca entsangbentsënga ndoñe Bëngbe Bëtsabe ndegombre entsanga quemátsmëna. <sup>7</sup> Ni nyetsca Abrahámbentsana entsanga, ndoñe chabe ndegombre básenga quemátsmëna; er Bëngbe Bëtsá Abrahámbioye tbojaniyana: “Chë ácbentsana entsanga nye Isaábentsana mochanjabo ca.” <sup>8</sup> Chca entsayana, bëngna ndoñe šontsamna jtsejuabnayana Abrahámbentsana nyetsca entsangbiama mo Bëngbe Bëtsabe basengcá; inyetsá, nye chë Bëngbe Bëtsá tbojanšbuachenáyeca Abraham yojánabamna básengbiama cocayé entsemna jtsejuabnayana, Abrahámbentsana ndegombre entsanga bëtsemnama. <sup>9</sup> Er mëntsá endmëna ntšamo Bëngbe Bëtsá tojánayana, Abrahámbioye tbojanšbuachená ora: “Camëntša tempo entsba uata chanjésabo, y Sara canye šešona bochantsebmna ca.”

<sup>10</sup> Pero nye nyetsá ndoñe quenátsmëna. Chë Rebecbe uta básatna canye taitá ibn-abomna, bëngbe tempsca bëts taitá Isaac. <sup>11-12</sup> Bëngbe Bëtsá, Rebécbioye tbojaniyana: “Ache mayor uaquiñá, ache ngomënche uaquiñábioye bochanjasérvia ca.” Cha chca tojánayana jinýinyiyama chë básatbentsana canya cha tbojánbocacama, Jacob, y ndoñe chë inye basa, Esaú, chca jamama tempo cha tojanjuabóyeca. Rebécbioye chca tbojaniyana chë básata cabá ndonýna ora, y ni canye basa cabá ndocna soye ndama ora. Y chca, ntšamo tojanopasacana, tojanopasá chë básatbentsana canya y ndoñe chë inya chca chaotsemnama Bëngbe Bëtsá tbojanábuayanayeca, y ndoñe ndayá chata tbojanmama. <sup>13</sup> Ntšamo Bëngbe Bëtsá chabe uabemana palabrenguiñe tojanayancá: “Jacob sënjánbobonshana, y Esaú sënjanáboyënja ca.”

<sup>14</sup> Y asna, ¿ntšamo mochjayana? ¿Bëngbe Bëtsá ndoñe cachcá nyetscángaftaca endëtsemna ca? ¡Ndoñe, ndegombre ndoñe! <sup>15</sup> Er Bëngbe Bëtsá Moisésbioye tbojaniyana: Atše šochanjóngmia nda chaitsebošabiamá, y nda chaitsebošá chanjalastéma ca.

<sup>16</sup> Y chca, Bëngbe Bëtsá canye entsá jabocacayana, ndoñe ndayá chë entsá tojtsebošama o tojamama, ndayá Bëngbe Bëtsá tbojalastemama. <sup>17</sup> Er Bëngbe Bëtsabe uabemana palabrenguiñe, Faraón chë Egiptoca réybioye cha tbojaniyana: “Atše rey tcbonjábema, tša bëtscá atšbe obenana yomnama nyetscanga ácheñe chayinýanyëma, y nyets luarentša entsanga atšbiama chamotatsšëmbonama ca.” <sup>18</sup> Y chca, Bëngbe Bëtsá jalastémama nda tojtsebošábioye, y nda tojtsebošábioye jalesénciana chabiamá nduauenaná chaotsomñama.

<sup>19</sup> Pero ndánaca tsëngaftanguentsá suatjatjaye: “Bëngbe Bëtsá chca tojtsamëse, ¿ntšamo cha nantsobena jayanana canye entsá bacna soye tojama ca? ¿Nda nanjobenaye chë ndayá Bëngbe Bëtsá tojtsebošama corente contra jtsemnana?” <sup>20</sup> Pero, nye entsá quecotsemñecá, ¿ntšamo catjobenaye tša uamaná comna ca jtsejuabnayana, Bëngbe Bëtsá jatstjanayama ndáyeca canye soye chca yojtsama ca? ¿Chë pormana soye chë chca tojamábioye buanjauyana: “¿ndáyeca chca šcojama ca?”? <sup>21</sup> Chë fshantse soyënga pormayá jtsobenana canye fshantsentsana jamana, canye matbaja uámana tescama, y inýajna cada te chaotsoservénama. Cachcá, Bëngbe Bëtsá jtsobenana jamana ntšamo cha tojtsebošcá, ndayá cha tojama sóyeca.

<sup>22</sup> Bëngbe Bëtsá yojáboše jinýanýiyama entsángaftaca tbojánatnama, chëngbe bacna soyëngama; y yojáboše cha puerte obená yomnama jinýanýiyama. Chíyeca, chënga tša yojanëuantana, chënga chë ndëmuanýengbiama Bëngbe Bëtsá yochjánayana chëngbe bacna soyëngama castigánënga jtsemnama yojánamna ca, chë ndëmuanýenga jtsapochócama Bëngbe Bëtsá yojtsanprontana. <sup>23</sup> Y chánaca yojáboše jinýanýiyama cha puerte uamaná y bëtsá yomnama. Cha tojama, bënga chë ndëmuanýenga cha šojanalastemá, chabe



obenanentšana y uámananentšana chamotsebomnama; y cha tempo chca tojanjuabó bēnga uámanēnga y bētsētsanga jábiamama. <sup>24</sup> Bēnga mondmēna chē ndēmuanyēnga Bēngbe Bētsá chama šojánachembo, ínŷengna judío entšanguentšana, y ínŷengna ndoñe judiēngbentšana. <sup>25</sup> Ntšamo chabe uabemana palabrēnguiñe, Oséasbe librēsañe Bēngbe Bētsá tojanayancá:

Entšanga ndoñe átšbenga mondmēnēnga, chēnga “atšbe entšanga ca” chantsēbobuatma; y canye luarentša entšanga ndoñe sēnjánababuanyēshanēnga, chēngna “atšbe bonshánēnga ca” chantsēbobuatma.

<sup>26</sup> Y cach luare ndayentše Bēngbe Bētsá tojánayana: “Tšēngaftanga atšbe entšanga ndoñe quešmátsmēna ca”,

cachentše Bēngbe Bētsá ainá chēnga echanjáuyana “atšbe básenga ca”.

<sup>27</sup> Israeloca entšangbiamá, Isaías jabuachana tojánayana:

Masque Israeloca entšanga puerte banga chamotsemna, nŷa mo chē mar béjayoca chēnŷañe cascajá,

Bēngbe Bētsá nŷe báseftanga chentšana echanjátsebacaye;

<sup>28</sup> er, ndoñe bēn y Bēngbe Utabná canye y nŷetsca tescama echanjayana,

nŷets quem luarentša entšangbiamá ndayá chēnga tmojamama tšabá o ndoñe tšabá bétsemnama,

y chēngaftaca echanjama ntšamo chaojayancá ca —cha tojánayana.

<sup>29</sup> Ntšamo Isaías tojanayancá, Bēngbe Bētsá Israeloca entšangaftaca ntšamo jamama tojanoyebuambá ora:

Bēngbe Utabná, nŷets obenana bomná,

ínŷengna bēnga jtsapochócama cha tojanalesenciá ora,

báseftanga bēngbe entšanguentšēnga ainēnga chamotsomñama ndoñe matēnjanmēse,

bēnga mora pochocánēnga mamojtsemna, mo chē Sodoma y Gomorra pueblēngoca entšangcá ca,

cha nŷetscanga y nŷetsca tescama tojtsanapochócaye ca.

### *Israeloca entšanga y chē tšabe noticiēnga*

<sup>30</sup> Chcasna, mora mēntšá mochjayana: ndoñe judiēnga tondaye monjánama Bēngbe Bētsabe bominiñe tšábenga jtsemnama, pero cha tojanma chēnga chabe bominiñe tšábenga chamotsemnama, chēnga chábeñe imojtsošbuáchiyama. <sup>31</sup> Pero, Israeloca entšanga imojánboše Bēngbe Bētsabe bominiñe tšábenga jtsemnama, ntšamo chē leyine iuayancá jtsamēse; pero ndoñe chca tmonjanobená. <sup>32</sup> ¿Y ndáyeca chca? Co chē Bēngbe Bētsabe bominiñe tšábenga jtsemnama, chábeñe jtsošbuáchiyēse, chēnga tondaye monjánama causa chca, sinó chca jtsemnama imojánboše nŷe ntšamo leyine iuayancá jtsamēse. Y chca, chēngna Jesús tmojtsanaboté, ntšamo chē Bēngbe Bētsabe uabemana palabrēnguiñe chē tmojtsanábotengbiamá endayancá, chēngbiamá cha yomna mo chē ndētšbé ndayiñe chēnga jtsojestjiamcá ca. <sup>33</sup> Bēngbe Bētsabe uabemana palabrēnguiñe cha chca tojánayana:

Smochjinŷe, atše sēnjama Jerusalenentše canŷa chaotsemna, y cha endmēna mo ndētšbecá ndayentše chēnga mochjojestje,

y canye peñescá ndayēse yochjama chēnga chamotsótsatsama;

pero nda chábeñe tojtsosbuaché, ndocna te nŷe bonamente queochátobatmana ca.

## 10

<sup>1</sup> Jesucristbeyeca catšátanga, atše nŷets ainánaca sēntseboše y Bēngbe Bētsá sēntseimpadana, cha Israeloca entšanga cháuatsebacama. <sup>2</sup> Atše sēndétatšēmbó y sēntsobena chēngbiamá jayanama, chēnga puerte mondboše Bēngbe Bētsá jaserviama, pero ntšamo chēnga yojtsēsertancá, ntšamo Bēngbe Bētsá jaserviama yojtsamnamna, ndoñe quenátsmēna ntšamo ndegombre yomncá. <sup>3</sup> Chēnga ndoñe tonjanēsertá

ntšamo Bëngbe Bëtsá inétsama entšanga chabe bominiñiñe tšábenga chamotsemnana, y cachënga tmojánguango ntšamo jamëse jobenayama Bëngbe Bëtsabe bominiñiñe tšábenga jtsemnana; pero ndoñe chca tmonjanobená, chë entšanga chabe bominiñiñe tšábenga chamotsemnana ntšamo Bëngbe Bëtsá inetsamcá ainánaca ntjoyëngacñëcá. <sup>4</sup> Er Cristo tojama entšanga ndoñe chamondëtsama ntšamo leyiñe iuayancá, Bëngbe Bëtsabe bominiñiñe tšábenga jtsemnana, chca, chënga chamobenama chabe bominiñiñe tšábenga jtsemnana, Crístbeñe jtsošbuáchiyëse.

<sup>5</sup> Chë Bëngbe Bëtsabe bominiñiñe tšábenga jtsemnana bošëngbiama, ntšamo leyiñe iuayancá jtsamëse, Moisés mëntšá tojánayana, chëngbiama tojanábema ora: “Nda tojtsama nyetsca mandënga ntšamo leyënguiñe endayancá, tšabe vida echántsebomna, nyets tempo chë leyëngaca mandaná ca.” <sup>6</sup> Mëntšá endmëna ntšamo Bëngbe Bëtsabe uabemana palabrënguiñe iuayana, entšanga chabe bominiñiñe tšábenga chamotsemnana ntšamo cha inétsamama, Jesucristbeñe jtsošbuáchiyëse: “Ndoñe cattsetjanaye: ‘¿Nda celoye yochjátsjua ca?’ (chca endmëna ndayá Cristo quem luaroye chaotsmama); <sup>7</sup> o, ‘¿Chë obanënga imomna luaroye yochjátsma ca?’ (chca endmëna ndayá Cristo chë obanënga imomna luarentšana chaotjsuama).” <sup>8</sup> Ntšamo Bëngbe Bëtsabe uabemana palabrënguiñe iuayancá mëntšá endmëna: “Tšëngaftanga paselo šmontsobena ntšamo Bëngbe Bëtsá tojabuayenacá jouenama, tšëngaftanga ya chama palabrëngaca šmojoyebuambá y tšëngaftangbe ainaniñe chama šmojtsejuabná.” Chë buayenánana endmëna ndayá bënga ftsabuayiyacá, y chiñe endayana Jesucristbeñe jtsošbuáchiyama šojtsamna ca. <sup>9</sup> Chë buayenana soyënguiñe endayana, Jesús ndegombre Bëngbe Utabná yomna ca aca tcojayanëse, y Jesucristo cháuatayenama Bëngbe Bëtsá tojanmama, nyets ainánaca tcojtsošbuáchese, Bëngbe Bëtsá cmochjatsbocá ca. <sup>10</sup> Er ainanoca bënga Jesucristbeñe jtsošbuáchiyana y Bëngbe Bëtsá jamana cachabe bominiñiñe tšábenga chamotsemnana; palabrëngaca bënga jinñanyiyana ndegombre Jesucristbeñe imojtsošbuáchema, y Bëngbe Bëtsá bënga játsebacana.

<sup>11</sup> Er Bëngbe Bëtsabe uabemana palabrënguiñe mëntšá endayana: “Nda Bëngbe Bëtsabeñe tojtsošbuaché, ndocna te nyë bonamente queochátobatmana ca.” <sup>12</sup> Judiënga y ndoñe judiënga atsebácanënga mondmëna cach sóyeca, er canye Utabná nyetscangbe Utabná endmëna, y cha tmojtsotsëmbuanëngbiama, cha bëtscá jtsamana. <sup>13</sup> Er Bëngbe Bëtsabe uabemana palabrënguiñe mëntšá endayana: “Ndánaca Bëngbe Utabná tbojtsotsëmbuanábioye, cha bochanjatsbocá ca.” <sup>14</sup> Pero, ¿ntšamo cha mochjótšëmbona, chábeñe ndoñe tmontsošbuáchese? ¿Y ntšamo chábeñe mochtsošbuáchiye, chabiama jóyebuambayama ndoñe tmonjouenëse? ¿Y ntšamo chabiama mochjouena, chabe buayenana soyënga chënga jáuyanama ndocná tontsemnëse? <sup>15</sup> ¿Y ntšamo chabe buayenánana mochtsabuátambaye, chëngbioye jíchamuama ndocná tontsemnëse? Ntšamo Bëngbe Bëtsabe uabemana palabrënguiñe endayancá: “¡Tša tšabá chë buayenánana abuatambayënga tmojáshjajna ora ca!”

<sup>16</sup> Pero nyetscanga chë tšabe noticiënga ndoñe ntjoyeunayana. Cach Isaías mëntšá tojánayana: “Utabná, ¿nda chë mondabuayiyá soyënguiñe yojtsošbuaché ca?” <sup>17</sup> Chcasna, chë tšabe noticiënga jouenëse, entšanga jobenayana Jesucristbeñe jtsošbuáchiyana; y nda Cristbiama tojtsabuayiyase, entšanga chabe buayenánana jouenana.

<sup>18</sup> Pero atše šcotjá: ¿ndegombre nandmëna judiënga chë buayenánana ndoñe tmonjanuena ca? ¡Aíñe, chënga aíñe tmonjanuena! Ntšamo Bëngbe Bëtsabe uabemana palabrënguiñe endayancá, chë Bëngbe Bëtsabe buayenana soyëngama oyebuambnayëngbiama:

Chëngbe oyebuambnayana nyets quem luariñe tojóshjango,

y chëngbe palabrënga nyets luarënguentša entšangbenache tojuáshana ca.

<sup>19</sup> Pero cachiñe šcotjá: ¿Israeloca entšanga chë buayenánana ndoñe tonjanësertá ca? Natsana, Moisés mëntšá tojánayana, chë ndoñe judiënga Jesucristbeñe tmojtsošbuaché ora, ntšamo chë judiënga mochtsanjuabnayama tojanoyebuambá ora:

Atše, Bëngbe Bëtsá, chanjama, ndayá chë ndoñe judiënga chamojashjache soyëngama tšëngaftanga chašmotsíyentsbuašama, chënga chë ndoñe monjamna mo tšëngaftangcá atšbe entšanga.

Atše chca chanjama chëngaftaca, chënga chë tempo Bëngbe Bëtsabe soyëngama ndoñe tonjanësertá ca.

<sup>20</sup> Isaíasnaca, Bëngbe Bëtsabiana tojanoyebuambá ora, puerte añémoca tojánayana:

Chë atše ndoñe šmondënguanga, šmonjínÿena;

y chë atšbiana ndoñe mondënotíciangbioye sënjenonÿinÿé ca.

<sup>21</sup> Pero Israeloca entšangbiana mëntšá tojánayana:

Nÿets tempo atše tša sënjánama, chënga átšeftaca tšabá tempcá chamotsatsmënema, pero chënga ndoñe chemátanbošena jouenama, y atšbe contra monjëtsemna ca.

## 11

### *Bëngbe Bëtsá, Israeloca entšangbiana tšabe juabna yobomnama tojinÿanÿé*

<sup>1</sup> Y as mora šcotjá: ¿Bëngbe Bëtsá chabe entšanga tojtsanëbaté? ¡Ndoñe, ndegombre ndoñe! Cach atše canÿe Israelocá sëndmëna, Abrahámbeñe entšá y Benjaminbe bëts pamillentšana entšá. <sup>2</sup> Bëngbe Bëtsá chabe entšanga ndoñe tonjubaté, chë temp-scana tojánabacacanga. Tšëngaftanga šmondëtatšëmbo ntšamo Bëngbe Bëtsabe uabemana palabrënguiñe endayancá, Bëngbe Bëtsabe juabna oyebuambnayá Elías, Israeloca entšangbe contra Bëngbe Bëtsábioye cha ibojanatsëtsná ora: <sup>3</sup> “Bëngbe Utabná, acbe juabna oyebuambnayënga tmojtšëbaye y acbiana pormana altarënga tmojtsepochochá; nÿe atše vídaca tijoquedá, y chënga montseboše átšnaca jóbama ca.” <sup>4</sup> Y mëntšá Bëngbe Bëtsá tbojanjuá: “Atše canÿsëfta uaranga boyabásenga atšbiana sënjacuedá, Baal ndoñe tmonjadoranga, ndayá entšanga tmojobopormá y imojtsejuabná canÿe dios yomna ca.” <sup>5</sup> Mórncaca cachcá entsemna, judiënguëntše báseftanga monduájamna Jesucristbeñe ošbuáchiyënga, ndëmuanÿënga Bëngbe Bëtsá tojabacacá, cha chëngbiana tšabe juabna bómnyeca. <sup>6</sup> Bëngbe Bëtsá entšanga jabacacayana chëngbiana tšabe juabna bómnyeca; y ndoñe chca ntjamana ndayá entšanga tmojamama. Er ndayá tmojamama Bëngbe Bëtsá entšanga tojabacacase, cha nanjínÿanÿiye cha chca inétsama, ndoñe nÿe chëngbiana tšabe juabna bómnyeca.

<sup>7</sup> ¿Y asna? Israeloca entšanga ndoñe chemátaninÿena ntšamo Bëngbe Bëtsabe bominiñe tšábenga jtsemnana, pero chënguëntšënga básefta bocacánënga aiñe tmojanobená. Bëngbe Bëtsá tojanalesenciá chë ínÿënga Israeloquënguëntšana chabe buayenana soyënga ainaniñe ndoñe chamondóyëngacñama; <sup>8</sup> ntšamo Bëngbe Bëtsabe uabemana palabrënguiñe endayancá: “Bëngbe Bëtsá tojama chënga chabe soyëngama jósertama ndoñe chamondëtsobenama, y mëntscañama chënga ndoñe quemátobena chabe soyëngama ni jinÿana ni josértana, mo nduabínÿnënga o nduauenanënga cuaftsemnëngcá ca.” <sup>9</sup> Davídnaca chëngbiana mëntšá tojánayana:

Mo chë entšanga canÿe fiestentše oboyejuayënga, chëngbe uayayëngbeyeca nÿe ndeolpe ishëchenëngcá,

y mo chë bayëngbiana uachmaniñe ishëchenëngcá, chënga mal chamopasama chao-mama Bëngbe Bëtsá sëntseimpadana, mo nda ndëtsbeñe cuaftsojestjca.

Chca Bëngbe Bëtsá chaoma, chëngbe bacna soyëngama;

y cha cháuyana chënga puerte castigánënga jtsemnana yojtsamna ca, bacna soyënga tmojama causa;

<sup>10</sup> Bëngbe Bëtsá chaoma ntšamo mochjapásama chënga ndoñe chamondobená jtsetatšëmbuana,

y chaoma puerte chamosufrima, nyets tempo padecena soyënguifne jtsiyenëse ca –cha tojánayana.

### *Bëngbe Bëtsá ndoñe judiënga tojatsebacá*

<sup>11</sup> As mora şcotjá: ¿Israeloca entşanga Bëngbe Bëtsá ndoñe tmonjanoyeuná ora, cha tojánayana chënga nyetsca tescama castigánënga jtsemnana yojtsamna ca, ndocna inye soye chëngbiamá ntsemncá? ¿Chëngbiamá yojamna mo chë ndëtsbeñe jójëstjiana y jtëtsbanama ndoñe más ntjobenayancá? ¡Ndoñe, ndegombre ndoñe! Chca ndoñe quenátsmëna. Chënga Bëngbe Bëtsá ndoñe chematanoyeuná causa, ndoñe judiënga tmonjántatsëmbona ndayá bëtsemnana Bëngbe Bëtsábeyeca atsbocaná jtsemnana; y chë causa, mora, judiënga, ndayá chë ndoñe judiënga Bëngbe Bëtsábentşana tmojoshachiñcá montsüyentşbuaşe. <sup>12</sup> Judiënga bacna soyënga tmojanma causa, inye entşanga quem luarentşe tmojobená ba tşabe soyënga jtsebomnama. Chë judiënga tmonjanorrebajá causa, chë ndoñe judiënga ba tşabe bendicionënga Bëngbe Bëtsábentşana tmojoshachiñe. Y chca, chë bëtscá judiënga Bëngbe Bëtsá jätsebacama, chënga atsebácanënga chamojtsemna ora, más bëtscá tşabe bendicionënga Bëngbe Bëtsábentşana nyetsca entşangbiamá echántsemna.

<sup>13</sup> Ntşamo mora chanjayancá, tşëngaftanga ndoñe judiëngbiamá entsemna. Bëngbe Bëtsá şojichmó chabe soyëngama chë ndoñe judiënga jábuayenama; atşe sëntsejuabná puerte uámana trabajo stsebomna ca. <sup>14</sup> Atşe sëntsobátmana, quem trabájoca atşe jobenayana jamama chë cach atşcá buifne bomna entşanguentşënga, ndayá chë ndoñe judiënga Bëngbe Bëtsábentşana tmojoshachiñcá chamotsüyentşbuaşe, y chca, ndayá tijamama, Bëngbe Bëtsá chënguentşana báseftanga cháuatsebacama. <sup>15</sup> Er chë judiënga Bëngbe Bëtsá tojtsanëbaté ora, cha tojanma inye entşanga quem luarentşe cháftaca tempcá tşabá chamotsatsmënama; y chënga cha chamojoyeuná ora, corente tşabá echántsemna, nya chënga mo obanënga cuabmëncá y cuaftsatayanëngcá. <sup>16</sup> Nda canye arninýentşana chë natsana tandëşe Bëngbe Bëtsabiamá joserviama yojtsemna ca tojayanëse, jtsemnana mo nyetsana chabiamá cuaftsemncá. Canye betiyentşá tbëtëjënga Bëngbe Bëtsabiamá yojtsemna ca canya tojayanëse, nyetsca chë betiyentşá buacuafjëngnaca Bëngbe Bëtsabiamá jtsemnana.

<sup>17</sup> Chë judiënguentşe báseftanga Jesucristbeñe ndoñe montsanoşbuaché ora, tşëngaftanga chë ndoñe judiënga şmonjanobená chábeñe jtsoşbuáchiyana. Y chca, judiënga monjamna mo canye jena olivo betiyentşana entşanga tmojatëtşe buacuafjëngcá, y tşëngaftangna mo tjoca olivo betiyentşá buacuafjënga, chë jena olivo betiyeshiñe jenëfjëngcá. Mora tşëngaftanga Bëngbe Bëtsábentşana cachca tşabe soyënga chë judiëngaftaca şmontsebomna, mo chë jena buacuafjënga y cachentşá buacuafjënga cach tbëtëjentşana lempe cuaftsoyëngacañcá. <sup>18</sup> Ndoñe şmattsenábotamnaye, tşëngaftanga Bëngbe Bëtsabe tşabe soyënga şmojtsebomnama, chë Jesucristbeñe ndoñe montsanoşbuaché judiëngbiamá yojamna soyënga. Smochtsejuabnaye, buacuafjëngna chë tbëtëjëngayeca vida jtsebomnana, y ndoñe tbëtëjënga chë buacuafjëngayeca; cachcá, tşëngaftanga nye Bëngbe Bëtsábeyeca chë tşabe soyënga şmojtsebomna.

<sup>19</sup> Pero tşëngaftanga şmuatjayana: “Aifne, pero Bëngbe Bëtsá básefta judiënga tojanëbaté, Jesucristbeñe ndoñe montsanoşbuaché causa; chíyeca bënga fsëjanobená mo buacuafjënga betiyiñe jenëfjëngcá chca tşabe bendicionënga Bëngbe Bëtsábentşana jójyëngacñana ca.” <sup>20</sup> Ndegombre, chënga Jesucristbeñe ndoñe montsanoşbuaché causa, mo buacuetëtşenëfjëngcá tmonjanoquedá, pero Jesucristbeñe şmojtsoşbuáchema, tşëngaftanga şmojoquedá Bëngbe Bëtsábentşana tşabe bendicionënga jtsoyëngacañcá. Chcasna, chama ndoñe şmattsenábotamnaye; más tşabana cuedado jtsebomnana. <sup>21</sup> Er Bëngbe Bëtsá, chë Jesucristbeñe ndoñe montsanoşbuaché judiënga, ndoñe tonjanaperdoná, y chënga chabe entşanga bëtsemnamna, monjamna mo cach betiyentşá



buacuafjēngcá; tšēngaftanga, chē mo betiyiñe jena buacuafjēngcá šmomnēnga, cha cach ndoñe quecmochátaperdonaye, chábeñe ošbuáchiyana šmojtsajbanase.

<sup>22</sup> Bětscá šmochtsejuabnaye Bēngbe Bětsá puerte tšabia yomnama, pero cha tšatjayá yomnámna šmochtsejuabnaye; tšatjayá endmēna chē bacna soyēnga tmojtsamēngaftaca, pero tšēngaftangaftacna puerte tšabia. Cha tšēngaftangaftaca chca echántsemna, tšēngaftanga chca chašmojtsomerecēntscuana; pero ndoñesna, Bēngbe Bětsá echanjama tšēngaftāngnaca mo buacuetētšenēfjēngcá chašmoquedama, chē tšabe bendicionēnga Bēngbe Bětsábentšana ntsoyēngacañcá. <sup>23</sup> Y ntšamo mora imojtsejuabnacá chē judiēnga tmojatrocá y tmojontšé Jesucristbeñe jtsošbuáchiyana, chēngnaca cachiñe chē tšabe bendicionēnga Bēngbe Bětsábentšana mochanjójyēngacñe, y mochántsemna mo betiyiñe jena buacuafjēngcá, er Bēngbe Bětsá becá obenana endbomna jamama ntšamo chē judiēnga tempo imojanbomncá cachiñe chamotsatsbomnama. <sup>24</sup> Chcasna, más paselo jtsemnana canye jena olivo betiyentša buacuatētšenēfja cach betiyiñe jětsjena, y ndoñe, chē tjoca olivos betiyentša buacuafja canye jena olivos betiyiñe chaójuama jájena. Cachcá, más paselo jtsemnana chē Jesucristbeñe ndoñe montsošbuaché judiēngbiama, jontšana jtošbuáchiyana y tšabe bendicionēnga Bēngbe Bětsábentšana jójyēngacñana, tšēngaftanga ndoñe judiēnga chē tempo Bēngbe Bětsá ndoñe šmonjanábuatmēngbiama.

### *Bēngbe Bětsá nyetscāngaftaca puerte tšabia endmēna*

<sup>25</sup> Jesucristbeyeca catšátanga, atše sěntseboše tšēngaftanga chašmotsetátšēmo chē tempo Bēngbe Bětsá entšanga ndoñe tonjaninyanjē soyēngama. Atše sěntseboše tšēngaftanga quem soyēngama chašmotsetátšēmo, chca, tšēngaftanga ndoñe judiēnga chē judiēngbiama más uámanēnga šmomna ca ndoñe chašmondětsejuabnama. Ndayá Bēngbe Bětsá tempo entšanga ndoñe tonjaninyanjēcá, quem soye endmēna: Bēngbe Bětsá tojalesenciá, nye baseftatescama banga Israeloquēnga Bēngbe Bětsabe soyēnga ainaniñe ndoñe chamondójyēngacñama; pero chca echántsemna, chē ndoñe judiēnguentše atsebácanēnga jtsamnama imomnēnga, atsebácanēnga chamojtsemnēntscuana. <sup>26</sup> Chca chaojopasá ora, nyetsca Israelentša entšanga atsebácanēnga mochántsemna; ntšamo Bēngbe Bětsabe uabemana palabrēnguiñe endayancá:

Entšangbe atsebacayá Israelocana echanjabo,

y echanjama nyetsca Jacóbēbentšana entšanga ndoñe más vida chamondětsebomna,  
bacna soyēnga jtsamēse ca.

<sup>27</sup> Y mēntšá endmēna ntšamo chēngbiama chjasebuachená:

chēnga játsebacana, chēngbe bacna soyēngama chajaperdónaye ora ca –chiñe endayana.

<sup>28</sup> Chē tšabe noticiēnga tmojtsanaboté causa, judiēnga Bēngbe Bětsabe uayayēnga mondmēna, chca, tšēngaftangbe tšabiamana chaotsemnama. Pero Bēngbe Bětsá tojánabacacayeca, chēngnaca Bēngbe Bětsabe bonshánēnga mondmēna, er Bēngbe Bětsá chēngbe tempsca uámana běts taitanga chca tojanašebuachená. <sup>29</sup> Chca endmēna, er Bēngbe Bětsá ndocna te juabna ntjatrócana; nyetscanga chabe entšanga chamotsemnama tojáchembēnga, nyets tempo cha echántsababuanjēshana, y echanjama chēngbeñe tšabe bendicionēnga chaotsemnama. <sup>30</sup> Tšēngaftanga ndoñe judiēnga tempo ndoñe šmonjánama ntšamo Bēngbe Bětsá inabošcá; y mora, Bēngbe Bětsá tcmojalastemá, judiēnga Bēngbe Bětsá ndoñe tmonjoyeuná causa. <sup>31</sup> Cachcá, Bēngbe Bětsá tšēngaftanga tcmojalastemama, judiēnga montsemna chē Bēngbe Bětsá ndoñe montsobedecēnēnga, chca, Bēngbe Bětsá chēngnaca cháualastemama. <sup>32</sup> Er Bēngbe Bětsá tojinjanjē, cha ndoñe ntjoyeunayama juabnēngaca nyetscanga mandánēnga imomnama, chca, nyetscanga jalastemama cha jobenayama.

<sup>33</sup> ¡Ndegombre, Bëngbe Bëtsá nyetscangbiana puerte tšabia endmëna, puerte osertaná y puerte obiashjachá! Ndocná quenátobena ínÿenga jábuayenama ndayá Bëngbe Bëtsá jamama inetsejuabnycá, y ndocná quenátobena corente josértana ntšamo cha inetsamcá.

<sup>34</sup> Ntšamo Bëngbe Bëtsabe uabemana palabrënguiñe endayancá:

Ndocná quenátstatšëmbo ntšamo Bëngbe Bëtsá inetsejuabnycá;  
ndocná quenátobena cha jábuayenama ndayá jamana ibomnama.

<sup>35</sup> Ndocná quenátobena ndayánaca cha natsana jshatšetayana, chë tbojatšetabiana ndebená cha jatsmënana,

y chë ndebënana ndayánaca jtoyiyama chabotsemnama ca.

<sup>36</sup> Er lempe cha tojama, lempe cha iútabna, y lempe chabiana yomna. ¡Nyetscanga nyetsca tescama cha chamotsatschuaná! Chca chaotsemna.

## 12

### *Ntšamo jtsiyenëse Bëngbe Bëtsá jtseservénama*

<sup>1</sup> Chcasna, Jesucristbeyeca catšátanga, Bëngbe Bëtsá bënga ba soye šojalastemáyeca, puerte cbontsaimpadana, tšëngaftanga Bëngbe Bëtsá chašmëyana tša šmojtseboše lempe jamana chábioye jadórana ca, Bëngbe Bëtsá jadórana mo ndayá cuafjobacá y cuafjuatšëmboncá, mo cabá ainá cuaftsomñcá. Smochjauyana tšëngaftanga sempre šmochtsentšena cha servénana y jtsamëse cha tšabá bëngaftaca chaotsemnama. As, chca chašmojtsama ora, ndegombre oyejuayá Bëngbe Bëtsá šmochántsebiamnaye. <sup>2</sup> Ndoñe šmattsiyena jtsamëse ntšamo chë nÿe quem luarama enójuabnaye entšanga monduamancá, y šmochjaleséncia Bëngbe Bëtsá mo tsëm entšangcá chácmbiamama, tšëngaftangbe ainana y juabna mo tsëmcá chaomëse. Chca, tšëngaftanga šmochanjobenaye jtsejuabnayana y šmochántsetatšëmbo ntšamo Bëngbe Bëtsá yobošcá: ndayá tšabá yomna, chë ndayá cha oyejuayá ibnabema, y ndayá ya ndoñe yondopodena más tšabá jtsemnama.

<sup>3</sup> Ndayá Bëngbe Bëtsá atšbiana tšabá jtsejuabnayešë šojatšetama, nyetsca tšëngaftanga cbochjáuyana, ndocná cachabiana chaondëtsejuabná más uamaná yomna ca, nÿe ntsachetšá jtsenójuabnayana ibomna nyetšá. Más tšabá, cada ona cachabiana tšabá chaotsenojuabná, y chca chaotsenojuabná ntšamo chabe ošbuáchiyana yomncá, chca, chë Bëngbe Bëtsá tbojatšetá ošbuáchiyana chabiana chaotsetrabájama. <sup>4</sup> Er, ntšamo bënga cada ona mondbomna canÿe cuerpo y chë cuerpiñe ba soyënga jtse-bomnana, y nyetsca soyënga ndoñe cach soyama cuerpiñe ntsoservénana, <sup>5</sup> cachcá bënga ošbuáchiyënga, masque bëtscanga imomna, Crísoftaca cánÿiñe mo canÿacá mondmënayeca, bënga mondmëna mo chabe cuerpo cuaftsemncá, y cada ona cánÿiñe mo canÿacá nyetscángaftaca.

<sup>6</sup> Bëngbe Bëtsá tojama bënga cada ona chamotsebomnama ndoñe cachca chabe tšetana obenana, ntšamo Bëngbe Bëtsá cada ona bëngbe tšabiana inajuabnycá. Y chabe juábnaca bënga jtsóyebuambnayama jtsobenama Bëngbe Bëtsá tojamëse, chca mochtsama ntsachetšá chábeñe bëngbe ošbuáchiyana yomncá. <sup>7</sup> Ošbuáchiyënga bëtscá jaserviama bënga chamotsobenama Bëngbe Bëtsá tojamëse, chca mochtsama. Tšabá jtsabuátambayama bënga chamotsobenama Bëngbe Bëtsá tojamëse, chca mochtsama. <sup>8</sup> Inÿenga jañëmuama bënga chamotsobenama Bëngbe Bëtsá tojamëse, chca šontsamna. Lempe ntšamo bënga tmobomncá inÿengbiámna chaotsemnama bënga jamama chamotsobenama Bëngbe Bëtsá tojamëse, nyets ainánaca chca šontsamna. Amëndayënga jtsemnama bënga chamotsobenama Bëngbe Bëtsá tojamëse, šontsamna bëtscá jamana tšabá jtsamëndayama. Inÿenga jálastemama bënga chamotsobenama Bëngbe Bëtsá tojamëse, šontsamna oyejuayënga chca jamana.

*Ntšamo bënga Jesucristbeñe ošbuáchiyënga jtsamana šojtsamna*

<sup>9</sup> Inya chašmojtsebobonshana ora, nyets ainánaca chca šmochtsama. Ndayá yomna ndoñe tšabe soye šmochtsaboté y chentšana šmochtsojuánañe; šmochtsentšena ntšamo tšabá yomncá jtsamama. <sup>10</sup> Cmotsamna nyetscanga puerte jtsenbobonshánana, Jesucristbeyeca catšátanga quetsomñecá, chë ínÿenga bëngbiana más uámanënga imomna ca jtsejuabnayëse.

<sup>11</sup> Ndoñe oyënjayënga šmattsemna, ndayá bëtsá Bëngbe Utabnabiana šmochtsetrabájaye; ainaniñe corente añemo jtsebomnëse, Bëngbe Utabná sempre šmochtseserverna.

<sup>12</sup> Tšëngaftanga Bëngbe Bëtsábeñe jtsošbuáchiyëse, chábeñe šmobatmánayeca, puerte oyejuayënga šmochtsemna; padecena soyënguiñe chašmojtsachnëjuana ora, puerte uantadënga šmochtsemna, y siempre Bëngbe Bëtsáftaca šmochtsencuëntaye.

<sup>13</sup> Bëngbe Bëtsabe entsanga opresido bomnënga šmochjújabuache, y šmochtseprontana tšëngaftangbe yebnentše posada ínÿenga júyentšamiama.

<sup>14</sup> Bëngbe Bëtsá šmochtseimpadana, chë tšëngaftanga chašmosufrima amëngbiana tšabe bendicionënga cha chaotsamama; aíñe, cha šmochjaimpáda tšabe bendicionënga chëngbiana chaotsamama, bacna soyënga ndoñe.

<sup>15</sup> Oyejuayënga ínÿengaftaca šmochtsemna, chënga oyejuayënga chamojtsemna ora; ngménaca šmochtsemna, ínÿenga ngméniñe chamojtsemna ora.

<sup>16</sup> Šmochtsiyena nyetscanga jtsenëyeunanëse. Nye cach tšëngaftanga uámanënga ndoñe šmattsenobiamnaye, sinó chë nduámanënga imomnëngaftaca tšabá mándbomnënga šmochtsemna. Ndoñe šmattsejuabnaye yapa osertánënga šmomna ca.

<sup>17</sup> Inÿenga bacá chacmojtsaborlana ora, ndoñe šmattsatëchénguaye; corente šmochtsentšena ntšamo nyetsca entsangbiana tšabá yomncá jtsamama. <sup>18</sup> Ntsachetšá šmojobenacá, lempe šmochtsama natjëmbana nyetsca entsángaftaca jtsiyenama. <sup>19</sup> Atšbe bonshánënga, ínÿenga bacá chacmojtsaborlana ora, ndoñe šmatjama chënga chë causa chamotsesufrínama, ndayá Bëngbe Bëtsá šmochjaleséncia chënga cháucastigama; er Bëngbe Bëtsabe uabemana palabrënguiñe cha tojánayana: “Atše chanjama chënga chamosufrima, ínÿenga chamosufrima tmojama causa; y chënga chanjácastigaye, ínÿengbioye bacá tmojaborlá causa ca.” <sup>20</sup> Chca játamamna, mëntšá šmochjama, ntšamo cachánaca tojanayancá:

Acbe uayayá tbojtseshëntsane, saná cochjacaredáda,  
y tbojtsajuendase, cochjuáfiye.

Chca chacojamëse, cochanjama cha puerte chaotsëuatja ntšamo tcmojaborlama,  
y ainana corente chabotsetšena, mo chebana iñbenga chabe bestšašiñe cuafjacacá ca.

<sup>21</sup> Ndoñe šmatjaleséncia, ntšamo ndoñe tšabá tontsemncá tšëngaftanga chacmayëñjanama. Chamna, ntšamo tšabá yomncá jtsamëse, chë ndoñe tšabe soye šmochjayëñjaná.

## 13

<sup>1</sup> Nyetsca entsanga entsamna jtsamana ntšamo chë amëndayënga tmojtsamëndacá, er ndocná obenana ntsebomnana, Bëngbe Bëtsá ndoñe chca tbonjalesenciase, y nye Bëngbe Bëtsá tojama amëndayënga obenana chamotsebomnana. <sup>2</sup> Chca, chë amëndayëngbe contra tmojtsemnëngna, ntšamo chaotsemnana Bëngbe Bëtsá tojayancá contra chënga jtsemnana; y chca contra tmojtsemnëngna, castigánënga mochántsemna; <sup>3</sup> er ntšamo tšabá yomncá amënga, ndoñe quenátamna ndayama chë amëndayënga jatebéuatjana, nye chë bacna soye amëngna aíñe. Tšëngaftanga šmojtseboše jtsiyenama chë amëndayëngbioye ntjatebéuatjá; chcasna, ntšamo tšabá yomncá šmochtsama, y chë amëndayëngna tšabe bomínÿeca mochantsonÿaye ntšamo chašmojtsamcá; <sup>4</sup> er chë amëndayëngna Bëngbe Bëtsabe trabajo amënga mondmëna, tšëngaftangbe tšabiana. Pero bacna soyënga

šmojtsamësna, cmontsamna jtsiyenana chë amëndayënga jtsebëuatjëse, er chënga jaccastígama obenana mondbomna, y chca mondbétsama. Chënga, Bëngbe Bëtsabe mándoca jayanana chë bacna soye amënga ndoñe tšabá tmonjama ca, y jamana chënga chamofufrima. <sup>5</sup> Chiyeca, jtseytana ntšamo chë amëndayënga tmojtsichamcá jtsamana, pero ndoñe nýe chë castigo ndoñe chašmondëtsebonnama, ndoñe chca šmontsama causa, sinó chë ainanentša tšabe juabnënga ntšamo tbojtsëtsësnacá joyeunayama yómnyayeca. <sup>6</sup> Cachca soyëngama, amëndayëngbiama impuesto tšëngaftanga jtsatsquécjnayana; er chë amëndayënga Bëngbe Bëtsabe oservénënga mondmëna, ntšamo chiñe jtsamama tojtsamncá corente tmojtsentšena ora.

<sup>7</sup> Chcasna, tšëngaftanga šmochjáyentšbuachiye ntšamo chënga jtsebomnama tojtsamncá. Chë crocénana entšanga ayëngacayëngbiyoye, ndaye impuéstnaca šmochtëbuénaye; chëngna šmochtsarrespetana ntšamo yomncá, y chënga uámanënga chamotsemnana šmochtsejuabnaye.

<sup>8</sup> Crocénana inýa jëtsëntsabuáchiyama chacmojtsamnëse, nýe ntoyiyacá ndoñe šmatjoquéda, nýets tempo ndebénënga; nýe quem soye sempre šmochtsama: nýetscanga šmochtsenbobonshana; er nda ndëmua entšábioyoye tbojtsebobonshana, ya tojama ntšamo leyiñe yomandancá. <sup>9</sup> Quem mandënga, “acbe shema inýaftaca ndoñe cattseíngñaye, inýa ndoñe catjóba, ndoñe catjatbëba, inýa tojtsebomna soye ndoñe nýe acbiama cattseboše”, y chë inýe mandënga leyiñe lempe quem mandiñe entsemna: “Ndëmua entšánaca cochtsebobonshana ntšamo cach aca cuenobobonshancá”. <sup>10</sup> Nda ndëmua entšábioyoye tbojtsebobonshana, chábioyoye ndoñe bacá ntjabórlana; chca, ndánaca jtsebobonshánëse, entšá jamana lempe ntšamo leyiñe yomandancá.

<sup>11</sup> Chë soyënga cmontsamna jtsamana, er bënga mondetatšëmbo ya chë uámana tempiñe imojtsiyenama, chë mocna ora šojtsamna prontánënga jtsemnana, mo ocnayentšana cuafjofšenangcá, Jesucristo jaserviama jtsentšënëse. Chca cmontsamna jamana, er chë Bëngbe Bëtsá bënga játsebacama te, mora ya más bécoñe entsemna, ntšamo chë Jesucristbeñe jtsošbuáchiyama tmonjanontšé ora enjamnama. <sup>12</sup> Mora bënga mondoyena canýe luarentše bëtscá bacna soyëngaca y ngmenánaca, y chca jtsemnana mo bënga nýets tempo ibetiñe cuaftsajncá. Pero ya entsobeco chë Bëngbe Bëtsá bënga játsebacama te, mo chë ibetiñe ya jtsopochócama y binýniñe ya jontšamcá. Chiyeca mochtsajbaná bacna soyënga amana, y mochtsiyena tšabe soyënga jtsamëse, Satanás játsjama y jáyëñjanama bënga jtseprontánëse, mo canýe soldado jenëuyanama y inýa jayëñjanama ba soyënga tojenocjacá. <sup>13</sup> Ntšamo šojtsamncá mochtsiyena, ntšamo entšanga ndaye tšabe sóynaca jamama monduamancá, inýëngbiama lempe chaotsinýnëse. Chcasna, ndoñe quešnátamna yapa tmoyënga ntsemnana, ndoñe fiestënguenache ndoñe tšabe soyënga ntsamana, ndoñe bacna soye boyabása o shembásaftaca ntsamana y jenomándama ntobencá chca soyënga ndoñe ntsamana, nýetscanga ndoñe cachcá ntsejuabnayama ndoñe ntsamana y ndoñe inýenga yapa ntsiyentšbuašana. <sup>14</sup> Chca játamamna, šmochtsiyena jtsamëse ntšamo Bëngbe Utabná Jesucristo endbetsamcá, y ndoñe nýe šmatjésejuabnaye jtsamana nýe cach tšëngaftanga tšabá jtsomñama juabnëngaca, ndayá tšëngaftanga chašmotsamama chë juabnënguiñe tojtsemncá.

## 14

### *Ndoñe šmattsóyebuambnaye inýe ošbuáchiyëngbe contra*

<sup>1</sup> Chë Jesucristbeñe nýe batšatema ošbuáchiyënga tšabá šmochjúbuaja, y chëngaftaca ndoñe šmattsenatsëtsnaye ndayá aíñe o ndoñe jamana yontsamnama. <sup>2</sup> Er básefta ošbuáchiyënga corente imotátšëmbo chënga nýe ndayánaca jasama imobenama, pero chë Jesucristbeñe nýe batšatema ošbuáchiyëngna, ndocna mëntšena ntsesayana, er chënga jtsejuabnayana aíñe jasana canýe bacna soye nántsemna ca. <sup>3</sup> Chë nýetsca saná sayënga



ndoñe chamondëtsejuabná chë inye soyënga ndoñe mondëtsesayëngbiana, chë causa chënga más batšá uámanënga imomna ca; y chë ndaye soyënga ndoñe mondëtsesayëngna, chë nyetsca saná sayëngbe contra ndoñe chamondëtsoyebuambná, er Bëngbe Bëtsá chënga tojúbuaja mo chabe entšangcá. <sup>4</sup> Tšëngaftanga ndoñe quecmátamna chë ínÿabe oservená ndoñe tšabá tonjama ca jatichámuana. Cachabe nduiño jtsemnana nda yochjayana cha tšabá o ndoñe tšabá tonjamama. Y chë oservená jamana ntšamo tbojtsemncá, er Bëngbe Utabná obenana endbomna cha chca chaotsamama.

<sup>5</sup> Báseftanga mondmëna, chënga jtsejuabnayana canye te inye tescama más uámana te yomna ca; pero ínÿengna jtsejuabnayana cada te cachcá iuámana ca. Y entsemna ndayá cada ona corente tšabá chaotsetátšëmbo, ntšamo yojuabnacá ndáyeca chca ca.

<sup>6</sup> Nda tojtsejuabná canye te inye tescama más uámana te yomna ca, chca jamana Bëngbe Utabnábiama jtenójuaboyama. Y nda nyetsca saná tojtsesá, chca jamana Bëngbe Utabnábiama jtenójuaboyama, er cha Bëngbe Bëtsábioye chë sanama jëtschuayana; y nda tojtsejuabná sananga yomna y ošbuáchiyënga chcana chamotsesama Bëngbe Bëtsá ndoñe yondboše ca, cha chë soyënga ndoñe ntjasana, Bëngbe Utabnabiama jtenójuaboyama, y chánaca Bëngbe Bëtsábioye chë sanama jëtschuayana.

<sup>7</sup> Bënga ošbuáchiyënguentsana ndocná ainá ntsemnana nÿe cachabiama, ni jóbanana nÿe cachabiama. <sup>8</sup> Bënga tmojtсийenëse, Bëngbe Utabnabiama jtсийenana; y tmojóbanëсна, Bëngbe Utabnabiama jóbanana. Chca, masque ainënga o obanënga, bënga Bëngbe Utabnábenga jtsemnana. <sup>9</sup> Chama Cristo tojanóbana y Bëngbe Bëtsá tojanma cha cháuatayenama, cha Bëngbe Utabná chaotsemnana, ainëngbeñe y chë ya tmojóbanëngbeñe chaotsemándama.

<sup>10</sup> As, ¿ndáyeca tšëngaftanguentšë báseftanga, catšátangbe contra jtsóyebuambnayana, ndayá chënga tmojtsamama? ¿Y ndáyeca ínÿenga tšëngaftanguentšë jtsichámuana, catšátanga ndoñe uámanënga montsemna ca, ndayá chënga tmojtsamama? Er nyetscanga šontsamna Bëngbe Bëtsabe delante jashjanguana, ntšamo cada ona tojëftsemcá tšabá o ndoñe tšabá bëtsemnana cha cháuyanama. <sup>11</sup> Er Bëngbe Bëtsabe uabemana palabrënguiñe Bëngbe Utabná mëntšá tojánayana:

Ndegombre atšë ainá sëndëtsomñe, y chíyeca atšë šcojurá,  
nyetscanga atšbe delante mochanjoshëntsaméntšä atšë jadórama,  
y nyetscanga šmochanjauyana, “ndegombre aca Bëngbe Bëtsá condmëna ca”.

<sup>12</sup> Chcasna, cada ona bënga šontsamna Bëngbe Bëtsá jauyanana ntšamo tmojamama ndáyeca chca ca.

*Ndoñe šmatjama inye ošbuáchiyënga bacna benachiñe chamótsatšama*

<sup>13</sup> Chíyeca, ya ndoñe quešnátamna ínÿengbe contra jtsóyebuambnayana. Chca játamamna, šmochtsejuabnaye y yejuana šmochtsantješna ndocna te tondaye ntjamana, ndayá chaoma Jesucristbeyeca acbe catšata, chaojuabó y bacna soyënga chaoma. <sup>14</sup> Atšë sëndëtatšëmbo, mo canya Bëngbe Utabnáftaca cánÿiñe mo canyacá quetsomñecá, ndocna soye yondmëna, nÿe cachabe ponto chaotsemna ndoñe tšabe soye. Pero canye entšá tojtsejuabná ndayánaca ndoñe tšabe soye yondmëna ca, ni jasama, ni jabojuama, chabiama cocayé chë soye nyets tempo jëftsemnana ndoñe tšabe soye. <sup>15</sup> Tšëngaftanga inya becá šmojtsatsëtná, inye soyënga tšabá endmëna jasama ca, y cha tojtsejuabná, chca soyënga jasama ndoñe tšabá yondmëna ca, pero tšëngaftanga tša šmojtsatsá causa, cha chca soyënga tojase, y chentšana tbojtsebiona puerte bacna soye tojamama, chca, tšëngaftanga jtsinÿanÿnayana ndoñe šmondoyena jtsamëse chë ínÿenga jtsababuánÿeshanëse. Nÿe tšëngaftanga inye soyënga šmétsesayama ndoñe šmatjaleséncia chë soye chaoma inya, ndabiama Cristo tojanóbana, chë ndoñe ndegombre benachiñe chaoquedama. <sup>16</sup> Ndoñe šmatjaleséncia ndayá tšëngaftanga tšabá šmétsamama, ínÿenga ndoñe tšabá tšëngaftangbiana chamotsóyebuambnama. Chca šmochanjobenaye, ntšamo šmojtsamcá jtsajbanase, ínÿenga ndoñe tšabá tmontsoyebuambná ora. <sup>17</sup> Bëngbe Bëtsabe

amëndayana bēngbeñe ndoñe quenátsmēna inye soyēnga aíñe jasana o inye soyēnga ndoñe, canye soye aíñe jofsiyana o inye soye ndoñe. Pero chabe amëndayana bēngbeñe aíñe endmēna jtsamana soyēnga ndayama Bēngbe Bētsá tojayana aíñe tšabá jamama yomna ca, cháftaca tempcá tšabá jtsatsmēnana y ainaniñe oyejuayana jtsebomnana; y Uámama Espíritbeyeca bēnga jobenayana chca jamana. <sup>18</sup> Y nda Crístbioye chca tbojtseser-vena, jamana Bēngbe Bētsá cháftaca oyejuayá chaotsemnana, y entšangbe bominiñe tšabia jtsemnana.

<sup>19</sup> Sempre šontsamna tšabe soyēnga jtsamana y chē soyēngaca chaopodé jamana nýetscanga natjēmbana chamotsiyenama, y ndaye sóynaca šmochtsama, ndayá inyēnga chaújabuache Jesucristbeñe corente jtsošbuáchiyama y ainaniñe bētsá añemo jtsebomnana. <sup>20</sup> Tšēngaftanga ndaye sanánaca jasama šmobénayeca, ndoñe šmatjama chaot-sopochocama ndayá Bēngbe Bētsá ainaniñe tojamcá. Ndegombre, nýetsca sananga tšabá jasama endmēna; pero ndayá tšēngaftanga šmojasama, inya bacna benachiñe chaótsatšama šmojamēse, chē soye cocayé ndoñe tšabá ntsemnana. <sup>21</sup> Tšabá endmēna mēntšena ndoñe ntjasana, vínoye ndoñe ntjofsiyana o ndayánaca ndoñe ntjamana, pero chē soye aíñe tcojama ora, Jesucristbeyeca canye catšata chaojuaboma y bacna soye chaomama tojoservese.

<sup>22</sup> Asna, ntšamo tšēngaftanga chē soyēngama ndegombre šmošbuachecá, nye Bēngbe Bētsá y tšēngaftangaftaca chaotsemna. Canye entšá ndegombre oyejuayá jtsemnana, canye soye jamama tšabá yomna ca tojtsejuabnase, y chē soye tojamentšana, ndoñe tšabá chca yonjamna ca juabnēnga ainaniñe ndoñe tontsebomnēse. <sup>23</sup> Pero canye entšá ndayá tojamentšana tojayana, bacna soye tojama ca chē ndayá tojasama o tojamama, as Bēngbe Bētsánaca echanjayana cha ndoñe tšabá tonjama ca, er ntšamo tojamcá ndoñe tonjama chē soye aíñe tšabá yomnama jtsošbuáchiyēse; y ndayánaca chca ora tojtsamēse, chca jamana bacna soye jtsemnana.

## 15

### *Ntšamo inyēngbiama tšabá tojtsemncá mochtsama, ndoñe nye bēngbiama*

<sup>1</sup> Bēnga, chē Jesucristbeñe corente ošbuáchiyēnga, šontsamna chē nye batšatema ošbuáchiyēnga jujabuáchana, chēnga bacna soyēnga tmojtsama ora, nye batšá ošbuáchiyana bomna causa; y ndoñe nye jatsēnguayana nye ndaye soyēngaca yopodena bēnga tšabá jtsemnana. <sup>2</sup> Cada ona bēnga šontsamna jamana ntšamo cach bēngcá Jesucristbeñe ošbuachiyabiama tšabá tojtsemncá, y ndayá cha oyejuayá chaotsemnana tojama soye. Chca šontsamna, cha más bētsá Jesucristbeñe chaotsošbuáchema, y ainaniñe más añemo chaotsebomnana. <sup>3</sup> Er Cristo, ntšamo tojanmcá cach ndoñe tonjanma nye cha oyejuayá jtsemnana. Inyētšá, cháftaca tojanopasá ntšamo Bēngbe Bētsabe uabemana palabrénguiñe endayancá, mo Cristo Bēngbe Bētsáftaca cuaftsoyebuambnacá: “Ntšamo entšanga montsichamcá aca joyenguanguama, atše šmontsatsētná ca.” <sup>4</sup> Er lempe ntšamo tempo Bēngbe Bētsabe uabemana palabrénguiñe tmojanabemcá, bēnga jabuátambama endmēna. Ndayá bēnga chiñe tmojuatsjinyama, bēnga jtsoebenana padecena soyēnguiñe tmojtsachnējuana ora uantadēnga jtsemnana, y ainaniñe más añemo jtsebomnana; y chíyeca bēnga montsobena, chábeñe jtsošbuáchiyēse, chábeñe jobátmana, ntšamo tojanayancá chaomama. <sup>5</sup> Atše, Bēngbe Bētsá sēntseimpadana, nda inétsama bēnga padecena soyēnguiñe uantadēnga chamotsemnana, y nda inétsama bēnga ainaniñe más añemo chamotsebomnana, cha chaoma nýetscanga canye juabna chašmotsebomnana, ntšamo Cristo Jesús yojanjuabnacá tšēngaftanga jtsejuabnayēse; <sup>6</sup> cha chca chaoma, nýetsca tšēngaftanga mo cányiñe cuaftsemncá, y mo nýetscanga canye ora cuaftjayancá, Bēngbe Bētsá, Bēngbe Utabná Jesucristbe Taitá, puerte bētsá y uamaná yomnama chašmuinyanjema.

*Chë ndoñe judiëngbiámnaca chë tšabe noticiënga jtsemnana*

<sup>7</sup> Nÿetscanga oyejuayënga šmochjenofja, ntšamo Crístnaca tšëngaftanga tcmojanëbuajcá, chca, entšanga chamuinÿanÿé Bëngbe Bëtsá puerte bëtsá y obená yomnama. <sup>8</sup> Atše sëntseboše ndayá jayanana, Cristo tojánabo judiënga jabáserviama ca, chca, jinÿanÿiyama Bëngbe Bëtsá sempre inétsamama ntšamo tojašebuachenacá; tojánabo ntšamo Bëngbe Bëtsá bëngbe tempsca uámana bëts taitanga tojanašebuachenacá chaocumplima; <sup>9</sup> y Bëngbe Bëtsá puerte bëtsá yomna ca chë ndoñe judiëngnaca chamuayanámna, cha chënga inétsalastemanama, ntšamo Bëngbe Bëtsabe uabemana palabrenguiñe endayancá, y chca tojanocumplí:

Chíyeca, atše chë ndoñe judiëngbeñe chaitsemna ora, aca cbochantsatschuanaye, Bëngbe Bëtsá;

y jacántase chanjayana aca puerte bëtsá y uamaná comna ca.

<sup>10</sup> Inÿoca mëntsá endayana:

Puerte oyejuayënga chë ndoñe judiënga šmochtsemna, Bëngbe Bëtsabe bocacana entšàngaftaca cánÿiñe ca.

<sup>11</sup> Y ínÿoca mëntsá endayana:

Bëngbe Utabná šmochtsatschuanaye tšëngaftanga ndoñe judiënga,

y cha šmochtsatschuanaye nÿetsca tšëngaftanga nÿets luarënguenache entšanga ca.

<sup>12</sup> Y Isaíasnaca Bëngbe Bëtsabe uabemana palabrenguiñe mëntsá tojanábema:

Canÿa Isaíbe entšanguentsana echanjabo,

y Bëngbe Bëtsá chábioye uamaná bochanjábema, nÿets luarënguenache entšanga chaot-samëndama,

y chënga chábeñe jtsošbuáchiyëse, chábeñe mochantsobátmana tšabe soyënga chëngbiana chaotsamama ca.

<sup>13</sup> Atše, Bëngbe Bëtsá sëntseimpadana, nda inétsama bënga chábeñe chamot-sobátmanama tšabe soyënga bëngbiana chaomama, cha chaoma tšëngaftanga ainaniñe puerte oyejuayënga chašmotsemnana y ainaniñe tšabe ebionana chašmotsebonnama, chábeñe jtsošbuáchiyëse; y Bëngbe Bëtsá chca tšëngaftangbiana chaoma, tšëngaftanga cada te más chábeñe chašmotsobátmanama, chë Uámana Espíritbe obenánaca.

<sup>14</sup> Jesucrístbeyeca atšbe catšátanga, atše corente sëndétatšëmbo tšëngaftanga puerte tšábenga šmomnama, ndayá cmamnama corente šmotatšëmbuama, y jtsebuayiynayama šmobenámna. <sup>15-16</sup> Quem tsbuanáchañe básefta soyëngama sënjuábema, ntšamo šmatjátsjuabnayama atše ntjatauatjcá; chca sënjama, básefta soyëngama chašmuatenójuaboma; y chca sëntsobena juabemana, er Bëngbe Bëtsá tojama atše chaitsebonna chë uámana trabajo, Cristo jtseeservénana, chë ndoñe judiënga jtsëjabuáchanëse. Atše bachnëcá sëntsoservena, Cristo stseservena ora, entšanga tšabe noticiëngama jtsabuayiynayëse; atše chca sëndama chë ndoñe judiënga Jesucrístbeñe chamotsošbuáchema, y ndayánaca chamotsamama Bëngbe Bëtsá oyejuayá chëngaftaca chaotsemnana, mo chabiana canÿe uatšëmbonancá. Chcánaca atše sëndama, ndoñe judiënga ndegombre Bëngbe Bëtsábenga chamotsemnana, chë Uámana Espíritbeyeca.

<sup>17</sup> Chca, atše Cristo Jesúsftaca cánÿiñe mo canÿacá quetsomñecá, ndegombre sëntsobena jtsejuabnayana ntšamo Cristo jaserviama atše sëndamcá, puerte uámana soye yomnama. <sup>18</sup> Atše añemo sëntsebonna nÿe chë ndayá Cristo átseftaca tojamama jóyebuambayama, ndoñe judiënga Bëngbe Bëtsá chamóyeunama. Chca tonjopasá, ndayá tijayanama y tijamama, <sup>19</sup> chë Bëngbe Bëtsabe obenana jinÿanÿiyama bëts soyëngama, chë chabe obenánaca tojopasá tšabe soyëngama, y chë Uámana Espiritu bëts obenánaca tojama soyëngama. Y chca, Jerusalenocana jabojátšase, nÿetsca luarënguëjana Iliria luaróntscoñe, Cristbe tšabe noticiëngama nÿets luarënguenache entšanga tijabuayená. <sup>20</sup> Atše sempre canÿe soye inÿe soyëngama más sënjánboše, y enjamna chë tšabe noticiëngama jábuayenana, entšanga ndocna te Cristbiana oyebuambnayana tmonjanuena

luarënguenache; y chca sënjanma, atše ndoñe játamama inya tojanbojatsé trabajo, mo inyabe bojatsena yebnentše jajebuama cuafjatontsecá. <sup>21</sup> Ntšamo Bëngbe Bëtsabe uabemana palabrënguiñe endayancá, chë tempo Cristbiamana ndoñe tmonjanuenëngbiamana: Chë ndëmuanyënga tempo ndocná chabiamana tonjanabuayená, chënga tšabá mochanjinye ntšamo cha yomnana; y chë ndocna te chabiamana tmonjouenënga, chabe soyëngama echanjósertaye ca.

### *Pablo yojanjuabná Roma bëts puebloye jama*

<sup>22</sup> Y nya chë causa, atše ndoñe chiyjobená tšëngaftangbioye jana tšëngaftanga jányama, masque ba soye tsjenojuabná choye jama. <sup>23</sup> Pero mora atšbe trabajo quem luarënguiñe sënjapochocá y tempscana tšëngaftanga jányama tša sëndánbošeyeca, <sup>24</sup> sëntsejuabná mora aïñe chjobenaye choye jama, tšëngaftanga jautsëtsayama, chëjana chajachnëngo ora, España luaroye chaitsá ora. Y baseftayté tšëngaftangaftaca chjëftsemna, cbochjányama tšëngaftangaftaca oyejuayá; chentšana Diosmanda šmochjuájabuache, y lempe ntšamo chašojtsajabotcá šmochjátsetaye jobenayama Españoloye ayana jtétóntšama. <sup>25</sup> Morna Jerusalenoye chanjá, choca entšanga Bëngbe Bëtsábenga imomnënga jaujabuáchama; <sup>26</sup> er Jesucristbeñe ošbuáchiyënga Macedonia y Acaya luarentsënga, tmonjajuabó tšabá yojtsemna crocénana jájuabana chë Jerusalenoca entšanga, Bëngbe Bëtsábenga imomnënga y ndbomnëjémënga imomnënga jujabuáchama; y oyejuayënga chca tmonjama. <sup>27</sup> Cachënga chca tmonjajuabó, y chca jamana tšabá endmëna, er judiënga tmonjanma, chë Bëngbe Bëtsábicocana tmojanóyëngacñe soyënga ndoñe judiëngnaca chamotsebomnama; chíyeca ndoñe judiënga entsamna chë Jerusalenoca judiënga ošbuáchiyënga jujabuáchana, ndaye soyënga jatsatayëse, chënga vida jtsebomnama chamotsobenama. <sup>28</sup> Y chca, quem trabajo chajapochocá ora, y chë ndoñe judiënga ošbuáchiyënga lempe tmojátbanana chajjátsayentšbuachiye ora, chanjontsé Españoloye jama, y tšëngaftangbiajana chanjachnëngo tšëngaftanga jáftsanýama, tšëngaftangaftaca baseftayté jëftsemnama. <sup>29</sup> Atše corente sëntsetatšëmbo tšëngaftangbioye chajá ora, chjášhjangoy chjama tšëngaftanga bëtscá tšabe bendicionënga Crístbentšana chašmotsebomnama, tondaye chacmondëtsabuáshebenëntscuana.

<sup>30</sup> Jesucristbeyeca catšátanga, Bëngbe Utabná Jesucristbeñe ošbuáchiyënga quetsomñecá, y bënga bonshánana chamotsebomnama chë Uámana Espíritu inétsamayeca, tšëngaftanga cbontsaïmpadana, bëtscá chašmotsentšena Bëngbe Bëtsá nyets ainánaca jtseïmpadánama, ntšamo atše sëndbetseïmpadancá, cha atše chašotsinýenama. <sup>31</sup> Cha šmochtseïmpadana chë Judea luaroca ndošbuáchiyënga ndocá chašmondëborlama, y chë Jerusalenoquënga Bëngbe Bëtsábenga, tšabá chamóyëngacñama ndayá chënga jujabuáchama chajjátsayentšbuachiye ora. <sup>32</sup> Y chentšana, y Bëngbe Bëtsá chca chaojábošenëse, atše chayobená bëtscá oyejuayá tšëngaftangbioca jashjanguana tšëngaftanga jányama, y tšëngaftangaftaca chaitsemna ora, batšá jóchnama chayobená. <sup>33</sup> Atše, Bëngbe Bëtsá sëntseïmpadana, nda inétsama bënga ainaniñe tšabe ebionana chamotsebomnama, nyetsca tšëngaftangaftaca chaotsemnama. Chca chaotsemna.

## 16

### *Ubuátmënga jacheuayama*

<sup>1</sup> Atše sëntseboše tšëngaftanga jáuyanana Febe, Jesucristbeyeca bëngbe uabena, canye tšabe entšá endmënama; cha chë Cencrea puebloca enefjuana ošbuáchiyënga endújabuachana. <sup>2</sup> Tšabá cha šmochjofja, mo canya Bëngbe Utabnábia quetsomñecá, ntšamo Bëngbe Bëtsabe entšanga entsamncá inyëngaftaca jenofjana. Smochjuájabuache ntšamo tbojtsajabotcá, er cha banga tonjújabuache; átšbioynaca.

<sup>3</sup> Atšbe cuenta Prisca y Aquila šmochjácheuaye, chë átšeftaca tbonjatrabajata, Cristo Jesusbiamana oservéniñe. <sup>4</sup> Jobanámnaca bonjanprontana, atše jatsbocama,



ndoñe chašmondóbama. Atše chama chata sentsatacheuaná; y ndoñe nýe atše, sinó nýets luarenache enefjuana ndoñe judiënga ošbuachiyëgnaca chca. <sup>5</sup> Chë ošbuachiyënga, chë Bëngbe Bëtsá jëtschuayama chatbe yebnentše jénefnama imua-manëgnaca, šmochjácheuaye. Atšbe bonshana Epeneto šmochjachuaye; cha endmëna chë natsaná Asia luaroca Jesucristbeñe jtsošbuachiyama. <sup>6</sup> María šmochjachuaye; cha tšëngaftangbeñe bëtsá tojatrabajá. <sup>7</sup> Chë cach atšcá judeocata Andrónico y Junias šmochjácheuaye. Chata canýe ora átseftaca cárceloye bonjanëtámëna, y Jesucristbe ichmónëngbiana chata puerte uámanata bonjamna, y atšbiana más natsana tbojanontsé Jesucristbeñe jtsošbuachiyama.

<sup>8</sup> Ampliato šmochjachuaye, atšbe bonshaná, er atšcá cha Bëngbe Utabnáftaca cánýiñe mo canýacá bondmëna. <sup>9</sup> Urbano šmochjachuaye, chë bëngaftaca Cristbiana oservëniñe trabajayá; y atšbe bonshana Estáquisnaca šmochjachuaye. <sup>10</sup> Apeles šmochjachuaye; cha ba soye tonjinýanyé Jesucristbeñe puerte yošbuáchema; y Aristóbulbe yebnentšëgnaca šmochjácheuaye. <sup>11</sup> Chë cach atšcá judeocá Herodión šmochjachuaye, y chë Narcisbe pamillentsana Bëngbe Utabnábeñe ošbuachiyëgnaca. <sup>12</sup> Trifena y Trifosa šmochjácheuaye; chata Bëngbe Utabnabiana puerte bondëtrabajá; y bëngbe bonshaná Pérsidnaca šmochjachuaye; cha bëtsá endëtrabajá, Bëngbe Utabnabiana oservëniñe. <sup>13</sup> Rufo, chë Bëngbe Utabnabiana uámana trabajayá, šmochjachuaye, y chabe mamánaca; cha mo atšbe mamacá endmëna. <sup>14</sup> Asíncrito, Flegonte, Hermes, Patrobas y Hermas šmochjácheuaye, y chë ínýenga Jesucristbeñe ošbuachiyënga chëngaftaca innénutanangnaca. <sup>15</sup> Filólogo y Julia, Nereo y chabe uabena, Olimpas y nýetsca Bëngbe Bëtsabe entšanga chëngaftaca innénutanangnaca šmochjácheuaye.

<sup>16</sup> Nýetscanga mo Jesucristbeyeca catšatangcá šmochjenuaye, jtenámochëse, ntšamo cach tšëngaftangbe pamíllanga puerte bonshanánaca šmondsetsacheuanaycá. Nýets luarenache enefjuana Cristbeñe ošbuachiyënga cmontsacheuaná.

<sup>17</sup> Jesucristbeyeca catšátanga, atše cbontsaïmpadana tšabá šmochjuáfšna y cuedado šmochtsebmna chë cánýenga ínýengaftaca contra chamotsemnana y ínýenga Jesucristbeñe ošbuachiyana chamotsajbanama innétsamëngbiana; chëngna, chë tšëngaftanga ndaye šmojóyëngaçñe buatëmbana soyëngama contra jtsóyebuambnayana. <sup>18</sup> Er chca amënga, ndoñe ntsentšénana Cristo Bëngbe Utabná jtseservénana, sinó jtsamana ndayá cachënga tmojtsebošcá, nýe cachëngbe cuerpama tšabá tojtsemncá; y tšabe y botamana palabrëngaca chë paselo jáingñana yomna entšanga jáingñana, chëngbe ainaniñe chëngcá chamotsejuabnama. <sup>19</sup> Nýetsca entšanga tmojouena, chë Bëngbe Bëtsabe soyëngama ntšamo ínýenga tcmojabuatambacá, tšëngaftanga corente šmnétsayaunanama, y chíyeca atše puerte oyejuayá tšëngaftangftaca sëntsemna. Atše sëntseboše, tšëngaftanga tšabá chašmotsetátšëmbo jtsamana ntšamo tšabá yomncá, y ntšamo bacna soyënga jamamna chašmotsemna mo ndoñe cuaftsetatsëmbcá. <sup>20</sup> Y Bëngbe Bëtsá, nda inétsama bënga ainaniñe tšabe ebionana chamotsebmnama, ndoñe bën y echanjama tšëngaftanga Satanás chašmoyëñjanama, mo cha tšëngaftangbe cucuatšinë cuafjaboshjoncá. Atše sëntseïmpadana Bëngbe Utabná Jesús, chaoma tšabe bendicionënga tšëngaftangbeñe chaotsemnana.

<sup>21</sup> Timoteo, chë átseftaca trabajayá, tšëngaftanga cmontsacheuaná; y Lucio, Jasón y Sosípater, cach atšcá Judeoquënga, chëngnaca tšëngaftanga cmontsacheuaná.

<sup>22</sup> Atšnaca Tercio, chë Páblëbe cuenta quem tsbuanácha uabiamnayá, tšëngaftanga cbontsacheuaná, tšëngaftanga y átšnaca Bëngbe Utabnáftaca cánýiñe mo canýacá quetsomñecá.

<sup>23</sup> Gayo cmontsacheuaná; atše Pablo chabe yebnentše posada sëntsebmna, y cha enduamana nýetsca chë muentša ošbuachiyënga tšabá júbuajana. Erasto, chë quem pueblentša crocénana bojanýá, tšëngaftanga cmontsacheuaná, y Jesucristbeyeca bëngbe catšata Cuártëna.

<sup>24</sup> Atše, Běngbe Utabná Jesucristo sěntseimpadana, cha chaoma tšěngaftangbeñe tšabe bendicioněnga chaotsemnama. Chca chaotsemna.

*Quem tsbuanácha juapochócoma, Pablo Běngbe Bětsábioye tbojtanchuá*

<sup>25</sup> Běnga sempre mochtsinýanýnaye Běngbe Bětsá puerte uamaná yomnama. Cha endobena jamama tšěngaftanga puerte chašmotsošbuáchema; y chca, cha echanjama ntšamo chě běnga fsěndabuayiyná tšabe noticiěnguiñe yomncá, ntšamo chě Jesucristbe buayenana soyěnga yomncá, y ntšamo chě Běngbe Bětsá šojinýanýe ndegombre soyěnga yomncá. Nýets tempo měntscoñama, Běngbe Bětsá chě soyěnga entsanga ndoñe tonjinýanýe, y chě causa chěnga chě soye ndoñe ntsetatšěmbuana. <sup>26</sup> Pero morna, ntšamo Běngbe Bětsabe juabna oyebuambnayěnga tmojanabemcá, tojama bětscá entsanga chě ndegombre soyěngama chamotsetatšěmbuama; Běngbe Bětsá, chě nýets tempo vida bomná, tojanmandá entsanga nýets luarěnguenache chě ndegombre soyěngama chamotsetatšěmbuama, chěnga chábeñe chamotsošbuáchema y ntšamo cha yobošcá chamot-samama.

<sup>27</sup> Nýe canýe Běngbe Bětsá endmēna, y cha nýets osertánana endbomna. ¡Nýetscanga chamotsinýanýná cha puerte bětsá y uamaná yomnama, ndayá Jesucristo tojanmama! Chca chaotsemna.

# 1 Corintios

## *Pablo chënga jacheuayama*

<sup>1</sup> Atše Pablo, ndábioye Bëngbe Bëtsá tbojanchembo Jesucristbe ichmoná jtsemnama, Bëngbe Bëtsá chca yojánbošeyeca, cánýiñe chë Jesucristbeyeca catšata Sósteneseftaca, <sup>2</sup> quem tsbuanácha sentsabiamná tšëngaftanga chë Corinto bëts puebloca Jesucristbeñe ošbuáchiyëngbiana; ndëmuanýenga Cristo Jesúseftaca Bëngbe Bëtsá tojábiana chabe entšanga nýe chábioye oservénënga, ndëmuanýenga Bëngbe Bëtsá tojáchembo chabe entšanga chašmotsemnama, chë nýe quem luarama enójuabnaye entšanguentsana luarénënga, Bëngbe Utabná Jesucristbioye tmojotsëmbonëngaftaca, Jesucristo nda yomna Bëngbe Utabná y chëngbe Utabná. <sup>3</sup> Atše sentsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama, y tšëngaftangbe ainaniñe tšabe ebionana chašmotsebomnama.

## *Bëngbe Bëtsá Jesucristbeyeca tojama tšëngaftanga ba tšabe bendicionënga chašmotsebomnama*

<sup>4</sup> Bëngbe Bëtsá tšëngaftangbiana sempre sëndbëtsatschuanaye, er tšëngaftanga cánýiñe mo canýacá Cristo Jesúseftaca šmómnyeyeca, Bëngbe Bëtsá tšëngaftangbeñe tojajuabó, tšëngaftangbe tšabiana. <sup>5</sup> Chca Crístoftaca šmómnyeyeca, Bëngbe Bëtsá tojama tšëngaftanga chašmotsebomnama chábensana nýetsca tšabe soyënga, tšëngaftanga obenana chašmotsebomnama cha jamëse, Bëngbe Bëtsabe soyëngama jóyebuambayama y chë soyëngama chacmësertama. <sup>6</sup> Chca, ntšamo chonjanabuayiynacá mo Jesucristbe ndegombre soyëngcá, tšëngaftángnaca ínýengbioye tšabá šmojinýanyé ndegombre soyënga bëtsemnama, chë ntšamo jtsiyenama. <sup>7</sup> Y chca, Bëngbe Bëtsá chabe entšanga inétsatsatnaye tšabe soyënguentsana tondaye quecmochatabuáshebena, Bëngbe Utabná Jesucristo quem luarentše yochtónýna tescama Bëngbe Bëtsábeñe jtsošbuáchiyëse chašmojtsojátmanëntscuana. <sup>8</sup> Cha echanjama tšëngaftanga chábeñe corente chašmotsošbuáchema y ainaniñe bëts añemo chašmotsebomnama, ndayá tšëngaftangaftaca jamama cha yojuabnacá chaojapochocantscuana; chca, chë Bëngbe Utabná Jesucristo nýetsca entšangbiana tšabá o ndoñe tšabá tmonjamama yochjayana te, ndocná chaondobená jayanana tšëngaftanga ndoñe tšabá šmonjama ca. <sup>9</sup> Bëngbe Bëtsá nýets tempo jtsamana ntšamo tojašebuachenacá, y cha endmëna nda tcmojánachembo cánýiñe mo canýacá chašmotsemnama chabe Uaquiñá Jesucristoftaca, Bëngbe Utabná.

## *Choca ošbuachiyëngbeñe nýetscanga ndoñe cachcá montsanjuabná*

<sup>10</sup> Jesucristbeyeca atšbe catšátanga, tša cbontsaimpadana, chë ndayá Bëngbe Utabná Jesucristo nýetsca bëngbiana yomnama, tšëngaftanga nýetscanga cachcá chašmotsejuabnama, y tšëngaftangbeñe ndoñe más báseftanga canýe soye y ínýenga inýe soye chamuatsjuabná. Y aiñe šmochtsiyena mo canýacá, nýetscanga cachcá jtsejuabnayëse y cachcá jamama jtsebošëse. <sup>11</sup> Jesucristbeyeca atšbe catšátanga, atše chca sënjayana, er Cloebe yebnentšënga šmonjabëuenaye, tšëngaftangbeñe šmojtsepenzentserama. <sup>12</sup> Ntšamo sentsichamcá entsemna ndayá tšëngaftangbentše báseftanga šmojttsichamo: “Atše Páblëbe ustoná sëndmëna ca”; ínýengna imojtsichamo: “Atšna Apólosbe ustoná sëndmëna ca”; ínýenga: “Atšna Pédrëbe ustoná sëndmëna ca”, y ínýengna: “Atšna Cristbe ustoná sëndmëna ca” imojtsichamo. <sup>13</sup> Chca šmojttsamama, jtsóbocanana mo cada básefta ošbuáchiyënga canýe Cristo tmojtsebomncá. ¿Pablo yojamna nda tmojancrucificá tšëngaftangbe tšabiana? ¿O tšëngaftanga uabáinënga šmomna, atše jótšëmbonëse, tšëngaftanga atšbe ústonënga bëtsemnama? <sup>14</sup> ¡Bëngbe Bëtsá sëndbëtsatschuanaye atše ndocná tšëngaftanguentsá tjanábayama; nýe Crispo y Gáybioye

aíñe! <sup>15</sup> Chca, ndocná quenátobena jayanana, atše jótšëmbonëse uabainá cha tojanoquedá ca, mo átšbeñe ošbuáchiyënga cuaftsemncá. <sup>16</sup> Estéfanabe pamillentsëgnaca sënjanëbaye, pero ndoñe quetsatabouínÿna inÿa tijanáyama. <sup>17</sup> Er Cristo ndoñe chešnatanichmó inÿenga jubáyama, ndayá chë chabe tšabe noticiëngama entšanga jábuayenama. Ndoñe chešnatanichmó chë soyënga jayanama, corente osertana entšangbe soyënga jtsichámëse; chca, entšanga Crístbeñe chamotsošbuáchema, ndoñe chë atšbe osertánanentšana palabrengama, sinó nÿe chë buayenánama, Cristo cruzoca bëngbiana tojanóbanama.

*Crístbeñe yomna Bëngbe Bëtsabe obenana y osertánana*

<sup>18</sup> Quem buayenánana, Cristo entšangbiana cruzoca tojanóbanama, chë pochocánënga jtsemnama tmojtsajnëngbioye jtsinÿanana mo ndoñe corente juabna bomnëngbe soycá; pero bëngbiana, chë Bëngbe Bëtsá nÿetsca tescama šochjátsebacangbiamna, quem buayenánana jtsinÿanÿayana Bëngbe Bëtsabe obenana. <sup>19</sup> Ntšamo Bëngbe Bëtsá chabe uabemana palabrenguiñe tojanayancá:

Atše chanjama chë tša osertánëngbe osertánana tondayama chaondëtsoservénama; y chanjama chë ba soyëngama osertánëngbe osertánana tondayama chaondëtsámanama.

<sup>20</sup> ¿Ntsachetšá yojtsámana chë tša osertaná y chë puerte uatsjinÿená tbojayana soyënga? ¿Ntsachetšá yojtsámana chë tša tšabá chë soyëngama juabnayá, morscá, y inÿengaftaca enatsëtsnaye ora chëngbe ayëñjanayá tojayana soyënga? Ndegombre Bëngbe Bëtsá tojinÿanÿé, chë quem luarentša bëts osertánanaca tmojayana soyënga tondaye yonduámanama. <sup>21</sup> Bëngbe Bëtsá, nÿets osertánana bomná quetsomñecá y puerte tšabá jtsejuabnayëse, ndoñe tonjanalesenciá quem luarentša entšanga cha chamotsábuatmama, chë quem luarentšënga tša osertánënga tmojánayana soyëngama. Chamna, cha tšabá tbojanínÿnana chábeñe ošbuáchiyënga játsebacana chë bënga fsëndabuayiyiná soyëngama, masque inÿengbioyna mo ndoñe corente juabna bomnabe soycá jtsinÿanana.

<sup>22</sup> Judiënga tša jtsebošana y Bëngbe Bëtsábioye jtsotjanañana bëts soyënga chaomama, chabe obenana jinÿanÿiyama; y ndoñe judiëngna tša jtsenguayana chë puerte osertánëngbe soyënga jtsetatšëmbuama. <sup>23</sup> Pero bëngna Crístbiana entšanga fsëndabuayiyiná, chë inÿenga tmojancrucificabiana. Quem buayenánana chë judiënga ndoñe tšabá ntjëuénanana. Y ndoñe judiënga mondbëtsejuabnaye chca yomna mo canÿe ndoñe corente juabna bomnabe soycá ca; <sup>24</sup> pero bëngbiana, nÿetscanga Bëngbe Bëtsá chabe entšanga chamotsemnama šojáchembëngbiamna, masque judiënga o ndoñe judiënga, Crístbeñe endmëna nÿets Bëngbe Bëtsabe obenana y osertánana; <sup>25</sup> er ndayá Bëngbe Bëtsá tojanmcá, Cristo cruzoca chaóbanama jalesénciase, banga jtsinÿanana mo canÿe ndoñe corente juabna bomnabe soycá, pero ndegombre endmëna canÿe puerte más osertaná tojama soye, lempe ntšamo entšanga imotatsëmbuama. Y ndayá cha tojamcá masque bángbioye jtsinÿanana mo canÿe tondaye obenabe soycá, ndegombre chë soye jtsinÿanÿayana Bëngbe Bëtsá puerte más obenana yobomnama, nÿets obenana ntšamo entšanga imobomnama. <sup>26</sup> Jesucrístbeyeca atšbe catsátanga, šmochtsejuabnaye ntšamo yojamnama, Bëngbe Bëtsá chabe entšanga chašmotsemnama tmojánachembo ora. Tšëngaftangbentše nÿe báseftanga tša osertánënga šmojamna, ntšamo chë osertánana bomnënga imomnama entšanga mondbetsejuabnaycá; y báseftanga šmojamna becá mando atšetanënga o uámana pamillentsënga. <sup>27</sup> Pero Bëngbe Bëtsá, quem luarentše ndoñe tša osertánënga tojanabacacá, chca, cha jamama chë quem luarentša soyëngama tša osertánënga chamotsëuatjama; y cha, quem luarentše ndobenënga tojanabacacá, chca, chë obenana bomnënga chamotsëuatjama. <sup>28</sup> Bëngbe Bëtsá quem luarentšana tojanbocacá ndayá tondaye yonduamancá y ndayá inÿenga imuabotencá; tojanbocacá ndayá tondaye yonduamancá, chca, ndayá quem luarentše tša iuamancá tondaye chaondëtsámanama. <sup>29</sup> Y chca, Bëngbe Bëtsabe delante ndocná quenátobena jayanana



tša bētsá cha yomna ca. <sup>30</sup> Bēngbe Bētsá tojama bēnga Crísoftaca cányiñe mo canyáca jtsemnēse chamotsiyenama, y chábeyeca tojama bēnga chamóyēngacñama chabe osertánana bomna soyēnga; chábeyeca tojama bēnga tsábenga chabe bominyñe chamotsemnana, chabe entsānga jtsemnana chamobenama, puerte tsábenga cach Bēngbe Bētsacá, y atsebácanēnga chamotsemnana. <sup>31</sup> Y chca, ntšamo Bēngbe Bētsabe uabemana palabrēnguiñe endayancá: “Nda tojtseboše jayanama cha canye uamaná yomna ca, chamna más tsabá cha bontsemna jayanama Bēngbe Utabná puerte uamaná yomna ca.”

## 2

### *Ntšamo Pablo Cristo crucificanábiamama chēnga tojanabuayená*

<sup>1</sup> Pero, Jesucristbeyeca atšbe catšátanga, Bēngbe Bētsabe ndegombre soyēngama tsēngaftanga jábuayenama sēnjána ora, chca sēnjanma ndoñe chē uámanēngbe palabrēngaca, ni chē tša osertánēngbe palabrēngaca. <sup>2</sup> Y tsēngaftangaftaca sēnjamna ora, ndoñe quetstétseboše nye ndayíñnaca jatsjuabnayana, ndayá nye Jesucristbeñe, nda bēngbe tsabiamama tmojan crucificá. <sup>3</sup> Atše tsēngaftangbeñe sēnjamna, mo canya ba soyēnga jamama ndobenacá, y mo canya puerte auatjacá y tbojtsengmēmncacá, chabe trabajo jamama ndoñe jobenayama juabnaye causa. <sup>4</sup> Ntšamo cbonjanētsētsná y cbonjanabuayiynacá atše sēnjanoyebuambá ndoñe chē tša osertánēngbe palabrēngaca, tsēngaftanga jáyēnjanama chiñe chašmotsošbuáchema; pero aīñe tcbonjanayēnjaná, Bēngbe Bētsabe Espíritu y chabe obenana tsēngaftanga jinyanñiyēse, <sup>5</sup> chca, tsēngaftanga Bēngbe Bētsabeñe chašmotsošbuáchema, ndoñe nye entsāngbe osertánanaca, sinó Bēngbe Bētsabe obenanama.

### *Uámana Espíritbeyeca, Bēngbe Bētsá jamana entsānga cha chamotsábuatmama*

<sup>6</sup> Pero, chē ya tmojashjáchēnga Bēngbe Bētsabeñe puerte jtsošbuáchiyama y chabe soyēngama corente jtsoertánama, chēngbeñe bēnga fchandóyebuambaye becá osertánana bomna soyēnga. Pero ndoñe quenátsmēna quem luarentša entsānga quem tempo mondbétsichamo soyēnga, ni mora quem luarentše amēndayēngbe soyēnga, ndēmuanñyēnga ndoñe bēn y ndocna obenana bomnēnga mochanjēftsoquéda. <sup>7</sup> Y aīñe, chē bēnga fsēndoyebuambná osertánana bomna soyēnga endmēna chē Bēngbe Bētsá quem luarentša entsāngbiōye baytentscuana ndoñe tonjaninñanñé soyēnga, y chca, entsānga baytentscuana chē soyēnga ndoñe tmonjanábuatmana. Cha yojanjuabná chē soyēnga chca yochtsanmēnana, quem luare cabá cha ndēma ora, y yojanjuabná, chē soyēngaca bēnga mochtsanobena puerte bētsētsānga y uámanēnga jtsemnana, cháftaca chē nyetsca tescama yomna tsabe vida jtsebomnana. <sup>8</sup> Quem Bēngbe Bētsabe puerte osertánana bomna soyēnga endmēna canye soye ndayá quem luarentša amēndayēnga ndoñe ntsēsertánana, er chēnga aīñe matēnjanēsértase, Bēngbe Utabnábiōye chēnga ndoñe matmēnjan crucificá, Bēngbe Utabná nda puerte bētsá y uamaná yomna. <sup>9</sup> Bēngbe Bētsabe uabemana palabrēnguiñe quem Bēngbe Bētsabe puerte osertánana bomna soyēngama mēntšá endayana:

Cha imobobonshánēngbiama Bēngbe Bētsá tojaprontá soyēnga, ndocná tonjinñe, ni tonjouena y ni mo tonjajuabó ca.

<sup>10</sup> Pero Bēngbe Bētsá quem soyēnga chabe Espíritoftaca bēnga šojanñanñé, er chē Espíritu lempe jtsetatsēmbuana, chē Bēngbe Bētsabe soyēngama puerte totcá josértama yomna soyēngámnaca.

<sup>11</sup> Entsāngbeñe ndocná quenátobena jtsetatsēmbuana ndayá entsabe ainaniñe tomnana, sinó nye chē entsabe espíritu, chē chabeñe yomná. Cachcá, nye Bēngbe Bētsabe Espíritu jtsetatsēmbuana ndayá Bēngbe Bētsá tojuabnacá. <sup>12</sup> Y bēngna, Bēngbe Bētsábiocana Espíritu tmojóyēngacñe, ndoñe canye quem luarentša espíritu, chca, bēnga chašósertama

chë Bëngbe Bëtsá tojama bënga chamotsebomna soyëngama, bëngbe tšabiama cha jtsejuabnayëse. <sup>13</sup> Bënga chë soyëngama fsëndoyebuambná, ndoñe chë quem luarentša entsángbentsana tifjuatsjinýe osertánana bomna palabrëngaca, sinó chë Bëngbe Bëtsabe Espíritu šojabuatambá palabrëngaca. Chca, Bëngbe Bëtsábiocana soyëngama bënga fsëndabuayiyiná, Bëngbe Bëtsabe Espíritbentsana yóbocana palabrëngaca, chë Uámana Espíritu ainaniñe imobomnéngbioye.

<sup>14</sup> Bëngbe Bëtsabe Espíritu ndoñe tondbomná, chabe ainaniñe ndoñe ntjójyëngacñana chë Bëngbe Bëtsabe Espíritbiocana yóbocana soyënga, er chë entsabiama chë soyënga jtsemnana mo canýe ndoñe corente juabna bomnabe soyëngcá, y chabosertama cach ndoñe ntsobenana. Chca endmëna, er entsá jobenayana quem soyëngama jtsetatšëmbuama y josértama, nýe chabe ainaniñe chë Uámana Espíritu tbojtsájabuachanëse. <sup>15</sup> Pero nda aíñe chë Espíritu tbojtsebomna jtsobenana nýetsca soyënga tšabá jinýama chabosertama, y ndocná chë Espíritu ndoñe tbondbomná ntsobenana josértana ntšamo chë Espíritu bomná yomnama. <sup>16</sup> Er Bëngbe Bëtsabe uabemana palabrënguiñe mëntšá endayana: “Ndocná quenátabuatma Bëngbe Utabnabe juabna, chábioye jabaútëmbama chaotsobename ca.” Pero bënga, chë ošbuáchiyënga, mondobena jajuaboyana ntšamo Cristo yojuabnacá.

### 3

#### *Jatrabájama enutanánënga Bëngbe Bëtsá jasérviamá*

<sup>1</sup> Pero, Jesucristbeyeca atšbe catsátanga, atše ndoñe chiyatanobená jóyebuambayama, mo tšëngaftanga chë Uámana Espíritoftaca mandánënga šmojatsmëncá, sinó nýe cachënga tšabá jtsomñama juabnënga bomna entsangbioycá, mo basetemëngbioycá, Cristbe soyëngama josértama ndobenënga. <sup>2</sup> Mo canýe bebmácá, chabe basetémbioye nýe létsiye jafsiyana y paselo jabmuánama sananga, chë básetema chcana jasama cabá ndoñe ntsobenana causa, cachcá, atše cbonjanabuatambá Bëngbe Bëtsabiama nýe chë más paselo josértama soyëngama, y ndoñe inýe soyënga más totcá josértama soyënga, er tšëngaftanga ndoñe quešmënjatobena chca soyëngama josértana. Y ni mora, tšëngaftanga quešmátobena Bëngbe Bëtsabe soyëngama josértana, chë josértama más totcá yomna soyëngama; <sup>3</sup> er tšëngaftanga cabá šmojtsama, nýe ntšamo cach tšëngaftanga tšabá jtsomñama tšëngaftangbe juabnënga yomncá. Y tšëngaftanga ínýengaftaca cabá yapa šmojtsenántšaboše y nýe ínýengbioye jayénjanama soyënga šmojtsamëntscuana, tšëngaftanga šmojtsama nýe ntšamo cach tšëngaftanga tšabá jtsomñama tšëngaftangbe juabnënga yomncá, y chca, tšëngaftanga šmojtsiyena mo chë nýe quem luarama enójuabnaye entsangcá. <sup>4</sup> Er canýa: “Atše Páblëbe ustoná sëndmëna ca”, y ínýana: “Atše Apólosbe ustoná sëndmëna ca” tojayana ora, chca jtsamana mo chë nýe quem luarama enójuabnaye entsangcá.

<sup>5</sup> Tšëngaftanga chca šmojamama, atše šontsemna tšëngaftanga játjayana: ¿Ndayá Apolos yomna? ¿Ndayá Pablo? Chatna co nýe Bëngbe Bëtsábioye oservénata bondmëna, ndátbeyeca tšëngaftanga Jesucristbeñe šmojtsošbuaché, y bëndata cada ona fsënjama chë Bëngbe Bëtsá šojanýanyé trabajo. <sup>6</sup> Atšna, mo nda jajañe jénaye cuafjuatbontsacá, tšëngaftangbeñe sënjanbojatsé chë trabajo, Bëngbe Bëtsabe soyëngama jábuayenama; y Apolos, mo nda chë jajañe matënguiñe béjaye cuaftsebuešcñnacá, enjantrabája cach atše sënjanbojatsé chiñe; pero Bëngbe Bëtsá, ntšamo matatémënga chauájuaama endbet-samcá, tojama banga tšëngaftanguentšë Jesucristbeñe chamotsošbuáchema. <sup>7</sup> Ntšamo, chë jená y chë matënguiñe béjaye buešcñayá ndoñe yapa ntsámanana chiñe shajuanënga chaóboconama, nýe Bëngbe Bëtsá aíñe, cachcá, nda Bëngbe Bëtsabiama entsanga jábuayenama trabajo tojabojatsé y nda chentšana tojášhango cach trabajuiñe jóntšama, ndoñe ntjamana entsanga Jesucristbeñe chamotsošbuáchema; nýe Bëngbe Bëtsá chca jamana.

<sup>8</sup> Chë jená y chë matiñe béjaye buešcjayá cach trabajuiñe jtsentšénana, y chatna mo trabajayatcá jtsámanana; y cada ona juácanana ntšamo chabe trabajo tomncá.

<sup>9</sup> Bëndata fsëndmëna trabájayata Bëngbe Bëtsabiama oservéniñe, y tšëngaftanga šmondmëna mo Bëngbe Bëtsabe jajañcá, ndayentše cha yojtseboše tšabe jaja saná chaóbcnana, y šmondmëna mo chë cha yojtsejebuana bëts yebncá. <sup>10</sup> Er Bëngbe Bëtsá atšbe tšabiama jtsejuabnayëse, chë trabajo šojabonyé, y atše mo canye puerte tšabe jebuanacá, canye yebna ndayiñe chaotsécuatjonama tojapormacá, sënjanbojatsé chë trabajo, Bëngbe Bëtsabe soyëngama tšëngaftangbeñe jábuayenama. Chentšana inya, mo chë inye yebna jebuaná tojajobatsé jajebuama chiñe más jatsjebuama nda tojatontšecá, cach atše sënjanbojatsé trabajuiñe tojanontsé. Pero cada ona botamana chaotsantješna ntšamo chë trabajo yojtsamama. <sup>11</sup> Mo chë cányabentšana inye trabajayacá, ndoñe ntšobenana chë yebna jajebuama tojanbojatsé cha chë yebna chaotsécuatjonama tojanpormañe inye soye cachcá chaoservema jatspórmana, cachcá, ndocná chaondëtsabuatambá inye soyënga, nye ntšamo Jesucristbe soyënga yomncá aiñe, chë ntšamo atše natsana sënjanabuatambacá. <sup>12</sup> Chë Jesucristbiama más uámana soyënga buatëmbayá jtsemnana mo chë castellano, midio y inye uámana soyëngaca yebna jebuanacá; y chë Jesucristbiama nye nduámana soyënga buatëmbayana mo chë niñëbenga, butšajësha y tëshenjñesheca yebna jebuanacá. <sup>13</sup> Y Cristo chaojésabo te, Bëngbe Bëtsá echanjínyanyiye ntšamo cada cányabe trabajo yomnana. Cha chë te iñesheca chca echanjínyanyiye, y chë iñesheca, Bëngbe Bëtsá echanjinnye y echanjínyanyiye ndaye trabajo cada ona tojamama. <sup>14</sup> Ntšamo cada cányabe trabajo yojtsámanama jtsetatšëmbuama Bëngbe Bëtsá chaojinnye ora, cha chabe trabajo aiñe yojtsámana ca queojayanëse, chë tšabe trabajayá Bëngbe Bëtsábiocana canye uacanana soye echanjójyëngacñe, er cha jtsemnana mo canye entšacá, nda canye yebna tojtsejebuana jtsejuinyama ndoñe paselo tondmëna soyëngaca. <sup>15</sup> Pero chë te cányabe trabajo nye batšá yojtsámanama Bëngbe Bëtsá iñesheca chaojinyanyëse, chora chabe trabajo echántsemna mo chë jtsejuinyama paselo tomna soyëngaca jebuanabe soyëngcá, chentšana nyets yebna jtsejuinyana. Chë jebuaná jtsachana, pero chabe trabajo lempe jobuétsana. Cachcá, chë Bëngbe Bëtsabiama trabajo tojtsamá, nye batšá oservena trabajo, cha echanjobenaye atsbocaná jtsemnana, masque lempe ntšamo tojamcá tondaye queochaisoquéda.

<sup>16</sup> ¿O tšëngaftanga ndoñe šmondëtatšëmbo nyetscanga cányiñe Jesucristbeñe ošbuachiyëngcá, mo chë Bëngbe Bëtsabe bëts yebncá šmomnana, y tšëngaftanguentše Bëngbe Bëtsabe Espíritu yomnana? <sup>17</sup> Nderado nda tojama, tšëngaftanga nyetscanga cányiñe Jesucristbeñe ošbuachiyëngcá jtsemnana chaotsopochocama, Bëngbe Bëtsá chábioye bochantsepochóca, er chë Jesucristbeñe ošbuachiyëngcá cányiñe imomnënga, jtsemnana mo chë Bëngbe Bëtsabe bëts yebncá, chabe entšanga nye chábioye jaserviama; y tšëngaftanga chca šmondmëna.

<sup>18</sup> Ndocná cachá chaondëtsenoíngña. Nderado nda tšëngaftanguentšá tojtsejuabná cha tša osertaná yomna ca, ntšamo quem luarentša entšanga mondbëtsejuabnaye ntšamo canye puerte osertaná inëtsemnana, cha bontsemna jóbemama mo canya ndabiama quem luarentša entšanga chamuayana cha corente juabna ndbomná yomna ca, chca, ndegombre corente osertaná jtsemnana chaobenama. <sup>19</sup> Er chë quem luarentša entšanga tša osertánënga imotátšëmbo soyënga, Bëngbe Bëtsabe bominyiñe yomna mo chë corente juabna ndbomnabe soycá. Bëngbe Bëtsabe uabemana palabrenguiñe mëntsá endayana: “Bëngbe Bëtsá chë tša osertánënga jáyëñanana, ndayá cachënga inyënga jáingñama tša osertánánaca tmojtsama soyëngaca ca.” <sup>20</sup> Y mëntsánaca endayana: “Bëngbe Utabná endëtatšëmbo chë tša osertánëngbe juabnënga tondayama yondoservënama ca.” <sup>21</sup> Chíyeca, ndocná chaondëtsichamo corente uamaná yomna ca, ndaye entšabe us-toná tomnana, er lempe ntšamo šmobomncá, Cristbeñe ošbuáchiyënga bëtsemnana, tšëngaftangbe tšabiama endmëna, y nyetscanga chë tcmojujabuachëngnaca cachcá.

<sup>22</sup> Lempe tsëngaftangbe soye endëtsomñe: ndayá Páblëbeyeca yomncá, Apólosbeyeca, Pédrëbeyeca, ndayá quem luarentse yomncá, ndayá yomncá ainá tcojtsemna ora, tcojóbana ora, ndayá mora yomncá y chë más chcoye yochtsemncánaca. <sup>23</sup> Y tsëngaftanga Crístbenga šmondmëna, y Cristna Bëngbe Bëtsábia.

## 4

### *Jesucristbe ichmónëngbe trabajo*

<sup>1</sup> Entšanga entsamna bëngbiana jtsejuabnayana bënga fstsemna Cristbe uajabuáchanënga y Bëngbe Bëtsabe soyëngama jtsabuátambayama trabajo bomnënga, chë Bëngbe Bëtsá baytentscuana entšangbioye ndoñe tonjaninÿanyé, pero mora aiñe tojinÿanyé soyënga jtsabuátambayama trabajo bomnënga. <sup>2</sup> Chca, nda canÿe trabajo tojtsebojanÿabiamna, chabe mandayá jtsobátmanana cha aiñe tsabe palabra bomná chaotsemnama. <sup>3</sup> Atšbe bariëna, tondaye quenatámama, ntšamo tijamcá šmojinÿe y ndoñe tsabá tijama ca šmojayanëse, o inÿe entšanga cachcá tmojayanëse mo canÿe tribunaliñcá. Ni cach atše ndoñe chca quetsátama, jtsetatsëmbuana ntšamo atšbe trabajuama tijayancá ndegombre tayojtsemnama. <sup>4</sup> Atšbe ainaniñe ndocna juabna quetsátsbomna atše chašuyanama bacna soye tijama ca, pero chca ndoñe quenátayana, ndegombre Bëngbe Bëtsabe delante ndocna bacna soye ndbomná atše stsemna ca. Er Bëngbe Utabná endmëna nda atšbe trabajo yonÿá y nda ndegombre yobena jayanama atše tsabá o ndoñe tsabá tijamama. <sup>5</sup> Chíyeca, tsëngaftanga ndoñe quecmátamna jinÿana y jayanana ínÿenga ndoñe tsabá tmonjama ca, chë nÿa chama tempo cabá ndóshjanguëntscuana, Bëngbe Utabná chama chaojésabo ora. Cha chaojésabo ora, puerte tsabá echanjinÿanyÿe chë iytëmencá yomna soyëngama, mo ibetiñe cuaftsemncá, y botamana echanjinÿanyÿe, mo binÿniñcá, ndayá jamama nÿe chëngbe ainanoca entšanga tmojajuabocá. Y chora Bëngbe Bëtsá cada entšabiana echanjayana tsabe soyënga, ntšamo tbojtsomerecencá.

<sup>6</sup> Jesucristbeyeca atšbe catsátanga, chë soyëngama tsabá jábuayenamna, atše sënjama ntšamo Apolos y atše tifjatrabájama botamana chašminÿama, y chca sënjama tsëngaftangbe tsabiana, ntšamo bëndata tifjamentšana chašmuatsjinÿama jtsiyenana nÿe ntšamo Bëngbe Bëtsabe uabemana palabrënguiñe iuayancá, y ndocná tsëngaftanguentsá canÿe entšabiana chaotsenábotamnaye, y ínÿabiana ndoñe tsabá chauátoyebuambnama. <sup>7</sup> Er, ¿nda chë ínÿengbiana más uámanënga tsëngaftanga cmojtsabiamná? ¿Y ndayá šmobomna, Bëngbe Bëtsá ndoñe tcmojtsatá soye? Y tsëngaftanga chca chašmotsebomnama cha tojanmëse, ¿ndáyeca šmojtsenabotamná mo Bëngbe Bëtsabe tšetana soyënga ndoñe tontsemncá, y nÿe cach tsëngaftangbeyeca šmojonÿencá?

<sup>8</sup> Tsëngaftanga šmojtsejuabná ya lempe ntšamo cmëjabotcá Bëngbe Bëtsábiocana šmojtsebomna ca, y lempe ntšamo jtsebošama šmojtsobencánaca ca. Mo reyënga cuaftsemnëngcá cmojtsabiona, bëngbentsana tondaye ntsëjabotcá. Malaye tsëngaftanga mo reyëngcá šmojtsemna, Crísoftaca cánÿiñe jtsemándayëse; chca, bëngnaca tsëngaftangaftaca jtsemnama, cánÿiñe jtsemándayëse. <sup>9</sup> Atše šontsinÿana, bënga chë Cristbe ichmónënga Bëngbe Bëtsá šojábiana mo chë nÿetscangbiana más nduamanëngcá, mo chë jóbanama yojtsemna entšangcá. Nÿetscanga chë Bëngbe Bëtsá tojábiamënga bëngbioye jtsënÿayana mo ndoñe cachca entšanga fstsemncá; angelënga y entšangnaca cachcá bëngaftaca montsama. <sup>10</sup> Bënga, Cristbiana oservena causa, quem luarentša entšangbiana fsëntsinÿna mo corente juabna ndbomnëngcá; chë cuenta, tsëngaftanga šmojtsejuabná Cristbe soyëngama corente osertánënga šmomna ca. Bënga fsëndmëna chë entšangbe bominiñe ndocna obenana ndbomnënga; y tsëngaftangna šmojtsejuabná puerte obenana bomnënga šmomna ca. Tsëngaftangbioye ínÿenga puerte uámanënga y bëtsëtsanga jtsabiamnayana, pero chënga bëngbioye jtsëbuayënjana. <sup>11</sup> Y mëntscoñama, bënga šontsabuashebebiana saná, ndayá jofšiyama y entšayá. Entšanga bëngbioye



bacá jtsaborlánana, y tondaye yebna queftsátsbomna. <sup>12</sup> Y bēnga puerte jabuache fsēndētrabája cach bēngbe cucuatsēngaca. Entsanga šojóyanguango ora, Bēngbe Bētsá fchandbétseimpadana cha chaoma chēnga tšabe bendicionēnga chamotsebomnama. Bēnga chamosufrima ínŷenga tmojt sama ora, bēnga chē soye fchandbét soboyaye. <sup>13</sup> Inŷenga bēngbiama bacá tmojtsoyebuambná ora, jtsababuánŷeshanēse fsēnduamana jtējuana. Quem luarentša entsangbe bominiŷiŷe bēnga jtsemnana chē puerte nduámanēnga, mo chē quem luarentša basurēshēngcá, chē quem luarentša entsanga tondayama ndoservénēnga, mo chē quem luarentša tsengacá; y chca endmēna mēntscoñama.

<sup>14</sup> Quem soyēnga ndoñe quecbatēbuabiarná tšēngaftanga chašmotsēuatjama, sinó ndayá jábuayenama mo cach atšbe basengbioycá, atšbe bonshánēnga. <sup>15</sup> Er masque tšēngaftanga mallajta abuátambayēnga chašmotsóbomñe, jacúntama ntjobenaycá, Crístbiama chacmotsabuátambama, ndoñe banga quešmátabamna tšēngaftangbiama mo taitangcá, Cristo Jesúsbeñe jtsošbuáchiyama tcmojanējabuachama. Nŷe atše sēndmēna mo taitacá tšēngaftangbiama, mo ošbuachiyēngcá, er atše natsana tcbonjanabuayená chē tšabe noticiēnga Jesucristbiama, y tšēngaftanga chiñe šmontsanošbuaché. <sup>16</sup> Chíyecna, cbontsaimpadana ntšamo atše tijamcá chašmotsamama.

<sup>17</sup> Chama Timoteo tšēngaftangbioye sēntsichamná, atšbe bonshaná, canŷe aíñe tšabe palabra bomná; Bēngbe Utabnábeñe tojanošbuachéyecna, atše Crístbiama sēnjanbuayiyná ora, mo atšbe uaquiñacánaca cha endmēna, ntšamo chabe ošbuáchiyana yomnama. Cha echanjama tšēngaftanga chašmuatenójuaboma ntšamo atše tšēngaftangbeñe tsjoyenama, Crístbeñe ošbuachiyacá, ndayama atše nŷets tempo ošbuáchiyēnga sēndbetsabuatambaycá nŷets luare ošbuáchiyēnga enefjuanenache. <sup>18</sup> Tšēngaftanguentše báseftanga ya šmojttsjuabná puerte uámanēnga šmojtsemna ca, er šmojtsejuabná atše stsauatja tšēngaftangbioye jama jányama ca. <sup>19</sup> Pero Bēngbe Bētsá chašojalesenciase, sēntsobátmana betscó tšēngaftangbioye jama jányama. As chjinŷe ntsache obenana imobomna chē Bēngbe Bētsabe entsangcá jtšiyenama tša uámanēnga imomna ca juabnayēnga, y ndoñe nŷe ntšamo jayanama imobencá. <sup>20</sup> Er Bēngbe Bētsá canŷe ošbuachiyabe ainaniñe tojtsemánda ora, chca jtšinŷnana ndoñe nŷe ntšamo tojtsichámuama, ndayá Bēngbe Bētsabe obenana chábeñe tojtsemnama. <sup>21</sup> ¿Tšēngaftanga ndayá más šmattseboše: atše chayá tšēngaftangbioye jaucácanama, o chayá tšēngaftangbioye jányama puerte bonshanánaca y ntsetšatjaycá tšēngaftanga jauyanama?

## 5

### *Ndayá cuanjama canŷe boyabása shembásaftaca bacna soye amáftaca*

<sup>1</sup> Ndegombre nŷets luariñe entsótatsēmbo tšēngaftanguentše yojtsemna canŷa, shembásaftaca bacna soye amá, y ntšamo cha yojtsamcá puerte bacna soye yojtsemna; ni chē Bēngbe Bētsábioye nduabuátmēnga chca ntsamana: canŷe entsá cachabe mamamnáftaca bacna soye yojtsama. <sup>2</sup> Y tšēngaftanga cabá šmojttsjuabná corente tšábenga šmomna ca, masque chca tšēngaftangbeñe yojtsopasánēse. Tšēngaftanga cmontsamna puerte ngménaca jtsemnana, tša uabouana soye cha yojtsama causa. Canŷe entsá chca tojamáftacna, tšēngaftanga cmontsamna jamana cha ndoñe más tšēngaftangaftaca chaondenútanama mo ošbuachiyacá. <sup>3</sup> Y atšna, masque tšēngaftangaftaca choca ndoñe quetsátsmēna, atšbe juabna choca tšēngaftangaftaca entsemna; y chca atšbe espíritoca sēntsemnayeca, Bēngbe Utabná šojéftsanatšetá mándoca, sēnjajuabó y sēntsetatsēmbo ntšamo tšēngaftanga cmojtsamnama, chē entsá chca tojamáftaca. <sup>4</sup> Tšēngaftanga chašmojénefjna ora, chentše atšbe espíritoca tšēngaftangaftaca atše chántsemna, y atšbe espíritu chentše echántsemna Bēngbe Utabná Jesusbe obenánaca. <sup>5</sup> Y chora tšēngaftanga cmontsamna jamándana chē entsá ya ndoñe más tšēngaftangaftaca mo ošbuachiyacá chaondenútanama, mo Satanasbe cucuatšiniŷe cha cuafjaboshjónca,

chca, chë quem entsá nÿe cachá tšabá jtsomñama juabnënga chaotsopochocama, y chca, Bëngbe Utabná cachiñe chaojésabo ora, chabe espíritu atsbočaná chaotsemnama.

<sup>6</sup> Tšëngaftanga šmojtsejuabná puerte tšábenga y uámanënga šmomna ca, pero šmojtseleséncia canÿa tšëngaftanguentše chca chaotsamama. Chca ndoñe tšabá quenátsmëna. Tšëngaftanga ya šmondétatšëmbo, ntšamo chë nÿe batšá levadura endbama, nÿets arninÿá chauábochema; cachcá, tšëngaftanguentše canÿa tša bacna soye chca tojama ora, nÿetscangbiana ndoñe tšabe soyënga jóbocnana. <sup>7</sup> Chíyeca, tšëngaftanga cmontsamna, chca uabouana bacna soye tojamá jtabocnana, cha ya ndoñe más tšëngaftangaftaca mo ošbuachiyacá chaondenútanama; y chora tšëngaftanga šmochántsemna mo tsëm arninÿacá, ndocna levadúraca, chë bacna juabnëngaca ya ndëmandánënga šmojtsémnayeca. Ndegombre tšëngaftanga chca šmondmëna, er Bëngbe Bëtsá tojama tšëngaftanga tsëm vida chašmotsebomnama. Bashco fiesta ora, oveshá tmojanóba, Israeloca entsánga perdonánënga chamotsemnama. Cachcá Cristo, mo chë oveshacá, tojanóbana bacna soyënguentsána bënga játsebacama. <sup>8</sup> Ntšamo chë judiënga chë fiesta ora mondbamcá, nÿets levadura ojamnana cachcá jonÿayana, cachcá, bënga šontsamna jtsajbanana oyenana bacna soyënga ínÿengbiana jamama jtsebošëse, y ndaye bacna soye jtsamëse, ntšamo tempo imojanamcá. Ntšamo chë judiënga chë fiestiñe nÿe levadúraca ndëpormana tandëse mondbetsesaycá, cachcá, bënga šontsamna jtsiyenana nÿetsca soyënga ainaniñe ndocna bacna juábnaca jtsamëse, y ndegombre yomncá jtsóyebuambnayëse y jtsamëse.

<sup>9</sup> Chë inÿe atšbe tsbuanáchañe tcbonjáuyana, chë boyabása o shembásaftaca bacna soye amëngaftaca tondayama chašmondëtsencuénta ca. <sup>10</sup> Y chca ndoñe quetstéteboše jáuyanana nÿa tondayama chašmondëtsoyebuambná nÿetsca chë quem luarentšënga boyabása o shembásaftaca bacna soye amëngaftaca, chë nÿe cachëngbiana bëtscá soyënga jtsebomnama tša bošëngaftaca y atbëbanëngaftaca, y chë cachëngbe pormana soyënga diosënga yomnana jtsejuabnayëse adorayëngaftaca ca; er nÿa chca jamamna, tšëngaftanga cmattsamna quem luarentšana jëftsebocanana. <sup>11</sup> Ntšamo chora sënjanayancá endmëna ndayá tondayama ntsencuéntayana, chë Crístbeñe ošbuachiyá yomna ca tojayanáftaca, y boyabása o shembásaftaca bacna soye tojtsama, o nda nÿe cachabiana bëtscá soyënga jtsebomnama tša tojtseboše, o chë cachabe pormana soyënga diosënga yomnana jtsejuabnayëse tojtsadorana, o yapa tojtsayatsená, o yapa tojtsetmó, o tojtsatbëbana. Chca entsángaftacna, ni mo šmuatjót bema chëngaftaca cánÿiñe jasama. <sup>12-13</sup> Atše ndoñe quešnátsmëna jayanana chë ndošbuáchiyënga, chë bëngaftaca ndoñe mondbénutananga, aíñe o ndoñe tšabá tmonjamama. Bëngbe Bëtsá echántsemna nda chëngbiana yochjayana ntšamo tmojamcá tšabá o ndoñe tšabá bëtsemnama, tšëngaftanga ndoñe. Ndegombre nÿe chë ošbuáchiyënga tšëngaftangaftaca innénutanangbiana cmontsamna chca jayanana. Chcasna, šmochjama ntšamo Bëngbe Bëtsabe uabemana palabrenguiñe endayancá: “Tšëngaftanga cmontsamna, chca bacna soye amá tšëngaftangbentsána jtabocnana ca.”

## 6

### *Ošbuáchiyënga jendemándama tojtsemna ora*

<sup>1</sup> Canÿe tšëngaftanguentša ošbuachiyá inÿe ošbuachiyabiama canÿe demanda tojtsebomna ora, ¿cha nanjá chë ndošbuáchiyënga mandadëngbiyoe chë soye chamojandmanama? ¿Ndáyeca chca nanjama, y ndoñe chë Bëngbe Bëtsabe entsángbiyoe nanjá chabe demanda chamouenama? <sup>2</sup> Tšëngaftanga ndegombre šmondétatšëmbo, Bëngbe Bëtsabe entsánga mochjayanama quem luarentša entsangbiana tšabá o ndoñe tšabá tmonjamama. Y chënga quem luarentša entsangbiana chca jayanama tmojtsobenëse, ¿ndoñe montsobena más base soyëngama chca jayanama? <sup>3</sup> Tšëngaftanga ndegombre

šmondétatšëmbo chë angelëngbiámnaca tšabá o ndoñe tšabá tmonjamama bënga moch-jayanama. Chcasna, bënga más jtsoobenana chë quem luarentše jëftsiyename soyëngama chca játayanana. <sup>4</sup> Y chcase, tšëngaftangbeñe chca demandënga chë quem luarentše jëftsiyename soyëngama tojtsemna ora, ¿ndáyeca šmatjätëbuayana chë ošbuáchiyëngbiama tondaye tmontsámána entšanga, chë soyënga chamojandmanama? <sup>5</sup> Chca sënjayana tšëngaftanga chašmotsëuatjama: ¿O tšëngaftanguentše ni mo canya yondmëna corente osertaná, ošbuachiyëngbeñe demandënga chaojandmanama? <sup>6</sup> Pero ndoñe chca: ošbuachiyëngbeñe demandënga tojtsemna ora, mandadëngbioye jana chë soyënga chamojandmanama. Y chca jamana ndošbuáchiyënga mandadëngaftaca.

<sup>7</sup> Y tšëngaftangbeñe nýe demandënga jájandmanama tojtsemna ora, tšëngaftangbiama ya canye puerte bacna soye jtsemnana. ¿Ndáyeca ndoñe šmattsóboyaye ínýenga bacá cmojtsaborlana ora? ¿Ndáyeca ndoñe cachcá šmatjonýaye ínýenga cmojtsabiatbëbana ora? <sup>8</sup> Pero cach tšëngaftangaftacna ínýtšá copasana, ínýengbioye bacá jtsaborlánana y jtsabiatbëbanana, y tšëngaftangcá Crístbeñe ošbuachiyëngbioynaca.

<sup>9</sup> ¿Tšëngaftanga ndoñe šmondétatšëmbo, chë bacna soye amënga Bëngbe Bëtsabe amëndayoye ndoñe mochanjámashënguama? Ndoñe matenoíngñana. Ni chë boyabása o shembásaftaca bacna soye amënga, ni chë cachëngbe pormana soyënga diosënga yomna ca jtsejuabnayëse adórayënga, ni cachëngbe boyá o shema ínýaftaca íngñayënga, ni chë boyabásënga mo shembasëngcá jtsinýnama bošënga, ni chë boyabásënga ínýe boyabásëngaftaca bacna soye amënga, <sup>10</sup> ni chë atbëbanënga, ni chë nýe cachëngbiama bëtscá soyënga jtsebomnama tša bošënga, ni chë tša tmoyënga, ni chë uayátšenayënga, ni chë ínýengbiama bacna soye jtsamëse innétsatbëbanënga, chënga nýetscanga ndoñe quemochatobenaye Bëngbe Bëtsabe amëndayoye jamashjnama. <sup>11</sup> Y tempo báseftanga tšëngaftanguentšënga chca šmojamna, pero Bëngbe Bëtsá tšëngaftangbe bacna soyëngama tcmojaperdoná, y chca entsemna mo bebënënga cuaftsemncá; cha tojama tšëngaftanga chabe entšanga chašmotsemnana, nýe cha chašmotseservénama, y tojama tšëngaftanga mo tšabëngcá chabe bominiñe chašmotsemnana. Lempe chca Bëngbe Bëtsá, tojama ndayá Bëngbe Utabná Jesucristo tojanmama y ndayá Bëngbe Bëtsabe Espiritu tojamama.

### *Bëngbe cuerpo chaotsemna Bëngbe Utabná jtseservénama*

<sup>12</sup> Mondbétsichamo: “Atšbiamna entselesenciana ndayánaca jamama, ndayama Bëngbe Bëtsá ndocá tonjayana ca.” Pero básefta soyënga jtsamana ndoñe atšbe tšabiamna ntsemnana. “Atšbiamna entselesenciana ndayánaca jamama ca”, pero ndoñe quichatslesencia ndaye sóyecnaca nýets tempo mandaná jatsmënana. <sup>13</sup> Mëntsánaca mondbétsichamo: “Saná uafsbiamna y uafsbíá saná chaóyëngacñama ca.” Pero Bëngbe Bëtsá canye te echanjama chë uta soye chaotsopochocama. Bëngbe Bëtsá entšabiamna cuerpo ndoñe tonjanma, boyabása o shembásaftaca bacna soye cha chaotsamama, sinó chë cuérpoca Bëngbe Utabná bënga chamoservema, y Bëngbe Utabná bëngbiama tšabe bendicionënga chaotsamama. <sup>14</sup> Y Bëngbe Bëtsá, nda tojama Bëngbe Utabná cháuatayenama, bëngbiámnaca chabe obenánaca echanjama chámuatayenama.

<sup>15</sup> ¿Tšëngaftanga ndoñe šmondétatšëmbo, Crístoftaca cánýiñe mo canýacá šmomnana yomna mo tšëngaftangbe cuerpo chabe cuerpentša soye cuaftsemncá? Tšëngaftangbe cuerpo Crístbioye jaserviama endmënayëca, tšëngaftangbe cuerpo jtsemnana mo Crístbe cuerpentša soycá. ¿Ntšamo atše chjätobena atšbe cuérpoca, chë ndayá yomna mo Crístbe cuerpentša soycá, canye bacna vida bomna shembásaftaca bacna soye jamana, y chca atšbe cuerpo jabemana mo chë shembásabe cuerpentša soye cuaftsemncá? ¡Ndoñe, ndegombre ndoñe! <sup>16</sup> ¿O tšëngaftanga ndoñe šmondétatšëmbo, canye entšá canye bacna vida bomna shembásaftaca tbojéninýena ora, chë útata jóbemana mo canýacá? Er Bëngbe Bëtsabe uabemana palabrenguiñe boyabása y shembása tbojéninýenama mëntsá endayana: “Chë

útata mo canyáca bochantsema ca.” <sup>17</sup> Pero canye entsá Bëngbe Utabnáftaca cánýiñe mo canyáca tojtsemna ora, jtsemnana mo chë útata cach canye espíritu tbojtsebomncá.

<sup>18</sup> Nya ndocna te canye boyabása o shembásaftaca bacna soyënga šmattsama. Nderado ndaye inye bacna sóynaca nda tojama ora, sempre jamana ndayánaca chabe cuerpentšana shjoye; pero boyabása o shembásaftaca bacna soye jamamna, lempe jamana nye cachabe cuérpoca, y chë causa, chca jamëse, cachabe cuerpama más bacna soyënga jtsamana. <sup>19</sup> ¿Tšëngaftanga ndoñe šmondétatšëmbo tšëngaftangbe cuerpo yomna mo canye yebncá Uámana Espiritbiana, cha tšëngaftangbe ainaniñe chaotsiyenama Bëngbe Bëtsá tojánmayeca? Ndegombre tšëngaftangbe cuerpo ndoñe tšëngaftangbe soye quenátsmëna, sinó Bëngbe Bëtsabe soye. <sup>20</sup> Chca endmëna, er Cristo bënga játsebacama tojanóbana ora, yojamna mo cha bëtsá cuafjopagacá tšëngaftanga Bëngbe Bëtsábenga chašmotsemnana. Chiyeca, chë tšëngaftangbe cuerpëngaca chašmojtsama soyëngaca šmochtsinýanýnaye Bëngbe Bëtsá puerte uamaná y bëtsá bëtsemnana.

## 7

### *Jobouamayama jábuayenama*

<sup>1</sup> Mora chanjóyebuambaye ndayá tšëngaftanga átšbioye šmojuábobemama. Ndegombre, canye boyabásabiama más tšabá endmëna ndoñe chaondobouamá. <sup>2</sup> Pero choca banga boyabása o shembásaftaca bacna soye amënga imojtsemna causa, tšabá entsemna cada boyabása chabe shema chabotsóbomñe, y cada shembása chabe boyá. <sup>3</sup> Boyábioye bontsemna jamana chabe shembiana lempe ntšamo jamama ibomncá, boyá bëtsemnana; y chabe shémnaca cachcá chabe boyabiama chaoma. <sup>4</sup> Chë shembe cuerpo ndoñe nye cha cánýabiama ntsemnana, sinó chabe boyabiámncá. Cachcá, chë boyabe cuerpo ndoñe nye cha cánýabiama ntsemnana, sinó chabe shembiámncá. <sup>5</sup> Ni boyá, ni shema ndoñe chabondëtsejuabná jtsenbiátšbuana. Aíñe chca copodena, pero nye chë útata chca básefta tescama tbojenóyeunase, Bëngbe Bëtsáftaca jencuëntama jtsentsénama. Pero chentšana chë útata entsamna cachiñe cánýiñe jtëtsmënana, chca, Satanás ndoñe chaondobená jamama bacna soye chaócochënguama, cachënga jenomándama ndoñe tmontsobena causa.

<sup>6</sup> Atše chca sentsichamo, tšëngaftanga jábuayenama, ndayá jamama šmojtselesenciana, y chca ndoñe chašmondëtsamama jamëndama. <sup>7</sup> Y atšbe bariëna, atšbe juabna entsemna malaye nyetscanga chë soyënguñe mo atšcá šmattsemna. Pero Bëngbe Bëtsá cada ona obenana tbojatšetá tšabe soyënga jamama, Crístbeñe ošbuáchiyënga jujabuáchama, ínýenga canye soyama, ínýengna inye soyama.

<sup>8</sup> Chë cabá ndbouamnënga y viudanga sentsëtsëtsná, chëngbiana tšabá yojtsemna ntjobouamaycá joquédana, atšcá. <sup>9</sup> Pero chca jtsemnana cachënga jenomándama ndoñe tmontsobenëse, chënga entsamna jtsóbouamayana, er más tšabá endmëna jtsóbouamayana, y ndoñe nye boyabásabiama o shembásabiama tša nyets tempo jésejuabnayana.

<sup>10</sup> Pero chë bouamnënga sentsamënda shema chabe boyábioye ndoñe cachcá chabondetsonyá. Chca ndoñe nye atše quetsatamënda, ndayá cach Bëngbe Utabná. <sup>11</sup> Pero, shema cachcá chabe boyábioye tbojesonyase, cha bontsemna ntjobouamaycá jtsomñana o chabe boyáftaca cachiñe jtenútanana. Y cachcá, chë boyá ndoñe quebnátsmëna chabe shema cachcá jesonýayana.

<sup>12</sup> Chë ínýenga chjáuyana, atšbe juabncá y ndoñe Bëngbe Utabnabe soycá, nderado canye ošbuachiyá tbojtsebomna canye shema Crístbeñe ndošbuachiyá, pero chë shema tojtseboše cháftaca joquédana jtsiyenama, cha chë shëmbioye ndoñe cachcá chabondetsonyá. <sup>13</sup> Nderado canye ošbuachiyá tbojtsebomna canye boyá Crístbeñe ndošbuachiyá, pero chë boyá tojtseboše cháftaca joquédana jtsiyenama, chë shema ndoñe chaondëtsejuabná cha cachcá jesonýayana. <sup>14</sup> Er Bëngbe Bëtsá tojama, canye shembása ošbuachiyá chabe entsá chaotsemnana, nye chábioye chabotseservënama,



y chca, chánaca jtsejuabnayana chë shembásabe boyá Crístbeñe ndošbuáchiyabiamama mo chabiamama oservena entsacá, cha chëngbeñe mo canye pamillécá jatrabájama tojtseboşe ora; y cachcá, chë boyá oşbuachiyábeyeca Bëngbe Bëtsá jtsejuabnayana chabe shema Crístbeñe ndošbuáchiyabiamama mo chabiamama oservena entsacá, cha chëngbeñe mo canye pamillécá jatrabájama tojtseboşe ora. Er chca ndoñe tontsemnëse, chë básenga muántsemna ndošbuachiyatbe básenga, Bëngbe Bëtsáftaca tondaye ndbomnënga. Ndoñe chca yondmënayeca, canya o nyets uta bëtsétsatbe oşbuáchiyama, Bëngbe Bëtsá jtsejuabnayana chë básengbiamama mo chabe entsangcá. <sup>15</sup> Pero chë boyá o shema Crístbeñe ndošbuachiyá cachcá jtsenónyayama tşa tojtseboşëse, chca chaboma. Chora, chë oşbuachiyá ndoñe ntsotocánana chë ínÿaftaca cachiñe jtëtenútanama, er Bëngbe Bëtsá tcmojáchembo natjëmbana chaşmotsiyenama. <sup>16</sup> Chca şmochjama, er aca shema çntşamo cattsetátşëmbo, tacuatjobenaye acbe boyá jayënjanana Crístbeñe chaotsoşbuáchema, y chca, atsbocaná chaotsemnana? o aca boyá çntşamo cattsetátşëmbo, tacuatjobenaye acbe shema jayënjanana Crístbeñe chaotsoşbuáchema, y chca, atsbocaná chaotsemnana?

<sup>17</sup> Masque ntşámnaca, cada ona chaotsiyena jtsamëse ntşamo chë Bëngbe Utabná tbojatşetá obenana yomncá, cada ona ndayá jamama Bëngbe Bëtsá tbojachembcá. Chca atşe nyets luare oşbuáchiyënga enefjuanenache sëndbëtsamëndaye. <sup>18</sup> Nderado Bëngbe Bëtsá cánÿabioye tbojachembo, y cha ínÿengbeyeca chë más delicadentşe base bobachtema tëtşená tojtsemna, ntşamo chë judiënga monduamancá, cha ndoñe chaondëtşenobiamnă mo ndoñe judío cuafjatsmëncá; y nderado Bëngbe Bëtsá cánÿabioye tbojachembo, y cha ndoñe chca tëtşená tontsemnëse, cha ndoñe chaondëtşeuabná tëtşená jatsmënana, ntşamo chë judiënga monduamancá. <sup>19</sup> Er ndayá iuámana, ndoñe quenátşmëna chca tëtşená jtsemnana o ndoñe, ndayá ntşamo Bëngbe Bëtsá yomandacá jtsamana. <sup>20</sup> Cada ona bontsemna jtsiyëñana, ntşamo yojoyencá, chabe entsá chaotsemnana Bëngbe Bëtsá tbojanchembo ora. <sup>21</sup> Bëngbe Bëtsá tcmojanchembo ora, nyets tempo ínÿabiamama oservená cojamnëse, chama ndoñe cattsenócochinÿena. Pero nderado tojtsemna ntşámose jashjáchama ndoñe más chca ntsemnana, cach acbiamama jatrabájama, as chca cochjama. <sup>22</sup> Er chë nÿe ínÿabiamama nyets tempo oservená yojamnă, Bëngbe Bëtsá chabe entsá chaotsemnana tbojanchembo ora, cha mora oşbuachiyacá, jtsemnana canya ya ndoñe más bacna soyënga jamama juabnëngaca mandaná, sinó Bëngbe Utabnabiamama oservená. Cachcá, chë nÿe cachabiamama trabajayá yojamnă, Bëngbe Bëtsá tbojanchembo ora, mora cha nyets tempo Cristbe oservená jtsemnana. <sup>23</sup> Cristo bëngbiamama tojanóbana ora, yojamna mo cha bëtscá cuafjopagacá, bënga Bëngbe Bëtsabe entsanga chamotsemnana. Ndoñe şmatjaleséncia nÿe entsangbe juabnëngaca nyets tempo mandánënga chaşmotsemnana, y Bëngbe Bëtsabiamama chacmotsebnëtjomba. <sup>24</sup> Chcasna, Jesucristbeyeca atşbe catşátanga, cada ona bontsemna Bëngbe Bëtsáftaca jtsiyëñana, ntşamo yojoyencá Bëngbe Bëtsá tbojanchembo ora.

<sup>25</sup> Y chë ndëbouamna shembásengbiamama, chënga aíñe o ndoñe yontsamna jobouamayamna, atşe chama ndoñe Bëngbe Utabnabe canye mando quetsátşbomna, pero chanjayana ntşamo atşe tsjuabnacá. Bëngbe Bëtsá atşbe tşabiamama tojanjuabóyeca, entsanga montsobena jtsejuabnayana aíñe tşabe palabra bomná chiñe atşe tşmënama. <sup>26</sup> Atşe şontsinÿana, entsá ibojtsemna jtsomñana nÿe ntşamo mora yotsomñcá, er bënga mora montsiyena puerte padecena soyënguñe. <sup>27</sup> Shema tcobomnëse, ndoñe cachcá catjëftsonÿaye; y ndoñe tcondbomnëсна, ndoñe catjátşënguaye. <sup>28</sup> Tcojobouamase, bacna soye ndoñe quecátama; y nderado canye tobiaşe tojobouamase, cach bacna soye ndoñe quenátama. Pero chë tmojtsobouamangna padecena soyënguñe mochanjoyena quem luarentşe chamojëftsemnëntşcuana, y atşe sëntseboşe chënga jujabuáchama chca jatiyenama ndoñe chaondëtşamnana.

<sup>29</sup> Jesucristbeyeca atşbe catşátanga, ntşamo sëntseboşe jayanamna mëntşá entsemna:

Cristo quem luaroye yochjésabo orscama ya n̄ye batšá entsájamna. Chíyeca, morscana y n̄yets tempo más chcoye, ch̄e bouamn̄nga entsamna jtsiyenana mo ndoñe bouamn̄nga tmontsemncá, o m̄entsá, entsamna jtsentsénana B̄ngbe B̄tsabe soȳenguiñe, y ndoñe n̄ye ch̄e bouamná b̄tsemnama tbojtsemna soȳenguiñe. <sup>30</sup> Cachcá, ch̄e puerte ngménaca tša ošachiyiñe imomn̄nga, entsamna jtsiyenana mo ndoñe chca tmontsemncá; y ch̄e puerte oyejuaȳenga, chamotsiyena mo ndoñe chca tmontsemncá; ch̄e soȳenga buamnaȳenga chamotsiyena mo tondaye ch̄ngbe soye tontsemncá. <sup>31</sup> Ch̄e quem luarentša soȳengaca jtsiyenama imojtsentsén̄nga entsamna jtsiyenana mo ndoñe chca tmontsamcá, er quem luare ntšamo b̄nga mora monduabuatmcá, pronto echanjochn̄ngo.

<sup>32</sup> Atše s̄entseboše t̄s̄ngaftanga ndoñe chašmond̄tsenocochin̄yena. Can̄ye entšá ndoñe bouamná tontsemna ora, jtsobenana jtsentsénana B̄ngbe Utabnabe soȳengama jtsejuabnayama, y ntšamo oyejuayá cha jabemama; <sup>33</sup> pero ch̄e bouamná n̄yets tempo jtsenócochin̄yena quem luarentša soȳengama, jtsiyenama, y ntšamo chabe shema oyejuayá jtsebonnama; <sup>34</sup> y chca, cha uta soyiñe can̄ye ora jtsentsénana. Ch̄e nd̄ebouamna shembása y ch̄e tobiáše bontsobena jtsentsénana B̄ngbe Utabnabe soȳenguiñe sempre jtsejuabnayama. Ch̄nga mondobena jtsentsénana B̄ngbe B̄tsá jaserviama, ndayá ch̄ngbe cuérpoca y ch̄ngbe espíritoca tmojamama. Pero in̄yetsá, ch̄e bouamna shembásana, n̄yets tempo jesenócochin̄yena quem luarentše vida jtsebonnama soȳengama, y ntšamo chabe boyá oyejuayá jtsebonnama.

<sup>35</sup> Atše chca cbonts̄ets̄sná t̄s̄ngaftangbe t̄sabiamana, y ndoñe jam̄endama ba soȳenga jamama ndoñe chašmond̄tsobenama, ndayá ntšamo t̄sabá yomncá chašmotsiyenama, y n̄ye B̄ngbe Utabná jtse servénama chašmotsentsénana.

<sup>36</sup> Nderado nda tojtsejuabná chabe uats̄ets̄naye tobiášeftaca jtsobouamayama ibojtsemna ca, chca jamama ch̄e tobiáše ya b̄tsá tojtsemnayeca, y chca jamama tša t̄sabá yojtsemna ca tojtsejuabnase, cha bontsemna jamana ntšamo tojtsebošcá. Chaotsobouamá. Chca tojama ora bacna soye ndoñe ntsamana. <sup>37</sup> Pero nderado in̄ya, tondaye obligaciúnaca tontsemna y lempe ntšamo tojtsebošcá cha tojtsobena jamama, cha t̄sabá tojajuabó y chabe ainaniñe corente tojtsetátš̄embo, ndoñe ntobouamayana t̄sabá yomna ca, cha t̄sabá chca jtsamana. <sup>38</sup> Chcasna, ch̄e tobiášeftaca tojtsobouamá chana, can̄ye t̄sabe soye jamana; pero ch̄e ndoñe cháftaca tonjobouamá chana, can̄ye más t̄sabe soye jamana.

<sup>39</sup> Ch̄e shembása bouamná jtsotocánana chabe boyáftaca sempre j̄eftsiyenana, ch̄e boyá vida tojtsebonn̄entscuana; pero ch̄e boyá tojóban̄ese, cha jtsobenana cachiñe jtobouamayana, nda cha tojtsebošáftaca, pero chca chaoma mo can̄ya B̄ngbe Utabnáftaca cán̄yiñe mo can̄yacá quetsomñecá. <sup>40</sup> Pero atše jayanamna, cha más oyejuayá nántsemna ndoñe tontóbouamase; y s̄entsejuabná, átšnaca tsbomna ch̄e B̄ngbe B̄tsabe Espiritu chašotsebuayiyana.

## 8

### *Uátš̄embona saná ents̄angbe pormana soȳengama*

<sup>1</sup> Mora chanj̄oyebuambaye ndayá t̄s̄ngaftanga atše šmojatjama, ndayá jtseyayama, ch̄e tempo in̄yenga cach̄ngbe pormana soȳenga, dios̄enga yomna ca jtsejuabnaȳese jadórana tmojanátš̄embona soȳengama. B̄nga mond̄etatš̄embo b̄nga n̄yetscanga osertán̄nga imomnama. Can̄ya tbojtsosertana ora, cha nderado nanjájuboye, chca b̄tsemnama puerte uamaná cha yojtsemna ca, pero can̄ya, in̄yenga tojtsababuán̄yeshana ora, cha jtsobenana ch̄nga becá jujabuáchana. <sup>2</sup> Nderado nda tojtsejuabná ndegombre can̄ye soye yotátš̄embo ca, cabá ndoñe yontsetátš̄embo ndayá jtsetatš̄embuama ibojtsemncá. <sup>3</sup> Pero nderado nda B̄ngbe B̄tsábioye tbojtsebobonshana, B̄ngbe B̄tsá chábioye jtsabuatmana mo chabe entšacá.

<sup>4</sup> Y chë tempo ínÿenga cachëngbe pormana soyënga, diosënga yomna ca jtsejuabnayëse jadórama uátsëmbona soyëngamna, atse šcuayana: bënga corente mondëtatšëmbo chë chënga imnétsadorana soyënga, diosënga yomna ca jtsejuabnayëse, ndegombre ndoñe dios quemátsmëna y nÿe canÿa Bëngbe Bëtsá endmëna. <sup>5</sup> Pero masque celoca y quem luarentse chamomna entsangbiamna “diosënga ca” uabáinënga (ntšamo ndegombre endmëncá, banga quem luarentša tsbanánoca obenánaca mondmëna, entsangbiamna diosënga ca ubuátmënga, y banga bëts mándoca entsangbiamna “utabnënga ca” uabáinënga), <sup>6</sup>bënga chë ošbuáchiyëngbiamna nÿe canÿa Bëngbe Bëtsá endmëna, Bëngbe Taitá, ndábentsana nÿetsca soyënga yóbocana, y nÿe nda jtse servénama bënga imoyena. Y nÿe canÿe Utabnánaca endmëna, Jesucristo, ndábeyeca nÿetsca soyënga yomna, y cach bëngnaca imomna.

<sup>7</sup> Pero nÿetsca ošbuáchiyënga ndoñe chca quemátstatšëmbo. Básefta entsanga, Crístbeñe cabá ntsošbuáchiye ora, imojanamana ndaye sanánaca juatšëmbonana, chë chënga imojanjuabná diosënga yojamna ca soyënga jadórama; chënga, chca uatšëmbonana tmojt-sesá ora, jtsejuabnayana chca uatšëmbonana bëtsemnama, y ainaniñe juabnënga jtse-bomnana ndoñe tšabá tmonjamama, chana tmojase causa. Chënga, ndayá tempo imojánamama, ndoñe quemátobena tšëngaftangcá jtsejuabnayana, chcana jasana bacna soye ndoñe yondmëna ca. <sup>8</sup> Ndegombre, ndayá bënga tmojt-sesacá ndoñe ntjamana bënga Bëngbe Bëtsábioye más chamuatobéconama. Bënga Bëngbe Bëtsabe bominiñe ndoñe quemochátsmëna más tšábenga aíñe tmojt-sesama; ni ndoñe chcanga, ndoñe tmontsesá causa.

<sup>9</sup> Pero cuedado šmochtse bomna, ndayá jamana yolesenciánama tšëngaftanga corente tšabá šmotatšëmbuama, ndayánaca jatsmana, y chca causa ínÿenga, chë soyënguiñe más batšá ošbuáchiyënga y osertánënga, ntšamo tšëngaftanga šmojt-samcá chamuat-smama, y chentšana, chëngbe ainaniñe juabnënga chamotse bomna y chëngbiyoye chaotsëtsëtsná ndoñe tšabá tmonjama ca. <sup>10</sup> Er, aca chë soyëngama tatšëmbuá, nderado tcojót-bema jasama canÿe luarentse, canÿe soye ndayama entsanga dios yomna ca jtsejuabnayëse adórayentse, y canÿe Crístbeñe ošbuachiyá tojtse bomna ainaniñe juabnënga ndoñe tšabá tonjamama, chca tojáseyeca, aquécá chë soyëngama ndoñe yondëtatšëmbo causa, y cha nderado chentse cojt-sesama tcmojinÿëse, chë soye nanjobenaye chábioynaca jañémuana chë saná jasana, chë tempo chë soyëngama tmojanátšëmbona saná. <sup>11</sup> Y chca aca, chë soyëngama ntšamo betatšëmbuama tcojamama, catjama chë Jesucristbeyeca acbe catšata, chë ndoñe corente ošbuachiyá, y ndoñe aquécá chë soyëngama corente tatšëmbuá, cha pochocaná chaotsemnama, er chabe ainanentse echántsemna juabnënga canÿe bacna soye tojamama, chë saná tojasama. Chca nderado cánÿabioye catjama, ndabiama Cristo tojanóbana, cha jatsbocama. <sup>12</sup> Jesucristbeyeca acbe catšatbiamna chca bacna soye tcojama ora, chca causa cha canÿe soye tojama, ndayama chabe juabnënga ainaniñe chabotsatsëtsná ndoñe chca chaondëtsama ca; y chca, chentšana tša tojesejuabná cha canÿe bacna soye tojamama, acna canÿe bacna soye jamana, ndoñe nÿe chë catšatbiamna, ndayá cach Cristbiámnaca. <sup>13</sup> Chíyeca, nderado ndayá atse stsesama, atse tsjama Jesucristbeyeca atšbe catšata chaoma canÿe soye y chca jamama chabiama canÿe bacna soye tojtsemnëse, más tšabá nántsemna ndocna te chë soye atse ntjasana, chca, atse ndoñe jatsmama cha canÿe bacna soyiñe chaótsatšama.

## 9

### *Jesucristbe ichmónëngbe derecho*

<sup>1</sup> Ndegombre endmëna, atse ndayánaca jamana stselesenciánama y Moisesbe leyëngaca ndoñe más mandaná sëntsemnama. Cach ndegombre endmëna, atse canÿe Jesucristbe ichmoná tsmënama y Jesús Bëngbe Utabná tijinÿama; y cach tšëngaftanga mora ošbuáchiyënga jtsemnëse, šmondmëna ndayá tojóbcna Bëngbe Utabnabiamna

atšbe trabajuentšana. <sup>2</sup> Masque ínÿenga atšbiana ndoñe quematsjuabná atše canÿe Jesucristbe ichmoná tsmëna ca, tšëngaftangbiamna aíñe chca endmëna; er tšëngaftanga Crístbeñe ošbuáchiyënga šmondmënama y Bëngbe Utabnáftaca cánÿiñe mo canÿacá šmondmënama, puerte tšabá šmontsinÿanÿná atše Jesucristbe canÿe ichmoná tsmënama.

<sup>3</sup> Mëntšá chanjayana chë atše ndoñe tšabá tijama ca imojtsichámëngbiana: <sup>4</sup> Ndegombre bënga nÿets derecho fsëndëtsóbomñe jtsobátmanama tšëngaftangbentšana, chë tchojujabuáchëngbentšana, bëngbe trabajuama saná o ndayá jofšiyama chašcuacaredadama. <sup>5</sup> Y bëgnaca derecho fsëndëtsóbomñe canÿe shema ošbuachiyá jtsebomnama y bëngaftaca cha jëftsbeštama inÿe luaroye fstsajna ora, ntšamo chë Jesucristbe inÿe ichmónënga, Bëngbe Utabnabe catšátanga y Pédrënaca mondbetsamcá. <sup>6</sup> ¿O nÿe Bernabé y atše šojtsëtocana cabëndatbe cucuatseca jatrabájana vida jtsebomnama, y ndoñe derecho fsëntsebomna ošbuáchiyënga chašotsacuédanama, Bëngbe Bëtsabiana trabájayama? <sup>7</sup> ¿Ndëmua mo canÿe soldadcá tojtsoservená, ndayá tbojtsájabotama cachá nantsatopagana, vida jtsebomnama? Ndocná canÿe jajañe uvas betiyënga ntjájena, chentša uvasëšangá ndoñe ntjuasama. Ndocná oveshënga ntsanÿenana, chë tojabuatëba létsiyentšana ndoñe ntjofšiyama. <sup>8</sup> Ntšamo atše muentse sëntsichamcá ndoñe nÿe entšangbe juabna quenátsmëna; y Moisesbe leyíñnaca cachcá endayana, <sup>9</sup> er chabe leyíñe mëntšá endayana: “Aca canÿe toróftaca shajuana tmojtsatbaná luariñe chacojtsetrabája ora, ndoñe catjuanguëtsenaye ca.” Y chca ndoñe quenátayana Bëngbe Bëtsá nÿe toronga inétsanÿena ca, <sup>10</sup> sinó inÿe más bëts soye; chca endayana ndayá ndegombre bënga, chë Bëngbe Bëtsabiana soyëngama abuyiynayiñe trabájayënga cha šnetsanÿena ca. Chca tmojanábema bëngbiana, er chë fshantse arayá y chë meshënga atbanayá, entsamna chca jamana jtsobátmanëse, chë tmojátabe shajuanentšana batšá jójyëngacñama. <sup>11</sup> Y chca, bënga chë tšabe noticiëngama tchojábuaenase, y chca, Bëngbe Bëtsábíocana tšabe bendicionënga chašmotsebomnama bënga tifjama, ndoñe yapa tanandátsmëna tšëngaftanga jótjañana, chë šmobomna soyënguentšana bënga jëftsiyenama chašcuatšatama. <sup>12</sup> Inÿenga derecho tmojtsebomna tšëngaftanga jótjañana chë šmobomnentšana chašmuacaredadama, tšëngaftangbeñe chëngbe trabajuama, as bënga más derecho fstsebomna chca jamama.

Pero bënga tondaye checbatamëndá, bënga chë derecho bëtsebomnayeca. Chca játamamna, bënga lempe fsëntsoboyá, chca, bënga tondaye ntjátamama, y chë causa entšanga ndoñe chašondëtsayaunana, bënga chë tšabe noticiënga fstsabuayiyná ora. <sup>13</sup> Tšëngaftanga šmondëtatšëmbo, Bëngbe Bëtsabe bëts yebnoca trabájayënga Bëngbe Bëtsabiana oservëniñe, mondbóyëngacñe chënga jasama, ndayá entšanga Bëngbe Bëtsá jadórana chabe bëts yebnoye tmojiyëbo sananguentšana. Y chë Bëngbe Bëtsá jadórana soyënga amënga, altaroca, chë juatšëmbonama luarentse, chënga jasana ndayá chentse tmojuátšëmbona soyënguentšana. <sup>14</sup> Cachcá, Bëngbe Bëtsá tojamandá, chë tšabe noticiënga abuyiynayëngna, vida jtsebomnamna lempe ntšamo tojtsëjbotcá chamóyëngacñe ca, chë tšabe noticiënga abuyiynayama. <sup>15</sup> Pero atše ndocna te chiyaisemandá ínÿenga chca chašmotsecuedánama, atše chë tšabe noticiënga abuyiynayá bëtsemnama chca derecho tsbómnyayeca, y cach ndoñe mora quem soye quecbatëbuabiamná, tšëngaftanga ndayánaca atše chašmuatšetama. Atšbiana más tšabá nántsemna jóbanana, y ndoñe ntjalesénciana inÿa chaoma atše cach atšbiana oyejuayá ndoñe ntjátsmënama, ínÿëngbentšana soyënga stjójyëngacñe causa.

<sup>16</sup> Atše ndoñe quetsatsjuabná atše canÿe bëts soye stsama ca, chë tšabe noticiënga stsabuayiynama, er atše obligaciónaca sëntsemna chca jtsamama, Bëngbe Bëtsá chama šojanchémboyeca. ¡Tša lastemcá atšbiana nántsemna, chë tšabe noticiënga ndoñe sëntsabuyiynase! <sup>17</sup> Chíyeca, atše chë tšabe noticiënga stsabuayiyná nÿe atše chca jamama stsebóseyeca, atšbe uacanana soye ya stsebomna; pero atše chca stjama, y ndoñe tontsemna nÿe atše chca jamama stsebóseyeca, masque chca, atše stsama,



ndayá jtsamama Bëngbe Bëtsá šojanbonjëcá. <sup>18</sup> Y chca, atšbe uacanana soye endmëna atše oyejuayá jtsemnana chë tšabe noticiënga abuyiynayama, ošbuachiyëngbentsana atše vida jtsebomnama tondaye ntjatoyëngacñëcá; chca, atše tondaye quetsátama chë tšabe noticiënga abuyiynayama tsbomna deréchoca, chë atšbe trabajuentsana vida jtsebomnama.

<sup>19</sup> Atše, masque ndocna entsábeyeca nyëts tempo mandaná quetsátsmëna, puerte nduamaná sënjobema, mo canya nyëts tempo ínÿabeyeca mandaná, nyëtscanga jaserviama, chca, atše chca jtsamëse, jobenayama becá entsanga, ntšamo tojopodecá, jáyënjanama Crístbeñe chamotsošbuáchema. <sup>20</sup> Chë judiëngbiamna atše sënjama chaitsiyena mo chëngcá jtsamëse y jtsejuabnayëse, chca, atše jobenayama chënga jáyënjanama Crístbeñe chamotsošbuáchema. Y chë Moisesbe léyeca mandánënga imoyenëngbiamna, atše chëngcá sënjobema, masque ndegombre chë Moisesbe léyeca mandaná ndoñe quetsátiyena; chca sëndbama chënga jáyënjanama Crístbeñe chamotsošbuáchema. <sup>21</sup> Pero chë Moisesbe léyeca ndëmandánënga oyenëngbiamna, atše chëngcá sënjobema, chënga jáyënjanama Crístbeñe chamotsošbuáchema, masque ndegombre endmëna, atše sontsemna jamana ntšamo Bëngbe Bëtsá šomandacá y ntšamo Cristo šomandacá. <sup>22</sup> Chë nye batsatema ošbuachiyëngbiamna y Bëngbe Bëtsabe soyëngama nye batsatema osertánëngbiamna, atše sënjama chaitsiyena mo chëngcá jtsamëse y jtsejuabnayëse, chca, atše jobenayama jamama chënga sempre Crístbeñe chamotsošbuáchema. Y lempe chca, chë atše jamana ntšamo nyëtscanga imomncá atše chaitsemnana, endmëna atše jobenayama báseftanga jáyënjanama Crístbeñe chamotsošbuáchema.

<sup>23</sup> Atše lempe chca sëndama, bëtscá entsanga chë tšabe noticiënguiñe chamotsošbuáchema, y chca, atše atsbocaná chaitsemnana y chëngcá atše chayóyëngacñama, chë atsebácanënga Bëngbe Bëtsá yochjatsataye tšabe soyënga.

<sup>24</sup> Tšëngaftanga šmondëtatšëmbo, canye luaroye jashjanguama entsanga tmojótjajo orna, banga jotjajuana, pero nye canya chë uacanana soye jóyëngacñana. Chcasna, mo chë uacanana soye jóyëngacñama tmojótjajëngcá, tšëngaftanga cmontsamna jtsiyenana, chë Bëngbe Bëtsábiocana uacanana soye josháchiñama. <sup>25</sup> Nyëtscanga chë tmojótjajënga ínÿenga jáyënjanama, chënga jopróntana nyëtsca soyënguiñe jtsenomándayëse, chca, canye uacanana soye, tsbuanachëngaca uapormana coronësha juayëngacñama; y chësha betscó jtsanctana. Pero bënga ndoñe; bënga mondoyena Cristbiamna soyënga jtsamëse, Bëngbe Bëtsábiocana ba tšabe soyënga mo uacanancá jóyëngacñama, y chë soyënga nyëtsca tescama bënga mochanjëftsebomna. <sup>26</sup> Y atšna, atšbe bariëna sëndëntšena Bëngbe Bëtsá jtseservénama, ndoñe mo canya ínÿengbioye jáyënjanama tojotjajuacá, chë ndëmoye jashjanguama yomnama ntsetatšëmbcá; y cach ndoñe mo nda tojtsepeliá orcá, chora, cha nye ínÿoye chabe buacuatsënga tojtsëtsana y chë ínÿabe cuerpoye ndoñe. <sup>27</sup> Mo canye tšabe peliayacá, chabe cuerpo játssetšenana y chca chë cuerpo corente jtsemándayana, atše ndoñe quetsatsleséncia chë atše tšabá jtsomñama atšbe ainanentsa juabnënga chašotsemándama; y chca, Crístbioye jtseservënëse chamotsiyenama ínÿengbioye stjabuayená chentšana, Bëngbe Bëtsá chašotsaboté chabe uacanana soye josháchiñama, cha ndoñe tšabá tijaservé causa.

## 10

### *Cach entsangbe pormana soyënga ndoñe chamondëtsadoránama jábuayenama*

<sup>1</sup> Jesucristbeyeca atšbe catsátanga, atše sëntseboše tšëngaftanga chašmotsetátšëmbo bëngbe tempsca bëtš taitanga judiënga, chënga nyëtscanga Bëngbe Bëtsá canye jantsetësheca benache yojaninÿanÿná, y chënga nyëtscanga, chë Buángana ca uabaina mar bejayëjana tmojánachnëjna, chiñe mo bojojuiñe cuaftsomñcá. <sup>2</sup> Chë jantsetësheca Moisés imojanëstonama, y chë mar bejayëjana tmojánama, chënga tmojanóbema Moisesbe ústonënga. <sup>3</sup> Chënga nyëtscanga tmojanse cachca saná, chë Bëngbe Bëtsá

celocana tojanichmó saná; <sup>4</sup> y nyetscanga tmojanofsé chë Bëngbe Bëtsá tojanma chë peñësentsana chaóbcna bėjaye. Cristo chëngaftaca yojtsemna jtsanýenama chënga imojtsajnëntscuana, y ntšamo chë peñësentsë chëngaftaca tojanopasacá, yojaninýanýná Cristo chënga yojtsanýenama. <sup>5</sup> Masque chca, banga chënguentsënga ntšamo tmojanmama Bëngbe Bëtsá ndoñe yontsóyejuaye; y chë causa, Bëngbe Bëtsá tojanma chënga chamóbanama chë entsanga ndoyenentsë.

<sup>6</sup> Lempe chca tojanopasá bënga jinýanýiyama y jábuayenama ntšamo inopása entsanga bacna soyënga jamama tmojtseboše ora, bënga chca jamama ndoñe chamondëtsebošama. <sup>7</sup> Chýyeca, tsëngaftanga ndoñe šmattsadorana entsangbe pormana soyënga, ndayama ínýenga jtsejuabnayana diosënga yomna ca, ntšamo báseftanga israeloquënga tmojanmcá. Ntšamo Bëngbe Bëtsabe uabemana palabrenguiñe chëngbiama endayancá, chënga canýe ternerá castellánoca tmojanpormá ora, mo dios cuaftsemncá jadórama: “Entsanga tmojanotbiama jasama y jatmuama, y chentsana tmojantsbaná joboyeuama ca”. <sup>8</sup> Boyabása o shembásaftaca bacna soyënga ndoñe šmattsama, ntšamo báseftanga chënguentsënga tmojanmcá, y chë causa, nýe canýe te, uta bnëtsana y unga uaranga entsanga tmojanóbana <sup>9</sup> Bacna soyënga ndoñe šmattsama, jinýama buetatescama Bëngbe Utabná uantado yochjéftsemnana y ndoñe šochanjacastigayama. Báseftanga chënguentsënga chca tmojanma, y chë causa tmojanóbana mëtšcuayëngaca ftëtšenënga. <sup>10</sup> Bëngbe Bëtsabe contra ndoñe šmattsóyebuambnaye, ntšamo báseftanga chënguentsënga tmojanmcá, y chë causa, chë ángel obanayá tojanma chënga chamóbanama.

<sup>11</sup> Lempe chca bëngbe tempsca bëts taitangftaca tojanopasá, bënga jinýanýiyama ntšamo jtsiyenana šojtsamnana, y Moisés, Bëngbe Bëtsabe uabemana palabrenguiñe chca tojéftsanboshjona bënga jabuátambama, bënga, chë Jesucristo yochjésabo orscama ya batšatema yojtsájamna ora oyenëngbiama. <sup>12</sup> Chcasna, nda tojtsejuabná Bëngbe Utabnabiama tšabá yojtsama ca y bacna soyënga ndocna te yochanjama ca, cuedado chaotsebomna, bacna soyënga amiñe ndoñe chaondótsatsama. <sup>13</sup> Ndocna entsá jatócochënguana bacna soyënga jamama, ntšamo tempo ínýenga ndoñe tonjanocochëngcá cachca bacna soyëngama, pero tsëngaftanga corente šmondétatsëmbo Bëngbe Bëtsá sempre cmochtsëjabuachanama chë padecena soyënguiñe, y cha ndoñe yochanjalesénciama bacna soyënga jamama chacmócochënguama, tsëngaftanga chca soyënga jamama jtsóboyayama obenana ntsebomncá; pero chë padecena soyënguiñe chašmojtsemna ora, cha cmochanjínýanýiye ntšamo chë bacna soyënga ora tšabá jabocanama, y chca, jtsóboyayama chašmotsobenama.

<sup>14</sup> Chýyeca, atšbe bonshánënga, ndocna te šmattsadorana cach entsangbe pormana soyënga, ndayama ínýenga jtsejuabnayana diosënga yomna ca. <sup>15</sup> Atše sëntsoyebuambná mo tsëngaftanga corente osertánënga cuaftsemncá. Cach tsëngaftanga šmochjenójuaboye y smochjayana, ntšamo cbojtsëtsëtnacá aíñe o ndoñe tšabá bëtsemnana. <sup>16</sup> Ntšamo Jesús chë coptema vinoyama Bëngbe Bëtsábioye tbojtanchuacá, bëngnaca cachcá Bëngbe Bëtsá chama fsëndbëtsatschuanaye. Bënga chca tmojama ora, ndegombre, jtsinýanýnayana bënga Crísoftaca cánýiñe mo canýacá imomnana, chabe buiñe juabuáshanëse bëngbiama tojanóbanayeca. Y chë mondbajataye tandëse tmojase ora, jtsinýanýnayana bënga Crísoftaca cánýiñe mo canýacá imomnana, cha bëngbiama tojanóbanayeca. <sup>17</sup> Bënga ošbuáchiyënga masque banga mondmëna, chca orna nyetscanga cach tandësentšana bënga jasana, y chýyeca bënga jtsemnana mo canýacá, mo Cristbe cuerpcá.

<sup>18</sup> Tsëngaftanga smochtsejuabnaye ndayá chë Israeloca bachnanga monduamanama: chënga chë altaroca tmojóba y tmojuátšëmbona bayënguentsana jasana, y chca chënga chora jtsinýanýnayana chënga cánýiñe mo canýacá imojtsemnana Bëngbe Bëtsáftaca, chë chca tmojtsadoranáftaca. <sup>19</sup> Y chca, atše ndoñe quetsátsboše jayanama chë entsangbe pormana soyënga mo diosënga cuaftsemncá, uámana soyënga yomna ca. Ni chë cach

entsangbe pormana soyënga diosënga yomna ca jtsejuabnayëse jadórama uátšëmbona saná inye sanama más iuámana ca. <sup>20</sup> Pero aíñe, entsanga cach entsangbe pormana soyëngama mo diosënga cuaftsemncá, chca tmojuátšëmbona ora, ndegombre chënga Satanás y chabe uajabuachanëngbioye jtsadoránana, y ndoñe Bëngbe Bëtsábioye. Y atše ndoñe quetsátsboše, tsëngaftanga chca uatšëmbonana šmojasama, cányiñe mo canyáca chë bayëjëngaftaca chašmotsemnana. <sup>21</sup> Tsëngaftanga ndoñe quešmátobena chë vínoye coptémentšana jofšiyana, ntšamo chë ošbuáchiyënga bétsemnana mondbetsamcá, y chentsana chë cach entsangbe pormana soyënga, mo diosënga cuaftsemncá jadórama vínoye coptémentšánëna. Chca šmojama ora jtsemnana mo chë diablëngaftaca cuaftsesangcá. Y cach ndoñe quešmátobena vínoye jofšiyana y tandëse jasana, ntšamo ošbuáchiyënga bétsemnana mondbetsamcá, y chentsana cach entsangbe pormana soyënga mo diosënga cuaftsemncá jadórama fiestentša sanánaca jasana, y chca chë bayëjëngbioye jtsadoránana.

<sup>22</sup> Bënga chca tmojtsamama, bënga mochanjama Bëngbe Utabná puerte etonaná bëngaftaca chaotsemnana, er chë bayëjëngaftaca bënga chca jtsamana. ¿O imojtsejuabná bënga chabiamá más obenana bomnënga imomna ca?

*Lempe šmochjama Bëngbe Bëtsá puerte bëtsá y uamaná yomnama jinyanüyama*

<sup>23</sup> Mondbëtsichamo: “Entselesenciana ndayánaca jamana, ndayama Bëngbe Bëtsá ndocá tonjayana ca”, pero básefta soyënga atše stjama ora ndoñe nyetscangbe tsabiama ntsemnana. “Entselesenciana ndayánaca jamama ca”, pero nyetsca soyënga ntšamo bënga tmojamcá, ošbuachiyëngbioye ndoñe ntjujabuáchana Jesucristbeñe más chamotsošbuáchema, y ainaniñe más añemo chamotsebomnana. <sup>24</sup> Ndocná chaondëtsama lempe ntšamo tojobenacá nye cachabe tsabiama, ndayá más chaotsama chë ínÿengbe tsabiama.

<sup>25</sup> Lempe mercadoca tmojtsena soyënguentsana šmochjase, ntjatstjanaycá chë mëntšena aíñe o ndoñe tmonjuátšëmbona chë cach entsangbe pormana soyënga, mo diosënga cuaftsemncá jadórama ca. Ndoñe chca šmattsetjanaye, ntšamo tsëngaftangbe ainaniñe juabnënga šmojtsebomnana; <sup>26</sup> er ntšamo Bëngbe Bëtsabe uabemana palabrënguñe endayancá: “Quem luare Bëngbe Utabnabe soye endmëna, y lempe ntšamo chiñe yomncánaca ca.”

<sup>27</sup> Nderado canye ndošbuachiyá tcmojúbuaja chábioca jasama, y tsëngaftanga choye jama tša šmojtsebošëse, lempe ntšamo cha chacmojonanjacá šmochjase, ndayentšana chë saná tojóboचना ndocá ntjatstjanaycá, ntšamo tsëngaftangbe ainaniñe juabnënga šmojtsebomnana. <sup>28</sup> Pero nderado nda tcmojáuyana: “Quem mëntšena cach entsangbe pormana soyënga mo diosëngcá jadórama tmonjanátšëmbona ca”, as ndoñe chana šmatjase, er canya chca tcmojáuyana, y ainanentše šmojtsebomna juabnënga, chë chca jamama ndoñe tsabá bétsemnana. <sup>29</sup> Atše sëntsoyebuambná ndayá chë chca tcmojauyanabe ainaniñe juabnëngama, chë soye jasana ndoñe tsabá yondmënama, ndoñe chë tsëngaftangbe ainanentša juabnëngama.

Pero tsëngaftanga šmatjatjaye: “¿Ndáyeca atše šojtsemna jayanana ndayá atše stsobena jamama, ošbuachiyá bétsemnana, ntšamo chë ínÿabe ainaniñe juabna yobomnana ca? <sup>30</sup> Y atše chë ndayá stsesama Bëngbe Bëtsá tijëtschuase, ¿ndáyeca inya šochjauyana atše ndoñe tsabá tijama ca, chë soye tijasama, chë ndayama Bëngbe Bëtsá tijëtschuá ca?” <sup>31</sup> Masque ntšámna, cachcá, chašmojttesá, o chašmojtsofšëšná, o ndaye inye soye chašmojtsama, ndayama Bëngbe Bëtsá ndocá tonjayana, lempe šmochtsama Bëngbe Bëtsá puerte bëtsá y uamaná yomnama jtsinyanüyayama. <sup>32</sup> Tondaye šmatjama ndayá chaobená jamana, ínÿenga Cristo chamotsábotema. Ndoñe chca šmatjama, ni judiëngbiama, ni ndoñe judiëngbiama, ni chë Bëngbe Bëtsábeñe ošbuachiyëngcá ene-fjuanëngbiama. <sup>33</sup> Smochtsama ntšamo atše sëndëntšencá, nyetscanga nyetsca soyënguñe oyejuayënga jtsabamnana, lempe ntšamo stjobenacá jtsamëse, ndoñe nye atšbe

tšabiamana, ndayá masna chë ínÿengbe tšabiamana, chënga chamotsobenama chëngbe bacna soyënguentšana atsebácanënga jtsemnana.

## 11

<sup>1</sup> Tšëngaftanga šmochtsiyena ntšamo atše sëndamcá jtsamëse, cach ntšamo atše sëndoyencá, ntšamo Cristo inetsamcá jtsamëse.

*Ntšamo yomna shembásenga tšabá jtsemnana, ošbuachiyëngcá tmojënefná ora*

<sup>2</sup> Atše sëntseboše tšëngaftanga jáuyanana tšabá šmojama ca, tšëngaftanga nÿetsca soyënguiñe atšbiamana šmnétsenojuabnama, y tšëngaftanga šmojtsabuátambama y šmojtsamama ntšamo tčbonjanabuatambacá, cachcá ntšamo atše sënjëftsanboshjoncá.

<sup>3</sup> Pero atše sëntseboše tšëngaftanga chacmësertá: nda nÿetsca entsanga iuamënda cha, Cristo endmëna; y nda shémbioye ibománda cha, boyá endmëna; y nda Crístbioye ibománda chana, Bëngbe Bëtsá endmëna. <sup>4</sup> Nderado canÿe boyabása chabe bestšaše tojtsenátstotse, inÿe ošbuáchiyëngaftaca cánÿiñe Bëngbe Bëtsáftaca tbojtsencuénta ora o Bëngbe Bëtsabe juabna tojtsoyebuambná ora, cha jamana cachá chaotsëuatjama, chabe bestšáseca chca tojama causa. <sup>5</sup> Pero nderado canÿe shembása chabe bestšaše ndoñe tontsenátstotse, inÿe ošbuáchiyëngaftaca cánÿiñe Bëngbe Bëtsáftaca tbojtsencuénta ora o Bëngbe Bëtsabe juabna tojtsoyebuambná ora, cha jamana chama cachá chaotsëuatjama; jtsëuatjana mo cha lempe jshetëtšená cuaftsemncá. <sup>6</sup> Er, nderado canÿe shembása ndocna te tontseboše chabe bestšaše jtsenátstotsana, chabiamana más tšabá nántsemna lempe chaotsenójshetëtše. Pero tojtsejuabná utsbotjená o chca lempe jshetëtšená jtsemnana cha yochtsëuatja ca, as chabe bestšaše chaotsenátstotse. <sup>7</sup> Boyabása ndoñe quebnátsmëna chabe bestšaše jtsenátstotsana, er Bëngbe Bëtsá tojanma ntšamo cachá yomncá cha chaotsemnana, y chë boyabása chca jtsemnëse, jtsinÿanÿayana Bëngbe Bëtsá chabe mandayá yomnana. Pero ntšamo chë shembása yomncá, jtsinÿanÿayana chë boyabása chabe mandayá yomnana; <sup>8</sup> er Bëngbe Bëtsá, boyabása ndoñe tbonjanma shembásabentšana, ndayá shembása boyabásabentšana. <sup>9</sup> Y Bëngbe Bëtsá, boyabása ndoñe tbonjanma shembásabeyeca, ndayá shembása boyabásabeyeca. <sup>10</sup> Chiyeca, y chca jamana angelënga tšabá jtsinÿanáneyeca, shembása jtsemnana chabe bestšaše chaotsenátstotsama, chca, chaotsinÿayana inÿa chábeñe yomándama. <sup>11</sup> Pero, Bëngbe Utabnábeñe ošbuachiyëngcá jtsiyenamna, boyabásenga y shembásenga cachcá jtseiytëtanana. <sup>12</sup> Er masque Bëngbe Bëtsá, shembása boyabásabentšana tbojanma, mora, shembásabentšana boyabása jóbocnana; y lempe Bëngbe Bëtsábiocana endóbocana.

<sup>13</sup> Cach tšëngaftanga, yejuana chama šmochtsejuabnaye y šmochjayana tšabá o ndoñe tšabá yontsemna, canÿe shembásabiamana Bëngbe Bëtsáftaca jencuëntana, bestšaše ntsenatsbotscá. <sup>14</sup> Ntšamo entsanga sempre mondbetsejuabnaycá, ndayá tšabá bëtsemnana, bëngbioye jtsabuátambayana, boyabása bën stjënësha chabuájuama tojalesenciase, cha jamana cachá chama chaotsëuatjama. <sup>15</sup> Pero shembásabiamna, chë bën stjënësha jtsinÿanÿayana chabe botamanana y uámanana, er Bëngbe Bëtsá tojanma shembása bën stjënësha chaotsábomnana, chca, cha chaotsebomna ndáyeca chabe bestšaše jtsenátstotsama. <sup>16</sup> Masque ntšámncá, ndánaca tojtseboše quem soyama más jatóyebuambayama, cha bontsemna jtsetatšëmbuana, ni bënga, ni Bëngbe Bëtsábeñe ošbuachiyëngcá enefjuanënga queftsatslesëncia chca ndoñe chaondëtsemnana.

*Bëngbe Utabnabiamana jtenójuaboyama jasama ora, chënga ndoñe tšabá imonjánama*

<sup>17</sup> Mora cbochanjamënda soyënguiñe atše ndoñe quetsátobena tšëngaftanga jáuyanana tšabá šmojama ca, er tšëngaftanga Crístbeñe ošbuachiyëngcá šmojënefná ora, Bëngbe Bëtsá jadórama, atše šontsinÿana chë soye yojtsoserverna tšëngaftanga más bacá chašmotsemnana, y ndoñe tšëngaftangbe tšabiamana. <sup>18</sup> Natsana cbochjáuyana, atše sënjouena tšëngaftanga ošbuachiyëngcá šmojënefná ora, báseftanga canÿe soye



innétsejuabnaye y ínÿengna inÿetsá ca, y atše sèntsejuabná batšana ndegombre chca yojtsemna ca. <sup>19</sup> Ndegombre jtseytana tšèngaftangbeñe chamotsemna báseftanga canÿe soye juabnayènga y ínÿengna inÿetsá, chca, nÿetscanga chamotsetatšèmbuama ndèmuanyènga imojtsemna chë Bèngbe Bètsá tojayana chènga tšabá tmojama ca. <sup>20</sup> Tšèngaftanga tandèse jasama y vínoye jofšiyama šmojénefjna ora, ntšamo bènga fsènduamancá, Bèngbe Utabná bèngbiana tojanóbanama jtenójuaboyama, ndayá chora tšèngaftanga šmnetsamcá, ndoñe quenátsmèna ntšamo ndegombre cmojtsamncá, chë Bèngbe Utabnabiana jtenójuaboyama jasama ora; <sup>21</sup> er chë jasama tojobuache ora, cada ona inóntša jasama ndayá tojiyèbcá, y ndoñe ntjatobátmanana nÿetscanga ndayánaca jasama chamotsebomnèntscuana; báseftanga shèntseca joquédana, y ínÿengna tša jèftsesana y jofšiyana jèftsótmenantscuana. <sup>22</sup> ¿Tšèngaftanga ndoñe yebna šmondobomna ndayentše jasama y jofšiyama? ¿Ndáyeca tšèngaftanga šmojtsejuabná chë innénefjna ošbuáchiyènga nduámanènga imomna ca, y šmojama chë chentše tmojtsemnènga, tondaye ndbomnènga, chamotsèuatjama? ¿Tšèngaftanga šmojtsejuabná atše cbochjáuyana tšabá šmojama ca, chë Bèngbe Utabnabiana jasama ora chca šmojamama? ¡Ndegombre ndoñe!

*Bèngbe Utabnabiana jtenójuaboyama saná  
(Mt 26.26-29; Mc 14.22-25; Lc 22.14-20)*

<sup>23</sup> Er atše cach Bèngbe Utabnábentsana ntšamo cbontsabuatèmbacá sènjanoýèngacñe: Bèngbe Utabná cach uayayèngbe cucuatšine tmojánboshjona ibeta, tandèse tojanca, <sup>24</sup> Bèngbe Bètsábioye tbojtanchuá chentšana, tojanjatá y tojánayana: “Quem tandèse atšbe cuerpo entsemna; tšèngaftangbe tšabiana chanjóbana. Ntšamo mora montsamcá šmochtsama, atšbiana jtenójuaboyama ca.” <sup>25</sup> Cachcá, chë saná tmojansentšana, coptema tojanaca y tojánayana: “Quem coptema vínoye atšbe buiñe entsemna. Atšbe buiñe echanjuábuashana tšèngaftanga chašmotsetatšèmbuama, ntšamo Bèngbe Bètsá entšanga tojanašebuachenacá pronto yochtsemnama. Cada vínoye chašmojtsofšèšná ora, chca šmochjama atšbiana jtenójuaboyama ca.” <sup>26</sup> Er tšèngaftanga cada quemèntša tandèse chašmojtšesá ora y quem coptementšaycá chašmojtsofšèšná ora, Bèngbe Utabná chaojésabèntscuana tšèngaftanga šmochántsinyanÿnaye cha entšangbiana tojanóbanama.

*Ntšamo yomna jamana, Bèngbe Utabnabiana jtenójuaboyama jasama ora*

<sup>27</sup> Chcasna, Bèngbe Utabnabiana jtenójuaboyama jasama ora, ndánaca tandèsentšana tojase y coptémentšana tojofšé, ndoñe chë ntšamo chaotsemnama Bèngbe Utabná yojanjuabnacá, chabiana Bèngbe Bètsá jayanana cha puerte bacna soye tojama ca. Chë entšá chca tojama ora, cha jtsinyanÿnayana, Bèngbe Utabnabe cuerpo y buiñe chabiana tondaye yonduámanama. <sup>28</sup> Chíyeca, entsemna cada ona corente chauenojuabó jtsetatšèmbuama aíñe o ndoñe yontseprontana chca jasama y jofšiyama, cabá ndèse y ndofšé ora. <sup>29</sup> Er nderado nda tojase y tojofšé, chë Bèngbe Utabnabiana jtenójuaboyama jasama ora, cach Bèngbe Utabnabe cuerpo yomnama ntjajuaboycá, cha chë sóyeca jamana Bèngbe Bètsá chabotsecastigama. <sup>30</sup> Chíyeca, banga tšèngaftanguentšènga šoquènga šmojtsemna, ínÿenga añemo ndbomnènga, y ínÿengna ndoñe nÿe báseftanga tmojóbana. <sup>31</sup> Pero bènga corente tmojajuabó jtsetatšèmbuama aíñe o ndoñe montseprontana ntšamo šuamncá jasama y jofšiyama, cabá ndèse y ndofšé ora; chca, Bèngbe Bètsá ndoñe buántsemna bènga játa castigana, ntšamo tšabá yomncá ndoñe tmonjase causa. <sup>32</sup> Pero, Bèngbe Utabná castigoca chca šojabuayená ora, jtsemnana bènga más tšabá jtsamama chamuatsjínÿama, y chca, bayté chentšana, Bèngbe Bètsá ndoñe chabondètsemna játayanana bènga šojtsamna nÿetsca tescama castigánènga jtsemnama ca, cánÿiñe chë nÿe quem luarama enójuabnaye entšangaftaca.

<sup>33</sup> Chca, Jesucristbeyeca atšbe catsátanga, tšëngaftanga chë Bëngbe Utabnabiama saná jasama chašmojénefjna ora, cánÿiñe nÿetscanga šmochjabojátša. <sup>34</sup> Y nderado nda tbojtseshëntsana, cachabe yebnoca chauétsese, chca, Bëngbe Bëtsá ndoñe chabondëtsemna tšëngaftanga jácastigana chora ndoñe tšabá šmonjama causa. Chë inÿe soyëngama ndayama tšëngaftanga šmonjatjá, chamna chanjamánda tšëngaftanga jányama chajjá ora.

## 12

### *Bëngbe Bëtsabe tšetana obenana, tšabe soyënga jamama*

<sup>1</sup> Jesucristbeyeca atšbe catsátanga, atše sëntseboše tšëngaftanga chašmotsetátšëmbo Bëngbe Bëtsabe tšetana obenanama tšabe soyënga jamama, Crístbeñe ošbuáchiyënga jujabuáchama.

<sup>2</sup> Tšëngaftanga šmondëtatsëmbo, tšëngaftanga Crístbeñe ndošbuáchiyënga šmonjamna ora, ínÿenga cmonjanabuatambá soyënga, y chora tšëngaftanga šmonjamna ínÿabeyeca uasjanëngcá, cach entsangbe pormana soyënga mo diosënga cuaftsemncá jadórama; y chë soyëngna ni mo jóyebuambayama ntsoobenana. <sup>3</sup> Chíyeca, atše mora sëntseboše tšëngaftanga chašmotsetátšëmbo, ndocná ntsoobenana jayanana: “Jesús ndoñe chë Cristo quenátšmëna, ni Bëngbe Utabná ca”, chë Bëngbe Bëtsabe Espíritbe obenánaca cha tojtsóyebuambnase. Y cach ndocná ntsoobenana jayanana: “Jesús Bëngbe Utabná endmëna ca”, chë Bëngbe Bëtsabe Espíritbe obenánaca cha ndoñe tontsóyebuambnase.

<sup>4</sup> Espiritu jamana bënga ndoñe chamondëtsebomnana cachca tšetana obenana tšabe soyënga jamama, pero lempe jobayana cach canÿe Espiritbeyeca. <sup>5</sup> Bënga, Bëngbe Bëtsá mondëserveda, nÿetsca soyënguiñe jtsetrabájayëse, pero cach Utabná nÿets chë trabajënga šojabanÿé. <sup>6</sup> Nÿetsca soyënga Bëngbe Bëtsabe obenánaca fsëndbëtsama, pero cach Bëngbe Bëtsá endmëna nda inétsama bënga chë soyënga jamama obenana chamotsebomnana. <sup>7</sup> Bëngbe Bëtsá inétsama cada ošbuachiyá chaotsebomnana canÿe tšetana obenana tšabe soyënga jamama, y chë soye jtsinÿanÿayana Bëngbe Bëtsabe Espiritu chabe ainaniñe yomnana; y chë tšetana obenana jtsemnana nÿetscangbe tšabíama. <sup>8</sup> Bëngbe Bëtsá, Espiritbeyeca, canÿa obenana jatštayana puerte osertanánaca chaóyebuambama, y ínÿana obenana cach Espiritbeyeca ndayámnaca corente jtsetatšëmbëse chaóyebuambama; <sup>9</sup> ínÿana cach Espiritbeyeca, obenana Crístbeñe puerte chaotsošbuáchema, y ínÿabiamna, cach nÿe canÿe Espiritbeyeca, obenana jatštayana šoquënga jáshnama; <sup>10</sup> ínÿana, obenana tšabe soyënga Bëngbe Bëtsabe obenánaca jamama, y ínÿana, obenana Bëngbe Bëtsabe juabna jóyebuambayama. Inÿana, obenana corente jajuaboyama y jtsetatšëmbuama ntšamo tmojayancá Bëngbe Bëtsabe Espiritbeyeca o bacna espiritëngbeyeca tojtsemnana, y ínÿana, obenana chë tempo ndmabiyáñnaca chaóyebuambama, y ínÿana, obenana josértama ntšamo chë ndaye biyáñnaca jóyebuambayama obenana bomná tojtsichamcá, y ínÿengna chama jábuayenama. <sup>11</sup> Pero cach Espiritu, chë nÿe canÿe Espiritu lempe chca jamana, ntšamo tšabá bëtsemnana cha tojtsejuabnacá cada entsábíoye jatštayëse.

### *Nÿetsca ošbuáchiyënga cánÿiñe, mo Crístbe cuerpcá jtsemnana*

<sup>12</sup> Cuerpo nÿe canÿe soye endmëna y chë cuerpna ba soyënga jtsebomnana; masque chë cuerpo ba soyënga jtsebomnana, nÿe canÿe cuerpo jtsemnana. Bëngaftácnaca cachcá. Bënga banga mondmëna nÿetscanga Crístbeñe ošbuáchiyënga, pero Crístbeyeca, bënga cánÿiñe mo canÿacá jtsemnana. <sup>13</sup> Er bënga nÿetscanga, judiënga o ndoñe judiënga, nÿe ínÿabíama nÿets tempo oservénënga o cachëngbíama trabájayënga šojanëbaye, Crísoftaca cánÿiñe mo canÿacá, jtsemnana mo chabe cuerpcá, y chca yomna cach Espiritbeyeca; y Bëngbe Bëtsá tojama cach Espiritu nÿetscangbe ainanoye cháuamashënguama, bënga jtsamëndayama.

<sup>14</sup> Cachcá, canÿe cuerpo ndoñe nÿe canÿe soye ntsebomnana, ndayá ba soyënga.

<sup>15</sup> Nderado shecuatše tojyana: “Cucuatše ndoñe quetsátšmëna causa, atše cuerpentša

soye ndoñe quetsátsmëna ca”. Chca tojayanamna, shecuatše mo chë cuerpentša soye ndoñe cuaftsemncá ndoñe ntjátsmënana. <sup>16</sup> Nderado matscuaše tojayana: “Bominýe ndoñe quetsátsmëna causa, atše cuerpentša soye ndoñe quetsátsmëna ca”. Chca tojayanamna, matscuaše chë cuerpentša soye ndoñe cuaftsemncá ndoñe ntjátsmënana. <sup>17</sup> Nýets cuerpo bominýe tojtsemnëse, bënga ndoñe muantsobena jouenama. Y nýets cuerpo matscuaše tojtsemnëse, bënga ndoñe muanjobenaye jonguétsetsiyana. <sup>18</sup> Pero ndegombre endmëna, Bëngbe Bëtsá nýetsca soye cuerpentše tojancjá ndayentše cha tojánbošenentše. <sup>19</sup> Nýetsca cuerpentša soyënga nýe canýe soye tojtsemnëse, ndoñe canýe cuerpo nántsemna. <sup>20</sup> Pero ndegombre endmëna, masque ba soyënga cuerpentše yomna, nýe canýe cuerpo jtsemnana.

<sup>21</sup> Bominýe quenátobena cucuatše jauyanana: “Ndoñe quecátsiyta ca”; y cachcá, bestsaše quenátobena shecuatše jáuyanana: “Ndoñe quecátsiyta ca”. <sup>22</sup> Inýetsá, chë cuerpentša soyënga, chë tojtsinýana mo obenana ndbomna y nduámana soyëngcá, jtsemnana chë cuerpama más iyta soyënga. <sup>23</sup> Chë cuerpentša soyëngama, ndayama bënga tmojtsejuabná más nduámana soyënga yomna ca, bënga jamana más chaotsámanama, chiñe entsáyaca jtichëtjése. Y chë cuerpentša soyënga, ndayama bënga jtsëuatjana ínýenga chamotsonýama, bënga jamana ínýenga ndoñe chamondëtsonýama, chiñe entsáyaca jtichëtjése. <sup>24</sup> Pero chë cuerpentša soyëngaca, chë nýetscanga jtsonýayana y botamana jinýama jtsemnana soyëngacna, ndoñe ntseytana chca játamana. Bëngbe Bëtsá cuerpo tojama, ntšamo bënga chamotsamama chentša más nduámana soyënga, más chaotsámanama, ntšamo chë soyënga bënga tmojtsinýenama. <sup>25</sup> Cha chca tojanma, cuerpentša nýetsca soyënga chë cuerpama trabajo cánýiñe chamotsamama, y chca, cada soye chaotsama trabajo chë cuerpentša nýetsca soyëngbe tšabiama. <sup>26</sup> Nderado canýe cuerpentša soyama bacna soye tojopasá, chora nýetsca chë cuerpentša soyëngámnaca chca ndoñe tšabe soye jtsebínýnana; pero canýe cuerpentša soyama tcojama más uámana soye chaotsemnana o ndaye tšabe soye tojopasase, chora nýetsca chë cuerpentša soyëngámnaca chca tšabe soye jtsebínýnana.

<sup>27</sup> Cachcá, tšëngaftanga Crístbeñe ošbuáchiyënga, cháftaca cánýiñe mo canýacá jtsemnëse, mo chabe cuerpcá jtsemnana, y cada ona tšëngaftanguentsá mo chë cuerpentša soyëngcá, jtsemnana mo chabe cuerpentša soyëngcá. <sup>28</sup> Ntšamo Bëngbe Bëtsá cuerpentše soyënga tojancjá ndayentše inabošcá, cachcá, ošbuachiyëngcá enefjuanëngbeñe Bëngbe Bëtsá tojubuáyana, natsana báseftanga mo Jesucristbe ichmonëngcá, chorna Bëngbe Bëtsabe juabna oyebuambnayënga, chorna Bëngbe Bëtsabiama abuátambayënga, chorna chë bëts soyënga Bëngbe Bëtsabe obenánaca jamama obenana bomnënga, chë šoquënga jáshnama obenana bomnënga, chë ínýengbioye puerte ujabuáchanënga, chë inýe ošbuachiyëngbioye amëndayënga, y chë nýetsca biyañe jtsóyebuambnayama obenana bomnënga, tempo ndmabiyañe. <sup>29</sup> Ndegombre, ošbuachiyëngcá enefjuanëngbeñe nýetscanga ndoñe Jesucristbe ichmónënga ntsemnana, nýetscanga ndoñe Bëngbe Bëtsabe juabna oyebuambnayënga, nýetscanga ndoñe abuátambayënga, nýetscanga ndoñe Bëngbe Bëtsabe obenana bomnënga, bëts soyënga jamama. <sup>30</sup> Nýetscanga ndoñe šoquënga jáshnama obenana bomnënga; nýetscanga ndoñe nýetsca biyañe jtsóyebuambnayama obenana bomnënga, tempo ndmabiyañe; ni nýetscanga ndoñe obenana bomnënga quemátsmëna, chë tempo ndmabiyañe nýetsca biyañe jtsóyebuambnayama obenana bomnënga ntšamo tmojtsichamcá josértama y ínýengbioye chama jtsabuayiynayama. <sup>31</sup> Pero tšëngaftangna puerte šmochtseboše, lempe ntšamo chašmojobenacá šmochjama, chë Bëngbe Bëtsabe más uámana tšetana obenana jëftsashjáchama.

### *Bonshánana jtsebomnana*

Y inýe soye más, atše cbochanjínýanýiye ntšamo šmojtsobena cabá más tšabá jtsiyenana, Bëngbe Bëtsá jtseeservënëse.

## 13

<sup>1</sup> Nderado atše stjóyebuambaye entsangbe biyañe y angelëngbe biyañe, pero ínÿengbioye ndoñe sentsababuánÿeshanëse, atše stsemna canÿa tondayama uamaná, mo nÿe canÿe metalëshe tojtsenancá, o mo nÿe canÿe platillëshcá ndoñe tšabá tontsenanëshe. <sup>2</sup> Y atše obenana stsebomna Bëngbe Bëtsabe juabna jóyebuambayama y nÿetsca soyëngama, y chë Bëngbe Bëtsá tempo entsanga ndoñe tonjaninÿanyé soyënga šojtsësertana, y Bëngbe Bëtsabe nÿetsca soyëngama stsetátšëmbo, y Crístbeñe puerte stjesošbuáchiye, chca betsošbuáchema nÿa mo chë tjashënga chamobonjoma jamama, pero ínÿenga ndoñe sentsababuánÿeshanëсна, atše tondaye sëntsemna. <sup>3</sup> Y atše lempe ntšamo stsebomncá ndbomnjëmënga stsëjátaye, y ínÿengbioye stjenontréga atšbe cuerpo chamojuinÿema, pero ínÿengbioye ndoñe sentsababuánÿeshanëse, atše ndocna uámana soye ntjashjáchana.

<sup>4</sup> Canÿe entsá ínÿenga ababuanÿeshaná, uantado jtsemnana masque padecena soyënguiñe tmojtsemna órnaca, y ínÿengaftaca tšabe ainánaca mando jtsebomnana. Inÿenga ababuanÿeshaná ndoñe ntsántšabošana ntšamo inÿa tojatsbomncá, ni ntsenábotamnayana, ni cachá chë ínÿengbiamá más uamaná ntjatenobiamnayana; <sup>5</sup> ndoñe bacá mandbomná ínÿengaftaca ntsemnana, ni nÿets tempo ntsebošana y lempe jtsamana nÿe chabiamá tšabe soye jónÿenama; cha nÿe ndayámnaca ndoñe ntjetnana, ntšamo ínÿenga tmojaborlá ora jtsaperdónayana. <sup>6</sup> Inÿenga ababuanÿeshaná ndoñe ntjóyejuayana chë ndoñe tšabá yondmëna soyëngama; chë ndegombre yomna soyëngamna aíñe. <sup>7</sup> Inÿenga ababuanÿeshaná, ainaniñe añemo jtsebomnana nÿetsca padecena soyënguiñe, lempe ntšamo más tšabá yomna soyënguiñe jtsošbuáchiyana, nÿetsca más tšabá yomna soyëngama jtsobátmanana, y jtsóboyayana nÿetsca toto soyënga.

<sup>8</sup> Bonshánana nÿetsca tescama jëftsemnana. Canÿe te echántsemna, chora chë Uámana Espíritu ndoñe más queochátama entsanga Bëngbe Bëtsabe juabna chamotsóyebuambnama, ni chë ndocna te ndmabiyañe chamotsóyebuambnama, ni chë puerte jtsetatšëmbëse jóyebuambayama obenama chamotsebomnana; <sup>9</sup> er ntšamo mora bënga imotatšëmbcá y Bëngbe Bëtsabe juábna jóyebuambayëse tmojayana soyënga, nÿe batsatema bëngbioye jtsinÿanÿnayana Bëngbe Bëtsabe soyëngama, ndoñe lempe; <sup>10</sup> pero Jesucristo chaojésabo ora, y chaojama bënga chamotsemna lempe ntšamo Bëngbe Bëtsá bëngbiamá yojanjuabnacá, quem soyënga, chë nÿe batsatema bëngbioye jtsinÿanÿnayana Bëngbe Bëtsabe soyëngama, ya ndoñe más queochátbinÿna.

<sup>11</sup> Atše básatema ora, sënjanoyebuambná, sënjanjuabná, y soyëngama tšabá jtsetatšëmbuamna sënjanjuabná mo canÿe basatemcá; pero bëtsá sënjanóbema orna, sëntsanajbaná lempe amana mo canÿe basatemcá. <sup>12</sup> Cachcá, mora bënga quem luarentšë nÿe batsatema Bëngbe Bëtsabe soyëngama jtsetatšëmbuana, mo canÿe espejuiñe tmojtsonÿacá, pero ndoñe nÿa corente tšabá. Pero canÿe te bënga mochántsetatšëmbo lempe nÿetsca soyëngama, bënga Bëngbe Bëtsabe delante chamojtsemna ora. Mora atše sëntsetatšëmbo nÿe batsatema Bëngbe Bëtsabe soyëngama, pero chora lempe chanjuábuatmana, ntšamo Bëngbe Bëtsá corente suabuatmcá.

<sup>13</sup> Pero morna, Bëngbe Bëtsabeñe jtsošbuáchiyana, chábeñe jtsobátmanana, y chábioye y ínÿengbioye jtsababuánÿeshanana, chë soyëngna nÿetsca tescama jëftsemnana; pero chentšana chë más uámana soye endmëna ínÿenga jtsababuánÿeshanana.

## 14

### *Ndmabiyañe obenana Bëngbe Bëtsabe tšetánana*

<sup>1</sup> Bëtscá šmochtsama nÿetscanga jtsababuánÿeshanëse chašmotsiyenama, y puerte šmochtseboše jtsebomnana chë Bëngbe Bëtsabe tšetana obenana tšabe soyënga jamama; pero chentšana masna, chë Bëngbe Bëtsabe juabna jóyebuambayama obenana. <sup>2</sup> Er



chë tempo ndmabiyañe mora jóyebuambayama obenana bomná, Bëngbe Bëtsábioye jtsatsëtsnayana y ndoñe entsángbioye, er ndegombre entsanguentse ntšamo cha tojtsoyebuambnacá ndocná ntjosértana; chana chabe espíritoftaca jtsóyebuambnayana y ndoñe nýe chabe juábnaca, chë tempo Bëngbe Bëtsá ndocna entsábioye tbonjaninýinýe soyëngama. <sup>3</sup> Pero chë Bëngbe Bëtsabe juabna oyeambuambnayana entsanga jtsëtsëtsnayana, chënga más chamotsošbuáchema y ainaniñe añemo chamotsebomnana, Bëngbe Bëtsabe soyëngama jábuayenama, y jamama padecena soyënguiñe tmojtsemna órnaca añemo chamotsebomnana. <sup>4</sup> Chë tempo ndmabiyañe mora jóyebuambayama obenana bomná, jtsamana nýe cha más jtsošbuáchiyama y ainaniñe añemo jtsebomnana; pero chë Bëngbe Bëtsabe juabna oyeambuambnayana jtsamana chë ošbuachiyëngcá enefjuanënga chca soyënga chamotsebomnana.

<sup>5</sup> Atše sëntseboše nýetsca tšëngaftanga chë tempo ndoñe šmonjanbiyañe mora jóyebuambayama obenana chašmotsebomnana, pero chama atše más sëntseboše tšëngaftanga chë Bëngbe Bëtsabe juábnaca soyënga chašmotsóyebuambnana. Chë Bëngbe Bëtsabe juábnaca soyënga oyeambuambnayá más uamaná jtsemnana chë inýe biyañe oyeambuambnayabiama; chca ndoñe nántsemna, ntšamo canýe biyañe tojayancá chë biyañe oyeambuambnayá tbojtsësertánëse y chë ošbuachiyëngcá enefjuanënga tojábuayenase, y chca, chë soyënga tmojouenama, chënga chamotsobena más jtsošbuáchiyama y añemo jtsebomnana. <sup>6</sup> Y mora, Jesucristbeyeca atšbe catsátanga, atše nderado tchojábuache y nýe inýe biyañe tchojáuyanëse, ¿chca ntšamo cbatjújabuache? Atše jtsobenana jujabuáchana, nýe ntšamo chë biyañe tijayancá átšnaca šojtsësertánëse, y ndayá Bëngbe Bëtsá šojinýinýecá entsanga jábuayenama stjobenase, chë Bëngbe Bëtsá tojama atše jtsetatšëmbuama soye, chë Bëngbe Bëtsabe juábnaca stsoyebuambná soye o chë tšëngaftanga jabuátambama cha yoboše soye.

<sup>7</sup> Entšanga monduamana ndayánaca juénanana, mo flautëfja o arpa, vida ndbomna soyënga; cada sóyeca inýetšá juénanama ndoñe tontsopodénëse, ndocná nantsobena jtsetatšëmbuama ndayá canýa chë soyëngaca yojtšënanama. <sup>8</sup> Y nderado nda trompetëfjua tojuájatëta ora, soldadënga japéliama chamoprontama, chë uajatëtaná inýetšá, nýa chama ndoñe tonjuájatëtëse, ndocná buanjósëta y jempéliama ndoñe nanjoprónta. <sup>9</sup> Tšëngaftangaftácnaca cachcá jtsopasánana. Inýenga paselo josértama jobenaycnana tšëngaftanga ndoñe šmonjóyebuambase, ndocná queochátstatšëmbo ntšamo šmojtsichamcá. Nántsemna mo nýe cánýenga cuaftsoyebuambnacá. <sup>10</sup> Atše sëntsejuabná, ndegombre quem luarentse ba inýe biyañe entsanga innëtsoyebuambnayana, y ndaye biyáñnaca tmojoyebuambá ora, sempre jtsemnana inýenga ntšamo chënga tmojtsichamcá osertánënga. <sup>11</sup> Pero ntšamo inýa chabe biyañe šojauyancá atše ndoñe šontsësertánëse, atše stsemna canýe chabiama ndosertana biyañe oyeambuambnayá, y chánaca cachcá atšbiama. <sup>12</sup> Chcasna, chë Uámana Espiritu šondinýanýná obenana jtsebomnana tšëngaftanga puerte šmobóseyeca, lempe ntšamo šmojobenacá šmochtsama chca tšetana obenana jóyëngacñama, chë ošbuáchiyënga más jtsošbuáchiyama y añemo jtsebomnana inétsama obenana.

<sup>13</sup> Chíyeca, chë tempo ndmabiyañe mora jóyebuambayama obenana tojtsebomná, Bëngbe Bëtsá chabotseimpadana, cha chaoma ntšamo chë inýe biyañe tojayancá chabosertama y ošbuáchiyënga jábuayenama obenana chaotsebomnana. <sup>14</sup> Pero atše Bëngbe Bëtsáftaca stjencuénta, chë ndmabiyañe jóyebuambayama cha obenana šojanatšetacá jtsóyebuambnayëse, atšbe espiritu cháftaca nantsóyebuambnaye, pero atšbe juabna ndoñe ntsetatšëmbuana ntšamo chë espiritu tojtsoyebuambnacá. <sup>15</sup> Y asna, ¿ntšamo atše chtsemana? Bëngbe Bëtsáftaca chanjencuénta atšbe espíritoca, pero ntšamo stsichámuama jtsejuabnayësnaca. Bëngbe Bëtsá jëtschuayama chanjavërsia atšbe espíritoca, pero chca chanjama chíñnaca jtsejuabnayëse. <sup>16</sup> Nderado aca Bëngbe Bëtsá cojtsatschuaná nýe espíritoca, y canýa quem Bëngbe Bëtsabe tšetana obenanama ndosertaná tcmojóyeunase,

cha ndoñe ntsoobenana jayanana “chca chaotsemna ca”, cach aquécá cha yojtsejuabnama jinÿinÿiyama, er ntšamo cojtsichamcá cha ndoñe ntsësertánana. <sup>17</sup> Aca jtsobenana chca puerte tšabá Bëngbe Bëtsá jëtschuayana, pero ntšamo tcojtsamcá ndoñe ntjamana inÿa ndaye tšabe soye chaotsebomnama. <sup>18</sup> Atše, Bëngbe Bëtsá sentsatschuaná inÿe biyañe jóyebuambayama tšëngaftangbiamá más tsobenama; <sup>19</sup> pero Crístbeñe ošbuachiyëngcá tmojënefjna ora, atše más sëndbétseboše nÿe mo shachna palabratémnaca jóyebuambayana, chënga aíñe catafjosertacá, chca, ínÿenga jabuátambama, y ndoñe bnëtsana uaranga palabrenga jatóyebuambnayana inÿe biyañe, chënga chaósertama ndoñe tontsopodénese.

<sup>20</sup> Jesucrístbeyeca atšbe catšátanga, šmochtsajbaná basetemëngcá juabnayana. Mo šešonatemëngcá šmochtsemna, bacna soyënga jamama ntsetatšëmbcá; pero mo bëtsëtsangcá tšabá šmochtsejuabnaye. <sup>21</sup> Bëngbe Bëtsabe uabemana palabrenguiñe, Bëngbe Utabná mëntšá tojánayana:

Atše quem entšángbioye chanjáuyana,

ínÿenga inÿe luarëngocana ashjajnëngaftaca, chëngbiamá canÿe ndosertana biyañe oye-  
buambnayënga;

y chanjáuyana ndayá chëngbe biyañe chamojtsichamo soyëngaca;

pero ni chca, chënga ndoñe quešmochatóyeunaye ca.

<sup>22</sup> Chcasna, inÿe biyañe jóyebuambayama obenana jtsebomnana endmëna, Bëngbe Bëtsá ndayánaca chë chábeñe ndošbuachiyëngbioye jinÿanÿiyama, y chábeñe ošbuachiyëngbioyna ndoñe. Pero, Bëngbe Bëtsabe juabna jóyebuambayama obenana jtsebomnana endmëna, Bëngbe Bëtsá ndayánaca chábeñe ošbuachiyëngbioye jinÿanÿiyama, y chábeñe ndošbuachiyëngbioyna ndoñe. <sup>23</sup> Er tšëngaftanga nÿetscanga ošbuachiyëngcá šmojënefjna ora, nÿetscanga ba biyañe šmojtsoyebuambná, y choye tojámashëngo canÿa chca Bëngbe Bëtsabe tšetana obenanama ndosertaná o chábeñe ndošbuachiyá, cha nanjájuaboje tšëngaftanga opënga šmojtsóbema ca. <sup>24</sup> Pero nÿetscanga tmojtsichamo, Bëngbe Bëtsabe juábnaca jtsóyebuambnayëse, y choye tojámashëngo canÿa Bëngbe Bëtsabeñe ndošbuachiyá o canÿa chca Bëngbe Bëtsabe tšetana obenanama ndosertaná, ntšamo chašmojtsichamcá cha bochanjosérta; y chë soye cha bochanjayënjaná cha bacna soyënga tojamama, y ndayá cha tojamiñe corente echántsejuabnaye, ntšamo nÿetscanga tmojtsichámuama. <sup>25</sup> Y Bëngbe Bëtsá chábioye bochanjinÿinÿiye ntšamo cha ainaniñe tojajuabó y tojabošencá, ndayá ndocnábioye tbonjinÿinÿecá, y cha echanjoshëntsamentšiyë Bëngbe Bëtsá jadórama, y tšëngaftangbe delante echanjayana Bëngbe Bëtsá ndegombre tšëngaftangbeñe yojtsemna ca.

### *Ošbuachiyëngcá šmojënefjna ora, ntšamo tšabá yomncá lempe šmochtsama*

<sup>26</sup> Chcasna, Jesucrístbeyeca atšbe catšátanga, šmojënefjna ora, cada ona ndayánaca jtsebomnana nÿetscangbiamá: ínÿengna jtsobenana javérsiama, Bëngbe Bëtsá jëtschuayama, ínÿengna jtsobenana jabuátambana o jábuayenama ndayá Bëngbe Bëtsá tojinÿanÿecá, o tempo ndmabiyañe chora jtsóyebuambnayana, o entšanga jábuayenana ntšamo inÿa inÿe biyañe tojayancá. Pero lempe šmochjama, ošbuachiyënga más chamotsošbuáchema y más añemo chamotsebomnama Cristo jasérviamá. <sup>27</sup> Nderado inÿe biyañe jóyebuambayama tojtsemnëse, útata o nÿa másese únganga chca chamoyebuambá, y canÿánÿa; y jtseytana ndánaca ntšamo tmojtsichamcá chabosertá y nÿetscanga chama chauabuayená. <sup>28</sup> Y chca chabosertama y nÿetscanga jábuayenama ošbuachiyëngbeñe ndocná tontsemnëse, as ošbuachiyëngcá chamojënefjna ora chë chca oyeambuambayá bontsemna ndoñe chca biyañe ntsoyebuambnayana, sinó nÿe canÿa tojtsemna ora cha jtsobenana chca Bëngbe Bëtsáftaca jencuéntana. <sup>29</sup> Utata o únganga entsamna jayanana soyënga, Bëngbe Bëtsabe juábnaca jtsóyebuambnayëse; y chë ínÿenga jtsamnana botamana jajuaboyana y jayanana ntšamo chënga tmojayancá aíñe o ndoñe Bëngbe Bëtsábíocana tayojsóbocanama. <sup>30</sup> Pero canÿa Bëngbe Bëtsabe juabna tojtsóyebuambnantscuana, inÿa

chentše ouenana tbemanábioye Bëngbe Bëtsá tbojinÿinÿé ndayánaca yojtsebomna jayanama, as chë natsana oyebuambnayá iytëca chaóbema, y chabolesenciá chë inÿa chaóyebuambama. <sup>31</sup> Chca, nÿetscanga, canÿánÿa jtsobenana jayanana soyënga, Bëngbe Bëtsabe juábnaca jtsóyebuambnayëse, nÿetscanga chamuatsjínÿama y nÿetscanga añemo jatšatayama. <sup>32</sup> Chë Bëngbe Bëtsabe juabna oyebuambnayá endobena jtsemándayana ntšamo tojtsichamcá, cha cachabe espíritoca tojtsoyebuambná ora; <sup>33</sup> er Bëngbe Bëtsá endmëna nda inétsama bënga natjëmbana chamotsiyenama, y ndoñe chë bënga nÿetscanga cachcá ndoñe chamondëtsejuabnama, y nÿe ntšamo cada ona tojtsebošcá chaotsamama.

Ntšamo nÿets luarënguenache, chë ošbuáchiyënga, chë Bëngbe Bëtsabe entsanga mondbénefná luarënguenache endbetsemncá, <sup>34</sup> tšëngaftangbéntšnaca, shembásenga entsamna iytëca jobiamëngana, ošbuachiyëngcá šmojënefná ora, er ndoñe quenátslesenciana chënga chora chamuáttoyebuambnama, y aíñe chënga entsamna chëngbe boyanga jtsayaunanana, ntšamo Moisesbe leyíñe endayancá. <sup>35</sup> Chënga ndayánaca jtsetatšëmbuama tmojtsebošëse, cachëngbe boyángbioye yebnocá chamotjanga; er ndoñe corente tšabá ntsemnana canÿe shembása jtsóyebuambnayana tšëngaftanga ošbuachiyëngcá šmojënefná ora.

<sup>36</sup> ¿Tšëngaftanga šmojatsjuabná, Bëngbe Bëtsabe tšabe noticiënga tšëngaftangbeñe tojanobojatšé ca, o nÿe tšëngaftanga chë soyënga šmojanóyëngacñe ca? Ndegombre ndoñe chca; chíyeca tšëngaftanga nÿe canÿënga ndoñe ntsoberenana jayanama ndayá jamama cmojtsamnama. <sup>37</sup> Nda tojtsejuabná cha Bëngbe Bëtsabe juabna oyebuambnayá yomna ca, o chabe ainaniñe chë Espíritu jtsemándayama yojtsebomna ca, cha bontsemna tšabá jtsetatšëmbuana, ntšamo Bëngbe Utabná šojamandacá atše stšabiamnama. <sup>38</sup> Pero cha ndoñe chca tontsetátšëmbo y chca ndoñe yondmëna ca tojayanëse, ndayá cha tojayanácá ndoñe šmatjóyëngacñe.

<sup>39</sup> Chcasna, Jesucristbeyeca atšbe catsátanga, puerte šmochtseboše Bëngbe Bëtsabe juábnaca soyënga jtsóyebuambnayama obenana jtsebomnama, y ndoñe šmattsama chë tempo ndmabiyañe ínÿënga ndoñe chamondëtsoyebuambnama; <sup>40</sup> pero lempe šmochjama ntšamo jamama yomncá, y ndoñe nÿe ntšamo cada ona tojatsjuabnacá.

## 15

### *Cristo tojtanayenama*

<sup>1</sup> Morna, Jesucristbeyeca atšbe catsátanga, atše sëntseboše tšëngaftanga chašmuatenójuaboma atše tčbonjanabuayená tšabe noticiënguiñe, ndayá tšëngaftanga šmonjanóyëngacñe, chë ndáyeca tšëngaftanga Jesucristbeñe šmojtsošbuaché y cha jt-seservénëse šmojtsiyena. <sup>2</sup> Chca šmobómnayeca, tšëngaftanga atsebácanënga šmojtsemna, pero tšëngaftanga sempre chiñe šmojtsošbuachese, ntšamo čbonjanabuayiynacá; chca ndóñesna, nÿe ndoñe corente tšabá ntjajuaboycá chë buayenana soyënguiñe šmojtsanošbuaché.

<sup>3</sup> Er atše tšëngaftangbeñe sënjéftsanboshjona, Bëngbe Bëtsábíocana atše tjanóyëngacñe más uámana buatëmbana soyënga. Atše tčbonjabuatambá: Cristo tojanóbana bënga bacna soyënga tmojamama, ntšamo Bëngbe Bëtsabe uabemana palabrënguiñe chabe juabna oyebuambnayënga chama tmojanayancá; <sup>4</sup> chë Cristo tmojanatbontsá y unga tianoye cha cháuatayenama Bëngbe Bëtsá tojanmama, ntšamo Bëngbe Bëtsabe uabemana palabrënguiñe chabe juabna oyebuambnayënga chama tmojanayancá; <sup>5</sup> chë Pédrëbioye tbojánëbëbocnama, y chentšana chë bnétsana útata ca uabobáinëngbioynaca. <sup>6</sup> Chentšana mo shachna patsama más chábeñe ošbuáchiyënga tojánëbëbuacna, chënga canÿëntše imojtsemna ora; chënguentsanga banga cabá vida imotsóbomñe, masque báseftanga ya tmojóbana. <sup>7</sup> Chentšana Santiágbioye tbojánëbëbocna, y chentšana nÿetsca chabe ichmónëngbioye.

8 Y chentšana átsnaca šonjánéböcna. Mo canye šešona cabá shbená tojonýnacá, Cristo chabe ichmoná šonjábema, chë tempo chama jopróntama ntsebmncá, ndayéntsucana ínýenga cha tojanabuatambá. 9 Er atše sëndmëna chë más batšá uamaná Jesucristbe ichmónëngbeñe; y ni merecido taitatobuajoñe “chabe ichmoná ca” chašmotsábobuatmama, er atše tša sënjánama Jesucristbeñe ošbuáchiyënga chamotsesufrínama. 10 Pero Bëngbe Bëtsá atšbe tšabiama yojanjuabná, y chíyeca atše mora tsmëna ntšamo sëndmëncá, y chabe tšabe juábnaca atšbiama jtsamana, ndoñe nýe bonamente quenátsmëna. Er atše más sënjatrabajá, chë inýe Jesucristbe ichmónëngbiama; pero ndegombre atše ndoñe nýe canya chca chiyatsma, sinó masna Bëngbe Bëtsá chë trabajo tojama, tšabe juabna atšbiama jtsebmñese. 11 Ndayá más yojtsámana ndoñe quenátsmëna, atše o chënga, Jesucristbe soyëngama abuyayinayíñe más tojatrabajá, sinó ndayá chë soyënga bëngbe buayenana soye yojtsemna, y tšëngaftanga chiñe šmojtsošbuaché.

### *Chë obanënga cachiñe vida mochtsatsbomnama*

12 Pero bëngbe buayenana soye endmëna, Bëngbe Bëtsá tojanma Cristo cháuatayenama; as ¿ndáyeca básefta tšëngaftanga šmnétsichamo Bëngbe Bëtsá ndoñe yochanjama chë mora obanënga chámuatayenama ca? 13 Pero chca tojtsemna, chë obanënga ndoñe mochántayenasna, Cristo cach ndoñe tontanayena; 14 y Cristo ndoñe matenjésayenëse, bënga nýe bonamente chabiama fstsabuayiná, y tšëngaftanga nýe bonamente chábeñe šmojtsošbuaché. 15 Y canye más bëts soye: chca tojtsemñesna, bënga muanjábocna mo chë Bëngbe Bëtsabiama soyënga tmojinýe ca ichamëngcá, pero ndoñe ndegombre chca tontsemna; er bënga fsëndbëtsichamo, Cristo cháuatayenama Bëngbe Bëtsá tojanma ca. Pero chë obanënga ndoñe mochántayenasna, Bëngbe Bëtsá ndoñe tonjanma Cristo cháuatayenama. 16 Pero chë obanënga ndoñe mochántayenasna, Cristo cach ndoñe tontanayena. 17 Y Cristo cháuatayenama Bëngbe Bëtsá ndoñe matënjämëse, tšëngaftanga nýe tondayama chábeñe šmojtsošbuaché; tšëngaftanga chë bacna soyëngama cabá ndoñe perdonánënga šmontsemna. 18 Y chca, chë tmojanóbanënga, Crístbeñe ošbuáchiyënga, chënga cach ndoñe chëngbe bacna soyënguentsana atsebácanënga quemochátsmëna, sinó nýetsca tescama castigánënga. 19 Bënga tmojtsobatmana Cristo bëngbiama tšabe soyënga chaotsamama, pero chca nýe quem luarentše bënga vida tmojtsebmñentsucana, as bënga nýetscangbiama más muantsomerecena, nýetscanga bëngbiama chaotsangménama.

20 Pero chca ndoñe ndegombre quenátsmëna, er ndegombre Bëngbe Bëtsá tojanma Cristo cháuatayenama. Mo chë uanatsena shajuancá, jtsinýanýayana más shajuanënga chentšana yochjóbcnana, cachcá, Cristo tojtanayena ora, cha tojaninýanýé Bëngbe Bëtsá yochjanma ínýenga chábeñe ošbuáchiyënga chámuatayenama vida chamotsatsbomnama. 21 Chca, ndayá canye entšá, Adán, tojanmama, nýetscanga jóbana yojtsamna, cachcá, ntšamo inýe entšá, Cristo, tojanmama, Bëngbe Bëtsá yochjama entšanga chámuatayenama. 22 Er ntšamo, Adánbentšana entšanga bëtsemnayeca jóbana yojtsamnana, cachcá, Crístbeñe ošbuáchiyënga bëtsemnayeca, Bëngbe Bëtsá jamana chë nýetsca tescama yomna tšabe vida chënga chamotsebmñesna. 23 Pero Bëngbe Bëtsá jamana cada ona cháuatayenama nýa chama tempo tojtsemna ora. Natsana Cristo, y chentšana, Cristo cachiñe quem luaroye chaojésabo ora, nýetscanga chë Crístbe entšanga imomñënga. 24 Y chentšana, Bëngbe Bëtsá chë Taitábioye, Cristo chabe amëndayana chabojantšabuaché ora, nýetsca mandadënga, mando y obenana bomñënga corente jtsayëñjanayëse. 25 Er Cristo bontsemna ínýenga mo reycá jtsamëndayana, chabe uayayënga chabe cucuatšiñe chamoquedama Bëngbe Bëtsá tojamëntsucana. 26 Canye uayayá inétsama entšanga jóbana; pero Cristo último echanjama chabe obenana pronto chaotsopochocama. 27 Er ntšamo Bëngbe Bëtsabe uabemana palabreñguíñe endayancá: “Bëngbe Bëtsá tojama Cristo nýetsca soyënguíñe chaotsemándama ca.” Pero “to-



jama Cristo nyetsca soyënguiñe chaotsemándama ca” tojayana ora, jtsopodénana puerte tšabá jinñama, chca ndoñe yontsayana, Bëngbe Bëtsá Crístbeyeca mandaná yojtsemna ca; Bëngbe Bëtsá nda tojanma Cristo nyetsca soyënguiñe chaotsemándama. <sup>28</sup> Y Cristo nyetsca soyënguiñe chaojtsemánda ora, cach Cristo, chë Uaquiñá, echántsemna Bëngbe Bëtsábeyeca mandaná, Bëngbe Bëtsá chë Cristo nyetsca soyënguiñe chaotsemándama tojanmá. Y chca, Bëngbe Bëtsá lempe echántsemna, lempe ntšamo quem luarentše yobínñiñe.

<sup>29</sup> Inyetsánaca, báseftanga cachiñe uabáinënga imojtsemna, chë ošbuáchiyënga ndu-abáinënga obanëngbe cuenta. Chca chënga jamana mo chë obanënga uabáinënga chamotsemnana cuafjamcá. Chë obanënga chámuatayenama ndoñe tontsemnëse, ¿ndáyeca entšanga chëngbe cuenta muantenábaye? <sup>30</sup> Obanënga chámuatayenama Bëngbe Bëtsá ndoñe tonjamëse, ¿ndáyeca bënga muántseprontana nyets tempo resjuiñe jtsajnama, Crístbiamana oservenana causa? <sup>31</sup> Atšbiamana cada te resjo endmëna jóbanama. Jesu-crístbeyeca atšbe catšátanga, atše sentsichamo, chca ndegombre yómnayeca, atše oyejuayá stsemna ca, mo Cristo Jesús Bëngbe Utabnabe canye oservenacá, tšëngaftanga chábeñe šmojtsošbuáchemana. <sup>32</sup> Mo canya tšátjaye bayëngaca tojtsentsjaná orcá, atšbiamana puerte resjo enjamna jóbanama, Efeso puebloca; pero nye chë entšanga mondbëtsejuabnaye jëftsashjáchama soyënga jtsebošëse chca matsjamnëse, ¿ndaye tšabe soye matënjanóbozna, chca atšbiamana resjo jóbanama enjamna ora? Obanënga ndoñe mochántayenësna, mocht-sama ntšamo entšanga jayanana monduamancá: “¡Mochjase y mochjofsiye, nderado yëfse muatjóbana ca!”

<sup>33</sup> Ndoñe matenoíngñana. Ntšamo canya tojanayancá: “Nderado nda bacna amiguëngaftaca tojtsenutaná, cha jtsajbanana chë tšabe soyënga, ntšamo jtsamëse yojoyena.” <sup>34</sup> Tšabá šmochtenójuaboye, y juabna ndbomnacá ndoñe; y šmochtsajbaná bacna soyënga amana, chë obanënga ndoñe mochántayena ca juabnaye causa, er báseftanga tšëngaftanguentše Bëngbe Bëtsabe soyënga ndoñe quešmatábuatma. Atše chca sentsichamo tšëngaftanga chašmotsëuatjama.

### *Ntšamo chë obanënga mochtayena*

<sup>35</sup> Pero nderado nda nanjatjaye: “¿Ntšamo chë obanënga mochtayena ca? ¿Mocna cuerpo mochtsebmna ca?” <sup>36</sup> ¡Juabna ndbomna entšá! Ndayá tcojajé orna, jtseytana chë jénaye chaóbanama, chë matatema vida chaotsebmnama. <sup>37</sup> Ndayá tcojajecá ndoñe ntsemnana chë juábocnama matatema, ndayá nye chë meshe, trigo meshe o ndaye mata méshnaca jtsemnana. <sup>38</sup> Pero Bëngbe Bëtsá jamana chë jénayentšana mata chauábocnama, ntšamo jamama cha tojajuabocá; y cha jamana cada jénayentšana canye mata chauábocnama, ntšamo chë jénayentšana chauábocnama tojtsemncá. <sup>39</sup> Nyetsca cuerpënga ndoñe cachcá ntsemnana. Entšanga canye cuerpo mondbomna, bayënga inye cuerpo, shloftšënga inye cuerpo, y beongna inye cuerpo. <sup>40</sup> Chë celoca vida bomnënga inyetsá jtsinñana, y chë quem luarentše vida bomnënga inyetsá. Pero chë buash-inyëñanana y botamanana ntšamo celoca vida bomnënga jtsinñancá, ndoñe cachcá ntsemnana chë quem luarentše vida bomnëngbe botamanancá. <sup>41</sup> Cachcá, shinye ndoñe quenátsbmna cachca buashinñinñana juashconcá, ni estrellëngcá; y estrellënguentše cach ndoñe cachcá ntsebuashinñinñana.

<sup>42</sup> Cachcá, chë obanënga chámuatayenama Bëngbe Bëtsá chaojama ora chamojtsebmna cuerpo, ndoñe queochátmëna cachcá ntšamo quem luarentše imojaniyena ora imojëftsebmna cuerpca. Ntšamo chë jénaye tcojuatbontsá ora chiye jóbanana, cachcá, quem luarentše bënga mondbomna cuerpo jóbanana, inyënga juatbontsana y jtsopochócana; pero bënga chámuatayenama Bëngbe Bëtsá chaojama ora, bënga tsëm cuerpo mochántatsbmna y ndocna te queochatopochóca. <sup>43</sup> Chë óbana cuerpo tmojuatbontsá ora, chë cuerpo tondaye ntsámanana; pero chë obanënga chámuatayenama Bëngbe Bëtsá chaojama ora, chë tsëm cuerpo puerte echántsebuashinñinñana y echantsámana. Bënga

quem luarentše imoyenëntscuana imobomna cuerpo, nÿe batsá obenana jtsebomnana; pero chë Bëngbe Bëtsá šochjatsataye tsëm cuerpo, puerte obenana bomna cuerpo echántsemna. <sup>44</sup> Quem luarentše imobomna cuerpo endmëna cam luarentše vida chaotsebomnana; pero bënga chámuatayenama chaojama ora, chë bënga mochtsebomna tsëm cuerpo, puerte chë Espíritbeyeca echántsemmandana. Canÿe cuerpo quem luarentše vida chaotsebomnana yómnyeca, canÿe cuérpënaca, jtsemnana celoca vida chaotsebomnana.

<sup>45</sup> Chca Bëngbe Bëtsabe uabemana palabrenguiñe endayana: “Bëngbe Bëtsá, chë natsana entsá tbojanma chaotsainama ca.” Adánbentsana nÿetsca entsanga jabocanana, pero Crístbeyeca, Bëngbe Bëtsá tojama banga mo tsmëma entsangcá chamotsemnana; chca, Cristo jtsemnana mo chë ústonoye Adancá; pero Cristna canÿe espíritu endmëna, y chë espíritu jamana entsanga chë nÿetsca tescama yomna tšabe vida chamotsebomnana. <sup>46</sup> Pero chë celoca nÿetsca tescama vida jtsebomnana cuerpna ndoñe natsana ntjóboconana, ndayá chë quem luarentše vida jtsebomnana cuerpo; chentsana chë celoca vida jtsebomnana cuerpo. <sup>47</sup> Bëngbe Bëtsá, chë natsana entsá tbojanma fshántseca, y chca, cha fshantsentsana tojánbocna; Cristna, mo entsángbentsana chë natsaná tsmacá bemanacá, celocana tojánbocna. <sup>48</sup> Adánbentsana, chë natsana entsá, chë fshántseca tmojanmábentsana tmojábocanënga, ntšamo cha yojamncá jtsemnana. Cachcá, chë mo tsmëmangcá tojábiamëngna, Cristcá jtsemnana; Cristo nda celocana tojánabo.

<sup>49</sup> Ntšamo bënga jtsinÿnana chë Bëngbe Bëtsá fshántseca tbojánbema entsacá, cachcá bëngnaca mochtsinÿna ntšamo chë celocá yomnacá.

<sup>50</sup> Jesucrístbeyeca atšbe catšátanga, atše cbochjáuyana, nÿe quem luarentše vida jtsebomnana cuerpëngaca, bënga ndoñe ntsoobenana Bëngbe Bëtsabe amëndayoye jamashënguana; ni ndayá yochjopochóca soye, ntsoobenana ndayá ndoñe yochanjopochóca soye jtsebomnana. <sup>51</sup> Smochjouena, atše canÿe soye cbochanjáuyana, y chë soye Bëngbe Bëtsá entsanga tempo ndoñe tonjaninÿanÿe: Bënga ošbuáchiyënga nÿetscanga ndoñe quemochatóbana, pero Bëngbe Bëtsá šochanjátrocaye mo tsmëmangcá. <sup>52</sup> Nÿe betesco, mo tcojofshetá y cachora tcojtafšnacá, quem luare ya jopochócamora, canÿe ángel trompetéfjua chaojuátëta ora, er chora trompetéfjua echanjuénana, Bëngbe Bëtsá echanjama obanënga chámuatayenama, nÿetsca tescama vida jtsebomnana; y bënga, chë ainënga mochtsemnëngna, cha šochanjátrocaye mo tsmëmangcá jtsemnana; <sup>53</sup> er jtseytana Bëngbe Bëtsá chaotrocá chë bëngbeñe jopochócamora yomna soye, ndocna te yochanjopochóca soyiñe; y ndayá bëngbeñe yochjóbanamora soye, ndocna te yochanjóbanamora soyiñe. <sup>54</sup> Bëngbe Bëtsá chca bëngaftaca chaojama ora, chë cha jatrócana ndayá bëngbeñe yochjopochocacá, ndocna te yochanjopochóca soyiñe, y ndayá bëngbeñe yochjobancá, ndocna te yochanjóbanamora soyiñe, chora echanjochnëngo ntšamo Bëngbe Bëtsabe uabemana palabrenguiñe chama endayanacá:

Bëngbe Bëtsá tojayënjaná chë entsanga chamóbanama endbëtsama obenana; entsanga ndoñe más quemochatóbana ca.

<sup>55</sup> ¡Mora entsanga chamuatóbanama chaotsama obenana ya ndoñe quenátsmëna; Bëngbe Bëtsá chë obenana nÿetsca tescama tojayënjaná ca!

<sup>56</sup> Entsanga bacna soyënga tmojama causa, obenana endmëna entsanga jóbanama chaot-samnama. Ndayá leyiñe iuayanama, entsá jtsetatšëmbuana ndayá yomna bacna soyënga jamana, y chca tátšëmbo causa, chca bacna soyënga jamama juabnëngaca mandaná jtsemnana, y cabana, jóbanama jtsemnana. <sup>57</sup> ¡Pero Bëngbe Bëtsá mochtsatschuanaye, bënga mo ayënjanayëngcá cha šojábiamama, er ya ndoñe šontsamna chca jtsemnana, chë Bëngbe Utabná Jesucristo bëngbiama tojanma sóyeca!

<sup>58</sup> Chíyeca, Jesucrístbeyeca atšbe catšátanga, atšbe bonshánënga, Jesucrístbeñe sempre puerte šmochtsošbuáchiye y ndocna te šmatjaleséncia ndocná ni tondaye chaotsama chábeñe ošbuáchiyana chašmotsajbanama. Sempre šmochtsentsëna bëtscá jtsamana

Bëngbe Utabnabiamama trabájayiñe, er tšëngaftanga šmondétatsëmbo, Bëngbe Utabnabiamama trabájayiñe ndayá šmojamcá, ndocna te nýe bonamente ntsemnana.

## 16

### *Jerusalenoca ošbuáchiyëngbiamama crocenánama*

<sup>1</sup> Mora chanjóyebuambaye chë Jerusalenoca Bëngbe Bëtsabe entsanga nd-bomnjémëngbiamama tšëngaftanga šmochjuíchmua crocenánama. Atše sëntseboše tšëngaftanga chca chašmoma ntšamo chë Galacia luaroca ošbuachiyëngcá enefjuanenache chama atše sënjanabuayenacá. <sup>2</sup> Cada tmengo, cmontsamna batšá crocénana jaluárana ntšamo chë semaniñe šmojonýencá, y šmochtsejuabaye; chca atše choye chajá ora, ndoñe chacmondétsamna quem uajabótama chora crocénana játatbanayana. <sup>3</sup> Y atše choye chajáshjango ora, Jerusalenoye chjichamuá chë tšëngaftanga mo tšabengcá šmojubuáyana entsanga, chë Jerusalenoca ošbuachiyëngbioye tšëngaftangbe crocénana chámuayentsbuachema, y tsbuanachangá chanjúyentsbuachiye ndayá imojtsamama chënga jábuayenama. <sup>4</sup> Y nderado, átsnaca chëngaftaca jama tšabá tojtsemnëse, chënga átsëftaca chamua.

### *Ntšamo Pablo yojanjuabná chë luarëngoye jama*

<sup>5</sup> Atše sëntsejuabná tšëngaftangbioye jama jautsëtsayama, Macedonia luarëjana chajachnëngüentsana, chentsa ošbuáchiyënga jaftsanyëse, er atše sëntsejuabná natsana Macedonia luaroye jéftsana. <sup>6</sup> Nderado baseftayté tšëngaftangbeñe chašuétsëjetana, o nderádose nýets uaftena tempo; as tšëngaftanga inýe luaroye játama chašmuájabuachama, ndëmoye jama chašojtsemnoye. <sup>7</sup> Atše ndoñe quetsátsboše nýe betesco tšëngaftanga jáftsanyana, er atše sëntsobátmana más bayté tšëngaftangbeñe jaftsemnana, Bëngbe Utabná chca šojalesenciase. <sup>8</sup> Pero Efesoca šochanjajétana Pentecostés fiesta chaojobuáchëntscuana. <sup>9</sup> Er Bëngbe Bëtsá tojama atše jobenayama muentše chë tsabe noticiëngama banga jábuayenama, y chíyeca banga Crístbeñe montsošbuaché; pero bángnaca atšbe contra montsemna.

<sup>10</sup> Timoteo tšëngaftangbioye chaojase, yejuana šmochtsantješna cha tondayama chaondëtsauatjama, tšëngaftangbeñe tojtsemnëntscuana, er cha Bëngbe Utabnabiamama endëtrabája, ntšamo atše sëndamcá. <sup>11</sup> Chcasna, ndocná chábioye chabondëtsáboyënja. Bëtscá šmochjama cha natjëmbana átsbioye chauatábama, er atše cha sëntsobátmana, chë inýenga muentše Crístbeñe ošbuáchiyëngaftaca.

<sup>12</sup> Y Jesucristbeyeca bëngbe catšata Apólosna, atše bëtscá cha sënjaimpadá, chë Jesucristbeyeca catšátanga tšëngaftanga jányama mochjángaftaca chaotsama, pero cha ndoñe chenátsbošena choye mora jama. Cha choye caochjá, chaojobená ora ca.

### *Pablo chënga jtadióšoftanama*

<sup>13</sup> Sempre šmochtsenocuedana chë Bëngbe Utabná ndoñe chašmondëtseservenama tojtsama soyëngama. Nýets tempo, Crístbeñe y chabe soyënguífñnaca šmochtsošbuáchiye. Ainaniñe puerte añemo šmochtsebomna, y bëtscá šmochtsama Bëngbe Bëtsabe obenánaca. <sup>14</sup> Y nýetsca soyënga ntšamo chašmojtsamcá, bonshanánaca šmochtsama.

<sup>15</sup> Jesucristbeyeca atšbe catšátanga, tšëngaftanga šmondétatsëmbo, Estéfanas y chabe pamíllanga chë natsanënga monjamnama Jesucristbeñe jtsošbuáchiyama, Acaya luaroca, y bëtscá imojtsentšena Bëngbe Utabnabiamama jtsetrabájayana, chabe entsanga jtsëjabuáchanëse. <sup>16</sup> Atše cbaimpadá, tšëngaftanga lempe šmochtsama ntšamo cmojtsamëndacá, chca entsanga mo tšëngaftangbe uanatsanëngcá, y ntšamo nýetsca chë inýenga mo bëngcá quemuiñe uajabuáchanëse trabájayënga cmojtsamëndacá.

<sup>17</sup> Atše tša oyejuayá sëntsemna tšëngaftangbe pueblentsana Estéfanas, Fortunato y Acaico moye tmojášhajnama, er atše sëntsobena oyejuayá chëngaftaca jtsemnana, tšëngaftangaftaca choca jtsemnana cabá ndoñe sëntsobenëntscuana. <sup>18</sup> Er chënga átsbioye

tmonjabo y tšëngaftangbiamá šmonjauyana, y chca chënga tmonjama, atše y tšëngaftanga natjëmbana ainánaca chamotsomñama. Chënga šmochtsëtabna mo puerte uámana entšangcá.

<sup>19</sup> Asia luaroca ošbuachiyëngcá enefjuanënga cmontsacheuaná. Aquila y Prisca y chatbe yebnentše mondbëtsenefjuana ošbuáchiyënga cmontsacheuaná, Bëngbe Utabnábeñe ošbuachiyëngcá, tšëngaftangcá bëtsemnayeca. <sup>20</sup> Muentša ošbuáchiyënga nyetscanga cmontsacheuaná. Nyetscanga šmochjenchuaye mo Jesucristbeyeca catšatangcá, jtenámochëse, ntšamo cach tšëngaftangbe pamíllanga puerte bonshanánaca šmondbetsacheuanaycá.

<sup>21</sup> Quem palabrënga tšëngaftanga jacheuayama cach atšbe cucuátšeca sëntsabiamná.

<sup>22</sup> Nderado nda Bëngbe Utabnábioye ndoñe tbontsebobonshana, Bëngbe Bëtsá nyetsca tescama chabocastigá. ¡Bëngbe Utabná cachiñe cochjésabo!

<sup>23</sup> Atše, Bëngbe Bëtsá sëntseimpadana, Bëngbe Utabná Jesús chaoma tšëngaftangbeñe tšabe bendicionënga chaotsemnana. <sup>24</sup> Atše, nyetsca tšëngaftanga cbondábabuanyëshana, canya mo tšëngaftangcá, Cristo Jesúseftaca cányiñe mo canyácá jtsemnëse.



## 2 Corintios

### *Jacheuayama*

<sup>1</sup> Atše Pablo, Jesucristbe canye ichmoná, Bëngbe Bëtsá atše chca jtsemnama yojánbošeyeca, Jesucristbeyeca bëngbe catsata Timotéoftaca quem tsbuanácha séntsabiamná, Corinto pueblaca Bëngbe Bëtsábeñe ošbuachiyëngcá enefjuanëngbiana, y nyets Acaya luarentše Bëngbe Bëtsabe nyetsca entšangbiámnaca. <sup>2</sup> Atše séntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama y ainaniñe tšabe ebionana chašmotsebmnama.

### *Ntšamo Pablo tojansufri*

<sup>3</sup> Bënga mochtsatschuanaye Bëngbe Bëtsá, chë Bëngbe Utabná Jesucristbe Taitá, bëngbe Taitá, chë bëngbiana lastemado yomná, y ndaye padecena soyënguiñe tmojtsemna ora, bënga šondbetsañemuayá. <sup>4</sup> Cha bënga jtsañémuayana padecena soyënguiñe tmojtsemna ora, chca, bënga chamotsobenama chë tmojtseufrinënga jañémuayama, ntšamo Bëngbe Bëtsá šojjabuachcá chënga jujabuáchëse. <sup>5</sup> Er ntšamo Cristo tojansufri, bënga tša fsëndësufrina chabiana oservëniñe; cachcá, Cristbeyëcnaca Bëngbe Bëtsá jama bënga puerte añemo ainaniñe fchaitsebmnama. <sup>6</sup> Er bënga tmojtseufrinëse, jtsemnana bënga jobenayama tšëngaftanga jañémuayama chë šmojtseufrina ora, y atsebácanënga chašmotsebmnama, Bëngbe Bëtsabe soyëngama jouenëse. Chë padecena soyënguiñe tmojtsemna ora Bëngbe Bëtsá šojañemose, jtsemnana bënga fchayobenama tšëngaftanga jañémuayama, padecena soyënguiñe šmojtsemna ora. Chca, bënga jobenayana tšëngaftanga jujabuáchana, Bëngbe Bëtsábeñe chašmotsobátmanama, chábeñe jtsošbuáchiyëse, y lempe jtsóboyayama, ntšamo bënga fsënjasufri, šmojtseufrina ora. <sup>7</sup> Bënga sempre fsëndobátmana y tšabá fsëndëtatsëmbo chë padecena soyënguentšana tšabá šmochjábocanama, er bënga fsëndëtatsëmbo, chë ntšamo bënga fsënjasufri, tšëngaftanga šmojasufri; y cachcá, Bëngbe Bëtsá yochjama tšëngaftanga ainaniñe puerte añemo chašmotsebmnama, ntšamo bënga fchaitsebmnama cha tojamcá.

<sup>8</sup> Jesucristbeyeca atšbe catsátanga, bënga fsëntseboše tšëngaftanga chašmotsetátšëmbo ntšamo bënga Asia luaroca tša fsënjansufrinama. Bënga puerte padecena soyënguiñe fsënjaniana, nya ndoñe más jauantacá, chentsana vídaca jabocanama ntjatobatmancá. <sup>9</sup> Bënga šontsanënanana mo jóbanama cuafsamncá. Pero chë soye tonjanoservé, bënga jtsošbuáchiyama Bëngbe Bëtsábeñe, nda inétsama obanënga chámuatayenama, y ndoñe cabëngbeñe ntsošbuáchiyana. <sup>10</sup> Cha šojatsebacá bënga jóbanama puerte resjo enjamntšana, y cachcá šochjátsebacaye bëngbiana cachiñe cachcá tša resjuñe chamojtsemna ora. Bënga puerte chábeñe fsëndobátmana, puerte padecena soyënguiñe bënga chamojtsemna ora, cha cachiñe šochjátsebacama. <sup>11</sup> Tšëngaftángnaca cmontsamna bënga jujabuáchana, bëngbiana Bëngbe Bëtsá jaimpádase; chca, ba entšanga Bëngbe Bëtsá mochanjëtschuaye, er cha tojama bënga chábentsana tšabe bendicionënga fchayóyëngacñama, cha jamëse ntšamo chënga bëngbiana tmojanimpadacá.

### *Ndáyeca Pablo Corinto pueblayo ndoñe tonjana*

<sup>12</sup> Canye soye endmëna ndayá oyejuayënga šojtsabiamná: bënga bëngbe ainantša juabnéngaca jtsetatsëmbuana puerte tšabá jtsamëse ftsiyena ca, ntšamo chë Bëngbe Bëtsabe entšanga endbetsamncá, nyetsca quem luarentša entšangbeñe, y más tšëngaftangbeñe, y bënga jtsetatsëmbuana ntšamo tšabá tifjamcá nyets ainánaca tifjamama. Bënga tondaye chibiatsma quem luarentša entšangbe osertanánaca, ndayá Bëngbe Bëtsá tša tšabia bëngaftaca bëtsemnayeca, šojújabuache chca chamotsiyenama. <sup>13</sup> Er ntšamo fsëntsabiamnamna ndoñe queftsátsboše, ntšamo tšëngaftanga

šmojtsalía y cmojtsësertánentšana inÿetšá játayanana, y sentsobátmana puerte tšabá lempe chacmósertama. <sup>14</sup> Mora ndayá atše stsamama ndoñe lempe quecmátësertana. Pero atše sëntseboše tšëngaftanga chama corente chacmósertama; chca, Bëngbe Utabná quem luaroye chaojésabo ora, tšëngaftanga bëngbiama oyejuayënga chašmotsemnana, ntšamo bëngnaca tšëngaftangbiama oyejuayënga fchantsemncá.

<sup>15</sup> Chca ndegombre yomnama atše sëndétatšëmboyeca, atše sënjanjuabná tšëngaftangbioye jshétsana jánÿama, y chca, chë tšabe soye tšëngaftangbiama uta soye jamana, tšëngaftangbioye uta soye jánÿese. <sup>16</sup> Atše sënjanjuabná tšëngaftanga jshaftsanÿana, Macedonioye ayiñe chëjana matijánachnëngo ora; y chentšana, ya camoye ataboye ora, tšëngaftanga cachiñe jáftsanÿana. Chca, tšëngaftanga mašmënjanobená atše juajabuáchana Judea luaroye játama. <sup>17</sup> Atše chca jamama tsjanjuabná ora, ¿chca tjanma ndoñe corente tšabá ntjenjuaboycá? ¿Tšëngaftanga šmatjájuaoye, ntšamo nÿe quem luarama enójuabnaye entšanga monduamancá, cachora canÿe soyama “áiñe” y “ndoñe ca” jayanëse, atše ndayánaca jamama snëtsejuabnaye ca?

<sup>18</sup> Canÿe soye ndegombre endmëna: Bëngbe Bëtsá sempre endbama ntšamo tojayancá, y chca puerte ndegombre endmënayeca, atše ndayánaca chjama ca stjayana ora, chca ndoñe questsbatayana chentšana atšbe juabna jatstrócama, mo canÿa cachora canÿe soyama “áiñe” y “ndoñe ca” cuafjatichamcá. <sup>19</sup> Er Cristo Jesús, Bëngbe Bëtsabe Uaquiñá, ndabiama Silvano, Timoteo y atše tšëngaftangbeñe fsënjanabuayiyiná, ndoñe ntsejuabnayana canÿe soye jamama y chentšana jatsjuabnayana inÿetšá jatsmama, mo canÿe entšá cachora canÿe soyama “áiñe” y “ndoñe ca” cuafjatichamcá, ndayá chana nÿets tempo ntšamo tojtsejuabnacá jayanana y jamana ntšamo ndegombre yomncá, chentšana ntjatstrocaycá. <sup>20</sup> Er ndayá cha tojamiñe, lempe ntšamo Bëngbe Bëtsá tojašebuachenacá jocúmpliana, mo chë lempe ntšamo Bëngbe Bëtsá tojašebuachenama cha “áiñe ca” cuafstichamcá. Chíyeca, Bëngbe Bëtsá bënga tmojtsatschuaná ora, Cristo Jesúsbeyeca bënga jayanana “chca chaotsemna ca”. <sup>21</sup> Pero Bëngbe Bëtsá endmëna nda inétsama bënga y tšëngaftanga puerte Crístbeñe chamotsošbuáchema, cháftaca cánÿiñe mo canÿacá jtsemnëse; y Bëngbe Bëtsánaca endmëna nda bënga šojabacacá chabe entšanga chamotsemnana. <sup>22</sup> Cha tojama chë Uámana Espíritu bëngbe ainaniñe cháuamashënguama jtsemándayama, y chë soye jtsinÿanÿayana bënga Bëngbe Bëtsabe entšanga imomnama. Y bëngbe ainaniñe chë Espíritu imobómnyeca, bënga corente jtsetatšëmbuana bënga mochjójyëngacñama lempe ntšamo Bëngbe Bëtsá bënga jatsatayama šojašebuachenacá.

<sup>23</sup> Bëngbe Bëtsá entsonÿá atše ndegombre stsihámuama. Atše Corinto puebloye cabá ndoñe chiyjá, er atše ndoñe quetsátsboše tšëngaftanga jašëchnana, chë bacna soyënga šmojamama, tchojaucácanëse. <sup>24</sup> Bënga ndoñe queftsátsboše tšëngaftanga jamëndana ndayiñe cmojtsamna jtsošbuáchiyana; er tša šmojtsošbuachéyeca, ndoñe quešmochatajbaná Crístbeñe jtsošbuáchiyana. Bëngbe fsëntseboše ndayá tšëngaftanga jujabuáchana, corente oyejuayënga chašmotsemnana.

## 2

<sup>1</sup> Chíyeca atše ndoñe chiyjá jautsëtsayama, er atše sënjanjuabó y sënjanéniyana choye ndoñe jama ca, bacna soyënga šmojtsanmama jábuayenama, y chca, ngmënënga játabiamana, ntšamo chanÿe sënjamcá. <sup>2</sup> Tšëngaftanga ngmënaca chašmotsemnana atše stjamëse, ¿nda yochjama atše oyejuayá chaitsemnana, sinó nÿe tšëngaftanga, chë atše ngmënënga tijábiamënga? <sup>3</sup> Chíyeca tcbonjanëbuábiana chë ntšamo šmojualiaca, chca, atše choye stjáshjango ora, tšëngaftanga átsbioye ndoñe ngmená chašmondëbemama. Chca játamamna, tšëngaftangbiama más tšabá endmëna oyejuayá atše chašmobema. Atše tšabá sënjántatšëmbo ndayá átsbioye oyejuayá šojabemcá, tšëngaftangnaca chca mašmënjánbošena y oyejuayënga chë soye matcmënjánabiama. Chíyeca atše ndoñe chiyataná, nÿetscanga oyejuayënga jtsemnana ndoñe quenjatopodena ora.

4 Pero chë tsbuanácha tcbonjanëbuábiamama ora, atše corente šonjanongmé y ainana šonjántsetšena chca jabuache soyënga tšëngaftanga jubuábiamama, y chca jamama shëchbuýnaca sënjanoperdé. Pero atše ndoñe checbátanëbuabiamama atše jatsmama tšëngaftanga puerte ngménaca chašmotsemnama, ndayá chašmotsetatšëmbuama atše tša cbababuánýeshanama.

#### *Perdón chë bacna soye amabiamama*

5 Y mora, chë tšëngaftangbeñe puerte ngménana chaotsemnama tojama boyabásabiamna, cha átšbioye ndoñe ngmená chešnátšbema, ntsachetšá tšëngaftanga tcmojabiamcá, ínýengbioye ínýengbiamama más. Chca sentsichamo, er atše ndoñe quetsátšboše jayanama ntsachetšá tojamama cha más bacna soye tojama ca. 6 Banga tšëngaftanguentšënga ntšamo šmojamcá, chë entšabiamama ya bëtš castigo entsemna. Nýe nýetšá ponto. 7 Chamna, ndayá mora cmojtsamna jamamna entsemna, cha jtseperdónana y jañémuana, chca, ndocna tšabe soye jamama ndobená ndoñe chaondëtsemnama, chë castiguama puerte ngménaca bëtsemna causa. 8 Chíyeca, tšëngaftanga cbaimpadá cachiñe tšabá chašminýinýe chábioye corente šmobobonshánama. 9 Tempo ya chama tcbonjanëbuábiamama, atše jinýama tšëngaftanga aíñe o ndoñe šmotsanprontánama, lempe ntšamo tcbonjanamëndacá jamama. 10 Chcasna, ndánaca ndayánaca tšëngaftanga chašmojaperdoná ora, átšnaca cha chantseperdóna. Y atše cha chantseperdóna, ndayá japerdónama ndegombre tojtsemnëse. Y chca chanjama tšëngaftangbe tšabiamama y Cristbe delante. 11 Atše tšëngaftangcá, quem entšábioye šcoperdoná chë bëngbiamama tojama bacna soye; chca, Satanás ndoñe chaondobenama bënga jáingñama, er bënga mondëtatšëmbo cha inéteboše ndaye bacna soye entšá chaotsamama.

#### *Ndáyeca Pablo ndoñe natjëmbana Troas pueblaca tontsanoquedañe*

12 Atše Troas pueblaca sënjánashjango ora, Cristbe tšabe noticiënga jábuayenama, atše sënjáninýe Bëngbe Utabná tojanma chentše banga chë buayenana soye chamouenama y chëngbe ainaniñe chana chamóyëngacñama. 13 Masque chca enjamna, atše ndoñe quetstétsobena natjëmbana ainana jtsebomnana, er atše sënjanjuabná Jesucristbeyeca bëngbe catšata Tito chentše jinýenana, pero ndoñe chca. Chíyeca, Troas pueblentša entšanga sëntanadiošoftaná, y Macedonia luaroye sënjána.

#### *Crístoftaca cánýiñe mo canýacá jtsemnëse, bënga mo ayënjanayëngcá jtsemnana*

14 Atše Bëngbe Bëtšábioye sëndbétsatschuanaye, bënga bacna soyënga jamama juabnënga cha tojanëyëñjanama, tempo šojanamënda juabnënga; y chë mora bënga Crístoftaca cánýiñe mo canýacá jtsemnëse, nýets tempo cha šnetsënachayama, mo canýe ayënjanayacá, y chë nýets luarenache entšanga Cristbiamama soyënga chamotsábuatmama bëngaftaca cha yojtsamama, mo nda canýe botamana uanguëtše soye nýets luarënguenache chauáshanama cuaftsamcá. 15 Er chë incienso tojtsejuínýinýana ora, entšábioye tšabá juanguëtšenana; cachcá Cristbe tšabe noticiënga fstsabuayinýa ora, Bëngbe Bëtšabiamama bënga jtsemnana chë ndëmuanyënga tmojtsama cha oyejuayá chaotsemnama. Incienso tcojtsejuinýná ora, nýetscángbioye juanguëtšenana. Cachcá, Bëngbe Bëtšabe palabra fstsoyebuambná ora nýetscanga jouenana, Cristo yojtsatsebacanga y chë pochocánënga jtsemnana imojtsajnëngnaca. 16 Chë pochocánënga jtsemnana imojtsajnëngna, pochocánënga mochanjábocana, er ntšamo bënga fsëndabuayinýacá y tmojouencá chënga tmojtsaboté; y chca, chëngbiamama chë tšabe noticiënga jtsemnana mo canýe obanabe uanguëtšancá. Pero chë Cristo yochjátsebacangna, tšabe noticiënga tmojóyëngacñeyeca, mochanjobenaye tšabe vida nýets tempo jtsebomnana; y chca, chëngbiamama chë tšabe noticiënga jtsemnana mo canýe puerte botamana uanguëtšancá. Y asna, ¿nda obenana yojtsebomna chë tšabe noticiënga jábuayenama trabajo jtsamama?

17 Bënga chë tšabe noticiënga ndoñe queftsatabuayiyná, ntšamo ba entšanga imojt-samcá, mo nÿe batšá uámana soyënga cuaftsemncá, y ndayánaca juácanama, mo nda ndaye nduámana soyënga cuaftsencá. Banga chca mondama; bënga ndoñe. Bënga, Crístoftaca cánÿiñe mo canÿacá jtsemnëse, fsëndabuayiyná mo Bëngbe Bëtsabe delante cuaftsemnëngcá, ndegombre nÿe ntšamo tšabá yomncá nÿets ainánaca jtsebošëse, y mo Bëngbe Bëtsabe ichmonëngcá.

### 3

#### *Chë Bëngbe Bëtsabe tsëm tratama buayenana soye*

1 Chca bëngbiamana fstsjayana ora, tsëngaftanga cmojtsinÿana ¿bënga cachiñe tiftëtontsé cabënga bëtsétsanga enobiamnayana? ¿O bënga šojtsamna, mo inÿengcá, tsëngaftanga juyentšbuáchiyana o juátjañana tsbuanachangá, bënga tšabá fstsamama chëchangaca jinÿanÿiyama? 2 Bënga bëngbe ainaniñe puerte tšabá fsëndétatsëmbo, nÿetsca entšanga, ntšamo tsëngaftanga jtsamëse šmoyencá tmojinÿe ora, tsëngaftanga jtsinÿanÿayana bënga ndegombre ntšamo tšabá yomncá fstsamama. Chca, tsëngaftanga jtsemnana mo canÿe tsbuanachacá, nÿetscanga jtsabuatmana y jtsobenana jualiana, bënga tšabá fstsamama. 3 Nÿetscanga tšabá mondétatsëmbo Cristo tojanma tsëngaftanga chábeñe chašmotsošbuáchema, y bëngaftaca cha chca tojanmámnaca. Chca, tsëngaftanga šmondmëna mo Cristbe canÿe tsbuanachacá, ndayëcha quem luarentša entšángbioye tojuyentšbuaché bëngaftaca. Tsëngaftanga ndoñe chešmatanobená Crístbeñe ošbuáchiyënga jtsemnana entšangbe trabájoca, er Crístbeñe šmonjanošbuaché chë Bëngbe Bëtsá Ainabe Espíritbeyeca; y chca, tsëngaftanga šmondmëna mo canÿe tsbuanácha cháftaca uabemanëchacá, y ndoñe mo entšángbeyeca uabemana tsbuanachacá. Bëngbe Bëtsá chë mandënga ndëtsbé tablëbenguiñe tojanábema, entšanga chamotsobedecénama, pero tsëngaftangna Cristbe buayenana soye tsëngaftangbe ainaniñe šmojóyëngacñe.

4 Crístbeyeca Bëngbe Bëtsábeñe jtsošbuáchiyëse, bënga corente fsëndétatsëmbo chca ndegombre bëtsemnana. 5 Ndoñe quenátsmëna, nÿe bënga cánÿënga quem trabajo jamama ftsobena y játayanana bëngbe soye chë trabajo yojtsemna ca, er bënga jtsobenana chca jamama, nÿe Bëngbe Bëtsabe ujabuáchenanaca; 6 er cha tojama bënga fchayobenama quem trabajo jamama, chë entšanga jábuayenana Bëngbe Bëtsá chabe entšángbioye tojanašebuachená soyëngama, ndayá Cristo tojanma sóyeca, mo canÿe tsëm tratcá, Bëngbe Bëtsá y chabe entšángaftaca. Quem soye ndoñe quenátsmëna mo chë Bëngbe Bëtsá tempo Israeloca entšángbioye léyeca tojanašebuachená soyëngcá. Inÿetsá; entšanga mondama Bëngbe Bëtsabe tsëm trato, Uámana Espíritbeyeca. Chë natsana trato, chë uabemana ley, ntšamo chiñe iuabemancá ndoñe tconjama causa, entšá jóbanama jtsemnana; pero Cristbe tšabe noticiënga, chë tsëm trato, entšanga ainaniñe tmojóyëngacñe ora, chë Uámana Espiritu jamana, chë nÿetsca tescama yomna tšabe vida chënga chamotsebom-nama.

7 Quem Moisesbe ley, chë ndoñe tmonjobedecema entšanga jóbanama jtsam-nana, ndëtsbé tablëbenguiñe letrëngaca tmojanábema, y Bëngbe Bëtsá Moisésbioye tbojanantšabuaché ora, cha tša buashinÿinÿaniñe tojánabo. Chë causa entšanga ndoñe imontsobena ni mo jinÿana Moisesbe jubíá, er tša ibojtsanjuebëbuashinÿinÿana, Bëngbe Bëtsáftaca tbojánencuententšana tojtanabo ora. Pero betscó tojanëjbana chë jubíá chca buashinÿinÿanana. Chë ley, chë natsana trato, Bëngbe Bëtsá tojanayentšbuaché ora, tša buashinÿinÿanánaca cha tojanmëse; 8 ndegombre, más bën y uámana tempo entsemna chë Bëngbe Bëtsá bënga šojanašebuachená tsëm soyënga yojtsama ora, chë Uámana Espiritu bëngbe ainaniñe cháumashënguama Bëngbe Bëtsá tojama ora. 9 Bëngbe Bëtsá chë ley tojanayentšbuaché ora, chë ndáyeca entšanga jóbanama yojánamna, ntšamo chiñe betsayancá ndoñe tmonjama causa, chora cha chca tojanma puerte chabe buashinÿinÿanana jinÿanÿiyëse; ndegombre más bën y uámana tempo entsemna chë



mocna ora Bëngbe Bëtsá yojtsama entsanga chabe bominyiñe tsábenga chamotsemnana. <sup>10</sup> Er chë Bëngbe Bëtsá ley tojanayentsbuaché ora tojaninyanyé buashinyinyanana, mora jtsinyñana mo ya tondaye cuabndëtsemncá, chë Bëngbe Bëtsá entsangbiana tsëm soyënga tojtsamama tcojtsonyá ora, chë tša buashinyinyanana yojtsemna ora. <sup>11</sup> Er chë leyama tempo, chë ya jochnënguama tempo entsemna ora, Bëngbe Bëtsá chabe buashinyinyanana y uámanana tojinyanýese; ndegombre chë Bëngbe Bëtsá tsëm soyënga entsangbiana jamama ora, chë ndocna te yochanjochnëngo tempo ora, Bëngbe Bëtsá más chabe buashinyinyanana y uámanana echántsinyanýnaye.

<sup>12</sup> Y chca, Bëngbe Bëtsá chca bëts soyënga yochjamama fsëndobatmánayeca, bënga fsëntsobena jóyebuambayama, nyetsca soyëngama jayanëse, tondayama ntjatauajcá. <sup>13</sup> Y chca, bënga ndoñe Moisescá queftsátama, chë chabe jubiá chaobuashinyinyanama Bëngbe Bëtsá tojanma ora, canýe entsëjuaca yojtsenamochëcjua; cha chca tojanma, chë Israeloca entsanga ndoñe chamondobená jinýama chë jubiá buashinyinyanana ya yojtsëchnëjuana ora. <sup>14</sup> Pero Bëngbe Bëtsá tojanma chënga ndoñe chaondósertama ntšamo Moisesbiajana cha tojanayancá. Y cabá quem tempo, ntšamo Bëngbe Bëtsá Moisésbioye tbojanšbuachenacá chëngbiana jamama, Israeloca entsanga tmojtsalía ora, ndoñe ntsësertánana Bëngbe Bëtsabe ndegombre soyënga, mo chëngbiana iytëmena soyënga cuaftsemncá, mo chë Moisés yojtsenamochëcjua entsëjuacá. Y chca endmëna, er nýe Crísoftaca cánýiñe mo canýacá jtsemnëse, chënga jtsobenana chë soyëngama jósertana, y iytëmencá ya ndoñe ntsemnana. <sup>15</sup> Y mëntscoñama, Moisesbe librëšangá chënga tmojtsalía ora, ndoñe ntsësertánana Bëngbe Bëtsabe ndegombre soyëngama, ntšamo chiñe tojtsayancá jamama ndoñe montseboše causa. <sup>16</sup> Pero canýe entsá chë Bëngbe Utabnabe benache tojishache ora, cha jtsobenana chë soyëngama josértana. <sup>17</sup> Y Bëngbe Utabná y Espíritu canýa bondmëna, y Bëngbe Bëtsabe Espíritu tojtsemnentše, chë bacna soyënga jamama juabnënga, ni chë ley ndoñe ntsemándayana. <sup>18</sup> Moisés chabe jubiañe Bëngbe Bëtsabe buashinyinyanana y uámanana tojaninyanyé, y chíyeca, canýe entsëjuaca yojtsenamochëcjua, chca, chënga ndoñe chamondinyama. Pero bënga ošbuáchiyënga nyetscanga jtsinyanýnayana Bëngbe Utabnabe buashinyinyanana y uámanana, mo canýe espejo canýe soye tojtsinyanýnacá, y ndoñe queftsátsoše ntšámnaca jamëse chë soye jatsëytamianana. Cha bëngaftaca yojtsama cada te más chë ntšamo cha yomncá bënga chamotsemnana, cada te más bëtsëtsanga chë ntšamo cha yomncá jtsemnëse. Chca endmëna ntšamo Bëngbe Utabná yojtsama; y Bëngbe Utabná y Espíritu canýa bondmëna.

## 4

<sup>1</sup> Y chca, Bëngbe Bëtsá bëngbiana lastemado yómnyayeca, quem trabajo šojabanyé, jtsabuayiynayama chë Crísoftaca tojašebuachená soyënga; y chíyeca bënga ndocna te ntjájbanana ainaniñe añemo bomnana. <sup>2</sup> Bënga fsëntsaboté chë ínýenga iytëmencá inmëtsama soyënga, chë ínýenga tmojinýe ora chama jtsëuatjana, y chë ínýenga entsanga jáingñama inmëtsama soyëngnaca, y Bëngbe Bëtsabe buayenana soye ndoñe queftsastroca ndoñe ndegombre soyëngaca. Chamna, bënga sempre nýe chë ntšamo ndegombre yomncá fsëndbëtsoyebuambnaye, mo Bëngbe Bëtsabe delante cuaftsemnëngcá jtsamëse; y chca, bënga fsëndbëtsama cada entsabe ainanentša juabnënga chamuayanama, bënga ndegombre soyënga fstsoyebuambná ca. <sup>3</sup> Y nderado bënga chë tsabe notiçiënga fstsabuayiná ora, báseftanga chë soyënga chaósertama ndoñe tontsopodëñe, nýe chë pochocánënga jtsemnana tmojtsajnëngbiana chca jtsemnana. <sup>4</sup> Chëngbiana, chë Crístbeñe ndošbuáchiyëngbiamna, chë quem luarentše mora mandayá, Satanás, tojama chë buayenana soye ndoñe chaondëtsësertánama; chca, chënga ndoñe chamondinyama chë tsabe notiçiënguentsana puerta bëts y tsabe soyënga, chë Cristo puerta bëtsá y obená yomnana ínyanýnaye soyënga, nda nyetsca soyënguñe Bëngbe Bëtsacá yomna. <sup>5</sup> Bënga ndoñe nýe cabëngbe soyama queftsatabuayiná, ndayá Jesucristbiana

mo Bëngbe Utabnacá. Bënga bëngbiana fsëndbáyana mo oservenëngcá fstsmëna ca, tšëngaftanga jujabuáchama; y chca fsëndbëtsama Jesús jasérviana. <sup>6</sup> Er Bëngbe Bëtsá, nda quem luare jobojátsama ora tojanmandá binýniñe ibetentšana chaóbocnama, chánaca tojama bënga ainaniñe tšabá chabe soyëngama chašotsësertánama, chca bënga fchayobená juabuátmanana chë Bëngbe Bëtsabe uámanana y obenanentšana inétsobocana osertánana, ndayá Cristbeñe bënga mondonýá.

*Bënga fsëndoyena Crístbeñe jtsošbuáchiyëse*

<sup>7</sup> Pero chë puerte tšabe y bëts soye, chë Cristbe buayenana soye, bënga mondbomna cuerpiñe, bëngbe ainaniñe; y chë cuerpënga jtsemnana nýe mo matbajëngcá, ndoñe yapa obenana ntsebmomna, chca, jinýanýiyama tša bëts obenana Bëngbe Bëtsábiocana yóbocanama, y ndoñe bëngbentšana. <sup>8</sup> Y chca, bënga nýetsca padecena soyënguiñe vida fsëndbomna, pero ndoñe queftsátsmëna ndobenënga chë padecena soyënguentšana tšabá jabocanama; ndoñe queftsátstatšëmbo ndayá jamama šojtsamna, pero ndoñe queftsátsmëna ntsobencá jtsobátmanama quem padecena soyënguentšana tšabá jabocanama. <sup>9</sup> Inýenga montsama bënga puerte fchaisufrima, pero Bëngbe Bëtsá ndoñe nýe cachcá šontsabashejuana; mo nda ínýabioye cuafjutsencá tmojtsentsjaná ora, ya jóbama jtseprontánana, uayayënga bënga jtsëbáyama imojtsejuabnangbe cucuatšiñe fsëntsemna, pero cabá ndoñe ntjobáyana. <sup>10</sup> Inýenga sempre jtsamana bënga bëngbe cuerpiñe puerte fchaisufrima, y jobanámnaca resjo jtsemnana, ntšamo Jesúseftaca tmojanmcá, cha chaosufrima y chaóbanama. Chca bëngaftaca endopasana, chca, ínýenga chamobená jinýama Jesús bëngbeñe vida yobomnama. <sup>11</sup> Er bënga vida fchabomnëntscuana, sempre puerte resjo bëngbiana jëftsemnana jóbana, Jesúsbioye servena causa; y chca endmëna, ínýenga chamobená jinýama Jesús vida yobomnama bëngbe cuerpiñe, chë canýe te yochjopochóca cuerpo. <sup>12</sup> Y chca, bënga tša fsëndësufrina y jobanámnaca resjo endmëna; y tšëngaftanga tšabe noticiënga šmojóyëngacñayeca, Bëngbe Bëtsá tojama chë nýetsca tescama yomna tšabe vida chašmotsebmomna.

<sup>13</sup> Bëngbe Bëtsabe uabemana palabrënguiñe endayana: “Atše sëntsanosbuaché y chíyeca sënjanoyebuambá ca.” Bënga cachca ošbuáchiyana fsëndbomna chë chca tojanayanacá, y chíyeca bëngnaca Bëngbe Bëtsábeñe fsëntsošbuaché y chabiana fsëntsoyebuambná. <sup>14</sup> Er bënga fsëndëtatšëmbo, Bëngbe Bëtsá, nda tojanma Bëngbe Utabná Jesús cháuatayenama, chánaca yochjama bënga Crísoftaca cánýiñe mo canýacá jtsemnëse, bënga chámuatayenama, y tšëngaftangaftaca cánýiñe cha yochtsemnoye šochjúshejango. <sup>15</sup> Lempe ntšamo bënga fstsama y fstsësufrincá tšëngaftangbe tšabiana endmëna; chca, más becá entšanga chábeñe chamojtsošbuaché ora, ba tšabe bendicionënga Bëngbe Bëtsá entšangbiana jtsamëse, más becá entšangnaca chábioye chamotsatschuaná, ndayá chëngbiana cha yochjamama; y lempe chca, Bëngbe Bëtsá puerte uamaná y obená yomnama nýetsca entšanga chamotsichámuama.

<sup>16</sup> Chíyeca bënga ndoñe ntjájbanana ainaniñe añemo bomnana. Masque quem luarentša bëngbe cuerpo cada te jtsoPOCHÓCAYANA, Bëngbe Bëtsá jamana chë bëngbentšana nýets tempo vida yochtsebmomna soye, cada te más obenana chaotsebmomna; y chca, bënga jtsemnana mo tsmëma entšangcá. <sup>17</sup> Ntšamo bënga mora fsëndësufrincá endmëna nýe quem luarentše vida tmojtsebmomnëntscuana, y chca, chë soye jtsemnana mo canýe nduámana soycá; pero ntšamo bënga fsëndësufrincá josérviana bënga jtsebmomna chë Bëngbe Bëtsá šochjatsataye puerte bëts uámanana y obenana, cháftaca nýets tempo vida jtsebmomna, chë ndayá yomna nýetsca soyëngama más bëts y uámana soye. <sup>18</sup> Er bënga nýe chë tojtsopodena jinýama soyënguiñe ndoñe nýets tempo queftsatsjuabná, ndayá chë ndoñe yondopodena jinýama soyënguiñe; er chë bënga imobena jinýama soyënga ndoñe nýetsca tescama ntsemnana; pero chë bënga ndoñe mondobena jinýama soyënga cocayé nýetsca tescama jtsemnana.

## 5

<sup>1</sup> Bënga mora mondbomna canye cuerpo quem luarentse vida jtsebomnama. Quem cuerpo yomna mo chë jtsatsjacama yopodena yebncá, cánÿentse ndoñe nÿets tempo ntjëftsemnana. Bënga mondetatsëmbo, quem cuerpo canye te tojtsopochocase, Bëngbe Bëtsá yochjama bënga tsmëma cuerpënga chamotsatsbomnama, celoca nÿetsca tescama vida jtsebomnama, Bëngbe Bëtsabe pormana cuerpënga y ndoñe entsangbe pormana cuerpënga. <sup>2</sup> Chiyeca, bënga quem luarentse chca vida tmojtsebomnëntscuana, yapa tmojtseufrina causa, bënga tša jtsebošana betesco Bëngbe Bëtsá celoye chašúyambama, y bënga nÿets tempo celoca jtsiyenama tsëm cuerpo jtsebomnama cha chaomama; <sup>3</sup> chca, Cristo yochjésabo ora, bënga chë tsëm cuerpoca chamotsemnana, y ndoñe nÿe espíritu ndocna cuerpoca. <sup>4</sup> Bënga quem cuerpiñe, chë quem luarentse vida jtsebomnama cuerpiñe chamojtsiyenëntscuana, yapa padecena soyënguñe sufrina causa, bënga jabuache mochanjáshachna; chca echántsemna ndoñe nÿe chë espíritu ndocna cuerpoca jtsemnana bënga imojtsebóseyeca, ndayá masna, bënga chë tsëm cuerpo chamotsebomnama Bëngbe Bëtsá chaomama imojtsebóseyeca. Bënga fsëntseboše chë bëngbeñe jopochócama yomna soye Bëngbe Bëtsá lempe chaotrocama, chca, bënga chamotsobenama celoca nÿetsca tescama vida jtsebomnama. <sup>5</sup> Y Bëngbe Bëtsá endmëna nda tojama bënga chamotseprontánama chë tsëm cuerpo jtsebomnama, y nda tojama Espíritu bëngbe ainaniñe cháuamashënguama, chca bëngbioye jinÿanÿiyama, bënga ndegombre mochjóyëngacñe ndayá Bëngbe Bëtsá tojašebuachenacá.

<sup>6</sup> Y chca, bënga sempre ainaniñe bëts añemo fchandbëtsebomna. Bënga fsëndëtatšëmbo, quem cuerpiñe cabá vida bënga mochjëftsebomnëntscuana, bënga ndoñe mochántsemna Bëngbe Utabná yojtsemnentse. <sup>7</sup> Er mora bënga fsëndoyena jtsamëse, ntšamo Crístbeñe bënga imošbuachecá, y ndoñe nÿe ndayá jinÿama tmojtsobenama. <sup>8</sup> Bëngbe fsëntsemna ainaniñe bëts añémoca, y más fsëntseboše jájbanana quem cuerpiñe vida jtsebomnana, jama Bëngbe Utabnáftaca nÿetsca tescama vida jtsebomnama. <sup>9</sup> Chiyeca bënga bëtská fsëndëntšëna Bëngbe Utabná sempre oyejuayá jabemama, masque bënga quem luarentse quem cuerpoca tmojtsiyena, o ya ndoñe. <sup>10</sup> Er nÿetscanga šontsamna jashjanguana Cristbe puestoca tribunalentse, cada ona ntšamo yomerecencá chaóyëngacñama, ntšamo tšabá o ndoñe tšabá quem luarentse chabe cuerpiñe vida yojëftsebomnëntscuana tojëftsemcá.

*Jábuayenama ntšamo Bëngbe Bëtsá inama entsanga tempcá tšabá cháftaca chamotsatsmënama*

<sup>11</sup> Chcasna, Bëngbe Utabná nÿetscangbiana chë más bëtsá yomnama jtsejuabnayëse, bënga bëtská fsëndama entsanga jáyënjanama, bënga tšabá fstsamama chamotsejuabnama. Pero Bëngbe Bëtsá ya endëtatšëmbo ntšamo bënga ftsmënama, y atše sëntsobátmana tšëngaftángnaca chca tšabá chašmotsetátšëmbo, tšëngaftangbe ainanentša juabnëngaca, chë bëngbiana aíñe ca cmojtsëtsëtsná juabnënga. <sup>12</sup> Bënga ndoñe cachiñe cabëngbiana queftsatoyebuambná; chca fsëntsichamo ndayá tšëngaftanga oyejuayënga bëngbiana chašmotsemnana, chca, tšëngaftanga jojuama chašmobenama, chë uámana soyënga tmojtsebiamnángbioye ndayá entsanga canye entsábeñe tmojtsonÿacá y ndoñe chca chë entsabe ainaniñe tomna soyëngaca. <sup>13</sup> Er bënga mo chë ndoñe corente juabna ndbomnëngcá fstsamëse, ntšamo báseftanga mondbetsichamcá, jtsemnana Bëngbe Bëtsá jaserviama; y bënga corente juabna bomnëngcá fstsamëse, jtsemnana tšëngaftangbe tšabiana. <sup>14</sup> Bënga chca fsëndmëna, Cristo šondábabuanÿeshanayeca, y chë soye endama bënga nÿe cha fchaitseservénama, er bënga fsëndenojuabná y puerta tšabá fsëndëtatšëmbo, canÿa, Cristo, nÿetscangbiana tojanóbanama; y cha nÿetscangbiana tojanóbanayeca, endmëna mo cha tojanóbana ora, nÿetscanga cháftaca cuafjobancá. <sup>15</sup> Y Cristo nÿetscangbiana tojanóbana, chë quem luarentse vida bomnënga ndoñe más nÿe

cachëngbiana chamondëtsiyenama, sinó chabiana, nda chëngbiana tojanóbana y tojtanayena. <sup>16</sup> Chíyeca, bënga ya ndoñe ndocnabiana queftsatsjuabná ntšamo entšanga quem luarentše jtsejuabnayama monduamancá; masque ndegombre bënga chca Cristbiana fsënjanjuabná, mora ya ndoñe chca chabiana queftsatsjuabná. <sup>17</sup> Chcasna, nderado nda Crísoftaca cánýiñe mo canýacá tojtsemna, Bëngbe Bëtsá tojama cha mo canýe tsëm entšacá chaotsemnana. Ntšamo chë Crístbioye cabá nduabuátmana ora cha yojamncá, mora ya ndoñe quenátsmëna. Morna cha jtsejuabnayana y jtsamana inýe soyënga y tsëm soyënga.

<sup>18</sup> Bëngbe Bëtsá endmëna nda chca inétsama, entšanga mo tsëm entšangcá jábiamama; y cha Crísoftaca tojama bënga tempcá tšabá cháftaca chamotsatsmënama. Y cha bënga canýe trabajo šonjanabanýé, bënga entšanga jábuayenama, Bëngbe Bëtsá inétsama entšanga tempcá tšabá cháftaca chamotsatsmënama, y entšanga jujabuáchama chca chamotsemnana. <sup>19</sup> O mëntšá, Cristo tojanma sóyeca Bëngbe Bëtsá yojtsama entšanga chamotsobenama tempcá tšabá cháftaca jtsatsmënama, y chca, chënga chamotsobena chëngbe bacna soyëngama perdonánënga jtsemnana, y chë soyëngama nyetsca tescama castigánënga jtsemnana ndoñe chaondétsamnana. Y bënga šonjanabanýé chë trabajo, entšanga jtsabuayiynayama ntšamo Bëngbe Bëtsá inama entšanga tempcá tšabá cháftaca chamotsatsmënama. <sup>20</sup> Y chca, bënga jtsemnana Cristbe cuenta oyebuambnayënga y amënga, mo cach Bëngbe Bëtsá bëngaftaca cmojtsaimpadancá. Cristbe cuenta cbaimpadá, bëtscá šmochtsentšena Bëngbe Bëtsáftaca tempcá tšabá jtsatsmënama. <sup>21</sup> Cristo ndocna bacna soye tonjanma, pero bëngbe bacna soyënga jabuajuánamna, Bëngbe Bëtsá cháftaca tojanma mo cha canýe bacna soyënga amá cuaftsemncá, chca, bënga Crísoftaca cánýiñe mo canýacá jtsemnëse, Bëngbe Bëtsabe bominiñe tšábënga jtsemnana chamotsobenama.

## 6

<sup>1</sup> Chcáyeca, bënga Bëngbe Bëtsáftaca cánýiñe trabájayënga quetsomñecana, cbontsaimpadana ndoñe nýe bonamente chašmondóyëngacñe chë Bëngbe Bëtsá yojtsama soyënga, tšëngaftangbiana tšabe juabna jtsebonnëse. <sup>2</sup> Er Bëngbe Bëtsá chabe uabemana palabrënguiñe mëntšá tojánayana:

Chë tšabe soye jamama tšabá šonjaninýana ora, atše tcbonjanoyeuná;

chë ácbioye jatsbocama te, tcbonjanájabuache ca.

Smochjinýe. Mora entsemna chë mocna ora Bëngbe Bëtsá tšabá ibojtsinýana tšabe soye jamama; mora entsemna chë mocna ora Bëngbe Bëtsá yojtseboše aca jatsbocama.

<sup>3</sup> Bënga ndocna bacna soye queftsátama, ndayá chaoma entšanga chë tšabe noticiënga chamotsábotema, chca, ndocná podësca chaondétsóyebuambnama bëngbe trabajuama, Cristbiana. <sup>4</sup> Inýetsá, bëngna nyetsca soyënguiñe fsënjanियena mo Bëngbe Bëtsabe oservenëngcá; Bëngbe Bëtsábeñe obatmancá puerte uantadënga jtsemnëse, fstsésufrina ora; puerte padecena soyënguiñe bëtsemna causa, ndayá jamama ndoñe fsëntsetatšëmbo ora; y ainaniñe puerte ngmënacá ftssemna ora; <sup>5</sup> inýënga šojtsatsetšená ora; cárceloye šojautame ora; entšanga bëngbe contra tmojtsenbouénana ora; jabuache trabájaiñe puerte uamëntšnayënga ftssemna ora; bayté ntsamanacá ftssemna ora; y jasama tondaye fsëntsebonna ora. <sup>6</sup> Bëngnaca fsëntsinýanýná Bëngbe Bëtsabe oservénënga ftsmënama, puerte tšabe vídaca, ndocna bacna soye ntjamcá jtsiyenëse; Bëngbe Bëtsabe soyëngama corente jtsetatšëmbëse; inýënga ntšamo šojáborlaye ora puerte uantadënga jtsemnëse; inýëngbioye puerte bonshanánaca jtsënýayëse; Uámana Espíritu bëngbe ainaniñe jtsebonnëse; y ndegombre nyets ainánaca nyetscanga jtsababuánýeshanëse; <sup>7</sup> ntšamo Bëngbe Bëtsabiama ndegombre yomncá jtsabuayiynayëse; Bëngbe Bëtsabe obenánaca ba soyënga jtsamëse; y mo chë soldadëngcá, uayayënga jáyëñjanama y



chëngbiana jenëuyanama soyënga jtsebomnana, chë Satanásbioye jayënjanama y chabi-ama jenëuyanama ndayá Bëngbe Bëtsá šojatšatacá jtsebomnëse; y Bëngbe Bëtsá chca tojama, er cha tojama bënga chabe bominiñe tšábënga chamotsemnana. <sup>8</sup> Bënga fsëntsinñanñá Bëngbe Bëtsabe oservënënga fstsmënana, ínñënga bëngbiana tšabe soyënga tmojtsejuabná ora y bënga nduámanënga jtsemnana chënga tmojtsama ora; ínñënga tšabe soyënga bëngbiana tmojtsoyebuambná ora y chënga bëngbiana podësca tmojt-sichamo ora; bënga áingñayënga fstsmëna ca báseftanga tmojtsejuabná ora, pero bënga ntšamo ndegombre yomncá jtsóyebuambnayëse. <sup>9</sup> Mo nduamanëngcá bënga entšángbeñe jtsëñyayana, pero banga corente tšabá bënga sondëubuatma; bëngbiana sempre resjo endmëna jóbanama, pero šmochjinñe, bënga sempre vídaca chentšana jatóbocañana; bënga juatsjínñama jobenayama, Bëngbe Bëtsábeyeca castigánënga fchandbétsemna, pero nña jóbanana ndoñe. <sup>10</sup> Masque ngmënënga fstsemna, ainaniñe sempre oye-juayënga fchandbétsomñe; masque ndbomñëjemëngcá, pero fchandbétsama banga Bëngbe Bëtsábiocana bëtscá chamotsebomnana; quem luarentša soyënga tondaye queftsátsbomna, pero Bëngbe Bëtsabe entšanga quetsomñecana, ndegombre lempe fsëndëtsóbomñe.

<sup>11</sup> Tšëngaftangbiana, Corintoca entšanga, lempe fsëñjayana, tondaye ntjaitëmcá; nyets ainánaca, corente cbondábabuanñeshana. <sup>12</sup> Bënga puerte cbondábabuanñeshana, pero tšëngaftangna ndoñe yapa quešcátatabuanñeshana. <sup>13</sup> Atše cbontsaimpadana, mo canñe taitá chabe básënga cuaftsaimpadancá, atše puerte chašmotsebobonshánama, er atše corente cbondábabuanñeshana.

### *Bënga mondmëna mo Bëngbe Bëtsabe bëts yebncá*

<sup>14</sup> Crístbeñe ndošbuáchiyëngaftaca ndoñe šmatjenutaná ndayánaca jamama, er chca, chëngaftaca šmatjábocana mo chë jaárama uacnata ndoñe cachënchechata tbontsemncá. Ndegombre, chë tšabe soyënga amá y Bëngbe Bëtsabe bominiñe tšabia mëná, nña tondayama cachcá ntsejuabnayana, chë Bëngbe Bëtsá tojamandacá ndoñe tontsamacá y bacna soyënga amacá. Ndegombre, chë entšangbe juabna binñayáftaca vida bomná, nña tondaye ntsebomnana chë nñe mo ibetiñcá juabnayáftaca. <sup>15</sup> Cristo y Satanás, Belial cánaca uabainá, ndocna te tondayama cachcá ntsejuabnayana; y cachcá copasana, Crístbeñe ošbuachiyá y chábeñe ndošbuachiyáftaca. <sup>16</sup> Ndocna soyiñe cachcá ntsemnana, Bëngbe Bëtsabe bëts yebna, chë nñe canñe Bëngbe Bëtsábioye jadórama yebna, y chë entšangbe pormana soyënga, mo diosënga cuaftsemncá jtsadoránana soyënga; chca endmëna, er bënga, nyetscanga cánñiñe Jesucrístbeñe ošbuachiyëngcá, mondmëna mo Bëngbe Bëtsá Ainabe bëts yebncá, ntšamo Bëngbe Bëtsá chabe uabemana palabrënguiñe chabe entšangbiana tojanayancá:

Chëngbeñe vida chántsebomna y chëngbenache chántšana;  
atše chëngbe Bëtsá chántsemna  
y chëngna atšbe entšanga ca.

<sup>17</sup> Chíyeca mëntšánaca Bëngbe Utabná chabe entšanga tojanëyana:

“Chë bacna soye amëngbentšana šmochjésebocana, y chëngbentšana šmochtsojuánañe;  
tondaye šmattsebana, ni šmattsama ndayá Bëngbe Bëtsabe entšangbiana ndoñe tšabá  
tontsemncá.

As cbochanjúbuaja,

<sup>18</sup> y chántsemna mo canñe taitacá tšëngaftangbiana,  
y tšëngaftangna mo atšbe uaquiñënga y bembangcá.

Chca séntsihamo atše, tšëngaftangbe Utabná, nyets obenana bomná ca” —chiñe en-  
duábemana.

## 7

<sup>1</sup> Chcasna, atšbe bonshánënga, chca endmëna ntšamo Bëngbe Bëtsá šojašebuachenacá. Chíyeca šontsamna, Bëngbe Bëtsabe delante nyetsca soyënguiñe tšábenga jtsemnana, bëngbe cuerpama o espíritu bama bacna soye ndoñe más ntsamcá; y Bëngbe Bëtsá nyetscangbiamá más uamaná yomna ca mondëjuabnýyeca, lempe ntšamo tmojobenacá mochtsiyena mo chabe entšangcá, nyetsca soyënguiñe puerte tšábenga jtsemnëse.

*Ntšamo chë Corintoca entšanga juabna tmojantrocá*

<sup>2</sup> Bëngbiamá šmochtsenójuabnaye tšëngaftangbe ainaniñe puerte bonshanánaca. Bënga ndocnabiamá bacna soye chibiatsma, ndocnabiamá chibiatsma más bacna entšá chaotsemnana, y ndocnábioye chibiatsingñé. <sup>3</sup> Atše chca ndoñe quetsátichamo, ndoñe tšabá šmonjama ca tšëngaftangbiamá jayanama, er ntšamo ya tcbonjauyancá, atše tšëngaftangbiamá sempre ainaniñe puerte bonshanánaca sëndbétsenójuabnaye; y chca, mo átšeftaca canyiñcá šmochántsemna, masque chayóbana o cabá vida chaitsóbomñëse. <sup>4</sup> Atše puerte tšabá sëndétatšëmbo, ntšamo tšabá yomncá šmochtsamama; y tšëngaftangbiamá puerte oyejuayá sëntsemna. Lempe ntšamo tsësufriñcá tsiyenama, atšbe ainaniñe bëts añemo sëndétsóbomñe y corente sëntsoyejuá.

<sup>5</sup> Macedonia luaroye fsënjánashjajna orscana, ndoñe luare queftsátsbomna jóchnama, sinó nyetsca soyënguiñe fsëndëpadecena: chë bëngbe buayenana soyama contra tmojtsemnëngaftaca jabuachana enatsëtsnayëse, y bëngbe ainaniñe jtsauatjëse. <sup>6</sup> Pero Bëngbe Bëtsá, chë yapa añemo ndbomnëngbioye endbetsañemuayá, tojanma bënga ainaniñe más añemo fchaitsebomnana, Tito moye tonjánashjango ora. <sup>7</sup> Y cha tonjánabo ora, bënga ndoñe más añemo quefstétsebomna nye cha tojánashjanguama, sinó tšëngaftanga šmojanájabuachama y ainaniñe añemo chaotsebomnana šmojanmama. Cha šonjanëyana tšëngaftanga tša šmojánboše bënga jányama ca, y šonjanacuntá ntšamo tšëngaftanga ngmënaca šmojamna, atšbiamá ndoñe tšabá šmonjanma causa, y ntšamo tšëngaftangbiamá atšbe tšabiana puerte iuámanana; y quem chabe noticiëngaca, cabá más sëntsoyejuá.

<sup>8</sup> Er masque tšëngaftanga tša ngmënaca šmojamna chë tcbonjanëbuábiamá tsbuanáchama, mora ndoñe quetsatsjuabná más tšabá yojamna chca ndoñe jatëbuabiamana ca; masque tempo atše chca sënjanjuabná, er atše sëntsetatšëmbo chë tsbuanáchá básefta tescama ngmënënga tcmojánabiamá, <sup>9</sup> mora atše puerte oyejuayá sëntsemna, ndoñe tšëngaftanga ngmënënga šmojamnama, ndayá chë šmojánbomna ngmënana tojanmama tšëngaftanga chašmuenójuaboma ndoñe tšabá šmontsamama, y chca amana chašmotsajbanama, tšëngaftangbe juabnënga jatrócase. Chca enjamna, er tšëngaftanga ngmënana šmojánbomna ntšamo Bëngbe Bëtsá inabošcá; chíyeca, bënga ndocna bacna soye tšëngaftangbiamá chibiatsma. <sup>10</sup> Ntšamo Bëngbe Bëtsá tojtsebošcá ngmënana bomnentsana, jóbocnana chë bacna soyënga tcojamama jenójuaboyana y juabnënga jatrócana; y juabna jatrócana entšábioye juanatsana atsbočaná chaotsemnana, y cha ndocna te ntjátsjuabnayana más tšabá yojamna ndoñe chca ntjatstrócana ca. Pero ntšamo chë nye quem luarama enójuabnaye entšanga mondbetsebomncá ngmënana bomnentsana, ndoñe ntjóbocnana juabna jatrócana; chentsana jóbocnana nye nyetsca tescama castigáná jtsemnana, mo nyetsca tescama cuafjobancá. <sup>11</sup> Smochjinýe ndayá tojóbocna, ntšamo Bëngbe Bëtsá inabošcá ngmënana bomnentsana: tojanma chë šmojanma soyiñe puerte chašmuenójuaboma; y ntšamo jájandmanana bëtscá chašmonguanguama; tojanma tšëngaftanga chacmetonama chë bacna soye tojanmáftaca; y castigánënga jtsemnana jtsauatjámna. Chentsana, tšëngaftanga tša šmojtsanboše atše jinýama; y šmojtsanprontana lempe jamama chca bacna soye ndoñe más chaondëtsemnana y chca tojanmábioye jacastígama. Nyetsca chë soyënguiñe tšëngaftanga šmonjinýanjé chca bacna soye ndoñe šmonjanmama; y chca, mora tondaye quenátsmëna tšëngaftanga castigo jtsebomnana chacmotsamnama.

<sup>12</sup> Y chca, atše chë tsbuanácha tcbonjanëbuábiamá ora, ndoñe checbátanëbuabiamá chë puerte bacna soye tojanmábeyeca, ni chë bacna soye tojanoyëngacñábeyeca; ndayá tsëngaftanga, mo Bëngbe Bëtsabe delante cuaftsemnëngcá, chë šmojanma soyiñe bëtscá chašmuenójuaboma, y chca, cha chašminyanýé tsëngaftanga bëngbe tsabiamá puerte šmenójuabnama. <sup>13</sup> Chýyeca bënga más añemo ainaniñe fsëntsebmna.

Pero ntsachetšá añemo fstsbmnama, masna puerte oyejuayënga fsëntsemna, er bënga fsënjinye Tito tša oyejuayá, er chabe ainaniñe lempe natjëmbana yojtsemna nyetsca tsëngaftangbiamá. <sup>14</sup> Tito tsëngaftanga jányama cabá nda ora, atše cha sënjanianá tsëngaftanga šmochjanóyeunaye chë atše tcbonjanëbuaja palabra ca; y tsëngaftanga ndoñe chešmatsma atše chaitsëuatjama chca tijánayanama. Inýetšá, lempe ntšamo tcbójauyancá ndegombre endmëna; cachcá, ntšamo bënga Títbioye fsënjianiancá ndegombre entsemna, chë tsëngaftangbiamá fstsóyejuama. <sup>15</sup> Y mora Tito más cmontsababuánýeshana, ntšamo cha tcmojanamëndacá ndayá tsëngaftanga šmojanmama, y ntšamo puerte respétoca y mo uamaná cuaftsemncá chabiamá jtsejuabnayëse šmojanofjama tojtenojuabó ora. <sup>16</sup> Atše puerte oyejuayá sëntsemna, er atše sëndëtatšëmbo tsëngaftanga ntšamo tsabá yomncá nyetsca soyënguiñe šmochtsamama.

## 8

### *Chënga jañëmuayama, inýe ošbuachiyëngbioye nyets ainánaca jujabuáchama*

<sup>1</sup> Y mora, Jesucristbeyeca catšátanga, bënga fsëntseboše tsëngaftanga chašmotsetátšëmbo ntšamo Bëngbe Bëtsá bëtscá tsabe bendicionënga tojama Macedonia luarentše ošbuachiyëngcá enefjuanëngbiamá. <sup>2</sup> Chënga puerte tmojasufri, y chora chca, chënga tmojinyanýé becá imošbuáchema y tša imoyejuama; y masque puerte ndbomnjëmënga, chënga nyets ainánaca bëtscá tmojanacaredadó Jerusalenentša ošbuáchiyënga ndbomnjëmëngbiamá. <sup>3</sup> Atše sëndëtatšëmbo y sëntsobena jayanama chënga ndegombre tmojatsatá ntšamo tmojobenacá, y ntsachetšá imobenentsana cabá más, chënga chca imobóšeyeca. <sup>4</sup> Tša šonjánaimpadana chëngbioye jálesenciamá ndayánaca jamama, Jerusalenoca ošbuachiyëngbioye jujabuáchama. <sup>5</sup> Bënga ftsjanobatmanama cabá más chënga tmonjanma; natsana, chënga Bëngbe Utabná tmojanianá lempe ntšamo cha tojtsebošcá chënga jamama imojtseboše ca, y chentšana bëngaftácnaca cachcá tmonjanma; y lempe enjamna ntšamo Bëngbe Bëtsá inabošcá. <sup>6</sup> Ndayá Macedonioca ošbuáchiyënga tmojanmama bënga añemo fsënjanóyëngacñeyeca, bënga Tito fsënjaimpadá chë tsabe trabajo chaopochocama, chë tsëngaftangbeñe crocénana játbanana, Jerusalenoca ošbuáchiyënga jujabuáchama, ndayá cha jamama tojanbojatšecá. <sup>7</sup> Y morna, ntšamo tsëngaftanga nyetsca soyënguiñe tša šmomncá –puerte ošbuáchiyënga, becá obenënga Bëngbe Bëtsabe soyëngama jóyebuambayama, puerte osertánënga Bëngbe Bëtsabe soyëngama, corente juabnayënga bëtscá jamama Cristo jaserviama y bëngbioye corente ababuánýeshanënga –cachcá, mórnaca bëtscá šmochjama quem trabajuiñe chë ošbuáchiyënga ndbomnjëmëngbiamá, tsëngaftangbe bonshánana jtsinýanýnayëse.

<sup>8</sup> Chca ndoñe quechatëtsëtsná mo canýe mandcá; atše sëntseboše ndayá nyë tsëngaftanga jáuyanana ntšamo ínýenga bëtscá tmojatrabajá chë ndbomnjëmëngbiamá, tsëngaftangnaca cachcá chašmotsamama; y chca, chašminyanýema chë tsëngaftanga šmobomna bonshánana ndegombre bëtsemnama. <sup>9</sup> Er tsëngaftanga šmondëtatšëmbo ntšamo Bëngbe Utabná Jesucristo puerte tsabe soyënga bëngbiamá tojamama, bëngbioye puerte jtsababuánýeshanëse. Celoca, cha cabá quem luaroye ndabo ora, cha bëtscá inabomna; pero tsëngaftanga ababuánýeshanayeca, mo canýe puerte nduamanacá tojanóbema. Y mora, Cristo mo canýe nduamanacá tojóbmeyeca, Bëngbe Bëtsá puerte tsabe soyënga šojatšatá.

<sup>10</sup> Tsëngaftangbe tšabiama mëntšá cbabuayená, ntšamo quem soyiñe šmochjamama. Chë inye uata tsëngaftanga šmonjanbojatsé, ndoñe nye chë ndbomnějémëngbiama jacjayama, ndayá chca jamama jtsebošámnaca. <sup>11</sup> Morna, chë ndbomnějémëngbiama trabajo šmochjapochóca; chca, ntšamo tsëngaftanga beca šmonjanprontana y jujabuáchama tša šmonjanbošcá, mórñaca cachcá chašmomama chë trabajo japochócama, ntšamo šmojobenacá jacjayese. <sup>12</sup> Er canye entšá, jatštayama ndegombre tojtsebošese, ndayá cha tojatštacá Bëngbe Bëtsábioye oyejuayá jabemana, ntšamo cha tojtsobencá, y ndoñe ntšamo cha ndoñe tontsobencá.

<sup>13</sup> Ndoñe quenátsmëna, tsëngaftanga puerte ujabótënga chašmoquedá, ínÿengbioye atšatnaye causa, chënga ndoñe yapa ujabótënga chamondëtsemnama. <sup>14</sup> Atše sentsichamo ndayá nÿetscanga chamotsenajabuachana, chca tojtséjaboto ora ca. Mora, chë bëtscá šmobomñentšana šmontsobena chënga jujabuáchana, ndayá tojtsabuáshebencá jatšatayese; y inye orna, chënga entsamna tsëngaftanga jujabuáchana chë cmojtsabuáshebena soyëngaca. Chca, nÿetscanga jóyëngacñana ndayá tojtséjaboto ora. <sup>15</sup> Ntšamo Bëngbe Bëtsabe uabemana palabrénguiñe endayancá: Chë tša bomnábioye ndoñe chebatanójama; y chë nye batšá bomnábioye, ndoñe quebënjatanbuáshbena ca.

### *Tito y chabe enutënga*

<sup>16</sup> Bëngbe Bëtsá šcuatschuá, tsëngaftanga jtsanÿenama Tito ainaniñe juabnënga chaotsebomñama cha tojanmama, cachcá ntšamo bënga fsëndbomncá. <sup>17</sup> Er tsëngaftangbioye chaotsama bënga fsënjanimpadá ora, cha oyejuayá aiñe ca tonjánayana choye jama; y chabiama puerte enduámana tsëngaftangbe tšabiana; chíyeca mora echanjá tsëngaftanga jáñyama, chca jamama cachá yobóseyeca.

<sup>18</sup> Títoftaca, canya Jesucristbeyeca bëngbe catšata fsëntsichamná; chabiama puerte tšabá ošbuachiyëngcá enefjuanëngbenache mondoyebuambná, chabe trabajuama chë tšabe noticiënga abuayinyayama. <sup>19</sup> Y ndoñe nye chë soye, sinó quem luarentše ošbuachiyëngcá enefjuanënga cha tmonjuábuayana bëngaftaca Jerusalenoye jama, y jujabuáchama chë ndbomnějémëngbiama trabajuiñe; chë trabajo endmëna bonshánana jinÿanÿiyama; chca fsëntsama, Bëngbe Utabná jtsatschuanayama y jinÿanÿiyama bënga chca jujabuáchama tša fstsbošama. <sup>20</sup> Títoftaca cha fsëntsichamná, chca, ndocná chaondëtsichamo bënga ndoñe tšabá tifjama ca, ntšamo játbánama cmojtsamniñe, chë beca juabónana játbánama, ndbomnějémënga jujabuáchama; <sup>21</sup> er bënga fsëndama lempe ntšamo fstsobencá, ndoñe nye ntšamo Bëngbe Bëtsabe bominiñe tšabá yomncá jamama, ndayá ntšamo entšangbe bominiñe tšabá yomncánaca.

<sup>22</sup> Chátaftaca inya Jesucristbeyeca bëngbe catšatnaca fsëntsichamná; cha bënga ba soyiñe šonjinÿanÿé cha yojtseboše bëtscá jamama, Cristo jaserviama, y mora más, er cha puerte bëtscá entsejuabná tsëngaftanga puerte tšabá šmochjamama. <sup>23</sup> Y Titbiamna, cha quem trabajuiñe atšbe enutá endmëna, y atšcá tsëngaftangbiama endëtrabája; y chë inÿata Jesucristbeyeca bëngbe catšatatbiamna, chata bontsemna quemuentša ošbuachiyëngcá enefjuanëngbe ichmónata, chëngbiama chabóyebuambama; y chë bontsama sóyecna, chata Crístbioye corente jtsatschuanayana. <sup>24</sup> Chíyeca, chëngbioca ošbuachiyëngcá enefjuanënga chca chamotsetatšëmbuama, chë ichmona boyabásengbioye šmochjinÿanÿiye tsëngaftanga ndegombre chënga šmojtsababuánÿeshanama, y bënga razón fstsebomñama tsëngaftangbiama oyejuayënga jtsemnama.

## 9

### *Chë inye ošbuachiyëngbiama crocénana játbánama*

<sup>1</sup> Chë Jerusalenoca Bëngbe Bëtsabe entšangbiama crocénana játbánamna ndoñe quenátsiya tsëngaftangbioye jatëbuabiamñayama, <sup>2</sup> er atše ndegombre sëntsetatšëmbo



tšëngaftanga tša šmojtseboše chca jujabuáchama. Macedonioca entšanga puerte oyejuayá sempre sëndbëtsëtsëtsnaye, Acaya luaroquënga chë inye uatscana quem trabajuíne jujabuáchama šmoprontánama; y chë jujabuáchama tšëngaftangbe bëtscá juabnënga tmojama banga quem luarentšënga bëtscá añemo chamotsebomnama, chëngnaca chë trabajo jamama. <sup>3</sup> Pero Jesucrístbeyeca quem catsátanga sentsichamná, ntšamo bënga oyejuayënga tifjayancá tšëngaftanga chašmotsamama, chë tšëngaftanga quem trabajuíne bëtscá šmochjama ca; chca, ntšamo tijanayancá ndoñe nye bonamente chaondëtsemnama, y ntšamo sënjanayancá tšëngaftanga chašmotseprontánama; <sup>4</sup> er nderado báseftanga Macedonioquënga átseftaca tmojá y choca ndëprontánënga tcmojánýena chë ndbomnjémëngbiama ujabuáchenanaca, chë soye nanjama bënga fchaitseuatjama, er ba soye fsënjayana bënga ndegombre fstsëtátšëmbo tšëngaftanga prontánënga šmochtsemna ca; y ndegombre, tšëngaftangbiama cabá más ouatjcá nántsemna. <sup>5</sup> Chíyeca, tšabá šonjuínýnana Jesucrístbeyeca quem catsátanga jáimpadana chënga atšbe natsana chamotsama tšëngaftanga jányama, y chacmëjabuachama chë juabónana játbanama, ndayá tšëngaftanga tempo šmonjanašebuachenacá. Chca, atše choca chajáshjango ora, tšëngaftangbe juabónana chaotseprontana. Chca, tšëngaftanga šmochanjínýanýiye ndbomnjémëngbiama šmojacjá, chca jamama tša šmobóseyeca, y ndoñe nye batšatema jatšatayama y tšëngaftangbiama bëtscá jobuájuama šmojtseboše.

<sup>6</sup> Quemuiñe šmochtsenójuabnaye: Nda nye batšá tojajé, cach batšá chentšana josháchiñana; y nda bëtscá tojajé, cach bëtscá chentšana josháchiñana. <sup>7</sup> Cada ona bontsemna jajájuana ntšamo chabe ainaniñe tojajuabocá; ndoñe ngménaca o nye ínýenga chca jamama tmojtsemándayeca. Chca chaotsemna, er nda oyejuayá tojajábioye, Bëngbe Bëtscá jtsebobonshánana. <sup>8</sup> Bëngbe Bëtscá endobena jamana chábentšana nyetsca tšabe bendicionënga y bëtscá soyënga tšëngaftanga chašmotsebomnama; chca, ntšamo nyetsca soyënguiñe cmojtsëjabotcá sempre chašmotsóbomñama, y cabá más bëtscá chašmotsebomnama, nyetsca tšabe obrënguiñe ínýenga chašmëjabuachama. <sup>9</sup> Bëngbe Bëtscabe uabemana palabrenguiñe, mëntšá endayana chë bëtscá tojacjabiamas: Cha nyets ainánaca ndbomnjémënga bëtscá jatšatayana; y chë tšabe soyënga ntšamo cha tojtsamcá nyets tempo jëftsemnana.

<sup>10</sup> Bëngbe Bëtscá, nda endbama chaotsemna jénaye jájema y sananga jasama, cmochanjátšataye lempe ntšamo cmojtsëjabotcá, y echanjama, tšëngaftanga cabá más tšabe soyënga chašmotsamama. <sup>11</sup> Bëngbe Bëtscá echanjama tšëngaftanga nyetsca tšabe soyënga chašmotsebomnama, chca, tšëngaftanga nyets ainánaca puerte ínýengbioye chašmatšatama, y bëngbeyeca, chë mochjójyëngacñënga Bëngbe Bëtscá chamotsatschuanama; <sup>12</sup> er chë ujabuáchenana Bëngbe Bëtscabe entšanga tcojatsatá ora, ndoñe nye ndayá tojtsëjabotcá jatšatayana, ndayá chënga Bëngbe Bëtscá chamotsatschuanámnaca jamana. <sup>13</sup> Chënga Bëngbe Bëtscá mochántatschuanaye, er chë ujabuáchenanaca chëngbioye jinýanýiyana, ntšamo Cristbe tšabe noticiënguiñe iuayancá tšëngaftanga šmobedecénama, y ntšamo tšëngaftanga tšabá jamëse, nyets ainánaca bëtscá soyënga chënga y nyetscanga šmojátšatama. <sup>14</sup> Y chënga tša mochántseboše tšëngaftanga jányama y tšëngaftangbiama Bëngbe Bëtscá mochántseimpadana, er cha bëtscá tšabe soyënga tšëngaftangbiama tojama. <sup>15</sup> ¡Bëngbe Bëtscá scuatschuá ndayá cha šojátšatama, canýe puerte uámana soye, ndocná jobenayana tšabá jayanama ntšamo chë soye bëtsemnana!

## 10

### *Ntšamo Pablo tojánayana ínýenga chabe contra imojtsichamo ora*

<sup>1</sup> Y mora, atše Pablo, cbochanjáimpada, tšëngaftangbioye puerte bonshanánaca jtsënyáyëse, y tšëngaftangbiama tšabá jamama jtseprontánëse, ntšamo cach Cristo endbetsamcá. Báseftanga tšëngaftangbioquënga imojtsichamo atše puerte nduamaná tsnenóbema atše tšëngaftangafata stsemna ora, pero corente añemo bomná tsnenóbema

jabuache soyënga jayanama tšëngaftangbentšana bënoca stsemna ora ca. <sup>2</sup> Tšëngaftanga cbontsaimpadana, tšëngaftanga jányama chajá ora, atše ndoñe chašondëtsemna puerte añemo bomná jtsemnana, jabuache soyënga tšëngaftanga jáuyanama, ndoñe ntšamo atše puerte tšabá sëntsetatšëmbcá ndayá báseftangaftaca jamama šojtsotocana, chë ndëmuanyënga imojtsejuabná, nýe bënga tšabá jtsomñama juabnëngaca bënga fstsiyena ca. <sup>3</sup> Ndegombre bënga quem luarentše fsëndoyena, pero ndoñe queftsátspelia Cristbiana, ntšamo quem luarentša entšanga monduamancá; <sup>4</sup> er chë ndaye sóyeca bënga Cristbe soyëngama fsëndépelia, ndoñe quenátsmëna mo chë ndaye sóyeca chë nýe quem luarama enójuabnaye entšanga japéliama monduamancá, ntšamo nýe chënga tšabá jtsomñama juabnënga yomncá. Inýetsá, chë ndaye soyëngaca bënga fsëndépelia, Bëngbe Bëtsá jtsinyanana puerte obenana bomna soyënga yomna ca; y endmëna chë Satanás tojtsemánda soyënga jayëñjanama, puerte jabuache soyënga jayëñjanama. Mo nda canýe uayayábioye jtsepochocancá, chë Bëngbe Bëtsabe osertánana ndoñe yonduámana ca jinýanyiyama soyënga ichámëngbiana, <sup>5</sup> y Bëngbe Bëtsabe osertánana jtsabotema juabnënga bomnëngbiana, bënga fsëndama ntšamo chënga tmojtsichamcá tondaye chaondëtsámanama. Y chë japéliama fsëndbomna soyëngaca, bënga fsëndbétsama chca juabnayana chamotsajbanama, y chamotsobena ntšamo Cristo yomandacá jtsamana. <sup>6</sup> Bënga fsëntseprontana chë Cristbiana nduauenanënga jácastigama, lempe ntšamo Cristo cmojtsamëndacá tšëngaftanga chašmojtsama ora.

<sup>7</sup> Tšëngaftanga ndayánaca jtsonýayana nýe ntšamo tbojtsabinýnecá. Nderado nda becá tojtsejuabná Cristbia yomna ca, cha bontsemna jtsejuabnayana bëngnaca Crístbenga fstsmënama, ntšamo cha yomncá. <sup>8</sup> Er atše masque tša sëndbétsoyebuambnaye chë Bëngbe Utabná šojatšatá mandama, chë ndáyeca bënga jamama tšëngaftanga puerte chašmotsošbuáchema y ainaniñe bëts añemo chašmotsebomnama, y ndoñe tšëngaftanga ntjapochócama, chama atše ndoñe quetsátëuatja. <sup>9</sup> Atše ndoñe quetsátsoše tšëngaftanga chacmotsinýana, tšëngaftanga jaútatjayama atše stseboše ca, ndayá atšbe tsbuanáchangañe tijuábemama. <sup>10</sup> Er báseftanga mëntsá atšbiana imojtsichamo: “Chabe tsbuanáchangañe cha šontsamënda bëtscá soyënga jamama, y tša obenacá cha jtsóyebuambnayana; pero cha bëngaftaca tojtsemna ora, cha jtsóyebuambnayana mo canýe ndocna obenana ndbomnacá, y ntšamo tojtsichamcá tondaye ntsámanana ca.” <sup>11</sup> Chca entšanga entsamna jtsetatšëmbuana, ntšamo bënga fstsichamcá, tsbuanachangá juíchmuase, tšëngaftangaftaca cabá ndoñe fsëntsemna ora, tšëngaftangaftaca fchaitsemna órnaca, bënga chca fchjama.

<sup>12</sup> Ndegombre bënga ndoñe tša añemo queftsátsoyebuambnaya jayanama nýetsá uámanënga fstsmëna ca, mo chë cachënga jtsenábotamnayana uamanëngcá. Chënga jtsejuabnayana y jtsichámuana tšábenga imomna ca, nýe ntšamo cachëngbeñe ínýenga imomnama jtsonýayëse; y chca tmojtsama ora, chënga juabna ndbomnënga jtsemnana. <sup>13</sup> Bënga ndoñe yapa quifchatóyebuambaye cabëngbiana, chca, tša tšábenga bënga imomna ca jtsenábotamnayama; fchanjóyebuambaye ndayá chë bënga tifjama tšabe trabajuama, ndayá Bëngbe Bëtsá šojabanýecá, y chíñnaca entsemna ntšamo tšëngaftangbeñe Corintoca tifjamcá. <sup>14</sup> Chiyeca, bënga ndoñe queftsatoyebuambná chë bënga ndoñe derecho fsëntsebomnama, ntšamo ndegombre nántsemna bënga tempo tšëngaftangaftaca ndoñe mafsënjamnëse; er bënga chë natsanënga fsëñjamna tšëngaftangbioye jama, Cristbiana tšabe noticiënga jábuayenama. <sup>15</sup> Y ndoñe quifchatóyebuambaye tša tšabá bëngbe trabajo yomna ca, chë ndayama ndoñe šontsamna chca jatichámuana, chë trabajo ndoñe bëngbe soye, sinó ínýengbe soye yómnyeca. Chamna, bënga fsëntsobátmana tšëngaftanga Crístbeñe más chašmotsošbuáchema, y chca chaojtsemna ora, bënga fchayobená ba luariñe entšanga jábuayenana, ntšamo tšëngaftangbeñe fsëntsamcá. <sup>16</sup> Chca, fsëntsobátmana bënga jobenayama tšabe noticiëngama jábuayenama, chë tšëngaftangbentšana más chcoye imoyena entšángbioye; chca, bënga ndoñe yapa quifchatóyebuambaye ínýengbe traba-

juama, Cristbe soyënga jábuayenama, mo chë soye bëngbe trabajo cuafjatsmëncá.

<sup>17</sup> Ntšamo Bëngbe Bëtsabe uabemana palabrénguiñe endayancá: “Nda tojtseboše jayanama cha canye uámana entšá yomna ca, más tšabá cha cháuyana Bëngbe Utabná puerte uamaná endmëna ca.” <sup>18</sup> Er Bëngbe Bëtsá jayanana canye entšá ndegombre tšabá tojama ca, ndoñe nye cachá tojtsenábotamnabiama, ndayá Bëngbe Bëtsá chca ndegombre tojama ca Bëngbe Bëtsá tojtsejuabnabiama.

## 11

### *Pablo y chë ndoñe ndegombre ichmónënga*

<sup>1</sup> Malaye atše šmëntjëuánta, atše básefta soyënga mo canye opá tojtsoyebuambnacá stsichámëntscuana, cach atše stsenabotamná ora. Masque ntšámncá šmochtsëuánta.

<sup>2</sup> Bëngbe Bëtsábeyeca atše tša cbondábabuanyëshana y cbondányëna, tšëngaftanga nye cha chašmotsëstonama y ndoñe ínÿengbioye. Er atše Cristo sënjašbuachená tšëngaftanga sempre cha šmochtsëstonama, y sëntseboše, cha quem luaroye yochjésabo ora, chábioye tšëngaftanga júshejanguana, mo nye chábioye sempre ustonëngcá, ntšamo canye taitá chabe bembe ndocna boyabása nduabuatmá nye canye boyabásaftaca chaóbuamama jushjanguancá. <sup>3</sup> Mëtšcuaye Evábioye tbojaningñé, y cha tbojanínÿnana puerte osertanabe soyënga cuafstsatsëtnacá, pero ndegombre ndoñe chca yonjamna. Atše sentsauatja nderado cachcá ínÿenga tšëngaftangaftaca muanjama y tšëngaftangbe juabna chašmotrocá, y chca, tšëngaftanga chašmotsajbaná sempre jtsejuabnayana nye Cristo nyetsca soyënguiñe jtseeservénama.

<sup>4</sup> Atše chama sentsauatja, er ndánaca jashjanguana y Jesusbiama tojtsabuayiyná, mo cha inÿe entšá cuaftsemncá, ndoñe ntšamo bënga Jesusbiama fsëndabuayiynacá, y tojtsama tšëngaftanga chašmobená canye espíritu jtsebomnana, pero ndoñe ntšamo chë Bëngbe Bëtsá tojama tšëngaftangbe ainaniñe cháumashënguama espíritu, chë Uámana Espíritu, tšëngaftanga tšabá cha jtsëuántana. Y atše sentsauatja, tšëngaftangbe ainaniñe inÿe buayenana chašmóyëngacñama ndánaca tojtsamama, ndoñe cachcá chë tšabe noticiënga ntšamo ya bëngbentsana šmonjouencá, y chora tšëngaftanga chábioye becá tšabá jtsëuántana. <sup>5</sup> Pero atše sëntsejuabná tondayiñe más batšá uamaná tsmëna ca, chë Jesucristbe puerte uámana ichmónënga imomna ca juabnayëngbiama.

<sup>6</sup> Atše ndoñe sënjuatsjinÿe ntšamo corente tšabá entšángaftaca jóyebuambayama; pero atše puerte tšabá sëndëtatšëmbo ntšamo stsichámuama. Bënga puerte tšabá nyetsca soyënguiñe tšëngaftanga tcbonjanÿanyé, ndegombre chca osertánana ftsbomnana.

<sup>7</sup> ¿O atše ndoñe tšabá sënjama, tšabe noticiënga cbonjanabuayiyná ora, tšëngaftangbentsana atšbiama tondaye ntjotjañcá, nduamanacá jenóbemëse; chca, tšëngaftanga puerte uámanënga chašmotsemnana Bëngbe Bëtsá chaomama? <sup>8</sup> Mo ínÿenache ošbuachiyëngcá enefjuanënga crocénana cuafjabaquëcá, crocénana sënjanóyëngacñe chë ošbuachiyëngbentsana, tšëngaftanga jujabuáchama jobenayama. <sup>9</sup> Y tšëngaftangaftaca sënjamna ora y ndayánaca šojanájaboto ora, atše ndoñe checbátantjañe atšbe opresidama, chca, tšëngaftangbiama totcá ndoñe chaondëtsemnana; er chë Jesucristbeyeca catšátanga Macedoniocana tmonjánashjajnënga, šmonjanatšetá ntšamo šojanbuashbencá. Chca, atše sënjanma, atšbe causa tšëngaftangbiama totcá ndoñe chaondëtsemnana; y sempre chca chántsama. <sup>10</sup> Serto, Cristbe ndegombre soyënga atšbe ainaniñe sëntsebomna; chíyeca, atše corente sëntsetatšëmbo ndocná Acaya luarentše yochjama atše chayajbaná puerte oyejuayá jtsóyebuambnayama, chë tšabe noticiënga stsabuayiyná ora; y chca chanjama atšbe opresidama chašmoyema ínÿenga ntsamncá. <sup>11</sup> ¿Y ndáyeca chca stsama? ¿Yojtsemna ndoñe cbondábabuanyëshana causa? Ndoñe. Bëngbe Bëtsá endëtatšëmbo tša cbondábabuanyëshanama.

<sup>12</sup> Pero atše sempre chántsama ntšamo sëndamcá, chca, chë ínÿenga, chë Jesucristbe puerte uámana ichmónënga imomna ca juabnayënga ndoñe chamondëtsebomna ndáyeca jatenábotamnayama, ntšamo bënga fstsamcá chënga imojtsetrabája ca. <sup>13</sup> Er chënga ndoñe

quemátsmëna Jesucristbe ndegombre ichmónënga, mondmëna chë ínÿenga jáingñama imotrabájanga, y mondama entšanga chaotsinÿanama chënga mo Jesucristbe ndegombre ichmónënga cuaftsemncá. <sup>14</sup> Y chama ndoñe šmatjenjnaná, er cach Satanásnaca endbétsama mo canÿe buashinÿinÿana angelcá jtsinÿnama; <sup>15</sup> chíyeca, ndoñe muatjenjnaná, chabe oservenëngnaca tmojtsamama mo tšabe entšangcá jtsinÿnama. Pero chënga mochanjopochóca, ntšamo tmojtsomerecencá, ndayá tmojamama.

*Ntšamo Pablo tojansufrí, Cristbe ichmoná bétsemna causa*

<sup>16</sup> Cachiñe cbochtëtëyana: ndocná chaondëtsejuabná atše opá stsemna ca, cach atše stsenabotamná ora; pero chca šmojtsejuabnase, mo canÿe opabioycá šmochtsëuánta, chca, átšnaca jtsenábotamnayama jobenayama. <sup>17</sup> Chca jayanëse, ndoñe quenátsmëna ntšamo Bëngbe Utabná endbetsamcá, ndayá canÿe opá inetsamcá; atše tšabá jtsetatšëmbëse ndegombre stsebmna ndáyeca jobenayama jtsenábotamnayana. <sup>18</sup> Banga mondmëna, cachënga jtsenábotamnayana ndayá quem luarentse chënga tmojamama, as átšnaca chantsenábotamnaye. <sup>19</sup> Tšëngaftanga chë tša osertánënga, oyejuayënga opëngbioye jtsëuantánana. <sup>20</sup> Atše sëndëtatšëmbo tšëngaftanga chë opëngbioye šmnetsëuantánama, er tšëngaftanga šmondbétsëuantana chë nÿets tempo tšëngaftanga mo chëngbe oservenëngcá tmojtsamëndayënga, o chë tšëngaftanga bëtscá tmojtsabacanga, o tmojtsaíngñanga, o chë uámanënga tmojtsenobiamnanga tšëngaftanga mo nduamanëngcá jtsamëndayama, o chë tmojtsajuebjantšëtayënga.

<sup>21</sup> Atše chca sentsichamo masque sentsëuatja chca jayanama. Bënga fsënjamna corente obenana ndbomnënga, ntšamo tšëngaftanga bëngbiana šmojayancá, tšëngaftangaftaca chca jamama.

Inÿenga, chë tšëngaftangbeñe imotrabájanga, ndayama jtsenábotamnayama tmojtsebmne, puerte uámana ichmónënga imomna ca jtsichámëse, átšnaca añemo sëntsebmna chama jtsenábotamnayama; chca stjaryana ora, mo canÿe opá tojtsoyebuambnacá sëntsoyebuambná. <sup>22</sup> Chënga jtsenábotamnayana hebreunga imomnama. Atšnaca hebreo sëndmëna. Chënga jtsenábotamnayana Israeloquënga imomnama. Atšnaca Israelocá sëndmëna. Chënga jtsenábotamnayana Abrahámbentšana entšanga imomnama. Atšnaca Abrahámbentšana entšá sëndmëna. <sup>23</sup> Chënga jtsichámuana Cristo imoservena ca. Atše chëngbiana cabá más tšabe oservená sëndmëna. Chca stjaryana ora, mo canÿe opá tojtsoyebuambnacá sëntsoyebuambná. Atše chëngbiana más tijatrabajá, más šmojutame, más šmojatsetšená y ba soye atšbiana resjo endmëna jóbanama. <sup>24</sup> Shachna soye judiënga šmonjantsetšená chë unga bnëtsana y esconëfta soye jasachënjëse, ntšamo chënga jacastígana monduamancá. <sup>25</sup> Unga soye niñëbéngaca šmonjanëtsjanganja, y ndëtšbéngaca canÿe šmonjanatëchënganja. Unga soye chë atše sënjánenjaquena barco tontsanenatjëmbe, y chca ora, canÿe šonjanotocá, chë mar béjayoca tsachocana bënoca canÿe ibeta jëftsebobínÿnana y canÿe te jëftsejétanana. <sup>26</sup> Atše becá sënjánana, y chca atšbiana resjo enjamna bëtš fshajayënguiñe y uacucuatšënga chašmuebiatbëbama; resjo cach atšbe entšángbentše, judiënga y ndoñe judiëngbentše; resjo bëtš pueblënguentše, entšanga ndoyenentše y mar béjayoca. Atšbiámna resjo enjamna chë Jesucristbeyeca atšbiana catšátanga imomna ca jtsichámuana, pero ndegombre chca ndoñe mondmënéngbeñe. <sup>27</sup> Atše bëtscá tijatrabajá empás uamëntšnaya joquédantscuana; ba soye tijachnëngo ibeta ntsamanacá y ba soye tijachnëngo shëntseca y uajuendayá; ba soye ndayá jasama ntsebmncá; tijasufrí sësnama y tondaye entšayama.

<sup>28</sup> Quem soyëngama y inÿe ndoñe chiyátayana soyëngama más, atše cada te natjëmbana ainánaca ndoñe queschbatsmëna, er ndoñe quetsátstatšëmbo ntšamo nÿetsca ošbuachiyëngcá enefjuanënga imojtsiyenana. <sup>29</sup> Ndánaca tšabe soye jamama tondaye añemo tontsebmna ora, atše chabiana šochandbóngmia, mo átšnaca cach



tondaye añémoca cuabndëtsemncá. Nderado ínÿenga tmojama ndánaca bacna soyiñe chaótsatsama, atše ndegombre puerte ngménaca chandbétsesufrina. <sup>30</sup> Nderado nÿa tojátsiyta atše ndayama jatenábotamnayama, as chë atše tondaye obenana ndbomná tsmënama ínÿanÿnaye soyëngama chtsenábotamnaye. <sup>31</sup> Bëngbe Bëtsá y Bëngbe Utabná Jesucristbe Taitá, ndábioye nÿetscanga nÿetsca tescama jtsatschuanayama entsamna, cha endétatšëmbo atše ndegombre stsichámuama chë sëntsoyebuambná soyënguiñe. <sup>32</sup> Atše Damasco bëts pueblaca sënjamna ora, chë rey Aretasbe uabuáyana mandado tojanmandá chë puebloye amashjuaniñe soldadënga chamotsebojanÿama, atše chašmishachama chëjana stsebocana ora; <sup>33</sup> pero básefta enutënga, canÿe sbarëcuiñe šmontsanëštjango chë pueblentša shëconana tapiësiñe canÿe atëfjnëjana, y chca atše sënjanobená chëngbe cucuatšentšana jótsbocana.

## 12

### *Ndayá Pablo mo otjenayoquëcá tojáninÿe y ndayá Satanás tojanma, Pablo chaosufrima*

<sup>1</sup> Atše šontsemna más jtsenábotamnayana, masque chca tcojamentšana ndocna tšabe soye ntjóbcnana. Mora chanjóyebuambaye, chë mo otjenayoquëcá sënjinÿe Bëngbe Bëtsabe soyëngama y Bëngbe Utabná šojinÿinÿe soyëngama. <sup>2</sup> Atše canÿe entšá sënduábuatma, cha Crísoftaca cánÿiñe mo canÿacá endmëna y nda bnëtsana canta uata entsemna, Bëngbe Bëtsá tbojanánatse, chë celoca más tsbanánoye, Bëngbe Bëtsá yomnoye. Atše ndoñe quetsátstatsëmbo Bëngbe Bëtsá cha tbojanánatse chabe cuérpoca o nÿe chabe espiritiñe. ¡Nÿe Bëngbe Bëtsá chama yotátšëmbo! <sup>3-4</sup> Atše sëndétatšëmbo Bëngbe Bëtsá chë entšábioye celoye tbojanánatsama, nÿetscanga oyejuayënga imomnoye (atše ndoñe quetsátstatsëmbo Bëngbe Bëtsá tbojanánatse chabe cuérpoca o nÿe chabe espiritiñe; nÿe Bëngbe Bëtsá chama yotátšëmbo), y chentše cha tojanuena palabrenga, ndocná bontsemna jayanama palabrenga, chë ndayama entšangbiamana ndoñe yontselesenciana jatichámuana. <sup>5</sup> Atše chë entšá sëndmëna. Canÿe entšá ndáftaca chca tojopasabiamana, tšabá nántsemna chama jtsenábotamnayana; pero cach atšbiamana jtsenábotamnayana ndoñe tšabá ntsemnana, ndayá nÿe chë atše mo obenana ndbomnacá tsmënama ínÿinÿnaye soyëngama chantsenábotamnaye. <sup>6</sup> Y nderado jtsenábotamnayama atše stseboše, chca ora atše ndoñe stsama mo canÿe opá tojtsoyebuambnacá, er ntšamo ndegombre yomncá atše stsichamo. Pero chca ndoñe quetsátama, chca, ndocná chaondëtsejuabná ntšamo atšbiamana tbojtsinÿanama o ntšamo atšbiamana cha tojouenama atše más tsmëna ca. <sup>7</sup> Chiyeca, tša uamaná tsjamna ca atše ntjátsjuabnayama, atše chë Bëngbe Bëtsá tša bëts soyënga tbojaninÿinÿe entšá bëtsemnayeca, Bëngbe Bëtsá tojanma atše chaitsebomna ndáyeca puerte chaisufrima, mo canÿe bëts uchmašëfja atšbe cuerpiñe tojtsashacuancá, mo Satanabe ichmona soycá, atše chaisufrima chaomama. <sup>8</sup> Unga soye Bëngbe Utabná sënjaimpadá chca sufrínana chašotsebojuánama; <sup>9</sup> pero Bëngbe Utabná šonjauyana: “Nÿe atšbe bonshánana endmëna lempe ntšamo cmojtsajabotcá; nÿetscanga atšbe obenana más tšabá jinÿana, chë obenana ndbomna entšangbeñe atšbe obenana stjínÿanÿiye ora ca.” Chcasna, atše puerte oyejuayá chanjóyebuambaye chë atše mo obenana ndbomnacá tsmënama ínÿinÿnaye soyëngama, Cristbe obenana átšbeñe sempre chaotsomñama. <sup>10</sup> Chiyeca, Cristo jasérviamana, oyejuayá chandbëtsemna atše mo obenana ndbomnacá stsemna ora, ínÿenga šmojtsoyenguá ora, puerte padecena soyënga causa ndayá jamana ndoñe sëntsetatšëmbo ora, atše puerte chaisufrima ínÿenga tmojtsama ora y puerte tšetšena ainánaca stsemna ora; er chca soyënguiñe stsemna ora, mo canÿa obenana ndbomnacá, chora Bëngbe Bëtsá jamana atše ainaniñe bëts añemo chaitsebomnama.

### *Nderado ndayá Corintoca ošbuáchiyënga muanjamama Pablo yojánauatja*

<sup>11</sup> Atše chca chë soyëngama sëntsenabotamná ora sënjoyebuambá mo canÿe opá tojtsoyebuambnacá, pero ndegombre tšëngaftanga šmonjama atše chca chaimama. Er

tšëngaftanga šmondmëna ndëmuanÿenga yojtsamna atšbiana puerte tšabá jtsichámuana, atše chca jtsenábotamnayama ndoñe chašondëtsemnana. Ndegombre, atše tondayiñe más batšá uamaná quetsátsmëna, chë Jesucristbe puerte uámana ichmónënga imonna ca juabnayëngbiana, masque atše šontsebiona mo atše tondaye cuaftsamancá. <sup>12</sup> Canÿa Jesucristbe ndegombre ichmoná bëtsemnana inÿinÿnaye soyënga, tšëngaftangbeñe tonjanopasá atše choca sënjamna ora. Chca, chë Bëngbe Bëtsabe obenana inÿinÿnaye soyënga y chë tšabe soyënga ntšamo chora tonjanopasacá, puerte tšabá jtsinÿanÿnayana atše canÿe ndegombre ichmoná tsmënama; y atše chca sënjanma, padecena soyënguiñe puerte uantado jtsemnëse. <sup>13</sup> ¿Ndayá tšëngaftanga ndoñe cachcá šmonjanóyëngacñe chë inÿe luarenache ošbuachiyëngcá enefjuanëngbiana? Canÿe soye aíñe, er tšëngaftangbiye tondaye ntjotjañcá, atše ndoñe chiyatslesenciá tšëngaftanga atšbe opresidama chašmuájabuachama, ntšamo inÿe ošbuáchiyënga aíñe sënjalesenciácá. Smochtseperdóna chca bacna soye tšëngaftangbiana tijamama.

<sup>14</sup> Atše ya sëntseprontana, móracna unga soyama jama tšëngaftanga jáñÿama, y mora atše cach ndoñe quebochataimpáda atšbe opresidama chašmuatájabuachama. Atše ndoñe quetsátsboše chë tšëngaftanga šmobomna soye jatsbomnana, ndayá puerte sëntseboše tšëngaftanga Cristo sempre chašmotseservénama. Atše chca jamama sëntseboše, er atše tšëngaftangbiana mo canÿe taitacá, Crístbeñe šmontsanošbuachéyeca, atše chabiana tcbonjanabuayená ora; sëntsejuabná chë taitanga inétsamna crocénana jájuabana básenga jtsanÿenama, y ndoñe básenga chë taitangbiana. <sup>15</sup> Y atše corente oyejuayá lempe ntšamo tsbomncá chanjátšataye, y atše jopochócantscuanënaca, tšëngaftangbe tšabiana. Atše cada te más cbojtsababuánÿeshanëse, ¿tšëngaftanga más batšá atše šmochtsebobonshana?

<sup>16</sup> Ndoñe; tšëngaftanga tšabá šmondëtatsëmbo, atše uajabotá sënjamna ora, atše tondaye tcbonjanótjañama. Masque chca, báseftanga imojtsichamo ntšamo ínÿenga ndayíñnaca jáingñama atše tstátšëmbo ca, chëngbentsana crocénana josháchiñama; y atše catijama, ínÿenga jáingñase, nÿe ntšamo atše tsbošcá chamotsamama ca. <sup>17</sup> ¿O nderado atše tchojaingñe, canÿa chë tšëngaftangbiye sënjichamó chentsáftaca? <sup>18</sup> Tito sënjanimpadá tšëngaftanga jáñÿama chaotsama, y cháftaca sënjanichmó chë inÿa bëngcá Crístbeyeca bëngbe catšata. ¿Nderado Tito tcmojaingñe? ¿Ndoñe ndegombre yondmëna, Tito y atše cachcá fstsjuabná y fstsboše y cachca soyënga jtsamëse ftsiyena? Ndegombre chca endmëna.

<sup>19</sup> Nderado tšëngaftanga šmojtsjuabná bënga jenëuyanama chca cbojtsëtsësná ca; pero ndoñe chca quenátsmëna. Inÿetsá, bënga Crísoftaca cánÿiñe mo canÿacá entšangcá, Bëngbe Bëtsabe delante fsëntsoyebuambná, y lempe ntšamo tijayancá, Jesucristbeyeca atšbe bonshana catšátanga, tšëngaftangbe tšabiana tijayana, Crístbeñe corente chašmotsošbuáchema y ainaniñe bëts añemo chašmotsebomnana. <sup>20</sup> Er atše sëntsauatja, atše jáñÿama chajjá ora, ndoñe chachbondánÿena ntšamo tsbošcá, y tšëngaftanga atše ndoñe chašmondínÿena ntšamo šmojtsebošcá. Sëntsauatja nderado bacna soyënga šmattsama: jtsenpenzentserana, ínÿengaftaca yapa jtsenántšabošana, ndayánaca rábiaca jtsamana, nÿe tšëngaftangbiana tšabe soyënga jtsebomnana jtsebošana, ínÿengbiana podesca ichámuana, uayátsenayënga jtsemnana, ínÿengbiana cachënga más uámanënga jtsenobiamnayana, y nÿetscanga ndoñe cachcá ntsejuabnayana. Chca chachojánÿenëse, tšëngaftanga ndoñe quešmochátsbošena jóyëngacñana ntšamo tšëngaftanga jucácanama atše šochtsemncá. <sup>21</sup> Atše sëntsauatja, cachiñe jáñÿama chajjá ora, atšbe Bëtsá chaoma atše chaitsëuatja chca šmojtsamama, y chašotsemna puerte ngménaca jošachnama ba tšëngaftangbiana, ndëmuanÿenga ya bayté bacna soyënga imojtsama y chca juabnayana ndoñe tmonjatrocá, y ndoñe tmonjajbaná chë bacna soyënga boyabása o shembásaftaca jtsamama juabnayana, y chca soyënga jtsamana y nÿetsca bacna soyënga jtsamana, jenomándama ntsoyencá.

## 13

### *Inye soyengama jábuayenama y jádiosoftama*

<sup>1</sup> Móraca ya unga soyama tsëngaftanga jányama chanjá. Atše chaijáshjango ora, tojtseiytëse chanjayana ntšamo báseftanga tmojamcá tsábá o ndoñe tsábá bëtsemnana. Nda bacna soye ntšamo Moisesbe leyiñe endëmandancá tojama ora, atše chanjayana cha ndoñe tsábá tonjama ca; pero útata o únganga tmojtsemnëse, chënga chamuayanama cha ndegombre chca tojamama. <sup>2</sup> Atše tempo sënjanabuayená, chë tsëngaftanguentsënga bacna soye tmojánamënga y chë ínÿenga, atše šojtsanmëna jácastigana, chca soyënga amana ndoñe tmonjájbánanga. Mora, tsëngaftangbentsana bënoca sëntsemna ora, cachiñe cachcá cbëtëtabuayená, ntšamo sënjanamcá chë tsëngaftangaftaca uta soyama sënjamna ora: atše cachiñe jányama chajase, ndoñe quichatsleséncia bacna soyënga chašmotsamama y chama ntjacastigacá jatabáshejuanana. <sup>3</sup> Atše chca chanjama, er tsëngaftanga šmotsenguá ndayánaca tsábá chacminÿanÿema Cristo atšbiajana yoyebuambnana. Cristo ndoñe quenátsmëna mo canÿa obenana ndbomnacá, ntšamo tsëngaftangaftaca cha tojamama; ndayá chabe bëtš obenana tsëngaftangbeñe bëtscá jtsinÿanÿayana. <sup>4</sup> Er cha tmojancrucificá mo canÿa obenana ndbomnacá; pero mora, Bëngbe Bëtsá puerte obená bëtšómñeyeca, cha tojtayena. Cachcá bëngnaca, cháftaca cánÿiñe mo canÿacá jtsemnëse, mo obenana ndbomnëngcá jtsemnana; pero cháftaca mochantsiyena, Bëngbe Bëtsá puerte obená bëtšómñeyeca, tsëngaftanga jtsaservénama.

<sup>5</sup> Tsëngaftanga cada ona šmochjshénojuaboye, tsábá jtsetatšëmbuama mocna entšanga bëtsemnana, jtsetatšëmbuama aíñe o ndoñe sempre Crístbeñe puerte tašmuetsošbuáchema. Smochjshénojuaboye chca šmošbuáchema ntšamo šmojtsemnana y tsábá ínÿenga šmochjínÿanÿiye. ¿Ndoñe šmondétatšëmbo Jesucristo tsëngaftangbe ainaniñe yoyenama? Ndóñesna, tsëngaftanga ndegombre ndoñe Crístbeñe ošbuáchiyënga šmontsemna. <sup>6</sup> Pero atše sëntsobátmana tsëngaftanga ndegombre chašmotsejuabnana bënga Jesucristbe ndegombre ichmónënga ftsmënana. <sup>7</sup> Y Bëngbe Bëtsá fsëntseimpadana bacna soye ndoñe chašmondëtsamama, ndoñe chë Jesucristbe ndegombre ichmónënga ftsmënana tsëngaftanga jinÿanÿiyama, ndayá ntšamo tsábá yomncá chašmotsamama. Nÿetscanga chca tmojtsamëse, nántsinÿna mo Cristbe ndegombre ichmónënga bënga ndoñe cuabndmëncá, er chca ndoñe tašuatátëjaboto jinÿanÿiyana ntšamo bënga bëngbe mándoca ftsmënana mo ichmonëngcá, tsëngaftanga jábuayenama. Pero chë soye tondayana šattsentsamna, <sup>8</sup> er bënga queftsátobena tondaye jamana Bëngbe Bëtsabe ndegombre soyëngama contra; nÿe ntšamo chabe ndegombre soyënga yomncá aíñe. <sup>9</sup> Bënga fsëntseboše ntšamo tsábá yomncá tsëngaftanga chašmotsamama, er bënga oyejuayënga fchandbëtsemna, bënga mo chë obenana ndbomnëngcá fstsemna ora, bëngbe mando jácastigama ntjatinÿanÿaycá, y tsëngaftanga ainaniñe bëtš añémoca šmojtsemna ora y puerte tsábá šmojtsemnómánda ora. Bënga Bëngbe Bëtsá fchandbëtseimpadana, chca bacna soyënga amana jtsajbanase, chašmobená jtsemnana nÿetsca soyënguiñe tsábënga, y lempe ntšamo tsëngaftanga chašmotsemnana Bëngbe Bëtsá yobošcá. <sup>10</sup> Quem tsbuanácha cbontsëbuabiamná tsëngaftangaftaca cabá ndoñe sëntsemna ora; chca, atše choye chaijá ora ndoñe chašondëtsemna jabuache jucácanana, mo canÿa puerte mandayacá, ntšamo Bëngbe Utabná šojanbemcá, tsëngaftanga jujabuáchama chábeñe corente chašmotsošbuáchema y ainaniñe bëtš añemo chašmotsebomnana, y ndoñe tsëngaftanga jatapochócama.

<sup>11</sup> Morna, Jesucristbeyeca atšbe catšátanga, tsábá chašmotsomñe, šmochtsajbaná chca bacna soyënga amana y šmochtsemna lempe ntšamo Bëngbe Bëtsá yobošcá. Smochjouena ntšamo tcbonjabuayenacá, nÿetscanga cachcá šmochtsejuabnaye, nÿetscángaftaca natjëmbana šmochtsiyena, y Bëngbe Bëtsá, chë cmondababuanÿeshaná y tsëngaftangbe ainaniñe tsábe ebionana chašmotsebomnana endamá, tsëngaftangaftaca

echántsemna. <sup>12</sup> Njetscanga šmochjenchuaye mo Jesucristbeyeca catšatangcá, jtenámochëse, ntšamo cach tšëngaftangbe pamíllanga puerte bonshanánaca šmondetsacheuanaycá. <sup>13</sup> Njetsca quem luaroca ošbuáchiyënga cmontsacheuaná.

<sup>14</sup> Atše, Bëngbe Bëtsá sëntseimpadana, Bëngbe Utabná Jesucristo chaoma, njetsca tšëngaftangbeñe tšabe bendicionënga chaotsemnama. Bëngbe Bëtsabe bonshánana sempre chašmotsóbomñe, y Uámana Espíritu sempre chašmotsóbomñe, y chë Uámana Espíritoftaca cányiñe mo canyácá chašmotsomñe.



## Gálatas

### *Pablo Galacia luaroca ošbuáchiyënga jacheuayama*

<sup>1-2</sup> Atše Pablo, quem tsbuanácha sentsabiamná Jesucristbeñe ošbuáchiyëngbiana, chë Galacia luaroca ošbuachiyëngcá enefjuanëngbiana. Jesucristo y Bëngbe Bëtsá, chë Taitá, nda tojanma Jesucristo cháuatayenama, chata šmonjanchembo chatbe ichmoná jtsemnama. Ndocna entšá chešnátanabuayana atše Cristbe ichmoná jtsemnama; ni Jesucristo, ni Bëngbe Bëtsá ndocna entšá tbonjanichmó atše chatbe ichmonacá jabuábuayanama. Atše y chë ínÿenga Jesucristbeñe ošbuáchiyënga átšeftaca montsemnënga, tšëngaftanga cbontsacheuaná. <sup>3</sup> Atše sëntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšabe bendicionënga tšëngaftangbeñe chaotsemnama, y chaboma tšëngaftangbe ainaniñe tšabe ebionana chašmotsebonnama. <sup>4</sup> Cristo chabe derecho vida jtsobomñama cachcá tojanonÿá y tojanóbana, bëngbe bacna soyënguentsana játsebacama, y bënga chamotsobena jtsiyenama ndoñe ntšamo quem tempo entšanga imoyencá, puerte bacna soyënga imojtsama ora. Cristo tojanóbana ora, tojanma ntšamo Bëngbe Bëtsá, Bëngbe Taitá endmëná yojanbošcá. <sup>5</sup> Nÿetscanga nÿetsca tescama Bëngbe Bëtsá chamotsatschuaná. Chca chaotsemna.

### *Nÿe canÿe ndegombre buayenana soyënga Cristbiana endmëna*

<sup>6</sup> Atšbe ainanoca inÿetšá šontsebiona, er nda nanjouena, tšëngaftanga nÿe baseftayshinÿe y ya juabna šmojatstrocá y Bëngbe Bëtsá stëtsoye šmojtsequedá, nda tšëngaftanga tcmojáchembo chabe entšanga chašmotsemnama. Cha chca tojanma Crísbeyeca, er mua puerte tšabia tšëngaftangaftaca enjamna. Tšëngaftanga Bëngbe Bëtsá stëtsoye šmojtsequedá, ínÿengbe buayenana soye jouenama, y chë ínÿenga jtsichámuana chë buayenana soyënga chë tšabe noticiënga canmëna ca. <sup>7</sup> Ndegombre, ndoñe quenátsmëna inÿe ndegombre buayenánana. Ntšamo entsopasancá mëntšá entsemna: báseftanga montsama tšëngaftanga ndoñe natjëmbana ainánaca chašmotsiyenama, y becá montsama chë Cristbiana tšabe noticiënguentsë, ba ndegombre soyënga jtsejuánama, inÿe soyënga jacjayama. <sup>8</sup> Nderado bënga o canÿe celoca ángel soyënga cmojtsabuayiyná, y ndoñe tontsemna mo chë tšabe noticiënga bënga tempo tcbonjanabuayenacá, as chë chca tojtsamabiana ¡Bëngbe Bëtsá chaoma infiernoca becá chaosufrima! <sup>9</sup> Tempo ya chca sënjánayana; mora cachiñe šcutëtayana: Nderado nda soyënga cmojtsabuayiyná, y ndoñe tontsemna mo chë tšabe noticiënga, ntšamo tempo šmonjanoyëngacñëcá, ¡Bëngbe Bëtsá chabiana chaoma infiernoca puerte chaosufrima!

<sup>10</sup> Atše chca stjajana ora, ¿tšëngaftanga cmojtsinÿana atše soyënga stsama entšanga oyejuayënga átšeftaca chamotsemnama? Ndoñe chca quenátsmëna. Atše sëndboše ndayá Bëngbe Bëtsá átšeftaca oyejuayá chaotsemnama. Entšanga oyejuayënga chamotsemnama, atše cabá soyënga stsamëse, atše ya ndoñe Cristbe canÿe oservená stsemna.

### *Ntšamo Bëngbe Bëtsá Páblëbioye tbojanchembo, Jesucristbe ichmoná jtsemnama*

<sup>11</sup> Atše sëntseboše tšëngaftanga, Jesucristbeyeca atšbe catšátanga, chašmotsetátšëmbo chë tšabe noticiënga ntšamo sëndabuayiynacá quem luarentša entšangbe juabnentšana ndoñe yondóbocanama. <sup>12</sup> Ndocna entšá chë tšabe noticiënga chešnatanbuayená, ni chešnatanbuatëmbá, ndayá cach Jesucristo šonjaninÿinÿe.

<sup>13</sup> Tšëngaftanga šmojátatšëmbona ntšamo atše tempo tsjanamana jtsiyenana, ntšamo judiënga Bëngbe Bëtsá mondadorancá atše cha sënjanadorana ora, ntšamo atše becá tsjánamama chë ošbuachiyëngcá enefjuanënga puerte chamosufrima, y ntšamo atše becá tsjánamama ndocná Jesucristbeñe chaondëtsošbuáchema. <sup>14</sup> Atše inÿe judiënga cach atšcá uata bomnëngbiana más sënjánama Bëngbe Bëtsá adórayiñe, ntšamo judiënga

cha jadórama monduamancá, y atše nyets añémoca tša sënjantšena jtsamama ntšamo bēngbe bēts taitanga básenga jabuátambama monjanamancá. <sup>15</sup> Pero Bēngbe Bētsá atšbe tšabiamama yojanjuabná, y chíyeca, atše cabá ndonyá ora, canye bēts soyama cha šojanbocacá. <sup>16</sup> Y cha tojánbošena ora, šonjaninýinýé ntšamo ndegombre chabe Uaquiñá yomnana, y šonjanchembo. Cha chca tojanma, atše chē tšabe noticiēnga ndoñe judiēngbeñe chayábuayenama. Y atše ndocnábioye chiyataná ndayá jamama šojtsanmēnana chašobuayenama; <sup>17</sup> y Jerusalenoye cach ndoñe chiyataná chē atšbiamama más natsana Jesucristbe ichmónēnga imojamnēngaftaca jencuéntama. Chamna, cachora Arabia uabaina luaroye sēntsanoñe, y chentšana Damasco bēts puebloye sēntaná.

<sup>18</sup> Jesucristbeñe jtsošbuáchiyama sēnjanóntša orscana, unga uatēse Jerusalenoye sēnjána Pédroftaca jencuéntama, y cháftaca nye uta semana sēnjéftsemna. <sup>19</sup> Y ndocna chē Jesucristbe inye ichmónēnga chiyáisananyē; nye Santiago aíñe, Bēngbe Utabnabe catsata. <sup>20</sup> Bēngbe Bētsá šontsonyá, ntšamo tšēngaftanga cbontsētsētsnacá ndegombre bétsemnana.

<sup>21</sup> Jerusalenocana sēnjéftsanbocnentšana, Siria y Cilicia luarēngoye sēnjána. <sup>22</sup> Pero chē tempo, chē Jesucristbeñe ošbuáchiyēnga Judea luariñe bomínýeca ndoñe quešmēnjatanábuatma. <sup>23</sup> Nye inýengbioye imojtsayaunana: “Nda tempo bēnga puerte chamotsesufrínama enjanamá, mora entšanga entsabuayiyná, Jesucristbeñe jtsošbuáchiyama caojtsamna ca. Y tempo cha tša enjánboše jamama entšanga Jesucristbeñe ndoñe chamondētsošbuáchema ca” —chēnga imojtsichamo. <sup>24</sup> Y entšanga Bēngbe Bētsá imojtsatschuanaye, ndayá cha atšbiajana tojanmama.

## 2

### *Chē inye ichmónēnga tmojánayana Pablo aíñe tšabá yojtsama ca*

<sup>1</sup> Jerusalenoye sēnjána orscana bnētsana canta uatēse, cachiñe choye sēnjesaná. Bernabé šonjantjēmbambá, y Tito bēndátaftaca fsēnjéftsanbetše. <sup>2</sup> Choye sēnjána, choye jama šojamnama Bēngbe Bētsá šonjaninýanýeyeca. Atše nye chē Jesucristbeñe ošbuáchiyēngbiamama uámanēnga imojamnēngaftaca sēnjanencuentá, inýengaftaca ndoñe; y chē tšabe noticiēngama chē ndoñe judiēngbeñe sēndabuayiynama chēnga sēnjanacuntá. Chca sēnjanma atše jtsetatšēmbuama, ntšamo tijanma y sēnjéftsamcá ndoñe nye bonamente yojamnama. <sup>3</sup> Pero chēnga tmonjánayana atše aíñe tšabá tijanma ca, y Tito, chē átšeftaca enjamná, masque Grecia luarocá enjamna, chēnga ndoñe chematanmandá base bobachtema chē más delicadentše tētšená chaotsemnana, ntšamo judiēnga monduamancá, Bēngbe Bētsábenga imomnana chaotsinýnama. <sup>4</sup> Chca tonjanopasá, masque inýenga monjánboše Tito base bobachtema chē más delicadentše tētšená chaotsemnana. Chēnga tmonjánayana bēngcá Jesucristbeñe ošbuáchiyēnga imojamna ca, pero ndoñe chca quemēnjatsmēna. Chēnga chē Jesucristbeñe ošbuáchiyēngaftaca tmojanenutaná, ndayá yojtsanopasánama chē ošbuáchiyēnga ntsetatšēmbcá, mo chē ošbuáchiyēngbiamama bacna soyēnga jamama cuafseitēmena cuenta. Chēnga tmojánabo jtsetatšēmbuama ntšamo Jesucristo bēnga atsebácanēnga šojánabiamama, chē judiēngbe leyēngaca ndēmandánēnga, cháftaca cánýiñe mo canýacá jtsemnēse. Chēnga chca tmojanma, er chēnga imojtsanboše jamana, bēnga chē judiēngbe leyēngaca nyets tempo mandánēnga chamotsiyenama. <sup>5</sup> Pero bēnga ndocna ora fchiyátanayana aíñe ca chē ntšamo chēnga monjánichamo bēnga šojánamna jamama soyēngama, er bēnga becá fsēnjánboše tšēngaftanga nyets tempo Jesucristbe ndegombre tšabe noticiēnga chašmotsóbomñama.

<sup>6</sup> Pero chē ndēmuanýengbiamama entšanga monjánichamo chē uánatsanēnga imojamna ca (ndayá chēnga tempo imojamna atšbiamama ndoñe quenatámana; Bēngbe Bētsabiamama nyetscanga cachcá monduámana), chēngna tondaye chešmatanbuayená, ntšamo tempo tijanmama inýetšá chaimama. <sup>7</sup> Masna, chēnga tmonjántatšēmbona, Bēngbe Bētsá chē tšabe noticiēnga ndoñe judiēnga jábuayenama trabajo atše jamama šojanēntšabuáchema,

ntšamo judiënga jábuayenama cachcá Pédrëbioye tbojanëntšabuachecá. <sup>8</sup> Er Bëngbe Bëtsá atše chabe ichmoná šonjánbema, ndoñe judiënga chabiamá jábuayenama, ntšamo cachá Pédrëbioye chabe ichmoná tbojanbemcá, judiënga chabiamá jábuayenama.

<sup>9</sup> Santiago, Pedro y Juan, chë ošbuachiyënguentsá uánatsanënga, atše canye bëts trabajo chaitsebomnana Bëngbe Bëtsá tojanmama tmonjántatsëmbona ora, cucuatše šontanatsataye atše y Bernabëbioye, jinÿinÿiyama chënga šojanëbuajama mo cachëngbe trabajo amatcá. Y fsënjanenoyeuná bëndata jama, masna ndoñe judiënga jtsabuayiy-nayama trabajo jamama, y chëngna judiëngbeñe. <sup>10</sup> Chënga nÿe šonjanaimpádaye chë ošbuáchiyënga ndbomnjëmënga Jerusaleñoquëngbiama jtsenójuabnayama; y atše bëtscá séntsama chënga jujabuáchama.

*Pablo Antioquioca Pédrëbiamá tojánayana cha ndoñe tšabá tojanma ca*

<sup>11</sup> Pero Pedro Antioquiá bëtš puebloye tonjánabo ora, chabe delante sënjánayana cha ndoñe tšabá tonjanma ca, er ntšamo enjanamcá ndoñe tšabá quenjatsmëna. <sup>12</sup> Mëntsá tonjanopasá: Santiago básefta entsanga Antioquiöye tojanichmó, pero chënga cabá choca ndáshjajna ora, Pedro yojanamana chë ndoñe judiënga ošbuáchiyëngaftaca jt-sesayana. Pero chë entsanga tmojánashjajnantsana, Pedro tojtsanajbaná chëngaftaca sayana y encuéntayana. Cha chca tojanma, ntšamo chë ndoñe judiënga ošbuáchiyënga, chë base bobachtema chë más delicadentše tëtšenënga jtsemnana yojánamna ca tmojánayanënga, chabiamá muanjájuaboyama yojtsauatja causa. <sup>13</sup> Chë inÿe judiënga ošbuachiyëngnaca tmojanontsé amana cachcá ntšamo Pedro yojtsamcá, jtsamëse ntšamo chënga imojántatsëmbo chca jamama ndoñe yonjanamncá. Y Bernabënaca, ntšamo chënga imojtsamcá jtsönÿayëse, chëngcá yojtsama, jtsamëse ntšamo cha yojántatsëmbo chca jamama ndoñe ibonjamncá. <sup>14</sup> Chënga ndoñe quemënjátaniyena jtsamëse ntšamo yojanamncá, ntšamo chë Jesucristbe tšabe noticiënguentsá ndegombre soyënga endmëncá. Chca sënjaninÿe ora, Pédrëbioye nÿetsca ošbuáchiyëngbe delante sënjanianyana: “Aca canye judío, mo ndoñe judío bendmëncá cojtsiyena, y ndoñe ntšamo chë judiënga jamama monduamancá; chcasna, ¿ntšamo catjobenaye jamana chë ndoñe judiënga ošbuáchiyënga mo chë judiëngcá chamotsiyenama ca?”

*Bëngbe Bëtsá judiënga y ndoñe judiënga játsebacana, Jesucristbeñe tmojtsošbuáchema*

<sup>15</sup> Bënga judiënga fsëndmëna, bëngbe bëtšetsanga judiënga monjámnayeca, y ntšamo judiënga chë ndoñe judiëngbioye mondubobuatmcá, chë “bacna soye amënga ca”, ndoñe queftsátsmëna. <sup>16</sup> Y bënga mondëtatšëmbo, canye entsá Jesucristbeñe tojtsošbuáchema, Bëngbe Bëtsá jamana cha chabe bominiÿiñe tšabia chaotsemnana, y Bëngbe Bëtsá ndoñe chca ntjamana, ntšamo chë judiëngbe leyënguiñe jamama yomna ca iuayancá chë entsá tojamama. Y bëngnaca Jesucristbeñe imojtsošbuaché, Bëngbe Bëtsá chaomama bënga chabe bominiÿiñe tšábenga chamotsemnana, pero ndoñe ntšamo chë judiëngbe leyënguiñe jamama yomna ca iuayancá bënga tmojamama. Er Bëngbe Bëtsá ndocna ora ntjamana canye entsá chabe bominiÿiñe tšabia chaotsemnana, ntšamo chë judiëngbe leyënguiñe iuayancá jamama ibomna ca cha tojamama.

<sup>17</sup> Pero, bënga bëtscá mondënguá, Bëngbe Bëtsá chaomama bënga chabe bominiÿiñe tšábenga chamotsemnana, bënga Crístoftaca cánÿiñe mo canÿacá jtsemnëse, chábeñe imošbuáchema. Chca mondošbuaché, bënga chë bacna soyëngama perdonánënga chamotsemnana. Pero inÿe entsanga jtsichámuana bënga bacna soyënga amënga imomna ca, ntšamo chë Moisesbe leyinÿe iuayancá ndoñe montsama causa. ¿Y chca, Cristo bacna soye amënga šuabiamná ca nántsayana? ¡Ndoñe, ndegombre ndoñe!

<sup>18</sup> Atše, ntšamo Bëngbe Bëtsá šojaninÿinÿecá, chë šojtsemna jájbanama soyënga, cachiñe jajuaboyama y jamama stëtontšese, mo chë Moisesbe ley jtsocumplínana perdonánënga jtsemnana, atše stsemna mo nda ndayá cachá tojtsendbema y cachiñe tojtëtsjebuanacá; y ndegombre, atše stsemna canÿa ntšamo ndoñe tšabá yondmëncá amá. <sup>19</sup> Chë judiëngbe

leyëngaca atše sëndétatsëmbo, ntšamo chë leyënguiñe iuayancá stsamëse, Bëngbe Bëtsá ndoñe yochanjama atše chabe bominiñe tšabia chaitsemnana; y chca, atše jtsemnana mo obanacá chë castígoca, er chë leyentša mandënga stsamëse, ndoñe quetsátobena atsbočaná jtsemnana. Chë léyeca ndoñe más mandaná ntsemnana jtsebošëse, atše cachcá chë ley sënjanonýá, Jesucristbeñe jtsošbuáchiyama; y chca, atše chaitsobena jt-siyenana Bëngbe Bëtsá jtseeservénëse. Atše Crísoftaca cánýiñe mo canýacá sëndmënayeca, Cristo cruciñe tojanóbana ora enjamna mo átšnaca cuaftobancá; <sup>20</sup> y mora entsemna mo nýe atše ya ndoñe cuaftsiyencá, Cristo becá vida atšbe ainaniñe entsebómnyeyeca. Y ntšamo mora atše vida sëntsebomncá, entsemna atše chë Bëngbe Bëtsabe Uaquiñábeñe betsošbuáchiyama, nda šojánbobonshana, y chabe derecho vida jtsošbomñama cachcá tojanonýá y atšbe tšabiamana tojanóbana. <sup>21</sup> Atše ndoñe quetsatábotena ntšamo Bëngbe Bëtsá entsangbe tšabiamana juabna yobomncá. Nderado Bëngbe Bëtsá tojama canýe entšá chabe bominiñe tšabia chaotsemnana, ntšamo chë leyiñe jamama yomna ca iuayancá cha tojtsamama, as Cristo nýe tondayama matëñjanóbana.

### 3

#### *Ley jtsošbedecénëse o Jesucristbeñe jtsošbuáchiyëse*

<sup>1</sup> ¡Tšëngaftanga Galacientša entsanga, yapa ndenójuabnayënga! Entsemna mo nda tcmojtsabocjuanacá, tšëngaftangbe juabna tojtsetrocá. Ndoñe quešnátësertana ntšamo chca nanjopása, er cach atše botamana cbonjanabuayiyná, Jesucristo cruciñe tojanóbana. <sup>2</sup> Atše sëntseboše nýe canýe soye atše chašmëyana: ¿Uámana Espíritu tšëngaftangbe ainaniñe tojánamashëngo jtsemándayama, tšëngaftanga ntšamo chë leyiñe jamama yomna ca iuayancá šmojamama, o tšëngaftanga chë tšabe noticiënga šmojanuena y chiñe šmojtsošbuáchema? <sup>3</sup> ¿Ndáyeca tša ndenójuabnayënga šmomna? Bëngbe Bëtsabe Espíritbeyeca tšëngaftanga šmonjanontsé mo tsmëma entsangcá jtsemnana. ¿Y mora šmojtseboše tšëngaftangbe vidënga jachnënguama nýe entsangbe juabnëngaca jtseyenëse? <sup>4</sup> ¿Nýetsca soyënga ndayëjana tšëngaftanga šmojachnëjna, tondayama tonjoservé? Ndegombre chca ndoñe taiuatsmëna. <sup>5</sup> Bëngbe Bëtsá, chë Uámana Espíritu tšëngaftangbe ainaniñe cháumashënguama tojanma ora, y tšëngaftangbeñe bëtš soyënga chaopasama tojama ora, ¿ndáyeca chca nanjama? ¿Tšëngaftanga ntšamo chë leyiñe jamama yomna ca iuayancá šmojtsamama, o tšëngaftanga Jesucristbe tšabe noticiënga šmojanuena y chiñe šmojtsošbuáchema?

<sup>6</sup> Menójuabonga ntšamo Abraham tojanpasama. Bëngbe Bëtsabe uabemana palabrënguiñe mëntšá endayana: “Cha Bëngbe Bëtsábeñe yojtsošbuáchiye, y chíyeca Bëngbe Bëtsá tonjánayana cha chabe bominiñe tšabia yojamna ca.” <sup>7</sup> Chíyeca tšëngaftanga cmontsamna jtsetatsëmbuana, Bëngbe Bëtsábeñe ošbuáchiyënga mondmëna mo Abrahám bentshana entsangcá, cachcá ošbuáchiyana bëtsebomnana, chë chá bentshana ndegombre entsangbiamana más. <sup>8</sup> Bëngbe Bëtsabe uabemana palabrënguiñe endopodena jualíama, Bëngbe Bëtsá yochjanma chë ndoñe judiënga chabe bominiñe tšábenga chamotsemnana, chábeñe tmojtsošbuáchema ca. Y Bëngbe Bëtsabe uabemana palabrënguiñe, cabá chca ndëma ora, Bëngbe Bëtsá Abrahám biyey quem tšabe noticiënga tbojanbuayená: “Acbeyeca, atše chanjama nýetsca quem luarentša entsanga tšabe bendicionënga chamotsebomnana ca.” <sup>9</sup> Bëngbe Bëtsá tojanma Abraham ba tšabe bendicionënga chaotsebomnana, cha chábeñe yojtsošbuáchema. Chca, Bëngbe Bëtsá, chábeñe ošbuachiyëngbiámna ba tšabe soyënga jamana, cachcá ntšamo Abraham biamana tšabe soyënga tojanmcá.

<sup>10</sup> Chë Bëngbe Bëtsá chabe bominiñe tšábenga yochjábiamana ca juabnayënga, ntšamo leyiñe jamama yomna ca iuayancá lempe tmojtsošbedecénama, chënga nýets tempo jtseyenana jtsetatsëmbëse Bëngbe Bëtsá nýetsca tescama chënga yochjácastigayama. Er Bëngbe Bëtsabe uabemana palabrënguiñe mëntšá endayana: “Bëngbe Bëtsá jayanana nýetsca



tescama castigo chaotsebomna ca, nda nyets tempo ndoñe tontsama nyetsca mandënga ntšamo chë leyënguine iuabemancá ca.” <sup>11</sup> Ndegombre, puerte tšabá entsinÿinÿena, Bëngbe Bëtsá ndoñe yochanjama ndocná chabe bominyiñe tšabia chaotsemnama, ntšamo chë leyiñe jamama ibomna ca iuayancá tojtsobedecénëse. Chca ndegombre endmëna, er Bëngbe Bëtsabe uabemana palabrënguine mëntšá endayana: “Nyë ndabiama Bëngbe Bëtsá tojama chabe bominyiñe tšabia chaotsemnama, cha Bëngbe Bëtsábeñe betsošbuáchema, cha ndegombre chë nyetsca tescama yomna tšabe vida echántsebomna ca.” <sup>12</sup> Jtsamana ntšamo chë leyënguine jamama yomna ca iuayancá, ndoñe quenátsmëna mo Bëngbe Bëtsábeñe cuaftsošbuachecá. Ntšamo Bëngbe Bëtsabe uabemana palabrënguine endayancá: “Nda tojtsama nyetsca mandënga ntšamo chë leyënguine endayancá, tšabe vida echántsebomna, nyets tempo chë leyëngaca mandaná ca.”

<sup>13</sup> Pero, Cristo jóbanama ibojamna ca tmojánayanama, y cha bëngbe causa chca chamomama chënga tojanalesénciayeyeca, Cristo tojama bënga nyetsca tescama castigánënga ndoñe chamondëtsemnama, ntšamo chë leyiñe iuayancá ndoñe tmontsama causa. Ntšamo Bëngbe Bëtsabe uabemana palabrënguine endayancá: “Nyetsca tescama castigo chaotsebomna, nda canÿe niñësiñe tmojajonÿá chaóbanama cha ca.” <sup>14</sup> Chca tojopasá, Bëngbe Bëtsá chaomama, chë tšabe bendicionënga ntšamo cha Abrahámbioye tbojanšbuachenacá, ndoñe judiëngnaca chamotsebomnama, Cristo Jesúsbeyeca; y Jesucristbeñe ošbuachiyánaca, Bëngbe Bëtsá chaomama chë Uámana Espiritu bëngbe ainaniñe cháuamashënga jtsemándayama, ntšamo Bëngbe Bëtsá tojanašebuachenacá.

### *Ndocna ley quenátobena Bëngbe Bëtsabe šbuachenana soye jatrócama*

<sup>15</sup> Jesucristbeyeca catšátanga, chë ndayá sentsichamcá endmëna ntšamo nyets tempo entšangbeñe endbetsopasancá. Uta entšata tbojenoyeuná canÿe trato jënbemama, y ntšamo tbojenšbuachenacá chaotsinÿinama chatbe uabaina tsbuanáchañe tbojuábemëse, ndocná inÿa más ntsobenana jayanana ntšamo tbojentratacá ndoñe yontsoservena ca; y inÿe soyënga chiñe jacjayama cach ndoñe. <sup>16</sup> Chcasna, Bëngbe Bëtsá ba soye Abrahámbioye tbojanšbuachená puerte tšabe bendicionënga chabiamama, y chabe entšanguentšana canÿabiámnaca. Y Bëngbe Bëtsabe uabemana palabrënguine ndoñe quenátayana: “chabe entšanguentšëngbiámnaca ca”, mo Bëngbe Bëtsá ba entšangbiamama cuafstichamcá; sinó mëntšá endayana: “acbe entšanguentšana cánÿabiamama ca”. Y chca entsayana, nyë canÿe entšá ca; y cha endmëna Cristo. <sup>17</sup> Atše ndayá mëntšá cbontsëtsëtsná: Natsana, Bëngbe Bëtsá Abrahánoftaca canÿe trato tojábemama, y tbojaniyana “aíñe ca”, ntšamo tbojanšbuachenacá jamama. Chentšana canta patse y unga bnëtsana uatëse, Bëngbe Bëtsá Moisesbe cucuatšinë chë leyënga tbojanántšaboshjona; chíyeca, chë leyënga ndoñe ntsobenana jamana chë Bëngbe Bëtsá Abrahánoftaca tojábemama trato ndoñe chaondëtsoservénama, ni jamana ndayá Bëngbe Bëtsá tojanšbuachenacá ndoñe chaondëtsoservénama. <sup>18</sup> Er ndayá Bëngbe Bëtsá chabe entšanga tojatsatacá, tojtsemna chënga ntšamo chë leyiñe jamama yomna ca iuayancá tmojtsamama, chca, chë tšetana soyënga ya ndoñe nantsóbocana ndayá Bëngbe Bëtsá jamama tojanašebuáchenantšana. Pero ba tšabe bendicionënga Abrahambiamama jamama, Bëngbe Bëtsá tbojanšbuachenáyeca, Bëngbe Bëtsá chë soyënga Abrahambiamama tojanma.

<sup>19</sup> Asna, ¿ndayama chë Moisesbe ley nantsoservena? Bëngbe Bëtsá chë leyënga tojanáboshjona, ba tšabe soyënga jamama Abrahámbioye tbojanšbuáchenantšana baytese. Bëngbe Bëtsá yojanjuabná chë ley chaoservé entšanga jinÿanÿiyama ndayá tšabá o ndoñe tšabá jamama bëtsemnama, chë Abrahábentšana Uámana Entšá jashjanguëntscuana, ndabiama Bëngbe Bëtsá Abrahámbioye tbojanšbuachená ba tšabe bendicionënga jamama. Bëngbe Bëtsá angelëngaftaca chë ley Moisesbe cucuatšinë tbojanántšaboshjona, y chë entšá Moisés enjamna chë oyebuambnayá Bëngbe Bëtsáftaca y entšangtaftaca. <sup>20</sup> Uta entšata canÿe trato jënbemama, jtseytana inÿe entšá chë uta

entšátaftaca chaóyebuambama; pero Bëngbe Bëtsá Abrahámbioye ba tšabe soyënga jamama tbojanšbuachená ora, nÿe canÿa chca tojanma, y ndoñe bonjanájaboto inÿa chabiamama Abrahánoftaca chaóyebuambama.

### *Ndayama chë ley yomna*

<sup>21</sup> ¿Chca nántsayana, ntšamo Moisesbe leyiñe iuayancá, chë Bëngbe Bëtsá tojanšbuachená soyëngama contra yomna ca? ¡Ndoñe, ndegombre ndoñe! Bëngbe Bëtsá entšangbe cucuatšíñe canÿe ley tojanáboshjona, y chë ley tojtsobena jamana entšanga ndegombre tšabe vida chamotsebomnama, as Bëngbe Bëtsá nanjama entšanga chabe bominyíñe tšábenga chamotsemnama, ntšamo chë leyiñe jamama yomna ca iuayancá tmojtsamama. <sup>22</sup> Pero Bëngbe Bëtsabe uabemana palabrënguiñe endayana, nÿetsca quem luarentša entšanga cachëngbe bacna soyënga jamama juabnëngaca mandánënga imomna ca, chca, Jesucristbeñe ošbuáchiyënga chamobenama ndayá Bëngbe Bëtsá tojašbuachenacá jóyëngacñama. Y chënga, Jesucristbeñe imojtsošbuáchema imojtsebomna ndayá Bëngbe Bëtsá tojanašebuachenacá.

<sup>23</sup> Jesucristbeñe jtsošbuáchiyama entšanga chamobenama tempo joshjanguëntscuana, bënga monjamna corente mandánënga chë léyeca, y chca enjamna mo presënga cuaftsemncá, cárceloca utámenënga. Chë ley chca enjamna, ntšamo entšanga Jesucristbeñe muanjobenaye jtsošbuáchiyama Bëngbe Bëtsá jinÿanÿiyama tempo joshjanguëntscuana.

<sup>24</sup> Cristo jabama tempo tonjanoshjanguëntscuana, chë ley bëngbiama enjamna mo canÿe pamillentša oservenacá, cha jtsamana chentša básenga chamotsamama ntšamo tšabá tojtsemncá. Chë ley chca yojamna, bënga Crístbeñe jtsošbuáchiyama chamobenama, y chca, Bëngbe Bëtsá chaoma bënga chabe bominyíñe tšábenga chamotsemnama.

<sup>25</sup> Pero Jesucristbeñe jtsošbuáchiyama bënga chamotsobenama mora ya tonjóshjangoyeca, chë ley ya ndoñe más quenátsmëna mo canÿe entšacá, ndayá tšabá yomncá bënga chamotsamama cuaftsamcá. <sup>26</sup> Cristo Jesúsbeñe šmojtsošbuáchema, nÿetsca tšëngaftanga šmojobená Bëngbe Bëtsabe básenga jtsemnama, Cristo Jesúseftaca cánÿiñe mo canÿacá jtsemnëse. <sup>27</sup> Tšëngaftanga tcmonjanëbaye, y chca, Crístoftaca cánÿiñe mo canÿacá šmontsemna. Y mora šmojobená mo cach Crístcá jtsemnama. <sup>28</sup> Chíyeca, ndayá Bëngbe Bëtsá tojamama, judiënga y ndoñe judiënga cachcanga mondmëna; nÿets tempo nÿe inÿabiama oservëngënga y chë nÿe cachëngbiama trabájayënga cachcanga, y boyabásenga y shembásengnaca. Nÿetsca tšëngaftanga mo canÿacá šmondmëna, Cristo Jesúseftaca cánÿiñe mo canÿacá jtsemnëse. <sup>29</sup> Tšëngaftanga Crístbe entšanga šmondmënayeca, šmontsemna mo Abrahámbentšana entšanga cuaftsemncá; y chca, ntšamo Bëngbe Bëtsá Abrahámbioye tbojašbuachenacá, tšëngaftanga šmochanjóyëngacñe.

## 4

<sup>1</sup> Atšnaca sëntseboše jayanama, chë uaquiñá nda yochjóyëngacñe ntšamo tbojtsotocancá, ntšamo chabe taitá jatsetayama tbojašbuachenacá, cha cabá mo canÿe basacá tojtsemnëntscuana, ndocna derecho chë soyënguiñe ntsebomnana; y chca, cha jtsemnana mo canÿa nÿets tempo nÿe inÿabiama oservenacá, masque lempe ntšamo chabe taitá tbojašbuachenacá chë uaquiñabiama tojtsemna. <sup>2</sup> Chë uaquiñá tojtsobóchantscuana, entšanga jtsemnana ndëmuanÿënga ntšamo cha tbojtsajabotcá jtsoinayana, y inÿënga jtsejuabnayana ndayá chë taitabe soyëngaca jamama, chë uaquiñá otocana soyëngaca. Y chca jtsemnana, chë taitá tojayana tempëntscuana. <sup>3</sup> Mo cachcá cuaftsemncá, bënga chë ndegombre soyëngama cabá ndosértaye ora, bëngnaca mandánënga monjamna mo nÿets tempo nÿe inÿabiama oservëngcá, quem luarentše imománda espiritëngaca.

<sup>4</sup> Pero Bëngbe Bëtsá chabe Uaquiñá quem luaroye tbojanichmó, nÿa chama tempo tojanóshjango ora; cha mo nÿetsca entšangcá, canÿe shembásabentšana tojanonÿná, y yojoyena jtsamëse ntšamo judiëngbe leyiñe jamama ibojamna ca yojanayancá jtsemnëse. <sup>5</sup> Quem luaroye chca tojánabo bënga jabátsebacama, y chamotsobenama Bëngbe

Bëtsabe basengcá jtsemnana, bënga chë tempo šonjánamna chë ley jtsobedecénana. <sup>6</sup> Y chca, tšëngaftanga ya chabe básenga šmojtsemnana jinýanýiyama, Bëngbe Bëtsá chabe Uaquiñabe Espíritu tbojanichmó, nyetscangbe ainaniñe cháumashënguama, y chë Espíritu endama bënga Bëngbe Bëtsá chamochembo, “Atšbe Taita ca”. <sup>7</sup> Mëntšá, cada ona tšëngaftanguentsá ya ndoñe quenátsmëna mo chë nyets tempo nye ínýabiama oservenëngcá, quem luarentše imománda espiriténgaca mandánënga, y aiñe Bëngbe Bëtsabe basa tojoquedá. Y chabe basa tojoquedáyeca, lempe ntšamo Bëngbe Bëtsá chabe básenga jatšatayama tojašebuachenacá cha echanjójyëngacñe.

*Pablo, Galacia luaroquëngbiama ngménaca yojtsanjuabnaye*

<sup>8</sup> Tempo, Bëngbe Bëtsá ndoñe šmonjanábuatma ora, tšëngaftanga šmojamna mo nyets tempo nye ínýabiama oservenëngcá, ndoñe ndegombre diosënga mondmëna espiriténgaca mandánënga. <sup>9</sup> Pero mora, Bëngbe Bëtsábioye šmontsábuatma ora, o tšabá jayanama, Bëngbe Bëtsá cmojtsëbuatma ora, ¿ntšámoyeca tšëngaftanga cachiñe chë quem luarentše imománda espiriténga šmojtsayaunana? Chënga ndocna obenana quemátbomna, y nduámanënga mondmëna. ¿Ndayeca tšëngaftanga šmojtseboše cachiñe jtsemnana mo chë nyets tempo nye ínýabiama oservenëngcá, chë espiriténgaca mandánënga? <sup>10</sup> Tšëngaftanga tša jtsejuabnayana diënguiñe, shinýënguiñe, canye uatentša tempënguiñe y uatënguiñe, mo uámana tempëngcá Bëngbe Bëtsá tšabá jadórama, y chama bëts fiestënga jtsebomnana. <sup>11</sup> Atše corente šontsengmena, nderado atšbe trabajo tšëngaftangbeñe tondayama tonjoservé.

<sup>12</sup> Jesucristbeyeca atšbe catsátanga, bëtscá cbontsaimpadana, šmochtsiyena jtsamëse ntšamo atše sëndamcá, er átšnaca sënjóbema ntšamo tšëngaftanga ndoñe judiënga šmondmëncá. Tšëngaftanga ndocna bacna soye atše chešatsborlá. <sup>13</sup> Tšëngaftanga šmondëtatšëmbo, atše sënjanobená chë natsana soyama tšëngaftanga chë tšabe noticiënga jábuayenama, canye šocana šonjanontšáshjango causa. <sup>14</sup> Atše canye šocana sënjanbomna causa, tšëngaftangbiama ndoñe paselo quenjatsmëna tšëngaftangbeñe atše jofjana; pero masque chca, tšëngaftanga ndoñe chešmatanaboté, ni quešmatanáboyënja; masna, tšëngaftangbeñe tšabá šmonjanofja; šmonjanofja mo canye ángel Bëngbe Bëtsabe ichmoná šmojofjá, o cach Jesucristbioycá. <sup>15</sup> Ndayá chora tšëngaftangftaca enjanopasancá, puerte oyejuayënga tcmónjánabiama. ¿Y mora ndayá tojopasá? Ndegombre, atše sëndëtatšëmbo y sëntsobena jayanama, tšëngaftanga ndaye sóynaca atšbiama mašmënjannama. Chë más uámana šmojánbomna soyënga atšbe cucuatšine mašmënjánboshjona, y nýa mo chë bominyëngnaca masmënjánenobuchjatsëca atše jatšetayama. <sup>16</sup> Y morna, ¿ntšamo ndegombre yomncá cbojtsëtsëtsnama, atšbiama šmojtsejuabná mo tšëngaftangbe uayayá cuaftsemncá ca?

<sup>17</sup> Chë ndoñe ndegombre soyënga buátëmbayënga montsinýinýná mo tšëngaftangbiama ndegombre tšabá chašmotsiyenama cuaftsebošcá, pero chca ndoñe quenátsmëna; ndayá jamama imojtsebošcá, tšëngaftangbiama ndoñe tšabá quenátsmëna. Chënga montseboše atšbe contra y atšbe buátëmbana soyëngama contra chašmotsemnana, chentšana tšëngaftanga chëngaftaca jtsemnana chašmotsebošama y chënga chašmotsababuánýeshanama. <sup>18</sup> Puerte tšabá endmëna atše y ínýënga chafstseboše tšëngaftangftaca amiguënga jtsemnana, canye tšabe soye jamama tojtsemnëse; y sempre chca chauëtsemna, tšabiama tojtsemnëse, y ndoñe nye atše chentše tšëngaftangftaca stsemna ora. <sup>19</sup> Tšëngaftanga, chë atšbiama mo atšbe basengcá šmondmëñënga, Jesucristbeñe chašmošbuáchema tcbonjanëjabuácheyeca; atše cachiñe sëntsesufrina tšëngaftangbe causa, ntšamo canye šešona jtsebomnana ora canye shembása jtseufrinancá; y atše chca chanjëftsentina, ntšamo Cristo endmëncá tšëngaftangbe vidiñe ndegombre chaojtsebínýnëntscuana. <sup>20</sup> Malaye atše, mora tšëngaftangftaca

stsemna, atše jobenayama jinŷanŷiyama, cach tšëngaftanga jáuyanëse, ntšamo ndegombre atše tšëngaftangbiana tsësëntínana. Atše tša šontsecochëngmena tšëngaftangbiana.

### *Ntšamo Agar y Sáraftaca tojanopasá*

<sup>21</sup> Canŷe soye šmochjauyana, tšëngaftanga chë Moisesbe léyeca mandánënga jtsemnama šmojtsebošënga. ¿Ntšamo chë leyiñe endayancá tacmojtsësertana? <sup>22</sup> Chiñe endayana, Abraham uta uaquiñata yojánabamna ca; cánŷana Agárbeñe, canŷa chabe shembiana nŷets tempo oservená; y chë ínŷana, cachabe shémbeñe, Sara, y mua ndocnabiana nŷets tempo oservená yonjamna. <sup>23</sup> Chë chabe shembiana nŷets tempo oservenabe šešona, tojanonŷná nŷe Abraham y Agar chca chaotsemnama tbojánbošenayeca; y cachabe shembe šešona tojanonŷná, Bëngbe Bëtsá chë soye jamama Abrahámbyoye tbojanšbuachenáyeca.

<sup>24</sup> Ntšamo Agar y Sara, y chatbe šešónataftaca tojanopasacá, bënga canŷe uámana soye šontsabuatambá. Ndayá chë uta shembásataftaca tojanopasacá, uta trato entsinŷinŷná: chë shembása Agar, chë nŷets tempo nŷe ínŷabiana oservená yojamná, entsinŷinŷná chë trato Bëngbe Bëtsá y Israeloca entsángaftaca, chë Moisésoftaca Bëngbe Bëtsá leyënga entsangbe cucuatšíñe tojanáboshjona ora. Agar básenga yojtsabamna ora, chëngnaca tmojanonŷná nŷe ínŷabiana nŷets tempo oservénënga jtsemnama, y chë tratentša leyiñe soyëngaca mandánënga jtsemnama tmojtsebošëngnaca jtsemnana mo nŷe ínŷabiana nŷets tempo oservenëngcá. <sup>25</sup> Ndayá Agáraftaca tojanopasacá entsinŷinŷná chë Sinaí batsjoca tmojánbema trato, Arabia luaroca; y chë morsca bëts pueblo Jerusalénënaca entsinŷinŷná, er chentša entsanga montsemna chë leyëngaca mandánënga. Ntšamo Agar y chabe básenga nŷe ínŷabiana nŷets tempo oservénënga monjamncá, Jerusalemntša entsángnaca cachcá chëngcá mondmëna, chë leyëngaca nŷets tempo mandánënga bëtsemnayeca. <sup>26</sup> Ndayá Sáraftaca tojanopasacá, chë nŷe cachabiana trabájaye shembása, entsinŷinŷná chë trato, chë tšabe bendicionënga Abrahambiana jamama chábyoye tbojanšbuachená ora. Chánaca entsinŷinŷná chë Bëngbe Bëtsabe bëts pueblo celoca, Jerusalén ca uabaina pueblo, er chë chentše mochjoyénananga, mora ndoñe quemuátiyena chë leyëngaca mandánënga. Chë Crístbeñe ošbuáchiyënga mondmëna chë celoca bëts pueblo Jerusalemntše joyénanama, y chca, ndegombre chënga mondmëna celocama entsanga. <sup>27</sup> Chë celoca Jerusalén endmëna chë ndegombre bëts pueblo chë Jesucrístbeñe ošbuáchiyëngbiana, y chca endmëna mo canŷe shembása šešonga ndabamná y aíñe chaotsabamnana Bëngbe Bëtsá cuafjamcá. Quem luarentša Jerusalén endmëna chë uámana luare chë léyeca mandánënga imomnëngbiana, y chca endmëna mo canŷe shembása aíñe boyaftaquëcá, er Bëngbe Bëtsabe uabemana palabrenguiñe chë shembásatbiana mëntšá endayana:

Shembása šešonga ndabamná, y ndocna te tsetšanënga ndbomná šešona jtsebomnama, moyeuá y moyó oyejuayá cojtsemnama.

Chca moma, er aca, chë shembása chabe boyabiana utšená, chë shembása boyá bomnabiana más básenga cochántsabamna ca.

<sup>28</sup> Chcasna, Jesucrístbeyeca atšbe catšátanga, ntšamo Isaac Abrahambe uaquiñá tojanobemcá, Bëngbe Bëtsá chca Abrahámbyoye tbojanšbuachenáyeca; cachcá, tšëngaftángnaca šmojobená Bëngbe Bëtsabe básenga jtsemnama, Bëngbe Bëtsá chca tojanšbuachenáyeca. <sup>29</sup> Ntšamo chë tempo tojanopasacá, chë Isaac chaosufrima Ismael tojanmcá (Ismael, Abrahambe uaquiñá Agárbeñe, chë nŷe chata chca tbojánbošenayeca onŷnaná; Isaac, chë Bëngbe Bëtsabe Espíritbeyeca onŷnaná), mórncaca cachcá entsopasana: chë ndoñe ndegombre soyënga buátëmbayënga judiënga montsama bënga chamosufrima, ntšamo Isaac chaosufrima Ismael yojanamcá. <sup>30</sup> Pero, ¿ndayá Bëngbe Bëtsabe uabemana palabrenguiñe Abrahambe básatbiana iuayana? Mëntšá endayana: “Moma, chë nŷets tempo nŷe ínŷabiana oservená y chabe basa acbe



yebnentsana chábuaisebocnama, er chë nyets tempo nye ínÿabiama oservenabe šešona ndoñe quenátobena chabe taitabe soyënga jtsebomnama. Nÿe chë propio shembe šešona aíñe, er chë shemna ndoñe nye ínÿabiama nyets tempo oservená quenátsmëna.”

<sup>31</sup> Chcasna, Jesucristbeyeca atšbe catšátanga, bënga ndoñe quemuátsmëna mo canÿa nye ínÿabiama nyets tempo oservenabe básenga cuaftsemncá, er mora ya ndoñe más quemuátsmëna chë léyeca nyets tempo mandánënga. Y aíñe montsemna mo canÿe shema ndoñe nye ínÿabiama nyets tempo oservenabe básenga cuaftsemncá, er Bëngbe Bëtsabe básenga bënga mondmëna.

## 5

### *Cristo bënga šojatsebacá*

<sup>1</sup> Cristo bënga šojatsebacá, ndoñe más mo chë nyets tempo nye ínÿabiama oservenëngcá chamondëtsiyenama, chë léyeca mandánënga. Nÿa šmochtsentsëna nyets tempo chca atsebácanënga chašmoquedama, y ndoñe šmatjaleséncia tšëngaftanga cachiñe chë léyeca mandánënga ínÿënga chácmbiamama.

<sup>2</sup> Tšabá šmochjouena. Atše Pablo cbëyana: Nderado tšëngaftanga ndoñe judiënga, šmojalesenciá ínÿënga chë tšëngaftangbe más delicadentše base bobachtema chamotëtšama, ntšamo judiënga monduamancá, asna, ndayá Cristo tšëngaftangbiama tojanmcá tondayama nantsoservena. <sup>3</sup> Ndëmuanÿe entšánaca, nda tojalesenciá ínÿënga chabe más delicadentše base bobachtema chamotëtšama, cachiñe cha šcobuayená: Mora aca cmontsemna nyetsca chë judiëngbe leyentša mandënga jtsobedecénana.

<sup>4</sup> Ndëmuanÿënga tšëngaftangbentšana šmojtsenguá, Bëngbe Bëtsabe bominyiñe tšábënga jtsemnama, ntšamo leyiñe jamama yomna ca iuayancá jtsamëse, tšëngaftanga chca šmojtsamama, šmojama Crísoftaca cánÿiñe mo canÿacá ndoñe chašmondëtsemnama; Bëngbe Bëtsábentšanënaca šmojtsoluaré, y chca, šmontsinÿanÿná tšëngaftanga ndoñe šmontseboše, Bëngbe Bëtsá tšëngaftangbe tšabiama jtsejuabnayëse, chácmatsebacana.

<sup>5</sup> Pero bënga, Bëngbe Bëtsábeñe jtsošbuáchiyëse, mondobátmana cha yochjama bënga chabe bominyiñe tšábënga nyets tempo chamotsemnama. Y bënga chca mondobátmana, Jesucristbeñe ošbuáchiyana bómnyeyeca, y chë ošbuáchiyana chë Uámana Espíritbiajana bëngbioye endobá. <sup>6</sup> Er Crísoftaca cánÿiñe mo canÿacá tmojtsemna ora, aíñe base bobachtema tëtšëngë tmojtsemna o ndoñe, tondaye ntsámanana; ndayá puerte enduámana endmëna chë Jesucristbeñe bënga mondbomna ošbuáchiyana, y chca bëtsebomnamna bënga montsinÿanÿná ínÿënga jtsababuánÿëshanëse.

<sup>7</sup> Tšëngaftanga tšabá šmonjánama, chë jtsiyenana ntšamo Bëngbe Bëtsabe ndegombre soyënga yomncá jtsamëse. Y mora, ¿nda tojama tšëngaftanga chašmotsajbanama chë Bëngbe Bëtsabe ndegombre soyënga jtsuenanama? <sup>8</sup> Ndegombre, Bëngbe Bëtsá ndoñe quenátsmëna, er cha tšëngaftanga tmojáchembo chabe entšanga chašmotsemnama.

<sup>9</sup> Ntšamo entšanga mondëntšayancá: “Nÿe base levadura jamana nyetsana chauabochama ca”; cachcá, tšëngaftanga chë judiëngbe básefta leyëngaca mandánënga jtsemnama šmojabojátšese, šmuatjábocna nyetsca leyëngaca mandánënga. <sup>10</sup> Bënga Bëngbe Utabnáftaca cánÿiñe mo canÿacá bëtsemnayeca, atše corente sëntsetatšëmbo, ntšamo atšbe juabna yomncá tšëngaftangnaca cachcá šmochtsejuabnayama; y átšnaca corente sëntsetatšëmbo Bëngbe Bëtsá puerte bochjacastíga, nda tšëngaftanga natjëmbana ainánaca ndoñe chašmondëtsiyenama tojtsamábioye, masque ndánaca cha chaotsomñe.

<sup>11</sup> Y atšbiama chanjayana, Jesucristbeyeca atšbe catšátanga, Jesucristbeñe ošbuáchiyënga base bobachtema chëngbe más delicadentše tëtšëngë chamotsemnama entšanga cabá stsabuayiynase, entšanga ya ndoñe muantsama atše chaitsesufrínama. Atše chca stsamëse, Cristo cruciñe tojanóbanama ntšamo iuayancá entšanga stsabuayiyná ora, chënga ya ndoñe átšëftaca nanjósentiaye. <sup>12</sup> Pero chë natjëmbana ainánaca ndoñe chašmondëtsiyenama imojtsamëngna, ¡malaye cachënga muanjenocbóna!

<sup>13</sup> Pero tsëngaftanga, Jesucristbeyeca atšbe catšátanga, Bëngbe Bëtsá tcmojáchembo chë judiëngbe léyeca ndëmandánënga chašmotsemnana. Pero chca bëtsemnana, mora ndoñe šmatjátsjuabnaye šmojtšobena jalesénciana, nÿe tsëngaftangbe cuerpënga tsabá chamotsemnana juabnëngaca mandánënga jatiyenama. Chamna, tsëngaftanga šmuenbobonshánayeca, nÿetscanga šmochtsenájabuachana. <sup>14</sup> Er ntšamo Moisesbe leyentša nÿetsca mandënguiñe endayancá, nÿe canÿe mandiñe lempe chca entsayana. Y chë mando endmëna: “Ndëmuá entsánaca cochtsebobonshana ntšamo cach aca cuenobobonshancá.” <sup>15</sup> Pero ínÿenga chamotsesufrínama jtsamëse tsëngaftanga šmojtšiyenëse, mo tsátjaye bayënga tmojtšenashantsná y tmojtšenobanacá, cuedado šmochtsëbomna. Ndóñese, nÿetscanga šmatjánenpochocaye.

### *Ntšamo chë Bëngbe Bëtsabe Espiritbeyeca vida jtsebomnana*

<sup>16</sup> Chiyeca cbochjáuyana: Nÿets tempo šmochtsiyena ntšamo chë Uámana Espiritu cmojtšamëndacá, y chca, tsëngaftanga ndoñe quešmochátama soyënga, nÿe cach tsëngaftanga tsabá jtsomñama juabnëngaca. <sup>17</sup> Er ndayá bënga, nÿe entsangbe juábnaca jamama mondbošcá, jtsemnana ndayá chë Uámana Espiritu bënga chamomama yobošcá contra; y ndayá chë Uámana Espiritu bënga chamomama yobošcá, jtsemnana ndayá bënga, nÿe entsangbe juábnaca jamama imobošcá contra. Chca endmënayeca, ntšamo chë Uámana Espiritu chašmomama yobošcá šmojtšamëse, ndoñe quešmátobena jamana, ndayá cach tsëngaftanga, nÿe entsangbe juábnaca jamama šmojtšbošcá. <sup>18</sup> Tsëngaftanga, ntšamo chë Uámana Espiritu cmojtšamëndacá šmojtšamëse, ndoñe quecmátamna ntšamo chë leyíñe iuayancá játamama.

<sup>19</sup> Ntšamo entsanga, nÿe entsangbe juábnaca tmojtšamcá, nÿetscanga paselo jtsonÿayana: chënga bacna soye boyabása o shembásaftaca jtsamana, nÿe chca soyëngama jésejuabnayana, y ndoñe ntšobenana cachënga jenomándama, chca soyënga jtsamëse. <sup>20</sup> Ba uabouana soyënga jtsamana, diosënga yomna ca tmojtsejuabná soyënga jadórana, jtsencjuanayana, ínÿengaftaca jtsenáyayana, nÿetscanga ndoñe cachcá chamondëtsejuabnama jtsamana, ínÿengaftaca yapa jtsenántšabošana, soyënga nÿe rábiaca jtsamana, ínÿengaftaca tša jesenaleganana, y cánÿenga ínÿengaftaca contra chamotsemnana jtsamana. <sup>21</sup> Nÿe jtsebošana ntšamo ínÿa tojatashjachcá jtsebomnana, yapa tmoyënga jtsemnana, fiestënguiñe ndoñe tsabe soyënga jtsamana, y ínÿe soyëngnaca mo chë soyëngcá jtsamana. Y mora atše cba buoyená, cach ntšamo tempo sënjanmcá: chca soyënga jtsamëse oyenënga, Bëngbe Bëtsabe amëndayoca ndoñe luare quemochátsbomna.

<sup>22</sup> Pero, Uámana Espiritu ainaniñe tojtsemánda ora, quem soyënga chentšana jóbocnana: nÿetscanga jtsababuánÿeshanana, jtsóyejuayana, natjëmbana ínÿengaftaca jtsiyenana, puerte uantado nÿetsca padecéniñe jtsemnana, nÿetscanga corente bonshanánaca jtsénÿayana, tsabe ainana jtsebomnana, y nÿetscañe tsabe palabra bomnënga jtsemnana, <sup>23</sup> jtsejuabnayana chë ínÿenga mo chabiana más uámanënga cuaftsemncá, y cachá nÿetsca soyënguiñe jenomándama jtšobenana. Y ndocna ley quenátsmëna, chca soyënga tmojtšama entsangbiana contra cháuyanama. <sup>24</sup> Jesucristbënga imomnënga tmojama, chënga chë nÿe entsangbe juabnëngaca mandánënga ndoñe ntsemnana; ya ndoñe más, chë nÿe cachënga tsabá jtsomñama bacna juabnëngaca mandánënga quemátsmëna, y chë nÿe cachëngbiana soyënga jamama bëtscá juabnëngaca cach ndoñe. <sup>25</sup> Bënga ndegombre tsabe vida chamotsebomnana Uámana Espiritu yojtšamayeca, bënga mochtsiyena jtsamëse lempe ntšamo Uámana Espiritu šojtsamëndacá. <sup>26</sup> Ndoñe šmattsenábotamnaye, uámanënga jatenobiamnayëse, ndoñe soyënga mattsama ínÿenga bëngaftaca chaoséntiayama, y ndoñe nÿe mochtjátsboše ntšamo ínÿa tojatashjachcá jatsbomnana.

## 6

*Nyetscanga smochtsenájabuachana*

<sup>1</sup> Jesucristbeyeca atšbe catšátanga, nderado ndánaca bacna soye tojamama šmojinýe, tsëngaftangbentše ntšamo chë Bëngbe Bëtsabe Espíritu tojtsemandacá tmojtsamënga cmontsamna cha juajabuáchana, chë ndoñe tšabe soye amana chaotsajbanama; pero chca smochjama becá bonshanánaca jtsonýayëse. Cuedado smochtsebomna, er ndoñese, tsëngaftángnaca cmatjócochëngo cachcá soye jamama. <sup>2</sup> Chë soyënguiñe chašmojtsepadecena ora, smochtsenájabuachana, mo chë uauta uasmanëshangá šmojtsëyambá ora, juyambama šmojtsenajabuachancá. Y chca chašmojtsama ora, ntšamo Cristo tojanmandacá smochantsocumplina.

<sup>3</sup> Nderado nda tojtsejuabná, cha canýe uámana entšá yomna ca, pero ndoñe chca cha tondmënëse, cachá jtseñoíngñayana. <sup>4</sup> Cada ona chauenojuabó, ntšamo tojamcá tšabá o ndoñe tšabá bëtsemnama. Ntšamo tojamcá tšabá tojtsemnëse, chca tojamama oyejuayá chaotsemna; pero cha ndoñe quebnátsmëna jayanana ntšamo tojamcá tšabá yojtsemna ca, chë ndayá ínýenga tmojamama más tšabá yojtsemna ca jatichámëse. <sup>5</sup> Er cada ona bontsemna jtseñojuabnayana, jtsetatšëmbuama ntšamo tojamcá tšabá o ndoñe tšabá bëtsemnama.

<sup>6</sup> Nda Bëngbe Bëtsabe soyëngama tojtsatsjendá, cha bontsemna chabe buatëmbayáftaca nyetsca tšabe soyënga jenájatayana.

<sup>7</sup> Ndoñe matenoíngñana; ndoñe smattsejuabnaye tsëngaftanga smojtsobena ntšamo Bëngbe Bëtsá tojamandacá ndoñe ntjamana, castigo ntjoyëngacñëcá, er ndocná quenátobena Bëngbe Bëtsá jaíngñana. Ntšamo entšanga mondëntšayancá: “Ndayá tcojajé y cachcá josháchiñana ca.” <sup>8</sup> Mo nda ndoñe tšabe fshantsiñe tojajecá, tšabe shajuana ndoñe ntjoshachiñana, cachcá, nda tojtsiyena nýe cachá tšabá jtsomñama bacna juabnëngaca, cha echanjábocna jabuache castiganá nyetsca tescama. Pero mo nda uaba fshantsiñe tojajecá, tšabe shajuana josháchiñana, cachcá nda tojtsiyena ntšamo chë Uámana Espíritu tojtsemandacá jtsamëse, chë nyetsca tescama yomna tšabe vida echántsebomna. <sup>9</sup> Chcasna, ndoñe chašondëmantšé tšabe soye jtsamama; er masque šojtsëmantšnasna, pero chë tšabe soyënga jtsamama ndoñe tmonjajbanase, canýe bëtse te echanjóshjango, bënga bëtscá tšabe soyënga josháchiñama, mo tša tšabe shajuanënga tmojashaquëcá. <sup>10</sup> Chíyeca, tmojtsobena ora, nyetscangbiana tšabe soyënga mochjama, pero masna chë Jesucristbeñe ošbuáchiyana bómnyeyeca, bëngcá Bëngbe Bëtsabe básenga imomnëngbiana.

*Quem tsbuanácha juapochócama cach Pablo tojanábema*

<sup>11</sup> ¡Smochjinýe, tša bëtse letrëngaca cach atšbe cucuátseca mora cbontsëbuabiarná!

<sup>12</sup> Ndëmuanýenga imojtseboše, tsëngaftanga chë ndoñe judiënga jamëndama tsëngaftangbe más delicadentše base bobachtema tëtšenënga chašmotsemnama, ntšamo judiënga monduamancá, chënga chca jtsamana nýe chë judiëngaftaca tšabá joquédama. Y chca jtsamëndayana, chënga chamosufrima ínýenga chamotsamama ndoñe mondbóseyeca; er judiënga muanjama chënga chamosufrima, Cristo cruzoca jóbanana entšangbiana puerte iuámana ca chënga tmojtsabuayiyase. <sup>13</sup> Pero ni mo chë más delicadentše base bobachtema tëtšenënga imomnënga, ndoñe quemátama lempe ntšamo chë leyiñe iuayancá. Pero chënga jtsebošana tsëngaftanga chca tëtšenënga chašmotsemna, chënga jtseñabotamnayama jobenayama, ínýenga base bobachtema chacmatëtšama tsëngaftanga smojalesenciama. <sup>14</sup> Atšeftacna ndocna te chca chaondopasá. Atše nyets tempo y becá chanjéftsóyebuambnaye ndayá atšbiana Bëngbe Utabná Jesucristo tojanmama, cha cruzoca tojanóbana ora; er ndayá choca tojanma sóyeca, atšbiana tondaye quenatámana ntšamo entšanga quem luarentše imojuabnacá y chëngbiana puerte iuámana; y ndayá atšbiana puerte iuámana, entšangbiana

tondaye quenatámana; y chë causa, atše chëngbiana mo obanacá sëndmëna. <sup>15</sup> Chë más delicadentše base bobachtema aíñe tëtšená o ndoñe, tondaye quenatámana. Ndayá puerte iuámana endmëna, Bëngbe Bëtsá mo tsmëma entsangcá bënga šojábiana, Uámana Espíritu bëngbe ainaniñe jtsemándayëse. <sup>16</sup> Chë quem buatëmbana sóyeca jtsamëse šmoyenëngbiana, atše, Bëngbe Bëtsá sëntseimpadana, cha chaoma tšëngaftangbe ainana natjëmbana chašmotsebomnama y becá chacmotsalastemánama; y ndoñe nýe chëngbiana chca quetsatsimpadana, ndayá nýetscanga Bëngbe Bëtsabe entsanga imomnëngbiámna.

<sup>17</sup> Y mora, nýe canýe soye cbochjáuyana: morscana ndocná chaondëtsama atše jasúfriama chašotsemnama; er atšbe cuerpiñe endëtinýna ntšamo atše tijasufri, Jesusbe oservená bëtsemnama.

<sup>18</sup> Jesucristbeyeca atšbe catšátanga, atše sëntseimpadana Bëngbe Utabná Jesucristo chaoma tšabe bendicionënga tšëngaftangbeñe chaotsemnama. Chca chaotsemna.



## Efesios

### *Jacheuayama*

<sup>1</sup> Atše Pablo, Jesucristbe ichmoná Bëngbe Bëtsá chca yobóseyeca, quem tsbuanácha sentsabiamná Efeso puebloca Bëngbe Bëtsabe entšanga y Cristo Jesúsbeñe ošbuáchiyënga imomnëngbiama. <sup>2</sup> Atše sëntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tsëngaftangbeñe tsabe bendicionënga chaotsemnama, y chata chaboma tsëngaftangbe ainaniñe tsabe ebionana chašmotsebmnama.

*Crísoftaca cányiñe mo canyáca jtsemnëse, bënga mochántsebmna nyetsca tsabe soyënga, ntšamo celoca yobinýncá*

<sup>3</sup> Bëngbe Bëtsá y Bëngbe Utabná Jesucristbe Taitábioye mochjëtshuaye, er bënga Crísoftaca cányiñe mo canyáca mondmënayeca, Bëngbe Bëtsá tojama bënga nyetsca tsabe soyënga chamotsebmnama, ntšamo celoca yobinýncá. <sup>4</sup> Bëngbe Bëtsá bënga šojanabacacá Crísoftaca cányiñe mo canyáca chamotsemnama, cabá quem luare cha ndama orscana, bënga chabe delante chamotsemnama chabe entšanga, bacna soyëngama perdonánënga y chabe oservénënga, y bënga ainaniñe bacna soye nd-bomnënga imomna ca cha cháuyanama. <sup>5</sup> Bëngbe Bëtsá šuababuánýeshanayeca, tempo cha tojanjuabó y tojánbošena bënga mo cachabe basengcá jábiamama, chë Jesucristo yochjanma sóyeca. <sup>6</sup> Chíyeca bënga Bëngbe Bëtsábioye sempre jtsatschuanayana, cha bëngbe tsabiamama juabna yobómnyayeca, ndayá chabe Bonshana Uaquiñáftaca bëngbe tsabiamama cha tojamama. <sup>7</sup> Bëngbe Bëtsá puerte bonshanánaca bëngbe tsabiamama bëtscá yojuabnáyeca, cha bëngbe bacna soyëngama šojtsaperdoná y šojatsebacá, er Jesús bëngbiama tojanóbana, chabe buiñe juabuáshanëse. <sup>8</sup> Bëngbe Bëtsá tojama bënga nyets osertánana y becá juabna chamotsebmnama, cha becá bonshanánaca bëngbe tsabiamama juabna yobómnyayeca, <sup>9</sup> y tojama bënga chamotsetatšëmbuama ndayá jamama cha yobošcá, ndayá cachá tempscana yojanjuabná jamama, pero entšanga chca ndoñe tonjaninýanjé. Ndayá jamama Bëngbe Bëtsá tempo yojanjuabnacá, ndayá cha tojama bënga chamotsetatšëmbuama, cachá yojanjuabná chca jamama. <sup>10</sup> Ndayá jamama Bëngbe Bëtsá yojuabnacá, lempe echanjochnëngo nýa chama tempo chaojóshjango ora, y quem Bëngbe Bëtsabe juabna endmëna jamana, lempe ntšamo cha tojamcá celoca y quem luarentše, Cristo chamotsebmna nyetsca chë soyënguiñe mo chë mandayacá.

<sup>11</sup> Bëngbe Bëtsá sempre jamana nyetsca soyënga ntšamo tojtsejuabnacá y tojtsebošcá. Y Bëngbe Bëtsá bënga šojabacacá, ntšamo cabá chca ndama ora yojanjuabnacá; chca, bënga Crísoftaca cányiñe mo canyáca jtsemnëse, bënga chamóyëngacñama ndayá Bëngbe Bëtsá chabe entšanga jatsatayama tojašebuachená, mo chëngbe otocana soycá. <sup>12</sup> Y Bëngbe Bëtsá chca tojama, bënga chë Crístbeñe natsana imojtsanošbuachenga, cha bënga šochjánatsebacama, tsabe soyënga jtsamëse chamotsiyenama, chca, chë inýe entšanga Bëngbe Bëtsabe obenanama cha chamotsatschuanama. <sup>13</sup> Y tsëngaftángnaca, chë ndegombre buayenánana šmojanuena ora, chë Bëngbe Bëtsá bënga játsebacama buayenánana, y Crístbeñe šmojsanošbuaché ora, Bëngbe Bëtsá tojanma tsëngaftanga Crísoftaca cányiñe mo canyáca chašmotsemnama y tcmojanainýnaná tsëngaftanga chabe entšanga bëtsemnama. Bëngbe Bëtsá chca tojanma, Uámana Espíritu tsëngaftangbe ainaniñe cháumashënguama tojanma ora, ntšamo tempo cha tojanašebuachenacá. <sup>14</sup> Bënga chë Uámana Espíritu bëngbe ainaniñe mondbómnyayeca, corente mondëtatšëmbo ndayá Bëngbe Bëtsá chabe entšanga tojašebuachenacá bënga mochjóyëngacñama. Uámana Espíritbeyeca bënga montsobena chca puerte tsabá jtsetatšëmbuama, chë Bëngbe Bëtsá chabe entšanga nyetsca tescama játsebacama y ntšamo tojašebuachenacá jatsatayama

tempo chaóshjanguëntscuana; y lempe ntšamo cha bēngbiana inétsamama, nyetscanga cha mochántsatschuanaye, cha bētsá y obená bétsemnama.

*Pablo Bēngbe Bētsábioye tbojanimpadá, ošbuáchiyēnga osertánana chamotsebomnama.*

<sup>15-16</sup> Chcáyeca, atšna, Bēngbe Bētsá tšēngaftangbiana stseimpadana ora, sempre cha sēndbētsatschuanaye, er atše sēnjátatšēmbona ntšamo tšēngaftanga Bēngbe Utabná Jesúsbeñe tša šmojtsošbuáchema, y ntšamo tšēngaftanga nyetsca chē Bēngbe Bētsábenga imomnēnga šmababuánjēshanama. <sup>17</sup> Bēngbe Bētsá, Bēngbe Utabná Jesucristbe Taitá, nda corente iuámama, sēntseimpadana cha chaoma Uámama Espíritu chacmējabuachama, corente osertánēnga chašmotsemnama, y chacminyānyé nda Bēngbe Bētsá yomnana, chca, más tšabá cha chašmotsábuatmama. <sup>18</sup> Atše, Bēngbe Bētsá sēntseimpadana, cha chaoma tšēngaftanga Bēngbe Bētsabe soyēnguiñe corente osertánana chašmotsebomnama, tšēngaftanga chašmotsetatšēmbuama, ndayá Bēngbe Bētsábeñe jtsošbuáchiyēse tšēngaftanga šmojtsošbuatmancá cha cmochjátšatayama. Bēngbe Bētsá tcmojáchembo chábeñe chca chašmotsobátmanama. Atše cha sēntseimpadana, chaoma tšēngaftángnaca chašmotsetatšēmbo tša bētsá y bēts soyēnga yomna ndayá chabe entšanga cha tojašebuachenacá; <sup>19</sup> y chašmotsetatšēmbo tša bēts soye y ndocna te ntjēftopochócama chabe obenana yomnana, chē ndayá bēngbe ainaniñe tšabe soyēnga yojtsama, bēnga chē Cristbeñe ošbuachiyēngbeñe. Cach quem puerte bēts obenana endmēna, <sup>20</sup> ndáyeca Bēngbe Bētsá tojanma Cristo cháuatayenama, y chabe catšbioica celoca tbojtantbema chaotsemándama. <sup>21</sup> Choca Cristo nyetsca soyēnguiñe yojtsemánda, y más bētsá obenana y mando yojtsebomna nyetsca mándayēngbiana, chē mando y obenana bomnēngbiana, y cha yomna más uamaná y bētsá nyetsca chē entšangbiana mo bētsétsangcá utabnēngbiana, chēngbe uabaina respétoca jtsichámēse. Cristo puerte bētsá endmēna lempe ntšamo quem luarentše yobínjyama y Cristo yochjésabentšana yochtsebinjyámna. <sup>22</sup> Bēngbe Bētsá tojama Cristo nyetsca soyēnguiñe chaotsemándama, y tbojanábuayana nyetsca soyēnguiñe chaotsemándama, chábeñe ošbuáchiyēngbe tšabiana. <sup>23</sup> Cha endmēna nyetsca chábeñe ošbuáchiyēngbe mandayá, y chēnga mondmēna mo cachabe cuerpo cuaftsemncá. Chēngbe ainaniñe cha endoyena y nyetsca luarēnguíñnaca, y lempe cha endēmánda.

## 2

*Atsebácanēnga mondmēna, Bēngbe Bētsá šuababuánjēshanayeca*

<sup>1</sup> Tempo tšēngaftanga Bēngbe Bētsabiana mo obanēngcá šmonjamna, er tšēngaftanga šmonjanijena, ntšamo Bēngbe Bētsá yomandacá ntsamcá, y bētsá bacna soyēnga šmojánama. <sup>2</sup> Chca, tšēngaftanga šmonjánama mo chē nye quem luarama enójuabnyēnga monduamancá, y šmonjanēyeunana Satanás, chē bacna espíritēnga obenana bomnēnga y quem luarentša tsbanánoca imomnēngbe amēndayá, chē Bēngbe Bētsábioye ndēyeunanēngbe ainaniñe yománda espíritu. <sup>3</sup> Tempo bēnga nyetscanga fsēnjaniyena ntšamo tšēngaftanga šmonjanijencá. Bēnga soyēnga fsēnjánama, nye ntšamo ftsjanbošcá nye bēngbe cuerpēngbe tšabiana, y nye ntšamo bēngbe juabna enjamncá bacna soyēnga jamama. Bēnga fsēnjaniyena soyēnga jtsamēse mo chē Bēngbe Bētsábioye nduabuatma entšanga mondbetsamcá; chē causa bēnga fsēnjanomerecena jtsebomnana chē Bēngbe Bētsabe uabouana castigo, cachcá chē Bēngbe Bētsábioye nduabuatmēngcá. <sup>4</sup> Pero Bēngbe Bētsá sempre tša lastemado entšangbiana endmēna y sempre corente bēnga šondábabuanjēshana; <sup>5</sup> y chíyeca, bēnga cabá mo obanēngcá chabiana fsēnjama ora, bacna soyēnga fsēnjánama causa, chora cha tojanma bēnga tšabe vida chamotsebomnama y Crísoftaca cánjiñe mo canyácá chamotsemnama. Bēngbe Bētsá tšēngaftangbe tšabiana juabna bómnyayeca, bacna soyēnguentšana tcmojatsebacá. <sup>6</sup> Bēnga Jesucrísoftaca cánjiñe mo canyácá bétsemnayeca, Cristo Jesús cháuatayenama Bēngbe

Bëtsá tojanma ora y celoca tbojtantbema ora, enjamna mo bëngnaca chámuatayenama Bëngbe Bëtsá cuaffjamcá y Cristo Jesúseftaca celoca cuafatbiamcá. <sup>7</sup> Chca enjamna, Bëngbe Bëtsá entsanga cháuinñanyema nyetsca joshjanguama tempënguiñe, ntšamo cha bëngbe tsabiama bëtscá juabna bëtsebomnana, cha Cristo Jesúseftaca bëngbioye tsabe juábnaca šojánanñe ora. <sup>8</sup> Er Bëngbe Bëtsá tsëngaftangbiamna tsabe juabna yojánbomnayeca, tcmojatsebacá, Jesucristbeñe šmojtsanošbuáchema; pero atsebácanënga šmondmëna, ndoñe cach tsëngaftanga ndayá šmojánmayeca, ndayá atsbocaná jtsemnana endmëna Bëngbe Bëtsabe canñe tšetana soye. <sup>9</sup> Atsebácanënga šmondmëna, ndoñe cach tsëngaftanga ndayá šmojánmayeca; chíyeca ndocná quenátobena jtšenábotamnayana atsbocaná yojtsemnana. <sup>10</sup> Bëngbe Bëtsá šojtabiamna ntšamo bënga mondmëncá, y Cristo Jesúseftaca cánñiñe mo canñacá bëtsemnayeca, Bëngbe Bëtsá mo tsmëma entsangcá cuafatsmëncá šojtabiamna, tsabe soyënga jtsamëse jtsiyenama. Y ndayá bënga tsabá mondamcá, Bëngbe Bëtsá tempo tojanprontá bënga chamotsamama.

### *Crístbeyeca tempcá tsabá Bëngbe Bëtsáftaca jtsatsmënanana*

<sup>11</sup> Tsëngaftanga ndoñe judiënga, ndëmuanyënga judiënga cmondubuatma “chë más delicadentše base bobachtema ndëtëtšenënga ca”, chëngcá uinñananënga ndoñe šmondmënama; chënga cachënga jtšenábobuatmana “chë más delicadentše base bobachtema tëtšenënga ca”, y cachëngbe cuerpënguiñe chca jtsamana. Mëntšá, tsëngaftanga chë ndoñe judiënga, <sup>12</sup> šmochjenójuaboye ntšamo tempo šmojamnama, Crístbeñe cabá ndošbuáchiye ora. Chora, tsëngaftanga Cristo ndoñe šmonjánbomna, Israeloca entsangbiamna stëtsoye šmonjanquedana, y ndoñe šmonjantátšëmbo lempe ntšamo Bëngbe Bëtsá chabe entsanga tojanašebuachenacá. Tsëngaftanga quem luarentše šmonjaniiyena ndocnábeñe ntsobatmancá y Bëngbe Bëtsá ntsabuatmcá. <sup>13</sup> Pero mora tsëngaftanga Cristo Jesúseftaca cánñiñe mo canñacá šmontsemna, chë tempo Bëngbe Bëtsá ndoñe šmonjanábuatmënga, y cha tojama chábioye chašmotsábuatmama; y chca yomna, er Jesús, chabe buiñe juabuáshanëse, tsëngaftangbiamna tojanóbana. <sup>14</sup> Cach Cristo yojtsama bënga tempcá tsabá Bëngbe Bëtsáftaca chamotsemnana. Cha tojama judiënga y ndoñe judiënga nyetscanga mo cachca entsangcá chamotsemnana, mo nda canñe tapiëse tojtsendbemcá, chë ndayëšeca canñe luarentša entsanga tmojtsenjáta, chënga enáyaye causa. <sup>15</sup> Cristo chënga mo cachca entsangcá tojábiamna, judiëngbe leyënga y mandënga ndocna obenana chamondëtsebomnana jamëse. Chca tojama, cha jóbanëse, chë útoica entsanga mo nñe canñe tsmëma entsangcá jábiamama, cháftaca cánñiñe mo canñacá jtsemnëse. Cha chca tojanma chënga nyetscanga tsabá chamotsiyenama; <sup>16</sup> y Cristo cruciñe tojanóbanayeca, cha tojanma chë útoica entsanga enáyayana chamotsajbanama, y tojanma chë útoica entsanga mo canñe entsangcá chamotsemnana, chënga tempcá tsabá Bëngbe Bëtsáftaca chamotsatsmënanana.

<sup>17</sup> Cristo quem luaroye tojánabo tsabe noticiënga jabábuayenama, tempcá tsabá Bëngbe Bëtsáftaca jtsatsmënanana. Cha quem tsabe noticiënga tojanabuayená tsëngaftanga chë ndoñe judiëngbioye, chë Bëngbe Bëtsá ndoñe šmonjanábuatmënga, y chë judiëngbioynaca, chë Bëngbe Bëtsá imojanábuatmënga. <sup>18</sup> Er chábeyeca, canñánñyënga y inñyënga montsobena chë Taitábioye jobéconana, er bënga nyetscanga cachca espíritu bëngbe ainaniñe mondbomna, chë Uámana Espíritu. <sup>19</sup> Chíyeca tsëngaftanga, Bëngbe Bëtsabe entsanguentše ndoñe quešmátsmëna mo inñe luarocana ashjajnëngcá, y ni mo cachëngbe yebnentše ndoyenëngcá, tondayama derecho ndbomnënga. Inñyëtšá endmëna; tsëngaftanga derecho šmondmëna cachcá ntšamo Bëngbe Bëtsabe entsanga mondbomncá, y Bëngbe Bëtsabe básenga šmondmëna. <sup>20</sup> Jesucristo y chabe entsanga mondmëna mo canñe jebna yebncá. Jesucristbe ichmónënga y chë Bëngbe Bëtsabe juabna oyebuambnayënga mondmëna mo chë ndëtšbënga ndayñe chë yebna tojtsëcuatjoncá; tsëngaftanga ošbuáchiyënga šmondmëna chë jebna yebnentša soyëngcá, y cach Jesucristo

mo chë más uámana luarentše uashacuana ndëtsbecá. <sup>21</sup> Quem más uámana luarentše uashacuana ndëtsbeñe, nyetsca chë bëts yebnentša soyënga jtsëcuatjonana, y tsbanánye más tmojatsjebëse, chë bëts yebnentše tsëm jebna sóynaca chiñe jtsëcuatjonana. Cachcá Cristo, mo chë más uámana luarentše uashacuana ndëtsbecá, jtsamana nyetsca chábeñe ošbuáchiyënga cháftaca cányiñe mo canyácá chamotsemnana, y ínÿengnaca cachcá chamotsemnana. Y nyetsca ošbuáchiyënga Crísoftaca cányiñe mo canyácá tmojtsemna ora, chënga jtsemnana mo Bëngbe Utabnabiana canye bëts yebna jebncá, chábioye jtsatschuanayama. <sup>22</sup> Y tšëngaftanga Efesoca ošbuachiyëngbiámnaca Cristo entsama, chë inÿe chábeñe ošbuáchiyëngaftaca mo canye entsangcá chašmotsemnana. Y chë Uámana Espíritu bëngbe ainaniñe yojtsiyënyeca, bënga nyetscanga cányiñe mondmëna, mo canye bëts yebncá ndayentše Bëngbe Bëtsá yoyena.

### 3

#### *Pablo Jesucristbe trabajo yojanbonÿena, chë ndoñe judiëngbeñe jamama*

<sup>1</sup> Chca, atše Pablo utamená sëntsemna, Cristo Jesusbiana soyënga entsanga abuyayinaye causa, tšëngaftanga chë ndoñe judiëngbe tšabiana. <sup>2</sup> Er tšëngaftanga ya cmontsamna jtsetatšëmbuama, Bëngbe Bëtsá tšëngaftangbe tšabiana juabna yobomnana; y chca, chë trabajo atše šojabonÿé, tšëngaftangbe tšabiana jamama. <sup>3</sup> Tšëngaftángnaca cmontsamna jtsetatšëmbuama ndayá Bëngbe Bëtsá šojinÿinÿé, ntšamo cha jamama tempo tojanjuabocá, pero entsanga chca ndoñe tonjaninÿanÿé, y chë soyama ya batsatema tcbonjuabiana. <sup>4</sup> Chašmojualiá ora, šmochanjátatšëmbona Cristbe soyënga šosertánana, chë tempo ndocná yonjanábuatma soyënga, <sup>5</sup> chë tempo Bëngbe Bëtsá ndocnábioye tbonjaninÿinÿé soyënga; pero mora cha tojinÿanÿé, Jesucristbe ichmónënga nÿe Bëngbe Bëtsabiana oservëngbioye y Bëngbe Bëtsabe juabna oyebuambnayëngbioye; y cha chca tojama chabe Uámana Espíritoftaca. <sup>6</sup> Ndayá tempo Bëngbe Bëtsá ndoñe tonjaninÿanÿecá mëntsá endmëna: chë ndoñe judiënga Jesucristbe tšabe noticiënguiñe chamojtsošbuaché ora, cachcá ntšamo chë judiënga ošbuáchiyënga Bëngbe Bëtsábicana mochjoshachiñcá, chëngnaca chábiocana mo otocancá chë soye mochanjóyëngacñe. Chënga mo cach judiënga ošbuachiyëngcá, Cristo mondbomna mo chëngbe mandayacá. Y chca Cristo endmëna mo bestšašcá y chënga nyetscanga mondmëna mo cachabe cuerpentša soyëngcá. Chë ndoñe judiënga ošbuáchiyënga mochanjóyëngacñe lempe ntšamo Bëngbe Bëtsá chë judiënga ošbuáchiyënga tojašebuachenacá. Chca echántsemna chë ndoñe judiëngaftaca, chënga Cristo Jesúseftaca cányiñe mo canyácá bëtsemnayeca.

<sup>7</sup> Masque ndoñe šonjanomerecena, mo ndayá cuafjatsetacá, Bëngbe Bëtsá šonjanábuayana cha jtseservënama, tšabe noticiënga entsanga jtsabuayinayëse; y cha átšeftaca chca tojanma chabe obenánaca. <sup>8</sup> Atše nyetsca chë Bëngbe Bëtsabe entsanguentše sëndmëna chë más nduamaná; pero Bëngbe Bëtsá bëts pavor šontsebema, šonjalesenciá chë Cristbe bëtscá tšabe soyënga chë ndoñe judiënga jábuayenama. Chë Cristbe soyënga tša bëtscá endmëna, y chca, quenátopodena chë soyënguentšana lempe jtsabuatmana. <sup>9</sup> Y chë trabajo šojabonÿé jamama, nyetscanga botamana jinÿama chamotsobenama ndayá Bëngbe Bëtsá yochjama, ndayá cachá, chë nyetsca soyënga tojamá, tempscana yojanjuabnacá. Mëntscoñama Bëngbe Bëtsá chë soye ndocnábioye tbonjinÿinÿé, pero mora aiñe. <sup>10</sup> Chca, Crístbeñe ošbuachiyëngbeyeca, mora chë celoca mándayënga y obenana bomnënga, chamobená juabuátmanana nyets osertánana ntšamo Bëngbe Bëtsá yobomncá. <sup>11</sup> Bëngbe Bëtsá chca tojama, ntšamo cachá yojanjuabnacá nyetsca tescama jamama, y chca cha tojama Jesucrísoftaca, Bëngbe Utabná. <sup>12</sup> Bënga Crísoftaca cányiñe mo canyácá mondmëna, y chábeñe mondošbuachéyeca, bënga montsobena Bëngbe Bëtsábioye jobéconama tondayama ntjatauajcá, y corente jtsetatšëmbëse cha ndoñe chašondubatema. <sup>13</sup> Chíyeca atše cbontsaimpadana ndoñe



chašmondëtsajbaná ainaniñe añemo bomnana, atše séntsesufrina causa, er chë tšëngaftangbe tšabiama tsësufrientšana, tšëngaftangbiama tšabe soyënga endóbocana.

### *Cristbe bonshánana*

<sup>14-15</sup> Y chca, Bëngbe Bëtsá, chë Taitá, ndábentšana nyetsca pamíllanga celoca y quem luarentše uabaina imóyëngacañe, chabe delante joshaméntsase, <sup>16</sup> séntseimpadana, chabe bëtsá uámana bomnánaca chaoma, tšëngaftanga ainaniñe obenana y bëts añemo chašmotsebomnana, chabe Espíritbeyeca, <sup>17</sup> y tšëngaftanga Crístbeñe jtsošbuáchiyëse, mua tšëngaftangbe ainaniñe chaotsiyenama. Bëngbe Bëtsánaca séntseimpadana, cha y ínÿenga nyets ainánaca jtsababuánÿeshanëse, <sup>18</sup> tšëngaftanga y nyetsca Bëngbe Bëtsabe entšágnaca tšëngaftangftaca, chašmotsobena josértama Crístbe bonshánana bëngbiama tša bëtsá yomnana. Nderado nda tojontsé chabe bonshánana jatšëmbonana mo canÿe soye cuaftsemncá, cha ndocna te nanjobenaye jtsetatšëmbuana tëntsoye ndayéntscoca yomna y nÿanëjoye ndayéntscoca, jashenoye ndayéntscõe y tsbanánoye ndayéntscõe yomna. <sup>19</sup> Atše séntseimpadana tšëngaftanga chašmobená chë bonshánana juabuátmanana (chë bonshánana puerte bëtsá endmëna causa, bënga ndocna te quemochatobenaye josértama ntšamo chë soye lempe yomnana). Pero séntseboše, tšëngaftangbe ainaniñe nÿe Bëngbe Bëtsabe soyënga chaotsemna y tšëngaftanga chašmotsiyena jtsamëse, ntšamo tšëngaftanga chašmotsamama Bëngbe Bëtsá yojuabnacá.

<sup>20</sup> Y mora, nyetscanga Bëngbe Bëtsá chamotsatschuaná. Cha obenana yobomna ntšamo bënga tmojtsojtjanañe o tmojtsejuabnama más soyënga jamama, chabe puerte bëts obenánaca; y chë obenana bëngbe ainaniñe yojtsemánda y yojtsama bënga ainaniñe sempre ošbuáchiyana chamotsebomnana. <sup>21</sup> Entšanga Bëngbe Bëtsá chamotsatschuaná nyets tempo y nyetsca tescama, ndayá Crístbeñe ošbuáchiyënga tmojtsamama y cach Cristo tojamámncá! Chca chaotsemna.

## 4

### *Uámana Espíritbeyeca bënga cánÿiñe mo canÿacá jtsemnana*

<sup>1</sup> As, atše chë cárceloye utamená, Bëngbe Utabnabiama trabájaye causa, tšëngaftanga cbontsaimpadana, ndëmuanÿenga Bëngbe Bëtsá tcmojáchembo chabe entšanga chašmotsemnana, sempre chašmotsiyena mo chë entšangcá ndëmuanÿenga Bëngbe Bëtsá cach soyama tojánachembo y chca imomerecena. <sup>2</sup> Cada ona chamotsenojuabná mo chë ínÿenga chabiama más uámanënga tmojtsemncá, y nyetscángbioye puerte bonshanánaca šmochtsobátmana, y bëtsá bonshánana jtsebomnëse šmochtsenëuantana; <sup>3</sup> sempre šmochtsejuabnaye y šmochtsentšena tšëngaftanga nyets tempo cánÿiñe mo canÿacá chašmotsemnana, nyetsca tšëngaftanga natjëmbana jtsemnëse. Y tšëngaftanga šmotsobena cánÿiñe mo canÿacá jtsemnana chë Uámana Espíritbeyeca. <sup>4</sup> Bënga Jesucristbeñe ošbuáchiyënga bëtsemnayeca mondmëna mo cach cuerpentšëngcá, chë Crístbe cuerpo, y cachca Espiritu bënga nyetscanga ainaniñe mondbomna. Bëngbe Bëtsá šojáchembo, bënga chábeñe jtsošbuáchiyëse, nyetscanga cachcá šochjátšatayama chamotsobátmanama. <sup>5</sup> Bënga nyetscanga cach Utabná mondbomna, cachca ošbuáchiyana Jesucristbeñe mondbomna, y bënga nyetscanga uabáinënga mondmëna chca betsošbuáchiyama. <sup>6</sup> Bënga ošbuáchiyënga nyetscangbiama cach Bëngbe Bëtsá y Taitá endmëna. Cha bëngbe amëndayá endmëna, chabe obenana nyetscángbeñe jtsinÿnana, y nyetsca bëngbe ainaniñe chabe Espiritu endmëna.

<sup>7</sup> Pero bënga, cada ona tšetana obenana tojóyëngacañe, tšabe soyënga jamama, ntšamo Cristo jatšatayama tojanbošencá, chábeñe ošbuáchiyënga jujabuáchama. <sup>8</sup> Chíyeca, Bëngbe Bëtsabe uabemana palabrenguiñe Jesucristbiama mëntšá endayana:

Cha celoye tontantsjuá, y cháftaca tonjanéyamba nyetsca chabe uayayënga, chë tojánayënjanga,  
y chabe entšángbioye obenana tonjanatsatá, tšabe soyënga jamama ca.

<sup>9</sup> ¿Y ndayá yojsayana chë “cha tontantsjuá ca”? Chca entsayana co Cristo natsana, quem luaroye tojánastjango ca. <sup>10</sup> Y Cristo, chë tojanastjanguá, cachá endmëna nda celoca chë más tsbanánoye tojtantsjuá; chca, canye ora nyetscañe cha chaotsemnama. <sup>11</sup> Y cachá, chë tšabe soyënga jamama obenana tojanatsatá ora, tojanma chábeñe ošbuáchiyënguentše chamotsemna ínÿengna chabe ichmónënga, ínÿengna Bëngbe Bëtsabe juabna oyebuambnayënga, ínÿengna tšabe noticiënga Cristbiana abuayiyayënga, y ínÿengna ošbuáchiyënga anÿenënga y Bëngbe Bëtsabe soyëngama abuátambayënga. <sup>12</sup> Cristo tojanabacacangna chabe entšángbioye mochjanëjabuache, cha tojanabanyé trabajo chënga chamotsamama, y nyetsca ošbuáchiyënga, chë nyetscanga cánÿiñe mondmëna mo Cristbe cuerpcá, cada te más ošbuáchiyana y bonshánana chamotsebomnama, <sup>13</sup> bënga nyetscanga chamobenantscuana cachca ošbuáchiyana Jesucristbeñe jtsebomnama, y Bëngbe Bëtsabe Uaquiñabiana nyetscanga lempe cachcá jtsetatšëmbuama. Chca, bënga mochanjashjache jtsemnama lempe ntšamo Cristo yomncá, mo bëtsétsanga bëtscá juabna bomnëngcá, <sup>14</sup> y ndoñe nye mo basengcá, Bëngbe Bëtsabe soyëngama jtsetatšëmbuama. Chë soyënguiñe ya ndoñe más nye mo basengcá quemochátsmëna, ndëmuanyënga paselo jáingñama yomna. Mo canye barquësha nye ndaye bínÿiacnaca tojtsëyambancá, básefta entšanga nye ndaye buatëmbana soye tmojatucá jatsyeunanana; bënga ndoñe chca quemochátsmëna, ya ndoñe más bëngbe juabna quemochatstróca, nye ndaye tmojatucana tsëm sóyeca, ínÿengbioye áingñayënga. Chënga becá montsetatšëmbo ntšamo entšanga jáingñana, y montseboše chë montsabatambá bostero soyënga bënga jtseyeunanama. <sup>15</sup> Chamna, chë Bëngbe Bëtsabe ndegombre soyëngama bonshanánaca jtsóyebuambnayëse, šontsamna jashjáchana jtsemnama lempe ntšamo Cristo yomncá. Cha bëngbe amëndayá endmëna, cachcá ntšamo bestšaše chë cuerpentša soyënga jtsemandayancá. <sup>16</sup> Mo canye bestšašcá, chëse jamana nyetsca chë cuerpentša soyënga ndayentše chamueneñjama y chiñe jobónjuama chamotsobenama, chë cuerpo saná chaotsebomnama jtsamëse, chca, nyets cuerpo tšabá chaóbochema, cachcá Cristo, chë nyetsca ošbuáchiyëngbe amëndayá, chabe obenánaca jamana chënga cada te más ošbuáchiyana y bonshánana chamotsebomnama. Cada cuerpentša soye tojtsama ntšamo chë soye chaotsamama tomncá, as nyets cuerpo tšabá jobóchana; cachcá, ošbuáchiyënguentše cada ona tojtsama ntšamo jamama tbojtsemncá, as nyetsca ošbuáchiyënga cada te más ošbuáchiyana mochántsebomna, puerte jtsenbobonshánëse.

*Crístoftaca cánÿiñe mo canÿacá jtsemnëse tsëm vida šmochtsebomna*

<sup>17</sup> Mëntsá entsemna ntšamo cbontsëtsëtsnacá, y Bëngbe Utabná endmëna nda tojama atše mando chaitsebomnama tšëngaftanga chca jáuyanama: Ndoñe más šmattsiyena bacna soyënga jtsamëse, mo chë Bëngbe Bëtsábioye nduabuátmënga mondbetsamcá; chënga jtsiyenana jtsamëse ntšamo cachëngbe ndoservena juabnënga tojtsamëndacá. <sup>18</sup> Chëngbe juabnoca obenana mondbomna nye ndoñe ndegombre soyëngama josértama. Chënga ndoñe quemátsbomna chë Bëngbe Bëtsábioyana yóbocana tšabe vida, er chënga ndoñe quemátslesëncia chë Bëngbe Bëtsabe soyënga chëngbe ainaniñe chaómashënguama; y chca endmëna, er chënga tmojajuabó y tmojama chë Bëngbe Bëtsabe buayenana soye chëngbe ainaniñe tondaye chaondómashënguama. <sup>19</sup> Chënga bacna soyënga tmojtsama ora, tondayama ntsenócochinÿenana; chënga nyets tempo jesentsénana nyetsca bacna soyënga amana, y chca jtsamana tondayama ntjatenojuabnycá.

<sup>20</sup> Pero chca ndoñe quenjatsmëna ntšamo tšëngaftanga Cristbe soyëngama šmojanatsjinÿe y ntšamo chábioye šmojanabuatmancá. <sup>21</sup> Ndegombre tšëngaftanga chabiana šmojanuena y ínÿengna tmojanabuatambá mo chábeñe ošbuachiyëngcá

y ntšamo chë ndegombre soyënga Jesucristbeñe endbinýncá. <sup>22</sup> Chcasna, ntšamo tšëngaftanga šmojanjuabná, šmojansentina y šmojanamcá Jesucristbeñe cabá ndošbuachená ora, mora lempe stëtsoye šmochjaquéda; ntšamo tempo tšëngaftanga šmojanjuabná, šmojansentina y šmojanamcá, canýe ondbiamnaye juabnentšana yojóbocana, tšëngaftanga bacna soyëngama juabnëngaca mandánënga jtsemnëse, y chë juabnënga tšëngaftangbioye cmojánaingñaye. <sup>23</sup> Tšëngaftanga cmontsamna tšëngaftangbe juabniñe tsëm y tšabe juabnënga jtsebmomnana. <sup>24</sup> Tšëngaftanga cmontsamna jashjáchana mo tsmëma entšangcá jtsemnama, y chë ntšamo tempo šmojanamcá mora ndoñe cachcá chašmondétsamama. Chca, tšëngaftanga šmochanjashjache jtsemnama ntšamo Bëngbe Bëtsá yomncá. Bëngbe Bëtsá chca tsmëma entšangcá tcmojábiamna, tšëngaftanga chašmotsiyenama jtsamëse Bëngbe Bëtsabe bominiñe tšabá yomna soyënga y chábioye jadórana soyënga, chë ndegombre soyënguentšana óbocana soyënga.

<sup>25</sup> Chcasna, ya ndoñe más šmattsebostero, ndayá cada ona cháuyayana ndegombre soyënga cachacá Jesucristbeñe ošbuachiyáftaca, er nyetscanga cánýiñe mondmëna mo nýe canýe entšangcá. <sup>26</sup> Nderado chacmojetëna, tcmojetëna causa ndaye bacna soye ndoñe šmatjama. Pero ndoñe šmatjaleséncia bënama chacmetëna y ndoñe nyets te chacmondetëna. <sup>27</sup> Ndoñe šmatjaleséncia Satanás ndayánaca tšëngaftangaftaca chaomama.

<sup>28</sup> Chë yojanatbëbaná chauajbaná atbëbanama y jatrabájama chaontsé; cachabe cucuátseca tšabe trabajo chaotsóboma, chca, ndayánaca cha chaotsebmomnama chë ujabótënga jatsatayama.

<sup>29</sup> Bacna palabrënga ndoñe šmattsichamo, pero aíñe tšabe palabrënga y nýa chorsca ujabótama palabrënga, chë inýe entšangbioye jujabuáchama más Cristcá chamotsemnama, chënga Bëngbe Bëtsábiocana tšabe bendicionënga chamóyëngacñama, chë ndayá chašmojtsëtsësná sóyeca. <sup>30</sup> Ndoñe šmattsama soyënga, Bëngbe Bëtsabe Uámana Espiritu chabongmema. Bëngbe Bëtsá tojama Uámana Espiritu tšëngaftangbe ainaniñe cháumashënguama, y chca, tcmojanainýnaná chabe entšanga bëtsemnayeca, chë yochjóshjango tescama, Bëngbe Bëtsá chabe entšanga nyetsca tescama yochjatsebacaye orscama.

<sup>31</sup> Inýengbiamna bacna juabnënga ainaniñe ndoñe chašmondëtsebmomna, etonánënga ndoñe chašmondëtsemna, ni inýengaftaca ndoñe chacmondetëna. Inýengbioye ndoñe chašmondétsabuachembuana, inýengbioye ndoñe šmatjoyánguango y ndaye bacna sóynaca ndoñe šmattsama. <sup>32</sup> Nyetscángaftaca tšábënga šmochtsemna, nyetscanga šmochtsenlastemana y šmochjenperdóna, ntšamo Bëngbe Bëtsá, Cristbeyeca tcmojaperdonacá.

## 5

### *Ntšamo yomna Bëngbe Bëtsabe básënga chamotsiyenama*

<sup>1</sup> Tšëngaftanga, Bëngbe Bëtsabe bonshana básënga quetsomñecá, nýa šmochtsentšëna cachacá jtsemnama. <sup>2</sup> Smochtsiyëna nyetsca soyënga bonshanánaca jtsamëse, ntšamo Cristo šojanababuanýeshancá; chca, cha chabe derecho vida jtsobomñama cachcá tojanonýa y bëngbiamna tojanóbana. Y ntšamo Cristo tojanmca, yojamna Bëngbe Bëtsábioye jëtschuayama, y chabe bominiñe tša tšabá yojtsemna, mo ndaye ora Bëngbe Bëtsá oyejuayá jóyëngacñana ndayá tcojóbana y altaroca tcojajuinýese, y chë soye botamana jtsonguëtsiyana.

<sup>3</sup> Tšëngaftanga, Bëngbe Bëtsábënga šmommnënga, ndoñe quecmátamna shembása o boyabásaftaca bacna soyënga jtsamana, ni chca játamama jtsejuabnayanana y jtsebošana, y chë nýe yapa jésebošana más soyënga inýengbiamna jtsebmomnama cach ndoñe. Ni chë soyëngama ndoñe šmattsóyebuambnaye. <sup>4</sup> Bacna soye ndoñe šmattsóyebuambnaye, ni corente ntjenojuaboýcá, ni nýe ntšámncana bacna soye jenbotatšëmbonana cach ndoñe, er chë soyënga tšëngaftangbiamna ndoñe tšabá ntsemnana. Chca játamamna, más tšabá,

Bëngbe Bëtsá šmochtsatschuanaye. <sup>5</sup> Er tšëngaftanga ya šmondétatšëmbo, ndocna chë shembása o boyabásaftaca bacna soye amá, ndocna chë nÿe chabe bacna juabnëngaca soyënga jtsamama oyená, o chë nÿe más soyënga ínÿengbiamá jtsebomnama bošá y amá (chca jtsayanana chabiamá más iuámana soyënga jtsebomnana, Bëngbe Bëtsábioye jatsbobonshánama), chca amënguentsána ndocná tondaye queochatóyëngacñe ndayá Bëngbe Bëtsá chabe entšángbioye jatšatayama tojašebuachenantšana, Cristo y Bëngbe Bëtsabe amëndayoca. <sup>6</sup> Ndocná chacmondaingñé ndoñe ndegombre tondmëna palabréngaca, bacna soyënga chašmotsamama, er chë causa chë uabouana castigo echanjobaye, ndáyeca Bëngbe Bëtsá chábioye ndëyeunanënga yochjácastigaye. <sup>7</sup> Chíyeca, chca amëngbe soyënga tondaye šmattsama.

<sup>8</sup> Tempo tšëngaftanga šmojanienyena bacna juabnënga jtsebomnëse y bacna soyënga jtsamëse, mo ibetiñe cuafsiyencá, pero mora Bëngbe Utabnáftaca cánÿiñe mo canÿacá bëtsemnayeca, chabe soyënga šmontsetátšëmbo y sempre šmondétsemna cháftaca, chë entšangbe juabnënga binÿnayáftaca. Šmochtsiyena jtsamëse mo chë binÿnayabe entšangcá. <sup>9</sup> Chë binÿnayábeyeca entšanga tšabe soyënga jtsamana, chë Bëngbe Bëtsabe bominiñe tšabá yomna soyënga, y ndegombre soyëngnaca. <sup>10</sup> Nÿa šmochtsentšena soyënga jamama, Bëngbe Bëtsá oyejuayá chaotsemnana. <sup>11</sup> Chë mo ibetiñe cuafsiyencá oyenëngbe bacna soyënga tondayama ntsošervénana, y tšëngaftanga chca ndoñe šmattsama. Chamna, chëngbioye šmochjinÿanÿiye chënga ndoñe tšabá tmonjamama. <sup>12</sup> Ndegombre, nÿe chë ndayá chënga mo iytëmencá tmojamama jóyebuambayama ya cuantsëuatja; <sup>13</sup> pero nÿetsca soyënga binÿniñe tmojacjá ora jtsopodénana tšabá jinÿama ntšamo ndegombre tomncá. Cachcá, ntšamo entšanga tmojamcá chë binÿnayá chaojinÿanÿé ora, echantsopodena jtsotatšëmbuama ntšamo chë soyënga yomnana; <sup>14</sup> er ndayánaca binÿniñe tojtsinÿinÿena, jtsopodénana jinÿama ntšamo ndegombre chë soye tomncá. Cachcá, ntšamo entšanga iytëmencá tmojtsamcá chë binÿnayá chaojinÿanÿé ora, chënga mochántsetatšëmbo bacna soyënga imojtsamama. Chíyeca mëntšá jtsichámuana:

Botamana cochjájuaboye, aca ndoñe quecátobena jenomándana, mo canÿa cuaftsomañcá; chë bacna soyënga ama causa, Bëngbe Bëtsabe bominiñe mo obanëngcá imomnënguentsána šmochtsojuánañe, y Cristo acbe juabnënga echantsebínÿnaye ca.

<sup>15</sup> Chcasna, šmochtsantješna ntšamo tšabá yomncá jtsamëse chašmotsiyenama. Ndoñe šmattsiyena jtsamëse, mo chë Bëngbe Bëtsabe soyëngama ndosertanëngcá, pero aíñe chë chca soyëngama osertanëngcá. <sup>16</sup> Lempe ntšamo chašmojobenacá nÿets tempo tšabe soyënga šmochtsama, er quem tempo entšanga yapa bacna soyënga montsama. <sup>17</sup> Ntjenojuaboycá ndoñe šmattsama, mo chë ndosertanëngcá. Pero aíñe bëtscá šmochtsentšena ndayá Bëngbe Utabná jamama yobošcá chacmósertama. <sup>18</sup> Ndoñe šmattsótmenaye, er chë soye entšábioye juanatsana jenomándama ndoñe chaondëtsobenama; chamna, šmochjama Uámana Espíritu sempre y bëtscá tšëngaftangbe ainaniñe chaotsemándama. <sup>19</sup> Šmochjenatsëtsaye Salmos librëšañe enduábemana cantënga jacántase, Jesucristbe soyëngama cantëngaca y chë Bëngbe Bëtsabe Espíritu inétsama tšëngaftanga chašmotsobena jacántama soyëngaca; chca, nÿets ainánaca Bëngbe Utabnabiamá šmochjacántaye y cha šmochtsatschuanaye. <sup>20</sup> Nÿets tempo y lempe ntšamo cha tojamama Bëngbe Bëtsá chë Taitá šmochtsatschuanaye, Bëngbe Utabná Jesucristbiajana.

### *Ntšamo yomna canÿe yebnentšënga chamotsemnana*

<sup>21</sup> Nÿetscanga šmochtsenëyeunana, tšëngaftanga Crístbioye puerte šmorrespetánayeca.

<sup>22</sup> Shémanga, šmochtsetátšëmbo tšëngaftangbe boyanga chë yebnentša mándayënga imomnana; y nÿets tempo chca šmochtsama, Bëngbe Utabná chašmotsobedecénama.



<sup>23</sup> Er boyá endmëna shembe mandayá y inyëná, ntšamo Cristo chë ošbuáchiyëngbe mandayá y inyëná endmëncá. Cha chënga tojatsebacá y mora cha chënga entsamënda, mo chë bestšaše nyëts cuerpo jtsemandayancá; <sup>24</sup> y chca, ntšamo chë ošbuáchiyënga, Cristo chëngbe amëndayá yomnama imotatsëmbcá y chca jtsamana, cachcá, chë shemángnaca entsamna jtsemnana nyëtsca soyënguiñe chëngbe boyángaftaca.

<sup>25</sup> Boyanga, tšëngaftangbe shémanga šmochtsababuányëshana, ntšamo Cristo chábeñe ošbuáchiyënga yojanababuanyëshanca, y chca, chabe derecho vida jtsobomñama cachcá tojanonjá y chëngbiamama tojanóbana. <sup>26</sup> Chca tojanma, chënga chabe entsanga y puerte tšábenga jábiamama; y chënga tmojánenabaye ora, tmojaninyänyé Bëngbe Bëtsá chëngbe bacna soyënga tojánabuajuanama, y chabe delante tšábenga chamotsemnana cha tojanmama. Cha chca tojanma, er chënga chábeñe imojtsanošbuaché, chabiamama buayenana soyënga tmojanuena ora. <sup>27</sup> Cha chca lempe tojanma, chë ošbuáchiyënga japróntayama corente tšábenga y uámanënga cachabiamama chamotsemnana, ndocna bacna soye ndobomnënga, ni ndocna entsá chaondobená jayanama chënga imomna chë ndoñe tšabá tmonjamënga ca, ni ndocna inye cachca sóyeca. <sup>28</sup> Ntšamo canye boyá cachabe cuerpo endbetsebbonshancá, cachcá cha bontsemna chabe shémbioye jtsebbonshánana. Nda chabe shémbioye tbojtsebbonshana, cachábioye jtsenobobonshánana, er chata cányiñe jtsemnana mo nye canye entsá cuenta. <sup>29</sup> Er ndocná cachabe cuerpo jtsáboyënjana, ndayá saná janguangoñana y jtsinjenana, ntšamo Cristo bënga chë ošbuáchiyëngaftaca endbetsamcá; <sup>30</sup> er bënga nyëtscanga cányiñe mondmëna mo chabe cuerpo cuaftsemncá, y bënga mo chabe cuerpentša soyënga cuaftsemncá. <sup>31</sup> Ntšamo Bëngbe Bëtsabe uabemana palabrenguiñe endayancá: “Chíyeca, boyabása chabe taitá y chabe mamá echanjésabashejuana chabe shémaftaca jenútanama, y chë útata mo canyáca bochántsemna ca.” <sup>32</sup> Chë soyënga josértama puerte totcá comna, pero atše šcuayana, chë soye entsoyebuambná ntšamo Cristo chábeñe ošbuáchiyëngaftaca yomnama. <sup>33</sup> Pero morna, tšëngaftanga cada ona cachabe shémbioye chabotsebbonshana, ntšamo cachá iuenobobonshancá, y shema boyábioye ndoñe stëtsoye chabondëquedá.

## 6

<sup>1</sup> Básenga, Bëngbe Utabnáftaca cányiñe mo canyáca bétsemnayeca, tšëngaftangbe bëtsëtsangbioye šmochtsayaunana, er chca jamana tšabá endmëna. <sup>2</sup> Moisesbe leyíñe canye mando endmëna, y chentše endmëna chë Bëngbe Bëtsabe natsana mando, ndayentše cha tojašbuachená tšabe bendicionënga jamama: “Acbe taitá y acbe mamá ndoñe stëtsoye catjëftsaquédaye, <sup>3</sup> tšabe vida chacuetsobomñama y quem luarentše bayté chacuetsiyenama.”

<sup>4</sup> Taitanga, ndoñe šmattsama tšëngaftangbe básenga chauetënama; más tšabana, chënga šmochtsabëchaye jtsabuátambayëse y jucácanëse, ntšamo Bëngbe Utabná endbetsabu-atambaycá.

<sup>5</sup> Tšëngaftanga, chë nyëts tempo nye ínñabiamama oservëñënga, tšëngaftangbe nduiñënga šmochtsayaunana; chca šmochtsama puerte respëtoca, bëtscá cuedádoca y nyëts ainaniñe tšabe juabnëngaca, mo cach Crístbioye cuaftseservencá. <sup>6</sup> Y chca chë nduiñëngbioye šmochtsaserverna, ndoñe nye chënga chacmojtsënña ora, mo nda nye entsangbe delante tšabá joquédama cuaftsebošcá, ndayá Cristbe oservëñëngcá, chënga nyëts ainánaca jtsamana ntšamo Bëngbe Bëtsá tojtsebošcá. <sup>7</sup> Nyëtsca trabajotëmënga šmochtsama nyëts tšëngaftangbe añémoca, mo Bëngbe Utabnabiamama cuaftsetrabajacá, y ndoñe nye entsangbiamama. <sup>8</sup> Er tšëngaftanga ya šmondëtatšëmbo, cada ona, nyëts tempo nye ínñabiamama trabajayá o nye cachabiamama trabajayá tomna, ntšamo tšabe soyënga tojamcá Bëngbe Utabnábiocana yochjóyëngacñe.

<sup>9</sup> Y tšëngaftanga, ndëmuanyëngbiamama ínñënga nyëts tempo imoserverna, cachcá tšabá chëngaftaca šmochjamna, tondayama ntsaútatjnyëse. Smochtsenójuabnaye, Bëngbe

Utabná chë celoca endmëná, tšëngaftanga y chëngbe mandayá yomnama, y chabiamana nÿetscanga cachcá monduámána.

*Ndayá Bëngbe Bëtsá entsanga tojatsatá Satanasbiamana jenëuyanama*

<sup>10</sup> Y morna, Bëngbe Utabnáftaca cánÿiñe mo canÿacá jtsemnëse, ainaniñe bëts añemo šmochtsebomna, chë Bëngbe Utabnabe bëts obenanentsana óbocana añemo. <sup>11</sup> Mo canÿe soldadká, ba soyënga jtochëtjuana chë tmojtsentsjananga ora uayayëngbiamana jenëuyanama, tšëngaftángnaca cachcá, nÿetsca chë Bëngbe Bëtsá cmojatsatá soyëngaca šmochtseprontana jenëuyanama, tšëngaftanga jáingñama Satanás ntšámnaca tojtsama ora, ndoñe chacmondáyënjanama. <sup>12</sup> Er bënga ndoñe quemuatenojuerzana cach quem luarentša entsángaftaca jenëyënjanama, ndayá bacna espíritënga mando bomnëngaftaca; bacna espíritënga obenana bomnëngaftaca; y quem luarentša entsanga, chë bacna juabna bomna causa y Bëngbe Bëtsabe soyënga nduabuatma causa, mo ibetiñe cuaftsoyencá oyena entsángbioye amëndaye espíritëngaftaca; y chë tsbanánoca luarënguifne imomna y bacna soyënga chaotsebínÿnama ama espíritëngaftácnaca. <sup>13</sup> Chíyeca, lempe ntšamo Bëngbe Bëtsá cmojatsatacá šmochjóyëngacñe y chë soyënga jtsamëse šmochtsiyena jtseprontánama, mo canÿe soldado jenëuyanama y jáyënjanama bëtscá soyënga tojtochëtjca. Chca šmochjama, chë uayayá Satanás tšëngaftangbioye jáingñama chaojtsama ora ndoñe chacmondáyënjanama, y jenëuyanama lempe jtsamëse, chašmobená cha jayënjanama.

<sup>14</sup> Mo canÿe soldadká, jabuache jtsanayana y cochaca canÿe morocho soye jenácochjatsana jtsevalentiamana y ndoñe chamondëyënjanama, tšëngaftángnaca cachcá, ntšamo ndegombre yomncá jtsamëse šmochtsiyena, mo chë jabuache cuaftasnacá, y chë Bëngbe Bëtsabe bominiñe tšabá yomna soyënga jtsamëse, mo chë morocho soye cochaca cuaftjenacochjatscá, chca, Satanás tšëngaftangaftaca tondaye chaondobená jamama. <sup>15</sup> Mo canÿe soldadká jtsohecochëtjuana betscó jobónjuama jtseprontánama, tšëngaftángnaca cachcá, Bëngbe Bëtsabe obenánaca sempre šmochtseprontana jtsabuayiyayama ntšamo Bëngbe Bëtsá inétsama entsanga tempcá tšabá cháftaca chamotsatsmënama. <sup>16</sup> Canÿe soldado escudo jtsebomnana chë uayayabe uajuinÿinÿana flechëjuangá chabe cuerpiñe ndoñe chaonduámashënguama. Cachcá, tšëngaftanga cmontsamna Jesucristbeñe puerte jtsošbuáchiyana, mo escudo cuaftsebomncá, chca, chë bacna soyënga mandayá Satanás tšëngaftangaftaca tondaye chaondobená jamama, tšëngaftangbe ošbuáchiyana jabuajuánama cha tojtsama ora. <sup>17</sup> Mo chë soldadká, canÿe morocho buchtsanëse tojtabuchëtsëse chabe bestšaše jenëuyanama, tšëngaftángnaca cachcá, sempre šmochjësejuabnaye Bëngbe Bëtsá cmojätsebacama, y chë juabna cmochanjújabuache, mo canÿe morocho buchtsanëse cuaftsabuchëtsancá. Mo canÿe soldadká, chë uayayábioye jayënjanana, chabe espadëjaca japéliase, cachcá tšëngaftanga, Bëngbe Bëtsabe palabra šmochtsóyebuambnaye Satanás jayënjanama. Uámána Espiritu jtsamana, tšëngaftanga Bëngbe Bëtsabe palabra chašmotsebomnama. <sup>18</sup> Nÿets tempo chë Uámána Espiritbe uajabuáchenanaca Bëngbe Bëtsáftaca šmochtsencuëntaye, lempe ntšamo Bëngbe Bëtsáftaca jencuëntama yomncá y chábioye jtseimpadánëse. Yejuana šmochtsenójuabnaye ntšamo šmojtsichámuama, Bëngbe Bëtsáftaca chašmojtsencuënta ora, y chca šmochjama Bëngbe Bëtsábeñe sempre jtsobátmanëse, y Jesucristbeñe ošbuáchiyëngbiamana nÿetscangbiamana cha šmochtseimpadana.

<sup>19</sup> Atšbiámnaca Bëngbe Bëtsá šmochtseimpadana, atše jóyebuambayama chaijontsé ora, cha chë buayenana soye chašúyanama; y atše chayobená tondayama ntjatauatjca jóyebuambayana, y chca, entsanga chayinÿanÿé Jesucristbiamana tšabe noticiënga, ndayá chënga tempo ndoñe monjántatšëmbo. <sup>20</sup> Bëngbe Bëtsá šojichmó mo canÿa chabe cuenta oyebuambnayacá, chë buayenánama entsángbeñe jóyebuambayama, y chca bétsamama,

mora atše utamená sěntsemna. Atšbiamá Běngbe Bětsá šmochtseimpadana, atše chay-obenama Cristbe buayenánama tondayama ntjatauatjca jóyebuambayana, ntšamo atše jamama šojtsemncá.

*Pablo chěnga jtadiósoftanama*

<sup>21</sup> Tíquico, Jesucristbeyeca běngbe bonshana catsata y canye entšá tšabe palabra bomná, Běngbe Utabnabe trabajo jamama oservéniñe, ntšamo atše stsemnama y ndayá stsamama tšěngaftanga chašmotsetatšěmbuama, lempe cmochanjácuntaye. <sup>22</sup> Chama cha tšěngaftangbioye sěnjichmó, ntšamo muentše fstsemnama chacméyanama, y tšěngaftanga ainaniñe añemo chašmotsebomnama chaomama.

<sup>23</sup> Atše sěntseimpadana Běngbe Bětsá chě Taitá y Běngbe Utabná Jesucristo, chaboma chě Jesucristbeyeca catsátangbe ainaniñe tšabe ebionana chašmotsebomnama, y Běngbe Bětsábioye y ínñengbioye puerte chašmotsababuánñeshanama, Jesucristbeñe tšěngaftangbe ošbuachiyánaca; <sup>24</sup> y chaboma, chě Běngbe Utabná Jesucristbioye běts bonshanánaca imobobonshaněngbeñe tšabe bendicioněnga chaotsemnama, canye ndocná yondobena jatrócama bonshanánaca.

## Filipenses

### *Jacheuayama*

<sup>1</sup> Pablo y Timoteo, Jesucristbiamana oservénata, quem tsbuanácha fséntsabiamná Filipos bēts pueblona Bēngbe Bētsabe entšanga imomnēnga, y Jesucristoftaca cānyīne mo canyācā imomnēngbiamana. Fséntsabiamná n̄yetsca chē Jesucristbeñe ošbuáchiyēngbiamana, n̄yetsca chentša uanatsanēngaftaca y chē in̄ye ošbuáchiyēnga ujabuáchaniñe trabajayēngaftaca.

<sup>2</sup> Atše sēntseimpadana Bēngbe Bētsá Bēngbe Taitá y Bēngbe Utabná Jesucristo, chaboma tsēngaftangbeñe tsabe bendicionēnga chaotsemnana, y chaboma tsēngaftanga ainaniñe tsabe ebionana chašmotsebomnana.

### *Pablo Bēngbe Bētsábioye tbojtanchuá ošbuáchiyēngbiamana*

<sup>3</sup> Cada tsēngaftangbiamana stenojuabó ora, Bēngbe Bētsá tsēngaftangbiamana sēndbētsatschuanaye; <sup>4</sup> y Bēngbe Bētsá tsēngaftangbe tsabiamana stseimpadana ora, atše corente oyejuayá chca sēndbētsama, <sup>5</sup> ntšamo tsēngaftanga atše šmojuájabuachama, tsabe noticiēnga Jesucristbiamana entšanga abuayiynayiñe, tsēngaftanga Jesucristbeñe jtsošbuáchiyama šmonjanbojatsé orscana y mēntscōñama. <sup>6</sup> Atše corente sēntsetatšēmo, Bēngbe Bētsá tojanbojatsé tsēngaftangbe ainaniñe tsabe soyēnga jtsamama, y más tsabe soyēnga yochtsamama. Y chca yochtsama, lempe ntšamo tsēngaftangbiamana cha yojtsejuabnacá chaochnēnguēntscuana, y chca, Cristo Jesús yochjésabēntscuana.

<sup>7</sup> Atše tsēngaftangbiamana sempre ainaniñe sēndbētsenojuabnaye, chíyeca atšbiamana puerte tsabá entsemna chca tsēngaftangbiamana jtsejuabnayana. Tsēngaftanga n̄yetscanga atše šmonjuájabuache jamama chē Bēngbe Bētsá tša tsabia bētsemnayeca šonjanēntšabuaché trabajo. Atše chē Bēngbe Bētsabe trabajo sēndbomna jamama, mora sēntsētámēna ora o natjēmbana shjoca stsana ora, n̄yetscāngbioye tsabá in̄yin̄ynayiñe chē tsabe noticiēnga ndegombre soyēnga bētsemnana, y bētscá amiñe entšanga chē soyēnguiñe corente chamotsošbuáchemana. <sup>8</sup> Bēngbe Bētsá yotátšēmo ntšamo sēntsichamcá ndegombre bētsemnana. Atše tša sēntseboše tsēngaftanga jányama y cbontsababuan̄yeshana cachcá ntšamo Cristo Jesús atše šondbobonshancá. <sup>9</sup> Atše, Bēngbe Bētsá sēntseimpadana tsēngaftanga cada te más cha chašmotsebobonshánama y chē in̄yēngbioynaca, chca, osertánana chašmotsebomnana ndayá chē ndegombre soye bētsemnana jtsetatšēmbuama, y chašmotsetátšēmo ndayá tsabá o ndayá ndoñe tsabá tondmēnana;

<sup>10</sup> y chca, chašmotsobena sempre jabocacayama chē puerte tsabá yojtsemna jamama soye. Chca, Cristo yochjésabo ora, tsēngaftanga puerte tsabe vida šmochántsebomna, bacna soyēngaca ndēmandánēnga; y tondaye quešmochátama, chora chē entšanga chca ndoñe tsabá quenátsmēna ca chamuátichamuama. <sup>11</sup> Y lempe ntšamo chašmojtsamcá ndegombre tsabá echántsemna, y n̄ye Jesucristo endobena jamama entšanga chca chamotsamama. N̄yetsca chē tsabe soyēnga echántsemna, Bēngbe Bētsá puerte bētsá y uamaná bētsemnana jin̄yan̄iyama.

### *Atšbe vida endmēna Cristo jtseeservénama*

<sup>12</sup> Jesucristbeyeca atšbe catsátanga, atše sēntseboše tsēngaftanga chašmotsetátšēmo, ntšamo atše tijapasama, más bētscá entšanga Jesucristbiamana tsabe noticiēnguiñe chamotsošbuáchemana tojoservema. <sup>13</sup> Chca, n̄yetsca chē romanēngbe mandadbe bēts yebna bojan̄yá soldadēnga y chē in̄ye entšanga quem luarentše montsetátšēmo atše utamená stsemna, atše Cristbiamana tstrabája causa. <sup>14</sup> Atše utamená sēntsemnayeca, ošbuáchiyēnguentšana banga ainaniñe más añemo montsebomna, y chíyeca chēnga Bēngbe Bētsabe palabra más y más añēmoca y tondayama ntjatauatjácá entšāngbioye montsabuayiná.



<sup>15</sup> Ndegombre entsemna, báseftanga Cristbiana entšángbioye imojtsabuayiyná, pero chëngna nÿe ntšamo tijashjachcá šmojtsántšabošama chca, y chënga imojtseboše, bëtscá jtsamëse, atše chayotjáyanama; chíyeca chca imojtsama. Pero ínÿengna, entšángbioye montsabuayiyná tšabe soyënga ínÿengbiana jamama ndegombre imojtsebóseyeca. <sup>16</sup> Mënga chca montsama, atše šmondobonshánayeca y Bëngbe Bëtsá chë trabajo šojanëntšabuáchema mondëtatšëmboyeca, Jesucristbiana tšabe noticiënga ndegombre bëtsemnama entšanga jtsinÿanÿayana; <sup>17</sup> pero chë ínÿengna chca imojtsama, ndoñe tšabe soyënga ínÿengbiana imojtsebóseyeca, ndoñe chënga chë ínÿengbiana tšabe soyënga imojtsebóseyeca. Chënga Jesucristbiana imojtsoyebuambná nÿe entšanga chënga chamotsar-respetánama, y nÿe cachëngbiana tšabe soyënga jtsebomnama imojtsebóseyeca. Chënga jtsejuabnayana mochjobenaye jamama atše más chašotsengménama ca, muentše utamená chjëftsemnëntscuana, chënga entšángbioye chca tmojtsabuatambá ora. <sup>18</sup> Pero ¿ndayase chë soye atšbiana? Masque ntšámnaca, tšabe soyënga ínÿengbiana tmojtseboše o ndoñe, Cristbiana montsoyebuambná, y Cristbiana chënga montsoyebuambnama atše oyejuayá sëntsemna.

Y cabá más chanjóyejuaye, <sup>19</sup> er atše sëntsetatšëmbo quem utámenentšana atše chjëseboconama. Atše sëntsetatšëmbo muentšana chjëseboconama, tšëngaftanga Bëngbe Bëtsá šmoimpadánayeca y Jesucristbe Uámana Espíritu šuajabuachánayeca. <sup>20</sup> Atše corente jtsošbuáchiyëse Bëngbe Bëtsábeñe sëndobátmana, atše ndocna te tondaye chanjëftsema y chama chjaisëuatjama, pero aíñe nÿetscangbe delante beca añémoca chayoyebuambá, y nÿets tempo pero más mora, lempe ntšamo stsamama y stsichámuama, atše chaima entšanga chaminÿanÿema Cristo puerte bëtscá y uamaná bëtsemnama, y chca chántsama masque ainá o obaná chaitsemnëse. <sup>21</sup> Chca entsemna, er atšbe vida Cristo jt-seservénama endmëna, y nderado atše chajóbanëse, nÿetscanga puerte bëtscá soye mochanjëftsashjache. <sup>22</sup> Pero atše ainá stsemnëse, chanjobenaye más uámana trabajo Cristbiana jëftsemama. Chíyeca, atše ndoñe corente quetsátstatšëmbo ntšamo mora jobuáyanana, ainá jtsemnama o ndoñe. <sup>23</sup> Ndegombre mora puerte šontsëtëmnana ntšamo jobuáyanana: atše tša sëndboše ndoñe más quem luarentše ntjëftsemnana, Crísoftaca jtsatsmënama, y ndegombre chca atšbiana puerte tšabá nántsemna; <sup>24</sup> pero, ínÿoicana tšëngaftangbiana šontsemna ainá jëftsemnana. <sup>25</sup> Atše corente sëntsetatšëmbo chca ndegombre yochtsemnama, y chíyeca sëntsetatšëmbo atše cabá ainá chjëftsemnama, tšëngaftanga jujabuáchama más Jesucristbeñe chašmotsošbuáchema, y chiñe bëtscá oyejuayana chašmotsebomnama. <sup>26</sup> Chca, atše tšëngaftanga jutsëtsayama choye chajá ora, chašmobená inÿe soyama más Cristo Jesús jëtschuayama.

<sup>27</sup> Morna, chë más uámana soye entsemna, tšëngaftanga chašmotsama ntšamo jtsiyenama ntšamo chë Cristbiana tšabe noticiënguiñe endayancá. Y mëntšá, cachcá, jutsëtsayama chajá o ndoñe, atše chántsetatšëmbo tšëngaftanga Jesucristbeñe ošbuáchiyama ndoñe šmontsajbanama, y aíñe beca ošbuáchiyana chábeñe šmotsobomñama; nÿetscanga cachcá šmojtsejuabnáyeca y nÿetscanga cach soye šmojtsebóseyeca, cánÿiñe nÿetscanga enutanánënga jtsenojuerzánëse, ndocná chë tšabe noticiënguiñe tšëngaftanga šmobomna ošbuáchiyana chacmondábuajuanama. <sup>28</sup> Tšëngaftangbe uayayëngbiana tondayama šmattsauatja, sempre bëtscá añemo šmochtsebomna. Chca tšëngaftanga šmochanjínÿanÿiye chënga pochocánënga mochtsemnama, y tšëngaftangna atsebácanënga šmochtsemnama. Y chë soye Bëngbe Bëtsá tšëngaftangbiana echántsama, Crístbeñe šmošbuachéyeca. <sup>29</sup> Chca echanjopása, er Bëngbe Bëtsá tšëngaftangtaftaca puerte tšabia endmëna, Cristbiana oservénënga Bëngbe Bëtsá tcmojábiana, pero ndoñe nÿe chábeñe chašmotsošbuáchema, ndayá chabiana chašmosufrímnaca. <sup>30</sup> Tšëngaftanga y atše cachca soyama montsenojuerzana. Tšëngaftanga ya šmonjinÿe ntšamo atše sënjánenojuerzana, entšanga jinÿanÿiyama chë tšabe noticiënga ndegombre soyënga bëtsemnama. Y mora, tšëngaftanga noticiënga šmochanjóyëngacñe ntšamo atše cach soyama cachcá stsamama.

## 2

*Ndoñe uámanënga šmattsenobiamnaye, ntšamo Cristo ndoñe tonjanmcá*

<sup>1</sup> Tšëngaftanga, Crísoftaca cánýiñe mo canýacá jtsemnëse, ainaniñe bëtscá añemo šmontsebomna. Cristo cmondábabuanýeshana, y chë soye tšëngaftanga cmontsëjabuachana nýetsca trabajënguentsana tšabá jabocanama. Y tšëngaftanga Cristbe Espíritoftaca cánýiñe mo canýacá šmontsemna; tšëngaftanga nýetscanga šmondënbobonshana y nýetscangbiamna jóngmiamna šmonduamana. <sup>2</sup> Tšëngaftanga lempe chca šmobómnyeca, atše corente oyejuayá šmochjábema, er tšëngaftanga nýetscanga cachcá cánýiñe šmondëjuabná, cachcá nýetscanga šmondënbobonshana, nýetscanga mo canýe ainancá šmondobomna, y nýetscanga cachca soye šmondboše. <sup>3</sup> Tondaye šmattsama nýe ínýenga chë sóyeca chamotjáyana, o nýe tšëngaftanga tša bëts soyënga amënga šmomna ca entšanga chamotsejuabnama; pero ndoñe yapa uámanënga šmojtsemna ca šmochtsejuabnaye, y cada ona chaotsejuabná chë ínýenga bëngbiamna más uámanënga imomnama. <sup>4</sup> Y ndocná tondaye chaondëtsama, nýe chabiamna tšabe soyënga jónýenama, sinó ndayánaca chaotsama nýetscangbiámna tšabe soyënga jónýenama.

<sup>5</sup> Tšëngaftanga cmontsamna jtsemnana ntšamo cach Cristo Jesús yojanjuabná y yojanamcá:

<sup>6</sup> Cha nýets tempo yomna cach Bëngbe Bëtsacá y uamaná cach Bëngbe Bëtsacá, pero masque chca, ndocna te yonjanjuabná:

“Atše sëntseboše nýetsca entšanga nýets tempo atše chašmotserrespetana, ntšamo atšbe Taitá Bëngbe Bëtsá mondërrespetancá ca.”

<sup>7</sup> Pero cha mo nduamanacá tonjanóbema, nýetsca chabe bomna soyënga jëftseboshjonëse, y ndegombre, mo canýe oservenacá tojanóbema.

Cha canýe entšacá tojanonýná, y entšanga canýe ndegombre entšacá tmojáninýe.

<sup>8</sup> Cachá tojanlesenciá nduamaná jtsemnana, y sempre Bëngbe Bëtsábioye ibnayeunana, y jobanámnaca, cruciñe jóbanëse.

<sup>9</sup> Ndayá cha tonjanmama, Bëngbe Bëtsá, chë celoca más uámana luare tbojaninýinýe y chë más uámana uabaina, chë más bëtsëtsangbe uabainënguentsa uabaina tbojabuajo;

<sup>10</sup> y chca, celoca imomnënga, y quem luarentše y fshantse jashenoye imomnëngnaca nýetscanga chamóshamentšema,

Jesúsbioye jëtschuayama, chabe uámana uabaina jayanëse;

<sup>11</sup> y chca, nýetscanga chamuayana Jesucristo chëngbe Utabná yomna ca, chca, Bëngbe Bëtsá chë Taitá nýetscanga chamotsatschuanama.

*Crístbeñe ošbuáchiyënga entsamna mo buashinýinýana estrellëngcá jtsemnana*

<sup>12</sup> Chcasna, atšbe bonshana catšátanga, ntšamo atše tšëngaftangaftaca sënjamna ora, atše sempre šmonjanëyeunancá, mora más šmochtsatënëyeunana, mora atše tšëngaftangbiamna bënoca stsemna ora. Bëtsëtsanga ntjatenobiamnycá y Bëngbe Bëtsá jtserrespetánëse šmochtsama soyënga, chca, tšëngaftangbe tšabe videntše, Jesucristbeñe ošbuáchiyënga quetsomñecá, tondaye chacmondëtsabuáshebenama; <sup>13</sup> er Bëngbe Bëtsá nýets tempo tšëngaftangbe ainaniñe inétsama tšëngaftanga ndayánaca chašmotsebošama y chašmotsamama, ntšamo cha yojuabná y yobošcá chaotsemnana.

<sup>14</sup> Ndayánaca jamama chacmojtšëjaboto ora, chë soye šmochjama, chca jamama yapa totcá comna ca ntjatichamcá y ínýengaftaca jabuachana ntjatenatsëtsnycá.

<sup>15</sup> Chca cmontsamna, chca, tšëngaftanga šmojtsama soyënguiñe ndocná ndocna bacna soye chaondínýenama, y puerte tšabe vida chašmotsebomnama. Bëngbe Bëtsabe puerte tšabe basengcá šmochtsiyena, tšëngaftanga chë šmojtsemnënga canýe luarentše puerte bacna entšángbeñe y sempre bëtscá bacna soyënga jtsamana uamanëngbeñe. Chíyecna, tšëngaftanga šmochtsiyena puerte tšabe soyënga jtsamëse, y chca tšëngaftanga

šmochántsemna mo canýe ibetiñe luarentše buashinýinýana estrellëngcá. <sup>16</sup> Chë tšabe soyëngaca entsángbioye chauinýanýé ntšamo muanjobenaye tšabe vida jtsebomnama. Chca chašmojamése, Cristo cachiñe yochjésabo ora, atše chantsobena tšëngaftangbeyeca puerte oyejuayá jtsemnana, er ntšamo chašmojamcá echanjínýanýiye atše ndoñe nýe bonamente jabuache tijatrabajá. Chca atše chántsemna mo nda bëtscá tojoprontá, y chentšana ínýengaftaca tojótjajo ora, chëngbioye tojtsayënjana. <sup>17</sup> Mo chë altaroca canýe bachna buiñe tojuabuashanacá, Bëngbe Bëtsá jëtschuayama tmojóba ovesháftaca, cachcá nderado echántsemna atšbe buiñe, atše šmojóbase, chca, Bëngbe Bëtsábioye oyejuayá jabemama. Tšëngaftanga bëtscá šmojalemošná, Crístbeñe tša šmošbuachéyeca, y tšëngaftangbe ošbuachiyánënaca endmëna Bëngbe Bëtsábioye oyejuayá jabemama. Chë uta soye echántsemna mo chë buiñe y chë oveshacá, Bëngbe Bëtsábioye oyejuayá jabemama. Atše chca stjobanése, puerte oyejuayá stsemna, y stjama tšëngaftángnaca cachcá chašmotsóyejuama. <sup>18</sup> Chca, tšëngaftanga cmontsamna oyejuayënga jtsemnana, y šmochjama átšnaca oyejuayá tšëngaftangaftaca chaitsemnama.

### *Timoteo y Epafrodito*

<sup>19</sup> Atše becá ošbuachiyánaca Bëngbe Utabná Jesúsbeñe jtsobátmanése, sëntsejuabná pronto chjobenaye Timoteo tšëngaftangbioye jíchmuama, tšëngaftangbiamna chašubocuéntama, y chca, atše más añemo chaitatsbomnama. <sup>20</sup> Er nýe cha endmëna canýa cach atšcá ainaniñe juabnayá, y cha ndegombre puerte entseboše tšëngaftanga tšabá chašmuetsiyenama; <sup>21</sup> chë ínýengna nýetscanga nýe cachëngbe tšabiamna ndayánaca jamama jtsejuabnayana, y tondaye ntsebošana Jesucristbiamna jamama. <sup>22</sup> Pero cach tšëngaftanga ya šmondëtatšëmbo, ntšamo Timoteo chë padecena soyënguentšana tšabá tonjëtsohocñama, y ntšamo Timoteo y atše, mo canýe uaquiñá chabe taitábioye cuaftsajabuachancá, cánýiñe fsënjatrabajá, más bëtscá entsanga chë tšabe noticiënga chamóyëngacñama. <sup>23</sup> Chcasna, atše sëntsobátmana cha jíchmuana, ntšamo átšeftaca jopásama chaitsetátšëmbo y cachora; <sup>24</sup> pero bëtscá ošbuachiyánaca sëntsobatmánayeca, sëntsejuabná, Bëngbe Utabná chašojtábocnëse, pronto átšnaca chjobenaye choye jama.

<sup>25</sup> Atše sëntsejuabná yojtsemna, Jesucristbeyeca bëngbe catšata Epafrodítnaca choye jíchmuana, nda átšeftaca cánýiñe endëtrabajá y chë tšabe noticiënga ndegombre soyënga bëtsemnama jinýanýiyama endenojuerzana, nda tšëngaftanga šmojanichmó atše chašubëuájabuachama. <sup>26</sup> Cha chanjíchmu; cha puerte entseboše tšëngaftanga jányama, y yapa ngménaca entsemna, cha šocá enjamnama šmojátatšëmbonama. <sup>27</sup> Y ndegombre cha šocá enjamna, y enjëtšinýna mo jtsobanamcá; pero Bëngbe Bëtsá tbonjalastemá, y ndoñe nýe chábioye sinó átšbioynaca, atše ndoñe más ngmenanënga chayátsbomnama, ntšamo mora sëntsebomnama. <sup>28</sup> Chíyeca atše más sëntseboše cha pronto jíchmuana, as tšëngaftanga cha chašmojtinýe ora, puerte oyejuayënga chašmotsemnama, y atše ndoñe yapa chašondëtsengmenama. <sup>29</sup> Smochjofja nýets oyejuayánaca, Bëngbe Utabnábeyeca catšátanga quetsomñecá; y nýets tempo chacá amëngbioye mo bëtšëtsangcá šmochtsëtabna, <sup>30</sup> er batšatema más y matënjëtsošana, Crístbiamna trabajayíñe uajabuachaniñe. Cha chë trabajo tonjanma atše juajabuáchama, ntšamo cach tšëngaftanga ndoñe chešmatanobenacá, atše juajabuáchama.

## 3

### *Ndayá Pablëbiamna ndegombre corente yojanámana*

<sup>1</sup> Y morna, atšbe catšátanga, ndayá Bëngbe Utabná tojamama móyejuanga. Ndoñe bacá quešnatámana, ntšamo chë inýe tsbuanáchañe tcbonjanëbuabiamcá cachcá cachiñe jtëtëyanama; y chë soye bëtscá cmochanjújabuache ndoñe resjuiñe chašmondëtsëmbonama. <sup>2</sup> Cuedado šmochtsebomna chë ndoñe tšabe entsangbiamna, mo quešëngcá imomnënga, chë puerte bacna soyënga mondbëtsamënga, y entsangbe

más delicadentše base bobachtema jatětšana uamanēnga; <sup>3</sup> er bēnga mondmēna y ndoñe ínŷenga, chē ndegombre uinŷnanánana bomnēnga, bēnga Bēngbe Bētsabe entšanguentšēnga bētsemnama, bēnga chē Uámana Espíritbe uajabuáchenanaca Bēngbe Bētsá mondadoránama, bēnga chē Cristo Jesúseftaca cánŷiñe mo canŷacá bētsemnama mondbétsoyejuama, y bēnga chē ntšamo ínŷenga monduamancá bēngbe cuerpiñe jamama tondayama yondoservénama mondbétsejuabnayama.

<sup>4</sup> Masque atše razón sēndētsóbomñe, ndayá atšbe cuerpiñe tmojamcá ndegombre iuámanama jtsejuabnayama; nderado nda tojtsejuabná razón yojtsebomna chē soyēnga yoservena ca jtsejuabnayama, ndegombre atše chabiamama más razón chama stsóbomñe. <sup>5</sup> Sēnjanonŷná y posufta tianoye base bobachtema chē más delicadentše šmojantětše; atšbe nŷets uta bētsētšata Israeloca entšanguentšata bonjamna, y atšna Benjaminbe bēts pamillentšá sēndmēna; atšbe tempsca bēts taitanga nŷetscanga hebreunga imnamna. Atšna fariseo sēnjamna. Atše sēnjánama, lempe ntšamo judiēngbe leyēnguiñe endayancá, ndayá jamama šojanmēncá. <sup>6</sup> Atše tša sēnjánboše Bēngbe Bētsá jtseservénama, chíyeca Jesúsbeñe ošbuáchiyēnga bētská sēnjanēcamena; y ndayá canŷe entšá ibnētsemna jt-samama, Bēngbe Bētsabe bominŷiñe tšabia jtsemnama, judiēngbe ley jtsocumplínese, chama ndocná tondaye quenjátšbomna jayanama, atše ndoñe tšabá sēntsanama ca.

<sup>7</sup> Pero lempe chca ntšamo atše sēnjamnama y ndayá sēnjánamama, puerte sēnjanjuabná atšbiamama puerte yojanámana ca; pero mora, Cristo atšbe ainaniñe tonjámashēngoyeca, chē soyēnga atšbiamama ya ndoñe quenatámana. <sup>8</sup> Y cabá más, tondaye atšbiamama quenatámana, chē bēts soye jtsonŷayēse, Cristo Jesús, Bēngbe Utabná jtsabuatmana. Chábeyeca, lempe chē nŷe quem luarentša soyēnga sēnjéseboshjona, y lempe chē soyēnga atšbiamama tondayama quenátoservena; y chca entsemna, chē bēts soye jēftsashjáchama, Cristo jtsabuatmama, <sup>9</sup> y cháftaca cánŷiñe mo canŷacá jtsemnama. Atše ya ndoñe quetsatsnguá Bēngbe Bētsabe bominŷiñe tšabia jtsemnama, nŷe ntšamo atše tijamama chē judiēngbe ley jtsocumplínese, pero Crístbeñe jtsošbuáchiyēse aíñe; Bēngbe Bētsá entsama atše chabe bominŷiñe tšabia chaitsemnama, atšbe bacna soyēngama jtseperdónase, y lempe chca entsemna atše Crístbeñe sēndošbuachéyeca. <sup>10</sup> Atše sēntseboše ndayá cha jtsabuatmana, chē obanēnguentshana tojtanayenama cha tojaninŷanŷé obenana atše chaitsebomnama, atše cháftaca cánŷiñe mo canŷacá chaitsemna ora; y ntšamo bēnga jatsebacama ora cach Cristo tojansufricá, átšnaca cachcá chaisufrima. Y cha tojanóbana orcá atše chaitsemnama; <sup>11</sup> y ntšámna, atše jēftsashjáchama Bēngbe Bētsá chaoma atše chaitayenama.

*Jejuana jtsentsénese, Bēngbe Bētsábiocana uacanánana josháchiñama*

<sup>12</sup> Pero atše ndoñe quetsátichamo lempe chca ya tijashjache ca, o atše ndocna bacna soye ndamá y puerte tšabia Bēngbe Bētsabe bominŷiñe stsemna ca, pero sempre natsanoye sēntšá, mo nda canŷe luaroye jashjanguama cuaftsēchamancá; y puerte jtsošbuáchiyēse sēntsobátmana atše chjobenaye jtsemnama, chē ndayama Cristo šojanchembo, er Cristo Jesús ya tonjama atše chabiamama chaitsemnama. <sup>13</sup> Atšbe catsátanga, atše ndoñe quetsátichamo chca ya tijashjache ca. Pero chama canŷe soye sēntsama: chē tempo atše sēnjánbomna y sēnjánama soyēnga, mora lempe stētsoye sēnjaquedá, y bētská sēntsama jobenayama chē jashjanguama yojtsemnoye jashjanguama, <sup>14</sup> chē ndēmoca yojtsemna jashjanguama luaroye jobenayama jashjanguama, mo nda canŷe luaroye jashjanguama ndayánaca juácanama bētská jenujuérase cuaftsēchamancá. Cachcá, átšnaca sēntšá chē Bēngbe Bētsá šojtsachembuana uacanánana josháchiñama, Cristo Jesúsbeyeca; y chē uacanánana entsemna chē nŷetsca tescama yomna tšabe vida jtsebomnana.

<sup>15</sup> Chca bēnga šontsamna jtsejuabnayana, chē Jesucristbeñe puerte ošbuáchiyana y nŷets tempo cha ústonēnga; y nderado tšēngaftanga ndayíñnaca inŷetšá šmojatsjuabná ora,



Bëngbe Bëtsá chë sóynaca tšabá cmochanjínñanñiye. <sup>16</sup> Pero morna šontsamna jtsiyenana ntšamo mëntscoñama Bëngbe Bëtsabe soyëngama šojosertacá.

<sup>17</sup> Jesucristbeyeca catsátanga, ntšamo atše sëndmëncá tšëngaftanga šmochtsemna, y chë ntšamo jtsiyenama tcbonjaninñanñecá imojtsiyenëngbioye šmochtsënñaye. <sup>18</sup> Ntšamo cbochanjauyancá, ya ba soye tcbonjáuyana y mora cachiñe chca chanjayana, pero chca jayanamna atše puerte ngménaca sëndbétsemna. Banga mondmëna, y chënga ntšamo vida imojtsebomnama montsinñinñá, lempe ntšamo Cristo chë cruciñe jóbanëse bëngbiana iuayancá contra chënga imojtsemnama, <sup>19</sup> y chëngbioye nñetsca tescama infiernoca mochántsapochocaye. Chëngbiana chë más uámana soye yojtsemna jtsamana ntšamo cachënga tmojtsebošcá, nñe cachëngbe cuerpiñe tšabá jtsomñama. Chënga nña mo bëts soye cuafjamcá jtsemnana chë soyënga tmojtsama ora, pero ndegombre chënga entsamna cach soyëngama jtsëuatjama; y chënga sempre jésejuabnayana chë nñe quem luarama enójuabnayëngbe soyëngama. <sup>20</sup> Chë cuenta bëngna, ndegombre celocama entsanga mondmëna, y mora montsobátmana, chë luarocana chauabo bëngbe atsebacayá, Bëngbe Utabná Jesucristo. <sup>21</sup> Cha bëngbe cuerpënga, chë pronto jopochócama cuerpënga echanjátrocaye, jtsemnama mo chabe cuerpcá, chë obanënguentšana tojtayenabe cuerpcá; y cha chca echanjama, cha puerte obenana lempe jtsemándayama bómnyeca.

## 4

### *Bëngbe Utabnáftaca cánñiñe mo canñacá jtsemnëse oyejuayana jtsebomnana*

<sup>1</sup> Chcasna, Jesucristbeyeca atšbe catsátanga, Bëngbe Utabnábeñe ošbuáchiyana ntjabanacá, y puerte chábeñe jtsošbuáchiyëse, cháftaca cánñiñe mo canñacá šmochtsemna. Corente cbondábabuanñeshana y tša sëntseboše tšëngaftanga jáññama. Tšëngaftangbeyeca atše puerte oyejuayá sëntsemna, y atše corente sëndbétsoyejuaye tšëngaftangbiana inñyëngbioye jáuyanama.

<sup>2</sup> Evodia sëntseimpadana y Síntiquenaca, chata chabuatenóyeunama, mo Bëngbe Utabnábeñe ošbuachiyata quetsomñecá. <sup>3</sup> Y ácnaca, nda puerte tšabá átšeftaca tconjatrabajá, cbontseimpadana chama chë shembásata chacújabuachama, er chata bëtscá átšeftaca tbonjatrabajá tšabe noticiënga entsanga abuayinñayañe. Clemente y inñe entsanga átšeftaca tmonjatrabajá cach soye amiñe. Nñetsca chëngbe uabaina entsábemana chë libréšañe, ndayentse yojtsábemana chë tšabe vida mochjónñenëngbe entsangbe uabaina.

<sup>4</sup> Sempre oyejuayënga šmochtsemna, Bëngbe Utabnáftaca cánñiñe mo canñacá jtsemnëse, y cachiñe šcutëtayana: ¡Móyejuanga! <sup>5</sup> Nñetscanga chamotsetátšëmbo, tšëngaftanga tšabe juabna bomnënga šmomnana. Bëngbe Utabná jésabama tempo ya entsobeco.

<sup>6</sup> Tondayama šmattsenócochinñena, pero cada Bëngbe Bëtsáftaca chašmojtsencuënta ora, ndayá cmojtsëjabetama cha šmochjaimpáda. Y chca chašmojtsama ora, chánaca šochtsatschuanaye. <sup>7</sup> Chca, Bëngbe Bëtsá echanjama chë chabe ainaniñe tšabe ebionana tšëngaftanga chašmotsebomnama; chë tšabe ebionana puerte bëtscá endmëna, y bënga entsanga quetsomñecá ndoñe ntsobenana chama jósertana; y chca tšabe ebionánaca, tšëngaftangbe juabnënguiñe y ainaniñe tondayama quešmochátenocochinñena, er tšëngaftanga cánñiñe mo canñacá Cristo Jesúsëftaca šmondmëna.

### *Lempe ntšamo tšabá yomncá soyëngama jtsejuabnayana*

<sup>8</sup> Cabana, atšbe catsátanga, lempe ntšamo ndegombre yomncá soyënguiñe šmochtsejuabnaye, lempe chë respeto yomerecëniñe, nñetsca soyënguiñe entsangbe bominiñe tšabá yomniñe, nñets tempo corente tšabá yomniñe, nñetsca soyënga entsanga yogusetániñe, y lempe chë ndayama entsanga tmojtsejuabná tša iuámana ca

soyënguiñe. Lempe chë tšabá yomna soyënguiñe y jtsatschuanayama yomna soyënguiñe šmochtsejuabnaye.

<sup>9</sup> Sempre šmochtsama chë átšbentšana šmojuá bouinýe soyënga, chë atšbiajana šmojóyëngacñe soyënga, chë atše šmojoyeuná soyënga y ntšamo šmojinýcá atše jtsamana. Chca šmochtsama y Bëngbe Bëtsá, chë bënga ainaniñe tšabe ebionana chamotsebomnama amá, tšëngaftangaftaca echántsemna.

#### *Pablo tojtanacheuá tmojanájabuachama*

<sup>10</sup> Atše corente sëndoyejuá Bëngbe Utabnáftaca cánýiñe mo canýacá tsmënama, er tšëngaftanga ba ishinýe chentšana, cachiñe šmojatobená atše jatinýinýiyana ntsachetšá atšbe tšabiana tšëngaftangbiama iuámanana. Chca, atše ndoñe quetsátichamo tšëngaftanga atšbiama cmojtsanebnětjomba ca, ndayá ntšamo tšëngaftanga tšabá šmojuabnacá atše jinýinýiyama ndoñe yonjanopodena ca. <sup>11</sup> Atše chca, ndoñe quetsátichamo uajabotá stsemna ca, er atše sënjuatsjinýe sempre oyejuayá jëftsemnana, nýe ndaye soyiñe masque batšatémnaca stsebomñese. <sup>12</sup> Atše sëndétatšëmbo ntšamo yomna jtsiyenana chë vida jtsebomnama uajaboto soyënga tojtsashbenëse, y ntšamo yomna jtsiyenana chë tcuajabótama más bëtscá jtsebomñese. Atše tijuatsjinýe oyejuayá jtsemnana masque nýe ndaye soyënguiñnaca stsemna ora, jasama bëtscá stsebomna ora o masque nýe shëntseca jtsemnama šojtsemna ora, atše jtsiyenama bëtscá soyënga stsebomñese o masque ndóñnaca. <sup>13</sup> Atše lempe chca sëndobena, atše obenana jtsebomnama Cristo endbétsamayeca. <sup>14</sup> Masque chcasna, tšëngaftanga tšabá šmonjama, atše padecena soyënguiñe sënjamna ora atše juajabuáchana.

<sup>15</sup> Tšëngaftanga, chë Filipos puebloca Jesucristbeñe ošbuáchiyënga, corente šmondétatšëmbo, Macedonia luarentšana sënjëftsanbocna ora, nýe tšëngaftanga atše šmonjanájabuachama; inýe ošbuáchiyënga ndoñe. Chora enjamna atšbe bojatšena tempo tšëngaftangbe luarentše chë tšabe noticiënga entšanga abuaiynayiñe; y nýe tšëngaftanga atše šmonjanájabuache. <sup>16</sup> Ba soye atše Tesalónica puebloca sënjamna ora, y chašmuájabuachama šonjanájaboto ora, tšëngaftanga atšbe opresidëngama crocénana šmonjanafja. <sup>17</sup> Chca ndoñe quenátayana atše tsjuabná nýe tšëngaftangbentšana ndayánaca jóyëngacñama ca; chë sóyeca atše sëntseboše ndayá tšëngaftanga más tšabe soyënga chašmotsamama, Bëngbe Bëtsá tšëngaftangbiama más chaotsóyejuama. <sup>18</sup> Er atše ya lempe sënjóyëngacñe, y chë šuajabótama cabá más sëntsebomna. Atše chë ntšamo šjuajabotcá lempe sëntsebomna, chë tšëngaftanga Epafrodítóftaca šmonjanichmó soyëngaca. Ndayá atše šmojanichmocá, Bëngbe Bëtsabe bominýiñe puerte tšabá entsemna, mo juatšëmbonama ndayá tcojóba y altaroca tcojajuinýe y botamana tojtsonguëtšecá, chora cha oyejuayá chca jóyëngacñana. <sup>19</sup> Atšbe Bëtsá, chabe bëtscá uámana y bëtš bomnánaca, echanjama tšëngaftanga lempe ntšamo cmëjabotcá Cristo Jesusbiajana chašmóyëngacñama. <sup>20</sup> Entšanga nýets tempo chamotsinýanýná Bëngbe Bëtsá y Bëngbe Taitá puerte uamaná bëtsemnama. Chca chaotsemna.

#### *Chënga jtadiósoftanama*

<sup>21</sup> Atšbe cuenta, nýetscanga chë Jesucristbeyeca Bëngbe Bëtsábenga imomnënga šmochjácheuaye. Atšeftaca montsemna Jesucristbeyeca catšátangnaca cmontsacheuaná. <sup>22</sup> Nýetscanga chë muentše Bëngbe Bëtsábenga imomnënga, y más chë romanëngbe mandadbe bëtš yebnoca oyenënga, cmontsacheuaná.

<sup>23</sup> Atše sëntseimpadana Bëngbe Utabná Jesucristo, chaoma tšëngaftangbeñe tšabe bendicionënga chaotsemnama.

## Colosenses

### *Jacheuayama*

<sup>1</sup> Atše Pablo, Jesucristbe ichmoná Běngbe Bětsá chca yobóseyeca, y Jesucristbeyeca běngbe catšata Timotéoftaca, <sup>2</sup> quem tsbuanácha sěntsabiamná chě Colosas puebloca Běngbe Bětsábenga imomnėngbiamna. Tšěngaftanga běngcá Jesucristbeñe ošbuáchiyěnga šmondmėna, y chca, Jesucristbeyeca běngbe catšátanga. Atše sěntseimpadana Běngbe Bětsá Běngbe Taitá, chaoma tšabe bendicionėnga tšěngaftangbeñe chaotsemnama, y chaoma tšěngaftangbe ainaniñe tšabe ebionana chašmotsebomnama.

### *Pablo, Běngbe Bětsábioye tbojanimpadá Colosas puebloca ošbuáchiyěngbiamna*

<sup>3</sup> Běngbe Bětsá, Běngbe Utabná Jesucristbe Taitá tšěngaftangbiamna fstseimpadana ora, cha sempre fchandbėtsatschuanaye, <sup>4</sup> er běnga fsějńatatsěmbona ntšamo tšěngaftanga Cristo Jesúsbeñe tša šmojtsošbuáchema, y ntšamo tšěngaftanga nyetscanga chě Běngbe Bětsábenga imomnėnga šmababuáněshanama. <sup>5</sup> Natsanama, chě ndegombre buayenánama, chě tšabe noticiėnga, tšěngaftanga tcmojanabuatambá ora, tšěngaftanga botamana šmojanuena ntšamo chě buayenániñe bejtsayancá, chě tšěngaftanga šmojtsovena tšabe soyama jobátmana, Běngbe Bětsábeñe jtsošbuáchiyěse. Chě šmontsobatmana soye entsama tšěngaftanga Jesucristbeñe puerte chašmotsošbuáchema y nyetscanga chašmotsababuáněshanama. Běngbe Bětsá celoca enduaquėcńńa chě tšěngaftanga šmojtsovatmana tšabe soye. <sup>6</sup> Chě tšěngaftanga tcmojanabuayená tšabe noticiėnga más bėtscá entšanga montsuenana; y chca, nyets quem luarentše entšanga montsiyena más tšabe soyėnga jtsamėse. Chca entsemna ntšamo tšěngaftangbentše tojopasacá, chě natsana te chě tšěngaftanga Běngbe Bětsabe tšabiánama šmojanuena orscana, y ntšamo Běngbe Bětsá puerte bonshanánaca y tšabiánaca běngbioye šuaněyename ndegombre cmojanosėrta orscana. <sup>7</sup> Y chca Epafras tšěngaftanga tcmojanabuatambá, Běngbe Bětsabe bonshánama y tšabiánama. Epafras endmėna canya běngaftaca Cristbiamna oserverná, y cha běnga fsėndbobonshana; cha Cristbiamna endėtrabája běngbe cuenta tšěngaftangbentše. <sup>8</sup> Cha šonjáyuyana ntšamo chě Uámana Espíritu yojtsama, nyetscanga Jesucristbeñe ošbuachiyěngbioye chašmotsababuáněshanama.

<sup>9</sup> Lempe ntšamo tšěngaftangaftaca tojopasama, chě natsana te tšěngaftangbiamna fsějńanuena orscana y měntscońńama, Běngbe Bětsá sempre tšěngaftangbiamna fchandbėtseimpadana, cháftaca ftsencuėnta ora. Běngbe Bětsá fsėndėimpadana, chabe Espíritu chaoma tšěngaftanga chašmotsobena jtsetatšėmbuana y jtsosertánana, chca, ntšamo Běngbe Bětsá yobošcá chašmotsamama, tšěngaftanga tšabá chašmotsetatšėmbuama. <sup>10</sup> Y chca, tšěngaftanga šmochantsobena jtsiyenana jtsamėse ntšamo Běngbe Utabná yobošcá, y sempre šmochántsama ntšamo chabiamna tšabá yomncá. Ntšamo tšěngaftanga chašmojtсийencá tšabe soyėnga jtsamėse, chentsana nyetsca tšabe soyėnga echanjóbocna, y tšěngaftanga más tšabá Běngbe Bětsá šmochantsábuatma. <sup>11</sup> Atše, Běngbe Bětsá sěntseimpadana, chabe puerte bėtscá obenánaca cha chaoma tšěngaftangbe ainaniñe bėts añemo chašmotsebomnama; y chca, tšěngaftanga chě padecena soyėnguiñe chašmojtsemna ora, puerte uantadėnga chašmotsemnama, y ainaniñe añémoca Běngbe Bětsábeñe becá chašmotsobátmanama. <sup>12</sup> Y puerte oyejuayėnga Běngbe Taitá šmochántatschuanaye, nda iuama běnga chamotsobena ntšamo cha chabe entšanga jatšatayama tojašebuachenacá jtsebomnama. Tšěngaftanga šmochanjóyėngacńńe ntšamo cmojtsetocancá celoca, chě corente buashinějńyana luarentše. <sup>13</sup> Běngbe Bětsá běnga šojatsebacá, Satanás, chě ibetiñe luarentša mandayabe cucuatšentšana, y tojama chě chabe bonshana Uaquiñabe

amëndayana bēngbe ainaniñe chamotsebomnama; <sup>14</sup> chábeyeca Bēngbe Bētsá Satanasbe cucuatšentsana šojatsebacá; o mēntšá, chábeyeca Bēngbe Bētsá bēngbe bacna soyēnga šojtsaperdoná.

*Cristo tojanóbanayeca, entsanga Bēngbe Bētsáftaca tšabá jtsatsmēnana*

<sup>15</sup> Cristo tmonjáninye ora, bēnga tmojántatšēmbona ntšamo Bēngbe Bētsá yomnana; entsanga imojobena cha jinýama, pero Bēngbe Bētsábioye ndoñe. Cha, chē Bēngbe Bētsabe Uaquiñá, ya natsana yojtsemna lempe chē Bēngbe Bētsá tojanma soyēngama; y cha lempe chē soyēngama más uamaná endmēna. <sup>16</sup> Chábeyeca Bēngbe Bētsá tojama lempe ntšamo celoca y quem luarentše yobinýncá, lempe ntšamo chē entsanga imobena o ndoñe mondobena jinýama soyēnga, y chē espíritēngnaca chē imobena ínýēngbioye jtsamēndayana y obenana imobomna. Bēngbe Bētsá, chábeyeca y chabiamá tojama, lempe ntšamo quem luarentše yobinýncá. <sup>17</sup> Bēngbe Bētsá cabá nyetsca soyēnga ndama ora, Cristo ya yojtsemna; y chábeyeca mora yomna, lempe ntšamo quem luarentše chaotsemnana yojamncá. <sup>18</sup> Cha endmēna nda nyetscanga Bēngbe Utabnábeñe ošbuáchiyēnga iuamēnda, ntšamo chē bestšaše nyetsca chē cuerpentša soyēnga jtsemandayancá. Cha endmēna nda iuama ošbuáchiyēnga tsēm tšabe vida chamotsebomnama, y cha endmēna chē Bēngbe Bētsabe más bēts Uaquiñá. Bēngbe Bētsá tojanma, chē cachiñe ainēnga mochtatsmēnēnguentšana, cha chē natsaná chaotsemnana; nye cha canya chē más uamana luare chaotsebomnama, nyetscañe chaotsemándayama. <sup>19</sup> Er Bēngbe Bētsá yojanjuabná cachabiamá tšabá yojamna, lempe ntšamo cha yomncá, chabe Uaquiñábeñnaca chaotsemnana, <sup>20</sup> y Bēngbe Bētsá tojánbošena, Crístbeyeca nyetsca soyēnga quem luarentše y celoca, cháftaca tempcá tšabá chaotsatsmēnana. Bēngbe Bētsá chē soye tojanma, chabe Uaquiñá cruciñe tojanóbana ora y chabe buiñe tojanábuashana ora; y chca, Bēngbe Bētsá tojanma nyetsca soyēnga quem luarentše y celoca, cháftaca tempcá tšabá chaotsatsmēnana.

<sup>21</sup> Tempo, tšēngaftanga Bēngbe Bētsá stētsoye šmojanquedá y chábioye uayayēnga šmojamna, bacna soyēnga šmojanjuabná y šmojánama causa; <sup>22</sup> pero mora chabe Uaquiñáftaca, cha mo canye entsacá jóbane, Bēngbe Bētsá tojama tšēngaftanga tempcá tšabá cháftaca chašmotsatsmēnana; y chca tojama, tšēngaftanga chabe delante nyets tempo chašmotsemnana; chora tšēngaftanga, chabe entsanga, ainaniñe ndocna bacna soye ndbomnēnga chašmotsemnana, y ndocná chaondayana ntšamo šmojamncá ndoñe tšabá yontsemna ca. <sup>23</sup> Pero tšēngaftanga cmontsamna chē bētscá ošbuáchiyana šmondobomnana nyets tempo jtsebomnana, Bēngbe Utabnábeñe jtsošbuáchiyama ndocna te ntjajbanacá. Nyets tempo chē tšabe noticiēnguiñe šmochtsošbuáchiye, y ndoñe šmatjalesencia ndocná tšēngaftangbe ošbuáchiyana chaotrocama; y nye chca puerte jtsošbuáchiyēse Bēngbe Bētsábeñe šmochtsošbátmana, ntšamo tšēngaftanga šmojanmncá, Jesucristbiamá buayenánama šmojanuena ora. Chē buayenánana endmēna ntšamo ba entsanga nyetsca quem luarentša entsángbioye tmojabuayenacá, y atšbe trabajo endmēna cach tšabe noticiēngama entsanga jtsabuayiyayana.

*Pablo, ošbuáchiyēnga jaserviama trabajo tmojanbonjé*

<sup>24</sup> Atše corente sēnjesoyejúa mora tšēngaftangbiamá jasúfriama stsobenama. Ba entsanga entsamna jasúfriana Cristo jaserviama, y atše sēntsesufrina ntšamo Cristo tojansufriacá, mora atše jtseufrinēse chabe cuenta, ntšamo jasúfriama yomncá. Y ntšamo sēntsesufrincá entsemna Crístbeñe ošbuáchiyēngbe tšabiamá, chē chabe cuerpcá imomnēnga, chēnga Crístbēnga bētsemnana. <sup>25</sup> Bēngbe Bētsá atše šojábema chē Jesucristbeñe ošbuáchiyēngbe canye ujabuachaná. Cachá chē trabajuama šojanábuaiana, chca jamēse, tšēngaftangbe tšabiamá chaotsemnana. Chē trabajo endmēna, lempe ntšamo cha tojayancá entsanga jábuayenana. <sup>26</sup> Bēngbe Bētsá nyetsca entsanga ndoñe tonjanalesencia, quem luare jobojátšama orscana y nyets tempo chē buayenánama



chamotsetatšëmbuama; pero mora, chábenga imomnënga chë soye cha tojinÿanyé. <sup>27</sup> Bëngbe Bëtsá yoboše, chabe entsanga imomnënga chamotsábuatmama ndayá tempo chënga ndoñe tonjaninÿanyécá; y yoboše chë ndoñe judiënga jinÿanyiyama tša bëts y tšabe soye yomna chë ndegombre buayenánana, ndayá tempo inÿyenga ndoñe tonjaninÿanyécá. Chë tempo ndoñe yonjanótatšëmbo buayenánana entsemna, Cristo tšëngaftangbe ainaniñe yojtsiyena, y chábeñe puerte jtsošbuáchiyëse šmojtsovena jt-sobátmanana, Bëngbe Bëtsá puerte bëtsëtsanga y uámanënga chácmbiamama, batšá ntšamo cachá yomncá. <sup>28</sup> Bënga nÿetscángbioye Jesucristbiana fchandbëtsabuayiyenaye; fchandbëtsëtsësnaye ndayá chënga ndoñe yontsamna jtsamana, y fsëndbëtsabuatambaye nÿets osertánana ndayá chënga aíñe yojtsamna jtsamana, y chca, nÿetscángbioye Bëngbe Bëtsabe delante junatsama, puerte ošbuáchiyënga y osertánënga Bëngbe Bëtsabe soyënguiñe, chënga Crísoftaca cánÿiñe mo canÿacá jtsemnëse. <sup>29</sup> Chca chaotsemnana, atše bëtsá sëndëtrabája; y chca séntsama, chë Cristo yojtsama atše chaitsebomnana bëts obenánana.

## 2

<sup>1</sup> Atše sëntseboše tšëngaftanga chašmotsetátšëmbo, Bëngbe Bëtsá becá tsimpadánama, tšëngaftangbioye jujabuáchama, chë Laodicea puebloquënga Jesucristbeñe ošbuáchiyënga y nÿetscanga chë ndocna te atše šmonjinÿe ošbuachiyëgnaca. <sup>2</sup> Atše chca sëndama, tšëngaftanga y chënga ainaniñe bëts añemo chašmotsebomnana, y cánÿiñe mo canÿacá chašmotsemanama, nÿetscanga jtsenbobonshánëse. Chca, nÿets osertánana tšëngaftanga chašmotsebomnana, y chë tempo Bëngbe Bëtsá entsanga ndoñe tonjaninÿanyé buayenánama chašmotsetatšëmbuama, y chë buayenánana Cristbe soye entsemna. <sup>3</sup> Mo canÿe bëtsá bomnana iytëmena soycá pero mora ya uínÿenana, cachcá Crístbeñe entsemna nÿets osertánana y obenana Bëngbe Bëtsá jtsabuatumama. Chë soye tempo Bëngbe Bëtsá entsanga ndoñe tonjaninÿanyé, pero mora Cristo yojtsama bënga chë uámana soyënga chamotsebomnana. <sup>4</sup> Atše chca séntsichamo, botamana pal-abréngaca ndocná chacmondáingñema. <sup>5</sup> Er masque choca tšëngaftangaftaca atše ndoñe quetsátmëna, atšbe ainana aíñe choca tšëngaftangaftaca entsemna; y atše puerte sëntsoyejuá tšëngaftanga šmatenëyeunanama y nÿets tempo Bëngbe Bëtsábeñe šmojtsošbuáchema.

*Crísoftaca cánÿiñe mo canÿacá jtsemnëse, entsanga ndegombre tšabe vida jtsebomnana*

<sup>6</sup> Tšëngaftanga Jesucristbeñe ošbuáchiyënga šmojanóbiana ora, šmojanayana: “Cristo Jesús, Bëngbe Utabná entsemna ca”. Chcasna, tšëngaftanga cmontsamna jtsiyenana soyënga jtsamëse mo chë cháftaca cánÿiñe mo canÿacá tojtsemnacá. <sup>7</sup> Chca šmotsobena jamana, cháftaca cánÿiñe mo canÿacá nÿets tempo jtsemnëse. Smochtsiyena jtsamëse ntšamo cha tojabuatëmbacá y cada te más chca. Cabá más šmochtsošbuáchiye chë Crístbiana buayenana soyëngama, ntšamo tcmojabuatumambacá; y Bëngbe Bëtsá sempre smochtsatschuanaye.

<sup>8</sup> Cuedado šmochtsebomna, ndoñe šmatjaleséncia ndocná chaondëtsamama tšëngaftanga jtsajbanama Crístbeñe ošbuáchiyana jtsebomnana. Chca entsanga montseboše juabnéngaca tšëngaftanga jáingñama, nÿe básefta entsangbe juabnénga y tondayama ndoservena juabnénga. Chë juabnénga jtsóbocanana ntšamo bëts taitanga básëngbioye mondbetsabuátambayentsana y chë espíritëngbentsana, ndëmuanÿëngbiana entsanga jtsejuabnayana chënga nÿetsca soyënguiñe imománda ca; pero Crístbentsana chë juabnénga ndoñe ntsóbocanana.

<sup>9</sup> Cristo endmëna cachcá ntšamo Bëngbe Bëtsá yomncá, masque mo canÿe entsacá quem luarentše yojëftsiyena; <sup>10</sup> y Bëngbe Bëtsá tojama tšëngaftanga ndegombre tšabe vida chašmotsebomnana, Crísoftaca cánÿiñe mo canÿacá bëtsemnayeca; y Cristo, nÿetsca chë mándayënga y obenana bomnëngbiana más uamaná endmëna. <sup>11</sup> Tšëngaftanga Crísoftaca

cányiñe mo canyáca bétsemnayeca, mo uinýnananëngcá šmontsemna, tšëngaftanga Bëngbe Bëtsabe entšanga šmomnana. Quem uinýnanánana ndoñe quenátsmëna mo chë más delicadentse base bobachtema tmojatëtšcá, cach entšángbeyeca ntšamo judiënga monduamancá, pero aïñe entsemna cach Cristo nda tmojauinýnaná; y chë uinýnanánana entsemna, tšëngaftangbe ainanentšana Cristo bacna juabnënga jabuajuánayana. <sup>12</sup> Tšëngaftanga šmojánenabaye ora, enjamna mo ntšamo cach Cristo tmojanatbontsacá tšëngaftanga utebuantsánënga cuaftsemncá, er tšëngaftanga šmojanajbaná jtsamana chë tempo šmojánama bacna soyënga; y ntšamo Cristo cháuatayenama Bëngbe Bëtsá tojamcá, cachcá, tšëngaftanga šmojánenabaye ora, enjamna mo tšëngaftanga chašmatayenama Bëngbe Bëtsá cuafjamcá, er mora tšëngaftanga mo tsmëma entšangcá šmondoyena. Chca tojanopasá, Bëngbe Bëtsá obená bétsemnana tšëngaftanga šmojtsošbuáchema, y chë obenana tojama Cristo cháuatayenama.

<sup>13</sup> Inye tempo tšëngaftanga Bëngbe Bëtsabiana mo obanëngcá šmojamna, yapa bacna soyënga jtsamama šmojanamana causa y uinýnanánënga mo Bëngbe Bëtsabe entšangcá ndoñe šmonjámnyayeca, pero aïñe šmojanamana bacna soyënga jtsamana nýe ntšamo šmojanbošcá. Morna Bëngbe Bëtsá tojama tšëngaftanga tšabe vida chašmotsebomnana, Crístoftaca cányiñe mo canyáca jtsemnëse, y Bëngbe Bëtsá bëngbe nýetsca bacna soyënga šojtsaperdoná. <sup>14</sup> Mo nda ba ndebénënga tojtsabamna y chama tsbuanachangá tojtsamna y chiñe tojtsayana chënga obligaciönaca imojtsemna chë ndebénana pronto jtobocana ca, pero chë entšá chëchangá tojtsandbiama chë entšanga cha ndoñe más chamondëtsendebénama, Bëngbe Bëtsá cachcá tojama, bacna soyëngama bënga šojtsaperdoná ora. Jesús bëngbe bacna soyëngama cruciñe tojanóbana ora, enjamna mo Bëngbe Bëtsá bëngbe ndebénana tojtsanpochocá cuenta. <sup>15</sup> Jesucristo cruciñe tojanóbanayeca, Bëngbe Bëtsá tojanayënjaná Satanás y chabe bacna espíritënga obenana bomnënga y ínýengbioye amëndayënga; y nýetsca entšangbe delante tojaninýanyé cha chënga jtsamëndayama yobenama, mo canýe reycá chë ínýënga tojayënjaná ora, chabe entšángaftaca natsana jtsayana y chë ayënjanánëngna ústonoye.

*Ainaniñe becá jtsebošana chë ošbuáchiyëngbiama celoca yomna soyënga*

<sup>16</sup> Ndoñe caso šmattsabiamnaye, ndoñe tšabá šmontsama ca ínýënga tšëngaftangbiama tmojtsichamo ora, ndayá tšëngaftanga šmétsesaye o šmétsosfšëšnayama, o ndayá aïñe o ndoñe šmondbétsamama Bëngbe Bëtsá jadórana fiestënga ora o shbojueta fiesta ora, o jóchnama tese. <sup>17</sup> Bayté entsemna, Bëngbe Bëtsá entšangbe cucuatšinë chë mandënga tojáboshjona, chë soyëngama bënga jabuátambama. Chë mandëngaca Bëngbe Bëtsá yojaninýanýnaye ndayá más chcoye jopásama; entšángbioye yojaninýanýnaye ndayá Cristo yochjanmama. <sup>18</sup> Báseftanga mondmëna y chënga mo nduamanëngcá entšángbeñe jtsebínýnana, pero tsoye cachënga corente uámanënga jtsenobiamnayana y angelënga jtsadórayana, mo Bëngbe Bëtsá cuaftsemncá. Ndoñe caso šmattsabiamnaye, tšëngaftanga ndoñe tšabá šmontsama ca chënga tmojtsichamo ora, ntšamo chënga tmojtsichamcá tšëngaftanga ndoñe šmontsámayeca. Chënga jtsichámuana bëts soyënga mo otjenayoquécá tmojinýe ca, y nýe cachënga puerte jtsenábotamnayana, pero chca chamotsamama razón ndoñe quemátbomna, er nýe ntšamo inye entšanga imnetsejuabnaycá chëngnaca cachcá jtsejuabnayana. <sup>19</sup> Chënga Jesucristoftaca cányiñe ndoñe tmonjoquedanga, y Cristo endmëna chë nýetsca ošbuáchiyëngbe amëndayá, mo chë bestšaše nýets cuerpo jtsemandayancá. Canýe cuerpiñe chë bestšaše jtsamana nýets cuerpo chaóbochema, ntšamo Bëngbe Bëtsá tojtsebošcá, chë cuerpo ndayá jasama chaotsebomnana jtsamëse, y nýetsca chë cuerpentša soyënga chamenefjanama jtsamëse. Cachcá, Cristo jtsamana nýetsca ošbuáchiyënga cányiñe mo canyáca cháftaca chamotsemnana, y cada te más tšabá cha chašmotsábuatmama.

<sup>20</sup> Cristo tojanóbana ora enjamna mo tšëngaftángnaca cuafjobancá, y Bëngbe Bëtsá tšëngaftanga cmojatsebacá chë quem luarentse imománda espíritëngbe cucuatšëntšana.

As, ¿tšëngaftanga ndáyeca šmojtšiyena jtsamëse mo chë nÿe quem luarama enojuabnayëngcá? ¿Ndáyeca tšëngaftanga cabá šmobedecena chca mandënga, mo: <sup>21</sup> “Chë soye ndoñe matsbanana, chca soye ndoñe catjase, o chë soye acbe cucuátšeca ndoñe catjaca ca”? <sup>22</sup> Lempe chë mandënga, chë ndayá canÿa ndoñe bontsemna jamana, nÿe soyëngama jtsayanana, y tempo tojochnëngo ora, chë soyënga jtsopochócana y chora tondaye ntsámanana. Chë mandënga jtsemnana nÿe ntšamo entšanga mondbetsamcá y ínÿengbioye mondbetsabuatambaycá. <sup>23</sup> Ndegombre, ba entšanga jtsejuabnayana chë mandënga tmojamëngbiama, puerte osertanáncá chca tmojama ca, pero ndegombre chca ndoñe quenátsmëna; er chënga jtsichámuana, ntšamo Bëngbe Bëtsá jadórana yomncá imojtsabuatambá ca, jtsabuátambayana entšá cabnmëna uamaná ndoñe ntsenobiamnayana ca, y jabuache cachabe cuérpoca jtsamana ca. Pero chë mandënga tondaye ntsámanana, er chë mandënga entšangbe ainanentšana ndoñe ntjajuánana chë bacna soyënga jtsamama juabnënga.

### 3

<sup>1</sup> Cristo cháuatayenama Bëngbe Bëtsá tojanma ora, enjamna mo tšëngaftángnaca Crístbeñe ošbuáchiyënga, chašmatayenama cha cuafjamcá. Chíyeca, tšëngaftangbe ainaniñe puerte šmochtseboše ndayá Bëngbe Bëtsá celoca tšëngaftangbiama yobomncá; y choca, Cristo uámana puestentše endëtbemana, Bëngbe Bëtsabe catsbioica. Y šmochtsinÿinÿnaye chca šmojtsebošama, ntšamo jtsamëse mora šmojtšiyenama. <sup>2</sup> Tšëngaftanga nÿets tempo chë celoca soyëngama šmochtsejuabnaye, ndoñe chë nÿe quem luarentše yomna soyëngama. <sup>3</sup> Tšëngaftanga Crísoftaca cánÿiñe mo canÿacá jtsemnëse, jtsemnana mo tšëngaftanga ya cuafjobancá, er mora ya ndoñe quešmátiyena tempcá jtsamëse. Cristo, Bëngbe Bëtsáftaca cánÿiñe mo canÿacá endmëna, y Cristo endmëna nda mora tšëngaftangbe vida yojtsinÿena. <sup>4</sup> Ndegombre, Cristo endmëna nda endama tšëngaftanga tšabe vida chašmotsebomnama; y quem luarentše cha cachiñe chaojtonÿná ora, tšëngaftángnaca chentše cháftaca šmochántsemna, y chora ntšamo Cristo corente uamaná y bëtsá yomnama Bëngbe Bëtsá yochjinÿanÿiycá, tšëngaftangbiámna echanjínÿanÿiye más bëtsëtsanga y uamanënga šmojtsemnama.

#### *Tempsca vida y morsca vida*

<sup>5</sup> Tšëngaftanga, ntšamo chë nÿe quem luarama enójuabnayënga mondbetsebošcá bošana lempe šmochtsajbaná. Ndocná chaondëtseboše ndaye bacna soye boyabása o shembásaftaca jtsamana, ni chca soyënguiñe ndoñe chaondëtsejuabná; ndoñe chaondëtšiyena nÿe ínÿengbiama bacna juabnënga jtsebošnëse, y ndoñe chaondëtseboše nÿe bëtscá soyënga ínÿengbiama más jtsebošnana, er chca jtsamana jtsayanana, chabiama más yojtsámana soyënga jtsebošnana, Bëngbe Bëtsá jatsbobonshánama. <sup>6</sup> Er entšanga mondmëna y chënga chca soyënga jtsamama jtsebošana, y Bëngbe Bëtsá ndoñe ntseyeunanana. Chca entšángaftaca Bëngbe Bëtsá puerte bochanjetna, y echanjamánda chë uabouana castigo chëngbeñe chaotsemnama. <sup>7</sup> Y tempo, tšëngaftanga šmojanियena jtsamëse, sempre nÿe chca bacna juabnëngaca, <sup>8</sup> pero mora tšëngaftanga cmontsamna lempe quem soyënga stëtšoye jaquédana: ínÿengaftaca jetnana, ínÿengaftaca rábiaca jtsemnana, ínÿabioye ntšamo jáborlama jtsebošana, ínÿengbioye joyánguanguana, y ndoñe tšabe palabrënga jtsóyebuambnayana. <sup>9</sup> Ndoñe šmattsenbuambnaye, er ntšamo tempo šmojamncá mora tšëngaftanga ya ndoñe cachcá quešmátsmëna, y mora ndoñe quešmátiyena jtsamëse ntšamo tempo šmojanamcá. <sup>10</sup> Y mora tšëngaftanga šmojashjache jtsemnama mo tsmëma entšangcá, y ntšamo tempo šmojanamcá ndoñe cachcá quešmátama. Bëngbe Bëtsá chca tsmëma entšangcá tcmojábiamá; y cha nÿets tempo yojtsama, tšëngaftanga cada te más ntšamo cha yomncá chašmotsemnama, chca, corente tšabá cha chašmuábuatmanama. <sup>11</sup> Chíyeca, ndayá Bëngbe Bëtsá tojamama, ndoñe judiënga y judiënga cachcanga mondmëna; chë más delicadentše base bobachtema

tétšenënga ndoñe más uámanënga quemátsmëna chë ndoñe chca mondmënëngbiamá; chë inye luarëngocana áshjajnënga, bën tjoye oyenënga, chë nye ínÿabiamá nyets tempo oservénënga y chë cachëngbiamá trabájayënga, nyetscanga cachcanga mondmëna. Chë nye ndayá iuámana endmëna Crístbeñe jtsošbuáchiyana y nyetsca ošbuáchiyëngbe ainaniñe cha yojtsemna jtsemádayama.

<sup>12</sup> Tšëngaftanga Bëngbe Bëtsábenga šmondmëna. Cha cmondábabuanÿeshana y tcmo-jabacacá chabe entšanga chašmotsemnama; chíyeca, tšëngaftanga cmontsamna ínÿenga jtsinÿanÿnayana nyetscangbiamá jóngmiamá šmuamanama, tšabe juabna ínÿengbiamá sempre šmnétsebomnama, cada ona chë ínÿenga chabiamá más uámanënga cuaftsemncá innétsejuabnayama, nyetscanga puerte bonshanánaca šmnétsënÿayama, y nyetsca pade-cena soyënguiñe corente uantadënga šmomnama. <sup>13</sup> Nyetscanga šmochtsenëuantana y šmochjenperdóna, nderado ntšamo nda ínÿabioye tbojaborlá y chama cha tbojt-satsëtná ora. Ntšamo Bëngbe Bëtsá tšëngaftanga tcmojaperdonacá, tšëngaftángnaca cachcá ínÿenga šmochjáperdonaye. <sup>14</sup> Lempe chë soyëngama más enduámana nyetscanga jtsenbobonshánana. Nyetscanga šmojtsenbobonshánëse, tšëngaftanga šmochantsobena sempre lempe chë inye soyënga corente tšabá jtsamana, ntšamo ndegombre chë soyënga jamama yomncá. <sup>15</sup> Cristo endama tšëngaftangbe ainaniñe tšabe ebionana chašmotsebomnama. Chë tšëngaftangbe ainaniñe tšabe ebionánaca šmochtsiyena nyetscanga natjëmbana, Jesucrístbeñe ošbuáchiyënga quetsomñecá. Bëngbe Bëtsá tcmojáchembo tšëngaftanga nyetscanga cánÿiñe mo canÿe cuerpcá chašmotsemnama, y chca, natjëmbana chašmotsiyenama. Bëngbe Bëtsá sempre šmochtsatschuanaye.

<sup>16</sup> Chë Crístbe puerte tšabe buayenana soyënga tšëngaftangbe ainaniñe nyets tempo šmochtsambaye. Nyets osertanánaca šmochtsenbuátëmbaye y šmochtsenbuayiynaye. Nyets ainánaca šmochjacánta chë Salmos librëšañe uabemana cantënga, chë Jesucrístbe soyëngama cantënga, y chë Bëngbe Bëtsabe Espíritu iuama tšëngaftanga chašmotsobena jacántama soyënga; chca šmochjama Bëngbe Bëtsá jëtschuayama. <sup>17</sup> Y lempe ntšamo chašmojtsama o chašmotsichamcá, Bëngbe Utabná Jesúsbeñe ošbuáchiyënga quetsomñecá chca šmochjama, sempre Bëngbe Bëtsá Bëngbe Taitábioye, chábeyeca jtsatschuanayëse.

### *Ntšamo ínÿengaftaca jtsiyenama*

<sup>18</sup> Shémanga, šmochtsatátšëmbo tšëngaftangbe boyanga chë yebnentša mándayënga imomnama, y nyets tempo chca jtsejuabnayëse šmochtsiyena, er tšëngaftanga Bëngbe Utabnábeñe ošbuáchiyënga quetsomñecá, chca cmontsamna. <sup>19</sup> Boyanga, tšëngaftangbe shémanga sempre šmochtsababuánÿeshana, y podesca palabrëngaca ndoñe šmattsëtsëtnaye.

<sup>20</sup> Básenga, tšëngaftangbe bëtsëtsanga nyétscañe šmochtsayaunana; chca šmojtsamëse, Bëngbe Bëtsá oyejuayá echántsemna. <sup>21</sup> Taitanga, ndoñe šmattsama tšëngaftangbe básenga chauetënama, ainaniñe tondaye añémoca chënga ndoñe chamondëtsatšmënama.

<sup>22</sup> Tšëngaftanga chë nyets tempo nye ínÿabiamá oservénënga, tšëngaftangbe nduiñënga nyétscañe šmochtsayaunana, y ndoñe nye chënga tcmojtsënÿa ora, mo nda nye entšangbe delante tšabá joquédama tojtsebošacá, ndayá chënga šmochtsayaunana nyets ainaniñe ndegombre tšabe juabnëngaca, er tšëngaftanga Bëngbe Utabnabiamá corente respeto šmondobomna. <sup>23</sup> Lempe ntšamo chašmojtsamcá, nyets tšëngaftangbe añémoca šmochtsama, mo Bëngbe Utabná ndegombre cuaftseservencá, y ndoñe nye entšangbioycá. <sup>24</sup> Tšëngaftanga ya šmondëtatšëmbo, ntšamo cha chabe entšanga to-jašebuachenacá mo uacanancá, Bëngbe Utabná tšëngaftanga cmochjátšatayama. Er Cristo, chë Utabná, endmëna ndábenga tšëngaftanga šmomnana, y cha šmondëserveda. <sup>25</sup> Pero chë ndoñe tšabe soyënga tontsamábioye, Bëngbe Bëtsá bochanjacástiga, ntšamo chë entšá bacna soyënga tojamcá, er Bëngbe Bëtsabiamá nyetscanga cachcá monduámana.



## 4

<sup>1</sup> Y tšëngaftanga, ndëmuanyëngbiamá ínÿënga nÿets tempo imoservena, nÿetsca soyënguifne tšabá šmochtsama, y nÿetscangbiamá cachcá šmochtsemna, chë nÿets tempo nÿe tšëngaftangbiamá oservenëngaftaca, er tšëngaftanga šmondëtatšëmbo celoca canÿa endmëna, ndabiamá tšëngaftangnaca oservënënga šmondmëna.

### *Ošbuáchiyënga jábuayenama*

<sup>2</sup> Nÿets tempo Bëngbe Bëtsáftaca šmochtsencuëntaye, ntšamo šmojtsichámuama botamana jtsejuabnayëse y Bëngbe Bëtsá jtsatschuanayëse. <sup>3</sup> Bëngbe Bëtsáftaca cha šmojtsencuënta ora, bëngbiámnaca chašmochtseimpadana, cha chaoma bënga fchayobenama Bëngbe Bëtsabe palabra Cristbiamá entšanga jábuayenama, chë buayenana soye ndayama tempo entšanga ndoñe monjántatšëmbo. Atše chë buayenana soye entšanga abuátambaye causa, mora cárceloye sentsëtámena. <sup>4</sup> Chcasna, Bëngbe Bëtsá atšbiamá šmochtseimpadana, atše chayobenama chë buayenana soyënga entšanga jabuátambama, y chë soye atše chaima chënga corente tšabá catafjosertaycá, er atše šontsemna chca jamana.

<sup>5</sup> Smochtsiyena nÿetsca soyënga osertanánaca jtsamëse chë Jesucristbeñe ndošbuáchiyëngaftaca, y chca, nÿets tempo ínÿënga šmochtsinÿanÿnaye tšëngaftanga Jesucristbeñe ošbuáchiyënga bëtsemnama. <sup>6</sup> Inÿëngaftaca chašmojtsencuënta ora, šmochtsama ntšamo šmojtsoyebuambnacá chëngbiamá tšabá chaotsemnama, y soyënga šmochtsichamo nÿetscanga oyejuayana chamotsebomnama; y šmochtsetátšëmbo ntšamo cmojtsamna cada cánÿabioye jojuana.

### *Jtadiósoftanama*

<sup>7</sup> Jesucristbeyeca bëngbe bonshana catšata Tíquico, canÿe trabajayá tšabe palabra bomná y Bëngbe Utabnabiamá bëngaftaca oservená, tšëngaftangbioye noticiënga echanjuamba ndayá átšeftaca tojopasama. <sup>8</sup> Chiyeca cha tšëngaftangbioye sentsichamná, chca, tšëngaftanga chašmotsetatšëmbuama ndayá bëngaftaca yojtsopasana, y cha chacmañëmuayama. <sup>9</sup> Cháftaca Onésimo echanjá, Jesucristbeyeca bëngbe bonshana catšata; cha canÿe tšabe palabra bomná endmëna, nda tšëngaftangbiocana tonjánabo. Chata tšëngaftanga cmochanjácuntaye lempe ntšamo muiñe yojtsopasancá.

<sup>10</sup> Aristarco, muentše átšeftaca cárceloye utamená, cmontsacheuaná. Y Marcos, Bernabebe primo, chánaca cmontsacheuaná. Tšëngaftanga ya buayenánënga šmontsemna ndayá jamama cmojtsamnana, Marcos tšabá jofjama, cha tšëngaftanga jautsëtsayama tojase. <sup>11</sup> Jesús, chë Justo cánaca uabainá, chánaca cmontsacheuaná. Quem pueblentša nÿetsca judiënga ošbuáchiyënguentsana, nÿe chë unga átšeftaca mondëtrabája, Bëngbe Bëtsabe amëndayana entšangbioye chaóshjanguama, y chënga mondama atše ainaniñe bëtš añemo chaitsebomnama. <sup>12</sup> Epáfrasnaca cmontsacheuaná, inÿe tšëngaftangbiocá y cha Cristo Jesusbiamá jatrabájama endoservena. Cha nÿets tempo tšëngaftangbiamá Bëngbe Bëtsábioye tša bochandbëtseimpadana, tšëngaftanga Bëngbe Utabnábeñe ošbuáchiyana ndocna te chašmondájbanama, y nÿets tempo chašmotsiyena lempe jtsamëse, ntšamo chë Jesucristbeñe corente ošbuáchiyënga jtsiyenana yojtsamncá; y chca, tšëngaftanga corente šmochántsetatšëmbo ntšamo šmojtsamncá ndegombre yomna ntšamo Bëngbe Bëtsá yobošcá. <sup>13</sup> Cach atše sënjinÿe y sentsobena jayanama ntšamo cha jabuache yotrabájama, tšëngaftanga jujabuáchama, chë Laodicea puebloquënga y Hierápolis puebloca oyenëgnaca. <sup>14</sup> Lucas, bëngbe bonshana ashnayá, cmontsacheuaná; y Démasnaca.

<sup>15</sup> Chë Laodiceoca Jesucristbeyeca catšátanga bëngbe cuenta šmochjácheuaye. Ninfábioynaca šmochjachuaye, y nÿetsca ošbuáchiyënga chë Bëngbe Bëtsá jëtschuayama chabe yebnentše jénefnama imuamanëgnaca. <sup>16</sup> Quem tsbuanácha chašmojualiá chentšana, Laodiceoca ošbuachiyëngbioye šmochjuíchmua, chócnaca mëcha

chamualiamá; y tšëngaftágnaca šmochjualía chë Laodiceoca ošbuachiyëngbioye tmonjanichmó tsbuanácha, chëcha tšëngaftangbioye chaojuáshjango ora.

<sup>17</sup> Arquipo šmochjauyana yejuana chaotsantješna chë Bëngbe Bëtsá tbojabonyé trabajo sempre tšabá chaotsocumplínama.

<sup>18</sup> Atše Pablo, nýe quem palabrënga tšëngaftanga jacheuayama cach atšbe cucuátšeca sëntsabiarná. Smochtsenójuabnaye atše utamená stsemnama. Atše, Bëngbe Bëtsá sëntseimpadana, cha chaoma tšabe bendicionënga tšëngaftangbeñe chaotsemnama.

# 1 Tesalonicenses

## *Jacheuayama*

<sup>1</sup> Atše Pablo, Silvano y Timotéoftaca, quem tsbuanácha sentsabiamná tšëngaftangbiamá, chë Tesalónica bëts puebloca Jesucristbeñe ošbuáchiyëngbiamá, tšëngaftanga chë Bëngbe Bëtsá chë Taitá y Bëngbe Utabná Jesucristoftaca cányiñe mo canyácá šmomnënga. Atše sëntseimpadana Bëngbe Bëtsá, chaoma tšabe bendicionënga tšëngaftangbeñe chaotsemnama, y tšëngaftanga ainaniñe tšabe ebionana chašmotsebonnama.

## *Pablo Bëngbe Bëtsábioye tbojtanchuá chë Tesalónica pueblentsa entsangbe ošbuáchiyama*

<sup>2</sup> Bënga sempre Bëngbe Bëtsá fsëndëtschuaná tšëngaftangbiamá, y bënga cháftaca ftsencuénta ora, tšëngaftangbiamá fchandbëtsëimpadana. <sup>3</sup> Bënga, Bëngbe Bëtsá chë Taitáftaca ftsencuénta ora, fsëndbëtsenojuabnaye ntšamo tšëngaftanga šmotrabájama, Jesucristbeñe ošbuáchiyana šmobómnayeca; ntšamo tšëngaftanga tša ínÿenga šmëjabuáchana, Jesucristo šmobobonshánayeca; y ntšamo tšëngaftanga, ndocna te ntjajbanacá, jtsošbuáchiyëse Bëngbe Utabná Jesucristbeñe šmobátmanama. <sup>4</sup> Jesucristbeyeca catšátanga, bënga fsëndëtatšëmbo Bëngbe Bëtsá cmababuánÿeshanama, y cha tcmojábacacama chábenga chašmotsemnama. <sup>5</sup> Bënga chë tšabe noticiënga Jesucristbiamá tcbonjanabuayená ora, ndoñe ñye bënga jóyebuambayëse chca quenjatšmëna, ndayá chë Uámana Espíritbe obenanácnaca, y bënga corente jtsejuabnayëse chë buayenánana ndegombre soye bëtsemnama. Tšëngaftanga corente šmondëtatšëmbo ntšamo bënga ftsjamna tšëngaftangaftaca fsënjamna ora, tšabe soyënga tšëngaftangbiamá nguayíñe.

<sup>6</sup> Chora, ntšamo bënga fsënjanamcá y ntšamo Bëngbe Utabná enjanियencá, tšëngaftanga šmonjanontsé amana; y chë buayenánana šmonjanóyëngacñe chë Uámana Espíritu tcmojanatsatá oyejuayánaca, masque ínÿenga tmojamna tšëngaftanga puerte chašmosufrima.

<sup>7</sup> Mëntsá, tšëngaftanga uánatsanënga šmonjanobiamá ntšamo ndegombre jtšiyenama, ñyetsca Macedonia y Acaya luarentša Jesucristbeñe ošbuáchiyëngbiamá. <sup>8</sup> Tšëngaftanga šmojoyebuambá Bëngbe Utabná Jesucristbe palabrama. Mora, ndoñe ñye Macedonia y Acaya luarentše entsanga chama quemátstatsëmbo –ñyets luarenache entsángnaca montsetátšëmbo ntšamo tšëngaftanga Bëngbe Bëtsábeñe šmojtsošbuáchema –y chca, bënga tondaye más quešnátëjajoto tšëngaftangbiamá jatichámuama. <sup>9</sup> Cach entsanga montsoyebuambná chë bënga tcbonjánabuache ora tša tšabá tšëngaftanga šcojanëbuajama. Chëngnaca montsichamo ntšamo tšëngaftanga šmojtšajbaná chë šmojanjuabná diosënga yojamna soyënga adórayana y šmojanontsé chë tšabe benache jtishachama, y chë Bëngbe Bëtsá ndegombrá y ainá jaserviama, <sup>10</sup> y chca, chabe Uaquiñá Jesús jobátmama; mua celocana echanjésabo; chabiamá Bëngbe Bëtsá tojanma obanënguentšana cháuatayenama, y cha šochanjátsebacaye chë uabouana castigüentšana, Bëngbe Bëtsá entsangbe bacna soyëngama chëngbiamá yobomnentšana.

## 2

### *Ntšamo Pablo yojantrabája Tesalónica puebloca*

<sup>1</sup> Cach tšëngaftanga, Jesucristbeyeca catšátanga, šmondëtatšëmbo bënga tcbonjánabuache ora ndoñe ñye bonamente quenjatšmënama. <sup>2</sup> Tšëngaftanga šmondëtatšëmbo, bënga cabá tšëngaftangbioye nda ora, Filiposoca šonjanëyánguango y bacá šonjánaborlama; y masque tšëngaftangbioca bëngbe contra entsanga monjamna, Bëngbe Bëtsá tonjanma bënga fchayobená chë tšabe noticiënga bëtscá añémoca jabuátambama. <sup>3</sup> Er bënga entsángbioye bostero soyënga ndoñe queftsjatanabuayiyná, tšëngaftangbiamá bacna

soyënga ndoñe queftsjátanboše, y entsanga jáingñama ndoñe queftsjatanoyebuambná. <sup>4</sup> Bëngna inyetšá; Bëngbe Bëtsá yojanjuabná bënga chabe trabajo jamama obenënga ftsjamna ca, y chca, šonjanëbuáyana chabe tšabe noticiënga entsanga jabuátambama, y chca bënga fsëndoyebuambná; chíyeca bënga ndoñe nye entsangbe bominyiñe tšabá chaotsinýnama queftsátama, ndayá nye Bëngbe Bëtsabiama, nda chë ndayá bëngbe ainaniñe yomnama yotátšëmbo. <sup>5</sup> Ntšamo tšëngaftanga corente šmondëtatsëmbcá, bënga ndocna te tšëngaftangbiamia tšabe soyënga tifjánayana, tšëngaftanga bëngaftaca oyejuayënga chašmotsemnama; y ntšamo tšëngaftanga cbonjanëtsëtsnacá ndoñe quen-jatsmëna nye tšëngaftangbentsana ba soyënga bëngbiamia josháchiñama. Bëngbe Bëtsá chama yotátšëmbo. <sup>6</sup> Ndocna te bënga queftsatsnguá entsanga más uamanëngcá bënga chašotsabiamnama, ni tšëngaftangbentsana, ni ínýengbentsana.

<sup>7</sup> Masque bënga, Cristbe ichmónënga bëtsemnama, matifjanobená tšëngaftanga nye sempre jtsamëndayana, bënga ndoñe chca chibiátanma; bënga corente jtsababuányëshanëse cbonjánányena, ntšamo canye mamá chabe básenga jtsabëchayana y corente bon-shanánaca jtsanýenana. <sup>8</sup> Tša cbonjánababuanýëshanayeca, bënga ndoñe nye chë Bëngbe Bëtsabe tšabe noticiënga checbënjatanabuayená, tšëngaftanga chiñe chašmotsošbuáchema ntšamo bënga fsëndošbuachecá, ndayá bëngbe vidënga jáshbiamnaca fsënjanprontana tšëngaftangbe tšabiama. ¡Tša cbondábabuanýëshana! <sup>9</sup> Jesucristbeyeca bëngbe catšátanga, tšëngaftanga šmenabouínýna ntšamo bënga bëtscá y jabuache fsënjantrabajama, Bëngbe Bëtsabe tšabe noticiënga abuayiyñayañe y bëngbe vida onguayañe, chca, tšëngaftanga ndoñe chacmondëtsamnama bëngbe uajabótama bënga jatátšatnayama.

<sup>10</sup> Cach tšëngaftanga šmondëtatsëmbo y Bëngbe Bëtsánaca, ntšamo bënga ftsjamna tšëngaftanga chë ošbuáchiyëngaftaca fsënjamna ora; fsënjaninyena ntšamo Bëngbe Bëtsá tšabá tbojtsinýancá, nyetscángaftaca fsënjánama ntšamo jamama šojanamncá, y ndocná quenátobena jatichámuana ntšamo fsënjanamcá ndoñe tšabá yonjamna ca. <sup>11-12</sup> Tšëngaftanga šmondëtatsëmbo, bënga bëtscá jóyebuambayëse cada ona tšëngaftanguentsá cbonjanëjabuachanama y cbonjánañemuama, ntšamo canye taitá chabe básëngaftaca endbetsamcá. Bënga bëtscá cbonjanëtsëtsná ntšamo Bëngbe Bëtsá tšabá tbojtsinýancá chašmotsiyenama; y Bëngbe Bëtsá cmontsëbuájajana chabe amëndayoye jamashënguama y chabe obenana y buashinýinýanana jinýama.

<sup>13</sup> Bënga, Bëngbe Bëtsabe tšabe soyënga cbonjanabuayinýa ora, ntšamo tcbon-janëyancá tšëngaftanga šmonjanuena y šmontsanosbuaché mo Bëngbe Bëtsábiocana buayenanancá, y ndoñe nye entsangbe oyebuambnayancá. Y ndegombre Bëngbe Bëtsabe buayenánana endmëna, y chë palábraca, tšëngaftanga chë chábeñe ošbuachiyëngbeñe Bëngbe Bëtsá bëtscá soyënga yojsama. Chama sempre Bëngbe Bëtsá fsëndëtschuaná. <sup>14</sup> Jesucristbeyeca catšátanga, cach tšëngaftangbe luarentša entsanga cmonjanëcamena ora y šmonjansufrina, šmonjanpasá ntšamo chë Judeoca Bëngbe Bëtsábeñe ošbuachiyëngcá enefjuanënga tmonjanpasacá, y chëngna Cristo Jesusbe entsanga mondmëna. Chënga tmonjansufrí cach luarentša entsanga, chë judiënga, chëngbioye monjanëcamena ora. <sup>15</sup> Chë judiëngbe bëtš taitanga, Bëngbe Bëtsabe juabna oyebuambnayëngbioye tmojtsanëbaye, y ntšamo chëngbe bëtš taitanga tmojanmncá, chëngnaca Bëngbe Utabná Jesúsbioye tmojanóba, y chënga mondama bënga chaftsesufrínama. Chënga ndoñe tšábënga Bëngbe Bëtsabe bominyiñe quemátsmëna, y nyetsca entsangbe contra montsemna. <sup>16</sup> Chë ndoñe judiëngbioye, Bëngbe Bëtsá cháuatsebacama jábuayenama fstseboše ora, chë judiënga bëtscá jtsamana bënga ndoñe fchandobenama chca jamama. Judiënga nyets tempo bacna soyënga monjánama; pero chë entsanga jábuayenama bënga ndoñe fchandobenama jtsamana, entsemna chë último bacna soye ntšamo chë judiënga jamama imojtsobencá, más ya ndoñe; y mora, cabana, Bëngbe Bëtsá ya puerte chëngaftaca tbojetna y echanjácastigaye.



*Pablo tša yojánboše, Tesalónica puebloca entsanga jánjama*

<sup>17</sup> Jesucristbeyeca catšátanga, bēnga tšēngaftangbentšana baseftayté jēftseboचना sonjanotocá ora, masque ndoñe choca tšēngaftangaftaca queftsjátanmēna, sempre tšēngaftangbiama fsēnjanenujuabná, y tša fsēnjánboše tšēngaftangbioye jtésana jautsētsayama. <sup>18</sup> Bēnga fsēnjánboše tšēngaftangbioye jésana; chíyeca cach atše Pablo, ba soye sēnjanóshenguēnja jobenayama choye jésama, pero Satanás yojantrabája bēnga ndoñe fchandobenama chca jamama. <sup>19</sup> Atše sēntsanboše tšēngaftanga jautsētsayama, er tšēngaftangbeyeca Bēngbe Utabná Jesusbe delante, cha yochjésabo ora, ntšamo tšēngaftanga šmoyenama, bēnga puerte jtsošbuáchiyēse fchantsobátmana, corente oyejuayēnga fchtsemnana y más bētsētsanga fchtsemnana. <sup>20</sup> Aíñe, ndegombre, ntšamo tšēngaftanga šmoyenama, bēnga bētscá añémoca ntšamo tšēngaftangbeñe tifjamama fsēndbétsoyebuambnaye, y tša oyejuayēnga fsēntsemna.

### 3

<sup>1</sup> Chíyeca ya ndoñe chibiatanobená más jatobátmanana tšēngaftanga jautsētsayama; as fsēnjanjuabó nñe bēndata Atenas bēts pueblentše joquédana, <sup>2</sup> y jíchmuana Jesucristbeyeca bēngbe catšata Timoteo, chē bēngaftaca trabajayá, Bēngbe Bētsábioye oservéniñe, tšabe noticiēnga Cristbiama entsanga abuyiynayíñe. Fsēnjanichmó chacmañémuayama y chaotsamama tšēngaftanga Jesucristbeñe más chašmotsošbuáchema; <sup>3</sup> y chca, ndocná Jesucristbeñe ošbuáchiyana chaondájbanama, masque tšēngaftanga Jesúsbeñe ošbuáchiyēnga bétsemnana, ínñyēnga imojtsama chašmotsesufrínama. Er cach tšēngaftanga šmondētatsēmbo bēnga šojtsamna chca quem luarentše jēftsepadecénana. <sup>4</sup> Y cabá tšēngaftangaftaca fsēnjēftsemna ora, tcbonjanéyana bēnga šojánamna jasúfriana; y ndegombre chca tonjopasá, ntšamo tšēngaftanga ya šmondētatsēmbcá. <sup>5</sup> As y chē tšēngaftangbiama jtsetatsēmhuama más jatobátmanana ndoñe quetstétsoebenayeca, sēnjanjuabó šojétsemna Timoteo jíchmuana. Sēnjanichmó atše jtsetatsēmhuama aíñe bētscá o ndoñe tšēngaftangbe ošbuáchiyana Jesucristbeñe tayoamnama, er atše yapa sēnjanjuabná nderado Satanás tojanma tšēngaftanga bacna soyēnga chašmotsamama, y chca, bēngbe trabajo tondayama chaondētsooservénama.

<sup>6</sup> Pero mora, Timoteo tšēngaftangbiocana tontashjango y tonjúshjango noticiēnga, y bēnga chama oyejuayēnga fsēntsemna, ntšamo tšēngaftanga bētscá Jesucristbeñe šmojtsošbuáchema y nyetscanga šmenbobonshánama. Cha šonjacuntá ntšamo tšēngaftanga corente oyejuayēnga bēngbiama šmuatenujuabnama, y ntšamo tšēngaftanga tša šmojtseboše bēnga jánjama, cachcá ntšamo bēnga tšēngaftanga jánjama tša fsēntsebošcá. <sup>7</sup> Quem sóyeca, Jesucristbeyeca catšátanga, y mora chē bēnga nyetsca chē padecena soyēnga ftssebomna ora y ínñyēnga bēnga jasúfriana imojtsama ora, bēts añemo fsēntsebomna, ntšamo tšēngaftanga tša Jesucristbeñe šmojtsošbuáchema jtsetatsēmbēse. <sup>8</sup> Jtsetatsēmhuana tšēngaftanga sempre puerte tšabá Bēngbe Utabnáftaca šmoyenama, entsama bēnga más añémoca chaftsiyenama. <sup>9</sup> Mora fchantsovena Bēngbe Bētsá jtsatschuanayana tšēngaftangbiama, y chē tšēngaftangbeyeca chabe delante bēnga oyejuayana ftsbomnámna. <sup>10</sup> Cada te, bnētē y ibeta, tša Bēngbe Bētsá fsēndétseimpadana jobenayama tšēngaftanga jautsētsayama chašualesenciama, Bēngbe Bētsabe palabra tšabá chašmobedecema, chē buayenánana ntšamo yojtsashbencá jabuátambama.

<sup>11</sup> Bēnga, Bēngbe Bētsá fsēntseimpadana, cachá y Bēngbe Utabná Jesús, chašújabuache bēnga fchayobenama tšēngaftangbioye jama jautsētsayama. <sup>12</sup> Y Bēngbe Utabná chaoma más bētscá chašmotsenbobonshánama, y cachcá corente nyetscángaftaca, ntšamo bēnga cbondababuanñeshancá. <sup>13</sup> Chca, tšēngaftangbe ainaniñe bētscá añemo šmochántsebomna; y Bēngbe Utabná Jesús cachábengaftaca chaojésabo ora, Bēngbe Bētsá Bēngbe Taitabe delante ndocná chaundayana, ntšamo tšēngaftanga šmojamcá ndoñe tšabá yontsemna ca, er tšēngaftanga šmondmēna Bēngbe Bētsábēnga, nñe cha jtseservénama.

## 4

### *Ntšamo jtsiyenama, Bëngbe Bëtsá oyejuayá chaotsemnana*

<sup>1</sup> Y mora inye palabra smochjatspasencia. Jesucristbeyeca bëngbe catsátanga, tsëngaftanga bëngbentsana smonjanatsjinye ntšamo jtsiyenana cmojánamna, ntšamo Bëngbe Bëtsábioye oyejuayá jabemama yomncá, y ndegombre chca tsëngaftanga smondoyena. Y mora Bëngbe Utabná Jesusbe cuenta, cbontsaimpadana y becá cbontsëtsësná más chca chašmotsamama.

<sup>2</sup> Tsëngaftanga smondëtatsëmbo ndayá tifjánayana ntšamo tsëngaftanga chašmotsiyenama, y chca fsënjanna Bëngbe Utabná Jesús chca jamama sonjanamëndáyeca. <sup>3</sup> Bëngbe Bëtsá endboše tsëngaftanga chašmotsiyenama mo Bëngbe Bëtsabengcá, ndocná bacna soyënga boyabása o shembásaftaca chaondëtsamama, <sup>4</sup> y nyetscanga chamotsobena ntšamo canye shema jonguanguana, chë ntšamo canya Bëngbe Bëtsábia yomná jamama ibomncá, y ntšamo entsangbe bominyiñe tsabá yomncá, <sup>5</sup> y ndoñe chabondónguango nye cháftaca bacna soyënga chëngbe cuérpoca jamama, ntšamo chë Bëngbe Bëtsábioye nduabuátmënga mondbetsamcá. <sup>6</sup> Chë palabriñe ndocná chabe catsátbioye chabondëingñé, chë catsatbe shëmaftaca bacna soye jamëse, er chca amëngbioye Bëngbe Utabná corente echanjácastigaye. Chiyeca bënga ya bëtscá chama tcbonjabuayená. <sup>7</sup> Er Bëngbe Bëtsá ndoñe šonjánachembo bacna soyënga boyabása o shembásaftaca jtsamama, ndayá ntšamo tsabá yomncá jtsamama, ntšamo chabe entsanga mondbetsamcá. <sup>8</sup> Mëntsá, nda quem buatëmbana soyënga tojtsábotena, cha ndoñe nye entsanga jtsëbátenana, ndayá Bëngbe Bëtsábioye, nda tsëngaftangbe ainaniñe Uámana Espiritu cháumashënguama tojama.

<sup>9</sup> Atse ndoñe quešnátsmëna juabuábiamana ntšamo cmojtsamna inyënga Jesucristbeñe ošbuáchiyënga jtsababuányëshanama, er cach Bëngbe Bëtsá tcmonjabuatambá nyetscanga chašmotsenbobonshánama. <sup>10</sup> Y ndegombre, tsëngaftanga chca smondama nyetsca Macedonia luarentše Jesucristbeñe ošbuáchiyëngaftaca. Pero cbontsaimpadana, Jesucristbeñe catsátanga, más chca chašmotsamama.

<sup>11</sup> Nya sempre quem soyënguiñe smochtsentsena: natjëmbana jtsiyenana, inyëngbe soyënguiñe ndoñe ntsonremeténana, y ndoñe ntjatobatmanana nye inyënga tsëngaftangbiama chamotsetrabájama, ntšamo tcbonjanëyancá tsëngaftangaftaca fsënjanna ora; <sup>12</sup> chca smochtsama, chë inyënga Jesucristbeñe ndošbuáchiyënga chacmotsarrespetánama, y ndocnábeñe ntjatobatmancá smochantsobena jtsiyenana.

### *Bëngbe Utabná quem luaroye yochjésabo ora*

<sup>13</sup> Bëngbe catsátanga, bënga fsëntseboše tsëngaftanga ndegombre chašmotsetátëmbo ntšamo chë obanëngaftaca yochjopásama, y chca, tsëngaftanga ndoñe ngmenánaca chašmondëtsemnana, mo chë inyëngcá, chë tcojóbanentsana ndoñe yontsemna jtayenama ca juabnayëngcá. <sup>14</sup> Bënga fsëndošbuaché Jesús tojanóbana y tojtanyenama, y cachcá bënga fsëndošbuaché chë tmojóbanënga y Jesúsbeñe tmojtsošbuáchese, Bëngbe Bëtsá chëngbiama yochjama chë nyetsca tescama yomna tsabe vida Jesucristoftaca chamotsebomnana, y quem luaroye cháftaca chamuatábama.

<sup>15</sup> Chë soyama bënga cbontsëtsësná ntšamo cach Bëngbe Utabná tojëftsanabuatambacá: Bëngbe Utabná chaojésabo ora, chë ošbuáchiyënga chë te cabá ainënga chamojtsemnënga, chábioye ndoñe quemochátinyëna tsbanánoca, más natsana chë ya obanënga chë te mochtayenëngbiama. <sup>16</sup> Er entsanga mochanjouena canye mando juayebuáchenana, chë angelëngbe amëndayabe oyebuambnayana y chë Bëngbe Bëtsabe trompetëfjua juajatëtámnaca, y chora cach Bëngbe Utabná celocana echanjástjango. Y chë tmojóbanënga, Crístbeñe imojanošbuachenga, natsana mochántayena; <sup>17</sup> chentsana, chë ainënga chamojtsemnënga chëngaftaca cányiñe Bëngbe Bëtsá šochanjúyamba, Bëngbe Utabná yochtsemnoca jashjanguama, chë celoca jantšetëshënga endmënoca; as chentsana nyetsca tescama

cháftaca bēnga mochántsemna. <sup>18</sup> Quem palabréngaca nyetscanga ndoñe más ngménana ainaniñe chašmondětsebmna.

## 5

<sup>1</sup> Jesucristbeyeca catsátanga, ndoñe quenátsiyta atše jubuábiamana mocna ora chē soyēnga yochjopásama. <sup>2</sup> Cach tsēngaftanga corente šmondětatsēmbo, Bēngbe Utabná yochjésabo chama ndocná chaondětsejuabná ora, mo canye atbēbanacá jashjanguana ibeta ndocná chama tonjatsjuabná ora. <sup>3</sup> Entšanga chamojyana: “Lempe tsabá endětsomñe y tondayama quešnátamna játauatjana ca”, chora nye ndeolpe chē entšangbiama tša jasúfriama echanjóshjango, mo canye shembása šešona jtsebmnama ora nye ndeolpe jasúfriama jóntšancá; y ndegombre, entšanga chca jasúfriama quemochatotsbocá. <sup>4</sup> Pero tsēngaftanga catsátanga, ndoñe quešmátiyena mo ibetiñcá, bacna soyēnga jtsejuabnayēse y jtsamēse; y chca, Bēngbe Utabná chaojésabo ora, tsēngaftanga ndoñe auatjanánēnga quešmochátsmēna, mo ndábioye canye atbēbaná tbojotbá ora, chábioye cuaftsauatjanacá. <sup>5</sup> Nyetsca tsēngaftanga šmondmēna entšangbe juabna binynayabe básenga, y mo binyniñcá šmondoyena. Bēnga ndoñe chē ibetiñe mandayabe básenga quemuátsmēna, y mo ibetiñcá ndoñe quemuátiyena; <sup>6</sup> chíyeca bēnga ndoñe quešnátamna jtsemnana mo chē cachēngbe cuerpo jenomándama ndobenēngcá, chē mo cuaftsemangcá oyenēnga. Pero aiñe šontsamna mo chē fšnēngcá jtsiyenana, bēngbe cuerpo jtsemándayēse y nyets tempo jtseprontánēse. <sup>7</sup> Ibeta ora entšanga jtsemangana, y cach ibeta tojtsemna ora entšanga jotmenangana; <sup>8</sup> pero bēnga, chē binynentsēngna, šontsamna sempre bēngbe cuerpo jtsemándayana. Šontsamna Bēngbe Bětsábeñe jtsošbuáchiyana y cha jtsebobonshánana, chē uayaná Satanasbiama jenéuyanama y cha jayēnjanama, mo canye soldadcá, canye morocho soye cochaca jenáčochjatsana jtsevalentiamana y ndoñe chamondēyēnjanama. Y chē castigüentšana Bēngbe Bětsá šochjátsebacamnaca puerte jtsošbuáchiyēse jtsobátmanana; y chca, bēnga mochántsemna mo canye soldadcá, cha canye casquēse juabuchětsana jenéuyanama. <sup>9</sup> Er Bēngbe Bětsá ndoñe šonjáchembo bēnga chašotsamnana chē nyetsca tescama castigo jtsebmnama. Ndayá Bēngbe Bětsá šojabacacá, Bēngbe Utabná Jesucristbeyeca bēnga chamótsbocama. <sup>10</sup> Cha bēngbiama tojanóbana, bēnga cháftaca cányiñe jtsiyenama chamotsobenama, masque ainēnga o obanēnga chamojtsemnēse, cha chaojésabo ora. <sup>11</sup> Chíyeca, nyetscanga šmochtsenañēmuaye y šmochtsenájabuachana más jtsošbuáchiyama, ntšamo tsēngaftanga mora ya šmontsamcá.

### *Pablo choca ošbuáchiyēnga jábuayenama*

<sup>12</sup> Jesucristbeyeca catsátanga, cbontsaimpadana chašmotsarrespetana chē Bēngbe Bětsabiama tsēngaftangbeñe trabajayēngbioye, y chē Bēngbe Utabná tsēngaftanguentše tojábacacanga uánatsanēnga chamotsemnana y ntšamo jtsiyenama cmojtsamnana chácmbuayenama. <sup>13</sup> Cmontsamna chēnga jtsarrespetánana y jtsababuányēshanana, ndaye trabajo chēnga imojtsamama. Natjēmbana nyetscángaftaca šmochtsiyena.

<sup>14</sup> Quem soyēnga chašmotsamámncaca cbontsaimpadana: jatrabájama ndoñe tmontsebošēngbioye šmochjucácana, añemo ndbomnēngbioye šmochjáñemuaye, bětscá ošbuáchiyana ndbomnēngbioye šmochjújabuache, y uantadēnga nyetscángaftaca šmochtsemna.

<sup>15</sup> Cuedado šmochtsebmna, nderado nda bacna soye tbojaborlase, ndocná ndoñe cachcá chabondětachnēnguama. Masna, nye šmochtsentšena nyets tempo tsabe soyēnga jtsamama cach tsēngaftanguentšēngaftaca y nyetsca entšangaftácnaca.

<sup>16</sup> Nyets tempo oyejuayēnga chašmotsemna. <sup>17</sup> Sempre Bēngbe Bětsáftaca šmochtsencuéntaye. <sup>18</sup> Nyetsca soyēnguiñe Bēngbe Bětsá šmochtsatschuanaye; er chca entsemna ndayá cha yojtseboše, bēnga Cristo Jesúsbeñe ošbuachiyēngcá chamotsamama.

<sup>19</sup> Ndoñe šmattsama ntšamo chë Uámána Espíritu tšëngaftangbeñe yojtsamcá chaot-sopochocama. <sup>20</sup> Ndoñe šmattsábotena chë Bëngbe Bëtsabe juabna oyebuambnayëngbe buayenana soye. <sup>21</sup> Yeuana šmochjájuaboye y šmochjayana, chë Bëngbe Bëtsabe juabna oyebuambnayá yomna ca tojtsichamuabe buayenánama ndegombre Bëngbe Bëtsábiocana tayóbocanama, y chentša tšabe soyënga šmochjobuajo y sempre chca šmochtsama. <sup>22</sup> Nýetsca bacna soyënguentsána šmochtsojuánañe.

<sup>23</sup> Cach Bëngbe Bëtsá, chë bëngbe ainaniñe tšabe ebionana chamotsebomnama endamá, nýetsca soyiñe tšábenga chacá chacmabiamama, y nýets tšëngaftangbe espíritu, ainana y cuerpo chaotsinýena, Bëngbe Utabná Jesucristo chaojésabo orscama; y chora, ntšamo tšëngaftanga šmojamama bacna soyënga yojtsemna ca ndocná chaodayanama. <sup>24</sup> Nda tcmojúbuaja chábenga chašmotsemnama, cha sempre jtsamana ntšamo tojayancá, y lempe cha echanjama.

*Inýe rueguënga chëngbiama y jtadiósoftanama*

<sup>25</sup> Jesucristbeyeca catšátanga, Diosmanda, bëngbiámnaca Bëngbe Bëtsá šmochtseimpadana.

<sup>26</sup> Nýetscángbioye mo Jesucristbeyeca catšatangcá šmochjácheuaye, jtenámochëse, ntšamo cach tšëngaftangbe pamíllanga puerte bonshanánaca šmondetsacheuanaycá.

<sup>27</sup> Cbontsaménda quem tsbuanácha nýetsca Jesucristbeñe ošbuáchiyënga chašmëbuáliama, y chca sentsama, Bëngbe Utabná chca jamama šojanmandáyeca.

<sup>28</sup> Atše sëntseimpadana Bëngbe Utabná Jesucristo, chaoma tšabe bendicionënga tšëngaftangbeñe chaotsemnama.



## 2 Tesalonicenses

### *Jacheuayama*

<sup>1</sup> Atse Pablo, Silvano y Timotéoftaca, quem tsbuanácha sentsabiamná tšëngaftangbiamá, chë Tesalónica bëts puebloca Jesucristbeñe ošbuáchiyëngbiamá, tšëngaftanga Bëngbe Bëtsá chë Taitá y Bëngbe Utabná Jesucristoftaca cánÿiñe mo canÿacá šmommënga. <sup>2</sup> Atse sëntseimpadana Bëngbe Bëtsá, chaoma tšabe bendicionënga tšëngaftangbeñe chaotsemnama, y tšëngaftangbe ainaniñe tšabe ebionana chašmotsebomnama.

### *Cristo chaojésabo ora, ntšamo entšanga tmojamama Bëngbe Bëtsá echanjayana*

<sup>3</sup> Jesucristbeyeca bëngbe catsátanga, šontsamna nÿets tempo Bëngbe Bëtsá tšëngaftangbiamá jtsatschuanayana, ntšamo tšëngaftangbiamá jamama šojtsëtocancá, er tšëngaftanga cada te más ošbuáchiyana šmontsebomna, y ntšamo tšëngaftanga nÿetscanga šmojtsebomshana, tempscama más yojtsemna. <sup>4</sup> Tšëngaftangbe ošbuáchiyama y bonshánama, bënga nÿets tempo oyejuayënga fchandbëtsemna, chë ínÿenache Bëngbe Bëtsábeñe ošbuáchiyëngcá enefjuanëngbeñe tšëngaftangbiamá jóyebuambayama. Bënga fchandbëtsoyebuambnaye ntšamo tšëngaftanga inÿetsá ntjatsjuabnaycá Jesucristo šmëstonama, y ntšamo tšëngaftanga chábeñe tša šmošbuachémnaca, masque ínÿenga tša cmëcamena y chašmosufrima bëtscá imojtsama, tšëngaftanga Jesucristbeñe ošbuáchiyënga bëtsemnama. <sup>5</sup> Tšëngaftanga chca Cristo šmëstonayeca, corente entsinÿinÿena Bëngbe Bëtsá nÿetsca soyënguñe tšabá amá yomnama, y entšanga ntšamo tmojamama tšabá o ndoñe tšabá bëtsemnama jayanama ora, cha chca echanjayana ntšamo entšanga tmojtšomerecencá. Y chca entsayana tšëngaftanga aíñe merecido šmotsobuájoñe chabe amëndayoye jamashënguama ca; y mora, tšëngaftanga choye jobenayama jashjanguama šmojtšamama, ínÿenga imojtsama chašmotsesufrínama.

<sup>6</sup> Bëngbe Bëtsá echanjama ntšamo jamama ibomncá; echanjama chë tšëngaftanga chašmosufrima imojtsamënga bëtscá chamosufrima; <sup>7</sup> y echanjama tšëngaftanga y bënga chë mondësufrinëngbiamá, ndoñe más chamondëtsesufrinama. Cha quem soyënga echanjama, Bëngbe Utabná celoca chaojábobocna ora. Cha chabe puerte obenana bomna angelëngaftaca echanjabo, y chora bëtscá inëtsënga echántsemna. <sup>8</sup> Cha echanjabo chë Bëngbe Bëtsábioye jtsabuatmama ndoñe montsebošënga jabácastigayama, y chë tšabe noticiënga Bëngbe Utabná Jesusbiamá ndoñe montsuenanëngbioynaca. <sup>9</sup> Chënga Bëngbe Bëtsá echanjácastigaye, nÿetsca tescama jtsapochócase; y Bëngbe Utabná bentšana bënoca mochantsemnënga, y ndocna te quemochatobenaye jinÿama Bëngbe Utabná tša bëtsá y obená bëtsemnama. <sup>10</sup> Quem puerte uámana te, Bëngbe Utabná chaojésabo ora, nÿetsca chabe entšanga, nÿetsca chábeñe ošbuáchiyënga cha mochántšatschuanaye y mochántšichamo: “¡Tša obená cha yomna ca!” Y tšëngaftanga chëngaftaca šmochántsemna, er tšëngaftanga šmotsanošbuaché bënga ndegombre fsënjántatšëmbo soyënguñe, chë bënga tcbonjanabuayená soyënguñe.

<sup>11</sup> Chíyeca, chca chaotsemnama, nÿets tempo Bëngbe Bëtsábioye tšëngaftangbiamá fsëndëimpadana merecido bomnënga chácmbiamama, chë vida chašmotsebomnama, ndayama cha tcmojúbuaja, y chabe obenánaca bëtscá chaoma tšëngaftanga chašmobená nÿetsca tšabe soyënga ntšamo šmojtsejuabnacá jamama, y chašmobená jamama ndaye soyënga ntšamo šmojtšamcá, Jesucristbeñe šmojtsošbuáchema. <sup>12</sup> Chca jtsamëse, tšëngaftanga šmochanjínÿanÿiye Bëngbe Utabná puerte bëtsá y uamaná bëtsemnama, y cha echanjama tšëngaftanga más uamanënga chašmotsemnama. Chca echanjopása, er Bëngbe Bëtsá y Bëngbe Utabná Jesucristo tšëngaftangbiamá tšabe juabna ibobomna.

## 2

### *Chë Bëngbe Bëtsabe contra yomná*

1-2 Mora atše sëntseboše Bëngbe Utabná Jesucristo jésabama orscama jáuyanama, chë bënga cháftaca tsbanánoca jteninýenama ora. Básefta entsanga imojtsichamo chë bëts uámana te, chë Bëngbe Utabná jésabama te, ya tojóshjango ca; pero cbontsaimpadana, Jesucristbeyeca catsátanga, bëtská šmochtsentšena chënga ndoñe chamondobená jamana tsëngaftanga inýetsá juabna tsëngaftangbe ainaniñe chašmátsbomnana. Ndoñe šmatjóyeunaye nderado nda mëntsá chacmojsëtsëtsná ora: “Canýe Bëngbe Bëtsabe juabna oyebuambnayá šonjáuyana chë Bëngbe Bëtsabe uámana te ya tojóshjango ca” o “canýa chca šonjabuayená ca” o “Páblëbiocana tsbuanácha fsënjushache y chiñe entsayana chë te ya tojóshjango ca”. 3 Bëtská šmochtsentšena ndocná tondáyeca chacmondáingñema. Er chë Bëngbe Utabnabe uámana te cabá ndóshjango ora, mallajta entsanga Bëngbe Bëtsabe amëndayama contra mochántsemna, y chë Bëngbe Bëtsabe contra yomná echanjábocna. Y cha entsemna nda ibojtsemna infiernoca pochocaná jtsemnana. 4 Cha Bëngbe Bëtsabe contra echanjóyeuambaye, chë ndëmuanýengbiamia y ndaye soyëngama entsanga imojuabná diosënga imomnana contra echanjóyeuambaye. Chentšana cha echanjayana chëngbiamia más obená yomna ca. Y Bëngbe Bëtsabe bëts yebnóynaca cha echanjámashëngo, choca echanjót'bema y entsanga echantsëtsëtsnaye ndegombre cha Bëngbe Bëtsá yojtsemna ca.

5 ¿Chë soyama tsëngaftanga ndoñe šmondenabouínýna? Atše cabá tsëngaftangaftaca sënjamna ora, chama sënjanoyebuambná. 6 Y tsëngaftanga šmondëtatšëmbo, nda mora yojtsama chë Bëngbe Bëtsabe contra yomná ndoñe chaondonýnama, cabá chë tempo chca jopásama ndóshjango ora. 7 Mora ya mallajta entsanga puerte bacna soyënga tmojontsé amana, ndoñe ntšamo Bëngbe Bëtsá tojayancá chënga jamama yojtsamna ca, y bënga chë soyënga josértama ndoñe quemuátobena, ndayá nye Bëngbe Bëtsá chca šojinýanyese; pero ntšamo tcbonjauyancá chë Bëngbe Bëtsabe contra yomnabiamia ndoñe queochatëchnëngo, nýa nda chë soyënga ndoñe chaondëtsemnana yojtsamábioye Bëngbe Bëtsá chabojtsejuaná ora aíñe. 8 Chora chë Bëngbe Bëtsabe contra yomná echanjábocna; pero Bëngbe Utabná yochjésabo ora, echanjángouo y echanjama cha chaóbanama; y tša buashinýinýanánaca y obenánaca echanjábocnama, chábioye bochantsepochoáca. 9 Chë Bëngbe Bëtsabe contra yomná, Satanasbe obenánaca echanjabo, y entsanga bëts obenana echanjínýanýiye, y chë bëts soyëngaca entsanga ingñénënga mochántsemna. 10 Cha ba bacna soyënga echanjama ntšamo Bëngbe Bëtsá ndoñe yondbošcá, chca, ba entsángbioye nýetsca soyënguiñe jáingñama. Y chënga ndegombre pochocánënga mochántsemna; Bëngbe Bëtsá chca echanjama, chënga chë ndegombre soyënga Jesucristbiamia chëngbe ainaniñe ndoñe tmonjanóyëngacñe causa, y chë soyëngama mo uámana soyëngcá ndoñe tmonjanjuabó causa, chca, atsebácanënga jtsemnana. 11 Chca causa, Bëngbe Bëtsá entselesencia entsanga ingñénënga chamotsemnana, y chë ndoñe ndegombre soyënguiñe chamotsošbuáchema. 12 Bëngbe Bëtsá chca echanjama, nýetscanga chë ndegombre soyënguiñe Jesucristbiamia ndoñe tmontsošbuáchenga, chë bacna soyënga amama oyejuayënga tmojtsemnënga, chë nýetsca tescama castigo chamotsebomnana jayanama.

### *Bëngbe Bëtsá sojabacacá atsebácanënga jtsemnana*

13 Pero bënga šontsamna nýets tempo Bëngbe Bëtsá jtsatschuanayana tsëngaftangbiamia, Jesucristbeyeca catsátanga, Bëngbe Utabnabe bonshánënga. Bënga, Bëngbe Bëtsá fsëndëtschuaná cha quem luare cabá ndobojátša ora, atsebácanënga chašmotsemnana tcmojánabacacama. Bëngbe Bëtsá tcmojatsebacá er chë Uámana Espíritu Bëngbe Bëtsabe entsanga tcmojábiamia, y tsëngaftanga chë ndegombre soyënguiñe šmojtsošbuaché. 14 Chë tsabe noticiënga bënga cbondábuayiyayeca, Bëngbe Bëtsá tcmojúbuaja

chábinga chašmotsemnana. Cha tcmojúbuaja Bëngbe Utabná Jesucristbe obenana y buashinÿinÿanánënaca chašmotsebomnana.

<sup>15</sup> Chcasna, ndocna te šmattsajbaná ošbuáchiyana chë ndegombre soyënguiñe ntšamo tcbonjabuatambacá, cach tšëngaftangbeñe jóyebuambayëse y tsbuanácha jubuábiamëse, y ndocna te inÿetsá šmatjátsjuabnaye. <sup>16</sup> Bëngbe Bëtsá puerte tšabia endménayeca, cha šuababuánÿeshana y tojama bënga sempre añemo ainaniñe chamotsebomnana y chë mochjóyëngacñe tšabe soyëngama corente jtsošbuáchiyëse chamotsobátmanama. Chábioye y Bëngbe Utabná Jesucristbioye fsëntseimpadana, <sup>17</sup> chata chaboma tšëngaftanga bëtsá añemo ainaniñe chašmotsebomnana, y tšëngaftanga nÿets tempo chašmotsobena ntšamo tšabá yomncá jtsichámuama y jtsamama.

### 3

#### *Bëngbiana Bëngbe Bëtsá šmochtseimpadana*

<sup>1</sup> Y morna, Jesucristbeyeca bëngbe catšátanga, Diosmanda bëngbiana Bëngbe Bëtsá šmochtseimpadana, nÿetsca luarenache más ba entšanga chamotsobenama Bëngbe Bëtsabe buayenánana jouenama, y chënga chë soye chamóyëngacñama, y puerte chamotserrespetánama, ntšamo tšëngaftanga šmonjanmcá. <sup>2</sup> Bëngbe Bëtsánaca šmochtseimpadana cha chašotsëbuáuyayama, y chë puerte bacna entšanga ndoñe chamondobenama jamama bënga fchaisufrima, er nÿetscanga ndoñe quemochatošbuáchiye chë fsëndbuayiyná palabriñe. <sup>3</sup> Pero Bëngbe Utabná sempre jtsamana ntšamo tojayancá, y cha echanjama tšëngaftanga más chábeñe chašmotsošbuáchema, y ndoñe nÿe cachcá quecmaténÿa chë bacna soyënga mandayá nÿe ntšámnaca ndoñe chacmondáborlama. <sup>4</sup> Y Bëngbe Utabná entsama bënga ndegombre ainaniñe fchaitsejuabnama, ntšamo bënga tcojoanamëndacá mora šmojtsamama y cachcá sempre šmochtsamámnaca. <sup>5</sup> Bënga, Bëngbe Bëtsá fsëntseimpadana, Bëngbe Utabná benache chacmanÿanÿé bonshánana jtsebomnana ntšamo Bëngbe Bëtsá endbomncá, y chašmojtsesufrina ora, corente añemo chašmotsebomnana, ntšamo Cristo tojansufrí ora yojanbomncá.

#### *Nÿetscanga entsamna jtsetrabájayama*

<sup>6</sup> Jesucristbeyeca catšátanga, Bëngbe Utabná Jesucristbe mándoca cbontsamënda, ndëmua Jesucristbeñe ošbuachiyá jatrabájama ndoñe tontseboše y ndoñe tontsiyena ntšamo bënga tcbonjabuatambacá, cháftaca ndoñe šmattsóyebuambnaye. <sup>7</sup> Cach tšëngaftanga tšabá šmondétatsëmbo ntšamo cmojtsamna jtsiyenana, ntšamo bënga fsënjoyencá: bënga tšëngaftangbeñe fsënjanियena ora, nÿe ntjatrabajacá oyënjayënga ndoñe queftsjatsmëna, <sup>8</sup> ni ndocnabe saná chibiáisese, tondaye ntabuenaycá. Inÿetsá enjamna; cada te bnëté y ibeta jabuache fsënjantrabája, chca, tšëngaftanga ndoñe chacmondétsamnana bëngbe uajabótama bënga jatatsatnayama. <sup>9</sup> Y ndegombre, bënga derecho fsënjánbomna tšëngaftanga jamëndama chašcújabuachama; pero masque chca, bënga jabuache fsënjantrabája tšëngaftanga chašmotsetatsëmbuama ntšamo yomna jtsiyenama, y chca chašmotsamama. <sup>10</sup> Bënga tšëngaftangaftaca fsënjamna ora, mëntsá tcbonjanamëndá: Nda ndoñe tontseboše jatrabájama, cha cach ndoñe chaondëtsesá. <sup>11</sup> Chca fsëntsichamo, er bënga fsënjátatsëmbona, báseftanga tšëngaftanguentsënga imojtsiyena tondaye ntsamcá, pero tša chë ínÿengbe soyënguiñe jtsontremetënëse. <sup>12</sup> Chca oyena entšángbioye fsëntsabuayiyná y fsëntsamënda Bëngbe Utabná Jesucristbe mándoca, natjëmbana cachëngbe vida onguayiñe chamotsotrabájañama.

<sup>13</sup> Jesucristbeyeca catšátanga, ndoñe chacmondëumantésé tšabe soyënga amana. <sup>14</sup> Nderado nda ntšamo quem tsbuanáchañe fsënjayancá ndoñe tontsuenana, šmochjarrepára nda cha yojtsemna y cháftaca ndoñe šmattsencuëntaye, chca, cha

chaotsëuatjama. <sup>15</sup> Mo canÿe uayayacá ndoñe šmattsonÿaye; šmochjabuayená mo canÿe catšatcá, chca ndoñe chaondětsamama.

*Jtadiósoftanama*

<sup>16</sup> Běngbe Utabná fsěntseimpadana, cha, chě entšanga tšabe ebionana ainaniñe chamotsebomna iuamá, chaoma tšěngaftanga nÿets tempo y nÿetsca tescama chca chašmotsebomnama. Běngbe Utabná tšěngaftangaftaca chaotsemna.

<sup>17</sup> Nÿe quem palabrěnga tšěngaftanga jacheuayama cach atšbe cucuátšeca sěntsabiamná. Atše chca sěndbauapochóca atšbe tsbuanachangá juabemama; ntšamo muentše entsabemancá entsinÿinÿná quem tsbuanácha atšbiácha iuamnama.

<sup>18</sup> Atše, Běngbe Bětsá sěntseimpadana, Běngbe Utabná Jesucristo chaoma tšabe bendicioněnga tšěngaftangbeñe chaotsemnama.



# 1 Timoteo

## *Jachuayama*

<sup>1</sup> Atše Pablo, Jesucristbe ichmoná sëndmëna. Bëngbe Bëtsá bëngbe atsebacayá endmëna y Bëngbe Utabná Jesucristo endmëna ndábeñe bënga, puerte jtsošbuáchiyëse mondobátmana ba soyënga bëngbiama cha yochjamama. Atše Jesucristbe ichmoná sëndmëna, er chata tbojanmandá atše chca jtsemnana. <sup>2</sup> Timoteo, atše quem tsbuanácha cbontsabobiamná. Atše Bëngbe Bëtsabe soyëngama entsanga sënjanabuayiyiná ora, aca Jesucristbeñe tconjanošbuaché, y chca, aca mo atšbe ndegombre uaquiñacá tconjanóbema. Atše sëntseimpadana, Bëngbe Bëtsá Bëngbe Taitá, y Cristo Jesús Bëngbe Utabná, chaboma aca tšabe bendicionënga chacotsebomnana, chata chacmolastemama y ainaniñe tšabiana ebionana chacotsebomnana.

## *Pablo chë ndoñe ndegombre soyënga abuátambayëngbiama chënga tojanabuayená*

<sup>3</sup> Ntšamo chë Macedonia luaroye chocana sënjëftsanbocna ora tconjanimpadacá, mora cachiñe cbochtëtsimpáda. Efeso pueblaca cochjoquéda, básefta entsanga chácuamëndama chë ndoñe ndegombre soyënga ndoñe chamondëtsabuatambama, <sup>4</sup> ni nyets tempo ndoñe nyë chamondetsejuabná anteungbe cuentëngama, ni chë ba uabemana uabáinënga chë tempsca bëts taitangbiama. Er nyë chca yapa jesejuabnayanentsana, jóbocnana nyë ínÿengaftaca jabuachana enatsëtsnanyiñe, y chca chëngbioye tondayama ntjuabuáchana ntšamo Bëngbe Bëtsá jamama yojuabnacá chaósertama. Chë soyna nyë chábeñe jtsošbuáchiyëse jobenayana josértana.

<sup>5</sup> Chca mando entsemna nyëtscanga chamotsenbobonshánana, y chë bonshánana endóbocana nda chabe ainanentše ndocna bacna soyënga tondbomnábentsana, ntšamo tojtsamcá tšabá yojtsemna ca ainaniñe tojtsejuabná y tojtsetatšëmbuábentsana, y Jesucristbeñe ndegombre ošbuachiyábentsana. <sup>6</sup> Báseftanga tmojtsajbaná chca jtsemnana y inÿe soyëngama tmojontsé juabnayana; chíyeca chënga mora imojtsentsëna nyë ndayámna ndoservenana soyëngama enatsëtsnayana. <sup>7</sup> Chënga jtsebošana Bëngbe Bëtsabe ley abuátambayënga jtsemnana, pero chënga ndoñe yontsósertana ni ntšamo imojtsabuatambacá, ni mo ndayánaca ntšamo chënga tmojtsichamcá, mo chë soyënga ndegombre cuaftsemncá.

<sup>8</sup> Pero bënga mondëtatšëmbo chë leyënga tšabá yomnana; tšabá endmëna, chë ndayama chë leyënga tmojuamcá entsá chë leyëngaca tojtsamëse. <sup>9</sup> Bëngnaca mondëtatšëmbo, chë leyënga ndoñe tmonjuama chë nyëtsca soyënguiñe tšabá amëngbiama. Chë leyënga tmonjuama quemëntsa entsanga jácastigama: ntšamo leyënguiñe ndoñe tontselesenciancá amënga y ntšamo Bëngbe Bëtsá yobošcá ndámënga, chë Bëngbe Bëtsá ndoñe imondadoránënga y bacna soye amënga, Bëngbe Bëtsá ndoñe mondërrespetánënga y Jesucristbeñe jtsošbuáchiyana y Bëngbe Bëtsá jtsadoránana tondaye yondoservenana ca juabnayënga, cachabe taitá o mamá obánayënga y ndëmuanÿënga imomna entsanga obánayënga, <sup>10</sup> boyabásaftaca o shembásaftaca bacna soye amënga y boyabásënga cach boyabásëngaftaca bacna soye amënga, entsanga enënga nyë ínÿabiama nyëts tempo chamotseservënama, bosterënga y chë nyë bonamente Bëngbe Bëtsabiama júrayënga; chca entsayana, chë leyënga yomna jácastigama nyëtscanga ndëmuanÿënga ndoñe tmontsama ntšamo chë ndegombre buatëmbana soyënguiñe iuayancá. <sup>11</sup> Ntšamo muentše chë leyëngama tijayancá, entsebuátëmbana chë Bëngbe Bëtsábiocana puerte tšabe noticiënguiñe, chë ndegombre buatëmbana soye; Bëngbe Bëtsá, chë corente bendición bomná, šonjichmó chë buayenánana entsanga jabuátambama.

## *Pablo Bëngbe Bëtsábiyë tojtanchuá, tbojanlastemama*

<sup>12</sup> Atše, Bëngbe Utabná Jesucristo sëndëtschuaná, er cha tojanjuabó, ntšamo cha šojanmandacá jobedésama atše tsjésetprontanama, y chíyeca šojanábuayana atše chabiamá chaitrabajama; y cha endmëna nda inétsama atše obenana chaitsebomnama chë trabajo jamama. <sup>13</sup> Cha chca átseftaca tonjanma, masque tempo atše chabe contra ba soyënga sënjánichamo, chabe ústonënga sënjanëcamena, y chabiamá tondaye respeto ntsebomncá sënjánenobuena. Pero Bëngbe Bëtsá šonjanlastemá, er atše, Jesucristbeñe ošbuachiyá cabá ndoñe quetsjátanmëna, y chca, atše ndoñe quetsjátantatsëmbo ndayá tsjánamama. <sup>14</sup> Y chca, Bëngbe Utabná ba tšabe bendicionënga atšbiamá tonjanma, y chábeñe ošbuachiyá šonjábema, y tonjanma atše cha chaitsebomshánama y ínÿengbioynaca. Cha chca bëngbiamá tojama, bënga cánÿiñe mo canÿacá Cristo Jesúseftaca bëtsemnayeca.

<sup>15</sup> Ntšamo chanjayancá ndoñe nÿe bostero soye quenátsmëna, y nÿetscanga entsamna chca ndegombre bëtsemnama jtsejuabnayama: Cristo Jesús quem luaroye tonjánabo, bacna soye amënga jabátsebacama, y chë bacna soye amënguentše atše chë más bëts bacna soye amá sëndmëna. <sup>16</sup> Chíyeca, Bëngbe Bëtsá šonjanlastemá, jinÿanÿiyama cha puerte uantado entšángaftaca yomnama. Y chë soye ínÿengbioye tojaninÿanÿé, chë nÿetsca tescama yomna tšabe vida jtsebomnama, chë chábeñe mochtsanošbuachéngbioye; chca tonjaninÿinÿé cachá átseftaca uantado jtsemnëse, atše nÿetscangbiamá chë más bëts bacna soye amá jtsemnëse. <sup>17</sup> ¡Entšanga nÿets tempo chamotsinÿanÿná, chë Utabná nÿets tempo mandayá y puerte bëtsá y obená yomnama! Cha endmëna chë ndocna te echanjëftsobaná, chë entšanga ndoñe ntšobenana jinÿamá y chë nÿe canÿe Bëngbe Bëtsá yomná. Chca chaotsemna.

<sup>18-19</sup> Timoteo, aca mo atšbe uaquiñacá condmëna. Atše tcbonjaimpadá, ntšamo tcbonjauyancá entšanga chacúyanama, ntšamo báseftanga Bëngbe Bëtsabe juabna oyebuambnayënga acbiamá tmojanayancá, y chiñe jtsejuabnayëse chë Jesucristbe soyëngama chacopeliá y nÿets tempo chca chacotsama, Jesucristbeñe puerte jtsošbuáchiyëse, y lempe ntšamo tcojtsamama tšabá yojtsemnama ainaniñe jtsetatšëmbëse. Báseftanga, chënga ndoñe tšabá imonjétsama ca chë ainanoca juabnënga tmojánayana ora, chë soye ndoñe tmonjanuena y chë causa, Jesucristbe soyënguiñe ošbuáchiyana tmojtsanajbananga y tmojanontsé inÿe buatëmbana soyënguiñe jtsošbuáchiyana. <sup>20</sup> Chca tonjopasá Himeneo y Alejándroftaca, y atše sënjalesenciá Satanás chaoma chata chabosufrima; y chca, chata chabuatsjinÿe Bëngbe Bëtsabiamá ndoñe bacá ntšoyebuambnayana.

## 2

### *Pablo tojanabuayená ntšamo Bëngbe Bëtsá jtsadoránama*

<sup>1</sup> Nÿetsca soyama más cbontsaimpadana ndayá chë Jesucristbeñe ošbuáchiyënga Bëngbe Bëtsáftaca chamojtsencuénta ora, nÿetsca soyëngama ntšamo tojtsëjabortá cha chamotseimpadana, nÿetsca entšangbiamá, y cha sempre chamotsatschuaná. <sup>2</sup> Entsemna, nÿetscangbe tšabiamá Bëngbe Bëtsá jtseimpadánama, pero masna quem luarentša reyëngbiamá y inÿe mándayëngbiamá, chca, nÿetscanga puerte natjëmbana jtsiyenama chamuetsobenama, y nÿetsca soyënguiñe tšabá jtsamëse, Bëngbe Bëtsá jtsatschuanayama, y entšangbe juabniñe tšabá chamotsemnama. <sup>3</sup> Chca jtsamana tšabá endmëna, y Bëngbe Bëtsá, bëngbe Atsebacayá, chama jtsóyejuayana; <sup>4</sup> y chca jtsóyejuayana, er cha endboše nÿetsca entšanga atsebácanënga chamotsemnama y chë ndegombre buayenánana chamotsábuatmama. <sup>5</sup> Chca nÿetsca entšangbiamá endmëna, er nÿe canÿe Bëngbe Bëtsá nÿetscangbiamá endmëna, y nÿe canÿa endmëna nda yobena jamama entšanga tempcá tšabá Bëngbe Bëtsáftaca chamotsemnama; cha endmëna Jesucristo, cach entšá. <sup>6</sup> Er Jesucristo, mo canÿa ínÿenga jätsebacama cuaftopagacá, chabe derecho vida jtsobomñama cachcá tojanonÿá y tojanóbana, chca, nÿetsca entšanga chamotsobenama atsebácanënga jtsemnama. Chë soye cha tonjaninÿanÿé, nÿa chama tempo yojtsemna ora, chë Bëngbe Bëtsá nÿetsca entšanga atsebácanënga chamotsemnama yobošama. <sup>7</sup> Bëngbe Bëtsá chca

nÿetsca entsangbiamana yobóseyeca, Jesucristo šojanábuayana chabe ichmoná jtsemnama, chabe soyënga entsanga jtsabuayiyayama; ndegombre soye sëntsoyebuambná, ndoñe quetsátsbostero. Sonjanmandá chë ndegombre buayenánana chë ndoñe judiëngbioye jabuátambama, y chënga entsamna chiñe jtsošbuáchiyana.

<sup>8</sup> Ntšamo sënjayancá, atše sëntseboše nÿetsca chë Jesucristbeñe ošbuachiyëngcá enefjuana luarënguenache, boyabásenga Bëngbe Bëtsáftaca chamotsencuënta, y chora celoye, Bëngbe Bëtsábioye cucuatše chamatsbaná; pero chamna, ainaniñe bacna soyënga ntse-bomncá, ínÿengaftaca ntjatentjayanaycá, y ínÿengaftaca jabuachana ntjatenatsëtsnaycá chënga chamotsemna.

<sup>9</sup> Y atše sëntseboše shembásenga entsayangá chamuatíchéjtjo, mo chë tšabe shembásenga mondbetsichëtjoncá, ndoñe nÿe entsanga chamotsëbuáuatjama y ntšamo tmojtsichëtjonama chëngna uámanënga imomna ca entsanga chamotsejuabnama. Ndoñe quenátamna jtsenóbotamnyana, nÿa mo chca chquëcnënga jtsemnëse, ni castellano soyëngaca o uámana fjantse ndëtsbéngaca, o yapa uámana entsayangaca, chca, nÿe entsanga jinÿama tšabá jtsemnama. <sup>10</sup> Pero aíñe mo chë Bëngbe Bëtsá adóraye shembásenga mondbetsamcá jtsamëse, chë tšabe soyënga jtsamana.

<sup>11</sup> Nderado nda tojtsabuatambá ora, shembása bontsemna jtsatsjéndayana, chca ora tondaye ntjatichamcá, y chentša mándayënga chaotsayaunana. <sup>12</sup> Atše ndoñe quichat-sleséncia, canÿe shembása boyabásenga chaotsabuatambá, ni chaotsamënda. Canÿe boyabása tojtsabuatambá o tojtsamënda ora, shembása ndocá chaondëtsichamo. <sup>13</sup> Chca chaotsemna, er Bëngbe Bëtsá natsana Adán tbojanpormá, y chentšana Eva; <sup>14</sup> y er Satanás Adánbioye ndoñe tbonjaningñé, ndayá chë shëmbioye; y chca tbojaningñé ora, chë shema tojanma ntšamo Bëngbe Bëtsá ndoñe tbonjanlesenciácá. <sup>15</sup> Pero shembása atsbocaná echántsemna, básenga quem luaroye endbaúshejangoyeca, pero chamna, aíñe nÿets tempo Bëngbe Bëtsábeñe tojtsošbuáchese, nÿetscanga tojtsababuánÿeshanëse, cachá nÿetsca soyënguiñe jenomándama tojtsobenëse, y nÿets tempo tšabe soyënga tojtsamëse, ntšamo Bëngbe Bëtsabe entsanga mondbetsamcá.

### 3

#### *Ntšamo ibojtsemna chë ošbuachiyëngcá enefjuanëngbeñe mandayá*

<sup>1</sup> Mëntsá ndegombre endmëna: nderado nda tojtseboše canÿe trabajo jtsebomnama, cánÿentše ošbuachiyëngcá enefjuanentše chë inÿe ošbuáchiyënga jtsamëndayama, cha ndegombre yojtseboše canÿe puerte tšabe trabajo. <sup>2</sup> Chíyeca, chë ošbuachiyëngcá enefjuanëngbe mandayá bontsemna jtsiyenana ba tšabe soyënga jtsamëse, chca, cha ndoñe tšabá yontsama ca ndocná chaondëtsichamuama. Y mëntsánaca cha bontsemna jtsemnama: nÿe canÿe shembásabe boyá; ntšamo jtsiyenama tšabá juabnaya chaotsemna, cachá nÿetsca soyënguiñe jenomándama chaotsobena, y chaotsetátšëmbo ndayá ibomna tšabá jtsamana; chaotseprontana chabe yebnentše posada entsanga júyentšamiama, y chaotsobena botamana abuatambayá jtsemnama. <sup>3</sup> Ndoñe yapa tmoyá o penzentero chaondëtsemna; pero chaotsemna tšabá mandbomná, entsanga natjëmbana chamotsiyenama bošá, y ndoñe chaondëtsejuabná nÿe crocénana jësebomnama. <sup>4</sup> Chaotsetátšëmbo ntšamo nÿetsca chabe yebnentša entsanga botamana jtsamëndayama, y chaoma chabe básenga chë ntšamo cha tojayancá chamot-samama, ndocna te stëtsoye chamondëquedama; <sup>5</sup> er, nda cachabe yebnentša entsanga ndoñe tontsobena jtsamëndayama, chca, ¿ntšamo nantsobena chë ošbuachiyëngcá enefjuanënga jtsanÿenama? <sup>6</sup> Cha ndoñe chaondëtsemna cabá mora cuenta Jesucristbeñe ošbuachiyá; aíñe chca chë ošbuachiyëngcá enefjuanëngbe mandayá tojtsemnëse, nderado nÿe cachá uámana entsá nantsenobiamnaye, y ntšamo Bëngbe Bëtsá Satanásbioye

tbonjancastigacá, chca bétsemnama, cach soyama Bëngbe Bëtsá chë entsábioye buanjacastíga. <sup>7</sup> Chánaca bontsemna jtsiyenana jtsamëse, y chca chaojtsama ora, chë Jesucristbeñe ndošbuáchiyënga tšabá chabiamama chamotsichamo. Chë entsá ndoñe chca tontsamëse, chënga chabiamama mochanjayana ndoñe tšabá yontsama ca, y Satanás echanjama cha chabócochëngo bacna soyënga jamama.

*Ntšamo ibojtsemna chë ošbuachiyëngcá eneffuanënga ujabuachaná*

<sup>8</sup> Cachcá, chë mándayëngbe ujabuáchanënga mëntsá entsamna: uámana entsangcá nyetscanga chamotsétabna, uta palabra ndbomnënga; ndoñe yapa vínoye chamondëtsetmó, y ndoñe chamondëtseboše nye paselo becá crocénana jtsebomnama. <sup>9</sup> Chënga entsamna ndegombre jtsošbuáchiyana chë Bëngbe Bëtsá tojinñanyé soyënguiñe, chë ndayiñe bënga mondošbuaché, chëngbe ainaniñe inyetsá juabnënga ntjatsbomncá. <sup>10</sup> Natsana, chëngbiamama botamana šmochjshauarrepára jtsetatsëmbuama chënga aíñe o ndoñe montsobena mo chë ošbuachiyëngbeñe mándayëngbe ujabuachanëngcá joserviama. Chënga nyetsca soyënguiñe tšabá tmojtsemnëse, šmochjálesenciaye chiñe chamoservema. <sup>11</sup> Cachcá, chë shémanga mëntsá entsamna: nyetscangbiamama mo uámana entsangcá utabnënga, ndoñe uayátsenayënga, cachënga nyetsca soyënguiñe jenomándama obenënga, y nyetscañe tšabe palabra bomnënga. <sup>12</sup> Canye ujabuachaná chaotsemna nye canye shembásabe boyá, y chaotsetátšëmbo ntšamo chabe básenga y nyetsca chabe yebnentša oyenënga jtsamëndayana. <sup>13</sup> Chë ujabuáchanënga tšabá chiñe tmoservënëse, canye uámana puesto mochanjashjache, y chënga mochantsobena bëts añémoca jtsóyebuambnayama ntšamo Cristo Jesúsbeñe tmošbuáchemama.

*Ndayá Bëngbe Bëtsá bënga šojinñanyecá, canye bëts buatëmbana soye endmëna*

<sup>14</sup> Atše sentsobátmana pronto chjobenaye jama aca jauatsëtsayama; pero chca cbontsabobiamná, <sup>15</sup> nderado atše betscó jama ndoñe sënjobenase, chacotsetatsëmbuama ntšamo canya ibojtsemna nyetsca chë Bëngbe Bëtsábënga imomnëngaftaca. Chënga mondmëna chë Jesucristbeñe ošbuáchiyënga, chë Bëngbe Bëtsá Ainabe básenga. Chënga chë Bëngbe Bëtsabe ndegombre soyënga mondbomna chë más uámana puestoca quem luarentše, y tša mondëntšena chama ínñengbioye jáyëñanama. <sup>16</sup> Nya ndegombre endmëna, Bëngbe Bëtsá soyënga šojinñanyé, y chë soyëngaca bënga montsobena jtsiyenana, chë Bëngbe Bëtsabe entsanga imomnëngcá; chë soyënga bëngbiamama ndegombre bëts buatëmbana soye endmëna, y chë buatëmbana soye mëntsá endmëna: Cristo quem luarentše cach entsacá entsángbioye tojánebëbuacna. Chë Uámana Espíritu tonjinñanyé cha nyetsca soyënguiñe tšabá amá yomnama. Angelënga cha tmojáninñe, y chabiamama ba luarënguentsa entsángbioye tmojanabuayená. Ba entsanga quem luarentše chábeñe montsanošbuaché, y Bëngbe Bëtsá celoye tbonatanatsbaná, cha puerte bëtsá y obená yomnama jinñanyiyëse.

## 4

*Báseftanga chë tšabe benachentsana mochtsojuánañe*

<sup>1</sup> Uámana Espíritu, nyetscanga catafjosertaycá tojayana, quem luare jopochócama tempo chaojtsobeco ora, básefta entsanga camochtsajbaná ošbuáchiyana chë ndayiñe bënga Jesucristbiamama mondošbuaché soyënguiñe ca. Chëngna, espíritënga entsanga áingñayënga mochántsayauana, y chë ndoñe ndegombre soyënga chë bacna bayëjënga entsángbioye mochtsabuátambaye soyënguiñnaca. <sup>2</sup> Chca buatëmbana soye jtsóbocanana chë bacna entsanga ntšamo ndegombre tmojuabnacá ndinñinñayëngbentsana y chë bosterëngbentsana. Chënga chca bacna soye tmojtsama ora, ainanoca ndoñe ntsejuabnayanana, ntšamo tmojamcá ndoñe tšabá yontsemna ca, er yapa bacna soyënga tmojama causa, chënga nye chca chëngbe ainaniñe jésejuabnayana. <sup>3</sup> Quem entsanga ndoñe ntjalesénciana ínñyënga chamotsobouamama, y jtsemándayana básefta sananga entsanga



ndoñe chamondëtsesama. Ntšamo chënga chiñe tmojtsebuatëmbacá ndoñe ndegombre soye ntsemnana, er Bëngbe Bëtsá chë sananga tojanma, Jesucristbeñe ošbuáchiyënga y chë ndegombre soyënga uabuátmënga chamóyëngacñama, Bëngbe Bëtsábioye chama jtsatschuanayëse. <sup>4</sup> Er lempe ntšamo Bëngbe Bëtsá entšanga chamosama tojamcá tšabá entsemna. Ndoñe quešnátamna ndaye saná jtsaboténana, bënga chë saná tmojuáyëngacñe ora, Bëngbe Bëtsá chama tmojëtschuase; <sup>5</sup> er chca saná Bëngbe Bëtsábioye tšabá jtsinñana, cachá chca tojayánayeca, y bënga chë sanama cha mondbatschuayama.

### *Jesucristbiana trabájayiñe canye tšabe oservená*

<sup>6</sup> Aca, chë soyënga ošbuachiyëngbioye chacojtsabuátambase, aca Jesucristbiana trabájayiñe canye tšabe oservená cochántsemna. Y mo nda bëtscá añemo jtsebomnama botamana tojtsesacá, cachcá, ácnaca puerte ošbuáchiyana y ainaniñe bëtscá añemo cochántsebomna; chca echántsemna, chë bënga mondošbuaché buayenana soye aca icuatsjendá y icoyeunánayeca, y ntšamo chë tšabe buatëmbana soyënguiñe endayancá sempre icuámayeca.

<sup>7</sup> Pero ndoñe nýe quem luarentša entšangbe cuentënga y ndoservena cuentënga cattsuenana. Ba soyënga cochjama aca bëtscá añemo ainaniñe chacotsebomnama, mo nda bëtscá añemo jtsebomnama cachabe cuérpoca ba soyënga cuaftsamcá, ntšamo Bëngbe Bëtsá jadórana yomncá jtsiyenama jtsamëse; <sup>8</sup> cachabe cuérpoca ba soyënga jamana más añemo jtsebomnama, aíñe batšatema endoservena; pero jtsiyenana Bëngbe Bëtsábioye jadórana yomncá jtsamëse, puerte enduámana y juajabuáchana nýetsca soyënga tšabá chaotsemnana; chca jtsamana puerte tšabá endmëna cachabe vidama quem luar-entše, y chë inýe vidócnaca. <sup>9</sup> Ntšamo tijayancá ndegombre entsemna, y nýetscanga entsamna jtsejuabnayana chca ndegombre bëtsemnana. <sup>10</sup> Y chë soyama bënga puerte mondëtrabája y mondësufrina, er chë Bëngbe Bëtsá Ainábeñe puerte mondošbuachéyeca, bënga mondobátmana cha yochjama soyënga bëngbe tšabiama. Cha endmëna chë nýetsca entšangbe atsebacayá, pero ndegombre masna, chábeñe ošbuáchiyëngbe atsebacayá cha endmëna.

<sup>11</sup> Ntšamo quem soyëngama tcbonjauyancá entšanga cochtsamëndaye y cochtsabuátambaye. <sup>12</sup> Ndoñe catjaleséncia, aca bobontse comnama, ndánaca chacmotsáboyënjama. Pero aíñe bëtscá cochtsama, chënga puerte chacmotserserrespetánama, chca jtsamëse icoyenama jtsionñayëse, cachcá chamotsamama: botamana jtsóyebuambnayëse, nýets tempo tšabe soyënga jtsamëse, nýetscanga jtsababuánýeshanëse, Bëngbe Bëtsábeñe corente jtsošbuáchiyëse, y puerte tšabia jtsemnëse, ainaniñe ndocna bacna soye ndbomná. <sup>13</sup> Atše choca chaijashjanguëntscuana, cochtsentšena chë Bëngbe Bëtsabe uabemana palabrenga entšangbeñe jtsalíayama, y chënga jtsabuátambayama y jtsabuayiynayama. <sup>14</sup> Acbioye Bëngbe Bëtsá obenana tmojanatšeta tšabe soyënga jamana chacotsobenama, ošbuáchiyënga jujabuáchama. Bëngbe Bëtsabe juabna oyebuambnayënga acbiama tmojanoyebuambá ora, y chë ošbuachiyënguentša bëtsejëmënga chëngbe cucuatsënga ábeñe tmonjancjá y Bëngbe Bëtsá acbiama tmonjanimpadá ora, chca tšetana obenana tcojanóyëngacñe. Chë soye sempre cochtsinýena.

<sup>15</sup> As, aca cmontsemna sempre jtsamana chë soyënga ntšamo tcbonjauyancá. Cochtsentšena chë soyënga tšabá jtsamama, chca, entšanga chamobená jinñama, aca cada te más tšabá lempe cojtsamama. <sup>16</sup> Botamana cochtsantješna, aca chë tšabe soyënga jtsamëse cojtsiyenama, y chë tšabe buatëmbana soye ínýenga cojtsabuátambama. Cada te chca cochtsama, y chca, cach aca cochanjenájabuache atsbocaná jtsemnana y chë ácbioye ouenanëngnaca játsebacama.

## 5

*Ntšamo Timoteo ibojtsemna chë inÿe ošbuáchiyëngaftaca jtsemnana*

<sup>1</sup> Bëtsëjëmënga ndoñe catjucácana; chca játamamna, cochjábuayenaye, chënga mo cach acbe taitá cuaftsemncá; y chë bobontsëngaftaca cochjama, mo chënga acbe catšátanga cuaftsemncá. <sup>2</sup> Chë bëtsanana shembásengaftaca tšabá cochtsemna, chënga mo cach acbe mamá cuaftsemncá; y chë tobiasëngaftaca cochjama, chënga mo acbe uabénanga cuaftsemncá; chëngaftaca cmontsemna puerte tšabia jtsemnana, chëngbiana ndocna bacna juabnënga ainaniñe ntsebomncá.

*Ošbuáchiyëngbenache viudanga tmojtsemna ora*

<sup>3</sup> Chë ndegombre viudanga, chë ndocná mondbomna chaújabuachama, chënga cocht-sarrespetana y cochtsëjabuachana. <sup>4</sup> Pero canÿe viudá nderado básenga o nietënga tuabamna, chënga entsamna natsana jshauatsjínÿana ndayá chënga chamotsamama Bëngbe Bëtsá yobošcá, cachëngbe pamíllanga chamotsarrespetánama, chëngbioye jt-sanÿenëse, y chëngbe bëtsétsangaftaca tšabá chamotsama, ntšamo chënga chëngaftaca tmojanmcá, er chca jtsamama, Bëngbe Bëtsá jtsóyejuayana. <sup>5</sup> Chë ndegombre viudá, chë juajabuáchama ndocná tbondbomná, Bëngbe Bëtsábeñe jtsošbuáchiyëse, cha bochjuájabuachama jtsobátmanana, y nÿets tempo jtseimpadánana, bnëtë y ibeta, cha chabuájabuachama. <sup>6</sup> Pero canÿe viudá, nÿe quem luarentša entsángaftaca oyejuayá jtsemnama soyënga tojtsamëse, cha masque ainá tojtsemna, Bëngbe Bëtsabe bominiñe mo canÿe obanacá jtsemnana, er chábioye ndoñe ntsebomncá. <sup>7</sup> Lempe chë soyënga chamotsamama ošbuáchiyënga cochtsamëndaye, chca, ndocná ndocna bacna soye chëngbiana jatichámuama chaondëtsebomnama. <sup>8</sup> Er, nda cachabe entsanga y más, cachabe pamíllanga ndoñe tontsacuedana, cha chca jtsinÿinÿayana chë buátëmbana soyënga, ndayiñe bënga mondošbuaché, ndegombre soyënga ndoñe yondmëna ca yojtsejuabnama, y cha chë ndoñe ošbuáchiyëngbiana más bacna entsá jtsemnana.

<sup>9</sup> Chë jujabuáchama viudanga imuábemana lístañe, chaotsábemana chë viudá chnënguana bnëtsana uatama más yobomná, y nÿe canÿe boyá ibnabomná. <sup>10</sup> Entšanga cha chamotsábuatma mo canÿe tšabe soyënga amacá: chabe básenga botamana tojabëché, áshjajnënga chabe yebnentše posada júyentšamiama prontaná, Bëngbe Bëtsabe entsanga imomnënga tojushcejabebé, chë imosufrinënga tojújabuache; jayanana, nda sempre nÿetsca tšabe soyënga jamama yontšená.

<sup>11</sup> Pero chë lístañe, chë viudanga chnënguana bnëtsana uata cabá ndbomnënga ndoñe catjúbiana; er chë chëfta uata ndbomnënga, yapa nÿe cachënga tšabá jtsemnama juabnënga jtsebomnana y soyënga jtsamana. Chcase, chënga Jesucristbioye ya ndoñe ntsebomncá, y chora jtsebošana cachiñe jtëtóbouamayama; <sup>12</sup> y chca, ínÿenga chëngbiana mochanjayana ndoñe tšabá montsama ca, chënga chë ntšamo tempo Bëngbe Bëtsá tmojanšbuachenacá chënga ndoñe tmonjamama. <sup>13</sup> Y cabá más, tondaye ntsamcá tmojtsemna ora, chënga juabouinÿana oyënjayënga jtsemnama, y yebnënguenache jtsanama; y ndoñe nÿe oyënjayënga, sinó oinÿanëngnaca, ínÿengbe soyënguiñe jtseyentšbëtsjuanëse, y ndoñe yontsemna jayanama soyënga jtsichámëse. <sup>14</sup> Chíyeca, atše sëntseboše, chë viudanga cabá tobiasëngna chamuatobouamá, básenga chamotsabamna, y chamotsobena cachëngbe yebnënguenache jtsemándayana; y tondaye chamondëtsama, chca, bëngbioye uayayënga chamuayana, chënga chca ndoñe tšabá montsama ca. <sup>15</sup> Atše chca sëntschamo, er básefta viudanga cabá tobiasënga tmojtsajbaná Jesucristo obedecëna, y tmojontsé Satanás joyeunayana.

<sup>16</sup> Canÿe shembása, Jesucristbeñe ošbuachiyá, nderado chabe pamíllangbeñe viudanga tojtsabamna, cha bontsemna chënga jujabuáchana, chca, chë ošbuachiyëngcá enefjuanënga ndoñe chaondëtsamna chëngbiana játantješnana; chca, chë

ošbuáchiyënga mochanjobenaye chë ndegombre viudanga, chë chaújabuachama ndocná mondbomnéngbioye jujabuáchama.

*Ntsamo cuantsemna chë ošbuachiyëngbeñe amëndayëngaftaca*

<sup>17</sup> Chë bëtsëjemënga, tšabá chë ošbuachiyëngcá enefjuanënga tmamëndangna, jtsomerecénana entsanga más chamotsarrespetánama, chca trabajo bétsamama, y más, chë sempre entsanga jtsabuayiynayama y jtsabuátambayama imontšenëngbioye. <sup>18</sup> Er Bëngbe Bëtsabe uabemana palabrénguiñe endayana, mëntšá: “Aca canye toróftaca sha-juana tmojtsatbaná luariñe chacojtsetrabája ora, ndoñe catjuanguëtsenaye ca”; ínÿoca: “Chë trabajayá merecido jtsebuájonana juácanama ca”. Chíyeca, chë bëtsëjemëngcá amëndayënga jtsomerecénana entsanga chamotsarrespetánama.

<sup>19</sup> Nderado nda tcmojáuyana canye bëtsëjemama bacna soye tojama ca; pero útata o unga entsanga más ndoñe tmontsemna, chca tojamama tmojinÿe, y chë bëtsëjemama mal quedayá ndegombre soye yojtsichamo ca ndoñe tmonjayana, ndoñe catjóyeunaye.

*Inÿe soyëngama jábuayenama*

<sup>20</sup> Chë bëtsëjemënga nÿe bacna soyënga tmojtsamënga, nÿetsca entsangbe delante cochjucácana, chca nÿetscanga uatjana chamuishache, bacna soye amama castigo mochtsebomnana.

<sup>21</sup> Atše cbontsemánda, Bëngbe Bëtsabe delante, Jesucristo y Bëngbe Bëtsabe bocacana angelëngbe delante, chë mandënga chacotsamama; pero ndoñe catjayana canye bëtsëjemama tšabá o ndoñe tšabá tonjama ca, cabá ndoñe lempe botamana ndabonÿe ora, ni canye entšá ínÿengbiama más tšabá ntjatabacacnaycá. <sup>22</sup> Ndocnabe bestšasiñe cucuatšënga catjajájua, Bëngbe Bëtsábioye chabiamama jaimpádama, jinÿinÿiyama cha mo canye bëtsëjemama amëndayacá joserviama yojtsobenama, nÿe betscó, juabuáyanama botamana ntjenojuaboycá. Pero nÿe ntjenojuaboycá chca tcojamëse, y cha canye bacna soye amá tomnësna, ácnaca cochántsemna mo chabe bacna soyënga cuafjamcá. Cochtsantješna ndocna bacna soyënga ainaniñe chacondëtsebomnana.

<sup>23</sup> Aca ba soye uafšbiaca condbëtsešoca causa, ndoñe más nÿe ena búyeshe cattseftmana, sinó base vínoynaca.

<sup>24</sup> Entšanga mondobena tšabá jinÿana, básefta entsangbe bacna soyënga, cabá chë soyëngama chëngbioye botamana ntjájayey ora; pero ínÿengbe bacna soyëngama, nÿe tcojájayentšana entsanga chama jtsetatšëmbuana. <sup>25</sup> Cachcá, báseftanga entsangbe delante tšabe soyënga jtsamana, y cachora chë soyëngama jtsotatšëmbuana; y ínÿengna iytëmncá tšabe soyënga jamana, pero masque chca, ndayténaca chë tmojanma tšabe soyëngama ínÿengama mochanjätatšëmbona.

## 6

<sup>1</sup> Chë nÿets tempo nÿe ínÿabiama oservënënga entsamna, chëngbe nduiñëngbiama jtsejuabnayana, chënga uámama entsanga imomnana y nÿets respeto jtsebomnana imomerecénama. Chca entsamna, Bëngbe Bëtsabe Uabainama y chabe soyëngama, ndayiñe bënga mondošbuaché y entsanga mondbétsabuatambaye, ínÿengna podescana ndoñe chamondëtsóyebuambnana. <sup>2</sup> Y chë imobomna Jesucristbeñe ošbuáchiyënga nduiñënga, chëngbioye nÿe batšá ndoñe chamondëtsarrespetana, er chënga Jesucristbeyeca chëngbe catšátanga mondmëna, y entsamna más tšabá jtsaservénana, er chëngbe trabajuentšá tšabe soyënga imóyëngacañe, Jesucristbeñe ošbuáchiyënga mondmëna, y Bëngbe Bëtsabe bonshánënga.

*Jtsiyenana Bëngbe Bëtsá jadórama soyënga jtsamëse, endmëna chë ndegombre bomnana*

Quem soyënga cmontsamna entsanga jtsabuátambayana, y becá jtsëtsëtsnayana chca chacmóyaunama: <sup>3</sup> Nderado nda inÿe soyënga tojtsabuatambá, y ntsamo bënga mondëjuabnacá, chë Bëngbe Uabná Jesucristbiama ndegombre buatëmbana soyama,

ni chë buatëmbánana ntšamo jtsiyenama Bëngbe Bëtsábioye jadórama yomna soyënga jtsamëse, ndoñe cachcá bëngcá tontsejuabnase, <sup>4</sup> cha nÿe cachá puerte uámana entšá yojtsenobiamná, y tondaye ndosertaná yojtsemna. Cha tša jtsogustánana ba soyëngama y palabrëngama jabuachana jtsenatsëtsnayana, y cha nÿe chama vida jésebomnana. Cha chca yomna causa, nÿe jtsebošana chë inÿa tojashjache soyënga jtsebomnana, nÿetscanga ndoñe cachcá chamondëtsejuabnama jtsamana, ínÿengbioye joyánguanguama jtsebošana, bacna soyënga ndoñe ndegombre soyënga ínÿengbiamna jtsejuabnayana, <sup>5</sup> y ínÿengaftaca nÿe sempre jtsenpenzétsiyana, er chëngbe juabniñe nÿe bacna soyënga jtsebomnana, chë ndegombre soyënga quematábuatma, y jtsejuabnayana chë soyënga Bëngbe Bëtsá jadórama jtsamana, nÿe más soyënga jóyëngacñama yoservenca. <sup>6</sup> Ndegombre canÿe entšá bëtscá tšabiana jëftsashjáchana, cha tojtsiyena Bëngbe Bëtsábioye jadórama soyënga jtsamëse, y sempre oyejuayá nÿe chë tojtsebomna soyëngaca tojtsemnëse. <sup>7</sup> Er bënga tmojanonÿná ora, quem luaroye bëngaftaca tondaye tmonjániyëbo, y quem luarentšana cach tondaye quemochatobenaye jëftsocñama. <sup>8</sup> As, bënga ndayá jasama y ndayá jtichëtjuama tmojtsebomnëse, chë soyëngaca oyejuayënga mochtsemna. <sup>9</sup> Pero chë bomnënga jtsemnama tmojtsebošënga, bacna soyënga jamama tojócochëngo ora, ndoñe ntsemorochana y pronto chiñe jotsatšana, mo bayá uachmaniñe cuafjotsatšcá, chë entšanga Satanasbe cucuatšíñe ndeolpe jotsatšana; chora chënga jtsamana soyënga mo chë juabna ndbomnëngcá, y chë cachëngbiamna ndoñe tšabe soyënga tmojtsamëngbe juabnëngaca. Y mo chë uándbemana barco, bëtš búyeshe asentoye tojtsenatjëmbcá, cachcá, chë bacna juabnënga bomnana, chëngbioye mochántsapochocaye y nÿetsca tescama mochántscastigaye. <sup>10</sup> Crocénana jtsebomnana yapa jtsebošana, jamana entšabe ainanentšana nÿetsca bacna juabnënga y soyënga chaóboconama; y básefta entšanga, crocénana jtsebomnana yapa jtsebošana causa, tmojtsajbaná ošbuáchiyana chë Bëngbe Bëtsabe soyënguiñe, chë bënga mondošbuaché soyënguiñe, y chca cachëngbiamna tmojama puerte chamosufrima y bëtš ngmënanana jtsebomnana.

### *Chë tšabe soyama jtsenojuerzánama, ošbuáchiyana sempre chaotsemnama*

<sup>11</sup> Pero aca, Bëngbe Bëtsabiamna oservená, chca benachentšana cochtsojuánañe. Nÿa cochtsentšana, chë Bëngbe Bëtsabe bominÿiñe tšabá yomncá jtsamama, chë ndayá Bëngbe Bëtsá jadórama yomncá jtsamama, Jesucristbeñe puerte jtsošbuáchiyama, nÿetscanga jtsababuánÿeshanama, Bëngbe Bëtsábeñe jtsoátmanëse puerte uantado padecena soyënguiñe jtsemnama, y corente jtsababuánÿeshanëse nÿetscanga chacotsënÿayama. <sup>12</sup> Chë tšabe soyama, ošbuáchiyana joboguiyanama cochtsenojuerzana. Chë nÿetsca tescama yomna tšabe vida cochjashjache; chama Bëngbe Bëtsá tmojanchembo y bëtscá entšangbe delante tconjánayana tšabe soyënga Jesucristbiamna, ndayiñe aca icošbuaché. <sup>13</sup> Y mora, Bëngbe Bëtsabe delante, nda endbama lempe ntšamo quem luarentše yobinÿncá vida chaotsebomnana, y Jesucristbe delante, ntšamo cachabiamna ndegombre bemncá Poncio Pilatbe delante lempe tojanayaná, chatbe delante cbontsemánda, <sup>14</sup> lempe cochjama ntšamo tcbonjauyancá, ndocna soye chacmondëntšashbe jamama, y cochtsiyena, ntšamo ndocná tondaye chaondëtsebomna jayanama aca bacna soye tcojama ca. Y chca cochtsama Bëngbe Utabná Jesucristo quem luaroye yochjésabëntscuana. <sup>15</sup> Y nÿa chë soyama chë tempo chaojóshjango ora, Bëngbe Bëtsá chca echanjínÿanÿiye, er cha endmëna chë corente bendición bomná y chë nÿe canÿe Mandado. Cha nÿetsca reyëngbiamna, chë más uámana Rey, y nÿetsca amëndayëngbiamna, chë más uámana Utabná. <sup>16</sup> Nÿe cha ndoñe bondmëna ndocna te ntjóbanana, y cha canÿe bëtš buashinÿinÿana luarentše endoyena y choye ndocná yondobena jobéconana. Cha ndocná tbonjinÿe y ndocná yondobena jinÿana. ¡Entšanga nÿets tempo chamotsinÿanÿná cha puerte bëtšá y obená bëtsemnama! Chca chaotsemna.



17 Chë quem luarentša soyëngaca bomnënga imomnënga, cochjámëndaye enábotamnayënga ndoñe chamondëtsemnana, ni lempe tšabá yochjóbcnana, bëtscá soyënga bëtsebomnana ndoñe chamondëtsobátmana, er chë tcobomna soyëngama ndoñe ntsótatsëmbuana ndayëntscoñama chca mochtsebomnana; pero aíñe, Bëngbe Bëtsábeñe jtsošbuáchiyëse, chënga chábeñe chamotsobátmana. Cha endmëna chë sempre bëtscá soyënga šnetsatšatnayá; y chca, cha jamana bënga chamotsobena nyetsca chë soyëngaca oyejuayënga jtsemnana. 18 Ntšamo tšabá yomncá chënga chamotsama, ba tšabe soyënga chamotsama, y sempre tšabe ainánaca chamotseprontana entšanga ba soyënga jatšatayama, y ndaye tmobomna soye entšángaftaca jenájatayama. 19 Mo nda bëtscá shajuana tojtsábuajo y jtsetatsëmbuana yochtsebomna más chcoye jasama, cachcá, quem bomnënga ba tšabe soyënga tmojtsamëse, mochántsetatsëmbo chënga bëtscá tšabe bendicionënga más chcoye mochtsebomnana. Y chënga chë soyënga tmojtsamëse, chënga chë ndegombre vida, chë nyetsca tescama yomna tšabe vida mochanjëftsashjache.

*Inye soye Timotéobioye tbojanbonjë*

20 Timoteo, ndayá Bëngbe Bëtsá tcmojabonjëcá, botamana cochtsinýena. Entšanga nyë quem luarentša soyëngama encuéntayana, ndoñe cattsuenana, ni chë ndoservena soyëngama jabuachana enatsëtsnayana, chë ndayama entšanga jtsichámuana becá osertánanentšana chca yóbocana ca, pero ndegombre chca ndoñe ntsemnana. 21 Atše chca séntsichamo, er báseftanga chca osertánana imobomna ca ichámënga, Jesucristbeñe ošbuáchiyana y chë bënga mondošbuaché soyënguiñe ošbuáchiyana tmojtsajbaná.

Atše, Bëngbe Bëtsá sëntseimpadana, ábeñe tšabe bendicionënga chaotsemnana.

## 2 Timoteo

### *Jachuayama*

<sup>1</sup> Atše Pablo, Jesucristbe ichmoná sēndmēna, Bēngbe Bētsá chca yobóseyeca. Jesucristo šonjichmó entšanga jábuayenama Bēngbe Bētsabe šbuachenánama, ntšamo cha inétsamama entšanga chē n̄yetsca tescama yomna tšabe vida chamotsebomnama; y chca vida montsebomna Cristo Jesúseftaca cán̄yiñe mo can̄yacá bétsemnayeca. <sup>2</sup> Atše quem tsbuanácha cbontsabobiamná, acbiama Timoteo, aca mo atšbe bonshana uaquiñacá, Crístbeñe condošbuachema. Atše sēntseimpadana, Bēngbe Bētsá, Bēngbe Taitá, y Jesucristo, Bēngbe Utabná, chaboma ácheñe tšabe bendicionēnga chaotsemnama, chata ácbioye chacmolastemama, y acbe ainaniñe tšabe ebionana chacotsebomnama.

### *Ndoñe ntsēuatjana entšángbeñe Jesucristbiama jóyebuambayama*

<sup>3</sup> Sempre Bēngbe Bētsáftaca stsencuēnta ora, acbiama sēndbētsenojuabnaye, y acbiama sēndbētsatschuanaye bnēté y ibeta; y Bēngbe Bētsá endmēna nda atše sēndēservena, ainánaca jtsejuabnayēse y jtsetatsēmbēse, ntšamo atše stsamcá tšabá bétsemnama, cachcá ntšamo atšbe bēts taitanga tmojanmcá. <sup>4</sup> Atše sēndbētētenojuaboje ntšamo aca, chocana atše sēntanabo ora shēchbuiye tconjanoperdema, y chíyeca atše tša sēntseboše aca jtētinyama, atše puerte oyejuayá chaitsemnama. <sup>5</sup> Bēngbe Bētsá acbiama sēndbatschuaye, er atše sēndbátenojuaboje aca Jesucristbeñe ndegombre ošbuáchiyana condbomnama. Natsana, acbe bēts mamá Loida, y chentšana acbe mamá Eunice chábeñe bontsanošbuáchiye, y ácnaca cachcá tcojamama atše puerte sēndētatsēmbo.

<sup>6</sup> Chíyeca sempre cochtsantješna quem uámana soyama: Mo nda can̄ye shin̄yañe tojtsajuin̄yinyacá, chentše sempre chaotsoiñama, cachcá aca, chē Bēngbe Bētsá tcmojatšetá obenana tšabe soyēnga jamama, siempre cochtsin̄yena. Chē obenana aca conjanóyēngacñe, atšbe cucuatšēnga acbe bestšasiñe sēnjanjajó y Bēngbe Bētsá acbiama sēnjanimpadá ora. <sup>7</sup> Er Bēngbe Bētsá tonjama bēngbe ainaniñe Uámana Espíritu chaotsemándama, uatjana ndoñe ntsebomnama, ndayá obenana bēnga chamotsebomnama, bonshánana Bēngbe Bētsabiama y n̄yetscangbiama chamotsebomnama, y cabēnga jenomándama chamotsobenama. <sup>8</sup> Chíyeca, ndoñe cattseuatja entšanga jáuyanama, ntšamo tcojin̄ye y cojtsetatsēmbcá Bēngbe Utabnabiama ndegombre bétsemnama; ni atšbiama ndoñe cattseuatja, atše cárceloye sēndutámenama, chabiama oservena causa. Chamna, chē Bēngbe Bētsá cmochanjátsetaye obenánaca, siempre cochtseprontana jasúfriama, átseftaca y ín̄yengaftaca, entšanga tšabe noticiēnga abuyayinaye causa. <sup>9</sup> Bēngbe Bētsá endmēna nda bēnga šojatsebacá, y šojáchembo jtsiyenama mo chábenga imomnēngcá jtsamēse. Y cha chca tojama, ndoñe nderado bēnga ndaye tšabe soye tmojamama, ndayá cachá chca chaotsemnama inabóseyeca y bēngbe tšabiama juabna bómnyayeca. Cha chca inajuabnaye, cabá quem luare ndmēna orscana; y chca jamama Bēngbe Bētsá inajuabnaye, chē ndayá Cristo Jesús bēngbiama jamama sóyeca. <sup>10</sup> Y mora, Bēngbe Atsebacayá Jesucristo tojáboyeca, Bēngbe Bētsá šojin̄yan̄yé cha bēngbe tšabiama juabna yobomnama. Jesucristo tonjama, entšanga n̄yetsca tescama obanēnga ndoñe chamondētsemnama, y tonjama bēnga chamotsetatsēmbuama, chē tšabe noticiēnga chabiama jouenēse y joyeunayēse, bēnga chē n̄yetsca tescama yomna tšabe vida mochjábomnama, ndoñe n̄ye jopochócama cuerpēnguiñe.

<sup>11</sup> Bēngbe Bētsá šojanábuayana tšabe noticiēnga entšanga jábuayenama, Jesucristbe ichmoná jtsemnama y entšanga jabuátambama. <sup>12</sup> Chē causa, atše mora cárceloca quem soyēnga sēntsesufrina; pero chama atše ndoñe quetsátēuatja, er atše sēndētatsēmbo

ndábeñe atše stsošbuáchema, y corente sëndétatsëmbo cha yobena jtsinýenana ndayá šojabonýecá, chë ndayté cha yochjésabëntscuana.

<sup>13</sup> Nýets tempo, chë ndegombre buayenánana, ndayá átsbentsana tconjanuencá, entsanga cochtsabuayinaye, entsanga jtsinýanýnayëse aca Jesucristbeñe icošbuáchema, y Bëngbe Bëtsá y nýetscanga icuababuánýeshanama, y chca yomna aca Cristo Jesúséftaca cánýiñe mo canýacá bétsemnayeca. <sup>14</sup> Chë Uámana Espíritu, chë bëngbe ainaniñe endoyenabe uajabuáchenanaca, ntšamo Bëngbe Bëtsá tcmojabonýecá sempre cochtsinýena.

<sup>15</sup> Ntšamo ya condétatsëmbcá, nýetsca ošbuáchiyënga Asia luaroquënga cachcá šmonjesonýá, y chentše bontsemna Figelo y Hermógenes. <sup>16</sup> Pero Bëngbe Utabná Onesíforbe pamíllanga chaotsalastemana, er cha ba soye šonjanañemó, y atše cárceloye utámenama cha ndoñe quenjatëuatja. <sup>17</sup> Maska, Romoye tojabánashjango ora, cha botamana šojánguango y šonjáninýena. <sup>18</sup> Bëngbe Utabná lastemado cháftaca chaotsemna, ntšamo nýetscanga tmojamcá tšabá o ndoñe tšabá yontsemnama cha yochjayana ora. Aca corente condétatsëmbo ntsachetsá Onesíforo Efeso puebloca šonjanëjabuachama.

## 2

### *Jesucristbiana canýe tšabe soldado*

<sup>1</sup> Y aca, atšbe uaquiñá, chë Cristo Jesús acbiana tšabe juabna yobomntšana, bëtscá añemo ainaniñe cochtsebmna. <sup>2</sup> Ntšamo ba entsangbe delante šconjoyeunacá, cach buayenánana, boyabásenga nýetscañe tšabe palabra bomnënga cochjábanýiye, y chamotsobena ínýenga cachcá jabuátambama.

<sup>3</sup> Aca, chë bënga fsëndbomna padecena soyëngama jasúfriama chacmojtsemna ora, Jesucristbe soyëngama entsanga abuayinaye causa, ainaniñe bëts añemo cochtsebmna, mo canýe tšabe soldadca, cha chabe mándayabiana jasúfriana. <sup>4</sup> Ndocna soldado ntjátanana shjoca soyënguiñe vida jtsebmnama o crocénana juácánama. Soldado chca jtsamana, chabe mandayá, chca chaotsemnama tbojabocacá cha, oyejuayá chaotsemnama. <sup>5</sup> Y canýe travisiayá, ínýenga jáyënjanama, canýe soye juácánama; pero ntšamo chë uacanána jocñama tomncá ndoñe tonjatravisiase, cha chë soye ndoñe ntjosháchiñama. Cachcá, acbe trabajo cochjama ntšamo cmojtsemncá. <sup>6</sup> Chë jajañe trabajayá derecho jtsebmnama chë natsaná jtsebmnama, chë tmojatbaná sananguentsana ndayánaca jtsebmnama. Acaftaca cachcá echanjopása, chë trabajo tšabá chacojamëse. <sup>7</sup> Chë cbontsatsëtsnañe cochtsenójuabnaye, y Bëngbe Utabná echanjama lempe chacmósertama.

<sup>8</sup> Sempre cochtsenójuabnaye Jesucristbiana, ndabiana Bëngbe Bëtsá tojanma cháuatayenama y enjamna canýa rey Davídbentsana entsá, ntšamo atše chabiana sëndabuayiná tšabe noticiënguiñe endmëncá. <sup>9</sup> Chca abuayinaye causa, atše sëntsesufrina, nýa cadenëjuangácnaca utsbuaná, mo canýe bëts bacna soye ochjajnayacá. Pero masque atše chca sëntsemna, chë Bëngbe Bëtsabe soyëngama buayenánana ínýenga entsángbiyoye montsabuatambá. <sup>10</sup> Chýeca atše nýetsca padecena soyëngaca sëndëtsóboyana, Bëngbe Bëtsabe bocacánëngbe tšabiana, chëngnaca atsebácanënga chamotsemnama, Crístbeñe jtsošbuáchiyëse; y Cristo Jesús bëtsëtsanga cháuabiamama, y cháftaca nýetsca tescama chamotsiyenama.

<sup>11</sup> Mëntsá ndegombre endmëna:

Cristo Jesús tojanóbana ora, enjamna mo bëngnaca cuafjobancá, er bënga tmontsajbaná oyenana ntšamo tempo monjaninyencá y Jesucristbeñe montsošbuaché; y chca, bëngnaca cháftaca mochantsiyena;

<sup>12</sup> bënga chë padecena soyëngaca tmojtsemsufrina ora, tmojtsemorochëse, bëngnaca Jesucristoftaca mochántsemandaye.

Bënga tmojayana, cha ndoñe monduabuatma ca, as cha bëngbiámncaca cachcá echanjayana;

<sup>13</sup> bënga chábeñe ndoñe tmontsošbuáchese,

masque chca, cha cabá echanjama ntšamo tbojašebuachenacá,  
er cha lempe jamana, ntšamo sempre iuetsemncá jtsinÿanÿnayëse.

*Canÿe trabajayá, ndáftaca Bëngbe Bëtsá jtsóyejuayana*

<sup>14</sup> Chë tcbonjauyana soyëngama, cochjama chë entsanga chamotsenójuabnama, y Bëngbe Bëtsabe delante cochjábuayenaye chënga ndoñe yontsamna nÿe palabrëngama jabuachana enatsëtsnayana; er chca, ndocna tšabe soye ntjamana, y chca tmojtse-natsëtsná ora, jamana chë soye ouenanënga más batšá chamotsošbuáchema, y ju-jabuáchana chëngbe tšabe juabnënga jtsondbiamama. <sup>15</sup> Lempe ntšamo icobencá cochtsama, aca chacotsemnama mo canÿe entsá ndabiama Bëngbe Bëtsá cháuyana nÿetsca soyënguifne tšabá amá yomna ca; aca chacotsemnama mo canÿe trabajayacá, nda tondaye tontsebomna ndayama jatëuatjama; y chacotsemnama chë ndegombre buayenánana corente tšabá buatëmbayá. <sup>16</sup> Entšanga nÿe quem luarentša soyëngama, ndoservena palabrënga tmojtsencuénta ora, chë soye ndoñe cattsuenana; er chë soye jamana entsanga puerte inÿetsá chamobocanama, ntšamo Bëngbe Bëtsá ndoñe yondmëncá, inÿetsá jtsejuabnayëse y jtsamëse. <sup>17</sup> Chëngbe buatëmbana soyëngaca puerte bacá ínÿengbioye jáborlana, nÿa mo canÿe uabouana šocana chamotsebomnama cuaf-jamcá. Chca buatëmbayënguëntše Himeneo y Fileto bontsemna. <sup>18</sup> Chata chë ndegombre benachentsana tbojtsojuánañe, y ibojttsichamo chë obanënga chámuatayenama Bëngbe Bëtsá ya catënjama ca, y Jesús chaojésabo ora, nÿetscanga chámuatayenama Bëngbe Bëtsá ndoñe yochanjama ca. Chë causa, chata bontsama básefta entsanga chë ntšamo Jesu-crístbeñe imojanošbuachecá, mora ya ndoñe chamondëtsošbuáchema. <sup>19</sup> Pero Bëngbe Bëtsabe ndegombre buayenánana nÿets tempo cachcá endesomñe, y ndocná quenátobena chë soye jatrócama. Chca endmëna mo chë ndëtšbenga ndayiñe canÿe bëts yebna tojebncá, ndayiñe mëntsá yojtšábemana: “Bëngbe Utabná endëubuatma chë chábenga imomnënga”, y “Nÿetscanga chë Bëngbe Utabná benga imomnënga ca tmojtsichámënga, chamuajbaná nÿetsca bacna soyënga amana ca”.

<sup>20</sup> Canÿe uámana entsabe yebnentše, tsafjoca soyënga ndoñe nÿe castellano o midio soyënga ntsemnana, ndayá niñëse y fshantse soyëngnaca; chë natsana soyënga uámana tescama jtsebuájonana, pero chë inÿe soyëngna, nÿe nÿets tempo chaut-soservénama. <sup>21</sup> Chca endmëna chë Jesucrístbeñe imojtsošbuachëngbeñe, ndoñe nÿetscanga tmontsajbaná bacna soyënga juabnayana y amana, ni chë chca tmojtsama entsángbentsana ndoñe tmontsojuaná. Pero, chca jtsojuánañama tojtsebošá, echántsemna canÿa Bëngbe Utabnabiama tšabe trabajayá; y chca, mo chë tsafjoca castellano y midio soyëngcá, canÿe uámana trabajuiñe echanjosérvia, y cha sempre echántseprontana ndaye tšabe soye jamama.

<sup>22</sup> Chíyeca, ntšamo básefta bobontsënga bacna soyënga jamama mondbošcá, ndoñe cattsama; pero aiñe cochtsiyena ntšamo Bëngbe Bëtsabe bominÿiñe tšabá yomncá jtsamëse, Jesucrístbeñe puerte cochtsošbuáchiye, Bëngbe Bëtsá y ínÿenga cochtsababuánÿeshana y nÿetscángaftaca natjëmbana cochtsomñe, chë chaújabuachama Bëngbe Utabná mondbetsotšëmbuanëngaftaca cánÿiñe, ndocna bacna soye ainaniñe ntsebomncá. <sup>23</sup> Ndoservena soyëngama palabrënga y ndosertánentsana óbocana soyëngama ndoñe cattsuenana; aca corente condétatšëmbo chë soyënguentsana entsanga nÿe jabuachana enatsëtsnayeñe jabocanana. <sup>24</sup> Pero chë Bëngbe Utabnabiama oservená ndoñe quebnátsmëna ínÿengaftaca jabuachana ntsenatsëtsnayana; chamna, cha bontsemna jtsababuánÿeshanëse nÿetscanga jtsënÿayana, jtsemnana tšabe buatëmbayá y ínÿengaftaca uantadá. <sup>25</sup> Cha bontsemna, chë chabe contra y chabe buayenánama contra imomnënga, chë ndegombre soyënga jabuátambama, pero ndoñe ntjatenabotamnaycá. Chca bontsemna, nderado Bëngbe Bëtsá nanjama chca juabnayana chamotrocama, y chca, chënga chë ndegombre soyëngama chamotsetatšëmbuama; <sup>26</sup> chënga botamana



chamuatsjuaboma, y Bëngbe Bëtsá, Satanasbe cucuatšënguentšana cháuatsebacama. Satanás chënga tojanëtabá ntšamo cha tojtsebošcá jamama, mo bayënga canÿe uachmaniñcá.

### 3

#### *Ntšamo entšanga mochtsemna, Cristo jésabama chaojtsobeco ora*

<sup>1</sup> Pero aca cmontsemna jtsetatšëmbuana, Cristo jésabama tempo chaojtsobeco ora, entšanga echántsamna puerte padecena soyënguiñe jtsiyenana. <sup>2</sup> Chca echántsemna, er entšanga, cada ona nÿe cachabe tšabiamana echanjësenojuabnaye, crocénana jtsebomnama tša mochántseboše, mochántsemna enábotamnayënga y ínÿengbioye mo nduamanëngcá mochantsëñÿaye. Bëngbe Bëtsabiamana y ínÿengbiamana bacá mochantsóyebuambnaye, chëngbe bëtsëtsangbioye ndoñe quemochátayaunana, ni chëngbiamana tšabe soyënga tmojtsamëngbioye quemochtëttacheuanaye, y Bëngbe Bëtsabiamana y chabe soyëngama ndoñe respeto quemochátsbomna, <sup>3</sup> ni cachëngbe pamíllangbioye quemochátatabuanÿeshana, mochántseboše ndoñe natjëmbana jtsiyenama, uayátsenayënga mochántsemna, cachënga jenomándama ndoñe quemochátobena, mo ainana ndbomnëngcá mochántsemna, y nÿetsca tšabe soyënga uabotëngënga. <sup>4</sup> Chënga, uayayëngbe cucuatšinë entšanga ayentsbáshejuanënga mochántsemna, mochántsama soyënga tondayama ntjatsrreparánëse, y cachënga uámana entšangcá mochántsenobiamnaye; chënga Bëngbe Bëtsá jatsbobonshana cuenta, cachëngbe cuerpiñe tšabá jtsomñama soyënga mochántseboše. <sup>5</sup> Inÿenga echantsinÿana mo ndegombre Bëngbe Bëtsá adórayënga chënga cuaftsemncá, pero chë mochántsama soyëngaca mochanjínÿanÿiye, Bëngbe Bëtsá obená bëtsemnama chënga ndoñe mondošbuáchema.

Nÿa tondayama chëngaftaca cattscuëntaye. <sup>6</sup> Chënguentšë báseftanga mondmëna, y chëngna botamana palabréngaca yebnënguenache jamashjnana, y chenache, chë paselo yomna jáingñama shembásenga jtsaíngñayana, chëngbe buatëmbana soyënguiñe chamotsošbuáchema. Chë shembásenga bëtscá bacna soyënga tmojama, y chë causa ndoñe corente natjëmbana montsiyena, y ba ndoñe tšabe soyënga imojtsama nÿe cachënga tšabá jtsemnama, ntšamo tmojtsebošcá. <sup>7</sup> Chënga nÿets tempo nÿe ndaye tsëm soye jatóntšana jatatsjínÿana, pero ndocna te ntjobenayana Bëngbe Bëtsabe ndegombre soyënga josértama. <sup>8</sup> Ntšamo Janes y Jambres Moisesbe contra ibojamncá, cachcá, chë ínÿenga jáingñama abuátambayënga nÿetsca ndegombre soyëngama contra jtsemnana. Chë entšanga chëngbe juabniñe nÿe bacna soyënga jtsebomnana, y Bëngbe Bëtsá chënga tojtsëbaté, chënga chë ndegombre soyënguiñe ndoñe ntsošbuáchiyana causa. <sup>9</sup> Pero chënga ndoñe quemochatobenaye bëtscá entšanga jáyëñjanama, er nÿetsca entšanga mochanjátatšëmbona chënga nÿe bacna soyënga juabnayënga imomnama, mo chë Israe- loca entšanga tmojantatšëmboncá Janes y Jambres nÿe chca juabnayata bëtsemnama.

#### *Inÿe soye Timotébioye tbojanbonÿé*

<sup>10</sup> Pero acna, puerte tšabá condëtatšëmbo ntšamo atše tijabuatambacá, ntšamo jtsamëse atše tsiyena, ndayá jamama tsjuabná, ntšamo atše Jesucristbeñe puerte tsošbuaché, ntšamo ínÿengaftaca uantado tsmëna; ntšamo atše, Bëngbe Bëtsá y ínÿengbioye tsababuánÿeshana; ntšamo atše, Bëngbe Bëtsábeñe jtsobátmanëse, <sup>11</sup> ínÿenga šmonjanacmena ora; y sënjansufrina ora, padecena soyënguiñe bëts añemo tsjánbomna. Acnaca condëtatšëmbo ntšamo atše chama Antioquía, Iconio y Listra bëts pueblëngoca tsjansufrínama. Pero masque entšanga tša šmonjanacmena, atše lempe sënjánauantana, Bëngbe Bëtsábeñe jtsobátmanëse, y cada ora, Bëngbe Utabná chëngbentsana šonjanatsbocá. <sup>12</sup> Ndegombre endmëna, nÿetscanga chë Bëngbe Bëtsá jadórana soyënga jtsamëse jtsiyenama bošënga, y Cristo Jesúseftaca cánÿiñe mo canÿacá imomnënga, puerte mochanjasúfria, chca bëtsemnama, chënga chamosufrima ínÿenga

chamojtsama ora; <sup>13</sup> pero chë bacna entšanga y chë ínÿenga áingñayënga, cada te más bacna entšanga mochántsemna, más bacna soyënga jtsamëse; chënga ínÿengbioye mochántsaingñaye, pero cachëngnaca ingñënënga mochántsemna.

<sup>14</sup> Pero aca, nÿets tempo cochtsejuabnaye y cochtsama lempe ntšamo tcojuatsjinÿcá, chë ndegombre soyëngcá cojtsošbuácheñe, er aca tšabá condëubuatma chë tcmojanbuátëmbanga; <sup>15</sup> y aca, cabá básetema conjamna orscana, chë Bëngbe Bëtsabe uabemana palabrengama condëtatšëmbo, chë ndaye sóyeca aca contsobena juatsjínÿana, Bëngbe Bëtsá chacmatsbocama, Cristo Jesúsbeñe jtsošbuáchiyëse. <sup>16</sup> Bëngbe Bëtsá, Uámana Espíritbeyeca tonjama, lempe ntšamo Bëngbe Bëtsabe uabemana palabrenguiñe yobinÿncá entšanga chamuábemama. Chë uabemana palabra endoservena, bëngbioye chë ndegombre soyënga jabuátambama; nderado ndaye soye ndoñe tšabá tmonjamama bënga chamotsetatšëmbuama, jinÿanÿiyama ntšamo más tšabá chë soyënga muanjobenaye jamama; y bëngbioye jabuátambama ntšamo jtsiyenama chë Bëngbe Bëtsabe bominiñe tšabá yomna soyënga jtsamëse; <sup>17</sup> chca, canÿe entšá Bëngbe Bëtsabiama oservená y obená chaotsemnana, tšabá chaotsetátšëmbo y sempre chaotseprontana nÿetsca tšabe soyënga jtsamama.

#### 4

<sup>1</sup> Bëngbe Bëtsabe delante y Cristo Jesús, nda echanjabo mo reycá jabomándama y jabáyanama chë ainëngbiana y chë ya mochjóbanëngbiana, ntšamo chëngbe vidënguiñe tmojëftsemcá tšabá o ndoñe tšabá bëtsemnana, chatbe delante cbomandá, <sup>2</sup> Bëngbe Bëtsabe palabra entšanga chacotsabuayiynayama; sempre chca jamama cochtseprontana, masque entšanga aíñe o ndoñe jouenama tmojtsebošëse. Cochjama, ínÿenga bacna soyënga tmojtsamama chamotsetátšëmbo, chca tmojtsamama cochjucácana y cochjábuaenaye ndayá jamama yojtsamnana. Sempre chca cochtsabuátambaye, chca ora puerta uantado jtsemnëse. <sup>3</sup> Chca cochtsama, er canÿe tempo echanjóshjango y chora entšanga chë ndegombre buatëmbana soye ndoñe quemochátuenana; chamna, nÿe chë último tsëm soyënga jtsetatšëmbuama boše causa, ba abuátambayënga mochanjuánguango, y chënga mochántsihamo soyënga nÿe ntšamo cach entšanga jouenama tmojtsebošcá. <sup>4</sup> Chënga chë ndegombre soyënga ndoñe quemochátuenana, y nÿe ndaye cuentënga mochántseyeunana. <sup>5</sup> Pero aca, siempre botamana cochtsejuabnaye; chë padecena soyëngama chacojtsesufrina ora, añemo cochtsebmoma; chë Jesucristbiana tšabe noticiënga entšanga abuayiynayabe trabajo cochtsama; y nÿa cochtsentšena ndayá Bëngbe Bëtsá tcmojabonÿecá tšabá jtsamama.

<sup>6</sup> Er mo Bëngbe Bëtsábioye jëtschuayama, canÿe bayá obanáftaca tcojabuešcja vínoye jtsopochocancá, cachcá atšbe vídnaca ya jopochócama entsemna. Atše jóbanama bécoñe entsemna; chanjóbana ora echántsemna Bëngbe Bëtsá oyejuayá chaotsemnana. <sup>7</sup> Cristo Jesúsbe soyëngama corente sënjenojuerzá. Mo canÿe travisiayacá, chë jashjanguama yomna luaroye ya tojashjangcá, átšnaca ya, ntšamo Bëngbe Bëtsá yobošcá atše jtsamëse, atšbe trabajo ya tijapochocá. Atše nÿets tempo Jesucristbeñe sëndošbuaché. <sup>8</sup> Chcasna, atšbiana canÿe uacanana soye echántsemna, er Bëngbe Bëtsá tojama atše chabe bominiñe tšabia chaitsemnana. Bëngbe Utabná endmëna chë ndegombre tšabá ichamuá entšanga aíñe o ndoñe tšabá tmonjamama, y cha chë uacanana soye šochántatšetaye, entšanga ntšamo tmojamama cha chaojabáyana ora. Pero cha nÿe atše ndoñe chë uacanana soye quešochtëtatšetaye, ndayá nÿetscángbioye chca, ndëmuanÿenga puerta imoboše cha cachiñe cháuesabama, cha imobobonshánayeca.

#### *Inÿe soyënga Timoteobiana*

<sup>9</sup> Lempe ntšamo tcojobenacá cochjama betesco jabama atše jabínÿama; <sup>10</sup> er Demas, cha yapa nÿe quem luarentša entšangbe soyënga bošá enjamna, cha cachcá šonjesonÿá y Tesalónica puebloye tojtsoñe. Crescente Galacia luaroye tonjá y Tito Dalmacia luaroye.

<sup>11</sup> Nýe Lucas, chë šmonjanájabuachanënguentšana, mora átšeftaca entsemna. Marcos cochjaftsenguango y ácaftaca cochjëftsbetše, er cha atšbe trabajuama puerte oserverná endmëna. <sup>12</sup> Tíquico, Efesoye sënjichmó. <sup>13</sup> Chacojabo ora, uabonjanía šcochjesacñe, atše Troas bëts pueblocá, Carpbe yebnoca tijésaboshjona; chë librëšangánaca, pero chë uámana uabemana tsbuanachangá ndoñe chacmondétsebnatjëmbe.

<sup>14</sup> Alejandro, chë cobre soyënga pormayá, puerte bacá šonjaborlá. Bëngbe Utabná bochanjacastíga, ntšamo atše šojaborlama. <sup>15</sup> Chabiamá cuedado cochtsebmna; cha tojobenase ntšámnaca cmatjabórla, er cha chë bënga mondabuayiyná soyëngama contra entsemna.

<sup>16</sup> Chë natsana soyama, mándayëngbe delante šonjanotocá jenëuyanama ora, atše ndocná chešnátanajabuache; nýetscanga cachcá šmonjésonyaye. Pero atše sentsobátmana, Bëngbe Bëtsá chama chënga chaotsaperdoná. <sup>17</sup> Pero Bëngbe Utabná aíñe šonjanájabuache y tonjanma atše bëts añemo jtsebmnama, y chcase, atše sënjanobená Jesucristbiamá nýetsca chabe tšabe noticiënga entšanga jábuayenama, y chë luarentša ndoñe judiënga tmonjanobená chë soye jouenama. Mëntšá, Bëngbe Utabná canye uabouana resjuentšana šonjanatsbocá, mo canye león jtsosañámentšana ndábioye cuafjatsbocacá, <sup>18</sup> y Bëngbe Utabná šochanjatsbocá, bacna soye ndocná chašondëborlama; y sempre jtsinýenëse, celoye, chë ndayentše cha yománda luaroye šochanjesbetše. ¡Nýetscanga nýetsca tescama cha chamotsatschuaná! Chca chaotsemna.

*Pablo Timotéobioye jadiósoftanama*

<sup>19</sup> Atšbe cuenta cochjácheuaye Prisca y Aquila, y Onesíforbe pamíllnaca. <sup>20</sup> Erasto, Corinto pueblocá tontsoquedañe, y Trófimo Mileto pueblocá šocá sënjëftsebmshjona. <sup>21</sup> Lempe cochjama, uaftena tempo chaondóshjango ora moye jabama. Acnaca cmontsechuaná Eubulo, Pudente, Lino, Claudia y nýetscanga muentše Jesucristbeñe ošbuáchiyënga.

<sup>22</sup> Atše sëntseimpadana, Bëngbe Utabná Jesucristo ácaftaca chaotsemna, y Bëngbe Bëtsá tšëngaftangbeñe tšabe bendicionënga chaotsemnama chaoma.

## Tito

### *Jachuayama*

<sup>1</sup> Atše Pablo, Bëngbe Bëtsabe oservená sëndmëna y Jesucristbe ichmoná entsanga jábuayenama, chë Bëngbe Bëtsá chabe entsanga chamotsemnama tojábacacanga, Jesucristbeñe chamotsošbuáchema y chë ndegombre soyëngama chamotsetatšëmbuama; chë soyënga endmëna ntšamo bënga, Bëngbe Bëtsabe básenga bëtsemnama, mondoyena jt-samëse. <sup>2</sup> Lempe chca sëndama, er Bëngbe Bëtsábeñe jtsošbuáchiyëse, atše sentsobátmana chë nyetsca tescama yomna tšabe vida jtsebonnama. Bëngbe Bëtsá, chë ndocna te obosterayá, quem luare cabá ndmëna orscana tojanašebuachená entsanga chca vida jtsebonnama; <sup>3</sup> y nÿa chama tempo tojóshjango ora, chë entsanga jábuayenama, soyëngaca Bëngbe Bëtsá chabe palabra šojinÿanyé, ndayá Jesucristo entsangbiama yochjanmama; y chca jábuayenama atše palabra šmonjabonÿé, Bëngbe Bëtsá, bëngbe Atsebacayabe mándoca. <sup>4</sup> Tito, quem tsbuanácha cbontsabobiamná. Atše Jesucristbe soyëngama entsanga sënjanabuayiyná ora, aca chábeñe contsanošbuaché y nyets útata cachca ošbuáchiyana Jesucristbeñe bondbomna, y chca, aca mo atšbe ndegombre uaquiñacá condmëna. Atše sëntseimpadana, Bëngbe Bëtsá Bëngbe Taitá y Jesucristo Bëngbe Atsebacayá, ácebeñe tšabe bendicionënga chaotsemnama chata chaboma, y chaboma aca ainaniñe tšabe ebionana chacotsebonnama.

### *Titbe trabajo Creta luaroca*

<sup>5</sup> Atše Creta luaroca tcbonjëftsanboshjona, ntšamo chentše jamama enjetsash-bencá chacomama, y nyetsca pueblënguenache chë ošbuachiyëngcá enefjuanëngbeñe bëtsëjemëngcá amëndayënga jtsemnama chacubuáyanama, ntšamo tcbonjftsemandacá. <sup>6</sup> Canÿa bëtsëjëmama uabuayaná mëntšá bontsemna: chaotsiyena ntšamo chabiamana ndocná chaondëtsichamo ndoñe tšabá yontsama ca; nÿe canÿe shembásabe boyá; chabe básengna, Jesucristbeñe ošbuáchiyënga chamotsemna, y chamotsiyena, ntšamo ndocná chaodayana chënga nÿe jenomándama ntsoyencá y nÿe ntšamo tmojtsebošcá imojtsiyena ca, o chënga chëngbe bëtsëtsanga o mándayënga ndoñe montsayaunana ca. <sup>7</sup> Er cánÿentše ošbuachiyëngcá enefjuanëngbe mandayá, Bëngbe Bëtsabe trabajo jamama tmojabonÿeyeca, cha bontsemna jtseyenana, ntšamo ndocná chaodayana cha ndoñe tšabá yontsama ca; ntjajuaboycá, nÿe ntšamo cha tojtsebošcá ndoñe chaondëtsama; ndoñe chaondëtsiyena nÿe rábiaca jtsemnama; ndoñe chaondëtsetmó; penzentero ndoñe chaondëtsemna; y ndoñe chaondëtseboše nÿe paselo becá crocénana jtsebonnama. <sup>8</sup> Pero chabe yebnentše posada entsanga júyentšamiamana sempre chaotseprontana, tšabe soyënga chaotsebinÿnama sempre chaotsentšena, botamana juab-nayá chaotsemna, ntšamo Bëngbe Bëtsabe bominÿiñe tšabá yomncá chaotsiyena, nyets tempo Bëngbe Bëtsábioye chabotsadorana, y cachá nyetsca soyënguiñe jenomándama chaotsobena. <sup>9</sup> Cha bontsemna nyets tempo jtsošbuáchiyana y jtsoybedecénana chë ndegombre buayenana soye, ntšamo tmojabuatëmbacá, chca, chë ndegombre bu-atëmbana soyëngaca inÿenga añemo chaotsatsatnama, y chë soyama contra tmojtsemnënga jáyënjanama, ndoñe tšabá montsamama.

<sup>10</sup> Cha chca bontsemna, banga nÿe ndëmandánënga jtseyenama bošënga mondmëna causa, y chënga mondmëna, nÿe ndaye ndoservena soyëngama yapa oyebuambnayënga y inÿenga áingñayënga, y chcanga más mondmëna chë nyetsca ošbuáchiyënga base bobachtema chë más delicadentše tëtšenënga jtsemnama yojtsamna ca mondbëtsichamënguentše. <sup>11</sup> Y entseyta chëngbioye jtayáchetana, er chënga jamana ba pamíllanguentše nyetscanga Jesucristbeñe ošbuáchiyana chamotsajbanama. Chënga



chca mondbétsama, chë ndoñe yontsamna jtsabuátambayama soyënga jtsabuátambayëse, nÿe paselo crocénana jongánama.

<sup>12</sup> Enjamna canÿa, ndabiama entsanga jtsichámuana cach Creta luarentša diosëngbiama oyebuambnayá canjamna ca, y cha cachabe luarentša oyenëngbiama mëntsá tonjánayana: “Creta luarentše oyenënga, nÿets tempo bosterënga mondmëna, ainana ndbomnënga y oyënjayënga nÿe becá jasama bošënga ca.” <sup>13</sup> Y chca ndegombre cha tonjánayana; chíyeca chënga jabuache cochjucácana, chca, chënga Jesucristbeñe chamotsošbuáchema y chamotsobedecena chë buatëmbana soyënga, chë ndayiñe bënga mondošbuaché; <sup>14</sup> y cach judiëngbe cuentënga ndoñe chamondëtsuenana, ni chë ndegombre soyënga uabotenëngbe mandënga.

<sup>15</sup> Chë ainaniñe bacna juabnënga ndbomnënga y chca juabnëngaca ndëmandánënga, nÿetsca soyëngama jtsejuabnayana mo ndegombre tšabe soyënga cuaftsemncá; pero chë bacna soyëngaca mandánënga y Jesucristbeñe ndošbuáchiyënga, nÿe ndayámnaca jtsejuabnayana mo bacna soye cuaftsemncá. Chca entsemna, er chëngbe juabnoca nÿe ena bacna soyënga jésebomnana, y ndaye bacna soye tmojama ora, chëngbe ainaniñe juabnënga ndoñe ntsebomnana, bacna soye tmojamama chaúyanama. <sup>16</sup> Chënga jtsichámuana Bëngbe Bëtsá imuábuatma ca, pero ntšamo tmojtsama soyëngaca jtsinÿinÿayana chca ndoñe ndegombre yondmënana. Chënga Bëngbe Bëtsabe bominiñe puerte bacna entsanga mondmëna, y ntšamo cha tomandacá ndoñe ntsamana; chë causa chënga ndoñe ntsobenana ndaye tšabe soye jamama.

## 2

### *Soyënga ntšamo chë ndegombre buatëmbánana endmëncá*

<sup>1</sup> Ntšamo chacojtsoyebuambnacá sempre chaotsemna ntšamo chë ndegombre buatëmbánana endmëncá. <sup>2</sup> Cochjayana chë bëtsëjëmëngna chamotsemna cachënga nÿetsca soyënguiñe jenomándama obenënga, nÿetscangbiama mo uámana entsangcá utabnënga, ntšamo jtsiyenama tšabá juabnayënga, nÿets tempo chë ndegombre soyënguiñe chamotsošbuaché, Bëngbe Bëtsá y nÿetscanga chamotsababuánÿeshana, y padecena soyënguiñe puerte uantadënga chamotsemna.

<sup>3</sup> Cachcá, chë bëtsanana shembásenga chamotsiyena mo Bëngbe Bëtsábioye adorayëngcá, uayátsenayënga ndoñe chamondëtsemna, ni tmoyënga. Entsamna chamotsiyena tšabe soyënga jtsamëse; <sup>4</sup> chë tobiasënga chamotsinÿanÿná y chamotsabuatambá ntšamo chëngbe boyanga y básenga jtsababuánÿeshanana, <sup>5</sup> ntšamo cachënga jenomándama jtsoebenana, ainaniñe ndocna bacna soye ntsebomnana, yebnentša soyënga jtsamama jtsentsénana, nÿetscángaftaca tšábenga jtsemnana, cachëngbe boyángbioye jtsayaunanana, chca, ndocná chaondëtsobena Bëngbe Bëtsabe palabrama bacá jatóyebuambnayana, ntšamo chë tobiasënga tmojamama.

<sup>6</sup> Cachcá, chë bobontsënga añemo cochtsatšatnaye cachënga jenomándama chamotsobenama, <sup>7</sup> y chënga cochjínÿanÿiye ntšamo yomna jtsiyenana, cach aca nÿetsca soyënguiñe tšabá jtsamëse. Chca chacojtsabuatambá ora, nÿe chë ndegombre buayenánana cochtsabuátambaye y corente respétoca chca cochtsama, <sup>8</sup> chë ndegombre soyënga jtsóyebuambnayëse; chca, ndocná chaondobená jayanana aca ndoñe tšabá tconjayana ca, y chca, chë acbe contra ichámënga chamotsëuatja, er ndocna bacna soye quemochatobenaye bëngbiama jayanama.

<sup>9</sup> Chë nÿets tempo nÿe ínÿabiama oservénënga cochjábuayenaye, chëngbe nduiñëngbioye chamotsobedecénama, soyënga chamotsama chënga chamotsóyejuama, y yajuatsanënga ndoñe chamondëtsemnama. <sup>10</sup> Ndoñe chamondëtsatbëbana, pero aíñe nÿetscañe tšabe palabra bomnënga chamotsemna. Chënga chca entsamna, chca, ínÿenga chámuinÿe y chamojuabó tša botamana chë buatëmbana soyënga, Bëngbe Bëtsá bëngbe Atsebacayabiama yomna ca.

11 Er Bëngbe Bëtsá bënga šonjinÿanÿé cha bëngbe tšabiamama juabnënga yobomnama, y chca, cha tojama nÿetsca entšanga chamotsobena atsebácanënga jtsemnama. 12 Chë Bëngbe Bëtsabe juabna bëngbe tšabiamama, šontsabuatambá jtsajbanama oyenana soyënga jtsamëse mo chë Bëngbe Bëtsá ndoñe mondadoranëngcá, quem luarentša bacna soyënga bošana jtsajbanama; y ntšamo mora quem luarentše jtsiyenámna šontsabuatambá, cabënga jenomándama jtsobenëse, ntšamo Bëngbe Bëtsabe bominiñe tšabá yomncá y cha jadórana soyënga jtsamëse. 13 Y chca jtsamëse, y Bëngbe Bëtsábeñe ošbuachiyánaca jtsiyenëse, jtsobátmanana chë puerte oyejuayana jtsebomnama te, Bëngbe Bëtsá obená y Atsebacayá Jesucristo, buashinÿinÿaniñe y canÿe corente uamanacá yochjésabo ora. 14 Cha chabe derecho vida jtsobomñama cachcá tojanonÿá y bëngbiamama tojanóbana, chë ntšamo Bëngbe Bëtsá bemandacá ndoñe yondmëncá jtsamëse oyentšana bënga játsebacama, ainaniñe ndocna bacna soye ndbomnënga jábiamama, bënga chábenga chamotsemnama, sempre prontánënga ntšamo tšabá yomncá jtsamama.

15 Chca cmontsemna jtsabuátambayana, chënga becá añemo jtsatšatnayëse, y jtsinÿanÿnayëse chënga bacna soye tmojamama, chë nÿets condbomna mándoca jucácanëse. Ndoñe catjaleséncia ndocná chaondayana aca mando ndoñe condbomna ca.

### 3

#### *Ndayá Jesucristbeñe ošbuachiyënga yojsamna jamana*

1 Cochtsama chënga chamuatenójuaboma chë mandadënga y inÿe mándayënga chamotsayaunanama, chamotsobedecénama, y tšabá yomncá jamama sempre chamotseprontánama. 2 Ndocnabiamama ndocna bacna soye chamondëtsoyebuambná, penzentserënga ndoñe chamondëtsemna, ndayá nÿetscángaftaca natjëmbana jtsiyenama bošënga, tšabá mándbomnënga, nÿetscanga tšabe ainánaca imojtsënÿama entšanga jtsinÿanÿnayëse.

3 Er bëngnaca tempo monjamna Bëngbe Bëtsabe soyëngama ndosertánënga, ntšamo Bëngbe Bëtsá endëmandacá ndoñe quemjatanama, ingñënënga y mandánënga monjamna nÿetsca bacna soyënga jamama juabnëngaca y nÿe quem luarentše tšabá jtsemnama juabnëngaca. Bënga monjaniiyena nÿe bacna soyënguiñe juabnaye, ínÿenga uantšaboše. Inÿenga bënga šonjanëbuayënja y bënga nÿetscanga monjanenáboyënja.

4 Pero Bëngbe Bëtsá, bëngbe Atsebacayá, bëngbe tšabiamama juabna yobómnyayeca y tša šuababuánÿeshanama šonjaninÿanÿé ora, 5 cha šonjanatsebacá, pero ndoñe nderado bënga ndaye tšabe soye tmojanmama, ndayá cha bëngbiamama tbojanongméyeca. Cha šonjanatsebacá, bëngbe bacna soyënga jabuajuánase, y chë Uámana Espiritu jujabuáchëse, bënga mo tsmëma entšangcá chamotsemnama, ntšamo tempo yojamncá ntjatsjuabnaycá y ntjatamcá. 6 Bëngbe Atsebacayá Jesucristbeyeca, Bëngbe Bëtsá tojanma Uámana Espiritu bëngbe ainaniñe nÿets tempo chaotsemándama y bënga chašotséjabuachanama, 7 chca bënga, Bëngbe Bëtsá bacna soyëngama šojaperdónanga y bëngbe tšabiamama juabna bómnyayeca tojayana chabe bominiñe tšábenga imomnënga, chamotsobena cha yobomna soyënguentšana bënga mo ndayá cuaftsëtocancá jójëngacñama, y chca, chábeñe jtsošbuachiyëse, chë nÿetsca tescama yomna tšabe vida chamotsobátmanama.

8 Chca, lempe ntšamo tijayancá nÿa ndegombre endmëna, y atše sëntseboše chë soyëngama bëtscá chacotsabuatambá, chca, chë Bëngbe Bëtsábeñe tmošbuachenga chamotsentsena chë tšabe soyënga jtsamama. Chë buatemánana puerte tšabá endmëna y nÿetscangbiamama bëtscá endoservena. 9 Inÿenga nÿe ndoservena soyëngama jabuachana tmojtsetsenatsëtná ora, y anteungbe cuentëngama chamojtsoyebuambná ora, ndoñe cattsontremetena; ndoñe cattsama cach tšëngaftanga ndoñe tšabá jtsenëyeunanamcá, y judiëngbe leyëngama ndoñe ínÿëngaftaca cattsenpéliaye. Chca jtsamana tondayama ntososervëna, y nÿe bonamente chca jtsamana.

<sup>10</sup> Nderado nda tojtsama entšanga ndoñe cachcá nyetscanga chamondětsejuabnama y chamotsenpéliama, canye o uta soye cochjabuayená ndoñe tšabá tonjamama; pero cha ndoñe tcmónjóyeunase, chentšana cháftaca ndoñe más cattsóyebuambnaye. <sup>11</sup> Chca cochjama, er aca cochanjátatsšëmbona canya chca tojtsemná, chabe juabna tojatrocá bacna soyënga jtsejuabnayama. Chë soye y chë inyë bacna soyënga ntšamo cha tojtsamcá, jtsinÿanÿnayana cha ibojtsemna castiganá chama jtsemnama.

### *Inye soyënga Titbiama*

<sup>12</sup> Atše, Artemas o Tíquico ácbioye chajichmó y choca chaojáshjango ora, ndayánaca cochjama Nicópolis puebloye aca jama atše jinÿama, er atše sënjajuabó chentše chë uaftenëntscuana jëftsemnana. <sup>13</sup> Lempe ntšamo chacojobenacá, cochjuájabuache chë inÿenga obuauyayá Zenas, y Apólosnaca; lempe ntšamo chata ibojtsëjabotcá cochjátšataye, inÿoye jama jatóntšama chamobenama y benachëjana tondaye chaondëtsabuáshebenama. <sup>14</sup> Atše sëntseboše, bëngbe entšanga, chë bëngcá Jesucristbeñe ošbuáchiyënga, chamotsentšena chë tšabe soyënga jtsamama y chë puerte ujabótënga jtsëjabuáchanama, chca, chënga tondayama ndoserverna vidënga ndoñe chamondětsebomnama.

### *Pablo Títbioye jadiósoftanama*

<sup>15</sup> Nyetscanga chë átšeftaca montsemnëngnaca cmontsechuaná. Atšbe cuenta cochjácheuaye nyetscanga chë bënga imuababuanÿeshanëngbioye, cach bëngcá Jesucristbeñe ošbuáchiyana bómnyeca. Atše, Bëngbe Bëtsá sëntseimpadana, cha chaoma ácebeñe tšabe bendicionënga chaotsemnama.

## Filemón

### *Jachuayama*

<sup>1</sup> Atše Pablo, mora utamená Cristo Jesusbiana oservena causa, quem tsbuanácha sentsabiamná, Jesucristbeyeca bēngbe catsata Timotéoftaca, acbiana Filemón, bēngbe bonshaná y nda bēngaftaca condētrabája Jesucristo jaserviama. <sup>2</sup> Atše sēntsacheuaná, Jesucristbeyeca bēngbe uabena Apia y Arquípnaca, nda bēngaftaca cányiñe Jesucristbe soyēngama endenojuerzana; y nyetsca ošbuachiyēngnaca, ndēmuanyēnga imuamana acbe yebnentše jénefnama Bēngbe Bētsá jētschuayama. <sup>3</sup> Atše sēntseimpadana Bēngbe Bētsá Bēngbe Taitá y Bēngbe Utabná Jesucristo, chata chaboma tsabe bendicionēnga tsēngaftangbeñe chaotsemnana, y chaboma tsēngaftangbe ainaniñe tsabe ebionana chašmotsebonnana.

### *Filemonbe bonshánana y ošbuáchiyana*

<sup>4</sup> Bēngbe Bētsáftaca stsencuēnta ora, acbiana sēndbētsenojuabnaye, y sempre acbiana Bēngbe Bētsá sēndbētsatschuanaye, <sup>5</sup> er atše sēnjátatsēmbona ntšamo aca nyetsca chē Bēngbe Bētsábenga imomnēnga icuababuánjeshanama, y ntšamo aca Bēngbe Utabná Jesúsbeñe tša icošbuáchema. <sup>6</sup> Bēnga, Jesucristbeñe ošbuáchiyēnga quetsomñecá, ácaftaca mo canyáca fsēndmēna. Chca endmēnayeca atše Bēngbe Bētsá sēntseimpadana, tsēngaftanga chašmobená más botamana josértana nyetsca chē Bēngbe Bētsábiocana tmojóyēngacñe tsabe bendicionēnga, bēnga Cristo Jesúsēftaca cányiñe mo canyáca bētsēmnayeca. <sup>7</sup> Jesucristbeyeca atšbe bonshana catsata, aca chē Jesucristbeñe ošbuáchiyēnga tša condábabuanjeshanama, atše corente oyejuayá sēntsemna y bēts añemo sēntsebonna. Y aca tcojama, nyetscanga chē Bēngbe Bētsábenga imomnēnga chēngbe ainaniñe ngmēnaca ndoñe chamondētsemnana, chēnga jujabuáchese.

### *Pablo, Filemónbioye Onésimbiana tbojanimpadá*

<sup>8</sup> Y chca, atše Cristbe ichmoná quetsomñecá sēntsobena, aca nye jamándana ntšamo yomncá chacotsamama, pero atše chca ndoñe quichatsma. <sup>9</sup> Y cbondbobonshánayeca, chca játamamna, aca cbochanjaimpáda. Atše Pablo, Jesucristbe cuenta ichmoná jóyebuambayama y mora utamená, chabiana oservena causa, <sup>10</sup> canye ruego cbochanjábema, Onésimo chacuájabuachama. Atše utamená tsmēnēntscuana, Jesucristbe soyēngama cha sēnjanbuayiyná. Cha Crístbeñe tonjanošbuachéyeca, cha mo atšbe uaquiñacá tonjanóbema.

<sup>11</sup> Tempo, cha ácbioye tondayama quecmēnjátanservena, pero mora cha becá entsámama, acbiana y atšbiana. <sup>12</sup> Mora ácbioye sēntsatichamná, y atše siempre chabiana sēndbētsenojuabnaye y sēndbobonshana. <sup>13</sup> Atšbiana puerta tsabá manmēna cha átseftaca matēnjoquedase, acbe cuenta atše chašoservema, cárceloye utamená sēntsemnēntscuana, chē tsabe noticiēnga entsanga abuayiynaye causa. <sup>14</sup> Pero atše ndoñe chiyatsma cha chaoquedama atše chašuájabuachama, er atše ndoñe quetsátsboše aca obligaciónaca chacotsemnana, atše juajabuáchama ndayánaca chacomama; y sēntseboše aca ndayánaca chacoma, cach aca chca jamama puerta tcojtsebošese. Chcasna, tondaye quichatsma, chē soye chca chaotsemnana aca cabá ndocá ntjayancá. <sup>15</sup> Atše sēntsejuabná nderado Onésimo ácbentšana básefta tescama tojanoluaré, mora ácaftaca nyets tempo jtsatsmēnana ca, <sup>16</sup> y ndoñe nye acbiana mo nyets tempo canye oservenacá, ndayá chama más uamanacá, mo Jesucristbeyeca canye bonshana catsatcá. Atše puerta Onésimo sēndbobonshana, y acna cmontsemna más cha jtsebbonshánana, er cha mora ndoñe quenátsmēna canya nye acbiana nyets tempo oservená, ndayá Bēngbe Utabnábeyeca canye catsata, ntšamo cach aca condmēncá.



<sup>17</sup> Chca, aca atšbiamna condëjuabná mo ácaftaca cánÿiñe Bëngbe Utabnabiamna trabajay-acá; chíyecna cmontsemna cha jtoffjana, mo atše šcojofjá. <sup>18</sup> Nderado ntšamo cha tcmo-janborlá o ndayánaca tcmondebena, atše chama cbochjëtsëntsabuachiye. <sup>19</sup> Atše Pablo, cach atšbe cucuátšeca quem soye sëntsabiamná. Atše chama cbochanjëtsëntsabuachiye. Ndegombre, ndoñe quenátsiyta atše chacbëyana becá šcondebena ca, ntšamo atsbocaná jtsemnama atše tcojábuanayenama. <sup>20</sup> Chcasna, Jesucrístbeyeca atšbe catšata, Bëngbe Utabnáftaca cánÿiñe mo canÿacá quetsomñecá, Diosmanda chë pavor šcochtsebema. Diosmanda cochjama atšbe ainana ngménaca ndoñe chaondëtsemnama.

<sup>21</sup> Atše chca cbontsabobiamná, er atše tšabá sëndëtatšëmbo, ntšamo cbontseimpadancá cochjamama, y cabá más chama cochjatsmama. <sup>22</sup> Y mora inÿe soye, Diosmanda posada šcochjaboprónta, atše jányama chajábocna orscama, er atše puerte jtsošbuáchiyëse Bëngbe Bëtsábeñe sëndobátmana, cha tšëngaftangbiamna yochjama lempe ntšamo atšbiamna chašmojotjáncá, y chca, cha šochjaleséncia atše tšëngaftangbioye jésama.

*Pablo Filemónbioye jadiósoftanama*

<sup>23</sup> Epafra, muentše átšeftaca cárceloye utamená, Cristo Jesusbiamna entšanga abuayiy-naye causa, chánaca cmontsechuaná. <sup>24</sup> Y Marcos, Aristarco, Demas y Lucas, chë bëngaftaca mondëtrabájanga Cristo jasérviamna, chëngnaca cmontsechuaná.

<sup>25</sup> Atše sëntseimpadana Bëngbe Utabná Jesucristo, chaoma tšabe bendicionënga tšëngaftangbeñe chaotsemnama.

## Hebreos

### *Bëngbe Bëtsá bëngaftaca tojoyebuambá, chabe Uaquiñáftaca*

<sup>1</sup> Tempo, Bëngbe Bëtsá ba soye y ba soyëngaca bëngbe bëts taitángbioye tojanéyana, chë chabe juabna oyebuambnayëngaftaca. <sup>2</sup> Pero quem tempo bëngaftaca tojoyebuambá, chabe Uaquiñá jíchmuase, bëngbioye cha chašúyanama. Bëngbe Bëtsá tojama, lempe ntšamo chabe soye yomncá, chabe Uaquiñabiama chaotsemnama, y chábeyeca Bëngbe Bëtsá quem luare y nyetsca inye luarënga tojama. <sup>3</sup> Cha endinýanýná Bëngbe Bëtsabe corente buashinýinýanana y uámanana, y cha endmëna cach Bëngbe Bëtsacá, y chábeñe bënga mondobena jinýama ntšamo Bëngbe Bëtsá yomncá. Chabe bëts obenánaca endútabna lempe ntšamo quem luarentše yobinýncá; cha tojayana y chca jtsemnana. Cha tojanóbana bëngbe bacna soyënga jabuajuánama, y chentšana Bëngbe Bëtsá tojaninýanýé cha puerte bëtsá y uamaná bëtsemnama, celoca játbemëse, Bëngbe Bëtsabe catsbioica, nyetscanga jtsamëndayama.

### *Bëngbe Bëtsabe Uaquiñá chë angelëngbiama más bëtsá yomna*

<sup>4</sup> Y chca, Bëngbe Bëtsá tbojánbema chë angelëngbiama más uamaná y obená, er Bëngbe Bëtsá tbojanbuajó canýe más uámana uabaina y chë angelëngbiama canýe más uámana trabajo tbojanbonýé. <sup>5</sup> Ndegombre chca endmëna, er Bëngbe Bëtsá ndocna te ndocna ángelbioye mëntšá tbonjaniana, ntšamo chabe Uaquiñábioye tbojaniancá:

Aca atšbe Uaquiñá condmëna.

Mënté entsanga sënjinýanýé aca atšbe Uaquiñá comnama ca.

Ni ndocna angelbiama mëntšá tojánayana, ntšamo chabe Uaquiñabiama tojanayancá:

Atše canýe taitá chabiama chántsemna,

y cha canýe Uaquiñá atšbiama ca.

<sup>6</sup> Quem Bëngbe Bëtsabe Uaquiñá endmëna nyetscangbiama más uamaná. Chca Bëngbe Bëtsá tojánayana, chabe natsana Uaquiñá quem luaroye cháúashjanguama cha tojanma ora:

Bëngbe Bëtsabe nyetsca angelënga cha chamotsatschuaná ca.

<sup>7</sup> Y chabe angelëngbiama, mëntšá tojánayana:

Atše sëndama atšbe angelënga, chë atšbe buayiynayënga, mo binýiëngcá chamotsemnama,

y chënga, atšbe oservëngca, mo iñjëngcá ca.

<sup>8</sup> Pero chabe Uaquiñabiama Bëngbe Bëtsá tojánayana:

Utabná, acbe amëndayana nyetsca tescama echántsemna,

y aca nyetsca soyënguiñe condbëtsemandaye, ntšamo tšabá yomncá jtsamëse.

<sup>9</sup> Aca icontšena ntšamo tšabá yomncá nyetsca soyënguiñe jtsamama, y sempre chca jtsamama tša icoboše,

pero nýa tondayama cmondogustana bacna soyënga jtsamana, chë ndayá Bëngbe Bëtsá ndoñe yondboše soye;

chíyeca Bëngbe Bëtsá tcmojabocacá,

y tojama aca puerte oyejuayá chacotsemnama,

chë inýengbiama más oyejuayá ca —Bëngbe Bëtsá tojánayana.

<sup>10</sup> Bëngbe Bëtsá mëntšánaca chabiama tojánayana:

Utabná, quem luare jobojátšama ora, aca quem luare tconjanma,

y lempe chë celoca yomna soyëngnaca.

<sup>11</sup> Lempe chë soyënga nyets tempo ndoñe queochátsmëna;

aca nyetsca tescama cochántsemna.

Lempe chë soyënga echanjopochóca, mo tojuatanguaná entsayacá.

<sup>12</sup> Aca chë luarënga cochanjátrocaye, mo tsmëcá cuafjabiamcá.  
Chca, chë luarëngaca cochanjama, mo entsáyá tcojtenëjonëtse y tcojenotrocacá.  
Pero aca nÿets tempo cach aca cochandosomesne,  
y nÿets tempo vida cochandésobomne ca —cha tojánayana.

<sup>13</sup> Bëngbe Bëtsá ndocna te ndocna ángelbioye mëntsá tbonjaniyana, ntšamo chabe Uaquiñábioye tbojaniyancá:

Atšbe catsbioica cochtsetbemana,  
acbe uayayënga acbe cucuatšinë chamoquedama atšbe obenánaca chjamëntscuana ca.

<sup>14</sup> Ndegombre, nÿetsca angelënga espíritënga mondmëna Bëngbe Bëtsá jaserviama,  
ndëmuanyënga cha tojanichamó bënga jabújabuachama, chë atsebácanënga mochtsemnëngbe tšabiama.

## 2

### *Canÿe bëts soye endmëna atsebácanënga jtsemnana*

<sup>1</sup> Chíyeca, bënga šontsamna sempre Bëngbe Bëtsabe soyënga jtsuenanana, chë bënga tmonjouena soyënga, chë tšabe benachentsana ndoñe chamondojuánama. <sup>2</sup> Ndayá Bëngbe Bëtsá tempo angelëngaca entsanga tojanamëndacá, canÿe ndegombre soye endmëna, y entsanga entsamna chca jtsobedecénana; y chë bacna soye tmojanmënga y ntšamo Bëngbe Bëtsá tojanmandacá ndoñe tmonjanmënga castigo tojanatšatá, chca tmojanma causa; y chca, <sup>3</sup> bënga chca bacna soyënga tmojtsamëse, ¿ntšamo mochjobenaye jtsejuabnayana Bëngbe Bëtsá chama ndoñe šochanjacastígaye ca? Ndegombre cha chca echanjama, bënga chábeñe ndoñe tmontsošbuáchese, chë bëts soye jëftsashjáchama, atsebácanënga jtsemnana. Bëngbe Utabná chë natsaná yojtsemna nda entsanga tojanabuayená Bëngbe Bëtsá entsanga yochjánatsebacama; y ínÿyënga bënga šonjanabuayená cachcá ntšamo chábioye tmojanoyeunacá. <sup>4</sup> Y Bëngbe Bëtsánaca tonjaninÿanyé, ndayá chënga tmojanabuayenacá ndegombre bëtsemnana, chabe obenana jinÿanyiyama soyëngaca, entsanga chamenjnaná soyëngaca, bëts soyëngaca, y entsanga chë Uámana Espíritu ainaniñe chamotsebonnama cha jtsamëse. Chca jamëse, cada ona chaotsobena jamama ntšamo Bëngbe Bëtsá yobošcá.

### *Bëngbe Bëtsá tojanma Jesucristo entsangcá chaotsemnana*

<sup>5</sup> Bëngbe Bëtsá angelënga ndoñe tonjubuáyana chamotsemándama ndayá quem luarëntse yochtsemniñe, lempe mo tsmëcá chaotsemnana Bëngbe Bëtsá chaojama ora, chë ndayama mora bënga montsoyebuambná. <sup>6</sup> Chamna, ínÿoca Bëngbe Bëtsabe uabemana palabrënguiñe mëntsá endayana, ntšamo chábioye canÿa tbojaniyancá tojánayana:

Entsanga ndoñe yapa uámanënga quemátsmëna, as ¿ndáyeca tša chëngbeñe cuanjésejuabnaye?

Chënga entsanga mondmëna. ¿Ndáyeca tša chënga cuanjésanyëna?

<sup>7</sup> Aca tcojama entsá puerte uamaná chaotsemnana, y chë angelëngna nÿe batšatema chabiamá más uámanënga mondmëna.

Aca tcojama cha puerte uamaná y respeto merecido bomná chaotsemnana,

<sup>8</sup> y cha chaotsemándama nÿetsca chë inÿe soyënguiñe, chë quem luarentse aca tcojamiñe —chiñe canÿa tojánayana.

Entsá lempe chaotsemándama Bëngbe Bëtsá tojanma ora, tondaye tonjانبoshjona entsáftaca ndëmandana soye ca. Pero mëntscoñama ndoñe nÿa chca quemëntinÿe, chë entsá lempe ntšamo quem luarentse yomncá jtsemándayana. <sup>9</sup> Pero bënga mondëtatšëmbo y corente mondonÿá Jesús aiñe chca tojanmama. Bëngbe Bëtsá tojanma cha nduamaná chaotsemnana, mo canÿe entsacá, baseftayté chë angelëngbiamá más batšá uamaná. Bëngbe Bëtsá, entsangbe tšabiamá jtsejuabnayëse, yojánboše Jesús chaóbanama, corente jasúfriase; Bëngbe Bëtsá yojánboše cha chca chaomama, nÿets

luarentša entšangbe tšabiamana. Y Jesús ya chca tojánmayeca, Bëngbe Bëtsá ya tojinÿanyë cha puerte bëtsá y uamaná bëtsemnama.

<sup>10</sup> Nÿetsca soyënga yobinÿna Bëngbe Bëtsabiamana y chábeyeca. Tšabá enjamna, Bëngbe Bëtsá jamana Jesucristo chaotsemnama lempe ntšamo entšanga tmojtsajabotcá, nda chëngbe bacna soyënguentšana cháuatsebacama. Bëngbe Bëtsá chca tojanma, Jesús, chë entšanga atsebácanënga jtsemnama unachayá, chaosufrima jamëse, chca, ba entšanga celoca, mo chabe basengcá, cháftaca bëtsëtsanga chamotsemnama. <sup>11</sup> Er Bëngbe Bëtsá cach Taitá nÿetscangbiamana endmëna: Jesús, chë entšanga Bëngbe Bëtsábenga chamotsemnama iuamabiamana, y chë entšanga chca chamojtsemnëngbiámna. Chíyeca Jesús, Bëngbe Bëtsabe Uaquiñá, ndoñe ntsëuatjana chëngbioye catšátanga ca jtsachembuanama.

<sup>12</sup> Bëngbe Bëtsabe uabemana palabrenguiñe Bëngbe Bëtsábioye cha mëntšá tbojanianana: Atšbe uabentsëngbeñe acbiamana chanjóyebuambaye, y jacántase chochanjëtshuaye, ácbioye adórayënguentse ca.

<sup>13</sup> Y mëntšánaca cha Bëngbe Bëtsabiamana tojánayana:

Atše atšbe Bëtsábeñe chantsošbuáchiye ca.

Y más chcoye mëntšá tojánayana:

Muentše Bëngbe Bëtsabe básengaftaca sëntsemna, chë atšbe cucuatšíñe tojábashesjuanënga, atše jtsanÿenama ca.

<sup>14</sup> Quem Bëngbe Bëtsabe básenga nÿetsca entšangcá mondmënayeca, Jesúsnaca canÿe entšá chëngcá tojanóbema. Cha chca tojanma, jóbanëse, chë entšanga jóbanama chaot-samnama obenana bomná Satanás, jayëñjanama. <sup>15</sup> Y chca, cha tojama chë jóbanama y ndayá chentšana yochjopásama auatjënga ndoñe chamondëtsauatjama; chënga nÿets tempo corente ngmëñaca imnoyena, jóbanama auatja causa. <sup>16</sup> Er ndegombre, cha ndoñe tonjánabo chë angelënga jabújabuachama, ndayá chë Abrahámbentsana entšangbioye. <sup>17</sup> Y chama cha ibojamna jtsemnana nÿetsca soyënguiñe cachcá mo chabe uabentsëngcá, chë entšanga, chca, jobenayama jtsemnama chëngbiamana mo bachnangbe canÿe más uámana amëndayacá, Bëngbe Bëtsá jtseimpadánama chëngbioye chëngbe bacna soyëngama cháuaperdonama, puerte lastemado mëná y sempre ntšamo Bëngbe Bëtsá tbojauyancá amá. Chca, cha jóbanëse jamama entšanga chamobenama perdonánënga jtsemnama, y chca, jobenayama Bëngbe Bëtsáftaca tšabá tempcá jtsemnëngama. <sup>18</sup> Y mora cha entsobena, ndëmuanÿënga bacna soye jamama tojócochenguënga jujabuáchana; cha chca entsobena, er cachánaca tojansufri, cha bacna soye chaomama Satanás tša yojtsentšena ora.

### 3

#### *Cristo Moisesbiamana más uamaná endmëna*

<sup>1</sup> Chíyeca, Jesucristbeyeca catšátanga, Bëngbe Bëtsábenga, ndëmuanÿënga Bëngbe Bëtsá tojáchembo chabe entšanga chamotsemnama, corente Jesucristbeñe smochjésejuabnaye. Cha endmëna nda Bëngbe Bëtsá bëngbioye tbojanichmó, y nda bëngbiamana yomna mo chë más uámana bachnangbe amëndayacá, Bëngbe Bëtsábioye jtseimpadánama bacna soyëngama chašotsaperdonama. Cha chca endmëna chë bënga mondošbuaché soyënguiñe y chë mondbáyana ndegombre yomna ca soyënguiñe. <sup>2</sup> Er Jesús nÿets tempo tojanma ndayá chaotsamama Bëngbe Bëtsá tbojanianancá, Bëngbe Bëtsá, nda tbojanábuayana chca chaoservema, cachcá ntšamo Moisés tojanma ntšamo Bëngbe Bëtsá tbojanmandacá, chabe entšangbioye cháuaservema. <sup>3</sup> Canÿe yebna jebuaná chë yebnama más uamaná jtsemnana; cachcá Jesús, nda inétsama entšanga Bëngbe Bëtsábenga chamotsemnama, más jtsemnëcánana Bëngbe Bëtsá cha puerte bëtsá y uamaná bëtsemnama cháuinÿanÿëma, nÿe ntšamo Moisés, canÿa Bëngbe Bëtsabe entšanguentšá yojanomerecënama. <sup>4</sup> Ndëmuanÿë yébnëñaca canÿe jebuaná jtsebomnana, pero Bëngbe Bëtsá endmëna nda tojanma lempe ntšamo yobinÿncá. <sup>5</sup> Moisés yojtsama ndayá



chaotsamama Bëngbe Bëtsá tbojanmandacá, tšabe oservernacá nyetsca Bëngbe Bëtsabe entsángbeñe, y yojamna canya corente tatsëmbuá ndayá más chcoye yochjanopásama, ndayá Bëngbe Bëtsá yochjánayanama. <sup>6</sup> Pero Cristo, ndayá Bëngbe Bëtsá tobošcá jamana, chë Bëngbe Bëtsabe entsángbeñe Uaquiñacá jtsemándayëse, ntšamo canye uaquiñá jtsemándayana ndayá nyetsca chabe pamíllanga tmojtsamiñe; cha, chë Uaquiñacá y chënga chë Bëngbe Bëtsabe pamillentsëngcá. Bënga chë pamillentsa entsanga jtsemnana, bënga chë ndayá tmošbuáchema bëts añémoca sempre tmojtsóyebuambnase, y sempre Bëngbe Bëtsá tšabe soyënga bëngbiana yochjamama tmojtsobátmanëse, y bënga chca jtsebomnama puerte oyejuayënga tmojtsemnëse.

*Chë jóchnama uámana luare Bëngbe Bëtsabe entsangbiana*

<sup>7</sup> Chcasna, ntšamo chë Uámana Espíritu Bëngbe Bëtsabe uabemana palabrenguiñe tojanayancá:

Mënté tsëngaftanga ndayá Bëngbe Bëtsá tojtsichamcá šmojouenëse,

<sup>8</sup> ndoñe šmattsama, Bëngbe Bëtsabe buayenana soyënga tsëngaftangbe ainaniñe ndoñe chaondómashënguama,

mo chë entsanga ndoyena luaroca Moiséssoftaca imojëftsemnëngcá, Bëngbe Bëtsabe contra nyetsca soyënguiñe imojtsemna.

Chënga bëtscá bacna soyënga tmojanma, mo ndayá cuaftsamcá jinÿama ntsachetšá más muanjobenaye jamana y Bëngbe Bëtsá cabá uantado chëngaftaca tayojtsemnama.

<sup>9</sup> Bëngbe Bëtsá tojánayana: “Chentše, tsëngaftangbe bëts taitanga bëtscá monjánama jinÿama ndayëntscoñe atše uantado chëngaftaca tsjamnama;

chca chënga tmonjanma, masque canta bnëtsana uatëntscuana chënga chentše tmonjáninÿe chë atše sënjánama bëts soyënga.

<sup>10</sup> Chiyeca, atše chorsca entsángaftaca šonjánetna y sënjánayana:

‘Tsëngaftanga mora átšeftaca ndoñe quešmátajna, mo chë otšenënga tmojtsemnëngcá, y ndoñe šmonjábošena jtsiyenana ntšamo atše tsbošcá jtsamëse.’

<sup>11</sup> Chiyeca, atše chëngaftaca etonaná sënjánayana, mo nda cuaafajuracá,

chënga ndocna te mochjëftsashjache chë átšeftaca jóchnama uámana luaroye jashjan-guama ca” –cha tojánayana.

<sup>12</sup> Jesucrístbeyeca catšátanga, yejuana šmochtsantješna ndocná tsëngaftanguentsá chaondëtsebmoma canye ainana bëtscá bacna juabnëngaca, y chë causa chaotsemna Bëngbe Bëtsábeñe ndošbuachiyá, y Bëngbe Bëtsábentsana, chë sempre iuetsemnábentsana chaotsojuánañe. <sup>13</sup> Chamna, nyetscanga añemo šmochtsatenatšetnaye cada te, chë bënga imobena Bëngbe Bëtsá joyeunayama tempo imoyenëntscuana, chë Bëngbe Bëtsabe uabemana palabrenguiñe “mënté ca” uabaina tempo. Chca cmontsamna, ndocná tsëngaftanguentsá chaondëtsamama, Bëngbe Bëtsabe buayenana soyënga ainaniñe ndoñe más chaondómashënguama, bacna soyënga jamama juabnëngaca ingñená. <sup>14</sup> Er,

ndayá Jesús chabe amëndayoca yobomnentsana bënga chamóyëngacñamna, bënga šontsamna sempre ainaniñe corente jtsetatšëmbuana Jesusbe soyënga ndegombre soyënga bëtsemnama, ntšamo bënga chábeñe jtsošbuáchiyama tmonjanontšé ora monjanamcá.

<sup>15</sup> Ntšamo Bëngbe Bëtsabe uabemana palabrenguiñe endayancá:

Mënté tsëngaftanga ntšamo Bëngbe Bëtsá tojtsichamcá šmojouenëse,

ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama,

mo chë entsanga ndoyena luaroca Moiséssoftaca imojëftsemnëngcá, Bëngbe Bëtsabe contra nyetsca soyënguiñe imojtsemna ca.

<sup>16</sup> ¿Y ndëmuanÿënga imojamna, chë Bëngbe Bëtsá tojanëyancá tmojanuenentsana, nyetsca soyënguiñe chabe contra imojtsanmëna? Co chë Moisésbeyeca Egiptocana

tmojánbocanënga. <sup>17</sup> ¿Y ndëmuanyëngaftaca Bëngbe Bëtsá etonaná canta bnëtsana uatëntscuana yojtsemna? Co chë bacna soyënga tmojanmëngaftaca, ndëmuanyënga entšanga ndoyena luaroca tmojanóbana y chëngbe cuerpo chentše tojanoquedá. <sup>18</sup> ¿Y ndëmuanyënga tojanëyana, mo nda cuafjajuracá, chënga ndocna te mochjëftsashjache chë cháftaca jóchnama uámana luaroye jashjanguama ca? Co chë ndëmuanyënga ntšamo cha tojanmandacá ndoñe tmonjanmënga. <sup>19</sup> Y ndegombre, bënga montsobena jinýama chënga ndoñe tmonjëftsashjache chë cháftaca jóchnama uámana luaroye jashjanguama, Bëngbe Bëtsábeñe ndoñe imontsošbuaché causa.

## 4

<sup>1</sup> Chíyeca, bënga chë Bëngbe Bëtsáftaca jóchnama uámana luare jashjáchama cabá imobenëntscuana, ntšamo cha šojanašebuachenacá cachcá mëntscoñama iuëtsemna, puerte cuedado mochtsebomna, nderado ndánaca tšëngaftanguentšá ndoñe nanjobenaye chca jashjáchama. <sup>2</sup> Er bëngnaca chë tšabe noticiënga tmonjouena, cachcá chë Bëngbe Bëtsabe buayenana soyënga chëngbe ainaniñe ndoñe chaondómashënguama tmojanmëngcá; pero chënga chë buayenana soyënga tmojanuena ora, ndocna tšabe soye chëngbeñe tonjanopasá, er chca tmojanuena ora, chë palabrënguiñe ndoñe montsanošbuaché. <sup>3</sup> Pero bënga, chë Jesucristbeñe tmojošbuachengna, mochanjobenaye chë jóchnama uámana luaroye jashjanguama, chë ndayama Bëngbe Bëtsá tojánayana, chë tempo chábioye chca tmojtsanábotengbiana cha mëntšá tojánayana ora:

Chíyeca, atše chëngaftaca etonaná, sënjánayana mo nda cuafjajuracá, ndegombre chënga ndoñe mochjëftsashjache chë jóchnama uámana luaroye jashjanguama ca.

Pero cha chabe trabajo tojanpochocá, quem luare tojanma ora; <sup>4</sup> er Bëngbe Bëtsabe uabemana palabrënguiñe cánýentše mëntšá endayana, chë canýsëfta tianoye ndayá cha tojanmama:

Bëngbe Bëtsá nyetsca trabajëngama tonjanochná chë canýsëfta tianoye ca.

<sup>5</sup> Y cachentše Bëngbe Bëtsabe uabemana palabrënguiñe endayana, chë tempo chábioye chca tmojtsanábotengbiana:

Chënga ndocna te quemocháisashjache chë átšeftaca jóchnama uámana luaroye jashjanguama ca.

<sup>6</sup> Chë entšanga monjamna chë natsanënga chë tšabe noticiënga jouenama, pero chë Bëngbe Bëtsáftaca jóchnama uámana luare ndoñe tmonjëftsashjache, ntšamo cha inabošcá chënga ndoñe tmonjanma causa. Chcasna, cabá ndegombre endëtsomñe báseftanga, chë Bëngbe Bëtsá tojánayana soyënguiñe tmojtsošbuáchenga, mochjëftsashjache chë Bëngbe Bëtsáftaca jóchnama uámana luaroye jashjanguama. <sup>7</sup> Chë entšanga ndoyena luaroca, Bëngbe Bëtsá entšanga tojánachembo chë cháftaca jóchnama uámana luaroye chámuamashjnama, y chentšana ba uatëse cha cachiñe canýe tempo tojuinýnaná, chora entšanga chamobenama chë cháftaca jóchnama uámana luaroye jashjajnama, chë cha “mënté ca” tojanabaye tempo. Cha chca tojanma Davidbiajana jóyebuambayëse, David Bëngbe Bëtsabe uabemana palabrënguiñe mëntšá tojánayana ora:

Mënté tšëngaftanga, ndayá Bëngbe Bëtsá tojtsichamcá šmojouenëse, ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama ca.

<sup>8</sup> Josué, Israeloca entšanga Canaán fshantsëngoye yojtsënachaye ora, chë Bëngbe Bëtsáftaca jóchnama uámana luare jtsebomnama cha choca matënjanmëse, Bëngbe Bëtsá bayté chentšana, David yojëftsiyena ora, inýe tempuama ndoñe matënjanoyebuambá, chë ndaye ora entšanga muanjobenaye chë cháftaca jóchnama uámana luare jashjáchama. <sup>9</sup> Y chca, cabá endmëna canýe uámana luare ndayentše Bëngbe Bëtsabe entšanga mochjobenaye cháftaca jóchnama, ntšamo Bëngbe Bëtsá tojanochnacá, chë quem luare jamama nyetsca

trabajënga tojanpochocá ora; <sup>10</sup> er nda tojashjache chë Bëngbe Bëtsáftaca jóchnama uámana luaroye jashjanguama, cha jóchnana chë Bëngbe Bëtsá tbojanmandá jamama trabajëngama, ntšamo Bëngbe Bëtsá tojanochnacá, chë quem luare jamama nyetsca trabajënga tojanpochocá ora. <sup>11</sup> Chíyeca, šontsamna lempe ntšamo tmojobenacá jamana chë jóchnama uámana luare jëftsashjáchama, ntšamo chë Bëngbe Bëtsábioye ndoñe tmonjanoyeunangcá ndocná chaondëtsamama, y chë causa chënga chë soye ndoñe tmonjëftsashjache.

<sup>12</sup> Er Bëngbe Bëtsabe palabra endmëna mo canye aina soycá, nyets tempo entšángbioye ndayánaca jtsabuátambayana, y bëtscá jamana corente obenánaca, y ndocna te nye bonamente chë palabra jóyebuambayana. Mo chë nyets utoicajana más efšana espadëjaquécá, jobenayana puerte jashenoye jatëtsana canye cuerpo tcojatëtse ora, cachcá y cabá puerte más Bëngbe Bëtsabe palábraca, cha bënga jinyanýiyana ntšamo bënga nye bëngbe ainaniñe tmojtsejuabná y tmojtsebošcá, y chë ndocnábioye tmonjinýinyé sóynaca; y chë palábraca cha endobena jáuyanana ntšamo bënga tmojajuabó y tmojabošencá aíñe o ndoñe tšabá bëtsemnana. <sup>13</sup> Ntšamo Bëngbe Bëtsá tojamentsana tondaye quenátopodena chabiamana iytemenana jtsemnana. Bëngbe Bëtsá lempe bominye iuetsequëcñá, y nyetsca soyëngama y nyetscangbiamana lempe yotátšëmbo; Bëngbe Bëtsá, ndábioye šojtsamna sempre jojuana ndáyeca canye soye chca tmojamama.

### *Jesús endmëna chë más uámana bachnangbe bëts amëndayá*

<sup>14</sup> Jesús, Bëngbe Bëtsabe Uaquiñá celoye tojámashëngo, y mora cha endmëna nda chabe delante sempre bëngbiamana ibuëtseimpadana, mo chë bachnangbe canye más uámana amëndayacá. Chíyeca, bënga šontsamna sempre chábeñe jtsošbuáchiyana, ntšamo bëngbe ndegombre ošbuáchiyana yomncá, chë ndayama bënga nyetsca entšángbeñe tmojayana. <sup>15</sup> Er chë bëngbiamana impadaná, mo bachnangbe canye más uámana bëngbe amëndayacá, Jesús, yobena bëngbiamana jóngmiana, bënga inye ora ndoñe yapa obenana tmontsebomna ora, tšabe soye o ndaye sóynaca jamama. Chca endmëna, er Satanás tša yojtšentšëna Jesúsbioye ba juabnënga chabotsontšáshjajuanama, jayëñjanama bacna soye chaomama, nyetsca juabnënga ntšamo bëngnaca mondbetsebomncá, pero Jesús ndocna te ndocna bacna soye tonjëftsema. <sup>16</sup> As, ndauatjá Bëngbe Bëtsá mochjótšëmbona, mo chábioye cuaftsobecocnangcá; cha canye uámana tbemaniñe yojtsetbemana canye bëts reycá; chca mochjama, bënga chásualastemama, y bëngbiamana tšabe juabna jtsebomnëse, chašújabuachama bënga chca chašojtsëjaboto ora.

## 5

<sup>1</sup> Ndëmuanye bachnangbe más uámana amëndayánaca jtsemnana entsanguentšana bocacaná, y uabuayaná chëngbe cuenta Bëngbe Bëtsá jaserviama, chábioye juatšëmbonama y bayënga jobáyama Bëngbe Bëtsá jëtschuayama, chca, Bëngbe Bëtsá chë bacna soyënga entšanga tmojamama cháuaperdonama. <sup>2</sup> Chë bachna jtsoobenana jóngmiana, chë bacna soyënga amëngbiamana chama ntsetatšëmbcá, y chë bacna soyënga jamama ingñëñënga imomnënga, mo otšëñëngcá imomnëngbiamana, er cachánaca inye ora ndoñe yapa obenana ntsebomnana, chë bacna soyënga jamama juabnëngama jtocochbuáchama. <sup>3</sup> Y chíyeca cha jtsemnana bayënga jobáyama Bëngbe Bëtsá juatšëmbonama, ndoñe nye entšángbioye bacna soyëngama cháuaperdonama, ndayá chábioye chaboperdonámnaca. <sup>4</sup> Ndocná quenátobena cachá quem uámana trabajo jentšëtayana, bachnangbe más uámana amëndayá jtsemnana; cha jtsemnana, Bëngbe Bëtsábeyeca uabuayaná chca uámana trabajo jamama, ntšamo ndegombre Aarónoftaca tempo cha tojanmcá. <sup>5</sup> Cachcá, Cristo ndoñe cachá tonjanenábuayana jtsemnana chë Bëngbe Bëtsabe delante siempre bëngbiamana impadaná, mo bachnangbe canye más uámana amëndayacá, ndayá Bëngbe Bëtsá tbojanábuayana chë uámana trabajo jtsebomnana. Cha endmëna nda Jesúsbioye mëntšá tbojanianana: Aca atšbe Uaquiñá condmëna.

Mënté entšanga sënjinÿanÿé aca atšbe Uaquiñá comnama ca.

<sup>6</sup> Y ínÿocnaca, Bëngbe Bëtsabe uabemana palabrënguifne mëntšá tbojaniana:

Aca nÿetsca tescama canÿe bachna condmëna,  
canÿe bëts bachna ntšamo Melquisedec yojamncá ca.

<sup>7</sup> Jesús quem luarentše yojëftsiyenëntscuana, cha juayebuáchëse y shëchbuíyeca Bëngbe Bëtsáftaca ibnécuentaye y ibnaimpadana, cha chë jobanámëntšana jatsbocama yojanobená; y Jesús ntšamo Bëngbe Bëtsá yojanbošcá tojánmayeca y tša respeto chabiamana bómnayeca, chábioye tbojanoyeuná. <sup>8</sup> Chca, Cristo masque Bëngbe Bëtsabe Uaquiñá inamna, jasúfriase tojanábouinÿe ntšamo jamana ndayá Bëngbe Bëtsá tojtsebošcá. <sup>9</sup> Chca, Bëngbe Bëtsá chábioye tbojánbema lempe ntšamo entšanga tmojtsajabotcá, nda chëngbe bacna soyëngama cháuatsebacama; chentšana cha, Cristo, tojanma lempe ntšamo yojaniytcá, nÿetscanga chë entšanga chábioye imojánÿeunanënga chamotsobenama nÿetsca tescama atsebácanënga jtsemnama; <sup>10</sup> y Bëngbe Bëtsá tbojanábuayana, chë chabe delante sempre bëngbiama impadaná, mo bachnangbe canÿe más uámana amëndayacá chaotsemnama, canÿe bëts bachna ntšamo Melquisedec yojamncá.

### *Resjo endmëna, ošbuáchiyana jtsajbanana*

<sup>11</sup> Bëtscá entsemna quem palabrama jóyebuambayama, pero chë soyënga jayanama ntšamo tšëngaftanga catafjosertaycá, ndoñe paselo quenátsmëna, er tšëngaftangna nÿa uenana Bëngbe Bëtsabe soyëngama jósertana. <sup>12</sup> Tšëngaftanga ya bayté Jesucristbe soyëngama šmotátšëmboyecca, tšëngaftanga cmontsamna ya jtsobenana ínÿengbioye chë soyënga jtsabuátambayana; pero tšëngaftanga cmontsëjaboto ndánaca Bëngbe Bëtsabe soyëngama cachiñe chacmëtëtabuayená, chë jtsošbuáchiyama šmojontšé ora natsana jshauatsjínÿana soyëngama. Y chca, tšëngaftanga šmojobiama mo šešonatëmëngcá, jtsëjabótana létšiyey jofšiyana y ndoñe jobenayana jasana chë jabmuánama ndoñe paselo tontsemna soyënga. <sup>13</sup> Chë nÿetsca soyënguifne ntšamo tšabá yomncá jtsamama buatëmbana soyënga ndoñe tontsabuatmá cha, jtsemnana mo canÿe šešonatëmcá, nda vida jtsebomnana nÿe létšiyey jtseftmanëse. <sup>14</sup> Pero chë tmojtsobena jajuaboyana y jtsetatšëmbuana ndayá tšabá yomna o ndayá ndoñe tšabá jamama, chca jtsamëse tmoyenamna, chënga jtsemnana mo bëtsëtsangcá, ndëmuanÿenga ndayánaca jasana, chë ndoñe paselo jabmuánama soyëngnaca.

## 6

<sup>1</sup> Chcasna, bënga šontsamna jtsajbanana nÿe jésebošana jtsatsjëndayana Cristbe buatëmbana soyënga, chë bënga chábeñe jtsošbuáchiyama tmojanontšé ora tmojanatsjinÿe soyënga, y šontsamna jtsatsjëndayana chabiamana nÿetsca soyënga, más totcá josértama yomna soyënga. Chca, bënga mochántsemna mo chë bëtsëtsangcá, ndayánaca jtsesayana. Ndoñe más nÿe chë natsana buatëmbana soyëngama mattsatsjëndaye, mo chë ndayá yomna bacna soyënga jtsamana y chë bënga ndoñe vida ntsebomnana junatsana soyënga amana jtsajbanana, y chë tšabe benache jtishachana; o ntšamo Bëngbe Bëtsábeñe jtsošbuáchiyana; <sup>2</sup> chë juabáyana ndayá yomna; chë ínÿabe bestšašifne cucuatšënga jacjayana Bëngbe Bëtsábioye chabiamana jaimpádama; chë obanënga jtayenama Bëngbe Bëtsá yochjamama; y mocna ora ntšamo entšanga tmojamama Bëngbe Bëtsá yochjayanama, chënga chë nÿetsca tescama yomna tšabe vida chamotsebomnana o nÿetsca tescama castigánënga chamotsemnama. <sup>3</sup> Y bënga chca fchanjama, chë más totcá yomna josértama soyënga jtsabuátambayana, Bëngbe Bëtsá chca chašojálesenciase.

<sup>4</sup> Ndëmuanÿenga, canÿe ya chë Bëngbe Bëtsabe ndegombre soyënga tmojanóyëngacñe, y chë Bëngbe Bëtsabe ba tšabe soyëngnaca, chábinga bëtsemnama, y chë Uámana Espíritu chëngbe ainaniñe chaotsemándama imobomna, <sup>5</sup> y chë Bëngbe Bëtsá ntšamo tojašebuachenacá sempre inétsamama tmojinÿe, y ndëmuanÿenga tmojáninÿe Cristo jtsamana bëts soyënga chabe bëts obenánaca, chë ndaye obenánaca cha puerte



bëts soyënga yochjama cha quem luaroye yochjésabo ora, <sup>6</sup> chënga Jesucristbeñe ošbuáchiyana lempe tmojtsajbanase, tondaye quenátsmëna ndayá jamama cachiñe Bëngbe Bëtsábioye jtobéconama; er Bëngbe Bëtsabe Uaquiñá chca stëtsoye jaquédana, y jtsemnana mo Bëngbe Bëtsabe Uaquiñábioye cachiñe chënga tmojtsecrucificacá, y entšanga cachiñe cha chamotsáboyejuanama chënga cuafjamcá. <sup>7</sup> Smochjinýe: fshantse jamana chë ba uafténënga chiñe chaómashënguama, y chë chiñe trabájayëngbiamama bëtscá jaja sananga tojóboconëse, Bëngbe Bëtsá jamana, chë fshantsentsána bëtscá tšabe soyënga entšangbiamama chaotsebínýnama. <sup>8</sup> Pero nýe uchmašëshangá y matënga uchmëfjangaca chiñe tojuábocnëse, chë fshantse tondaye ntsámanana; y nderado Bëngbe Bëtsá nanjama chiñe ndocna tšabe mata chaonduábocnana, y cabana, entšanga chiñe mochantsashaniñá. Cachcá, chë ošbuáchiyana tmojtsajbananga castigánënga mochántsemna.

*Bëngbe Bëtsábeñe sempre chamotsobátmanama y ainaniñe bëtscá añemo chamotsebomnama*

<sup>9</sup> Pero masque chca montsoyebuambná, atšbe bonshánënga, bënga tšabá fsëndétatšëmbo tšëngaftangbeñe chë más tšabe soyënga echántsemna, chë atsbocaná jtsemnana tojtsá cha yobomna soyënga. <sup>10</sup> Er Bëngbe Bëtsá sempre ntšamo tšabá yomncá nýetsca soyënguiñe jtsamana, cha ndegombre echántsejuabnaye ndayá tšëngaftanga šmojamama, y chë chabiamama šmojinýinýe bonshánama, chabe entšangbioye jtsëjabuáchanëse, ntšamo mórnaca šmojtsama. <sup>11</sup> Pero bënga fsëntseboše, cada ona tšëngaftanguentšá, nýets tempo y Jesús chaojésabëntscuana chaotsinýanýná corente yoboše chca jtsamama, Bëngbe Bëtsábeñe chca jtsošbuáchiyëse, chábeñe sempre chašmotsobátmanama, tšëngaftangbe tšabiamama cha chaomama. <sup>12</sup> Ndoñe queftsátšboše tšëngaftanga oyënjayënga chašmotsobiamama chë Bëngbe Bëtsá tcmojabanýe trabajo jtsamama, ndayá Jesucristbeñe ošbuáchiyana bomnëngcá y padecena soyënguiñe uantado mënëngcá šmochtsama. Chca, chënga mochanjóyëngacñe ndayá Bëngbe Bëtsá jatšatayama tojašebuachenacá, chabe entšanga bëtsemnana.

<sup>13</sup> Bëngbe Bëtsá Abrahámbioye tbojanšbuachená ora, chca tbojanियana cachabe uabaina jayanëse, er inýa chabiamama más uamaná ndoñe yontsemna ndabiamama jajúrama, ntšamo tbojanšbuachenacá ndegombre chaotsemnana; <sup>14</sup> cha mëntšá tbojanšbuachená: “Aíñe, atše chanjama aca bëtscá tšabe bendicionënga chacotsebomnama, y chanjama acbentša pamillentšana mallajta entšanga chamotsemnana ca.” <sup>15</sup> Y chca, Abraham Bëngbe Bëtsábeñe jtsošbuáchiyëse, puerte uantadiñe yojanobátmana ntšamo tbojanšbuachenacá Bëngbe Bëtsá yochjanmama, y pronto chca tojanóyëngacñe.

<sup>16</sup> Entšanga tmojajurá ora, chca jamana chëngbiamama canýe puerte más uámanabe uabaina jayanëse, y chca chëngbiamama más uamanabiamama tmojajurá ora, jtsayanana ntšamo tmojašbuachenacá pronto mochjamama, y chcasna, chama ya ndoñe más ntjatenátsëtsnayana. <sup>17</sup> Y chca, Bëngbe Bëtsá tojánbošena botamana jinýanýiyana, ntšamo cha tojanašebuachenacá mochjanoyëngacñëngbioye, ntšamo tojanašebuachenacá cha ndegombre yochjanmama, y ndocna te chë ntšamo jamama yojanjuabnacá yochjantrócama. Chíyeca, botamana tojaninýanýe cha chca yochjanmana, cachabiamama jajúrase, chë ntšamo tojanašebuachenacá yochjanmama ndegombre bëtsemnana. <sup>18</sup> Bëngbe Bëtsabe šbuachenana soye y chama jinýanýiyama ntšamo tojanayancá, ntšamo tojanašebuachenacá ndegombre yochjamnama, chë uta soye ndocná ntsoberenana jatrócama; y chca tojayana ora, ndoñe ntsoberenana Bëngbe Bëtsá chaobená jobostërama. Y chca, chë uta soyama, bënga bëtscá añemo ainaniñe jóyëngacñana, bënga chë Bëngbe Bëtsábioye tmojobéconanga, cha chásuatsebacama y chašotsanýenama, mo canýe bëtš resjuentšana tmojtsachetëngcá, ntšamo chentšana atsebácanënga jtsemnana cuafsen-guacá. Bëngbe Bëtsá šojáuyana bënga imojtsobena chábeñe jtsobátmanama ca, y bëtš añémoca chábeñe jtsošbuáchiyëse, cha yejuana šochtsanýenama mondobátmana. <sup>19</sup> Mo

ntšamo chë béjaye asentoca cuedádoca tcojajajo anclama, chë barcuife enjaquenënga tšabá jtsetatsëmbuana chë barco ndoñe yochántsashatiyina, cachcá bëngnaca, Bëngbe Bëtsábeñe imobátmanama, montsobena ainanoca jtsetatsëmbuana lempe tšabá yot-somñama. Bënga Jesucristbeñe mondobátmana, y Bëngbe Bëtsá yojtsemnoye celoca cha tojámashëngo y chabe delante entsemna mo chë bachnangbe más uámana amëndayacá. Chana jamashënguana chë Bëngbe Bëtsabe bëts yebnoca, “chë más uámana ca” uabaina lu-aroje, entsëjua ujonýana stëtsoica, Bëngbe Bëtsabe delante jtsemnama,<sup>20</sup> ndayentse Jesús celoca, Bëngbe Bëtsabe delante tojámashëngo bëngbe tšabiama soyënga jamama, bëngnaca chamobenama chabe delante jamashënguama; chca, Jesús tojanóbema chë bachnangbe más uámana amëndayá nyetsca tescama, canýe bëts bachna ntšamo Melquisedec yojamncá.

## 7

### *Jesús, canýe bëts bachna ntšamo Melquisedec yojamncá*

<sup>1</sup> Quem Melquisedec yojamna Salem puebloca rey y bachna chë celoca Bëngbe Bëtsabiama; Bëngbe Bëtsá, chë nyetscangbiana más uamaná. Abraham chë reyënga y chëngbe soldadëngaftaca imojentsjaná y tojanayënjaná chentšana yojtsatabó ora, Melquisedec tojánbocna cha jajëbenguama, y chora Bëngbe Bëtsábioye tbojanimpadá, Abraham bëtscá tšabe bendicionënga chaotsebomnama chaomama. <sup>2</sup> Chora Abraham chábioye tbojanatšetá, chë reyëngaftaca imojentsjaná ora, lempe tojanosháchiñentšana, bnëtsanentšana canýe soye. Chë palabra Melquisedec endayana “nyetsca soyënguiñe tšabá ama rey ca”; y chánaca yojamna Salem puebloca rey, y chca endayana “nyetscanga natjëmbana chamotsiyenama ama rey ca”. <sup>3</sup> Chabe pamíllangbiana tondaye quenatótatšëmbo; chca cha endmëna mo ni taitá ni mamá ndoñe endbomnacá, ni bëts taitanga. Tondaye quenatótatšëmbo ntseco tojanonýnama, ni ntseco tojanóbanama; chca, inýe soyënguiñe cha yojamna mo Bëngbe Bëtsabe Uaquiñacá, y endmëna mo nyetsca tescama bachna cuaftsemncá.

<sup>4</sup> Y mora, šmochjájuaboje tša uamaná Melquisedec inamnama, er bëngbe tempsca uámana bëts taitá Abraham chábioye tbojanatšetá, chë reyëngaftaca imojentsjaná ora lempe tojanosháchiñentšana bnëtsanentšana canýe soye. <sup>5</sup> Ntšamo Moisesbe leyíñe endëmandacá, chë bachnangbe más uámana amëndayá Leví, Aarónënaca ca uabainabe pamillentšana tmomna bachnanga, jtsamnana chë Israeloca entsángbioye nyetsca chë tmobomna soyënguentsana bnëtsanentšana canýe soye jtsayëngacayana; y chca jtsamnana masque chë entsanga cachëngbe pamillentšënga tmomna y Abrahámbentšana pamillentšëngnaca. <sup>6</sup> Pero Melquisedec, masque Aaronbe pamillentšá ndoñe yojamna, Abraham, chë ntšamo Bëngbe Bëtsá tbojanšbuachenacá tojanóyëngacñabentšana, cha tojanóyëngacñe nyetsca soyënguentsana bnëtsanentšana canýe soye, y Bëngbe Bëtsábioye tbojanimpadá, Abraham bëtscá tšabe bendicionënga chaotsebomnama chaomama. <sup>7</sup> Y ndocná quenátobena jayanama ndoñe ndegombre yondmëna ca, chë Bëngbe Bëtsábioye impadaná inýabiama tšabe soyënga chaomama, más uamaná inëtsemna chë chca tojóyëngacñabiama, inýa chabiama Bëngbe Bëtsábioye tbojaimpadá ora. <sup>8</sup> Quem tempo, bachnanga mochjóbanënga, entsángbioye jtsayëngacayana nyetsca chë tmobomna soyënguentsana bnëtsanentšana canýe soye, pero chë Bëngbe Bëtsabe uabemana palabra, Melquisedecbiana endoyebuambná cha mo canýa cabá ainá totsomñacá. <sup>9</sup> Y bënga montsobena jayanama, Abraham Melquisedécbioye chë nyetsca soyënguentsana bnëtsanentšana canýe soye tbojanoyé ora, yojamna mo Leví, chë nyetscángbioye nyetsca soyënguentsana bnëtsanentšana canýe soye ayëngacayá, Melquisedécbioye chca cuaftopagacá; <sup>10</sup> er cha Abrahambe pamillentšá inamna. Melquisedec yojtsabó ora y chábioye chë lempe tojanosháchiñentšana bnëtsanentšana canýe soye Abraham tbojanatšetá ora, yojamna mo nyetscanga, chë Abrahámbentšana entsanga más chcoye

mochtsaniyenënga, chëngnaca chë bnëtsanentšana canye soye cuafjajajocá, masque Abraham chca tojanma ora, Leví y chë Abrahábentšana inye entsanga cabá ndoñe tmonjanonýná.

<sup>11</sup> Israeloca entsanga Moisesbe ley tmojanáyëngaca, chë bëts taitá Levibe pamillentsënga bachnanga imojamnënga Bëngbe Bëtsá imojtseserverna ora, y chënga monjamna Aarónbentšana entsanga. Ntšamo chë leyiñe yomandancá imojánamënga perdonánënga jtsemnama y Bëngbe Bëtsabe bominiñe tšábenga jtsemnama quem bachnanga jamama matmëñjanobenase, ndoñe manjanëyta Bëngbe Bëtsá inye bachna chabuatschembuama, nda ndoñe yonjamna mo chë bëts bachna Aaroncá, ndayá ntšamo chë bëts bachna Melquisedec yojamncá. <sup>12</sup> Er, canye bachnanga Bëngbe Bëtsábioye jtseeservénama tmojjabná y inye bachnanga chábioye jaserviama tmojatontšé ora, jtseytana chë natsana bachnanga imojanoserverna ora mándaye leyëngnaca jtsetrócama. <sup>13</sup> Bëngbe Utabná, ndabiama quem soyënga jtsóyebuambnayana, ndoñe Aaronbe pamillentsá quenjatšmëna, ndayá inye pamillentsá, y quem pamillentsa entsanga ndocna te bachnangcá Bëngbe Bëtsá tmonjanservé, chë altar ndirichiñe Bëngbe Bëtsabe bëts yebnoca. <sup>14</sup> Er nyëtscanga mondëtatšëmbo Bëngbe Utabná Judabe pamillentsana bëtsemnama, y chë pamíllama Moisés ndocá tonjánayana, Bëngbe Bëtsá mo bachnangcá chënga jtseeservénama.

<sup>15</sup> Y ntšamo tmojjayancá montsobena más tšabá josértana, er chë tsëm bachna Cristo yojamna canya mo Melquisedec yojamncá. <sup>16</sup> Cha bachna yojamna, ndoñe chë bachnanga chabe pamillentsana jabocanama yojánamnama canye ley tojánayanayeca, ndayá nyëtsca tescama jëftsiyenama cha inobénayeca. <sup>17</sup> Er mëntsá endmëna, ndayá Bëngbe Bëtsá chabiama tojánayana:

Aca bachna nyëtsca tescama condmëna,  
canye bëts bachna ntšamo Melquisedec yojamncá ca.

<sup>18</sup> Cha tojánabo ora, Bëngbe Bëtsá tojanma chë nda bachna jtsemnama y ntšamo joserviama mandënga chaotsopochocama, er chë mandënga ndoñe ntjobenayana entsanga jujabuáchama atsebácanënga jtsemnama, y chca, chëngbiamana ndoñe bëtscá yonjanoserverna. <sup>19</sup> Er Moisesbe léyeca, entsanga ndoñe tmonjanobená Bëngbe Bëtsabe bominiñe tšábenga jtsemnama, pero mora chama canye corente más uámana soye montsebmna: Jesucristbeñe jtsošbuáchiyëse, chábeñe montsobátmana Bëngbe Bëtsáftaca tšábenga chášuabiamama, y chca, Bëngbe Bëtsábioye bënga jtobéconama.

<sup>20</sup> Y Bëngbe Bëtsá lempe chca tojanma, cachabiamana jajúrase, lempe ntšamo cha tojanayancá ndegombre chaotsemnama. Chë inye bachnanga, chë Aaronbe pamillentsëngbioye tmojanëbuáyana ora, Bëngbe Bëtsá ndoñe chca tonjánayana, <sup>21</sup> pero mo bachnëcá chaoservema Bëngbe Utabnábioye tbojanábuayana ora aíñe; cach Bëngbe Bëtsabiamana jajúrase, Bëngbe Utabná canye bachna yochtsemna ca tojánayana. Ntšamo Bëngbe Bëtsabe uabemana palabrenguiñe endayancá:

Bëngbe Utabná Bëngbe Bëtsá, Jesucristbioye tbojanianana, cachabiamana jajúrase, ntšamo tojanayancá ndegombre chaotsemnama,  
y juabna ndoñe ntjatrócamana:

“Aca bachna nyëtsca tescama condmëna ca.”

<sup>22</sup> Bëngbe Bëtsá chca tojánayanama, Jesúsbeñe bënga corente mondëtatšëmbo, ndayá Bëngbe Bëtsá bëngbiamana jamama tojanašebuachenacá, chë Jesúsbioye bëngbe bachna chaotsemnama juabuáyanana, más tšabá yojtsemna chë ndayá tempo cha chabe entsangbiamana tojanašebuachená soyama. <sup>23</sup> Chë inye bachnanga banga imojamna, er ndocná yonjanobena Bëngbe Bëtsábioye nyëtsca tescama chca jtseeservénana; cada ona básefta uatëngama tojéftsanoservé, tojanóbana y ínjabioye chë trabajo jatontšabuáchana. <sup>24</sup> Pero Jesús ndocna te ntjobanámayecna, cha mo bachnëcá Bëngbe Bëtsábioye nyëtsca tescama bochjéftseserverna, y ndocna te chabe trabajo ínjabioye bochanjéftsinýinýiye,

chë inÿa cachcá jtsamama chauatontšema. <sup>25</sup> Chíyeca, cha yobena nÿetsca tescama játsebacana ndëmuanyënga chábeyeca Bëngbe Bëtsábioye tmojobeconá, er nÿetsca tescama cha echanjëftsiyena Bëngbe Bëtsábioye chëngbiana jtseimpadánama.

<sup>26</sup> Chcasna, Jesús ndegombre endmëna lempe ntšamo bënga imuajabotcá nda Bëngbe Bëtsábioye bëngbiana chabotseimpadánama, mo chë bëngbe bachnangbe más uámana amëndayacá. Cha sempre uamaná endmëna, ndocna te ni mo canÿe juabna ínÿabe contra yonjábomna, ainaniñe ndocna bacna juabna yonjábomna, chë bacna soyënga amënguentsana luaroca mëná, y Bëngbe Bëtsá tojanma celoca más bëtsá y obená nÿetscangbiana cha chaotsemnana. <sup>27</sup> Cha ndoñe bonjanájaboto canÿe te y inÿe te bayënga jtsebánayana, Bëngbe Bëtsá chabe bacna soyëngama chaboperdonama y chë bacna soyënga entšanga tmojanmámna, mo chë inÿe bachnangbe más uámana amëndayënga mondbetsamcá, cachëngbiana y chë judiëngbiámna. Cha tojanma lempe ntšamo yojaniytcá canÿe soye y nÿetsca tescama, entšanga bacna soyënga tmojanmama perdonánënga chamotsemnana. Cha chca tojanma, chabe derecho vida jtsobomñama cachcá tojanonÿná ora; y tojanóbana entšanga chamotsobenama perdonánënga jtsemnana. <sup>28</sup> Ntšamo Moisesbe leyíñe yojanmandacá, chëngbiana mo chë bachnangbe más uámana amëndayëngcá tmojanëbuáyana entšanga inÿe ora bacna soye amënga; pero Bëngbe Bëtsá cabá chë ley entšangbe cucuatšíñe tojanáboshjonentsana baytese, cha chabe Uaquiñábioye chë bachnangbe más uámana amëndayacá tbojanábuayana, cachabiana jajúrase, ntšamo tojanayancá ndegombre chaotsemnana. Bëngbe Bëtsá tojanma chë Uaquiñá chaotsemnana lempe ntšamo entšanga tmojtsajabotcá, nda cháuatsebacama, ndocna te bacna soye ndamá, ni ainaniñe bacna juabnënga ndbomná.

## 8

### *Cristo, nda jóbanëse tojanma entšanga Bëngbe Bëtsáftaca mo canÿacá chamotsemnana*

<sup>1</sup> Chë más uámana soye ndayama bënga montsichamo, chë Cristo mo bachnëcá yomnana montsoyebuambná ora, entsemna: Bënga chábeñe imojtsebomna canÿa nÿetsca tescama Bëngbe Bëtsabe delante bëngbiana impadaná, mo chë bëngbe bachnangbe más uámana amëndayacá, Bëngbe Bëtsabe catsbioica yojtsetbemana jtsemándayama, y Bëngbe Bëtsá chë más uámana tbemanentše. <sup>2</sup> Chë inÿe bachnanga Bëngbe Bëtsabe bëts yebnentše tmojánamashjna chë “más uámana ca” uabaina luaroye, Bëngbe Bëtsabe delante jtsemnana; pero chë luare celoca ndayentše nÿets tempo Cristo mo chë bachnangbe más uámana amëndayacá yoservena, entšanga ndoñe chca tmonjanpormá, ndayá Bëngbe Bëtsá.

<sup>3</sup> Nÿetscanga chë bachnangbe más uámana amëndayënga tmojanëbuáyana, entšangbiana soyënga y tmojóba bayënga Bëngbe Bëtsábioye juatšëmbonama, chëngbe bacna soyëngama perdonánënga chamotsemnana; chíyeca, jtseytana Jesucristo ndayánaca chaotsebomnana, Bëngbe Bëtsábioye juatšëmbonama. <sup>4</sup> Cha quem luarentše tojtsetrabájase, cha ni mo bachna ndoñe nántsemna, er muentše ba bachnanga mondmëna, y chënga ba soyënga jamana Bëngbe Bëtsábioye jëtschuayama, ntšamo jamama Moisesbe leyíñe yomandancá. Y chca, ndoñe nantseyta cha chca chauatoservénama. <sup>5</sup> Chë inÿe bachnanga imobomna luarënga Bëngbe Bëtsá jadórama, y ndaye soyëngaca chënga Bëngbe Bëtsá imoservena, ndoñe cachcá yontsemna chë ndayentše Jesucristo celoca yoservena luarcá, ni ntšamo cha yoservencá; nÿe batšatema bëngbioye šuinÿanÿná ntšamo chë celoca luare yomnana, ndayentše Cristo mo bachnëcá yoservena. Y bënga mondetatsëmbo quem luarentše chë soyënga chca yomnana, er chë Bëngbe Bëtsábioye jadórama yebna, chë jatsjacama opodena yebna Moisés japórmama ora, Bëngbe Bëtsá mëntsá tbojanianyana: “Cuedado cochtsebomna chë atšbiana yebniñe nÿetsca soyënga jamama, ntšamo tcbonjaninÿinÿecá chacomama, chë tjoca bonjamna ora ca.” <sup>6</sup> Pero bëngbe bachnangbe más uámana amëndayá Cristo, tojashjache canÿe más



bëts trabajo jtsebomnama, ntšamo chë inÿe bachnanga imobomna trabajuama; cachcá, ndayá Bëngbe Bëtsá tojayancá Crísoftaca bëngbiamama jamama, bënga tempcá tšabá Bëngbe Bëtsáftaca jtsemnama jtsamëse, puerte más tšabá endmëna, chë ndayá tempo chabe entšangbiamama jamama tojanašebuachená soyama. Ntšamo mora cha tojayancá puerte más tšabá entsemna, er tojašebuachená más tšabe soyënga bëngbiamama jamama.

<sup>7</sup> Chë Bëngbe Bëtsá natsana tojanašebuachená soyëngaca matënjanopodé entšanga chamotsamama ntšamo yojanamncá, ntšamo tojanašebuachenacá jóyëngacñama, as ndoñe manjanëyta Bëngbe Bëtsá cachiñe canÿe trato chauátsbemama entšangbiamama. <sup>8</sup> Pero Bëngbe Bëtsá tojáninÿe ntšamo yojanamncá entšanga ndoñe tmonjanmama, ntšamo cha tojanašebuachenacá jóyëngacñama, y Bëngbe Utabná Bëngbe Bëtsá chëngbiamama mëntšá tojánayana:

Canÿe tempo echanjóshjango, y chora Israel y Judabe pamillentša entšangbiamama básefta soyënga jamama chanjašebuachená, chënga átseftaca tempcá tšabá jtsemnama chamotsobenama.

<sup>9</sup> Chë chanjašebuachená soye ndoñe queochátsmëna cachcá ntšamo chë chëngbe bëts taitanga sënjanašebuachená soye enjamncá, atše chënga sënjanënatse ora, Egiptó luarocana sënjesanëbuacna ora; pero chëngna, ntšamo jamama enjanamncá, chë sënjanašebuachená soye jóyëngacñama ndoñe chemátanma causa, atše cachcá chënga sënjesanëñÿaye ca, Bëngbe Utabná tojánayana.

<sup>10</sup> Chë Israeloca entšangbiamama ndayá jamama canÿe tempo chentšana chanjašebuachená soye, mëntšá entsemna ca, Bëngbe Utabná tojánayana: Atše chanjama chë chëngbe juabniñe chaitsemánda soyama chënga chamotsejuabnama, y chamotseboše jtsamana ndayá chëngbe ainaniñe chaitsemánda soye. Atše chëngbe Bëtsá chántsemna, y chënga atšbe entšanga.

<sup>11</sup> Chë tempo ndoñe queochátsiyta cánÿenga ínÿenga chamotsabuátambama, cachabe luariñe oyenábioye o cachabe pamillentša entšábioye, atše chë chëngbe Utabná chašmotsábuatmama. Ndoñe queochátsëyta, er nÿetscanga uámanënga y nduámanënga, corente tšabá atšbe šmochantsábuatma.

<sup>12</sup> Chënga chanjálastemaye y chëngbe bacna soyëngama chanjáperdonaye, y ndocna te más chë bacna soyënga chënga tmojamama quichátsjuabnaye ca —cha tojánayana.

<sup>13</sup> Bëngbe Bëtsá, chë entšangbiamama mora jamama tojašebuachenama tojtsichamo ora, chca jtsemnana, er cha tojama chë tempo entšangbiamama jamama tojanašebuachená soye, mora ya ndoñe chaondëtsooservénama; ndayá mo tanguá soycá tojtsemna y ya ndoñe tontsooservena, chë soyna nÿe batšatema más y ya jtsopochócana.

## 9

### *Bëngbe Bëtsá jadórama muentša luare y chë celoca luare*

<sup>1</sup> Y morna, ndayá Bëngbe Bëtsá tojanašebuachenama y tojanmandá soyama, mandënga yojamna ntšamo cha jtsadoránama, y nÿa chabiamama pormana yebnentše quem luarentše. <sup>2</sup> Chíyeca, Bëngbe Bëtsá tojanmandá chaotsemna canÿe jatsjagama opodena yebna chábioye jadórama, mëntšá: Chë natsana tsañe quem Bëngbe Bëtsabiamama yebnentše inauabaina “chë uámana luare ca”; chentše inamna chë canÿsëfta quinÿenëfjuangá castellano candelerësiñe, y canÿe mesësha ndayiñe yojacjana chë luar-entše Bëngbe Bëtsá bëtsemnama inÿinÿnaye tandëšënga.

<sup>3</sup> Inye ujonýana entšējua chentšana, inye luare inamna; inauabaina “chë más uámana luare ca”. <sup>4</sup> Chentše inamna chë castellano altar, incienso jajuinýiyama, y chë cajontema nyetsiñe castellanoca pormánëtema. Quem cajontema yojaninýanýná ntšamo Bëngbe Bëtsá tojanašebuachenacá, chë Israeloca entšanga chabe uámana entšanga yochjánabiamama, y inauabaina “Bëngbe Bëtsabe šbuachenana soye inýinýnaye cajontema ca”; y chë tsoye quem soyënga inabomna: canýe castellano jarrëtema, maná ca uabaina tandëseca, chë Bëngbe Bëtsá tojanma celocana chabe entšangbiamama chaótsatsama saná; Aaronbe varëfja, chë tojanantsëfjonëfja; y chë ndëtsbé tablëbenga ndayiñe Bëngbe Bëtsá tojanábema chë bnëtsana uámana mandënga. <sup>5</sup> Chë cajontema juatsboca innamna chë juatëngmiásha uabomnënga, mo angelëngcá, “querubinënga ca” uabáinënga, y chënga imojaninýanýná chë Bëngbe Bëtsabe buashinýinýanana chéntšnaca bëtsemnama. Chënga, chë juatëngmiáshangaca chë cajontémentša nyets ústonëtema imojanëtsbotsana; chë ústonëtema inauabaina “entšanga bacna soyënga tmojamama Bëngbe Bëtsá perdonaye luare ca”, er chentše, chë cajontema juatsboca chë bachnangbe más uámana amëndayá jtsamanana buiñe jabuëscjana, chë Bëngbe Bëtsábioye cha ibnaimpadana te, entšanga cháuaperdonama. Pero mora ndoñe quenátsiyta chë soyëngama lempe jatóyebuambnayama.

<sup>6</sup> Lempe chca tmojanprontantšana, chë bachnanga sempre chë natsana luaroye imojánamashjuana, jamama ntšamo Bëngbe Bëtsá tojanamëndacá, chábioye jadórama. <sup>7</sup> Pero nýe chë bachnangbe más uámana amëndayá yojobena chë inye luaroye jamashënguana, y nýe canýe cada uata. Choye jamashënguama orna, cha ibojamna bayëngbe buiñe juabuyambana, Bëngbe Bëtsábioye juatšëmbonama, chca, chë bachnangbe más uámana amëndayá tojanma bacna soyënga Bëngbe Bëtsá chaboperdonama, y chë ntsetatšëmbcá entšanga tmojanma bacna soyëngnaca. <sup>8</sup> Chca, chë Uámana Espiritu jamana bënga chašósertama, chë natsana luare cabá tojtsemnëntscuana y chë bachnanga cabá chë soyënga chentše tmojtsamëntscuana, nyetscanga cabá ndoñe tmonjanobená chë inye luaroye jamashjnama, chë “más uámana luaroye”. <sup>9</sup> Chë soyëngaca jt-sopodénana bëngbioye jinýanýiyana, chë tempo, chë Bëngbe Bëtsábioye jadórama yebnëntše entšanga uta luare imojábomna ora, ndoñe yonjopodena Bëngbe Bëtsabe delantë nyetscanga jatsmënana, mo chë bachnangbe más uámana amëndayacá. Y chë soyëngnaca jtsayanana, chë Bëngbe Bëtsabiamama uátšëmbona soyëngaca y bachnanga tmojanóba bayëngaca, ndoñe tonjanopodé jamana canýa Bëngbe Bëtsábioye adorayá, Bëngbe Bëtsáftaca tempcá tšabá chaotsatsmënana y Bëngbe Bëtsá chabe bacna soyëngama tbojaperdonama ainaniñe corente chaotsetatšëmbuama. <sup>10</sup> Chënga, chë uátšëmbona soyëngaca y tmojanóba bayëngaca tmojanma nýe ntšamo Moisesbe leyiñe yojanayancá, ndayá chiñe yojanlesenciancá, ndayá jasama o jofšiyama, y chë cuerpo jabebianama mo tšabe entšangcá Bëngbe Bëtsabe delante jtsatsmënana; nyetsca mandënga nýe cuerpama, pero ainanama tondaye ntjamana. Pero chë entšanga chca yojánamna jtsamana, nýe Bëngbe Bëtsá inye soyënga, más tšabe soyënga jamama tojamandantscuana, chë tsëm trato tojábema ora.

<sup>11</sup> Pero Cristo ya tojánabo, y cha yomna chë Bëngbe Bëtsabe delante bëngbiamama impadaná mo chë bëngbe bachnangbe más uámana amëndayacá, chca, bëngbiamama chaotsemnama chë tšabe soyënga ntšamo mochjoyëngacñëcá. Chë luare celoca ndayentše cha Bëngbe Bëtsabe delante mo bachnëcá yotrabája, puerte tšabe luare yomna, y chentše cha, ndoñe chë quem luarentše bachnanga imomnëngcá, cha yobena jamana lempe ntšamo Bëngbe Bëtsá entšangbiamama jamama inajuabnaycá. Chë luare ndoñe entšangbe cucuátseca yondëpormana, y chca jtsayanana, quem luarentša soye ndoñe yondmëna ca. <sup>12</sup> Cha, canýe y nyetsca tescama chë luaroye Bëngbe Bëtsabe delante tojánamashëngo ora, cha ndoñe chivo o ternerbe buiñe tonjanabuyamba, ntšamo chë inye bachnanga imojuamancá; ndayá jóbaniñe, chabe buiñe juabuáshanëse, cha tojanma entšanga atsebácanënga jtsemnama chamotsobenama; y chca tojanmëse, cha tojanobená chë

luaroye Bëngbe Bëtsabe delante jamashënguama. Y Cristo chca choye tojanamashënguëse, tojanma bënga chë nyetsca tescama yomna tšabe vida jtsebomnama chamotsobenama.

<sup>13</sup> Ndëmuanÿenga ndayámnaca chë leyama tmojanoquedá mo chë Bëngbe Bëtsabe delante ndoñe tšabengcá, chë bachnanga imojuamana chëngbioye toronga y chivëngbe buiñe jabuëscacjana, y chë altaroca tcojajuinÿé ternerabe jatinyá chëngbioye jatbótotana, chca, chënga jábiamama Bëngbe Bëtsabe delante mo tšabengcá. Chca tmojamentšana, chë bachnanga tmojánayana chënga imojtsobena chë ínÿengaftaca jabama, Bëngbe Bëtsá jadórama, y cachiñe mo tšabengcá Bëngbe Bëtsabe delante imojtsatsmëna ca. <sup>14</sup> Ndayá bachnanga tmojanmcá yojanámana entšanga cachiñe mo tšabengcá Bëngbe Bëtsabe delante imojtsatsmëna ca jayanama; y chca, chë ínÿengaftaca Bëngbe Bëtsábioye jadórama tmojanobenase, jntſachetšá más yojtsámana Cristbe buiñe, ndëmuanÿeye tojanábuashana bëngbiamama cha tojanóbana ora! Chë nyets tempo vida bomná Espiritbe obenánaca, Cristo, chabe derecho vida jtsobomñama cachcá tojanonÿá y bëngbiamama tojanóbana. Cha, chë ndocna bacna soye ndbomná, tojanóbana ora yojamna mo canÿe bayá tondaye ndbemaná chë bachnanga cuafjobacá juatšëmbonama, entšangbe bacna soyëngama; cachcá Cristo, chë ndocna bacna soye ndbomná, bëngbe bacna soyëngama jáperdonama tojanóbana. Bëngbiamama tojanóbanayeca, Cristo yobena jamama bënga ainaniñe corente tšabá chamotsetátšëmo, bacna soyënga bënga tmojamama, chë ndoñe vida jtsebomnama bënga junatsana soyënga, chama bënga perdonánënga imojtsemnama, y chca, bënga montsobena jtsiyenana, Bëngbe Bëtsá, chë ndegombre ainá yomná, jtseservënëse.

<sup>15</sup> Chíyeca, Cristo jóbanëse tojama entšanga Bëngbe Bëtsáftaca cánÿiñe mo canÿacá chamotsemnama, ntšamo Bëngbe Bëtsabe tsëm trato yomncá; y chca cha tojama, Bëngbe Bëtsá chabe entšanga chamotsemnama tojáchëmbënga perdonánënga chamotsemnama, chë Bëngbe Bëtsabe tempsca tratentša ley jtsocumplínama inamna ora imojoyenëntscuana bacna soyënga tmojanmama; y chëngnaca chamotsobenama chë nyetsca tescama mochtsebomna soyënga jóyëngacñama, ntšamo Bëngbe Bëtsá chabe entšanga tojanašebuachenacá.

<sup>16</sup> Ntšamo canÿe testamentiñe tojtsayancá chaopasamna, jtseytana chaotsótatšëmo chë chca jamama tojašbuachená cha tojóbanama. <sup>17</sup> Canÿe testamento tondaye ntsámanana, chë chca jamama tojašbuachená cha cabá ainá totsomñëntscuana; nÿa cha tojóbanama orna aiñe. <sup>18</sup> Chíyeca chë Bëngbe Bëtsabe natsana trato, entšangbeñe tojanobojaťšé, chora tmojanóba bayëngbe buiñe jabuëscjëse. <sup>19</sup> Moisés chë leyentša nyetsca mandënga nyetsca entšanga tojánabuayenantšana, tojanca buángana boboshëshe y hisopo betiyentša buacuafja, chë ternerënga y chivëngbe buiñe búyeshëca enajuabnëyiñe tojanfcheacuacá, y chora chë leyënga librëšañe tojanbuëscacja, y nyetsca entšangbeñnaca. <sup>20</sup> Y mëntšá tojánayana: “Quem buiñe entsinÿinÿná, ntšamo Bëngbe Bëtsá tojamandacá ndegombre yochtsemnama, y tšëngaftangbiamama puerte yochtsámanama ca.” <sup>21</sup> Moisésnaca buiñe tojanbuëscacja chë jatsjacama opodena yebniñe, y lempe chentša soyënguiñe, chë ndaye soyënga Bëngbe Bëtsábioye jadórama yojanoservena. <sup>22</sup> Er ntšamo leyiñe iuayancá, yojtsemna nÿa mo nyetsca soyënguiñe buiñe jabuëscacjana, Bëngbe Bëtsábioye jadórama tšabá chaoservema; y buiñe ndoñe tonjuábuashanësna, ndoñe ntsopodénana entšanga bacna soyëngama perdonánënga chamotsemnama.

*Cristo jasúfriase y jóbanëse, tojanma entšanga bacna soyëngama perdonánënga chamotsemnama*

<sup>23</sup> Chíyeca jtseytana chë Bëngbe Bëtsábioye quem luarentše jadórama soyënga, chë bachnanga chamoma, Bëngbe Bëtsábioye jadórama tšabá chaoservema, chë Bëngbe Bëtsábioye jëtschuayama tmojóba bayëngbe buiñeca. Chë soyënga batšatema jtsinÿanÿnayana ntšamo chë celoca luare yomnana Bëngbe Bëtsabe delante, ndayentše Jesús yoservena. Lempe

ntšamo chë Bëngbe Bëtsábioye jadórama luarentše yomncá, chabe delante celoca, Jesucristo tojanma, chábioye jadórama tšabá chaoservema; pero chca tojanma más uámana soyënga jamëse, chë tmojóba bayëngaca bachnanga quem luarentše innétsama soyëngama. <sup>24</sup> Er Cristo ndoñe tonjánamashëngo canye luarentše Bëngbe Bëtsá jadórama nye entsangbe pormánentše, ndaye luare nye batsatema jtsinyanynayana ntšamo chë celoca luare Bëngbe Bëtsabe delante chábioye jadórama yomnana; ndayá cach celoye tojánamashëngo, Bëngbe Bëtsabe delante luaroye, bëngbiana jtseimpadánama. <sup>25</sup> Chë bachnangbe más uámana amëndayana chë “más uámana luaroye” jamashënguana canye cada uata, bayëngbe buíñeca, ndoñe cachabe buíñeca, chca, ndayánaca jamama entsanga bacna soyënga tmojamama perdonánënga chamotsemnana. Pero Cristo chë luaroye celoca ndoñe tonjánamashëngo, chentsana jtéseboचना, y chabe buíñe juabuáshanëse cachiñe jatóbanama, y ba soye cachcá chauétsemnana. <sup>26</sup> Chca tojtsemnëse, Cristbiana manjanmëna jasúfriana y jóbanana ba soye, chë Bëngbe Bëtsá quem luare tojanma orscana. Pero ntšamo tojopasacá entsemna, mora chë quem luare jopochócama tempo yojtsobeco ora, Cristo canye y nyetsca tescama tojenonynyé quem luarentša entsanga bacna soyënga jabuajuánama, chëngbiana jóbanëse, mo entsangbe bacna soyëngama canye tmojóba bayá, Bëngbe Bëtsábioye uatšëmonacá. <sup>27</sup> Cachcá, ntšamo nyetsca entsanga jtsamnana nye canye jóbanama, y chentsana Bëngbe Bëtsá chëngbiana jayanana chë imojëftsiyenëntscuana ntšamo tmojanmcá tšabá o ndoñe tšabá bétsemnana, y chëngaftaca jamana ntšamo chora tojajuabocá, <sup>28</sup> cachcá, Crístnaca, nye canye chabe derecho vida jtsobomñama cachcá tojanonýá, chabe buíñe juabuáshanëse jóbanama, ba entsanga bacna soyëngama jáperdonama; y chentsana cachiñe yochjésabo, ndoñe bacna soyëngama entsanga jabáperdonama, ndayá chë cha cháuesabama tša tmobátmanënga jabátsebacama.

## 10

<sup>1</sup> Chë Moisesbe leyentša mandënga, ntšamo chë bachnanga yojánamnama Bëngbe Bëtsá jadórama tmojóba bayëngaca y inye soyëngaca, ndoñe ntsinyanynayana lempe chë Bëngbe Bëtsá chabe entsanga jatsatayana puerta tšabe soyënga, pero aiñe batsatema jtsinyanynayana ntšamo chë soyënga yochtsemnana. Chíyeca chë mandënga, chë uatšëmbona soyëngaca y Bëngbe Bëtsábioye jadórama tmojóba bayëngaca, ndocna te ntjopódiana jamana chë Bëngbe Bëtsábioye jobéconama tmojtsebošënga, chca soyënga tmojtsamama cada uata nyets tempo, chënga ainaniñe corente chamotsetatšëmbuama chëngbe bacna soyëngama nyetsca tescama perdonánënga imojtsemnana. <sup>2</sup> Er ndayá tcojtsamama Bëngbe Bëtsabiana uatšëmbona soyëngaca y chábioye jëtschuayama tmojóba bayëngaca, entsanga Bëngbe Bëtsábioye adórayënga, chabe delante tšábënga jtsemnana matmëñjanobenase, chënga chë bacna soyënga tmojanmama ainaniñe ngmënaca ya ndoñe mamëñjésemna, y matmëñsanajbaná soyënga amana chë tmojóba bayëngaca. <sup>3</sup> Pero juatšëmonama entsanga bayënga tmojóba ora, josérviana entsanga bacna soyënga tmojamama cada uata chamuatenójuaboma; <sup>4</sup> er chë toronga y chivënga tmojóbanëngbe buíñeca ndoñe ntšopodénana entsángbioye bacna soyënga jabuajuánama.

<sup>5</sup> Chíyeca, Cristo quem luaroye tojánabo ora, Bëngbe Bëtsábioye mëntšá tbojanianana: Ndoñe tconjábošëna entsanga chacmátšëmbona soyënga, ni tmojobaye bayënga, pero aiñe tcojama atše canye entsacá chaitsemnana.

<sup>6</sup> Ndoñe tšabá quecmátinýana chë tmojóba y tmojajuinýé bayënga, entsanga bacna soyëngama chacotsaperdonama.

<sup>7</sup> As atše Bëngbe Bëtsá sënjanianana: “Bëngbe Bëtsá, muentše sëntsemna, ntšamo aca icobošcá atše chaimama, ntšamo acbe uabemana palabrenguiñe atšbiana endayancá, chë ndayá atše chjanmama ca.”



<sup>8</sup> Natsana, Cristo tojánayana, Bëngbe Bëtsá ndoñe tonjánbošena, ni tšabá tbonjanínynana entsanga chamuátsëmbona soyënga, ni Bëngbe Bëtsábioye jëtschuayama tmojóba bayënga, ni tmojóba ni tmojajuinýé bayënga, entsanga bacna soyëngama cha chaotsaperdonama ca, masque chënga chë Bëngbe Bëtsábioye jadórama soyëngaca jamana, ntšamo leyiñe iuayanca ndayá chënga jamama yojsamna. <sup>9</sup> Y chentšana, Cristo Bëngbe Bëtsábioye tbojátaniyana: “Muentše sënjabo, chë ntšamo aca icobošcá atše chaimama ca.” Chca, Cristo tojinýanýé chë jtsamana soyënga tmojóba bayëngaca, tondaye yonduámama entsanga bacna soyënga jabuajuánama, y entsangbe bacna soyëngama jóbanëse tojaninýanýé chë ntšamo Bëngbe Bëtsá yobošcá jtsamana, más iuámama chë inýe soyënga játamama. <sup>10</sup> Bëngbe Bëtsá tojama, bënga chabe entsanga y chabe delante tšábenga chamotsemnama, ntšamo Bëngbe Bëtsá yobošcá Jesucristo tojánmayeca, chabe derecho vida jtsobomñama cachcá jonýayëse y entsangbe bacna soyëngama jóbanëse, canýe y nyëtsca tescama.

<sup>11</sup> Judiëngbe nyëtsca bachnanga nyëts tempo ba soye altarentša natsanoica Bëngbe Bëtsá jtseservénana, y ba soye cachcá jtsamana tmojóba bayëngaca, pero chë soyëngaca ndocna te ntjopódiana entsanga bacna soyënga jabuajuánama. <sup>12</sup> Pero Jesucristo entsangbe bacna soyëngama tojanóbana ora, yojamna mo canýe tmojóba bayacá, Bëngbe Bëtsá entsanga bacna soyëngama cháuaperdonama; nýe canýe y nyëtsca tescama chca tojanma, y chentšana Bëngbe Bëtsabe catšbioica tojtanoítbema, canýe uámama puestentše, jtsemándayama. <sup>13</sup> Chentše cha yobátmana, Bëngbe Bëtsá chabe obenánaca Cristbe uayayënga chabe cucuatšinë chamoquedama yochjamëntscuana. <sup>14</sup> Er nýe canýe, entsangbe bacna soyëngama cruzoca jóbanëse, Jesucristo lempe tojama, entsanga chë Bëngbe Bëtsábenga jtsemnama chëmbonënga, chabe delante nyëtsca tescama tšabengcá chamotsemnama. <sup>15</sup> Y Uámama Espíritnaca, Bëngbe Bëtsabe uabenana palabrënguñe šontsinýanýná chca ndegombre bëtsemnama, mëntšá tojánayana ora:

<sup>16</sup> Ndayá entsangbiamama chjama, canýe tempo chentšana chanjašebuachená soye mëntšá entsemna ca, Bëngbe Utabná tojánayana:

Atše chanjama chënga chamotseboše jtsamana ndayá chëngbe ainaniñe chaitsemánda soye,

y chamotsejuabnama chë chëngbe juabniñe chaitsemánda soyama ca.

<sup>17</sup> Y chentšana mëntšá tojánayana:

Ndocna te más quichátsjuabnaye chënga bacna soyënga tmojamama,

y ntšamo atše stsebošcá contra soyënga chënga tmojamama ca.

<sup>18</sup> Chcasna, Bëngbe Bëtsá nyëtsca tescama entsanga bacna soyëngama tojaperdoná ora, ya ndoñe ntjátsiytana inýe soyënga más játamama, mo bayënga cuafjobaycá, entsanga bacna soyëngama perdonánënga chamotsemnama.

### *Sontsamna Bëngbe Bëtsábioye jtobéconana*

<sup>19</sup> Y chca, Jesucristbeyeca catšátanga, Jesusbe buiñe tojanábuashanama y bëngbiamama tojanóbanama, chábeñe jtsošbuáchiyëse, bënga montsobena, tondayama ntjatauatjcá Bëngbe Bëtsabe delante jamashënguama. <sup>20</sup> Bënga montsobena jamashënguama chë tsëm benachëjana, Cristo bëngbiamama tojamëjana; cha nda inétsama chë nyëtsca tescama yomna tšabe vida chamotsebomnama. Mo chë quem luarentše chë bachnangbe más uámama amëndayacá, chë ujonýana entsëjuajana jamashënguana chë “más uámama ca” uabaina luaroye, Bëngbe Bëtsabe delante jtsemnama, cachcá, Cristo bëngbe bacna soyëngama mo entsacá tojanóbanayeca, bëngnaca montsobena Bëngbe Bëtsabe delante luaroye jamashënguama. <sup>21</sup> Bënga mondbomna canýe bëts bachnangbe más uámama amëndayá, Bëngbe Bëtsabe entsángbeñe jtsemándayama, y cha endmëna Jesús. <sup>22</sup> Chíyeca, Bëngbe Bëtsá jaserviama ndegombre ainaniñe corente jtsebošëse, y chábeñe puerte jtsošbuáchiyëse, šontsamna Bëngbe Bëtsábioye jobéconana. Ntšamo chë

bachnángbioye buíñeca tmojanabuešcacjca, Bèngbe Bètsabe delante tšabengcá chamotsemnama cha jaserviama, cachcá, Cristbe buíñe juabuáshanèse y bèngbiamama jóbanèse, bènga ainaniñe corente montsetátšëmbo Bèngbe Bètsá nyetsca tescama bèngbe bacna soyèngama šojtsaperdonama. Y bènga béjayeca uabainèngnaca mondmèna; chíyeca bènga jtsobenana Bèngbe Bètsábioye chca jobéconana.

<sup>23</sup> Bènga šontsamna nyets tempo Bèngbe Bètsábeñe puerte jtsošbuáchiyana, y ndocna te nye ndayámnaca játajbanana entsángbeñe ichámuana, chë Bèngbe Bètsábeñe jtsošbuáchiyese bènga imobatmana soyènga cha yochjamama, er chë soyènga šojašebuachená cha, sempre jamana ntšamo tojayancá. <sup>24</sup> Bènga šontsamna janguanguana ntšamo muatjobenaye añemo jenatšetayana, nyetscanga jtsenbobonshánana, y ntšamo tšabá yomncá jtsamana; <sup>25</sup> pero ndoñe quešnátamna játajbanana, Bèngbe Bètsábioye jadórana enefjuanana mo Cristbeñe ošbuáchiyènga quetsomñecá, ntšamo báseftanga imojtsamcá. Chamna, nyetscanga añemo mochtsenatšetnaye Cristo nyets tempo jtseservénama, y más mora, chë ndayá imojtsonyama, Bèngbe Utabná yochjésabama ya yojtsobecuama montsetátšëmbo ora.

<sup>26</sup> Er chë ndegombre soyèngama tšabá tmojátatšëmbonentsana y chë soyènga tmojoye-uná chentsana, bacna soyènga jtsamése tmojtsiyena, nye chca jamama tmojtseboše causa, muattsaboté ndayá Cristo bèngbiamama tojanmca, bèngbe bacna soyèngama cha tojanóbana ora, y ya tondaye nántsemna ntšamo Bèngbe Bètsá bènga jtsaperdonama. <sup>27</sup> Y chca, ndayá bènga muattsobena jobátmana soye nántsemna nye chë Bèngbe Bètsábicana castigo, chë ndayama šojtsamna uatjana jtsebomnana; y nye jobátmana chë tempo, ndaye ora Bèngbe Bètsá puerte etonaná chabe uayayènga bètscá íñesheca yochtsapochóca. <sup>28</sup> Ndánaca chë Moisesbe leyama tojayana tondaye yondovalena ca, y útata o únganga chca tmojouena y aíñe cha chca tojayana ca chènga tmojayanèse, jtsemnana chë entsábioye jtsóbana, tondaye ntjalastemacá. <sup>29</sup> Canya, nyets ainánaca Bèngbe Bètsabe Uaquiñábioye tbojtsaboté; y tojayana Cristbe buíñe, chë ndémuanyeye tojanábuashana bèngbiamama tojanóbana ora, tondaye yonduámana ca, ndayá nye ndaye entsabe buíñcá ca, chë buíñe chë ndémuanyeye šojtsinýanýná ndayá Bèngbe Bètsá tbojašebuachenacá bèngbiamama jamama, y ndáyeca Bèngbe Bètsá chabe entsanga šojábiamama, cha jaserviama; chë entsá Uámana Espíritbioye tbojójenguango, nda inétsama bènga tšabe soyènga chamotsebomnana; y canya chca amá, ¿tšèngaftanga ndoñe šmontsejuabná cha ibojtsomerecena Bèngbe Bètsábicana canye puerte más uabouana castigo, chë Moisesbe leyama tondaye yondovalena ca tojayanabiamama? <sup>30</sup> Bènga nyetscanga mondétatšëmbo Bèngbe Bètsá mentsá tojánayanama: “Atše chanjama chènga chamosufrima, ínýenga chamosufrima tmojama causa; y chènga chanjácastigaye, ínýengbioye bacá tmojaborlá causa ca.” Y mentsánaca tojánayana: “Bèngbe Utabná chabe entsangbiamama echanjayana ntšamo tmojëftsemcá tšabá o ndoñe tšabá bétsemnana, y chèngaftaca echanjama ntšamo chora chaojajuabocá ca.” <sup>31</sup> ¡Tša uabouana, Bèngbe Bètsá chë nyets tempo ainabe cucuatšiñe joquédana, castiganá jtsemnana!

<sup>32</sup> Pero ntšamo tempo yojamnana šmochtsenójuabnaye, chë ndegombre soyènga Jesucristbiamama cabá chora šmonjanábuatmana ora, y chora tša jenojuérezana cmonjanotocá padecena soyènguiñe, y chë causa tša šmojansufrí. <sup>33</sup> Báseftanga tšèngaftanguentsèngbioye entsangbe delante tcmojanoyánguango, y ínýenga tmojanma puerte chašmotsesufrínama; y ínýenga tšèngaftanguentsènga chca imojansufrinèngaftaca šmojanama, chènga jujabuáchama. <sup>34</sup> Tšèngaftanga šmojanalastemana chë chènguentsènga cárceloye imojanétámenènga; y oyejuayènga šmojanlesenciá ntšamo šmojanbomncá ínýenga chacmotsabacama, er tšèngaftanga šmojátatšëmbona Bèngbe Bètsábicana más tšabe soyènga šmojtsebomnana, chë nyetsca tescama šmochtssebomna soyènga. <sup>35</sup> Chcasna, ndoñe šmatjajbaná ainaniñe bètscá añemo jtsebomnana, ni Bèngbe Bètsábeñe sempre jtsobátmanana; er chca šmobatmánayeca, Bèngbe Bètsá echanjama tšèngaftanga bètscá ua-

canana soyënga chábiocana chašmotsebomnama. <sup>36</sup> Tšëngaftanga cmontsamna corente uantadënga jtsemnana, padecéniñe chašmojtsachñëjuana ora, chca, ntšamo Bëngbe Bëtsá yobošcá tšëngaftanga chašmotsamama, y ndayá Bëngbe Bëtsá tojanašebuachenacá chašmóyëngacñama. <sup>37</sup> Er Bëngbe Bëtsabe uabemana palabrënguiñe cha mëntšá tojánayana:

Betsco, ndoñe bën, y chë jabama ibomná echanjabo.

Ndoñe bën quebochatóbema.

<sup>38</sup> Nye chë ndabiamama atše chajama atšbe bominiñe tšabia chaotsemnana, átšbeñe cha betsošbuáchema, cha ndegombre chë nyetsca tescama yomna tšabe vida echántsebomna;

pero uatjana causa, átšbeñe ošbuáchiyana tojtsajbanase, atše cháftaca ndoñe quichátoyëjuaye ca —cha tojánayana.

<sup>39</sup> Pero bënga ndoñe quemátsmëna chë uatjana causa Bëngbe Bëtsábeñe ošbuáchiyana tmojtsajbananga, y chca, nyetsca tescama pochocánënga jtsemnana imojtsajnënga; pero aíñe mondmëna chë Bëngbe Bëtsábeñe ndegombre ošbuáchiyënga, y chca, chë atsebácanënga jtsemnana mochjashjáchënga.

## 11

### *Bëngbe Bëtsábeñe ošbuáchiyana jtsebomnana*

<sup>1</sup> Ošbuáchiyana jtsebomnana endmëna corente jtsetatšëmbuana, ndayá tmojtsobamancá ndegombre chca yochjopásama; endmëna ainaniñe corente jtsetatšëmbuana, ndayá bënga mora ndoñe tmontsonyáca ndegombre chca yomnama. <sup>2</sup> Bëngbe Bëtsá tojánayana bëngbe bëts taitanga tšabá imojánama ca, chënga chábeñe imojtsošbuachéyeca.

<sup>3</sup> Bënga, Bëngbe Bëtsábeñe mondošbuachéyeca, mondëtatšëmbo cha quem luare y nyetsca luarënga tojanmama, chca chaotsemnana cha tojanmandá ora; chcasna, chë ndayá mora bënga jinýama imobencá, cha tojanma bënga ndoñe mondobena jinýama soyënguentsana.

<sup>4</sup> Abel Bëngbe Bëtsábeñe yojanošbuachéyeca, oveshatémënga chábioye tbojanátšëmbona, y chë soye Bëngbe Bëtsabiamama más tšabá yojtsemna, chë ndayá Caín, chabe catšata, Bëngbe Bëtsá jëtschuayama tbojanátšëmbonama. Chíyeca, Bëngbe Bëtsá tojánayana Abel chabe bominiñe tšabia yojtsemna ca, ndayá Abel chábioye jëtschuayama tojanmcá oyejuayá tojanóyëngacñeyeca. Ntšamo Abel Bëngbe Bëtsábeñe yojanošbuachecá, masque cha ya obaná yojtsemna, chë soye cabá bënga šontsabuatambá.

<sup>5</sup> Enoc Bëngbe Bëtsábeñe puerte yojanošbuachéyeca, Bëngbe Bëtsá celoye tbojesanbëtšëñe, ntjobancá. Chentšana ndocná tonjanobená cha jtsinýenana, Bëngbe Bëtsá tbojesanbëtšëñe causa. Y Bëngbe Bëtsabe uabemana palabrënguiñe endayana, Bëngbe Bëtsá Enócaftaca oyejuayá canjamna ca, ntšamo jtsamëse yojoyenama, y chentšana celoye tbojtsanámbañe. <sup>6</sup> Pero Bëngbe Bëtsábeñe ntsošbuachiycá, ndoñe quenátópodena cha oyejuayá bëngaftaca jabemama, er chábioye jobéconamna, entšá jtsemnana jtsošbuáchiyana cha ndegombre bëtsemnana, y cha inétsamama chë cha jtsabuatmama tša tmobošëngbiama bëtscá tšabe soyënga chamotsebomnama, mo chábiocana uacanana soyëngcá.

<sup>7</sup> Bëngbe Bëtsá Noébioye tbojanbuayená uabouana soyënga yochjanopásama, cachora ndopodena jinýama soyënga, y cha Bëngbe Bëtsábeñe yojanošbuachéyeca, tojanma ntšamo Bëngbe Bëtsá tbojanmandacá y barquëshu tojanapormá chabe pamíllanga játebacama. Cha chca tojanma ora, ošbuáchiyana bómnyayeca, cha tojaninýanýe entšanga tša bacna soyënga tmojanmama y chë causa castigánënga jtsemnana yojtsamnama. Chabe ošbuachiyanámnaca Noé tojánashjache Bëngbe Bëtsabe bominiñe tšabia jtsemnana, y chca entšá jashjáchana, nye Bëngbe Bëtsábeñe jtsošbuáchiyëse.

<sup>8</sup> Bëngbe Bëtsá Abrahámbioye tbojanchembo, inye luaroye cháuama; Abraham Bëngbe Bëtsábeñe yojanošbuachéyeca, tojanma ntšamo Bëngbe Bëtsá tbojanmandacá, y tojánbocna chë luaroye jama, chë Bëngbe Bëtsá tbojanšbuachená jatšetayama luaroye, masque Abraham ndoñe yontsetátšëmbo ndémoye yochjánama. <sup>9</sup> Bëngbe Bëtsábeñe yojanošbuachéyeca, yojobena mo inye luarocana ashjangonacá jtsiyenana, cachabe luarentše ndoyená, chë Bëngbe Bëtsá tbojanšbuachená luarentše. Entšëjuaca pormana tambënguiñe yojoyena, cachcá ntšamo chë chábentsana básenga Isaac y Jacob ibojëftsiyencá; y chátnaca Abrahamcá ibojanobátmana jóyëngacñama ntšamo Bëngbe Bëtsá Abrahámbioye tbojanšbuachenacá. <sup>10</sup> Er Abraham corente uantadá yojanobátmana chë canye luaroye celoca jamashënguama tempo; chë luare inamna canye bëts pueblo, puerte tšabe ucuatjoniñe pormana pueblo, canye luare chë ndayentsama Bëngbe Bëtsá tojanjuabó ntšamo chaotsemnama, y cachabe pormana luare inamna.

<sup>11</sup> Sara, Bëngbe Bëtsábeñe yojanošbuachéyeca, Bëngbe Bëtsá tojanma cha canye šešona chabotsebomnama, masque chora ya bëtsanáñejema yojtsemna, šešona jtsebomnama. Bëngbe Bëtsá chca tojanma, er Sara corente yojanjuabná, cha chë canye šešona yochtsanbomnama tbojanšbuachená cha, nyets tempo ntšamo tojayancá amá yojamna ca. <sup>12</sup> Y chca, quem entšá Abraham, chë šešonga jtsabamnama ya ndobenábentsana, ba básenga tmojanonýná, tša mallajta mo chë celoca estrellëngcá, y tša chëftanga mo chë mar béjayoca chënyañentša cascajca, ndocná jacúntama ntjobenayana.

<sup>13</sup> Nyetsca quem entšanga imojëftsiyena jtsamëse ntšamo chëngbe ošbuáchiyana yojamncá, y chca tmojanóbana, masque cabá ndoñe tmonjanóyëngacñe chë Bëngbe Bëtsá tojanašebuachená soyënga. Pero chëngbe ošbuachiyánama corente imojtsetátšëmbo, Bëngbe Bëtsá chentsana baytese ntšamo tojanašebuachenacá yochjánatšatayama y chë soyënga ndegombre yochtsemnama, y chama oyejuayënga chënga imojtsemna. Chënga tmojánayana quem luarentše chënga imojoyena mo cachëngbe luarentše ndoyenëngcá, y quem luarëjana mo nye achnëjuanëngcá ca. <sup>14</sup> Y chca tojtsichámëngna, puerte jtsinýanýnayana chënga tša imojtseboše inye luaroca joyénanama, canye luare cachëngbiana. <sup>15</sup> Chënga nye chë ndayentsana tmojëftsanbocna luarama manjánjuabnase, matmënjanobená tšabá cachoye jesshëconama. <sup>16</sup> Pero chëngna canye más tšabe luare innaboše, canye luare celoca. Chíyeca Bëngbe Bëtsá ndoñe yonjanëuatja, chëngbe Bëtsá ca chënga chamotsechembuanama, er celoca canye bëts luare, mo canye bëts pueblécá chëngbiana tojanprontá.

<sup>17</sup> Bëngbe Bëtsá Abrahámbioye jinýama, ndegombre aíñe o ndoñe Bëngbe Bëtsábeñe tajojtsanošbuachema, tbojanmandá chabe uaquiñá Isaac chabuánatse jóbama, chábioye jëtschuayama, ntšamo Abraham chë tojóba bayëngaftaca jamama yojanamancá. Cha Bëngbe Bëtsábeñe yojanošbuachéyeca, yojtseprontana chë nye canye uaquiñá ibnabomná jóbama, Bëngbe Bëtsábioye jëtschuayama, masque Bëngbe Bëtsá mëntšá tbojanšbuachená: <sup>18</sup> “Chë ácbentsana entšanga nye Isaacbiajana mochanjabo ca.” <sup>19</sup> Abraham corente yojanjuabná y yojátatšëmbo, Bëngbe Bëtsá ndegombre obenana bomná bëtsemnama, chë obanënga chámuatayenama jamama. Chíyeca, Bëngbe Bëtsá Abrahámbioye tbojtsanauyaná Isaac jóbama ora, yojamna mo Abraham obanënguentšana chábioye cuaftoyëngacñécá. Y chca, ntšamo Isaácraftaca tojanopasacá, batšá yojtsinýanýnaye ntšamo Jesucrísoftaca yochjanopasacá.

<sup>20</sup> Isaac Bëngbe Bëtsábeñe yojanošbuachéyeca, Bëngbe Bëtsábioye tbojanimpadá chabe uaquiñátbiana, Jacob y Esaú, bëtscá tšabe bendicionënga chabotsebomnama, chë joshjanguama tempënga ora.

<sup>21</sup> Jacob Bëngbe Bëtsábeñe yojanošbuachéyeca, ya jóbana ora, tbojanimpadá cada ona chë Josebe básëngbiana, Bëngbe Bëtsá chaoma bëtscá tšabe bendicionënga chamotsebomnama. Cha chca tojanma, jotsejbénase Bëngbe Bëtsábioye jadórama, y chabe jatjonëfjiñe tsbanánoca jojuáchase.



<sup>22</sup> José Bëngbe Bëtsábeñe yojanošbuachéyeca, ya jóbanama ora, tojánayana más chcoye chë Israeloca entsanga Egiptó luarentšana mochjëftsanbocna ca, y tojëftsanmandá ndayá jamana chabe óbana cuérpoca.

<sup>23</sup> Moisesbe bëtsétsata Bëngbe Bëtsábeñe ibojanošbuachéyeca, cha tojanonýná ora, unga shinýentscuana cha tmojtsaniytëme, er chata tbojáninýe cha canýe botamana básetema bétsemnama, y ndoñe tbonjanëuatjaná chë reybe mandama, chë nyetsca judiëngbe basetëmënga boyabásetemënga jtsëbáyana.

<sup>24</sup> Moisés Bëngbe Bëtsábeñe yojanošbuachéyeca, ya bëtsá yojtsemna ora, ndoñe tonjánbošena chë Egiptoca reybe bembëbe uaquiñacá chamotsábuatmama. <sup>25</sup> Chamna, tojánbošena cha jasúfriama ínýenga chamotsamama, cánýiñe chë Bëngbe Bëtsabe entsángaftaca, y ndoñe nýe baseftayté tšabá jatsmënana, bacna soyënga jtsamëse, ntšamo cachá tojtsejuabnacá, nýe cachá tšabá jtsomñama. <sup>26</sup> Chamna, cha yojanjuabná, chë padecena soyënguiñe jasúfriana ntšamo Cristo tojansufricá, más tšabá yojamna chë Egiptoca uámana soyëngama, er cha Bëngbe Bëtsábeñe jtsošbuáchiyëse chábeñe yojanobátmana, ba tšabe soyënga mo canýe uacanana soycá cha ibochjanatšetayama.

<sup>27</sup> Bëngbe Bëtsábeñe yojanošbuachéyeca, Moisés Egiptocana tojëftsanbocna, chë luar-entša rey cháftaca chábuetsnama ntjatauatjca. Cha ainaniñe nyets tempo añemo yojtsebomna, y chca yojáninýna mo chë ndocná jinýama tondobenacá, Bëngbe Bëtsábioye cuaftsonýacá. <sup>28</sup> Bëngbe Bëtsábeñe yojanošbuachéyeca, ntšamo Bëngbe Bëtsá tbojanmandacá, Moisés chë judiënga tojanabuayená Bashco fiesta jamama, y chë Israeloca entsángaftaca yebnëngoye amashjuaniñe buiñeca tojanbuéscacja, chca, chë ángel obanayá, chë Israeloca pamíllangbeñe Egiptoca chë mayor uaquiñënga ndocá chaondámama.

<sup>29</sup> Moisés y Israeloca entsanga Bëngbe Bëtsábeñe imojanošbuachéyeca, chë “Buángana ca” uabaina mar bejayëjana tmojánenachnëngo, mo chiñe bojojo fshantse cuaftsomñcá; chentsana, chë Egiptoca entsanga cachcá jamama tmojánbošena ora, nyetscanga chiyiñe tojtsanatajo.

<sup>30</sup> Israeloca entsanga Bëngbe Bëtsábeñe imojanošbuachéyeca, chë Jericó bëts pueblentša tapiësënga shëconana canýsëfta tentscuama chënga imojánajnentšana, chëšënga yojtsáshajaye.

<sup>31</sup> Rahab, chë pueblentša bacna vida bomna shembása, Bëngbe Bëtsábeñe yojanošbuachéyeca, ndoñe tonjanóbana chë ínýengaftaca, chë bëts pueblentše oyenënga, chë ntšamo Bëngbe Bëtsá tojanmandacá ndoñe tmonjanmënga; y ndoñe tonjanóbana, er chë Israeloca entsanguentsana ichmónënga tšabá tojanëbuaja, chë jarrepárama tmojánanga ntšámose chë luarentše oyenënga jáyënjanama jobenayama.

<sup>32</sup> Atše sentsobena bangbiana más jóyebuambayama, Bëngbe Bëtsábeñe ošbuáchiyëngbiana, pero luare šattsëshbe chcangbiana jóyebuambayama, mo Gedeoncá, Barac, Sansón, Jefte, David, Samuel y Bëngbe Bëtsabe juabna oyebuambnayëngcá.

<sup>33</sup> Chënga Bëngbe Bëtsábeñe imojanošbuachéyeca ínýengbe mandadëngbe entsángbioye tmojanayëñaná, bëtscá imojánama nyetsca entsángaftaca ntšamo tšabá yomncá jtsamama y nyetscanga cachcá chamotsámanama, ndayá Bëngbe Bëtsá chënga tojanašebuachenacá tmojanóyëngacñe; y Bëngbe Bëtsá tojanma chënga leóngaca imojtsemna ora, chënga chamuatenáyebengoma, chentsana báseftangbioye ndocá chamondámama.

<sup>34</sup> Ošbuáchiyana bómnyayeca, Bëngbe Bëtsá tojanma lempe chaotsefsanama, chëngbioye íñeshiñe tmojanacjá ora, chënga ndocá chamondëpasama; tmojanotsbocá espadëjaca jobanámentsana; ya tondaye añemo béntsebomna ora, Bëngbe Bëtsá tojanma bëts obenana y puerte añemo chamotsebomnama; tmojánashjache bëts obenana jtsebomnama ínýenga jáyënjanama, chëngaftaca imojtsentsjaná ora; y tmojanobená inýe mandadënga y chëngbe soldadënga jáyënjanama, chamotsachetama jamëse. <sup>35</sup> Ošbuáchiyana bómnyayeca, básefta shembásënga chëngbe óbana pamíllangbioye cachiñe ainënga tmojtananýe, chënga ainënga chamotsatsmënama Bëngbe Bëtsá tojanma ora.

Ošbuáchiyana bómnyeca, ínÿenga tmojanma básefta ošbuáchiyënga, puerte chamofrima, y jobanámnaca; er chënga más tmojánbošena jashjáchana chë nÿetsca tescama yomna tšabe vida jtsebomnana, y ndoñe nÿe chë jótsbocana batšatema más vida jtsebomnana. <sup>36</sup> Ošbuáchiyana bómnyeca, ínÿenga corente tmojansufri, ínÿenga chëngbioye tmojanoyánguango ora y tmojanatsetšená ora; y ínÿenga tmojansufri y cárceloye cadenëjuangaca utámenënga joquédamnaca. <sup>37</sup> Inÿengbioye ndëtšbéngaca tmojtsanatëchënganja, serruchëshaca tmojtsanëjátcacaye, espadéjaca tmojtsanëbaye. Inÿenga imojánajna cánÿentšana ínÿecnoye nÿe oveshá y chivëbe bobáchea uichëtjonënga, ujabótënga, ainana tsetšanënga, y ínÿengbeyeca mocá borlánënga. <sup>38</sup> Chë nÿe quem luarama enójuabnayënga ndoñe monjanomerecena chënga mëngaftaca jtsiyenama, chënga chë vida imojábomna cánÿentšana ínÿecnoye aniñe, entšanga ndoyena luarënguenache, tjañenache, fshantsiñe atëbëfjniñe y cuevëshënguiñe.

<sup>39</sup> Nÿetsca quem entšanga, ndëmuanÿengbiamu muentše tmonjoyebuambá, Bëngbe Bëtsá tšabá chëngbiamu tojánayana, ošbuáchiyana imojánbomna ca; pero ni canÿa chënguentšá tonjanóyëngacñe, ndayá Bëngbe Bëtsá chëngbe entšanga jatšatayama tojanašebuachenacá, nÿetsca tescama jtsebomnana. <sup>40</sup> Bëngbe Bëtsá, bëngbeñe jtsejuabnayëse, tojanjuabó canÿe más tšabe soye bëngbiamu jamama, chca, Bëngbe Bëtsá canÿe ora jamama, bënga nÿetscanga, chënga y bënga chamotsemnama lempe ntšamo Bëngbe Bëtsá yobošcá, ntšamo Bëngbe Bëtsá tojanašebuachenacá jóyëngacñe.

## 12

### *Bënga mochtsejuabnaye ndayá Jesús tojanmama*

<sup>1</sup> Chíyeca, bënga mochtsejuabnaye ba entšangbiamu, chë bëngbiamu más natsana imojaniyenënga, ndëmuanÿenga puerte tšabá bënga jtsinÿanÿnayana ntšamo ndegombre yomnana Bëngbe Bëtsábeñe ošbuáchiyana jtsebomnana, mo chënga ndayá bënga tmojtsamama cuaftsonÿangcá. Chcasna, mo chë tmochamanëngcá, ínÿengaftaca jenëyëñjanama, chë jashjanguama tojtsemna luaroye natsana jashjanguama, chënga jotjajuamna, chë chorscama nduaserverna entšayá jtsenátsejcana, y lempe ndayá tojt sama más uenana chamotjajuama soyëngnaca jtsenójacana; bëngnaca cachcá, ndoñe matjaleséncia bënga Crístbioye ndoñe tšabá ndëtšoservénama, ni chë bacna soyënga jamama juabnënga, chë bëngbioye paselo jáyëñjanama juabnënga cachcá chamotsamama. Chamna, šontsamna sempre Bëngbe Bëtsá jtseservénana, puerte uantadënga jtsemnëse masque padecena soyënguiñe tmoyena, bënga chamobená chë trabajo jamama, chë ndayama Bëngbe Bëtsá šojáchembo. <sup>2</sup> Jesusbiamu mochtsejuabnaye, nda šuebënatsana bënga ošbuáchiyana chamotsebomnana, y šuinÿanÿná ntšamo nÿets tempo nÿetsca soyënguiñe Bëngbe Bëtsábeñe jtsošbuáchiyama. Cha chë cruzoca jóbanama sufrínana lempe tojanoboyá, er cha yojanobátmana chë chentšana yochtsanbomna bëts oyejuayánama; y yojanjuabná, chë más bacá uamana entšangcá jóbanana, chabiamu ndoñe canÿe uamana soye yonjamna ca; y chentšana chë uamana puestentše tojtanoítbema, Bëngbe Bëtsabe catšbioica, jtsemándayama.

<sup>3</sup> Chíyeca, šmochtsejuabnaye ntšamo Jesús Bëngbe Bëtsábeñe jtsobátmanëse, puerte uantado yojamnama, chë bacna soye amënga corente chabe contra imojtsemna ora. Chca chábeñe šmochtsejuabnaye, tšëngaftanga Crístbiamu oservëniñe ndoñe chacmondëumantšema, ni ainaniñe añemo jtsebomnana ndoñe chašmondájbanama. <sup>4</sup> Tšëngaftanga padecena soyënguiñe šmojachnëngo, entšanga bacna soyënga imojt sama causa, pero mëntscoñama ndoñe cmontsamna jóbanama, Crístbe soyëngama enojuerzániñe; <sup>5</sup> y tcmojtsëbnëtjomba ndayá Bëngbe Bëtsá tšëngaftangbioye, chabe básenga quetsomñecá tcmojábuayenama. Chë Bëngbe Bëtsabe uabemana palabrenguiñe mëntšá endayana:

Atsbe uaquiñá, Bëngbe Utabná aca jábuayenama tojtseboše ora, aca jasúfriase y padecena soyënga jauántase,

chora ndoñe catjátsjuabnaye chiñe mo canye nduámána soye cuaftsemncá; y cha chacmojuácacana ora, ndoñe cattsajbaná ainaniñe añemo jtsebomnana.

<sup>6</sup> Er Bëngbe Utabná jábuayenana nda cha tbobobonshanábioye, y jacastígana chë mo chabe uaquiñacá tbojofjábioye ca –chiñe endayana.

<sup>7</sup> Padecena soyënguiñe chašmojtseufrina ora, šmochtsejuabnaye chë soye yojtsemna tšëngaftangbioye jábuayenama, y chca, Bëngbe Bëtsá tšëngaftangaftaca jtsamana mo chabe básenga quetsomñecá. ¿Nderado nántsemna canye uaquiñá, y chábioye chabe taitá ndocna te buanjuácacana, más tšabá chaotsamama? <sup>8</sup> Nderado Bëngbe Bëtsá tšëngaftanga ndoñe tcmonjabuayená, ntšamo nyetsca chabe básengaftaca cha endbetsamcá, as tšëngaftanga ndoñe ntsemnana ndegombre chabe básenga. <sup>9</sup> Y bënga básenga monjamna ora, bëngbe bëtsétsanga quem luarentše monjanamana bënga jácastigana, y bënga chëngbioye ndoñe stëtsoye ntjaquédana. Y mora, bënga más šontsamna, jtsobedecénana y más bëts respeto jtsebomnana celoca Bëngbe Taitabiana, nda tojama entšanga espíritu chamotsebomnana, y chca, bënga tšabe vida chamotsebomnana. <sup>10</sup> Bëngbe bëtsétsanga quem luarentše, nye básiesta tescama, bënga jëftsabuayiyayana, y chca jamana chënga tšabá tojtsinyana ora; pero Bëngbe Bëtsá bënga šojtsabuayiyiná ora, sempre chca jtsamana bëngbe tšabiana, bënga chabe entšanga jábiamama, cachacá puerte tšábenga, ntšamo cha nyets tempo yomncá. <sup>11</sup> Siempre bënga ndaye castigo tmojtsebomna ora, chora bënga chama ndoñe oyejuayënga ntsemnana, pero aiñe cochtsetšenánënga. Pero bënga chë castigüentsana tmojuatsjinye ndayá Bëngbe Bëtsá chë sóyeca tbojtsabuayiyinacá, as chentsana jóbocnana natjëmbana oyenana, nyetsca soyënguiñe ntšamo tšabá yomncá jtsamëse.

*Bëngbe Bëtsábioye jtsabotena, entšangbiana ndoñe tšabá ntsemnana.*

<sup>12</sup> Mo nda puerte uamëntšnayacá, jatrabájama tondaye añemo ntjtsebomncá, tsátšena buacuatšëngaca y puerte uamëntšena ntsamiasëngaca, tšëngaftangbentše básiestanga ya uamëntšnayënga šmojtsemna Bëngbe Utabnabiana trabájayiñe, y ainaniñe ndoñe añemo šmontsebomna. Cachiñe bëts añemo šmochtishache, y Bëngbe Bëtsabe obenana cachiñe šmochtsatsbomna. <sup>13</sup> Mo chë canye benache tšabá y ndericho chaotsemnana tmojtsamëngcá, chca, chë coshetënga chiñe jama chamotsobenama y más tšabá jtsatanama chamuatatsjinyama, y chë benachentsana ndoñe chamondëtsebocanama; cachcá tšëngaftanga, chë bëtscá ošbuáchiyana y Cristo jaserviama corente añemo šmobomnënga, chë nye batšatema ošbuáchiyana y chca jatrabájama nye tondaye añemo ndbomnënga šmochjújabuache; chë soye šmochjama, ntšamo Cristo tšabá jaserviama yomncá jinyanÿiyëse, y ntjalesenciaca ndocna soye chaotsama chë tšabe benachentsana tšëngaftanga chašmotsojuánañama.

<sup>14</sup> Lempe ntšamo chašmojobenacá šmochjama nyetscángaftaca natjëmbana jtsiyenama, y ntšamo Bëngbe Bëtsabe entšanga mondbetsamcá jtsamëse chašmotsiyenama, cha jtseservënëse; er chca ntjamcá, canya ndoñe ntsoobenana Bëngbe Utabnábioye jinÿyama. <sup>15</sup> Yeuana šmochtsantješna, ndocná Crístbeñe ošbuáchiyana chaondëtsajbanama, y chca, chë Bëngbe Bëtsá chabe entšangbioye yochjatšataye tšabe soyënga chënga ndoñe chamondashjache. Smochtsantješna, tšëngaftanguentše ndocná chaondëtsemna, mo canye untja tbëtëjcá, chë chcaja sayëngbioye jásocayana, nda chaotsama, inÿyenga natjëmbana ainana ndoñe chamondëtsebomnana y bacna soyënga jtsamëse chamotsiyenama. <sup>16</sup> Yeuana šmochtsantješna ndocná tšëngaftanguentše shembása o boyabásiesta bacna soye amá chaondëtsemnana, ni canya ndabiana Bëngbe Bëtsabe soyënga tondaye chaondëtsámána. Esaú chca tojanma, chë lempe yochjanashjachcá, mayor uaquiñá bëtsemnana, chabe uabentsábioye canye šcena sanama tbojtaname

ora. <sup>17</sup> Y tsëngaftanga šmondětatsëmbo, chca tojanopasá chentšana, Esaú tojánbošena chabe taitá Bëngbe Bëtsábioye chaboimpadama, chabiamá tsabe bendicionënga chaomama, chë mayor uaquiñá bëtsemnama yojanobena jtsebomnama soyënga; pero chora chabe taitá ndoñe tbonjanoyeuná, er masque Esaú chora juabna tojantrocá, cha ndoñe tonjanobená ntšamo yojtsopasancá jëtsjandmanana. Masque cha tša tojánbošena, shëchbuíyeca chabe taitábioye jaimpádase, ya ndoñe yontsopodena ntšamo tojanopasacá jëtsjandmanana.

<sup>18</sup> Tsëngaftanga ndoñe chešmatobeconá, mo chë entšanga Israeloca Sinaí ca uabaina tjoye tmojanobeconacá, ndayá chënga imojobena jabojuama, y íñesheca yojtsángbototjuana, tondaye binýniñe luare, tša ibetiñe y puerte jabuache binýiëngaca; <sup>19</sup> ni chešmatuena chëngcá, canýe trompetéfjua uajatëtanana, ni Bëngbe Bëtsabe oyebuambnayana. Chë oyebuambnayana tmojanuenënga, imojtseimpadana ndoñe más chëngbioye chaondëtsóyebuambnama. <sup>20</sup> Chca tmojanma, jauántama ndoñe tmonjanobená causa, ntšamo Bëngbe Bëtsá tojanamëndacá: “Nda quem tjoca chaojoyená, masque canýe bayá chaotsomñe, entsemna chana ndëtsbéngaca chamotsatëchënjanga jtsóbama ca.” <sup>21</sup> Ndegombre, ntšamo tmojaninýcá tša uabouana yojtsemna, cach Moisésnaca mëntšá tojánayana: “Tša šontsengmëmna auatjananá sëntsemna causa ca.”

<sup>22</sup> Pero tsëngaftanga Bëngbe Bëtsábioye šmojobeconá, y chca endmëna mo tsëngaftanga canýe Sión ca uabaina tjoye celoca cuafjobeconacá, chë Bëngbe Bëtsá nýets tempo vida bomnabe bëtš pueblöye, mo celoca Jerusalén cuenta; y ba uaranga angelëngbioye šmojobeconá, cánýiñe oyejuayënga enefjuanënga imojtsemnëngbioye, Bëngbe Bëtsá jt-satschuanayama. <sup>23</sup> Endmëna mo tsëngaftanga chë Bëngbe Bëtsabe entšángbioye cuafjobe-conangcá, chentše enefjuanënga mo Bëngbe Bëtsabe basengcá, chënga ndayá chë Taitá tojašebuachenacá jýyëngacñama, ndëmuanýënga Bëngbe Bëtsá chabe librëšañe tojúbiamá. Tsëngaftanga šmojobeconá Bëngbe Bëtsábioye, ntšamo nýetsca entšanga tmojamcá tsabá o ndoñe tsabá bëtsemnama yochjayanábioye. Endmëna mo tsëngaftanga cuafjobeconacá, chë entšanga mora ya obanënga y ntšamo tsabá yomncá jtsamëse imojëftsiyenëngbe espiritëngbioye, chë entšanga ndëmuanýëngbiama Bëngbe Bëtsá tojanma chamotsem-nama lempe ntšamo chabe entšangbiama yojanjuabnacá, chca, cháftaca sempre vida jëftsebomnama. <sup>24</sup> Tsëngaftanga Jesúsbioye šmojobeconá, chë jóbänëse, entšanga Bëngbe Bëtsáftaca mo canýacá chamotsemnama tojanmá, ntšamo Bëngbe Bëtsabe tsëm trato yojamncá; y endmëna mo chë bëngbiama cha tojanóbana ora tojanábuashana buiñöye tsëngaftanga cuafjobeconacá; chca tojanábuashana, bëngbioye Bëngbe Bëtsabe delante mo tsabengcá jábiamama, mo ntšamo entšángbeñe buiñe jabuéscacjama chë bachnanga imojuamancá. Caín chabe catšata Abélbioye tbojanóba ora, yojamna mo chë Abelbe uabuáshanana buiñe Bëngbe Bëtsábioye cuaftseimpadancá, chë bacna soyama castigo chaotsemnama; pero Jesucristbe buiñe ndoñe chca ntsamana, ndayá chíyeca bënga más tsabe soyënga jashjáchana; Jesusbe buiñeca, bënga montsobena atsebácanënga jtsem-nama.

<sup>25</sup> Cuedado šmochtsebomna, bëngbioye tojtsoyebuambná ora cha joyeunayama. Chë Israeloca entšanga ndoñe tmonjánbošena Bëngbe Bëtsá joyeunayama, chë Sinaí tjoca quem luarentše tojanabuayená ora; chëngbioye cha tojanacastigá. Y mora más, Bëngbe Bëtsá, chë celocana bënga abuayiyayá, ndoñe cachcá ndëcastigánënga quešochátabashejuana, ntšamo cha šojtsëtsëtsnacá ndoñe tmontseyeunanëse. <sup>26</sup> Bëngbe Bëtsá Sinaí tjoca chë entšángbioye tojanoyebuambá ora, chabe oyebuambnayánaca to-janma quem luare chauangmëmanama, pero mora cha chabe uabemana palabrënguiñe tojašebuachená: “Atše cachiñe chanjatsma chauangmëmanama, ndoñe nýe quem luare, sinó celócnaca ca.” <sup>27</sup> Bëngbe Bëtsá “cachiñe ca” tojánayana ora, chë sóyeca yojtsichamo, chë ndayté lempe chaongmëmanama cha cachiñe yochjama ora, chë



quem luarentše tmojama soyënga y chë jatrócama yopodena soyënga yochtsejuána ca, chca, nÿe chë nÿetsca tescama yomna soyënga y ndoñe jatrócama soyënga chaoquedama. <sup>28</sup> Chcasna, Bëngbe Bëtsabe amëndayoca, chë cha yochjama bënga chamuamashënguama luare, yomna cachcá nÿetsca tescama y ndocna te ntjotrócana. Bëngbe Bëtsá chama mochjëtschuaye, y ntšamo cha tšabá tbojtsinÿancá mochtsadorana, chabiamá bëts respeto jtsebomnëse, y nÿetscangbiamá más bëtsá cha yomnama jtsejuabnayëse. <sup>29</sup> Er Bëngbe Bëtsá puerte etonaná chë chabiamá nduauenanënga jabuache echanjácastigaye, y chca, cha jtsemnana mo canÿe íñeshe lempe jtsepochoamcá.

## 13

### *Ntšamo jtsiyenama, Bëngbe Bëtsá oyejuayá bëngaftaca chaotsemnana*

<sup>1</sup> Sempre nÿetscanga šmochtsenbobonshana, Jesucristbeyeca catšátanga quetsomñecá.

<sup>2</sup> Sempre tšabá chë tšëngaftangbe yebnoye inÿe luarëngocana tmojáshjajnënga šmochjúbuaja, er chca jamëse, ntsetatšëmbcá báseftangna angelënga chëngbe yebnentšë tmojanëbuaja.

<sup>3</sup> Chë utámenëngbiamá sempre šmochtsenójuabnaye, mo tšëngaftángnaca chëngaftaca utámenënga cuaftsemncá. Chë inÿënga tmojtsama chamotsesufrinëngbiamá šmochtsenójuabnaye, er tšëngaftángnaca nderado cachcá šmatjatspása.

<sup>4</sup> Boyabása y shembása tbojanobouamá ora, ntšamo tbojanenšbuachenacá nÿetscanga chamotserrespetana; y chë útata chabotsama nÿe ndayá y nÿe ntšamo Bëngbe Bëtsá bouamnátbioye tojanamëndacá, er Bëngbe Bëtsá echanjácastigaye chë shembása o boyabásaftaca bacna soye amënga, y chë shema o boyábioye inÿaftaca ingñayëngnaca.

<sup>5</sup> Ndoñe šmattsiyena jtsejuabnayëse nÿe mallajta crocénana jëftsebomnama. Nÿe chë šmobomna soyëngaca oyejuayënga šmochtsomñe, er Bëngbe Bëtsá tojánayana: “Ndocna te cachcá quebochatonÿaye, ni canÿa quebocháiseboshjona ca.” <sup>6</sup> Y chca, bënga montsobena corente añémoca jayanama:

Bëngbe Utabná endmëna nda atšë šonduájabuachana; tondayama quichátauatja.

¿Ndayá canÿe entšá nanjobenaye átšeftaca jamama ca?

<sup>7</sup> Tšëngaftangbe amëndayëngbiamá, chë Bëngbe Bëtsabe buayenana soyënga tmojábuatambangbiamá, sempre šmochtsenójuabnaye. Sempre šmochtsenójuabnaye chë ntšamo chënga imojaniyentšana tojanóbozna tšabe soyëngama, y šmochtsiyena jtšamëse ntšamo chënga imojanamcá, Jesucristbeñe ošbuáchiyënga bëtsemnana.

<sup>8</sup> Jesucristo cachá nÿets tempo iuétsemna, tempo, mora y nÿetsca tescama.

<sup>9</sup> Ndoñe šmatjaleséncia inÿënga chamotsamama tšëngaftanga chë benachentšana chašmotsojuánañama, ndayá chënga tmojtsabuátambama, y chë Cristo tojánabuátambama contra soyëngaca. Más tšabá endmëna bënga ainaniñe añemo jtsebomnana, Bëngbe Bëtsá tšabe juabna bëngbiamá yobómnayeca, y ndoñe chë sanama, chë ndayá aíñe o ndoñe šontsamna jtšesayana soyëngama mandënga tcojtsamëse. Chca mandënga ndocna te chë Israeloca entšangbiamá tempo tonjanoservé.

<sup>10</sup> Bënga chë Jesucristbeñe mondošbuáchenga, canÿe soye mondbomna mo chë Bëngbe Bëtsábioye jëtschuayama altaroca juinÿëna soycá, bacna soyëngama perdonánënga jtsemnana. Bënga mondbomna chë Jesucristo bëngbiamá tojanma soye, cruzoca tojanóbana ora, bëngbe bacna soyëngama; y chë nÿe tmojóba bayëngaca soyënga tmojtsama bachnanga ndoñe ntsebomnana, chë Cristo tojanóbana ora, ndayá tojanmentšana tojanóbozna tšabe soyënga. <sup>11</sup> Er chë judiëngbe más uámana bachnangbe amëndayá, chë tmojóba bayëngbe buiñe chë “más uámana ca” uabaina luaroye juabuyambana, Bëngbe Bëtsá entšangbe bacna soyëngama cháuaperdonama, y chë bayëngbe cuerpënga jtsejuinÿiyana entšanga tmoyena luarentšana chaboca. <sup>12</sup> Cachcá, Jesúsna tojansufrí y tojanóbana bëts pueblentšana chaboca, chabe buiñe tojanábuashana ora jóbanëse,

entsanga Bëngbe Bëtsábenga chamotsemnana, y chabe delante mo tšabengcá chamotsemnana. <sup>13</sup> Chíyeca bēnga šontsamna Jesúsbioye jobéconana, nda entsanga tmojt-sanaboté y bēts pueblentšana chaboca tojanóbana. Cha mochjuasto, y ntšamo cha tojansufricá bēngnaca mochjasúfria. <sup>14</sup> Er quem luarentše bēnga ndoñe quemátsbomna canye bēts pueblo bēngbiana, nyets tempo chauesomñe bēts pueblo, ndayá bēngna tša mondboše y puerte mondobátmana bēnga joyénanama chē celoca yochtsemna Bëngbe Bëtsabe bēts pueblentše. <sup>15</sup> Chíyeca, šontsamna sempre Bëngbe Bëtsábioye jtsatschuanayana, Jesucristbiajana. Bëngbe Bëtsá chca tmojtsadorana ora, jtsemnana mo chábioye jëtschuayama canye soye cuafjuatsëmboncá. Chcasna, jtsóyebuambnayëse cha mochtsadorana. <sup>16</sup> Sempre ntšamo tšabá yomncá šmochtsama, y chē šmobomncá inyengbiámncacaotsemna. Chca šmochtsama, er chca tcojama ora, Bëngbe Bëtsá oyejuayá jtsejuabnayanana chca chabiana tcojama ca, y jtsinyanana bēnga Bëngbe Bëtsá imojtsatschuanama, ndayá cha tojamama.

<sup>17</sup> Sempre šmochtsama ntšamo chē tšëngaftanga ošbuachiyëngcá enefjuanëngbeñe amëndayënga tmojayancá, y sempre šmochtsiyena jtsamëse nyë ntšamo chënga tmojtsebošcá. Chënga sempre tšëngaftangbioye jtsanyenana, tšëngaftangbe tšabiana, ntšamo cmojánanyenama Bëngbe Bëtsábioye jojuama yojtsamnama chënga jtsetatšëmbëse. Jtsayaunanëse, šmochjama chënga chëngbe trabajo oyejuayánaca y ndoñe ngménaca chamotsamama, er ndoñe chca šmonjamëse, chē trabajo tšëngaftangbe tšabiana ndoñe nántsemna.

<sup>18</sup> Bëngbe Bëtsá bēngbiana šmochtseimpadana, er bēnga ainaniñe corente fsëndëtatšëmbo tšabá tifjamama, y tša fsëntseboše jtsiyenana ntšamo tšabá yomncá lempe jtsamëse. <sup>19</sup> Tšëngaftanga bëtscá cbontsaimpadana, Bëngbe Bëtsá chašmoimpadama, atše chašolesenciana tšëngaftangacacachiñe jtsatsmënama.

### *Bëngbe Bëtsábioye chëngbiana jaimpádama y chënga jacheuayama*

<sup>20</sup> Atše, Bëngbe Bëtsá sëntseimpadana, cha chē nda endbétsama bēnga natjëmbana chamotsiyenama, y nda tojanma Bëngbe Utabná Jesús cháuatayenama, nda bēnga šondányena mo oveshëngbe tšabe abujënyacá; y Bëngbe Bëtsá chca tojanma, Jesús, chabe buiñe juabuáshanëse tojanóbanayeca, chca, entsanga jinýanyiyama ndegombre bëtsemnana ntšamo Bëngbe Bëtsá chabe entsangbiana tojanašebuachenacá nyetsca tescama jamama. <sup>21</sup> Cha sëntseimpadana chaoma tšëngaftanga chašmotsebomnama nyetsca tšabe soyënga ntšamo cmojtsëjbotcá, chca, lempe ntšamo cha yobošcá tšëngaftanga chašmotsamama; y cha Jesucrísoftaca chaboma bëngaftaca ntšamo cha tšabá tbojtsinyancá. ¡Nyetscanga nyetsca tescama Cristo chamotsatschuaná! Chca chaotsemna.

<sup>22</sup> Jesucristbeyeca catsátanga, tšëngaftanga cbontsaimpadana, jábuayenama ntšamo tcbonjauyancá, puerte uantádoca tšabá chašmóyëngacñama, er nyë básefta palabrëngaca chama tcbonjubuábiana. <sup>23</sup> Atše sëntseboše tšëngaftanga chašmotsetátšëmbo, Timoteo Jesucristbeyeca bëngbe catsata, ya ndoñe utamená yontsemnana, y cha betesco átšbioye chaojtabëse, átšeftaca chanjëftsbeťse tšëngaftanga jányama chajjá ora.

<sup>24</sup> Tšëngaftanga ošbuachiyëngbeñe nyetsca amëndayënga šmochjácheuaye, y nyetsca Bëngbe Bëtsabe entsángnaca choca. Chē Italia luaroquënga ošbuáchiyënga tšëngaftanga cmontsacheuaná.

<sup>25</sup> Atše, Bëngbe Bëtsá sëntseimpadana, cha chaoma tšabe bendicionënga tšëngaftangbeñe chaotsemnana.

## Santiago

### *Jacheuayama*

<sup>1</sup> Atše Santiago, Bëngbe Bëtsá y Bëngbe Utabná Jesucristbe canye oservená, tšëngaftanga cbontsëbuabiamná, tšëngaftanga chë bnëtsana uta Israeloca bëts pamíllangbioye nyets luarëjana ujquëshenënga. Atše cbontsacheuaná.

### *Chë Bëngbe Bëtsábiocana osertánana*

<sup>2</sup> Jesucristbeyeca atšbe catsátanga, tšëngaftanga ndaye padecena soyënguiñe chašmojtsiyena ora, chiñe šmochjájuboye mo chca tšëngaftangbe tšabiamna cuaftsemncá y šmochjóyejuaye; <sup>3</sup> er tšëngaftanga šmondëtatšëmbo, chcañe chašmojtsajna ora, šmochtsetátšëmbo cach tšëngaftanga Jesucristbeñe puerte šmošbuaché o ndoñe. Chca ora bëts ošbuáchiyana chašmojtsebomñese, šmochanjobenaye, Bëngbe Bëtsábeñe jtsobátmanëse añémoca jtsemnana, masque padecena soyënguiñe chašmotsomñëse. <sup>4</sup> Pero chca chašmojtsemnëse, šmochtsentšena jashjáchama ntšamo canye entšá Bëngbe Bëtsabe soyëngama corente osertaná yomncá chašmotsemnana, ntšamo Bëngbe Bëtsá yobošcá chašmotsiyenama, chiñe ni mo canye soye jamama chacmondëtsabuashebenëse.

<sup>5</sup> Nderado nda tšëngaftanguentsana ndoñe tontsobena corente osertánana jtsebomnana, cha bontsemna Bëngbe Bëtsá jaimpádana cha chaoma aíñe chana jtsebomnana, y Bëngbe Bëtsá chana bochanjátšetaye; er Bëngbe Bëtsá nyetscanga bëtscá endbëtsatšatnaye y ndocnábioye jatáboyënjana. <sup>6</sup> Pero cha bontsemna, Bëngbe Bëtsábeñe puerte jtsošbuáchiyëse chama cha jaimpádana, y cha nderado ndoñe bochanjóyeunayama ntjatatëmnancá. Nda mëntšá tojtsamëse, inye ora aíñe Bëngbe Bëtsábeñe cuaftsošbuachecá y inye ora ndoñe, cha entsemna mo canye olëshcá, mar béjayoca binýia nye cáatoye jtsambayana. <sup>7</sup> Chca ama entšá ndoñe chaondëtsejuabná, Bëngbe Utabnábentšana ndayánaca jatóyëngacñama. <sup>8</sup> Cha jtsemnana canye entšá, mora canye soye juabnayá, pero chentšana inyetsá jatójuabnañana. Chca, cha jtsiyenana nyetsca soyëngama uta soye jtsejuabnayëse, y chca cha ndoñe ntsoobenana tondaye puerte tšabá jamama.

<sup>9</sup> Chë Jesucristbeñe ošbuachiyá, ndbomñëjema y ndoñe yapa uámana entšá tomná, corente oyejuayá chaotsemna, er Bëngbe Bëtsabe bominyiñe cha canye uámana entšá jtsemnana; <sup>10</sup> y chë bomnánaca puerte oyejuayá chaotsemna, Bëngbe Bëtsá chábioye nduámana entšá chabojábema ora, er mo chë shacuaniñe uantšëfjushacá, cha ndoñe nyets tempo quem luarentše ntjëftsiyenana. <sup>11</sup> Shinye tojábocna y becá tojojënyana ora, chë shácuaana jtsebuashana, chë uantšëfjúsha jtsátsatšana y chabe uabótamanana ya ndoñe más ntsebinýnana. Cachcá chë bomná, echanjóbana nye cachabiamna más becá crocénana onguayíñe chaojtsemna ora.

### *Bacna soye ocochënguentsana tšabá jabocnana*

<sup>12</sup> Oyejuayá chaotsemna chë entšá chë padecena soyënguentsana tšabá tojëtšbocná, cabá Jesucristbeñe ošbuachiyá; chama Bëngbe Bëtsá chabiamna oyejuayá echántsemna y echanjama chë nyetsca tescama yomna tšabe vida cha chaotsebomnana, mo uacananancá chabe ošbuáchiyama. Chë soye Bëngbe Bëtsá tojašebuachená nyetscanga cha imobobonshánëngbioye. <sup>13</sup> Nderado nda bacna soye jamama tbojócochëngo, ndoñe chaondëtsejuabná Bëngbe Bëtsá chca cháftaca yojtsama ca; er Bëngbe Bëtsá ndocna te bacna soye jamama jócochënguana, y cha ndoñe ntsamana ínýenga bacna soye jamama chaócochënguana. <sup>14</sup> Inyetsá endmëna, canya bacna soye jamama jócochënguana, bacna juabnënga tojtsebomna ora; cha chiñe nye jësejuabnayana y chë soye jtsasjayana cha chca jamama. <sup>15</sup> Nda yapa bacna soyënga tojtseboše, cabana cha pronto chë bacna soye

jamana; y nda sempre bacna soyënga tojtsama, chama Bëngbe Bëtsá nyetsca tescama bochanjacastíga.

<sup>16</sup> Atšbe bonshana catšátanga, ndoñe matenoíngña, jtsejuabnayëse Bëngbe Bëtsá yojtsama tsëngaftanga bacna soyënga chašmotsamama ca. <sup>17</sup> Nyetsca tsabe soyënga y chë puerte tsabe soyënga tsbanánocana endobá, Bëngbe Bëtsá chë Taitábiocana. Y cha chë shinÿe, juashcona, y nyetsca chë celoca yobuashinÿinÿana soyënga tojamá, nyets tempo nÿe cachá iuesomñe y ndoñe inÿa ntjátsmënana. <sup>18</sup> Cachá jamama tojánbošenayeca, bënga chábenga šojánabiama, bënga chabe ndegombre palabrenga jouenëse. Cha chca tojama, lempe ntšamo Bëngbe Bëtsá quem luarentše tojamentšana, bënga chë natsanënga chábenga chamotsemnana.

### *Ntšamo ndegombre yomna Bëngbe Bëtsábioye tsabá jadórama*

<sup>19</sup> Atšbe bonshana catšátanga, quem soyama šmochtsenójuabnaye: nyetsca tsëngaftanga cmontsamna sempre jtseprontánana jouenama; pero jóyebuambayamna jobátmana y ínÿengaftaca jetnámnaca. <sup>20</sup> Inÿaftaca tbojetna ora, canÿe entšá ndoñe ntšamana ntšamo Bëngbe Bëtsá yobošcá, chë nyetsca soyënguiñe tsabá jtsamana. <sup>21</sup> Chcasna, šmochtsajbaná bacna soyënga jtsamëse oyenana, y amana nyetsca soyënga ndoñe ntšamo Bëngbe Bëtsá yomandacá; y chë Bëngbe Bëtsá tojama tsëngaftangbe ainaniñe chaómashënguama buayenánana, ntjatosoberbnaycá šmochjójyëngacñe. Chë buayenánana chašmojóyeunase, echanjopódia tsëngaftanga atsebácanënga jtsemnana.

<sup>22</sup> Ndoñe quecmátamna nÿe chë Bëngbe Bëtsabe buayenánana jouenana, ndayá ntšamo cha tojayancá aiñe jtsamana; ndoñe chca šmontsamëse, cach tsëngaftanga šmontsenoíngña. <sup>23</sup> Nda nÿe chë buayenánana tojouena, pero betesco tbojtsebnatjëmbe y ndoñe tontsama ntšamo chiñe tojtsayancá, cha jtsemnana mo canÿe entšá chabe jubiá espejuiñe tojtsenonÿacá: <sup>24</sup> chana cachá jtsenónÿayana, pero chë espejo tojabuertaná ora, jtsebnatjëmbana ntšamo cha bëtsemnana. <sup>25</sup> Pero nda ntšamo tojouencá ndoñe tbonjebnatjëmbe, y sempre tojtsejuabná chë entšanga jätsebacama Bëngbe Bëtsabe puerte tsabe mando chabosertama, y tojtsiyena ntšamo chë mandënguentše endayancá, lempe ntšamo chë entšá chaojtsamiñe oyejuayá Bëngbe Bëtsá bochanjábema.

<sup>26</sup> Nderado nda tojtsejuabná Bëngbe Bëtsábioye ibojtsadorana ca y chë Bëngbe Bëtsábioye adorayá ntšamo ibomncá cha yojtsama ca, pero ndoñe tontsobena bacna soye oyebuambnayana jtsajbanana, cachá yojtsenoíngña, y nyetsca soyënga ntšamo tojtsamcá Bëngbe Bëtsá jadórama, chabiamana tondaye ntsámanana. <sup>27</sup> Bëngbe Bëtsá chë Taitabe bominÿiñe, chë puerte tsabe y ndegombre soyënga, ndayá entšá ibojtsemna jamana endmëna: chë uajchonga y viudanga corente ngmënënga tmojtsemna ora jujabuáchana, y ndoñe bacna soyënga játamana, mo chë nÿe quem luarama enójuabnayënga mondbet-samcá.

## 2

### *Nÿetscanga tsabá jtsatenonÿayëngana*

<sup>1</sup> Tsëngaftanga, Jesucristbeyeca atšbe catšátanga, šmondošbuaché Bëngbe Utabná Jesucristo, chë puerte bëtsá y uamanábeñe; chíyeca tsëngaftanga cmontsamna nyetsca entšanga cachcá jtsatenonÿayëngana. <sup>2-3</sup> Nderado tsëngaftanga cánÿentše šmojënefjna, y chora canÿe bomna entšá tojášhango castellano ntšabuchëtjonëfjangaca y uámana entšayëjuangaca bopormaná, cha botamana šmojúmashëngo y mëntšá šmojayuana: “Moca quëfseroca mabesótbema ca”. Pero cachca ora, canÿe ndbomnëjema tojášhango uandocuenta entšayá uichëtjoná, y cha šmojayuana: “Acna choca tsanana cochtsemna o chafjoca mótbema ca”. <sup>4</sup> Chca tsëngaftanga ya šmontsama cach tsëngaftanguentše báseftanga más uámanënga ínÿengbiama chamotsemnana, y chca šmojtsama, ana bacna juabnënga šmojtsebmna causa.



<sup>5</sup> Atšbe bonshana catsátanga, quem soye šmochjouena: Bëngbe Bëtsá quem luarentše ndbomnënga imomnënga tojabacacá, chënga canye puerte uámana soye chamotsebomnama, Jesucristbeñe puerte chamotsošbuáchema; y mo otocana soyca Bëngbe Bëtsabe amëndayama chamosháchiñama. Cha imobobonshánëngbioye chë soye jatsatayama tojašebuachená; <sup>6</sup> pero tsëngaftanga chë cuenta, mo ndoñe cach tsëngaftangcá entšanga bendmëncá chëngbioye jtsënyayana. Ndegombre, chë bomnënga mondmëna chë nye sempre cmondbëtsamëndayënga y chë sjojónana chë pueblentsa mandadëngbioye cmondbáunatsënga. <sup>7</sup> Y cach bomnëngnaca mondmëna chë Cristbiana podescas oye-buambnayënga, ndábenga tsëngaftanga šmondmëna, y chabe uabaina tsëngaftangbiana puerte enduámána.

<sup>8</sup> Bëngbe Bëtsabe uabemana palabrenguiñe mëntsá endayana: “Ndëmua entšánaca cochtsebomshana ntšamo cach aca cuenobobonshancá ca.” Tsëngaftanga ntšamo chë Bëngbe Utabnabe mandiñe endayancá ndegombre šmojtsamëse, tsabá šmochántsama. <sup>9</sup> Pero tsëngaftanga ndoñe cachcá šmontsenonýase, chcana bacna soye jtsamana y šmojama ntšamo Bëngbe Bëtsabe leyënguiñe ndoñe yondëlesenciancá. <sup>10</sup> Y mora, canye entšá nyetsca chë leyentsa mandënga tojtsobedecena, pero ndoñe tontsama ntšamo nye mo canye mando ntšamo iuayancá, cha Bëngbe Bëtsabiana jtsemnana canya ntšamo nyetsca chë leyentsa mandënguiñe ndoñe yondëlesenciancá amá. <sup>11</sup> Cach Bëngbe Bëtsá, chë “acbe shema o boyábioye ínÿaftaca ndoñe cattseíngñaye ca” tojanayaná, cachá mëntsánaca tojánayana, “ínÿabioye ndoñe catjóba ca”. Chca, nda cachabe shëmbioye ínÿaftaca ndoñe tbonjaingñé, pero aíñe ínÿabioye tbojóba, chca, Bëngbe Bëtsabiana cha jtsemnana canya nyetsca chë leyentsa mandënga ndocumpliná.

<sup>12</sup> Tsëngaftanga cmontsamna jtsóyebuambnayana y jtsamana ndayá Cristo šojanamëndacá, atsebacana entšangcá, er Bëngbe Bëtsá echanjayana ntšamo tmojamcá aíñe o ndoñe tsabá bëtsemnana. <sup>13</sup> Er chë ínÿengbiana ndoñe ngmënanana bomnëngbiana, Bëngbe Bëtsá ntjongmiacá echanjayana ntšamo tmojamcá aíñe o ndoñe tsabá bëtsemnana; pero chë ínÿengbiana aíñe ngmënanana bomnëngbiana, ntšamo tmojamcá aíñe o ndoñe tsabá bëtsemnana Bëngbe Bëtsá chaojayana ora, chënga tsabá chentsana mochanjábocana.

### *Chë ndegombre ošbuáchiyana, soyëngaca jinÿanÿiyana*

<sup>14</sup> Atšbe catsátanga, ¿ndayama cánÿabioye buanjóservia jayanana aíñe Jesucristbeñe sëntsošbuaché ca, pero cha ínÿengbiana tsabe soyënga ndoñe tontsama, y chca, ntšamo cha tojtsamcá ndoñe tontsinÿanÿná cha Jesucristbeñe yošbuáchema? Ndegombre, cha nye chca tojtsichámëse, ndoñe ntšopodénana cha atsbocaná chaotsemnana. <sup>15</sup> Nderado canye boyabása o shembása ošbuachiyá entsayá tbojtsabuáshbena y saná chë te jasámnaca tbojtsebuáshbena, <sup>16</sup> y canya tsëngaftanguentsá tbojauyana: “Diošoftá, sësnama ndoñe chacondëtsepapedecena y becá chacuatoshachá ca”, pero chca chaotsemnana chábioye tondaye tbonjatsetase, ¿ndayama nantsoservena chca jayanana? <sup>17</sup> Cachcá, nda tojayana Jesucristbeñe yošbuaché ca, pero ndocna tsabe soyënga tontsama, chë ošbuáchiyana bomnama jinÿanÿiyama, nye chca ošbuáchiyana jtsebomnana tondayama ntšoservënanana.

<sup>18</sup> Pero nderado ndánaca mëntsá echanjayana: “Aca Jesucristbeñe icošbuaché, pero atšna ínÿengbiana tsabe soyënga sëntsama ca.” Chora atše stjojuá: “Sminÿinÿé ntšamo canya nantsobena Jesucristbeñe jtsošbuáchiyana, chca chaotsinÿnama tondaye ntsamcá, y chora, ndayá tijamama atšbe ošbuáchiyana cbochjinÿinÿiye ca.” <sup>19</sup> Aca condošbuaché nye canye Bëngbe Bëtsá yomnama y chca tsabá contsama; pero chë bacna bayëjëngnaca chiñe jtsošbuáchiyana, y chë causa chënga uatjana jtsebomnana y jtsangmëmnyana. <sup>20</sup> Ndoñe obëjema cattsemna; ndegombre cbochanjinÿinÿiye nderado nda Jesucristbeñe tojtsosbuaché, pero tondaye tontsama chca chaotsinÿnama, chabe ošbuáchiyana tondayama ntšoservënanana. <sup>21</sup> Bëngbe Bëtsá tojánayana chabe bominÿiñe

Abraham, bēngbe tempsca bēts taitá, tšabia yojamna ca; chca tojánayana, er Bēngbe Bētsá tbojanmandá ora, yojtseprontana chabe uaquiñá altariñe jóbama, cach Bēngbe Bētsábioye jētschuayama. <sup>22</sup> Aca contsobena Abrahámbeñe jinýama, cha Bēngbe Bētsábeñe yojanošbuáchema, y soyēnga yojánama chca chaotsinýnama; y ndayá cha tojanmama entsinýinýena, cha ndegombre puerte bētsá yojanošbuáchema. <sup>23</sup> Chca tojanopasá ntšamo Bēngbe Bētsabe uabemana palabrenguiñe endayancá, mēntšá: “Abraham Bēngbe Bētsábeñe yojtsošbuáchiye, y chama Bēngbe Bētsá tojánayana chabe bominiñe cha tšabia yojamna ca.” Y Abraham entsanabaina Bēngbe Bētsabe amigo ca.

<sup>24</sup> Y tšēngaftanga šmontsetátšēmo, Bēngbe Bētsá ináyana canýe entšá chabe bominiñe tšabia yomna ca, chē entšá ndayá tojtsamama, chabe ošbuáchiyana chaotsinýnama, y ndoñe nýe ošbuáchiyana tojtsebomnama. <sup>25</sup> Cachcá tojanopasá Rahab, chē bacna vida bomna shembásaftaca; Bēngbe Bētsá tojánayana chabe bominiñe cha tšabia yojamna ca, er cha canýe tšabe soye tojanma. Cha chē noticia uambaye judiēnga posada tojanéyentsame, y chentšana tojanējabuache inýe benachējana chamuáisebocanama, chē pueblentša soldadēngbiama chamotsachetama. <sup>26</sup> Lempe básefta palabrenguiñe jayanamna mēntšá entsemna: ntšamo canýe cuerpo, espíritu ndbomna cuerpo, pronto jóbana, cachcá chē ošbuáchiyana, ndocna soyēngaca tontsemna, chca chaotsinýnama, tondayama ntsoservénana.

### 3

#### *Bichtájaca tšabá jóyebuambayama endmēna*

<sup>1</sup> Jesucristbeyeca atšbe catšátanga, ndoñe yapa buátēmbayēnga tšēngaftangbeñe chamondētsemna; er tšēngaftanga ya šmondētatsēmo, bēnga, chē entšanga abuatāmbayēngbiama, chē castigo más bētsá yochtsemnama, Bēngbe Bētsá ndoñe tmonjóyeunase, ntšamo entšanga tmojamama aíñe o ndoñe tšabá bētsemnama cha chaojayana ora. <sup>2</sup> Bēnga nýetscanga nýetsca bacna soyēnga mondbétsama. Nderado nda oyebuambnanyiñe ni mo canýe bacna soye tonjama, chē entšá puerte tšabia jtsemnana, ntšamo Bēngbe Bētsá yobošcá jtsiyenēse, y cha yojtsobena cachá sempre jtsemándayama.

<sup>3</sup> Chē couayēngbioye freno tmojuayashbé ora, ntšamo bēnga tmojtsebošcá chēnga mochántsama, y bēnga cachora jtsoebenana ntšamo nýets chēngbe cuérpoca tmojtsamcá jtsemándayana, y ndoñe nýe chēngbe bestšaše. <sup>4</sup> Barquēshamnaca smochjenójuaboye. Masque tša bētsētsacuemēngá y tša jabuache binýiēnga chē barco jtsējuatsēntšayana, chē uamanéjayēnga chē barco juyambana ndayējana tmojtsebošcá, y chca, nýe canýe base soyetémaca, timón ca uabainétémaca. <sup>5</sup> Cachcá, chē bichtaja cuerpiñe canýe base soyetema endmēna, pero chē bichtájaca entšanga jtšenábotamnayana bēts soyēnga tmojamama. Smochjouena, canýe base íñeshe jtsoebenana canýe bēts tjañe juangbotjuama. <sup>6</sup> Y chē bichtaja endmēna mo canýe íñeshcá, mo canýe luare ndayentše puerte bacna soyēnga tobinýncá. Chē bichtaja jtsoebenana bēngbe cuerpentše puerte bacna soyēnga bēngbiama jamama. Mo canýe íñeshe becá tojtsendbiamnacá, chē bichtájaca tcojtsichamo ndoñe tšabe soye, jtsoebenana bacna soyēnga bēngbiama jamama nýets tempo quem luarentše tmuetšiyenēntscuana; y mo nda ndayá tojtsangbotjuacá, Satanás jtsoebenana chē bichtaja jtsemándayana, bacna soyēnga chaotsamama.

<sup>7</sup> Entšá endobena jtsemándayana nýetsca tjoica bayēnga, shloftšēnga, osjojnayēnga y buyeshiñe oyena bayēnga; y ndegombre mora entsamēnda; <sup>8</sup> pero ndocná tonjobená chē bichtaja jtsemándayana, chca, bacna soyēnga amana chaotsajbanama. Chē bichtaja jtsamana bētsá bacna soyēnga cada te chauétsebinýnama, y mo canýe mētšcuaycá veneno jtsebomnana jóbama, chē bichtájaca cachcá endmēna. <sup>9</sup> Bichtájaca bēnga puerte tšabá Bēngbe Bētsá y Taitabiama jtsichámuana, y cach bichtájaca bēnga puerte bacá entšangbiama mondbétsichamo, masque Bēngbe Bētsá cachacá enoparecēngna

chënga tojábiana. <sup>10</sup> Cach uayásentsana jtsóbocanana Bëngbe Bëtsabiana tšabe palabrënga y entsangbiana bacna palabrënga. Jesucristbeyeca atšbe catsátanga, chca ndoñe chaondëtsemna. <sup>11</sup> Canye bėjaye obocanentsana ndoñe ntsopodénana tšabe búyeshe chaóbocnama y cachentsana untja búyeshnaca. <sup>12</sup> Ntšamo canye higo betiyentsana ndoñe ntsopodénana olivosësënga jashacama, y canye uvas betiyentsana ndoñe ntsopodénana higuëbenga jashacama, cachcá, atšbe catsátanga, tamona búyeshentsana ndoñe ntsopodénana tšabe búyeshe chaóbocnama.

### *Bëngbe Bëtsábiocana óbocana osertánana*

<sup>13</sup> Nderado tšëngaftanguentše tojtsemna canye puerte tatšëmbuá y osertaná, cha bontsemna, chca yomnama entsanga jinyanñiyana, tšabe soyënga amana jtsiyenëse y chë ntjatosoberbnaycá tojama soyëngaca; y cha chca jamana, puerte osertaná bëtsemnama. <sup>14</sup> Pero tšëngaftangbe ainaniñe yapa ínñabiye šmojtšántšaboše y nñe ínñenga chamotjáyana soyënga šmojtšama, as ndoñe šmattsenábotamnaye osertánënga y tšábënga šmomnama, er ndegombre Bëngbe Bëtsabe osertánana tšëngaftanga ndoñe šmontsebmna. <sup>15</sup> Er chca osertánana, Bëngbe Bëtsábiocana ndoñe ntsóbocanana, ndayá nñe quem luarama enójuabnayëngbentsana, nñe entsangbe juabnentsana, y canye bacna bayëjbentsana. <sup>16</sup> Ndayentše entsanga yapa tmojtšenantšaboše, y nñe ínñenga chamotjáyana soyënga tmojtšama, chentše tondayama quemochátenëyeunana y nñetsca bacna soyënga mochántšama.

<sup>17</sup> Pero chë Bëngbe Bëtsábiocana óbocana osertánana bomnënga, nñetsca soyamna, natsana puerte tšabe vídaca jtsiyenana, bacna soyëngaca ndëmandánënga; y chënga jtsemnana chë ínñenga ndoñe chamondëtsejtsjanama amënga, tšábënga y sempre jtseprontánana ínñenga joyaunayama. Y cach quemënga jtsemnana ínñengbiana ngménana bomnënga, siempre tšabe soyënga jtsamana, cachcá nñetsca entsangbiye jtsëñyayana, y ntšamo ndegombre tojtsemncá jtsichámuana y jtsamana. <sup>18</sup> Ntšamo canye jená, botamana shajuana jtsebmnama tšabe jénaye jájena, cachcá, siempre natjëmbana jtsiyenama bošëngna, natjëmbana ínñëngaftaca jtsiyenana, chca, nñetsca entsanga chamotsamama ntšamo Bëngbe Bëtsabe bominiñe tšabá yomncá.

## 4

### *Smochtsiyena Bëngbe Bëtsá tšëngaftangbeñe jtsemándayëse*

<sup>1</sup> ¿Ndayentsana chë tšëngaftanga jtsentsjanayama y jtsepenzentsiyama yóbocana? Endóbocana chë tšëngaftangbe bacna juabnënguentsana, nñe cach tšëngaftanga tšabá jt-somñama; y chë soyënga tšëngaftangbe ainaniñe siempre chë tšabe juabnëngama contra jësemnana. <sup>2</sup> Tšëngaftanga ndayánaca jtsebmnama šmojtseboše, pero chca jtsebmnama ndoñe šmontsobena, as jtseprontánana ínñengbiye jtsëbáyama. Inya ntšamo tobomncá tšëngaftanga tša jtsántšabošana, y chë soye jashjáchama ndoñe šmontsobena ora, ínñëngaftaca jentjáyana y jtsepenzentsiyana. Ntšamo šmojtsebošcá ndoñe ntjobenayana jtsebmnama, Bëngbe Bëtsá chama ndoñe šmondbotjañe causa; <sup>3</sup> y chë soye šmojtjañe ora, tšëngaftanga ndoñe ntjójyëngacñana, ndoñe botamana chë soye šmondbotjañe causa, er tšëngaftanga chë soye jtsebošana nñe chaoservema oyejuayënga bacna soyënguiñe jtsomñama.

<sup>4</sup> ¡Tšëngaftanga, Bëngbe Bëtsá bobonshánana šmojtšajbananga! ¿Ndoñe šmondëtatšëmo, chë jtsebošana nñe quem luarama enójuabnayëngbe amigo jtsemnama y nñe quem luarentša soyënga jtsebmnama, chca, canye entsá Bëngbe Bëtsabe uayayá jtsemnana? Ndánaca tojajuabó nñe quem luarama enójuabnayëngbe amigo jtsemnama, chca, canye Bëngbe Bëtsábiye uayayá jóbemana. <sup>5</sup> Ndoñe nñe bonamente Bëngbe Bëtsabe uabemana palabrënguiñe mëntsá endayana: “Chë Bëngbe Bëtsá tbojanichmó bëngbe ainaniñe chaotsiyenama Uámana Espiritu, puerte entseboše nñe Bëngbe Bëtsá

canÿa bēngbe amēndayá chaotsemnama ca.” <sup>6</sup> Pero Bēngbe Bētsá, bēngbe tšabiamna jtsejuabnayēse bēnga jtsējabuáchanana, chíyeca Bēngbe Bētsabe uabemana palabrēnguiñe mēntšá endayana:

Bēngbe Bētsá chē nÿe cachēnga uámanēnga tmojtsenobiamnangbe contra entsemna, y chē ndoñe uámanēnga montsenobiamnangbiamna, Bēngbe Bētsá más tšabe juabna entsebomna ca.

<sup>7</sup> Asna, tšēngaftanga šmochtseprontana nÿe Bēngbe Bētsá chacmotsamēndama; ntšamo Satanás tcmojtsamēndacá ndoñe šmattsama, y cha cachora tšēngaftangbentšana echantsachá. <sup>8</sup> Bēngbe Bētsábioye šmochtobeconá, y cha echanjama tšēngaftanga ntšamo cha yomnama chacmotsēsertánama. Tšēngaftanga bacna soye amēnga, cach tšēngaftangbe cucuatsēngaca tšabe soyēnga šmochtsama, bacna soyēnga ndoñe. Tšēngaftanga chē inÿe ora jtsejuabnayana Bēngbe Bētsá jtsebobonshánama, y inÿe orna, nÿe quem luarentša soyēnga jtsebomnama, šmochtsajbaná bacna soyēnga jamama bošana, chca, nÿe tšabe juabnēnga tšēngaftangbe ainaniñe chašmotsebomnama. <sup>9</sup> Tšēngaftangbe bacna soyēngama ngmēnaca šmochtsemna, šmochjenóbošachna y cochtsetšenánēnga šmochjóyebuambaye. Jatenbiajuayamna, šmochjenóbošachna; y joyejuayēngamna, ngmēnaca šmochtsemna. <sup>10</sup> Bēngbe Bētsabe delante bētsētsanga ndoñe šmattsenobiamnaye, y cha más uámanēnga cmochanjábiamna.

### *Inÿengbiamna ndoñe ntsichámuana ndoñe tšabá tmonjama ca*

<sup>11</sup> Jesucristbeyeca catšátanga, ínÿengbiamna bacna soyēnga ndoñe šmattsóyebuambnaye. Nda cachabe catšatbiamna bacna soye tojtsichamo o tojayana ntšamo cha tojamcá ndoñe tšabá yontsemna ca, cha chora chē leyentša mandēnga ndoñe ntsocumplínana y jtsichámuana chē leyentša mandēnga tondayama yontsoservena ca. Y chē leyama chca tcojtsichámēse, cach ley jocúmplia cuenta, contsobiamná canÿe ichamuá chē ley aínne o ndoñe yondoservénama, y chca ndoñe quecmátsmēna jtsamana. <sup>12</sup> Chē ley tojuapormá cha nÿe canÿa endmēna, Bēngbe Bētsá, y cachá endmēna ntšamo entšanga tmojamcá aínne o ndoñe tšabá bētsemnama ichamuá, y cachánaca entsobena entšanga játsebacama o nÿetsca tescama jácastigama. Y acna, ¿ndase cmēna ndēmua entšabiámna jobenayama jatichámuama ntšamo tojamcá aínne o ndoñe tšabá bētsemnama?

### *Ndayá yēfse yochjatēchnēnguama ndoñe ntsótatšēmbuana*

<sup>13</sup> Y mora quem soye šmochjouena, tšēngaftanga chē šmondbétsichamo: “Mēnté o yēfse quemoye o chē inÿe bēts puebloye fchanjanga, y chentše canÿe uata fchanjēftsemna ba soyēnguiñe trabájayiñe, y ndegombre becá fchanjónÿena ca.” <sup>14</sup> ¡Pero ni mo ndayá yēfse tšēngaftangaftaca yochjochnēnguama ndoñe quešmátstatšēmbó! Tšēngaftanga ndoñe quešmátstatšēmbó ndayēntscuana vida šmochjēftsebomna, y chca, tšēngaftanga šmondmēna mo canÿe jantsetēshcá, chēshe mora jónÿnana y nÿe ndeolpe jatenatjēmbana. Tšēngaftangaftaca cachcá echanjopása. <sup>15</sup> Tšēngaftanga mēntšá cmontsamna jayanama: “Bēngbe Bētsá quešojalesenciase, ainēnga fchántsemna y quem soye o chē soye fchanjama ca.” <sup>16</sup> Pero chē cuenta, tšēngaftanga bēts soyēnga šmochjamama sempre jt-senábotamnayana, ndayá tšēngaftanga chašmomama Bēngbe Bētsá yochjalesenciaca ntsetatšēmbcá; y chca jtsamana ndoñe tšabá quenátsmēna. <sup>17</sup> Nda tojtsobena ntšamo tšabá yomncá jamama, pero ndoñe chca tonjama, cha canÿe bacna soye jtsamana.

## 5

### *Chē bomnēnga jábuayenama*

<sup>1</sup> ¡Quem soye šmochjouena, tšēngaftanga chē bomnēnga! ¡Chē tšēngaftanga šmochtsesufrínama šmochjenóbošachna y uatjananēnga šmochtseyoye! <sup>2</sup> Tšēngaftangbe bomnana buajónana janguánana entsemna, tondayama quenátoserverna, y chē entšayējuangá mejējonga montsasá. <sup>3</sup> Tšēngaftangbe castellano y midio



tojtseñgúsheshe; y chë ngúsheshna echántsinÿinÿnaye tšëngaftanga chë crocenánaca ndoñe šmonjanmama ntšamo ínÿenga jujabuáchama yojamncá; chë causa, nÿetsca tescama cmochántsapochocaye, ntšamo chë íñeshe canÿe soye endbetsepochoacá. Tšëngaftanga quem tempo bomnana šmojtsejuabá, y mora quem luare jopochócama ya entsobeco. <sup>4</sup> Tšëngaftanga chë tšëngaftangbe fshantsënguiñe tmojëftsetrabajanga ndoñe šmontanëbuénaye, y mora šmochjouena, chënga chama cmontsachembuanama. Bëngbe Utabná nÿets obenana bomná, chë trabajayëngbe chembuanana ya tojouena. <sup>5</sup> Quem luarentše tšëngaftanga šmondoyena ba botamana soyëngaca y nÿe ntšamo cach tšëngaftanga šmobošcá jtsamëse. Ntšamo canÿe uacná jóbana, minÿicá tojtsemna ora, cachcá tšëngaftangbiamama entsobeco chë te, ndaye ora Bëngbe Bëtsá echanjama castigánënga chašmotsemnana, er puerte bacna soyënga šmojama. ¡Chë castigo jtsebínÿnana tempo ya entsobeco! <sup>6</sup> Tšëngaftanga, chë puerte tšabá amëngbiamama šmojayana jóbana yojtsamna ca y šmojtšëbaye, chca ndoñe chaondëtsemnana chënga ndocá jamama ntšobencá.

### *Chë uantado jtsemnana y chë Bëngbe Bëtsáftaca jencuéntama ora*

<sup>7</sup> Pero tšëngaftanga, catšátanga, uantádoca šmochjobátma Bëngbe Utabná yochjésabo orscama. Chë jajañe trabajayá tojtsobátmana bëtscá tšabe shajuanënga jobuátbanama, jtsoócánana natsana uantádoca jobátmana chë jajañama uaftena tempo chaóshjanguama. <sup>8</sup> Tšëngaftangnaca uantadënga šmochtsemna, y tšëngaftangbe ainaniñe añemo chaotsemna, er Bëngbe Utabná mëntescana ndoñe bën y moye echanjésabo.

<sup>9</sup> Jesucristbeyeca catšátanga, ntšamo ínÿenga tmojtsamama ndoñe nÿe šmattsoquejana, Bëngbe Bëtsá tšëngaftangbiamama ndoñe chaodayanama, ntšamo šmojóyebuambama ndoñe tšabá šmonjama ca. Y nda yochjayana ntšamo entšanga tmojamcá aíñe o ndoñe tšabá bëtsemnana, ya entsebeconá. <sup>10</sup> Atšbe catšátanga, chë tempsquënga Bëngbe Bëtsabe juabna oyebuambnaye, ndëmuanÿenga entšanga tmonjanabuayená Bëngbe Utabná jótšëmbonëse, chënga bëngbioye šonjëftsantinÿanÿiye ntšamo tmojansufrima, ntšamo šojtsamna uantadënga jtsemnana tmojtseufrina ora; y chca tšëngaftanga cmontsamna jtsamana. <sup>11</sup> Bënga chëngbiamama fsëndbëtsejuabnaye oyejuayënga imojamna ca, chë tmojansufrí ora Bëngbe Bëtsábeñe imojanobátmana ainaniñe añemo jtsebomnëse. Tšëngaftanga šmojouena ntšamo Job ainaniñe añémoca Bëngbe Bëtsábeñe yojanobátmana, puerte padecena soyënguiñe yojasufrina ora; y šmondëtatsëmbo ntšamo Bëngbe Bëtsá cabana chábioye tbojancuedama, y chca yojamna Bëngbe Utabná entšangbiamama puerte ngmená yómnyeca.

<sup>12</sup> Pero masna, atšbe catšátanga, ndayá jamama chašmojašbuachená ora, chca ndoñe šmatjama jajúrase ni celocama, ni quem luarama, ni ndocna inÿe soyama. Tšëngaftanga aíñe ca jayanama šmojtsebošëse, nÿe aíñe ca šmochjayana, y ndoñe casna nÿe ndoñe; chca, Bëngbe Bëtsá ndoñe chaodayana ndoñe tšabá šmonjama ca júraye causa.

<sup>13</sup> Nderado nda tšëngaftanguentšá puerte ngménaca tojtsemna, cha bontsemna Bëngbe Bëtsá chama jaimpádama. Y nderado nda oyejuayá tojtsemna, cha bontsemna jacántana Bëngbe Bëtsá jëtshuayama. <sup>14</sup> Nderado nda šocá tojtsemna, cha bontsemna chentša ošbuachiyëngcá enefjuanëngbeñe bëtšëjemëngcá amëndayënga jáchembuana, chënga Bëngbe Bëtsá chabiamama chamoiimpadama, y Bëngbe Utabná jótšëmbonëse aceitiye chamuanëtjuama. <sup>15</sup> Y tšëngaftanga, puerte jtsošbuachiyëse Bëngbe Bëtsá chašmojaimpadá ora, chë šocá salud echántinÿena, y Bëngbe Utabná echanjama cha tšabá cachiñe chaot-satsmënama; y nderado cha bacna soyënga tojamëse, Bëngbe Bëtsá bochantseperdóna. <sup>16</sup> Chíyecna, chë bacna soyënga šmojtsamama šmochjobuambaye, y Bëngbe Bëtsá nÿetscangbiamama šmochtseimpadana, chca, tšabá mo shnanëngcá chašmotsemnana. Canÿa ndabiamama Bëngbe Bëtsá tojayana chabe bominÿiñe tšabia yomna ca, cháftaca tbojencuentá ora, chánaca ba tšabe soyënga jójëngacñana, y jobenayana bëtš soyënga

jamama. <sup>17</sup> Bëngbe Bëtsabe juabna oyebuambnayá Elías, mo cach bëngcá canye entśá in-amna, y puerte jtsošbuáchiyëse ndoñe chaonduaftema Bëngbe Bëtsábioye tbojanimpadá ora, quem luariñe mo unga uata y tséntsañe ndoñe tonjanafté. <sup>18</sup> Chentsana, Bëngbe Bëtsábioye cachiñe tbojtanimpadá ora, quem luariñe tojanafté y cachiñe chë jajañenache bëtscá saná yojtsatsbinýna.

<sup>19</sup> Atšbe catśátanga, nderado nda tšëngaftanguentśá tojtsajbaná chë ndegombre soyënga jtsamana, pero inýa chábioye tbojuájabuache cachiñe chë tšabe benache cháuatishachama, <sup>20</sup> tšëngaftanga šmochtsetátšëmbo, ndánaca chë bacna soye amábioye tbojuájabuache chabe ndoñe tšabe videntšana cháuissebocnama, cha chë nýetsca tescama castigüentšana chábioye jatsbocana, y jamana ba bacna soyëngama cha perdonaná chaotsemnana.

# 1 San Pedro

## *Jacheuayama*

<sup>1</sup> Atše Pedro, Jesucristbe ichmoná, quem tsbuanácha sentsabiamná chë cachëngbe luarentše ndoñe mondoyenëngbiamá, chë Ponto, Galacia, Capadocia, Asia y Bitinia luarënguenache ujquëshenënga imoyenëngbiamá. <sup>2</sup> Sentsabiamná chë Bëngbe Bëtsá Bëngbe Taitá tojánabacacangbiamá, ntšamo cachá jamama yojanjuabnacá y ntšamo jopásama yojantatšëmbcá, cabá chca ndochnëngo ora; Uámana Espíritbeyeca, Bëngbe Bëtsá tojama tsëngaftanga chabe entšanga chašmotsemnama, Jesucristo chašmotseyeunanama y Bëngbe Bëtsabe delante tsabá chašmotsatsmënama, bacna soyënga abujauánënga. Y Bëngbe Bëtsá chca tojanma, Jesucristbe buiñe juabuáshanëse, cha tojanóbanayeca. Atše bëtscá sëntseimpadana Bëngbe Bëtsá, chaoma tsabe bendicionënga tsëngaftangbeñe chaotsemnama, y chaoma tsëngaftangbe ainaniñe tsabe ebionana chašmotsebomnama.

## *Bëngbe Bëtsábeñe jtsošbuáchiyëse vida jtsebomnana, atsebácanënga jtsemnama*

<sup>3</sup> Bëngbe Bëtsá y Bëngbe Utabná Jesucristbe Taitábioye matschuanga; cha puerta lastemado ínÿengaftaca yómnayeca, tojanma bënga tsëm juábnaca vida chamotsebomnama, bëngbioye bacna soyënga jabuajuánase, Jesucristo cháuatayenama tonjánmayeca. Chíyeca bënga montsobena chábeñe jtsobátmanana sempre y nyetsca tescama, ndayá cha šochjátšatayama. <sup>4</sup> Ndayá bënga šochjátšataycá ndoñe quenátsmëna jëftsopochócama opodena soyënga, ndayá nyets tempo tsabe soyënga. Y bënga mondobátmana jóyëngacñama ndayá Bëngbe Bëtsá chabe entšanga jatsatayama tojašebuachenacá, ndayá celoca bëngbiamá cha yojtsinÿena. <sup>5</sup> Chë soyënga tsëngaftangbiamá entsemna, Bëngbe Bëtsábeñe šmošbuáchema; cha chabe obenánaca cmondánÿena, tsëngaftanga jätsebacama. Cha chca jamama ya tojaprontá y echanjínÿanÿiye, Cristo jésabama tempo chaojóshjango ora.

<sup>6</sup> Chíyeca tsëngaftanga tša oyejuayënga šmojtsemna, masque nderado jtseytana inÿe ora, nyetsca padecena soyënguiñe jasúfriase chašmuachnënguama. <sup>7</sup> Mo chë castellanama jtsetatšëmbuama aiñe o ndoñe tsabe castellano tomnama iñiñe fjuchnëngcá, padecena soyënguiñe tsabá chašmojachnënguse, Bëngbe Bëtsá echanjínÿanÿiye tsëngaftanga ndegombre taišmošbuáchema. Chë castellano pronto endbetsopochóca, masque chca, chana puerta endbetsámána. Y tsëngaftangbe ošbuáchiyana chë castellanama puerta más enduámána. Tsëngaftanga padecena soyënguentsána bëtš ošbuachiyánaca chašmojábocnëse, Jesucristo chaojésabo ora, entšanga mochanjinÿe tsëngaftanga šmojtsomerecena chacmotsatacheuanama, más bëtšetsanga y obenënga chácmbiamama y uámanëngnaca.

<sup>8</sup> Tsëngaftanga Jesucristo šmondobonshana, y chábioye ndoñe chešmátaninÿe; masque mora cha ndoñe quešmatonÿá, tsëngaftanga chábeñe šmontsošbuaché, y šmontsebomna canÿe puerta tsabe oyejuayana, y ntsachetšá chana yomnana ndoñe quešmátobena jayanama, tša bëtscá causa. <sup>9</sup> Chca oyejuayana tsëngaftanga šmontsebomna, er ndayá tsëngaftanga jtsošbuáchiyëse šmobatmancá, ya šmojtsosháchichana, chë Bëngbe Bëtsá tsëngaftanga jtsatsebacyana.

<sup>10</sup> Bëngbe Bëtsabe juabna oyebuambnayënga ya imojanatsjendá y imojanguá jtsetatšëmbuama, ntšamo Bëngbe Bëtsá entšanga jätsebacama, y tmojanoyebuambá ndayá Bëngbe Bëtsá tsëngaftanga jatsatayama, tsëngaftangbiamá tsabe juabna cha yobómnayeca.

<sup>11</sup> Chëngbe ainaniñe yojtsemna Cristbe espíritu, y ntšamo tojanëyancá, cabá chca ndochnëngo ora, yojamna Cristo jasúfriama y ntšamo chentšana Bëngbe Bëtsá chábioye puerta bëtscá bochjánbemama, Bëngbe Bëtsabe juabna oyebuambnayënga imojanjuabná y imojanatsjendá jtsetatšëmbuama chë soyënga yochjanopása ora, ndaye tempo y ntšamo chë tempo yochtsemnama. <sup>12</sup> Pero tempo Bëngbe Bëtsá chëngbioye tojaninÿanÿé, chca

jtsamana ndoñe cachëngbe tšabiamana yonjamnama, ndayá chca jtsamana yojamna tšëngaftangbe tšabiamana. Chënga tmojanoyebuambá, ntšamo chë tšabe noticiënga oye-buambnayënga tšëngaftanga tcmojauyancá. Y chca tcmojáuyana chë Uámana Espíritbe obenánaca, nda Bëngbe Bëtsá celocana tbojichmó. Chë soyënga endmëna ndayá chë angelënga muantseboše tšabá jinýama, chënga chaósertama.

*Bëngbe Bëtsá entsanga jtsachembuanana chabe entsangcá chamotsiyenama*

<sup>13</sup> Chíyeca, botamana jtsejuabnayëse tšabá jatrabájama, y cach tšëngaftanga jenomándama jtsoebenëse, yejuana šmochtšobátmana, Bëngbe Bëtsá soyënga cmochjátšatayama tšëngaftangbe tšabiamana jtsejuabnayëse, Jesucristo quem luaroye yochjésabo ora. <sup>14</sup> Tšëngaftanga Bëngbe Bëtsabe básënga uauenanënga quetsomñecá, ndoñe šmattsiyena ntšamo cach tšëngaftangbe bacna juabnënga yomncá nýe tšabá jtsomñama, ntšamo Bëngbe Bëtsábioye cabá nduabuatma ora šmonjanbomncá. <sup>15</sup> Chamna, šmochtšiyena mo chë Bëngbe Bëtsabe entsangcá, puerte tšabe entsangcá jtsamëse, er Bëngbe Bëtsá, nda tcmojáchembo chca chašmotsemnama, sempre uamaná endmëna. <sup>16</sup> Er Bëngbe Bëtsabe uabemana palabrenguiñe mëntsá endayana: “Tšëngaftanga Bëngbe Bëtsábeñe uámanënga šmochtsemna, er atše uamaná sëndmëna ca.”

<sup>17</sup> Tšëngaftanga Bëngbe Bëtsábioye šmondbuyana “Taita ca”, šmondbótšëmbona ora. Bëngbe Bëtsabiamana nýetscanga cachcá mondmëna. Chíyeca, ntšamo nýetscanga tmojamama tšabá o ndoñe tšabá yontsemna ca cha yochjayana ora, cha chca echanjama nýe ntšamo chënga tmojamcá jtsonýayëse. “Taita ca” chábioye šmondbuyánayeca, quem luarentše šmochtšiyenëntscuana sempre šmochtsejuabnaye cha nýetscangbiama más bëtsá yomnama, chë šmojtsama sóyeca chca jtsinýanýayëse. <sup>18</sup> Tšëngaftanga šmondëtatšëmbo, Jesucristo, mo nda ínýengbioye játebacama crocénana cuafjëtsjajocá, tonjanóbana tšëngaftanga játebacama, chë nýetsca soyënga nýe bonamente jtsamëse oye-nentšana, ntšamo jtsiyenama tšëngaftangbe bëts taitángbentšana šmojanatsjinýcá. Cristo ndoñe checmatanatsebacá, yopodena jtsopochócama soyënga jëtsjájuase, mo crocénana o castellancá, <sup>19</sup> ndayá cachá jóbaniëse, chabe uámana buiñe juabuáshanëse. Cristo chë ndocna bacna soye ndbomná, tonjanóbana ora enjamna mo canýe oveshatemcá, tondaye ndbemaná, ni tsengana ndbomná, Bëngbe Bëtsábioye jëtschuayama altaro ca obaná. <sup>20</sup> Chama Bëngbe Bëtsá Crístbeñe tojanjuabó y tbojanábuayana, cabá quem luare ndëtsemna ora; pero quem tempo, Cristo entsángbeñe tonjábocna tšëngaftangbe tšabiamana. <sup>21</sup> Crístbeyeca, tšëngaftanga šmondošbuaché Bëngbe Bëtsábeñe, nda tonjanma Cristo cháuatayenama y puerte uamaná tbonjábema. Mëntsá, ndábeñe tšëngaftanga šmošbuaché y šmobátmana, Bëngbe Bëtsábeñe endmëna.

<sup>22</sup> Tšëngaftanga šmojama ndocna bacna soyënga ainaniñe ntsebomnama, Jesucristbeyeca catšátangbioye ndegombre jtsababuánýeshanama, er tšëngaftanga ntšamo ndegombre yomncá jtsamëse, Bëngbe Bëtsá šmoyeunana. Chcasna, sempre nýets ainánaca nýetscanga šmochtsenbobonshana. <sup>23</sup> Bëngbe Bëtsá tojama tšëngaftanga tsëm vida chašmotsebomnama; pero tšëngaftanga tsëm vida šmontsebomna, ndoñe nýe quem luarentša entsanga ndayá tmojamama, sinó ndayá Bëngbe Bëtsá chë ndocna te jobanamá tojamama. Cha chca tojama cachabe palábraca, ndayá endoyebuambná ntšamo entsanga muantsobena tšabe vida jtsebomnama y chë palabra ndocna te queochaisopochóca. <sup>24</sup> Ntšamo Bëngbe Bëtsabe uabemana palabrenguiñe endayancá:

Nýetsca entsanga mondmëna mo shacuaná,  
y chënga imobomna tšabe soyënga, endmëna mo chë shacuanentša uantšefjushangacá.  
Chë shácuaana jtsanctana y chë uantšefjushangá jtsatquécjanana;  
entsanga cachcá, nýets tempo quem luarentše ndoñe quemochátiyena;

<sup>25</sup> pero Bëngbe Bëtsabe palabra nýets tempo echanjesomñe ca —chiñe endayana.



Y chë palabra endmëna chë Jesucristbe tšabe noticiënga, chë buayenánana ntšamo ínÿenga tcmojabuayenacá.

## 2

<sup>1</sup> Chcáyecna, nÿetsca tescama šmochtsajbaná nÿetsca bacna soyënga amana, ínÿengbioye áingñayana, bacna entsanga chë ntšamo ndegombre šmojuabnacá ndinÿinÿayënga ntsemnana, ínÿengbioye untšabošana, y ínÿengbiamá uayátsenayana. <sup>2</sup> Mo cabá mora onÿnana šešoncá, tša jtsebošana chabe mamabe létšiyë, cachcá tšëngaftanga cmontsamna puerte jtsebošana nÿets tempo Bëngbe Bëtsabe soyënga jtsebmomna, chë soyëngaca Jesucristbeñe corente chašmotsošbuáchema, y chca, atsebácanënga chašmotsemnama; <sup>3</sup> ntšamo Bëngbe Bëtsabe uabemana palabrënguifne endayancá: “Tšëngaftanga šmojátatsëmbona Bëngbe Utabná puerte tšabia nÿetscángaftaca yomnama ca.”

### *Cristo, chë mo aina ndëtšbecá endmëná*

<sup>4</sup> Bëngbe Utabnábioye šmochtoconá, nda endmëna mo canÿe aina ndëtšbecá, ndëmanÿëse tojtsama entsanga tšabe vida chamotsebmomna. Báseftanga cha tmojtšaboté, mo ntšamo chë ndëtšbéngaca canÿe yebna tmojtsejebuana ora, luaroca tmojtsejajó ndëtšbecá; pero Bëngbe Bëtsá chábioye tbojuábuayana, y chabe bominÿifne cha puerte uamaná endmëna. <sup>5</sup> Chábioye šmochtoconá, tšëngaftanga chë tšabe vida šmojóyëngacñënga, cánÿifne mo aina ndëtšbéngcá, Bëngbe Bëtsabiamá jajebuama canÿe yebnentšama chašmotsemnama; mo Bëngbe Bëtsabiamá bachnangcá chašmotsemnama, nÿe Bëngbe Bëtsábioye jtseservénama jtsentsénëse, chábioye jtsatschuanayama. Ntšamo Bëngbe Bëtsábioye jtseservénama šmojtsamcá, chábioye tšabá jtsinÿanana, ndayá Jesucristo tojanmama. <sup>6</sup> Chca ndegombre endmëna, er Bëngbe Bëtsabe uabemana palabrënguifne, Bëngbe Bëtsá Jesucristbiamá mëntšá tojánayana: Smochjinÿe, atše sënjama Jerusalenentše canÿa chaotsemna, y cha endmëna mo chë canÿe yebna jajebuámentše chë más bëts uashacuanëšentše jajona ndëtšbecá.

Cha atšbe Uabuayaná endmëna, y atšbiamá puerte enduámana.

Nda chábeñe tojtsosbuaché, ndocna te nÿe bonamente chábeñe queochátobatmana ca.

<sup>7</sup> Tšëngaftanga, chábeñe ošbuáchiyëngbiamá, nda endmëna mo chë yebna jajebuámentše más bëts uashacuanëšentše jajona ndëtšbecá, cha puerte enduámana; pero chábeñe ndošbuáchiyëngbiamna, entsopasana ntšamo Bëngbe Bëtsabe uabemana palabrënguifne Cristbiamá endayancá:

Chë yebna jebuanënga tmontsanaboté ndëtšbé,  
mora chë más bëts uashacuanëšentše entsejájona ca.

<sup>8</sup> Inÿoca, Bëngbe Bëtsabe uabemana palabrënguifne mëntšánaca chabiamá endayana:

Cha endmëna mo ndëtšbé ndayentše jtsojestjiyamcá;

y mo peñëscá yomna chënga chamotsótsatšama ca.

Chënga Jesucristo jtsabotena, chabe buayenánana ndoñe ntjeyeunaycá; Bëngbe Bëtsá cabá chca ndopása ora tojanjuabó chca chaotsemnama.

<sup>9</sup> Pero tšëngaftanga šmondmëna Bëngbe Bëtsábeyeca bocacánënga, y mo canÿe rey tmojtseserveba bachnangcá, y šmondmëna Bëngbe Bëtsabe entsanga nÿe chabiamá jtsetrabájayama, y chë nÿe Bëngbe Bëtsábënga šmomnënga. Y chca endmëna, tšëngaftanga chë bëts soyënga ntšamo Bëngbe Bëtsá tojamcá chašmotsabuayiyama. Cha endmëna nda tcmojáchembo chašmotsajbanama oyenana mo ndoñe binÿniñcá jtsejuabnaye y jtsamëse, cháftaca jtsemnama chašmotsobenama, chë tšëngaftangbe juabnënga puerte binÿnayáftaca. <sup>10</sup> Tempo tšëngaftanga ni mo cánÿentša entsangcá ndoñe quešmënjatsmëna, nÿe ujquëshenënga; pero mora, Bëngbe Bëtsabe entsanga šmontsemna;

tempo šmonjamna entšanga ndocná tonjánalastemanga, pero mora, Bëngbe Bëtsá aíñe lastemado tšëngaftangafaca entsemna.

*Bëngbe Bëtsá jtseservénama jtsiyenana*

<sup>11</sup> Atšbe bonshánënga, ndayentše tšëngaftangbe ndegombre luare yomna, celoca endmëna, y muentše quem luarentše, tšëngaftanga šmondmëna mo ínjoicana ash-jajnëngcá, y mo canye luarëjana nye achnëjuanëngcá, cach tšëngaftangbe luaroye átayiñe. Chíyeca cbontsaimpadana, ndoñe chašmondétsama soyënga ntšamo chë šmobomna bacna juabnënga tomncá, ainaniñe bacna soyënga bomna causa; chca juabnënga ainaniñe jtsenpenzétsiayana, chentše jtsemándayama y Uámana Espíritu ndoñe chaondëtsemándama. <sup>12</sup> Chë Bëngbe Bëtsábioye nduabuatmëngbeñe sempre šmochtsiyena tšabá jtsamëse; chca chënga, masque mora tšëngaftangbe contra imojtsoyebuambná, tšëngaftanga mo bacá uamana entšanga cuaftsemnëngcá, chë tšabe soyënga ntšamo tšëngaftanga šmojtsamcá chamuinýama, y chca, Bëngbe Bëtsá chëngbioye chaojenonýinýe te, chábioye chënga chamotsatschuanama.

<sup>13</sup> Bëngbe Bëtsá šmoyeunanama, nyetsca entšanga mando bomnëngbioye šmochtsobedecena; chë Romoca bëts mandádbioye, cha chë quem luarentša más uámana puesto jtsemándayama endbómnyeyca; <sup>14</sup> y chë tšëngaftangbeñe mandadëngbióynaca, ndëmuanýenga cha jíchamuana chë bacna soyënga amënga jácastigama, y chë tšabe soyënga amëngbiana tšabá imojtsama ca chamuayanama. <sup>15</sup> Chë mando bomnëngbioye šmochtsobedecena, er Bëngbe Bëtsá endboše tšëngaftanga tšabe soyënga chašmotsamama, chca, chë ndosertánënga chë tšëngaftangbiana podesca ichámënga, ntšamo ndegombre yomncá ntsetatšëmbcá, tondaye chamondëtsebomna tšëngaftangbe contra jayanama.

<sup>16</sup> Šmochtsiyena tšabá jtsamëse, mo chë ya ndoñe más bacna soyëngaca y bacna juabnëngaca ndëmandanëngcá; pero chca šmojtsemnana ndoñe šmattsejuabnaye nye ndaye bacna soye jamama šmojtsobena ca, y nye chca šmochjátama. Más tšabá endmëna jtsiyenana, mo chë Bëngbe Bëtsá imoservenëngcá. <sup>17</sup> Nyetscangbiana respeto šmochtsebomna, chë Jesucrístbeyeca catšátangbioye šmochtsababuánýeshana, sempre šmochtsiyena Bëngbe Bëtsabiama jtsejuabnayeše cha chë más bëtsá yomnama, y chë Romoca bëts mandado šmochtserrespetana.

*Cristo chabe entšanga tojinýanýé ntšamo yomna jasúfriana*

<sup>18</sup> Tšëngaftanga, chë nyets tempo ínjabiana canye yebnentše oservénënga, tšëngaftangbe nduiñëngbioye šmochtsayaunana, puerte respeto chëngbiana jtsebomnëse; y ndoñe nye chë tšábëngbioye y nye tšabá mandbomnëngbioye, ndayá chë bacá mandbomnëngbioynaca. <sup>19</sup> Nderado nda, ntšamo Bëngbe Bëtsá yobošcá jamama bošama, tojoboyá chabe nduiño cha chaosufrima tojtsama ora, masque chama jasúfriama ndoñe tbondmëna, chca jamëse, Bëngbe Bëtsá corente tšabá jtsinýanana. <sup>20</sup> Er nderado tcmojtsacastigá ndaye bacna soye šmojama causa, y chora tša uantadënga chiñe šmojachnëngo, chë soye ndoñe yapa ntsámanana. Pero tšabe soyënga šmojtsama y chë causa šmojtsesufrina, y tša uantadënga chiñe šmojachnëngo, chë soye cocayé Bëngbe Bëtsá corente tšabá jtsinýanana. <sup>21</sup> Chca cmontsamna, er Bëngbe Bëtsá tcmojánachembo tšabe soyënga jamama y chca jasúfriama; chca ndegombre endmëna, er Cristo tšëngaftangbiana tonjansufrí, y chca cha tcmonjaninýanýé, ntšamo jamama cmojtsamna, tšëngaftanga chca chašmotsamama. <sup>22</sup> Cristo ndocna te ndocna bacna soye chenáisema, ni ndocnábioye chebnaisëingñé. <sup>23</sup> Chábioye tmojtsoyenguá ora, chëngbioye ndoñe ntëyánguanguana. Cha chaosufrima tmonjanma ora, cha ndocá ntjatëtsétsnayana jaútatjayama, ndayá Bëngbe Bëtsábeñe jtošbuáchiyëse, chábeñe yojanobátmana. Bëngbe Bëtsá ntšamo nyetscanga tmojamama tšabá o ndoñe tšabá yonjamna ca yochjayana ora, chca echanjama nye ntšamo chënga tmojamcá jtonýayëse. <sup>24</sup> Cristo cruciñe

tonjanóbana ora, cha tonjansufrí chë castigo, chë bēngbe bacna soyēngama cach bēnga šojánamna jasúfriama castigo, bēnga chë bacna soyēnga jamama juabnēngaca ndoñe más mandánēnga chamondētsemnama, y bēnga ntšamo Bēngbe Bētsabe bominyiñe tšabá yomncá jtsamēse chamotsiyenama. Er Crístbioye chēnga tmonjanlisiá chaóbanama y tonjansufrí jobanēntscuana, y chca, bēnga šonjanatsebacá. <sup>25</sup> Er tšēngaftanga, tempo Bēngbe Bētsábentšana bēnoca šmonjamna, mo ótsena oveshēngcá; pero mora Crístbe benache šmojtishache, y cha cmontsanýena, mo oveshēngbe canýe abujāyēnacá, y cha entsantješna tšēngaftanga tšabá chašmotsemnama.

### 3

#### *Ntšamo iuamna chë bouamnēngbioye jtsiyenana*

<sup>1</sup> Cachcá mo chë oservenēngcá, tšēngaftāngnaca shémanga, tšēngaftangbe boyāngbioye šmochtsayaunana, chca, chë Bēngbe Bētsabe buayenana soyēnguiñe ndošbuáchiye boyāngbioye chašmobená jáyēnjanama, Jesucrístbeñe chamotsošbuáchema, ntšamo tšēngaftanga šmojtsiyenama. Ndoñe queochátsiyta chë buayenánama chēnga jatētsētsnayana, <sup>2</sup> er chēnga mochanjinýe tšēngaftanga šmojtsiyena, Bēngbe Bētsá nyētscangbiamá más bētsá yomnama sempre jtsejuabnayēse, y ntšamo šmojtsamcá chca yojtsinýinýnáyeca. <sup>3</sup> Cach tšēngaftangbiamá ndoñe mēntšá šmattsejuabnaye: “Entšanga atše botamaná tsmēna ca chamotsejuabnama atše nýa mo chca chantenochquēca, chantenóbotamayē ba castellano soyēngaca o ba uámana entšayangá chantichētjo ca”; <sup>4</sup> ndayá chca chaotsemna, ntšamo tšēngaftanga chë Uámana Espíritbeyeca mandánēnga jtsemnēse ainaniñe šmojuabnama, cmēbionama y šmobošama; ndocna te ndopochócayē botamanana jtsebomnama, ainaniñe nýe cach tšēngaftanga uámanēnga jenobiamama juabnēnga ntsebomncá, pero aiñe ainaniñe tšabe ebionana jtsebomnēse. Chë soyēnga Bēngbe Bētsabe bominyiñe puerte enduámána. <sup>5</sup> Tempo chca, chë puerte tšabe shembásēnga, chë Bēngbe Bētsabe bocacanēnguentšēnga, imojanamana jtenóbotamayana; chēnga Bēngbe Bētsábeñe imojtsanošbuaché y chábeñe imojanobátmana, y nyētscanga chēngbe boyāngbioye imojánayaunana. <sup>6</sup> Chca yojamna Sara, Abrahámioye ibnayeunana y chábioye “Taita ca” ibojanábobuatma. Tšēngaftanga Sarabe bembangcá jtsemnana, tšabe soyēnga šmojtsamēse, y tondayama uatjana šmontsebomnēse.

<sup>7</sup> Cachcá, tšēngaftanga boyanga, cada ona cachabe shémaftaca chaotsiyena, tšabá jtšenēyeunanēse, y cha respeto buajoná chaotsemnama jtsamēse; pero chca, ndoñe nýe cha acbiamá más batšá obenana bomná bētsemnama, ndayá Bēngbe Bētsá chabiamá tšabe juabna yobómnyayeca, ntšamo cach aca tšabe vida tcmojašbuachenacá chábioynaca tbojašbuáchenama. Chca šmochtsama, Bēngbe Bētsáftaca jencuéntama totcá chaondētsemnama.

#### *Chë tšabe soyēnga amama jasúfriama yojtsamnēnga*

<sup>8</sup> Y morna, nyētsca tšēngaftanga cachcá šmochtsejuabnaye, ínýēnga šmochtsalastemana, chë Jesucrístbeyeca catšátangbioye šmochtsababuánýeshana, ínýēngbiamá chacmóngmiaye, y cada ona chaotsejuabná chë ínýēnga chabiamá más uámanēnga imomna ca. <sup>9</sup> Inýēnga tšēngaftangbiamá ntšamo tcmojaborlá ora, ndoñe šmattēchenanguaye; ni chacmojtsēyanguá ora, chēngbioye ndoñe šmattoyánguango. Chca játamama cuentna, Bēngbe Bētsá šmochjaimpáda, chēngbeñe tšabe bendicionēnga chaotsemnama cha chaomama, er Bēngbe Bētsá tcmojáchembo chca chašmotsamama, y Bēngbe Bētsábíocana tšabe bendicionēnga chašmosháchiñama. <sup>10</sup> Ntšamo Bēngbe Bētsabe uabemana palabrenguiñe endayancá:

Nda toboše tšabe vida jēftsebomnama y puerte oyejuayá tempēnga jtsebomnama, yejuana chaochtsenajuabná bacna soyēngama ndoñe chaondētsóyebuambnama, y ndoñe chaondētseboosterama.

11 Bacna soyënguentshana chaotsojuánañe y tšabe soyënga chaotsama, natjëmbana nyetscángaftaca jtsiyenama chaotseboše, y chca chaotsemnama sempre chaotsentsena.

12 Chca bontsemna jamana, er Bëngbe Utabná, chabe bominyiñe tšabe soyënga amëngbioye jtsanyenana, chëngbiamama sempre jtsantješnëse; y sempre chëngbioye jtsayaunanana, chábioye ndayámnaca tmojtsotjanañe ora; pero chë bacna soyënga jamana uamanëngbe contra cha jtsemnana ca —chiñe endayana.

13 ¿Nda nanjobenaye tšëngaftangbiamama bacna soyënga jamama, tšëngaftanga chë tšabe soyënga jamama siempre šmojtsentsënëse? 14 Pero masque tšëngaftanga cmojtsamna jasúfriama tšabe soyënga šmojtsamama, Bëngbe Bëtsá chama tšabe soyënga cmochántatšataye. Chë tšëngaftanga chašmosufrima amëngbiamama ndoñe matauatjëngana, ni ainana tsetšenánënga ndoñe matsmënëngana, 15 ndayá ainaniñe sempre šmochtsejuabnaye Cristbiamama mo Bëngbe Utabnacá y chabiamama respeto šmochtsebomna; y siempre šmochtseprontana jojuama ndëmuanyënga tcmojtsatjaná ndáyeca tšëngaftanga Bëngbe Bëtsábeñe jtsošbuáchiyëse, chabiamama ainaniñe šmobátmanama. 16 Pero chca šmochjama tšabe ainánaca jtsënýayëse y Bëngbe Bëtsabiamama respeto jtsebomnëse. Smochtsiyena tšabá jtsamëse, y chama ainaniñe ndoñe chašmondëtsebomna juabnënga y chamuayana chca ndegombre ndoñe tšabá šmotsama ca, chca, ínýënga tšëngaftangbiamama podësca chamojtsoyebuambná ora, tšëngaftanga Cristbeñe ošbuáchiyënga quetsomñecá tšabe soyënga šmojtsamama, chënga chamotsëuatja chca tmojtsóyebuambnama.

17 Más tšabá endmëna jasúfriana tšabe soyënga tcojamama, nderado Bëngbe Bëtsá chca chaotsemnama tojtsebošëse, y ndoñe chë jasúfriana ndaye bacna soye tcojamama.

18 Er Cristo nye canýe tonjanóbana bënga bacna soyëngama jáperdonama; chë nyetsca soyënguiñe tšabá amá, chë Bëngbe Bëtsabe bominyiñe ndoñe tšabá yondmëna soyënga amëngbiamama, tšëngaftanga Bëngbe Bëtsáftaca chašmotsatsmënama. Entšacá, Cristo tonjanóbana, pero Bëngbe Bëtsá tonjanma, cha cachiñe vida chabe espiritiñe chaotsatsbomnama. 19 Pero Cristo cháuatayenama Bëngbe Bëtsá cabá ndëma ora, chabe espiritiñe cha tojánama chë ndoñe tšabe entšanga imonjamnëngbe espíritënga utámenënga imojamnoye, chëngbiamama castigo tojtsemnëntscuana; y cha tojanayënjanama chënga tojanabuayená.

20 Quem espíritënga bayté entsemna, Bëngbe Bëtsábioye ndoñe monjánëyeunana, Noebe yojëftsiyena ora, chë bacna soyënga amënga chca amama chamotsajbanama y tšabe benache chámuatishachama Bëngbe Bëtsá bën yojanobátmana ora, barquësha canduapor-mantscuana. Chentsana chë barquëshañe báseftanga tmojanotsbocá, posufta entšanga, búyeshe juatsbuacá chë barquësha yojtsámnyayeca. 21 Chë chënga chamótsbocama tojanëjabuache béjaye, enjamna mo chë mora jenábayama buyeshcá, chca, atsebácanënga bënga chamotsemnama. Pero tmojenábaye ora, bënga atsebácanënga jtsemnana, ndoñe chë cuerpentša tsengá tmojtsenóbolimpiama, ndayá bëngbe ainaniñe ndocna bacna juabnënga ntsebomnama Bëngbe Bëtsá tmojtseimpadánama; y bënga atsebácanënga mondmëna, Jesucristo cháuatayenama Bëngbe Bëtsá tojánmayeca. 22 Cristo celoye tojtantsjuá y Bëngbe Bëtsabe catšbioica yomna jamándama. Cha endmëna chë amëndayá angelëngbiamama y espíritënga mando y obenana bomnëngbiamama.

## 4

### *Entšanga entsamna jtsiyenana ntšamo Bëngbe Bëtsá yobošcá*

1 Chcasna, ntšamo Cristo tojansufricá, chabe cuerpiñe mo entšacá játssetšenëse, tšëngaftángnaca cmontsamna jtseprontánana chca jasúfriama. Er chë Cristbeñe ošbuachiyá nda chabe cuerpiñe tojasufrí, chë bacna soyënga amentsana tojtsojuánañe,

2 chca, chabe vidiñe, morscana y jobanëntscuana, jëftsiyenama ntšamo Bëngbe Bëtsá yobošcá, y ndoñe nye entšangbe bacna juabnëngaca, nye quem luarentše tšabá



jeftsemnama. <sup>3</sup> Tempo, bayté enjamna, ndayentscuana tsëngaftanga šmonjánama soyënga, mo chë Bëngbe Bëtsábioye nduabuátmënga mondbetsamcá; nÿa ndoñe más. Chë tempo, tsëngaftanga šmonjanijena nÿetsca bacna soyënga jtsamëse, jenomándama ntsobencá; tsëngaftanga šmonjánama soyënga nÿe ntšamo šmojanbošcá, nÿe tsëngaftanga tsábá jtsomñama; šmonjanamana jotmenangana y ba fiestënga jtsebomnana, y chora chë ófjanënga tša jtsetmoyana y tša jtseyoyana, y ba uabouana soyënga šmonjanamana jtsamana chë diosënga yojamna ca šmojanjuabná soyënga jadórama. <sup>4</sup> Morna, chë Bëngbe Bëtsábioye nduabuátmënga montsenjananá, tsëngaftanga ya ndoñe más bacna soyënga jtsamëse šmojtсийenama, ntšamo tempo šmonjanijena, ntšamo chënga jtsamëse mondoyena, jenomándama ntsobencá; y chë causa, chënga bacna soyënga tsëngaftangbiamana jtsóyebuambnayana. <sup>5</sup> Pero chënga echanjótocaye jayanama ndáyeca chca tmojamama, chë entsangbiamana, chë ainënga y chë ya mochjóbanëngbiamana, ntšamo tmojamama, aíñe o ndoñe tsábá bëtsemnama jayanama entseprontanabe delante. <sup>6</sup> Chiyeca, Crístbeñe ošbuáchiyënga, chë mora obanënga imojtsemnënga, ainënga monjamna ora, ínÿënga chë tsábe noticiëngama chëngbioye monjanabuayiyná, chënga chamobenama chë nÿetsca tescama yomna tsábe vida chëngbe espíritoftaca jtsebomnana, ntšamo Bëngbe Bëtsá yobomncá; masque mora quem luarentše, chëngbe cuerpo tojóbana, er Bëngbe Bëtsá tojayana nÿetsca entsanga yojtsamna jóbanama ca.

<sup>7</sup> Ndoñe bayté y nÿetsca soyënga echanjopochóca. Chiyeca, tsëngaftanga cmontsamna botamana jtsejuabnayana y jenomándama jtsobenana, Bëngbe Bëtsáftaca jencuëntama chašmotsobenama. <sup>8</sup> Nÿetsca soyëngama, masna, sempre nÿetscanga puerte šmochtsenbobonshana, er nda ínÿënga puerte tojtsababuanÿeshaná, sempre jtseprontánana ínÿënga jáperdonama, chëngbiamana bacna soyënga tmojamama. <sup>9</sup> Nÿetscanga šmochtsamana tsëngaftangbe yebniñe jenofjana, chca jamama totcá yojtsemna ntjatichamcá. <sup>10</sup> Nÿetsca tsëngaftanga Bëngbe Bëtsá tcmojatšatá obenana tsábe soyënga jamama; chca, chë obenánaca cmontsamna jtsamana soyënga chë ínÿëngbe tsábiamana, chë Bëngbe Bëtsá cmojatšatá nÿets obenánaca ínÿëngbioye jujabuáchama, nÿets tempo tsábe soyënga jtsamëse. <sup>11</sup> Nda tojtsabuayiyná, Bëngbe Bëtsábe palabra chaotsabuayiyná mo Bëngbe Bëtsá chabijana cuaftsoyebuambnacá; nda ínÿënga tojtsaserverna, chca chaotsama chë Bëngbe Bëtsá yojtsama cha chaotsebomnana obenánaca. Nÿetsca soyënga ntšamo šmojtсамcá chaotsinÿanÿná Bëngbe Bëtsá puerte uamaná y obená bëtsemnama, Jesucrístbeyeca. Chca šmochtsama, er Bëngbe Bëtsá puerte uamaná endmëna y obenana endbomna nÿets tempo y nÿetsca tescama. Chca chaotsemna.

*Puerte tsábá endmëna, Crístbeñe tcošbuáchema, jasúfriama tbojtsemnëse*

<sup>12</sup> Atšbe bonshana entsanga, ndoñe šmattsenjanaye padecena soyënguiñe šmojtseufrínama; chiñe jtsinÿnana ntsachetšá ošbuáchiyana šmobomnana. Chca ora ndoñe šmattsejuabnaye, tsëngaftanga ndoñe cmondamna chca soyiñe jtsachnëjuanana ca; <sup>13</sup> chamna, šmochjóyejuaye chë ntšamo Cristo tojansufricá šmojtseufrina ora, chca, Cristo corente obenánaca y uamanacá entsángbeñe chaojtonÿná te, tsëngaftanga puerte chašmotsóyejuama. <sup>14</sup> Puerte šmochtsóyejuaye, nderado nda tcmojoyáanguango Crístbiamana bëtsoservernayeca, er Bëngbe Bëtsábe Espíritu, chë corente bëtšá endmëná, sempre tsëngaftangbe ainaniñe iuétsemna. <sup>15</sup> Tsëngaftanguentše ndocná chabondëtsemna jasúfriama ínÿa óbanaye causa, atbëbanama, bacna soyënga ínÿëngbiamana amama, o ínÿëngbe soyënguiñe ontremeténama. <sup>16</sup> Pero Crístbe ustoná tomnama tojasufrí, chama ndoñe chaondëtséuatja; chamna, Bëngbe Bëtsábioye chabotsatschuaná, cha Crístbe ustoná bëtsemnama.

<sup>17</sup> Er chë tempo ya tojobuache, Bëngbe Bëtsá jayanama, cach Crístbeñe ošbuáchiyëngbiamana, chabe entsangbiamana, tsábá o ndoñe tsábá tmonjamama. Cha chca bëngbiamana jayanama tojontšese, chë chabe palabra ndobedecenëngaftaca yochjanopasacá puerte uabouana echántsemna, cha chëngbiamana chca chaojayana ora.

18 Y chca, chë Bëngbe Bëtsabe bominiñe tšabá amabiamana ndoñe paselo atsbocaná jtsemnana tontsemnëse, ¿ntšamo yochjopása chë Bëngbe Bëtsábioye ndoñe adórayënga y chë bacna soye amëngaftaca? 19 Chcasna, chë imosufrinëngaftaca Bëngbe Bëtsá chca yobóseyeca, entsamna chë tšabe soyënga jtsamana y Bëngbe Bëtsabe cucuatšinë chëngbe espíritu chamoboshjona cha chaotsinýenama, er cha chënga tojánabiamana, y nyetsca soyënguiñe tšabe palabra bomná cha endmëna.

## 5

### *Cristbeñe ošbuáchiyënga jábuayenama*

1 Y mora, chë tšëngaftangbentše ošbuachiyëngcá enefjuanëngbeñe bëtsëjemëngcá amëndayënga chanjabuayená, atše cach tšëngaftangcá bëtsëjema, canya ntšamo Cristo tonjansufricá tonjaninýá y chama ínýenga tonjanéyana, y canya ndábioye cach tšëngaftangcá Bëngbe Bëtsá bochjábema más uámana y bëtsá, Cristo entsángbeñe chaojtonýná ora; tšëngaftanga cbabuayená. 2 Ošbuáchiyënga šmochtsanýena; chënga chašotsanýenama Bëngbe Bëtsá chca tcmojábiamana. Chca, chentša ošbuachiyëngbeñe šmochtsama ntšamo canye tšabe abujénýa chabe oveshëngaftaca endbetsamcá. Bëngbe Bëtsabe trabajo ndoñe šmattsama, nye cmojtsëtocanama, ndayá chca jamama šmojtsebóseyeca. Chca ndoñe šmatjama nye paselo crocénana juácana, ndayá ínýengbioye jujabuáchama tša šmobóseyeca. 3 Chë cmojtsamna jtsanýenama ošbuáchiyënga ndoñe nye bëtscá šmattsamëndaye, mo chëngbe nduiñënga cuafjatsmënëngcá, ndayá ntšamo tšëngaftanga šmojtsiyenama, chënga šmochjínýanýiye ntšamo yojtsamna jtsiyenana. 4 Chca, chë bënga nyetscanga, mo chë tšabe abujénýacá šuanýená, quem luaroye yochjésabo ora, mo canye uabuashinýinýana coronësha ndocna te tontsandbemëshacá, tšëngaftanga canye bëts uacanana soye šmochanjóyëngacñe, y chë soye endmëna nyetsca tescama; Bëngbe Bëtsá uámanënga y bëtsëtsanga cmochanjábiamana, cháftaca nyets tempo oyejuayënga jtsemnëse.

5 Cachcá, tšëngaftanga chë bobontsëngnaca cbabuayená, sempre šmochtsejuabnaye chë bëtsëjemënga tšëngaftangbe amëndayënga imomnana, y chca šmochtsama. Cada ona tšëngaftanguentšá bontsemna jtsejuabnayana chë ínýenga tšëngaftangbiamana más uámanënga cuaftsemncá, ínýengbioye šmojtsaserverna ora; er ntšamo Bëngbe Bëtsabe uabemana palabrënguiñe endayancá:

Bëngbe Bëtsá chë nye cachënga uámanënga tmojtsenobiamnangbe contra entsemna, y chë ndoñe uámanënga montsenobiamnangbiamna, Bëngbe Bëtsá más tšabe juabna entsebomna ca.

6 Sempre šmochtsejuabnaye Bëngbe Bëtsá chë más bëtsá nyetscangbiamana yomnana, y nyets mando y obenana bomná yomnana, y chabe delante ndoñe uámanënga šmattsenobiamnaye, cha más uámanënga chácmabiamama, chama chë tempo chaojobuache ora. 7 Nyetsca soyënga ndayama šmuenócochinýenama Bëngbe Bëtsabe cucuatšinë šmochjáboshjona, er cha tšëngaftanga yejuana cmondánýena.

8 Cach tšëngaftanga jenomándama chašmotsobena y sempre šmochtseprontana, er tšëngaftangbe uayayá Satanás, mo canye león tojtsejató, nda jtsósañama tojtsana orcá, chë diablo, sempre jtsebošana jamama, tšëngaftanga Jesucristbeñe ošbuáchiyana chašmotsajbanama. 9 Puerte šmochtomorócha, Jesucristbeñe bëtscá jtsošbuáchiyëse, chë uayayá tondaye chaondobená tšëngaftangaftaca jamama, cach tšëngaftangcá Jesucristbeñe ošbuáchiyënga nyets luarënguenache cachcá jasúfriama yojtsamnana jtsetatšëmbëse. 10 Pero tšëngaftanga baseftayté chašmojasufri chentšana, Bëngbe Bëtsá cmochanjábiamana nyetsca soyënguiñe puerte tšábënga, puerte chašmotsemorochama, bëtscá ošbuáchiyana y bonshánana bomnënga jtsemnëse, y ainaniñe corente añemo bomnënga chašmotsemnana; Bëngbe Bëtsá, chë bëngbiamana tšabe juabna bomná, bënga nyetsca tšabe soyënga šonjatšatá, y nda bënga šojáchembo nyetsca tescama bëtsëtsanga

jtsemnama, chca echanjama. <sup>11</sup> Cha nÿets obenana nÿets tempo y nÿetsca tescama chaotsebonna. Chca chaotsemna.

### *Jtadiósoftanama*

<sup>12</sup> Silvano, ndabiama sëndëjuabná atšbiana canÿe tšabe palabra bomná Jesucristbeyeca catšata yomnama, cháftaca quem base tsbuanácha tcbonjubuábiana. Atše sëntseboše tšëngaftanga añemo jatšatayana y jáuyanana, ndegombre ntšamo tcbonjubuabiamcá yojtsoyebuambná ntšamo Bëngbe Bëtsá tšabe bendicionënga cmatsatnama. Chíyeca, sempre šmochjëftsiyena jtsamëse ntšamo chabe tšabe juabna tšëngaftangbiana yomncá.

<sup>13</sup> Ošbuáchiyënga muentše átšeftaca montsemnënga cmontsacheuaná. Chënga quem bëts pueblentše mondoyena bacá uamana entšángaftaca, mo chë tempo, Babilonia bëts puebloca imojoyena entšangcá, pero Bëngbe Bëtsá muentša ošbuáchiyënga tojabacacá cach tšëngaftangbioycá. Marcos, chë atšbiana mo uaqiñacá endmëná, chánaca cmontsacheuaná. <sup>14</sup> Nÿetscanga Jesucristbeyeca catšatangcá šmochjenchuaye, jtenámochëse tša šmojtsenbobonshánama.

Atše, Bëngbe Bëtsá sëntseimpadana cha chaoma tšëngaftanga chë Jesucristoftaca cánÿiñe mo canÿacá šmognënga, nÿetscanga ainaniñe tšabe ebionana chašmotsebonnama.

## 2 San Pedro

### *Jacheuayama*

<sup>1</sup> Atše Simón Pedro, Jesucristbe oservená y chabe ichmoná, quem tsbuanácha sentsabiamná tšëngaftangbiamá, ndëmuanÿënga šmojashjache jtsebofnama canÿe ošbuáchiyana Jesucristbeñe, cach bëngbe ošbuachiyancá uámanana, er Bëngbe Bëtsá y Atsebacayá Jesucristo, jtsebošana ndánaca y nÿetscanga chábeñe chamotsošbuáchema.

<sup>2</sup> Atše sëntseimpadana, tšëngaftanga Bëngbe Bëtsabiamá y Bëngbe Utabná Jesusbiamá cada te más jtsetatšëmbëse, Bëngbe Bëtsá chaoma tšabe bendicionënga tšëngaftangbeñe chaotsemnana y chaoma tšëngaftanga ainaniñe tšabe ebionana chašmotsebofnama.

### *Chë Jesucristbeñe ošbuáchiÿëngbe tšabe soyënga*

<sup>3</sup> Bëngbe Bëtsá chabe obenánaca tojama bënga chamobená jtsebofnama, lempe ntšamo tmojtšëjbotcá tšabe vida jtsebofnama y jtseyenama, Bëngbe Bëtsá jadórama soyënga jtsamëse. Cha chca tojama bënga chábioye chamotsábuatmama tojanma ora. Cha bënga šojáchembo, cachá obená y uamaná bëtsemnana y bëtš soyënga jamëse, chabe entšanga chamotsemnana. <sup>4</sup> Chca, Bëngbe Bëtsá šojatšatá ntšamo bënga jatšatayama tojanašebuachenacá, bëtš y uamana soyënga, chca, quem luarentša bacna soyënguentšana chašmotsojuánañama. Chë bacna soyënga quem luarentše jtsebinÿnana, entšanga nÿe cachëngbe bacna juabnëngaca jtseyenama yapa boše causa. Chánaca chë tšabe soyënga šojatšatá, tšëngaftanga cháftaca cánÿiñe mo canÿacá chašmotsemnana, cachacá jtsemnana jashjáchëse. <sup>5</sup> Chca, ndoñe quenátsmëna nÿe Jesucristbeñe ošbuáchiyana jtsebofnana; chiñe šmochjenobuáshjache, bëtscá tšabe soyënga jtsamëse; chora bëtscá šmochtsama Bëngbe Bëtsabe soyëngama chacmotsësertánama; <sup>6</sup> chora bëtscá šmochtsama cach tšëngaftanga jenomándama chašmotsobenama; y chca, tšëngaftanga masque pade-cena soyënguiñe chašmojtšachnëjuana, ainaniñe puerte añemo jtsebofnëse, puerte uantadënga chašmotsemnana; y chentšana bëtscá šmochtsama, tšëngaftanga Bëngbe Bëtsá šmojtšadoránama jinÿanÿiyama; y <sup>7</sup> chca, nÿetsca tšëngaftanga ošbuáchiÿënga chašmotsenbobonshana; y chca, nÿetsca entšanga chašmotsababuánÿeshana.

<sup>8</sup> Tšëngaftanga lempe chë soyënga šmojtsebofna, y bëtscá chca šmojtšamëse, šmochantsiyena becá oservena soyënga jtsamëse, y chentšana puerte tšabe soyënga echantsóbocana, corente tšabá Bëngbe Utabná Jesucristo chašmotsábuatmama. <sup>9</sup> Pero nda quem soyënga ndoñe tontsama, Bëngbe Bëtsabe soyëngama ndoñe ntosertánana; y chca, cha mo canÿe jtaná o nduabinÿnacá jtsemnana; cha tbojtsebnatjëmbe Bëngbe Bëtsá chabe tempsca bacna soyënga tbojtsebojuánama, y Bëngbe Bëtsabe delante cachiñe tšabá chaotsatšmënama tojamama. <sup>10</sup> Chíyeca, Jesucristbeyeca atšbe catšátanga, nÿa šmochtsentšena chca tšabe soyënga jtsamama, y chca, corente tšabá šmochanjátatšëmbona, Bëngbe Bëtsá chabe entšanga chašmotsemnana tcmojáchembuama y tcmojábacacama; y chca jtsamëse, Jesucristbeñe ošbuáchiyana ndocna te quešmochatajbaná. <sup>11</sup> Chca, Bëngbe Bëtsá oyejuayá tšëngaftangbiamá echanjama, Bëngbe Utabná y Atsebacayá Jesucristbe amëndayoye jamashënguama ndegombre chašmobenama.

<sup>12</sup> Chcáyecna, atše sëntsejuabná tšëngaftangbioye sempre chë soyëngama jtsabuayiy-nayana, masque chë soyëngama ya šmotátšëmbo, y tša šmojtsošbuaché Bëngbe Bëtsabe ndegombre soyënguiñe y chca šmojtšiyena, chë mora šmojtsetátšëmbo soyënguiñe.

<sup>13</sup> Sëntsejuabná, chajjëftsainëntscuana tšabá yojtsemna jamana, ainaniñe bëtscá añemo chašmotsebofnama chë soyënga jtsamama, ntšamo tijayancá jtsabuayiy-nayëse. <sup>14</sup> Atše sëntsetatšëmbo, ndoñe baytese y atšbe ainana Bëngbe Bëtsábioye yochtá, ntšamo Bëngbe



Utabná Jesucristo šonjëftsanbuayenacá; <sup>15</sup> pero bëtscá chanjëftsema, atše chajjóbana chentsánënaca tšëngaftanga nyets tempo chë soyëngama chašmotsenójuabnama.

*Cristo corente uamaná y obená yojamnama tmojáninýe ora*

<sup>16</sup> Bëngbe Utabnabe obenanama y cha yochjésabama ntšamo tcbonjanabuatambacá, ndoñe quenjatsmëna entsangbe osertanánaca pormana cuenténgaca, er cach bënga botamana fsënjáninýe chabe uámanana y obenana. <sup>17</sup> Bëngbe Bëtsá chë Taitá, Jesucristo puerte obenana bomná bétsemnama y cha corente bëtscá y uamaná bétsemnama tonjaninýinýe ora, bënga fsënjáninýe. Chca fsënjáninýe Bëngbe Bëtsá, chë puerte uámana y bëtscábíocana oyebuambnayana Jesúsbiye mëntšá tbonjanianya ora: “Mua atšbe bonshana Uaquiñá endmëna, atše chabiana sëntsoyejuá ca.” <sup>18</sup> Cach bënga chë oyebuambnayana fsënjanuena, chë celocana tonjanóbocnana, er bënga Bëngbe Utabnáftaca fsënjánmëna, chë uámana tjoca.

<sup>19</sup> Chë sóyeca bënga fsëntsobena corente jtsetatsëmbuana, ntšamo chë Bëngbe Bëtsabe juabna oyebuambnayënga tmojanayancá ndegombre bétsemnama, y tšëngaftanga tšabá šmochántsama, ntšamo chënga tmojanayancá šmojtseyeunanëse. Chca, chëngbe palabrëngaca entsopodena Bëngbe Bëtsabe soyëngama tšëngaftanga jinýanýiyana, y echántsemna mo canýe uajuinýanësha canýe ibetiñe luarentše tojtsebinýnacá. Chë soyënga šmochtsuenana Jesucristo yochjésabëntscuana; chora, cha nyetsca soyënga cmochanjínýanýiye, mo tšëngaftangbiana canýe tsëm te cuafjabinýncá, y chë jabínýnama ora bínýnaye estrella tojábocna tšëngaftanga jabuabinýnamcá. <sup>20</sup> Pero natsana chacmësertá, ndocna palabra Bëngbe Bëtsabe uabemana palabrënguiñe tojayana canýe soye yochjopása ca, cabá chca ndopása ora, nye cach Bëngbe Bëtsabe juabna oyebuambnayëngbe juabnentšana tojanóbocnana; <sup>21</sup> er Bëngbe Bëtsabe juabna oyebuambnayënga ndoñe monjanoyebuambná nye chënga chca jamama innabóseyeca, ndayá Bëngbe Bëtsabe cuenta tmojanoyebuambá, chë Uámana Espíritu chënga chca chamóyeuambama tojánmayeca.

## 2

*Chë ndoñe ndegombre soyënga buátëmbayënga  
(Jud 4-13)*

<sup>1</sup> Chë Bëngbe Bëtsabe juabna oyebuambnayëngbe tempo, Israeloca entsángbeñe baseftángnaca imojamna, ndëmuanýënga imojichamo chënga ndegombre chca juabna oyebuambnayënga imojamna ca, pero ndegombre ndoñe chcanga imonjamna; cachcá, tšëngaftangbeñe abuátambayënga mochántsemna, y chënga ndoñe ndegombre soyënga mochántsabuatambaye, pero ndegombre soyëngaca cánýiñe, chca, chënga chca imojtsabuátambama entsanga ndoñe chamondétatšëmbonama. Chë buátëmbana soyënga echanjama, entsanga ndoñe ndegombre soyënga y bacna soyënga chamotsamama. Ntšamo chënga mochántsama y mochántsabuatambaye soyëngaca, mochántsama Jesucristo ndoñe chëngbe Utabná chaondétsemnama, cha nda chënga tojatsebacá, mo nda ínýënga játsebacama crocénana cuafjëtšajocá. Y chca, nye ndeolpe, chë Bëngbe Bëtscábíocana uabouana castigo nyetsca tescama mochántsebomna. <sup>2</sup> Banga chëngbiye mochantsësetona, nyetsca bacna soye, jenomándama ntšobencá jtsamëse; y chëngbe causa, ínýënga ndoñe tšabá quemochátoyebuambnaye chë tšabe benachama, chë ndegombre soyëngaca benache jtishachama. <sup>3</sup> Chënga bëtscá crocénana jtsebonnama yapa mochántseboše causa, ba bostero soyëngaca cmochántsaingñaye; pero Bëngbe Bëtsá tempo chëngbiana tojánayana, ndoñe tšabá imojtsamama y chëngbiana castigo nyetsca tescama chaotsemnámnaca.

<sup>4</sup> Bëngbe Bëtsá chë bacna soyënga tmojanma angelëngbiye ndoñe tonjanaperdoná, ndayá infiernoye tojtsanatsatše y puerte ibetiñe tojtsanabáshejuana, chë uabouana tboca

chamoquedama, Bëngbe Bëtsá chëngbiana nyetsca tescama castigo chamotsebomnama yochjayana orscama. <sup>5</sup> Y cach ndoñe quem luarentša entsángbioye tonjanaperdoná Noé yojëftsiyena ora, y chënga jácastigama aíñe tojanma chë uabouana uaftena chëngbeñe chaotsemnama, chë nduauenana y bacna entsanga jtsapochócama. Chentšana, nye Noébioye, tbojanatsbocá, nda entsanga yojanabuayiyná ntšamo jtsiyenana, Bëngbe Bëtsabe bominiñe tšabá yomncá jtsamëse; cha y inye canýsëftangnaca tojanatsebacá. <sup>6</sup> Bayté entsemna, Bëngbe Bëtsánaca tojánayana chë Sodoma y Gomorra bëts pueblentša entsanga, yapa bacna entsanga imojamnama, bëts castigo jtsebomnama yojánamnama; y íñeshca tojtsanapochocá, chë pueblënga y chentša entsanga jatinýá jtsabiamëntscuana. Y chë sóyeca Bëngbe Bëtsá tojaninýanýe ntšamo bacna entsángaftaca yochjama, chë chentšana mochtsiyena bacna entsángbiana. <sup>7</sup> Pero Bëngbe Bëtsá Lótbioye tbojanatsbocá, chë bëts pueblënga pochócayentsana. Cha yojamna Bëngbe Bëtsabe bominiñe tšabá amá, y ntšamo chë luarentša entsanga imojaniyenama, nyetscna bacna soye jtsamëse, jenomándama ntsoyencá, cha puerte ngménana inabomna. <sup>8</sup> Er quem tšabe entsá, chëngbeñe oyená, chë entsanga imojtsama bacna soyënga cada te yojanonýaye y yojanuenana ora, puerte chabe tšabe ainaniñe inasufrina.

<sup>9</sup> Chca, Bëngbe Utabná endobena chë Bëngbe Bëtsábioye adórayënga játsebacana pade-cena soyënguentšana y bacna soyënga jamama juabnënguentšana, y chë bacna soyënga jamama uamanëngna castigánënga jtsabamnama, chë ntšamo chënga imojaniyenëntscuana imojanamcá ndoñe tšabá yonjamna ca Bëngbe Bëtsá yochjayana tescama, y chënga nyetsca tescama chë bëts castigo chamotsebomnama jamándama. <sup>10</sup> Chca ndegombre endmëna, y más chë ndëmuanýënga nye cachëngbe cuerpëngama bacna juabnëngaca jtsamëse imoyenëngbiana, chënga chë Bëngbe Utabnabe mando jtsaboténana. Chënga bacá buátseñanënga mondmëna y jtsebošana nye ntšamo cachënga tmojtsejuabnacá chaotsemnama, y ndoñe ntsauatjana chë espíritënga obenana bomnëngbiana puerte bacna soyënga jtsóyebuambnayama. <sup>11</sup> Chamna chë angelënga, masque más añemo y obenana bomnënga mondmëna, ndoñe jenñëmuana chë espíritënga obenana bomnëngbiana chca jayanama, chëngbiana ndoñe tšabe soyënga jtsóyebuambnayëse, Bëngbe Utabnabe delante.

<sup>12</sup> Pero chë buátëmbayënga, chë cachënga ndoñe tontsësertana soyëngama puerte bacá jtsóyebuambnayana, y chca, chënga mondmëna mo tja bayëngcá, soyënga tšabá josértama juabna ndbomnënga; chënga jtsiyenana nye ntšamo tojtsebiona y tmojtsebošcá, y chënga jónýnana, chámuashebuayama y chamëbáyama. Chë buátëmbayënga mo chë bayëngcá mochántsapochocaye. <sup>13</sup> Chënga mochanjasúfria, ínýënga chamosufrima tmojama causa. Chëngbe oyejuayana endmëna nye chora chënga tšabá jtsemnana soyënga. Tšëngaftangaftaca cánýiñe mo ošbuachiyëngcá tmojtsesá ora, tšëngaftangbiana ouatjácá jtsemnana y chëngbe causa, ínýënga tšëngaftangbiana podescá mochántsihamo, er chënga chentše oyejuayënga jtsemnana, nye chënga tšabá jtsemnana jtsamëse; y chënga tšëngaftangbeñe jtsemnana, tšëngaftangbioye jtsaíngñase.

<sup>14</sup> Chënga ndoñe ntsoybenana canýe shembása jinýana, cháftaca bacna soye jamama ntsebošcá, y sempre jtsenguayana ntšamo bacna soye jamama. Chënga chë Jesucristbeñe nye batsá ošbuáchiyana bomnënga jtsaíngñayana, y sempre jtsentšénana nye más soyënga jésebošama y jésebomnama, ínýënga tmobomnama más soyënga jashjáchama; chënga montsemna pochocánënga jtsemnana. <sup>15</sup> Chënga chë tšabe benachentšana tmojtsojuánañe, y mora mo otšëngcá montsemna. Chca chënga imojtsiyena jtsamëse, mo chë Bëngbe Bëtsabe juabna oyejuambnayá Balaamcá, cha ndoñe tšabá tonjanma orcá; Balaam Beorbe uaquiñá. Cha yapa inaboše bëtscá crocénana juácánama ínýëngbiana bacna soyënga jtsamëse; <sup>16</sup> y Bëngbe Bëtsá, chábioye chabe bacna soyëngama tbojanácacana, cachabe asno chábioye chabuatsëtsama jamëse; y chca, ndoñe tbonjanlesenciá jama chë ndocna juábna soye jamama.

17 Entšanga jtsobátmanana chënga bëtscá tšabe soyënga chamotsamama, pero chë tmojtsama soyënga tondayama ntoservénana, y chca, chënga jtsemnana mo búyeshe obocanentše tojtsebuashjá; y chënga mora canýe soye jtsejuabnayana y chentšana inýetsá; chca chënga jtsemnana mo jantšetëshënga bëtš bínýiaca bonjnëshëngcá. Chëngbiana Bëngbe Bëtšá tojayana castigo chamotsebomnama, chë más ibetoca, tondaye binýniñe luarentše. 18 Chënga ba botamana palabrëngaca jtsenábotamnayana, pero tondayama ntoservénana; y chë cabá mora Jesucristbeñe tmojtsošbuachëngbioye jtsaíngñayama, chënga ntšamo chëngbe enutënga Bëngbe Bëtšábioye nduabuátmënga imoyencá jtsiyenama imojtsajbananga. Chë buátëmbayënga chë soye jtsamana, chëngbioye jáyëñjanase, nýe cachënga tšabá jtsomñama bacna juabnëngaca soyënga chamotsamama, cachënga jenomándama ntobencá. 19 Chë abuátambayënga jašebuachenana tšabe vida jónýenama, nýe ntšamo chënga tmojtsebošcá jtsejuabnayëse y jtsamëse; pero cachënga mondoyena cachëngbe bacna juabnëngaca mandánënga, y chca, chënga montsajna pochocánënga jtsemnana, er ndaye entšánaca mandaná jtsemnana, chë nýets tempo tobedecena sóyeca. 20 Er ndëmuanyënga, Bëngbe Utabná y Atsebacayá Jesucristo tmojtsábuatmama, tmojtsajbaná oyenana mo chë nýe quem luarama enójuabnaye entšangcá, nýetsca bacna soye amana y tša bacna juabnënga ainaniñe bomnana, pero mora cachiñe chë soyënguiñe tmojtésajna, y cachiñe mandánënga tmojtsemna chë bacna juabnëngaca, chënga mora más bacá tempscama jabocanana. 21 Chëngbiana más tšabá manjamna ndoñe ntjobenayana jtsetatšëmbuana ntšamo Bëngbe Bëtšabe bominýiñe tšabá yomncá inétsamama, chë soye jatabuátmanana y chentšana játajbanana chë buátëmbana soyënga y chë abuayiyayëngaftaca chëngbioye Bëngbe Bëtšá tojanoyé mandënga jtsobedecénana. 22 Pero chëngaftaca tojopasá ntšamo entšanga mondëntšayancá chca ndegombre bëtsemnana: “Chë queše chabe ashconánana tojtsemnoye jeshéconana ca” y “chë cotše cabá chora bebená, ngüichetšoye jana jetsójanduouoyama ca”.

### 3

#### *Jesucristo quem luaroye jésabama ora*

1 Jesucristbeyeca atšbe bonshana catšátanga, móraca ya uta soyama cbontsëbuabiamná. Quem uta tsbuanáchaca atše sënjábošena jamama tšëngaftangbe juabna nýe ena tšabe soyëngaca chaotsemnana, y chca chaotsemnamna atše jtsabuayiyayëse chë tcmojanabuatambá soyëngama. 2 Atše sëntseboše tšëngaftanga chašmotsenujuabná, ntšamo chë inýe tempënga ora, chë nýe Bëngbe Bëtšábioye jtsoservénëse, chabe juabna oyebuambnayënga tmojánayanama, y chë Bëngbe Utabná y Atsebacayabe buátëmbana soyëngama y mandëngama, ndayá chabe ichmónëngaftaca tšëngaftanga šmojanóyëngacñe.

3 Pero masna quem soye chacmotsësertana: Jesucristo quem luaroye jésabama tempo chaojtsobeco ora, mochántsemna entšanga y chënga mochantsiyena nýe cachënga tšabá jtsomñama bacna juabnëngaca, y cmochantsëbuayajuana, chë Cristo yochjésabama šmošbuáchema. 4 Chënga mëntšá mochántsihamo: “Cristo tcmojanašebuachená quem luaroye jésabama. ¿Ndegombre chca? Chcase, ¿ndayentše cha yojtsemna? Bëngbe bëtšëtšanga, ndëmuanyëngbioye cha tojanašebuachená quem luaroye jésabama, ya tmonjóbana, y quem luarentše lempe cachcá endesomñe, ntšamo quem luare tojanobotatšé orscana enjamncá ca.” 5 Chë entšanga ndoñe ntsebošana jtsejuabnayana ya bayté yojtsemna, Bëngbe Bëtšá tojanmandá y chca tojanma celoca y quem luare chaotsemnana. Cha quem luare tojanma búyeshentšana y búyeshca; 6 y cach búyeshcna, chë uabouana uaftenentša béjayeca, ya bayté yojtsemna, cha lempe quem luarentše yojanbinýncá tojtsanpochocá. 7 Pero chë mora entsemna celoca y quem luare, cach Bëngbe Bëtšabe mándoca, ndoñe quenátópodena chamotsepochocama, chë Bëngbe Bëtšá jayanama chábioye ndoñe mondadoránënga ntšamo tmojamcá ndoñe tšabá yonjamnama, y chë bacna soyënga tmojamama nýetsca tescama castigo chamotsebomnama

jamándama tempo candóshjanguentscuana. Chora Bëngbe Bëtsá, celoca y quem luare íñesheca echantsepochóca.

<sup>8</sup> Pero, atšbe bonshánënga, canÿe soye endmëna y chë soye ndoñe chacmondébnëtjomba: Bëngbe Utabnabe juabnama, canÿe te endmëna mo canÿe uaranga uatcá, y canÿe uaranga uata mo canÿe tecá. <sup>9</sup> Ndoñe quenátsmëna, ntšamo báseftanga jtsejuabnayana, ntšamo tojašebuachenacá cha ndoñe betesco yochanjama ca, chë cha quem luaroye jésabama, ndayá chana puerte uantado tsëngaftangaftaca comna; er cha jtsebošana ndocná nÿetsca tescama castigo chaondëtsebomnama, ndayá nÿetscanga bacna soyënga amana jtsajbanase, Bëngbe Bëtsabe tsabe benache chamuashjáchama.

<sup>10</sup> Pero Bëngbe Utabná echanjésabo ndocná chama chaondëtsejuabná ora, mo canÿe atbëbanacá jashjanguana, ndocná chama tontsejuabná ora. Chora celoca echanjopochóca, canÿe jabuache shauenanánaca, y quem luare ndaye soyënguentshana yomnana íñesheca echántsefjatëjo, y ndayá Bëngbe Bëtsá y entsanga quem luarentše tmojamcá, lempe echántsejuinÿe.

<sup>11</sup> Lempe chca japochócama entsémnayeca, ndegombre tsëngaftanga cmontsamna jt-siyenana ntšamo chë Bëngbe Bëtsabe entsanga jt-siyenana entsamncá, y nÿets tempo jtsamëse chë Bëngbe Bëtsábioye jtsatschuanayama yomna soyënga, <sup>12</sup> tsëngaftanga chë Jesucristo quem luaroye jésabama chaóshjanguama šmojtsobátmanëntscuana; y nÿa šmochtsentsëna cha más betesco cháuesabama. Chë te íñesheca celoca echántsejuinÿe, y ndaye soyënguentshana quem luare yomnana cach íñesheca echántsefjatëjo. <sup>13</sup> Pero bënga mondobátmana ntšamo cha šojašebuachenacá: canÿe tsëm luare, mo canÿe tsëm celoca y tsëm fshantscá, y chentše nÿetscanga mochantsiyena ntšamo Bëngbe Bëtsabe bominiñe tsábá yomncá jtsamëse.

<sup>14</sup> Chíyeca, atšbe bonshánënga, chë soyënga chaotsemnama šmojtsobátmanëntscuana, nÿa chiñe šmochtsentsëna, chca, cha yochjésabo ora, chacmanÿena oyeniñe tsábá Bëngbe Bëtsáftaca jtsatsmënëse, ínÿengaftaca natjëmbana jt-siyenëse; chacmanÿena ainaniñe ndocna bacna soye ndbomnënga, y puerte tsábá jtsamëse oyeniñe; chca, ndocná chaondobená jayanama tsëngaftanga ndaye bacna soye šmojama ca. <sup>15</sup> Quem soye šmochtsejuabnaye: Bëngbe Atsebacayá ndoñe yapa betesco tonjésabësna, chca jtsemnana cha puerte uantado nÿetscángaftaca yómnayeca; chca cha yomna, ba entsanga chë bacna soyënga amana chámajbanama y chabe benache chámuatishachama y chca, atsebácánënga chamotsemnama. Cach quem soyëngámna, Jesucristbeyeca bëngbe bonshana catšata Pablo tcmonjanëbuábiamana, chë Bëngbe Bëtsá tojanma cha chaotsebomnama osertanánaca. <sup>16</sup> Chë soyëngama, Pablo nÿetsca chabe tsbuanáchangañe tonjanoyebuambá. Chéchangañe endmëna soyënga totcá josértama; y chë soyëngama, chë Bëngbe Bëtsabe soyëngama ndoñe tmonjuatsjínÿënga, y chë mora canÿe soye jtsejuabnayana y chentšana ínÿetsá juabnayënga, jtsejuabnayana y ínÿengbioye jtsabuayiynayana ndoñe ndegombre yondmëna ca. Y cachcá jtsamana inÿe soyëngaca, Bëngbe Bëtsabe uabemana palabrenguiñe. Chca chënga montsajna pochocánënga jtsemnama.

<sup>17</sup> Chíyeca, atšbe bonshánënga, tsëngaftanga chë ya šmojtsetátšëmbo chë ndoñe ndegombre soyënga abuatambayënga mochtsemnama, yejuana šmochtsantjesna; chca, chë Bëngbe Bëtsá ntšamo yomandacá ndobedecenëngbe soyëngaca ínÿënga jáingñama, tsëngaftanga ndoñe chašmondëtsemna mo uambanëngcá, ndoñe chašmondëtsajbanama jtsebomnana chë Bëngbe Bëtsabe soyënga ntšamo šmojashjachcá. <sup>18</sup> Pero atšna, Bëngbe Utabná y Atsebacayá Jesucristo sëntseimpadana, tsëngaftanga chašmotsiyena jtsamëse, chë chábentsana šmojóyëngacñe ba soyënga ntšamo tomnama jtsejuabnayëse, y chaoma tsëngaftanga cada te más tsábá cha chašmotsábuatmama. ¡Nÿetscanga cha chamotsatschuaná, mora y nÿetsca tescama! Chca chaotsemna.



## 1 San Juan

*Cristo, chë nyetsca tescama yomna tšabe vida entsanga chamotsebomnama amá*

<sup>1</sup> Bënga cbontsëbuabiamná chë Bëngbe Bëtsá ndabijana inétoyebuambnabiama, chë nyetsca tescama yomna tšabe vida entsanga chamotsebomnama iuamabiama, chë Bëngbe Bëtsá cabá quem luare ndëma orscana ya yojamnabiama. Bëngbe matscuašëngaca chabe oyebuambnayana fsënjouena y bëngbe bomínýeca cha tonjama soyënga fsënjinyë. Aíñe bënga cha fsënjinyë y bëngbe cucuátšeca fsënjábojajo. <sup>2</sup> Cha bëngbentše tonjanonýná y fsënjáninyë; chíyeca bënga chabiama cbontsëtsëtsná y cbontsabuyayiná, nda sempre vida yobomna y nda chë nyetsca tescama yomna tšabe vida entsanga chamotsebomnama iuama. Chana, chë Taitá Bëngbe Bëtsáftaca inamna, pero mora bëngbioye šojinýanyë. <sup>3</sup> Bënga tsëngaftanga cbontsabuyayiná ntšamo tifjinýe y tifjouencá, tsëngaftanga cánýiñe mo canýacá bëngaftaca chašmotsemnama. Bënga cánýiñe mo canýacá fsëndmëna chë Taitá Bëngbe Bëtsáftaca y chabe uaquiñá Jesucristoftaca. <sup>4</sup> Bënga quem soyënga tsëngaftanga cbontsëbuabiamná, bëngbe oyejuayana corente bëtsá chaotsemnama.

*Bëngbe Bëtsá endmëna chë entsangbiama binýnaya*

<sup>5</sup> Mëntsá entsemna ntšamo Jesucristbentsana tifjouencá y chca tsëngaftanga cbontsabuyayiná: Bëngbe Bëtsábeñe lempe binýniñe, lempe tšabá endmëna, y chábeñe tondaye ndoñe chca quenátsmëna. <sup>6</sup> Bënga tmojtsichamo cháftaca cánýiñe mo canýacá fsëntsemna ca, pero cabá ndoñe Bëngbe Bëtsabe cucuatsiñe, chë binýniñe tmontsemna, y chca, bacna soye juabnayënga y amënga tmojtsiyena, asna, bënga mojtsebohero y ndoñe montsama ntšamo ndegombre yomncá. <sup>7</sup> Pero bënga chë binýniñe tmojtsiyena, tšabe soye juabnayënga y amënga ntšamo Bëngbe Bëtsá iuamcá, as nyetscanga cánýiñe mo canýacá mochántsemna, y chabe uaquiñá Jesucristbe uabuáshanana buiñeca, Bëngbe Bëtsá bëngbe bacna soyënga sempre šochántsabuyajuanaye, y echanjama bënga chabe delante tšabá chamotsatsmënama.

<sup>8</sup> Bënga bacna soyënga ndoñe queftsátsbomna ca tmojtsichámëse, chca cabënga jt-senoíngñayana y ainaniñe chë ndegombre soyënga ndoñe tmonjóyëngacñe; <sup>9</sup> pero bënga ndegombre bacna soye amënga fsëndmëna ca, Bëngbe Bëtsá tmojuayanëse, cha bënga šochanjínýanyie cachá chë ntšamo šojiytsašebuachecá amá y nyetsca soyënguiñe tšabá amá yomnama; y chca, nyetsca bëngbe bacna soyënga šochanjáperdonaye y nyetsca bacna soyënga šochanjábuajuanaye. <sup>10</sup> Bënga tmojtsichamo, bacna soyënga ndoñe chibiatsma ca, chca bënga muattsichamo mo Bëngbe Bëtsá canýe bohero cuaftsemncá, y ntšamo Bëngbe Bëtsá bënga šojauyancá ainaniñe ndoñe tmonjóyëngacñe.

## 2

*Cristo, bëngbe obuauyayá*

<sup>1</sup> Tsëngaftanga mo atšbe basengcá, er atše tcbonjanéjabuache Jesucristbe tšabe noticiënguiñe chašmotsošbuáchema, quem soyënga cbontsëbuabiamná bacna soyënga ndoñe chašmondëtsamama. Pero ndánaca Crístbeñe ošbuachiyënguentšá bacna soye tojamëse, bënga canýe obuauyayá Bëngbe Bëtsabe delante montsebomna, y cha endmëna Jesucristo, chë nyetsca soyënguiñe tšabá amá. <sup>2</sup> Jesucristo tonjanóbana ndoñe nýe Bëngbe Bëtsá bënga chásuaperdonama bëngbe bacna soyëngama, ndayá quem luarentša nyetsca entsángnaca chëngbe bacna soyëngama cháuperdonama.

<sup>3</sup> Bënga ntšamo Bëngbe Bëtsá šojtsamëndacá tmojtsamëse, ndegombre mochántsetatšëmbo bënga cha imuábuatmama. <sup>4</sup> Pero nda tojajana: “Atše Bëngbe

Bëtsá sënduábuatma ca”, pero ndoñe tontsama ntšamo Bëngbe Bëtsá ibuamëndacá, cha canye bostero jtsemnana y ainaniñe chë Bëngbe Bëtsabe ndegombre soyënga ndoñe tonjóyëngacñe. <sup>5</sup> Pero nda ntšamo Bëngbe Bëtsá ibuamëndacá tojtsama, jtsinñanñayana chabe ainaniñe Bëngbe Bëtsabiama corente bonshánana yomnama, y chca, mochántsetatšëmbo bënga sempre cányiñe mo canyáca cháftaca imomnama. <sup>6</sup> Nda tojtsichamo Bëngbe Bëtsáftaca cányiñe mo canyáca yojtsemna ca, bontsemna jtsiyenana soyënga jtsamëse ntšamo Jesucristo yojëftsiyencá.

### *Canye tsëm mando*

<sup>7</sup> Atšbe bonshana entšanga, ntšamo mora cbontsëbuabiamnacá, ndoñe canye tsëm mando quenátsmëna, pero aíñe canye tempsca mando; entsemna cach tsëngaftanga Cristbe ústonënga šmonjanobiama ora šmonjanóyëngacñe mando. Quem tempsca mando entsemna ntšamo tsëngaftanga bëngbentsana šmonjouencá. <sup>8</sup> Pero masque chca endmënëse, quem cbontsëbuabiamná soye tsëngaftangbiama echántsemna mo canye tsëm mandcá. Cristo enjëftsiyena ntšamo quem Bëngbe Bëtsabe mando ndegombre yomncá y tsëngaftángnaca cachcá šmondoyena, er chë bacna juabnënga jtsebomnëse mo ibetiñcá jtsiyenana tempo ya echanjochnëngo, y chë entšangbe juabna ndegombre binñayá ya entsebuashinñinñana.

<sup>9</sup> Nda tojayana chë binñayáftaca yojtsemna ca, pero cha chabe catsátbioye tbojtsáboyënja, cha cabá tempcá, bacna juabnënga jtsebomnëse yojtsiyena, mo ibetiñcá. <sup>10</sup> Nda chabe catsátbioye tbojtsebobonshana, cha chë binñayáftaca jtsiyenana, y tondaye queochátsmëna cha bacna soye chaotsamama. <sup>11</sup> Pero nda chabe catsátbioye tbojtsáboyënja, cha bacna juabnënga jtsebomnëse jtsiyenana, mo canya ibetiñe oyenacá. Cha ndoñe ntsetatšëmbuana chë ndayá tojamama ntšamo chentšana yochjopása, er chë bacna juabnënga jtsebomnëse jtsiyenana chábioye ndoñe ntjalesénciana ntšamo tšabá yomncá chaotsamama.

<sup>12</sup> Básenga, atše cbontsëbuabiamná Bëngbe Bëtsá tsëngaftangbe bacna soyënga tcmojáperdonama, ndayá Jesús tojanma sóyeca. <sup>13</sup> Taitanga, tsëngaftanga cbontsëbuabiamná, er tsëngaftanga ya šmonjuábuatmana chë quem luare jobojátšama orscana ya inamná. Tsëngaftanga bobontsëgnaca cbontsëbuabiamná, er tsëngaftanga ya chë nyetsca bacna soyënga mandayá Satanás šmonjayëñaná.

<sup>14</sup> Básenga, tsëngaftanga tcbonjubuábiamna, er tsëngaftanga chë Taitá ya šmonjuábuatmana. Taitanga, tsëngaftanga tcbonjubuábiamna, er tsëngaftanga ya šmonjuábuatmana chë quem luare jobojátšama orscana ya inamná. Bobontsënga, tsëngaftángnaca tcbonjubuábiamna, er tsëngaftanga bëtscá añemo ainaniñe šmambá, y Bëngbe Bëtsabe palabrama sempre tsëngaftangbe ainaniñe šmondëjuabná, y chë nyetsca bacna soyënga mandayá šmonjayëñaná.

<sup>15</sup> Ndoñe matsbošana oyejuayënga jtsemnana nye quem luarentša soyëngaca, ni nye chë soyënga jtsebomnama. Nda yapa tojtseboše quem luarentša bacna soyënga jtsebomnama, cha ndoñe chë Taitábioye bondbobonshana. <sup>16</sup> Er chë nye quem luarama enójuabnayënga mëntsá juabnënga mondbomna: yapa jtsebošana jtsebomnama ntšamo chë ainaniñe bacna juabnënga bomnënga mondbetsebošcá; yapa jtsebošana nye ndayá tmojatinñe soye; y yapa jtsenábotamnayana chë tmobomna soyëngama. Chë juabnënga Bëngbe Bëtsábiocana ndoñe ntsóbocanana, ndayá nye chë quem luarama enójuabnayëngbentsana. <sup>17</sup> Pero quem luare echanjopochóca y nyetsca chentša soyënga, chë entšanga bacna juabnëngaca yapa imoboše jtsebomnama soyëngnaca. Pero nda ntšamo Bëngbe Bëtsá yobošcá tojtsama, cha chë nyetsca tescama yomna tšabe vida echántsebomna.

### *Chë Cristbe contra yomná*

<sup>18</sup> Básenga, quem luare jopochócama tempo ya entsobeco. Ntšamo tšëngaftanga šmonjouencá, quem tempo echanjabo chë Cristbe contra yomná. Pero morna banga Cristbe contra imomnënga tmonjábocana. Chca bënga montsetátšëmbo chë quem luare jopochócama tempo ya yojtsobecuama. <sup>19</sup> Chënga cach bëngbentsana tmonjábocana. Pero chënga Jesucristbeñe ndoñe tmonjanošbuachená ntšamo bënga mondošbuachecá, er chënga ntšamo bënga montsošbuachecá mamojtsošbuachese, cach bëngaftaca matmënjoquedanga. Pero chca tonjopasá, ndegombre jtsotatšëmbuama ntšamo bënga Jesucristbeñe mondošbuachecá, chënga nyetscanga ndoñe mondošbuáchema.

<sup>20</sup> Pero Cristo, chë Uamaná, tšëngaftanga tmonjabacacá, y cha tonjama chë Uámana Espíritu tšëngaftangbe ainaniñe cháúamashënguama; y nyetsca tšëngaftanga chë ndegombre soyënga šmondétatšëmbo. <sup>21</sup> Atše cbontsëbuabiamná, ndoñe chë ndegombre soyëngama ndoñe šmondétatšëmbuama, ndayá aíñe šmotatšëmbuama; er tšëngaftanga šmondétatšëmbo chë ndegombre soyënga y ndoñe ndegombre soyënga cányiñe jtsemnana ndoñe yondopodénama. <sup>22</sup> Nda tojayana Jesús chë Bëngbe Bëtsabe Uámana Uabuayaná, chë Cristo ndoñe yondmëna ca, chana jtsebosterana. Cha jtsemnana chë Cristbe contra yomná, nda iuichamo Cristo Bëngbe Bëtsabe Uaquiñá ndoñe yondmëna ca, y chca, cha Bëngbe Bëtsabiana ndoñe ntsejuabnayana cha chë Taitá bëtsemnana. <sup>23</sup> Nda tojtsichamo Cristo Bëngbe Bëtsabe Uaquiñá ndoñe yondmëna ca, cha chë Taitáftaca cányiñe mo canyácá ndoñe ntsemnana. Pero nda entsángbeñe tojayana, Cristo aíñe Bëngbe Bëtsabe Uaquiñá endmëna ca, chana aíñe chë Taitáftaca cányiñe mo canyácá jtsemnana.

<sup>24</sup> Tšëngaftanga, chë Cristbe ústonënga šmojanóbiana orscana šmojanuena soye, tšëngaftangbe ainaniñe šmochtsambaye. Chca chašmojtsamëse, tšëngaftanga chë Uaquiñá y chë Taitáftaca cányiñe mo canyácá šmochántsemna. <sup>25</sup> Y quem soye entsemna ntšamo Cristo šojéftsasëbuachená: chë nyetsca tescama yomna tšabe vida jtsebomnana.

<sup>26</sup> Atše chca cbontsëbuabiamná, chë tšëngaftanga jáingñayama imojtsebošëngbiana chašmotsetatšëmbuama. <sup>27</sup> Pero Cristo tcmojanabacacá ora, Uámana Espíritu šmojanóyëngacñe, y mora tšëngaftangbe ainaniñe Uámana Espíritu šmontsebmna, y ndoñe quenátseyta ndocná más chacmotsabuátambama, er chë Uámana Espíritu lempe cmontsabatambá; y cha endabatambá ndegombre soyënga, y bostero soyënga ndoñe. Mëntsá, ntšamo chë Uámana Espíritu tcmojabatambacá jtsiyenëse, Crísoftaca cányiñe mo canyácá šmochtsemna.

<sup>28</sup> Y mora básenga, Crísoftaca cányiñe mo canyácá šmochtsemna, chca, cha chaojabáisebocna ora, chábeñe jtsošbuáchiyëse, bënga añémoca chamotsemnana y ndoñe chamondëtsëuatjama, bënga chabe delante chamojtsemna ora. <sup>29</sup> Tšëngaftanga šmontsetátšëmbo Jesucristo nyetsca soyënguiñe tšabá amá yomnana. Chcasna, cmontsamna jtsetatšëmbuana, nyetscanga ntšamo Bëngbe Bëtsá yobošcá tmojtsamëngna, Bëngbe Bëtsabe básenga imomnana.

### 3

#### *Crístbeñe ošbuáchiyënga, Bëngbe Bëtsabe básenga*

<sup>1</sup> Menójuabonga, ntsachetšá Bëngbe Bëtsá chë Taitá šondábabuanjeshanama. Chabe bonshánana tša bëtscá endmënayeca, bënga šondëubuabatma chabe básenga ca, y ndegombre bënga chca mondmëna. Chë causa chë nye quem luarama enójuabnayënga ndoñe quenátësertana ntšamo bënga imomnana, er chënga cha ndoñe tmonjanábuatmana.

<sup>2</sup> Atšbe bonshana entsanga, mora bënga ya Bëngbe Bëtsabe básenga montsemna. Y masque cabá ndoñe quemuátstatsëmbo ntšamo más chcoye bënga mochtsemnana, aíñe mondétatšëmbo, Jesucristo chaojabáisebocna ora bënga cachacá mochtsemnana, er bënga mochanjobenaye jinýama ntšamo cha ndegombre yomncá. <sup>3</sup> Y nda chca chábeñe

puerte jtsošbuáchiyëse tojtsobátmana, bacna soyënga amana jtsajbanana, más tšabia jtsemnana, ntšamo cach Cristo yomncá, lempe tšabia y bacna soye ndbomná.

<sup>4</sup> Pero nda bacna soye tojama, chana ntšamo Bëngbe Bëtsá tojëftsemandacá jtsaboténana; er bacna soye jamana endmëna, jtsabotena ntšamo Bëngbe Bëtsá tojëftsemandacá. <sup>5</sup> Tšëngaftanga ya šmondétatšëmbo Jesucristo quem luaroye tojánabo bëngbe bacna soyënga jabétsabuajuanama, y cha ni mo canyë bacna soye ndoñe yondbomnana. <sup>6</sup> Chcasna, nda cányïñe mo canyácá cháftaca nyëts tempo tojtsemna, ndoñe ntsiyenana bacna soyënga jtsamëse. Pero nda tojtsiyena bacna soyënga jtsamëse, Jesucristbiana ndoñe tbonjosertá y ndoñe yondétatšëmbo ntšamo cha bétsemnana. <sup>7</sup> Atšbe básenga, ndocná chacmondaingñe: nda nyëtsca soyënguiñe tšabá tojtsama, cha canyë tšabá mándbomna entšá jtsemnana, ntšamo Jesucristo yomncá; <sup>8</sup> pero nda tojtsiyena bacna soyënga jtsamëse, chabe ainaniñe Satanás jtsemándayana, er Satanás quem luare jobojátšama orscana bacna soyënga iuëtsama. Bëngbe Bëtsabe Uaquiñá nya quem soyama tojabo: chë Satanabe soyënga jabétsepochochama.

<sup>9</sup> Ndocná Bëngbe Bëtsabe uaquiñá tojtsemná jtsiyenana bacna soyënga jtsamëse, er cha jtsebmomnana chë Bëngbe Bëtsá tbojuántšame tšabe vida, y Bëngbe Bëtsá chabe Taitá endmëna. Chiyeca cha ndoñe ntsiyenana bacna soyënga jtsamëse. <sup>10</sup> Corente jtsotatšëmbuana ndëmuanyënga Bëngbe Bëtsabe básenga imomnana y ndëmuanyënga Satanabe básenga; ndëmuanyëngnaca ntšamo tšabá yomncá ndoñe tmontsana o chabe catšata ndoñe tmontsebomnana, ndoñe ntsemnana Bëngbe Bëtsabe básenga.

### *Nyëtscanga jtsenbobonshánana*

<sup>11</sup> Quem buayenana entsemna ntšamo tšëngaftanga šmojanuena, tšëngaftanga Cristbe ústonënga šmonjanobiama orscana: nyëtscanga šontsamna jtsenbobonshánana. <sup>12</sup> Ndoñe Caincá muatjama. Chabe ainaniñe Satanás yojamánda, y chiyeca, chabe uabentsábioye tbojtsanóba. ¿Y ndáyeca tbojtsanóba? Cha ndoñe tšabá yonjánama; chabe uabentsana aíñe; chiyeca tbojtsanóba.

<sup>13</sup> Jesucristbeyeca atšbe catšátanga, ndoñe šmattsenjnanaye chë nyë quem luarama enójuabnayënga cmojtsëbuayënjama. <sup>14</sup> Bënga mondétatšëmbo, bënga tempo monjaniyena chë nyë quem luarama enójuabnayënga mondoyencá, y chca, Bëngbe Bëtsabiana mo obanëngcá monjamna, er bënga monjaniyena ntšamo Bëngbe Bëtsá ndoñe yondëmandacá. Pero Bëngbe Bëtsá tonjama mora bënga tsëm vida chamotsebomnana, y chca, mo ndegombre ainëngcá montsemna. Chca mondétatšëmbo, er bënga bëngbe catšátangbiyey mondábabuanyëshana. Nda chabe catšátbiyey ndoñe tbonsebomnana, cha cabá mo obanacá jtsiyenana. <sup>15</sup> Nda cachabe catšátbiyey tbojtsáboyënja, cha jtsemnana mo entšanga obanayacá. Y tšëngaftanga šmondétatšëmbo entšanga obanayá ndoñe ntsoybenana jtsiyenana, chë nyëtsca tescama yomna tšabe vida chabe ainaniñe jtsebmomnëse.

<sup>16</sup> Ndayá chë jtsenbobonshánana bétsemnana mëntšá montsetatšëmbo: Jesucristo chabe derecho vida jtsobomñana cachcá tojanonyá y bëngbiana tojanóbana; cachcá bënga šontsamna jtsemnana, sempre jtseprontánana chë Jesucristbeyeca bëngbe catšátangbiana jóbanama. <sup>17</sup> Canya bomnana tojtsebmomna y catšátbiyey uajabotá tbojtsonyá, pero chabiana ndoñe tbonjongmé y ndoñe tbonjuájabuache, cha ndoñe ntsoybenana Bëngbe Bëtsabiana ainaniñe bonshánana jtsebmomnana. <sup>18</sup> Atšbe básenga, ndoñe quešnátamna nyë bëngbe catšátanga imuababuányëshana ca jatichámua, y nyë chë bonshánana jatóyebuambnayana; pero ndegombre šontsamna ndayánaca jamana, chca, jinyanñiyama, bënga ndegombre inyëngbiana imuababuányëshana.

### *Bëngbe Bëtsabe delante natjëmbana ainánaca entšanga*

<sup>19</sup> Chcase bënga mochántsetatšëmbo, ntšamo chë Bëngbe Bëtsabe ndegombre soyënga yomncá bënga imojtsamama. Y bënga ndoñe quemochátenocochinñena, Bëngbe Bëtsábiocha



jtsemnama merecido ndoñe mondbuájona ca tmojtsejuabná ora; y bēngbe ainana natjēmbana Bēngbe Bētsabe delante echántsemna. <sup>20</sup> Bēnga chca bēngbe ainaniñe tmojtsejuabná ora, bēnga montsobena natjēmbana ainana jtsebomnana, er Bēngbe Bētsá corente jtsotatsēmbñana ntšamo bēngbe ainana yomnana, y cha lempe yotátšēmo. <sup>21</sup> Atšbe bonshana entšanga, bēnga ndoñe bacna soye tmonjama ca bēngbe ainaniñe tmojtsejuabnase, jtsobenana añémoca jtsemnana y tondayama ntsauatjácá Bēngbe Bētsabe delante jtsemnana. <sup>22</sup> Y cha lempe ntšamo chamojotjañcá šochanjátšataye, er bēnga montsama ntšamo Bēngbe Bētsá ibuamandacá y ndayá chabe bominyiñe tšabá yomncá. <sup>23</sup> Y chabe mando endmēna: bēnga chabe Uaquiñá Jesucristbeñe jtsošbuáchiyana, y bēnga nyetscanga jtsenbobonshánana ntšamo Jesús šojéftsamēndacá. <sup>24</sup> Ntšamo Bēngbe Bētsá tojéftsemandacá amēnga, Bēngbe Bētsáftaca cányiñe mo canyácá jtsemnana, y cha sempre chēngaftaca cányiñe mo canyácá echanjéftsemna. Y quem sóyeca bēnga montsobena jtsetatsēmbuana cha bēngaftaca iuétsemnama: Uámana Espíritu bēngbe ainaniñe cháumashēnguama cha tojama.

## 4

### *Chē Bēngbe Bētsabe Espíritu y chē Cristbe uayayabe espíritu*

<sup>1</sup> Atšbe bonshana entšanga, nyetscanga chē Bēngbe Bētsabe juábnaca imoyebuambná ca ichámēngbioye ndoñe šmattsayaunana; botamana šmochjuarrepára corente jtsetatsēmbuama chēnga aíñe o ndoñe chē Bēngbe Bētsabe juábnaca imóyebuambnama. Quem tempo banga Bēngbe Bētsabe ndoñe ndegombre juabna oyebuambnayēnga quem luarējana mondajna. Chē causa tšēngaftanga cmontsamna botamana chēngbiamá juarrepárana. <sup>2</sup> Chē Bēngbe Bētsabe Espíritu ndegombre imobomnēngbiamá tšēngaftanga mēntšá šmontsobena jtsetatsēmbuana: nda tojayana Jesucristo quem luaroye aíñe entšacá tojánabo ca, cha ndegombre chē Bēngbe Bētsabe Espíritu yojtsebomna. <sup>3</sup> Pero nda ndoñe chca Jesucristbiamá tonjayana, cha Bēngbe Bētsabe Espíritu ndoñe yontsebomna; inyētšá, chana chē Cristbe contra yomnabe espíritu yojtsebomna. Tšēngaftanga šmojouena chē espíritu yochjabama; pero ndegombre cha ya quem luarentše entsemna.

<sup>4</sup> Atšbe básenga, tšēngaftanga Bēngbe Bētsábenga šmondmēna y ndoñe šmonjalesenciá chē Bēngbe Bētsabe ndoñe ndegombre juabna oyebuambnayēnga tšēngaftangbioye chacmaingñema, er chē nyets tempo tšēngaftangbe ainaniñe vida endbomná, chē nye quem luarama enójuabnayēngbe ainaniñe mándayabiamá más obená endmēna. <sup>5</sup> Chē Bēngbe Bētsabe ndoñe ndegombre juabna oyebuambnayēngna chē nye quem luarama enójuabnayēnguentšana mondmēna, chíyeca chēnga nye quem luarentša soyēngama jtsóyebuambnayana, y chē nye quem luarama enójuabnayēnga chēnga jtsayaunanana. <sup>6</sup> Pero bēnga Bēngbe Bētsábenga mondmēna. Nda Bēngbe Bētsábioye tbojtsabuátma, bēngbioye jtsayaunanana; pero nda Bēngbe Bētsábioye ndoñe tbontsabuatma, cha bēnga ndoñe ntsayaunanana. Chiñe bēnga montsobena jtsetatsēmbuana nda chē ndegombre soyēnga jóyebuambayama ama espíritu yobomnabiamá, y nda chē ínñyēngbioye jáingñama ama espíritu yobomnabiámna.

### *Chē bonshánana Bēngbe Bētsábocana yóbocana*

<sup>7</sup> Atšbe bonshana entšanga, chē bonshánana Bēngbe Bētsábocana endóbocana; chcase, bēnga šontsamna nyetscanga jtsenbobonshánana. Nda Bēngbe Bētsábioye y chē inye entšángbioye tojtsababuánñeshana, cha Bēngbe Bētsabe uaquiñá jtsemnana y Bēngbe Bētsábioye jtsabuátmana. <sup>8</sup> Nda ndoñe chca tontsebobonshana, cha Bēngbe Bētsábioye ndoñe ntsábuátmana, er Bēngbe Bētsá bonshanánaca nyetsca soyēnga jamana. <sup>9</sup> Bēngbe Bētsá šonjinñanyé bēnga šuababuánñeshanana, cha chē nye canye Uaquiñá ibobomná quem luaroye jíchmuase; cha tbojanichmó, bēnga chábeyeca chē nyetsca tescama yomna tšabe vida chamotsebomnama. <sup>10</sup> Bēngbe Bētsabe bonshánana mēntšá

endmëna: ndoñe quenátsmëna bënga Bëngbe Bëtsá imobobonshánayeca, ndayá cha bënga šojánababuanÿeshanayeca, y chabe Uaquiñá tbojanichmó, cha jóbanëse, bënga bëngbe bacna soyëngama perdonánënga chamotsemnama.

<sup>11</sup> Atšbe bonshana entsanga, Bëngbe Bëtsá chca šuababuánÿeshana; chcasna, bëngnaca šontsamna nÿetscanga jtsebobonshánana. <sup>12</sup> Ndocná ndocna te Bëngbe Bëtsábioye tbonjinÿe. Bënga nÿetscanga tmojtsebobonshánëse, Bëngbe Bëtsá nÿets tempo bëngaftaca echántsemna, y chabe bonshánana puerte bëtsá bëngbeñe echántsemna. <sup>13</sup> Bënga mëntšá montsobena ndegombre jtsetatšëmbuana bënga Bëngbe Bëtsáftaca imomnama y cha bëngaftaca: cha tonjanma chabe Espiritu bëngbe ainaniñe cháumashënguama. <sup>14</sup> Y cach bënga fsënjÿe y entsanga fsëntsëtsësná, chë Taitá chabe Uaquiñá tbojichmoma, quem luarentša entsanga jabátsebacama. <sup>15</sup> Ndánaca tojayana Jesús Bëngbe Bëtsabe Uaquiñá yomna ca, cha Bëngbe Bëtsáftaca cánÿiñe echántsemna y Bëngbe Bëtsánaca sempre cháftaca cánÿiñe mo canÿacá.

<sup>16</sup> Chcase bënga montsetátšëmbo y montsošbuaché ndegombre Bëngbe Bëtsá bënga šuababuánÿeshanama. Bëngbe Bëtsá nÿetsca soyënga bonshanánaca jamana y nda Bëngbe Bëtsá y chë inÿe entsanga sempre tojtsababuánÿeshana, cha Bëngbe Bëtsáftaca cánÿiñe mo canÿacá jtsemnana y Bëngbe Bëtsánaca sempre cháftaca cánÿiñe mo canÿacá. <sup>17</sup> Chca, Bëngbe Bëtsabe bonshánana puerte bëtsá bëngbeñe echántsemna, bënga bëts añémoca y tondayama ntsauatjá chamotsemnama, chë tšabá o ndoñe tšabá tmonjamama entsangbiamama jayanama Cristo yochjésabo orscama; er bënga Jesucrísoftaca cánÿiñe mo canÿacá jtsemnëse, quem luarentše mondmëna ntšamo Jesucristo endmëncá. <sup>18</sup> Nda Bëngbe Bëtsá y chë inÿe entsanga tojtsababuánÿeshana, tondayama ntsauatjana; bënga corente tmojtsebobonshana ora, ndoñe ntsopodénana uatjana jtsebomnana. Canÿe entšá tojtsauatja ora, jtsemnana mo chabe castigo ya cuafjoboatšecá. Chca, nda uatjana tojtsebomna, Bëngbe Bëtsábioye y chë inÿe entsanga cha ndoñe corente yondábabuanÿeshana, ntšamo Bëngbe Bëtsá bënga šuababuanÿeshancá.

<sup>19</sup> Natsana Bëngbe Bëtsá šojánababuanÿeshana, y chíyeca bënga, cha y chë inÿe entsanga imuababuánÿeshana. <sup>20</sup> Nda tojayana: “Atšë Bëngbe Bëtsábioye sëndbobonshana ca”, pero cachca ora cachabe catsátbioye tbojtsáboyënja, cha canÿe bostero jtsemnana. Canÿa aíñe jtsobenana chabe catsata jinÿama; y cha chë catsátbioye ndoñe tbontsebobonshana, ndegombre cha Bëngbe Bëtsábioye ndoñe bondbobonshana, ndábioye jinÿama ndoñe ntsobenana. <sup>21</sup> Y bënga quem mando chábentšana tmonjanóyëngacñe: nda Bëngbe Bëtsábioye tbojtsebobonshana, cachabe catsátbioynaca chabotsebobonshana ca.

## 5

### *Chë Jesucristbeñe ošbuachiyá endobena Satanásbe soyënga jayënjanana*

<sup>1</sup> Nda tojtsošbuaché Jesús chë Uámama Uabuayaná, chë Cristo yomnama, cha Bëngbe Bëtsabe uaquiñá jtsemnana; y nda canÿe taitábioye tbojtsebobonshana, chë taitabe uaquiñábioynaca cha jtsebobonshánana. <sup>2</sup> Bënga Bëngbe Bëtsá tmojtsebobonshana y ntšamo cha tojtsemandacá tmojtsamëse, bënga ndegombre mochántsetatšëmbo, chë Bëngbe Bëtsabe basengbioynaca bënga imuababuánÿeshanama. <sup>3</sup> Bënga Bëngbe Bëtsábioye imobobonshánama quem soyiñe jtsinÿnana: bënga ntšamo Bëngbe Bëtsá tomandacá tmojtsamëse. Y ndayá Bëngbe Bëtsá yomandacá ndoñe yapa totcá quenátsmëna bënga chamotsamama. <sup>4</sup> Nda Bëngbe Bëtsabe uaquiñá tomna, chana jáyënjanana quem luarentša entsanga y soyënga ntšamo Satanás yomandacá. Quem luarentša entsanga y soyënga ntšamo Satanás yomandacá, Crístbeñe bënga imošbuachéyeca montsobena bënga jayënjanana. <sup>5</sup> Nÿe nda, Jesús Bëngbe Bëtsabe Uaquiñá yomnama tojtsošbuaché, cha jtsobenana chë entsanga y soyënga ntšamo Satanás yomandacá jayënjanana; ndocná más.

*Bëngbe Bëtsá tojinÿanjé ntšamo chabe Uaquiñabiama ndegombre yomncá*

<sup>6</sup> Cach Jesucristo endmëna nda quem luaroye tojánabo y mëntsá tojanenonÿinÿé: búyesheca cha tmojanabaye ora, y buiñe juabuáshanëse cha tonjanóbana ora. Cha ndoñe tonjanenonÿinÿé nÿe búyesheca, ndayá búyesheca y buiñeca. Cach Uámana Espíritu entsobena jayanana chca ndegombre bétsemnama Jesusbiamana, er chë Espíritu endmëna chë sempre ndegombre oyebuambnayá. <sup>7</sup> Endmëna unga soyënga, ndayá iuinÿanÿná ntšamo ndegombre yomncá Jesusbiamana: <sup>8</sup> Espíritu, búyeshe y buiñe; y chë unga soyënga lempe cachcá Jesusbiamana jtsinÿanÿnayana. <sup>9</sup> Bënga mondbétsejuabnaye, ndayá entšanga tmojinÿe ca tmojtsichámuama mo ndegombre cuaftsemncá, pero ndayá Bëngbe Bëtsá tojtsichamcá chë ndegombre soye jtsemnana y puerte jtsámanana, er chë ndegombre soye ntšamo cha tojtsichamcá, endmëna ndayá chabe Uaquiñabiama iuichamcá. <sup>10</sup> Nda Bëngbe Bëtsabe Uaquiñábeñe tojtsošbuaché, cha chca nÿets tempo chabe ainaniñe jtsejuabnayana; nda Bëngbe Bëtsábeñe ndoñe tontsošbuaché, cha chca jtsamana mo Bëngbe Bëtsá canÿe bostero cuaftsemncá, er chë Bëngbe Bëtsá chabe Uaquiñabiama tojayana soyama cha jtsejuabnayana ndoñe ndegombre yontsemna ca. <sup>11</sup> Ntšamo Bëngbe Bëtsá chabe Uaquiñabiama tojayancá mëntsá entsemna: Bëngbe Bëtsá bëngbiamana tojama chë nÿetsca tescama yomna tšabe vida chamotsebomnama; y quem vida chabe Uaquiñábeñe entsemna. <sup>12</sup> Nda Bëngbe Bëtsabe Uaquiñáftaca cánÿiñe mo canÿacá tojtsemna, cha chë tšabe vídnaca jtsebomnana; pero nda chë Bëngbe Bëtsabe Uaquiñáftaca cánÿiñe mo canÿacá ndoñe tontsemna, cha chë nÿetsca tescama yomna tšabe vida ndoñe ntsebomnana ca.

*Inÿe soyëngama jábuayenama y jtadiósoftanama*

<sup>13</sup> Tšëngaftanga, chë Bëngbe Bëtsabe Uaquiñábeñe šmošbuachéngbioye quem soyënga cbontsëbuabiamná, ndegombre chašmotsetatšëmbuama chë nÿetsca tescama yomna tšabe vida šmojtsebomnama.

<sup>14</sup> Bënga bëts añémoca y ndauatjca Bëngbe Bëtsabe delante mondmëna, er bënga mondëtatšëmbo, nderado ntšamo chaotsemnama cha tojtsebošcá bënga tmojotjañe ora, cha bënga šnétsayaunanama. <sup>15</sup> nderado ndayá chca Bëngbe Bëtsábioye tmojtsotjanañe ora, cha bënga joyaunayana; bënga mondëtatšëmbo chca ndegombre yomnama, y chca, bëngnaca montsetátšëmbo, ndayánaca chábioye bënga chamojotjañcá cha šochjátšatayama.

<sup>16</sup> Nda cachabe catsátbioye tbojinÿe canÿe bacna soye tojtsamama, pero chë bacna soye tojamentšana cha perdonaná jtsemnana cabá tojtsopodénëse, chábioye bontsemna Bëngbe Bëtsá jaimpádana, y chca, Bëngbe Bëtsá echanjama chë catsata chë nÿetsca tescama yomna tšabe vida chaotsebomnama, cha chca tojamentšana perdonaná jtsemnana cabá tojtsopodénëse. Pero canÿe bacna soye endmëna, y chca tojamama canÿa ndoñe ntsoobenana perdonaná jtsemnana, y chca, cha jabocnana canÿa nÿetsca tescama castiganá chaotsemnama, y atše ndoñe quetsátichamo chë bacna soyama yojtsemna Bëngbe Bëtsá jtseimpadánana chaboperdonama ca. <sup>17</sup> Nda tojtsama ntšamo Bëngbe Bëtsá ndoñe yondëmandacá, cha bacna soye jtsamana; pero nÿetsca bacna soyënga ntšamo canÿa tojtsamcá, ndoñe ntjamana cha ndëperdonaná chaotsemnama.

<sup>18</sup> Bënga mondëtatšëmbo, nda Bëngbe Bëtsábioye mo taitacá tbojtsebomna, cha ndoñe ntsiyenana bacna soyënga jtsamëse, er chë Bëngbe Bëtsábentsana Onÿnaná chábioye jtsinÿenana, y Satanás, chë nÿetsca bacna soyënga amëndayá, tondaye ntsoobenana chábioye jabórlana. <sup>19</sup> Bënga mondëtatšëmbo, bënga chë Crístbeñe ošbuáchiyënga Bëngbe Bëtsábënga imomnama, y chë quem luarentša inÿe entšanga Satanasbe cucuatšinë imomnama. <sup>20</sup> Bëngnaca mondëtatšëmbo Bëngbe Bëtsabe Uaquiñá tojabama, y cha iuama bënga osertánana chamotsebomnama, chë ndegombre Bëngbe Bëtsá yomná jtsabuatomama. Bënga chë ndegombráftaca cánÿiñe mo canÿacá mondmëna, bënga chabe Uaquiñáftaca cánÿiñe bétsemnayeca. Cha chë ndegombre Bëngbe Bëtsá endmëna, y nda

chë nyetsca tescama yomna tšabe vida entšanga chamotsebomnama iuamá. <sup>21</sup> Atšbe básenga, ndoñe šmattsadorana cach entšangbe pormana soyënga, chë ndayama ínÿenga mondbétsejuabnaye diosënga yomna ca.



## 2 San Juan

### *Jtsiyenana ndegombre soyëngaca y nyëtscanga jtsenbobonshánëse*

<sup>1</sup> Atše chë bëtsëjema, quem tsbuanácha sëntsabiamná, chë uámana mamá, chë Bëngbe Bëtsabe bocacáná y chabe basengbiámnaca, ndëmuanyënga atše ndegombre sëndábabuanyëshana. Y ndoñe nyë atše chënga quetsátababuanyëshana, ndayá nyëtscanga chë Bëngbe Bëtsabe ndegombre soyënga uabuátmëngnaca. <sup>2</sup> Atše cbontsababuanyëshana, chë ndegombre soyënga bëngbe ainaniñe mondbómnyayeca, y chë soyënga bëngbe ainaniñe sempre echántsemna.

<sup>3</sup> Atše sëntseimpadana Bëngbe Bëtsá chë Taitá, y Jesucristo chë Taitabe Uaquiñá, chaboma tsëngaftangbeñe tsabe bendicionënga chaotsemnama, chata tsëngaftangbioye chácmalastemama, y chaboma tsëngaftangbe ainaniñe tsabe ebionana chašmotsebmoma. Quem soyënga, bënga chë ndegombre soyënga uabuátmënga y nyëtscanga mondenbobonshánëngaftaca echántsemna.

<sup>4</sup> Puerte sënjoyejuá, er atše acbe básenguëntšë báseftanga sënjányëna chë ndegombre soyënga ntšamo Bëngbe Bëtsá chë Taitá šojamëndacá jtsamëse. <sup>5</sup> Y mora, uámana mamá, cbontseimpadana Diosmanda nyëtscanga chamotsenbobonshana. Chë cbontsëbuabiamná soye ndoñe canyë tsëm mando quenátsmëna, ndayá cach Cristbe ústonënga tmonjanobiama ora tmonjanóyëngacñe mando. <sup>6</sup> Bënga, Bëngbe Bëtsá y chë inyë entšanga imababuanyëshanama jtsinynana, bënga ntšamo Bëngbe Bëtsá tojamandacá jtsamëse tmojtsiyenama. Y chabe mando, ntšamo Cristbe ústonënga šmonjanobiama ora šmojanuencá, mëntšá endmëna: jtsiyenana Bëngbe Bëtsá y chë inyë entšanga jtsababuányëshanëse.

### *Chë entšángbioye áingñayënga*

<sup>7</sup> Quem luarëjana banga entšángbioye áingñayënga mondajna, y chënga jtsejuabnayana Jesucristo quem luaroye ndoñe mo canyë ndegombre entšacá tonjánabo ca. Nda chca tojtsejuabná, cha jtsemnana chë aingñayá y Cristbe contra yomná. <sup>8</sup> Chëngbiamama cuedado šmochtsebmoma. Ndoñe chcase, tsëngaftanga ndoñe quešmochátsbmoma chë Cristbiamama cach tsëngaftangbe trabajuentshana tojóbocna soyënga, y ndoñe quešmochatosháchiñe lempe ntšamo Bëngbe Bëtsá tsëngaftangbioye jatšatayama yojtsebošcá.

<sup>9</sup> Ndánaca chë Cristo tojanabuatambá soyëngama inyë soyënga tojatabuatambá, cha ndoñe Bëngbe Bëtsáftaca cányiñe mo canyáca ntsemnana; pero nda sempre ntšamo Cristo tojanbuatëmbacá tojtsabuatambá, cha aíñe chë Taitáftaca y chabe Uaquiñáftaca cányiñe mo canyáca jtsemnana. <sup>10</sup> Ndánaca tsëngaftangbioye tojá jabuátambama, pero ndoñe ndayá Cristo tojanabuatambacá tojtsebuátëmbase, cha ndoñe šmatjofja, ni mo šmatjachuaye. <sup>11</sup> Er nda chábioye tbojachuase, chábioye jtsajabuáchanana chë bacna soye chaomama.

### *Jtadiósoftanama*

<sup>12</sup> Atše ba soyënga sëntsebmoma tsëngaftanga jáuyanama, pero ndoñe quetsátsboše tsbuanáchañe jubuábiamama. Atše sëntsejuabná aíñe chjobenaye tsëngaftangbioye jama, jobenayama nyëtscángaftaca jencuéntama, chca, bëngbe oyejuayana puerte bëtscá chaotsemnama.

<sup>13</sup> Crístbeyeca acbe quenata, chë Bëngbe Bëtsabe bocacáná, chabe básenga cmontsacheuaná.

## 3 San Juan

### *Juan Gaybiama puerte tšabá tojanoyebuambá*

<sup>1</sup> Atše chë bëtsějema, quem tsbuanácha atšbe bonshana amigo Gaybiama sentsabiamná. Chábioye atše ndegombre sëndbobonshana.

<sup>2</sup> Atšbe bonshaná y Crístbeyeca atšbe catšata, Bëngbe Bëtsá sëntseimpadana aca tšabia nyetsca soyënguiñe chacotsemnama y salud bomnánaca. Atše sëntsetatšëmbo aca ainaniñe tšabá cotsomñama, Bëngbe Bëtsabiama bëtská tšabe juabnënga chentše jtse-bomnëse. <sup>3</sup> Er báseftanga Jesucristbeñe ošbuáchiyënga átšbioye tmonjabo y šmonjacuentá ntšamo aca chë ndegombre soyënga yomncá icuamama, aca chë ndegombre soyënga jtsamëse icoyenama. Chíyeca atše bëtská sëntsoyejuá. <sup>4</sup> Tondaye jamana atše nyetsá oyejuayá chaitsemnama, ndayá nye jouenana chë atšbe basengcá imoquedánënga ntšamo chë ndegombre soyënga yomncá jtsamëse imoyenama.

<sup>5</sup> Atšbe bonshaná, aca contsama ntšamo Jesucristo tonjanbuatëmbacá, aca chë ínÿënga Jesucristbeñe ošbuáchiyënga jujabuáchama ndayánaca tcojama ora, y masna, chë inÿe luaroquëngocana ashjajnëngbiama ndayánaca tcojtsama ora. <sup>6</sup> Chë átšbioye tmonjabënga tmonjoyebuambá, chë Jesucristbeñe ošbuáchiyënga quem luarentše mond-benenefjnëngbe delante, aca tša chënga icuababuánÿeshanama. Diosmanda, ntšamo tojtsëjabotcá chënga cochjújabuache, chca, chënga chamobená tšabá inÿe luarëngoye játama. Chënga mondmëna Bëngbe Bëtsabiama trabájayënga; chcasna, chëngaftaca cochjama ntšamo chënga chama merecido imobuajoncá. <sup>7</sup> Chca cochjama, er chënga chëngbe pueblënguentšana tmojëftsebocana Jesucristbe soyëngama entšángbioye jábuayenama, y chënga chama tondaye crocénana quematóyëngacañe chë Jesucristbeñe ndošbuáchiyëngbe cucuatšentšana. <sup>8</sup> Chíyeca bënga šontsamna chëngbiama jtsantješnana y jtsëjabuáchanana, chca, bënga chamobená cánÿiñe chëngaftaca jatrabájana, entšángbioye chë ndegombre soyëngama jábuayenama, ndayá chënga mondama.

### *Diótfes ndoñe tšabá tonjanma; Demetrio añe*

<sup>9</sup> Atše canÿe tsbuanácha chë Jesucristbeñe ošbuáchiyënga chentše mondbenenefjnëngbioye sënjubuábiamana, pero Diótfes ndoñe yontsuenana ntšamo atše sentsichamcá, er cha yojtseboše chë ínÿëngbioye nye jtsamëndayana. <sup>10</sup> Chíyeca atše choye chajjá ora, ndayá cha yojtsamama chanjauácacana. Cha sempre bacá yojtsoínÿana y uayátsenaye soyënga bëngbe contra yojtsichamo. Y chë soye chábioye ndoñe bontsobastana; chana chë Jesucristbeñe ošbuáchiyënga chabe puebloye tmojáshjajnënga ndoñe ntjúbuajana, y chënga júbuajama tmojtsebošëngbioye ndoñe yontsalesenciana chca chamomama, y chë Jesucristbeñe ošbuáchiyënga bëtsemnama imnétsenefjuana luarentšana yojtsatëbuacana.

<sup>11</sup> Atšbe bonshaná, ndoñe cattsama chë ndoñe tšabá yontsamacá, ndayá chë tšabe soyënga tmojtsamëngcá cochtsama. Nda ntšamo tšabá yomncá tojtsama, cha Bëngbe Bëtsábia jtsemnana; pero nda ndoñe chca tontsama, cha cabá ndoñe yondëtatšëmbo ntšamo Bëngbe Bëtsá yomnama.

<sup>12</sup> Jesucristbeñe ošbuáchiyënga nyetscanga tšabe soyënga Demetriëbiama montsichamo, y Jesucristbe ndegombre soyënga entsinÿna ntšamo cha soyënga yojtsiyenama. Bëngnaca chabiamana tšabá fsëntsichamo, y aca condëtatšëmbo ntšamo bënga fsëntsichamcá, ndegombre yomnama.

### *Jadiósoftanama*

<sup>13</sup> Atše ba soyënga sëntsebomna aca jauyanama, pero ndoñe quetsátsboše ts-buanáchañe juábobemana. <sup>14</sup> Atše sëntsejuabná betsko chjobenaye ácbioye jama jau-atsëtsayama y jobenayana ácaftaca jencuéntama.

<sup>15</sup> Puerte tšabe ebionana ainaniñe chacotsebomna. Quem luarentša amiguënga cmontsechuaná. Diosmanda, bëngbe amiguëngbioye choca cada ona cochjácheuaye.

## San Judas

### *Jacheuayama*

<sup>1</sup> Atše Judas, Jesucristbe oservená y Santiagbe catšata, quem tsbuanácha sentsabiamná, ndēmuanÿengbioye Bēngbe Bētsá, chē Taitá chabe entšanga chamotsemnama tojáchembo, chabe bonshánēnga, y ndēmuanÿenga Jesucristo endánÿena. <sup>2</sup> Atše, Bēngbe Bētsá sēntseimpadana, cha puerte lastemado tšēngaftangaftaca chaotsemnama, cha chaoma tšēngaftanga ainaniñe tšabe ebionana chašmotsebonnama, y chaoma tšēngaftanga cada te más Bēngbe Bētsábioye y ínÿengbioye chašmotsababuánÿeshanama.

### *Chē ndoñe ndegombre soyēnga buátēmbayēnga*

<sup>3</sup> Atšbe bonshánēnga, atše tša sēndboše tšēngaftanga jubuábiamama, ntšamo Jesucristo bēngbe bacna soyēnguentšana šojátsebacama, tšēngaftangbioye y bēngbioynaca; pero atše sēntsejuabná atše šojtsemna tšēngaftanga jubuábiamana, jáimpadama bētsá chašmotsama Jesucristbe soyēngama, chē mondošbuaché soyēngama jenujuérsama, ndoñe chaondopochocama. Chē soyēnga Bēngbe Bētsá chabe entšanga canÿe tojatšatá, y nÿetsca tescama. <sup>4</sup> Er tšēngaftanga ntšamo ínÿenga imomnama ntjatatsēmboncá, básefta entšanga tšēngaftangaftaca tmojenutaná. Chēnga mondmēna Bēngbe Bētsá ndoñe adórayēnga, y chē buátēmbana soyēnga tmojtsetrocá. Bēngbe Bētsá bēngbe tšabiamama juabna yobómnayeca, chēnga jtsichámuana tšēngaftanga šmojt sobena nÿetsca bacna soyēnga jtsamēse jtsiyenana, jenomándama nt sobencá ca; y chca, chēnga montseboše jinÿanÿiyama, Jesucristo ndoñe bēngbe canÿe Nduño y Bēngbe Utabná chēngbiama yondmēna ca. Y bayté, Bēngbe Bētsabe uabemana palabrēnguiñe tmojanábema, chē chca amēngna jtsamnana nÿetsca tescama castigánēnga jtsemnama ca.

<sup>5</sup> Masque tšēngaftanga lempe quem soyama ya šmondētatsēmbo, atše sēntseboše jamama tšēngaftanga chašmotsenujuabná, Bēngbe Utabná, Israeloca entšanga Egiptoquēngbe cucuatšentsana tojanatsebacá chentšana, cachá chē Israeloquēnguentše chábeñe ndošbuáchiyēnga tojánapochocama; <sup>6</sup> y cachcá chē angelēngbiámna, ndēmuanÿenga ndoñe tmonjanoquedá chē tmojanóyēngacñe mándoca, pero aíñe chēngbe luarēnga cachcá imojéftsonÿaye. Chē causa, Bēngbe Bētsá tojanmandá cadenējuangaca nÿetsca tescama chamoquedama, chē más ibetiñe, tondaye binÿniñe luarentše, chēnga bacna soyēnga tmojanmama nÿetsca tescama castigánēnga jtsemnama vojtsamna ca, cha jayanama tescama. <sup>7</sup> Y chē Sodoma y Gomorra, y chē béconana pueblēnguentše entšangbiámna; chēngnaca cach angelēngcá ndoñe tšabá monjánama, y nÿetsca bacna soyēnga imojánama boyabása o shembásaftaca, y ínÿengaftaca y bayēngaftácnaca. Chíyeca chēnga tmonjansufrí chē íñesheca castigo nÿetsca tescama, y chca, nÿetsca entšangbioye tmojaninÿanÿé, ndayá yochjopása chē chca Bēngbe Bētsábioye ndoñe tbontsobedecenáftaca.

<sup>8</sup> Cachcá, chē ndoñe ndegombre soyēnga buátēmbayēngnaca chē mo otjenayoquécá tmojáninÿe soyēngama jtsichámuana, y chē causa cachēngbe cuerpēngama bacna soyēnga jtsamana, chē mando bomnēngbioye jtsébátenana, y chē espíritēnga obenana bomnēngbiama ndoñe tšabá ntsichámuana, mo chēngbioye cuafjoyanguangcá. <sup>9</sup> Pero ni mo chē angelēngbe mandayá Miguel quem buátēmbayēngcá tojanma. Cha chē diábloftaca ibojentsjaná ora, Moisesbe cuerpama cháftaca jabuachana ibojanenatsētsnaye ora, ndoñe tonjanenñemó jayanama chē diablēbiamama podesca soyēnga, jójyenguanguse, ndayá nÿe mēntsá ibojauyana: “Bēngbe Utabná chacmácacana ca.” <sup>10</sup> Pero quem buátēmbayēngna, chē ndoñe tontsésertana soyēngama podesca jtsichámuana, y ntšamo tojtsebionama y tmojtsebošama, nÿe mo bayēngcá, chē soyēngama tšabá josértama



juabna ndbomnënga, ndayá chentšana tmojtsësertancá jtsamëse, jamana chënga nyëtsca tescama castigánënga jtsemnana chamotsajnama.

<sup>11</sup> ¡Tša lastema quem buátëmbayëngbiama! Er chënga ndoñe tšabá tmojanma, mo Caincá; cha tojanaboté ntšamo Bëngbe Bëtsá inétsama bacna soyënga japerdónama, y cabana chabe catsátbioye tbojanóba. Chënga crocénana juácánama, mo Balaam yojanamcá, Bëngbe Bëtsabe tšabe benachentšana tmojtsojuánañe, bacna soyënga jamama. Chënga chë amëndayëngcá Bëngbe Bëtsá tojanabacacángbioye ndoñe ntsayaunanana, ntšamo Coré, Moisés y Aarónbioye joyaunayama ndoñe tonjanbošencá; y chë causa chënga pochocánënga mochántsemna, ntšamo Coré pochocaná chaotsemnana Bëngbe Bëtsá tojanmcá.

<sup>12</sup> Chëngna tšëngaftangbiama jtsemnana mo canye ndëtsenga luarentše canye bëtstengacá, tšëngaftangaftaca tmojenutaná ora, cányiñe jasama mo Jesucristbeñe ošbuachiyëngcá. Chënga chca jtsemnana, er chca fiestënguiñe chënga oyejuayënga jtsemnana, nye chënga tšabá jtsomñama soyënga jtsamëse, y chënga chama ndoñe ntsëuatjana. Chënga nye cachëngbiama jtsantješnana, ínÿengbiama ndoñe. Chënga tša jtsašebuachiyana, pero chëngbe buátëmbana soyënga ínÿengbiama tondayama ntoservénana; y chca, chënga jtsemnana mo chë tša jënÿá ora jantsetëshëngcá, tondaye ntjuaftena, bínÿiaca ochñëjuanëshënga; y mo betiyeshënga jashtsnëshenga y buashanëshëngcá, chë jashacama tojtsemna ora tondaye shajuana causa. <sup>13</sup> Chënga nyëts tempo bacna soyënga jtsamana cachëngbe bacna juabnëngaca, y chë bacna soyënga ntšamo tmojtsamcá jtsinÿanÿnayana chënga chë bacna juabnënga imobomnana. Chca, chënga jtsemnana mo mar béjayoca oleshëngcá, chentšana espumushënga bëtscá tsenguësheca jtsóbocanana. Y cabana, chënga jtsemnana mo estrellëngcá chëtemëngbe benachentšana tmojtsebocna, y chentšana jtsefsanana. Bëngbe Bëtsá tojamandá, chë buátëmbayënga ntšamo tmojamamna, chë más ibetoca, tondaye binÿniñe luarentše nyëtsca tescama chënga chamoquedama.

<sup>14</sup> Adánbentšana chñënguana pamillo entšanga tmojánachñëjna chentšana Enoc tojánashjango. Chánaca Bëngbe Bëtsabe juabna tojanoyebuambá chë bacna buátëmbayëngbiama, mëntsá tojánayana ora: “Smochjinÿe, Bëngbe Utabná echanjabo bëtscá uaranga angelëngaftaca, <sup>15</sup> nyëtsca entšangbiama jabáyanama ntšamo tmojamcá tšabá o ndoñe tšabá bëtsemnana; y cha echanjamánda chë Bëngbe Bëtsábioye ndoñe adórayënga nyëtsca tescama castigánënga chamotsemnana, tša bacna soyënga chabe contra tmojamama, y bacna soyënga chabe contra tmojayanama, chënga, chë puerte bacna soyënga amënga ca” —tojánayana. <sup>16</sup> Chënga mondmëna chë tšabe soyëngama nyëts tempo podësca ichámënga, y ndocna te tondáyecá oyejuayënga ntsemnana. Chënga jtsiyenana bacna soyënga jtsamëse nye cachënga tšabá jtsomñama, y puerte botamana palabrënga jtsichámuana uámanënga jtsenobiamnayëse, y tšabe soyënga ínÿengbioye jtsëtsënayana, chënga tšabá joquédama y chëngbentšana ndayánaca josháchiñama.

### *Ošbuáchiyënga jábuayenama*

<sup>17</sup> Pero tšëngaftanga, atšbe bonshánënga, šmochtsenójuabnaye ndayá chë Bëngbe Utabná Jesucristbe ichmónënga tmojanëyanama, mëntsá: <sup>18</sup> “Jesucristo quem luare jésabama tempo chaojtsobeco ora, mochántsemna entšanga, y chënga mochantsiyena jtsamëse nye cachënga tšabá jtsomñama bacna juabnëngaca, y tšëngaftanga cmochantsëbuayajuana ca.” <sup>19</sup> Chënga mondmëna chë ošbuáchiyënguentše nyëtscanga ndoñe cachcá chamondëtsejuabnama amënga; chënga mondoyena jtsamëse cachëngbe bacna juabnëngaca y ndoñe quemátsbomna Uámana Espíritu, chëngbe ainaniñe chaotsemándama.

<sup>20</sup> Pero tšëngaftanga, atšbe bonshánënga, nyëts tempo, cada te más Jesucristbeñe ošbuáchiyana šmochtsebomna, chë Bëngbe Bëtsábocana endóbocana ošbuáchiyana, y Bëngbe Bëtsáftaca šmochjencuénta, ntšamo Uámana Espíritu tmojtsamëndacá.

<sup>21</sup> Yejuana šmochtsantješna tšëngaftanga nyets tempo chašmotsiyenama, Bëngbe Bëtsá cmababuányeshanama jtsejuabnayëse, y šmochtsobátmana chë tempo ndaye ora Bëngbe Utabná Jesucristo, tšëngaftanga jtsalastemánëse, yochjama tšëngaftanga chë nyetsca tescama yomna tsabe vida chašmotsebonnama.

<sup>22</sup> Chë inye ora aíne y inye ora ndoñe Jesucristbeñe ošbuáchiyana bomnënga šmochtsalastemana. <sup>23</sup> Bëtsá šmochtsama, báseftanga chë uabouana castigüentšana atsebácanënga chamotsemnana, mo chënga íñeshentšana cuaftëbuacancá. Inyengbiana chacmotsangmena, pero cuedado šmochtsebonna, chënga chašmojtsëjabuachana ora, ntšamo chënga bacna soyënga tmojtsamcá ndoñe chašmondétsamama; y chë bacna soyënga ntšamo chënga tmojtsiyena jtsamëse, chëngbe bacna juabnéngaca, nya tondaye chacmondétsogusetana.

*Judas, Bëngbe Bëtsá jëtschuayama*

<sup>24-25</sup> Chë nye canye Bëngbe Bëtsá, bëngbe Atsebacayá obenana endbomna tšëngaftanga jtsanýenama, chca, tondaye chaondëma tšëngaftanga Jesucristbeñe ošbuáchiyana chašmotsajbanama; y obenana endbomna tšëngaftanga ainaniñe ndocna bacna soye ndbomnënga chašmotsemnana y puerte oyejuayënga cachabe delante chašmotsemnana, cha canye puerte uamaná y obená bétsemnana chaojinýanjé ora. Bëngbe Utabná Jesucristbeyeca, nyetscanga Bëngbe Bëtsá chamotsatschuaná; y cha puerte bëtsá chauesomñe, nyets obenana bomná y nyets mando bomná, nyets tempscana, tempo, mora y nyetsca tescama. Chca chaotsemna.

## Apocalipsis

### *Ndayá quem librêsañe yomna*

<sup>1</sup> Quemuentše entsábemana ndayá Bëngbe Bëtsá Jesucristbioye tbojaninÿinÿé, chë Bëngbe Bëtsabe oservénënga cha cháuinÿanÿema, ndayá jopásama yojtsobecuama chënga chamotsetatsëmbuama. Jesucristo chama chabe ángel tbojichmó, chë soyëngama atše, Juan, chë Jesucristbe oservenábioye chašuinÿinÿema. <sup>2</sup> Y atše sënjayana lempe ntšamo ndegombre yomncá lempe chë tijinÿe soyëngama, chë Bëngbe Bëtsabe buayenana soyëngama y chë Jesucristo šonjaniyana ndegombre bëtsemna soyëngama.

<sup>3</sup> Oyejuayá nda tojtsalía, y oyejuayënga ndëmuanÿenga botamana tmojtsuenana quem yochjopása soyëngama, chë muentše entsabemancá ndegombre tmojóyeunanga, er chca jopasa tempo entsobeco.

### *Asia luaroca ošbuachiyëngcá enefjuanënga jacheuayama*

<sup>4</sup> Atše Juan, sentsabiamná chë Asia luaroca canÿsëftañe ošbuachiyëngcá enefjuanëngbiana. Atše, Bëngbe Bëtsá sëntseimpadana, tšabe bendicionënga chábiocana chašmosháchiñe y ainaniñe puerte tšabe ebionana chašmotsebomna, Bëngbe Bëtsábentšana, chë canÿsëfta espíritëngbentšana y Jesucristbentšana. Bëngbe Bëtsá, chë mora endmëná, enjamná y sempre echantsemná; chë canÿsëfta espíritënga, chabe uámana puesto natsanoica mondmënénga; <sup>5-6</sup> y Jesucristo, chë ntšamo Bëngbe Bëtsabiana yotatsëmbcá ndegombre oyebuambnayá, chë natsaná ndabiana Bëngbe Bëtsá tojama obanënguentsana cháuatayenama, y nÿetsca quem luarentša mandadëngbe amëndayá. Cristo šondábabuanÿeshana y bëngbe bacna soyënguentsana šojatsebacá, cha tonjanóbanayeca, chabe buiñe juabuáshanëse. Cha tojama bënga chamotsobena cháftaca jtsemándayana y uámanënga chamotsemnama, y Bëngbe Bëtsá chabe Taitá mo bachnangcá chamotseservénama. ¡Nÿetscanga nÿets tempo chamotsinÿanÿná Cristo puerte bëtsá y uamaná bëtsemnama y obenana nÿetsca tescama yobomnama! Chca chaotsemna.

<sup>7</sup> Mouenënga. Cristo jantšetëshënguñe echanjésabo.

Chábioye nÿetscanga mochanjinÿe,

chë tmonjancrucificágnaca;

y quem luarentša nÿetsca entsanga puerte ngménaca mochántsemna

y mochantsošachna chábeyeca.

Ndegombre, chca chaotsemna.

<sup>8</sup> “Atše sëndmëna chë nÿetsca soyënga bojatšayá y pochocayá ca,” Bëngbe Utabná Bëngbe Bëtsá tojayana. Cha chë sempre endmëná, enjamná, nÿets tempo echantsemná, chë nÿets obenana bomná.

### *Juan mo otjenayoquëcá Cristbiana tojáninÿe*

<sup>9</sup> Atše Juan, Jesucristbeyeca tšëngaftangbe catšata, cháftaca cánÿiñe mo canÿacá bëtsemnama, cach tšëngaftangcá sëndëpadecena, tšëngaftangcá chanjëftsashjache Bëngbe Bëtsabe amëndayoye jamashënguama, y tšëngaftangcá Bëngbe Bëtsabeñe jtsobátmanëse, uantado sëndmëna chë padecena soyënguñe. Bëngbe Bëtsabe palabra sënjánabuayiynama y Jesusbiana ntšamo ndegombre endmëncá sënjanóyebuambnama, atše šmonjetsanëtšena mar béjayoca canÿe fshantsentše, Patmos ca uabáinoca. <sup>10</sup> Y tonjanopasá, canÿe tmengo, chë ošbuáchiyënga Bëngbe Utabnábioye cánÿiñe jëtschuayama te, atše sënjanouedá chë Uámana Espiritbeyeca corente mandaná, mo otjenayoquëcá soyënga sënjëtsonÿaye, y atšbe stëtšoica canÿe jabuache oyebuambnayana sënjanuena, mo canÿe trompetéfjua cuafjuatëtécá; <sup>11</sup> mentsá šontsanatsëtsná: “Canÿe librêsañe mábema lempe ntšamo contsonÿacá

y cochjuíchmua chë Asia luaroca canÿsëftañe ošbuachiyëngcá enefjuanëngbioye: Efeso, Esmirna, Pérgamo, Tiatura, Sardis, Filadelfia y Laodiceoquëngbioye ca.”

<sup>12</sup> Sënjanobuértana jinÿama nda chca šojtsanatsëtsná, y chca sënjanma ora, sënjáninÿe canÿsëfta castellano candelerëšënga; <sup>13</sup> y chë canÿsëfta castellano candelerëšënguiñe tsëntsaca canÿa sënjáninÿe, mo entšacá inÿná, canÿe bën entšayá uichëtjoná, y cochóntscoca canÿe tëntša castellano uasnanëjaca. <sup>14</sup> Chabe stjënashana uafjantsësha, puerte uafjantsësha mo canÿe oveshabe boboshëshacá, y chabe fšnëbenga mo iñeshcá enjëtsinÿna. <sup>15</sup> Chabe shecuatšënga enjëtsëbuashinÿinÿana mo bronscá, ndaybé natsana iñëjana tcojuchnëngo enabé chaotsemnama y chentšana entšëjuaca becá tcojajojó corente chaotsebuashinÿinÿanama; y chabe oyebuambnayana jabuache enjëtsenana mo bëtscá béjaye cuaftsebuachquëcjancá. <sup>16</sup> Chabe catšbioica cucuatšinë enjëtsatbëna canÿsëfta estrellënga, y chabe uayoicana enjëtsobocana canÿe espadëja, nÿets utoicajana puerte efsánëja, y chabe jubiá tša enjëtsëbuashinÿinÿana, mo chë shinÿe corente, lempe ntšamo tojobenacá tojtsebuashinÿinÿana orcá.

<sup>17</sup> Cha sënjáninÿe ora, chabe shecuatšentše mo obanacá sënjánshajaye. Pero cha, chabe catšbioica cucuatše átšbeñe jajájuase, šonjaniyana: “Ndoñe matauatjana; atše sëndmëna chë nÿetsca soyënga bojatsayá y pochocayá, <sup>18</sup> chë sempre vida bomná. Atše obaná sënjamna, pero mora nÿetsca tescama vida sëntsebomna. Atše obenana sëndbomna, y chë obenánaca entšángbioye ndoñe quenátamna infiernoca nÿetsca tescama castigánënga jtsemnana, mo nÿets tempo cuaftsobancá. <sup>19</sup> Ntšamo tconjinÿcá mábema, chë quem tempo endmëna soyëngama y chë más chcoye echántsemna soyëngama. <sup>20</sup> Mëntšá endmëna chë atšbe catšbioica cucuatšinë tconjinÿe canÿsëfta estrellëngaca y chë canÿsëfta castellano candelerëšëngaca: chë canÿsëfta estrellënga montsinÿinÿná chë canÿsëftañe ošbuachiyëngcá enefjuanëngbeñe chamotsemándama uámana ichmónënga, y chë canÿsëfta candelerëšëngna chë canÿsëftañe ošbuachiyëngcá enefjuanënga.”

## 2

### *Efesoca ošbuachiyëngcá enefjuanënga jábuayenama*

<sup>1</sup> Mëntšánaca cha šonjaniyana:

“Mëntšá mabobema chë Efesoca ošbuachiyëngcá enefjuanëngbeñe chaotsemándama uámana ichmonábioye:

Mëntšá entsichamo chë chabe catšbioica cucuatšinë canÿsëfta estrellënga entsatbëná y chë canÿsëfta castellano candelerëšënga luarëjana entsaná: <sup>2</sup> Atše lempe sëndëtatšëmbo ntšamo tšëngaftanga šmoyenana; atše corente sëndëtatšëmbo tšëngaftanga jabuache šmotrabájama, y ntšamo tšëngaftanga Bëngbe Bëtsábeñe jtsobátmanëse šmnëtsauantana padecena soyënguiñe šmojtsemna ora. Y átšnaca sëndëtatšëmbo tšëngaftanga ndoñe šmontsobena jtsëuantánana ntšamo bacna entšanga tmojtsamcá. Atšnaca sëndëtatšëmbo tšëngaftanga yejuana šmojarrepará y becá šmojenojuabó jinÿama chë Jesucristbe ichmónënga imomna ca tmojtsichamëngbiamna; pero ndegombre chënga ndoñe chca quemátsmëna; y chca šmojámayeca, tšëngaftanga mora šmontsetátšëmbo chënga bosterënga imomnana. <sup>3</sup> Padecena soyënguiñe becá šmojoboyá y chca ora, Bëngbe Bëtsábeñe šmobátmana. Chë soyënguiñe šmojasufrí, tšëngaftanga atše šmoservënama; y tšëngaftanga chca šmondëservena, ainaniñe añemo jtsebomnana ntjajbanacá.

<sup>4</sup> Pero canÿe soye sëntsebomna tšëngaftangbe contra jayanama: Tšëngaftanga mora ya ndoñe cachca bonshánana quešmátsbomna ni atšbiamna ni nÿetsca entšángbiamna, ntšamo átšbeñe jtsošbuáchiyama šmonjanbojatsé orcá. <sup>5</sup> Menójuabonga ntšamo chë tempo šmonjánbobonshanama, juabnayana motrocanga y cachiñe šmochtsama ntšamo chë átšbeñe jtsošbuáchiyama šmonjanbojatsé orcá. Ndoñe chcase, atše tšëngaftangbioye chanjá jabuache jetsacastígama, jtsapochócantscuana, mo chë tšëngaftangbe cuenta



entsemna candlerëse chabe puestentsana cuaftsejuanacá. Chca chanjama, tsëngaftanga juabnayana ndoñe chašmonjatrocace. <sup>6</sup> Pero tsëngaftangbe pavor quem tsabe soye šmontsebonna: Tsëngaftanga šmonduábotena lempe ntšamo chë nicolaíta ca uabaina entsanga tmojtsamcá, ndayá átšnaca sënduábotena.

<sup>7</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtnacá. Chë padecena soyënguentsana tsabá chamojábocana mo ayënjanayëngcá, chëngbiana chanjama chë nyetsca tescama yomna tsabe vida chamotsebonnama, y chca chënga mochántsemna mo chë nyetsca tescama yomna tsabe vida jtsebonnama betiyeshentsana cuaftsesacá, chë entsanga sempre oyejuayënga mondbetsemnoca ca” —cha šonjaniyana.

### *Esmirnoca ošbuachiyëngcá enefjuanënga jábuayenama*

<sup>8</sup> Mëntsánaca cha šonjaniyana: “Esmirna bëts pueblentse ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntsá entsichamo chë nyetsca soyënga bojatsayá y pochocayá, chë tonjanobaná y ndabiana Bëngbe Bëtsá tonjama cháuatayenama: <sup>9</sup> Atše sëndëtatšëmbo tsëngaftanga tša jabuache šmojasufrima y ndbomnjëmënga šmomnama, pero ndegombre Bëngbe Bëtsábocana bëtscá tsabe soyënga šmondëtsóbonne. Y sëndëtatšëmbo tša bacá tsëngaftangbiana mondoyebuambná chë judiënga imomna ca ichámënga, pero ndoñe ntsamana mo chë Bëngbe Bëtsabe bocacana entsangcá; chca, chënga mondmëna mo Satanasbe entsangcá, nye chábioye jtseservënëse y jtsatschuanayëse.

<sup>10</sup> Ndoñe matauatjëngana chë ndoñe yapa bën y tsëngaftanga šmochjasufrima, er Satanas echanjama tsëngaftanguentsënga báseftanga cárceloye ínÿënga chacmëtámiana, jinÿama ntsachetšá Crístbeñe ošbuáchiyana šmobomnama, padecena soyënguifne šmojtsemna ora; y entsamna baseftayté jasúfriana. Sempre bëtscá ošbuáchiyana, y ainaniñe bëts añemo šmochtsebonna, masque jobanámnaca chacmotsamna, Crístbiana trabájaye causa. Chca chašmojtsamëse, atše chanjama tsëngaftanga chašmotsebonnama mo canÿe uacanana soycá, chë nyetsca tescama yomna tsabe vida.

<sup>11</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtnacá. Chë padecena soyënguentsana tsabá chamojábocana mo ayënjanayëngcá, ndegombre chënga ndoñe queochátamna játauatjana nyetsca tescama castigánënga jatsmënama ca” —cha šonjaniyana.

### *Pérgamoca ošbuachiyëngcá enefjuanënga jábuayenama*

<sup>12</sup> Mëntsánaca cha šonjaniyana: “Pérgamo bëts pueblentse ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntsá entsichamo chë nyets utoicajana puerte efsana espadëja entsatbënë: <sup>13</sup> Atše sëndëtatšëmbo ntšamo yomna tsëngaftangbe oyenentse, canÿe luare ndayentse Satanas entsángbioye puerte iuamënda. Masque chca, tsëngaftanga sempre nye atše šmondëtseservena, y ndocna te chešmáisayana átšbeñe ndoñe šmondošbuaché ca, ni mo Antipas, chë canÿe nyets tempo atšbe ustoná y atšbiana ndegombre oyebuambnayá, ínÿënga tmonjanóba ora. Y lempe chca tojopasá tsëngaftangbe pueblentse, ndayentse Satanas bëtscá entsana.

<sup>14</sup> Pero básefta soyënga sëntsebonna tsëngaftangbe contra jayanama: Chentse tsëngaftangbeñe báseftanga montsemna, soyënga montsabuatambá ntšamo bayté entsemna Balaam enjanabuatambacá. Cha rey Balácbioye tbojanbuayená ntšamo jamana Israeloca entsángbioye jáingñama, chënga chë ntšamo ndoñe tsabá yomncá chamotsamama; y chca, Balac tojanma chë ínÿënga diosënga yojamna ca imojana-juabná soyënga jadórama uátšëmbona saná chë Israeloca entsanga chamosama, y shembása o boyabásaftaca bacna soyënga chamotsamama. <sup>15</sup> Chëntšnaca ínÿënga

montsemna, y chëngna chë nicolaitëngbe buatëmbana soyënguiñe mondošbuaché, y chca buatëmbana soyënga ndoñe tšabá quenátsmëna. <sup>16</sup> Smochtsejuabnaye ntšamo šmojtsamama, chëngbioye tšëngaftangbeñe šmojtsëuantana ora, y chca jtsamana šmochjajbaná; er ndoñese, atše betscó tšëngaftangbioye chanjá, y chë chca buatëmbana soyënguiñe ošbuáchiyana ndoñe tmonjajbanángaftaca chanjéntsja chë atšbe uayoicana endóbocana espadéjaca.

<sup>17</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojsëtsëtsnacá. Chë padecena soyënguentsana tšabá chamojábocana mo ayëñjanayëngcá, chëngbioye maná chanjátšataye chamosama, chë celoca tandëse, ndayá Bëngbe Bëtsá tempo entšángbioye ndoñe tonjinñanýé; y canýe fjantse ndëtšëtëma chanjáyentšbuachiye, chënga oyejuayënga šmojábemama. Chiñe canýe tsëm uabaina echantsábemana; ndocná chë uabaina quenátabuatma, ndayá nýe chë chamojóyëngacñënga ca” —cha šonjaniana.

### *Tiatiroca ošbuachiyëngcá enefjuanënga jábuayenama*

<sup>18</sup> Mëntsánaca cha šonjaniana: “Tiatira bëts puebloca ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntsá entsichamo Bëngbe Bëtsabe Uaquiñá, chë mo iñeshcá uafšná y mo entšëjuaca jojona puerte chaotsebuashinýinñanama bronce shecuatsënga bomná:

<sup>19</sup> Atše sëndëtatšëmbo ntšamo tšëngaftanga šmoyenama; sëndëtatšëmbo ntsachetšá tšëngaftanga Bëngbe Bëtsábioye y nýetscángbioye šmababuánýeshanama, ntšamo tšëngaftanga Bëngbe Bëtsábeñe puerte šmošbuáchema, ntšamo chábioye šmoservénama, ntšamo tšëngaftanga ínýenga šmojuabuache y ntšamo Bëngbe Bëtsábeñe jtsobátmanëse becá šmojoboyá padecena soyënguiñe; y sëntsetatšëmbo mora más bëtscá tšabe soyënga šmojtsama, ntšamo tšëngaftanga átšbeñe jtsošbuáchiyama šmonjanbojatsë orscama.

<sup>20</sup> Pero canýe soye sëntsebmoma tšëngaftangbe contra jayanama: Tšëngaftangbeñe šmondëuantana chë shembása, mo chë bacna reiná Jezabelcá endmënábioye. Chë shembása entsichamo Bëngbe Bëtsabe juabna oyebuambnayá canmëna ca; pero chabe buatëmbana soyëngaca atšbe oservénënga entsaíngña, shembása o boyabásaftaca bacna soyënga chënga chamotsamama, y chë ínýenga díosënga yojamna ca imojanajuabná soyënga jadórama uátšëmbona saná chamosama. <sup>21</sup> Cha sënjuená atše chjacastíga ca, chca juabnayana ndoñe tonjatrocace, y canýe boyabásaftaca bacna soyënga amana ndoñe tontsajbanase. Cha jacastígama batšá sënjobatma, nderado chca amana nanjatróca, pero ndoñe chenátšbošëna. <sup>22</sup> Mora atše chanjama bëtš šocana cha chaboshachama, y chë cháftaca bacna soye tmojamënga, juabnayana ndoñe tmonjatrocá y chca jtsamana ndoñe tmontsajbanase, chëngbiana chanjama puerte chamosufrima; <sup>23</sup> y chë shembásabe básënga chantsëbaye. Chca, nýetsquénache ošbuachiyëngcá enefjuanënga mochántsetatšëmbo, ndayá entšanga juabniñe y ainaniñe tmojuabnacá atše tsuábuatmama; y cada ona tšëngaftanguentsá, chca bacna soye cháftaca tojamá, ntšamo ibojtsomerecencá chanjacastíga.

<sup>24</sup> Pero tšëngaftangbentše, ínýenga Tiatira pueblentše šmojtsemnënga, chë shembásabe buatëmbana soyënguiñe ndoñe šmontsošbuachënga, y chë ínýenga imuábuatma Satanasbe soyënga, chë ndoñe paselo josértama soyënga ndoñe šmonjuabuátmanënga, tšëngaftanga ndoñe quebochatamënda inýe más toto soye chašmotsamama. <sup>25</sup> Pero nýe sempre smochtsama ntšamo mora šmojtsamcá, y smochtsiyena ntšamo chë Bëngbe Bëtsábocana šmojóyëngacñë soyënga yomncá, atše quem luaroye jesabámëntscuana.

<sup>26</sup> Chë padecena soyënguentsana tšabá chamojábocana mo ayëñjanayëngcá y ntšamo atše sëndëmandacá chamojtsamënga, chë quem luarentše ya ndoñe más vida jesebmómëntscuana, atšbe obenana chanjátšataye nýetsca mándayëngbentša

entsángbeñe jtsemándayama,<sup>27</sup> ntšamo atšbe Taitá chabe obenana šojatšetacá; y chënga entsángbioye puerta obenánaca mochántsamëndaye, mo canye hierro varëfjaquécá, y chëngbe contra chamojtsemnëngbioye mochántsapochocaye, mo nye matbajënga tmojtsëtsjanjnacá. <sup>28</sup> Y chë jabínynama ora binynaye estréllnaca chanjátšataye.

<sup>29</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá ca” —cha šonjaniana.

### 3

#### *Sardisoca ošbuachiyëngcá enefjuanënga jábuayenama*

<sup>1</sup> Mëntšánaca cha šonjaniana: “Sardis bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë Bëngbe Bëtsabe canysëfta espíritënga y chë canysëfta estrellënga bomná: Atše lempe sëndëtatšëmbo ntšamo tšëngaftanga šmoyenama; atše sëndëtatšëmbo tšëngaftangbiana inyënga tša jtsichámuana Bëngbe Bëtsá jasérviana bëtscá šmojtsama ca, pero ndegombre tšëngaftanga nye batšatema šmontsama, y chca, chabiana mo obanëngcá šmondmëna. <sup>2</sup> Botamana šmochjenóbobonye y más šmochtsama chë Bëngbe Bëtsá jasérviana cabá šmondama básefta soyënga. Ndoñe yapa quenátájamna chë tšabe soyëngnaca chašmotsajbanama, er atše sënjinye chë Bëngbe Bëtsábioye jasérviana ntšamo jtsamëse šmoyencá, atšbe Bëtsabiana ndoñe yapa tšabá quenátsmëna. <sup>3</sup> Asna, šmochtsenójuabnaye ndayá Bëngbe Bëtsábioyocana šmojóyëngacñama, y chabiana šmojouena soyënguínna. Ntšamo chë soyënga yomncá šmochtsiyena, juabnayana šmochjatróca y šmochjónťsa bëtscá jtsamana Bëngbe Bëtsá jasérviana. Ndoñe tšabá cach tšëngaftanga chašmonjenójuabose y juabnayana ndoñe chašmonjatrocace, nye ndeolpe chanjá tšëngaftangbioye, mo canye atbëbanacá, chabiana ndocná tontsejuabná ora, y ndegombre tšëngaftanga ndoñe quešmochátstatsëmbo mocna ora atše tšëngaftangbioye chjama.

<sup>4</sup> Masque chca, Sardisentše tšëngaftangbeñe básefta entšanga mondmëna, chënga ndoñe chematajbaná oyenana tšabe soyënga jtsamëse, bacna soyënga játamama. Chëngna átšëftaca mochántsaína uafjantsëjuangá uichëtjonënga, chënga chca merecido montsebuajónayeca. <sup>5</sup> Chë padecena soyënguentsana tšabá chamojábocana mo ayëñjanayëngcá, chca uafjantsëjuangá uichëtjonënga mochántsemna, y chëngbe uabaina ndoñe quichatsjuána chë tšabe vida mochjónyëngbe uabaina enduábemana libřësentšana, ndayá atše, Bëngbe Bëtsabe delante y chabe angelëngbe delante, chënga atšbe entšanga imomna ca chanjayana.

<sup>6</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá ca” —cha šonjaniana.

#### *Filadelfioca ošbuachiyëngcá enefjuanënga jábuayenama*

<sup>7</sup> Mëntšánaca cha šonjaniana: “Filadelfia bëts puebloca ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë uamaná y ndegombre oyebuambnayá, chë jtsemándayama puerta obenana bomná, ntšamo Rey David enjanbomncá, chë nda ndayá chaotsemnama tojamandá ora, ndocná ntšobenana jamama chca ndoñe chaondëtsemnama, y ndayá ndoñe chaondëtsemnama tojamandá ora, ndocná ntšobenana jamama aïne chaotsemnama: <sup>8</sup> Atše lempe sëndëtatšëmbo ntšamo tšëngaftanga šmoyenama. Minyënga, atše sënjama tšëngaftanga bëtscá tšabe soyënga chašmotsebomnama, y ndocná quenátobena jamama chca ndoñe chaondëtsemnama; y chca entsemna mo atše tšëngaftangbiana canye bëshása cuafjatëfjá, y chësa jtatámiana ndocná quenátobena. Atše sëndëtatšëmbo tšëngaftanga batšatema obenana šmobomnama, pero šmojouena ntšamo jtsamama tcbonjauyancá, y ndocna te chešmátayana

atsbe entsanga ndoñe šmondmëna ca. <sup>9</sup> Atše chanjama, chë mo Satanasbe entsangcá imomnënga, nÿe chábioye jtseservënese y jtsatschuanayëse, chë judiënga imomna ca ichámënga, pero chë Bëngbe Bëtsabe bocacana entsangcá ndámënga y bosterënga, chënga tsëngaftangbioye chamua y tsëngaftangbe delante chamoshamentsé, tsëngaftangbiama respeto jinÿanÿiyama, y chca, chënga chamotsetátšëmbo atše sempre cbababuánÿeshanama. <sup>10</sup> Atše tcbonjanamëndá, Bëngbe Bëtsábeñe jtsobátmanëse, lempe chašmotsoboyá padecena soyënguiñe, y tsëngaftanga chca šmonjama. Chíyeca, atše puerte tsábá cbochántsanyëna, chë quem luarentše oyenënga nÿetscanga jasúfriama y padecena soyënguiñe jtsemnama chaojtsemna ora, Bëngbe Bëtsábeñe aiñe o ndoñe mondošbuáchema jinÿanÿiyama.

<sup>11</sup> Cachiñe quem luaroye betesco chanjésabo. Sempre šmochtsama ntšamo mora šmondamcá, y Bëngbe Bëtsábíocana šmojóyëngacñe soyënga šmochtsinÿena; chca ndocná chaondobená ndayá jamana, y chë sóyeca chaoma tsëngaftanga ndoñe chašmondóyëngacñe ndayá Bëngbe Bëtsá chë chábioye jtseservënema ndoñe tmontsajbanángbioye yochjatšataycá, chëngbe uacanana soye. <sup>12</sup> Chë padecena soyënguentšana tsábá chamojábocana mo ayëñjanayëngcá, chëngbiama atše chanjama sempre Bëngbe Bëtsabe delante chamuesomñama, y chca, chënga mochántsemna mo chë Bëngbe Bëtsabe bëts yebnentša ucuatjoniñcá; ndocna te Bëngbe Bëtsábentšana quemocháisebocana; y chëngbeñe atšbe Bëtsabe uabaina chanjuábema y atšbe Bëtsabe bëts pueblentša uabaina, chë tsëm pueblo Jerusalén, chë celocana yobá pueblo, Bëngbe Bëtsábíocana. Y chëngbeñnaca chanjuábema atšbe tsëm uabaina. Lempe chca chanjama jinÿanÿiyama chënga Bëngbe Bëtsábenga mochtsemnama.

<sup>13</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsetsëtsnacá ca” —cha šonjaniyana.

### *Laodiceoca ošbuachiyëngcá enefjuanënga jábuayenama*

<sup>14</sup> Mëntšánaca cha šonjaniyana: “Laodicea bëts pueblaca ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë sempre Ndegombrá endmëná, chë Bëngbe Bëtsabe soyëngama ndegombre oyebuambnáyá, y chë ndábeyeca Bëngbe Bëtsá quem luare tojanmá: <sup>15</sup> Atše lempe sëndétatšëmbo ntšamo smoyenama. Atše sëntsetatšëmbo tsëngaftanga ndoñe yapa smontseboše Bëngbe Bëtsá jaserviama, pero Bëngbe Bëtsabe buayenana soyënga ndoñe lempe smontsaboté. Y chca, nÿe batsatema šmojtseboše Bëngbe Bëtsá jaserviama; chca, tsëngaftanga smontsemna mo tibiye buyeshcá, ni ntšniñiye, ni shécbaniye. ¡Atše sëntseboše tsëngaftanga chašmotsemna mo ntšniñiye o shécbaniye buyeshcá, tsábá jtsamëse o tondaye! <sup>16</sup> Chca, tsëngaftanga tibiye buyeshcá šmondmëna, y ndoñe quešmátsboše bëtscá jamama, pero Bëngbe Bëtsabe soyënga ndoñe lempe smontsaboté. Chíyeca atše sëntsejuabná jtsëbatena, mo nda tibiye búyeshetójtšbuashëtjácá, chcaye ndoñe bondogustana causa.

<sup>17</sup> Er tsëngaftanga jtsichámuana bomnënga šmomna ca, puerte tsábá šmojábocana y tondaye cmontsabuáshebena ca, pero ndoñe quešmátstatšëmbo Bëngbe Bëtsabe soyënga bëtscá cmojtsabuáshebena. Chca, tsëngaftanga smontsemna nÿa ndoñe tsábá, inÿyënga ngmënanana chacmotsabamna, mo ndbomnëjemëngcá, mo jtanëngcá, Bëngbe Bëtsabe soyëngama ntosertancá, y mo enašëngcá, bëtscá Bëngbe Bëtsabe soyënga ntsebomncá. <sup>18</sup> Chíyeca cbabuayená, átšbentšana chašmuatsjinÿe chë Bëngbe Bëtsabe soyënga y uámana soyënga, mo chë ena castellano jabemama, inëjana fjëchnënguëse castellano átšbioye šmojtsontšabuamnañcá. Tsëngaftanga Bëngbe Bëtsabe delante mo enašëngcá šmondmëna, er cha endonÿá chë ba bacna soyënga ntšamo tsëngaftanga šmojtsamcá. Smochjalesencia atše chachëjabuache tsëngaftanga Bëngbe Bëtsabe bominiñe tsábenga chašmotsemnama, mo juichëtjuama uafjantse entsáyá átšbioye



šmojtsantšabuamnañcá. Chca šmochjama, tšëngaftanga Bëngbe Bëtsabe delante ndoñe chašmondëtsëuatjama. Smochjalesencia atše chacbëjabuache tšëngaftanga Bëngbe Bëtsabe soyëngama chacmósertama, mo tšëngaftanga bominye šocanama shnana átšbioye šmojtsontšabuamnañcá. Chca šmochjama, Bëngbe Bëtsabe soyëngama puerte tšabá chacmósertama.

<sup>19</sup> Atše chë sëndábabuanyeshanënga sëndbaucácana y sëndbábuayenaye. Chíyeca, lempe ntšamo šmojobenacá šmochtsama Bëngbe Bëtsá jaserviama, y juabnayana šmochjatróca, y nyets tempo puerte šmochtseboše Bëngbe Bëtsá jtseservénana.

<sup>20</sup> Nderado canye tšabe amigo yebnoye tojabo y tojachembo, tšëngaftanga šmojouenëse y bësáša šmojebiatëfjese, cha jamashënguana, y cányiñe cháftaca joyejuayana y jasana. Cachcá, atše entsanga sentsachembuana chašmolesenciá chëngbe ainaniñe jtsiyenama. Nderado nda šojóyeunase, atše chanjámashëngo chabe ainaniñe jtsiyenama, y nyets tempo cháftaca cányiñe mo canyáca chanjëftsemna.

<sup>21</sup> Chë padecena soyënguentšana tšabá chamojábocana mo ayënjayanayëngcá, atše chanjama chënga puerte bëtsëtsanga chamotsemnana ntšamo atše sëndmëncá, y átšeftaca chamótbemama, atšbe uámana tbemanentše jtsemándayama, ntšamo atše atšbe uayayëngbioye sënjayënjana, y atšbe Taitáftaca chabe uámana tbemanentše tijotbemcá.

<sup>22</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá” —cha šonjaniana.

## 4

### *Chë Ainënga Bëngbe Utabnabe uámana tbemanentša natsana imojtsechuanaye*

<sup>1</sup> Chentšana mo otjenayoquécá sënjáninye. Sënjanrrepará y sënjáninye celoca canye bësáša enjétsatëfjna, y chë natsana sënjanuena oyebuambnayana, chë enjamna mo canye trompetëfjua cuafjuajatëtcá, mëntsá šonjétsatsaye: “Moye másëngo, atše cbochanjinýinye ntšamo más chcoye yochjopasacá ca.”

<sup>2</sup> Cachora, chë Uámana Espíritbeyeca, mo atšbe ainana celoca cuaftsemncá atše sënjanuquedá, y sënjáninye celoca enjëtsemna canye reybe uámana puesto, y chentše canya enjëtsetbemana. <sup>3</sup> Chentše enjëtsetbemaná enjamna, puerte tëshinýná mo jaspe ndëtsbecá, puerte buanganá mo cornalina ndëtsbecá, y chë uámana puesto shëconana canye tsëfcuácuatjo enjamna, y enjëtsebuashinýnyana mo canye esmeralda ndëtsbecá. <sup>4</sup> Chë reybe uámana puesto juachajana, inye uta bnëtsana y canta puesto sënjáninye, y chiñe uta bnëtsana y canta bëtsëjëmënga amëndayënga monjëtsetbiamana, uafjantsëjuangá uichëtjonënga, y castellano coronëshangá monjëtsetbestšajona. <sup>5</sup> Chë uámana puestentšana enjëtsohocana tcuinýejënga, becá shauenanana y juesasanana; y chë uámana tbemaniñentša natsanoicna, canysëfta uajuinýanëshu enjëtšangbototjuana; chë uajuinýanëshangá entsayana chë Bëngbe Bëtsabe canysëfta espíritënga. <sup>6</sup> Y chë uámana puestentša natsanoica enjëtsemna mo canye mar bejaycá, tëshinýniye mo canye cristal ca uabaina ndëtsbecá.

Chë luariñe tsëntsaca, chë uámana puesto enjëtsemnentše y chë shëconánëjana monjëtsemna canta Ainënga, nyëtsañe fšnëbéngaca, natsanoica y stëtsaica. <sup>7</sup> Chë natsana Ainá enjamna mo canye leoncá, chë inye Ainá mo canye toroščá, chë inye Ainá enjánbomna mo canye entsabe jubiacá, y chë inye Ainá mo canye águila tojtsongüefjncá. <sup>8</sup> Chë canta Ainënga, cada ona chnënguana juatëngmiáša enjanábomna, y tsoicajana y shjoicajana nyëtsañe fšnëbënga monjánbomna. Y chënga nyets tempo, ntjochnacá mëntsá monjánichamo:

¡Uamaná, Uamaná, Uamaná, Bëngbe Utabná,  
Bëngbe Bëtsá nyets obenana bomná,  
nda enjamná, endmëná y sempre echanjëftsemná ca!

9-10 Chca chë Ainënga Bëngbe Bëtsá bëtscá tmontanchuá, Bëngbe Bëtsá chë uámana puestentse tbemaná, chë nyets tempo y nyetsca tescama oyená. Chënga puerte respeto chabiana monjétsobomna y bëtscá tmontanchuá. Cada ora chënga chca tmonjanma ora, chë uta bnétsana y canta bëtsejémënga amëndayënga, chë uámana puestentse tbemanabe shecuatsentse joshamentsiyana y chábioye jtsatschuanayana, chë coronëshangá chë natsanoica jutshanana, y mëntšá jtsichámuana:

11 Aca nyets mercedo condëtsobuájoñe, Bëngbe Utabná y Bëngbe Bëtsá, entsanga chamotsinÿanÿnama, aca puerte bëtscá comnama, y chamotsichamo aca nyets respeto buajoná comna, y nyets obenana bomná comna ca, er aca nyetsca soyënga tcojama; aca icnabóseyeca chë soyënga yojtsemna y aca chca tcojanma ca.

## 5

### *Chë uabemana uándmanana tsbuanácha y chë Oveshatema*

1 Chë uámana puestentse enjetsetbemanabe catsbioica cucuatsiñe canÿe uándmanana tsbuanáchanaca sënjáninÿe, y nyétsañe enjétsabemana tsoicajana y shjoicajana, y canÿsëfta tsengájaše sellëngaca enjétsajandmanana. 2 Y canÿe ángel puerte obenana bomná sënjáninÿe, y cha mëntšá enjétsayebuache: “¿Nda mercedo yobuájona, quem uándmanana tsbuanácha jutëfjonama y chë sellënga jutsécama ca?”

3 Pero, ni celoca, ni quem luarentse, ni quem luarentša jashenoye, ndocná quen-jatsmëna obenánaca chë uándmanana tsbuanácha jutëfjonama, ni juinÿama. 4 Y atse puerte sënjánenobošachna, er ndocná ntjónÿnana mercedo buajoná chë uándmanana tsbuanácha chautëfjonama, ni chauinÿama. 5 Pero canÿa chë bëtsejemënguentšá šonjaninyana: “Ndoñe más matenóbošachena; mouena, chë Judabe pamillentsá, León ca uabobainá, mando y obenana bëtsebomnama, chë rey Davidbentsana Entšá, ton-jayëjaná; cha entsobena chë uándmanana tsbuanácha jutëfjonama, y chë canÿsëfta sellënga jutsécama ca.”

6 Chora sënjáninÿe, chë uámana puesto y chë canta Ainënga y chë bëtsejémëngbe tsëntsaca, canÿe Oveshatema tsanana, pero enjétsinÿna mo cuaftsobacá. Chë Oveshatema enjánbomna canÿsëfta tsëtjonëse y canÿsëfta fšnëbé. Chë canÿsëfta fšnëbé monjaninÿinÿná chë Bëngbe Bëtsabe canÿsëfta espíritënga, chë Bëngbe Bëtsá nyets quem luarëjana tojánichamonga. 7 Chë Oveshatema tonjanobeconá y chë uándmanana tsbuanácha tonjanaca, chë uámana puestentse tbemanabe catsbioica cucuatsëntšana; 8 y chabe cucuatsiñe tonjanaca ora, chë canta Ainënga y chë uta bnétsana y canta bëtsejémënga amëndayënga chë Oveshatembe shecuatsentse tmonjanoshamentšé. Nyetscanga monjétsëtbëna arpangá y castellano codbenga jútjena inciensiÿeca; chë codbenga inciensiÿeca enjamna chë Bëngbe Bëtsabe entsanga tmojayana palabrenga, cháftaca jencuëntama ora. 9 Y quem tsëm canto montsancántaye:

Aca mercedo condëtsobuájoñe, chë uándmanana tsbuanácha chacuacama y chë sellënga chacutsécama; er acbe buiñe juabuáshanëse tconjanóbana, y chca enjamna mo crocénana cuafjëtšajocá, Bëngbe Bëtsabiana chamotsemnama, entsanga nyetsca cachca buiñe bomnënguentšana, nyetsca biyana bomnënguentšana, nyetsca canÿe entsanguentšana, y nyetsca mándayëngbentša entsanguentšana.

10 Aca tcojama chënga chamotsobena ácaftaca jtsemándayama y uámanënga chamotsemnama, Bëngbe Bëtsábioye mo bachnangcá chamotseservénama, y quem luarentse chënga montsemánda ca —chënga monjétserversiaye.

11 Y chca sënjétsonÿaye ora, mallajta angelëngbe oyebuambnayana sënjanuena, y chënga monjétssemna chë uámana puestentse, chë Ainënga y chë bëtsejémënga amëndayëngbe

shéconana. Nýetsá bétscá angelënga monjésemna, corente mallajta; <sup>12</sup> y chënga mëntšá monjétsayebuache:

¡Chë Oveshatema cuafjobacá endmëná,  
 mercedo endëtsobuájoñe, nýets obenana, nýets bomnana,  
 nýets osertánana y nýets añemo chaotsebomnana,  
 y entšanga chabiamana chamotsichamo cha nýets respeto buajoná yomna ca,  
 y chamotsinýanýnama cha puerte bëtšá y uamaná yomnama,  
 y nýetscanga chamotsatschuanama ca! —chënga monjétsayebuache.

<sup>13</sup> Y sënjanuena, lempe ntšamo Bëngbe Bëtšá tojanmcá aina soyënga, celoca, quem luar-entše, quem luarentša jashenoye y chë mar béjayoca, chëngnaca mëntšá monjétsichamo: ¡Chë uámana puestentše tbemanábioye y chë Oveshatema nýetscanga nýets tempo y nýetsca tescama chamótsatacheuanaye y chamotsichamo chata puerte uámanata y nýets respeto buajonata ibomna ca, y chamotsinýanýná chata puerte bëtšétsata y obenata bëtsemnana ca!

<sup>14</sup> Y chë canta Ainëngna monjétsichamo: “Chca chaotsemna ca.” Y chë bëtšëjémënga amëndayëngna tmonjanoshamentšé y chátbioye monjétsatacheuanaye.

## 6

### *Chë Oveshatema chë canýsëfta sellënga tonjanëtsécá*

<sup>1</sup> Chentšana más sënjáninýe; chë Oveshatema chë canýsëftentšana natsana sello tonjanëtsécá ora, sënjanuena canýa chë canta Ainënguentšana puerte jabuache, mo cuafjajuesascá, mëntšá enjétsichamo: “¡Mabo ca!” <sup>2</sup> Sënjanrrepará y sënjáninýe canýe fjantse couaye, y chábeñe enjetsenjaquená canýe arquëja enjétsatbëna. Chábioye canýe coronëshá tmonjaníyé, y mo canýe ayëñjanayacá tonjéftsanbocna, y cabá más jat-sýëñjanámna.

<sup>3</sup> Chë Oveshatema chë inýe sello tonjanëtsécá ora, sënjanuena chë inýa chë canta Ainënguentšana mëntšá enjétsichamo: “¡Mabo ca!” <sup>4</sup> Y inýe couaye tonjánbocna, canýe buanganá; y chë enjetsenjaquená obenana tonjanóyëngacñe jamama chë fshantsentša natjëmbana vida chaotsopochocama, entšanga chamotsenóbama; y canýe bëtš espadëja tmonjanoyé.

<sup>5</sup> Chë Oveshatema chë inýe sello tonjanëtsécá ora, sënjanuena chë inýa chë canta Ainënguentšana mëntšá enjétsichamo: “¡Mabo ca!” Sënjanontjësé y canýe ftsenga couaye sënjáninýe, y chë enjetsenjaquená canýe romanëshá enjétsëtbëna. <sup>6</sup> Y chë canta Ainëngbeñe canýe oyebuambnayana mëntšá sënjanuena: “Nýe canýe kilo trigo canýe tesca trabajuama, y unga kilo cebadá canýe tesca trabajuama; pero chë aceitiye y chë vínoyna ndoñe cattsepochoçaye ca.”

<sup>7</sup> Chë Oveshatema chë inýe sello tonjanëtsécá ora, chë ústonoca Ainá enjétsichamo: “¡Mabo ca!” <sup>8</sup> Sënjanontjësé y canýe shatsësiye couaye sënjáninýe; chë enjetsenjaquená Obanana ca enjanabaina, y stëtsoica bonjétsëstona canýa, Obanënga imomna luare ca uabainá; y chátbioye obenana tmonjanatšatá cántañentšana cánýentše quem luar-entše jtsepochoçama, chentša entšanga jtsapochócase, entšanga tmojtsentsjanama, bëtš shëntsanëngaca, šocanëngaca y quem luarentša tšátjaye bayëngaca.

<sup>9</sup> Chë inýe sello tonjanëtsécá ora, sënjáninýe chë altarentša tajsoye chë tmojanóbanëngbe espíritënga, chë Bëngbe Bëtšabe palabra entšanga abuayiynayama tmojanóbanënga. <sup>10</sup> Chora chënga tmonjanontšé tša uayebuáchana: “Uamaná y ntšamo tojašebuachenacá lempe amá bëngbe Nduiño, ¿ntseco quem luarentša entšangbiamana cochjayana ndoñe tšabá tmonjamama, y chë bëngbioye obanayama cochjácastigaye ca?”

<sup>11</sup> Chentšana nýetscángbioye uafjantse entšayá tmonjaníyé y tmonjanéyana batšatema más chamobatmá ca, chë cachëngcá Crístbeyeca catšátanga y oservëngca, chë cachëngcá mochjanóbanënga, nýetscanga choca chamojtsemnëntscuana.

12 Y más sēnjáninýe; chē inýe sello cha tonjanētsēcá ora, jabuache fshantse tontsanangmēmāna; shinýe tontsanftséngāna, mo chē obaná tojtsemnāna juichētjuama entšayacá, y nýets juashcona mo buiñcá enjétsinýna, 13 y estrellatémēnga celocana fshantsoye tontsantquécjana, mo canýe higo betiye jabuache binýiaca tojtseshatíyeyna ora, chē nguēfshna higuēbēnga cuafjatquécjancá. 14 Y celoca luare tontsanenatjēmba mo canýe tsbuanácha cuafjuandmanacá, y nýetsca tjañe y bējayoca fshantsēnga, chē ndayentse enjamntšsana tontsanojuaná; 15 y nýetscānga, fshantsoca reyēnga, uámanēnga, soldadēngbe amēndayēnga, bomnēnga, obenana bomnēnga, y nýetscānga chē nýets tempo nýe inýabiama oservénēnga y chē cachēngbiama trabájayēngnaca, chē cuevēshēnguiñe y bēts ndētsbēnguenache tjañe tmontsanóitana; 16 y chē tjañēngoye y chē ndētsbēngoye montsanichamo: “¡Bēngbioye šmotsētebuantsá y šmotsaitame, chē uámana puestentse tbemanabe bominýentšsana, y chē Oveshatembe uabouana castigo, cha bēngaftaca tbojetnāna, bēngbeñe ndoñe chaondētsemnāna! 17 Er chē uachuana te chabe castigo jtsebínýnāna te tojóshjāngo; y mora ¿nda nanjobenaye chē sóyeca ndoñe chamondētsepochochocama ca?” –chēnga montsanichamo.

## 7

### *Chē Bēngbe Bētsábioye oservénēnga chē uabouana castigüentšsana mochántsatsebacana*

1 Chca tonjanopasá chentšsana, canta angelēnga sēnjánanýe, monjétsatsana chē quem luarentša canta opochócayenache; chēnga ndoñe quemēnjatanleséncia chē canta binýiēnga jtsebínýnāna, ndoñe chaondētsebinýiayama, ni fshantsentse, ni mar bējayoca, ni ndocna betiyeshēnguiñe. 2 Inýe ángelnaca sēnjáninýe, shinýe bocana luaroicana enjetsabó, y chē Bēngbe Bētsá Ainabe sello enjétsiyēboye. Chē ángelna chē inýe canta angelēngbioye, ndēmuanýēngbioye obenana tmojanatsatá chē fshantsentse y mar bējayoca lempe jtsepochochocama, chēngbioye jabuache tonjánabachembo: 3 “¡Tondaye šmatjapochóca, ni fshantsoca, ni mar bējayoca, ni betiyeshēnguiñe, chē Bēngbe Bētsabiama oservénēngbioye chē sélloca juentsaca fchayauínýnanantscuana, ndoñe chamondētsepochochocama ca!”

4 Y sēnjanuena buétānga chē sélloca tmojánauinýnanayama: canýe patse, canta bnētsana y canta uarānga entšānga uinýnanánēnga nýetsca Israeloquentša bēts pamíllanguentšsana.

5 Judabe pamillentsana, bnētsana uta uarānga uinýnanánēnga;

Rubenbe pamillentsana, bnētsana uta uarānga;

Gadbe pamillentsana, bnētsana uta uarānga;

6 Aserbe pamillentsana, bnētsana uta uarānga;

Neftalibe pamillentsana, bnētsana uta uarānga;

Manasesbe pamillentsana, bnētsana uta uarānga;

7 Simeonbe pamillentsana, bnētsana uta uarānga;

Levibe pamillentsana, bnētsana uta uarānga;

Isacarbe pamillentsana, bnētsana uta uarānga;

8 Zabulonbe pamillentsana, bnētsana uta uarānga;

Josebe pamillentsana, bnētsana uta uarānga;

y Benjaminbe pamillentsana, bnētsana uta uarānga entšānga.

### *Chē mallajta entšānga uafjantsējuangá uichētjonēnga*

9 Chentšsana, sēnjanrrepará y mallajta entšānga sēnjánanýe, ndocná quentaisobenaye jacúntana, nýetsca mándayēnguentšsana, nýetsca cachca buiñe bomnēnguentšsana, nýetsca canýe entšanguentšsana, y nýetsca biyana bomnēnguentšsana; chēnga monjétsatsana chē uámana puesto chē Oveshatembe natsanentse, uafjantsējuangá uichētjonēnga y ramēshangá monjétsētbēna. 10 Nýetscānga tša monjétsayebuache:

¡Bēnga atsebacayana endobá, Bēngbe Bētsá,

chē uámana puestentse entsetbemanábentšsana,



y chë Oveshatémbentšana ca!

<sup>11</sup> Y nÿetsca angelënga, chë uámana puesto y chë bëtsëjémënga amëndayënga y chë canta ainëngbe shëconana monjétsatsanënga, chë uámana puestentša natsanoica tmonjanoshamentšé, fshantsóntscoñe jotsejbénase, y Bëngbe Bëtsá tmonjanadorá, <sup>12</sup> mëntšá jayanëse:

¡Chca chaotsemna!

Bëngbe Bëtsábioye nÿets tempo y nÿetsca tescama chamotsadorana y nÿets ainánaca cha chamotsatschuaná.

Entšanga chamotsinÿanÿná cha puerte bëtsá y uamaná bétsemnama;

cha endmëna nÿets osertánana bomná, y nÿets respeto buajoná, y nÿets obenana y añemo bomná.

¡Chca chaotsemna ca! —chënga monjétsichamo.

<sup>13</sup> Chentsana, canÿa chë bëtsëjemënguentšá tonjanoyebuambá y šonjantjá: “¿Ndëmuanÿënga imomna chë uafjantsëjuangá uichëtjonënga, y ndëmocana tmojabo ca?”

<sup>14</sup> “Taita, aca chëngbiana cotátšëmbo ca” —atše sënjanjuá.

Y cha šonjaniyana: “Chënga montsemna chë jabuache ngmenënguentšana tšabá tmojábočanënga; chë Oveshatema chëngbiana tojóbana y chëngbe bacna soyëngama perdonánënga montsemna; chëngbe uichëtjonëjuangá tmojtsaboshabé y chë Oveshatembe buiñeca tmojtabofjantsé.

<sup>15</sup> Chíyeca chënga chë Bëngbe Bëtsabe uámana puestentša natsanoica montsemna,

y chábioye nÿets tempo chabe delante mondëservena,

y chë uámana puestentše entsetbemaná,

chëngbenache jtsemnëse, chënga echántsanyëna, mo cuafjutsebotscá.

<sup>16</sup> Ya ndoñe más shëntsana, ni uajuendayana quemochátsbomna;

shinÿama, ni yapa jënÿama ya ndoñe más quemochátssufrina;

<sup>17</sup> er chë Oveshatema, chë uámana puestentša natsana tsëntsaca entsemná,

chëngbioye mo oveshëngcá echantsabuajënÿa,

y echanjunatse bėjaye vida bomniye yóbocana luaroye,

y Bëngbe Bëtsá echanjama ya ndoñe más ngmënanana chamondëtsebomnama ca” —cha šonjanjuá.

## 8

### *Chë ústonoca sello*

<sup>1</sup> Chë Oveshatema chë uándmanana tsbuanáchañe chë ústonoca sello tonjanëtsécá ora, celoca ndocá quentétsënëna mo tsëntsa hora nÿetsá.

<sup>2</sup> Chora sënjananÿe chë canÿsëfta angelënga, chë Bëngbe Bëtsabe delante monjétsatsanënga; chëngbioye canÿsëfta trompetëfjuangá tmonjaniyé.

<sup>3</sup> Chentsana inÿe ángel tonjánashjango, canÿe castellano matbëtémaca incienso jajuinÿiyama, y altar natsanoica tonjantsá; chábioye bëtscá incienso tmonjanoyé chaojuinÿyema chë castellano altaroça, chë uámana tbemana natsanoica enjëtsemnoca. Chë ángel incienso tonjanjuinÿé Bëngbe Utabná jëtschuayama, cánÿiñe nÿetsca chë Bëngbe Bëtsabe entšanga tmojoyebuambá palabrëngaca, cháftaca jencuëntama ora. <sup>4</sup> Y chë incienso juinÿnentša ngona, chë ángelbe cucuatšentsana Bëngbe Bëtsabe delante tonjanótsjua, cánÿiñe chë Bëngbe Bëtsabe entšanga cháftaca jencuëntama palabrëngaca.

<sup>5</sup> Chentsana chë ángel chë incienso jajuinÿiyama matbëtema tonjanca, chë altarentša chebánbengaca tonjanajutjé, y quem luaroye tonjanëtsana. Chora enjëtsemna tša jue-sasanana, corente shauenanana, bëtscá tcuinÿënga, y quem luare tontsanangmëmana.

### *Chë trompetëfjuangá*

<sup>6</sup> Chora chë canÿsëfta angelënga, chë canÿsëfta trompetëfjua uabomnënga, tmonjanoprontá chëfjuangá juajatëtama.

<sup>7</sup> Chë natsana ángel chabe trompetëfjua tonjanájatëto, y quem luaroye tmonjanëtšana bëntstá y íñeshe, cánÿiñe buiñeca. Ungañentšana cánÿentšë quem luarentšë tontsanjuinÿe, úngañentšana cánÿentšë betiyeshënguiñe y nÿetsca nguëfshna shacuanënguíñnaca.

<sup>8</sup> Chë inÿe ángel chabe trompetëfjua tonjanájatëto, y chora chë mar béjayoye tmonjanëtšana canÿe soye mo canÿe bëts tjañe tojtsangbototjuancá, y chë mar béjayiñe úngañentšana cánÿentšë buiñe tontsanóbema. <sup>9</sup> Chë mar béjayiñe vida imobomnëngbeñe úngañentšana cánÿentšë tontsanopochocá, y chë barquënguëntšnaca úngañentšana cánÿentšë.

<sup>10</sup> Chentšana chë inÿe ángel chabe trompetëfjua tonjanájatëto, y canÿe bëts estrella, mo canÿe uajuinÿanëshacá enjétsangbototjuana, celocana tonjanótsatšë chë úngañentšana cánÿentšë béjayënguiñe, y béjaye óbocanenache. <sup>11</sup> Chë estrella enjanabaina Untjana ca; y chë úngañentšana cánÿentšë buyeshënguiñe untjiye tontsanóbema, y chë untja búyeshe causa ba entšanga tmonjanóbana.

<sup>12</sup> Chë inÿe ángel chabe trompetëfjua tonjanájatëto, y chora tontsanóndbema chë úngañentšana cánÿentšë shinÿiñe, y chë úngañentšana cánÿentšë juashconiñe y chë estrellënguíñnaca. Chca, nÿetsca chentša úngañentšana cánÿentšë ibetiñe tonjanoquedá, y chë causa ndoñe quemëntétsebinÿnaye posufta horëntscuana, bnëté canta hora y ibeta canta hora.

<sup>13</sup> Chentšana, sënjanrrepará y sënjanuena canÿe águila, tsbanánoca celoca enjet-songüefjná, jabuache mëntšá enjétsichamo: “¡Tša lastema, tša lastema, tša lastema quem luarentša entsangbiama, chë inÿe trompetëfjuangá chë inÿe unga angelënga chamojuájatëto ora ca!”

## 9

<sup>1</sup> Chentšana chë inÿe ángel chabe trompetëfjua tonjanájatëto, y sënjáninÿe canÿe ángel quem luaroye jastjanguana y enjétsinÿna mo canÿe estrella celocana quem luaroye cuaftsotsatsancá; y moye tonjánashjango ora, tmonjanoyé chë uabouana tboça atëfjnentša llavëfja. <sup>2</sup> Chë uabouana tboça atëfjnentšë tonjánatëfjo, y chentšana becé ngona tonjanótsjua, mo bëts hornentša ngoncá; y chë uabouana tboçe atëfjnentšë ngona causa shinÿe tontsanibétata y nÿets celoca ena ngona enjétsemma. <sup>3</sup> Chë ngonentšana ba tšátjaye chapulinga tmonjánbocana, y nÿets quem fshantsëjana tmonjanáshana; y chëngbioye obenana tmonjanatšatá, chánaca jándbemama, mo chë juetjuama alacranëngbe obenancá. <sup>4</sup> Chëngbioye tmonjanamëndá tondaye ntjándbemana chë shacuanënguiñe, ni ndocna nguëfshna matënguiñe, ni ndocna betiyeshiñe; nÿe chë juentsaca chë Bëngbe Bëtsabe sëlloca nduinÿnanana entsangna aíñe. <sup>5</sup> Pero ndoñe chematanalesenciá entsángbioye jobáyana, ndayá nÿe jamama chënga shachna shinÿëntscuana tsetšanana chamotsebomnama; y chë chënga monjánama chamotsebomnama tsetšanana enjamna mo canÿe alacranbe uetjoniñca.

<sup>6</sup> Chca tempo chaojtsemna ora, entšanga mochántseguaye ntšamo jtsóbanama, chë tsetšanënga jauántama ndoñe quemochátobena causa, pero ndoñe quemochátinÿena ntšamo jamëse jtsóbanama; y masque tša mochántseboše jóbanama, chora chëngaftaca ndoñe chca queochatopása, mo jóbanama ndoñe tmontsobencá.

<sup>7</sup> Chë tšátjaye chapulinga monjétsinÿna mo couayëngcá prontánënga jama entsángaftaca jétsjama; chëngbe bestšašiñe monjanábomna mo castellano coronëshangacá, y chëngbe jubíá enjamna mo entšabe jubiácá. <sup>8</sup> Stjënashë monjánbomna mo shembásabe stjënashacá, y chëngbe juatsašënga mo leonbe juatsašëngcá. <sup>9</sup> Chëngbe cuerpënga jenëuyanama cochaca

monjánbomna morocho soyënga, mo hierro soyëngcá, y chëngbe juatëngmiashangá tmojtsabonjná ora, chë shauenanana bëtscá enjamna, mo ba cochëshangá couayënga cuaftsasjojnacá, chë inyëngaftaca jéntsjava tmojëftsátjajo ora tojtseshauenancá. <sup>10</sup> Chënga monjanábomna mo alacranbe uascuatšëjuacá, ba uetotjëfjangaca, y chë uascuatšëjuaca obenana monjánbomna shachna shinjëntscuana entšanga mal chamotsepasama. <sup>11</sup> Chë tsátjaye chapulinga canyë amëndayá monjánbomna, chë uabouana tboca mándaye ángel; hebreo biyaña cha uabainá Abadón ca y grieguiña Apolión o pochocayá ca.

<sup>12</sup> Chë natsana pochócayana ya tocjochnëngo, pero más chcoye cabá inyë uta soye más pochócayana cachcá echántsemna.

<sup>13</sup> Chentšana chë inyë ángel chabe trompetëfjua tonjanájatëto, y canyë oyebuambnayanana sënjanuena, chë Bëngbe Bëtsabe delante enjëtsemna castellano altarentša juatsboica lado sibienache obocanentšana enjëtsovocana. <sup>14</sup> Y chë oyebuambnayanana, chë trompetëfjua tonjanájatëto y enjëtsetbëna ángelbioye tbonjanianana: “Chë canta angelënga chë Eufates bëtš fshájaye tsachoca utsbuanënga mëjafjoná ca.” <sup>15</sup> Y chë canta angelënga tmonjanëjafjoná; y nya chë ora, chë te, chë shinjyë y chë uatama chëngbioye tmojanaprontá, chë quem luarentša entšángbeñe úngañentšana cánjëntšënga jtsëbáyama. <sup>16</sup> Atšë sënjanuena buëtanga imojamna chë angelëngaftaca tmojána soldadënga, couayënguiñe: uta patse millonënga ca.

<sup>17</sup> Mëntšá sënjananjyë mo otjenayoquëcá chë couayënga y chë chëngbeñe enjaquenënga: Chë enjaquenënga monjánbomna morocho soyënga cochaca, jenëuyanama, y chë soye buanganana enjáninjyëna, mo iñcá, y fchendana mo chë uámana ndëtšbé jacintcá y tsësiyana injynana mo azufrcá; y chë couayënga monjánbomna mo leonbe bestšašcá, y chëngbe uayoicana enjëtsovocana iñe, ngona y azufrana. <sup>18</sup> Y chë úngañentšana cánjëntšë entšanga tmonjanóbana quem unga uabouana pochócaye soyëngaca, chë couayëngbe uayoicana enjëtsovocanana: iñe, ngona y azufrana. <sup>19</sup> Er chëngbe obenana entšanga japochócama monjánbomna uayáshañe y uascuatšëjuañe; er chëngbe uascuatšëjua enjuamna mo mëtšcuayëngcá, bestšašëngaca, y chëjuanga causa entšanga mal montsanpásaye.

<sup>20</sup> Pero chë inyë entšanga, chë uabouana pochócaye soyëngaca ndoñe tmonjanopochocanga, juabna ndoñe chematanrocá, y ndoñe chematanajbaná amana chë bacna soyënga ntšamo monjanamcá; ndoñe chematanajbaná adórayana chë bacna bayëjënga, ni chë mo diosënga cuaftsemncá jtsejuabnanyëse imojánadorana castellano soyënga, midio soyënga, bronce soyënga, ndëtšbé y niñëbé soyënga; y chca soyënga ndoñe quemënjatobena ni jinjyama, ni jouenama, ni jtsanama. <sup>21</sup> Juabna ndoñe chematanrocá y ndoñe chematanajbaná entšanga obanayana, encjuanayana, bacna soyënga boyabása o shembásoftaca jtsamëse oyenana, ni atbëbanana.

## 10

### *Chë ángel base uándmanana tsbuanáchaca*

<sup>1</sup> Chentšana sënjaninjyë inyë ángel, puerte obenana bomná; celocana enjëtstajjuana, y chabe shëconana canyë jantšëtšë enjëtsemna; chabe bestšaše tatsëtsacá canyë tsëfcuácuatjo. Chabe jubiá shinjycá enjëtsebuashinjyëna, y chabe shecuatšënga mo úcuatjona niñëbënga cuaftsoiñcá. <sup>2</sup> Chabe cucuatšëñe enjëtsetbëna canyë base uándmanana y utëfjna tsbuanáchaca. Chabe catšbioica shecuatšëca chë mar béjayoca tonjantsá, y chë uañicuayóicatšëcna, quem fshantsentšë. <sup>3</sup> Y jabuache tonjanoyó, mo canyë león cuaftseyocá; y tonjanoyó ora, canjësëfta juesasanentša jabuache shauenanana sënjanuena. <sup>4</sup> Chë canjësëfta juesasana chca tmonjanoyebuambá ora, atšë sënjanoprontá ntšamo chënga tmonjanayancá juabemama; pero canyë oyebuambnayanana celocana sënjanuena, mëntšá šonjëtšatsaye: “Nyë aca cochtsójuabnañe ntšamo chë canjësëfta juesasana tmonjayancá, ndocnábioye catjauyana, y chë soye ndoñe catjuábema ca.”

<sup>5</sup> Chora chë ángel, chë mar béjayoca y quem fshantsentse atsaná sënjaninyá, chabe catšbioica cucuatše celoye tonjanatsbaná, <sup>6</sup> y tonjanjurá Bëngbe Bëtsabiama, chë nyets tempo y nyetsca tescama oyenabiama, chë celoca, quem luare, chë mar béjaye, y lempe chë luarënguifne yobinyñcá tojanmabiama. Tonjánayana: “Ya ndoñe más quemochatobatma; mora Bëngbe Bëtsá echanjama ntšamo tojašebuachenacá, <sup>7</sup> er chë tempo chaojóshjango, chë ústonoye ángel chabe trompetéjua juajatëtama chaojontsé ora, chora ya echanjochnëngo ntšamo Bëngbe Bëtsá jamama yojuabnacá; chë soye nyetsca entšángbioye cha ndoñe chenatinyanýé, ntšamo tempo cha chabe oservénëngbioye, chë chabe juabna oyebuambnayëngbioye tojanabuayenacá ca” —cha tonjánayana.

<sup>8</sup> Chë atše sënjanuena oyebuambnayana celocana enjétsobocanana, cachiñe šonjanatsëtsá y šonjaniyana: “Motsa y mauaca chë mar béjayoca y quem luarentše ángel entsemnabe catšbioica cucuatšifne base uándmanana y utëfjna tsbuanácha ca.”

<sup>9</sup> As atše chë ángelbioye sënjána; chë base uándmanana tsbuanácha chašuíyema sënjaniyana, y cha šonjanjuá: “Quemëcha, motsásañe. Acbe uayoye uamešquénëcha mo tjouangbe meloycá echántsamna, pero acbe uafsbioyna puerte uauntjécha echantsábema ca.”

<sup>10</sup> As chë base uándmanana tsbuanácha chë ángelbe cucuatšentsana sënjanaca, y sëntsanásañe; y atšbe uayoye meloycá enjétsamna, pero sënjanabmuaná y atšbe uafsbioyna puerte uauntjécha tontsanábema. <sup>11</sup> Chora šmonjaniyana: “Aca cmontsemna cachiñe jtëtabuayenana, ntšamo Bëngbe Bëtsá tojayancá chë ntšamo yochjopásama, ba canýe luarentša entšángaftaca, ba mándayëngbentša entšángaftaca, ba biyana bomna entšanguentšëngaftaca y quem luarentša reyëngaftaca ca.”

## 11

### *Chë útata Bëngbe Bëtsabe juabna oyebuambnayata*

<sup>1</sup> Chentšana canýe medídaye niñëfja šmonjanoyé, mo jatšëmbonëfjácá, y šmonjaniyana: “Motsa y Bëngbe Bëtsabe bëts yebna y chentša altar cochjamedída, y cochjácuntaye bueta entšanga chentše Bëngbe Bëtsábioye imojtsadorana. <sup>2</sup> Pero chë Bëngbe Bëtsabe yebnentše más shjoica luarna cachcá cochjonýaye, ndoñe catjamedída, er chiñe chë ndoñe judiëngbiamana endmëna; y chënga, chë uámana ca uabaina bëts pueblama, canta bnëtsana y uta shinýëntscuana soyënga mochántsama chiñe jtsepochoćama, mo cuaftsebotajnaycá. <sup>3</sup> Pero atše, útata atšbiamana tatšëmbuata y oyebuambnayata chanjichamuá atšbe cuenta entšángbioye jábuayenama, canýe uaranga y uta patse y chnënguana bnëtsana tentscuana. Chatna uajojësha entšayangá uichëtjonata bochantsemna, chca, ngmena bomnama jinyanýiyama ca” —chata tbonjánayana.

<sup>4</sup> Quem útata atšbiamana tatšëmbuata y oyebuambnayata bontsinýinyena chë uta olivos betíyeca y chë uta candelerëšeca, ntšamo Bëngbe Bëtsá, chë quem luarentše mandayabe delante endmëncá. <sup>5</sup> Nderado nda tojtseboše chatbiamana bacna soye jamama, ndoñe quentatobenaye ntšámncá jáborlana, er uayoicana íñeshe nanjóbcna y chë uayayëngbioye nantsapochóca; nderado nda tojábosena chatbiamana bacna soye jamama, cachcá cha buántsemna jóbanama. <sup>6</sup> Chë útata obenana bondbomna celoca jtsachtama, ndoñe chaonduaftema, entšángbioye Bëngbe Bëtsabiama chabojsabuayiyiná tese; obenana béjayënga buiñe jtsebiama, y jamama quem luarentše chaotsóndbemama, nyetscna pochóca soyëngaca, bueta sóynaca ntšamo chata tbojtsebošcá.

<sup>7</sup> Pero ntšamo Bëngbe Bëtsabiama ibotatsëmbcá entšángbioye jábuayenama chata chabo-japochocá ora, chë uabouana bayá, chë corente bëts tboicana chaojabocná, chátbioye echántšatsjaye, echantsayëñaná y echantsëbaye. <sup>8</sup> Y chatbe óbana cuerpo, chë corente bëts pueblentša tsáshenañe echanjoquéda, chë chatbe Utabná tmojanrucificá luarentše, y chë bëts pueblo inýetsá juabáyamna nántsemna mo chë Sodoma y Egiptó luaroycá. Chentše endmëna mo chë bëts pueblënga Sodoma y Egiptcá, er chentše



chë entsanga yapa bacna soyënga jtsamana. <sup>9</sup> Y unga y tsëntsa tentscuana, chë obanatbe cuerpo mochantsonyaye, nyetsca canye luarentša entsanga, nyetsca cachca buiñe bomna entsanga, ba biyana bomna entsanguentsana y ba mándayëngbentsa entsanga; ndoñe quenátslesenciana chata jutabuantsama. <sup>10</sup> Chata bochjóbanama, quem luarentše oyenënga mochanjóyejuaye; tša oyejuayënga mochántsemnama, ndayánaca mochanjénatsëtaye, er ntšamo chë Bëngbe Bëtsabe juabna oyebuambnayata tbojanayancá, tojanma quem luarentše oyenënga puerta chamosufrima.

<sup>11</sup> Pero chë unga y tsëntsa te tonjanochnëngo ora, Bëngbe Bëtsá tonjanma chë obanata chábuatayenama; chentsana tbontantsata, y chë monjétsantješnënga tša uatjana tonjanëbuache. <sup>12</sup> Chora canye jabuache oyebuambnayana tbonjanuena, celocana mëntšá enjétsëtsësnaye: “Moye mašënguata ca.” Y chatna canye jantšetëshiñe tbonjántsjua, y chatbe uayayënga chca monjétsontyaye. <sup>13</sup> Cachora quem fshantse jabuache tontsanangmëmana, y chë bëts pueblentše bnëtsanentsana cányëntše tontsanáshajaye, y canyësëfta uaranga entsanga tmonjanóbana. Chë ainënga tmonjanoquedanga, tša auatjanánënga, chë celoca Bëngbe Bëtsábioye montsanadorana.

<sup>14</sup> ¡Chë inye uabouana soye quem luare japochócama, mora tocjochnëngo, pero betesco chë ústonoye uabouana pochócaye soye echanjóshjango!

### *Chë ústonoye ángelbe trompetëfjua*

<sup>15</sup> Chë ústonoye ángel chabe trompetëfjua tonjanájatëto ora, celoca tša monjétsayebuache, mëntšá monjétsichamo:

Ora tocjobuache, Bëngbe Utabná y chabe Uámana Uabuayaná Jesucristbe amëndayana quem luarentše chaotsemnama,

y chë amëndayana echántsemna nyets tempo y nyetsca tescama ca.

<sup>16</sup> Y chë uta bnëtsana y canta bëtsëjëmënga amëndayënga, chë chëngbe uámana puestiñe Bëngbe Bëtsabe delante monjétsëbiamanënga, tmonjanoshamentšé, fshantsóntscoñe jotsejbënase, y Bëngbe Bëtsá tmonjanadorá, <sup>17</sup> mëntšá jayanëse:

Bëngbe Utabná, Bëngbe Bëtsá nyets obenana bomná,

aca chë mora cha condmëná y chë tempo cha conjamná cbontsatschuaná,

er nya mora acbe bëts obenánaca soyënga cochjama, acbe amëndayana jóntšama.

<sup>18</sup> Ba luarentša entsanga ácaftaca tmonjanotšatjayaná;

pero chëngaftaca cmojetnama chë uabouana castigo jtsebínynama te tocjóshjango,

chë tempo tmojanóbanëngbiamama jayanama tšabá o ndoñe tšabá tmonjéftsemama.

Tonjóshjango chë hora, uacanánana jtatšatayama chë acbiamama oservëngbioye,

chë acbe juabna oyebuambnayëngbioye, chë acbe entsángbioye,

y chë acbe uabaina nyetscangbiamama más bëts uabainana yomnama juabnayëngbioye,

uámanënga y nduámanënga;

y chë tempo tonjóshjango, quem luare pochocayënga jtsapochócayama ca —chënga tmonjánayana.

<sup>19</sup> Chora, Bëngbe Bëtsabe bëts yebna celoca tonjantëfjo, y choye enjétsëbinyna chë cajontema, ndayëtëma yojaninynáná ntšamo Bëngbe Bëtsá chabe entsángbioye tojanašëbuachenacá; y chora enjétsëmna tcuinënga, tša shauenanana, juesasanana, quem fshantse tontsanangmëmana y bëts cá bëntstá tonjantquécjana.

## 12

### *Chë shembása y chë uabouana bayá*

<sup>1</sup> Chentsana, canye bëts soye celoca tonjanonyná entsanga canye soye jinynayiyama: canye shembása, shinye mo chabe uichëtjoniaca, juashcona chabe shecuatšentša tajsoye, y chabe bestšašhiñe canye coronësha bnëtsana uta estrellëngaca. <sup>2</sup> Chë shembása ngomananá enjétsëmna, y chë šëšona jónynama yojétsobecuama jabuache enjétsëyoye, chë šëšona

jónyname cha puerte jasúfriama ibojamna causa. <sup>3</sup> Y chora inye bêts soye celoca tonjanonyná, entsanga inye soye jinyaníyama: canye uabouana dragón buanganá, canyséfta bestsašengaca y bnétsana tsétjonéšengaca y chë bestsašenguiñe enjanábomna canyséfta coronéshangá. <sup>4</sup> Chabe uascuatšéjuaca úngañentsana cánýentse chë estrellatémenga celocana tontsansjojó, y quem fshantsoye chëtémenga tontsanétsana. Y chë dragón chë šešona jtsebomnama shembásabe delante tonjantsá, chë šešonatémbioye jtsósañama, cha tojonyná ora. <sup>5</sup> Chora chë shembása canye šešona boyabásetema bontsanbomna, nda nyets luarenache entsángbioye yochtsaméndaye mo canye hierro varéfjaquécá. Pero chë šešona chábentsana tmontsanjuaná y Bëngbe Bëtsábioye, chabe uámana puestoye tmontsanámbañe. <sup>6</sup> Chë shembásana entsanga ndoyena luaroye tontsanachá, Bëngbe Bëtsá canye luare ibojaboprónta choye, chentse saná chamocaredadoma, canye uaranga y uta patse y chnënguana bnétsana tentscuana.

<sup>7</sup> Chentsana celoca canye entsjanayana enjésemna: Miguel, chë angelëngbe amëndayá, y chabe angelënga chë dragónaftaca monjétsentsjanaye. Chë dragón y chabe angelënga monjétsatsjanaye, <sup>8</sup> pero ndoñe chematanobená jáyëñjanama, y chëngbiamá ya ndoñe más luare celoca quentésemna. <sup>9</sup> Chcase, chë uabouana dragón chocana tmontanábocna, chë tempsca mëtscuaye, chë Diablo y Satanás ca uabainá, y chë bëtscá entsángbioye aingñayá; quem fshantsoye cha tmontsantsatse, y chë cha yojanaménda angelëngnaca.

<sup>10</sup> Chora canye jabuache oyebuambnayana celoca sënjanuena, mentsá enjétsichamo:

Chë Bëngbe Bëtsá entsanga játsebacama tempo ya tonjóshjango.  
Mora Bëngbe Bëtsá echanjínyaníyie chabe obenana y mándayana,  
y chabe Uámana Uabuayaná Jesucristbe obenana jtsemándayama;  
er chë Cristbe delante bëngbe catšátanga mal aquedayá ya tmontábocna,  
nda nyets tempo Bëngbe Bëtsabe delante mal enjanaquedayá.

<sup>11</sup> Bëngbe catšátanga cha tmonjayëñjaná,  
er Cristo, chë mo tmojóba Oveshatemcá, Bëngbe Bëtsá bacna soyëngama entsanga  
cháuperdonama,  
tonjanóbana, chabe buiñe juabuáshanëse,  
y chë ndegombre soyëngama chënga monjanóyebuambnáyeca;  
er chëngbe vida chëngbiamá ndoñe quenjatámana;  
Jesucristo jaserviama jóbanama chënga monjanprontana.

<sup>12</sup> ¡Chcasna, celoca corente oyejuayana chaotsemna,  
y tsëngaftanga chë choca oyenëngbeñnaca!  
¡Pero tša lastema chë fshantsoca y mar béjayoca oyenëngbiamá,  
er chë diablo tsëngaftangbioye tonjástjango, corente tšatjayá,  
er cha entsetátšëmbo ya nye batsá yojtsábojamna chë chábioye mochjacastígama ca! —  
enjétsichamo.

<sup>13</sup> Chë dragón quem fshantsoye tmojtsantsatsáma tonjáninýe ora, chë šešona boyabásetema tbonjanéshjango shembásabioye tbontsanacmé. <sup>14</sup> Pero uta juatëngmiásha, chë bêts aguilbeshá, chë shembásabioye tmonjaníyë, chabiamá tmojanprontá luaroye chaongüefjoma, entsanga ndoyena luaroca, chë dragónbentsana bënoca; y chentse enjamna chë shembásabioye saná chamuájuatšema, unga y tsëntsa uatëntscuana. <sup>15</sup> Chora chë dragón, chabe uayoicana bêts béjaye tonjanbuashëtjo chë shembásabe stëtsoica, chaobuama y chabotsambama; <sup>16</sup> pero quem fshantse chë shembásabioye tbonjanájabuache, er chë fshantse mo uayašacá tonjantëfjo, y chë dragonbe uayoicana béjaye obocniye tontsanobmuánañe. <sup>17</sup> Y chë dragón chë shembásabioye tondaye jamana chenatanobená causa, corente cacháftaca tbonjánëtna, y tonjána chë ínýenga, chë shembásabe basengcá mondmënënga játsjayama, ntšamo Bëngbe Bëtsá yomandacá imobedecénënga, y ntšamo Jesucristo tonjanabuayená ndegombre soyëngaca sempre imoyenënga. <sup>18</sup> Y chë dragón chë mar béjaye tsachañe tonjantsá.

## 13

*Chë dragón tonjanma, chë mar béjayoca uabouana bayá chabe obenana chaotsebomnama*

<sup>1</sup> Chentsana atše sënjaninýe, canýe uabouana bayá chë mar bejayoicana tonjánbocna; enjánbomna canýsëfta bestšašënga y bnëtsana tsëtjonëšënga, y chëšënguiñe bnëtsana coronëshangá, y chë bestšašënguiñe bañe enjëtsabemana Bëngbe Bëtsabiana contra oye-uambnaye uabaina. <sup>2</sup> Chë uabouana bayá sënjaninýá enjamna mo canýe leopardcá, mo osbe shecuásangaca, y chë uayáshana mo leonbeshacá. Chora chë dragón tonjanma chë uabouana bayá chaotsebomnama chabe obenana, y chabe uámana puesto jtsemándayama, y chabe bëts mando. <sup>3</sup> Canýe chabe bestšašënguentše enjëtsinýna mo jóbanama tëtšeniñcá; pero chentše tbontanóbema; y chora quem luarentša nyëtsca entšanga ojnánënga monjësemna, y chë uabouana bayábioye montsanëyeunana. <sup>4</sup> Y chë dragón montsanadorana, chë uabouana bayábioye obenana tbojánatšetama; y chë uabouana bayábioynaca montsanadorana, mëntšá jayanëse: “Ndocná obenana quenátsbomna quem uabouana bayacá, y ndocná quenátobena chábioye jayënjanama ca.”

<sup>5</sup> Chë uabouana bayábioye tbonjanlesenciá corente podesca Bëngbe Bëtsabiana chaotsóyeuambnama, y obenana tbonjanatšetá, canta bnëtsana y uta shinýëntscuana chaotsemándama. <sup>6</sup> Y podesca Bëngbe Bëtsabiana tonjánayana, soyënga chabe contra, chabe bëts yebnama y chë celoca oyenëngbe contra. <sup>7</sup> Chábioynaca tbonjanlesenciá chë Bëngbe Bëtsábenga imomnënga játsjayama, jáyënjanantscuana; y obenana tbonjanatšetá chaotsemándama nyëtsca cachca buiñe bomna entšángbeñe, nyëtsca canýe entšángbeñe, nyëtsca biyañe bomnëngbeñe, y nyëtsca mándayëngbentša entšángbeñe. <sup>8</sup> Chë uabouana bayá nyëtsca quem luarentša entšanga mochántadorana. Chë entšanga mondmëna ndëmuanýengbe uabaina ndoñe yontsábemana, chë Bëngbe Bëtsábioye jëtschuayama mo canýe oveshatemcá, tojanóbanabe librëšañe. Bëngbe Bëtsá quem luare cabá ndëma ora, quem librëšañe tojanábema nyëtscanga chë tšabe vida mochjónyëngbe uabaina.

<sup>9</sup> Chë jouenama obenënga, chamouena.

<sup>10</sup> Chë cárceloye jama ibomná, cárceloye bochanjotóca jama; chë espadējaca jobanamá, espadējaca echanjóbana.

Chíyeca quem luarentše entseyta, chë Bëngbe Bëtsábenga imomnënga padecena soyënguiñe tmojtsemna ora, puerte uantadënga jtsemnana y Bëngbe Bëtsábeñe jtsošbuáchiyana, mo chë Bëngbe Bëtsabe entšangcá.

<sup>11</sup> Chentsana inýe uabouana bayá sënjaninýe, quem fshantsentsana enjëtsëbocana; uta tsëtjonëše mo oveshabešcá enjánbomna, pero mo canýe dragoncá, mo canýa Satanásbeyeca mandanacá enjëtsoyebuambnaye. <sup>12</sup> Y enjánama soyënga chë natsana uabouana bayabe nyëts obenánaca, chabe delante. Chë fshantsentša bayá tonjanma nyëtsca luarentše oyenënga chamotsadoránama chë natsana uabouana bayábioye, chë jóbanama tëtšeniñe tbontanobemá. <sup>13</sup> Cha ba bëts soyëngnaca enjánama chabe obenana entšanga jinýanýiyama, entšangbe delante jamana iñe celocana fshantsoye chaótsatsamnaca. <sup>14</sup> Y cha tbonjanlesenciá chaoma chabe obenana jinýanýiyama chë natsana uabouana bayabe delante. Chë soyëngaca entšanga tonjanaíngñé, y quem luarentša entšanga tonjanéyana canýe soye chamopormá, y chë soye cháotsinýna mo chë natsana uabouana bayacá, chë espadējaca tëtšená enjamná, y chora tšabá enjetsatsmëná. <sup>15</sup> Y chë inýe uabouana bayábioye tmonjanlesenciá obenana chaotsebomnama jamama, chë natsana uabouana bayábioye jadórama entšanga tmonjanma soye vida chaotsebomnama, y chë soye jóyeuambayama chaotsobenámna, y jamama chë chábioye ndoñe tmontsadoránënga chamóbanama. <sup>16</sup> Y tonjanma, nyëtscángbioye, básanga y bëtsétsanga, bomnënga y ndbomnënga, cachëngbiama trabájayënga y nyë ínýabiama nyëts tempo oservëngë, catšbioica cucuatšíñe o juentsaca chamuínýnanama. <sup>17</sup> Y ndocná

quenjátanobena ni jiyama, ni jobuámiñama, chë uinýnanánana ndoñe tontsebomñese; chë uabouana bayabe uabaina o chë chabe uabainama yomna número.

<sup>18</sup> Chë número jinýenamna bëtscá osertánana jtseytana. Chë becá osertánana bomná cháuinýena ntšamo chë uabouana bayabe número iuayancá, er canýe entšabe número endmëna. Chë número endmëna chë chñnguana patse y chñnguana bnëtsana y chñnguana.

## 14

### *Chë canýe patse y canta bnëtsana y canta uaranga entsangbe canto*

<sup>1</sup> Y más sënstanonýá. Sënjáninýe, chë Oveshatema, enjétsatsjabna Sión ca uabaina tjoca, y cháftaca monjésemna canýe patse y canta bnëtsana y canta uaranga entsanga, y chëngbe juentsaca enjétsabemana chë Oveshatembe y chabe Taitabe uabaina. <sup>2</sup> Chora sënjanuena celocana canýe shauenanana, mo bëtscá béjayënga y bëts juesasana shauenanancá; y chë shauenanana enjamna mo chë arpësha uenanayënga chëngbe arpëshangá tmojt sabuastocá. <sup>3</sup> Chënga canýe tsëm canto montsancánta Bëngbe Bëtsabe delante, chë chabe uámana puesto y chë cháftaca canta Ainënga y chë bëtsëjémënga amëndayëngbe natsanentše. Y ndocná quenjátanobena chë canto juatsjínýana, nýe chë canýe patse y canta bnëtsana y canta uaranga quem luarentšëngbentšana atsebácanënga aíñe. <sup>4</sup> Chënga monjanmëna chë shembásaftaca ndocna bacna soye tmonjanmënga, er chënga imojanenománda chca bacna soyënga ndoñe ntsamama; chë Oveshatema ndëmoye tojtsá y chëngnaca choye jtséstonana. Chënga imojamna chë natsanënga chë quem luarentša entsanguentše atsebácanënga jtsemnama, y chënga atsebácanënga imojtsemna Bëngbe Bëtsá y chë Oveshatema jtsaservénama. <sup>5</sup> Chënga ndocna te tmonjanobosteró; ndocná quenátobena jayanama chënga bacna soye tmojanma ca.

### *Ntsamo chë unga angelënga tmojánayana*

<sup>6</sup> Chentšana inýe ángel sënjáninýe, tsbanánoca celëjana enjétsongüefjnaye. Cha enjánbomna canýe nýets tempscama oservena buayenana soye, entsángbioye jáuyanama, nýets quem luarentše oyenënga, nýetsca mándayëngbentša entsanga, nýetsca cachca buiñe bomna entsanga, nýetsca biyañe bomñëngbeñe y nýetsca canýe entsangbiama. <sup>7</sup> Y jabuache mëntsá enjétsichamo: “¡Bëngbe Bëtsabiamá smochjájuaoye cha nýetscangbiama chë más uamaná endmënama, y cha smochtsatschuanaye, er ya tonjóshjango chë tempo ntšamo entsanga tmojamama tšabá o ndoñe tšabá bëtsemnama cha cháuyanama! ¡Chë celoca y quem luare, chë mar béjaye y nýetsca chë fshantsentšana óbocana béjayënga tojamá smochtsadorana ca!”

<sup>8</sup> Chábentšana inýe ángel mëntsá enjétsichamo: “¡Ya bëts castigo, ya bëts castigo chë Babilonia bëts pueblaca entsángbeñe echántsemna!, ndëmuanýënga tmojinýanýé ntšamo puerte bacna soyënga shembása o boyabásaftaca jtsamama y inýe corente bacna soyëngnaca, y chentšana nýets quem luarentša entsanga mo cach Babilonioquëngcá tmojama. Chë causa, Bëngbe Bëtsá echanjama chëngbiámnaca chabe uabouana castigo chaotsemnama ca.”

<sup>9</sup> Chë útatbentšana inýe ángel jabuache mëntsá enjétsichamo: “Nderado nda chë uabouana bayábioye y chë chábioye jadórana pormana soye tojtsadorana, y tojalesenciá chabe uinýnanana soye juentsaca o cucuatšíñe chamojajoma, <sup>10</sup> chánaca bontsemna, chë Bëngbe Bëtsabe uabouana castigo jasúfriana. Entšanga puerte bacna soye tmojamama, Bëngbe Bëtsá puerte tbojetna, y chë causa echanjama chë castigo chëngbeñe chaotsemnama. Y chë uámana angelënga y chë Oveshatembe delante, chë bayá adorarábioye puerte mochanjatsetšená, íñeshe y azúfrecá. <sup>11</sup> Chca chamojtsesufrina ora, becá ngona echantsóbocana, y chë ngona nýets tempo chca echantsótsjuaye; y chënga, chë



uabouana bayá y chábioye jadórama pormana soye adórayënga, y chabe uinÿnanana soye bomnëngbiana, ndocna te chë tsetšanana queochatëjbana ca” —cha enjëtsichamo.

<sup>12</sup> Chíyeca quem luarentse entseyta, chë Bëngbe Bëtsabe mandënga obedecënënga y Jesúsbeñe puerte ošbuáchiyana bomnënga, chë Bëngbe Bëtsabe entsanga, padecena soyënguiñe tmojtsemna ora, puerte uantana jtsemnana.

<sup>13</sup> Chentsana canÿe oyebuambnayana celocana sënjanuena, mëntšá šonjëtsatsaye: “Mëntšá mábema: ‘Tša oyejuayënga mochántsemna chë mëntescana mochjóbanënga, Bëngbe Utabnáftaca cánÿiñe mo canÿacá jtsomñëse ca.’ ”

“Aíñe ca” —chë Uamana Espíritu tonjayana—, “chënga ya ndoñe más queochátamna jatrabájana, ni jasúfriana, er chënga tmojama tšabe soyënga Jesús jaserviama, y chë soyëngama chënga tšabe bendicionënga mo uacanancá celoca mochanjóyëngacñe ca.”

### *Ndayá chë angelënga quem luarentse tmojanatbaná*

<sup>14</sup> Chora más sënjáninÿe; sënjáninÿe canÿe fjantse jantsetëshe, y chëshiñe canÿa enjëtssetbemana. Cha enjamna mo canÿe entsacá; chabe bestšasiñe enjanábomna canÿe castellano coronësha, y cucuatsiñe canÿe puerte efsana mëtštá enjëtsatbëna.

<sup>15</sup> Chentsana, chë celoca Bëngbe Bëtsabe bëts yebnentsana inÿe ángel tonjánbocna, y jabuache bonjëtsatsaye chë jantsetëshiñe tbemanábioye: “¡Acbe mëtštaca machbonja y shajuanënga matbaná, er chë játbanama tempo ya tonjóshjango; chë quem luarentša shajuana ya tonjaboche ca!” <sup>16</sup> Y chë jantsetëshiñe enjantbemaná chabe mëtštaca quem luariñe tonjánachbonja, y nÿets quem luarentse atbanániñe tonjanoquedá.

<sup>17</sup> Chentsana inÿe ángel chë celoca Bëngbe Bëtsabe bëts yebnentsana tonjánbocna; chánaca canÿe puerte efsana mëtštaca. <sup>18</sup> Y chë altarentšana inÿe ángel tonjánbocna, chë mando bomná íñesheca castigo entsangbiana jamama; y chë puerte efsana mëtštá bomna ángelbioye jabuache tbonjanianya: “¡Acbe mëtštaca machbonja y chë fshantsoca nÿetsca uvas betiyeshënguentsa uvasëšangá mátabe, er ya uabochenëšangá entsamna ca!” <sup>19</sup> Y chë ángelna chabe mëtštaca quem luariñe tonjánachbonja, y nÿetsca quem luarentša uvasëšangá tonjanátabe, y lempe chë juantsëtetjiana luaroye tonjanëšana. Chë soye entsinÿinÿná ntšamo yochtsemnana Bëngbe Bëtsabe uabouana castigo. <sup>20</sup> Chë uvasëšangana, chë bëts pueblentsana chaboye tmonjanantsëtetje, y chë luarentšana tša buiñe tonjanóbocna; tonjanojutjé couayëngbe uayashbenëshantscoñe y mo unga patse kilómetrënga tonjanábuashana.

## 15

### *Chë angelënga chë canÿsëfta pochócaye soyëngaca*

<sup>1</sup> Chentsana, inÿe bëts soye entsanga inÿe soyama jinÿanÿiyama, celoca sënjáninÿe, canÿe puerte bëts soye: canÿsëfta angelënga canÿsëfta pochócaye soyëngaca, chë ústonoye pochócaye soyënga. Chë soyënga chaojtsemnentsana ya ndoñe inÿe pochócaye soye yochántsemna, er chëntscoñe Bëngbe Bëtsá yochjacastíga, lempe ntšamo cha jamama tojanjuabocá.

<sup>2</sup> Canÿe mar béjaynaca sënjáninÿe, mo cristalca enjëtsinÿna íñeca enájuabniye; y chë béjaye juachaca monjëtsatsana chë tšabá tmojanbocnënga, y ni chë uabouana bayá, ni chë chábioye jadórama pormana soye ndoñe tmonjánadoranga, y chë uabouana bayabe uabainama yomna número chëngbeñe chaotsemnana ndoñe tmonjanlesencianga. Nÿetscanga chënga monjëtsabomna Bëngbe Bëtsá tojanëšatá arpangá. <sup>3</sup> Chënga, canÿe canto monjëtsacantaye ntšamo Moisés, chë Bëngbe Bëtsabe oservená tojancantacá, y ntšamo chë Oveshatema tojancantacá. Mëntšá monjëtsacantaye:

Puerte bëts soyënga y tšabe soyënga entsemna lempe ntšamo aca tcojanmcá,  
Bëngbe Utabná Bëngbe Bëtsá nÿets obenana bomná;

lempe ntšamo jtsamëse aca icoyena, acbe bominyiñe puerte tšabe y ndegombre soyënga yomna,

nÿets luarënguenache entsangbe Rey.

<sup>4</sup> Bëngbe Utabná, ¿nda nanjájuaboye aca nÿetscangbiamama ndoñe más bëtsá condmëna ca, o ndoñe cmantsatschuanaye?

Nÿe aca uamaná condmëna;

nÿetsca mándayëngbentša entsanga ácbioye mochanjabo,

ácbentše mochanjoshamentsiye aca jadórama,

er ntšamo tcojamcá lempe entsángbioye mora tcojinÿanÿé,

y lempe ntšamo aca tcojamcá tšabá jtsemnana ca —monjésecantaye.

<sup>5</sup> Chca chentsana sënjanontješé y sënjáninÿe chë celoca Bëngbe Bëtsabe bëts yebna tonjantëfjo, chë Bëngbe Bëtsá Moisésbioye tbojaníyé leyënga uajajónentše. <sup>6</sup> Y Bëngbe Bëtsabe bëts yebnentšana tmonjánbocna chë canÿsëfta angelënga, chë canÿsëfta pochócaye soyënga uambayënga, uafjantse lino entsëjuangá uabuashinÿinÿanëjuangá uichëtjonënga, y tëntša castellano uasnanëjëngaca cochóntsoñe. <sup>7</sup> Chentsana, canÿa chë canta Ainënguentšá chë canÿsëfta angelëngbioye tonjanoyé canÿsëfta castellano copbenga jútjena chë Bëngbe Bëtsabe uabouana castígoca; Bëngbe Bëtsá chë nÿets tempo y nÿetsca tescama vida bomná. <sup>8</sup> Chorna, chë Bëngbe Bëtsabe bëts yebna celoca becá ngónaca tonjanojutjé, y chë ngona enjétsobocana Bëngbe Bëtsábentšana, chabe buashinÿinÿanana y obenana jtsinÿanÿayëse; y Bëngbe Bëtsabe bëts yebnoye ndocná quenjátanobena jamashënguana, chë canÿsëfta angelëngbe canÿsëfta pochócaye soyënga candochnënguëntscuana.

## 16

### *Chë castígoca copbenga*

<sup>1</sup> Chentsana, canÿe jabuache oyebuambnayana sënjanuena, chë celoca Bëngbe Bëtsabe bëts yebnentšana enjétsobocana, y chë canÿsëfta angelëngbioye mëntšá enjétsëtsësnaye: “Motsajna y quem canÿsëfta copbenga, chë Bëngbe Bëtsábiocana endóbocana uabouana castígoca, fshantsoca šmochjabuashcja ca.”

<sup>2</sup> Chora chë natsana ángel tonjána y chabe copbé quem luariñe tonjanbuashcja, y nÿetsca entsanga chë uabouana bayabe uinÿananana soye bomnënga y chë chábioye jadórama pormana soye adórayëngbe cuerpiñe bañe bacna nguayanana tonjanóbocna, puerte tsetšënana.

<sup>3</sup> Chentsana, chë inÿe ángel chabe copbé mar béjayoca tonjanbuashcja, y choca búyeshe buiñcá tontsanóbema, mo canÿe entsá obanabe buiñcá, y nÿetscanga chë mar béjayoca vida bomnënga tmontsanóbana.

<sup>4</sup> Chora chë inÿe ángel chabe copbé béjayënguiñe y béjaye obocanënguiñe tonjanbuashcja, y buiñe tontsanobiamama. <sup>5</sup> Chentsana sënjanuena, chë béjayënguiñe mando bomna ángel mëntšá enjétsichamo:

Aca nÿetsca soyënguiñe tšabá amá condmëna,

er aca tcojayana chë quem luarentša entsanga chca castigánënga chamotsemnana.

Bëngbe Bëtsá, Uamaná, mora chca condmëna y chca conjamna;

<sup>6</sup> er chënga tmonjama, chë acbe entsanga

y acbe juabna oyebuambnayëngbe buiñe chauábuashanama, jtsëbáyëse;

y mora tconjama chënga buiñe chamofšema.

Nÿets mercedo imobuájona chca japásama ca —cha enjétsichamo.

<sup>7</sup> Altarocánënaca canÿe oyebuambnayana sënjanuena, mëntšá enjétsichamo: “Aíñe, Bëngbe Utabná, Bëngbe Bëtsá, nÿets obenana bomná condmëna, y ntšamo entsanga contsacastigacá, ndegombre y tšabá entsemna ca.”

<sup>8</sup> Chentsana, chë inye ángel chabe copbé shinýiñe tonjanbuashcja; chë shinýe corente tontsanobonýaná y chíyeca entsángbioye íñesheca tontsanajuinýé. <sup>9</sup> Y nýetscanga uabouancá juinýnënga tmonjanoquedá; pero chënga ndoñe chemátanbošena bacna soyënga amana jtsajbanana, ni Bëngbe Bëtsabe benache jtishachana, ni chábioye quemëntétsatschuanaye, más chabe contra ba soyënga montsanichamo; cha nda obenana yobomna chëngbioye chë pochócaye soyënga jíchmuama, chënga chamosufrima.

<sup>10</sup> Chentsana chë inye ángel chabe copbé chë uabouana bayabe uámana puestiñe tonjanbuashcja, y nýets chabe amëndayiñe ibetiñe tonjanoquedá. Chë entsanga bichtaja montsanenójantsnaye, yapa tsetše causa; <sup>11</sup> pero ni chca, chë entsanga chematanajbaná bacna soyënga jtsamana, ndayá chë yapa tsetšama y chë chëngbe cuerpiñe bacna nguayanana causa, chë celoca Bëngbe Bëtsabe contra ba soyënga montsanichamo.

<sup>12</sup> Chentsana chë inye ángel chabe copbé chë bëts fshájaye Eufrates ca uabáiniyiñe tonjanbuashcja y chë béjaye tontsanbuashjo, japróntama chë shinýe bocanoica luarënguentša reyënga y chëngbe soldadënga chëjana chámuachnëjnama.

<sup>13</sup> Atše sënjáninýe, chë dragonbe uayáshoicana, chë uabouana bayabe uayáshoicana y chë ndoñe ndegombre Bëngbe Bëtsabe juabna oyebuambnayabe uayoicana tmonjánbocna unga bacna espíritënga; mo sapošëngcá monjétsinýna. <sup>14</sup> Chënga monjamna bayëjëngbe espíritënga; bëts soyënga monjánama obenana jinýanjíyama, y montsanbocana nýets luarentša reyënga jáchembuama, chë uámana te, ndayté Bëngbe Bëtsá, chë nýets obenana bomná yochjabo entsangbiana jabáyanama ntšamo chënga tmojamama, chë te chënga chabe contra chamotsetsjama.

<sup>15</sup> Bëngbe Utabná Jesucristo mëntšá tojayana: “Smochjinýe, atše nýe ndeolpe chanjabo, mo canýe atbëbanacá, chabiana ndocná tontsejuabná ora; chíyeca oyejuayënga mochántsemna atše jabama tmojtseprontanënga, mo nda tojtsefšna y chabe entsáyá totsaboprontañacá, nýe enasá ndoñe chaondétsemnama, y entsanga chca tmojinýe ora ndoñe chaondétsëuatjama ca.” <sup>16</sup> Y chë bacna espíritëngna chë reyëngbioye tmonjanënatse canýe luare, hebreniñe Armagedón ca uabáinoye.

<sup>17</sup> Chentsana, chë ústonoye ángel chabe copbé quem luarentša tsbanánoca tonjanbuashcja, y chë celoca Bëngbe Bëtsabe bëts yebnentša uámana puestentsana canýe jabuache oyebuambnayana tonjanóbocna, mëntšá enjétsichamo: “¡Chë jopásama enjamna soye ya tocjochnëngo ca!”

<sup>18</sup> Chora enjëtsemna tcuinýënga, shauenanana y juesasanana, y quem luariñe tontsanangmëmana, yapa jabuache quem luare tontsanëbanjó causa; quem luarentše entsanga imobinýna orscana, ndocna te nýa chca quem luare tontsanëbanjó. <sup>19</sup> Chë puerte bëts pueblo úngañe tontsanojatá, y nýets luarentša bëts pueblënga tontsanáshajaye, y Bëngbe Bëtsá tojanenojuabó chë puerte bëts pueblama, Babilonia ca uabaina pueblama, chentša entsanga chë uabouana castigo chamotsebomnama, Bëngbe Bëtsá tša tbojánetna causa, tša bacna soyënga chentše tmojanmama. Y chca, chë chëngbe bëts pueblo úngañe tontsanojatá ora, cha chënga tonjanacastigá. <sup>20</sup> Mar béjayoca nýetsca fshantsënga y quem luarentša nýetsca tjañe tontsanenatjëmbe. <sup>21</sup> Celocana bëtsëtsa bëntstbënga entsángbeñe tonjantquécjana, chëbënga canta bnëtsana kilama más utbënga; y entsanga Bëngbe Bëtsabe contra ba soyënga tmonjánayana, er chënga tša montsansufrina chë bëts pochócaye bëntstá causa, y chë pochócaye bëntstá chëngbiana puerte jabuache castigo enjamnama.

## 17

### *Chë puerte bacna vida bomna shembásabe castigo*

<sup>1</sup> Canýa chë canýsëfta angelënguentšá, chë canýsëfta copbënga monjanatbënënguentšá, tonjánabo y šonjaniana: “Mabo; cbochanjinýinýiye ntšamo yochtsemna chë puerte

bacna vida bomna shembása, chë béjayënguiñe entsetbemanabe castigo. <sup>2</sup> Quem luar-entša mandadënga cháftaca puerte bacna soyënga tmojama, y quem luarentša oyenënga puerte tmojóyejuanga chë cháftaca bacna soyënga amama, mo chë bacna vida bomna shembásabe vínoyeca puerte cuafjotmenangcá ca.”

<sup>3</sup> Chentšana chë ángel, atše chë Uámana Espíritbeyeca corente mandaná jtsemnëse, šonjanánatse entšanga ndoyena luaroye. Choca sënjaninÿe canÿe shembása, canÿe uabouana buángana bayábeñe enjaquená; chë bayabe cuerpiñe nÿetsañe Bëngbe Bëtsabiamana puerte bacá oyebuambnaye uabaina enjétsabemana, y enjánbomna canÿsëfta bestšaše y bnëtsana tsëtjonëse. <sup>4</sup> Chë shembása enjanichëtjona uámana shbuenda uaffatsenga y buángana entšayá, y entsanbotamana castellánoca, uámana botamana ndëtsëtémëngaca y pérlica. Chabe cucuatšifne canÿe castellano copbé enjétsatbëna, jútjena puerte uaboyënja soyëngaca, y chë boyabásengaftaca cha tojanma puerte bacna soyëngaca. <sup>5</sup> Y chabe juentsaca canÿe uabaina enjétsabemana, ndoñe josërta soye, mëntšá: “Chë puerte bëts pueblo Babilonia, tša bacna entšanga chentše, mo chë puerte bacna vida bomna shembásengbe bebmá cuaftsemncá; chentšana tojanóbocna quem luarentša nÿetsca puerte uaboyënja soyënga ca.” <sup>6</sup> Atše sënjaninÿe chë shembása tëmiá, er cha tojanofšë chë Bëngbe Bëtsábenga imojamnëngbe buiñe, ndëmuanÿengbioye tmojanëbaye Jesusbiamana oyebuambnaye causa.

Chca sënjaninÿe ora, tša sënjanenjananá. <sup>7</sup> Chora chë ángel šonjanianana: “¿Ndáyeca tcojenjananá ca? Atše cbochanjauyana ntšamo vojtsayana chë shembása y chë chábioye bontsambá uabouana bayá, chë canÿsëfta bestšaše bomná y bnëtsana tsëtjonëse; chë soye ndocná quenátstatsëmbo. <sup>8</sup> Chë tconjinÿe uabouana bayá, tempo chca enjamna, pero mora ya ndoñe. Chë corente bëts tboicana cha echanjesetsjuá, pero lempe pochocaná jtsemnama chca echántsaye. Quem luarentše oyenënga, ndëmuanÿengbe uabaina quem luare jobojátšama orscana ndoñe yonduábemana, chë tšabe vida mochjónÿenëngbe uabaina iuábemana librësañe, chënga mochanjenjananá, chë bayá chë tempo enjaniená y mora ya ndoñe, pero cachiñe yochjésabama chamojinÿe ora.

<sup>9</sup> “Muentše canÿe soye entsemna chë chca josértama chamojobenangbiamana: chë bayabe canÿsëfta bestšaše endmëna canÿsëfta tjañe ndayiñe chë shembása entsetbemana; chë bestšašëngnaca mondmëna canÿsëfta mandadënga. <sup>10</sup> Chentšana, shachnëngbe amëndayana ya tonjochnëngo, canÿa mora entsetbemana jtsamëndayama y chë inÿa cabá ndoñe tonjášhango. Y cha chaojášhango ora, ndoñe bënana cha queochaisemánda. <sup>11</sup> Chë tempo enjanienana uabouana bayá pero mora ya ndoñe, endmëna chë canÿsëfta mandadënguentšana inÿe mandado, pero chánaca chë inÿe canÿsëftangcá endmëna y lempe pochocaná jtsemnama entsá.

<sup>12</sup> “Chë tconjinÿe bnëtsana tsëtjonëse mondmëna bnëtsana mandadënga, jamëndama cabá ndoñe tmonjóyayenga; pero básefta tescama cánÿiñe chë uabouana bayáftaca, mando mo reyëngcá mochanjóyëngacñe. <sup>13</sup> Quem bnëtsanënga nÿetscanga cachcá mochántsejuabnaye, y chë uabouana bayábioye chëngbe obenana y mando mochanjátsetaye. <sup>14</sup> Chë Oveshatembe contra mochántsejtsjanaye; pero chë Oveshatema echantsayëñjaná, er chë Oveshatema endmëna nÿetsca amëndayëngbiamana chë más uámana Utabná y nÿetsca reyëngbiamana chë más uámana Rey. Chë bnëtsana mandadënga cháftaca mochántsejtsjanaye ora, cha chentše chabe entšángaftaca cánÿiñe echántsemna. Chënga mondmëna chë cha tojáchembo y tojubuáyanënga y chábeñe sempre ošbuáchiyënga ca” —cha šonjanianana.

<sup>15</sup> Chë ángel mëntšanaca šonjanianana: “Chë tconjinÿe béjayënga, ndayiñe chë bacna vida bomna shembása entsetbemana, mondmëna nÿetsca canÿe luarentša entšanga, enutanana entšanga, nÿetsca biyañe oyebuambnaye y nÿetsca mándayëngbentša entšanga. <sup>16</sup> Y chë uabouana bayábeñe tcojinÿe bnëtsana tsëtjonëse y chë uabouana



bayá, chë bacna vida bomna shembásabioye mochantsáboyënja; enašá cachcá mochanjesonýaye; chabe cuerpentša mëntšena mochantsósañe y íñesheca mochántsejuinýiye, chaopochocantscuana. <sup>17</sup> Bëngbe Bëtsá tojama chë bnëtsanënga ainaniñe tša chamotseboše, ntšamo cha yobošcá chamotsamama. Chca, chënga mochanjenóyeunaye chëngbe mando chë uabouana bayábioye jantšabuáchiyana, ntšamo Bëngbe Bëtsá tojayancá chaojopasantscuana. <sup>18</sup> Chë tconjinýe shembása chë puerte bëts pueblo endmëna, chë ndayentša mandadënga nýets quem luarentša mandadëngbeñe mando mondbomna ca” —cha šonjaniyana.

## 18

### *Babilonia japochócama*

<sup>1</sup> Chentšana inýe ángel sënjaninýe, celocana enjétsastjajuana, puerte obenana bomná, y chabe buashinýinýanánaca nýets quem luariñe entsanbinýna. <sup>2</sup> Chë ángel jabuache mëntšá enjétsichamo:

¡Ya mochantsepochóca, ya mochantsepochóca chë uámana pueblo Babilonia!

¡Chentše tojtsóbema diablëngbe oyeniñe,

nýetsca bacna espíritëngbe oyeniñe,

y ndoñe tšabe y uaboyënja shloftšëngbe oyeniñe!

<sup>3</sup> Er nýetsca quem luariñe mándayëngbentša entsanga puerte bacna soyënga tmojama chentša entsangbe causa,

mo chë bacna vida bomna shembásaftaca bacna soyënga cuafjamcá,

mo puerte cuafjotmenangcá chë bacna vida bomna shembásabe vínoyeca.

Nýetsca luarënguentša mandadënga puerte bacna soyënga tmojama,

mo chë shembásaftaca bacna soye cuafjamcá,

y quem luarentša obuámnañënga y enënga, bomnënga tmojobiama chentša entsanga yapa crocénana nýe ndayíñnaca ntsejuabnaycá gástaye causa ca —cha enjétsichamo.

<sup>4</sup> Chentšana, celocana inýe oyebuambnayana sënjanuena, mëntšá enjétsichamo:

¡Chë bëts pueblentšana maisebocana!, tšëngaftanga chë atšbe entsanga šmomnënga,

chë chentša entsanga mondbétsama bacna soyënga ndoñe chašmondétsamama,

ni chë chëngbioye japochócama soyënga tšëngaftangbiana cach ndoñe chaondëtsemnama.

<sup>5</sup> Chënga tša bacna soyënga tmojama, tša bëtscá nýa mo celóntscoñe cuafjojutjecá,

y Bëngbe Bëtsá mora entsejuabná chënga tša puerte bacna soyënga tmojama causa, chë soyëngama jácastigama.

<sup>6</sup> Ntšamo chentša entsanga ínýëngbiana ndoñe tšabá tmonjamcá,

chë entsangbiámnaca cachcá chaotsemna;

ntšamo tmojamama, cabá uta soye más cachca soye chëngbiana chaotsemna;

ntšamo chentša entsanga ínýënga chamosufrima tmojamcá,

chëngnaca cachcá uta soye más chamosufrí.

<sup>7</sup> Chënga corente jtšenábotamnayana y yapa crocénana nýe ndayíñnaca ntsejuabnaycá jtsegástayana;

chë causa, chënga entsamna puerte jasúfriama y becá tsetšanana jtsebomnama.

Er chëngbe ainaniñe mëntšá jtsejuabnayana:

“Muentše mo reyëngcá mondëtbiámana.

Viudacá ngménaca ndoñe quemuátsmëna; tondayama quemochátssufrina ca.”

<sup>8</sup> Chíyeca, canýe ora pochócaye soyënga chëngbiana echanjóshjango:

jóbanama šocanënga, puerte ngménana y jabuache shëntsana,

íñesheca lempe chëngbeñe echántsejuinýe;

er Bëngbe Bëtsá corente obenana bomná endmëna,

Bëngbe Utabná chë chënga chca castigo chamotsebomnama tojayaná ca —cha enjétsichamo.

<sup>9</sup> Quem luarentša mandadënga, chentša entsángaftaca puerte bacna soyënga tmojamënga, y chëngaftaca nÿe ndayíñnaca yapa crocénana, ntsejuabnaycá tmojagastanga, mochanjošachna y puerte ngmenánaca mochántsemna, chë bëts pueblo chaojtsangbototjuanentša ngona chamojinÿe ora. <sup>10</sup> Chentšana bënoca mochanjoquéda antješna, chë uabouana castiguama auatja causa, y chentša entsangbiama mochanjayana:

¡Tša lastema, tša lastema tšëngaftanga chë uámana bëts pueblo, Babilonientše oyenëngbiama, chë tša obenana binÿnentše!

Canÿe ora tšëngaftangbe castigo tojóshjango ca —mochánttsichamo.

<sup>11</sup> Chë quem luarentša obuámañënga y enëngnaca mochanjošachna y ngmenánaca mochántsemna chë pueblentša entsangbiama, er chora ya ndocná queochátsmëna chë chënga tmojúshjango soyënga chamobuámiñama: <sup>12</sup> tmojúshjango castellano soyënga, midio soyënga, uámana y botamana ndëtsbénga, perlënga, uámana lino y shbuenda uafjatsenga entsáyá y sedéjua y uámana uabuángana entsáyá; nÿetsca botamana uanguëtše betiyënga, marfiloca pormana soyënga, uámana niñësëngaca pormana soyënga, bronce soyënga, hierro y marmol soyënga; <sup>13</sup> bëtscá canela y inÿe botamana uanguëtše y tamna soyënga, botamana uanguëtše béjayënga, incienso y mirra; vínoye, aceitiye, uámana arninÿá, trigo; bayënga ndayánaca uasmëmnayënga, oveshënga, couayënga, cochëshangá y entsanga nÿets tempo nÿe ínÿabiama oservenëngnaca. <sup>14</sup> Y chë pueblentša entsangbiama mochanjayana:

¡Chë tša cmonjanogúsetana jtsebomnama soyënga, mora ya ndoñe quešmátsbomna; chë uámana y buashinÿinÿana soyënga y tša bomnana lempe šmojobuetše, y ndocna te más cachca soye quešmochátsbomna ca!

<sup>15</sup> Chë soyënga enënga, chë bëts pueblentša entsángbeyeca bomnënga tmojanobiamënga, bënoca mochanjoquéda antješna, chë bëts pueblentša entsangbiama tša bëts castiguama auatja causa; mochanjošachna, puerte ngmenánaca mochántsemna. <sup>16</sup> Y mëntsá chentša entsangbiama mochanjayana:

¡Tša lastema, tša lastema tšëngaftanga chë uámana bëts pueblentše oyenëngbiama!

Chë enjáninÿna mo canÿe shembasacá, uámana lino entséjua uichëtjoná,

uámana shbuenda uafjatsenga y uabuángana entsáyá uichëtjoná,

botamananá castellanoca, perlënga y uámana botamana ndëtsbéngaca.

<sup>17</sup> ¡Y canÿe ora chabe tša bomnana lempe tojtsopochocá ca! —mochanjayana.

Nÿetsca chë barquënguentša mándayënga, chentša entsanga inÿe luaroye ajnënga y chentša trabájayënga, y nÿetscanga chë vida onguayiñe mar béjayoca trabájayëngnaca, chentšana bënoca mochanjoquéda antješna, <sup>18</sup> y chë bëts pueblo chaojtsangbototjuanentša ngona chamojinÿe ora, jabuache mochanjayana: “¡Quem uámana bëts pueblécá ndocna inÿe pueblo cachcá quenátsmëna ca!” <sup>19</sup> Chca chamojinÿe ora, ngménama bestšašñe polvëshe mochántsenotboto, y mëntsá mochántseyona ošachiyënga y puerte cochtsetšenánënga:

¡Tša lastema, tša lastema tšëngaftanga chë uámana bëts pueblentše oyenëngbiama!

Chentša bomnánaca bomnënga tmojanobiama nÿetscanga chë mar béjayoca barco bomnënga.

¡Canÿe ora lempe tojtsopochocá ca! —chënga mochántseyona.

Chora chë ángel tonjánayana:

<sup>20</sup> ¡Celoca oyenënga móyejuanga

chë pueblo chca tojapasama;

y tšëngaftángnaca móyejuanga, Bëngbe Bëtsabe entsanga, Jesucristbe ichmónënga y Bëngbe

Bëtsabe juabna oyebuambnayënga,

er chca jacastígase, Bëngbe Bëtsá tojama chënga chamosufrima,

ntšamo tšëngaftanga chašmosufrima chënga tmojanmcá ca! —cha tonjánayana.

<sup>21</sup> Chentsana, canye ángel puerte obenana bomná, canye ndëtsbé tonjanatsbaná, mo canye bëts nantsnëbé ndëtsbecá, mar béjayoye tonjanashbuetse y mëntsá tonjánayana: Mëntsá, nye ndeolpe y jabuache, Babilonia chë uámana bëts pueblo mochántsetsatse, y ndocna te más quem pueblo queochátsmëna.

<sup>22</sup> Chentše, ndocna te más quemochátuenana arpangá uabuástoyana, ni cantayana, flautëfjënga y trompetëfjuangá cach ndoñe; ndocna te más quemochátsmëna obrerënga, ni chë nantsnëbeñe trabájayana quemochátuenana.

<sup>23</sup> Chentše, ndocna te más ndocna uajuinñanësha queochátsbinñayey, ni casamento fiestentša enbouenanana quemochátuenana.

Er chë bëts pueblo chca mochantsepochóca, masque chentša obuámnãñënga y enënga nyets quem luarentše chë más bomnënga monjamna, y chentša bocjuanáncana nyetsca luarënguentsa entsanga ingñëñënga monjamna ca —cha tonjánayana.

<sup>24</sup> Bëngbe Bëtsá chca chë bëts pueblentše echanjama, er chentše tmojinñena chë Bëngbe Bëtsabiama trabájaye causa tmojanóbanëngbe buiñe; chë chabe juabna oye-buambnayënga, chabe entsanga, y chë chábioye oservënana nyets quem luarentše tmojtsëbayëngbe buiñe.

## 19

<sup>1</sup> Chentsana celoca sënjanuena mo mallajta entsanga cuaftsayebuachcá, mëntsá monjétsichamo:

¡Bëngbe Utabná matschuanga!

Bëngbe Bëtsá endmëna nda chabe entsanga tojatsebacá; cha puerte uámanana, buashinñinñana y mando endbomna,

<sup>2</sup> er ndayama cha tojayancá ndegombre jtsemnana, y ntšamo tšabá chama tojtsemncá.

Cha chë uachuana bacna vida bomna shembásabioye tbojacastigá.

Chë shembásabe puerte bacna soyënga causa,

nyets luarentša entsángnaca bacna soyënga tmojama.

Chábioye chca jacastígase,

Bëngbe Bëtsá tojama ntšamo jamama ibomerecencá,

chábioye oservënënga chë shembásabeyeca tmojóbana causa ca —chënga monjétsichamo.

<sup>3</sup> Y cachiñe mëntsá tmonjánayana:

¡Bëngbe Utabná matschuanga!

¡Chë bëts pueblo japochócama uangbototjuanentsa ngona nyetsca tescama chca echanjótjuaye ca!

<sup>4</sup> Y chora, chë uta bnëtsana y canta bëtsëjëmënga amëndayënga y chë canta Ainënga tmonjanoshamentsé, y Bëngbe Bëtsá, chë uámana tbemanentše enjëtsetbemanabioye tmonjanadorá, mëntsá jayanëse: “¡Chca chaotsemna! ¡Bëngbe Utabná matschuanga ca!”

<sup>5</sup> Y chë uámana puententšana canye oyebuambnayana tonjanóbocna, mëntsá:

Bëngbe Bëtsá matschuanga, nyetsca chabe oservënënga

y chë nyetscangbiana cha chë más uamaná yomnama juabnayënga,

básenga y bëtsétsanga ca.

### *Chë Oveshatembe casamento fiesta*

<sup>6</sup> Y sënjanuena mo mallajta entsangbe oyebuambnayancá, mo bëtscá béjaye cuaft-sobonjnacá y mo bëts juesasanana shauenanancá; mëntsá monjétsichamo:

¡Bëngbe Utabná matschuanga!

Er Bëngbe Utabná, Bëngbe Bëtsá nyets obenana bomná tojontsé jamándana.

<sup>7</sup> Puerte móyejuanga y mochjínyanýiye

Bëngbe Bëtsá puerte bëtsá y uamaná bétsemnama,

er mora entsemna mo chë Oveshatembe casamento te cuafjoshjangcá;

chabe shema yochjabocná puerte tojtenobotamá;

<sup>8</sup> tmojalesenciá cha chauatíchëtjo uámana, nduatsenga uafjantse y uabuashinýinýana lino entsáyá.

Chë shema entsinýinýná chë Bëngbe Bëtsabe entsanga;

y chë lino entsáyá jtsichëtjonana entsinýinýná

chënga lempe ntšamo tšabá yomncá jtsamëse imoyena ca —chënga monjétsichamo.

<sup>9</sup> Chentsana chë ángel šonjaniyana: “Mëntšá mábema: ‘Oyejuayënga chë Oveshatembe casamento fiestama ófjanënga ca.’ ” Y mëntšánaca šonjaniyana: “Chca, ndegombre Bëngbe Bëtsabe palabrénga endmëna ca.”

<sup>10</sup> As chabe shecuatšentše sënjanoshamentšé cha jadórama, pero cha šonjaniyana: “Ndoñe, átšeftaca ndoñe chca mátamana, er atše Bëngbe Bëtsabe canýe oservená sëndmëna, ntšamo aca condmëncá, y chë Crístbeyeca acbe catšátanga, ntšamo chabiamá motatšëmbcá y chabe ndegombre palabrénga nyets tempo imabuayinýanga mondmëncá. Aca cmontsemna Bëngbe Bëtsá jadórama ca.”

Ndayá Jesús tojanma y tojanayancá, endama chë Bëngbe Bëtsabe juabna oyebuamb-nayënga chëngbe ainaniñe osertánana y añemo chamotsebomnama, chë soyëngama entsángbiöye jábuayenama.

### *Chë fjantse couayíñe enjaquená*

<sup>11</sup> Chora sënjáninýe celoca atëfjniñe; canýe fjantse couaye enjëtsemna y chë chábeñe enjaquená enjanabaina “Ntšamo tojašebuachenacá amá” y “Ndegombre oyebuamb-nayá ca”, er ntšamo tšabá yomncá cha tojanjuabó y tojanma entsángaftaca; y chca chabe uayayëngaftaca monjánentsjanaye. <sup>12</sup> Chabe fšnëbenga mo iñeshcá enjáninýna, bestšašíñe ba uabuashinýinýana coronëshangá enjanábomna, y canýe uabaina chábeñe enjanábemana; nýe cha chë uabaina yojanábuatma. <sup>13</sup> Cha enjanichëtjona buíñeca unëtjona entsáyá y chabe uabaina enjamna “Bëngbe Bëtsabe palabra ca”. <sup>14</sup> Y chabe ústonoye monjétsajna mallajta soldadënga celoquënga, nduatsenga uafjantse y uámana lino entsáyá uichëtjonënga, fjantse couayënguiñe enjaquenënga. <sup>15</sup> Chë enjëtsebnatsanabe uayoicana enjanóbocana canýe puerte efsana espadëja, chë Bëngbe Bëtsábeñe ndošbuáchiyënga játatsetšama. Cha puerte obenánaca echántsamëndaye, mo canýe hierro varëfjaquëcá. Cha echanjama entsángaftaca mo nda uvasëšangá juantsëtetjiamá tojtsabotajná ora cuafjamcá; y echanjama chënga chamotsebomnama chë puerte uabouana castigo, Bëngbe Bëtsá chë nyets obenana bomná tbojetna causa. <sup>16</sup> Chabe uabonjaníyañe y chabe mëntjoca canýe uabaina enjanábemana: “Nyetsca reyëngbiamá chë más uámana Rey, y nyetsca amëndayëngbiamá chë más uámana Utabná ca”.

<sup>17</sup> Chentsana canýe ángel sënjáninýe, shinýiñe enjétsatsana, chë celoca tsbanánoca nyetsca monjanongüefjná shloftšënga jabuache mëntšá enjétsëtsësnaye: “¡Mabënga, menefjna chë Bëngbe Bëtsá tojaprontá bëts saná jasama; <sup>18</sup> chašmosama reyëngbe mëntšëna, soldadënga amëndayëngbe mëntšëna y valente entsangbe mëntšëna, couayënga y chëngbeñe enjaquenëngbe mëntšëna, y nyetsca entsangbe mëntšëna, cachëngbiamá trabájayënga y nýe ínýabiamá nyets tempo trabájayënga, básesenga y bëtsëtsanga ca!”

<sup>19</sup> Chora atše sënjáninýe chë uabouana bayá y quem luarentša reyënga chëngbe soldadëngaftaca tmojánenefjna, chë fjantse couayíñe enjaquená y chabe soldadëngaftaca jétsjama. <sup>20</sup> Chë uabouana bayá tmonjanotbá, y cháftaca chë Bëngbe Bëtsabe ndoñe ndegombre juabna oyebuambnayá, chë bayabe delante ba bëts soyënga tonjanmá



obenana jinÿanÿiyama; y cha chë soyëngaca tojanaingñé chë uabouana bayabe uinÿnanana soye chamuayentsjajoma tmojanlesencianga, y chë chábioye jadórama pormana soye adórayënga. Y chë útatbioyna ainata tmontsanatmetše chë íñsheca uafjajónayoye, chë azufre endëjuinÿinÿanentše. <sup>21</sup> Chë ínÿengbioyna tmontsanapochocá chë fjantse couayiñe enjaquenabe uayoicana enjanóbocana espadějaca, y nÿetsca shloftšënga chëngbe mëntšénaca yapa tmontanoshachá.

## 20

### *Chë uaranga uata*

<sup>1</sup> Chentsana canÿe ángel sënjáninÿe celocana entsanastjajuana chë corente asentoye tboca llavëfjaca, y canÿe bëts cadenëjua entsanëtvena. <sup>2</sup> Chë ángel tbontsantbá chë dragónbioye, chë tempsca mëtšcuaye, chë Diablo y Satanás endmëná, y canÿe uaranga uatama tbontsanbátsëca. <sup>3</sup> Chë corente asentoye tboye tbontsantsatše, chentše tbontsanëtame, y chentše bëšáša tsengájašëca tonjaninÿnaná, ndotatsëmbcá jatëfjuama ndocná chaondobenama; y chca, chë dragón ndoñe chaondobená jabocnama entsanga jáingñama, chë uaranga uata candochnënguëntscuana; y chora, básefta tescama chë dragón mochanjëtshboshjona.

<sup>4</sup> Uámana puestënga sënjáninÿe, y chiñe tmonjanotbiama chë entsanga tšabá o ndoñe tšabá tmonjamama jayanama obenana tmojanóyëngacñënga. Chë bestšaše jtsëstjanguëse tmojanóbanëngbe espíritëngnaca sënjánanÿe. Chënga chca tmojanóbana, Jesús tojánayana soyënguiñe y chë Bëngbe Bëtsabe buayenana soyënguiñe sempre ošbuáchiye causa. Chënga ndoñe tmonjanadorá ni chë uabouana bayá, ni chë chábioye jadórama pormana soye, y ndoñe tmonjanlesenciá chë bayabe uinÿnanana soye juentsaca o cucuatšinë chamuayentsjajoma. Y sënjáninÿe chëngna tmontanayena y Crístoftaca canÿe uaranga uatama montsanmánda. <sup>5</sup> Chë entsanga mondmëna chë natsanënga jtayenama, pero chë tempo chë inÿe obanënga ndoñe chemëntëtanayena, ndayá nÿe chë canÿe uaranga uata chentsana. <sup>6</sup> ¡Oyejuayënga y Bëngbe Bëtsabe entsanga, chë tmojtanayenënga chë obanënga chámuatayenama Bëngbe Bëtsá tojanma ora! Chënga ndoñe quenátamna chë nÿetsca tescama castigo jtsebomnana, ndayá Bëngbe Bëtsá y Crístbioye mo bachnangcá chënga mochántseservena, y Crístoftaca chë uaranga uatama mochántsemdaye.

### *Satanás japochócama*

<sup>7</sup> Chë uaranga uata chaojochnëngo ora, Satanás chabe utámenocana mochanjëtshboshjona; <sup>8</sup> y cha echanjábocna nÿets luarentša entsángbioye, chë Bëngbe Bëtsabe soyëngama contra imomnëngbioye jáingñama, chë ntšamo Bëngbe Bëtsabe contra Gog y Magog tempo ibojamncá imomnënga. Satanás, chë entsanga echanjáchembo Bëngbe Bëtsabe contra jéntsama, y tša chëftanga cha echanjáchembo, nÿa mo chë mar béjaye chëñÿoca cascajcá mochántsemna.

<sup>9</sup> Chënga nÿetscanga nÿets luarëjana mochanjátsjua, y chë Bëngbe Bëtsabe entsanga oyenentše y chabe bonshana entsangbe bëts pueblo shëconana mochanjotsaye. Pero celocana inë echanjatquëcjana y chë Bëngbe Bëtsabe contra imomnënga lempe echántsjuinÿe. <sup>10</sup> Y Satanás, chë aingñayá, mochántsatmetše chë íñshe y azúfrecu uafjajónayoye, ndayentše chë uabouana bayá y chë Bëngbe Bëtsabe ndoñe ndegombre juabna oyebuambnayá tmontsanatmetše. Chentše bëts castigo nÿets tempo, bnëté y íbeta mochanjasufrina.

### *Chë obanëngbiama tmonjánayana ntšamo chëngaftaca jamama yojtsemnana*

<sup>11</sup> Chentsana sënjáninÿe canÿe bëts uámana fjantse puesto jamándama y nda chiñe enjetsetbemaná. Celoca y quem luare chabe delante lempe tonjanenatjëmbe, y ndócnentše más chenatanobinÿná. <sup>12</sup> Y chë obanënga sënjánanÿe, bëtsëtsanga y básesenga, chë uámana puestentša natsanoica monjëtšatsana; y chë librëšangá tmonjanëtëfjo, y

inÿe librëshanaca, ndëmuanyënga nyetsca tescama tšabe vida mochjónyëngbe uabaina uabemana librëša. Chë obanëngbiama tmonjánayana ntšamo chëngaftaca jamama yojtsemnana, cachënga vida imojábomna ora ntšamo tmojëftsema soyëngaca, ntšamo chë librëshangañe yojanabemancá. <sup>13</sup> Chë mar béjayoye tmojanóbanënga choicana tmontanbocna, y chë obanënga tmojanoqueadanga luarënguentsana tmontanbocna, y cada cánÿabiama tmonjánayana ntšamo cháftaca jamama yojtsemnana, cachënga vida imojábomna ora ntšamo tmojëftsema soyëngaca. <sup>14</sup> Chentsana ya ndoñe más obenana quentétsemna entsanga chamóbanama chaomama, mo chë obenana chë ñesheca uafjónayoye cuaftsëtšencá; quem ñesheca uafjónayoye endmëna chë nyetsca tescama castigo jtsebomnama luare; chë choca castigánënga jtsamnama yojtsamnëngbiama entsemna mo chënga cachiñe cuaftatobancá; <sup>15</sup> y ndëmuanyëngbe uabaina chë tšabe vida mochjónyëngbe uabaina iuábemana librëšañe ndoñe yonjanabemana, chë ñesheca uafjónayoye tmontsanatmetše.

## 21

### *Celoca tsmiñe y fshantse tsmiñe*

<sup>1</sup> Chentsana atše sënjaninÿe canÿe celoca tsmiñe y canÿe fshantse tsmiñe, ndoñe ntšamo tempo enjamncá, er chë tempo enjamna celoca y fshantse chora ya ndoñe quentétsemna, y chë mar béjaye chora cach tondaye. <sup>2</sup> Sënjaninÿe chë “uámana ca” uabaina bëts pueblo, chë tsëm bëts pueblo Jerusalén, Bëngbe Bëtsábiocana celocana enjëstostjajuana, puerte botamaniñe, mo canÿe shembása puerte botamanancá, chabe boyá jábocnabiama. <sup>3</sup> Y chora canÿe jabuache oyebuambnayana Bëngbe Bëtsabe uámana puestentsana sënjanuena, mëntsá: “Mouena. Bëngbe Bëtsá entsángaftaca echántsemna y cha chëngbeñe echantsiyena. Chënga chabe entsanga mochántsemna, cach Bëngbe Bëtsá chëngaftaca echántsemna, y cha chëngbe Bëtsá echántsemna. <sup>4</sup> Cha echanjama chënga ndocna te más ngmënënga chamondëtsemnama, y ndoñe más chamondóbanama, ndoñe más chamondošachema, ni ngmënaca ndoñe chamondëtsóyebuambnama y ndoñe más tsetšanana chamondëtsebomnama; er ntšamo chënga entsangcá fshantsoca tempo imojëftsiyena ora enjamncá, chora ya ndoñe chca queochátsmëna ca.”

<sup>5</sup> Chë uámana puestentše enjantbemaná šonjanianayana: “Atše lempe mo tsëm soyëngcá sëndbama ca.” Y mëntsánaca tonjánayana: “Chë soyënga mábema, er chë palabrënga endmëna ntšamo ndegombre yomncá, y nyetscanga mondobena chiñe corente jtsošbuáchiyana ca.”

<sup>6</sup> Chentsana šonjanianayana: “Lempe tonjochnëngo. Atše sëndmëna chë nyetsca soyënga bojatsayá y pochocayá, chë natsaná y chë ustonoyá. Mo nda tša uajuendayana tojtsebomná canÿe béjaye fshantsiñe obocanentsana cuaftofšecá, cachcá nda tša tojtseboše atšbe soyënga jtsebomnama, atše chanjama cha chë soyënga chaotsebomnama, y chë nyetsca tescama yomna tšabe vídnaca, chca jtsebomnama chábioye tondaye ntsotjañcá. <sup>7</sup> Nda nyetsca soyënguentsana tšabá chaojabocná mo ayënjanayacá, lempe echanjóyëngacñe ntšamo atšbe entsángbioye jatsatayama tijašebuachenacá, y atše chabe Bëtsá chántsemna y cha atšbe uaquiñá. <sup>8</sup> Pero chë auatja causa Crístbioye ndoñe mondëservénënga, chábeñe ndošbuáchiyënga, chë bacna soyënga causa Bëngbe Bëtsabiama puerte uaboyënjanënga imomnënga, chë inÿëngbioye obánayënga, chë shembása o boyabásaftaca bacna soye amënga, chë bocjuana soyënga amënga, chë soyënga adórayënga diosënga yomna ca jtsejuabnayëse, y nyetscanga bosterënga imomnëngbiama, chënga entsamna chë ñesheca uafjónayoye jasúfrana, chë azufre yojuñÿinÿanentše. Chentše puerte castigánënga sempre mochanjëftsemna, mo uta soyama cuaftatobancá ca.”

### *Chë tsëm bëts pueblo Jerusalén*

<sup>9</sup> Chentsana canya chë angelënguentsá, chë canysëfta codbenga bomnënga jútjena chë canysëfta ústonoye pochócaye soyëngaca, átšbioye tonjánabo y šonjanijana: “Mabo, cbochanjinÿinÿiye chë tojobouamá shembása, chë Oveshatembe shema ca.” <sup>10</sup> Y atše chë Uámana Espítoftaca corente mandaná jtsemmëse, chë ángel šonjanánatse canÿe bëts y tsbanana tjoye, y šonjaninÿinÿé chë tsëm bëts pueblo Jerusalén, chë “uámana ca” uabaina pueblo, celocana Bëngbe Bëtsábiocana enjétsostjajuana. <sup>11</sup> Chë bëts pueblo enjétsbuashinÿinÿana Bëngbe Bëtsabe buashinÿinÿanánaca; enjétsbuashinÿinÿana mo canÿe uámana botamana ndëtsbecá, mo jaspe ndëtsbecá, pero mo cristalca tëshinÿniñe. <sup>12</sup> Chë bëts pueblo shëconana canÿe bëts y tsbanana tapiëse enjamna, chë tapiëšiñe bnëtsana uta bëshashangá y cada bëshashentše canÿe ángel, y chë bëshashangañe enjanábemana chë Israeloca bnëtsana uta bëts pamíllangbe uabaina. <sup>13</sup> Shinÿe bocanoica unga bëshashangá, shinÿe uenatjëmbambanoica ungashá, tsjuanoica unga bëshashangá, y tsmanoica ungashá. <sup>14</sup> Chë tapiëse enjanëcuatjona bnëtsana uta ndëtsbenguiñe, y chëbenguiñe enjanábemana Jesucristo chë Oveshatembe bnëtsana uta ichmónëngbe uabaina.

<sup>15</sup> Chë ángel átšeftaca oyebuambnayá canÿe castellano juinÿnanëšëfja enjánatbëna jamedídama chë bëts pueblo, chentsa bëshashangá y chentsa tapiëse. <sup>16</sup> Chë bëts pueblo cach medida enjánbomna nyets cantoica, cach medida tëntsoye y nÿanëjoye. Chë ángel chabe juinÿnanëšëfjaca chë bëts pueblo tonjanmedidá: enjánbomna uta uaranga y uta patse kilómetrënga; tëntsoye, tsbanánoye y nÿanëjoye cach medida enjánbomna. <sup>17</sup> Chentsana chë tapiëse tonjanmedidá, enjánbomna chnënguana bnëtsana y shachna metrënga; ntšamo entšanga chca soyënga jamedídama mondëtatšëmbcá chë ángel tonjanmedidá.

<sup>18</sup> Chë tapiëse enjanpormana jaspe ndëtsbeca, y chë bëts pueblo ena castellánoca, tša chca nÿa mo cristalca tëshinÿniñe enjáninÿna. <sup>19</sup> Chë ndëtsbenga ndayiñe chë tapiëse enjanëcuatjona enjánbotamanana nyetsca uámana botamana ndëtsbéngaca: canÿebé jaspe ndëtsbeca, chë inÿebé zafíroca, chë inÿebé ágata ndëtsbeca, chë inÿebé esmeráldaca, <sup>20</sup> chë inÿebé ónice ndëtsbeca, chë inÿebé cornalina ndëtsbeca, chë inÿebé crisólito ndëtsbeca, chë inÿebé berilo ndëtsbeca, chë inÿebé topácioca, chë inÿebé crisoprasa ndëtsbeca, chë inÿebé jacíntoca y chë inÿebena amatista ndëtsbeca. <sup>21</sup> Chë bnëtsana uta bëshashangá enjuamna bnëtsana uta perlënga; cada bëshasha nÿe canÿe pérlica uapormanësha. Y chë más bëts tsáshenëjana enjamna ena castellánoca; mo cristalca tëshinÿniñe enjáninÿna.

<sup>22</sup> Chë bëts pueblentše ndocna Bëngbe Bëtsabe bëts yebna chiyátaninÿe, er Bëngbe Utabná, chë Bëngbe Bëtsá nyets obenana bomná y chë Oveshatema chentše bonjamna, y chata nyetscangbiana chë bëts pueblentše ndayétsnaca adoránata bonjëtsemna. <sup>23</sup> Chë bëts pueblentše ndoñe quenjatsiyta shinÿe o juashcona chaotsebinÿnaye, er Bëngbe Bëtsabe buashinÿinÿanana chentše enjétsbinÿnaye, y chë Oveshatembe buashinÿinÿanana mo uajuinÿanëshacá enjamna chë bëts pueblama. <sup>24</sup> Chentsa binÿnayánaca, entšanga nyetsca mándayëngbentše mochantsiyena, y quem luarentša mandadënga chëngbe uámana y bëts soyënga chë bëts pueblöye mochanjiyëbo. <sup>25</sup> Chë bëts pueblentša bëshashangá ndocna te quemochtëtatame, y chentše ndocna ora ibeta queochátsmëna. <sup>26</sup> Chë bëts pueblöye mochanjiyëbo chë nyetsca luarënguentsá entšangbe uámana y bëts soyënga, y chë nyetsca luarënguentsá entšangbeñe bëtsëtsanga y uámanënga iuabi-  
amná soyëngnaca. <sup>27</sup> Pero ndocna te queochatómashëngo ndayánaca, y chë soye chaotsama entšanga ndoñe tsábenga chamotsemnama Bëngbe Bëtsá jadórama; ni ndocná queochátamashëngo, Bëngbe Bëtsabiana nÿa tondayama ogustana soyënga amá o inÿengbioye jáingñama soyënga amá. Choye mochanjámashjna nÿe chë ndëmuanÿengbe uabaina yojtsábemana chë Oveshatembe librësañe, chë nyetsca tescama tsabe vida mochjónÿenëngbe uabaina uábemanentše.

## 22

1 Chë ángel šonjaninÿinÿé chë enjanobějna bėjaye vida bomniye. Chë búyeshe enjamna ndëtsenguïye y tëshínÿniye mo cristalca. Enjanóbocana chë Bëngbe Bëtsá y chë Oveshatembe uámana puestocana, <sup>2</sup> y chë más bëts tsashená tsëntsajana enjanobějna. Chë fshajayentša catoïca lado enjanójuajna betiyeshënga chë nÿetsca tescama yomna tšabe vida jtsebomnama, canÿe uatiñe bnëtsana uta soye jashájonana, canÿe cada shinÿe; chë betiyeshentša tsbuanáchënga josérviana nÿetsca mándayëngbentša entsanga jáshnama. <sup>3</sup> Choca ndocna soye queochátsmëna chë ndayama Bëngbe Bëtsá tojayana ndoñe tšabá yondmëna ca, y ndaye bacna soye japásama chaotsemna soye. Chë Bëngbe Bëtsá y chë Oveshatembe uámana puesto chë bëts pueblentše echántsemna, y chatbe oservénënga mochántadorana. <sup>4</sup> Chënga mochanjinÿe Bëngbe Bëtsabe jubíá, y chabe uabaina chëngbe juentsaca mochantsambaye. <sup>5</sup> Chentše ndocna ora ibeta queochátsmëna, y chentša oyenënga ndoñe queochátëjamoto canÿe uajuinÿanësha o shinÿe chaotsebínÿnaye, er Bëngbe Bëtsá Bëngbe Utabnabe buashinÿinÿanana chëngbiama echantsebínÿnaye, y chënga mochántsemna mo reyëngcá uámanënga, y Bëngbe Bëtsáftaca nÿetsca tescama mochántsemmandaye.

### *Jesucristo jésabama entsobeco*

<sup>6</sup> Chentšana chë ángel šonjaniyana: “Quem palabrenga endmëna ntšamo ndegombre yomncá, y nÿetscanga mondobena chiñe corente jtšoşbuáchiyana. Bëngbe Utabná, cach Bëngbe Bëtsá, nda endbama chabe juabna oyebuambnayënga, chëngbe ainaniñe osertánana y añemo chamotsebomnama jóyebuambayama, chabe ángel tbojichmó chabe oservénëngbioye jinÿanÿiyama ndayá betscó yojtsemna jopásama ca.”

<sup>7</sup> Chora Jesús tonjánayana: “Mouena. ¡Atše cachiñe betscó chanjésabo! Oyejuayá nda quem buayenana soyënga, ntšamo ndegombre jopásama, chë Bëngbe Bëtsabe juábnaca oyebuambana soye tojoyeuná, chë ndayama quem librësañe entsábemana ca.”

<sup>8</sup> Atše Juan, chë soyënga sënjanuena y sënjaninÿe. Y chca sënjanuena y sënjaninÿentšana, chë chca šonjaninÿinÿé ángelbe delante atše sënjanoshamentšé, cha jadórama. <sup>9</sup> Pero cha šonjaniyana: “Ndoñe, átšeftaca ndoñe chca mátamana, er atše canÿe Bëngbe Bëtsabe oservená sëndmëna, ntšamo aca condmëncá, y ntšamo chë Crístbeyeca acbe catsátanga, chë Bëngbe Bëtsabe juabna oyebuambnayënga y nÿetscanga chë ndayá quem librësañe endayanama tmojóyeunanga mondmëncá. Aca cmontsemna Bëngbe Bëtsá jadórama ca.”

<sup>10</sup> Chora mëntšánaca šonjaniyana: “Ndoñe mo iytëmencá catjáboshjona ndayá quem librësañe entsabemancá, chë ndegombre jochnënguama soyënga, er chca jopásama chë tempo ya entsobeco. <sup>11</sup> Cachcá monÿá chë bacna entsá bacna soyënga chaotsama; chë puerte bacna soyënguiñe jtšiyenama boşá, cachca soyënga chaotsama; pero chë tšábiana ntšamo tšabá yomncá chaotsama, y chë Bëngbe Bëtsabe entsá, nÿets tempo nÿets ainánaca chábioye chabotseserverna ca” —cha šonjaniyana.

<sup>12</sup> Chora Jesús cachiñe tonjánayana: “Mouena. Atše quem luaroye betscó chanjésabo, y átšeftaca chanjiyëbo chë uacanana soye, y cada ona tšëngaftanguentšábioye chanjoiye ndayá tojamama ntšamo tbojtsomerecencá. <sup>13</sup> Atše sëndmëna chë nÿetsca soyënga bojatsayá y pochocayá, chë natsaná y ustonoyá, chë ndábeyeca y ndabiama lempe yomna ca” —šonjaniyana.

<sup>14</sup> Oyejuayënga chë bacna soyëngama perdonánënga imojtsemnënga, mo chënga chëngbe entsayá botamana cuaftsaboshabecá. Chca chënga mochantsobena chë nÿetsca tescama yomna tšabe vida jtsebomnama uacanánana jashjáchama, mo chë nÿetsca tescama yomna tšabe vida jtsebomnama betiyeshentšana cuaftsescá, y mochanjobenaye chë tsëm bëts puebloye bësásajana tšabá jamashjnama. <sup>15</sup> Pero ndoñe quemochatobenaye jamashjnana chë ba ndoñe tšabe juabnënga ainaniñe bomnënga, chë bocjuanënga, chë shembása o boyabásaftaca bacna soye amënga, chë ínÿenga obánayënga,



chë soyënga adórayënga diosënga yomna ca jtsejuabnayëse, y nyetscanga chë bostero soyënga ogusetánënga y chca jtsamëse oyenënga.

<sup>16</sup> Chora Jesús cachiñe tonjánayana: “Atše Jesús, atšbe ángel tijichmó chë ntšamo atše sëntsejuabnacá ndayenache ošbuachiyëngcá enefjuanëngbioye lempe chámabuayenama. Atše sëndmëna chë Rey Davídbentšana Entšá. Atše sëndmëna mo chë bínyanoye puerte bínynaye estrellcá ca.”

<sup>17</sup> Chë Uámana Espíritu y chë Oveshatembe shema bondbétsichamo: “¡Mabo ca!” Y nda chca chaojouená cháuyayana: “¡Mabo ca!” Y mo nda tša uajuendayana tojtsebomna, tojabo y bëtscá béjaye cuafjofšecá, cachcá nda tša tojtseboše Jesusbe soyënga jtsebomnama, chábioye chaobeconá y cha echanjama chë soyënga cha chaotsebomnama y chë nyetsca tescama yomna tšabe vídnaca, chca jtsebomnama tondaye ntsotjañcá.

<sup>18</sup> Nyetscanga ntšamo quem librëšañe entsabemancá, chë ndegombre echanjopásama chamojouenëngbioye šcuabuayená. Nderado nda chë soyëngama más chaojaboté, Bëngbe Bëtsá echanjama cha chaosufrí chë quem librëšañe entsábemana pochócaye soyënga. <sup>19</sup> Y nderado nda ntšamo quem librëšañe entsabemancá, chë ndegombre echanjopásama soyënguiñe ndayánaca tojajuaná, Bëngbe Bëtsá chábioye bochantsebojuána ntšamo chabiamama yomncá chë nyetsca tescama yomna tšabe vida jtsebomnama betiyeshentšana y chë tsëm bëtš pueblentšana, chë ndayama quem librëšañe entsábemana.

<sup>20</sup> Quem soyënga oyebuambnayá, chë lempe ndegombre echantsemnama tonjayaná, atše, Jesús sëntsichamo: “Aíñe, betšco chanjésabo ca.”

Chca chaotsemna. ¡Cochjabo, Bëngbe Utabná Jesús!

<sup>21</sup> Bëngbe Utabná Jesús chaoma tšabe bendicionënga tšëngaftangbeñe chaotsemnama.